


Taroha Goro mana
Ususu Maea



The New Testament in the Arosi language of the Solomon
Islands

Taroha Goro mana Usuuu Maea
The New Testament in the Arosi language of the Solomon Islands
Niu Testament long langguis Arosi

copyright © 2005 Wycliffe Bible Translators, Inc.

Language: Arosi

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-09

PDF generated using Haiola and XeLaTeX on 18 Apr 2025 from source files dated 13 Dec 2023
444a3934-0a25-5ce9-b53e-5049851eb3b5

Contents

St. Matiu	1
St. Mak	66
St. Luk	107
St. Jon	177
Buka Tatau'aro	225
Rom	282
1 Korin	311
2 Korin	338
Galesia	356
Efesas	365
Pilipae	374
Kolosae	381
1 Tesalonaeka	388
2 Tesalonaeka	394
1 Timoti	398
2 Timoti	407
Taetas	413
Pilimon	417
Hibru	419
Jems	441
1 Pita	448
2 Pita	456
1 Jon	461
2 Jon	468
3 Jon	470
Jiud	472
Buka Ha'ata'i	475
Diksonari	503
Topical Index	507

Na Taroha Goro 'Onaai Usua Ana St. Matiu

Gere Mamaani 'Iniai Bukani

'A 'ua? Tara'i 'oha 'o arungana do'ia God 'a agoheta'i hadahada tarai'o? 'A he'ua i 'iraraa amuai taha na 'ia God 'a rabasia do'oi haua 'anai ha'a-wa'ewa'ea?

Naasi ta'i mareho na 'iraau saeni Jiu na'i madoraana Jisas rau 'adoma'inia do'a to'iraau. Na'i 'ohasi, 'e hai 'arangi harisi murinai hadahada ana God tanaraau beiai rarabea Malakae. Rau to'oraai Usu-usu Maea ana God beiraau, ma 'e ta'i mareho nagu taritari'a 'inia, rau ai'a raba araisuria. Tabu'a na 'ia God naagu ai'a ha-hadahada tarairaau'a 'inia.

Na'i madoraasi, ni gaumani na'i Rom 'a marungiraau Jiu mana ano na 'ia God na duruduru tanaraau 'inia. Rau 'adoma'inia do 'iia 'ai ha'ataaria mai ta mwaeraha hehei'oi 'anai ha'a-hura'ahiraau baaniai heimarungi 'anai gaumani anai Rom.

Na'i 'oha na 'ia Jisas 'a boi na'i marewana 'a ha'a-arotaha'i taha na 'iraau rarabea ra 'unu'i 'abaiai Ha'atahi. Ma'ata rei'uaa na o'asi, 'a rago i saeni Jiu narau ai'a hinihinia do 'iia naasi nai ha'atahiraau. Rau ai'a raba hinihini'i ma'ua araisuri'i taha na 'ia Jisas na maani'i tanaraau.

Tara'i 'oha 'ia God 'a mamarota'i hadahada tanagia na'i 'oha na 'iia 'a bwane 'unu'i tanagiai taha 'anai haa'i ma mamasigaau do gai araisuria. Naasi na'i 'oha na 'oi 'oha'iniai Taroha Goro ana St. Matiu, 'oi rongorongo 'iniai taha na 'ia God nai 'unua tana'o.

Mamaani 'Iniai Burungana Jisas Kraest (Luk 3:23-38)

¹ Naani mamaani 'iniai burungana Jisas Kraest na huta mai baaniai burungana Deved mea Ebrahim.

² 'Ia Ebrahim naasi amana Aisak,

'ia Aisak amana Jekop,

'ia Jekop amana Jiuda miraau do'orana'i,

³ 'ia Jiuda amana Peres mia Sira (inadarua 'ia Tama).

'Ia Peres amana Hesron,

'ia Hesron amana Ram,

⁴ 'ia Ram amana Aminadab,

'ia Aminadab amana Nason,

'ia Nason amana Salmon,

⁵ 'ia Salmon amana Boas ('ia Rehab naasi inana).

'Ia Boas amana Obed (inana 'ia Rut),

'ia Obed amana Jesi,

⁶ 'ia Jesi amana Mwaeraha Deved.

'Ia Deved amana Solomon (inana 'ia Batsiba, nararu hai'wai ga'u a Uraea).

⁷ 'Ia Solomon amana Rehobom,

'ia Rehobom amana Abaeja,

'ia Abaeja amana 'Asa,

⁸ 'ia 'Asa amana Jehosofat,

'ia Jehosofat amana Joram,

'ia Joram amana Usaea,

⁹ 'ia Usaea amana Jotam,

'ia Jotam amana Ehas,
 'ia Ehas amana Hesikaea,
 10 'ia Hesikaea amana Manase,
 'ia Manase amana Amon,
 'ia Amon amana Josaea,
 11 'ia Josaea amana Jekonaea miraau do'orana'i. Rau huta gaarangiai madoraa ra wairaau Israel 'ari na'i Babilon 'anai ha'i slev 'iniraa.
 12 Na'i murinai wairaau ada i Israel 'ari Babilon 'ia Jekonaea amana Saltiel,
 'ia Saltiel amana Serababel,
 13 'ia Serababel amana Abiud,
 'ia Abiud amana Elaeakim,
 'ia Elaeakim amana Aso,
 14 'ia Aso amana Sadok,
 'ia Sadok amana Akim,
 'ia Akim amana Eliud,
 15 'ia Eliud amana Eleasa,
 'ia Eleasa amana Matan,
 'ia Matan amana Jekop,
 16 'ia Jekop amana Josep, mwane ana Meri. 'Ia Meri inana Jisas nara 'unua 'inia Ha'atahi.

17 'E ta'i tangahuru mana hai ugui inoni tahamora beia Ebrahim tari beia Deved, ma'e ta'i tangahuru mana hai ro'u tahamora beia Deved tari madoraa ra wairaau Israel 'ari Babilon. Mana tahamora na'i 'ohasi tari 'oha na huta i Ha'atahi 'e ta'i tangahuru mana hai ugui inoni ro'u.

*Huta Ana Mai a Jisas Kraest
 (Luk 2:1-7)*

18 Naani mamaani 'inia huta ana mai a Jisas Kraest. 'Ia Meri inana Jisas, ra durua tanaa i mwane na atana 'ia Josep. Na'i na'o ma rarugu ha'iwai, ra sadoia do'a to'ora 'inia mena anai Hi'ona Maea.

19 'Ia Josep nara duruduru tanaa 'anai waina Meri, 'e sae odo-odo. 'A 'adoma'inia do'ai horosiai duruduru ana ma ai'a raba haua beiai rongo raha, 'inia 'a ai'a raba ha'animaia Meri na'i maadaui noni.

20 Na'i 'oha na wai'ado'ado mau suriai mahosi, 'e enjel ana God 'a ha'ata'i tanaa na'i mauru'aa. 'A o'ani 'inia, "Josep baaniai burungana Deved, 'oi abui ha'ata'ai 'adoma'imu 'anai waina Meri. 'Inia ni rurua na haua 'inia gare, 'a to'o 'inia mena anai Hi'ona Maea.

21 Mana'i 'oha nai huta mai garesi, 'oi ha'a-atana 'inia Jisas,* 'inia 'iia 'ai ruhasiraaui sae ana'i baani'i ora-ora'a adaa'i."

22 Naasi duruduru ana God 'a to'o ha'a-momori'a 'onaai taha na ha'ateenga'inia Araha God na'i ngoonai rarabea o'ani,

23 "E gere urao na ai'a mauru goni mau beia ta mwane nai rurua, ma'ai ha'ahutaa ta gare mwane marai 'unua 'inia Imanuel. Ni 'ado'ado 'anai ata naasi, 'ia God 'a awa beigia."†

24 'Oha 'ia Josep 'a rarai baaniai mauru, 'a haua 'onaai 'unua anai enjel ana Araha God. 'A waina Meri,

25 ma'ata 'a ai'a mauru goni beia tari 'oha na ha'ahutaa i gare mwane ana. Mia Josep 'a ha'a-atana 'inia Jisas.

* **1:21 Jisas:** Ni 'ado'ado 'anai Jisas naasi "'Ia God 'ai ruhasigia." † **1:23** 1:23 Aisaea 7:14; 8:8; 8:10

2

Traau Sae Madoma Baaniai Dora

Na Ara'a Iei Sina

¹ 'Ia Jisas 'a huta na'i Betlehem, 'e 'omaa na'i Provensi Jiudea 'oha na mwaeraha Herod. Ai'a orema mau ma ra'i sae madoma ra boi baaniai dora na ara'a iei sina ra ada na'i Jerusalem

² mara heisonga'i o'ani, "Na'i hei na huta iei mwaeraha adaui Jiu? Meu re'iai hee'u na'i dora na ara'a iei sina na ha'ata'iniai huta ana, mameu boi 'anai ha'arahesia."

³ Na'i 'oha 'ia Herod 'a rongoa o'asi, 'a ta'aa di'u i 'adoma'ina, beiraaui ro'u hakoi sae na'i Jerusalem.

⁴ Ma 'unu goniraaui mai Na'ohadaa'i Piriisi mana Ha'ausuri 'anai Ringe ana'ia Moses maagu songa'iniraaui o'ani, "Na'i hei nai huta iei Ha'atahi?"

⁵ Miraaui o'ani, "Na'i Betlehem na'i Provensi Jiudea. 'Inia naasi maho na 'ia God na 'unua na'i ngoonai Rarabea o'ani,

⁶ 'Betlehem, 'o ororiu di'u na'i Jiudea,

'inia baani'o nai hura'a mai mwaeraha

nai marungiraaui noni agu'i, 'iraaui Israel.' **

⁷ Mia Herod 'a 'unuraaui girugiru moi sae madoma magu songa'iniraaui 'iniai 'oha he'ua narau tahamora re'iai hee'u.

⁸ 'A o'ani 'iniraaui maagu ha'a-taariraaui wou, "Moi 'ari Betlehem mamoi sibaniai garesi. 'Oha moi sadoia, moi aho'i mai 'ini 'anai ha'arangasia tanaau mawaigu 'ari ro'u wou 'anai ha'arahesia."

⁹ Marau 'ari, rau re'ia ro'u mau ta'i hee'u narau re'ia ga'u ani, 'a na'otaradaau. 'Agu papaku na'i ahoranai dora na awa iei gare.

¹⁰ Rau wa'ewa'e raha di'u 'oha rau re'iai hee'u.

¹¹ Rau siri ruma marau re'iai gare beia inana 'ia Meri. Rau topira'i ruru marau ha'arahesia. Rau rahi'i hura'a i bane adaa'i marau banea tanaa i gol mana rua mareho si'ini goro nara 'unua 'inia franginsens mana myrrh.

¹² Na'i muri, 'ia God 'a ha'abasuraaui na'i mauru do rai abu aho'i 'ari beia Herod. Miraaui aho'i wou na'i 'omaa adaaui na'i tara he'ete'i.

Ta Josep Mia Meri Raru Hora

Beiai Gare 'Ari Ijip

¹³ Murinai aho'i adaui sae madoma, 'e enjel ana Araha God 'a ha'amaranga tanaa Josep na'i mauru. 'A o'ani 'inia, "Josep, 'oi rarai ma'oi waiai gare mia inana mamoi hora 'ari Ijip, 'inia Herod 'ai sibaniai gare 'anai ha'amaesia. Moi awa 'isi tari 'oha wai 'unua tana'o do moi aho'i mai 'ini."

¹⁴ Mia Josep 'a rarai ma waiai gare mia inana na'i rodosi marau hano 'anai Ijip.

¹⁵ Rau awa 'isi tari 'oha na mae a Herod. Rau hua o'asi 'anai ha'ato'oa ha'a-momori taha na 'unua Araha God na'i ngoonai Rarabea o'ani, "Au 'unua hura'a i gare agua baaniai Ijip."†

Ra Ngahu Ha'amaesiraaui

Mwani Garemwane

¹⁶ 'Oha 'ia Herod 'a sadoia do 'iraaui sae madoma rau pwari'ia'a, 'a taesu'a di'u i ahuna, ma atenga'inia dorai ngahu ha'amaesi'i hako mwane garemwane na'i Betlehem, taraawa'a na'i rua harisi ma dio, mana garemwane suri'i ro'u i 'omaa gaarangi'ai Betlehem. 'Ia Herod 'a hua o'asi

* 2:6 2:6 Maeka 5:2 † 2:15 2:15 Hosea 11:1

suria 'iraaui sae madoma rau 'unua do 'e rua harisi na bwane hako murinai ha'ata'i na haa i hee'usi.

¹⁷ Na'i 'oha na haua o'asi a Herod, 'a to'o ha'a-momori'a i taha na 'unua Rarabea Jeremaea na o'ani,

¹⁸ "E angi uru-uru ra rongoa na'i 'omaai Ramaa. 'Ia Resel 'a angisiraaui gare ana'i ma ai'a 'irisia dorai ha'a-aroahuna, 'inia 'iraaui gare ana'i ra mae'a." ‡

Ra Waia Aho'i a Jisas Baaniai Ijip

'Ari Nasaret

¹⁹ Murinai mae ana Herod, 'e enjel ana Araha God 'a ha'ata'i tanaa Josep na'i mauru na'i Ijip.

²⁰ 'A o'ani 'inia, "'Oi rarai ma'oi waiai gare mia inana mamoi aho'i 'ari Israel. 'Inia 'iraaui nei ra sibania 'anai ha'amaesia ra mae'a."

²¹ Mia Josep 'a rarai ma waiai gare mia inana marau aho'i 'ari Israel.

²² Na'i 'oha na 'ia Josep 'a rongoa do 'ia Akeleas 'a mwaeraha orisia amana 'ia Herod na'i Provensi Jiudea, 'a mamaa'uta'i aho'i 'ari Jiudea. Mana nata maho na 'omesia ro'u na'i nata mauru, ra 'unua wetewete tanaa do'ai 'ari Provensi Galili.

²³ Naasi rau 'ari marau awa na'i Nasaret ma ha'a-momori'a i taha nara 'unua i Rarabea o'ani, "Rai 'unua 'inia ai Nasaret."

3

Heitaroha'i Ana Jon Bwareomaea

(Mak 1:1-8; Luk 3:1-18; Jon 1:19-28)

¹ Muridi tara'i harisi ra hako, 'ia Jon Bwareomaea 'a taraawa'a taroha'inia hura'ai ha'atee ana God na'i dora mangasara na'i Provensi Jiudea.

² 'A o'ani, "Moi rihosi baani'i ora-ora'a amoo'i, 'inia ni madoraa na 'ia God 'ai marungiraaui noni ana'i 'a gaarangi'a."

³ 'Ia Jon naasia mo'o na 'ia rarabea Aisaea 'a ha'ateenga'inia mau mai o'ani na'i 'oha bwani,

"E nei nai totoro hura'a na'i dora mangasara. 'Ai ha'atee o'ani, 'Moi ha'aagau! 'Ia Araha 'a gaarangi boi'a. Moi ha'a-odoodoi tara tanaa.' "*"

⁴ 'Ia Jon 'a awa 'onaai huunai rarabea. 'A ho'owa'a 'ini'i bwana ra tau'arodi 'ini'i warihui kamel, ma rorowa'a 'inia rorowa'a nara tau'arona 'inia uri-uri mwamwaa mana mahoingau ana'i naasi ngabo mana modi'o ni hasimou.

⁵ 'Iraau saenai Jerusalem, ma ra'i sae baaniai Provensi Jiudea mana 'omaa gaarangi'ai wai rahai Jodan rau boi beia Jon

⁶ 'anai ha'arangasi'i ora-ora'a adaa'i ma bwareomaeeraau na'i wai Jodan.

⁷ Na'i 'oha 'ia Jon 'a re'iraaui Farisei miraaui Sadiusi rau boi beia 'anai bwareomaeeraau, 'a o'ani 'iniraaui, "'I'amou mwane mwaa ta'a'i! 'A 'ua? Mou 'adoma'inia doni bwareomaea moi nai 'a'auhi'amou 'anai bainihu baaniai ha'a-mama'ai na 'ia God 'ai ha'ataaria mai?"

⁸ 'Onaa namou raba bwareomaea mamoi nugasi'i barongamoo'i nara ta'a'i, mamoi hau'i mareho goro nai ha'ata'inia domou rihosi baani'i ora-ora'a amoo'i.

⁹ Mou gasigu 'adoma'inia do'ia God 'a bwa'i ha'a-mama'ai'amou do 'inia huta amooi mai 'onaai warowarona'i a Ebrahim. 'Inau wai 'unua tana'amou, 'ia God 'a matai ha'a-aho'ita'ini'i hau 'ini, marai ha'i warowarona'i a Ebrahim.

‡ 2:18 2:18 Jeremaea 31:15 * 3:3 3:3 Aisaea 40:3

¹⁰ 'Ia God 'a ha'aagau'a 'anai ha'a-mama'airaau nei nara ai'a 'adoma'i orisi. 'A 'onaai nei na ha'aagau 'anai arai'i dioi mwane hasi'ei. 'Onaa nara bwa'i hungu 'ini'i hua goro, 'ai ara dio suri'i raridi mai gaasi'i ara'ai 'eu 'anai suu gata'ini'i.

¹¹ "'Inau 'au bwareomaea'amou 'inia moi wai 'anai ha'ata'inia domou orisi. 'Ia mo'o nai boi murigu 'ai bwareomaea'amou 'iniai Hi'ona Maea mana 'eu. 'Iia 'a ororiu di'uau. 'Inau ai'a arari 'anai daa'i tanaa i sandol ana'i 'onaai sae tatau'aro ana.

¹² 'Iia 'a ha'aagau 'anai hoairaau noni goro baaniraau nei ta'a'i, 'onaai nei na hoai'i koradi wiit ana'i baani'i kahokahodi. 'Iia 'ai nugaraau noni goro na'i dora goro, ma'ai ha'a-mama'airaau noni ta'a'i, 'onaai nei na nuga ha'agorohi'i koradi wiit ana'i na'i dora 'ada'i mana kahokahodi 'a suu gata'ini'i na'i 'eu na bwarai kuru."

'Ia Jon 'A Bwareomaea Jisas
(Mak 1:9-11; Luk 3:21-22)

¹³ Mia Jisas 'a hano baaniai Galili ma 'ari wai Jordan do'ia Jon 'ai bwareomaeaa na'iei.

¹⁴ 'Ia Jon 'a ai'a 'irisia o'asi ma o'ani, "Ni 'uaana na'ogu boi beiau 'inia 'anai bwareomaea? I'oe na'o ga'i bwareomaeau!"

¹⁵ Mia Jisas 'a o'ani 'inia, "Nugaa mai 'onaai 'unua agua. 'Igaraa garai haua ma'ata i hei'irisina God." Naasi mia Jon 'agu bwareomaeaa Jisas.

¹⁶ Na'i 'oha na 'ia Jisas 'a ara'a baaniai wai, i aro 'a heihoa ma 'omesiai Hi'ona Maea ana God 'a dio na'i hungana 'onaai waibora.

¹⁷ Ma'e ringe na ao mai baaniai aro 'a o'ani, "Naani gare agua nau ta'ahia ororiu mau ahugoro 'inia."

4

'Ia Saetan 'A Ohongia Jisas
(Mak 1:12-13; Luk 4:1-13)

¹ Mana Hi'ona Maea 'a waia Jisas 'ari dora mangasara do'ia Saetan 'ai ohongia.

² 'Ia Jisas 'a ai'a ngau suriai hai tangahurui dangi mana hai tangahurui rodo magu hioro.

³ Mia Saetan 'a boi beia ma o'ani 'inia, "'Onaa i'oe garena God, 'oi ha'atee tana'i hau 'ini marai aho'ita'i bredi."

⁴ Mia Jisas 'a o'ani 'inia, "Na'i Usu-usu Maea ra usu o'ani, 'I sae 'a bwa'i tahi moi 'iniai huai bredi, ma'ata 'inia ro'u i ha'atee ana God.' " *"

⁵ Mia Saetan 'a waia Jisas 'ari Jerusalem, 'i 'omaa nara 'unua ro'u 'iniai 'omaa maea. 'A ha'a-urasia na'i dora ahaaha na'i hunganai Ruma Maea ana God

⁶ ma o'ani 'inia, "'Onaa i'oe garena God 'oi rege auru, 'inia ra usua na'i Usu-usu Maea o'ani, 'Ia God 'ai ha'a-taariraau enjel ana'i 'anai 'a'auhi'o. Rai dau bwarasi'o 'ini'i rimadaa'i mana uwamu'i ra bwa'i maara 'ini'i hau.' " †

⁷ Mia Jisas 'a aramia o'ani, "Mana Usu-usu Maea 'a 'unua ro'u o'ani, 'Moi abui ha'imaania Araha God amou.' " ‡

⁸ Mia Saetan 'a waia Jisas ara'a na'i hunganai hungahunga ahaaha ma ha'ata'ini'i tanaai mwani kantri hako na'i marewana mana toto'ora adaa'i,

⁹ ma o'ani 'inia, "Wai haa'i hako tana'o i mwane mareho 'ini 'onaa 'oi topira'i ruru tanaau ma'oi ha'arahesiau."

* 4:4 4:4 Diutronomi 8:3 † 4:6 4:6 Psalm 91:11-12 ‡ 4:7 4:7 Diutronomi 6:16

10 Mia Jisas 'a o'ani, "Ariwou baaniau Saetan! Ra usua na'i Usu-usu Maea o'ani, 'Moi ha'arahesia moi Araha God amouu, me 'iia moi namoi tau'aro tanaa.' "§

11 Mia Saetan 'a 'arita'inia Jisas miraaui enjel rau boi marau 'a'auhia.

*'Ia Jisas 'A Taraawa'a Hauai Tau'aro Ana
(Mak 1:14-15; Luk 4:14-15)*

12 Na'i 'oha na 'ia Jisas 'a rongoa do'ia Jon 'a awa na'i rumaniho'o, 'a aho'i 'ari Provensi Galili.

13 Ma'ata 'a ai'a awa na'i Nasaret, 'a 'ari na awa na'i Kapaniam na'i bobonai kae bwera i Galili, na'i dorai ano anai burungana Sebiulan mea Naftali.

14 'A hua o'asi ma to'o ha'a-momori'a i taha na 'unua Rarabea Aisaea o'ani,

15 "A ragoi nei nara ai'a Jiu narau awa na'i Galili,
na'i dora nara 'unua ro'u 'inia ano ana Sebiulan mea Naftali
na'i gaarngiai kae bwera i Galili mana'i nata batarau 'inia wai Jodan.

16 'Iraaui sae 'isi rau awa na'i kuhi,

ma'ata ra re'ia'a i bewaa.

Rau awa na'i mamaru ni mae,

ma'ata i bewaa 'ai bewaasiraaui."*

17 Mia Jisas 'a taraawa'a ha'ausuriraaui sae. 'A o'ani, "Moi rihosi, na heimarungi ana God na awa na'i aro, 'a gaarangi'a!"

*'Ia Jisas 'A Soiai Hai Sae Ahuahuasi
(Mak 1:16-20; Luk 5:1-11)*

18 Na'i 'oha 'ia Jisas 'a hahano na'i bobonai kae bwera i Galili, 'a 'omesiai rua ha'ido'orada, 'ia Saemon, nata ata 'ia Pita, mia Andru. Na'i 'ohasi, raru ahuasi 'inia hu'o, suria 'iraruasi ra'i sae ahu-ahuasi.

19 Mia Jisas 'a o'ani, "Murui suriau! 'Onaai rau'i amuru'i ii'a na'i wai, 'a o'asi ro'u, wai ha'ausuri'amurua 'anai wai'i mai sae beiau."

20 Na'i mau 'ohasi, raru nugasi'i hu'o adaru'i ma raru suria.

21 Mia Jisas 'a 'ariwou ma re'ia Jems mia Jon na'i ora beia amadarua 'ia Sebedi. Rau orima'ini'i hu'o adaa'i ma o'ani 'inirarua, "Murui suriau."

22 Mararu 'arita'iniai amadarua beiai ora mararu hano beia Jisas.

*Ni Tau'aro Ana Jisas Na'i Galili
(Luk 6:17-19)*

23 'Ia Jisas 'a 'ari suri'i 'omaa na'i Galili ma ha'ausurirai sae suri'i rumani ha'arahesi adaa'i Jiu. 'A taroha'inia tanaraaui taroha goro 'inia heimarungi ana God na awa na'i aro, ma ha'agorohiraaui aho'i nei na to'iraaui i mwane daoha he'ete'i hairiu.

24 I tarohana 'a 'adarara 'ari suriai mwane dora na'i Galili, tari 'ari na'i Provensi Siria. 'Iraaui sae na to'iraaui i mwane daoha he'ete'i hairiu ma'ua ra rongomaata'i di'u, ra wairaaui mai tanaa. Tara'i sae ra bwaunira i adaro, ma tara'i sae ra manumanu'a, ma tara'i sae ra mae hako'i uwadi. Ma'ata 'ia Jisas 'a ha'agorohiraaui hako aho'i.

25 'E kae ruruha narau hano suria Jisas baani'i mwane dora he'ete'i hairiu. Tara'i nei baaniai Galili, mana'i Dekapolis, na'i Jerusalem mei Jiudea mana'i nata batarau wai rahai Jodan.

5

'Ia Jisas 'A Ha'ausuriraaui Rongoiusuri

Na'i Hungahunga
(Luk 6:20-23)

¹ 'Oha 'ia Jisas 'a re'iai rago di'u adaui sae nara hano suria, 'a hane ara'a na'i gere hungahunga ma heinagu auru. 'Iraui rongoiusuri ana'i rau heinagu garigaria

² ma ha'ausuriraau o'ani,

³ "'Ia God 'ai ha'agorohiraau nei ra 'u'uria suri'i mwani maho 'onaai sae na pohara.

'Iraau rai awa na'i bahainai heimarungi ana God na awa na'i aro.

⁴ 'Ia God 'ai ha'agorohiraau nei ra ahutotou.

'Ia God 'ai ha'a-aro'i ahudaa'i.

⁵ 'Ia God 'ai ha'agorohiraau nei ra awa manego.

Rai daa'i mwani mareho goro na duruduru 'inia God.

⁶ 'Ia God 'ai ha'agorohiraau nei nara huunai raba awa odo-odo na'i maana, 'inia 'ia God 'ai hua tanaraau i taha nara 'irisiasi.

⁷ 'Ia God 'ai ha'agorohiraau nei rau ahu ta'ahira i nei nara awa ha-ha'aroha'a,

'inia 'ia God 'ai ahu ta'ahiraau ro'u.

⁸ 'Ia God 'ai ha'agorohiraau nei na tahingadaa'i ra odo-odo,

'inia rai re'ia God.

⁹ 'Ia God 'ai ha'agorohiraau nei nara ha'a-hagugoniraau goro i noni.

'Ia God 'ai 'unuraau 'ini'i gare ana'i.

¹⁰ 'Ia God 'ai ha'agorohiraau nei ra nora ta'airaau 'inia hua adaui taha na 'irisia God.

'Iraau rai awa na'i bahainai heimarungi ana God na awa na'i aro.

¹¹ "'Ia God 'ai ha'agorohi'amou na'i 'oha ra ha'atee ha'a-ta'ai'amou, mara nora ta'ai'amou mara 'unu'i mwane maho pwari'i 'ini'amou, suria 'i'amou ra'i rongoiusuri agu'i.

¹² 'Oha na o'asi, moi abui ahutotou, ma'ata moi wa'ewa'e, 'inia 'e heitahari na raha na 'ia God 'a ha'aagau mamasi'amou 'inia na'i aro. Mamoi abui kaku'aa do ra bwane nora ta'airaau o'asi'a ro'u i rarabea na'i 'ohabwani."

Solt Mana Marewa
(Mak 9:50; Luk 14:34-35)

¹³ "'I'amou mou 'onaai solt tanaraau inoni nai marewana. 'Onaa i solt 'agu bwa'i ngau asi'a'a, 'agu bwa'i here'a ro'u naraigui hua 'anai ha'a-asi'aa aho'i ro'u! 'A goro dorai rasaha'inia hura'a i 'omaa marai buu hunia.

¹⁴ "'I'amou mou 'onaai raita na bewasiraau inoni nai marewana na 'iraau hako i sae ra re'ia 'onaai 'omaa nara tau'arona na'i hunganai hungahunga.

¹⁵ Bwa'i sae nai suungiai raita maigui nugaa na'i bahainai rabo'o. 'Ai nugaa ma'ata na'i dora 'ana mai marewasiraau hakoi sae na'i raronai ruma.

¹⁶ 'A o'asi ro'u, moi abui giru'i baaniraau noni here goro namou haa'i. Ma'ata moi ha'ata'ini'i hura'a 'onaai marewa marai re'i'i marai ha'aneanea Amamoou ara'ai aro 'inia."

Ringe Ana'ia Moses

¹⁷ "Moi abui 'adoma'inia do 'inau 'au boi 'anai ha'a-ai'a'i Ringe ana'ia Moses mana ha'ausuringa'i adaa'i Rarabea. 'Au boi 'anai ha'ato'o'i huunai 'ado'ado 'ada'i.

¹⁸ Aro mana ano 'ai anoro ma bwa'i ta gere dora na'i Ringe ana'ia Moses nai ai'aa. Mwane maho nara usu'i na'iei rai to'o hako.

¹⁹ 'Onaa 'oi raesia ta gere dora na'i Ringe ana'ia Moses ma'oi ha'ausuriraau ro'u tara'i nei 'anai hua 'onaai hua amua, 'o bwa'i ororiu moe'a na'i hourana ni aro. Ma 'onaa 'oi ha'isuri'i hako ma'oi ha'ausuriraau

sae 'anai haua 'onaai haua amua, 'ia God 'ai ha'a-ororiu'o na'i hourana ni aro.

20 'Iraaui Farisei miraaui Ha'ausuri 'anai Ringe rau 'adoma'inia dorau odo-odo na'i maana God 'inia suri'i adaa'i Ringe ana'ia Moses. Me 'onaa mou bwa'i odo-odo di'u baanirau, mou bwa'i siri mwada'u na'i hourana ni aro."

Ha'ausuringa'i 'Abaii Taesu'a

21 Mia Jisas 'a o'ani ro'u, "'T'amou mou bwane 'iraraai Ringe ana Moses na o'ani, 'Abui heingahu,* 'inia 'ia mo'o nai heingahu 'ai siri na'i hihiri.'

22 Ma'ata, 'inau wai 'unua tana'amou, 'iatei nai taesu'a 'ana ta sae 'ai siri na'i hihiri. Ma 'onaa 'iatei nai 'unu bweu 'inia ta sae, rai waia na'i Kansol† 'anai 'i'ia. Ma 'iatei nai 'unu bwau kuhi 'inia ta sae 'a ta'isada dorai gaasia siri na'i 'eu na'i dora ni rongomaata'i.

23 "Naasi 'onaa 'o waai bane amua 'anai nugaa na'i hunganai dorani ho'asi na'i Ruma Maea ana God ma'ogu aidangisia do'e sae na taesu'a mumua,

24 'oi nugaa ga'u i bane amua, ma'oi aho'i 'anai hagu aho'i beia mo'o na taesu'a mumua ma'oigui aho'i ro'u 'anai hauai bane amua tanaa God.

25 Ma 'onaa na sae na taesu'a mumua 'a raba wai'o na'i kooti, 'oi bonasia ha'a-arataraa raurau beia. 'A gasi taranga'ini'o tanaai sae hihiri, mana sae hihiri 'ai taranga'ini'o tanaai sae hehei'oi mai gaasi'o na'i rumaniho'o.

26 Wai 'unua ha'a-momori tana'o, 'oi awa 'isi tari 'oha 'oi horia hako siha ha'a narai 'unua tana'o do'oi horia."

Ha'ausuringa'i 'Abaii Ha'iwai

27 Mia Jisas 'a o'ani ro'u, "'T'amou mou bwane 'iraraa i Ringe ana Moses na o'ani, "Oi abui taritari'a baaniai urao amua ma'ua mwane amua.'‡

28 Ma'ata 'inau wai 'unua tana'amou, 'iatei na re'iai urao ma 'adoma'i sisiwa 'inia, 'iia 'a bwane taritari'a beia na'i 'adoma'ina.

29 Naasi 'onaa na maa odomu nai haai maho na'o ora-ora'a 'inia, 'oi suki gaasia hura'a moi. 'A goro do'oi ha'a-ai'aa ta ta'i dorai abe moi, baaniai abemu hako nai siri na'i 'eu na'i dora ni rongomaata'i.

30 Ma 'onaa na rima odomu nai haai maho na'o ora-ora'a 'inia, 'oi horosia ma'oi gaasia. 'A goro do'oi ha'a-ai'aa ta ta'i dorai abe moi, baaniai abemu hako nai siri na'i 'eu na'i dora ni rongomaata'i."

Ha'ausuringa'i 'Abaii Haigaasi

(Matiu 19:9; Mak 10:11-12; Luk 16:18)

31 Mia Jisas 'a o'ani ro'u, "'T'amou bwane 'iraraai Ringe ana Moses na o'ani, "Iatei nai gaasiai urao ana 'ai haua moi ta usu-usu ni haigaasi tanaa ma nugasia'a.'§

32 Ma'ata 'inau wai 'unua tana'amou, 'oi abui gaasiai urao amua 'onaa na ai'a taritari'a baani'o. 'Onaa 'oi gaasia ma'ai waina ta saemwane he'ete'i, naia na gaasia amua nagu taritari'a 'inia beiai sae nagu waina ro'u. I sae nagu waina ro'u 'a taritari'a beiai urao anai sae he'ete'i."

Ha'ausuringa'i 'Abaii Herehere

'Anai Hauai Duruduru

33 Mia Jisas 'a o'ani ro'u, "'T'amou mou 'iraraa do ra ha'a-aburaau wauwa agaa'i 'anai horosi'i duruduru narau haa'i tanaa Araha God narau tohe 'ini'i

* 5:21 5:21 Eksodas 20:13; Diutronomi 5:17 † 5:22 **Kansol:** Wanasia na'i Diksonari ‡ 5:27 5:27 Eksodas 20:14; Diutronomi 5:18 § 5:31 5:31 Diutronomi 24:1

na'i atana 'anai haa'i. Ra 'unua tanaraau do 'oha rai duruduru, rai araisuri'i ma'ata!*

³⁴ Mawai 'unua tana'amou, 'oha moi hauai duruduru, moi abui tohe 'inia ta maho. Moi abui tohe 'iniai aro, 'inia naasi dora ni heimarungi ana God,

³⁵ ma'ua tohe 'iniai marewana, 'inia marewana 'iia ana God, ma'ua tohe 'iniai Jerusalem 'inia naasi 'omaa ana God, i mwaeraha hauasa.

³⁶ Abu tohe o'ani ro'u, "Onaa wai horosiai duruduru agua, ni warihugu 'ai mamaahui.' 'Inia i'oe ai'a to'o mena 'anai ha'amamahuia ma'ua ha'a-buruburu'aa'i warihumu.

³⁷ Naasi 'onaa 'oi hauai duruduru, 'oi 'unua odo-odo moi 'io ma'ua bwa'i ma hako'a. 'Onaa 'oigui tohe 'inia ta maho ro'u, ma naasi neisi 'a boi'a baania Saetan."

Ha'ausuringa'i 'Iniai Heisu'usu'u

'Iniai Ta'aa

³⁸ Mia Jisas 'a o'ani ro'u, "'I'amou mou bwane 'iraraai Ringe ana Moses na o'ani, "Iatei nai kaaniai maana ta sae, rai kaania ro'u i maana. Mia tei nai rubu husiai rihona ta sae, rai rubu husia ro'u i rihona.'†

³⁹ Ma'ata, 'inau wai 'unua tana'amou, moi abui heisu'usu'u 'iniai ta'aa. 'Onaa ta sae na hidariai baba odomu, 'oi rihota'i mai hida ro'u na'i nata baba.

⁴⁰ 'Onaa ta sae nai raba wai'o na'i kooti 'anai rahia i to'oni abe amua 'anai su'uai mareho na'o ha'atari'aa tanaa, 'oi haua ro'u wou tanaa i to'oni tewa amua.

⁴¹ 'Onaa ta sae hehei'oi nai ha'a-'usu'usu'o 'anai suru'ia tanaa i anga ana suria ta ta'i kilomita, 'oi waia suria ta rua kilomita.

⁴² Na'i 'oha na sae ra ha'angoni mareho, 'oi hisu. 'Oha ra raba waia ga'u ta mareho amua suria moi ta gere madoraa, 'oi abui ruia."

Ha'ausuringa'i 'Abaiai Heita'ahi

(Luk 6:27-28, 32-36)

⁴³ Mia Jisas 'a o'ani ro'u, "'I'amou mou bwane 'iraraai Ringe ana Moses na o'ani, 'Moi ta'ahirai sae amoo'i, mamoi 'utairaaui maerongamoo'i.‡

⁴⁴ Ma'ata, 'inau wai 'unua tana'amou, moi ta'ahiraaui maerongamoo'i mamoi ha'arahesi taradaaui nei ra nora ta'ai'amou.

⁴⁵ 'Onaa moi haua o'asi, naasi 'a ha'ata'inia do 'i'amou ra'i gare ana'ia Amamoou ara'ai aro. 'Inia 'iia 'a hauai sina tanaraau hakoi sae goro mana sae ta'a'i, ma haa'i rangi tanaraau hakoi sae odo-odo mana sae ora-ora'a.

⁴⁶ 'A 'ua? 'Onaa mou ta'ahiraaui moi nei ra ta'ahi'amou, mou 'adoma'inia do'ia God 'ai tahari'amou goro 'inia? Rei'uaa 'iraaui sae ha-ha'atakisi namou wana bodio 'iniraausi, marau haa moi ro'u o'asi.

⁴⁷ Ma 'onaa mou goro moi 'iniraaui nei ra goro 'ini'amou, naa 'i'amou mou ai'a he'ete'ita baania namoiwou ta sae. 'Inia 'iraaui sae ahurodo ra goro moi ro'u 'iniraaui nei ra goro 'iniraaui.

⁴⁸ Naasi 'i'amou moi goro tatarasi 'onaaia Amamoou na goro tatarasi."

6

Ha'ausuringa'i 'Iniai Hisu

¹ Mia Jisas 'a o'ani ro'u, "Moi wai'ado'ado goro na'i 'oha moi haa'i here goro. Mou gasi haa'i beiai ha'a-ta'eta'e na'i maadi noni rago. 'Onaa moi haua o'asi, mamou bwa'i dau heitahari beia Amamoou ara'ai aro.

* 5:33 5:33 Levitikas 19:12; Nambas 30:2; Diutronomi 23:21 † 5:38 5:38 Eksodas 21:24; Levitikas 24:20; Diutronomi 19:21 ‡ 5:43 5:43 Levitikas 19:18

2 'Oha 'oi hisungiraau i pohara 'oi abu hua beiai rongoo raha, 'inia naasi here rau haa'i sae pwapwaari'i suri'i rumani ha'arahesi mei suri'i tara raha, 'inia rau 'irisia do rai ha'atee ha'a-ta'eta'eraau. Wai 'unua ha'a-momori tana'amou, na'i 'oha nara ha'atee ha'a-ta'eta'eraau, naasi'a i heitahari adaau.

3 'Oha 'oi hisungiraau sae pohara 'oi abui ha'ata'inia hura'a tanaraau sae taha na'o haa,

4 ma'ata 'oi hua na'i dora bainihu. Taha na'o hua na'i dora bainihu, 'ia Amamu ara'ai aro 'a 'iraraa. 'Ia naigui tahari'o 'iniai taha na'o hua."

Ha'ausuringa'i 'Iniai Ha'arahesi

(Luk 11:2-4)

5 "'Oha moi ha'arahesi moi abui 'onaairaui sae nara here 'onaa dora odo-odo nara raba ura na'i rumani ha'arahesi mana'i tara raha 'anai ha'arahesi dorai re'iraau. Wai 'unua ha'a-momori tana'amou, na'i 'oha nara ha'atee ha'a-ta'eta'eraau, naasi'a i heitahari adaau.

6 Naasi 'oha 'oi ha'arahesi 'oi siri ahii amua ma'oi honosiai maraaruma ma'oigui ha'arahesi tanaa Amamu na'o bwa'i re'ia. 'Ia na 'iraraa taha na'o hua na'i dora bainihu, 'ia naigui tahari'o.

7 "Mana'i 'oha moi ha'arahesi, moi abui 'onaairaui sae ahurodo nara 'unu ori-ori'i ha'atee nara ai'a rongo ha'amadomaahu. Ra 'adoma'inia doni hi'ona adaau 'ai arami'i ha'arahesi adaa'i 'ini'i mwane ha'atee nara haa'i.

8 'T'amou moi abui 'onaairaui sae o'asi. 'Ia Amamoou 'a bwani 'iraraa taha mou 'irisia mamougu ha'angoni.

9 Naasi 'oha moi ha'arahesi, moi ha'arahesi o'ani:
Amameu na'i aro,

na atamu 'ai maea.

10 Na houramu 'ai boi.

Na hei'irisimu rai hua na'i anoi bahai
'onaai hua ada na'i aro.

11 Hua tana'ameu i mahoingau 'anai dangini.

12 'O'i 'adoma'i nugasi'ameu 'ini'i ora-ora'a amee'i

'onaai 'adoma'i nugasi'i amee'i nei ra haa'i 'ino bwarasi'ameu.

13 Ma'oi 'a'auhi'ameu 'anai ura bwarasi'i heiohongi
ma'oi taatahi bwarasi'ameu baania Saetan.

14 "'Onaa moi 'adoma'i nugasi'i ora-ora'a adaa'i nei ra haa'i here ra ai'a goro tana'amou, 'ia Amamoou ara'ai aro 'ai 'adoma'i nugasi'i ora-ora'a amoo'i ro'u.

15 Ma 'onaa mou bwa'i, 'ia Amamoou 'a bwa'i 'adoma'i nugasi'i ro'u i ora-ora'a amoo'i."

Ha'ausuringa'i 'Iniai Ha'ariri

16 "'Oha moi ha'aririta'i ngau, moi abui 'ome ahutotou beia 'onaai hua adaui sae ra here 'onaa dora odo-odo. Rau 'ome ha'ata'ata'ahi beia do nei narai re'iraau. Wai 'unua ha'a-momori tana'amou, na'i 'oha nara ha'atee ha'a-ta'eta'eraau, naasi'a i heitahari adaau.

17 Naasi 'oha 'oi ha'ariri, 'oi aromaa ma'oi 'aha'aha goro

18 neina bwa'i sae nai 'ome 'iraraa do'o ha'ariri. Ma'ata 'ia Amamu na 'iraraa taha na'o hua na'i dora bainihu, 'ia naigui tahari'o."

Ha'ausuringa'i 'Iniai Toto'ora Na'i Aro

19 "Moi abui boribori'i toto'ora 'anai marewanani, 'inia he'a mana 'adi ra mata'i ha'ata'ai'i, mana sae beriberi ra matai siri na'i ruma 'anai beri'i.

20 Ma'ata moi haa'i mwani mareho goro neina 'a 'onaa domou nuga'i toto'ora amoo'i na'i aro, dora i he'a mana 'adi ra bwa'i matai ha'ata'ai'i na'iei mana sae beriberi ra bwa'i matai beri'i.

21 *Moi haua o'asi, 'inia na 'adoma'imu 'ai awa tarau na'i dora na toto'ora amu'i ra awa na'iei."*

Ha'ausuringa'i 'Iniraau Nei Nara Naga

*'Ini'i Mwani Maho
(Luk 11:34-36)*

22 "I maa 'a 'onaai raita anai abemu. Na'i 'oha na maamu'i ra goro hako, na abemu 'a honura'i marewa.

23 Ma 'onaa na maamu'i ra ta'a'i, na abemu hako 'a honura'i kuhi. 'Onaa 'o 'adoma'inia do 'o awa na'i marewa ma'ogu awa na'i kuhi, i'oe 'o huunai awa na'i kuhi."

*Ha'ausuringa'i 'Iniai Ha'a
(Luk 16:13; 12:22-31)*

24 "A bwa'i sae nai tau'aro goro tanaai rua bwauodo. 'Onaa nai o'asi, me 'iia 'ai 'itaa ta nei mai ta'ahiai nata nei. Ma'ua 'ai 'adoma'i ha'ahoua tanei mana nata nei 'a bwa'i. Naasi 'a bwara 'anai tau'aro tanaa God ma do'oigui ta'ahia ro'u i ha'a.

25 "Naasi, wai 'unua tana'amou, 'ai abui ta'aabemu 'iniai tahingamu 'ado dangi, 'iniai taha 'anai ngaua mana gono mana bwana na'oi ho'osia. 'Inia na tahingamu, ai'a moi 'anai ngaa'i mahoingau, mana abemu ai'a moi 'anai ho'osiai bwana.

26 Moisu 'omesiraaui manu na'i ahoasara, rau ai'a hasi mahoingau mana 'e'eri ma'ua nuga taguma'ini'i mahoingau na'i hare. Mia Amamoou ara'ai aro 'a hanganiraaui manu 'isi. Mi'amou tanaa God, mou ororiu di'u baani'i manu 'isi.

27 Ma rei'uaa na towa'i ta'aabemoou, me mareho nara ta'aabemoou 'ini'isi, ra bwa'i 'a'auhi'amou 'anai ha'atewaa 'ari tahi namou haa na'i marewana.

28 "A 'ua na ta'aabemoou 'iniai bwana 'anai abemoo'i? Moisu 'adoma'i suri'i tagai raraaua ni hasimou. Rau ai'a haua ta tau'aro ma'ua tata nadaau bwana.

29 Mawai 'unua tana'amou, rei'uaa 'ia Mwaeraha Solomon 'a toto'ora, ma'ata ai'a ta ta'i bwana ana nai 'ome goro ta'isada beia ta ta'i tagai raraaua.

30 Hinihinimoou 'a kekerei di'u! 'Onaa 'ia God na ha'a-'omegoro'i tagai raraaua nara ahurara moi gere madoraa maraigui suungi'i, ni 'ua ana na bwa'i haa'i bwana 'inia tana'amou?

31 "Naasi, moi abui o'ani, "E taha gaigui ngaua, ma'ua 'e taha gaigu gonohia, ma'ua ho'osia?"

32 Na'isi mareho na 'iraau sae narau ai'a aidangisia God rau 'adoma'i raha 'ini'i. Naasi 'ai abui ta'aabemoou, 'inia 'ia Amamoou ara'ai aro 'a 'iraraa domou 'irisi'i mareho 'isi.

33 Maho na ororiu di'u domoi haua, naasi 'anai awa tarau na'i bahainai heimarungi ana God mana awa suriai hei'irisina. 'Onaa moi haua o'asi, mia God 'ai haua tana'amoui mwani mareho 'isi.

34 Naasi 'ai abui ta'aabemu 'iniai ho'oa. Dangini 'a to'oraai mareho 'ana haaria 'anai ta'aabemu 'inia."

7

*Abui Hiiriai Nata Sae
(Luk 6:37-38, 41-42)*

1 "O'i abui hiiriai nata sae, ma naasi nara bwa'i hiiri'o ro'u.

2 'Inia rai hiiri'o 'iniai ta'i hihiri na'o haua tanaai nata sae. Mana ta'i herehere na'o haua 'anai hiiriai nata sae, naia ro'u narai haua tana'o.

3 "Ni 'uaana na'o bonasiai rahia 'inia i gere mamamo na'i maanai nata sae, ma'ogu ai'a aidangisiai kae mamamo na'i maamu haari'o?

⁴ 'A he'ua na'ogu matai 'unua 'inia tanaai nata sae do'oi 'a'auhia 'anai rahiai gere mamamo baaniai maana, mi'oe 'e kae mamamo na awa na'i maamu!

⁵ Pwari'i ta'aa! Na'i na'o 'oi rahia ga'u i kae mamamo baaniai maamu haari'o neina 'oi matai wana goro 'anai rahiai mamamo baaniai maana nata sae."

⁶ Mia Jisas 'a hauai heiha'auu 'iniraau nei nara 'itaai ha'atee ana God. 'A o'ani, "Moi abui haua tanaai misu i maho na maea, 'inia 'ai rihota'i aho'i mumua 'anai here ha'ata'ai'o. 'A o'asi ro'u, moi abui gaasi'i maho ra ororiu tanaai boo, 'inia 'ai buu huni'i moi mai rihota'i mumua 'anai here ha'ata'ai'o."

Ha'ausuringa'i 'Ini Ha'arahesi

(Luk 11:9-13)

⁷ "Naasi, wai 'unua tana'amou, moi abui agoheta'i ha'angoni. Ma naasi na mareho namoi ha'angonia, 'ia God 'aigui watea tana'amou. Moi abui agoheta'i siba. Ma naasi na mareho namou sibania, moigui sadoia. Moi abui agoheta'i pwepwee. Ma naasi 'ia God 'aigui tahangiai maraaruma tana'amou.

⁸ 'Inia 'iatei nai ha'angonia God 'ini'i taha na 'irisi'i, 'ai hau'i tanaa. Mia tei nai siba, 'ia God 'ai haua tanaai taha na sibania. Mia tei nai pwepwee, 'ia God 'ai tahangia tanaai maraaruma.

⁹ "'Iatei 'ini'amou nai matai haua tanaai gare ana ta hau 'onaa 'ai ha'angoni breidi?

¹⁰ Ma'ua 'ai haua tanaa ta mwaa 'onaa 'ai ha'angoni ii'a?

¹¹ Rei'uaa na'o ta'aa he'ua, ma'ata 'o 'irara'i maho goro 'anai haa'i tana'i gare amu'i. 'Onaa na o'asi, mamoi 'iraraa ha'agorohia doni Amamoou ara'ai aro 'ai haa'i mwani mareho goro tanaraau nei narau ha'angonia.

¹² "Ni here na'oi haua tanaai nata nei, 'ai suriai here na'o 'irisia dorai haua tana'o. Naasi 'ado'ado 'anai Ringe ana'ia Moses mana ha'ausuringa'i adaa'i Rarabea."

Maraaruma Na 'Ogo

(Luk 13:24)

¹³⁻¹⁴ "Na maraaruma anai dora ni mae 'a bwabwahora mana tara 'ana 'a mwada'u 'anai suria. Ma ragoi nei ra suriai tarasi. Na maraaruma anai tahi tarau 'a 'ogo mana tara 'ana 'a bwara 'anai suria, magu ai'a ragoi nei ra suria. Naasi, moi siri na'i maraaruma na 'ogo."

Ha'atee Ha'abasu

'Iniraau Rarabea Pwapwaari'i

(Luk 6:43-44)

¹⁵ "Moi 'ome'ome goro 'iniraau rarabea pwapwaari'i. Ra 'ome mamahu 'onaai siip mana'i raromada ra 'onaai misu hahaingau.

¹⁶ Moi 'ome 'irara'i moi na'i herengada 'onaai 'ome 'irara'i amoo'i hasi'ei suri'i huadi. 'O bwa'i matai husia ta huai memeapu ma'ua ta huai 'aai baaniai waroraraki.

¹⁷ Hasi'ei goro ra hungu 'ini'i hua goro, mana hasi'ei ta'a'i ra hungu 'ini'i hua ta'aa.

¹⁸ Hasi'ei goro 'a bwa'i haa'i hua ta'aa mana hasi'ei ta'aa 'a bwa'i haa'i hua goro.

¹⁹ 'Adonai hasi'ei nara hungu 'ini'i hua ta'a'i, 'ia mo'o na to'ora'i 'ai ara gata'ini'i marai gaasi'i ara'a na'i 'eu.

²⁰ Naasi, moi matai 'ome 'irara'i rarabea pwapwaari'i na'i taha na ha'ata'inia hura'a na'i barongana.

21 “Ai'a do 'iraau hakoi nei rau 'unuau 'inia Arahā adaau narai siri na'i heimarungi ana God ara'ai aro. 'Iraau moi nei rau ha'isuri'i hei'irisina Amagu na'i aro narai siri na'iei.

22 Na'i dangi ni hihiri 'ai ragoi nei narai o'ani, 'Arahā, 'i'ameu meu taroha'ini'i ha'atee amu'i, ma 'inia atamu meu taari'i adaro mameu hau'i 'ini'i mwane ha'abu'oahu.'

23 Minau wai o'ani 'inirāau, 'Arai sae ora-ora'a, moi 'ariwou! 'Inau ai'a matai'amou.' ”

Rua Sae Tatau'aro Ruma
(Luk 6:47-49)

24 Mia Jisas 'agu o'ani ro'u, “Hoita naasi, 'iatei na rongo'i ha'ausuringa'i agu'i ma ha'isuri'i 'a 'onaai sae madoma na tau'aronai ruma na'i hunganai hau.

25 'A dio i rangi raha mana wai ra ahe. I ro'a 'a uuhira'i wetewete mana ruma 'a ai'a arobo 'inia 'a ura baabau na'i hunganai hau.

26 'Iatei na rongo'i ha'ausuringa'i agu'i ma ai'a ha'isuri'i 'a 'onaai sae bweu na tau'aronai ruma na'i hunganai nu'unu'u.

27 'Oha na dio i rangi raha mana wai ra ahe, i ro'a 'a uuhira'i wetewete mana ruma 'a arobo auru na maguru na'i ano.”

28 Na'i 'oha 'ia Jisas 'a haa'i hako i mamaani 'ini, 'iraui sae rago rau heimwaota'i di'u 'ini'i ha'ausuringa'i ana'i.

29 'Inia 'a huunai 'irara'i mareho na maani'i, 'a ai'a 'onaairāui Ha'ausuri 'anai Ringe ana'ia Moses.

8

Ta Jisas 'A Ha'agorohia Aho'i Sae Lepa
(Mak 1:40-45; Luk 5:12-16)

1 'Oha na 'ia Jisas 'a dio aho'i baaniai hungahunga, 'iraui sae rago rau suria.

2 Raugu 'ome ma'e sae lepa na boi ma topira'i ruru auru tanaa Jisas ma o'ani, “Arahā, 'ona 'o mwa'emwa'e, ma'o ga'i ha'agorohiau aho'i baaniai daoha na to'iauni.”

3 'Ia Jisas 'a taranga'inia hura'ai rimana, 'a dau wou beia ma o'ani, “'Io, 'au mwa'emwa'e moi, 'oi goro'a aho'i.” Na'i mau 'ohasi mana abena 'agu goro aho'i.

4 Mia Jisas 'a o'ani 'inia, “'Oi abu maania ga'u tanaa ta sae i maho na to'o bei'o. 'Oi 'ari odo-odo beiai Piriisi mai 'iraraa haaria do i'oe 'o goro aho'i. Naasi ma'oi hauai bane amua tanaa Piriisi mai ho'asi 'inia 'onaai 'unua ana Moses, 'anai ha'ata'inia tanaraui noni do'o goro'a.”

Hinihinai Ta'i Na'ohadaui Hehei'oi
(Luk 7:1-10)

5 Na'i 'oha 'ia Jisas 'a ada na'i 'omaai Kapaniam, 'e ai Rom, 'e na'ohadaui hehei'oi, 'a boi beia ma o'ani 'inia,

6 “Arahā, i sae tatau'aro agua 'a daoha raha. 'Iia 'ari ruma agua. 'A rongomaata'i di'u maagu ai'a ririhota'i'a.”

7 Mia Jisas 'a o'ani, “'Io. Wai 'ari ha'agorohia aho'i baaniai daohasi.”

8 Mana saemauasi 'a o'ani, “Arahā, 'oi abui 'ari, 'inia 'inau 'au ai'a arari do'oi boi na'i ruma agua. 'Oi ha'atee moi mana sae tatau'aro agua 'ai goro'a aho'i.

9 'Au 'iraraa o'asi, suria 'inau 'au to'oraai nei na marungiau nawai ha'isuri'i heiatenga'i ana'i, minau ro'u 'au to'ora'i sae hehei'oi na 'iraui rai ha'isuri'i ro'u i heiatenga'i agu'i. Na'i 'oha nawai o'ani 'inia ta ta'i 'inirāau,

“O'i 'ariwou 'isi,' 'iia 'ai ha'isuria'a ma'ata. Ma 'onaa nawai o'ani 'inia ta nei 'iniraaui, “O'i boi 'ini,' 'iia 'ai boi'a ro'u ma'ata. Ma 'onaa wai o'ani 'inia sae tatau'aro agua, “O'i hauai tau'aroni,' 'iia 'ai haua'a ma'ata.”

¹⁰ Na'i 'oha na 'ia Jisas 'a rongoai ha'atee o'asi anai saemauasi, 'a heimwaota'i di'u, ma o'ani 'iniraaui nei rau hano suria, “Nau wai 'unua ha'a-momori tana'amou, ai'a ta ta'i saeni Israel nawai 'omesia do'ai hinihini tari 'onaaia mo'oni.

¹¹ Wai 'unua tana'amou, 'ai ragoi nei ra ai'a Jiu rai boi baaniai mwane dora hako na'i marewana 'anai ngaugoni beia Ebrahim, Aisak, mia Jekop na'i hourana ana God ara'ai aro.

¹² Ma'ai ragoi saeni Israel nara ga'i awa na'i hourana God na'i aro naragu bwai'a! Rai gaasiraaui hura'ai dora kuhi, dora rai angi marai 'ara ha'angingita'i rihodaa'i na'iei.”

¹³ Mia Jisas 'a o'ani 'inia na'ohadaaui hehei'oi, “O'i aho'i 'ari ruma amua, i sae tatau'aro amua 'ai goro'a 'onaa hinihinia amua.” Mau na'i 'ohasi, mana sae tatau'aro anasi 'a goro'a aho'i.

Jisas 'A Ha'agorohiraaui Aho'i

Mwane Sae Daoha

(Mak 1:29-34; Luk 4:38-41)

¹⁴ 'Ia Jisas 'a 'ari ruma ana Pita ma re'ia do na hungona Pita 'a awa moi na'i be'ana, 'inia 'a mata'i ma raorao i abena.

¹⁵ 'A dau wou na'i rimanai uraosi mana mata'i 'a rigisia. Ma suruta'e ma ha'aagau mahoingau 'ana Jisas.

¹⁶ Na'i moi su'urahi mara wairaaui mai tanaa Jisas nei ra bwaunira i adaro. 'Agu ha'atee moia Jisas mana adaro ra hura'a baaniraaui, ma ha'agorohiraaui hako aho'i nei ra daoha.

¹⁷ Ni haua ana o'asi 'a to'o ha'a-momori'a i taha na 'unua Rarabea Aisaea o'ani, “A ha'a-ai'a'i daoha ra to'igia.”*

Rua Sae Nararu Raba Suria Jisas

Magu Bwara

(Luk 9:57-62)

¹⁸ Mia Jisas 'a re'iraaui sae rago i ruru adaui mai ma 'unua tanaraui rongoiusuri ana'i do rai ta'e 'ari nata batarau 'inia kae bwera i Galili.

¹⁹ Ma'e Ha'ausuri 'anai Ringe ana'ia Moses 'a boi beia Jisas ma o'ani 'inia, “Ha'ausuri, 'inau wai suri'o rei'uaa ta dora na'oi 'ari iei.”

²⁰ Mia Jisas 'a o'ani 'inia, “Na mwane mwamwaa wasi ra to'o dora ni mauru, mana manu ra to'ora'i nu'i. Minau na Gare'i Inoni, 'au ai'a to'o dora ni mono.”

²¹ Ma'e ta'i nei 'iniraaui nei rau suria Jisas 'a o'ani, “Araha, wai 'ari ga'u mawai toringia amagu.”

²² Mia Jisas 'a o'ani 'inia, “O'i suriau'a! 'O'i nugasiraaui nei ra suriai tara 'anai mae tarau marai toringiraaui nei nara mae.”

'Ia Jisas 'A Ha'apapakuai Ro'a Raha

(Mak 4:35-41; Luk 8:22-25)

²³ Mia Jisas 'a ta'e ara'a na'i ora beiraaui rongoiusuri ana'i marau 'ari nata batarau 'inia kae bwera i Galili.

²⁴ Raugu 'asu'a na'i 'oha rau 'ari mau ma'e kae ro'a na to'iraaui. I tabaosi ra abwao ta'eha na'i raronai ora. 'Ia Jisas 'a mauru na'i 'ohasi.

²⁵ Miraaui rongoiusuri rau 'ariwou ha'araia Jisas, marau ha'atee o'ani, “Araha, 'oi ha'atahigaui! Gai dodo'a naani!”

* 8:17 8:17 Aisaea 53:4

²⁶ Mia Jisas 'a o'ani, "A 'ua mou maaaa'u 'inia? Hinihinimoou 'a kekerei di'u!" 'Ia Jisas 'a ura ara'a ma ha'atee wetewete tanaai ro'a mana tabaosi do rarui papaku. Mau na'i 'ohasi ma biowaa'a.

²⁷ 'Iraau rongoiusuri rau heimwaota'i, rau o'ani, "E sae he'ua naani? Rei'uaa ro'a mana tabaosi ra araisuria."

'Ia Jisas 'A Taari Adaro

Baaniraruai Rua Sae (Mak 5:1-20; Luk 8:26-39)

²⁸ Na'i 'oha 'ia Jisas mana rongoiusuri ana'i rau tarau 'ari nata batarau na'i kae bwera i Galili, rau 'oto na'i dora ra 'unua 'iniai Gadara.† Rau 'ari wou marau haisuara'i beiai rua saemwane na bwauniraruai i adaro. Raru hura'a mai baani'i wabwa ra toringi'i ei sae mae. 'A ha'amagugu abe do ta sae nai taha wou na'i dorasi 'inia raru here 'onaai adaro wawauru.

²⁹ 'Oha raru re'ia Jisas raru awara o'ani, "Jisas, garena God, 'o raba 'uamiria? 'A 'ua? Ai'a madoraa mau 'anai hihiri, ma'o bwane boi'a 'anai ha'a-mama'ai'amiria?"

³⁰ Gere ha'atau wou baaniai dorasi 'e kae wareai boo nara suasua 'isi.

³¹ Mana adaro ra bongainia wetewete Jisas o'ani, "Onaa 'oi taari'ameu hura'a ma'o watea mei siri suri'i boo."

³² Mia Jisas 'a o'ani, "Moi 'ari!" Mana adaro ra hura'a baaniraruai rua saesi mara siri suri'i boo. Mana mwani boo 'isi ra 'eba dio suriai ahana mara rege dio na'i wai mara mae hako.

³³ 'Iraau nei ra 'omesuri'i boo 'isi rau 'eba 'ari 'omaa narau maaniai taha na to'o beiraau'i boo mana rua sae na bwauniraruai adaro.

³⁴ Mana sae na'i 'omaasi rau hura'a mai 'anai heisadoi beia Jisas marau bongainia do'ai hano daara'i baaniai dora adaau.

9

'Ia Jisas 'A Ha'agorohia Aho'i Sae

Na Nugu i Abena (Mak 2:1-12; Luk 5:17-26)

¹ 'Ia Jisas mana rongoiusuri ana'i rau ta'e ara'a na'i ora marau aho'i 'ari na'i 'omaa na awa-awa iei.*

² 'Oha rau ada, ra'i sae rau suru'ia mai sae na abena 'a nugu tanaa Jisas na'i be'ana. 'Oha 'ia Jisas 'a 'ome 'iraraai hinihinidaau, 'a o'ani 'iniai saesi, "Garegu, 'ai abui ta'aabemu. Na ora-ora'a amu'i 'au 'adoma'i nugasi'i hako."

³ Tara'i nei 'iniraau'i Ha'ausuri 'anai Ringe ana'ia Moses ra 'ado'ado o'ani, "Ia mo'oni 'a 'adoma'inia gasi do 'a ta'isada beia God. 'Iia 'a ha'atee ha'ata'aia God!"

⁴ Ma'ata 'ia Jisas 'a 'iraraai 'adoma'idaau ma o'ani 'iniraau, "A 'ua namou to'oraa 'iniai 'ado'ado ta'aasi?"

⁵ Taha na mwada'u? 'Anai 'unua tanaai saesi do'au 'adoma'i nugasi'i ora-ora'a ana'i, ma'ua 'anai 'unua tanaa do'ai ura maai hahano? 'Anai 'unua tanaa mo'osi do'au 'adoma'i nugasi'i ora-ora'a ana'i 'a mwada'u, 'inia 'a bwarai 'iraraa 'onaa ra 'adoma'i nugasi'i ora-ora'a ana'i ma'ua ai'a.

⁶ Naasi, 'inau i Gare'i Inoni, wai hauai maho namou 'adoma'i ha'abwaraa ma moigu'i 'iraraa do 'au to'oraa ro'u i mena 'anai 'adoma'i nugasi'i ora-ora'a na'i marewanani."

Naasi maagu o'ani 'iniai sae na abe nugusi, "O'i ura ara'a ma'oi suru'iai be'amu ma'oi 'ari ruma amua!"

⁷ Mana saesi 'a ura ara'a ma 'ari ruma ana.

† **8:28 Gadara:** Tara'i Baebol bwani ra 'unua Garasa. * **9:1 'Omaa na awa-awa iei:** Kapaniam (Wanasia 4:13)

⁸ 'Oha 'iraau i noni hunga rau re'iai maho na to'osi rau mamaa'u marau ha'a-aneanea God 'inia hua ana i mena o'asi tanaai noni.

*'Ia Jisas 'A Soia Matiu
(Mak 2:13-17; Luk 5:27-32)*

⁹ Na'i 'oha 'ia Jisas 'a hano baaniai 'omaasi 'a re'iai sae ha-ha'atakisi, atana 'ia Matiu, 'a heinagu na'i dorani tatau'aro ana. Mia Jisas 'a o'ani 'inia, "'Oi boi suriau 'onaai rongoiusuri agua.'" 'Ia Matiu 'a ura ara'a ma suria'a.

¹⁰ Mia Jisas mana rongoiusuri ana'i rau ngau na'i ruma ana Matiu. 'A ragoi sae ha'atakisi mana sae ta'a'i narau ngau beiraa.

¹¹ Ma tara'i Farisei rau re'iai hua o'asi ana Jisas marau songa'iniraa'u a i rongoiusuri ana'ia Jisas o'ani, "Ni 'uaana na Ha'ausuri amou 'a ngau 'inia beiraaui sae ha-ha'atakisi mana sae ta'a'isi?"

¹² Mia Jisas 'a rongoa ma o'ani 'iniraa, "Na sae nara goro moi abedi ra bwa'i rabasiai hei'a'auhi baaniai sae na matai ha'agorohi'i daoha, me 'iraaui moi nei nara daoha nara rabasiai hei'a'auhi.

¹³ 'A o'asi ro'u, 'inau boi na'i marewana, ai'a do 'anai 'a'auhiraaui noni odo-odo, ma'ata 'au boi 'anai 'a'auhiraaui noni ora-ora'a. Moi 'ari mamoi sibaniai 'ado'ado anai usu-usu na'i Usu-usu Maea na o'ani, "E ta'i maho na ororiu domoi hua, naasi goro 'iniraaui nata sae. Ni mahosi 'a ororiu di'u'i ho'asi namou haa'i tanaa.'" †

Ha'ausuringa'i Bwani 'A Bwa'i 'Ari Goni

*Beia Mwada'u i Ha'ausuringa'i Haoru
(Mak 2:18-22; Luk 5:33-39)*

¹⁴ 'Iraau rongoiusuri ana'ia Jon Bwareomaea rau boi beia Jisas marau songa'inia o'ani, "Tameu miraaui Farisei meu matai ha'aririta'i ngau. Ni 'uaana na rongoiusuri amu'i rau ai'a hua o'asi 'inia?"

¹⁵ Mia Jisas 'a aramiraaui o'ani, "'A 'ua? Mou 'adoma'inia do 'iraau nei ra awa na'i rongo-ni-haiwai rai ahutotou na'i 'oha na awa beiraaui a mo'o ra ha'aha'iwaia? 'Abwa'i! Ma'ata na'i 'oha rai waia nei nara ha'aha'iwaia baaniraaui, ma raigui matai nuga ngau aho'ita.‡

¹⁶ "'Abwa'i nei nai haa ta maakari bwana haoru 'anai tai bwarasiai dora na maakari na'i bwana bwani. 'Onaa 'ai hua o'asi, na'i 'oha raigui wasiai bwanasi, na maakari bwana haorusi 'ai niniro, mai hua'a ta kae maakari nai raha di'u ro'u wou na'i bwana bwanisi. 'Inia na maakari bwana haoru ai'a ta'isada beiai bwana bwani.

¹⁷ "Nata mareho ro'u, 'abwa'i nei nai matai nuga waen haoru suri'i bei uri-uri mwamwaa bwani, 'inia na bei bwani ra bwane 'a'asi. Na'i 'oha na waen haoru 'ai su'u, na bei bwani rai pusu. Naasi mana waen rai ahe gata'ini'i, mana bei rai maakari ta'a'i. Na waen haoru rai niga'i ma'ata na'i bei haoru mararui awa goro hako."

Gare Urao Na Mae

*Mana Urao Na To'iai Abu Raha
(Mak 5:21-43; Luk 8:40-56)*

¹⁸ Na'i 'oha 'ia Jisas 'a mamaani mau, 'e saemaua adaui Jiu na boi ma topira'i ruru bwarasia Jisas ma o'ani 'inia, "Gare urao agua 'a bura'i mae moi. 'Oi boi karohia maai tahi aho'i."

¹⁹ Mia Jisas mana rongoiusuri ana'i rau ura ara'a marau suriai saesi.

† 9:13 9:13 Hosea 6:6 ‡ 9:15 9:15 Ni 'ado'ado 'anai heiha'auuni 'a o'ani: Ai'a ta'isada do'iraau rongoiusuri ana'i Jisas rai nuga ngau 'oha 'ia Jisas 'a awa mau beiraaui. Na'i 'oha 'ia God 'ai waia Jisas baaniraaui, naasi madoraaui goro 'anai nuga ngau.

20 Ma'e urao na to'iai 'abu raha suriai ta'i tangahurui harisi mana rua na awa ro'u na'i 'ohasi. 'A 'ariwou na'i murina Jisas ma karohia wou na'i gaonai to'oni tewa ana Jisas.

21 'A 'iraraa haaria do 'onaa 'ai karohia moi na'i to'oni ana Jisas ma 'a ga'i goro aho'i baaniai daoha na to'iasi.

22 Mia Jisas 'a rihota'i ma o'ani 'inia, "Ina, 'oi wa'ewa'e. Na hinihinimu na ha'agorohi'o aho'i." Na'i mau i 'ohasi mana uraosi 'a goro'a.

23 Na'i 'oha nagu siri a Jisas na'i ruma anai saemaua adaui Jiu ani, 'a re'iraui sae ra ada'ima'e ra ago-ago mara rongo raha ma ra'i nei nara uuhi'i gana suri'i 'au 'ini ahutotou.

24 Ma o'ani 'iniraaui, "Moi hura'a baaniai ruma! I gare uraosi 'a ai'a mae, 'iia 'a mauru moi." Miraaui da'ata'inia.

25 'Oha rau ha'a-taariraaui hako hura'a, 'ia Jisas 'a siri wou na'i ahii anai garesi ma dau na'i rimana ma ha'a-urata'ea ara'a.

26 Na'i muri na taroha 'a 'adarara 'ari suriai dorasi.

'Ia Jisas 'A Ha'a-wanawanaa Rua Sae Kuru

27 Na'i 'oha 'ia Jisas 'a hano baaniai dorasi 'e rua sae kuru raru suria, raru awaawara o'ani, "Pwirana Deved, 'oi arunga ta'ahimiria ma'oi 'a'auhimiria."

28 Na'i 'oha na siri ruma, raru siri suria ma songa'inirarua o'ani, "A 'ua? Muru hinihini do 'inau 'au matai ha'a-wanawana'amurua?"

Ma raru ha'atee o'ani, "Araha, miri hinihini."

29 Ma dau wou suri'i maadarui ma o'ani, "Suriai hinihini amurua, murui goro'a."

30 Ma raru taraawa'a wanawana'a. Mia Jisas 'a ha'abasurarua wetewete o'ani, "Murui abui maaniai mahosi tanaa ta sae."

31 Me raru 'ari nararu taroha'inia Jisas 'ari suria hako'i dorasi.

'Ia Jisas 'A Ha'agorohiai Sae Baanguu

32 Ai'a orea mau hura'a adarua i rua sae kurusi mara waia ro'u mai tanaa Jisas sae na baanguu, 'inia 'a sirihia i adaro.

33 Mia Jisas 'a taaria i adaro hura'a baania mana saesi 'a taraawa'a hadahada aho'i ro'u. 'Iraui noni hunga rau heimwaota'i marau o'ani, "Taraawa'a mau mai, ai'a ta maho o'ani nai to'o na'i Israel."

34 Miraaui Farisei rau o'ani, "I mwaeraha adaui adaro na hua tanaa i mena 'anai taariraaui hura'ai adaro."

'Ia Jisas 'A Ahu Ta'ahiraui Inoni

35 'Ia Jisas 'a 'ari suri'i 'omaa raha mana gere 'omaa na'i dorasi 'anai ha'ausuriraaui sae suri'i rumani ha'arahesi, ma taroha'inia tanaraui Taroha Goro 'inia heimarungi ana God, mana ha'agorohi'i aho'i sae nara to'iraui mwani taraani daoha mana riunga he'ete'i hairiu.

36 'Oha na re'iraui inoni hunga 'a ahu ta'ahiraui, 'inia rau awa ha'aroha'a marau 'ome ha'ata'ata'ahi 'onaa siip nara ai'a to'o sae 'anai 'omesuri'i.

37 Mia Jisas 'a o'ani 'iniraaui rongoiusuri ana'i, "Na nei nara ha'aagau 'anai hinihiniau ra rago di'u'a 'onaa mwane hua nara mau'a suri'i hasi'ei. Mara ai'a rago i nei 'anai husi'i.

38 Naasi, moi ha'arahesi tanaa God maai ha'ataari'i hura'a tara'i mwane sae tatau'aro 'anai 'a'au na'i mou hasi'eisi."

10

'Ia Jisas 'A Ha'ataariraaui Hura'a

*i Tangahuru Mana Rua Ha'ataari
(Mak 3:13-19; Luk 6:12-16)*

¹ 'Ia Jisas 'a soi goniraaui ta'i tangahuru mana rua rongoiusuri ma haua tanaraaui mena 'anai taari adaro mana ha'agorohi'i aho'i nei na sadoira i mwani daoha mana riunga he'ete'i hairiu.

² Nara 'ini atadaa'i ta'i tangahuru mana rua ha'ataari:

'Ia Saemon, nata atana 'ia Pita,
mea do'orana 'ia Andru,
'ia Jems mea Jon, rua gare ana'ia Sebedi.

³ 'Ia Pilip,
'ia Batolomiu,
'ia Tomas,
'ia Matiu i sae na ha-ha'atakisi,
'ia Jems garena Alfias,
'ia Tadias,

⁴ 'ia Saemon baaniai ruruha narau raba taaria hura'ai heimarungi adaui Rom,
mea Jiudas Iskariot, 'ia mo'o na usuha'inia Jisas tanaraaui maeron-gana'i.

⁵ Na'i 'oha 'ia Jisas 'a ha'aagau 'anai ha'a-taariraaui hura'ai ta'i tangahuru mana rua ha'ataari, 'a heiatenga'i o'ani tanaraau, "'Oha moi hura'a 'anai 'ari 'anai tau'aro, moi abui taha suri'i 'omaa adaa'i Samaria mei beiraaui nei ra ai'a Jiu.

⁶ Moi 'ari moi beiraaui saenai Israel narau 'onaai siip ra teha baaniai 'omesuri siip.

⁷ 'Oha moi hura'a, moi maania doni heimarungi ana God na awa na'i aro 'a gaarangi'a.

⁸ Moi ha'agorohi'i aho'i nei ra daoha ma'ua nei ra lepa. Moi taari adaro baanirai sae mamoi ha'atahi'i aho'i nei ra mae. 'Inau 'au hisu dadara'a tana'amou 'ini'i mareho 'isi, naasi moi hisu aho'i dadara'a ro'u tanaraaui noni.

⁹⁻¹⁰ "I sae ra tau'aro 'a arari dorai taguma'iniraaui 'inia tau'aro adaau. Naasi 'oha moi hano, moi abu waiwai ha'a ma'ua anga ni 'aariha ma'ua sandol ma'ua 'a'abi ma'ua do ta bwana ro'u.

¹¹ 'Oha moi ada ta 'omaa moi siba 'inia ta sae goro nai ha'a-awahi'amou na'i ruma ana. Moi awa beia tari 'oha moi hano baaniai 'omaasi.

¹² 'Oha moi 'ari ta ruma, moi ha'atee o'ani, 'Gooroha ana God 'ai awa bei'amou.'

¹³ 'Onaa 'iraui rumasi rai ha'amaoto'amou, 'ia God 'ai ha'agorohiraaui, ma 'onaa rai 'itamou ma bwa'i ha'agorohiraaui'a.

¹⁴ 'Onaa 'e 'omaa na ai'a raba ha'amaoto'amou, ma'ua ai'a raba rongo'i heitaroha'i amoou, moi tarohi'i kahua baani'i uwamoo'i mamoi hano baaniai 'omaasi. Naasi 'e ha'abasu tanaraau do'ia God 'ai ha'a-mama'airaaui.

¹⁵ Wai 'unua ha'a-momori tana'amou, na'i madoraa ni hihiri, ha'a-mama'ai nai haua God tanaai 'omaasi 'ai ta'aa di'u baaniai ha'a-mama'ai nai haua tanaraaui Sodom mana Gomora."

Ha'atee Ha'abasu

*'Iniai Madoraa Ni Rongomaata'i
(Mak 13:9-13; Luk 21:12-17)*

¹⁶ Mia Jisas 'a ha'atee o'ani, "Moi 'ome'ome goro, suria 'i'amou mou 'onaai'i siip nau ha'ataari'i hura'a na'i 'uruhadi misu hahairete. Naasi moi hihinano'a 'onaai mwaa mamoi manego 'onaai waibora.

¹⁷ Moi 'ome'ome goro, 'inia tara'i nei rai wai'amou 'anai 'i'amou marai rohoroho'amou suri'i rumani ha'arahesi adaa'i.

¹⁸ Suria 'i'amou ra'i rongoiusuri agu'i, rai wai'amou tanaraaui Primia mana Mwaeraha 'anai hiiri'amou. Naasi 'oha goro amooou 'anai taroha'inia hura'a i Taroha Goro tanaraau mei tanarai nei ra ai'a Jiu.

¹⁹ Na'i 'oha rai wai'amou 'anai hiiri'amou, moi abui 'adoma'i raha 'inia taha moi maani'i, 'inia moi 'iraraai taha moi maani'i na'i madoraasi.

²⁰ Na maho na moi maani'i, ai'a 'ado'adomoo'i haarimooou mei baaniai Hi'ona Maea nai ha'ataaria mai a Amamooou.

²¹ "Na'i 'ohasi, sae rai usuha'ini'i do'oradaa'i mana gare adaa'i nara hinihiniau tanaraaui nei nara raba ha'amaesiraaui. Mana gare rai ha'imaie bei'i amadaa'i mana inadaa'i marai usuha'iniraaui ro'u tanaraaui nei rai ha'amaesiraaui.

²² 'Iraaui noni rai 'utai'amou, suria 'i'amou ra'i rongoiusuri agu'i. Ma 'onaa moi ura baabau tari ha'ahakonai madoraai ta'aasi, moigu daua namooou tahi tarau.

²³ 'Onaa rai nora ta'ai'amou ta 'omaa, moi 'eba 'ari na'i nata 'omaa. Wai 'unua ha'a-momori tana'amou, mou bwa'i ada hako mau suri'i 'omaani Israel minau Gare'i Inoni wai aho'i'a mai.

²⁴ "Ni rongoiusuri 'a bwa'i ahaaha di'uai ha'ausuri ana, mana sae tatau'aro 'abwa'i ahaaha di'uai bwauodo ana.

²⁵ 'A arari do ni rongoiusuri 'ai awa 'onaaia moi ha'ausuri ana, mana sae tatau'aro 'ai awa 'onaaia moia mo'o na bwauodo 'inia. 'Inau 'au 'onaaui bwauodonai ruma mi'amou moi 'onaaui nei nara awa na'i ruma agua. Naasi 'onaa rai 'unuaui 'iniaui Mwaeraha adaaui adaro,* rai matai 'unu'i maho nara ta'aa di'u ro'u wou 'ini'amou."

Moi Abui Mamaa'usiraaui Sae,

Me Moi Mamaa'usia God

(Luk 12:2-7)

²⁶ "Moi abui mamaa'usiraaui nei narau raba ha'a-mama'ai'amou. 'Inia mwane maho hako narau awa bainihu suri'i tahingadaa'i mana taha narau giru'i, rai ha'ata'ini'i hura'a.

²⁷ Na tarana naasi, maho nau maani'i tana'amou haari'amou, moi maani'i hura'a tanaraau hakoi mwani sae.

²⁸ Moi abui mamaa'usiraaui sae, 'inia 'iraaui sae ra matai ha'amaesia moi abemu, mara bwa'i matai ha'amaesiaui aungamu. Moi mamaa'usia moia God na matai ha'a-mama'aiiai abemu mana aungamu na'i dora ni ha'a-mama'ai.

²⁹ 'A 'ua? Mou 'iraraai rua gere manu nara raonga'i ta'i sereni moi 'ini'i na'i maketi? Rei'uaa nara hori mwada'u o'asi, ma 'abwa'i ta nei 'ai mae 'onaa Amamooou 'a bwa'i 'irisia o'asi.

³⁰⁻³¹ Naasi moi abui mamaa'u, 'inia 'i'amou namou ororiu di'u'i mwani manu rago. Na rei'uaa warihu suri'i bwaumoo'i, 'ia God 'a uduma'ini'i hako."

Ha'arangasia Hura'ai Hinihinia Amua Jisas

(Luk 12:8-9)

³² "Ia tei nai ha'arangasia tanaraaui sae do 'iia 'e rongoiusuri agua, 'inau ro'u wai ha'arangasia tanaa Amagu ara'ai aro do'iia 'e rongoiusuri agua.

³³ Ma 'onaa 'iatei nai gagata'iniaui, 'inau wai gagata'inia o'asi ro'u na'i maana Amagu na'i aro."

Na Ha'ausuringa'i Ana'ia Jisas

* **10:25 Mwaeraha adaaui adaro:** Na'i ha'ateeni Grik ra 'unua Bielsebul. 'Ado'ado 'ana, 'ia Saetan ma'ua Mwaeraha adaaui adaro.

'A Ha'a-haihoaraaui Noni
(Luk 12:51-53; 14:26-27)

³⁴ “Moi abui 'adoma'inia do 'inau 'au boi 'anai ha'a-awagorohiraau goni inoni na'i marewana. Ai'a! Nau waa mai heihoa.

³⁵ 'Au boi 'anai ha'ahaihoai gare mwane beia amana, mana gare urao beia inana, mana urao ha'iwai beiai hungona.

³⁶ Ha'amomori, huunai maerongamu 'e sae moi na'i ruma amua.

³⁷ 'Onaa 'o ta'ahia amamu ma'ua inamu, ma'ua gare mwane amua ma'ua gare urao amua di'uau, 'o ai'a arari 'anai ha'i rongoiusuri agua.

³⁸ 'Onaa 'o bwa'i suru'iai dadaahoro amua,† ma'oi suriau, 'o ai'a arari 'anai ha'i rongoiusuri agua.

³⁹ 'Onaa 'o raba dau baabau na'i tahingamu na'i marewanani, 'o bwa'i dauai huunai tahi. Ma 'onaa 'oi mwa'emwa'e 'anai ha'a-ai'aa'i tahingamu 'iniau, 'oi sadoiai huunai tahi.”

Heitahari
(Mak 9:41)

⁴⁰ “Iatei na ha'amaoto'amou, 'a 'onaa do'a ha'amaotoau ro'u. Mia tei na ha'amaotoau, 'a 'onaa do'a ha'amaotoa ro'u a mo'o na ha'ataariau mai.

⁴¹ Iatei na ha'amaotoai rarabea 'inia 'a 'iraraa do'e rarabea, 'ai daua nana i ta'i heitahari na 'ia God 'ai haua tanarai rarabea. Mia tei na ha'amaotoai sae odo-odo 'inia 'a 'iraraa do'e sae odo-odo, 'ai daua nana i ta'i heitahari na 'ia God 'ai haua tanarai sae odo-odo.

⁴² 'Ia tei nai haua moi ta panikeni wai wauni tanaa ta nei 'iniraau nei narau suriau nara 'adoma'i heiheiraau, 'ia God 'ai taharia.”

11

'Ia Jon Bwareomaea
(Luk 7:18-35)

¹ 'Oha 'ia Jisas 'a heiatenga'i hako tanaraaui ta'i tangahuru mana rua rongoiusuri ana, 'a hano ma ha'ausuri ma heitaroha'i suri'i 'omaa gaarangi'ai dorasi.

² Na'i 'ohasi, 'ia Jon Bwareomaea 'a awa na'i rumanih'o ma rongo tarohanai Ha'atahi. Ma ha'a-taariraau 'ari tara'i rongoiusuri ana'i beia Jisas

³ marau songa'inia Jisas o'ani, “Toe naasi nei nara 'unua do'ai boi 'anai ha'atahi'ameu, ma'uasi 'e nei he'ete'i namei mamasia ro'u mau?”

⁴ Mia Jisas 'a o'ani, “Moi aho'i 'ari mamoi 'unu'i tanaa Jon i mareho namou rongo'i mana mareho namou 'omesi'i nau haa'i.

⁵ Nei ra kuru ra wanawana'a, nei ra pwaki ra hahano'a, nei nara lepa ra goro aho'i, nei ra pwarongo ra rongorongo'a, na nei ra mae ra suruta'e aho'i baaniai mae, miraau pohara ra bahurongoai Taroha Goro.

⁶ 'Ia God 'ai ha'agorohiai nei na 'omesi'i mareho nau haa'i, ma ai'a 'adoma'i heiruarua'a 'iniau.”

⁷ 'Oha 'iraau rongoiusuri ana'ia Jon rau hano'a, 'ia Jisas 'a taraawa'ai maania Jon tanaraaui sae rago. 'A o'ani, “'A 'ua? Na'i 'oha namou 'ari na'i dora mangasara 'anai bahurongoa Jon, 'e taha namou 'adoma'inia domoi 'omesia? 'E sae na orisia tarau i 'adoma'ina 'onaai ade na gegewao?

⁸ 'A 'ua? 'E sae he'ua namou hura'a 'anai re'ia? 'E sae na siri suri'i bwana 'ome goro? Na sae ra siri suri'i bwana o'asi, ra awa suri'i ruma adaa'i mwaeraha, ai'a suri'i dora mangasara.

† 10:38 *Suru'iai dadaahoro amua*: Ni 'ado'ado 'ana 'a o'ani. Gai mwa'emwa'e 'anai rongomaata'i ma'ua mae 'onaa gau raba suria Jisas.

9 Ma'e tahata namou hura'a 'anai 'omesia na'i dora mangasara? 'E rarabea? Ha'amomori, 'e rarabea, ma'ata 'iia ai'a do'e rarabea moi.

10 'Ia Jon naasi nei na 'ia God na taroha'i 'abaia o'ani na'i Usu-usu Maea, 'Nau wai ha'ataaria wou i noni heitaroha'i agua na'i na'o 'ini'o, 'iia nai ha'aagauraau noni 'anai boi amua.'*

11 "Wai 'unua ha'a-momori tana'amou, 'ia Jon naasi na ororiu di'u'i hako mwane inoni nara huta mai na'i marewanani. Ma'ata, namoiwou ta sae na ai'a taraa ororiu na awa na'i heimarungi ana God ara'ai aro, 'a ororiu di'ua Jon Bwareomaea.

12 Taraawa'a na'i madoraa na heitaroha'i a Jon tari 'ohani ra rago i nei ra bonasia di'u dorai siri na'i heimarungi ana God.

13 I buka ra usu'i Rarabea mana Ringe ana'ia Moses ra mamaani nga'iniiai taha ra to'o tari na'i madoraa ana Jon.

14 Ma 'onaa mou hinihini'i mamaani 'isi, 'ia Jon naasia Elaija, i rarabea namou mamasia 'anai boi aho'i ta'oha.

15 Tei na to'o karinga 'anai rongo, 'ai bahunongoa mai aidangi tarihana.

16 "'E taha nawai heiha'auu 'inia nai ta'isada beiraau noni nai 'ohani? 'Iraau rau 'onaai'i gare haha'ariaria nara hainonora na'i dorani maketi. 'E ta'i ruruha nara awara o'ani 'ari tanaai nata ruruha,

17 "Ei, meu uuhi'i gana ni hainonora mamou ai'a raba mao, mameu ganari'i gana ni heitori mamou ai'a raba angi.'

18 'I'amou mou ha-ha'ariaria o'asi ro'u! 'Oha na boia Jon 'a ai'a gonohi'i waen ma matai ha'aririta'i ngau mamou 'unua do 'e adaro na bwaunia.

19 Ma na'i 'oha nau boi, Gare'i Inoni, mou re'ia do 'au matai gono waen mau matai ngaungau, mamou 'unua do'au ngangaura'a mau bweu 'ini gonohiai waen, ma do 'inau 'e saegoro adaui inoni ha-ha'atakisi miraaui inoni ta'a'i. Ma'ata, na awaha odo-odo adaa'i nei narau hinihini'i ha'ausuringa'i amiria Jon 'ai ha'ata'inia hura'ai madoma nara haa'i ha'ausuringa'i 'isi."

*Oru 'Omaa Narau Ai'a Hinihini
(Luk 10:13-15)*

20 Suri'i 'omaa na 'ia Jisas 'a haa'i ei mwani ha'abu'oahu rago, 'iraui sae ra ai'a rihosi baani'i herengadaa'i nara ai'a goro. 'Oha 'ia Jisas 'a aidangisia o'asi, 'a taesu'a i ahuna ma ha'atee o'ani,

21 "'I'amoui Koresin mi'amoui Betsaeda, 'ai ta'aa di'u tana'amou! 'Onaa ha'abu'oahu nau haa'i tana'amou ra ga'i haa'i tanaraui sae ta'a'i na'i 'omaii Taea mei Saedon, rau ga'i bwane rihosi orema mau tanaa God. Ra ga'i bwane ho'osi'i bwana do'odo'o'a mana nuga dohu 'ada'i bwaudaa'i 'anai ha'ata'inia do rau ahutotou 'ini'i ora-ora'a adaa'i.

22 Wai 'unua tana'amou, na'i 'oha na 'ia God 'ai hiiriraui noni hako, na ha'a-mama'ai nai haua tana'amou 'ai di'ua ro'u wou i ha'a-mama'ai nai haua tanaraui Taea mei Saedon.

23 "Mi'amoui Kapaniam, mou 'adoma'inia do'ia God 'ai wai'amou ara'ai aro 'anai ha'a-ahaaha'amou? 'A bwa'i! 'Iia 'ai gaasi'amou auru na'i 'eu na'i dora ni rongomaata'i. 'Onaa ha'abu'oahu nau haa'i tana'amou ra ga'i haa'i tanaraui sae ta'a'i na'i Sodom, i 'omaasi 'a ga'i ura mau tari na'i dangini.

24 Naasi wai 'unua tana'amou, na'i dangi ni hihiri, 'i ha'a-mama'ai God nai haua tana'amou 'ai di'ua ro'u wou i ha'a-mama'ai nai haua tanaraui saenai Sodom."

*Moi Boi Beia Jisas Mamoi Mamaro
(Luk 10:21-22)*

* 11:10 11:10 Malakae 3:1

²⁵ Na'i 'ohasi 'ia Jisas 'a ha'atee o'ani, "Ama, i'oe na'o marungiai aro mana ano. 'Au ha'atee ha'agorohi'o suria 'o giru'i mareho 'isi ta'iniraau nei nara madoma mara aidangi, ma'o ha'ata'ini'i tanaraau nei 'ini nara 'onaai gare.

²⁶ 'Io Ama, 'a o'asi 'inia naasi huunai hei'irisimu."

²⁷ Ma o'ani ro'u, "Na mwane mareho hako 'ia amagu 'a hau'i hako tanaau. Ai'a tanei nai huunai aidangisiai garena God, me 'iia moia Amagu. Ma ai'a tanei nai huunai aidangisiai Ama, ma'ata 'iia moi garena, miraau nei na 'inau 'au sigihiraau 'anai ha'a-aidangisiraau 'inia.

²⁸ "I'amoui nei namou wai'ate'a mamou magare 'inia suri'i amoo'i mareho nara ha'ahihi'amou 'ini'i, moi boi beiau mawai ha'a-mamaro'amou.

²⁹ Moi araisuri'i Ha'atora agu'i minau wai ha'ausuri'amou, 'inia 'inau 'au manego mawai 'abenga'i bei'amou. Moi matai mamaro,

³⁰ 'inia ni Ha'atora agu'i rai 'a'auhi'amou mara ai'a hihia."

12

Iraui Sae Rau Ororiu

Di'ua i Dangi ni Mamaro

(Mak 2:23-28; Luk 6:1-5)

¹ Na'i dangi ni mamaro 'ia Jisas mana rongoiusuri ana'i rau tahahoro na'i 'ubutadi mou wiit. 'Iraui rongoiusuri rau rahi'i tara'i kora marau ngaa'i 'inia rau hioro.

² Tara'i nei 'iniraau Farisei rau re'iraau marau o'ani 'inia Jisas, "'Ei! 'Iraau rongoiusuri amu'i rau ga'i bwa'i husi'i wiit 'isi. Na Ringe ana'ia Moses 'a ha'aabu'ai tau'aro na'i dangi ni mamaro!"

³ Mia Jisas 'a ha'atee o'ani, "'A 'ua? Mou ai'a 'oha'iniai mamaani 'inia Mwaeraha Deved mana nei rau ta'i hano na'i 'oha narau hioro?"

⁴ 'Ia Deved 'a siri na'i Ruma Maea Saira ana God marau ngaa'i brede nara ha'amaeaa. Na brede 'isi 'iraau moi Piriisi narau ga'i matai ngaa'i. Naasi rau horosia ro'u i Ringe mia God 'a ai'a taesu'a 'adaau.

⁵ 'A 'ua? 'I'amou mou ai'a 'oha'inia na'i Ringe ana'ia Moses do 'iraui Piriisi ra matai tau'aro moi na'i dangi ni mamaro? Rei'uaa narau haua o'asi, ma ai'a ta sae nai 'unua dorau taritari'a.

⁶ Mawai 'unua tana'amou, 'e ta'i maho na ororiu di'uai Ruma Maea na awa'a.

⁷ 'I'amou mou ai'a 'iraraai huunai 'ado'ado 'anai maho ra maaniai na'i Usu-usu Maea 'oha ra o'ani, 'Rei'uaa namou bwa'i suu ho'asi tanaau ma goro moi. Maho moi nau rabasia domoi haua, naasi goro 'iniraui sae.*' 'Onaa moi 'iraraai 'ado'ado 'anai mahosi, mou ga'i bwa'i ha'ahuniraui rongoiusuri agu'i 'inia maho narau haua na ai'a taritari'a.

⁸ Hoita naasi, 'inau na Gare'i Inoni, nau matai 'unu'i maho 'iraui sae ra matai haa'i na'i dangi ni mamaro, 'inia 'inau naasi Araha 'anai dangi ni mamaro."

Sae Na Mae i Rimana

(Mak 3:1-6; Luk 6:6-11)

⁹ 'Ia Jisas 'a hano baaniai dorasi ma siri na'i rumani ha'arahesi adaui Jiu.

¹⁰ 'A sadoia ei sae na rima mae. Tara'i Farisei rau raba sadoia ta maho 'anai subunia Jisas 'inia. Naasi rau songa'inia o'ani, "'A 'ua? 'A odo-odo moi na'i Ringe ana'ia Moses 'anai ha'agorohi'i aho'i sae daoha na'i dangi ni mamaro?"

* 12:7 12:7 Hosea 6:6

11 Mia Jisas 'a aramiraau o'ani, "Onaa 'oi to'oraa ta ta'i siip, mana siipisi 'ai ahoda na'i waumu na'i dangi ni mamaro. 'A 'ua? 'O bwa'i rahia ta'eha?"

12 I sae 'a ororiu di'uai siip. Naasi 'a ha'ata'inia doni Ringe ana'ia Moses 'a ha'awategaau 'anai hauai maho na goro tanaai sae na'i dangi ni mamaro."

13 Mia Jisas 'a o'ani 'inia sae na rima mae, "Oi taranga'inia hura'ai rimamu." Ma taranga'inia hura'a mana rimana 'a goro aho'i 'onaai nata rima.

14 Miraaui Farisei rau hura'a marau haai ha'aradorado 'anai ngahu ha'amaesia Jisas.

Sae Tatau'aro Na 'Ia God Na 'Ome Sigihia

15 Na'i 'oha na 'ia Jisas 'agu 'iraraai taha na 'iraaui Farisei rau 'adoma'inia 'inia, ma hano'a baaniai dorasi. 'Iraau sae rago rau hano suria, ma ha'agorohiraau hako aho'i nei ra daoha.

16 Ma'ata 'a ha'a-aburaau dorai abui maania tanaa ta sae do 'iia 'iatei.

17 'A haua o'asi ma ha'a-momori'a i taha na 'unua Rarabea Aisaea o'ani,

18 "Naani sae tatau'aro agua nau 'ome sigihia,

'au ta'ahia mau wa'ewa'e 'inia.

Wai haua tanaai Hi'ona Maea agua,

ma'ai taroha'inia tanaraau sae suri'i 'ado marau i hihiri odo-odo nawai haua.

19 'Iia 'a bwa'i heitohetohe ma bwa'i awaawara,

ma bwa'i ha'atee raha suri'i tara.

20 'A bwa'i raesiai ade na mwa'o'o

ma bwa'i kuruiai raita na gaarangi kuru.†

'Ai haua o'asi tari 'oha 'ai ha'ahehoia hako i ta'aa.

21 'Iraau hakoi saenai marewana rai wana tanaa 'anai ha'atahiraau."

Jisas 'A Mena Di'ua Saetan

(Mak 3:20-30; Luk 11:14-23)

22 Tara'i sae ra waa mai tanaa Jisas sae na kuru ma baanguu 'inia 'e adaro na bwaunia. 'Ia Jisas 'a ha'agorohia aho'i saesi mana saesi 'a taraawa'a ha'ha'atee ma 'ome'ome aho'i ro'u.

23 'Iraau sae rago rau heimwaota'i 'inia, marau heisosonga'i o'ani, "Romwane, 'iia'a gasi naani Ha'atahi nai hura'a mai baaniai burungana Mwaeraha Deved?"

24 'Oha 'iraaui Farisei rau rongoa, rau ha'atee o'ani, "'Iia 'a taari'i hura'ai adaro 'inia mena ana Saetan,‡ i mwaeraha adaui adaro."

25 'Ia Jisas 'a 'iraraai 'adoma'idaau ma o'ani 'iniraau, "Onaa 'e kantri na 'iraaui inoni rai hei'oi hairiu, na kantrisi 'ai ai'aa. Ma 'onaa 'e 'omaa ma'ua 'e ruruha na'i ruma narai awa heheihoa'a moi, i 'omaasi ma'ua ruruhasi 'a bwa'i ura.

26 Naasi 'onaa 'ia Saetan na haua tanaui mena 'anai taari adaro ma 'anai ha'ata'ai ruruha ana haaria, ni ruruha ana 'ai hako raurau moi.

27 Hoita, ma 'onaa na ga'i ha'a-momori do 'inau taari adaro hura'a 'inia mena ana Saetan, mana mena ana tei na 'iraaui rongoiusuri amoo'i narau taari adaro 'inia? Ni mena ro'u ana Saetan? Ai'a! 'Iraau rongoiusuri amoo'i rau haua 'onaai haua agua, ma ha'ata'inia do 'i'amou mou taritari'a.

28 Ma 'onaa nau taari adaro 'inia mena ana Hi'ona Maea na boi baania God 'a ha'ata'inia doni heimarungi ana God 'a taha'a bei'amou."

29 Mia Jisas 'a haua ro'u i ha'atee heiha'auu. 'A ha'atee o'ani, "Onaa 'e nei na raba taari'i hura'ai adaro, i mena ana 'ai wetewete ma'ata'a di'ua Saetan. 'A 'onaai sae na raba sirihiai ruma anai sae wetewete 'anai haa'i

† 12:20 *Bwa'i kuruiai raita na gaarangi kuru:* 'Ia Jisas 'ai 'abenga'iniraau sae ha-ha'aroha'a. 'Ai wa'ewa'e 'anai awa beiraaui ma bwa'i 'itaraau. ‡ 12:24 *Saetan:* Na'i ha'atee ni Grik ra 'unua Saetan 'inia Belsabul.

mareho ana'i, 'ai wetewete ma'ata'a di'ua ro'u i sae wetewetesi. Naasi 'aigu mwada'u tanaa 'anai siri tosiai saesi, maigui haa'i bori ana'i.

³⁰ "Iatei na ai'a aba beiau, 'a ha'ima'e beiau. Mia tei na ai'a 'a'auhiau 'anai wai'i inoni tanaa God, 'a adara'iniraaui inoni baania God.

³¹⁻³² "Mawai 'unua tana'amou, mwane maho ta'a'i na'o haa'i ma'ua 'unu'i 'ia God 'a matai 'adoma'i nugasi'o moi 'ini'i. Rei'uaa na 'oi ha'atee ha'ata'aiau i Gare'i Inoni 'a matai 'adoma'i nugasi'o ro'u. Ma'ata 'onaa 'oi ha'atee ha'ata'aiai Hi'ona Maea, 'a bwa'i matai 'adoma'i nugasi'o mwada'u, na'i 'ohani mana'i ta 'oha ro'u."

Hasi'ei Mana Huana'i
(Luk 6:43-45)

³³ "Mou ga'i 'iraraa doni hasi'ei goro 'a ha'i hua goro, mana hasi'ei ta'aa 'a ha'i hua ta'aa. 'O matai 'ome 'iraraai hasi'ei 'inia huana.

³⁴ 'I'amoui mwane mwaa ta'a'i! 'Iniai ta'aa di'u amou, 'a bwara he'ete'i domoi 'unu'i tara'i maho goro. Ni ngoo naasi na ha'arangasia hura'ai taha na honu 'inia i raromanai noni.

³⁵ Ni sae goro ra hura'a mai mareho goro baaniai ngoona, suria ni raromana 'a honu 'inia goro. Mana sae ta'aa, ra hura'a mai mareho ta'a'i baaniai ngoona, suria ni raromana 'a honu 'inia ta'aa.

³⁶ Wai 'unua tana'amou, na'i dangi ni hihiri 'ia God 'ai hiiriraaui hakoi sae 'ini'i hadahadangadaa'i nara ai'a goro narau ai'a 'adoma'inia do 'ai matai ha'a arungata'aiai nata sae.

³⁷ 'Onaa ni hadahadangamu 'a goro, 'ia God 'ai 'unua do i'oe 'e sae odo. Ma 'onaa na ta'aa, 'ia 'ai 'unua do i'oe 'e sae ta'aa."

Ra Raba 'Omesia Ta Ha'abu'oahu 'Anai

Ha'ata'inia Do 'Ia Jisas Naasi Ha'atahi
(Mak 8:11-12; Luk 11:29-32)

³⁸ Tara'i Farisei mana Ha'ausuri 'anai Ringe ana'ia Moses rau o'ani 'inia Jisas, "Ha'ausuri, 'i'ameu meu rabasia do'oi haua tana'ameu ta ha'abu'oahu."

³⁹ Mia Jisas 'a o'ani 'iniraaui, "'Iraaui inoni na'i 'ohani rau ta'aa di'u marau ai'a bonasia suria tarau a God. Rau raba 'omesiai ha'abu'oahu magu 'a bwa'i nei nawai haua tanaraau. 'E ta'i ha'abu'oahu moi narai re'ia, naasi ha'abu'oahu 'onaaiai nei na to'o tanaa Rarabea Jona.

⁴⁰ 'Ia 'a awa na'i ahunai kae ii'a suriai oru dangi mana oru rodo. 'Inau, i Gare'i Inoni, wai o'asi ro'u. Wai awa na'i hera suria ta oru dangi ma ta oru rodo ro'u.

⁴¹ Na'i dangi ni hihiri, 'iraaui saeni Ninive rai ura ara'a 'anai 'unua hura'a do 'i'amoui inoni 'ohani mou taritari'a mora. 'Inia na'i 'oha na 'ia Jona 'a heitaroha'i tanaraau, 'iraaui rau rihosi baani'i ora-ora'a adaa'i. Mawai 'unua tana'amou, 'e nei na ororiu di'ua ro'ua Jona na ataha'a bei'amou, mi'amou ai'a raba rihosi baani'i ora-ora'a amou'i.

⁴² Na'i dangi ni hihiri, ni urao mwaeraha baaniai Shiba 'ai ura ara'a mai 'unua do 'i'amoui inoni 'ohani mou taritari'a mora. 'Inia rei'uaa na awa ha'atau 'ari nata aba 'inia marewana, me 'ia 'a boi 'anai baturongoi mwane ha'ausuringa'i ana'ia Mwaeraha Solomon. Minau wai 'unua tana'amou, 'e nei na ororiu di'ua ro'ua Solomon na ataha'a bei'amou mamou ai'a raba baturongoa."

Heiha'auu 'Iniai Herenganai Adaro
(Luk 11:24-26)

⁴³ Mia Jisas 'a o'ani ro'u, "Na'i 'oha na adaro 'a hura'a baaniai noni, 'ia 'a hano 'ari suriai dora mangasara 'anai siba dorani mono. Ma 'onaa na bwa'i sadoia ta dora,

⁴⁴ 'ia 'aigui o'ani 'inia haaria, 'Wai aho'i 'ari mawai siri aho'i na'i sae nau hano baania ani.' Na'i 'oha na aho'i wou 'a re'ia dona tahinganai saesi 'a 'onaa ruma na bwaranga nara tatara 'orima'inia goro mara nuga ha'a-odoodo'i goroi mwane mareho na'i raronai.

⁴⁵ Na'i 'oha na 'omesia o'asi, 'agu 'ari 'anai waia ro'u mai beia i biu adaro narau ta'aa di'u ro'u wou baania. Na'i 'oha narau siri 'anai mono na'i raronai saesi, ni saesi 'a ta'aa di'u ro'u wou baaniai na'o. 'T'amou moi o'asi ro'u, 'i'amoui sae ta'aa na'i madoraani."§

Inana Jisas Mana Do'orana'i
(Mak 3:31-35; Luk 8:19-21)

⁴⁶ 'Oha 'ia Jisas 'a mamaani mau tanaraau sae rago, 'ia inana miraau do'orana'i rau boi marau ura na'i abau 'omaa, 'inia rau raba hadahada beia Jisas.

⁴⁷ Ma'e ta'i sae na o'ani 'inia Jisas, "Ia inamu miraau do'oramu'i neirau hura'asi, rau raba hadahada bei'o."

⁴⁸ Mia Jisas 'a o'ani, "Iatei inagu miraaua tei do'oragu'i?"

⁴⁹ Ma usuraau rongoiusuri ana'i ma o'ani, "Niraauni inagu mana do'oragu'i.

⁵⁰ 'Iatei na hauai taha Amagu na'i aro na 'irisia do 'ai haa, naasi huunai do'oragu mana asigu mana inagu."

13

Mamaani 'Iniai Sae Na Rarasa
(Mak 4:1-9; Luk 8:4-8)

¹ Mana'i maui dangisi 'ia Jisas 'a hura'a baaniai ruma ma hura'ai bobonai bwera i Galili. 'A heinagu auru 'anai ha'ausuriraau noni.

² Miraau sae rago rau ruru mai garigaria. Ma ta'e ara'a na'i ora ma heinagu na'iei miraau sae rago rau ura na'i one 'anai bahurongoa.

³ Ma haa'i ha'atee heiha'auu 'anai ha'ausuriraau. 'A o'ani, "'E 'oha na 'e ta'i sae na hura'a 'anai hasi korai wiit na'i mou ana.

⁴ Ma na'i 'oha na rarasanga'ini'i kora, ra'i nei nara to'o na'i tara mana gere manu ra dio mara ngaa'i.

⁵ Tara'i nei ra to'o na'i dora hauhau'a, dora na ano 'a ai'a raha mara tahi. Mana 'oha ra tahi, ra tahi goro ga'u moi.

⁶ Mana 'oha na sina 'a raorao di'u, ra nugu mara mae aho'i moi, 'inia raridi ra ai'a ganu dio.

⁷ Ma tara'i kora ra to'o na'i dora ra tahi bei'i warorarakiki. Ma na'i 'oha ra tahi ara'a, na warorarakiki 'a agu ha'amaesi'i.

⁸ Mana kora ra to'o na'i ano goro, ra tahi goro mara hungu. Tara'i nei ra'i 'arangi hua, tara'i nei ra'i ono tangahuru, ma tara'i nei ra'i oru tangahuru."

⁹ Maagu o'ani ro'u, "Tei na to'o karinga 'anai rongo 'ai bahurongoa mai aidangi tarihana."

Taranai Taha Jisas Na Haa'i 'Ini'i

§ 12:45 12:43-45 'Onaa 'iraau sae ta'a'i rau bwa'i ha'ahonu'i tahingadaa'i 'ini'i mareho goro na maani'i a Jisas, rai ta'aa di'u baaniai na'o. Rai 'onaaiai sae na'i mamaanini. Ni saesi 'a ai'a ha'ahonuui tahingana 'ini'i tara'i mareho goro ma ai'a ore mana mwani adaro rago ra boi aho'i 'anai sirihia.

Ha'atee Heiha'auu
(Mak 4:10-12; Luk 8:9-10)

¹⁰ 'Iraaui rongoiusuri ana'ia Jisas rau boi beia marau o'ani, "Ni 'uaana na'ogu haa'i 'ini'i ha'atee heiha'auu na'i 'oha na'o ha'ausuriraau sae?"

¹¹ Mia Jisas 'a aramiraau o'ani, "Na'i na'o, 'ia God ara'ai aro ai'a ha'arangasia he'uai marungiraau nai haa i noni ana'i. Me na'i 'ohani 'a ha'ata'inia tana'amou. Mei tanaraaui nei nara ai'a hinihinia God, 'a ai'a haua o'asi tanaraau.

¹² 'Iatei na raba aidangisia God, 'ia God 'ai a'oia tanaai aidangi na bwane to'ora mai aidangisia goro. Mia mo'o na ai'a raba aidangisia God, na gere aidangi na to'ora, 'ia God 'ai rahia baania.

¹³ 'Inau 'au haa'i ha'atee heiha'auu tanaraaui sae 'isi neina rei'uaa narai towa'i 'ome'ome, marau bwa'i matai 'ome 'iraraa, ma'uasi rai towa'i bahurongo, marau bwa'i rongo 'iraraa ma'ua aidangisia.

¹⁴ 'Au haua o'asi ma ha'a-momori'a i maho na 'unua Rarabea Aisaea o'ani, "Iraaui sae rai bahurongo marai bahurongo marau bwa'i aidangisia ta maho,

rai 'ome marai 'ome marau bwa'i 'ome 'iraraa ta maho.

¹⁵ Rau ha'ababau'i 'adoma'idaa'i, marau ai'a rongorongo goro 'ini'i karingadaa'i, marau kuruha'ini'i maadaa'i.

'Onaa 'a ga'i bwa'i o'asi, rau ga'i 'ome 'irara'i mareho 'ini'i maadaa'i, marau ga'i rongo 'irara'i mareho 'ini'i karingadaa'i, marau ga'i aidangisi'i mareho 'ini'i 'adoma'idaa'i, marau ga'i rihota'i tanaau,

mawai ha'agorohiraau baaniai taha na sadoiraau.' **

¹⁶ Mia Jisas 'agu o'ani 'iniraau rongoiusuri ana'i, "Ia God 'a ha'agorohi'amou 'inia mou aidangisi'i taha namou rei'i 'ini'i maamoo'i mamou aidangisi'i taha mou rongo'i 'ini'i karingamoo'i.

¹⁷ Ha'amomori! Wai 'unua tana'amou, 'a ragoi rarabea mana sae odo-odo nara mae hako'a narau raba 'omesi'i taha namou rei'i, maraugu ai'a 'omesi'i. Marau raba rongo'i mareho namou rongo'i, maraugu ai'a rongo'i."

'Ia Jisas 'A Maani Ruhasiai 'Ado'ado

'Anai Sae Na Rarasa
(Mak 4:13-20; Luk 8:11-15)

¹⁸ "'Ohani moi bahurongo mamoi rongoai taha naasi 'ado'ado 'anai mamaani 'iniai sae na rarasanga'ini'i kora.

¹⁹ I kora ra to'o na'i tara ra ura 'iniraau nei ra rongoai taroha 'abaiai heimarungi ana God maraugu ai'a aidangisia. 'Agu boi moia Saetan ma ha'a-ai'aa'a baani'i 'adoma'idaa'i.

²⁰ I kora ra to'o na'i ano na hauhau'a 'a ura 'iniraau nei ra rongoai ha'atee ana God marau daua raurau ha'i wa'ewa'e.

²¹ Marau ai'a daua orea 'inia na ha'atee 'a ai'a ganu dio na'i tahingadaa'i 'onaai hasi'ei nara ai'a ganu auru i raridi. 'Oha na mwani maho ra bwara mara ha'a-mama'airaau 'iniai suria adaau i ha'atee ana God, raugu rihota'i aho'i.

²² I kora ra to'o na'i 'uruhanai waroraraki 'a ura 'iniraau nei ra rongoai ha'atee ana God maagu tahingadaau 'a ta'aabedaaui 'ini'i maho rai tahi 'ini'i na'i marewanani, marau bweu suriai toto'ora ni marewana. Tarana naasi, ni ha'atee ana God 'a ai'a tahi na'i tahingada ma ai'a ha'i hua.

* 13:15 13:14-15 Aisaea 6:9-10

²³ I kora ra to'o na'i ano goro 'a ura 'iniraaui nei ra rongoai ha'atee ana God marau aidangisia goro. Mana mwane maho goro ra hura'a baani'i tahingadaa'i 'onaai hungu goro ra hahaa'i hasi'ei. Tara'i nei ra'i 'arangi hua, tara'i nei ra'i ono tangahuru, ma tara'i nei ra'i oru tangahuru."

Ha'atee Heiha'auu 'Iniai Hahaarisi Ta'aa

²⁴ Mia Jisas 'a haua ro'u i mamaani heiha'auu o'ani, "Ni heimarungi ana God na awa na'i aro 'a 'onaai taha na to'o tanaai sae na rarasanga'ini'i kora goro na'i mou.

²⁵ Na'i rodo, 'oha ra mauru hakoi sae, 'e maeronga na boi ma rarasanga'ini'i ro'u i korai hahaarisi ta'aa ma hano'a.

²⁶ Na'i 'oha na korai wiit ra tahi ara'a mara hungu, ra'i hahaarisi ta'a'i ra tahi ro'u ara'a bei'i.

²⁷ 'Iraaui sae tatau'aro ana'i rau boi marau o'ani, 'Saemaua, i'oe 'o rarasanga'ini'i moi korai wiit na'i mou amua. Na'i hei naragu boi ro'u ei hahaarisi he'ete'i 'isi?'

²⁸ "Mia aramiraau o'ani, 'E maeronga nagu boi rarasanga'ini'i ro'u i hahaarisi ta'aa 'isi.'

"Miraau o'ani 'inia, "O 'irisia domei rangu gata'ini'i hahaarisi ta'a'i 'isi?'

²⁹ "Mia o'ani 'iniraaui, 'Moi abu, mou gasi rangu goni'i wiit.

³⁰ Nugaa moi marai tahi goni. Na'i 'oha 'anai ha'igoni'i nawaigui 'unua tanaraaui sae tatau'aro agu'i marai rangu'i'i ga'u i hahaarisi ta'a'i. Rai ha'abobo'i marai suungi'i maraigui ha'igoni'i ro'u i wiit 'anai nuga taguma'ini'i na'i ruma.' "

Rago Anai Sae Narai Awa Bahainai

Heimarungi Ana God

(Mak 4:30-32; Luk 13:18-21)

³¹ Mia Jisas 'a haua ro'u i nata ha'atee heiha'auu. 'A o'ani, "Na heimarungi ana God na awa na'i aro 'a 'onaai koranai hasi'ei nara 'unua 'inia mastad nara hasia na'i mou.

³² Rei'uaa na kekerei baani'i hakoi mwani taraani kora, 'oha na tahi ara'a 'a kae raha di'u'i hakoi mwane mareho nara hasi'i na'i mou. 'A aho'ita'i hasi'ei mana raraana ra raha 'ohadi manu 'anai nu'i suri'i."

³³ 'Ia Jisas 'a haua ro'u i ha'atee heiha'auuni, "Na heimarungi ana God na awa na'i aro 'a 'onaai urao na dorariai gere dorai draebam beiai ta'i baegi flaoa bubu. Na'i muri, na gere dorai draebamusi 'a ha'asu'uai flaoa ma ha'arahaa'a."

³⁴ 'Ado mamaani na haa'ia Jisas tanaraaui noni hunga, 'a hau'i 'ini'i ha'atee heiha'auu. Ai'a ta mamaani nai haua do'a bwa'i haua 'inia ha'atee heiha'auu.

³⁵ Naasi ma to'o'a i ha'atee rarabea na o'ani, "Wai mamaani tana'amou 'inia ha'atee heiha'auu mawai maani ruhasi'i taha ra awa bainihu mau mai taraawa'anai ha'apwa'araa adai marewana."†

'Ia Jisas 'A Maani Ruhasiai 'Ado'ado

'Anai Hahaarisi Ta'aa

³⁶ Mia Jisas 'a hano baaniraau noni hunga ma siri ruma. Miraau rongoiusuri ana'i rau boi beia marau o'ani 'inia, "'Oi mamaani ha'a-aidangisi'ameu 'inia 'ado'ado 'anai hahaarisi ta'aa nara tahi na'i moui wiit."

³⁷ 'Ia Jisas 'a o'ani 'iniraaui, "'Ia mo'o na rarasanga'ini'i kora goro, naasi 'inau na Gare'i Inoni.

† 13:35 13:35 Psalm 78:2

³⁸ I mou naasi marewana. Kora goro naasi 'iraau nei narau awa bahainai heimarungi ana God. Hahaarisi ta'aa neiraausi nei ana'ia Saetan.

³⁹ I maeronga na rarasanga'ini'i korai hahaarisi ta'a'i na'i moui wiit, naasia Saetan. Madoraa ni ha'igoni naasi ha'ahakonai dangi. 'Iraau nei 'anai ha'igoni neiraausi enjel.

⁴⁰ "Onaai rahi'i adaa'i hahaarisi ta'a'i mara suu gata'ini'i, 'ai o'asi ro'u na'i ha'ahakonai dangi.

⁴¹ 'Inau na Gare'i Inoni, wai ha'ataari'i hura'ai enjel agu'i marai rahi'i hura'a baaniai heimarungi agua 'i sae ora-ora'a mana nei narau ha'atehaai nata nei.

⁴² Marai gaasiraaui siri na'i 'eu ngarungaru na raorao. Na'isi naraigu angiangi na'i ei marai 'ara-ngingita'i rihodaa'i 'inia maata'i.

⁴³ Miraau sae odo-odo rai rara 'onaai sina na'i hourana ana Amadaau. 'Ia tei na'o to'o karinga 'oi bahurongo ma'oi aidangi tarihana."

Ra'i Ha'atee Heiha'auu

'Iniai Heimarungi Ana God

⁴⁴ 'Ia Jisas 'a o'ani, "I heimarungi ana God na awa na'i aro 'a 'onaai mareho ororiu na awa na'i ano. I sae na sadoia, 'a wa'ewa'e di'u ma ahunia aho'i ma 'ari raonga'ini'i hakoi mwane mareho ana'i do'ai to'ora ha'a arari, ma'ai horiai dorai ano na awai mareho ororiusi ma do'ai to'ora nana.

⁴⁵ "I heimarungi ana God 'a 'onaa ro'u i sae raoraonga'i buri magu sibasiba 'ini'i nei goro 'anai hori'i.

⁴⁶ 'Oha na sadoiai nei na goro di'u na bwara di'ui horihorina, 'a aho'i ma raonga'ini'i hakoi bori ana'i ma 'ari 'anai horiai burisi.

⁴⁷ "Ma ro'u i heimarungi ana God 'a 'onaai hu'o na 'iraau sae ahu-ahuasi rau arasia na'i asi, na namoiwou ta taraani ii'a he'ete'i hairiu nara to'o na'i ei.

⁴⁸ Mana 'oha na honu, ra ogea tarau na'i one, mara heinagu 'anai hoai'i nei goro baani'i nei ta'a'i. Na nei goro ra nuga taguma'ini'i suri'i abira, mana nei ta'a'i ra gaasi'i.

⁴⁹ 'Ai o'asi ro'u i here rai hauai enjel na'i ha'ahakonai dangi. Rai hoairaaui sae odo-odo baani'i sae ta'a'i.

⁵⁰ 'Iraau sae ta'a'i rai gaasiraaui siri na'i 'eu ngarungaru na raorao. Na'i 'isi rai angiangi marai 'ara ngingita'i rihodaa'i 'inia maata'i."

⁵¹ 'Ia Jisas 'agu songa'iniraaui rongoiusuri ana'i o'ani, "Mou 'irara'i 'ado'ado 'ada'i ha'atee heiha'auu 'ini?" Miraau o'ani, "Meu 'irara'i."

⁵² Maagu o'ani 'iniraaui, "Hoita, 'iatei sae na aidangisi'i Ringe ana'ia Moses ma aidangisia ro'u i ha'ausuringa'i haoru 'inia heimarungi ana God na awa na'i aro, 'a 'onaai sae na matai rahi'i hura'a baaniai ruma ana i mwane mareho goro he'ete'i hairiu. I mareho haoru mana nei bwani."

'Iraau Saeni Nasaret

Rau Ai'a Hinihinia Jisas (Mak 6:1-6; Luk 4:16-30)

⁵³ Na'i 'oha 'ia Jisas 'a haa'i hakoi mwani ha'atee heiha'auu 'ini, 'a hano baaniai dorasi

⁵⁴ ma aho'i 'ari 'omaa ana na'i Nasaret. 'A siri na'i rumani ha'arahesi 'anai ha'ausuriraaui noni hunga, mana 'oha rau rongoai ha'ausuringa'i ana rau heimwaota'i di'u. Miraau o'ani, "A 'ua na madoma di'u 'inia mo'oni? 'Iatei na haua tanaa i mena na haa'i 'ini'i mwani ha'abu'oahu 'isi?

⁵⁵ Gau 'iraraa do'ia mo'osi 'e gare ana moi kapentaa. 'Ia Meri naasi inana, mana do'orana'i 'iraaua Jems, Josep, Saemon mia Jiudas.

⁵⁶ Mana asina'i ra awa ro'u na'i 'omaani. 'A he'ua na 'irara'i 'ini'i maho 'isi a mo'osi?"

⁵⁷ Naasi rau 'itaa Jisas marau ai'a raba hinihinia. Mia Jisas 'a o'ani 'iniraaui, "I rarabea ra ha'ahoua suri'i mwani 'omaa hako. Ta'i moi, na'i 'omaa ana miraaui huudi sae ana'i naraugu ai'a."

⁵⁸ Na'i 'omaa anasi ai'a ha'abu'oahu rago naigui haua, 'inia rau ai'a hinihinia.

14

'Ia Herod 'A Ngahu Ha'amaesia

Jon Bwareomaea

(Mak 6:14-29; Luk 9:7-9)

¹ Na'i 'oha 'ia Herod Antipas, 'i Mwaeraha 'anai Galili, 'a rongo tarohana Jisas,

² 'a o'ani 'iniraaui sae tatau'aro ana'i, "'Iia gasi a Jon Bwareomaea na tahi aho'isi baaniai mae. Naia na haa'i 'ini'i mwane ha'abu'oahu rago 'isi."

³⁻⁴ Na'i na'o wou, 'oha na tahi mau a Jon, 'ia Herod 'a waina Herodias, urao ana ga'u a Pilip, mia Pilip 'e do'orana Herod. 'Oha 'ia Jon 'a 'unua tanaa Herod do 'a ai'a odo-odo do'ai wainai urao na waina ga'u i do'orana, 'ia Herod 'a taesu'a ma 'unua tanaraaui sae hehei'oi dorai daua Jon. Rau ho'osia 'inia arihau marau nugaa na'i rumaniho'o.

⁵ 'Ia Herod 'a raba ha'amaesia Jon magu magugu 'iniraaui noni hunga, rau gasi ha'ato'oa ta ha'agogoru 'inia rau aidangisia do 'ia Jon 'e rarabea.

⁶ Hoita, na'i dangi ra ngaugoni 'anai 'adoma'i aho'isiai dangi na huta Herod, 'e gare urao ana Herodias 'a siri mai mao 'anai ha'a-reirei'araau, mia Herod 'a wa'ewa'e di'u 'anai reireia.

⁷ 'A hauai duruduru na wetewete tanaa do'ai haua tanaa namoiwou ta mareho nai 'irisia.

⁸ Me suriai hei'irisiinai inana, i gare uraosi 'a o'ani, "'Au 'irisia dorai haua tanaa i bwauna Jon Bwareomaea na'i ta rabo'o papaheta'a."

⁹ 'Ia Herod 'a ahutotou ma 'adoma'i aho'i, ma bwara'a 'inia 'a bwane haua'a i duruduru ma bwara'a ro'u do'aigui horosia na'i maadaaui sae na ari'ahuraaui. Mia Herod 'a ha'atoraraaui sae hehei'oi dorai ha'a-'osia'a.

¹⁰ Naasi rau 'ari rumaniho'o marau o'iai 'u'una Jon Bwareomaea.

¹¹ Rau waia mai bwauna na'i rabo'o tanaa gare urao ana Herodias maagu waia 'ari tanaa inana.

¹² 'I abena Jon 'iraaui rongoiusuri ana'i naraugu boi waia narau 'ari toringia. Na'i muri naraugu taroha'inia tanaa Jisas 'i mareho na to'osi.

Jisas 'A Hanganiai Rima Merui Mwane

(Mak 6:30-44; Luk 9:10-17; Jon 6:1-14)

¹³ Na'i 'oha na 'ia Jisas 'a rongoai mae ana Jon Bwareomaea, 'a ta'e haaria na'i ora ma 'ari na'i dora bwaranga na ai'a ta sae nai awa iei. 'Oha na 'iraaui sae rago raugu 'iraraai dora na 'ari iei a Jisas, rau hano baani'i 'omaa adaa'i marau hatare haisuri.

¹⁴ 'Oha nagu 'oto wou na'i one ma re'iraaui sae rago rau heimamasi, 'a ta'ahiraaui ma ha'agorohiraaui aho'i nei ra daoha.

¹⁵ 'Oha na gaarangi suu'a i sina, 'iraaui rongoiusuri rau boi beia Jisas marau o'ani 'inia, "'A gaarangi rodo'a naani! 'Oi ha'ahanoriraaui aho'i sae 'ini marai 'ari suri'i 'omaa 'anai hori 'adaau mahoingau. 'Inia dorani 'a ai'a ruma'a."

¹⁶ Mia Jisas 'a o'ani, "'A ai'a goro dowai ha'ahanoriraaui, 'i'amou namoi ha'i 'adaau mahoingau."

17 Miraau i rongoiusuri rau o'ani, "E rima gere huai bre di mana rua ii'a moi na bei'ameuni."

18 Mia Jisas 'a o'ani, "Moi haa'i mai tanaau."

19 'A ha'a-heinagusiraau i sae 'isi na'i mwane hahaarisi maagu dauai rima huai bre di mana rua ii'a. 'A wana ara'ai aro ma ha'atee ha'agorohia God 'inia. Ma uubi'i bre di 'isi maagu haa'i tanaraau i rongoiusuri naraugu ha'atora'ini'i tanaraau i sae rago.

20 'Iraau hako rau ngau masu mana mahoingau narau ngau tahi'i rau si'o ha'ahonua 'inia i ta'i tangahuru mana rua abira.

21 'A 'onaai rima merui saemwane narau ngau masu hako ha'atai na'i dangisi. Ni urao mana gare ra ai'a uduma'iniraau.

22 Na'i muri 'ia Jisas 'a o'ani 'iniraau i rongoiusuri ana'i, "Moi ta'e na'i ora ma moi gagaau 'ari nata batarau. 'Inau wai awa ga'u." Naasi mia Jisas 'a awa moi beiraau i kae ruruhai saesi tari 'oha na ha'ahanoriraau aho'i 'ari suri'i 'omaa adaai.

23 'Oha na ha'ahanoriraau hako i sae, 'a ta'eha haaria na'i hungahunga 'anai ha'arahesi. Ma su'urahi'a. Mia Jisas 'a awa mau haaria na'isi.

'Ia Jisas 'A Hahano Na'i Hunganai Wai
(Mak 6:45-52; Jon 6:15-21)

24 Na'i 'ohasi 'iraau i rongoiusuri rau hano ha'atau'a na'i ora baaniai one. Na tabaosi ra raha di'u mara abwao ta'eha huniraau na'i ora 'inia rau hano suaai ro'a raha.

25 Na'i wa'aria 'ia Jisas 'a boi beiraau i rongoiusuri ana'i, 'a hahano na'i hunganai wai.

26 'Oha rau 'omesia rau 'adoma'inia do'e anoa. Rau mamaa'u di'u marau awaawara.

27 Mia Jisas 'a o'ani 'iniraau, "'Ai abui ta'aabemoou! 'Inau moia Jisas na! Moi abui mamaa'u."

28 Mia Pita 'a o'ani, "Araha, 'onaa i'oe ha'a-momori ma'oi 'unuau mawai 'ariwou bei'o na'i hunganai wai."

29 Mia Jisas 'a o'ani, "'Oi boi."

Mia Pita 'a dio baaniai ora ma hahano 'ari beia Jisas na'i hunganai wai.

30 'Oha 'ia Pita 'agu 'omesi'i tabaosi, naasi ma mamaa'u ma taraawa'a dodo'a. Mia Pita 'a awara, "Araha, 'oi 'a'auhiau!"

31 Na'i mau 'ohasi mia Jisas 'a ta'ara wou ma daua ara'a Pita, 'a o'ani 'inia, "Hinihinimu 'a kekerei! 'A 'ua na'o 'adoma'i heiruarua'a 'inia?"

32 Na'i 'oha 'ia Pita mia Jisas rarugu ta'e ara'a na'i ora, mana ro'a 'a papaku'a.

33 'Iraau i rongoiusuri narau awa na'i ora raugu re'ia o'asi marau ha'arahesia Jisas, rau o'ani, "Ha'amomori, i'oe garena God."

'Ia Jisas 'A Ha'agorohiraau Aho'i

Sae Daoha Na'i Genesaret
(Mak 6:53-56)

34 Jisas mana rongoiusuri ana'i rau haruta 'ari nata batarau ma rau 'oto na'i dora ra 'unua 'inia i Genesaret.

35 Na'i 'oha na 'iraau i sae rau 'ome 'iraraa Jisas, 'a ai'a orea mana taroha 'inia i ada rau haa 'a 'adarara'a 'ari suriai dorasi. Miraau i sae ra wairaa'u a mai sae daoha tanaa Jisas 'anai ha'agorohi'i aho'i.

36 'Iraau i sae daoha rau bongahua Jisas dorai karohia moi gaonai to'oni tewa ana. 'Iraau nei rau haua o'asi rau goro aho'i baani'i daoha nara to'iraau.

15

Ha'ausuringa'i Baaniraau Jiu 'Ohai Na'o (Mak 7:1-13)

¹ Tara'i Farisei mana Ha'ausuri 'anai Ringe ana'ia Moses rau boi baaniai Jerusalem 'anai songa'inia Jisas.

² Rau o'ani 'inia, "Ni 'uaana na 'iraaui rongoiusuri amu'i rau horosia 'inia i ha'ausuringa'i narau ha'adiohi'i mai tanagaau i wauwa agaa'i na'i 'ohai na'o? Rau ai'a suriai huunai herehere 'anai dorima maraigu ngau."

³ Mia Jisas 'a aramiraaui o'ani, "Mi'amou, ni 'uaana namou horosia 'inia Ha'atora ana'ia God mamougu suri'i moi 'inia i ha'ausuringa'i amoo'i haari'amou?"

⁴ Mou 'iraraa do 'ia God 'a bwane 'unua o'ani, "Oi ha'ahoua amamu mea inamu' ma o'ani ro'u, 'Tei na 'unu ha'ata'aia amana mea inana rai ha'amaesia.'

⁵⁻⁶ Me'imou mou 'unua dona 'a odo-odo moi 'onaa tanei 'ai o'ani 'inia inana mia amana, 'Ha'a-arohai'amurua, 'au ga'i 'a'auhimurua 'ini'i maho nau to'ora'i. Me 'au bwa'i 'a'auhimurua'a. Suria maho nau to'ora'i ra maea'a. 'Inia 'au bwane wate'i tanaa God.' Ma naasi mou here 'onaa do ha'ausuringa'i amoo'i ra ororiu di'uai Ha'atee ana God.

⁷ "Mou here 'onaa domou goro, ma'ata ai'a! Maho na 'ia Aisaea 'a ha'atee rarabeanga'inia, 'a to'i'amou ha'a-momori'a.

⁸ 'A 'unua o'ani,
"Iraau sae 'ini rau ha'ahouau 'ini'i ngoodaa'i,
magu 'adoma'idaa'i ra awa ha'atau di'u baaniau.

⁹ I ha'arahesi adaa'i ra 'ari pwaranga,
'inia rau orisi'i Ha'atora ana'ia God 'ini'i ha'ausuringa'i adaa'i haraariraaui
na inoni moi na haa'i.' "*"

Ha'ausuringa'i 'Iniai Maho Na Matai

Ha'ado'o'aaui Sae Na'i Maana God (Mak 7:14-23)

¹⁰ Mia Jisas 'a 'unuraau noni hunga magu o'ani 'iniraau, "Moi baturongo goro mamoi aidangisiai taha nawai 'unua tana'amou.

¹¹ I mahoingau na'oi ngaua 'a bwa'i matai ha'ado'o'a'o na'i maana God. Naia na maho na'o 'unu'i nara hura'a baaniai ngoomu na matai ha'ado'o'a'o."

¹² 'Iraau rongoiusuri ana'ia Jisas rau boi beia marau o'ani, "Iraau Farisei rau arunga ta'aa 'inia maho na'o 'unua ani."

¹³ Mia aramiraaui o'ani, "Adonai hasi'ei na ai'a hasi'i a Amagu, 'ia Amagu 'ai rangu gata'ini'i.

¹⁴ Naasi 'ai abui ta'aabemou 'iniraau Farisei. 'Iraausi rau 'onaa sae kuru na uruai nata sae kuru, 'irarua hako rarui ahoda dio na'i giru."

¹⁵ 'Ia Pita 'a 'unua tanaa Jisas o'ani, "'Oi mania tana'ameui 'ado'ado 'anai maho na'o 'unua ani, do sae 'a bwa'i matai do'o'a na'i maana God 'inia moi mahoingau na ngaua."

¹⁶ Mia Jisas 'a o'ani 'inia Pita, "'A 'ua? 'O ai'a aidangisia mau?"

¹⁷ 'O ai'a 'iraraa do maho na'o ngaua 'a dio na'i bwahurimu ma hura'a aho'i baaniai abemu?"

¹⁸ 'I maho ta'aa na 'unua i sae 'a hura'a baaniai raromana, ma naia na matai ha'ado'o'aa na'i maana God.

* 15:9 15:8-9 Aisaea 29:13

¹⁹ Baaniai raromana na hura'a mai ei 'ado'ado ta'aa, 'onaai heingahu, taritari'a baaniai urao amua ma'ua mwane amua, wawaasua'a, beri, pwapwaari'i, mana 'unu ha'ata'aiai nata sae.

²⁰ Nara 'isi mareho na matai ha'ado'o'aa sae na'i maana God, ai'a do 'inia ngau ha'i ai'a dorima."

'E Urao Na Ai'a Jiu Na Hinihinia Jisas

(Mak 7:24-30)

²¹ 'Ia Jisas 'a hano baaniai dorasi, 'a 'ari suriai dora gaarangiai kae 'omaai Taea mana Saedon.

²² Ma 'e urao na ai'a Jiu na awa 'isi. 'Iia baaniai burungana Kenan. 'A boi beia Jisas ma o'ani, "Araha, pwirana Deved. 'Oi arunga ta'ahiau ma'oi 'a'auhiau! Gare urao agua, 'i adaro 'a bwaunia. 'A here ha'ata'aia di'u ma rongomaata'i raha."

²³ 'Ia Jisas 'a ai'a aramia 'inia ta ta'i ha'atee. Miraau rongoiusuri rau ha'ata'u'ua Jisas o'ani, "'Oi ha'ataaria aho'i mai hano'a wou. 'Inia 'iia 'a surigaau moe'a magu wamoi ta'i awara."

²⁴ Mia Jisas 'a o'ani 'inia uraosi, "'Ia God 'a ha'ataariau mai 'anai 'a'auhiraau moi Jiu narau 'onaai siip nara tari baaniai 'omesuri siip. 'Au ai'a boi 'iniraau nei narau ai'a ha'i saeni Jiu."

²⁵ Mana uraosi 'a boi ma topira'i ruru na'i maana Jisas ma o'ani 'inia, "'Oi boi ma'oi 'a'auhiau Araha."

²⁶ Mia Jisas 'a o'ani 'inia, "'A ai'a arari dorai haa'i mahoingau adaa'i gare ma do raigui gaasi'i 'ada'i misu."†

²⁷ Mana uraosi 'a ha'atee o'ani, "'O ha'atee ha'a-momori. Ma'ata 'iraau misu rau matai ngaa'i ro'u moi mamamo i mahoingau nara ahoda baaniai hunganai dora ngaungau adaa'i sae nara to'oraraau."

²⁸ Mia Jisas 'a o'ani 'inia, "Urao, 'i hinihinimu 'a wetewete di'u! 'I mareho na'o 'irisiasi wai haua tana'o." Na'i mau na'i 'ohasi mana gare anai uraosi 'a goro'a aho'i.

Jisas 'A Ha'agorohi'i Aho'i

Mwani Sae Daoha

²⁹ 'Ia Jisas 'a hano baaniai dorasi ma aho'i 'ari suriai bobonai kae bwera i Galili. 'A ta'eha na'i hungahunga ma heinagu na'iei.

³⁰ Kae ruruhai sae rau boi beia, rau waa'i mai tanaa i sae pwaki, 'iraau sae kuru, 'iraau sae ta'ata'a'i, 'iraau sae baanguu mana nei haru daoha hehe'ete'i ro'u na to'iraau. Rau ha'adaohiraau na'i gaarangiai uwana'i a Jisas mia Jisas 'a ha'agorohiraau aho'i hako.

³¹ 'Iraau sae rago rau 'omesiai haua ana o'asi a Jisas marau heimwaota'i di'u. 'Iraau nei ra baanguu ga'u rau ha-hadahada'a, 'iraau sae ta'ata'a'i ra goro'a, 'iraau nei ra pwaki ra hahano hairiu, miraau nei ra kuru ga'u rau wanawana'a. 'Iraau sae rago rau ha'a-aneanea God adaaui Israel.

'Ia Jisas 'A Hanganiai Hai Merui Saemwane

(Mak 8:1-10)

³² 'Ia Jisas 'a 'unuraau rongoiusuri ana'i ma o'ani 'iniraau, "'Au ta'ahiraau sae 'ini, 'inia 'e oru dangi narau awa'a 'ini beigaau ma na'i 'ohanisi raugu ai'a to'o mahoingau'a 'anai ngau. Maugu ai'a raba ha'a-taariraau ha'i hioro 'ari suri'i 'omaa adaa'i. Rau gasi dionga'i suri tara."

† 15:26 15:26 Ni 'ado'ado 'anai tatarani 'a o'ani: 'Iraau gare ra ura 'iniraau Jiu. Mana misu 'a ura 'iniraau nei ra ai'a Jiu. 'Ia Jisas 'a 'unua do 'a raba 'a'auhiraau moi Jiu. 'A ai'a arari do 'ai nugasiraau Jiu mai 'a'auhiraau nei ra ai'a Jiu.

³³ 'Iraau rongoiusuri rau o'ani 'inia Jisas, “Na'i hei na'i dora mangasarani nagau ga'i ha'i mahoingau arari 'ada'i mwane sae 'ini?”

³⁴ Mia Jisas 'a songa'iniraaui o'ani, “E siha huai brede na bei'amou?” Ma rau aramia o'ani, “E biu hua moi ma ra'i gere ii'a.”

³⁵ 'Ia Jisas 'agu 'unua tanaraau sae 'anai heinagu dio na'i ano

³⁶ ma dauai biu hua brede mana ii'a 'isi. Mana 'oha na ha'atee ha'agorohia hako a God 'ini'i, 'a uubi'i ma haa'i tanaraau rongoiusuri ana'i naraugu ha'atora'ini'i tanaraau sae.

³⁷ 'Iraau hako rau ngau masu. Rau si'ohi'i dora i mahoingau narau ngau tahi'i, rau ha'ahonuai biu abira.

³⁸ 'Iraau sae narau ngau na'i 'ohasi 'e hai merui saemwane. Ra ai'a uduma'ini'i urao mana gare.

³⁹ 'Ia Jisas 'a ha'ahanoriraaui aho'i sae 'isi, maagu ta'e na'i ora beiraaui rongoiusuri ana'i. Rau 'ari na'i dora ra 'unua 'inia Magadan.

16

'Iraui Saemaua Adaa'i Jiu

Rau Raba 'Omesia Ta Ha'abu'oahu (Mak 8:11-13; Luk 12:54-56)

¹ Tara'i Farisei mana Sadiusi rau boi beia Jisas do rai ha'imaania. Rau ha'angonia do 'ai haua ta ha'abu'oahu ma'uasi ta ha'ara ma dorai 'iraraa do'ia God na ha'ataaria mai.

² Mia Jisas 'a o'ani 'iniraaui, “T'amou mou 'iraraai ha'ara na'i aro. Na'i su'urahi 'oha na aro 'a wangawanga, mou ha'arangasia do ho'oa 'ai dangi goro.

³ Mana'i haho'oa, 'oha na aro 'a wangawanga ma waikuhi'a, mamou ha'arangasia do'ai dangi ta'aa. Mou aidangisi'i moi ha'ara ni aro mamougu ai'a aidangisiai 'ado'ado 'ada'i mareho nau haa'i na'i madoraa 'ini!

⁴ 'Iraui inoni na'i 'ohani rau ta'aa di'u marau ai'a bonasia suria tarau a God. Rau raba 'omesiai ha'abu'oahu magu 'a bwa'i nei nawai haua tanaraau. 'E ta'i ha'abu'oahu moi narai re'ia, naasi ha'abu'oahu 'onaai nei na to'o tanaa Jona.” 'Ia Jisas 'agu 'unua o'asi moi tanaraau ma hano'a baaniraaui.

Ni Ha'ausuringa'i Adaa'i Farisei

Mana Sadiusi 'A 'Onaai Draebam (Mak 8:14-21)

⁵ 'Oha narau 'ari mau 'anai nata batarau kae bwera i Galili miraaui rongoiusuri raugu aidangisia dorau kaku'aai waa'i tadaa'i brede.

⁶ 'Ia Jisas 'a ha'atee ha'abasuraui o'ani, “Moi 'ome'ome goro mamoi 'omesuri'amou baaniai draebam adaui Farisei mana Sadiusi.”

⁷ 'Iraui rongoiusuri rau hasi hadanga'i haraariraaui, rau o'ani, “Gau ai'a to'o brede na 'unua o'asi 'iniasi.”

⁸ 'Ia Jisas 'a 'iraraai taha rau maania ma o'ani 'iniraaui, “Hinihinimoo'i ra kekerei di'u. 'A 'ua namou hadanga'inia 'inia i ai'a to'o brede amoo?”

⁹ Mou ai'a aidangisia mau? 'A 'ua? Mou kaku'aai rima merui sae nau ha'angaua 'inia moi rima huai brede, mana abira namou ha'ahonu'i 'ini'i mahoingau nara ngau tahi'i?

¹⁰ Mamou kaku'aa ro'u i hai merui sae nau ha'angaua 'inia moi biu huai brede mana siha abira namou ha'ahonu'i 'ini'i mahoingau nara ngau tahi'i?

¹¹ 'A 'ua namou 'adoma'inia 'inia do'au hadanga'inia ai'a to'o brede amoo? Wai 'unua aho'i ro'u tana'amou. Moi 'omesuri'amou baaniai draebam adaui Farisei mana Sadiusi.”

¹² Na'i 'ohasi raugu aidangisia do'ia Jisas 'a ai'a hadanga'inia draebam anai breidi, ma'ata 'a rabasia dorai 'omesuriraa baaniai ha'ausuringa'i adaui Farisei mana Sadiusi.

'Ia Pita 'A Ha'arangasia

*Do 'Ia Jisas Naasi Ha'atahi
(Mak 8:27-30; Luk 9:18-21)*

¹³ 'Oha 'ia Jisas mana rongoiusuri ana'i rau ada wou gaarangiai 'omaai Sisaria Pilipae, 'ia Jisas 'a songa'iniraaui rongoiusuri ana'i o'ani, "Iraaui sae rau 'unuau i Gare'i Inoni 'inia tei?"

¹⁴ Miraau o'ani, "Tara'i sae ra 'unua do i'oe a Jon Bwareomaea, tara'i nei ra 'unua do i'oe a Elaija, ma tara'i nei do i'oe a Jeremaea, ma tara'i nei ro'u do i'oe 'e ta'i 'iniraaui haru rarabea ni 'oha bwani."

¹⁵ Mia Jisas 'a o'ani 'iniraaui, "Mi'amou, mou 'adoma'inia do 'inau atei?"

¹⁶ Mia Saemon Pita 'a o'ani 'inia, "I'oe naasi Ha'atahi na 'ia God na duruduru 'inia 'anai ha'ataaria mai. I'oe garena God tahitahi."

¹⁷ 'Ia Jisas 'a o'ani 'inia Pita, "Ha'amwani'o Saemon garena Jona, 'inia taha na'o ha'arangasiani, 'ia Amagu ara'ai aro na ha'ata'inia tana'o, ai'a inoni.

¹⁸ Ni 'ado'ado 'anai atamusi 'e hau, mana'i hunganai hauni wai tau'aronai heisoi agua. I mena anai mae 'a bwa'i ha'ahehoa mwada'u i heisoi.

¹⁹ Ma wai haua tana'o i kii anai hourana ana God na'i aro. Taha na'oi ha'aabua na'i ano, 'ia God 'ai 'adoma'i aratara bei'o 'inia na'i aro. Mana taha na'oi ha'awatea na'i ano, 'ai 'adoma'i aratara ro'u bei'o 'inia na'i aro."

²⁰ Ma ha'atee ha'abasuraui rongoiusuri dorai abu taraa to'o maania do'ia naasi Ha'atahi.

*'Ia Jisas 'A Maaniai Mae Nai Haua
(Mak 8:31-33; Luk 9:22)*

²¹ Taraawa'a na'i 'ohasi ma 'ari'a, 'ia Jisas 'a taraawa'a maani ha'arangasia tanaraui rongoiusuri ana'i 'ari nai haua na'i Jerusalem mana taha nai to'o tanaa na'i 'isi. 'A 'unua tanaraui do 'iraui Na'ohadaa'i Piriisi miraaui Ha'ausuri 'anai Ringe ana'ia Moses ma tara'i na'otara ro'u rai ha'a-rongomaata'ia marai ha'amaesia. Ma'ata 'e rua dangi nai hako mana'i oruna 'aigui suruta'e aho'i.

²² Mia Pita 'a waia beira'i a Jisas 'anai ha'atee ha'abwarasia magu o'ani 'inia, "Araha, 'abwa'i! 'Ia God 'a bwa'i ha'awatea do'ai to'o tana'o i maho na'o maaniasi."

²³ Mia Jisas 'a rihota'i tanaa Pita ma o'ani 'inia, "Saetan, hora wou baaniau! 'O bonasiai ha'atehau baaniai hei'irisina God. Na maho na 'o 'unu'i 'isi ai'a 'ado'adona God, ma'ata ra'i 'ado'ado ni noni moi!"

'Iatei Nai Suria Jisas 'Ai Mwa'emwa'e

*'Anai Rongomaata'i Mana Mae
(Mak 8:34—9:1; Luk 9:23-27)*

²⁴ 'Ia Jisas 'a o'ani 'iniraaui rongoiusuri ana'i, "Iatei na raba ha'i rongoiusuri agua, 'ai nugasiai hei'irisina haaria, 'ai mwa'emwa'e 'anai suru'iai dadaahoro ana, maai suriau.

²⁵ 'Iatei na raba dau baabau na'i tahingana na'i marewanani, 'a bwa'i to'oraai huunai tahi. Me 'iatei na mwa'emwa'e 'anai ha'a-ai'aai tahingana 'inia suriau ana, 'ai sadoia nana i tahi.

²⁶ 'A 'ua? 'Onaa tanei 'ai daa'i hako nana i marehoni marewana, ma ai'a daua nana i huunai tahi, mareho 'isi rai 'a'auhia? 'A bwa'i! 'Onaa 'ai mae, 'a bwa'i maho naigu haa 'anai horia aho'i tahingana.

²⁷ 'Inaui Gare'i Inoni wai aho'i ro'u mau mai bei'i enjel ana'i Amagu ma beiai mena mana raraha na ta'isada beia 'anai tahariai 'adonai nei suriai taha na haua.

²⁸ Tara'i nei 'ini'amoui sae 'ini mou bwa'i mae mau minau i Gare'i Inoni wai aho'i'a mai 'anai marungiraaui hako i mwani noni."

17

'Ia Jisas 'A Orisi 'Omeha (Mak 9:2-13; Luk 9:28-36)

¹ 'E ono dangi na hako, 'ia Jisas 'a waia Pita, Jems mea Jon, i rua ha'ido'orada, 'anai ta'eha haariraaui na'i hunganai hungahunga ahaaha.

² Raugu 'ome mana 'omehana Jisas 'a orisi'a. I hauraena tari auru na'i 'u'una 'a wadora'i 'onaai sina mana bwana ana'i ra mamaahui 'onaai marewa.

³ Raugu 'asu'a mia Moses mia Elaija raru ha'amaranga mararu mamaani beia Jisas.

⁴ Mia Pita 'a o'ani 'inia Jisas, "Araha, 'a goro nagau awa 'ini. 'Onaa 'o 'irisia, 'inau wai tau'arona ta oru hare, tanei tana'o, tanei tanaa Moses, ma tanei tanaa Elaija."

⁵ Na'i 'oha na ha'atee o'asi mau a Pita, 'e rorodo na wadora'i na dio huniraaui ma marumarusiraaui. Ma'e ringe na ao mai baaniai rorodosi, 'a o'ani, "Naani gare'agua nau ta'ahia mau huunai wa'ewa'e 'inia. Moi rongosuria."

⁶ 'Oha 'iraau oru rongoiusurisi rau rongoa o'asi, rau kae mamaa'u di'u marau abwa dioi ano.

⁷ Mia Jisas 'a boi ma dau wou beiraaui ma o'ani, "Moi abui mamaa'u, moi ura ara'a."

⁸ Raugu wana wou mia moi haaria Jisas nagu awa beiraaui.

⁹ 'Oha 'ia Jisas mana oru rongoiusuri ana rau didio mau na'i hungahunga, 'ia Jisas 'a ha'atoraraui o'ani, "Moi abui maania tanaa ta sae i taha namou re'ia, tari 'oha 'inau i Gare'i Inoni wai suruta'e aho'i baaniai mae."

¹⁰ 'Iraaui rongoiusuri rau songa'inia o'ani a Jisas, "A 'ua na 'iraau Ha'ausuri 'anai Ringe ana'ia Moses rau 'unua 'inia do'ia Elaija 'ai boi ga'u na'i na'o maigu boi Ha'atahi?"

¹¹ Mia aramiraaui o'ani, "A ha'a-momori. 'Ia Elaija 'ai boi na'i na'o 'anai ha'a-agauhiraau mwani noni 'anai boi anai Ha'atahi.

¹² Ma'ata wai 'unua tana'amou, 'ia Elaija 'a bwane ada'a magu 'iraau sae rau ai'a 'ome 'iraraa. Rau haa'i moi mwane here nara ai'a goro tanaa suriai 'adoma'ida. 'Inaui Gare'i Inoni rai haua o'asi ro'u tanaau."

¹³ Na'i 'ohasi 'iraau rongoiusuri raugu aidangisia do'ia Jisas 'a hadanga'inia Jon Bwareomaea.

'Ia Jisas 'A Ha'agorohia Aho'i

Gare Na Bwauniaui Adaro (Mak 9:14-29; Luk 9:37-43a)

¹⁴ 'Oha 'ia Jisas mana oru rongoiusuri ana rau ataha dioi gaonai hungahunga, 'iraau sae rago rau bwane mamasi 'isi. 'E sae na boi ma topira'i ruru auru tanaa Jisas ma o'ani 'inia,

¹⁵ "Araha, 'oi ta'ahiai gare' mwane'agua ma'oi 'a'auhia. 'A manumanu'a, daohasi 'a here ha'ata'aia di'u. 'A rago'a i 'oha na ahuge'a ara'ai 'eu mana'i wai ro'u.

¹⁶ 'Au waia tanaraau rongoiusuri amu'i dorai ha'agorohia aho'i magu bwara tanaraau."

17 Mia Jisas 'a o'ani, "I'amou inoni na'i 'ohani mou ha'i sae ta'a'i mamou bwarai hinihini! 'Ai orea he'uai maratanoa nawai haua bei'amou, ma'ua wai awa orea tari he'ua bei'amou mamoigu hinihini? Waia mai garesi."

18 Mia Jisas 'a taaria hura'ai adaro mana garesi 'a goro aho'i mau na'i 'ohasi.

19 Na'i muri 'iraau rongoiusuri raugu boi haarirau beia Jisas marau o'ani 'inia, "A 'ua na bwara 'inia tana'ameu 'anai taaria hura'ai adaro ani?"

20 Mia Jisas 'a o'ani, "Hinihinimoo'i ra ai'a wetewete arari. Wai 'unua ha'a-momori tana'amou: 'Onaa namoi to'oraai gere hinihini na kekerei moi 'onaai korai mastad, mou ga'i ha'atee o'ani moi 'iniai hungahunga wouni, "Oi sara wou,' mai matai sara ha'atau moi. 'A bwa'i maho nai bwara tana'amou 'onaa namoi hinihini.

21 Ma'ata adaro 'onaai neini 'a bwarai hura'a, naia moi ha'ariri mana ha'arahesi na matai hura'a 'inia."*

Jisas 'A Hadanga'inia Ro'u i Mae Nai Haua
(Mak 9:30-32; Luk 9:43b-45)

22 'E ta'i dangi, 'oha rau awa na'i Galili, 'iraau rongoiusuri ana'ia Jisas rau rurugoni mai beia. Mia Jisas 'a o'ani 'inirau, "E nei nai usuha'inau i Gare'i Inoni tanaraau nei narau ha'ima'e beiau

23 marai ha'amaesia. Ma'ata 'e rua dangi nai hako mana'i oruna, wai suruta'e aho'i baaniai mae." Miraau rongoiusuri rau arunga ta'aa di'u 'iniai mareho na maaniasi.

Jisas 'A Hori Takisi Tanaai Ruma Maea

24 'Oha 'ia Jisas mana rongoiusuri ana'i rau ada na'i Kapaniam, 'iraau sae ha'atakisi 'anai Ruma Maea rau boi beia Pita marau songa'inia 'inia, "I ha'ausuri amou 'a matai hori takisi ro'u tanaai Ruma Maea, ma'ua ai'a?"

25 Mia Pita 'a o'ani, "Io, 'a matai hori takisi ro'u." Mia Pita 'a siri ruma narau awa iei. Ai'a ta maho mau nai 'unua Pita mia Jisas 'a o'ani'a 'inia, "Saemon Pita, 'e taha na'o 'adoma'inia? 'O 'adoma'inia do 'iraau mwaeraha nai marewanani rau matai ha'atakisi'i ro'u i gare adaa'i ma'ua 'iraau moi sae he'ete'i?"

26 Mia Pita 'a o'ani, "Iraau moi sae he'ete'i."

Mia Jisas 'a o'ani 'inia, "A o'asi'a. 'Iraau gare adaa'i mwaeraha rau ga'i bwa'i hori takisi.

27 Ma'ata rei'uaa na o'asi, gai abu ha'a-taesu'araau sae ha-ha'atakisi. Naasi 'oi hura'ai one ma'oi gaasia hura'ai 'aro amua. Ii'a tahamora na'oi raua, 'oi tetesiri na'i ngoona ma'oi rahia hura'ai sereni na awa na'iei ma'oi 'ari hori takisi taragaraa."

18

Nei Nai Ororiu Di'u Na'i Hourana Ni Aro
(Mak 9:33-37; Luk 9:46-48)

1 Na'i mau 'ohasi 'iraau rongoiusuri rau boi beia Jisas marau o'ani, "Iatei nai ororiu di'u na'i hourana ni aro?"

2 Mia Jisas 'a 'unua mai gare kekerei ma ha'a-urasia na'i maadau magu o'ani,

3 "Onaa 'o bwa'i orisi ma'oi ha'a-anoano'o 'onaai gare, 'o ai'a arari 'anai siri na'i hourana ni aro.

4 Ma'ata 'onaa na'oi ha'a-anoano'o 'onaai gareni, 'oi ororiu di'u na'i hourana ni aro.

* 17:21 17:21 Tara'i Baebol bwani ra ai'a to'oraai tatara 'e 21.

5 'Onaa 'o ha'amaotoa ta nei 'onaai gareni suria 'o ta'ahiau, 'o ha'amaotoau ro'u."

*Abui Ha'atehaai Nata Sae
(Mak 9:42-48; Luk 17:1-2)*

6 "'Onaa 'ia tei sae nai raba ha'atehaa tanei 'iniraau nei kekerei 'ini narau hinihinau, 'a goro do ra ga'i ho'osia ta kae hau na'i 'u'una. Ma rai waia hura'ai asi su'u ma rai ha'adodohia dio. 'Inia na ha'a-mama'ai na 'ia God nai haua tanaai nei nai ha'atehaa tanei 'iniraau, 'ai ta'aa di'u ro'u wou.

7 Ha'arohairaaui di'u i noni nai marewanani. 'Inia ra rago i mareho nara matai ha'ateharaau 'anai hauai ora-ora'a. Ha'amomori, i mareho narai hauai ora-ora'a tanaai inoni rai to'o. Ma'ata 'ai ta'aa di'u ro'u wou tanaa mo'o nai ha'atehaai nata sae 'anai hauai ora-ora'a.

8 "'Onaa na rimamu ma'ua uwamu nai haai maho na'o ora-ora'a 'inia, 'oi horo gaasinga'inia moi. 'A goro do'oi dauai tahi tarau beia moi ta'i rima mana ta'i uwa, baaniai siri na'i 'eu na bwarai kuru beiai rua uwamu mana rua rimamu hako.

9 Ma 'onaa ta maamu nai haai maho na'o ora-ora'a 'inia, 'oi kaania ma'oi gaasia. Ai'a goro dorarui awa hakoi rua maamu maraigui gaasi'o na'i 'eu na'i dorani rongomaata'i. 'A goro baania do'oi dauai tahi tarau beia moi ta'i maa."

Ha'atee Heiha'auu 'Iniai Gare'i Siip

*Na Teha Baaniai Tara
(Luk 15:3-7)*

10 Mia Jisas 'a o'ani ro'u, "Moi 'ome'ome goro. Mou gasi 'adoma'i ha'auruhia moi ta nei 'ini'i gare kekerei 'ini. Wai 'unua tana'amou, ni enjel adaa'i ra awa tarau beia Amagu na'i aro.

11 'Inaui Gare'i Inoni, 'au boi 'anai ha'atahiraau nei nara teha."*

12 "'A 'ua? 'Onaa ta sae nai to'oraa ta ta'i 'arangi siip ma ta nei 'ini'i 'ai teha baaniai tara ma ai'aa'a, 'e taha nai haua? 'Ai nugasiraau siwa tangahuru mana siwa na'i hungahunga nara ngaungau iei ma'ai sibaniai nei na ai'aasi.

13 Wai 'unua ha'a-momori tana'amou, na'i 'oha nai sadoia 'ai wa'ewa'e di'u 'inia. Mana wa'ewa'e ana 'ai di'uai wa'ewa'e nai haua 'iniraau siwa tangahuru mana siwa na ai'a ai'araau.

14 'A o'asi ro'ua Amamou ara'ai aro. 'A ai'a 'irisia do ta ta'i nei 'iniraau gare kekerei 'ini nai teha mai ai'aa."

Herehere 'Anai Ha'a-odoodoai Heiho

Na'i Ahoanai Rua Sae Hinihini

15 Mia Jisas 'a o'ani ro'u, "'Onaa ta do'oramu 'ai haua ta hereta'aa tana'o, 'oi 'ari haari'o beia ma'oi ha'a-aidangisia 'inia taritari'ana. 'Onaa 'a 'adoma'i aratara bei'o 'inia maho na'o 'unua tanaa, ma kae goro 'inia naasi mamurui awa goro'a aho'i.

16 Ma 'onaa 'a ai'a 'adoma'i aratara bei'o, 'oi aho'i 'ari beia ro'u ta 'oha he'ete'i, ma'ata 'oi 'unua ta ta'i ma'ua rua sae hinihini ma rarui hano bei'o. 'Inia ni Usu-usu Maea 'a 'unua o'ani, "'Onaa 'oi rangasia ta abe, ta rua ma'ua oru sae narai awa 'anai baturongoai taha na'oi maania. 'O gasi pwari'i.'

17 Hoita, 'onaa mo'osi 'a ai'a 'adoma'i aratara ro'u mau bei'amou 'ini'i taha mou maani'i, naasi 'oigui ha'arongoraau sae maua na'i heiso'i na'i 'omaa amua. Ma 'onaa 'a bwa'i 'adoma'i aratara ro'u mau beiraau, ma 'oi here mara sae ahurodo 'inia ma'ua 'onaai sae ta'a'i nara ha-ha'atakisi.

* 18:11 18:11 Tara'i Baebol bwani ra ai'a to'oraai tatarani.

18 “Mawai 'unua ha'a-momori tana'amou, 'e taha namoi ha'aabua na'i ano, 'ia God 'ai 'adoma'i aratara bei'amou 'inia na'i aro. Mana taha namoi ha'awatea na'i ano, 'ai 'adoma'i aratara ro'u bei'amou 'inia na'i aro.

19 “Wai 'unua tana'amou ro'u, 'onaa ta rua sae hinihini na'i marewanani rarui 'adoma'i aratara 'anai ha'angonia Amagu 'anai haua ta maho, 'ia Amagu ara'ai aro 'ai hauai taha nararui ha'angonia.

20 “Ai haua, 'inia namoiwou ta dora ta rua ma'ua ta oru sae rai awagoni na'iei suria 'iraaui ra'i sae agu'i, 'inau wai awa beiraaui.”

Mamaani 'Iniai Sae Na Ai'a Raba

'Adoma'i Nugasiai Do'orana

21 Mia Pita 'a boi beia Jisas ma o'ani 'inia, “Araha, wai 'adoma'i nugasia ha'asiha i do'oragu na awa moi 'anai here ha'ata'aiau? Ha'abiu?”

22 Mia Jisas 'a o'ani, “A bwa'i ha'abiu, 'ai biu tangahuru ha'abiu.

23 'Au ha'atee o'asi suria na heimarungi ana God na awa na'i aro 'a 'onaa mwaeraha na siba suri'i kaoni nara haa'i sae tatau'aro ana'i beia.

24 Na'i 'oha na taraawa'a siba suri'i kaoni, ra waia mai ta'i sae tatau'aro ana na kaoni beia 'ini'i tara'i milion

25 na bwara'a tanaa 'anai su'ua. Naasi mwaeraha 'a 'unua dorai waia beiai urao ana mana gare ana'i marai raonga'iniraaui bei'i ro'u i bori adaa'i 'anai su'ua aho'i kaoni ana.

26 “Mana saesi 'a topira'i ruru auru tanaai mwaeraha ma ha'angonia wetewete o'ani, “Oi nugaa ta gere madoraa tanaau mawai su'u'i hako aho'i tana'o i ha'a nau kaoni 'ini'i.”

27 Mana mwaeraha 'a ta'ahia ma 'adoma'i nugasia tanaai kaoni ana ma ha'ahura'ahia dadara'a.

28 “Oha na saesi 'agu hura'a, ma heisadoi beiai sae na kaoni beia 'ini'i tara'i 'arangi. 'A 'ariwou ma here baabau na'i konokonona ma 'unua tanaa do'ai su'ua'a i kaoni ana.

29 Mia mo'osi 'a topira'i ruru auru tanaa ma ha'angonia wetewete do'ai nugaa tanaa ta gere madoraa 'anai su'ua aho'i tanaa i kaoni ana.

30 Mia 'a ai'a 'irisia o'asi ma 'unua dorai gaasia siri na'i rumanih'o. 'Ai awa 'isi tari 'oha nai su'ua aho'i kaoni ana.

31 “Na'i 'oha na 'iraaui tara'i sae tatau'aro ro'u rau re'iai here na haua mo'osi, rau arunga ta'aa 'iniai here na haua mo'osi marau rangasia'a tanaai mwaeraha.

32 Mana mwaeraha 'a 'unua mai saesi ma o'ani 'inia, 'Toe 'o ha'i sae tatau'aro ta'aa! 'Iniai ha'angoniau wetewete na'o haua, 'inau 'au 'adoma'i nugasia tana'o i kae kaoni na'o haa beiau.

33 'A 'ua na'o ai'a ta'ahia ro'ua mo'o na kaoni bei'o 'onaa haua agua tana'o?”

34 I mwaeraha 'a taesu'a raha 'ana mo'osi, ma 'unua dorai gaasia siri na'i rumanih'o marai ha'a-rongomaata'ia. 'Ai awa 'isi tari 'oha nai su'ua hako aho'i ha'a na kaoni 'inia.”

35 Mia Jisas 'agu 'unua o'ani, “Ai o'asi ro'u i here nai haua Amagu na'i aro tana'o 'onaa 'o bwa'i huunai 'adoma'i nugasiai do'oramu beiai tahingamu hako.”

19

Ha'ausuringa'i 'Abaii Haigaasi

(Mak 10:1-12)

1 Na'i murinai mamaani hako ana Jisas, 'a hano baaniai Provensi Galili ma tarau 'ari nata batarau wai rahai Jodan ma ada na'i Provensi Jiudea.

2 'A rago i sae narau hano suria ma ha'agorohiraaui aho'i nei ra daoha.

³ Tara'i Farisei rau boi beia Jisas 'inia rau raba ha'imaania 'onaa na heiarami ana 'ai odo-odo beiai Ringe ana'ia Moses. Ma rau songa'inia o'ani, "A 'ua? Na Ringe ana'ia Moses ra wateai sae 'ai matai gaasia moi urao ana 'inia namoiwou ta maho?"

⁴ Mia Jisas 'a o'ani 'iniraaui, "Mou ai'a 'oha'inia gasi taha na 'unua i Usu-usu Maea. 'A 'unua do mau mai taraawa'anai marewana, 'ia God 'a ha'apwa'araa i saemwane mana urao."

⁵ Ma o'ani ro'u, 'Na tarana naasi, na saemwane 'ai nugasia amana mea inana maai hasi beiai urao ana mararui ha'i ta'i abe.'

⁶ Naasi, 'irarua rarugu ai'a 'onaia'ia i rua abe, ma'ata 'e ta'i abe moi. Tarana naasi, na noni 'ai abui hoai'ia taha na 'ia God na ho'ogonia."

⁷ Miraaui Farisei raugu songa'inia Jisas o'ani, "'Onaa na o'asi, ma 'ua na 'ia Moses 'agu 'unua 'inia do 'ia tei sae nai raba gaasiai urao ana 'ai haua ga'u ta usu-usuni haigaasi tanaai urao ana maigu gaasia?"

⁸ Mia Jisas 'a aramiraaui o'ani, "'Ia Moses 'a ha'awateai haigaasi suria 'imoou saemwane mou rongoasa mamou ai'a raba araisuriai Ha'atora ana God, me na'i taraawa'a ai'a o'asi hei'irisina God."

⁹ Ma wai 'unua tana'amou, 'iatei nai gaasiai urao ana ma'ai waina ro'u ta urao he'ete'i, 'a taritari'a baaniai urao ana. Ma'ata 'onaa ni urao ana 'a bwane taritari'a baania, naasi 'a matai gaasia moi uraosi."

¹⁰ Miraaui rongoiusuri rau o'ani, "'Onaa namoisi ta'i maho nara matai haigaasi 'inia, ma 'a goro do ra ga'i bwa'i ha'iwai."

¹¹ Mia Jisas 'a o'ani 'iniraaui, "Ai'a do 'iraaui hako'i mwane sae rai wa'ewa'e 'anai suria'i mareho namou 'unuasi. 'Iraaui moi nei na 'ia God na 'irisia dorai awa o'asi narai wa'ewa'e 'anai suria."

¹² Tara'i mwane ra ai'a ha'iwai suria ra 'amara, ma tara'i mwane ra ai'a ha'iwai ro'u 'inia here na tara'i sae nara haa tanaraaui 'ada'i abedaa'i.* Ma tara'i sae ra ai'a ha'iwai suria ra 'adoma'i ororiu 'inia heimarungi ana God. 'Ia tei nai matai suria'i ha'ausuringa'isi, ma'ai suria."

Ta Jisas 'A Ha'arahesi Huniraaui Gare

(Mak 10:13-16; Luk 18:15-17)

¹³ Tara'i sae ra waa'i mai gare tanaa Jisas mia Jisas 'ai dau hungadi bwaudaa'i mai ha'arahesi huniraaui. Maagu 'iraaui rongoiusuri raugu ha'aburaau.

¹⁴ Naasi mia Jisas 'a o'ani, "Moi abui ha'a-bwarasiraaui. Moi wateraaui gare marai boi beiau. 'Inia 'iraaui nei ra 'onaairaausi, naasi nei nara arari 'anai awa bahainai heimarungi ana God na awa na'i aro."

¹⁵ Ma dau na'i bwaudaa'i ma ha'agorohiraaui. Na'i muri 'agu hano baaniai dorasi.

Sae Toto'ora

(Mak 10:17-31; Luk 18:18-30)

¹⁶ 'E sae na boi beia Jisas ma songa'inia o'ani, "Ha'ausuri, 'e mareho goro taha nawai haua mawaigui daua 'inia i tahi tarau?"

¹⁷ Mia Jisas 'a aramia o'ani, "'Inia 'uaana na'o songa'iniau 'inia mareho na goro? I'oe 'o bwane 'iraraa, 'ia moia God na goro. Ma'ata 'onaa 'o raba dauai tahi tarau ma'oi araisuri'i Ha'atora."

¹⁸ Mana saesi 'a songa'inia ro'ua Jisas o'ani, "Ra'i Ha'atora he'ua na'o 'unu'isi?"

Mia Jisas 'a o'ani 'inia, "Abui heingahu, abui taritari'a baaniai urao amua ma'ua mwane amua, abu beri, abui pwari'i na'i kooti,

* **19:12** 19:12 I here nara haa tanaraaui 'ada'i abedaa'i naasi hoe. 'Iraaui sae nara hoeraausi, ra'i sae narau tau'aro tanaai mwaeraha maraugu raba awa maea do nei narai abui 'adoma'i ta'a'i 'ini'i urao.

¹⁹ ha'ahoua amamu mia inamu, ma'oi ta'ahiai sae 'etea 'onaai ta'ahi'o amua haari'o."

²⁰ Mana saesi 'agu o'ani 'inia Jisas, "'Au ha'isuri'i hako'a i Ha'atora 'isi, 'e taha ro'u nawai haa mau?"

²¹ Mia Jisas 'a o'ani, "'Onaa 'o raba odo-odo na'i maana God, 'oi 'ari ma'oi raonga'ini'i hakoi toto'ora amu'i ma'oi hauai ha'a tanaraaui pohara. 'Onaa 'oi haua o'asi, 'oi toto'ora na'i aro. Na'i muri 'oigui boi suriau."

²² 'Oha nagu rongoa o'asi, ma hano'a ha'i ahutotou 'inia 'iia 'e sae na toto'ora di'u.

²³ Naasi mia Jisas 'agu o'ani 'iniraau rongoiusuri ana'i, "Wai 'unua ha'amomori tana'amou. 'A 'ome bwara do sae toto'ora 'ai siri na'i heimarungi ana God na awa na'i aro.

²⁴ Wai 'unua ro'u o'ani. 'A 'ua? I mwamwaa nara 'unua 'iniai kamel 'a matai siri daara'i na'i maanai nila? 'A bwara! Ma bwara di'u ro'u wou tanaai nei na toto'ora 'ana'i siri na'i heimarungi ana God."

²⁵ 'Oha 'iraau rongoiusuri rau rongoi ha'atee o'asi ana Jisas, rau heimwaota'i di'u marau o'ani, "Romwane! 'Onaa na o'asi, ma 'ome 'onaa do 'a bwa'i ta sae nai dauai tahi tarau!"

²⁶ Mia Jisas 'a wanasiraau ma o'ani, "Beiai noni 'a bwarai daua haariraau tahi tarau, mei tanaa God mwane maho ra mwada'u moi."

²⁷ Naasi mia Pita 'a o'ani 'inia Jisas, "'Ome! 'Tameu meu nugasi'i hakoi mwane mareho amee'i mameu suri'o. 'E heitahari he'ua na 'ia God 'ai haua tana'ameu?"

²⁸ Mia Jisas 'a o'ani, "'Oha 'inau i Gare'i Inoni wai heinagu na'i dorani mwaeraha agua 'ana'i heimarungi beiai mena mana raraha na'i marewana haoru, 'i'amoui rongoiusuri agu'i moi heinagu ro'u na'i ta'i tangahuru mana rua dorani mwaeraha 'ana'i marungiraau ta'i tangahuru mana rua burungai noni nai Israel.

²⁹ 'Iatei na nugasiai ruma ana, ma'ua do'orana'i, ma'ua asina'i, ma'ua amana mea inana, ma'ua gare ana'i, ma'ua dorai ano ana 'inia 'a suriau, 'ia God 'ai ha'arago'i tanaai mareho na nugasi'i 'isi. Ma'ai daua ro'u i tahi tarau.

³⁰ Na'i madoraasi, 'a ragoi nei nara ororiu na'i 'ohani, rai ha'i sae haari'i moi. Ma ragoi nei nara ai'a ororiu na'i 'ohani, 'ia God 'ai ha'a-ororiuraau."

20

Ha'atee Heiha'auu 'Iniraau Sae

Rau Tau'aro Na'i Mou

¹ Naasi 'ia Jisas 'agu o'ani ro'u, "Ni heimarungi ana God na awa na'i aro 'a 'onaai sae na hura'a na'i haho'oa ta'aa ma siba sae 'ana'i tau'aro na'i moui grep ana.

² 'Oha na sadoi'i tara'i nei, rau 'adoma'i aratara beia 'ana'i dauai ta'i korai ha'a 'ana'i ta'i dangi, ma ha'a-taariraau hura'a 'ana'i tau'aro.

³ "Na'i angi siwa haho'oa 'a hura'a ma re'iraau ro'u i sae ra awa pwaranga moi na'i dorani maketi.

⁴ Ma o'ani 'iniraau, "Onaa moi 'ari mamoi tau'aro na'i moui grep agua, wai hori'amou 'iniai taha na arariai tau'aro namoi haua.'

⁵ Marau 'ari narau tagora.

"Na'i atoa mana'i angi oru na'i abai dangi 'a hura'a ro'u 'ana'i siba sae.

⁶ Na'i angi rima su'urahi 'a hura'a ma re'i'i ro'u tara'i sae ra poru agohe ro'u moi ma o'ani 'iniraau, "A 'ua namou poru agohe moi 'inia na'i dangi bubuni?"

⁷ "Miraau o'ani 'inia, 'Ai'a ta sae nai ha'atagoraameu.'

“Mia o'ani 'iniraaui, 'Moi 'ari mamoi tagora beiraaui sae rau tagora na'i mou agua.’

⁸ “Na'i ha'ahakonai dangisi 'a 'unua tanaa mo'o na 'omesuriraaui sae ra tagora do'ai 'unuraaui mai, mai horiraaui. 'Ai taraawa'a beiraaui ruruha rau tagora ha'ahako maigui hako beiraaui ruruha rau tagora tahamora.

⁹ “‘Oha ra horiraaui ruruha ra taraawa'a tagora moi na'i angi rima su'urahi ra ha'a 'ado ta'i korai ha'araau.

¹⁰ Mana 'oha ra horiraaui ruruha rau taraawa'a tau'aro na'i haho'oa ta'aa, rau 'adoma'inia do 'iraaui rai dau ha'a raha magu ai'a, 'iraaui ro'u rau 'ado ta'i korai ha'a moi.

¹¹ 'Agu haa marau taesu'a'a, rau o'ani,

¹² “Iraaui ruruha narau tagora ta'i 'aoa moi 'o horiraaui 'iniai ta'i korai ha'a. Mi'ameu i ruruha nameu tagora raha tanaai sina suriai dangi bubu, 'o hori ha'a-ta'isada'ameu ro'u moi 'onaairaaui.’

¹³ “‘Ia mo'o na to'oraai mou 'a o'ani 'iniai ta'i abe 'iniraaui, 'Gere sae agua, 'inau ai'a ha'a-bweubweu'a'o. I'oe na'o 'adoma'i aratara 'anai tau'aro maenai ta'i korai ha'a ta'i dangi.

¹⁴ 'Oi dauai horihorimu ma'oi hano. Na'i 'adoma'igu haariau, 'au 'adoma'inia do 'inau wai hori ha'a-ta'isada'amou hako.

¹⁵ 'A 'ua? 'A taritari'a 'onaa wai raba hisu 'ini'i ha'a agu'i suriai 'adoma'igu? 'O ga'i bwa'i taesu'a 'iniai haua aguai mareho na goro 'oha nau here ha'agorohiraaui.’ ”

¹⁶ Mia Jisas 'agu 'unua o'ani ro'u, “Naasi, na'i heimarungi ana God 'iraaui nei ra muri na'i 'ohani, rai na'o. Miraau nei ra na'o na'i 'ohani, rai muri.”

Orunai 'Oha 'Ia Jisas

'A Maaniai Mae Nai Haua

(Mak 10:32-34; Luk 18:31-34)

¹⁷ 'Oha 'ia Jisas 'a hano 'anai Jerusalem, 'a wairaaui beira'i ta'i tangahuru mana rua rongoiusuri ana maagu mamaani tanaraau. 'A o'ani,

¹⁸ “Moi bahurongo goro. Na'i 'ohanisi gau hahano'a 'anai Jerusalem. Maagu na'i 'isi 'e nei nai usuha'iniau i Gare'i Inoni tanaraau Na'ohadaa'i Piriisi mana Ha'ausuri 'anai Ringe ana'ia Moses marai hiiriau 'anai ha'amaesiaui.

¹⁹ Rai usuha'iniau ro'u tanaraau nei ra ai'a Jiu. Rai haikou 'iniau, rai roro'oaui marai rabuau na'i dadaahoro 'anai ha'amaesiaui. Ma'ata 'e rua dangi nai hako mana'i oruna wai suruta'e aho'i baaniai mae.”

Ha'ausuringa'i 'Iniai Na'otara Goro

(Mak 10:35-45)

²⁰ Na'i muri, urao ana Sebedi mana rua gare ana, 'ia Jems mia Jon, rau boi beia Jisas. Mana urao ana Sebedi 'a topira'i ruru tanaa Jisas 'anai ha'angoni beia 'iniai ta'i maho.

²¹ Mia Jisas 'a o'ani, “‘E taha na'o rabasia?”

Mia o'ani, “‘Oha 'oi heimarungi na'i hourana amua, 'au 'irisia do 'oi ha'awateraru i rua gare aguani 'anai heimarungi bei'o. Tanei nai heinagu na'i dora ni mwaeraha na'i aba odomu ma tanei na'i maha.”

²² Mia Jisas 'a o'ani, “‘I'amurua muru ai'a aidangisiai maho na muru ha'angoniasi! 'A 'ua? Muru ga'i siri moi na'i rongomaata'i na 'inau wai siri iei?”

Miraru aramia o'ani, “‘Miri ga'i haa moi!”

Mia Jisas 'a o'ani, “‘Ha'amomori di'u. Murui rongomaata'i ha'a-momori 'onaai rongomaata'i na 'inau wai haa.

23 Ma'ata 'inau 'au bwa'i sigihia 'iatei nai heinagu na'i odogu ma'ua na'i mahagu. 'Iia moi Amagu nai 'unua 'iatei nai heinagu beiau. 'Inia 'iia 'a bwani 'ome sigihiraau."

24 'Oha 'iraau ta'i tangahurui rongoiusuri rau rongoai taha nararu ha'angonia Jems mea Jon, rau taesu'a 'adarua.

25 'Ia Jisas 'a 'unu goniraau mai rongoiusuri ana'i ma o'ani 'iniraau, "I'amou bwani 'iraraa do 'iraau mwaeraha mana na'otara adaa'i sae ra ai'a Jiu, rau ha'aba'o 'inia heimarungi narau haua ma goro adaa'u i haa'i mwani heiatenga'i tanaraau noni.

26 Ma'ata 'i'amou moi abui haua o'asi tana'amou hairiu. 'Iatei nai raba na'otara tana'amou 'ai ha'i sae tatau'aro tana'amou.

27 Mia tei na raba bwauodo, 'ai ha'i slev tana'amou.

28 Moi ha'isuriai herehere agua. 'Inau Gare'i Inoni 'au ai'a boi do 'irai sae rai tau'aro tanaau. Me 'inau 'au boi do 'inau wai tau'aro tanaraau, ma 'anai wateai tahingagu 'anai ha'atahiraau baaniai ora-ora'a."

*'Ia Jisas 'A Ha'a-wanawana i Rua Sae Kuru
(Mak 10:46-52; Luk 18:35-43)*

29 'Oha 'ia Jisas mana rongoiusuri ana'i rau hano baaniai 'omaai Jeriko, ragoi sae rau haisuri.

30 'E rua sae kuru raru heinagu na'i bobonai tara, raru rongoa do'ia Jisas 'a boi suriai tara. Raru awara o'ani, "Araha, pwirana Deved, 'oi arunga ta'ahimiria ma'oi 'a'auhimiria!"

31 'Iraau sae rago rau 'unua do rarui papaku. Mirarua rarugu awaawara raha baaniai na'o. Raru o'ani, "Araha, pwirana Deved, 'oi arunga ta'ahimiria ma'oi 'a'auhimiria!"

32 Jisas 'a ura papaku ma 'unurarua mai ma songa'inirarua, "E taha na muru 'irisia dowai haua tana'amurua?"

33 Miraru o'ani, "Araha, miri raba wanawana."

34 Mia Jisas 'a ta'ahirarua, ma dau wou suri'i maadaru'i. Na'i maui 'ohasi mararu wanawana'a mararu hano'a suria Jisas.

21

'Ia Jisas 'A Ta'e Na'i Dongki

Siri Na'i Jerusalem

(Mak 11:1-11; Luk 19:28-40; Jon 12:12-19)

1 'Oha 'ia Jisas mana rongoiusuri ana'i rau gaarangia wou i Jerusalem, rau 'omesia 'ari 'omaai Betfeis gaarangiai hungahungai 'Oliv. Mia Jisas 'a ha'a-taarirarua i rua rongoiusuri 'anai 'ari na'o na'i 'omaasi.

2 'A o'ani, "Murui hano mamurui 'ari nai 'omaa 'ariani ma murui re'iai dongki nara ho'osia na'i 'isi beiai gare ana. Murui wagasirarua mamurui wairarua mai.

3 'Onaa ta sae nai songa'inimurua ma murui o'ani, "Ia Araha na rabasirarua.' Maagu bwa'i maho'a ro'u nai 'unua."

4 Marehonisi 'a to'o o'asi ma to'o ha'a-momori'a taha na 'ia God 'a ha'atee rarabeanga'inia beiai Rarabea. 'A 'unua o'ani,

5 "Naani mareho na'oi 'unua tanaraau noni nai Jerusalem na awa na'i hungahungai Saeon.

'Ome, na mai mwaeraha amouu.

'Iia 'a manego, 'a ta'e mai na'i hunganai dongki.

Ha'amomori, 'a ta'e na'i hunganai gare dongki."*

6 Hoita, mana rua rongoiusuri raru haua 'onaai 'unua ana Jisas.

* 21:5 21:5 Sakaraea 9:9

7 Raru waa mai dongki mana gare ana mararu haari'i to'oni bo hura'a adaru'i na'i hungana mia Jisas 'a heinagu ara'a na'i iei.

8 Ma ragoi sae rau 'ari na'o marau haari'i bwana adaa'i suriai tara, ma tara'i sae ra tabari'i hasi'ei nara hahaa'a mara haari'i hahaadi na'i tara.

9 Mana sae ra na'o mana nei na'i murina Jisas rau awaawara. Rau o'ani, "Ha'a-aneaneai pwirana Deved.

Araha God, 'oi ha'agorohia mo'o na'o ha'ataaria mai!

Ha'a-aneanea God na'i aro."

10 'Oha na siri a Jisas na'i Jerusalem, 'iraau saenai 'omaa rau wa'ewa'e di'u ma tara'i nei rau o'ani, "Ia tei naasi!"

11 Miraa sae rago rau o'ani, "Ia Jisas, i rarabea baaniai Nasaret na'i Provensi Galili."

'Ia Jisas 'A Taariraau Hura'a i Sae

Baaniai Ruma Maea

(Mak 11:15-19; Luk 19:45-48; Jon 2:13-22)

12 Mia Jisas 'a siriwou na'i dora a'ora na'i maanai Ruma Maea ana God ma taraawa'a taariraau hura'ai sae ra horihori mara raoraonga'i na'iei. Ma rihota'ini'i tebol 'anai ori-orisi ha'a mana baba heheinagu adaa'i nei ra raoraonga'i waibora.

13 Ma o'ani 'iniraau, "I Usu-usu Maea 'a 'unua o'ani, 'Na ruma agua 'e ruma 'anai ha'arahesi.' Mi'amou mou ha'i dorani bainihu 'inia nadaau sae beriberi."†

14 Na'i muri tara'i sae kuru mana sae pwaki ra boi beia na'i 'isi ma ha'agorohiraau aho'i.

15 'Iraau na'ohadaau Piriisi miraaui Ha'ausuri 'anai Ringe ana'ia Moses rau taesu'a 'oha rau re'i'i ha'abu'oahu na haa'i marau rongoraau gare rago narau totoro o'ani, "Ha'a-aneaneai pwirana Deved!"

16 Marau o'ani 'inia Jisas, "'O rongoai taha narau 'unua i gare 'isi? 'O ga'i ha'atee ha'a-bwarasiraau!"

Mia Jisas 'a o'ani, "'Au rongoa. Ma 'ua? Mou ai'a 'oha'iniai dorai Usu-usu Maea na 'unua do 'ia God 'ai 'a'auhiraau gare kekerei miraaui gare ra bura'i huta marai huunai ha'a-aneanea?"‡

17 Mia Jisas 'a hura'a baaniai Jerusalem ma 'ari na'i Betani nagu mauru na'iei.

'Ia Jisas 'A Ha'atee Murisiai Hasi'ei

Nara 'Unua 'Iniai Fig

(Mak 11:12-14, 20-24)

18 Na'i haho'oa, 'oha 'ia Jisas 'a aho'i mai 'anai Jerusalem, 'a hioro.

19 Ma re'iai hasi'ei nara 'unua 'iniai fig na ura na'i bobonai tara ma 'ariwou do'ai re'ia 'onaa 'a hungu. Magu ai'a, nai'i moi na rawa nara awa. Mia Jisas 'a ha'atee o'ani, "'A bwa'i ta 'oha'a ro'u na'oigui hungu." Mau 'ohasi mana hasi'eisi 'a nugu'a.

20 'Iraau rongoiusuri rau heimwaota'i di'u, rau o'ani, "'A he'ua na nugu raurau moi 'inia i hasi'eini."

21 Mia Jisas 'a o'ani 'iniraau, "Wai 'unua ha'a-momori tana'amou. 'Onaa moi hinihini mamou bwa'i 'adoma'i heiruarua'a, mou ga'i matai ha'atee murisia ro'u i hasi'eisi. Mamou ga'i matai haa'i tara'i ha'abu'oahu ro'u nara raha baaniai nei nau hauasi. 'O ga'i 'unua moi tanaai hungahungani o'ani, "Oi sara baaniai dorani ma'oi hura'ai asi!' Ma'ai matai 'onaaia moi 'unua amua.

† 21:13 21:13 Aisaea 56:7, Jeremaea 7:11 ‡ 21:16 21:16 Psalm 8:2

22 'Oha 'oi ha'arahesi tanaa God 'anai ha'angonia ta maho, 'ai matai haua moi tana'o, 'onaa 'oi hinihini."

Heisonga'i 'Inia Tei Na Hauai Mena

Tanaa Jisas

(Mak 11:27-33; Luk 20:1-8)

23 Na'i 'oha 'ia Jisas 'a ada na'i Jerusalem, 'a siri na'i Ruma Maea ana God ma ha'ausuriraau sae. 'Iraaui Na'ohadaa'i Piriisi ma tara'i saemaua adaa'i Jiu rau boi beia marau o'ani, "O'i 'unua tana'ameu, 'iatei na 'unua tana'o do'oi matai haa'i mareho 'isi?"

24 Mia Jisas 'a 'unua o'ani, "Wai matai aramia heisonga'i amou 'onaa moi aramia ro'u i heisonga'i nawai haua tana'amou.

25 'Iatei na 'unua tanaa Jon 'anai bwareomaeerau noni? 'Ia God ma'ua inoni?"

Rau hadahada haariraau hairiu o'ani, "Onaa nagai 'unua do 'ia God, me 'iia 'ai o'ani, 'Ma 'ua namou ai'a hinihinia 'inia Jon?"

26 Ma 'onaa nagai 'unua do 'iraau moi inoni nara 'unua tanaa, miraau sae rago rai taesu'a marai haua ta here gagaau. 'Inia rau hinihinia do'ia Jon 'e rarabea."

27 Ma rau o'ani 'inia Jisas, "Meu ai'a 'iraraa."

Mia Jisas 'agu o'ani 'iniraau, "Nau bwa'i rangasia ro'u tana'amou 'iatei na 'unua tanaau do wai matai haa'i mareho 'isi."

Ha'atee Heiha'auu 'Iniai Rua Gare Mwane

28 Mia Jisas 'a o'ani ro'u 'iniraau, "Moisu rongoa ga'u i heiha'auu nawai hauani mawaigui rongoi 'adoma'imoo'i 'inia. 'E ta'i sae na to'oraai rua gare mwane, ma o'ani 'iniai gare na hutai na'o, 'Mama, na'i dangini 'oi 'ari ma'oi tagora na'i moui grep."

29 Mia o'ani, "Inau 'au 'age.' Na'i muri 'a orisiai 'adoma'ina ma hano na tagora.

30 Mia amadarua 'a 'ariwou beiai nata abe na hutai muri ma 'unua ro'u tanaa. Mia o'ani, "Io, 'a goro moi.' Ma'ata na'i muri magu ai'a hano'a."

31 Mia Jisas 'agu songa'iniraau o'ani, "Mou 'adoma'inia do'ia tei 'iniraruai rua garesi na araisuriai amadarua?" Miraau o'ani, "I gare tahamora." Mia Jisas 'agu o'ani 'iniraau, "Wai 'unua ha'a-momori tana'amou. 'Iraaui sae ha-ha'atakisi nara beriraau noni miraau urao horihori raai siri na'i na'o 'ini'amou na'i heimarungi ana God.

32 'Inia 'oha na 'ia Jon Bwareomaea 'a boi 'anai ha'ata'inia tana'amou awaha odo-odo namou ga'i awasuria, 'iraau narau hinihinia, 'i'amou mou ai'a. Rei'uaa namou 'omesia dorau rihosi, me 'a bwara mau ro'u tana'amou i rihosi ma'ua 'anai hinihinia Jon."

Ha'atee Heiha'auu 'Iniraau Sae Ta'a'i

Narau 'Omesuriai Moui Grep

(Mak 12:1-12; Luk 20:9-19)

33 Mia Jisas 'a o'ani ro'u, "Moi rongoa ro'u i nata ha'atee heiha'auuni. 'E ta'i sae na hasiai moui grep. 'A bara garia ma tagoraai dora 'anai rosirosi grep na'iei 'anai tagora waen. Ma ha'a-urasia ro'u i ruma ahaaha 'anai 'ome'ome 'ini'i maeronga. Na'i muri 'agu sadoi'i sae 'anai tau'aro maedi hua 'anai 'omesuriai mou ma hano na awa na'i kantri he'ete'i.

34 Na'i madoraa 'anai husi'i grep 'a ha'ataari'i wou sae tatau'aro ana'i 'anai waa aho'i tanaai wadui grep ana.

³⁵ Miraau sae narau 'omesuriai mousi, rau dauraau marau ngahu ngahuai ta'i abe, rau ngahu ha'amaesia nata nei marau buta ha'amaesia nata abe ro'u 'iniau hau.

³⁶ Na'i muri 'agu ha'ataari'i ro'u tara'i sae tatau'aro ana'i. Na'i 'ohani rau rago di'uai ruruha na'i na'o. Miraau sae narau 'omesuriai mou, rau haua ro'u mau i ta'i herehere nara haua 'adaui ruruha na'i na'o.

³⁷ "Ha'ahakona 'a ha'ataaria 'ari huunai gare ana. 'Iia 'a 'adoma'inia dorai ha'ahoua.

³⁸ Na'i 'oha rau re'ia rau o'ani, 'Naasia mo'o naigu to'oraai mousi na'i 'oha nai mae amana. Gau magai ngahu ha'amaesia magai to'ora nagaau i mou.'

³⁹ Rau 'ariwou marau daua. Rau waia hura'a na'i murinai mou naraugu ngahu ha'amaesia na'iei."

⁴⁰ Mia Jisas 'agu o'ani 'iniraui Na'ohadaui Piriisi miraui saemaua adaa'i Jiu, "Mou 'adoma'inia do'e taha nai haua mo'o na to'oraai moui grep naasi 'adaui sae 'isi na'i 'oha 'ai aho'i mai?"

⁴¹ Miraui o'ani, "'Ai ngahu ha'amaesiraui sae ta'a'i 'isi, mai nuga'i tara'i sae he'ete'i ro'u 'anai 'omesuriai mou nei narai matai haa'i tanaai hua na ga'i to'ora'i na'i 'oha narai mauai grep."

⁴² Naasi mia Jisas 'agu o'ani ro'u 'iniraui, "Mou ai'a 'oha'inia gasi taha na 'unuai Usu-usu Maea na o'ani,

'Na hau na 'iraui sae tatau'aro ruma rau 'itaa,
naia naagu ha'i hau na ororiu di'u na'i bani anai ruma.

'Ia Arahā God na haua do'ai o'asi,
magau wa'ewa'e di'u 'inia.'§

⁴³ "Na tarana naasi nawai 'unua tana'amou. Na'i na'o 'ia God 'a 'ome sigihi'amou ai Jiu 'anai awa bahainai heimarungi ana. Ma na'i 'ohani 'ai orisi'amou mai ha'awateraui noni he'ete'i narai matai hungu 'ini'i huudi hua goro 'anai awa na'i bahainai heimarungi ana.

⁴⁴ 'Ia tei nai agusu na'i hausu, 'ai maara ta'aa. Mia tei na hausu 'ai ahoda hunia, 'ai meme'a."

⁴⁵ Na'i 'oha 'iraui Na'ohadaui Piriisi miraui saemaua adaa'i Jiu rau bahurongoa Jisas, rau aidangisia do ni ha'atee heiha'auu na haa'i ra to'iraui.

⁴⁶ Marau raba daua'a Jisas dorai ha'a-mama'aia, maraui magugu do ra gasigu ha'agogoru i sae rago. 'Inia ra hinihinia do 'ia Jisas 'e rarabea.

22

Ha'atee Heiha'auu 'Abaii Ngaugoni

Na'i Ha'aha'iwai (Luk 14:15-24)

¹ 'Ia Jisas 'a haa'i ro'u tara'i mamaani heiha'auu tanaraui sae rago.

² 'A o'ani, "I heimarungi ana God na awa na'i aro 'a 'onaai mwaeraha na hauai ngaugoni 'oha na ha'iwai gare mwane ana.

³ 'A ragoi sae na ari'ahuraui. Ma na'i 'oha na agau hako'i mwane maho, 'a ha'a-taariraui hura'a hako'i sae tatau'aro ana'i 'anai 'unuraui mai sae na ari'ahuraui, maagu 'iraui sae 'isi, ra kakawata'i boi 'anai ngaugonisi.

⁴ Na'i muri 'a ha'ahanori'i tara'i sae tatau'aro he'ete'i ro'u ma o'ani 'iniraui, 'Moi 'ari mamoi 'unuraui mai sae nagau ari'ahuraui marai boi raurau. 'Inia na mwani maho ra agau'a, na mwani kau pwapwanato'a agui nara ngahui'i ra ha'amatota'i hako'a!'

⁵ “Mana'i 'oha narau 'ariwou, ni sae ra ari'ahuraausi raugu da'ata'inia moi mwaeraha marau poru agohe moi 'ini'i taha rau haa'i. Tara'i abe rau 'ari moi suri'i mou adaa'i, ma tara'i abe rau 'ari dora narau tau'aro suri'i.

⁶ Ma tara'i abe rau dau'i sae tatau'aro ana'i mwaerahasi marau here ha'ata'airaau mara ngahu ha'amaesiraau.

⁷ “Mana mwaeraha 'a taesu'a di'u ma ha'ataariai ruruha hehei'oi ana narau ngahu gata'iniraau sae hahaingahu 'isi mara suungiai 'omaa adaau.

⁸ Naasi mwaeraha 'agu o'ani 'iniraau tara'i sae tatau'aro ana'i ro'u, 'I sae nau ari'ahuraa, rau ai'a arari 'anai boi, maagu mwane maho 'anai ngaugoni ra agau hako'a.

⁹ Naasi moi 'ari suri'i tara raha suriai 'omaa mamoi ari'ahua namoiwou ta sae namoi sadoia marai boi 'anai ngaungauni.'

¹⁰ “Miraau sae tatau'aro ana'i mwaeraha rau 'ari marau waa'i mai mwane sae. Tara'i nei ra'i sae hehere ta'aa ma tara'i nei ra'i sae goro. I ruma 'anai ngaungau na'iei 'a honu ha'atai 'iniai sae.

¹¹ 'Oha na mwaeraha 'a boi 'anai re'iraau sae narau boi, 'a re'ia'a i ta'i sae na ho'osiai bwana he'ete'i na ai'a arari 'anai ho'osia na'i ha'aha'iwai.

¹² Ma o'ani'a 'inia, 'Gere sae agua, 'a he'uai siri mai amua na'i 'ini? 'Inia i'oe 'o ai'a ho'osiai bwana na 'ome marasinai ha'aha'iwai.' Mia mo'osi 'a ai'a aramia 'inia ta mareho.

¹³ Mana mwaeraha 'a o'ani 'iniraau sae tatau'aro ana'i, 'Moi daua mamoi ho'osi'i uwana'i mana rimana'i mamoi gaasia hura'ai dora kuhi. Na'i 'isi rai angi marai 'ara ha'angingita'i rihodaa'i na'iei.' ”

¹⁴ Mia Jisas 'agu o'ani, “A ragoi nei na 'ia God 'a ari'ahuraa ma'e taringai nei moi na 'ome sigihiraau.”

*Heisonga'i Abaii Hori Takisi
(Mak 12:13-17; Luk 20:20-26)*

¹⁵ 'Iraau Farisei narau awa 'isi rau hano baaniai dorasi marau ha'aradorado 'anai sadoia ta here narai ha'a-bweubweu'aa Jisas 'inia, neina 'ai 'unua ta maho taritari'a narai ha'a-mama'aia 'inia.

¹⁶ Na'i muri, rau soigoniraau mai tara'i rongoiusuri adaa'i bei'i tara'i ai Jiu nara wa'ewa'e 'iniai heimarungi ana Herod.* Rau ha'a-taariraau 'anai taha beia Jisas marau songa'inia o'ani, “Ha'ausuri, meu 'iraraa dona mwane maho na'o 'unu'i ra ha'a-momori hako ma'o ha'ausuriraau noni 'ini'i taha 'ia God na 'irisiai noni 'anai haa. Ma na'i 'oha na'o ha'ausuriraau, rei'uaa na 'e sae he'ua na bahurongo'o, mana ha'ausuringa'i amu'i ra ta'isada moi.

¹⁷ Naasi, meu raba rongoai 'ado'adomu. 'A 'ua? Na'i ringeringe agaau, 'a odo-odo dogai hori takisi tanaai mwaeraha raha na'i Rom ma'ua ai'a?”

¹⁸ 'Ia Jisas 'a bwani 'iraraai 'ado'ado ta'aa na awa na'i 'adoma'idaau na'i 'oha narau hauai heisonga'isi ma o'ani 'iniraau, “'I'amou ra'i sae pwapwapwaari'i! 'A 'ua namou raba ha'a-bweubweu'aa 'anai 'unuai maho na taritari'a?”

¹⁹ Moisu waa mai ta korai ha'a nara matai haa 'anai hori takisi.” Miraau haua tanaa.

²⁰ Mia o'ani 'iniraau, “Na atana tei mana nununa tei na awa na'i korai ha'ani?”

²¹ Miraau o'ani, “Na atana Mwaeraha adaui Rom mana nununa.”

Maagu o'ani 'iniraau, “'Onaa na o'asi, mamoi haua tanaai Mwaeraha i taha 'iia na to'oraa, mamoi haua tanaa God taha 'ia God na to'oraa.”

²² 'Oha rau rongoai ha'atee ana o'asi, rau heimwaota'i di'u marau hano'a baania.

* **22:16 Herod:** 'Ia Herod 'e ai Rom. 'Iraau Farisei rau 'itaa di'u i heimarungi adaui Rom. Naasi, 'oha rau mwa'emwa'e 'anai tau'aro goni beiraui Jiu nara aba beia Herod, 'a ha'ata'inia dorau huunai 'itaa Jisas.

Heisonga'i 'Abaiai Suruta'e Aho'i
(Mak 12:18-27; Luk 20:27-40)

²³ Na'i maui dangisi tara'i Sadiusi ra boi beia Jisas. 'Iraausi rau ai'a hinihinia do 'irai noni rai suruta'e aho'i baaniai mae, miraaui songa'inia Jisas o'ani,

²⁴ "Ha'ausuri, 'Ia Moses 'a 'unua do 'onaa ta sae nai waina ta urao maigu mae baania ha'i ai'a to'o gare, 'i do'orana mo'osi 'ai waina ro'u i uraosi. Mana gare na rarui to'ora'i, rai 'unu'i 'ini'i gare ana'i do'orana na maesi, neina burungana 'a bwa'i hako.

²⁵ "Hoita, na'i na'o, 'e biu ha'ido'orada nara awa na'i 'omaa ameeuni. Nei tahamora 'a ha'iwai ma mae ha'i ai'a to'o gare, mana do'orana na hutai muri 'a waina ro'u i urao na mae baania do'orana na hutai na'o.

²⁶ Ma mae ro'u ha'i ai'a to'oraa ta gare, mana uraosi 'a waina ro'u i nata do'oradarua i rua ha'ido'orada nararu maesi. Ma o'asi moe'a tari 'oha na biu ha'ido'oradasi raugu buna waina hako i ta'i uraosi.

²⁷ Ha'ahakona mana uraosi 'a mae ro'u.

²⁸ "Hoita, na'i 'oha ni suruta'e aho'i, 'iatei 'iniraaui ha'ido'orada 'isi naigui to'oraai uraosi? 'Inia 'iia 'a waidaau hako i biu ha'ido'oradasi."

²⁹ Mia Jisas 'a aramiraaui o'ani, "Mou taritari'a ha'atai! 'T'amou ai'a aidangisiai Usu-usu Maea mamou ai'a aidangisia ro'u i taha na mena ana God 'ai matai haua. Naia namou to'oraa 'inia 'ado'ado bweubweu'asi.

³⁰ Na'i 'oha 'iraaui sae rai suruta'e aho'i, 'a bwa'i sae nai ha'iwai. 'Iraau rai 'onaairaaui enjel na'i aro nara ai'a ha'iwai.

³¹ 'Io, ma wai ha'a-aidangisi'amou ro'u 'inia suruta'e aho'i. 'A 'ua? Mou ai'a 'oha'inia taha na 'ia God 'a 'unua tana'amou na'i Usu-usu Maea 'abaiai suruta'e aho'i? 'A 'unua o'ani,

³² "Inau naasi God ana Ebrahim, mia Aisak mia Jekop.† Mana God naasi, ai'a God adaui nei ra mae, me 'e God adaui nei ra tahi. Naasi 'a ha'ata'inia doni waira orusi rau tahi mau, rei'uaa narau bwane mae."

³³ 'Oha na mwani sae rago 'isi ra rongoai taha na 'unua Jisas, rau heimwaota'i di'u 'ini'i ha'ausuringa'i ana'i.

Heisonga'i 'Abaia Ha'atora Na Ororiu Di'u
(Mak 12:28-34; Luk 10:25-28)

³⁴ 'Oha 'iraaui Farisei rau rongoa do'ia Jisas 'a ha'a-papakuraaui Sadiusi, rau ruru goni 'anai ha'aradorado maraugu 'ariwou beia Jisas.

³⁵ 'E ta'i 'iniraaui 'e Ha'ausuri 'anai Ringe ana'ia Moses, 'a hauai ta'i heisonga'i 'anai ha'imaania Jisas.

³⁶ 'A o'ani, "Ha'ausuri. I Ha'atora he'ua na ororiu di'u baani'i hako i mwane Ha'atora."

³⁷ Mia Jisas 'a o'ani, "'Oi ta'ahiai Araha God amua 'inia tahingamu hako mana ahumu hako mana 'adoma'imu hako.‡

³⁸ Naasi Ha'atora na ororiu baani'i hako mwane Ha'atora.

³⁹ Nata nei na ororiu ro'u, "Oi ta'ahiai nata sae 'onaai ta'ahi'o amua haari'o. §

⁴⁰ I Ringe hako ana'ia Moses mana ha'ausuringa'i adaa'i Rarabea ra awa hako na'i bahainai rua Ha'atorasi."

Heisonga'i 'Inia Mo'o Nai Ha'atahiraui Jiu
(Mak 12:35-37; Luk 20:41-44)

⁴¹ Na'i 'oha na 'iraaui Farisei rau awa mau beia Jisas, 'ia Jisas 'a songa'iniraaui o'ani,

⁴² "Mou 'adoma'inia do Ha'atahi 'e pwirana tei?"

† 22:32 22:32 Eksodas 3:6 ‡ 22:37 22:37 Diutronomi 6:5 § 22:39 22:39 Lev 19:18

Miraaau o'ani, "'E pwirana Mwaeraha Deved."

⁴³ Mia Jisas 'a o'ani ro'u, "Ma 'ua na Hi'ona Maea 'agu haua 'inia tanaa Deved i 'ado'ado nagu 'unua 'inia do 'i Ha'atahi naasi 'ia Araha ana? 'Ia Deved 'a 'unua o'ani,

⁴⁴ "Ia Araha God 'a ha'atee o'ani 'inia Araha agua, 'O'i heinagu na'i aba odogu
'anai heimarungi beiau,
tari 'oha wai nugaraau i maerongamu
na'i bahainai heimarungi amua.'*

⁴⁵ Na'i 'oha na 'ia Deved 'a 'unua do 'ia Ha'atahi 'e Araha ana, 'a ha'ata'inia do 'ia Araha ai'a do'e pwirana moi, ma'ata 'iia Araha ro'u ana."

⁴⁶ Na'i 'ohasi ai'a ta ta'i nei 'iniraaui Farisei nai aramia. Taraawa'a mau na'i 'ohasi ai'a ta ta'i nei 'iniraaui ro'u naigui raba haua ro'u ta ta'i heisonga'i.

23

Ha'abasu 'Iniai Barongadi

Saemaua adaa'i Jiu

(Mak 12:38-40; Luk 11:37-52; 20:45-47)

¹ Mia Jisas 'a o'ani 'iniraaui noni hunga mana rongoiusuri ana'i,

² "I tau'aro adaaui Ha'ausuri 'anai Ringe miraaui Farisei naasi 'anai mamaani ruhasi'i 'ado'ado 'ada'i taha ra awa na'i Ringe ana'ia Moses.

³ Mareho rai maani'i, moi araisuri'i mamoi ha'isuri'i. Ma'ata moi abu 'onaairaaui. 'Inia rau ai'a ha'isuri'i taha narau ha'ausuri'amou 'ini'i!

⁴ Rau ha'ahihi'amou 'ini'i mwani ringeringe nara bwara 'anai ha'isuri'i maraugu ai'a gere 'a'auhi'amou 'anai araisuri'i.

⁵ "Mwani maho rau haa'i rau haa'i do 'iraaui sae rai wanasiraaui marai ha'a-ta'eta'eraau 'ini'i. Rau ha'araha'i gere anga narau ho'osi'i na'i rimadaa'i ma na'i hauraedaa'i nara awaiei tara'i tatara i Usu-usu Maea. Mana'i gaodi to'oni tewa adaa'i rau ha'atewa'i ro'u aurui gere hasiwaro* nara kurukuru suri'i.

⁶ Na'i suri'i ngaugoni mei suri'i rumani ha'arahesi rau raba heinagu moe'a suri'i dora ororiu.

⁷ 'Oha rau 'ari suri'i dorani maketi, rau 'irisia di'u dorai ha'a-ta'eta'eraau mana 'unuraaui 'inia ha'ausuri.

⁸ "'I'amou moi abui 'irisia dorai 'unu ha'ausuri 'ini'amou, 'inia 'e ta'i sae moi na ha'ausuri'amou, 'inau. 'I'amou hako rai ha'ido'orada.

⁹ Moi abui 'unu Ama ro'u 'inia ta sae ni marewanani. 'Ia moia God naasi Amamoou na awa na'i aro.

¹⁰ Moi abui 'irisia dorai 'unu bwauodo 'ini'amou 'inia 'e ta'i bwauodo moi, 'iia naasi Ha'atahi.

¹¹ 'Iatei nai bwauodo 'ini'amou, 'iia naasi nai ha'i sae tatau'aro namoou.

¹² 'Iatei nai ha'a-ara'ahia haaria, 'ia God 'ai ha'a-auruhia. Mia tei nai ha'a-auruhia haaria, 'ia God 'ai ha'a-ara'ahia.

¹³ "'Ai ta'aa di'u tana'amoui Ha'ausuri 'anai Ringe ana'ia Moses mi'amou Farisei! Mou here 'onaa domou goro, ma'ata ai'a! Mou ai'a raba siri na'i heimarungi ana God mamougu ha'a-bwarasiraaui ro'u i nei nara bonasiai siri na'iei.

¹⁴ "'Ai ta'aa di'u tana'amoui Ha'ausuri 'anai Ringe mi'amou Farisei! Mou here 'onaa domou goro, ma'ata ai'a! Mou ha'a-bweubweu'araui nao 'ini'i

* **22:44** 22:44 Psalm 110:1 * **23:5 Gere hasiwaro:** I hasiwaro 'isi ra ha'ata'inia do ra ha'ahoua God. Rau suriai ringe na 'ia God na 'unua na'i Nambas 15:37-41. Ma'ata, 'iraaui Farisei ra raba ha'atewa'i 'anai ha'ata'inia do 'iraaui rau ha'ahoua di'u a God baaniraaui mwani sae hako.

ruma adaa'i mana mareho narau to'ora'i. Mana 'oha mou ha'arahesi, mou pwari'i ha'amaesiraaui noni 'anai haa'i rihunga'i tewa. Moi aidangisia do na ha'a-mama'ai, 'ia God 'ai ha'arahaa ro'u wou tana'amou.

15 “Ai ta'aa di'u tana'amoui Ha'ausuri 'anai Ringe mi'amou Farisei! Mou here 'onaa domou goro, ma'ata ai'a! Mou tau'aro raha 'inia 'ari suriai mwane dora, na'i asi mana'i toro 'anai sadoia ta sae 'anai rihosia ma do'ai awasuri'i ha'ausuringa'i amoo'i. 'Oha nagu suri'amou, na barongana'i ra ta'aa di'u ro'u wou mana ha'a-mama'ai na 'ia God 'ai haua tanaa na'i dora ni rongomaata'i, 'ai raha di'ua i ha'a-mama'ai nai haua tana'amou.

16 “Ai ta'aa di'u tana'amou, 'inia mou 'onaai sae kuru na na'otaradaaui noni. Mou ha'ausuriraaui sae do 'onaa rai tohe na'i atanai Ruma Maea ana God beiai duruduru nara haua, 'a ai'a 'ua 'anai horoosiai durudurus. Me 'onaa rai tohe na'i gol na awa na'i Ruma Maea, 'a ororiu di'u dorai abu horosia.

17 “T'amou kuru mora mamou bweu! Ni Ruma Maea ana God 'a ororiu di'u baani'i gol, suria naasi maho na ha'amaea'i gol 'isi

18 Mou 'unua ro'u do 'onaa rai tohe na'i dora ni suu ho'asi beiai duruduru nara haua, ai'a 'ua 'anai horoosiai durudurus. Me 'onaa rai tohe na'i ho'asi na awa na'i hunganai dora ni suu ho'asi, 'a ororiu di'u dorai abu horosia.

19 Mou kuru! Ni dora ni suu ho'asi 'a ororiu di'u baaniai ho'asi, suria naasi maho na ha'amaeaa i ho'asi.

20 Naasi, 'iatei na tohe na'i dora ni suu ho'asi beiai duruduru na haua, 'a tohe ro'u na'i ho'asi na awa na'i hungana.

21 Mia tei na tohe na'i atanai Ruma Maea beiai duruduru na haua, 'a tohe'a ro'u na'i atana God, 'inia 'iia 'a awa na'i Ruma Maea.

22 'iatei na tohe na'i aro beiai duruduru na haua, 'a tohe ro'u na'i dora ni mwaeraha ana God ma tohe ro'u na'i atana God, 'inia 'ia God 'a heinagu na'i dora ni mwaerahasi.

23 “Ai ta'aa di'u tana'amoui Ha'ausuri 'anai Ringe mi'amou Farisei. Mou here 'onaa domou goro, ma'ata ai'a! 'Inia rei'uaa namou wate'i tanaa God tangahurudi gere mareho rawa kekerei ta'a'i nara ha'angaugoro i mahoingau, ma'ua tara'i mareho ro'u suri'i mou amoo'i, mi'amou mou ai'a araisuri'i mareho raha nara awa na'i ha'ausuringa'i anai Ringe ana Moses. Mareho 'onaai haa'i here ra odo-odo tanaraaui sae, 'a'auhiraui sae ha'ha'aroha'a ma 'anai ha'a-momori suri'i mwani maho namou haa'i. 'A goro i wate'i moi mareho kekerei o'asi tanaa God, ma'ata 'a ta'i kaeni goro di'u 'onaa mou ga'i haa'i ro'u i mareho raha.

24 T'amou naasi sae 'anai na'otara mamougu 'onaai sae kuru. 'Oha mou bonasiai suri'i mwani gere ringe nara ai'a taraa ororiu, mamougu kaku'a'i mwani nei nara ororiu, mou here 'onaai sae na tau'aro raha 'anai rahiai gere abei nono baaniai panikeni wai, magu ai'a aidangisia do 'a gonohiai abei kamel.

25 “Ai ta'aa di'u tana'amoui Ha'ausuri 'anai Ringe mi'amou Farisei. Mou here 'onaa domou goro, ma'ata ai'a! Mou 'onaai sae na wasi ha'a-wadiwadi'i abedi panikeni mana abedi rabo'o, mana rarodi ra do'o'a moi. 'Inia 'omehamouu 'a kae goro na'i maadaaui sae, ma na'i raromamoo'i, naia haariai hairaurau mana 'ado'ado 'anai ha'a-wa'ewa'e'amou haarimoou.

26 T'amou Farisei mou 'onaai sae kuru. Moi wasi ha'a-wadiwadia ga'u i raronai panikeni mana raronai rabo'o, maigu wadiwadi ro'u i abena.

27 “Ai ta'aa di'u tana'amoui Ha'ausuri 'anai Ringe mi'amou Farisei. Mou here 'onaa domou goro, ma'ata ai'a! Mou 'onaai hera nara here ha'a-'omegoroa. 'A 'ome goro moi na'i abau 'omaa, mana'i raronai 'a honu 'ini'i surisuri mana sae mae ra ngabo.

²⁸ Marehosi 'a to'i'amou, 'inia 'omehamoou 'a kae goro na'i maadaui sae, ma na'i raromamoo'i, 'a honu 'iniai pwari'i mana ora-ora'a.

²⁹ "Ai ta'aa di'u tana'amoui Ha'ausuri 'anai Ringe mi'amou Farisei. Mou here 'onaa domou goro, ma'ata ai'a! Mou tau'aro ha'agorohi'i barabaradaa'i rarabea na 'iraaui wauwa amoo'i rau ngahu ha'amaesi'i 'oha bwani mamou here ha'a-'omegoro'i barabaradaa'i sae odo-odo na 'iraaui ro'u narau ha'amaesi'i.

³⁰ Mamou 'unua do 'onaa moi awa na'i madoraasi mou ga'i bwa'i 'a'auhiraui wauwa amoo'i 'anai ngahu ha'amaesiraui rarabea 'isi.

³¹ 'Oha namou 'unua do 'iraaui ra'i wauwa amoo'i, mou rangasia ha'a-momori'a do 'i'amou ra'i pwiradaa'i sae narau ngahu ha'amaesiraui rarabea.

³² Naasi, moi ha'a-ariosia wou i here ta'aa rau hauai wauwa amoo'i 'oha bwani.

³³ 'T'amou mwani mwaa ta'a'i! 'Ai he'ua namoigu hora 'inia baaniai ha'a-mama'ai na 'ia God 'a nuga mamasi'amou 'inia na'i dora ni rongomaata'i?

³⁴ "Naasi, wai 'unua tana'amou. Wai ha'ataari'i rarabea mana sae madoma mana ha'ausuri tana'amou. Moi taritariraaui suri'i mwani 'omaa 'anai here ha'ata'airaaui. Tara'i nei 'iniraaui moi ngahu ha'amaesi'i, tara'i nei moi rabu ahita'ini'i na'i dadaahoro, ma tara'i nei moi rorohoraaui suri'i ruma ni ha'arahesi.

³⁵ Suriai haua amooi o'asi, 'i'amou namoigui dau ha'a-mama'ai 'ini'i sae odo-odo ana'ia God nara bwani ngahu ha'amaesiraui mau mai, taraawa'a mau na'i 'oha 'ia Kein 'a ngahu ha'amaesia Ebol tari beia Sakaraea, gare ana Barakaea na 'i'amou ai Jiu mou ngahu ha'amaesia na'i ahoana'i dora ni ho'asi mana Ruma Maea ana God.

³⁶ Wai 'unua ha'a-momori tana'amou, 'i'amou inoni na'i 'ohani naigu auru hunimoou i ha'a-mama'ai nai haua God 'ini'i mae nara haa'i sae 'isi."

'Ia Jisas 'A Angisiai Jerusalem (Luk 13:34-35)

³⁷ Mia Jisas 'a ha'atee o'ani, "Ei Jerusalem, Jerusalem. 'T'amou namou ngahu ha'amaesi'i rarabea mamou buta ha'amaesi'i sae heitaroha'i ana'ia God 'ini'i hau. 'A rago i 'oha nau rabasia domoi boi beiau 'anai 'omesuri'amou 'onaa bi'a i kua na abwa bwarasi'i gare ana'i. Mi'amou ai'a rabasia.

³⁸ Naasi moi rongoa! 'Ia God 'a hano'a baaniai 'omaa mana Ruma Maea amooi.

³⁹ Mawai 'unua tana'amou, 'a bwa'i ta 'oha namoigu 'omesiau tari 'oha namoi ha'atee o'ani, 'Araha God, 'oi ha'agorohia mo'o na'o ha'ataaria mai.' "

24

'Ia Jisas 'A Ha'arangasia Hura'a

Do Ruma Maea Rai Kaia (Mak 13:1-2; Luk 21:5-6)

¹ 'Oha 'ia Jisas 'a hano baaniai Ruma Maea ana God, 'iraaui rongoiusuri ana'i rau 'ariwou beia marau maania tanaa i 'ome goro na haa i Ruma Maea mana mwani gere ruma garigaria.

² Mia Jisas 'a o'ani 'iniraaui, "Mou re'i'i mwani ruma 'isi? 'E 'oha nai boi mau na bwa'i ta ta'i hau 'ini'i hau 'isi naraigui awa suri'i dora nara heinagu suri'isi. Na mwane hau 'isi rai gaasi'i dio. 'E mareho ha'a-momori nau maania tana'amounisi."

*Ha'abasu 'Ini'i Maho Ta'a'i Narai Siri Mai
(Mak 13:3-13; Luk 21:7-19)*

³ Na'i muri 'ia Jisas 'a heinagu na'i hungahungai 'Oliv. Miraau rongoiusuri ana'i rau boi haarirau beia marau o'ani 'inia, "'Oi maania tana'ameu i 'oha he'ua nai to'o i mareho na'o maania ani? Ma 'e ha'ara he'ua na mei re'ia na meigu 'iraraa 'inia do 'a gaarangi'a i ha'ahakonai dangi mana madoraa na'oi aho'i mai?"

⁴ Mia Jisas 'a aramirau o'ani, "Moi 'ome'ome goro. Ra gasi ha'ateha'amou tara'i sae.

⁵ 'Inia 'ai ragoi nei narai boi heitaroha'i na'i atagu narai o'ani, "Inau naasi Ha'atahi.' Ma'ai ragoi nei narai ha'ateharaau 'ini'i ha'ausuringa'i adaa'i nara ai'a ha'a-momori.

⁶ Moi rongo'i rongo raha suri'i hei'oi nara to'o gaarangi mana taroha 'ini'i nei ra to'o ha'atau. Ma'ai abui ta'aabemoou. 'Inia mareho 'isi rai to'o o'asi'a, ma ai'a do naasi'a i ha'ahakona dangi.

⁷ 'Iraui sae na'i ta'i kantri rai 'ari marai heingahui beirau sae na'i nata kantri. I hioro raha 'ai to'iraui sae suri'i tara'i dora mana nunu raha rai 'ihara'ini'i tara'i dora na'i marewana.

⁸ Maho 'isi 'e taraawa'adi moi rongomaata'i, 'onaai urao nagu taraawa'a maesi ahu 'anai ha'ahutaai gare.

⁹ "Na'i madoraasi, sae suri'i mwani dora hako na'i marewana rai 'utai'amou suria 'i'amou ra'i rongoiusuri agu'i. Rai dau'amou 'anai nora ta'ai'amou marai ngahu ha'amaesi'amou.

¹⁰ 'Ai ragoi sae hinihini naraugu bwa'i raba hinihiniau'a. 'Iraui rai 'itaraau hairiu marai usuha'inirau tanaraui maerongadaa'i.

¹¹ Na'i 'ohasi 'ai ragoi rarabea pwapwari'i rai ta'eha mai, ma'ai ragoi sae narai ha'ateharaau 'ini'i ha'ausuringa'i adaa'i nara ai'a ha'a-momori.

¹² Suriai haa'i moe'a adaa'i here ra ta'a'i, gaarangi 'iraui hako sae ra bwa'i to'oraa'a i heita'ahi.

¹³ Ma 'onaa moi ura baabau tari ha'ahakonai madoraa ta'aasi, moigu daua namooui tahi tarau.

¹⁴ Mana Taroha Goro 'abaiai heimarungi ana God rai taroha'inia hura'a 'ari suriai marewana hako neina mwani noni hako rai rongoa, maigui boi ha'ahakonai dangi."

'Ia Jisas 'A Ha'arangasiai Taha

Nai To'o Na'i Jiudea

(Mak 13:14-23; Luk 21:20-24)

¹⁵ Mia Jisas 'agu o'ani ro'u, "Ta 'oha, 'i'amou moi re'iai mareho na ta'aa di'u na 'ia God na 'itaa. Naia naasi mareho na 'ia Rarabea Daniel 'a ha'atee rarabeanga'inia na'i 'oha bwani. 'Ai ura na'i Ruma Maea mai ha'ata'ai ai dorasi na'i maana God. 'Iatei na'oi 'oha'iniai ha'ateeni, 'oi ha'imaania aidangisia ma'ata'a i 'ado'ado 'ana.

¹⁶ Hoita, 'onaa 'oi awa na'i Provensi Jiudea na'i madoraasi, 'oi hora ta'eha suri'i hungahunga 'anai bainihu.

¹⁷ 'Onaa 'oi awa hura'a i buriinai ruma amua, 'oi hora'a! 'Oi abui siri aho'i na'i ruma 'anai rahi'i tara'i mareho amu'i.

¹⁸ 'Onaa 'oi awa na'i mou amua, 'oi abu aho'i 'ari ruma 'anai hauai bwana amua.

¹⁹ Ha'a-arohai'araui di'u i urao ra pote mana hasuuri'i, 'inia 'ai bwana tanaraui hora.

²⁰ Moi ha'arahesi mana madoraasi 'ai abui to'o na'i 'oha na rangi ro'aro'a ma'ua na'i dangi ni mamaro.

21 'Inia ni rongomaata'i na'i madoraasi, 'ai ta'aa di'u baani'i mwane rongomaata'i nara taraawa'a mau na'i madora na ha'apwa'araa God i marewana tari dangini. Ma na'i muri, 'a bwa'i ta madora ta'aa o'asi'a ro'u naigu to'o.

22 'Onaa 'ia God 'ai abui ha'apwakuai madoraasi, 'a bwa'i sae nai tahi. Me suriai ta'ahiraau ana i sae na bwani 'ome sigihiraau, naia naigui ha'apwakua 'inia i madoraasi.

23 "Na'i 'ohasi 'onaa ta sae nai o'ani, 'Moisu wana mai. Naani Ha'atahi,' ma'uasi 'ai o'ani, 'Na 'ariani.' Moi abui hinihinia.

24 Rai sae pwapwaa'i rai boi ma rai o'ani, "Inau naasi huunai Ha'atahi,' ma'uasi rai o'ani, "Inau naasi huunai Rarabea ana God.' Rai haa'i ha'ara raha mana ha'abu'oahu 'anai ha'ateharaau sae. Rau raba ha'ateharaau ro'u i nei na 'ia God 'a bwani 'ome sigihiraau maagu bwara.

25 Naasi moi mamataihere goro 'iniraau. Naia nau ha'abasu'amou 'inia na'i na'o 'ini'i mareho 'ini.

26 "'Onaa ta sae 'ai o'ani, 'Moi bahurongoau! 'I Ha'atahi na 'ari dora mangasarasi,' moi abui 'ari. Ma 'onaa 'ai o'ani, "Iia na moi siriwou rumani,' mamoi abu hinihiniai taha na 'unuasi.

27 'Inia na'i 'oha na 'inau i Gare i Noni wai aho'i mai, wai ha'ata'i goro hura'a 'onaai mararea na marewa raha na'i ahoaa na marewasiai rua aba hairiu.

28 Ma gau 'iraraa, na'i dora na awaiei maho na mae, rai ruru wou iei manu nara matai ngaa'i maho mae."*

'Ia Jisas 'A Ha'arangasia

i Aho'i Mai Mau Nai Haa

(Mak 13:24-27; Luk 21:25-28)

29 Mia Jisas 'a o'ani ro'u, "Na'i moi murinai madora ta'aasi, 'I sina 'a bwa'i marewa, mana hura 'ai o'asi ro'u. I hee'u rai ahoda

mana taraani maho na'i ahoasara rai 'iha'iha.'†

30 "Na'i muri 'iraau hako'i saenai marewanani rai re'ia na'i ahoasara i ha'ara na ha'ata'iniai aho'i mai agua, i Gare i Inoni. Na'i 'ohasi rai awara tau ta'aa 'iniai maaa'u. Maraigui 'omesiai boi aho'i agua suri'i rorodo bejai mena mana raraha na wetewete.

31 'E enjel nai uuhia wetewete i ahuri mawai ha'a-taariraau hura'ai enjel agu'i suriai mwani dora na'i marewana 'anai wairaaui goni mai nei nau bwani 'ome sigihi'i. Rai taraawa'a na'i nata aba i marewana marai tari 'ari na'i nata aba."

Ha'ausuringa'i Baaniai Hasi'ei

Nara 'Unua 'Iniai Fig

(Mak 13:28-31; Luk 21:29-33)

32 Mia Jisas 'agu o'ani ro'u, "Moisu 'adoma'iniai fig mai ha'ausuri'amou. Na'i 'oha na'o re'iai raraanai fig ra taraawa'ai asuru mana rawa ra pwira, ma'o 'iraraa do madora raorao 'a gaarangi'a.

33 'A o'asi ro'u. 'Oha na maho ta'a'i 'isi rai to'o, mamou 'iraraa do 'inau gaarangi aho'i mai'a.

34 Mawai 'unua ha'a-momori tana'amou, mareho 'isi rai to'o, miraau sae nara awa na'i madoraani ra bwa'i mae mau.

* **24:28** 24:28 Ta'i 'ado'ado 'anai tatarani 'a o'ani: Na'i 'oha na 'ia Jisas 'ai aho'i mai, na mwani inoni hako rai 'omesia 'onaai 'omesi'i adaa'i manu narau roho garigariai dora na awa iei maho na mae.

† **24:29** 24:29 Aisaea 13:10; 34:4

³⁵ I ahoasara mana ano rarui anoro mana ha'atee agu'i rai awa tarau."

³⁶ Mia Jisas 'a o'ani, "Na dangi mana madoraa he'ua nawai aho'i mai, ai'a ta sae nai 'iraraa. Rei'uaa 'inau i Gare'i Inoni miraaui enjel na'i aro mameu ai'a 'iraraa ro'u. 'Ta moia Amagu na 'iraraa.

³⁷ Ni mareho na 'iraaui sae ra hahaa'i na'i madoraa ana Noa rai to'o ro'u na'i 'oha 'inau i Gare'i Inoni wai aho'i maisi.

³⁸ 'Oha na ai'a boi mau i ruarua, 'iraaui sae rau poru moi 'inia ngaungau mana gonogono mana ha'aha'iwai tari na'i 'oha na 'ia Noa 'agu buna siri na'i haka.

³⁹ Rau ai'a 'adoma'inia do ta maho nai to'o. Raugu 'asu'a mana ruarua 'a to'o'a ma taresiraaui. 'Ai o'asi taha nai to'o na'i madoraa na 'inau i Gare'i Inoni wai aho'i mai.

⁴⁰ "Na'i 'ohasi ta rua sae rarui tau'aro goni na'i mou. 'Iraau enjel agu'i rai waia ta nei mana nata nei 'ai awa mau.

⁴¹ 'E rua urao rarui tagora mahoingau goni, 'e ta'i rai waia mana nata nei 'ai awa mau.

⁴² Naasi moi 'ome'ome goro, 'inia mou ai'a 'iraraai madoraa he'ua 'inau Araha amou wai aho'i mai.

⁴³ "Moisu 'adoma'inia taha nau maaniani. 'Onaa sae na to'oraai ruma 'ai 'iraraai 'oha na sae beriberi 'ai siri na'i ruma ana, 'a bwa'i mauru. 'Ai 'ome'ome goro ma bwa'i ha'awatea doni saesi 'ai siri 'anai beri na'i ruma ana.

⁴⁴ Naasi 'i'amou ro'u moi ha'aagau tarau, 'inia 'inau i Gare'i Inoni wai aho'i mai na'i madoraa namou bwa'i 'iraraa ro'u."

Sae Tatau'aro Na Ha'aagau Tarau

'Iniai Boi Aho'i Ana Araha (Luk 12:41-48)

⁴⁵ Naasi mia Jisas 'agu o'ani ro'u, "Sae tatau'aro he'ua ni saemaua 'ai ha'a-omesuria 'ini'i mwane mareho na'i ruma ana, ma 'anai ha'atora'ini'i hura'ai mahoingau tanaraaui sae tatau'aro na'i madoraa 'ana? Naia i sae tatau'aro na madoma ma here goro suri'i mwane mareho nara ha'a-u'uria 'ini'i.

⁴⁶ Ha'amwaniai sae tatau'arosi na'i 'oha na saemaua ana 'ai boi sadoia do 'iia 'a here ha'agorohiai tatau'aro ana.

⁴⁷ Ma wai 'unua ha'a-momori tana'amou, 'i saemauasi 'ai ha'a-u'uria mo'osi 'ini'i mwane mareho na to'ora'i.

⁴⁸ "Ma 'onaa 'ia mo'osi 'e sae tatau'aro ta'aa, 'iia 'ai matai haua moi 'ado'ado o'ani, 'I saemaua agua 'a bwa'i aho'i raurau.'

⁴⁹ Naasi ma taraawa'a ngahu ngahuraui sae tatau'aro na 'omesuri'i, ma awa moi 'anai ngau mana gonogono raha 'ini waini bweu beiraaui sae nara gono raha.

⁵⁰ 'Aigu 'asu'a mana saemaua ana 'ai ataha na'i madoraa na saesi 'a bwa'i 'adoma'inia do 'a ga'i ataha.

⁵¹ Na'i 'oha nai ataha, 'ai ha'a-mama'aia di'u i sae tatau'arosi, mai nugaa 'anai mamaa'a beiraaui sae narau here 'onaa dorau goro maraugu ai'a. Na'i 'isi naraigui angiangi na'i ei marai 'ara ngingita'i rihodaa'i 'inia rongomaata'i."

25

Ha'atee Heiha'auu

'Iniai Ta'i Tangahurui Gere Urao

¹ Mia Jisas 'agu o'ani ro'u, "Ni heimarungi ana God na awa na'i aro 'a 'onaai mamaani 'inia tangahuru gere urao narau waa'i raita adaa'i 'anai

'ari ruma anai gere urao na ha'aagau 'anai heisadoi beiai sae na dorarui ha'iwai.

² Mana ta'i tangahurui uraosi, 'e waira rima 'iniraaui narau madoma mana nata waira rima rau ai'a.

³ 'Iraau waira rima narau ai'a madomasi, raugu ha'ahonu'i moi raita adaa'i 'inia rumu maraugu ai'a waiwai rumu ha'araroa'a ro'u.

⁴ Miraau waira rima narau madoma rau ha'ahonu'i raita adaa'i 'inia rumu marau waiwai rumu ha'araroa.

⁵ 'Ohasi na mwane na dorarui ha'iwai uraosi 'a gere boi poruporu'a. Rau mamasi wou miraau ta'i tangahurui gere uraosi rau mamauru'a marau mauru'a.

⁶ Raugu 'asu'a na'i 'ubutanai rodo marau rongo'i'a i sae ra awaawara. Ra o'ani, "Ia mo'o nai ha'iwai 'a gaarangi ada'a. Moi hura'a mai 'anai ha'amaotoa.'

⁷ "'Iraau ta'i tangahurui uraosi rau rarai marau ha'aagau'i raita adaa'i.

⁸ Mana rima urao narau ai'a waiwai rumu rau ha'angoni rumu beiraaui nata rima urao, 'inia raita adaa'i ra gaarangi mamata'a.

⁹ Mana rima urao narau madoma rau o'ani 'iniraaui, 'Rumu nameu to'oraa 'a araria moi raita amee'i. Moi 'ari dora 'anai hori rumu mamoi hori namoou rumu.'

¹⁰ "'Oha raugu hano 'anai hori rumu, mana sae narau mamasia 'a ada'a. Mana rima urao narau ha'aagau rau hano'a beia. 'Oha naraugu siri na'i dora ni ngaugoni mara honosia'a i maraaruma.

¹¹ Na'i muri, 'oha naraugu boi nata rima urao, mana maraaruma 'a bwani honohono'a. Miraau awara o'ani, 'Saemaua, 'oi tahangiai maraaruma tana'ameu mamei siriwou.'

¹² Mia mo'o nara ha'aha'iwaia 'agu o'ani moi, 'Wai 'unua tana'amou ha'a-momori. 'Inau ai'a 'irara'amou.' "

¹³ Na'i ha'ahakonai mamaani ana Jisas 'agu o'ani ro'u, "Moi awa ha'aagau tarau, 'inia mou ai'a 'iraraai dangi mana madoraa nawai aho'i mai."

Mamaani Heiha'auu

'Iniai Oru Sae Tatau'aro (Luk 19:11-27)

¹⁴ Mia Jisas 'a o'ani ro'u, "Wai hua ta heiha'auu ro'u 'inia madoraa naigui boi i heimarungi ana God. 'Io, 'e ta'i 'oha 'e saemaua na ha'aagau 'anai hano ha'atau. 'A 'unuraaui mai sae tatau'aro ana'i ma ha'a-u'uriraaui 'ini'i toto'ora ana'i.

¹⁵ 'A haa'i ha'a tanaraau, mana ha'i ha'a na hua 'a suriai mataihere narau ha'ata'inia hura'a suri'i tatau'aro adaa'i. 'E ta'i abe na hua tanaai rima meru, nata abe 'e rua meru, mana nata abe 'e ta'i meru. Na'i muri maagu hano.

¹⁶ "'Ia mo'o nara hua tanaai rima meru 'a hano ma ha'atau'aroi ha'a ma sadoia ro'u i nata rima meru 'anai a'oia ara'a i ha'asi.

¹⁷ 'Ia mo'o ra hua tanaai rua meru 'a hua o'asi ro'u. 'A sadoiai nata rua meru ma nuga a'oia ara'a ro'u 'inia.

¹⁸ Mia mo'o nara hua tanaai ta'i meru, 'a hano ma dehia giru ma ahunia'a na'iei.

¹⁹ "'A orea'a magu aho'i mai saemaua adaaui ma 'unuraaui mai 'anai re'i'i ha'a na haa'i tanaraau.

²⁰ Na sae tatau'aro nara hua tanaai rima meru 'a waa mai ha'a ana ma o'ani 'inia saemaua ana, 'Saemaua, 'inau 'o hua tanaai rima meru, ma naani ro'u i nata rima meru nau to'oana 'inia.'

²¹ "Mia mo'osi 'a o'ani 'inia, 'Goro di'u! 'Ioe 'e sae tatau'aro goro na 'o here goro suri'i mwani mareho nau ha'a-u'uri'o 'ini'i. Suriai here goro

amua na'i gere tagora nau haua tana'o, naasi na'i 'ohani wai ha'a-'u'uri'o 'ini'i mareho raha. 'Oi boi ma'oi wa'ewa'e tarau beiau.'

²² "Mia mo'o nara haua tanaai rua meru 'a boi ma o'ani 'inia, 'Saemaua, 'e rua meru na'o haua tanaau. Ma naani ro'u i nata rua meru nau to'oana 'inia.'

²³ Mana saemauasi 'a o'ani, 'Goro di'u! I'oe 'e sae tatau'aro goro na 'o here goro suri'i mwani mareho nau ha'a-'u'uri'o 'ini'i. Suriai here ha'agorohia amua i gere tagora nau haua tana'o, na'i 'ohani wai ha'a-'u'uri'o 'ini'i mareho raha. Naasi 'oi boi ma'oi wa'ewa'e tarau beiau.'

²⁴ "Na'i muri, na sae tatau'aro nara haua tanaai ta'i meru 'a boi ma o'ani 'inia, 'Saemaua, nau 'iraraa do i'oe 'e sae here bwara. 'Au 'iraraa do rei'uaa na i'oe 'o ai'a tau'aro suri'i mou amu'i, ma'o 'adoma'iniai dau ha'a 'ini'i mahoingau na 'iraa sae tatau'aro amu'i ra hasi'i.

²⁵ Suriai o'asi ana, 'inau mamaa'usi'o mau giru'i'a i ha'a amu'i na'i ano. 'Ome! Nara mau 'ini ha'a amu'i.'

²⁶ "Mana saemauasi 'a o'ani 'inia mo'osi, 'T'oe 'e sae tatau'aro ta'aa! 'O 'age'age! 'O bwane 'iraraa do 'inau 'au 'adoma'iniai dau ha'a 'ini'i mahoingau na 'iraa sae tatau'aro agu'i ra hasi'i.

²⁷ Naasi, 'o ga'i ha'atagoraai ha'a agua na'i rumani niga ha'a! Neina na'i 'oha nawai aho'i mai, wai matai daa goni beia ta gere ha'a narai a'oa ara'a ro'u na'i hungana.'

²⁸ "Mana saemauasi 'a o'ani 'iniraaui sae tatau'aro ana'i, 'Moi rahia baania mo'osi ha'asi mamoi haua tanaa mo'o na to'oraai tangahurui meru.

²⁹ 'Ia mo'o na here ha'agorohiai taha nau haua tanaa, 'inau wai ha'arago'a ro'u wou tanaa mai to'o nei rago. Mia tei na ai'a here ha'agorohiai mareho nau haua tanaa, rei'uaa gere mareho na to'oraa, wai rahia aho'i baania.

³⁰ Hoita, moi daua mo'osi mamoi gaasia siri na'i dora kuhi. Na'i 'isi naigui angiangi na'iei mai 'ara ngingitai rihona.' "

Garei Inoni 'Ai Hiiriraau Sae

³¹ Mia Jisas 'a o'ani ro'u, "Na'i 'oha 'inau i Gare'i Inoni wai aho'i mai 'onaai mwaeraha, wai boi beiai raraha ma beiraau enjel agu'i mawai heinagu na'i dorani mwaeraha agua.

³² 'Iraau hakoi sae na'i mwane marau rai goni mai na'i maagu mawai hoairaaui 'onaai sae 'omesuri siip na hoai'i siip baaniraaui gout.

³³ Wai nugaraui siip na'i aba odo, miraaui gout na'i aba maha.

³⁴ "Minau mwaeraha waigu o'ani 'iniraaui nei na'i aba odo, 'Moi boi, 'i'amoui nei na ha'agorohi'amou a Amagu. Moi boi 'anai awa wa'ewa'e na'i heimarungi ana God na bwani ha'aagaua tana'amou mau mai na'i taraawa'anai marewana.

³⁵ Mou matai siri, 'inia na'i 'oha nau hioro mou hanganiau. 'Oha nau raba gono mou ha'agonoau. 'Au mahuara mamou ha'amaotoau suri'i ruma amoo'i.

³⁶ Na'i 'oha nau ai'a to'o bwana, mou ha'aho'owa'aau. 'Oha nau daoha mou 'omesuriau. 'Oha nau awa na'i rumaniho'o mou garihiaui.'

³⁷ "Miraaui sae nara odo-odo na'i maana God rai o'ani, 'Araha, na'i 'oha he'ua na'o hioro mameu hangani'o, ma'ua 'oha he'ua na'o raba gono mameu ha'agono'o?

³⁸ 'Oha he'ua na'o mahuara mameu ha'amaoto'o, ma'ua 'oha he'ua 'o ai'a ho'owa'a mameu ha'aho'owa'a'o?

³⁹ 'Oha he'ua na'o daoha ma'ua awa na'i rumaniho'o mameu garihi'o?'

⁴⁰ "Minau mwaeraha waigu o'ani, 'Wai 'unua ha'a-momori tana'amou. Na'i 'oha 'o 'a'auhia tanei 'iniraaui do'oragu'i ma'ua asigu'i nara ai'a ororiu na'i marewanani, 'a 'onaa do'o 'a'auhiaui ro'u.'

⁴¹ “Na'i muri waigu rihota'i tanaraaui nei na'i aba maha, mawai o'ani 'iniraaui, “I'amou nei nai ha'a-mama'ai'amou a God, moi 'ariwou baaniau. Dora amou na'i 'ari 'eu na bwa'i kuru'a ro'u ta'oha na 'ia God 'a bwani ha'aagaua tanaa Saetan mana enjel ana'i.

⁴² 'Inia 'inau 'au hioro mamou ai'a hanganiau. 'Au maesiai gono mamou ai'a ha'agonoau.

⁴³ 'Au mahuara mamou ai'a 'unuau siri suri'i ruma amoo'i, 'au ai'a to'o bwana mamou ai'a ha'aho'owa'aau. 'Au daoha mau awa na'i rumaniho'o mamou ai'a garihiau.'

⁴⁴ “Ma rai o'ani, 'Araha, na'i 'oha he'ua nameu re'i'o na'o hioro, ma'ua 'o raba gono, ma'ua 'o mahuara, ma'ua 'o ai'a to'o bwana, ma'ua 'o daoha, ma'ua 'o awa na'i rumaniho'o mameu ai'a 'a'auhi'o?’

⁴⁵ “Mawai o'ani, 'Wai 'unua ha'a-momori tana'amou, na'i 'oha na'o ai'a raba 'a'auhia tanei 'iniraaui do'oragu'i ma'ua asigu'i nara ai'a ororiu na'i marewanani, 'a 'onaa do'o ai'a raba 'a'auhiau ro'u.'

⁴⁶ “'Iraaui sae 'isi rai siri na'i ha'a-mama'ai na bwa'i hako'a ta 'oha. Miraau nei ra odo-odo na'i maana God rai dauai tahi tarau.”

26

I Ha'aradorado 'Anai Ha'amaesia Jisas

(Mak 14:1-2; Luk 22:1-2; Jon 11:45-53)

¹ Na'i murinai mamaani hako ana Jisas tanaraaui rongoiusuri, 'a o'ani 'iniraaui,

² “Mou 'iraraa do na'i ho'oa wou 'ai taraawa'a i rongo 'anai 'adoma'i aho'isiai Roho Aharau. 'Inau i Gare'i Inoni, 'e nei nai usuha'iniau tanaraaui nei rai ha'amaesia na'i hunganai dadaahoro.”

³ Hoita, na'i maui 'ohasi 'iraaui Na'ohadaaui Piriisi ma 'iraaui tara'i saemaua adaa'i Jiu ro'u rau rurugoni na'i ruma ana Kaeafas. 'Iia naasi bwauodo nadaaui Piriisi na'i madoraasi.

⁴ Rau hadanga'iniai here narai haua narau bwa'i rongo raha 'inia na'i 'oha rai daua Jisas 'anai ha'amaesia.

⁵ Rau 'adoma'i aratara dorai abui daua suri'i dangi narau haa i rongo, 'a gasi to'o ta ha'agogoru.

'E Urao Na Ringisiai Rumu

Na'i Bwauna Jisas Na'i Betani

(Mak 14:3-9; Jon 12:1-8)

⁶ 'Ia Jisas 'a awa na'i Betani na'i ruma ana Saemon, 'e sae na lepa ga'u.

⁷ Na'i 'oha 'ia Jisas 'a ngau, 'e urao na sirimai beiai gere bei 'ome goro na awaiei rumu na hori bwara ma si'ini goro. 'A boi ma ringisia na'i bwauna Jisas.

⁸ Na'i 'oha 'iraaui rongoiusuri rau re'iai haua o'asi anai uraosi, rau taesu'a 'ana marau o'ani, “'A 'ua na ha'agata'inia 'inia rumu na hori bwarasi?

⁹ 'Onaa 'a ga'i raonga'inia, 'e kae ha'a nara ga'i horia 'inia, mana ha'a 'a ga'i hisungiraaui 'ini'i sae pohara.”

¹⁰ 'Ia Jisas 'a 'iraraa moi taha rau 'unua ma o'ani 'iniraaui, “'A 'ua namou ha'atee ha'ata'aia 'inia? 'Iia 'a haua tanaau i here na goro.

¹¹ 'Iraaui sae pohara rai awa tarau bei'amou. 'Inau na bwa'i.

¹² Ni mareho na haua tanaausi 'a ha'aagauai abegu 'anai 'oha rai toringiau.

¹³ Mawai 'unua ha'a-momori tana'amou. Suri'i mwane dora na'i marewana narai taroha'inia ei Taroha Goro, rai maaniai taha na haua i uraosi, marai 'adoma'i aho'isia 'inia.”

'Ia Jiudas 'A Raba Usuha'inia Jisas

Tanaraaui Na'ohadaaui Piriisi (Mak 14:10-11; Luk 22:3-6)

¹⁴ Mia Jiudas Iskariot, 'e ta'i 'iniraaui i ta'i tangahuru mana rua rongoiusuri, 'a 'ari beiraaui Na'ohadaa'i Piriisi.

¹⁵ Ma o'ani, "'E siha ha'a namoi haua tanaau 'onaa nawai haua tana'amou ta ha'a-aratara namoi matai daua 'inia Jisas?" Miraau haua tanaa i oru tangahuru korai silva.

¹⁶ Na'i 'ohasi 'a taraawa'a sibasiba madoraa goro 'anai usuha'inia Jisas tanaraau.

Ha'aagau 'Anai Ha'ato'oai Roho Aharau (Mak 14:12-21; Luk 22:7-13; Jon 13:21-30)

¹⁷ Na'i dangi tahamora 'ini'i dangi nara ha'ato'oai Rongo 'ini Bredi nara ai'a dorari'i beiai draebam, 'iraaui rongoiusuri rau boi beia Jisas marau songa'inia o'ani, "Na'i hei na'o 'irisia domei ha'aagaua iei ngaugoni 'anai 'adoma'i aho'isiai Roho Aharau?"

¹⁸ Mia Jisas 'a o'ani, "Moi siri na'i 'omaai Jerusalem mamoi taha beiai sae nau 'unua tana'amou ani. Moi o'ani 'inia, 'I ha'ausuri ameeu 'a 'unua doni madoraa ana 'a gaarangi'a. 'Ai ngau beiraaui rongoiusuri ana'i na'i ruma amua 'anai 'adoma'i aho'isiai Roho Aharau.' "

¹⁹ Na'i 'ohasi 'iraaui rongoiusuri rau haa 'onaai 'unua ana Jisas tanaraau marau ha'aagauai ngaugoni 'anai 'adoma'i aho'isiai Roho Aharau na'i rumasi.

²⁰ Na'i su'urahi, 'ia Jisas mana rongoiusuri ana'i rau heinagu 'anai ngau.

²¹ Na'i 'oha rau ngau, 'ia Jisas 'a o'ani 'iniraaui, "Wai 'unua ha'a-momori tana'amou. 'E ta'i abe 'ini'amou nai usuha'iniau tanaraaui maerongagu."

²² Na'i 'oha rau rongoa o'asi, 'iraaui rongoiusuri rau arunga ta'aa di'u. 'E nei ma o'ani 'inia Jisas, "'A 'ua Araha? 'O 'adoma'inia do 'inau gasi?"

²³ Mia o'ani, "'Ia mo'o miri ta'i toha'iniai dorai bredi na'i ta'i rabo'oni nai usuha'iniau tanaraaui maerongagu.

²⁴ 'Inau i Gare'i Inoni wai mae 'onaai ha'arangasia ada na'i Usu-usu Maea. Ma'ata ha'arohaia di'u a mo'o nai usuha'iniau tanaraaui maerongagu. 'A ga'i goro tanaa 'onaa 'a ga'i bwa'i huta."

²⁵ Na'i 'ohasi 'ia Jiudas, sae na duruduru 'inia do'ai usuha'inia Jisas tanaraaui maerongana 'a o'ani, "Ha'ausuri, 'o 'adoma'inia do 'inau gasi?" Mia Jisas 'a o'ani 'inia, "T'oe haari'o na'o 'unua o'asi."

'Ia Jisas

'A Ha'a-ngaumaearaaui Rongoiusuri (Mak 14:22-26; Luk 22:14-23; 1 Korin 11:23-25)

²⁶ Na'i 'oha rau ngau, 'ia Jisas 'a dauai huai bredi. 'A ha'atee ha'agorohia God 'inia ma uubia. 'A haua tanaraaui rongoiusuri ma o'ani, "Naani abegu. Moi daua mamoi ngau."

²⁷ Ma dauai panikeni waen. 'A ha'atee ha'agorohia God 'inia ma haua tanaraau ma o'ani, "'T'amou hako moi gonohia.

²⁸ Naani 'abugu 'anai ha'a-o'oriai duruduru haoru ana God. 'Ai ahe 'iniraaui mwani noni rago neina 'ia God 'ai 'adoma'i nugasi'i 'inodaa'i.

²⁹ Wai 'unua tana'amou. 'Augu bwa'i gonohia'a ro'u ta waen tari 'oha wai gonohiai waen haoru bei'amou na'i dora ni heimarungi ana Amagu."

³⁰ Rau suru'iai gana marau hura'a 'anai hungahungai 'Oliv.

Jisas 'A 'Unua Do 'Ia Pita 'Ai Tohea
(Mak 14:27-31; Luk 22:31-34; Jon 13:36-38)

³¹ Mia Jisas 'a o'ani 'iniraaui rongoiusuri ana'i, "Na'i rodoni, 'e mareho nai to'o tanaau. Mi'amou hako moi nugasiau mamoi hora hako baaniau 'inia marehosi. 'Ai 'onaai 'unua ada na'i Usu-usu Maea o'ani, "Ia God 'ai ha'amaesiai 'omesuri siip miraaui siip ana'i rai 'adarara.'*

³² Ma'ata na'i 'oha wai suruta'e aho'i, wai 'ari na'i na'o 'ini'amou na'i Galili. Na'i 'isi nagaigui heito'oi ei."

³³ Na'i 'ohasi 'ia Pita 'a o'ani 'inia Jisas, "Rei'uaa na 'iraaui rongoiusuri amu'isi rai nugasio, minau 'au bwa'i moe'a!"

³⁴ Mia Jisas 'a o'ani 'inia, "Pita, wai 'unua tana'o ha'a-momori. Na'i de'eni rodo, i kua 'a bwa'i tataraoke mau mi'oe 'oi bwani tohe ha'a-oru do i'oe 'o ai'a mataiau."

³⁵ Mia Pita 'a o'ani, "Rei'uaa nawai mae bei'o, mau bwa'i 'unua moe'a do 'au ai'a matai'o!" Miraau hakoi rongoiusuri rau ha'atee o'asi ro'u.

'Ia Jisas 'A Ha'arahesi Na'i Getsemanii
(Mak 14:32-42; Luk 22:39-46)

³⁶ Mia Jisas 'a wairaaui rongoiusuri 'ari na'i dora ra 'unua 'inia Getsemanii. Ma o'ani 'iniraaui, "Moi heinagu mamasi 'ini. 'Inau wai 'ari 'ani 'anai ha'arahesi."

³⁷ Ma waia Pita mana rua gare ana Sebedi, 'ia Jems mia Jon. Na'i 'ohasi 'ia Jisas 'a ahutotou di'u mana 'adoma'ina 'a kuhi.

³⁸ Ma o'ani 'iniraaui i waira orusi, "Na ahutotou nau haa 'a raha di'u, mau gaarangi maesia. Moi awa na'i 'ini mamoi rarai beiau."

³⁹ Ma gere sara 'ari wou baaniraaui. 'A topira'i ruru ma abwa auru dioi ano ma ha'arahesi o'ani, "Amagu, 'onaa 'ai mwada'u 'oi abu ha'awateau 'anai siri na'i rongomaata'ini. Ma'ata 'ai abu suriai hei'irisigu, ma 'ai suriai hei'irisimu."

⁴⁰ 'A aho'i mai ma re'iraaui waira oru, rau poru mauru moi. Mia Jisas 'a o'ani 'inia Pita, "'A 'ua namou mauru moi 'inia? Mou bwa'i matai rarai beiau suria moi ta ta'i 'aoa?"

⁴¹ Moi rarai mamoi ha'arahesi neina moi abui ahoda na'i 'oha moi siri na'i heiohongu. Ra wetewete i 'adoma'imoo'i 'anai ha'isuri'i maho ra odo-odo, mana abemoo'i naragu maemae'a."

⁴² 'A aho'i ma ha'arahesi ro'u. Naasi ruanai 'oha. 'A o'ani, "Ama, 'onaa 'a bwara do'oi ha'abwarasiau baaniai rongomaata'ini, ma 'ai o'asi'a 'onaai 'irisia amua."

⁴³ 'Oha na aho'i ro'u ma re'iraaui waira oru rau poru mauru moi. Ni maadaa'i ra hihia di'u 'inia mamauru'a.

⁴⁴ Ma aho'i 'anai ha'arahesi ro'u. Naasi orunai 'oha. 'A 'unua ro'u mau ta'i mareho ani.

⁴⁵ 'Oha nagu aho'i ro'u mai ma o'ani'a 'iniraaui, "'A 'ua? Mou mauru mamou mamaro mau? 'A tari'a i madoraa narai usuha'iniaui i Gare'i Inoni tanaraaui noni ta'a'i.

⁴⁶ 'Ome, 'ia mo'o nai usuha'iniaui tanaraaui maerongagu 'a boi'a. Moi ura ara'a magari 'ari beiraaui."

Ra Boi 'Anai Daua Jisas
(Mak 14:43-50; Luk 22:47-53; Jon 18:3-12)

⁴⁷ Na'i madoraa na hadahada mau a Jisas, mia Jiudas 'e ta'i 'iniraaui rongoiusuri, 'a ada'a beiai ruruha raha narau ha'ataaria 'i Na'ohadaa'i

* 26:31 26:31 Sakaraea 13:7

Piriisi mana saemaua adaa'i Jiu. Rau boi bei'i naihi mana hasi'ei 'anai heingahu.

⁴⁸ 'Ia Jiudas 'a bwani hauai ha'a-aratara tanaraau o'ani, "'Ia mo'o nawai ngoonia, naasi na moi daua."

⁴⁹ Ma 'ari odo-odo beia Jisas ma o'ani 'inia, "Maia Ha'ausuri" ma ngoonia.

⁵⁰ Mia Jisas 'a o'ani 'inia, "Gere sae agua, 'oi hauai mareho na'o boi 'ana." Na'i mau 'ohasi mara daua'a Jisas 'anai waia.

⁵¹ Ma'e ta'i 'iniraau rongoiusuri ana'ia Jisas 'a dau wou na'i naihi ana. 'A rahia ma taba taahiai karinganai sae tatau'aro anai Na'ohadaau Piriisi.

⁵² Mia Jisas 'a o'ani 'inia, "'Oi nugaa aho'i naihi amua na'i dora 'ana. 'Iatei nai heingahui 'iniaai naihi, 'ai mae ro'u 'iniaai naihi.

⁵³ 'A 'ua? 'O ai'a 'iraraa do 'onaa wai ha'angonia Amagu 'anai 'a'auhiau, 'a ga'i bwa'i hasi ha'ataari'i mai ta taringai merui enjel 'anai boi taatahi bwarasigaau?

⁵⁴ Me 'onaa nawai haua o'asi, me 'agu bwa'i to'o'a i taha na Usu-usu Maea na 'unua 'iniaai mareho naagu to'o na'i 'ohanisi."

⁵⁵ Ma o'ani 'iniraau mwani sae 'isi, "'A 'ua? Mou 'adoma'inia do 'inau 'e sae hehere ta'aa namou boi 'inia bei'i naihi mana hasi'ei 'anai heingahu 'anai dauau? 'A 'ua namou ai'a bwani dauau 'inia na'i Ruma Maea ana God? 'Ado dangi na'i 'isi'a nau ha'ausuri na'iei.

⁵⁶ Ma'ata mareho namougu hauanisi, 'e ha'ato'oa moi mareho narau bwani usua 'i rarabea na'i Usu-usu Maea."

Na'i 'ohasi miraau rongoiusuri rau nugasia Jisas marau hora hako baania.

Ra Waia Jisas 'Ari Tanaraau Kansol

(Mak 14:53-65; Luk 22:54-55, 63-71; Jon 18:13-14, 19-24)

⁵⁷ 'Iraau Ha'ausuri 'anai Ringe ana'ia Moses miraau tara'i saemaua ro'u rau bwane goni mai hako na'i ruma ana Kaeafas, i Na'ohadaau Piriisi. Miraau nei rau daua Jisas rau waia 'ari na'i dorasi.

⁵⁸ Mia Pita 'a haisuri ha'atau moi. 'A siri na'i raronai dora a'ora na'i maanai ruma anai Na'ohadaau Piriisi. Ma heinagu beiraau sae hehei'oi ra 'omesuriai Ruma Maea ana God 'anai re'iai taha nai to'o tanaa Jisas.

⁵⁹ Hoita, na'i raronai ruma, 'iraau Na'ohadaa'i Piriisi miraau haru saemaua narau awa ro'u na'i Kansol rau bonasia do rai sadoia ta mamaani pwari'i 'anai subunia 'inia Jisas marai hiiri ha'amaesia 'inia.

⁶⁰ 'A rago i sae ra ura ara'a mara haa'i mamaani pwari'i 'ana Jisas. Ma rei'uaa na o'asi, rau ai'a sadoia ta maho 'anai ha'ahunia 'inia. 'Ari wou ma 'e rua sae ro'u nararugu boi

⁶¹ mararu o'ani, "'Ia mo'oni 'a 'unua do 'ai kaii Ruma Maea ana God ma 'ai matai ha'a-urasia aho'i ro'u moi na'i raronai oru dangi."

⁶² 'I Na'ohadaau Piriisi 'a ura ara'a ma o'ani 'inia Jisas, "'A 'ua? 'O bwa'i haua ta heiarami 'ini'i mareho ra ha'ahunio 'ini'isi?"

⁶³ Mia Jisas 'a ai'a aramia. Mana Na'ohadaau Piriisi 'a o'ani ro'u, "'Oi tohe na'i atana God tahitahi ma'oi ha'arangasia tana'ameu, i'oe naasi Ha'atahi, i garena God?"

⁶⁴ Mia Jisas 'a o'ani, "'A 'onaai 'unua amuasi. Mawai 'unua tana'amou. Na'i 'oha nai boi mau, moi re'iaui Gare'i Inoni, wai heinagu na'i dora ororiu na'i aba odona God huunai mena. Wai aho'i mai hungadi rorodo na'i aro."

⁶⁵ 'Oha naagu rongo o'asi Na'ohadaau Piriisi, 'a karia haaria i to'oni tewa ana 'anai ha'ata'inia 'ado'adona doni mareho na haua Jisas 'a ta'aa di'u. Ma o'ani, "'Iia 'a ha'atee ha'ata'aia God! Gaugu bwa'i sibania'a ro'u ta sae 'anai

ha'ahunia 'inia ta maho ro'u. Naia mou rongoa'a haarimoousi, 'a ha'atee ha'ata'aia God!

⁶⁶ Naasi 'e taha namou 'adoma'inia?"

Miraaui o'ani, "'A arari 'anai mae."

⁶⁷ Naasi raugu ngisuhiai bwauna marau hidaria ma tara'i nei ra rubu'ia 'ini'i rimadaa'i.

⁶⁸ Rau o'ani, "'Onaa i'oe naasi Ha'atahi, ma 'oi 'unua 'ia tei na ngahui'o. 'Inia i'oe 'e rarabea, nita?"

'Ia Pita 'A Tohe Do 'A Ai'a 'Iraraa Jisas

(Mak 14:66-72; Luk 22:56-62; Jon 18:15-18, 25-27)

⁶⁹ Na'i mau 'oha ra hiiria Jisas, 'ia Pita 'a heinagu na'i dora a'ora na'i maanai ruma anai Na'ohadaaui Piriisi. Ma'e gere urao na tau'aro na'i rumasi 'a boi ma o'ani 'inia, "'Toe ro'u 'o awa beia Jisas, 'i ai Galilisi."

⁷⁰ Mia Pita 'a tohe na'i maadaau hako, 'a o'ani, "'Inau ai'a 'iraraa taha na'o 'unuasi."

⁷¹ Ma hura'a na heinagu na'i maanai bara. Mana nata gere urao ro'u 'a boi ma o'ani 'iniraau sae narau awa na'i 'isi, "'Ia mo'oni 'a awa ro'u beia Jisas ni Nasaret."

⁷² Mia Pita 'a tohe ro'u o'ani, "'Ha'amomori ara'ai aro, 'inau ai'a 'iraraa mo'osi."

⁷³ 'A ai'a orea miraaui sae rau ura na'isi rau boi marau o'ani 'inia Pita, "'Ha'amomori, i'oe 'e ta'i ro'u 'iniraau. Meu rongo 'iraraa hadahadangamu do i'oe 'e sae ni Galili."

⁷⁴ Mia o'ani, "'Ha'amomori beia God, 'inau ai'a 'iraraa mo'osi. 'Onaa wai pwari'i 'ia God 'ai ha'a-mama'aiau." Na'i mau madoraasi mana kua 'a tataraoke'a.

⁷⁵ Mia Pita 'agu 'adoma'i aho'isiai taha na 'unua Jisas. Na o'ani, "'I kua 'a bwa'i tataraoke mau mi'oe 'oi bwane tohe ha'a-oru do'o ai'a 'iraraau." Maagu hura'a na'i maanai bara 'anai rumasi ma ru'uhiai ang'i.

27

Ra Waia Jisas Tanaa Paelat

(Mak 15:1; Luk 23:1-2; Jon 18:28-32)

¹ Na'i mau haho'oa ta'aa, 'iraau Na'ohadaa'i Piriisi miraaui saemaua adaa'i Jiu rau ruru goni aho'i 'anai ha'aradorado 'inia mamaani he'ua narai haua tanaa Primia neina 'ai mwa'emwa'e 'anai ha'amaesia tanaraau a Jisas. 'Oha narau mamaani hako

² rau ho'osi'i rimana marau waia 'ari tanaa Paelat. 'Iia naasi ai Rom na Primia na'i 'ohasi.

Mae Na Haua Juidas

(Buka Tatau'aro 1:18-19)

³ 'Oha na'ia Juidas, mo'o ma ha'awatea Jisas tanaraau maerongana'i, 'a rongoa do rau hiiria Jisas 'anai mae, 'a ahutotou di'u. Ma 'ari ma ha'a-aho'isia aho'i oru tangahurui korai silva ani tanaraau Na'ohadaa'i Piriisi miraaui saemaua adaa'i Jiu.

⁴ 'A o'ani, "'Ia mo'o nau usuha'inia tana'amou ani, 'a ai'a haua ta maho taritari'a. Mareho nau haua ani, naasi na taritari'a na'i maana God."

Miraaui o'ani 'inia, "'Tameu 'a ai'a ta'abemeeu 'inia mareho na'o 'unuasi. Aba amua na."

⁵ Mia Juidas 'a rasaha'ini'i moi wou ha'a na'i Ruma Maea ana God ma hura'a na 'ari ri'o haaria.

⁶ 'Iraau Na'ohadaa'i Piriisi rau si'ohi'i ha'a 'isi marau o'ani, "'Ha'ani 'a ai'a arari dorai nugaa goni beiai ha'a anai Ruma Maea, 'inia 'e ha'a ra horia

'anai ha'amaesiai sae. 'Onaa gai nugaa goni beiai ha'a anai Ruma Maea magai horosiai ringe."

⁷ Rau hadanga'inia wou maraugu 'adoma'i aratara 'anai hauai ha'asi 'anai horiai dorai ano baaniai sae na tatagora rabo'o 'iniai mwago. Mana anosi rai haua 'inia ta hera nadaaui sae boboi.

⁸ Tari dangini, anosi ra 'unua mau 'inia ano ni 'abu.

⁹ Ma to'o'a i taha na 'unua Rarabea Jeremaea na'i 'oha bwani na o'ani, "Iraaui saeni Israel rau dauai oru tangahurui korai silva.

Naasi horihori nara nugaa 'anai ta'i sae.

¹⁰ Mana ha'asi rau horia 'inia dorai ano baaniai sae tatagora rabo'o, 'onaai 'unua ana Araha God tanaau."*

'Ia Paelat 'A Songa'inia Jisas

(Mak 15:2-5; Luk 23:3-5; Jon 18:33-38)

¹¹ Hoita, 'ia Jisas 'a ura na'i maanai Primia, 'ia Paelat, mia Paelat 'a songa'inia o'ani, "A 'ua? 'Oe naasi mwaeraha adaui Jiu?"

Mia Jisas 'a aramia o'ani, "Naia na'o 'unuasi."

¹² 'Iraaui Na'ohadaa'i Piriisi miraau saemaua rau taraawa'ai subunia Jisas, mia Jisas 'a ai'a 'unua ta maho.

¹³ Mia Paelat 'a o'ani 'inia, "A 'ua? 'O rongo'i mwani maho rau ha'ahuni'o 'ini'isi?"

¹⁴ Mia Jisas 'a ai'a haua ta ta'i heiarami. 'Ia Paelat 'a heimwaota'i 'inia haua o'asi ana Jisas.

'Ia Paelat 'A Hiiria Jisas

(Mak 15:6-15; Luk 23:13-25; Jon 18:39—19:16)

¹⁵ 'Ado harisi, 'oha 'iraaui Jiu rai ha'ato'oai rongo 'anai 'adoma'i aho'isiai Roho Aharau, 'ia Paelat 'a matai ha'awatea tanaraau ta ta'i nei 'iniraaui sae na'i rumaniho'o narau rabasia 'anai ha'ahura'ahia baaniai rumaniho'o.

¹⁶ Mana'i 'ohasi, 'e sae na atana 'ia Barabas 'a awa ro'u na'i rumaniho'o na 'iraaui sae rau 'iraraa goro.

¹⁷ Na'i 'oha 'iraaui sae rago rau ruru wou na'i maanai ruma ana Paelat, 'a songa'iniraaui o'ani, "Iatei namou 'irisia dowai ruhasia tana'amou mai hano dadara'a? 'Ia Barabas ma'ua Jisas ra 'unua 'inia Ha'atahi?"

¹⁸ 'Ia Paelat 'a ha'atee o'asi suria 'a bwane 'iraraa do 'iraaui saemaua adaa'i Jiu rau waia maia Jisas suria rau kakawa 'omesia 'inia rago anai sae nara ta'ahia.

¹⁹ Na'i 'oha 'ia Paelat 'a heinagu mau na'i dorani hihiri 'anai hiiria Jisas, mana urao ana 'a ha'ataari hadahada'a mai. 'A o'ani, "Oi abu haua ta here tanaai sae odoodosi. 'Inia nabongi 'au mauru'aa i mareho 'abaia nau arunga ta'aa di'u 'inia."

²⁰ Miraau Na'ohadaa'i Piriisi beiraaui saemaua adaa'i Jiu rau bonasiraaui sae rago. Miraau 'adoma'i aratara beiraaui dorai ha'abonga'inia Paelat mai ruhasia Barabas tanaraau mai ha'amaesia Jisas.

²¹ Mia Paelat 'a songa'iniraaui o'ani, "Iatei 'inirarua i rua mwaneni namou 'irisia dowai ruhasia tana'amou?" Miraau awara o'ani, "Ia Barabas!"

²² Mia Paelat 'a o'ani ro'u, "Onaa wai ruhasia Barabas tana'amou, ma wai ha'ahe'uaa Jisas nara 'unua 'inia Ha'atahi?"

Miraau awara o'ani, "Rabua na'i dadaahoro!"

²³ Mia Paelat 'a o'ani, "Ini 'uaana? 'E 'ino he'ua na haua?"

Miraau awara raha ro'u o'ani, "Rabu ahita'inia na'i dadaahoro!"

* 27:10 27:9-10 Sakaraea 11:12-13; Jeremaea 19:32-69

²⁴ Na'i 'ohasi 'ia Paelat 'a 'omesia do 'ai bwarai ha'a-auruhi'i 'ado'adodaa'i ma 'omesia do 'a ga'i bwa'i orema mai to'o'a i ha'agogoru. Naasi ma 'unua dorai waa mai rabo'oi wai ma dorima na'i maadaau. 'A o'ani, "I mae nai haua mo'oni, 'a auru na'i hungamooou. 'Inau 'au dadara'a."

²⁵ Miraau o'ani, "A goro moi. Nugaa mai auru na'i hungameeu mana'i hungadi pwira amee'i."

²⁶ Mia Paelat 'a ruhasia Barabas, ma 'unua tanaraaui sae hehei'oi ana'i dorai rohoa Jisas 'inia hasiwaro baabau marai waia hura'a 'anai rabua na'i dadaahoro.

'Iraau Sae Hehei'oi

Rau Ha'i Maho Ha'ada'ada'a 'Inia Jisas (Mak 15:16-20; Jon 19:2-3)

²⁷ 'Iraaui sae hehei'oi ana'ia Paelat rau waia Jisas siri na'i kae ruma ana Paelat. Miraau mwani sae hehei'oi hako na'i ruruha adaau rau goni wou beiraaui marau ura garigaria Jisas.

²⁸ Rau rahi'i bwana ana'i marau ha'ato'onia 'onaai mwaeraha 'inia to'oni tewa wangawanga.

²⁹ Rau tagoraai hihiri bwau warorarak i marau nugaa na'i bwauna. Rau ha'adaua 'inia 'a'abi ni mwaeraha na'i rima odona. Rau topira'i ruru tanaa, rau ha'ada'ada'a 'inia marau o'ani, "Ha'aasaa mwaeraha adaui Jiu."

³⁰ Rau ngisuhia marau rahiai 'a'abi baania marau ruburubuai bwauna 'inia.

³¹ Na'i 'oha rau ha'ada'ada'a hako 'inia rau rahia aho'i to'oni wangawanga narau ha'ato'onia 'inia marau ha'ato'onia aho'i 'inia to'oni ana mara ugu waia 'ari 'anai rabua na'i dadaahoro.

Ra Rabu Ahita'inia Jisas Na'i Dadaahoro (Mak 15:21-32; Luk 23:26-43; Jon 19:17-27)

³² Na'i 'oha 'iraau hehei'oi rau waia Jisas hura'a, rau 'ariwou marau heisadoi beiai sae ni Saerin na atana 'ia Saemon. Miraau sae hehei'oi rau ha'a-usu'usua do 'ai suru'iai dadaahoro ana Jisas.

³³ Rau 'ariwou ro'u marau ada na'i dora ra 'unua 'inia Golgota. 'Ado'ado 'ana naasi "Dora ni Korai Bwau Sae."

³⁴ Mara haua tanaa Jisas i waen ra doraria 'inia maho mahai. 'Oha na gono maania 'a 'ageta'i gonohia.

³⁵ 'Iraau sae hehei'oi rau rabua'a Jisas na'i dadaahoro. Na'i muri, rau gaasi ha'ara 'anai sadoia tei nai to'ora'i to'oni ana'i.

³⁶ Na'i muri rau heinagu marau boesuria Jisas, ra gasi 'a'auhia tara'i sae.

³⁷ Marau usuai usu-usu na'i baba marau rabua na'i bwaunai dadaahoro 'anai ha'ata'inia taha na ta'aa narau 'adoma'inia do 'a haua. Rau usua o'ani,

NAANI A JISAS, MWAERAHA ADAUI JIU

³⁸ Mara rabua ro'u i rua sae beriberi beia Jisas. 'E ta'i na'i aba odo mana nata nei na'i aba maha.

³⁹ Miraau sae ra taha horo 'isi rau ha'atee ha'ata'aia Jisas. Rau arabwau 'ini ha'atotooa.

⁴⁰ Rau o'ani, "Mmm naasi, i'oe na'o 'unua ani do'oi kaii Ruma Maea ana God ma'oi matai ha'a-urasia aho'i ro'u moi na'i raronai oru dangi? 'Onaa i'oe garena God ha'a-momori, 'oi ha'atahi'o haari'o ma'oi dio mai baaniai dadaahoro."

⁴¹ 'Iraau Na'ohadaa'i Piriisi mana Ha'ausuri 'anai Ringe ana'ia Moses miraau tara'i saemaua ro'u rau ha'ada'ada'a ro'u 'inia Jisas.

⁴² Rau o'ani, "Ome, sae he'ete'i 'a matai ha'atahi'i ma bwa'i ha'atahia haaria. 'A 'ua? 'Iia naasi mwaeraha adaau Israel? 'Onaa 'ai dio baaniai dadaahoro, naasi gai hinihinia.

⁴³ 'A 'unua tarau do'a 'u'uria God ma 'unua do 'iia 'e Garena. Naasi, 'onaa 'ia God 'a 'adoma'inia magari re'ia God 'ai ha'atahia na'i 'ohani."

⁴⁴ Mana rua sae beriberi nara rabua beia Jisas raru ha'atee ha'ata'aia ro'u o'asi.

Jisas 'A Mae

(Mak 15:33-41; Luk 23:44-49; Jon 19:28-30)

⁴⁵ Ma na'i angi ta'i tangahuru mana rua na'i dangisi, 'a kuhi bwarasiai kantri hako tari na'i angi oru.

⁴⁶ Mana'i angi oru abaidangi 'ia Jisas 'a totoro o'ani, "'Elai, 'Elai, lama sabaktani." 'Ado'ado 'ana, "God agua, God agua, 'ini 'uaana na'o gagata'iniau 'inia?"

⁴⁷ Tara'i sae narau ura gaarangi rau rongoai awara o'asi ana marau o'ani, "'Ei, 'a kukua Elaija."

⁴⁸ 'E ta'i abe 'iniraaui na 'eba wou ma rahiai mareho na matai omi'i wai. 'A ha'abunia 'iniai waen mahai ma nugaa na'i hasi'ei ma taranga'inia ara'a na'i ngoona Jisas do 'ai gono.

⁴⁹ Ma tara'i sae rau o'ani, "Gai 'ome'ome ga'u magari re'ia 'onaa 'ia Elaija 'ai boi 'anai ha'atahia."

⁵⁰ Mia Jisas 'a totoro raha ro'u maagu nuga manawa.

⁵¹ Mana bwana ubu-ubu'a ra rohe bwarasia 'iniai dora maea na'i Ruma Maea ana God, 'a maakari heihoa taraawa'a bo ta'eha ma dio. Mana nunu 'a 'ihara'iniai ano. I hau ra makasa

⁵² mana wabwa suri'i hera ra wawaa'a. Ragoi sae nara odo-odo na'i maana God nara bwani mae ra suruta'e aho'i.

⁵³ 'Oha na suruta'e a Jisas baaniai mae, rau hura'a baani'i hera marau 'ari na'i 'omaa maea i Jerusalem. 'A rago i sae narau re'iraaui.

⁵⁴ Hoita, na na'otara adaui hehei'oi mana sae hehei'oi narau 'omesuriai abena Jisas, rau mamaa'u di'u 'oha rau arunganai nunu raha marau re'i'i mwani mareho nara to'o 'isi. Rau o'ani, "Ha'amomori. 'Ia mo'oni huunai garena God."

⁵⁵ 'A ragoi urao narau ta'i boi a Jisas baaniai Galili narau 'a'auhia na'i 'aariha na haasi. 'Iraausi rau gere ura ha'atau moi maraugu wanawana 'ari 'inia Jisas.

⁵⁶ Tara'i nei 'iniraaui naasia Meri ni Magdala, Meri inana Jems mia Josep, mana inana Jems mia Jon, gare ana'ia Sebedi.

Ra Rahia Dio i Abena Jisas

Baaniai Dadaahoro

(Mak 15:42-47; Luk 23:50-56; Jon 19:38-42)

⁵⁷ 'E sae toto'ora ni 'Arimatea na awa na'i Jerusalem, atana 'ia Josep. 'Iia 'e ta'i sae na suria ro'u a Jisas. Na'i 'oha na gaarangi suu'a i sina

⁵⁸ 'a 'ari beia Paelat ma ha'angoniai abena Jisas. 'Ia Paelat 'a ha'awatea dorai rahia dio i abena Jisas tanaa Josep.

⁵⁹ Mia Josep 'a 'ari ma hauai abena. 'A ho'ua 'iniai bwana mamaahui haoru

⁶⁰ ma aoraa na'i wabwa ana haaria nara 'eria na'i abenai kae hau. Ai'a ta sae ga'u narai toringia na'i wabwasi. Ma hugesia i kae hau 'anai honosiai maanai wabwa ma hano'a.

⁶¹ 'Ia Meri ni Magdala mia nata Meri raru heinagu gaarangiai maanai wabwa na'i 'ohasi.

'Iraau Sae Hehei'oi Rau 'Omesuriai Wabwa

⁶² Dangi ahora naasi dangi ni mamaro adaau Jiu. 'Iraau Na'ohadaa'i Piriisi miraaui Ha'ausuri 'anai Ringe ana'ia Moses rau 'ari beia Paelat

⁶³ marau o'ani, "Saemaua, meu 'adoma'i aho'isiai mareho na 'unua i sae pwapwaari'isi. Na'i 'oha na tahi mau 'a 'unua do 'e rua dangi nai hako mana'i oruna 'ai tahi aho'i.

⁶⁴ Naasi meu rabasia do'oi 'unua tanaraau sae hehei'oi amu'i marai 'omesuri na'i wabwa tari oru dangi. 'Iraau rongoiusuri ana'i rau gasi beriai abena maraigu pwari'iraau noni do 'a tahi aho'i. 'Onaa rai haua o'asi, mai ta'aa di'u baaniai pwari'i na haua ga'u na'i na'o."

⁶⁵ Mia Paelat 'a o'ani 'iniraaui, "Moi waa'i tara'i sae hehei'oi agu'i mamoi 'ari 'omesuri na'i wabwa suriai here namou 'adoma'inia do 'a ga'i goro."

⁶⁶ Marau 'ari narau pono ha'ababauai maanai wabwa marau nuga'i sae hehei'oi 'anai 'omesuria. Marau nugaai maho na'iei 'anai 'iraraa do 'onaa ta sae nai raba tahangia.

28*Jisas 'A Tahi Aho'i*

(Mak 16:1-8; Luk 24:1-12; Jon 20:1-10)

¹ Murinai dangi ni mamaro, na'i wa'aria i dangi sade, 'ia Meri ni Magdala mia nata Meri, raru 'ari 'anai 'omesiai wabwa.

² Rarugu 'asu'a ma to'o'a i kae nunu raha, 'inia 'e enjel ana Araha God 'a dio mai baaniai aro ma hugesia hui hau baaniai maanai wabwa ma heinagu na'i hungana.

³ Ni hauraena tari auru na'i 'u'una 'a wadora'i 'onaai mararea mana bwana ana 'a mamaahui di'u 'onaai tagai 'abe.

⁴ 'Iraau sae hehei'oi narau 'omesuri na'i wabwa rau mamaa'u marau 'idi'idi marau dionga'i narau dadao 'onaai sae na mae.

⁵ Mana enjel 'a o'ani 'iniraru rua urao, "Murui abu mamaa'u. 'Au 'iraraa muru boi siba 'inia Jisas nara rabua na'i dadaahoro.

⁶ 'Iia 'a ai'a awa 'ini, 'a bwani suruta'e aho'i 'onaai 'unua ana mau na'i na'o. Murui boi mamurui re'iai dora na dadao ga'u iei.

⁷ Hoita, murui aho'i raurau mamurui maania tanaraau rongoiusuri ana'i o'ani, "Ia Jisas 'a tahi'a aho'i. 'Iia 'ai na'o 'ari Galili 'ini'amou. Na'i 'isi namoigu sadoia na'iei.' Naasi maho nau boi 'inia 'anai 'unua tana'amuraa."

⁸ Mararu 'eba aho'i raurau ha'i mamaa'u. Ma'ata raru wa'ewa'e di'u ro'u. Raru 'eba 'ari 'anai maania tarohasi tanaraau rongoiusuri.

⁹ Rarugu 'asu'a mararu heito'oi beia Jisas mia o'ani 'iniraru, "Maia." Raru 'ari wou mararu topira'i ruru auru mararu dau na'i uwana mararu ha'arahesia.

¹⁰ Mia Jisas 'a o'ani, "Murui abu mamaa'u. Murui 'ari mamurui maania tanaraau do'oragu'i, rai 'ari Galili. Na'i 'isi naraigu sadoiau na'iei."

Saemaua Adaa'i Jiu Rau Haa i Pwari'i

¹¹ Na'i 'oha na rua uraosi raru 'ari 'anai 'omaa, tara'i nei 'iniraaui sae hehei'oi narau 'omesuri na'i wabwa rau 'ari beiraaui Na'ohadaa'i Piriisi marau maania tanaraau i taha na to'o.

¹² Miraau Na'ohadaa'i Piriisi ma tara'i saemaua ro'u, rau rurugoni. Rau 'adoma'i aratara 'anai ha'a-karekaraau sae hehei'oi narau 'omesuriai wabwa 'inia kae ha'a.

¹³ Rau 'unuraau mai sae hehei'oi 'isi 'anai horiraaui marau o'ani, "Moi ha'arangasia do 'iraaui rongoiusuri ana'ia Jisas rau boi waa i abena na'i rodo 'oha mou mauru.

¹⁴ 'Ai abui ta'aabemoou. 'Onaa 'ia Paelat 'ai rongoa domou mauru na'i 'ohasi, 'i'ameu nameigu mamaani ha'a-odoodoa tanaa neina bwa'i taesu'a momoou."

¹⁵ Miraau sae hehei'oi rau daa i ha'a marau 'ari narau maaniai mamaanisi 'onaai 'unua ada tanaraau. I mamaanisi 'a 'adarara 'ari beiraau Jiu. Tari dangini ra mamaania mau.

'Ia Jisas 'A Ha'a-'u'uriraau

Rongoiusuri 'Iniai Kae Tagora

(Mak 16:14-18; Luk 24:36-49; Jon 20:19-23; Buka Tatau'aro 1:6-8)

¹⁶ 'Iraau ta'i tangahuru mana ta'i rongoiusuri rau hano 'anai Galili. Rau 'ari na'i hungahunga na 'ia Jisas 'a 'unua dorai 'ari na'iei.

¹⁷ Na'i 'oha rau re'ia Jisas, rau ha'arahesia. Ma'ata tara'i nei 'inirau rau ai'a taraa hinihini do 'ia Jisas naasi.

¹⁸ Mia Jisas 'a boi beiraau ma o'ani, "Ia God 'a 'unua do 'inau wai marungi'i mwani mareho hako na'i aro mana ano.

¹⁹ Naasi moi hura'a suria hako i marewana mamoi taroha'iniau tanaraau sae marai ha'i rongoiusuri agu'i. Moi bwareomaearau na'i atana Ama mana Gare mana Hi'ona Maea.

²⁰ Moi ha'ausurirau marai araisuri'i hako i Ha'atora nau haa'i tana'amou. Mamoi 'iraraa do 'inau wai awa tarau bei'amou tari 'oha nai hako marewana."

Na Taroha Goro 'Onaai Usua Ana St. Mak

Gere Mamaani 'Iniai Bukani

'O 'adoma'inia do 'e taha na goro di'u 'inia Jisas? 'Onaa 'o ga'i usua ta mamaani 'inia, 'e taha na'o ga'i maania 'inia?

'Ia Matiu, Mak, Luk mea Jon rau sigihi'i mwane mamaani he'ete'i hairiu 'inia Jisas 'oha rau usu'i Taroha Goro adaa'i. 'Ia Mak 'a goro ana di'u 'anai maani'i ha'abu'oahu na haa'i mana 'a'auhiraau na haa i noni. 'Ai ragoi dora na'i bukani na'oi sadoia do 'ia Mak 'a mamaani wetewete tarau 'ini'i mareho 'isi. 'Ia Mak 'a rabasia do 'iraau noni rai aidangisia do 'ia Jisas 'a ha'ata'inia hura'a i heita'ahi ana suri'i mareho na haa'i.

'Ia Mak 'a ha'ata'inia goro tanagaau do 'ia Jisas 'a boi 'onaai sae tatau'aro. 'Inia 'ia Jisas naasi na Ha'atahi, 'iia 'a matai hua namoiwou ta maho nai 'adoma'inia. Mana mareho na 'adoma'inia 'anai hua, naasi 'anai 'a'auhiraau noni na'i tahitahi adaa'i. 'Iia ai'a do 'ai ura ha'atau ma do 'aigui hadahada tanaraau, ma'ata 'a 'ariwou gaarangi'ara ma heinagu beiraa na'i dora na 'iraau rai matai hataria, nei narai hei'irara'i beia.

'E taha na'o 'adoma'inia do'o ga'i usua 'abaia Jisas? Na'i 'oha na 'oi 'oha'iniai bukani, 'oi 'ome'ome 'ini'i herengana'i a Jisas na'o 'adoma'ini'i dora goro di'u.

Na Heitaroha'i Ana Jon Bwareomaea

(Matiu 3:1-12; Luk 3:1-18; Jon 1:19-28)

¹ Naani Taroha Goro 'inia Jisas Kraest, Garena God.

² Na'i buka ana Rarabea Aisaea, 'ia God 'a o'ani,
“Inau wai ha'ataariai sae heitaroha'i agua na'i na'o 'ini'o,
'iia nai ha'aagauraau noni 'anai boi amua.*

³ 'Ai totoro hura'a na'i dora mangasara.

'Ai ha'atee o'ani,
'Moi ha'aagau! 'Ia Araha 'a gaarangi boi'a. Moi ha'a-odoodoi tara tanaa.' ”†

⁴⁻⁶ Hoita, 'ia Jon Bwareomaea naasi sae heitaroha'isi. 'A boi ma awa na'i dora mangasara. Bwana ana ra tau'arona 'iniai warihui kamel mana rorowa'a ana, 'e uri-uri mwamwaa. Na mahoingau ana, naasi ngabo mana modi'o ni hasimou.

'A bwareomearai sae ma 'unua tanaraau o'ani, “Moi rihosi baani'i mwani baronga ta'a'i amoo'i mamoi bwareomaea, mia God 'ai 'adoma'i nugasi'i 'inomoo'i.”

Ma na'i 'ohasi, ragoi sae na'i Jerusalem mana tara'i 'omaa na'i Provensi Jiudea nara boi 'anai bahurongoa Jon. Marau ha'arangasi'i ora-ora'a-daa'i ma bwareomearaa na'i wai Jodan.

⁷ Ma naani maho na maania tanaraau sae, “Na nei nai boi na'i murigu, 'a ororiu di'uau. 'Inau ai'a arari 'anai mwaoro auru 'anai wagasi'i sandol ana'i.

⁸ 'Inau 'au bwareomaea'amou 'inia moi wai, me 'iia 'ai bwareomaea'amou 'iniai Hi'ona Maea.”

Na Bwareomaea Mana Heiohongi Ana Jisas

(Matiu 3:13-17; 4:1-11; Luk 3:21-22; 4:1-13)

* 1:2 1:2 Malakae 3:1 † 1:3 1:3 Aisaea 40:3

⁹ Na'i muri 'ia Jisas 'a hano baaniai Nasaret, 'e 'omaa ni Provensi Galili, ma 'ari na 'ia Jon 'agu bwareomaeaa Jisas na'i wai Jodan.

¹⁰ Ma na'i 'oha 'ia Jisas 'a ara'a baaniai wai, 'a 'omesiai aro 'a heihoa mana Hi'ona Maea 'a dio na'i hungana 'onaai waibora.

¹¹ Mana aohanai ringe na ao dio mai baaniai aro 'a o'ani, "I'oe na garegu nau ta'ahi'o ororiu, mau ahugoro 'ini'o."

¹² Na'i mau 'ohasi, mana Hi'ona Maea 'a ha'ataaria Jisas 'ari na'i dora mangasara.

¹³ Ma na'i ro'u 'isi, 'iraaui mwamwaa wasi rau awa na'iei. 'A awa 'isi suriai hai tangahuru'i dangi, mia Saetan 'a ohongia iei a Jisas. 'Iraaui enjel rau boi marau taguma'inia.

Jisas 'A Soiraaui Hai Sae Ahuahuasi
(Matiu 4:12-22; Luk 4:14-15; 5:1-11)

¹⁴ 'Ia Jisas 'a 'ari na'i Provensi Galili na'i 'oha 'ia Herod 'a bwane nugaa'a Jon Bwareomaea na'i rumanih'o. 'A 'ari 'anai taroha'iniai Taroha Goro na boi baania God.

¹⁵ 'A ha'atee o'ani, "Na heimarungi ana God 'a gaarangi'a. Moi rihosi baani'i ora-ora'a amoo'i mamoi hinihiniai Taroha Goro!"

¹⁶ Ma na'i 'oha 'ia Jisas 'a hatare na'i one i Galili, 'a re'ia Saemon mana do'orana 'ia Andru. Na'i 'ohasi, raru ahuasi 'iniai hu'o, 'inia 'iraruasi ra'i sae ahu-ahuasi.

¹⁷ Mia Jisas 'a o'ani 'ini'ararua, "Murui suriau! 'Onaai rau'i amuru'i ii'a na'i wai, 'a o'asi ro'u, wai ha'ausuri'amurua 'anai wairaaui mai sae beiau."

¹⁸ Na'i mau 'ohasi, raru nugasi'i hu'o adaru'i ma raru suria.

¹⁹ Ma gere 'ari ro'u wou baaniai dorasi ma re'irarua Jems mea Jon, rua garena Sebedi. Raru awa na'i ora adaau, rau orima'ini'i hu'o adaa'i.

²⁰ Ma na'i 'oha 'ia Jisas 'a re'irarua, 'a soirarua. Me'irarua raru hano baania amadarua miraaui sae tatau'aro narau awa na'i ora. Ma raru hano beia Jisas.

'E Sae Na Adaro 'A Bwaunia
(Luk 4:31-37)

²¹ Mia Jisas mana rongoiusuri ana'i rau taha na'i 'omaai Kapaniam. Ma na'i dangi ni mamaro adaau Jiu, 'ia Jisas 'a siri na'i ruma ni ha'arahesi ma ha'ausuriraaui sae.

²² Miraaui nei narau rongo'i mareho na maani'i rau heimwaota'i di'u 'ini'i ha'ausuringa'i ana'i, 'inia rau 'iraraa do 'a aidangisi'i goro i mareho na maani'i. 'Iia 'a ai'a 'onaairaaui Ha'ausuri 'anai Ringe ana'ia Moses.

²³ Ma na'i 'ohasi 'e sae na adaro 'a bwaunia 'a awara raha o'ani,

²⁴ "Jisas, saeni Nasaret, 'o raba 'uaameuni? 'O boi 'anai ha'a-ta'ai'ameu? 'Inau 'au 'iraraa ha'agorohi'o! I'oe nei na maea na'o boi baania God."

²⁵ Mia Jisas 'a ha'atee hurasia o'ani, "'Oi papaku, ma'oi hura'a mai baania mo'osi!"

²⁶ Mana adarosi 'a 'ihara'iniai saesi ma awara raha ro'u maagu hura'a baania.

²⁷ Miraaui mwane sae rau heimwaota'i ro'u marau ha'atee hairiu o'ani, "Romwane! 'E tahasi? 'E ha'ausuringa'i haoru naasi, 'inia na ha'atee ana'i ra wetewete 'onaai sae na to'o mena! Rei'uaa adaro ma ra araisuria ro'u."

²⁸ Mana taroha 'inia Jisas 'a 'adarara 'ari suri'i 'omaa hako na'i Galili.

Jisas 'A Ha'agorohira Aho'i

Mwani Sae Ra Daoha
(Matiu 8:14-17; Luk 4:38-44)

²⁹ Ma na'i 'ohasi 'ia Jisas beia Jems mea Jon, rau hano baaniai ruma ni ha'arahesi marau 'ari na'i ruma ana Saemon mea Andru.

³⁰ Ma na'i 'oha rau siri wou i ruma, 'ia Jisas 'a rongoa do na hungona Saemon 'a awa moi na'i be'ana, 'inia 'a mata'i ma raorao i abena.

³¹ Mia Jisas 'a 'ari wou beia, 'a dau na'i rimana ma ha'a-suruta'ea ara'a. Na'i 'ohasi mana mata'i 'a rigisia'a. Naasi mana uraosi 'a ha'aagau mahoingau 'adaau.

³² Mana'i su'urahisi 'oha na sina 'a bura'i suu, mana dangi ni mamaro 'a hako'a, ra waa'i mai inoni nara daoha tanaa Jisas mana nei na ra bwaunira i adaro.

³³ Miraau hakoi inoni na'i 'omaasi narau rurugoni mai na'i rumasi.

³⁴ Mia Jisas 'a ha'agorohi'i mwane daoha he'ete'i hairiu, ma taari'i hura'ai mwane adaro baani'i sae. Ma'ata 'a ai'a waterai adaro do rai 'unua hura'a do 'iia naasi garena God, 'inia 'a ai'a rabasia do rai taroha'inia tanaraau inoni.‡

³⁵ Ma na'i mau i wa'aria, 'ia Jisas 'a rarai mai ma 'ari dora 'etea 'anai ha'arahesi.

³⁶ Ma na'i 'oha na rarai a Saemon miraau nei narau ta'i awa, maraugu ai'a re'ia'a Jisas, raugu sibania.

³⁷ Ma na'i 'oha rau sadoia, rau o'ani 'inia, "'Iraau hakoi sae rau sibani'o!"

³⁸ Mia Jisas 'a ha'atee tanaraau o'ani, "'Au 'iraraa. Ma'ata 'au raba taroha'iniai Taroha Goro tanaraau sae suri'i ro'u i 'omaa 'isi. 'Inia naasi taranai taha nau boi 'inia."

³⁹ Mia Jisas 'a 'ari suri'i ruma ni ha'arahesi suri'i mwani 'omaa na'i Galili ma taroha'iniai Taroha Goro ma taari'i hura'ai adaro baaniraau sae.

Jisas 'A Ha'agorohia Aho'i Sae Lepa

(Matiu 8:1-4; Luk 5:12-16)

⁴⁰ Hoita, 'e sae lepa 'a boi ma topira'i ruru dio tanaa Jisas ma ha'angonia o'ani, "'Onaa 'o mwa'emwa'e, ma'o ga'i ha'agorohiau baaniai daoha na to'iauni."

⁴¹ 'Ia Jisas 'a ta'ahia. 'A taranga'inia hura'ai rimana, 'a dau wou beia ma o'ani, "'Io, 'au mwa'emwa'e moi, 'oi goro'a aho'i!"

⁴² Na'i mau 'ohasi mana abena 'agu goro aho'i.

⁴³⁻⁴⁴ Na'i 'ohasi 'ia Jisas 'a ha'aabua wetewete a mo'osi, 'a o'ani 'inia, "'Oi abu maania ga'u tanaa ta sae i maho na to'o bei'o. 'Oi 'ari odo-odo beiai Piriisi mai 'iraraa haaria do i'oe 'o goro aho'i. Naasi ma'oi hauai bane amua tanaa Piriisi mai ho'asi 'inia 'onaai 'unua ana Moses, 'anai ha'ata'inia tanaraau noni do'o goro'a." Na'i 'ohasi 'ia Jisas 'a ha'ataaria 'ari.

⁴⁵ Mia mo'osi 'a ai'a araisuria Jisas ma taroha'inia moe'a 'ari tanarai mwani sae, tarana naia na 'ia Jisas 'a ai'a 'ari ha'ata'i 'inia suri'i 'omaa. Ma awa moi hura'a suri'i dora na ai'a ta sae nai awa iei. Rei'uaa na o'asi, sae suri'i 'omaa rago rau sadoia marau rurugoni mai beia.

2

Jisas 'A Ha'agorohia Aho'i

Sae Na Nugu i Abena

(Matiu 9:1-8; Luk 5:17-26)

¹ Ma hako i taringai dangi, 'ia Jisas 'a aho'i 'ari na'i Kapaniam. Miraau inoni rau 'iraraa do'a awa na'i ruma na bwani awa-awa iei ga'u ani.

‡ **1:34** 1:34 'Ia Jisas 'a ha'aabu'i adaro 'inia rau gasi rangasia do 'iia naasi, garena God, me 'iraau sae ririhunga'i rai taesu'a marai ha'abwarasiai tau'aro ana.

² Ma ragoi nei ra boi beia Jisas ma ai'a dora taradaau na'i ruma ma'ua na'i abau 'omaa. Mia Jisas 'a ha-ha'ausuri 'ini'i ha'atee ana'ia God.

³ Ma'e waira hai rau suru'ia mai sae na nugui abena mana saesi 'a dadao na'i be'ana.

⁴ Me 'inia rago di'u anai sae, 'a bwara tanaraau suru'ia siri saesi tanaa Jisas. Naasi marau suru'ia ta'eha suriai tara hanehane 'anai ta'eha na'i hunganai rumasi. Na hunganai rumasi 'a sada moi. 'Oha narau taha ta'eha, rau tahangiai dora na'i goroi odohana Jisas, marau toto'oa dio a mo'osi na'i 'ubutadaa'i sae nara awa na'i rumasi.

⁵ Mia Jisas 'a 'ome 'iraraai hinihinidaau magu ha'atee o'ani 'inia mo'o narau toto'oa diosi, "Gare agua, na ora-ora'a amu'i 'au 'adoma'i nugasi'i hako."

⁶ Na'i 'ohasi ra'i Ha'ausuri 'anai Ringe ana'ia Moses rau awa ro'u 'isi. Miraau 'ado'ado o'ani,

⁷ "Ni 'uaana nagu 'unua 'iniaai marehosi? 'A ga'i bwa'i o'asi! 'A 'adoma'inia do 'iia naasia God? 'Ia moia God na matai 'adoma'i nugasi'i ora-ora'a! 'Iia 'a ha'atee ha'ata'aia God!"

⁸ 'Ia Jisas 'a 'iraraai 'adoma'idaau ma ha'atee o'ani 'iniraau, "'A 'ua namou to'oraa 'iniaai 'adoma'isi bei'amou?"

⁹ Taha na mwada'u? 'Anai 'unua tanaai saesi do'au 'adoma'i nugasi'i ora-ora'a ana'i, ma'ua 'anai 'unua tanaa do'ai ura maai suru'iai be'ana maai hahano? 'Anai 'unua tanaa mo'osi do'au 'adoma'i nugasi'i ora-ora'a ana'i 'a mwada'u, 'inia 'a bwarai 'iraraa 'onaa ra 'adoma'i nugasi'i ora-ora'a ana'i ma'ua ai'a.

¹⁰ Naasi, 'inau i Gare'i Inoni, wai hauai maho namou 'adoma'i ha'abwaraa mamoi'igui 'iraraa do 'au to'oraa ro'u i mena 'anai 'adoma'i nugasi'i ora-ora'a na'i marewanani."

Naasi magu o'ani 'iniaai sae na abe nugusi,

¹¹ "Nau wai 'unua tana'o, 'oi ura ara'a, 'oi suru'iai be'amu, ma'oi 'ari ruma amua!"

¹² Na saesi 'a ura odo-odo ara'a, 'a suru'iai be'ana ma hura'a. Miraau inoni hako rau wanasia marau heimwaota'i di'u. Rau ha'aasaa God 'inia marau ha'atee o'ani, "'Iameu meu ai'a 'omesia ga'u ta mareho o'ani!"

Jisas 'A 'Ome Sigihia Livae

(Matiu 9:9-13; Luk 5:27-32)

¹³ 'E ta'i 'oha ro'u, 'ia Jisas 'a 'ari bobonai kae bwera i Galili. Mana ruruhai sae rago rau rurugoni mai beia magu ha'ausuriraau.

¹⁴ Ma na'i 'oha na gere hahano sara wou, 'a re'ia Livae, 'e sae ha-ha'atakisi. 'Iia 'e garena Alfias. 'A heinagu na'i dora-ni-horihori takisi mia Jisas 'a ha'atee o'ani 'inia, "'Oi boi suriau 'onaa rongoiusuri agua!" 'Ia Livae 'a ura ara'a ma suria'a.

¹⁵ 'Ari wou mia Jisas mana rongoiusuri ana'i rau ngau na'i ruma ana Livae. 'A ragoi sae ha'atakisi ta'aa mana sae ta'aa rau suria Jisas marau ngau beiraau.

¹⁶ Tara'i Ha'ausuri 'anai Ringe ana'ia Moses nara aba beiraau Farisei rau re'i'i sae 'isi 'oha rau ngau beia Jisas. Marau songa'iniraau rongoiusuri ana'i o'ani, "Ni 'uaana na ngau 'inia beiraau sae ha-ha'atakisi miraau sae ta'a'isi?"

¹⁷ 'Ia Jisas 'a rongoraau ma aramiraau o'ani, "Na sae nara goro moi abedi ra bwa'i rabasiai 'a'au baaniai sae na matai ha'agorohi'i daoha, me 'iraau moi nei nara daoha nara rabasiai 'a'au. 'A o'asi ro'u, 'inau boi na'i marewanani, ai'a do 'anai 'a'auhiraau inoni odo-odo, ma'ata 'au boi 'anai 'a'auhiraau inoni ora-ora'a."

Ha'ausuringa'i Bwani 'A Bwa'i 'Ari Goni

Beiai Ha'ausuringa'i Haoru Ana Jisas

(Matiu 9:14-17; Luk 5:33-39)

¹⁸ Ma tara'i 'oha na rongoiusuri ana'ia Jon Bwareomaea miraaui na Farisei rau ha'ariri 'ini ngau 'anai ha'arahesi. Ma'e ta'i 'oha ra'i sae ra boi beia Jisas 'anai songa'inia, rau ha'atee o'ani, "Iraaui rongoiusuri ana'ia Jon Bwareomaea miraaui rongoiusuri adaa'i Farisei ra suriai ringe 'ini nuga ngau. Ni 'uaana na 'iraaui rongoiusuri amu'i rau ai'a?"

¹⁹ Mia Jisas 'a aramiraaui, 'a ha'atee o'ani, "A 'ua? 'T'amou mou 'adoma'inia do 'iraaui nei ra awa na'i rongo-ni-ha'iwai rai ha'aririta'i ngau 'oha na awa beiraaui a mo'o ra ha'aha'iwaia? 'Abwa'i! 'Oha na nei na ha'iwai 'a awa beiraaui sae 'isi, raugu bwa'i 'asu'ani awa ha'i hioro moi.

²⁰ Ma'ata tari 'oha na nei na ha'iwai rai waia baaniraaui, ma raigui matai ha'aririta'i ngau 'inia ai'ahutotou adaaui.*

²¹ "Mana nata maho ro'u, 'a bwa'i nei nai haa ta maakari bwana haoru 'anai tai bwarasiai dora na maakari na'i bwana bwani. 'Onaa nai haua o'asi, na'i 'oha raigui wasiai bwanasi, na maakari bwana haorusi 'ai niniro. Mai haa ta kae maakari nai raha di'u ro'u na'i bwana bwani. 'Inia na maakari bwana haoru ai'a ta'isada beiai bwana bwani.

²² "Nata mareho ro'u, 'abwa'i nei nai matai nuga waen haoru suri'i bei bwani nara tagora'i 'ini'uri-uri mwamwaa, 'inia na bei bwani ra bwane 'a'asi. Na'i 'oha na waen haoru 'ai su'u, na bei bwani rai pusu. Naasi mana waen rai ahe gata'ini'i, mana bei rai maakari ta'a'i. Na waen haoru rai niga'i ma'ata na'i bei haoru ro'u. 'Inia ni waen haoru ai'a ta'isada beiai bei bwani."

Sae Ra Ororiu Di'uai Dangi ni Mamaro

(Matiu 12:1-8; Luk 6:1-5)

²³ Ma'e ta'i dangi ni mamaro adaaui Jiu, 'ia Jisas miraaui rongoiusuri ana'i rau tahahoro na'i 'ubutadi mou wiit. Me 'iraaui rongoiusuri raugu rahi'i tara'i kora.

²⁴ 'Oha 'iraaui na Farisei rau re'iraaui, raugu ha'atee o'ani 'inia Jisas, "Ei! Rau ga'i bwa'i husi'i wiit 'isi. Na Ringe ana'ia Moses 'a ha'aabuui tau'aro na'i dangi ni mamaro!"

²⁵⁻²⁶ Mia Jisas 'a ha'atee o'ani, "A 'ua? Mou ai'a 'oha'inia mamaani 'inia Mwaeraha Deved mana nei rau ta'i hano na'i 'oha narau hioro? 'A to'o na'i madoraa ana 'Abaeata, i Na'ohadaaui Piriisi. 'Ia Deved 'a siri na'i Ruma Maea Saira ana God ma ngaai breidi maea ra haa tanaa God, ma ha'angauraaui ro'u 'ini'uri sae ana'i. Na'i Ringe ana'ia Moses 'a 'unua do'iraaui moi na Piriisi na rau matai ngaai bredisi. 'Omena, 'ia Deved 'a horosia ro'u i ringeringe!"

²⁷ Mia Jisas 'a 'unua tanaraaui o'ani, "Na dangi ni mamaro, 'ia God 'a haua 'anai 'a'auhiraau moi sae, ma ai'a 'anai ha'abwara'i maho tanaraaui.

²⁸ Me 'inau, na Gare'i Inoni, 'inau 'au matai 'unu'i maho 'iraaui sae ra matai haa'i na'i dangi ni mamaro. 'Inia 'inau naasi Araha 'anai dangi ni mamaro."

3

Sae Na Mae i Rimana

(Matiu 12:9-14; Luk 6:6-11)

* **2:20** 2:19-20 Ni 'ado'ado 'anai heihauuuni 'a o'ani. 'A ai'a ta'isada do'iraaui rongoiusuri agu'i rai nuga ngau 'oha na 'ia Jisas 'a awa mau beiraaui. Na'i 'oha na 'ia God 'ai waia Jisas ara'ai aro, 'a arari dorai ha'aririta'i ngau 'inia ai'ahutotou adaaui.

¹ 'E ta'i 'oha ro'u, 'ia Jisas 'a siri na'i ruma ni ha'arahesi. Ma'e sae na mae i rimana, 'a awa na'isi.

² Miraau na Farisei rau 'ome'ome 'onaa 'ia Jisas 'ai ha'agorohia aho'i sae na mae i rimanasi, do nei narai subunia do'a hauai tau'aro na'i dangi ni mamaro.

³ 'Ia Jisas 'a 'unua tanaai saesi do 'ai ara'a urai na'o.

⁴ Ma songa'iniraau o'ani, "A 'ua? 'E taha na Ringe ana'ia Moses 'a ha'awategaau 'anai haua na'i dangi ni mamaro? 'Anai haa'i mareho goro, ma'uasi 'anai haa'i mareho ta'a'i? 'Anai ha'atahiai noni ma'ua 'anai ha'amaesia?" Ai'a ta ta'i 'iniraau nai aramia 'inia ta ta'i ha'atee.

⁵ 'Ia Jisas 'a wanasiraau ma taesu'a di'u 'adaau suria rau ai'a ta'ahiai mwaeta'aasi. Rei'uaa na o'asi, 'a ahutotou ro'u suria na talingadaau 'a baabau. Ma 'unua tanaai saesi, "Oi taranga'inia hura'ai rimamu." Mana 'oha na taranga'inia hura'a, na rimanai saesi 'agu goro aho'i.

⁶ Ma na'i 'ohasi 'iraau na Farisei raugu hura'a baaniai ruma ni ha'arahesi, rau 'ari beiraui sae ana'ia Herod marau 'adoma'i sibasiba 'iniai here he'ua na rai ngahuia 'inia Jisas.

Kae Ruruhai Sae Na'i Kae Bwerai Galili

⁷ 'Ia Jisas miraui rongoiusuri ana'i rau dioi bobonai kae bwera i Galili. 'A ragoi sae ra suriraau baani'i 'omaa na'i Provensi Galili mana Jiudea mana 'Idumea,

⁸ mana kae 'omaai Jerusalem ma tara'i 'omaa na'i aba bo ara'a 'iniai wai Jordan ma ra'i 'omaa gaarangiai 'omaai Taea mana Saedon. 'Iraau mwani sae 'isi ra boi beia Jisas 'iniai rongo'i adaa'i taha 'iia na haa'i.

⁹ Ma 'iniai rago di'u anai sae, 'ia Jisas 'a o'ani 'iniraui rongoiusuri ana'i, "Moi ha'aagau 'inia ta ora tanaau. 'A gasi 'idi marai ragoi sae maragu haisu'isu'i di'u."

¹⁰ 'A ragoi nei ra daoha nara heisu'usu'u 'ari wou beia Jisas 'anai hatariai abena, 'inia ra re'i'i mwani sae na 'ia Jisas 'a bwane ha'agorohi'i'a aho'i.

¹¹ Ma ra'i nei na adaro 'a bwaunira ra boi beia Jisas. Ra topira'i ruru dioi ano tanaa Jisas ma ra awara, "Toe na garena God!"

¹² Mia Jisas 'a ha'atee wetewete, 'a ha'abasuraui adaro 'isi ma o'ani, "Abu ha'a-'irararaui sae do 'inau atei!"

Jisas 'A 'Ome Sigihiai Waira Ta'i

Tangahuru Mana Rua Ha'ataari (Matiu 10:1-4; Luk 6:12-16)

¹³ Mia Jisas 'a ta'eha na'i hungahunga ma 'unuraui nei na 'irisiraau 'anai tau'aro beia. Mana 'oha rau boi beia,

¹⁴ 'a sigihiai waira ta'i tangahuru mana rua ma ha'a-atadaau 'iniai Ha'ataari. Mia Jisas 'a ha'atee tanaraau o'ani, "Au 'ome sigihi'amou 'anai awa beiau ma wai ha'ataari'amou hura'a 'anai hadanga'ini'i ha'atee ana'ia God,

¹⁵ ma moigui to'oraai mena 'anai taari'i adaro."

¹⁶ Nara 'ini atadaa'i waira ta'i tangahuru mana rua 'ia Jisas na 'ome sigihiraau:

Saemon, mo'o na 'ia Jisas 'a ha'a-atania ro'u 'inia Pita;

¹⁷ mea Jems mea Jon rua garena Sebedi, waira rua na 'ia Jisas 'a 'unurarua 'iniai Boanejis ma'ua Sae ni Hita, 'inia ruru matai taesu'a mwada'u;

¹⁸ mea Andru,
Pilip,
Batolomiu,

Matiu,
 Tomas,
 mea Jems garena Alfias,
 mea Tadius,
 mea Saemon, baaniai ruruha ra raba taaria hura'ai gaumani ni Rom,
¹⁹ mea Jiudas Iskariot, 'ia mo'o na usuha'inia Jisas tanaraaui maeron-
 gana'i.

Jisas 'A To'oraai Mena

Na Wetewete Di'ua Saetan (Matiu 12:22-32; Luk 11:14-23; 12:10)

²⁰ Mia Jisas 'a aho'i 'ari ruma ana. Ma na'i ro'u i 'ohasi, 'a ragoi sae ra rurugoni mai beia. Mana rago di'u 'anai sae, 'ia Jisas mana rongoiusuri ana'i rau bwarabwara'a di'u marau ai'a to'o madoraa 'anai ngau ma'ua haa'i tara'i maho he'ete'i ro'u.

²¹ 'Oha 'iraau do'orana'i mana inana Jisas rau rongo'i maho 'isi, rau 'ari wou 'anai waia 'ari ruma adaau. 'Inia tara'i sae rau 'unua do ai'a odo-odo i 'adoma'ina.

²² Hoita, ma tara'i Ha'ausuri 'anai Ringe ana'ia Moses narau boi baaniai Jerusalem, rau awa ro'u marau ha'atee o'ani, "Na mwaeraha adaau adaro, 'ia Saetan,* 'a bwaunia Jisas. 'Iia na haa tanaai mena 'anai taari'i hura'ai adaro baaniraau sae."

²³ Mia Jisas 'a soiraau mai sae 'anai boi gaarangia, ma haa'i ha'atee heiha'auu 'anai ha'ausuriraau, 'a o'ani, "'A 'ua? Mou 'adoma'inia do'ia Saetan 'ai matai taaria hura'a haaria? 'A bwara!

²⁴ 'Onaa 'e kantri na 'iraau sae ra hei'oi hairiu, na kantrisi 'a bwa'i ura.

²⁵ Ma 'onaa 'e ta'i ruruha na'i ruma ra awa heheihoa'a moi, na ruruhasi 'a bwa'i ura ro'u.

²⁶ Hoita, 'onaa ruruha ana Saetan rai awa heheihoa'a, 'a o'asi ro'u. 'A bwa'i ura mwada'u, ma'ai ahoda mai ai'aa."

²⁷ Mia Jisas 'a haa ro'u i ha'atee heiha'auu. 'A ha'atee o'ani, "'Onaa 'e nei na raba taari'i hura'ai adaro, 'ai wetewete ma'ata di'ua Saetan. 'A 'onaa sae na raba sirihiai ruma anai sae wetewete 'anai haa'i maho ana'i, 'ai wetewete ma'ata di'ua ro'u i sae wetewetesi. Naasi 'aigu mwada'u tanaa 'anai siri tosiai saesi, maigui haa'i bori ana'i.

²⁸ "'Inau wai 'unua ha'a-momori tana'amou. 'Ia God 'a matai 'adoma'i nugasi'i moi mwane ora-ora'a na sae 'a haa'i mana mwane maho ta'a'i na 'unu'i 'inia God.

²⁹ Ma'ata 'ia tei nai ha'atee ha'ata'ai ai Hi'ona Maea, 'ia God 'a bwa'i 'adoma'i nugasia 'inia. Ni ora-ora'asi 'ai awa tarau beia."

³⁰ 'Ia Jisas 'a 'unua o'asi tanaraau 'inia tara'i nei 'iniraau Ha'ausuri 'anai Ringe ana'ia Moses ra 'unua do'e adaro na bwaunia, naia na to'o mena 'inia 'anai taari'i hura'ai adaro. Ai'a do 'iniai mena ana Hi'ona Maea.

Huunai Inana Mana Do'orana Jisas (Matiu 12:46-50; Luk 8:19-21)

³¹ Mana inana Jisas miraaui do'orana'i rau ataha mai na'i ruma na 'ia Jisas 'a awa iei. Marau ura moi hura'ai abau 'omaa. Maraagu ha'ataaria siri taroha tanaa Jisas do'ai hura'a.

³² Me na'i 'ohasi, 'a ragoi sae na rau heinagu garigaria Jisas marau o'ani 'inia, "'Ei, 'ia inamu miraaui do'oramu'i, neiraau hura'asi. Rau raba re'i'o."

³³ 'Ia Jisas 'a ha'atee o'ani 'iniraau, "'Iatei inagu miraaui tei do'oragu'i?"

* **3:22 Saetan:** Na'i ha'atee ni Grik ra 'unua Saetan 'inia Belsabul.

³⁴ Mia Jisas 'a wanasiraaui hairiui sae ra heinagu garigaria. Maagu ha'atee o'ani, "Ome! Neiraauni inagu mana do'oragu'i!

³⁵ 'Ia tei na hauai taha God na 'irisia do 'ai haa, naasi huunai do'oragu mana asigu mana inagu."

4

Mamaani 'inia Sae Na Rarasa (Matiu 13:1-9; Luk 8:4-8)

¹ Mia Jisas 'a taraawa'a ha'ausuriraaui ro'u i sae na'i bobonai kae bwera i Galili. Me suriai rago 'anai sae nara goni na'i dorasi, 'ia Jisas 'a heinagu ara'a na'i ora ma ta'e hura'a baaniai one. Me 'iraaui sae ra ura moi one 'anai bahurongoa.

² Ma haa'i ha'atee heiha'auu 'anai ha'ausuriraaui. 'Agu ha'atee o'ani 'iniraaui,

³ "Moi bahurongo goro. 'E 'oha na 'e ta'i sae na hura'a 'anai hasi korai wiit na'i mou ana.

⁴ Ma na'i 'oha na rarasanga'ini'i kora, ra'i nei nara to'o na'i tara mana gere manu ra dio mara ngaa'i.

⁵ Tara'i nei ra to'o na'i dora hauhau'a, dora na ano 'a ai'a raha mara tahi'a. Mana 'oha ra tahi, ra tahi goro ga'u moi.

⁶ Mana 'oha na sina 'a raorao di'u, ra nugu mara mae aho'i moi, 'inia raridi ra ai'a ganu dio.

⁷ Ma tara'i kora ra to'o na'i dora ra tahi bei'i warorarakai. Ma na'i 'oha ra tahi ara'a, na warorarakai 'a agu ha'amaesi'i maragu ai'a hungu'a.

⁸ Mana kora ra to'o na'i ano goro, ra tahi goro mara hungu. Tara'i nei ra'i ta'i oru tangahuru hua, tara'i nei ra'i ono tangahuru, ma tara'i nei ra'i 'arangi.

⁹ Tei na to'o karinga 'anai rongo 'ai bahurongoa mai aidangi tarihana."

'Ado'adona Jisas 'Anai Ha'ausuri

'Ini'i Ha'atee Heiha'auu (Matiu 13:10-17; Luk 8:9-10)

¹⁰ 'Oha na awa haaria Jisas, 'iraaui na ta'i tangahuru mana rua rongoiusuri ana ma tara'i sae ro'u beiraaui, rau boi marau songa'inia 'ini'i 'ado'ado 'ada'i mamaani 'isi.

¹¹ Mia Jisas 'a ha'atee o'ani 'iniraaui, "Na'i na'o, 'ia God ai'a ha'arangasia he'uai marungiraaui nai haa i noni ana'i. Me na'i 'ohani 'a ha'ata'inia tana'amou. Mei tanaraaui nei nara ai'a hinihinia God, wai ha'ausuriraaui moi suri'i ha'atee heiha'auu.

¹² 'Au haa o'asi do,
'Rei'uaa rai 'ome marai 'ome
marau bwa'i 'ome 'iraraa ta maho,
ma'ua rai bahurongo marai bahurongo
marau bwa'i aidangisia ta maho.
Ma 'onaa rai 'ome 'iraraa marai aidangisia,
rau ga'i rihosi,
mea God 'ai 'adoma'i nugasi'araau.' "*"

'Ado'ado 'Anai Nei Na Rarasa (Matiu 13:18-23; Luk 8:11-15)

¹³ Mia Jisas 'a songa'iniraaui ro'u o'ani, "A 'ua? Mou ai'a aidangisiai ha'atee heiha'auusi? 'Onaa mou ai'a, 'ai he'ua namoigu aidangisi'i ro'u 'ini'i tara'i heiha'auu na wai maani'i ro'u?

* 4:12 4:12 Aisaea 6:9-10

¹⁴ Hoita, 'i nei na rarasa kora 'a 'onaai sae na taroha'ini'i ha'atee ana'ia God tanaraaui sae.

¹⁵ Na kora ra to'o suriai tara nara ngaa'i manu, 'a ura 'iniraau sae ra rongo'i moi ha'atee. Mia Saetan 'a boi ma ha'akaku'araau aho'i 'ini'i.

¹⁶ Na kora ra to'o na'i ano hauhau'a 'a ura 'iniraau sae ra rongo'i mara daa'i raurau i ha'atee ha'i wa'ewa'e.

¹⁷ Mara ai'a daa'i ore'a 'inia na ha'atee ra ai'a ganu dio na'i tahingadaa'i 'onaai hasi'ei ra ai'a ganu i raridi. 'Oha na mwani maho ra bwara mara ha'a-mama'airaaui 'ini suri'i adaa'i ha'atee ana'ia God, raugu rihota'i aho'i.

¹⁸ Na kora ra to'o na'i dora ra awa iei waro raraki 'a ura 'iniraau sae ra rongo'i ha'atee ana'ia God.

¹⁹ Ma 'ari wou maraugu 'adoma'i raha moi 'ini'i taraani maho. Mara ta'ahi'i ro'u i toto'ora ni marewana, mana taraani maho ni marewana moi. Tarana naasi, na ha'atee 'a bwa'i matai tahi ma ai'a ha'i hua.

²⁰ Mana kora ra to'o na'i ano goro, 'a ura 'iniraau sae ra rongo'i ha'atee ana'ia God marau huunai hinihini'i. Mana mwane maho goro ra hura'a baani'i tahingadaa'i 'onaai hungu goro ra hahaa'i hasi'ei. Tara'i nei ra'i oru tangahuru hua, tara'i nei ra'i ono tangahuru, ma tara'i nei ra'i ta'i 'arangi."

Maho Nara Bainihu Ga'u,

Rai Ha'ata'i Hura'a (Luk 8:16-18)

²¹ 'Ia Jisas 'a ha'atee o'ani ro'u 'iniraau, "A 'ua? Ta sae 'a ga'i suungia ta raita 'anai nugaa moi na'i bahainai rabo'o ma'ua na'i bahainai bwea? 'A bwa'i! 'Iia 'ai tokia ma'ata'a na'i dora 'ana.

²² Taha na awa bainihu 'ai ha'ata'i hura'a.

²³ Tei na to'o karinga 'anai rongo 'ai bahurongoa mai aidangi tarihana."

²⁴ Mia Jisas 'a ha'atee o'ani ro'u 'iniraau, "Moi wai'ado'ado goro suri'i maho nau maani'i tana'amou. 'Ia God 'ai haua tana'amoui aidangi suriai araisuri'i amoo'i taha nau 'unu'i.

²⁵ 'Ia tei na raba aidangisia God, 'ia God 'ai a'oi'a tanaai aidangi na to'oraa. Mia mo'o na ai'a raba aidangisia God, na gere aidangi na to'oraa, 'ia God 'ai rahia baania."

God Moi Na Matai Ha'a-urasiai

Heimarungi Ana

²⁶ Mia Jisas 'a haa ro'u i ha'atee heiha'auu, "Na heimarungi ana God 'a 'onaai kora na sae 'a rarasa-nga'ini'i na'i moou ana nara tahi haari'i.

²⁷ Saesi 'a mauru na'i rodo, 'a rarai na'i dangi ma poru haa'i tagora ana'i. 'Ado dangi 'a haua o'asi moe'a. Ma na'i 'ohasi, na kora ra raboa mara tahi ara'a. Mia mo'osi 'a ai'a 'iraraai taha na ha'atahi'i kora 'isi.

²⁸ Hoita, naia na ano na ha'atahi'i 'isi na ragu hungu 'ini'isi. Na maho tahamora na re'ia, naasi rawadi, ruana tagadi mana oruna nai'i huadi.

²⁹ Mana 'oha na hua ra maua, 'a hauai naihi ana ma tabari'i, 'inia 'a tari'ai madoraa 'anai haa'i."

Raha Nai Hauai Heimarungi Ana God (Matiu 13:31-32; Luk 13:18-19)

³⁰ Mia Jisas 'a songa'iniraau ro'u o'ani, "A he'uai 'adoma'imoou 'inia heimarungi ana God? 'E taha wai heiha'auu 'inia na moi aidangisia 'inia?

³¹ 'Io, 'a 'onaai koranai hasi'ei ra 'unua 'inia mastad nara hasia na'i mou. Na koranai hasi'eisi 'a kekerei di'u'i koradi mwane hasi'ei.

³² Ma na'i 'oha na tahi ara'a, 'e kae hasi'ei na raha di'u'i hakoi maho ra hasi'i na'i mousi, mana raraana ra raha 'ohadi manu 'anai nu'i suri'i."

*'Ado'adona Jisas 'Anai Ha'ausuri**'Ini'i Ha'atee Heiha'auu
(Matiu 13:34)*

³³ 'Ia Jisas 'a haa'i tanaraaui inoni ha'ausuringa'i na rau matai aidangisi'i.

³⁴ 'A haa'i moi suri'i ha'atee heiha'auu. Ma na'i 'oha nai awa haaria beiraaui rongoiusuri ana'i 'aigui ha'atee wagasi'i tanaraau.

*Jisas 'A Ha'apapakuai Ro'a Mana Tabaosi
(Matiu 8:23-27; Luk 8:22-25)*

³⁵ Na'i dangisi, 'oha na gaarangi su'urahi, 'ia Jisas 'a ha'atee o'ani 'iniraauui rongoiusuri ana'i, "Gau magai 'ari nata batarau i bwera."

³⁶ Miraauui rongoiusuri ana'i rau hano baaniraauui inoni 'isi. Rau ta'e ara'a na'i ora na 'ia Jisas na heinagu iei marau ta'i 'ari nata batarau. Ma tara'i ora ro'u narau ta'i 'ari goni.

³⁷ Raugu 'asu'a marau hano suaai kae ro'a beiai tabaosi. Mana ora narau ta'e iei 'a gaarangi mai dodo 'inia ni tabaosi ra abwao aharau siri na'i raronai ora.

³⁸ Na'i 'ohasi 'ia Jisas 'a borunga na'i pilo auru na'i muri, 'a poru mauru. Miraauui rongoiusuri ana'i rau ha'araia marau o'ani 'inia, "Ha'ausuri, 'a ai'a ta'aabemu 'inia gaarangi dodo'a agaauni?"

³⁹ 'Ia Jisas 'a ura ara'a ma ha'atee wetewete o'ani tanaai ro'a mana wai, "Papaku!" Ma na'i mau 'ohasi na ro'a 'a papaku mana wai 'agu biowaa.

⁴⁰ 'Ia Jisas 'agu songa'iniraauui rongoiusuri ana'i, "Ni 'uaana mou mamaa'u 'inia? 'A 'ua? Mou ai'a hinihiniau mau?"

⁴¹ Na'i 'ohasi rau mamaa'u ro'u wou baaniai na'o marau ha'atee hairiu o'ani, "E sae he'ua naani? Rei'uaa ro'a mana tabaosi mara araisuria moi!"

5*Ra'i Adaro Nara Bwaunia Sae
(Matiu 8:28-34; Luk 8:26-39)*

¹ 'Ia Jisas miraauui rongoiusuri ana'i rau taha wou na'i nata batarauui bwera i Galili marau 'oto na'i dora ra 'unua 'inia Gerasa.

²⁻³ Ma na'i 'oha rau dio baaniai ora, 'e sae na adaro 'a bwaunia 'a boi 'anai heisadoi beia Jisas. Saesi 'agu hura'a mai baaniai dora na awa iei, suri'i wabwa nara toringi'i ei sae mae. Me 'inia wetewete di'u ana, rei'uaa ra ho'osia 'ini'i arihau mara ai'a bwara tanaai mosi'i.

⁴ 'A ragoi 'oha ra ho'osiai uwana mana rimana 'ini'i arihau ma momosi'i moi. Ma ai'a ta sae ro'u 'ai wetewete 'anai ha'amanataa.

⁵ Dangi mana rodo 'a hano hairiu suri'i wabwa mana hungahunga. 'A awaawara ma ha'amaaraai abena 'ini'i hau.

⁶ Hoita, saesi 'a bwane re'ia mau hura'a Jisas sisiri mai adaau ma bwane 'eba 'anai heisadoi beia. 'A taha wou beia ma topira'i ruru tanaa.

⁷⁻⁸ Mia Jisas 'a ha'atee o'ani, "Adaro, 'oi hura'a baaniai saeni!" Mana saesi 'agu awara raha o'ani, "'Ei Jisas, garena God ororiu ara'a! 'O raba 'uaauni? Na'i atana God 'au ha'angoni'o, 'oi abui ha'a-mama'aiau!"

⁹ Mia Jisas 'a songa'inia saesi, "'Iatei atamu?"

Mia aramia, 'a o'ani, "Atagu 'ia Kae Ruruha, 'inia meu rago di'u."

¹⁰ Mia ha'angonia wetewete a Jisas do 'ai abui taarirau hura'a baaniai dorasi.

¹¹ Ma na'i bobonai abaaba gaarangirau, ra'i mwane boo nara suasua 'isi.

¹² Miraauui adaro 'isi ra bonga'inia Jisas o'ani, "'Oi ha'ataari'ameu siri suri'i boo 'isi 'anai awa suri'i."

¹³ Mia Jisas 'a ha'awateraau mana adaro 'isi ra hura'a baaniai saesi mara siri'a suri'i mwani boo 'isi. Mana boo 'isi ra 'eba dio suriai ahana mara rege dio na'i wai mara dodo hako.

¹⁴ Miraau nei ra 'omesuri'i boo 'isi rau 'eba 'ari na'i 'omaa ma na'i suri'i mwani dora ro'u 'anai taroha'iniai tarohasi. Mana mwani sae hako ra boi 'anai 'omesiai maho na to'o.

¹⁵ Mana 'oha ra boi beia Jisas, ra re'iai sae na adaro ra bwaunia ga'u. 'A goro'a mana aidangina 'a odo-odo aho'i ma ho'o bwana'a, 'a heinagu papaku moi. Miraau sae ra mamaa'u hako.

¹⁶ Miraau nei rau re'i'i maho 'isi, rau maania 'ari taha na to'o tanaai saesi mana boo 'isi.

¹⁷ Miraau saenai dorasi rau bonga'inia Jisas do'ai hura'a baaniai dora adaau.

¹⁸ 'Oha 'ia Jisas 'a ta'e aho'i na'i ora, na sae na adaro ra bwaunia ga'u ani 'a ha'angonia wetewete do rarui ta'i hano.

¹⁹ Mia Jisas 'a ha'atee o'ani 'iniai saesi, "Au ai'a rabasia do'oi hano beiau, ma'ata 'oi 'ari 'omaa amua beiraui sae amu'i. Ma'oi 'unua tanaraau taha 'ia Araha God na haua tana'o mana heita'ahi ana tana'o."

²⁰ Naasi mana saesi 'a hura'a ma 'ari na'i Provensi Dekapolis. 'A maania tanaraau hakoi mwani sae taha na 'ia Jisas 'a haua tanaa mana mwani sae 'isi ra heimwaota'i di'u 'inia.

'E Gare Urao Ana Jaeras

Mana Urao Na Adoiai 'Abu Raha (Matiu 9:18-26; Luk 8:40-56)

²¹ 'Ia Jisas miraau rongoiusuri ana'i rau ta'e aho'i 'ari nata aba 'iniai bwera i Galili. 'Oha na siri wou na'i one, 'a ragoi sae ra rurugoni mai beia.

²² Ma'e sae na boi 'anai re'ia Jisas na atana 'ia Jaeras. 'Iiasi 'e na'otara na'i ruma ni ha'arahesi 'anai 'omaasi. 'A boi ma topiruru auru tanaa Jisas.

²³ 'A ha'angonia wetewete, 'a ha'atee o'ani, "Jisas, ni gare urao agua 'a gaarangi mae'a. 'Oi boi karohia maai goro aho'i."

²⁴ Mia Jisas 'agu hano beia Jaeras 'anai 'ari ruma ana. Ma'e kae ruruhai sae ra hano haisuri mara ha'asu'isu'ia.

²⁵ Ma na'i ruruhasi, 'e urao na awa iei na adoiai 'abu raha, ma'e ta'i tangahuru mana rua harisi na hako'a.

²⁶ 'A rongomaata'i di'u suri'i 'oha 'iraui dokita ra bonasiai ha'ahakoa baania i daohasi. Mana uraosi ai'a gere goro moe'a, 'agu daoha raha di'u wou. Mana gere ha'a ana'i ra hako mamata 'iniai tahariraa.

²⁷ Na uraosi 'a bwane rongoai taroha 'inia Jisas. Naasi ma 'ariwou na'i murina na'i 'uruhanai kae ruruhasi ma karohiai to'oni ana.

²⁸ 'A 'iraraa haaria do 'onaa 'ai karohia moi to'oni ana Jisas ma 'a ga'i goro aho'i baaniai daoha na adoiasi.

²⁹ Ma na'i 'oha na karohia na 'abu 'a papaku ma arunga 'iraraa do 'iia 'a goro'a.

³⁰ Ma na'i ro'u 'ohasi, 'ia Jisas 'a 'iraraa do ni mena ni ha'atahi 'a hura'a baania. Ma rihota'i ma songa'iniraui mwane sae 'isi o'ani, "Ia tei 'ini'amou na karohiai to'oni agua?"

³¹ Miraau rongoiusuri ana'i rau ha'atee o'ani 'inia, "A 'ua na'o songa'inia 'inia mo'o na karohiai to'oni amuasi? 'A bwarai 'iraraa tei na karohi'o! 'O ai'a 'iraraai rago anai sae na ra ha'a-su'isu'i'osi?"

³² Mia Jisas 'a wanawana hairiu 'anai re'ia tei na karohiai to'oni ana.

³³ Mana uraosi 'a 'iraraai maho na to'o tanaa. 'A boi ha'i-'idi'idi 'inia 'a mamaa'u, 'a topira'i ruru auru tanaa Jisas ma maania hako tanaai daoha na sadoia ma 'inia ro'u i karohia anai to'oni ana.

³⁴ Mia Jisas 'a ha'atee o'ani 'inia i uraosi, “Ina, i hinihinimu na ha'agorohi'o aho'i! 'O bwa'i rongomaata'i'a. 'Oi 'ariwou dadara'a!”

³⁵ Na'i 'oha na 'ia Jisas 'a ha-hadahada mau, ra'i sae ra boi baaniai ruma ana Jaeras marau o'ani 'inia Jaeras, “Ni gare amua 'a hako'a. 'Oigu abu 'unua'ai ha'ausurisi 'anai 'ari!”

³⁶ 'Ia Jisas 'a rongo'i mareho narau maani'isi ma o'ani 'inia Jaeras, “Oi abui maaa'u, 'oi hinihini moi!”

³⁷ 'Ia Jisas 'a ai'a rabasia do tanei ro'u 'anai hano beia, ma'ata 'ia moia Pita, 'ia Jems, mea Jon do'orana Jems.

³⁸ Rau 'ari wou ruma ana Jaeras marau rongoraui sae nara boi 'anai ada'ima'e 'inia garesi.

³⁹ Na'i 'oha 'ia Jisas 'a siriwou na'i ruma 'a ha'atee o'ani 'iniraaui, “Ni 'uaana namou angi 'inia? Na garesi ai'a mae, 'iia 'a mauru moi.”

⁴⁰ Mana mwane sae hako ra da'ata'inia Jisas. 'Ia Jisas 'a 'unua tanaraui mwane sae 'isi do rai hura'a baaniai ruma. Maagu wairaruai amana mana inanai garesi, beiraaui oru rongoiusuri anasi marau 'ari na'i ahii na awa iei garesi.

⁴¹⁻⁴² Mia Jisas 'a dau na'i rimaui garesi ma ha'atee o'ani na'i ha'atee ana, “Talitha, koum!” I 'ado'ado 'anai ha'ateesi 'a o'ani, “Gere urao, suruta'e!” Ma na'i moi 'ohasi, na garesi 'a suruta'e magu hahano. Miraau hako rau heimwaota'i di'u.

⁴³ 'Ia Jisas 'a ha'atee wetewete tanaraui do rai abui taroha'inia ro'u tanaa ta nei 'inia mahosi. Ma ha'atee o'ani, “Moi haua tanaa ta mahoingau.” Mana gare uraosi, ni harisina 'e ta'i tangahuru mana rua.

6

Ra 'Utaia Jisas Na'i 'Omaai Nasaret (Matiu 13:53-58; Luk 4:16-30)

¹ 'Ia Jisas 'a hura'a baaniai 'omaasi bei'i rongoiusuri ana'i marau 'ari Nasaret, 'omaa na raha ara'a iei.

² Ma na'i dangi ni mamaro 'a siri na'i ruma ni ha'arahesi ma ha'ausurirai noni. Ma ragoi noni ra goni mai 'anai bahurongoa. Ma na'i 'oha ra rongo'i ha'ausuringa'i ana'i, rau heimwaota'i di'u maraugu ha'atee heiheia o'ani, “Romwane! 'A he'ua na 'irara'i 'ini'i maho 'inia mo'osi? 'E sae haaria moi na'i 'omaani naasi, ma 'a he'ua na aidangi di'u 'iniasi? Ma to'oraa he'uai mena na haa'i 'ini'i ha'abu'oahu 'isi?”

³ 'Iia 'e kapentaa moi, gare ana Meri, do'oradaau a Jems, Josep, Jiudas mea Saemon. Me 'iraaui asina'i rau awa ro'u moi 'ini.”

Naasi rau 'itaa Jisas marau ai'a raba hinihinia.

⁴ Mia Jisas 'a ha'atee o'ani 'iniraaui, “I rarabea ra ha'ahoua suri'i mwani dora hako. Na'i moi 'omaa ana miraaui sae ana'i naraugu ai'a.”

⁵ Ma 'ini ai'a hinihinia adaau a Jisas, ai'a ragoi ha'abu'oahu na haa'i na'i 'omaasi. Mia nugaai rimana moi hungadaau taringai nei ra daoha mara goro aho'i baani'i daoha nara sadoira.

⁶ 'Ia Jisas 'agu heimwaota'i di'u 'iniraaui sae na'i 'omaa ana, 'inia rau ai'a hinihinia.

Jisas 'A Ha'ataariraaui Hura'a Ta'i Tangahuru

Mana Rua Ha'ataari Ana (Matiu 10:5-15; Luk 9:1-6)

Ma na'i muri, 'ia Jisas 'a hano hairiu suri'i 'omaa 'anai ha'ausurirai noni.

⁷ Ma'e ta'i 'oha, 'a soiraaui goni ta'i tangahuru mana rua rongoiusuri ana. Ma ha'atee o'ani 'iniraaui, “'E waira rua ma wai ha'ataaria hura'a 'ari suri'i

'omaa. Ma wai haa tana'amoui mena 'anai taari'i hura'ai adaro baanirai sae.

⁸ Na'i 'oha moi hura'a, abu tanei 'ini'amou 'ai waa ta huai bredi ma'ua anga ni 'aariha, ma'ua ha'a. Moi matai waa'i 'a'abi amoo'i

⁹ mamoi siri suri'i sandol amoo'i. Ma'ata mou abui waa'a ro'u ta to'oni.

¹⁰ 'Oha moi siri wou na'i ruma nara ha'a-maoto'amou na'iei, moi awa hatara'i na'iei tari 'oha moi hura'a baaniai dorasi.

¹¹ Mana 'oha moi taha wou ta dora na rau bwa'i raba ha'amaoto'amou mana rongo'i taha mou hadanga'ini'i, moi hura'a baaniai 'omaasi. Ma moi tarohi'i kahua baani'i uwamoo'i, 'e ha'abasu tanaraau do'ia God 'ai ha'amama'airaau."

¹² Me 'iraaui rongoiusuri rau hura'a marau taroha'iniai ha'atee ana God tanaraau mwane sae, rau o'ani, "Mou rihosi baani'i ora-ora'amoo'i."

¹³ Marau taari'i hura'a mwani adaro marau tarohiraau mwani nei ra daoha 'iniai rumu mara goro aho'i baani'i daoha nara sadoira.

*Na Mae Na Haa Jon Bwareomaea
(Matiu 4:1-12; Luk 9:7-9)*

¹⁴ Na'i 'ohasi, 'ia Herod Antipas na Mwaeraha na'i Galili, 'a rongo'i mwani taroha 'ini'i taha 'ia Jisas mana rongoiusuri ana'i rau haa'i. 'Inia na taroha 'a 'adarara hako 'ari suriai mwane dora. Tara'i sae ra 'unua do 'ia Jisas naasi 'ia Jon Bwareomaea na tahi aho'i baaniai mae. 'Inia do naia na to'o mena 'inia 'anai haa'i ha'abu'oahu.

¹⁵ Ma tara'i nei ro'u ra 'adoma'inia do 'ia Elaija ma'ua 'e ta'i 'iniraaui Rarabea ni 'ohaani mau.

¹⁶ Ma na'i 'oha 'ia Herod 'a rongo'i maho ra 'unu'i 'inia Jisas, 'a o'ani, "Ia Jon Bwareomaea nara horosia'ai 'u'una ani, na suruta'e aho'i baaniai maesi."

¹⁷⁻²⁰ 'Inia na'i na'o, 'ia Herodias raru ha'iwai a Pilip, do'orana Herod. 'A 'ari wou mia Herod 'agu asihura moi ma waina'a Herodias. Naasi 'ia Jon Bwareomaea 'a taringai 'unua tanaa Herod do 'a ai'a odo-odo do'ai wainai urao ana do'orana!

Hoita, mia Herodias 'a taesu'a di'u 'ana Jon ma raba ngahuia maagu bwara tanaa. 'Inia 'ia Herod 'a maguguta'i ngahuia 'inia 'a 'iraraa do 'ia Jon 'e sae na maea ma odo-odo na'i maana God. Naasi 'ia Herod 'a 'unua tanaraau sae hehei'oi do rai waia Jon marai nugaa na'i rumanih'o, 'inia 'a raba ha'atahia baania Herodias. 'Ia Herod 'a wa'ewa'e 'oha na bahurongo'i mamaani na haa'i a Jon, rei'uaa na ha'a-heingahui'i maho 'isi na'i 'adoma'ina.

²¹ 'E ta'i 'oha, 'ia Herod 'a hauai kae ngaungau 'anai 'adoma'i aho'isiai 'oha na huta. Ma ari'ahuraau hako mai saemaua ana'i, 'iraaui na'otara na'i ruruhai hehei'oi, miraaui hakoi na'otara na'i Galili. Na'i 'ohasi, 'ia Herodias 'agu sadoiai 'oha goro 'anai ngahuia Jon.

²² Na'i 'oha na to'o i ngaungau, 'e gere urao, garena Herodias, 'a siri mai mao 'anai ha'a-reirei'araau. Mia Herod miraaui hakoi sae na'i rumasi rau wa'ewa'e 'anai reireia. Mia Herod 'agu o'ani 'iniai gere uraosi, "Wai haua tana'o namoiwou ta mareho 'oi 'irisia.

²³ Wai duruduru tana'o 'inia ta aba 'iniai dora nau marungia 'onaa 'o 'irisia."

²⁴ Mana gere uraosi 'a hura'a, ma 'ari songa'inia inana, 'a o'ani, "Nanae, 'e taha wai ha'angonia?"

Mana inana 'a o'ani, "Ni bwauna Jon Bwareomaea!"

²⁵ Mana gere urao 'a hasi hura'a ma 'ari aho'i beia Herod ma ha'atee o'ani, "Inau 'au rabasia do'oi haua'a mai tanaau bwauna Jon Bwareomaea na'i ta rabo'o papaheta'a."

²⁶ Na Mwaeraha 'a ahutotou di'u. Ma ha'a-heingahuia na'i 'ado'adona, 'inia 'a ai'a raba horosiai 'u'una Jon. Ma bwara'a ro'u tanaai ura bwarasiai taha na gere uraosi 'a ha'angonia na'i maadi sae rago.

²⁷ Naasi 'ia Herod 'a ha'ataariai sae hehei'oi moi 'ohasi 'ari rumaniho'o 'anai horosiai 'u'una Jon.

²⁸ Mana sae hehei'oi 'a horosiai 'u'una, 'a nugaai bwauna na'i rabo'o papaheta'a ma haua tanaai gere urao, mana gere uraosi 'a waa 'ari tanaa inana.

²⁹ 'Oha 'iraau rongoiusuri ana'ia Jon ra rongoa, raugu boi waai abena marau nugaa na'i wabwa.

*Jisas 'A Hanganiai Rima Merui Mwane
(Matiu 14:13-21; Luk 9:10-17; Jon 6:1-14)*

³⁰ 'Oha 'iraau Ha'ataari rau aho'i mai baaniai 'aariha adaau, rau maani'i tanaa Jisas mwani maho rau haa'i mana mwani maho rau ha'ausuriraau sae 'ini'i.

³¹ Me 'iniai rago anai sae nara boi beia Jisas ma ra aho'i, 'ia Jisas mana ha'ataari ana'i rau bwarabwara'a di'u marau ai'a to'o madoraa 'anai ngau mana haa'i tara'i maho he'ete'i ro'u. Mia Jisas 'a ha'atee o'ani 'iniraau, "Gau ma gai 'ari ta dora na bwa'i ta sae nai awa na'iei ma gai gere mamaro ga'u."

³² Naasi, marau ta'e na'i ora, rau 'ari na'i dora na ai'a sae awa iei.

³³ Miraau sae rau 'irararaau'ai hano adausi, marau hano baani'i 'omaa adaai. Rau 'eba hatare 'anai dora na 'ia Jisas mana rongoiusuri ana'i narau hano 'ana, marau ataha na'i na'o 'iniraau.

³⁴ 'Oha 'ia Jisas 'a dio baaniai ora, 'a re'iai kae ruruhai saesi ma ta'ahiraau di'u, 'inia rau 'ome ha'a-ta'ata'ahi 'onaai'i siip nara ai'a to'o sae 'anai 'omesuri'i. Ma ragoi maho na ha'ausuriraau 'ini'i.

³⁵ Ma su'urahi'a 'iraau rongoiusuri ana'i rau boi beia marau o'ani 'inia, "A orea di'u'a naani, mana dorani, 'a ai'a ruma'a.

³⁶ Ni 'uaana na'o ai'a ha'a-taariraau sae 'ini marai hura'a suri'i 'omaa 'isi 'anai hori 'adaau mahoingau?"

³⁷ Mia Jisas 'a aramiraau o'ani, "'I'amou namoi ha'i 'adaau mahoingau!" Marau o'ani 'inia, "'E taha na mei hanganiraau 'inia? Horihorinai ta'i sae na'i ta'i harisi maigui arari 'anai hori breidi 'ada'i mwani sae 'ini!"

³⁸ 'Ia Jisas 'a ha'atee o'ani 'iniraau, "Moi sadoiai siha huai breidi na beiraau sae 'isi."

Mana 'oha rau 'iraraa, rau 'unua tanaa o'ani, "'E rima gere huai breidi ma'e rua ii'a."

³⁹ Mia Jisas 'a 'unua tanaraau rongoiusuri 'anai ha'a-heinaguraau sae na'i mwani hahaarisi marai hoairaau suri'i ruruha.

⁴⁰ Miraau sae ra heinagu suri'i ruruha, tara'i ruruha ra'i ta'i 'arangi sae, ma tara'i nei rima tangahuru.

⁴¹ Mia Jisas 'a dauai rima huai breidi mana rua ii'asi. 'A wana ara'ai aro ma ha'atee ha'agorohia God 'inia. Ma uubi'i breidi 'isi mana ii'a ma haa'i tanaraau rongoiusuri ana'i 'anai ha'atora'ini'i tanaraau sae.

⁴² 'Iraau hako rau ngau masu

⁴³ mana mahoingau narau ngau tahi'i rau si'o ha'ahonua 'iniai ta'i tangahuru mana rua abira.

⁴⁴ 'A 'onaai rima merui saemwane narau ngau masu hako na'i dangisi.

*Jisas 'A Hahano Na'i Hunganai Wai
(Matiu 14:22-33; Jon 6:15-21)*

⁴⁵ Na'i moi muri 'ia Jisas 'a o'ani 'iniraau rongoiusuri ana'i, "Moi ta'e na'i ora mamoi gaau na'i na'o 'ari nata batarau, mamoi siri na'i 'omaai Betsaeda.

'Inau wai awa ga'u." Naasi mia Jisas 'a awa moi beiraaui sae 'isi tari 'oha na ha'ahanoriraaui aho'i hako 'ari suri'i 'omaa adaa'i.

⁴⁶ 'Oha na ha'a-taariraaui hako sae, 'a ta'eha na'i hungahunga 'anai ha'arahesi.

⁴⁷ Ma su'urahi'a mia Jisas 'a awa mau na'i hungahunga mana rongoiusuri ana'i rau 'ari wou taha na'i 'ubutanai wai.

⁴⁸ 'Ia Jisas 'a re'iraaui rongoiusuri ana'i do rau tau'aro raha di'u 'anai haruta suaai ro'a raha. 'Ari wou me 'iia 'a 'ari beiraaui na'i wa'aria, 'a hahano na'i hunganai wai ma gaarangi hano di'uraau'a.

⁴⁹ Ma na'i 'oha 'iraaui rongoiusuri ana'i rau re'iai hahano ana Jisas na'i hunganai wai rau 'adoma'inia do 'e anoa marau awaawara.

⁵⁰ Rau kae maaaa'u di'u 'oha rau re'ia, mia Jisas 'a o'ani 'iniraaui, "Ai abui ta'aabemoou! 'Inau moia Jisas na! Moi abui maaaa'u."

⁵¹ Ma ta'e ara'a beiraaui na'i ora mana ro'a 'a papaku'a. Miraau na rongoiusuri ra kakuta'aa'i ahudaa'i.

⁵² Ra pwapwakui 'adoma'idaa'i 'inia rau ai'a raroma-tarihana do'a to'o mena 'anai haa'i ha'abu'oahu, 'onaai 'oha na hanganiraaui ani rima merui mwane.

Jisas 'A Ha'agorohira Aho'i Sae

Ra Daoha Na'i Genesaret (Matiu 14:34-36)

⁵³ 'Ia Jisas mana rongoiusuri ana'i rau haruta 'ari nata batarau marau 'oto na'i dora ra 'unua 'iniai Genesaret marau ha'ahunaai ora adaaui na'i 'isi.

⁵⁴ 'Oha rau dio baaniai ora, 'iraaui sae ra 'ome 'iraraa Jisas.

⁵⁵ Naasi, marau 'eba 'ari suri'i mwani 'omaa na'i dorasi marau taroha'iniai boi ana Jisas. Marau suru'i'i sae ra daoha suri'i bwea marau waa'i 'ari na'i dora na 'ia Jisas 'ai taha suri'i.

⁵⁶ Ta 'omaa he'ua nai 'ari ei, 'iraaui sae ra waa'i mai moe'a i sae adaa'i nara daoha mara nuga goni'i na'i ta'i dora a'ora. 'Iraaui sae daoha rau bongal'inia Jisas dorai karohia moi gaonai to'oni tewa ana. 'Iraaui nei rau haua o'asi rau goro aho'i baani'i daoha ra to'iraaui.

7

Ha'ausuringa'i Ni 'Oha Bwani (Matiu 15:1-9)

¹ Tara'i Farisei mana Ha'ausuri 'anai Ringe ana'ia Moses nara boi baaniai Jerusalem, ra goni mai beia Jisas.

² Rau re'ia do tara'i rongoiusuri ana'ia Jisas rau ngau maraigu ai'a dorima suriai herehere 'iraaui Farisei rau 'unua.

³ 'Iraaui Jiu, ororiu 'iraaui Farisei, ra suri'i mau i ringe adaa'i na'i 'oha bwani, 'onaai herehere 'anai dori ha'agorohi'i rimadaa'i maraigu ngau.

⁴ Ma na'i 'oha rai 'ari suri'i dora-ni-horihori mahoingau, ra bwa'i ngaa'i mahoingau rai hori'i tari 'oha rai hauai herehere 'anai dori ha'agorohi'i rimadaa'i. Marau suri'i ro'u tara'i ringe adaa'i, 'onaai here 'anai dori panikeni mana kuki mana rabo'o.

⁵ Hoita, miraau Farisei mana Ha'ausuri rau songa'inia o'ani a Jisas, "Ni 'uaana na'iraaui rongoiusuri amu'i ra ai'a ha'isuri'i 'ini'i ha'ausuringa'i narau ha'adiohi'i mai tanagaau i wauwa agaa'i na'i 'oha bwani? 'Tameu meu re'ia do rau ai'a suriai huunai herehere 'anai dorima, marau ngau moi!"

6 Mia Jisas 'a ha'atee o'ani 'iniraa, "Mou pwapwaari'i! Maho na 'unu'ia God tanaa Aisaea 'anai usu'i 'iniraaui wauwa amoo'i ra to'i'amou ro'u. 'Ia Aisaea 'a usu 'oniaa,

"Iraaui noni 'ini ra ha'ahouau moi 'ini'i ngoodaa'i,
magu tahingadaa'i ra awa ha'atau di'u baaniau.

7 I ha'arahesi adaa'i ra 'ari pwaranga,
'inia rau orisi'i Ha'atora ana'ia God

'ini'i ha'ausuringa'i adaa'i haariraaui na inoni moi na haa'i.' **

8 Mia Jisas 'a o'ani ro'u, "I'amou mou gagata'ini'i Ha'atora ana God, ma mou suri'i moi ha'ausuringa'i adaa'i noni.

9 Mou mataihere di'u 'anai gagata'iniai Ha'atora ana God 'anai suri'i moi ha'ausuringa'i amoo'i haarimoo.

10 Mou 'iraraa do 'ia Moses 'a bwane 'unua o'ani, "Oi ha'ahoua amamu mea inamu' ma o'ani ro'u, "Iatei na 'unu ha'ata'aia amana mea inana rai ha'amaesia.†

11 Me'imooou mou 'unua dona 'a odo-odo moi 'onaa ta sae 'ai o'ani 'inia inana mea amana, 'Ha'a-arohai'amurua, 'au ga'i 'a'auhimurua 'ini'i maho nau to'ora'i. Me 'au bwa'i 'a'auhimurua'a. Suria maho nau to'ora'i ra maea'a. 'Inia 'au bwane wate'i tanaa God.'

12 I'amou mou 'adoma'i ha'agorohia moi heresi!

13 Na'i 'oha mou ha'ausurirai noni 'anai hua o'asi, mou here 'onaa do ha'ausuringa'i amoo'i ra ororiu di'u'ai Ha'atee ana God. Mara rago ro'u i maho na mou here hiosi'i o'asi."

*Taha Na Matai Ha'ado'o'aai Sae
(Matiu 15:10-20)*

14 'Ia Jisas 'a soi goniraaui ro'u mai kae ruruhai sae ma o'ani 'iniraaui, "Moi bahurongo goro mamoi aidangisiai taha na wai 'unu'i.

15 Maho na siri na'i ngoonai sae, 'a ai'a ha'ado'o'aai sae na'i maana God. Naia na taha na hura'a baaniai ngoona na ha'ado'o'aa.

16 Tei na to'o karinga 'anai rongo 'ai bahurongoa mai aidangi tarihana."

17 'Ia Jisas miraaui rongoiusuri ana'i rau hano baaniraaui sae marau siri na'i ruma. Miraaui rongoiusuri rau ha'angonia 'anai ha'a-aidangisiraaui 'iniai ha'atee heiha'auusi.

18 Mia Jisas 'a o'ani 'iniraaui, "Mwane! Mou ai'a aidangisia mau? Na 'adoma'imoo'i ra kuhi 'inia? Mou ai'a 'iraraa dona mahoingau na siri na'i ngoonai sae 'a ai'a ha'ado'o'aai sae na'i maana God?

19 Suria na mareho naasi 'a ai'a siri na'i raromana, 'a siri moi na'i ngoona, ma dio na'i ahuna ma hura'a aho'i moi baaniai abena." 'Ia Jisas 'a ha'atee o'asi 'iniraaui ma dorai 'iraraa dona mwane mahoingau ra goro na'i maana God.

20 Ma ha'atee o'ani ro'u 'iniraaui, "Ni taha na hura'a baaniai raromanai sae, naasi na ha'ado'o'aa na'i maana God.

21 'Inia na'i raromanai sae nara hura'a i 'adoma'i ta'a'i, 'onaai wawaasua'a, taritari'a beiai nata nei, heingahu mana beri,

22 hairaurau, haa'i maho ta'a'i mana pwapwaari'i, 'adoma'i sisiwa 'iniai nata nei, hai'ubwani, 'unu ha'ata'aia nata nei, ha'a-ta'eta'e mana here to'o bweubweu'a.

23 Nara 'isi mareho nara ha'ado'o'aai noni na'i maana God. 'Inia ni mareho 'isi ra hura'a mai baaniai raromanai inoni."

*E Urao Na Ai'a Jiu Na Hinihinia Jisas
(Matiu 15:21-28)*

* 7:7 7:6-7 Aisaea 29:13 † 7:10 7:10 Eksodas 20:12; 21:17; Levitikas 20:9; Diutronomi 5:16

²⁴ Mia Jisas 'a hano baaniai dorasi, 'a 'ari suri'i 'omaa gaarangi'ai kae 'omaai Taea. Ma 'ari wou na'i 'omaa ma siri na'i ruma 'inia 'a ai'a rabasia do 'iraaui sae rai 'iraraa. Ma rei'uaa na o'asi, 'iraaui sae rau 'iraraa moi do'a awa 'isi.

²⁵⁻²⁶ Ma'e urao na rongoai dora na awa iei a Jisas. Uraosi ai'a urao ni Israel, 'iia 'a huta na'i Ponisia, 'e aba 'inia'i kantri ra 'unua 'inia'i Siria. 'A 'ari beia Jisas 'inia na adaro 'a bwaunia'i gare urao ana. 'A 'ari wou beia ma topiruru ma mwaoro dio na'i ano. Ma ha'angonia wetewetea Jisas 'anai taaria hura'ai adaro baaniai gare ana.

²⁷ Mia Jisas 'a ha'atee heiha'auu o'ani, "Ni gare narai hangani'i na'i na'o. 'A ai'a goro dorai hau'i mahoingau adaa'i gare ma do raigui gaasi'i 'ada'i misu."‡

²⁸ Mana uraosi 'a o'ani 'inia, "Ha'amomori di'u Araha! Ma'ata na misu ra matai ngaa'i ro'u moi mamamo i mahoingau adaa'i gare na rau ahoda baaniai dora ngaungau."

²⁹ Mia Jisas 'a o'ani 'inia, "'Iniai heiarami odo-odo amua, na adaro 'a nugasia'ai gare amua. 'Oi aho'i 'ari 'omaa."

³⁰ Mana 'oha na uraosi 'a aho'i 'ari ruma ana, 'a re'ia dona gare ana 'a goro'a aho'i ma dadao hatara'i moi na'i be'a. 'Inia na adaro 'a nugasia'a.

Jisas 'A Ha'agorohia Aho'i Sae

Na Pwarongo Ma Ai'a Hadahada Goro

³¹ 'Ia Jisas miraaui rongoiusuri ana'i rau hano baani'i 'omaa gaarangi'ai 'omaai Taea. Rau 'ari wou rau riutaha na'i 'omaai Saedon mana Provensi Dekapolis maraugu taha aho'i mai na'i kae bwera i Galili.

³² Ma ra'i sae rau waa mai sae na pwarongo ma ai'a hadahada goro. Marau ha'angonia wetewete a Jisas do 'ai karohia maai goro aho'i.

³³ Mia Jisas 'a waia beira'i saesi baaniraaui mwani sae maagu siwi siri suri'i karingana'i saesi. Ma ngisuhiai kaka'una maagu karohiai meameanai saesi 'inia'i kaka'una.

³⁴ 'A wana ara'ai aro ma osimaro ma o'ani, "Efata!" Mana 'ana 'ado'ado i ha'ateesi, "Ai'a pono'a!"

³⁵ Na'i 'ohasi saesi 'a rongorongo ma ha-ha'atee goro'a aho'i.

³⁶ 'Ia Jisas 'a ha'a-aburaaui wetewetei sae do rai abui maaniai ha'agorohia anai saesi. Rei'uaa na towai ha'a-aburaaui, miraugu here raorao 'anai taroha'inia hura'a.

³⁷ 'Ira hakoi nei rau rongoa, rau heimwaota'i di'u marau o'ani, "Romwane, maho na haa'i a mo'osi ra goro di'u! 'A ha'agorohiraaui aho'i ro'u i pwarongo mana baanguu."

8

Jisas 'A Hanganiai Hai Merui Sae

(Matiu 15:32-39)

¹ Tara'i dangi ahora, ra ragoi sae narau goni ro'u mai beia Jisas. 'Ari wou ma na'i 'oha na rau ai'a to'o mahoingau'a, 'ia Jisas 'agu soiraaui mai rongoiusuri ana'i ma o'ani 'iniraaui,

² "'Au ta'ahiraaui sae 'ini, 'inia 'e oru dangi'a narau awa be'inigaau ma na'i 'ohanisi raugu ai'a to'o mahoingau 'anai ngau.

³ Ma'au gasi ha'a-taariraaui 'ari suri'i 'omaa adaa'i ha'i hioro, maraugu dionga'i moi suri tara. 'Inia tara'i nei 'iniraaui rau boi ha'atau di'u."

‡ **7:27** 7:27 Ni 'ado'ado 'anai tatarani 'a o'ani: 'Iraaui gare ra ura 'iniraaui Jiu. Mana misu 'a ura 'iniraaui nei ra ai'a Jiu. 'Ia Jisas 'a 'unua do 'a raba 'a'auhiraau moi Jiu. 'A ai'a arari do 'ai nugasiraaui Jiu mai 'a'auhiraau nei ra ai'a Jiu.

4 Me 'iraaui rongoiusuri ana'i rau o'ani, "'Igaau gau awa na'i dora mangasara. 'A bwa'i dora na gaigui sadoia ta mahoingau nai arariraau mwane sae 'ini."

5 'Ia Jisas 'a songa'iniraaui o'ani, "'E siha huai breidi na bei'amou?" Marau aramia o'ani, "'E biu."

6 'Ia Jisas 'agu 'unua tanaraau sae 'anai heinagu dio na'i ano ma dauai biu hua breidi. Mana 'oha na ha'atee ha'agorohia hako a God 'ini'i, 'a uubi'i ma haa'i tanaraau rongoiusuri ana'i 'anai hatora'ini'i tanaraau sae.

7 Ma ra'i gere ii'a ro'u narau to'ora'i. Mia Jisas 'a ha'atee ha'agorohia God 'ini'i ma haa'i tanaraau rongoiusuri 'anai hatora'ini'i ro'u tanaraau sae.

8-9 Mana nei ra ngau 'a 'onaai hai merui sae. Rau ngau marau masu goro. Na'i muri raugu ha'ahonuai biu abira raha 'ini'i dorai mahoingau ra ngau tahi'i. Naasi mia Jisas 'agu ha'a-taariraaui aho'i sae.

10 Ma ta'e ara'a na'i ora beiraaui rongoiusuri ana'i marau 'ari na'i distrik ra 'unua 'inia Dalmanuta.

*'Iraaui Farisei Ra Ha'angoniai Ha'abu'oahu
(Matiu 16:1-4)*

11 Ra'i Farisei ra boi beia Jisas marau taraawa'a heiraeraesi beia 'inia rau raba ha'imaania. Rau 'unua tanaa Jisas 'anai haa ta ha'abu'oahu 'anai ha'ata'inia tanaraau 'ona 'ia God ha'a-momori na haa tanaai mena.

12 'Ia Jisas 'a osimaro ma o'ani, "'Ini 'uaana na 'imoou mou raba re'ia ta ha'abu'oahu 'anai ha'ata'inia do'inau 'au boi baania God? Wai 'unua ha'a-momori tana'amou, 'a bwa'i ha'abu'oahu na wai haa tana'amou!"

13 Ma hano baaniraaui, 'a ta'e ara'a aho'i na'i ora marau tahamora aho'i 'ari nata batarau kae bwera i Galili.

Jisas 'A Ha'abasuraui Rongoiusuri Ana'i

*Do Rai Abui Heitohe 'Onairaaui Farisei
(Matiu 16:5-12)*

14 'Oha rau 'ari wou mau suriai wai, 'iraaui rongoiusuri raugu 'iraraa do rau kaku'aa'i waa'i tadaa'i breidi. 'E ta'i huai breidi moi na rau to'oraa.

15 'Ia Jisas 'a ha'abasuraui o'ani, "'Moi 'ome'ome goro mamoi 'omesuri'amou baaniai draebam adaui Farisei mea Mwaeraha Herod."

16 'Iraaui rongoiusuri rau maania haariraaui mahosi marau o'ani, "'Gau ai'a to'o breidi na 'unua o'asi 'iniasi."

17 'Ia Jisas 'a 'iraraai taha na rau maania ma ha'atee o'ani 'iniraaui, "'A 'ua mou hadanga'inia 'inia ai'a to'o breidi amou? Mou ai'a aidangisia mau? Mou ai'a aidangisia 'inia ra baabau tahingamoo'!"

18-19 Mou to'o maa, ma 'ua namou ai'a 'ome 'iraraa 'inia? Ma mou to'o karinga, ma 'ua namou ai'a rongo 'iraraa 'inia? 'A 'ua? Mou kaku'aa'a i 'oha nau uubiai rima huai breidi tanaai rima merui sae ani? 'E siha abira na mou ha'ahonua 'ini'i dora na rau ngau tahi'i?"

Marau aramia o'ani, "'E ta'i tangahuru mana rua."

20 Maagu songa'iniraaui ro'u o'ani, "'Ma na'i 'oha nau uubiai biu huai breidi tanaai hai merui sae ani, 'e siha abira na mou ha'ahonua 'ini'i dora na rau ngau tahi'i?"

Marau aramia o'ani, "'E biu abira."

21 Ma o'ani 'iniraaui, "'A 'ua? Mou ai'a aidangisia ro'u mau? Hoita, moi wai'ado'ado goro 'ini'i maho nau 'unu'i 'isi!"

Jisas 'A Ha'agorohia Aho'i Sae

Na Kuru Na'i Betsaeda

22 Rau ataha mai na'i Betsaeda, ma ra'i sae rau waia mai sae na kuru. Marau bongahinia Jisas do'ai karohiai saesi mai 'ome'ome aho'i.

²³ 'Ia Jisas 'a dau na'i rimana ma urua hura'a baaniai 'omaasi. Ma ngisuhi'i maanai saesi, 'a karohi'i ma o'ani 'inia, "'A 'ua? Rai maho na'o re'i'i?"

²⁴ Mana saesi 'a wana ara'a ma o'ani, "'Au re'i'i sae maragu 'ome 'onaai'i hasi'ei nara hahano hairiu."

²⁵ 'Ia Jisas 'a karohi'i ro'u i maanai saesi. Mana saesi 'a wanawana wetewete. Ma na'i 'ohasi, 'agu 'ome'ome aho'i ma matai 'ome 'irara'i goro hako aho'i mwani maho.

²⁶ Mia Jisas 'a ha'atee wetewete tanaa o'ani, "'Oi 'ari odo-odo aho'i ruma amua. 'Oigu abui siri aho'i'a i 'omaa 'anai to'o taroha'inia 'ari taha na to'o tana'o."

Pita 'A Ha'arangasia Hura'a

Do 'Ia Jisas Na Ha'atahi

(Matiu 16:13-20; Luk 9:18-21)

²⁷ Mia Jisas mana rongoiusuri ana'i rau 'ari suri'i gere 'omaa gaarangi'ai 'omaa raha i Sisaria Pilipae. 'Oha rau 'ari wou mau suriai tara, 'ia Jisas 'agu songa'iniraaui o'ani, "'A 'ua? 'Iraaui sae, rau 'unua do 'inau 'iatei?"

²⁸ Marau ha'atee o'ani, "'Rau 'unua do i'oe 'e nei na mae na suruta'e aho'i. Tara'i nei ra 'unua do i'oe a Jon Bwareomaea. Ma tara'i nei ra 'unua do i'oe naasi a Rarabea Elaija ma tara'i nei ro'u ra 'unua do i'oe 'e Rarabea mau mai na'i na'o."

²⁹ Mia Jisas 'a o'ani 'iniraaui, "'Mi'amou mou 'adoma'inia do 'inau 'iatei?" Mia Pita 'a o'ani, "'Toe naasi Ha'atahi na 'ia God na duruduru 'inia 'anai ha'ataaria mai."

³⁰ Mia Jisas 'a o'ani, "'Moi abui 'unua'a ro'u tanaa ta sae do 'inau a tei!"

Jisas 'A Maania Hura'ai Rongomaata'i

Mana Mae Nai Haa

(Matiu 16:21-28; Luk 9:22-27)

³¹ Na'i 'ohasi 'ia Jisas 'a taraawa'a ha'ausuriraaui ro'u i rongoiusuri ana'i. 'A o'ani, "'Inau, i Gare'i Inoni, rai ha'a-rongomaata'iau di'u. 'Iraaui Na'ohadaa'i Piriisi miraaui Ha'ausuri 'anai Ringe ana'ia Moses ma tara'i saemaua ro'u rai 'utai'au marai ha'amaesiau. Ma 'e rua dangi nai hako mana'i oruna, waigu suruta'e aho'i."

³² 'Oha 'ia Jisas 'a mamaani tanaraau, ai'a girua ta ta'i maho baaniraaui.

Mia Pita 'a waia beira'i a Jisas ma ha'atee ha'abwarasia.

³³ Mia Jisas 'a rihota'i ma wanasiraaui rongoiusuri ana'i magu ha'atee wetewete o'ani tanaa Pita, "'Saetan, hora wou baaniau! Maho na'o 'unu'i 'isi, ai'a 'ado'adona God, ma'ata rai 'ado'ado ni noni moi!"

³⁴ 'Ia Jisas 'a 'unuraaui mai sae rago miraaui rongoiusuri ana'i ma ha'atee o'ani 'iniraaui, "'Iatei na raba ha'i rongoiusuri agua, 'ai nugasiai hei'irisina haaria, 'ai mwa'emwa'e 'anai suru'iai dadaahoro ana,* maai suriau.

³⁵ 'Ia tei na raba dau baabau na'i tahingana na'i marewanani, 'a bwa'i to'oraai huunai tahi. Me 'ia tei na mwa'emwa'e 'anai ha'a-ai'aai tahingana 'injai suriau ana mana Taroha Goro, 'ai to'oraa nana i tahi.

³⁶ 'A 'ua? 'Onaa tanei 'ai to'ora'i hako nana i mwani maho na'i marewana, ma bwa'i daua nana i huunai tahi, mareho 'isi rai 'a'auhia? 'A bwa'i!

³⁷ 'Onaa 'ai mae, 'a bwa'i maho 'isi naigu haua 'anai horia aho'i tahingana.

* **8:34 Mwa'emwa'e 'anai suru'iai dadaahoro:** Ni 'ado'ado 'ana 'a o'ani. 'Onaa 'o mwa'emwa'e 'anai suru'iai dadaahoro amua, 'a minimua do 'o mwa'emwa'e 'anai rongomaata'i ma'ua mae 'onaai rongoiusuri ana Kraest. 'Inia na'i madoraa ana Jisas, 'iraaui sae nara suru'iai dadaahoro, ra hano 'anai mae.

38 “Inau na Garei Inoni, wai boi aho'i mau ta 'oha beiraaui enjel ana'ia God beiai mena mana raraha na ta'isada beia amagu. Mana 'oha wai boi, waigui 'utairaaui nei ra ora-ora'a nara ninimata'iniau na'i 'ohani. Ma wai 'utairaaui ro'u i nei ra ninimata'i taroha'ini'i ha'atee agu'i.”

9

1 Mia Jisas 'a ha'atee o'ani ro'u 'iniraaui, “Wai 'unua ha'a-momori tana'amou: Tara'i nei 'ini'amou 'ini moi awa tari mau 'anai 'omesia God 'oha nai marungiraaui noni beiai mena.”

Jisas 'A Aho'ita'i Raraha (*Matiu 17:1-13; Luk 9:28-36*)

2 'E ono dangi na hako, 'ia Jisas 'a waia Pita, Jems, mea Jon, 'anai ta'eha haariraaui na'i hunganai hungahunga ahaaha. 'Oha narau awa 'isi, raugu 'asu'a i waira orusi mana 'omehana Jisas 'a orisi'a,

3 mana to'oni ana 'a mamaahui wadowado.

4 Na'i 'ohasi, rau 'omesiai ha'amaranga ana Moses mea Elaija, mararu mamaani beia Jisas.

5 Mia Pita 'a ha'atee o'ani 'inia Jisas, “Saemaua, 'a goro nagau awa 'ini! Mei ha'a-urasia ta oru hare, 'e ta'i tana'o, 'e ta'i tanaa Moses, ma ta ta'i tanaa Elaija.”

6 'Ia Pita 'agu to'o ha'atee o'asi moi, suria rau kae mamaa'u di'u.

7 Raugu 'ome ma'e rorodo na dio huniraaui ma marumarusiraaui. Na'i 'ohasi rau rongoai ringe na ao mai baaniai rorodosi, 'a o'ani, “Naani garegu nau ta'ahia. Moi rongosuria!”

8 Raugu 'ome'ome hairiu, mia Moses mea Elaija raugu ai'a 'omesiraru'a, 'iia moia Jisas naraugu re'ia.

9 'Oha 'ia Jisas mana oru rongoiusuri ana rau dio mau na'i hungahunga, 'ia Jisas 'a ha'atee wetewete tanaraau. 'A o'ani, “Moi abu maani'i tanaa ta sae i mareho na mou re'i'i, tari 'oha 'inau, na Garei Inoni, wai suruta'e aho'i baaniai mae.”

10 Miraaui araisuriai taha na 'unu'i tanaraau. Ma'ata ra kakui ahudaa'i 'inia 'ado'ado 'anai suruta'e aho'i. Maraugu taraawa'a heisonga'i hairiu 'inia.

11 Rau songa'inia o'ani a Jisas, “'A 'ua na 'iraaui Ha'ausuri 'anai Ringe ana'ia Moses rau 'unua 'inia do'ia Elaija 'ai boi na'i na'o, maigui boi Ha'atahi?”

12-13 Ma aramiraaui o'ani, “'A ha'a-momori. 'Ia Elaija 'ai boi na'i na'o 'anai ha'aagauraaui mwani noni 'anai boi anai Ha'atahi. Ma'ata 'inau wai 'unua tana'amou. 'Ia Elaija 'a bwane boi'a, miraaui sae rau haa'i here nara ai'a goro tanaa 'onaai 'unua ada na'i Usu-usu Maea. 'Onaa na Usu-usu Maea 'a 'unua o'asi, moi wai'ado'ado goro 'ini'i maho na wai 'unu'ini. 'A 'unua ro'u do 'inau, na Garei Inoni, wai rongomaata'i di'u marai 'utaiu.”

Jisas 'A Ha'agorohia Aho'i Garemwane

Na Adaro 'A Bwaunia (*Matiu 17:14-21; Luk 9:37-43a*)

14 'Oha 'ia Jisas mana oru rongoiusuri rau taha dio mai baaniai hungahunga, rau 'omesiai kae ruruhai noni ra garigariraaui rongoiusuri. Ma tara'i nei 'iniraaui Ha'ausuri 'anai Ringe ana'ia Moses ra heitoheitohe be'iniraaui rongoiusuri.

15 'Oha 'iraaui sae 'isi rau re'ia Jisas, rau heimwaota'i di'u marau 'eba 'anai heito'oi beia.

16 'Ia Jisas 'agu songa'iniraaui rongoiusuri ana'i o'ani, "E taha mou heitohetohe-nga'inia?"

17 Ma'e ta'i nei 'iniraaui na'i ruruhasi 'a aramia o'ani, "Ha'ausuri, 'au waia mai tana'o i garemwane agua na adaro 'a bwaunia maagu ai'a ha-ha'atee'a.

18 'Oha na adaro 'a bwaunia, 'a 'onaai sae na manumanu'a. 'A ha'a-ngadingadi'i rihona ma ngadia hako'i abena. 'Au 'unua tanaraaui rongoiusuri amu'i dorai taariai adaro baania maraugu bwarai taaria hura'a."

19 Naasi mia Jisas 'a o'ani 'iniraaui, "'T'amou inoni 'ohani, mou bwarai hinihini! 'Ai orea he'uai maratanoa nawai huaa bei'amou, ma'ua wai awa orea tari he'ua bei'amou mamoi'gu hinihini? Mou waia mai garesi!"

20 Marau waia 'ari tanaa Jisas.

Ma na'i 'oha na adaro 'a re'ia Jisas 'a 'idira'iniai garesi, ma ahoda dioi ano. Ma buriburi 'ari na'i ano mana hutohuto ra hura'a na'i ngoona.

21 Mia Jisas 'a songa'iniai amanai garesi, "'A orea he'ua'a i bwaunia na huaa i adaro?"

Mia amanai garesi 'a aramia o'ani, "'Taraawa'a mau mai 'oha na kekerei'a.

22 Rago'a i 'oha na adarosi 'a gaasia ara'a na'i 'eu mana ha'adodohia na'i wai 'anai ha'amaesia. 'Onaa 'ai mwada'u, Araha, 'oi 'a'auhi'ameu."

23 Mia Jisas 'a o'ani 'inia, "Ni 'uaana na'o 'unua 'inia dona "Onaa 'ai mwada'u?" Mwane maho rai mwada'u tanaai nei na hinihinia God!"

24 Ma na'i mau 'ohasi, na amanai garesi 'a ha'atee raha ma o'ani, "'Inau 'au hinihini moi, maagu ai'a raha i hinihinigu. 'Oi 'a'auhiau mai wetewete i hinihinigu!"

25 'Ia Jisas 'a 'ome 'irararaaui sae ra taraawa'a ruru mai beia, maagu ha'atee hurasi o'ani tanaai adaro, "Adaro na'o ha'apwarongo'i mo'o ha'abanguu'i sae, 'oi hura'a baaniai garenai ma'oi abui siri'a ro'u beia ta'oha!"

26 Mana adaro 'a awara raha ma 'idira'inia ha'atai garesi maagu hura'a baania. 'Iraaui sae ra 'unua'a dona garesi 'a mae'a 'inia 'a dadao hatara'i moi.

27 Mia Jisas 'a dau wou na'i rimana ma ha'a-suruta'ea maagu ura ara'a.

28 Na'i murina, 'ia Jisas mana rongoiusuri ana'i rau 'ari aho'i ruma. Ma na'i 'oha rau awa haariraaui raugu songa'inia Jisas o'ani, "'A 'ua na bwara 'inia tana'ameu 'anai taaria hura'a i adaro ani?"

29 Mia Jisas 'a o'ani 'iniraaui, "Ha'arahesi moi na matai taari'i hura'a i adaro ta'ai o'asi."

Jisas 'A Maania Ro'u i Mae Nai Haa

(Matiu 17:22-23; Luk 9:43b-45)

30 'Ia Jisas miraaui rongoiusuri ana'i rau hano baaniai dorasi marau 'ari daara'i suri'i 'omaa na'i Galili. 'Ia Jisas 'a ai'a rabasia tanei nai 'iraraai dora na awa iei,

31 'inia 'a ha'ausuriraaui rongoiusuri ana'i 'iniai taha na rai to'o tanaa. 'A ha'ausuriraaui o'ani, "'E nei nai usuha'iniaui i Gare'i Inoni tanaraaui nei narau ha'ima'e beiau marai ha'amaesiaui. Ma 'e rua dangi nai hako mana'i oruna, wai suruta'e aho'i baaniai mae."

32 Miraaui ai'a 'adoma'i tarihanai 'ado'ado 'anai mamaani ana, marau maguguta'i songa'inia ro'u 'anai ha'a-aidangisiraaui 'inia.

'Iatei Nai Ororiu?

(Matiu 18:1-5; Luk 9:46-48)

33 Rau taha mai 'omaai Kapaniam ma na'i 'oha rau siri na'i ruma, 'ia Jisas 'a songa'iniraaui rongoiusuri ana'i o'ani, "'E taha mou hadanga'inia ani, 'oha gau boi suriai tara?"

³⁴ Miraau ai'a aramia, 'inia na'i 'oha rau boi suriai tara, rau hadanga'inia tei 'iniraau na ororiu di'u.

³⁵ 'Ia Jisas 'a heinagu auru ma 'unuraau mai gaarangi rongoiusuri ana'i ma ha'atee o'ani 'iniraau, "'Ia tei na raba ha'i sae ororiu 'ini'amou, 'ai ha'a-anoanoa mai mwa'emwa'e 'anai 'a'auhia namoiwou tanei 'ini'amou."

³⁶ Mia Jisas 'a waia mai gare kekerei, 'a ha'a-urasia na'i maadaau hako ma abea maagu ha'atee o'ani,

³⁷ "'Onaa 'o ha'amaotoa ta nei 'onaai gareni suria 'o ta'ahiau, i'oe 'o ha'amaotoau ro'u. Ma 'onaa 'o ha'amaotoau, 'o ai'a ha'amaotoau moi, mia ro'ua God na ha'ataariau mai."

'Tatei Na Aba Beia Jisas?

(Luk 9:49-50)

³⁸ Mia Jon 'a ha'atee o'ani 'inia, "Ha'ausuri. Meu re'iai sae na taari'i adaro hura'a baani'i sae 'inia atamu mameu ha'aabua, 'inia 'ia ai'a ta'i 'inia ruruha agaau."

³⁹ Mia Jisas 'a o'ani 'iniraau, "Moi abui ha'aabua. 'Onaa 'e nei nai haa'i ha'abu'oahu 'inia atagu, 'agu bwa'i 'asu'ani ha'atee ha'ata'iaiu moi.

⁴⁰ 'Inia 'ia tei na ai'a ura bwarasigaau, 'iiasi 'e aba 'inia ruruha agaau.

⁴¹ Ha'amomori! Wai 'unua tana'amou: 'Ia tei na 'a'auhi'amou 'inia ta gere maho, 'onaai ha'a-gonohi'amou, 'inia 'a 'iraraa do 'imoou mou ta'ahiau, 'ai daua nana i heitahari."

'A Ororiu Di'u Do Gai Dauai Tahi Tarau

(Matiu 18:6-9; Luk 17:1-2)

⁴² Mia Jisas 'a ha'atee o'ani ro'u, "'Onaa 'ia tei sae nai raba ha'atehaa ta nei 'iniraau nei kekerei 'ini narau hinihiniau, 'a goro do ra ga'i ho'osia ta kae hau na'i 'u'una marai hura'a ha'adodohia na'i asi rodo. 'Inia na ha'a-mama'ai na 'ia God nai haua tanaai nei nai ha'atehaa tanei 'iniraau, 'ai ta'aa di'u ro'u wou.

⁴³⁻⁴⁴ Hoita, 'onaa na rimamu nai haai maho na'o ora-ora'a 'inia, 'oi horo gaasinga'inia. 'O gasi to'oraai rua rimamu ma'ogui siri na'i dora-ni-rongomaata'i. Na'i dorasi na uro ra bwarai mae mana 'eu 'a bwarai kuru. 'A goro baania do'oi dauai tahi tarau beia moi ta'i rima.

⁴⁵⁻⁴⁶ Ma 'onaa na uwamu nai haai maho na'o ora-ora'a 'inia, 'oi horo gaasinga'inia. 'O gasi to'oraai rua uwamu maraigui gaasi'o na'i dora-ni-rongomaata'i. Na'i dorasi na uro ra bwarai mae mana 'eu 'a bwarai kuru. 'A goro baania do'oi dauai tahi tarau beia moi ta'i uwa.

⁴⁷⁻⁴⁸ Ma 'onaa na maamu nai haai maho na'o ora-ora'a 'inia, 'oi suki gaasia hura'a. 'O gasi to'oraai rua maamu ma ragui gaasi'o na'i dora-ni-rongomaata'i. Na'i dorasi na uro ra bwarai mae mana 'eu 'a bwarai kuru. 'A goro i awa tarau na'i heimarungi ana God beia moi ta'i maa baaniai siri na'i dora-ni-rongomaata'i beiai rua maa hako.

⁴⁹ "Naasi, 'ia God 'ai ha'ausuriraau sae ana'i 'ini'i rongomaata'i nara siri suri'i na'i marewana. Mia God 'ai ha'a-mama'airaau nei nara ai'a suria na'i 'eu na bwa'i kuru'a ro'u ta 'oha.

⁵⁰ "'Io, solt 'a goro 'anai ha'angaugoroai mahoingau. Me 'onaa 'aigu ai'aa i asi'ahana, ma naasi 'agu bwa'i here'a ro'u naraigui haua 'anai ha'a-asi'aa ro'u. 'A o'asi ro'u, 'onaa mou awa heihoa na'i tahingamoo'i 'a 'onaai solt na ai'aa gorohana. Naasi moi awa hagu goni goro!"

10

Haigaasi Na'i Ha'iwai

(Matiu 19:1-12; Luk 16:18)

¹ Mia Jisas mana rongoiusuri ana'i rau hano baaniai Kapaniam. Rau ataha wou na'i Provensi Jiudea marau 'ari 'anai nata batarau wai Jodan. Ma ra rago ro'u i sae nara boi beia Jisas, maagu ha'ausuriraa ro'u 'onaai bwane hahaua ana.

² Tara'i Farisei ra boi beia Jisas, 'inia rau raba ha'imaania 'onaa na heiarani ana 'a ta'isada beiai Ringe ana'ia Moses. Marau songa'inia o'ani, "O'i 'unua tana'ameu. 'A 'ua? Na Ringe ana'ia Moses ra ha'awatea moi dona sae 'ai matai gaasiai urao ana?"

³ Mia Jisas 'a aramiraa ro'u 'iniai heisonga'i. 'A o'ani, "E taha na ringeringe ana Moses 'a 'unua 'iniai haigaasi?"

⁴ Miraa o'ani 'inia, "Ia Moses 'a ha'awatea moi sae ha'iwai 'anai gaasiai urao ana, 'onaa 'ai haua ga'u na'i na'o ta usu-usu ni haigaasi."*

⁵ Mia Jisas 'a o'ani, "Ia Moses 'a haua tana'amoui ringeringesi suria mou rongoasa mamou ai'a raba araisuriai Ha'atora ana God.

⁶ Na Usu-usu Maea 'a o'ani, "Oha 'ia God 'a ha'apwa'araai marewana, 'a ha'apwa'araai mwane mana urao.†

⁷ Na tarana naasi, na mwane 'ai nugasia amana mea inana maai hasi beiai urao ana,

⁸ mararui ha'i ta'i abe. Naasi, 'irarua rarugu ai'a 'onaia'a i rua abe, ma'ata 'e ta'i abe moi.‡

⁹ Na tarana naasi, na noni 'ai abui hoaii taha na 'ia God na ho'ogonia."

¹⁰ 'Ia Jisas mana rongoiusuri ana'i rau aho'i 'ari ruma. Miraaui rongoiusuri rau songa'inia ro'ua Jisas 'ini'i 'ado'ado 'ada'i maho 'isi.

¹¹ Mia o'ani 'iniraaui, "Onaa ta mwane nai gaasiai urao ana ma waina ro'u i urao he'ete'i, 'iia 'a taritari'a baaniai urao ana.

¹² Ma ro'u, 'onaa 'e urao na gaasiai mwane ana ma waina ro'u i mwane he'ete'i, 'iia 'a taritari'a ro'u baaniai mwane ana."

*Jisas 'A Ha'agorohirai Gare Kekerei
(Matiu 19:13-15; Luk 18:15-17)*

¹³ Ra'i sae ra waa'i mai gare tanaa Jisas do'ai karohiraaui maai ha'atee ha'agorohiraaui. Me 'iraaui rongoiusuri ana'i rau ha'a-aburaaui sae 'isi.

¹⁴ 'Oha 'ia Jisas 'a 'iraraa o'asi, 'a taesu'a 'adaui rongoiusuri ana'i ma o'ani 'iniraaui, "Moi abui ha'a-bwarasiraaui. Moi wateraaui gare marai boi beiau. 'Inia 'iraaui nei ra 'onaairaaui, naasi nei nara arari 'anai siri na'i heimarungi ana God.

¹⁵ 'Inau wai 'unua ha'a-momori tana'amou: 'Ia tei na bwa'i 'u'uria God 'onaai gare, 'a bwa'i awa bahainai heimarungi ana God."

¹⁶ Mia Jisas 'a wairaaui mai gare beia ma aberaaui. 'A nugaai rimana na'i hungadaui ma ha'atee ha'agorohiraaui.

*'E Sae Na Toto'ora
(Matiu 19:16-30; Luk 18:18-30)*

¹⁷ 'Oha na taraawa'a hano ro'ua Jisas mana rongoiusuri ana'i, 'e sae na 'eba mai ma topira'i ruru tanaa Jisas ma o'ani, "Ha'ausuri! I'oe 'e sae goro? 'E taha nawai haua nawai daua 'inia i tahi tarau?"

¹⁸ 'Ia Jisas 'a aramia o'ani, "Ni 'uaana na'o 'unua 'inia do 'inau 'au goro? Ai'a tanei do 'ai goro, me 'iia moi a God.

¹⁹ I'oe 'o bwane aidangisi'i'a i Ha'atora: Abui ngahu ha'amaesia sae; abui taritari'a baaniai urao amua ma'ua mwane amua; abui beri; abui

* 10:4 10:4 Diutronomi 24:1 † 10:6 10:6 Jenesis 1:27; 5:2 ‡ 10:8 10:7-8 Jenesis 2:24

pwari'i na'i kooti; abui ha'a-bweubweu'aai sae 'inia maho na to'oraa; ma'oi ha'ahoua amamu mea inamu."§

²⁰ Mana saesi 'a o'ani, "Ha'ausuri, na mwane mareho 'isi 'au bwane ha'isuri'i mau mai na'i 'oha nau kekerei."

²¹ Mia Jisas 'a wana to'obuu 'inia ma ta'ahia maagu o'ani, "E ta'i mareho na i'oe 'o ai'a haua mau. 'Oi 'ari ma'oi raonga'ini'i hako mareho na'o to'ora'i ma'oi hauai ha'a tanaraaui sae pohara. 'Onaa 'oi haua o'asi, 'oi toto'ora na'i aro. Na'i muri 'oigui boi suriau."

²² 'Oha na rongoa, maagu 'ome ahutotou'a. Ma hano'a ha'i ahutotou, 'inia 'iia 'e sae na toto'ora di'u.

²³ 'Ia Jisas 'a wanasiraaui hairiu i sae ma o'ani 'iniraau rongoiusuri ana'i, "Ai bwara di'u tanaraaui sae ra toto'ora 'anai siri na'i heimarungi ana God."

²⁴ 'Iraau rongoiusuri ana'i rau heimwaota'i di'u 'ini'i maho na 'unu'isi. Mia Jisas 'a o'ani ro'u 'iniraau, "Mwani sae agu'i, 'a bwara di'u 'anai siri na'i heimarungi ana God!

²⁵ 'A 'ua? I mwamwaa nara 'unua 'inia kamel 'a matai siri daara'i na'i maanai nira? 'A bwara! Ma bwara di'u ro'u wou tanaa nei na toto'ora 'anai siri na'i heimarungi ana God."

²⁶ Na'i 'oha rau rongoa o'asi rongoiusuri, raugu heimwaota'i di'u marau ha'atee o'ani, "Romwane, 'onaa na o'asi, 'a 'ome 'onaa do 'a bwa'i ta sae nai dauai tahi tarau!"

²⁷ Mia Jisas 'a wanasiraaui ma o'ani, "Bei'ai noni 'a bwarai daua haariraaui tahi tarau, mei beia God 'a ai'a maho i bwara tanaa, 'inia tanaa God mwane maho ra mwada'u moi."

²⁸ Mia Pita 'a o'ani 'inia, "Ome! 'Tameu meu nugasi'i hako mwane maho amee'i mameu suri'o!"

²⁹⁻³⁰ Mia Jisas 'a o'ani 'iniraau, "Au 'iraraana. 'Inau wai 'unua ha'a-momori tana'amou: 'Ia tei na nugasi'i mwane mareho ana'i 'inia 'a suriau mana Taroha Goro, 'iia 'ai dau'i mwani mareho di'u'i mareho na nugasi'i 'isi. 'Onaa 'ai nugasiai ruma ana ma'ua do'orana'i, asina'i, amana, inana, gare ana'i ma'u'ai dorai ano ana, 'ia God 'ai huunai ha'agorohia. Ma na'i marewana 'ai ha'arago'i tanaa mwani maho 'isi. Me 'iraau sae rai ha'a-mama'aia ro'u! Ma'ata na'i madoraa nai boi mau, 'aigui daua nana i tahi tarau.

³¹ Ma naasi, 'a ragoi nei nara ororiu na'i 'ohani, rai ha'i sae haari'i moi. Ma ragoi nei ra ai'a ororiu na'i 'ohani, 'ia God 'ai ha'a-ororiu'araau."

Orunai 'Oha Na 'Ta Jisas

'A Hadanga'iniai Mae Nai Haua

(Matiu 20:17-19; Luk 18:31-34)

³² 'Oha rau suriai tara na ta'eha 'anai Jerusalem, 'ia Jisas 'a hano na'i na'o 'iniraau rongoiusuri ana'i. 'Iraau rongoiusuri ana'i rau heimwaota'i di'u 'inia, miraau sae ra haisuri ra maaa'u. Jisas 'a wairaaui haariraaui ro'u i rongoiusuri ana'i ma maani'i tanaraaui taha na rai to'o mau tanaa.

³³ 'A o'ani 'iniraau, "Moi bahurongo goro. Na'i 'ohanisi gau hahano'a 'anai Jerusalem. Maagu na'i 'isi, 'e nei nai usuha'iniau i Gare'i Inoni tanaraaui Na'ohadaa'i Piriisi mana Ha'ausuri 'anai Ringe ana'ia Moses. Rai hiiriau 'anai ha'amaesiaui marai usuha'iniau ro'u tanaraaui nei ra ai'a Jiu.

³⁴ Rai haikou 'iniau marai ngisuai abegu marai roro'hoau maraigu ngahu ha'amaesiaui. Ma'ata 'e rua dangi nai hako mana'i oruna, wai suruta'e aho'i baaniai mae."

§ 10:19 10:19 Eksodas 20:12-16; Diutronomi 5:16-20

*Na Hei'irisina Jems Mea Jon
(Matiu 20:20-28)*

³⁵ 'Ia Jems mea Jon rua garena Sebedi, raru boi beia Jisas ma raru ha'atee o'ani 'inia, "Ha'ausuri, 'e ta'i maho na miri 'irisia do'oi haua tana'amiria."

³⁶ Mia Jisas 'a songa'inirarua o'ani, "'E taha muru rabasia?"

³⁷ Ma rarugu aramia o'ani, "Na'i madoraa na'oi mwaeraha ma'oi marungiraaui noni, miri raba heimarungi bei'o. Tanei nai heinagu na'i dora ni mwaeraha na'i aba odomu ma tanei na'i maha."

³⁸ Mia Jisas 'a o'ani 'ini'ararua, "'I'amurua muru ai'a aidangisiai maho na muru ha'angoniasi. 'A 'ua? Muru ga'i siri moi na'i rongomaata'i na 'inau wai siri iei? Ma muru ga'i matai mae moi 'onaai mae na wai haua?"

³⁹ Miraru aramia Jisas o'ani, "Miri ga'i haa moi!"

Mia Jisas 'a o'ani ro'u, "Ha'amomori di'u. Murui rongomaata'i ha'amomori 'onaai rongomaata'i na 'inau wai haa ma murui mae moi 'onaai mae na wai haua.

⁴⁰ Ma'ata 'inau 'au bwa'i sigihia 'iatei nai heinagu na'i odogu ma'ua na'i mahagu. 'Iia moi a God nai 'unua 'iatei nai heinagu beiau. 'Inia 'iia 'a bwane 'ome sigihiraaui."

⁴¹ 'Oha 'iraaui nata tangahurui rongoiusuri ana'ia Jisas rau rongoai mahosi, rau taesu'a di'u 'ana Jems mea Jon.

⁴² Mia Jisas 'a 'unuraa hako mai beia, ma o'ani 'iniraaui, "Mou bwani 'iraraa doni mwaeraha mana na'otara adaa'i sae ra ai'a Jiu, rau ha'aba'o 'inia heimarungi narau haua ma goro adaaui i haa'i mwani heiatenga'i tanaraaui noni.

⁴³ Ma'ata 'ai abui o'asi bei'amou. 'Ia tei nai raba na'otara tana'amou, 'iia 'ai ha'i sae tatau'aro tana'amou.

⁴⁴ Mia tei na raba bwauodo, 'ai ha'i slev tana'amou hako.

⁴⁵ Moi ha'isuriai herehere agua. 'Inaui Gare'i Inoni 'au ai'a boi do 'irai sae rai tau'aro tanaau. Me 'inau 'au boi do 'inau wai tau'aro tanaraau, ma 'ana'i wateai tahingagu 'ana'i ha'atahiraaui baaniai ora-ora'a."

*Jisas 'A Ha'a-wanawanaa Aho'i a Batimeas
(Matiu 20:29-34; Luk 18:35-43)*

⁴⁶ Jisas mana rongoiusuri ana'i rau tahai 'omaai Jeriko. Ma na'i muri, 'oha rau hura'a baaniai 'omaasi, 'a ragoi sae ra suriraaui. Ma'e sae na kuru na atana 'ia Batimeas 'a heheinagu na'i bobonai tara, 'iiasi 'e garena Timias. 'Iia 'a heinagu 'isi'a 'ana'i ha'angoni ha'a beiraaui noni rau tatahahoro na'i tarasi.

⁴⁷ Na'i 'oha na 'iraraa do 'ia Jisas, 'e sae ni Nasaret na boi na'i tarasi, 'agu taraawa'a awara raha o'ani, "Jisas, warowarona Deved. 'Oi arunga ta'ahiau ma'oi 'a'auhiau!"

⁴⁸ Ragoi sae ra 'unua do 'ai papaku, mia awara raha ro'u baaniai na'o, "Jisas, warowarona Deved, 'oi arunga ta'ahiau ma'oi 'a'auhiau!"

⁴⁹ Jisas 'a ura papaku ma o'ani 'iniraaui, "Moi 'unua mai."

Maraugu o'ani 'inia Batimeas, "'Ai abui ta'aabemu. 'Ia Jisas 'a 'unu'o, 'oi ura ara'a!"

⁵⁰ 'Ia Batimeas 'a rege ara'a ma gaasiai to'oni bo-hura'a ana, ma 'ari beia Jisas.

⁵¹ Jisas 'a songa'inia o'ani, "'E taha na'o 'irisia do wai haua tana'o?"

Mia aramia Jisas o'ani, "Ha'ausuri, 'au raba wanawana aho'i!"

⁵² Mia Jisas 'a ha'atee o'ani tanaa, "'Io, na hinihinimu na ha'agorohi'o. 'Oi 'ari'a."

Na'i mau 'ohasi na sae kurusi 'agu wana. Ma hano beia Jisas suria'i tara.

11

Jisas 'A Taha Siri Na'i Jerusalem

(Matiu 21:1-11; Luk 19:28-40; Jon 12:12-19)

¹ 'Oha 'ia Jisas mana rongoiusuri ana'i rau gaarangia wou i Jerusalem, rau 'omesia 'ari 'omaai Betfeis mana Betani gaarangiai hungahungai 'Oliv. Mia Jisas 'a ha'a-taarirarua i rua rongoiusuri 'ana'i 'ari na'o.

² 'A o'ani 'inirarua, "Murui hano mamurui 'ari nai 'omaa 'ariani. Ma na'i 'oha murui taha siri wou, murui re'iai garei dongki nara ho'osia. Na garei dongkisi ai'a ta sae mau nai ta'e na'i hungana. Naasi murui wagasia ma murui waia mai tanaau.

³ Ma 'onaa ta sae nai songa'ini'amurua 'inia tei na 'unua tana'amurua do murui waiwai mwamwaasi, murui o'ani 'inia, "Ia Araha na rabasia ma'ai ha'ataaria aho'i raurau moi mai.' "

⁴ 'Oha raru ataha wou, raru re'iai dongki ra ho'osia na'i bobonai maraaruma. Raru 'ariwou ma raru tahamora wagasia,

⁵ ma ra'i sae nara ura 'isi ra o'ani 'ini'ararua, "Eei! 'A 'ua na muru wagasia 'inia i mwamwaasi?"

⁶ Mararu 'unu'i maho 'ia Jisas 'a 'unu'i tanararua, maraugu watea tanararuai dongki ma raru hano beia.

⁷ 'Oha raru ataha aho'i beia Jisas, raru rahi'i tara'i to'oni bo hura'a adaru'i ma raru nuga'i na'i hunganai mwamwaasi. Mia Jisas 'a heinagu ara'a na'i hungana.

⁸ Ragoi sae ra haa'i bwana bo hura'a adaa'i mara haari'i 'ari suriai tara. Ma tara'i sae ra 'ari mara tabari'i hasi'ei nara hahaa'a mara haari'i hahaa'i na'i tara.

⁹ Mana sae ra na'o mana nei na'i murina Jisas raugu awaawara, rau o'ani, "Ha'a-aneanea God!

Araha God, 'oi ha'agorohia mo'o na'o ha'ataaria mai!

¹⁰ God 'oi ha'agorohia mo'oni na boi 'ana'i mwaeraha agaau

'onaai wauwa ameeu a Deved!

Ha'a-aneanea God na'i aro!"*

¹¹ 'Ia Jisas 'a taha wou i Jerusalem ma siri na'i Ruma Maea ana God ma wanasi'i hako 'ari mwane maho na'i raron. 'Iia ai'a awa orea, ma 'ari'a i Betani beiraau rongoiusuri ana'i, 'inia 'a su'urahi'a.

Jisas 'A Ha'atee Orohuniai Hasi'ei

Nara 'Unua 'Iniai Fig

(Matiu 21:18-19)

¹² 'Oha rau aho'i mai baaniai Betani na'i nata dangi, 'ia Jisas 'a hioro.

¹³ Ma re'ia 'ari urunai hasi'ei ra 'unua 'iniai fig. Rei'uaa na 'iraraa do'a ai'a tari mau i madoraa 'adaau fig 'ana'i hungu, 'a 'ariwou 'ana'i 'ome'ome hua na'iei. 'Inia 'a 'iraraa do na fig 'ai hungu ma'ata'a 'onaa na to'o rawa. Ma na'i 'oha na 'ariwou gaarangi, 'a 'omesia do nai'i moi rawa na re'i'i.

¹⁴ Naasi mia Jisas 'a ha'atee orohuniai hasi'eisi, 'a o'ani, "'Ogu bwa'i hungu'a ro'u ta 'oha!" Miraau rongoiusuri ana'i rau rongo'i hakoi maho na 'unu'isi.

Jisas 'A Taariraau Sae

Baaniai Ruma Maea Ana God

(Matiu 21:12-17; Luk 19:45-48; Jon 2:13-22)

¹⁵ 'Oha rau ataha wou i Jerusalem, 'ia Jisas 'a siriwou na'i dora a'ora na'i maanai Ruma Maea ma taraawa'a taariraau hura'a i sae ra horihori

* **11:10** 11:9-10 Psalm 118:25-26; 148:1

mara raoraonga'i na'iei. 'A rihota'ini'i tebol 'anai ori-orisi ha'a mana baba ni heheinagu adaa'i nei ra raoraonga'i waibora.

¹⁶ Mia Jisas 'a ha'a-abu'i sae nara raba tahahoro bei'i maho na'i kae dora a'ora na'i maanai Ruma Maea.

¹⁷ Maagu ha'ausuriraau sae o'ani, "Ra usua o'ani na'i Usu-usu Maea, 'ia God 'a o'ani, 'Na ruma agua 'e ruma ni ha'arahesi adaaui hakoi mwane noni suriai marewana.' Mi'amou mou ha'i dorani bainihu 'inia nadaui sae beriberi!"†

¹⁸ Miraau na Na'ohadaui Piriisi mana Ha'ausuri 'anai Ringe ana'ia Moses, rau rongo to'oana marau taraawa'a siba herehere 'anai ngahua Jisas. Ma'ata rau magugu ro'u, 'inia ra ragoi sae ra heimwaota'i di'u 'iniai ha'ausuringa'i ana'i.

¹⁹ Ma na'i su'urahi, 'ia Jisas miraui rongoiusuri ana'i raugu hura'a aho'i baaniai Jerusalem.

*Hinihini Mana Ha'arahesi
(Matiu 21:20-22)*

²⁰ 'Oha rau 'ari wou suriai tara na'i haho'oanai nata dangi, rau re'iai hasi'ei na ha'atee orohunia ania Jisas 'a nugu'a.

²¹ Mia Pita 'a hasi 'adoma'i aho'isia ma o'ani 'inia Jisas, "Ha'ausuri, 'ome! Na hasi'ei na'o ha'atee orohunia 'ani 'a nugu'a!"

²² Mia Jisas 'a o'ani, "Moi hinihinia God!"

²³ 'Inau wai 'unua ha'a-momori tana'amou: 'Ia tei nai hinihini ma bwa'i 'adoma'i heiruarua'a, 'ai matai o'ani 'iniai hungahungani, "Oi sara baaniai dorani ma'oi hura'ai asi!' Na maho nai 'unuasi 'ai to'o'a 'onaai 'irisia anasi.

²⁴ Tarana naasi nau 'unua 'inia tana'amou, do 'oha moi ha'angonia ta maho na'i ha'arahesi, moi hinihini do 'ia God 'a bwane haua'a tana'amou. Maigu haua tana'amoui taha mou 'irisia.

²⁵ Ma na'i 'oha moi ha'arahesi, 'onaa mou taesu'a 'ana tanei, moi 'adoma'i nugasias ga'u, neina Amamou na'i aro 'ai 'adoma'i nugasiamou ro'u 'ini'i maho ta'a'i na mou haa'i.

²⁶ Ma 'onaa mou bwa'i 'adoma'i nugasias, 'ia God na awai aro 'a bwa'i 'adoma'i nugasii ro'u i ora-ora'a amoo'i."

'Iraui Saemaua Adaa'i Jiu Ra Ai'a

*Hinihinia Do 'Ia Jisas 'A Boi Baania God
(Matiu 21:23-27; Luk 20:1-8)*

²⁷ Mana 'oha rau ataha ro'u mai na'i Jerusalem, 'ia Jisas 'a taha ro'u siri na'i Ruma Maea ana God. 'Iraui Na'ohadaui Piriisi miraui Ha'ausuri 'anai Ringe ana'ia Moses ma tara'i saemaua ro'u rau boi beia,

²⁸ marau songa'inia, "'Oi 'unua tana'ameu, 'iatei na 'unua tana'o do'oi matai haa'i mareho 'isi?"

²⁹ Mia Jisas 'a aramiraui o'ani, "Wai matai aramiai heisonga'i amou 'onaa moi aramia ro'u i heisonga'i nawai haua tana'amou.

³⁰ 'Ia tei na 'unua tanaa Jon 'anai bwareomaearaui noni? 'Ia God ma'ua inoni?"

³¹ Miraui hadahada haariraui hairiu o'ani, "'E taha nagai 'unua? 'Inia 'onaa nagai 'unua do'ia God, 'ia 'ai 'unua o'ani, 'Ma 'ua namou ai'a hinihinia 'inia Jon?"

³² Ma 'onaa nagai 'unua do 'iraui moi inoni nara 'unua tanaa, ra gasi taesu'a inoni." Rau 'unua o'asi, 'inia rau maaa'usiraui sae na rau hinihinia do'ia Jon 'e huunai rarabea.

³³ Miraui aramia o'ani, "Meu ai'a 'iraraa."

† 11:17 11:17 Aisaea 56:7; Jeremaea 7:11

Mia Jisas 'a o'ani 'iniraaui, "Nau bwa'i rangasia ro'u tana'amou 'iatei na 'unua tanaau do wai matai haa'i mareho 'isi."

12

Ha'atee Heiha'auu 'Iniraaui Sae Ta'a'i

Nara 'Omesuriai Moui Grep

(Matiu 21:33-46; Luk 20:9-19)

¹ Na'i 'ohasi, 'ia Jisas 'a maania ro'u tanaraau saemaua adaa'i Jiu i ha'atee heiha'auuni. 'A o'ani 'iniraaui, "'E sae na hasiai moui grep. 'A bara garia ma tagoraai dora 'anai rosirosi grep na'iei 'anai tagora waen. Ma ha'a-urasia ro'u i ruma ahaaha 'anai 'ome'ome 'ini'i maeronga. Na'i muri 'agu sadoi'i sae 'anai tau'aro maedi hua 'anai 'omesuriai mou ma hano na awa na'i kantri he'ete'i.

² "Ma na'i 'oha na tari madoraa 'anai husi'i hua, na saesi 'agu ha'ataaria 'ari noni tatau'aro ana 'anai waa mai hua narau ga'i haa'i tanaa baaniai moui grep anasi.

³ Na'i 'oha na ataha wou, 'iraaui mwane narau 'omesuriai mousi rau daua marau ngahu ngahua moi, marau ha'ataaria aho'i 'ari ha'i pwaranga.

⁴ 'Ari wou mana nei na to'oraai mou 'a ha'ataaria ro'u i ta'i sae tatau'aro ana 'anai waa mai tanaa hua ana'i. Miraau sae 'isi rau ngahuia ro'u. Rau ha'amaaraai bwauna mara here ha'ata'aia di'u ro'u.

⁵ 'Ari wou mana nei na to'oraai mou, 'a ha'ataaria ro'u 'ari ta'i sae tatau'aro ana. Miraau sae 'isi rau ngahu ha'amaesia moi. Mwane sae tatau'aro ana'i na ha'ataari'i ra here osia'i hako. Ra'i nei ra ngahu ha'ata'ai'i ma ra'i nei ra ngahu ha'amaesi'i.

⁶ "Na nei nagu awa mau 'anai ha'ataaria, naasi huunai gare ana'a na ta'ahia di'u. Naasi'a i sae ha'ahako 'anai ha'ataaria 'ari. Ma 'adoma'inia do 'iia rai ha'ahoua. Naasi, maagu ha'ataaria 'ari.

⁷ "'Oha narau re'ia, rau ha'atee hairiu o'ani, 'Naasia mo'o naigu to'oraai mousi na'i 'oha nai mae amana. Gau magai ngahu ha'amaesia magai to'oraa nagaau i moui grepisi.'

⁸ Marau daua, rau ngahu ha'amaesia marau gaasia hura'a baaniai mou."

⁹ 'Ia Jisas 'agu songa'iniraaui o'ani, "Mou 'adoma'inia do'e taha naigu haa i sae na to'oraai mousi. 'Iia 'ai boi, mai ngahu ha'amaesiraaui hako sae 'isi mai wateai mousi tanaraau tara'i nei ro'u.

¹⁰ Mou ai'a 'oha'inia gasi taha nara usua na'i Usu-usu Maea na o'ani, 'Na hau na 'iraaui sae tatau'aro ruma rau 'itaa, naia naagu ha'i hau na ororiu di'u na'i bani anai ruma.

¹¹ 'Ia Araha God na haua do 'ai o'asi, magau wa'ewa'e di'u 'inia!' "*"

¹² Na ha'atee heiha'auu ana Jisas 'a to'iraaui saemaua adaa'i Jiu. Rau raba daua Jisas dorai ha'a-mama'aia. Maraugu ai'a haua, suria rau magugu do ra gasigu ha'agogoru i noni. Naasi raugu hano'a baania.

Ra Hauai Heisonga'i 'Iniai Hori Takisi

(Matiu 22:15-22; Luk 20:20-26)

¹³ Na'i muri, 'iraaui Farisei mana sae ana'ia Herod ra ha'a-taariraaui wou tara'i sae 'anai songa'inia Jisas do neina 'ai ha'atee ha'ata'aiai mwaeraha raha adaaui Rom.

¹⁴ Rau 'ari wou beia marau o'ani 'inia, "Ha'ausuri, meu 'iraraa dona mwane maho na'o 'unu'i ra odo-odo mara ha'a-momori hako. Ma'o ha'ausuriraaui noni 'ini'i taha 'ia God na 'irisiai noni 'anai haa. Ma na'i

* 12:11 12:10-11 Psalm 118:22-23

'oha na'o ha'ausuriraau, rei'uaa na 'e sae he'ua nara bahurongo'o, mana ha'ausuringa'i amu'i ra ta'isada moi. Hoita, 'oi 'unua tana'ameu, 'A 'ua? Na'i ringeringe agaau, 'a odo-odo dogai hori takisi tanaai mwaeraha raha na'i Rom ma'ua ai'a?"

¹⁵ 'Ia Jisas 'a bwane 'iraraa do rau raba ha'imaania, maagu o'ani, "Ni 'uaana na mou raba ha'a-bweubweu'aau 'anai 'unuai maho na taritari'a? Moisu waa mai ta korai ha'a ma wai re'ia!"

¹⁶ Marau waa wou tanaai korai ha'a, maagu songa'iniraau o'ani, "I atana tei mana nununa tei na awa na'i korai ha'ani?" Miraau aramia o'ani, "Na atanai Mwaeraha adaui Rom mana nununa."

¹⁷ Mia Jisas 'a o'ani 'iniraau, "Onaa na o'asi mamoi haua tanaai Mwaeraha i taha 'iia na to'oraa, mamoi haua tanaa God taha 'ia God na to'oraa." Miraau heimwaota'i di'u 'inia Jisas.

Heisonga'i 'Iniai Suruta'e Aho'i

'Anai Ohongia Jisas

(Matiu 22:23-33; Luk 20:27-40)

¹⁸ Ma na'i muri, ra'i Sadiusi ra boi beia Jisas. 'Iraausi rau ai'a hinihinia do 'iraau noni rai suruta'e aho'i baaniai mae, miraau songa'inia Jisas o'ani,

¹⁹ "Ha'ausuri, 'ia Moses 'a nugaai Ha'atora tanagaau do 'onaa 'e sae ha'iwai nai mae baaniai urao ana mararu ai'a to'o gare, na do'orana 'ai orisia, maai waina ro'u i uraosi. Mana gare na rarui to'ora'i, rai 'unu'i 'ini'i gare ana'i do'orana na maesi, neina burungana 'a bwa'i matai hako."[†]

²⁰ "E heiha'auu naani. 'E ta'i 'oha 'e biu ha'ido'orada narau awa wou, mana gare na hutai na'o 'a ha'iwai. Raru ai'a to'o gare mau i urao anasi ma mae'a baania.

²¹ Na'i muri, do'orana na huta haisuri, 'a waina ro'u i naosi. Ma raru ai'a to'o gare mau ro'u, ma mae'a ro'u i saesi. Mana ta'i maho mausi, 'a to'o ro'u tanaai orunai do'oradaau.

²² 'Ari wou, 'iraau biu ha'ido'oradasi, rau waina hako'i uraosi. Ma ai'a ta ta'i 'iniraau naigu to'oraa ta gare beia, marau mae hako'a. Na'i muri mana uraosi 'a mae ro'u.

²³ Hoita, na'i 'oha na 'iraau biu ha'ido'oradasi rau waina hako o'asi uraosi, 'iatei 'iniraau nararugui ha'iwai uraosi na'i 'oha na 'ia God 'aigui ha'a-suruta'erau aho'i baaniai mae?"

²⁴ Mia Jisas 'a aramiraau o'ani, "Mou taritari'a ha'atai! 'T'amou ai'a aidangisiai Usu-usu Maea mamou ai'a aidangisia ro'u i taha na mena ana God 'ai matai haua. Naia namou to'oraa 'inia 'ado'ado bweubweu'asi.

²⁵ 'Oha 'ia God 'ai ha'a-suruta'era'i noni baaniai mae, 'a bwa'i sae nai ha'iwai. 'Iraau rai 'onaairau enjel na'i aro nara ai'a ha'iwai.

²⁶ 'Io, ma wai ha'a-aidangisi'amou ro'u 'iniai suruta'e aho'i. Mou bwani 'iraraa do na'i mamaani 'inia Moses mana gere hasi'ei na noroi uruna ani, 'ia God 'a ha'atee o'ani 'inia Moses, "Inau God ana Ebrahim, mia Aisak, mia Jekop."[‡]

²⁷ Mana God naasi, ai'a God adaui nei ra mae, me 'e God adaui nei ra tahi. Naasi 'a ha'ata'inia doni waira orusi rau tahi mau, rei'uaa narau bwane mae. 'T'amoui Sadiusi mou taritari'a di'u 'oha mou 'unua do gau bwa'i suruta'e aho'i."

Ha'atora Na Ororiu Di'u

(Matiu 22:34-40; Luk 10:25-28)

²⁸ 'Oha 'iraau Sadiusi rau heitohetohe mau beia Jisas, 'e nei 'iniraui Ha'ausuri 'anai Ringe ana'ia Moses, 'a boi ma rongoa dona heiamani ana

[†] 12:19 12:19 Diutronomi 25:5-6 [‡] 12:26 12:26 Eksodas 3:6

Jisas 'a odo-odo. Maagu songa'inia ro'u o'ani, "Ha'atora he'ua na ororiu di'u?"

²⁹ Mia Jisas 'agu aramia o'ani, "Ia Moses 'a 'unua o'ani, "T'amou sae ni Israel, moi bahu-bahurongo goro! 'Ia God naasi Araha agaau, me 'iia moi naasi ta'i God.

³⁰ Moi ta'ahiai Araha God amou 'ini'i tahingamoo'i hako mana ahumoo'i hako me 'ini'i 'adoma'imoo'i hako mana wetewete amoo'i hako.' Naasi nei na ororiu di'u.

³¹ Mana ruanai Ha'atora na ororiu 'a o'ani, "Oi ta'ahiai nata sae 'onaai ta'ahi'o amua haari'o.'§ 'Agu ai'a Ha'atora'a ro'u naigu ororiu di'uai rua Ha'atorasi."

³² Mana saesi 'a o'ani, "Ha'ausuri, 'O ha'a-momori di'u 'oha na i'oe 'o 'unua do'e ta'i God moi.

³³ Ma'o ha'a-momori ro'u do gai ta'ahia God 'ini'i tahingagaa'i hako mana ahugaa'i hako me 'ini'i 'adoma'igaa'i hako mana wetewete agaa'i hako. Ma mei ta'ahirau ro'u i mwane sae hako 'onaai ta'ahigaa'u haarigaa'u nagau haua. Na rua Ha'atorasi, raru ororiu di'u'i tara'i Ha'atora nagau suri'i, 'onaai'i ho'asi nagau hahaa'i na'i Ruma Maea ana God."

³⁴ 'Oha 'ia Jisas 'a rongoa dona saesi 'a heiarani odo-odo, 'agu o'ani 'inia, "Wai 'unua tana'o: I'oe 'o gaarangi ha'awatea God 'anai marungiai tahingamu." Na'i muri, 'agu ai'a ta sae'a ro'u naigu raba haa ta heisonga'i.

Heisonga'i 'Iniai Ha'atahi

(Matiu 22:41-46; Luk 20:41-44)

³⁵ Na'i muri, 'oha 'ia Jisas 'a ha'ausuriraaui noni na'i Ruma Maea ana God, 'a o'ani 'inirau, "A he'ua na 'iraaui Ha'ausuri 'anai Ringe ana'ia Moses rau 'unua dona Ha'atahi 'e warowarona Mwaeraha Deved?

³⁶ 'Inia 'e ta'i 'oha, na Hi'ona Maea 'a haua tanaa Deved i 'ado'ado, mia Deved 'a o'ani,

"Ia Araha God 'a ha'atee tanaai Araha agua o'ani:

'Oi heinagu na'i aba odogu

'anai heimarungi beiau,

tari 'oha wai nugaraui maerongamu

na'i bahainai heimarungi amua.'*

³⁷ Na'i 'oha na 'ia Deved 'a 'unua do 'ia Ha'atahi 'e Araha ana, 'a ha'ata'inia do 'ia Araha ai'a do'e warowarona moi, ma'ata 'iia Araha ro'u ana."

Miraaui nei na ha'ausurirau, rau wa'ewa'e di'u 'anai bahurongo'i maho na maani'i.

Jisas 'A 'Unu Ha'ata'airaaui Farisei

Miraaui Ha'ausuri 'Anai Ringe

(Matiu 23:1-36; Luk 20:45-47)

³⁸ Mana 'oha na ha'ausuriraaui noni 'a o'ani, "Moi 'ome'ome goro 'iniraaui Ha'ausuri 'anai Ringe ana'ia Moses! 'A goro adaau hano hairiu na'i maketi bei'i to'oni ororiu adaa'i do neina 'iraaui inoni rai 'ome 'irararaau marai ha'ahouraaui.

³⁹ Na'i 'oha narau siri suri'i ruma ni ha'arahesi, mei suri'i ngau goni nara haa'i, rau 'irisia dorai heinagu moe'a suri'i dora ororiu.

⁴⁰ Marau matai ha'a-bweubweu'araui nao 'ini'i ruma adaa'i mana maho na rau to'ora'i. Mana 'oha rai rihunga'i, rau pwari'iraaui sae 'anai haa'i rihunga'i tewa. Moi 'iraraa dona ha'a-mama'ai 'ia God 'ai ha'arahaa ro'u wou tanaraau."

Jisas 'A Ha'ata'eta'eai

*Wawate Anai Nao Na Pohara
(Luk 21:1-4)*

⁴¹ Mia Jisas 'a heinagu gaarangiai bakosi 'anai wawate na'i Ruma Maea ana God. 'A wana suriraaui sae nara sisiri mai 'anai nuga'i bane adaa'i. 'A 'omesia do'a ragoi sae toto'ora na rau nuga'i mwane ha'a.

⁴² 'Agu 'ome, ma 'e ta'i nao pohara na boi ma nugaa dioi rua gere korai ha'a. 'Onaa rai ha'igoni'i 'a ga'i arariai ta'i sereni.

⁴³ Mia Jisas 'agu 'unuraaui mai rongoiusuri ana'i ma o'ani, "Inau wai 'unua ha'a-momori tana'amou: Na naosi 'a nuga ha'a di'uraaui hako i mwane sae 'isi.

⁴⁴ 'Inia 'iraauui mwane sae 'isi rau hisu 'ini'i taha nara madara suri'i toto'ora adaa'i. Mana uraosi, 'oha na wateai ha'a na to'oraa, 'agu ai'a to'oraa'a ro'u tanei."

13

*Jisas 'A 'Unua Dona Ruma Maea Ana God Rai Ha'ata'aia
(Matiu 24:1-2; Luk 21:5-6)*

¹ 'Oha Jisas 'a hura'a baaniai Ruma Maea ana God, 'e ta'i 'iniraauui rongoiusuri ana'i 'a boi beia ma o'ani 'inia, "Ha'ausuri, 'osui re'i'i kae hau suri'i bani 'anai kae Ruma Maea 'omegorosi."

² Mia Jisas 'a o'ani 'inia, "'O 'iraraa? 'E 'oha nai boi mau na bwa'i ta ta'i hau 'ini'i hau 'isi naraigui awa suri'i dora nara heinagu suri'isi. Na mwane hau 'isi rai gaasi'i dio."

*Ha'abasu 'ini'i Maho Ta'a'i Narai Siri Mai
(Matiu 24:3-14; Luk 21:7-19)*

³ Na'i muri, 'ia Jisas 'a heinagu na'i hungahungai 'Oliv. Na'i dorasi ra matai wanasia moi 'ari Ruma Maea ana God. Mia Pita, Jems, Jon, mea Andru rau boi haariraaui beia, marau songa'inia o'ani,

⁴ "Na'i 'oha he'ua na rai kaii Ruma Maeasi? 'E ha'ara he'ua na mei re'ia na meigu 'iraraa 'inia do 'a tari'a i madoraa 'ana?"

⁵ Mia Jisas 'a aramiraaui o'ani, "Moi 'ome'ome goro, ra gasigu ha'ateha'amou tara'i sae!

⁶ 'Inia 'ai ragoi sae rai boi heitaroha'i na'i atagu narai o'ani, "Iia'a ninauni,' ma 'ai ragoi nei narai ha'ateharaau 'ini'i ha'ausuringa'i adaa'i nara ai'a ha'a-momori.

⁷ Moi rongo'i rongo raha suri'i hei'oi nara to'o gaarangi mana taroha 'ini'i nei ra to'o ha'atau. Ma 'ai abui ta'aabemoou. 'Inia mareho 'isi rai to'o o'asi'a, ma ai'a do naasi'a i ha'ahakona dangi.

⁸ 'Iraauui sae na'i ta'i kantri rai 'ari marai heingahui beiraaui sae na'i nata kantri. Ra'i nunu rai to'o suri'i tara'i dora, ma tara'i dora na inoni rai mae 'inia hioro. Maho 'isi 'e taraawa'adi moi rongomaata'i, 'onaai urao naagu taraawa'a maesi ahu 'anai ha'ahutaai gare.

⁹ "Moi 'ome'ome goro! 'Inia rai boi wai'amou 'anai 'i'i'amou marai rohoroho'amou suri'i ruma ni ha'arahesi adaa'i. Suria 'i'amou rai rongoiusuri agu'i, rai wai'amou 'anai ha'a-urasi'amou na'i maadi Primia mana Mwaeraha. Naasi madoraa amou 'anai taroha'inia hura'a i Taroha Goro tanaraau.

¹⁰ Na Taroha Goro rai 'adara'inia hako 'ari suriai marewana, maigu tari ha'ahakonai dangi.

¹¹ Hoita, 'oha rai wai'amou 'anai 'i'i'amou, moi abui 'adoma'i raha 'ini'i taha na moi maani'i. 'Inia na maho namoi 'unu'i rai ha'ata'ini'i tana'amou suri'i 'adoma'imoo'i na'i madoraa na moi ha'atee. Na maho na moi maani'i, ai'a 'ado'adomoo'i haarimoou mei baaniai Hi'ona Maea.

12 “Na'i 'ohasi, sae rai usuha'ini'i do'oradaa'i mana gare adaa'i nara hinihiniau tanaraaui nei nara raba ha'amaesiraau. Mana gare rai ha'imaie bei'i amadaa'i mana inadaa'i marai usuha'iniraau ro'u tanaraaui nei rai ha'amaesiraau.

13 'Iraaui noni rai 'utai'amou, suria 'i'amou ra'i rongoiusuri agu'i. Ma 'onaa moi ura baabau tari ha'ahakonai madoraa ta'aasi, moigu daua namooui tahi tarau.”

Jisas 'A Maaniai Taha Nai To'o

Na'i Jerusalem

(Matiu 24:15-28; Luk 21:20-24)

14 Mia Jisas 'a o'ani ro'u 'iniraau, “'I'amou moi re'iai maho ta'aa di'u na 'ia God 'a 'itaa. 'Ai ha'ata'ai Ruma Maea ana God, 'inia 'a ga'i bwa'i awa iei. 'Ia tei na'oi 'oha'iniai ha'ateeni, 'oi ha'imaania aidangisia ma'ata'a i 'ado'ado 'ana! Hoita, 'onaa 'oi awa na'i Provensi Jiudea na'i madoraasi, 'oi hora ta'eha suri'i hungahunga 'anai bainihu.

15 'Onaa 'oi awa hura'ai buriinai ruma amua, 'oi hora'a. 'Ogui abu siri ro'u i ruma 'anai waa'i tara'i maho amu'i.

16 'Onaa 'oi awa na'i mou amua, 'oi abui aho'i 'ari ruma 'anai hauai bwana amua.

17 Ha'a-arohai'araau di'u i urao ra pote mana hasuuri'i, 'inia 'ai bwara tanaraaui hora.

18 Moi ha'arahesi mana mahosi 'ai abui to'o na'i 'oha na rangi ro'aro'a.

19 'Inia ni rongomaata'i na'i madoraasi, 'ai ta'aa di'u baani'i mwane rongomaata'i nara taraawa'a mau na'i madoraa na ha'apwa'araa God i marewana tari dangini. Ma na'i muri, 'a bwa'i ta madoraa ta'aa o'asi'a ro'u naigu to'o.

20 'Onaa 'ia Araha God 'ai abui ha'apwapwakuai madoraa 'anai rongomaata'i 'isi, 'a bwa'i nei 'aigu tahi. Me 'iniai ta'ahiraau ana 'i sae ana'i na bwane 'ome sigihiraau, naia naigui ha'apwakua 'inia i madoraasi.

21 'Onaa ta sae nai o'ani, 'Moisu wana mai. Naani Ha'atahi!' Ma'uasi 'ai o'ani, 'Na 'ariani!' Moi abui hinihinia.

22 Ra'i sae pwapwaaari'i rai boi marai o'ani, “Inau naasi huunai Ha'atahi,' ma'uasi rai o'ani, “Inau naasi huunai Rarabea.’ Rai haa'i mwani ha'abu'oahu 'anai ha'ateharaaui sae. Rau raba ha'ateharaau ro'u i nei na 'ia God 'a bwane 'ome sigihira maagu bwara.

23 Moi 'ome'ome goro 'iniraau! Naia nau 'unu'i'a 'ini'i maho 'isi tana'amousi.”

Jisas 'A Maaniai Boi Aho'i Nai Haa

(Matiu 24:29-31; Luk 21:25-28)

24 'Ia Jisas 'a ha'atee o'ani ro'u, “Na'i murinai madoraa ta'aasi, 'I sina 'a bwa'i marewa,
mana hura 'ai o'asi ro'u.

25 I hee'u rai ahoda,

mana taraani maho na'i ahoasara rai 'iha'iha.’*

26 Miraau noni raigu re'iau i Gare'i Inoni. Wai boi aho'i suri'i rorodo beiai raraha mana mena na wetewete.

27 Me 'inau waigu ha'a-taariraau enjel agu'i 'ari suri'i mwani dora hako na'i marewana 'anai taragoniraau mai nei na 'ia God 'a bwane 'ome sigihiraau.”

Ha'ausuringa'i Baaniai Hasi'ei

* 13:25 13:24-25 Aisaea 13:10; 34:4; Joel 2:10

*Nara 'Unua 'Iniai Fig
(Matiu 24:32-44; Luk 21:29-33)*

²⁸ Mia Jisas 'a o'ani ro'u, "Moisu 'adoma'iniai fig mai ha'ausuri'amou. Na'i 'oha na'o re'iai raraanai fig ra taraawa'ai asuru mana rawa ra pwira, ma'o 'iraraa do madoraa raorao 'a gaarangi'a.

²⁹ 'A o'asi ro'u. 'Oha na maho ta'a'i 'isi rai to'o, mamou 'iraraa do 'inau gaarangi aho'i mai'a.

³⁰ 'Inau wai 'unua ha'a-momori tana'amou, mareho 'isi rai to'o, miraaui sae nara awa na'i madoraani ra bwa'i mae mau.

³¹ I ahoasara mana ano rarui anoro mana ha'atee agu'i rai awa tarau.

³² "Na dangi mana madoraa he'ua nawai aho'i mai ai'a ta sae nai 'iraraa. Rei'uaa 'inau i Gare'i Inoni miraaui enjel na'i aro mameu ai'a 'iraraa ro'u. 'Ia moia Amagu na 'iraraa.

³³ Naasi, moi 'ome'ome mamoi ha'aagau goro, 'inia mou ai'a 'iraraai madoraa na wai aho'i mai.

³⁴ Na boi aho'i na wai haua, 'a 'onaai sae na ha'aagau 'ana'i 'aariha ana. Na saesi 'a ha'a-'u'uriraau sae tatau'aro ana'i 'ini 'omesuriai ruma ana. 'A 'unu'i tanaraau tau'aro narai haa'i ma nugaai sae na'i maraaruma 'ana'i 'ome'ome goro 'iniai madoraa nai aho'i mai.

³⁵⁻³⁶ Naasi moi 'ome'ome goro! 'Inia mou ai'a 'iraraai madoraa wai boi aho'i 'onaai ai'a 'iraraa adaau 'oha nai boi aho'i anai sae na to'oraai ruma. Mou gasi mauru ma moigu 'asu'a 'oha wai boi aho'i. Na'i gasi su'urahi, ma'ua na'i 'ubutanai rodo, ma'ua na'i gasi wa'aria ma'ua haho'oa.

³⁷ Taha nau 'unua tana'amou 'au 'unua ro'u tanaraau hakoi mwani noni. Moi 'ome'ome goro!"

14

*'E Ha'aradorado 'Anai Ngahuia Jisas
(Matiu 26:1-5; Luk 22:1-2; Jon 11:45-53)*

¹ Ma'e rua dangi na mau maraigu ha'ato'oa 'e rua rongo. 'Etana 'ana'i 'adoma'i aho'isiai Roho Aharau mana ruanai rongo ra 'unua 'iniai Rongo 'ini Bredi nara ai'a dorari'i beiai draebam.

Hoita, 'iraaui na Na'ohadaa'i Piriisi miraaui Ha'ausuri 'ana'i Ringe ana'ia Moses, rau siba herehere do neina 'iraaui sae rai abui 'iraraai madoraa rai daua Jisas 'ana'i ha'amaesia.

² Rau o'ani, "Gai abui daua suri'i dangi nagau haai rongo, 'inia 'iraaui sae ra gasi ha'ato'oa ta ha'agogoru."

'E Urao Na Ringisiai Rumu

*Na'i Bwauna Jisas Na'i Betani
(Matiu 26:6-16; Luk 22:3-6; Jon 12:1-8)*

³ 'Ia Jisas 'a awa na'i 'omaai Betani na'i ruma ana Saemon. 'Ia Saemon 'e sae na adoia ga'ui daoha ra 'unua 'iniai lepa. Na'i 'oha rau ngau, 'e urao na siri mai beiai gere huai wai 'ome goro na honu 'ini rumu na hori bwara ma si'ini goro. 'A tahangia ma ringisia na'i bwauna Jisas.

⁴ Mana haru tara'i sae na'i rumasi rau taesu'a 'ana'i uraosi marau ha'atee hairiu o'ani, "'Ei, 'a 'ua na ha'agata'inia 'inia i rumusi?"

⁵ 'A ga'i raonga'inia, mana ha'a 'ana 'a ga'i 'a'auhiraaui 'inia i pohara. Na rumusi ra ga'i horia 'iniai oru 'arangi korai ha'a madara!" Maraugu taraawa'a ha'atee ha'ata'aiai uraosi.

⁶ Mia Jisas 'agu o'ani 'iniraaui, "Nigaa! 'A 'ua na mou ha'atee ha'ata'aiai 'inia? 'Iia 'a haua tanaau i here na goro.

⁷ 'Iraau pohara rai awa tarau moi bei'amou, mamoi matai 'a'auhiraau na moi wou ta madoraa. Me 'inau 'au bwa'i awa tarau bei'amou.

⁸ Na uraoni 'a hauai here na goro tanaau. 'A ha'aagauai abegu 'anai 'oha rai toringiau.

⁹ Wai 'unua ha'a-momori tana'amou: Suri'i mwane dora na'i marewana narai taroha'inia ei Taroha Goro, rai maaniai taha na haua i uraoni, marai 'adoma'inia aho'i."

¹⁰ Mia Jiudas Iskariot, 'e ta'i 'iniraau rongoiusuri ana'ia Jisas, 'a 'ari beiraau Na'ohadaa'i Piriisi ma 'unua do 'ia 'ai 'a'auhiraau 'anai sadoia ta here narai matai daua 'inia Jisas.

¹¹ Na'i 'oha narau rongoa do'ai 'a'auhiraau, rau wa'ewa'e di'u. Marau duruduru tanaa dorai taharia. Ma na'i 'ohasi, 'ia Jiudas 'a taraawa'a sibasiba madoraa goro 'anai usuha'inia Jisas tanaraau.

*Jisas 'A Ngau Beiraau Rongoiusuri Ana'i
(Matiu 26:17-30; Luk 22:7-23; Jon 13:21-30)*

¹² Na'i dangi tahamora 'ini'i dangi nara ha'ato'oai Rongo 'ini Bredi nara ai'a dorari'i beiai draebam, ra ngahui'i tara'i garei siip 'anai 'adoma'i aho'isiai Roho Aharau. Ma na'i dangisi, 'iraau rongoiusuri ana'ia Jisas rau boi songa'inia o'ani, "Na'i hei na'o rabasia do mei ha'aagaua iei ngaugoni 'anai 'adoma'i aho'isiai Roho Aharau?"

¹³ Mia Jisas 'agu o'ani 'iniai waira rua 'ini'i rongoiusuri ana'i, "Murui hano ma murui 'ari na'i kae 'omaai Jerusalem. Ma na'i 'oha na murui ataha wou, murugui heisadoi beia ta sae nai suru'iai bei wai. Ma na'i 'oha murui re'ia, murui suria na'i dora nai 'ari iei.

¹⁴ Na'i 'oha nai siri na'i ruma, murui songa'iniai sae na to'oraai rumasi. Murui o'ani, 'I Ha'ausuri ameeu 'a raba 'iraraa, na hei ahii nai matai ngau iei beiraau rongoiusuri ana'i 'anai 'adoma'i aho'isiai Roho Aharau?"

¹⁵ Na sae na to'oraai rumasi, 'aigu wai'amurua ta'eha 'anai 'omesiai ahii nara bwane ha'a-arataraa mana mwani maho ra bwane agau. Na'isi na murui ha'aagauhi'i ei mwane mareho."

¹⁶ Miraruai rua rongoiusuri raru 'ari ma raru 'omesia dona mwani maho ra to'o 'onaai bwane 'unua ana Jisas tanararu. Mararu ha'aagauai ngaugoni 'anai 'adoma'i aho'isiai Roho Aharau na'i rumasi.

¹⁷⁻¹⁸ 'Oha 'ia Jisas miraau rongoiusuri ana'i rau ngau goni na'i su'urahisi, 'ia Jisas 'a o'ani 'iniraau, "'Inau wai 'unua ha'a-momori tana'amou: 'E ta'i abe 'ini'amou namou ngau beiau 'ini, nai usuha'iniau tanaraau maerongagu."

¹⁹ 'Oha na 'ia Jisas 'a 'unua o'asi, 'iraau rongoiusuri rau arunga ta'aa. 'E nei ma o'ani 'inia Jisas, "'A 'ua? 'O 'adoma'inia do 'inau gasi?"

²⁰ Mia Jisas 'a aramiraau o'ani, "'E abe 'ini'amou moi, 'ia mo'o miri ta'i toha'iniai dorai bredi na'i ta'i rabo'oni.

²¹ Ha'amomori. 'Inau i Gare'i Inoni, wai mae 'onaai ha'arangasia ada na'i Usu-usu Maea. Ma'ata, ha'arohaia di'u a mo'o nai usuha'iniau tanaraau maerongagu! 'A ga'i goro tanaa 'onaa 'a ga'i bwa'i huta!"

²² Na'i 'oha na rau ngau, 'ia Jisas 'a dauai huai bredi. 'A ha'atee ha'agorohia God 'inia ma uubia. 'A haua tanaraau rongoiusuri ana'i ma o'ani, "Naani abegu. Moi daua mamoi ngaua."

²³ Mia Jisas 'a dauai paniken waen. 'A ha'atee ha'agorohia God 'inia ma haua tanaraau rongoiusuri ana'i ma o'ani, "Moi gonohia." Miraau hako rau gono.

²⁴ Maagu o'ani ro'u 'iniraau, "Naani 'abugu 'anai ha'a-o'oriai duruduru haoru ana God. 'Ai ahe 'iniraau mwani noni rago.

²⁵ Nau wai 'unua ha'a-momori tana'amou: 'Augu bwa'i gonohia'a ro'u ta waen tari 'oha wai gonohiai waen haoru na'i dora ni heimarungi ana God."

²⁶ Miraau suru'iai gana marau hura'a 'anai hungahungai 'Oliv.

Pita 'A Duruduru Tanaa Jisas

(Matiu 26:31-35; Luk 22:31-34; Jon 13:36-38)

²⁷ Mia Jisas 'a o'ani 'iniraaui rongoiusuri ana'i, "I'amou hako moi nugasiau mamoi hora baaniau. 'Ai 'onaai 'unua ada na'i Usu-usu Maea o'ani,

"Ia God 'ai ha'amaesiai 'omesuri siip,

miraau siip rai 'adarara!'"*

²⁸ Ma'ata na'i 'oha wai suruta'e aho'i, wai 'ari na'i na'o 'ini'amou na'i Galili. Na'i 'isi nagaigui heito'oi ei."

²⁹ 'Ia Pita 'agu ha'atee raha o'ani, "Rei'uaa na 'iraaui rongoiusuri amu'isi rai nugasi'o, me 'inau 'au bwa'i moe'a!"

³⁰ Mia Jisas 'a aramia o'ani, "Pita, wai 'unua tana'o ha'a-momori: De'eni rodo i kua 'a bwa'i tataraoke ha'arua mau, mi'oe 'oi bwani tohe ha'a-oru do'o ai'a mataiau."

³¹ Mia Pita 'a tohe baabau ma o'ani, "Inau, rei'uaa nawai mae bei'o, mau bwa'i 'unua moe'a do'au ai'a matai'o!" Miraau hakoi rongoiusuri rau ha'atee o'asi ro'u.

Jisas 'A Ha'arahesi Na'i Getsemanii

(Matiu 26:36-46; Luk 22:39-46)

³² 'Ia Jisas mana rongoiusuri ana'i rau taha na'i dora nara 'unua 'inia Getsemanii, maagu o'ani 'iniraaui, "Moi heinagu mamasi 'ini 'oha wai ha'arahesi."

³³ Ma waia Pita, Jems mea Jon. Na'i 'ohasi 'ia Jisas 'a arunga ta'aa mana 'adoma'ina 'a kuhi,

³⁴ maagu o'ani 'iniraaui waira orusi, "Na ahutotou nau haa 'a raha di'u, mau gaarangi maesia. Moi awa na'i 'ini mamoi rarai beiau."

³⁵⁻³⁶ Ma gere sara wou baaniraaui ma topira'i ruru aurui ano ma ha'arahesi, "Ama, 'onaa 'ai mwada'u, ma'ai abui to'o o'asi tanaau! Mama, bei'o ai'a maho nai bwara tana'o, 'oi abui wateau 'anai siri na'i rongomaata'ini. Ma'ata 'ai abui suriai hei'irisigu, me 'ai suriai hei'irisimu."

³⁷ 'A aho'i mai ma re'iraaui waira oru, rau poru mauru moi. Mia Jisas 'a o'ani 'inia Pita, "Saemon, i'oe 'o mauru moi? 'O bwa'i gere matai rarai beiau suria ta ta'i 'aoa moi?"

³⁸ Moi rarai mamoi ha'arahesi neina moi abui ahoda na'i 'oha moi siri na'i heiohongi. Ra wetewete i 'adoma'imoo'i 'anai ha'isuri'i maho ra odo-odo, mana abemoo'i naragu maemae'a."

³⁹ Mia Jisas 'a aho'i 'ari ma haa ro'u mau i ta'i ha'arahesi.

⁴⁰ 'Oha na aho'i ro'u ma re'iraaui waira oru rau poru mauru moi. Ni maadaa'i ra hihi'a di'u 'inia mamauru'a. 'A ha'arairaaui ma kakui ahudaau 'inia taha rai 'unua tanaa.

⁴¹ 'Ia Jisas 'a aho'i 'ari ro'u 'ini ha'arahesi ma na'i 'oha na boi aho'i beiraaui, 'a o'ani 'iniraaui, "Mou mauru mamou mamaro mau? 'A goro'a ga'u! Na madoraa na rai usuha'iniau i Gare'i Inoni tanaraau noni ta'a'i, naani'a!

⁴² 'Ome, 'ia mo'o nai usuha'iniau tanaraau maerongagu 'a boi'a. Moi ura ara'a magari 'ari beiraaui."

Ra Boi 'Anai Daa Jisas

(Matiu 26:47-56; Luk 22:47-53; Jon 18:3-12)

* 14:27 14:27 Sakaraea 13:7

⁴³ 'Oha na 'ia Jisas 'a ha-hadahada mau, 'ia Jiudas, 'e ta'i 'iniraau rongoiusuri ana'ia Jisas, 'a taha mai beiai ruruhai sae. Ra waa'i mai naihi mana hasi'ei 'anai heingahu. 'Iraau Na'ohadaa'i Piriisi mana Ha'ausuri 'anai Ringe ana'ia Moses ma tara'i saemaua ro'u ra ha'a-taariraaui mai.

⁴⁴ Mia Jiudas 'a bwane hauai ha'a-aratara tanaraau o'ani, "Ia mo'o nawai ngoonia, naasi na moi dau ha'agorohia mamoi waia."

⁴⁵ Naasi, mia Jiudas 'a 'ari odo-odo beia Jisas ma ha'atee o'ani tanaa, "Ha'ausuri" ma ngoonia.

⁴⁶ Miraaugu daua 'anai waia.

⁴⁷ Ma na'i 'ohasi, 'e ta'i 'iniraau rongoiusuri na awa gaarangiraaui, 'a rahiai naihi ana ma taba taahiai karinganai sae tatau'aro anai Na'ohadaaui Piriisi.

⁴⁸ Mia Jisas 'a ha'atee o'ani tanaraau, "A 'ua? Mou 'adoma'inia do 'inau 'e sae hehere ta'aa na mou boi 'inia bei'i naihi mana hasi'ei 'anai heingahu 'anai dauau?"

⁴⁹ 'A 'ua namou ai'a bwani dauau 'inia na'i Ruma Maea ana God? 'Ado dangi na'i 'isi'a nau ha'ausuri na'iei. Ma'ata, mareho namougu hauanisi, 'e ha'ato'oa moi mareho nara bwane usua 'iniau na'i Usu-usu Maea! Naia na mou boi dauau o'ani 'iniani."

⁵⁰ Miraau rongoiusuri rau nugasia'a Jisas marau hora hako baania.

⁵¹ Ma'e sae haoru, na suria Jisas. 'Iia 'a ho'owa'a 'iniai tahangai bwana mamae. Mana 'oha rau bonasiai daua,

⁵² 'a ahodai bwana ana ma hora ha'i wa'aroko.

Jisas Ra Waia Tanaai Na'ohadaaui Piriisi

(Matiu 26:57-68; Luk 22:54-55, 63-71; Jon 18:13-14, 19-24)

⁵³ Marau waia Jisas 'ari na'i ruma anai Na'ohadaaui Piriisi. Miraau Na'ohadaa'i Piriisi miraau Ha'ausuri 'anai Ringe ana'ia Moses ma tara'i saemaua ro'u na rau awa na'i Kansol, rau goni mai hako na'i dorasi.

⁵⁴ Mia Pita 'a haisuri ha'atau moi. 'A siri na'i raronai dora a'ora na'i maanai rumasi ma heinagu na'i bobonai 'eu. 'A waari'u beiraui sae hehei'oi nara 'omesuriai Ruma Maea ana God.

⁵⁵ Hoita, na'i raronai ruma, 'iraau Na'ohadaa'i Piriisi miraau haru saemaua narau awa ro'u na'i Kansol ra bonasia do rai sadoia ta mamaani 'anai subunia 'inia Jisas marai hiiri ha'amaesia 'inia. Miraau ai'a sadoia ta maho 'anai ha'ahunia 'inia.

⁵⁶ 'Inia, rei'uaa nara ragoi nei ra haa'i mamaani pwari'i 'ana Jisas, me ni mamaani adaa'i ra ai'a ta'isada.

⁵⁷ Ra ura ara'a ro'u tara'i nei ma ra haua ro'u i pwari'i. Rau o'ani,

⁵⁸ "Tameu meu rongoa do 'ai kaii Ruma Maea ana God 'iraui sae rau tau'aronasi. Ma 'unua do 'ai ha'a-urasi aho'i ta nei haoru na'i moi oru dangi, 'e nei na bwa'i sae nai matai tau'arona!"

⁵⁹ Ma'ata na mamaani adaa'i ra he'ete'i hairiu mau.

⁶⁰ Mana Na'ohadaaui Piriisi 'a ura ara'a na'i maadaui sae 'isi, ma ha'atee o'ani tanaa Jisas, "A 'ua? 'O bwa'i haua ta heiarani 'ini'i mareho ra ha'ahunio 'ini'isi?"

⁶¹ 'Ia Jisas 'a papaku ma ai'a 'unua ta ta'i ha'atee. Mana Na'ohadaa'i Piriisi 'a songa'inia o'ani ro'u, "A 'ua? I'oe naasi Ha'atahi, garena God?"

⁶² Jisas 'a aramia o'ani, "Io. 'Inau! 'Inau, na Gare'i Inoni, moi re'iau mau, 'oha wai heinagu na'i dora ororiu na'i aba odona God† huunai mena. Wai aho'i mai hungadi rorodo na'i aro!"

† **14:62 Aba odona God:** Dorasi 'a ha'ata'inia do 'ia Jisas 'ai heimarungi goni beia God. Beiraui sae ni Jiu "aba odo" 'e dora hauasa ma ra ha'ahouai sae na awa ei.

⁶³ Mana Na'ohadaaui Piriisi 'a karia i to'oni ana haaria 'anai ha'ata'iniiai 'ado'adona doni mareho na haua Jisas 'a ta'aa di'u. Ma o'ani, "Gaugu bwa'i sibania'a ro'u ta sae 'anai ha'ahunia 'inia ta maho ro'u.

⁶⁴ Naia mou rongoa'a haarimoousi, 'a ha'atee ha'ata'aia God! Mou 'adoma'i he'ua?"

Marau aramia o'ani, "A arari do rai ha'amaesia!"

⁶⁵ Maraugu ngisuai abena, ma tara'i nei rau bibii bwarasiai maana marau rubu'ia 'ini'i rimadaa'i marau ha'atee o'ani, "O'i 'unua tana'ameu mo'o na rubu'i'osi! 'Inia i'oe 'e rarabea, nita?" Ma na'i 'ohasi na sae hehei'oi nara 'omesuriai Ruma Maea ana God rau waia marau hidaria ro'u.

Pita 'A Tohea Jisas

(Matiu 26:69-75; Luk 22:56-62; Jon 18:15-18, 25-27)

⁶⁶ Na'i mau 'oha ra hiiria Jisas, 'ia Pita 'a heinagu mau na'i dora a'ora na'i maanai ruma. Na'i 'ohasi 'e gere urao na tau'aro tanaai Na'ohadaaui Piriisi 'a boi.

⁶⁷ 'Oha na 'omesiai wawaari'u ana Pita na'i 'eu, 'a wana wetewete 'inia ma o'ani, "I'oe ro'usi beia Jisas ni Nasaret!"

⁶⁸ Me 'iia 'a o'ani 'inia, "O pwari'i na! Nau ai'a 'iraraai maho na'o 'unuasi!" Mia Pita 'a suruta'e ma gere hura'a wou na'i maanai bara, mana kua 'a tataraoke.

⁶⁹ Mana gere uraosi 'a 'omesia ro'ua Pita, ma ha'atee o'ani tanaraaui sae rau awa 'isi, 'a o'ani, "E ta'i abe 'iniraaui ro'u naasi!"

⁷⁰ Mia Pita 'a o'ani ro'u, "Ai'a, 'inau ai'a!"

'A ai'a orea miraaui sae rau ura na'isi rau o'ani ro'u 'inia Pita, "Ha'amomori, i'oe 'e ta'i ro'u 'iniraaui. Meu 'iraraa do i'oe 'e sae ni Galili ro'u."

⁷¹ 'Ia Pita 'a tohe baabau 'a o'ani, "Ha'amomori beia God! 'Inau ai'a 'iraraa mora a mo'o namou 'unuasi! 'Onaa wai pwari'i 'ia God 'ai ha'a-mama'ai!"

⁷² Na'i mau madoraasi mana kua 'a ruana'ai tataraoke. Mia Pita 'agu 'adoma'i aho'isi'i ha'atee na 'unu'i a Jisas tanaa, 'a o'ani, "Na kua 'a bwa'i tataraoke ha'arua mau, ma'oi 'unua ha'a-oru'a do 'o ai'a 'iraraaui." 'A 'adoma'i aho'isia magu angi.

15

Ra Waia Jisas Tanaa Paelat

(Matiu 27:1-2, 11-14; Luk 23:1-5; Jon 18:28-38)

¹ Na'i mau haho'oa ta'aa, 'iraaui saemaua na'i Kansol rau goni aho'i hako marau hauai ta'i 'ado'ado 'iniiai here rai haa 'ana Jisas. Naasi marau ho'osi'i rimana Jisas marau waia 'ari tanaa Paelat, na Primia 'anai Provenc.

² Mia Paelat 'a songa'inia Jisas o'ani, "A 'ua? I'oe naasi mwaeraha adaauui Jiu?"

Jisas 'a aramia o'ani, "Naia na'o 'unuasi."

³ Miraaui Na'ohadaa'i Piriisi rau subunia 'ini'i mwani maho ta'a'i.

⁴ Naasi mia Paelat 'a songa'inia aho'i ro'ua Jisas, 'a o'ani "O rongoi maho rau subuni'o 'ini'isi? 'A 'ua? 'A bwa'i maho na'oi 'unua?"

⁵ Mia Jisas 'agu ai'a 'unua'a ta ta'i ha'atee mia Paelat 'a heimwaota'i di'u.

Paelat 'A Hiiria Jisas

(Matiu 27:15-26; Luk 23:13-25; Jon 18:39—19:16)

⁶ 'Ado harisi, 'oha 'iraaui Jiu ra ha'ato'oai rongo 'anai 'adoma'i aho'isiai Roho Aharau, 'ia Paelat 'a matai ha'awatea tanaraaui ta sae narai 'irisia ma'ai ha'ahura'ahia baaniai rumaniho'o.

⁷ Hoita, na'i madoraa narau hiiria Jisas, ra'i sae nara awa na'i rumanih'o, 'inia rau ngahu ha'amaesi'i sae na'i madoraa na rau bonasia ha'ahakoai heimarungi adaui Rom. Ma'e ta'i 'iniraaui naasia Barabas.

⁸ Miraau Jiu rau boi 'anai ha'angonia Paelat do'ai ruhasia ta sae 'onaai bwane hahaua ana.

⁹ Mia Paelat 'a o'ani 'iniraaui, "A 'ua? Mou 'irisia dowai ruhasiai mwaeraha amooui Jiu?"

¹⁰ 'Ia Paelat 'a ha'atee o'asi suria 'a bwane 'iraraa do 'iraaui Na'ohadaa'i Piriisi rau waia maia Jisas suria rau kakawa 'omesia 'iniai rago anai sae nara ta'ahia.

¹¹ Miraau Na'ohadaa'i Piriisi rau ha'angoniraaui wetewete inoni dorai 'unua tanaa Paelat 'anai ruhasia Barabas, 'ia Jisas 'ai abu.

¹² Mia Paelat 'a songa'iniraaui hakoi noni o'ani, "Mawai ha'ahe'uaa mo'o na mou 'unuasi do 'iia 'e mwaeraha amooui Jiu?"

¹³ Marau awara o'ani, "Rabu ahita'inia na'i dadaahoro!"

¹⁴ Mia Paelat 'a songa'iniraaui o'ani, "Iniai 'uaana? 'E 'ino he'ua na haa?"

Marau awara raha ro'u o'ani, "Rabu ahita'inia na'i dadaahoro!"

¹⁵ Mia Paelat 'a ruhasia Barabas, suria 'a rabasia do 'ai aroi ahudaa'i. Ma 'unua tanaraui sae hehei'oi ana'i dorai rohoa Jisas 'iniai hasiwaro baabau marai waia hura'a 'anai rabua na'i dadaahoro.

'Iraui Hehei'oi Ra Haikou 'Inia Jisas

(Matiu 27:27-31; Jon 19:2-3)

¹⁶ Miraau hehei'oi rau waia Jisas siri na'i kae ruma raha ana Paelat. Marau 'unuraui ro'u hako mai sae hehei'oi na'i ruruha adaui.

¹⁷ Marau ha'ato'onia Jisas 'onaai mwaeraha 'iniai to'oni tewa wangawanga. Marau nugaa na'i bwauna i hihiri bwau nara haa 'iniai warorarakai.

¹⁸ Marau ha'atotoo, rau o'ani, "Ha'aasaai mwaeraha adaui Jiu!"

¹⁹ Rau rubu'iai bwauna 'iniai hasi'ei, rau ngisuai abena marau topira'i ruru tanaa do rau ha'ahoua.

²⁰ Na'i 'oha rau ha'ada'ada'a hako 'inia rau rahia aho'i to'oni wangawanga narau ha'ato'onia 'inia marau ha'ato'onia aho'i 'iniai to'oni ana maraugu waia 'ari 'anai rabua na'i dadaahoro.

Ra Rabu Ahita'inia Jisas Na'i Dadaahoro

(Matiu 27:32-44; Luk 23:26-43; Jon 19:17-27)

²¹ 'Oha rau 'ari wou suriai tara na'i Jerusalem, rau heisadoi beiai sae na atana 'ia Saemon. 'Iia 'e sae ni 'omaai Saerin me 'iiasi 'e amana Aleksanda mea Rufas. 'Agu boi baaniai dora na gere ha'atau baaniai 'omaasi ma riutaha mai ro'u na'i tarasi. 'Iraui hehei'oi rau ha'a-'usu'usua do 'ai suru'iai dadaahoro baania Jisas.

²² Rau waia Jisas 'ari na'i dora ra 'unua 'iniai Golgota mana 'ado'ado 'ana, "E Dora ni Korai Bwau Sae."

²³ Marau haua tanaai waen ra doraria 'iniai merisini na ra 'unua 'inia "myrrh" 'anai ha'amaadidi'i dora ra maata'i. Mia Jisas 'a ai'a raba gonohia.

²⁴ Miraau sae hehei'oi rau rabu ahita'inia Jisas na'i dadaahoro. Rau gaasi ha'ara 'anai sadoia tei 'iniraaui nai to'ora'i to'oni ana'i.

²⁵ Mana'i madoraa 'onaai angi siwa na'i haho'oa na rau rabu ahita'inia Jisas na'i dadaahoro.

²⁶ Mara usuai usu-usu na'i baba mara nugaa na'i bwaunai dadaahoro 'anai ha'ata'iniai taha na ha'atari'aa. Rau usua o'ani,

MWAERAHA ADAUI JIU

²⁷ Ma'e waira rua sae beriberi narau rabu ahita'iniraru ro'u suri'i dadaahoro. Ta nei na'i aba odo 'inia Jisas ma ta nei na'i aba maha.

28 'A to'o o'asi do 'ai to'o ha'a-momori taha na ra usua na'i Usu-usu Maea, "Iraaui sae ra 'unua do 'iia 'e ta'i abe 'iniraau sae hehere ta'aa."*

29 Miraau sae ra taha horo 'isi rau ha'atee ha'ata'aia, rau arabwau 'ini ha'atotooa marau o'ani, "Mmm naasi, i'oe na'o 'unua ani do'oi kaii Ruma Maea ana God ma'oi matai ha'a-urasia aho'i na'i raronai oru dangi.

30 'Onaa 'o to'o mena o'asi, 'o ga'i ha'atahi'o haari'o ma 'oi dio mai baaniai dadaahorosi."

31 'Iraau ro'u na Ha'ausuri 'anai Ringe ana'ia Moses miraau Na'ohadaa'i Piriisi rau haikou 'inia. Rau ha'atee hairiu o'ani, "Sae he'ete'i 'a matai ha'atahi'i, me 'iia 'a bwa'i matai ha'atahia haaria.

32 'A 'ua? Naia naasi Ha'atahi, mwaeraha adaui Jiu? 'Onaa gai 'omesiai dio mai ana baaniai dadaahoro ma gaigu hinihini'i ha'atee ana'i."

Mana waira rua ra rabu ahita'ini'ararua beia Jisas, raru ha'atee ha'ata'aia ro'u.

Na Mae Ana Jisas

(Matiu 27:45-56; Luk 23:44-49; Jon 19:28-30)

33 Ma na'i angi ta'i tangahuru mana rua na'i dangisi, 'a kuhi bwarasiai kantri hako tari na'i angi oru.

34 Na'i angi oru abaidangi 'ia Jisas 'a tooro o'ani na'i ha'atee ana, "Elai, 'Elai, lama sabaktani?" Na 'ado'ado 'anai ha'ateesi, 'a o'ani, "God agua! God agua! 'Ini 'uaana na'o gagata'iniau 'inia?"

35 Ma tara'i nei nara ura gaarangi, rau rongoai awara o'asi ana marau o'ani, "Ei, 'a kukua Elaija."

36 Ma 'eba i ta'i sae ma dauai mareho na matai omi'i wai, ma ha'ahonua 'inia waen mahai. 'A nugaa na'i hasi'ei ma taranga'inia ara'a tanaa Jisas do 'ai gonohia. Mana saesi 'a o'ani, "Gai 'ome'ome ga'u 'onaa na 'ia Elaija 'ai boi 'anai ha'adiohia baaniai dadaahoro."

37 Mia Jisas 'a tooro magu mae.

38 Mana bwana ubu-ubu'a nara rohe bwarasia 'inia dora maea na'i Ruma Maea ana God, 'a maakari heihoa, taraawa'a bo ta'eha ma dio.†

39 Na'i 'ohasi 'e na'otara adaui sae hehei'oi na ura na'i maanai dadaahoro ana Jisas. Mana 'oha na re'iai mae na haua, 'agu ha'atee o'ani, "Ha'amomori, 'ia mo'oni huunai garena God!"

40-41 Ma tara'i urao ra suria Jisas ara'a mai na'i Jerusalem. Rau awa gere ha'atau moi baaniai dadaahoro maraugu wanawana 'ari. Tara'i nei beirau, 'ira a Meri ni Magdala, 'ia Salome, mea Meri inana gere Jems mea Joses. Waira orusi rau bwane suria mau mai a Jisas 'anai 'a'auhia na'i madoraa na tatariori na'i Galili.

Josep Ni 'Arimatea 'A Aoraa Jisas

Na'i Wabwa

(Matiu 27:57-61; Luk 23:50-56; Jon 19:38-42)

42 Ma 'ari wou 'anai su'urahi'a mana dangi ni mamaro 'a gaarangi. Miraau na Jiu rau ha'aagau 'anai dangi hauasa adausi.

43 Naasi ma'e sae na atana 'ia Josep ni 'Arimatea, 'a taha beia Paelat. 'Iiasi 'e ta'i sae na'i Kansol na rau hiiriasi a Jisas. Me 'iia 'e sae nara ha'ahoua. 'Iia 'a to'oraai 'adoma'i heitotori 'inia madoraa na 'ia God 'ai marungiraui inoni ana'i. Ma rei'uaa na maaa'u, me 'iia 'a taha beia Paelat ma o'ani 'inia, "Mwaeraha, 'inau 'au raba rahia dioi abena Jisas baaniai dadaahoro. 'A 'ua? 'A goro moi?"

* 15:28 15:28 Tara'i Baebol bwani ra'a ai'a to'oraai tatara 'e 28. † 15:38 15:38 Bwanasi ra rohea bwarasiraui sae baaniai ahii na maea di'u. Ta'i 'iraau Piriisi moi nara matai siri na'iei.

⁴⁴ Mia Paelat 'a o'ani, "A 'ua? 'Ia Jisas 'a mae'a?" Ma soiai bwauodo adaui sae hehei'oi na re'iai mae ana Jisas ma songa'inia.

⁴⁵ Na'i 'oha na sae hehei'oisi 'a 'unua tanaa do'ia Jisas 'a mae'a, 'ia Paelat 'agu ha'awatea Josep 'anai rahia dioi abena Jisas baaniai dadaahoro.

⁴⁶ Mia Josep 'a horiai bwana mamaahui, ma rahia dioi abena Jisas. Naasi 'a ho'ua 'iniai bwana, magu aoraa na'i wabwa ra 'eria na'i abenai kae hau. Naasi mara hugesia ro'u wou i kae hau bwarasiai maanai wabwasi.

⁴⁷ Ma na'i 'ohasi, 'ia Meri ni Magdala mea Meri inana Joses raru awa ro'u 'isi ma raru re'iai dora na ra aoraa na'iei abena Jisas.

16

Jisas 'A Tahi Aho'i

(Matiu 28:1-8; Luk 24:1-12; Jon 20:1-10)

¹ Murinai dangi ni mamarosi, 'ia Meri ni Magdala, 'ia Salome mea Meri inana Jems rau 'ari hori'i waiwai nara dorari'i 'iniai hasi'ei sisi'ini 'anai nuga'i na'i abena Jisas.

² Mana'i wa'aria na'i dangi sade, na'i 'oha na sina 'agu taraawa'a ara'a, rau 'ari na'i wabwa nara aoraa ieia Jisas.

³ Na'i 'oha narau 'a'ari wou mau, rau heisosonga'i hairiu o'ani, "Ia tei nai 'a'auhigaau 'anai hugesiai hau baaniai maanai wabwa?"

⁴ Na'i 'oha naraugu ataha wou na'i dorasi, rau 'omesia doni kae hau raha di'usi ra bwane hugesia'a.

⁵ Na'i 'oha naraugu siri wou na'i wabwa, rau re'iai sae na heinagu na'i aba odo. Mana saesi 'e sae haoru na to'oni 'iniai to'oni mamaahui. Miraau kae mamaa'u di'u.

⁶ Mana saesi 'a o'ani 'iniraaui, "Moi abu mamaa'u! 'Au 'iraraa mou 'ome 'inia Jisas ni Nasaret nara rabua na'i dadaahoro. 'Agu ai'a awa'a 'ini, 'inia 'ia God 'a ha'a-suruta'ea aho'i baaniai mae. 'Ome! Naani dora ra aoraa iei abena.

⁷ Moi aho'i 'ari mamoi maania tanaa Pita miraaui haru tara'i rongoiusuri ro'u o'ani, "Ia Jisas 'ai na'o 'ari Galili 'ini'amou ma moigui sadoia na'iei 'onaai bwane 'unua ana tana'amou.' "

⁸ 'Oha rau hura'a baaniai wabwa, rau hora ha'i 'idi'idi 'iniai mamaa'u. Rau ai'a maania ro'u tanaa ta nei, 'inia rau mamaa'u di'u.*

Jisas 'A Ha'ata'i Tanaraaui Nei Ra Suria

(Matiu 28:9-10, 16-20; Luk 24:13-49; Jon 20:11-23; Buka Tatau'aro 1:6-8)

⁹ Na'i haho'oa na'i dangi sadesi, 'oha 'ia Jisas 'a suruta'e aho'i baaniai mae, 'a ha'ata'i tanaa Meri ni Magdala na'i na'o, i urao na 'ia Jisas 'a taariai biu adaro baania ani.

¹⁰ 'Ia Meri 'a 'ari beiraaui sae hagu hagu goro ana'ia Jisas, na rau ahutotou marau angi. 'A maania tanaraaui ha'ata'i ana Jisas tanaa.

¹¹ Ma na'i 'oha rau rongoa do 'ia Meri 'a re'ia Jisas, do 'a suruta'e aho'i baaniai mae, rau ai'a hinihinia.

¹² 'E ta'i 'oha ro'u 'ia Jisas 'a ha'ata'i tanaai rua rongoiusuri 'oha raru bwabwahe ha'atau baaniai 'omaa. Na'i 'ohasi raru ai'a 'ome 'iraraa Jisas 'inia na 'omehana 'a orisi.

¹³ 'Oha raru aho'i mai, raru maania tanaraaui tara'i rongoiusuri ro'u, me 'iraaui ai'a hinihiniraru ro'u.

¹⁴ Ma ha'ata'i ha'ahako tanaraaui ta'i tangahuru mana waira ta'i rongoiusuri ana na'i 'oha rau ngau goni. Ma ha'atee wetewete tanaraau

* **16:8** 16:8 Tara'i kopi bwani 'iniai bukani ra hako moi na'i tatara 'e waru. Na'i muri ra a'oi wou tatara 'e siwa 'ari tari tatara 'e 20.

'inia ra baabau tahingadaa'i. 'Inia rau ai'a hinihini'i mamaani adaa'i sae na ra re'ia Jisas do 'a tahi aho'i.

¹⁵ Miagu o'ani ro'u 'iniraa, "Moi hura'a suri'i mwane dora na'i marewana, mamoi taroha'inia hura'ai Taroha Goro tanarai mwani noni hako.

¹⁶ 'Iatei nai hinihiniai Taroha Goro maai bwareomaea, 'ai to'oraai tahi tarau beia God. Mana nei na bwa'i hinihini, 'ia God 'ai hiiri ha'a-mama'aia marai gaasia na'i dora ni rongomaata'i.

¹⁷ 'Irai sae ra hinihini, 'ia God 'ai hua tanaraaui mena 'anai hau'i mwani ha'abu'oahu. Ma rai taari'i adaro 'iniai atagu, marai matai ha'atee 'ini'i mwani ha'atee he'ete'i hairiu na ra ai'a 'irara'i mau.

¹⁸ Rei'uaa rai daa'i mwaa ta'a'i ma'ua gonohi'i maho mamaesi'i ma ra bwa'i maesi'i. Ma rai nuga'i rimadaa'i na'i hungadi sae daoha marai goro aho'i."

Jisas 'A Ara'ai Aro

(Luk 24:50-53; Buka Tatau'aro 1:9-11)

¹⁹ 'Oha 'ia Jisas 'a maani'i hako tanaraaui rongoiusuri mareho 'isi, mia God 'a waia'a ara'ai aro ma heinagu na'i aba odona God.

²⁰ Miraau rongoiusuri ana'i rau hura'a suri'i mwani 'omaa 'anai taroha'iniai Taroha Goro. Mia Araha 'a awa beiraaui 'anai 'a'auhiraau. Rau hau'i mwani ha'abu'oahu 'iniai mena ana, ma naasi 'a ha'ata'inia doni mareho narau taroha'ini'i ra ha'a-momori.

Na Taroha Goro 'Onaai Usua Ana St. Luk

Gere Mamaani 'Iniai Bukani

Tara'i 'oha gai wai'ado'ado suria gasi 'onaa na Taroha Goro 'a maani'i mora i mareho ha'a-momori 'inia Jisas ma'ua ai'a. Na Taroha Goro ana Luk naasi nai maani ha'agorohia tanagaau neina gai aidangisia do mareho 'isi ra ha'a-momori.

'I sae nara 'unu Luk 'iniasi 'e dokita ma'e sae na matai usu-usu 'abai'i taha nara to'o na'i 'oha bwani. 'Iiasi 'e geresae goro ana Pol mea Mak ma tara'i abe ro'u 'iniraaui na'i madoraa ana Jisas. Na'i 'oha na 'ia Luk 'a ha'aagau 'anai usuai Taroha Goro ana, 'a hura'a ma siba suri'i taha nara ha'a-momori 'inia Jisas. Taha na 'irisia naasi do 'ai maani'i goro hura'a tanaai gere sae ana, 'ia Tiofilas, i huudi mamaani 'inia Jisas. Na taha na maani'i ma nuga'i dio 'a ha'ata'inia hura'a do'a mamaani ga'u beiraaui i nei narau aidangisia goro a Jisas maagu usu'i. 'Ia Luk 'a mamaani ruhasi'i ro'u i ringeringe adaa'i Jiu na 'igaau mana geresae ana nai bwara 'anai aidangisi'i.

'Ia Luk 'a rabasia do 'ia Tiofilas 'ai aidangisia goro 'iatei naasia Jisas ma'e taha na boi 'ana. Mia Luk haraaria 'a aidangisia ma hinihinia ha'a-momori taha na usu-usu 'abaia.

Gasi 'a rago i mareho na 'o bwani aidangisia 'abaia Jisas. Rei'uaa na o'asi, 'oha na 'oi 'oha'iniai bukani, 'oi 'ome'ome 'ini'i taha na'o ai'a aidangisi'i mau nara haoru tana'o na'i tahingamu.

¹ Tana'o Tiofilas:

'A ragoi nei ra bwane usu'i mamaani 'ini'i mwane maho na hau'ia Jisas na'i madoraa na awa bei'ameu.

² Mana mareho narau usu-usu 'abai'i, ra'i mareho nameu bwane rongo'i beiraaui nei narau wanara'i maa 'ini'i. 'Iraau naasi inoni tatau'aro ana'ia God narau maania hura'a i tarohasi tanaraaui inoni.

³ Hoita, suria 'inau ro'u naasi ta'i abe nau bonasiai siba ha'agorohia ro'u i mamaani 'inia Jisas mau mai na'i taraawa'ana, 'inau nau raba usua ro'u ta buka tana'o. Mwanemaua Tiofilas, 'au haua o'asi

⁴ do neina 'oi 'irara ha'agorohia doni mareho nara ha'ausuri'o 'ini'i ra'i mareho ha'a-momori.

Enjel Gebrel 'A 'Unua Hura'a

Do 'Ia Jon Bwareomaea 'Ai Huta

⁵ Na'i 'oha 'ia Herod 'a mwaeraha na'i Jiudea, 'e Piriisi na atana 'ia Sakaraea na awa ro'u na'i madoraaui. 'Ia 'e ta'i 'iniraaui ruruhai Piriisi nara 'unuraau 'iniai Abaeja. Mana urao ana Sakaraea 'ia Elisabet. 'Ia Elisabet 'e urao baaniai burungana Eron. Mia Eron 'e 'etanai Na'ohadaaui Piriisi na'i 'oha bwani.

⁶ 'Ia Sakaraea mea Elisabet ra'i inoni odo-odo na'i maana God nararu awa suri'i tarau i Ha'atora mana heiatenga'i ana'ia God.

⁷ Ma'ata, raru ai'a to'o gare, suria 'ia Elisabet 'a 'amara, mirarua raru wari hako'a ro'u.

⁸ Hoita, ta'i 'oha, 'ia Sakaraea 'a tau'aro na'i Ruma Maea ana God, 'inia 'a tari mai 'oha anai ruruha ana 'anai hauai tatau'aro adaaui.

⁹ Ma suriai ringeringe adaaui Piriisi na'i 'ohasi. 'Iraau rau gaasi ha'ara 'anai sadoia tei naasi nai siri na'i Ruma Maea 'anai suungiai insens. Naasi ni ha'ara 'a auru hunia Sakaraea magu siri 'anai suungiai insens.

¹⁰ Na'i madoraasi, 'a ragoi noni nara goni mai na'i maanai Ruma Maeasi 'anai ha'arahesi.

¹¹ Ma na'i 'oha na 'ia Sakaraea 'a suungiai insens, 'e enjel ana Araha God 'a ha'amaranga tanaa. 'A ura na'i aba odo 'inia dora maea nara susuungiai insens.

¹² Na'i 'oha na 'ia Sakaraea 'a 'omesia, 'a kaku ta'aa i ahuna, ma mamaa'u di'u.

¹³ Mana enjel 'a ha'atee o'ani 'inia, "'Oi abui mamaa'u Sakaraea! 'Ia God 'a rongoai ha'arahesi amua mana urao amua 'ai ha'ahutaai gare mwane ma'oi ha'a-atana 'inia Jon.

¹⁴ 'Tamura murui wa'ewa'e di'u 'inia, mai rago ro'u i nei narai wa'ewa'e 'inia huta ana,

¹⁵ suria 'iia 'ai ha'i inoni hauasa na'i 'ado'adona Araha God. 'Iia 'ai abui gonohia ta waen, ma'ua gonohia ta wai ni bweu he'ete'i ro'u moi wou. Na Hi'ona Maea 'ai awa beia taraawa'a mau na'i ahuna inana.

¹⁶ 'Ai rago inoni ni Israel nai wairaa aho'i mai 'anai aho'isia Araha God adaau.

¹⁷ 'Iia 'ai to'o mena nai wetewete 'onaaia rarabea Elaija. 'Ai boi na'i na'o 'inia Araha 'anai ha'aagauraaui inoni 'anai boi ana. 'Ai ha'ahaguraaui aho'i ama bei'i gare adaa'i ma'ai rihosi'i 'adoma'idi nei ra hairaesii beia God marai awa 'onaa nei nara awa odo-odo."

¹⁸ Mia Sakaraea 'agu songa'i o'ani, "'Ai he'uai 'iraraa agua doni marehosi 'a ha'a-momori? 'Inia 'inau 'au wari'a, mana urao agua 'a wari'a ro'u."

¹⁹ Mana enjel 'a aramia o'ani, "'Inau Gebrel, minau 'au ura na'i maana God 'ado dangi. 'Ia God na ha'ataariau mai 'anai ha'atee bei'o 'anai mania tana'o i taroha gorosi.

²⁰ Ma'ata suriai ai'a hinihini'i amu'i ha'atee agu'i, i'oe 'oi baanguu tari dangi nai huta i gare amua. Ni ha'atee agu'i rai to'o ha'a-momori na'i huunai madora 'ana."

²¹ Na'i 'ohasi 'iraui mwane inoni ani narau awa 'anai ha'arahesi na'i abau 'omaa rau mamasia Sakaraea do'ai hura'a mai. Rau wai'ado'ado 'inia orea na haa siri raronai Ruma Maea.

²² Ma na'i 'oha nagu hura'a mai, 'a ai'a ha'atee tarairaaui ma haa'i moi ha'ara tanaraui 'inia rimana'i. Na'i 'ohasi rau 'iraraa do'e mareho na ha'amaranga tanaa na'i Ruma Maea.

²³ Ma na'i 'oha na hako i sade ana 'anai tagora, 'ia Sakaraea 'agu aho'i 'ari ruma ana.

²⁴ Na'i gere muri moi mai, 'ia Elisabet 'a to'ora 'inia gare, ma'e rima hura na awa hatara'i moi na'i ruma.

²⁵ Mia Elisabet 'a ha'atee o'ani, "'Naasi 'ia Araha God 'agu goro 'inia ma rahia baaniaui ninima na awa beiau 'inia ai'a to'ora gare."

Enjel 'A 'Unua Hura'a Do 'Ia Jisas 'Ai Huta

²⁶ Na'i ononai hura ana Elisabet na to'ora 'inia gare, 'ia God 'a ha'ataaria enjel Gebrel 'ari na'i 'omaai Nasaret na'i Provensi Galili.

²⁷ I enjel 'a taha beiai gere urao haoru ta'aa na ai'a 'ari mau beia ta mwane. Na atanai gere uraosi 'ia Meri. Mia Meri 'a haguhaui beiai sae na atana 'ia Josep. 'Ia Josep 'a huta mai baaniaui burungana Deved i mwaeraha.

²⁸ Mana enjel 'a 'ariwou ma ha'atee o'ani, "'Wa'ewa'e raha di'u tana'o Meri! 'Ia God 'a awa bei'o ma ha'agorohi'o."

²⁹ 'Ia Meri 'a torakoke i 'adoma'ina ma kakui ahuna 'ini'i 'ado'ado 'ada'i ha'atee 'isi.

³⁰ Mana enjel 'a ha'atee o'ani, "'Abui mamaa'u Meri! 'Ia God 'a 'ome taeni'o.

³¹ I'oe 'oi to'ora 'inia ta gare mwane, ma na'i 'oha nai huta 'oi ha'a-atana 'inia Jisas.

³² 'Ia 'ai ha'i inoni hauasa marai 'unua 'iniaai garena God na ororiu ara'a. 'Ia Araha God 'ai ha'amwaeraha'a 'onaai wauwa ana, 'ia Deved.

³³ Mana garesi 'ai marungiraau tarau i saeni Israel mana heimarungi ana 'a bwa'i 'oha nai hako."

³⁴ Mia Meri 'a ha'atee o'ani, "Ma'ai to'o he'ua i marehosi, na'i 'oha nau ai'a awa mau beia ta mwane?"

³⁵ Mana enjel 'a aramia o'ani, "Na Hi'ona Maea 'ai boi na'i hungamu, mana mena ana God na ororiu ara'a 'ai awa bei'o. Tarana naasi na garesi 'ai maea, marai 'unua 'iniaai garena God.

³⁶ 'O 'iraraai gere inamu a Elisabet? Ra 'adoma'inia do'ia 'agu bwa'i to'o gare'a. Ma na'i 'ohani 'ia 'a to'ora 'iniaai gare, rei'uaa na wari, me naani'a i ononai hura ana.

³⁷ 'Ia God 'a bwa'i mareho nai bwara tanaa."

³⁸ Mia Meri 'a o'ani, "Inau 'e inoni tatau'aro ana Araha God. 'A goro do'ai to'o o'asi tanaau 'onaai 'unua amua." Naasi mana enjel 'agu hano baania.

Meri 'A Garihia Elisabet

³⁹ Na'i murina moi 'ohasi, 'ia Meri 'a ha'ataura'i ma raurau 'ari 'anai 'omaa na'i toroi Jiudea.

⁴⁰ Na'i 'oha na ataha wou na'i 'omaasi, 'a siri na'i ruma ana Sakaraea ma ha'atee wa'ewa'e tanaa Elisabet.

⁴¹ Na'i 'oha 'ia Elisabet 'a rongoai ha'atee wa'ewa'e na haua Meri tanaa, na gare na'i ahuna Elisabet 'a 'ihara'i, mia Elisabet 'a rabe beiai Hi'ona Maea.

⁴² Ma na'i ringe raha 'a ha'atee hurasi o'ani, "'Ia God 'a ha'agorohi'o di'u'i mwane urao hako, mai ha'agorohiai kakae na'oi ha'ahutaa.

⁴³ 'A 'ua gasi na 'ia God 'a ha'agorohiau o'asi 'inia, 'oha i'oe, inana Araha agua 'o boi 'anai garihiau?

⁴⁴ I'oe 'e inana Araha, 'au 'iraraa o'asi, 'inia na'i moi 'oha nau rongoai ha'atee wa'ewa'e amua tanaau, na gare na'i raronai ahuguni 'a 'ihara'i 'iniaai wa'ewa'e.

⁴⁵ 'Ia God 'ai ha'agorohi'o 'iniaai hinihinia amua do'ai to'o ha'a-momori tana'o i taha na duruduru 'inia."

Gana ni Ha'aasa Ana Meri

⁴⁶ Mia Meri 'a o'ani,
"Ni tahingagu 'a ha'aasaa Araha God.

⁴⁷ Mau wa'ewa'e,
'inia 'ia na ha'atahiau.

⁴⁸ 'Ia 'a 'adoma'iniau i inoni tatau'aro ana,
rei'uaa nau ai'a ororiu.

Na'i 'ohani ma 'ari'a, na mwane ugui inoni
rai ha'arangasia hura'a i ha'agorohiau na haua God,

⁴⁹ 'iniaai mareho hauasa na haua tanaau 'iniaai mena ana.
Na atana na maea.

⁵⁰ 'Ia 'a ahu ta'ahirai nei nara ginagina 'inia,
suri'i mwane ugui inoni he'ete'i hairiu.

⁵¹ 'Ia 'a hau'i mwane tatau'aro hauasa 'iniaai mena ana.
'Ia 'a taari 'adara'iniraau nei nara 'adoma'i ha'ata'eraau haariraau.

⁵² 'A ha'a-hura'ahiraau mwaeraha baani'i dora ni heimarungi adaa'i,
ma ha'a-ororiuraau nei rau heiheiraau aho'i.

⁵³ 'Ia 'a hanganiraau 'ini'i mwane mareho goro 'i nei ra hioro,
ma ha'a-taariraau beira'i kongari nei ra toto'ora.

⁵⁴⁻⁵⁵ 'Ia 'a 'a'auhigaau Israel, i inoni tatau'aro ana'i,
ma ahu ta'ahia tarau a Ebrahim mana warowarona'i,

'onaai durua ana tanaraaui wauwa agaa'i."

⁵⁶ Mia Meri 'a ga'i 'onaai oru hura na awa beia Elisabet, maagu aho'i 'ari 'omaa ana na'i Nasaret.

Na Huta Ana Jon Bwareomaea

⁵⁷ Na'i 'oha nagu tari mai madoraa ana Elisabet 'anai ha'ahuta, 'a ha'ahutaai gare mwane.

⁵⁸ 'Iraaui noni ana'ia Elisabet, miraau nei narau mono goni ta'i 'omaa rau rongoai heita'ahi 'ia Araha God na haua tanaa, marau wa'ewa'e beia 'inia.

⁵⁹ Ma na'i warunai dangi, rau goni mai 'anai hauai ringei aha ha'ara tanaai kakae, ma 'anai ha'a-atana 'inia Sakaraea, 'e ha'amarahu suriai amana.

⁶⁰ Mana inana garesi 'a ha'atee wetewete tanaraau o'ani, "Ai'a. Na atana 'ia Jon!"

⁶¹ Miraau inoni rau o'ani 'inia, "Mi'oe ai'a tanei na'i burungamu nai to'oraai atasi."

⁶² Naasi marau haai ha'ara tanaai amanai garesi 'anai 'unua ta ata nai 'irisia nana.

⁶³ Mia Sakaraea 'a hauai ha'ara tanaraau dorai haua tanaa ta mareho 'anai usu-usu na'iei. Ma na'i 'oha narau haua tanaa, 'a usua o'ani, "Na atana 'ia Jon." Na'i 'ohasi na mwane inoni hako ra heimwaota'i di'u.

⁶⁴ Ma na'i mau 'ohasi 'a matai hadahada aho'i ma taraawa'a ha'aasaa God.

⁶⁵ Na mwane inoni na'i 'omaasi 'a kakui ahudaau hako, mana marehosi ra hadanga'inia suri'i mwani 'omaa na'i toroi Jiudea.

⁶⁶ Miraau hakoi nei rau rongoa rau wai'ado'ado surisuria, rau o'ani, "Romwane, 'ai ha'i sae he'ua na'i 'oha nai raha ara'a?" Rau ha'atee o'asi, suria rau aidangisia doni mena ana God 'a awa beiai garesi.

'Ia Sakaraea 'A Gana Ha'aasaa God

⁶⁷ Mia Sakaraea, amana Jon, 'a rabe beiai Hi'ona Maea ma ha'atee rarabeanga'ini'i taha 'ia God na 'unu'i tanaa.

⁶⁸ "Gau magai ha'atee ha'agorohia Arahaga, i God agaui Israel, 'inia 'ia 'a boi 'anai ruhasiraui inoni ana'i.

⁶⁹ 'A haua tanagiai Ha'atahi na wetewete na hura'a baaniai burunganai inoni tatau'aro ana, 'ia Mwaeraha Deved.

⁷⁰ Naasi taha na duruduru 'inia na'i ngoodaa'i rarabea ana'i 'oha bwani.

⁷¹ 'A durua do 'ai ha'atahigia baani'i maerongaga, mei baani'i hakoi mena adaa'i nei ra 'utaigia.

⁷² 'Iia 'a ha'ata'ini'ai ahu heita'ahi ana tanaraaui wauwa agaa'i, suria 'a ai'a kaku'aai duruduru ana tanaraau na wetewete ma maea.

⁷³ Na durudurusi 'a haua tanaa Ebrahim, i wauwa agaau.

⁷⁴ 'A 'unua do 'ai ha'atahigia baaniraui maerongaga, magai abui maaa'u na'i 'oha gai tau'aro tanaa God,

⁷⁵ beiai awaha na maea mana odo-odo na'i maana suri'i mwane dangiga.

⁷⁶ Mi'oe gare agua, rai 'unu'o 'e rarabea ana God ororiu ara'a, suria i'oe 'oi na'otara tanaai Araha 'anai ha'aagauraui noni 'anai boi ana.

⁷⁷ 'Oi taroha'inia tanaraaui inoni i tahi tarau na 'ia God 'ai matai haua tanaraau 'oha nai 'adoma'i nugasi'i ora-ora'a adaa'i.

⁷⁸ Ma'ai o'asi 'ini'ai ahu heita'ahi ana God tanagaau.

'Onaai sina na ara'a, i Ha'atahi aga 'ai boi baaniai aro

79 'anai bewaasiraau nei narau awa na'i kuhi,
 mara awa na'i bahainai heimarungi anai mae.
 'Ia 'ai na'otaragia 'anai hagu goro aho'i beia God."

80 Mia Jon 'a raha ara'a ma ha'i sae raroma goro. 'A 'ari ma awa na'i dora mangasara, tari 'oha na taraawa'a heitaroha'i tanaraau inoni nai Israel.

2

Na Huta Ana Jisas (Matiu 1:18-25)

1 Na'i madoraa na kekerei maua Jon, 'ia Ogastas na mwaeraha adaau Rom, 'a ha'a-urasiyai ringe 'anai usu ata tanaraau hakoi mwane inoni suri'i 'ado dora narau awa na'i bahainai heimarungi ana.

2 (Naasi 'etanai usu ata naigui to'o na'i madoraa na 'ia Kuirinias na Primia 'anai Provensi Siria.)

3 Na mwane inoni hako ra hano baani'i 'omaa nara awa suri'i mara 'ari 'anai usu ata suri'i huudi 'omaa adaa'i.

4 Naasi 'ia Josep 'a hano baaniai 'omaai Nasaret na'i Provensi Galili, ma 'ari na'i Betlehem, 'omaa ana Deved, na'i Provensi Jiudea. 'Ia Josep 'a 'ari Betlehem, suria 'iiasi 'e burungana Deved.

5 Mia Meri nara durua tanaa Josep 'anai waina, raru ta'i hano ro'u 'anai usu ata. Mia Meri 'a bwane to'ora 'iniaai gare.

6 Ma na'i 'oha narau awa na'i Betlehem, 'a tari mai madoraa anai gare 'anai huta.

7 Mia Meri 'a ha'ahutaai 'etanai gare ana, 'e gare mwane. 'A ho'ua 'ini'i bwana, ma ha'adadaoa na'i dora ni hangani mwamwaa, suria na'i ruma ni mahuara 'a ai'a taradarua.

Enjel 'A Taroha'inia Hura'a

Do 'Ia Jisas 'A Huta

8 Ma na'i rodosi, ra'i sae nara awa hura'a baaniai 'omaasi narau 'omesuri'i siip adaa'i.

9 Raugu 'asu'a mana enjel ana Araha God 'a ha'ata'i tanaraau, mana rarahana Araha God 'a bewaasiraau. Miraau mamaa'u di'u.

10 Mana enjel 'a ha'atee o'ani tanaraau, "Mou abui mamaa'u! 'Inau 'au boi beiai taroha na goro tana'amou 'anai ha'a-wa'ewa'eraaui mwane inoni hako.

11 Na de'eni, i nei 'anai ha'atahi'amou na huta mai na'i 'omaa ana Deved. 'Ia naasi Kraest i Araha.

12 Ma naani ha'ara 'inia tana'amou. Moi 'omesiai gare nara ho'ua 'ini bwana nara ha'adadaoa na'i dora ni hangani mwamwaa."

13 Raugu 'asu'a ma'e kae ruruhai enjel rau rurugoni mai beiai nata enjel ani marau ha'atee ha'agorohia God o'ani,

14 "Ha'ahauasaa God na'i aro,
 mana gooroha ana 'ai awa beiraau nei na'i marewana na 'ia God 'a ahugoro 'iniraaui."

15 'Iraaui enjel rau aho'i ara'ai aro, miraau 'omesuri siip raugu o'ani 'iniraaui hairiu, "Gaau magari 'ari 'omesiai taha na to'o na'i Betlehem, na 'ia Araha God na ha'arangasia tanagaau."

16 Marau raurau 'ari Betlehem, rau sadoia Josep mea Meri mana kakae na dadao na'i raronai dora ni hangani mwamwaa.

17 Na'i 'oha narau 'omesiai kakae, rau maani'i mwane mareho na enjel 'a maani'i tanaraau 'iniaai kakaesi.

¹⁸ Miraau nei narau rongo'i, rau heimwaota'i di'u 'ini'i mareho narau maani'i.

¹⁹ Mia Meri 'a nuga'i mareho 'isi na'i 'adoma'ina ma wai'ado'ado suri'i tarau.

²⁰ Miraau na 'omesuri siip rau aho'i. Rau ha'aasaa marau ha'atee ha'agorohia God 'ini'i mwane mareho narau rongo'i marau 'omesi'i. Ra to'o 'onaaiai taha i enjel na maani'i tanaraau.

Jisas Ra Ha'a-atana

²¹ Na'i 'oha na gare 'a tari warunai dangi, ra haua tanaai ringei aha ha'ara marau ha'a-atana 'inia Jisas. Naasi ata na enjel 'a bwane 'unua mau na'i 'oha na ai'a toto mau na'i ahuna inana.

Josep Mea Meri Raru Waia Jisas

'Ari Ruma Maea Na'i Jerusalem

²² 'Agu tari mai madoraa ana Josep mea Meri 'anai ha'a-wariwarirarua aho'i na'i maana God 'onaa Ringe ana'ia Moses na 'unua 'anai haua murinai huta anai gare.* Raru waiai kakae 'ari Ruma Maea ana God na'i Jerusalem 'anai wateai gare tanaa Araha God,

²³ 'inia na Ringe ana'ia Moses 'a o'ani, "Na 'adodi 'etadi gare mwane rai wate'i tanaa Araha God."†

²⁴ Miraru haua ro'u i ho'asi tanaa God suriai ringe na 'ia Moses na 'unua dorai ho'asi 'inia ta rua abei 'ao ma'ua ta rua garei waibora.

²⁵ Na'i 'ohasi 'e sae atana 'ia Simion 'a awa na'i Jerusalem. 'Ia 'e sae odo-odo na awa suriai hei'irisina God. 'Ia Simion 'a mamasiai 'oha na 'ia God 'ai ha'ataaria mai ta nei 'anai ruhasiraau inoni nai Israel. Mana Hi'ona Maea 'a rabe beia,

²⁶ ma bwane 'unua tanaa do 'iia 'a bwa'i mae tari 'oha 'ai 'omesiai Ha'atahi na 'ia Araha God 'a duruduru 'inia 'anai ha'ataaria mai.

²⁷ Mana Hi'ona Maea 'a tau'aro na'i raromana Simion, ma 'ari na'i Ruma Maea. Ma na'i muri, 'ia Josep mea Meri raru ataha mai 'anai watea Jisas tanaa Araha God 'onaa Ringe ana'ia Moses na 'unua.

²⁸ Mia Simion 'a suru'iai kakae ma ha'atee ha'agorohia 'inia God. 'A o'ani, ²⁹ "Araha God, na duruduru amua 'a to'o ha'a-momori'a.

Naasi, 'au wa'ewa'e'a mau ha'aagau 'anai mamaro baaniai marewanani.

³⁰⁻³¹ 'Inia 'inau wanara'i maa 'iniai nei na'o ha'aagaua 'anai ha'atahiraau mwane inoni hako.

³² Na kakaeni 'ai 'onaa raita nai ha'ata'iniai huunai tara tanaraau nei narau ai'a Jiu,

ma'ai ha'a-ororiu'ameu inoni amu'i nai Israel."

³³ Mia Josep mea Meri raru heimwaota'i 'ini'i mareho na 'ia Simion na 'unu'i 'iniai gare adarua.

³⁴ Ma na'i 'oha 'ia Simion 'a ha'agorohiraau hako, magu ha'atee o'ani 'inia Meri, "Ni gareni, 'ai ragoi noni nai Israel nai ha'a-auruhiraau, ma'ata 'ai rago ro'u i nei nai ha'a-ara'ahiraau. 'Inia naasi maho na 'ia God 'a 'ome sigihia 'anai haua. 'Ia 'e ha'ara 'anai ha'ata'inia God tanaraau noni. Ma'ata 'ai ragoi nei narai ura bwarasia,

³⁵ mana mwane mareho nara bainihu suri'i 'adoma'idaa'i rai ha'ata'i hura'a. Mei tana'o Meri, na ahutotou 'ai maata'i 'onaa naihi na ganu tahuraga na'i to'ohunumu."

* **2:22** 2:22 Levitikas 12:1-8 Na'i murinai huta nai hauai gare, na urao 'a do'o'a na'i maana God ma na'i 'ohasi 'ai awa hatara'i na'i ruma. Murinai oru tangahuru mana oru dangi, ni uraosi 'ai hauai ho'asi tanaa God 'anai ha'a-wariwaria aho'i. † **2:23** 2:23 Eksodas 13:2

³⁶ Na'i ro'u i 'ohasi 'e urao rarabea nara 'unua 'inia 'Aana na awa beiraaui na'i Ruma Maea ana God. 'Iia 'e gare ana Panuel baaniai burungana 'Asa. 'Ia 'Aana 'a wari di'u'a, me 'iia 'e nao. 'E biu harisi nararu ha'iwai mwane ana, mana mwane ana 'a mae baania.

³⁷ 'Iia 'a awa 'ari, mana harisina 'agu buna tari na'i waru tangahuru mana hai. 'Ado dangi mana rodo 'a siri Ruma Maea ana God 'anai ririhunga'i. 'A ha'aririta'i ngau ma awa moi 'anai ha'arahesi.

³⁸ Na'i 'oha na hadahada maua Simion beia Josep mea Meri, 'ia 'Aana 'a 'ariwou beiraaui ma ha'atee ha'agorohia God 'inia'i gare adarua. Ma na'i muri, 'a maania Jisas tanaraui nei narau mamasiai boi anai Ha'atahi 'anai ha'atahiraui inoni nai Israel.

³⁹ Na'i 'oha 'ia Josep mea Meri raru hau'i hako i taha na Ringeringe ana God na 'irisia, rarugu aho'i 'ari 'omaa adarua i Nasaret na'i Provensi Galili.

⁴⁰ Mia Jisas 'a raha ara'a beiai wetewete mana madoma, mia God 'a ha'agorohia di'u.

Jisas 'A Awa Na'i Ruma Maea Ana God

⁴¹ Ha'atai na'i 'ado harisi i amana mana inana Jisas raru 'ari Jerusalem 'anai ha'ato'oai rongo 'anai 'adoma'i aho'isiai Roho Aharau.

⁴² Ma'e ta'i 'oha, na taha mai madoraa 'anai 'ari ro'u 'anai rongosi, 'ia Jisas harisina 'a tari ta'i tangahuru mana rua. 'Ia amana mia inana raru waia ro'u 'ari 'anai dangi hauasa naasi.

⁴³ Na'i 'oha na ngaugoni 'a hako, 'ia amana mia inana Jisas raru hano 'anai aho'i 'ari 'omaa adaui, mia Jisas 'a awa mau na'i Jerusalem. Mirarua raru ai'a 'iraraa o'asi,

⁴⁴ 'inia raru 'adoma'inia do'a ga'i awa ta dora beiraaui na'i kae ruruha narau ta'i hanosi. Ma naasi raru hano'a suriai dangi bubu. Ma na'i su'urahi, rarugu taraawa'a siba suria beiraaui nei ana'i, mei beiraaui sae narau hei'irara'i.

⁴⁵ Na'i 'oha nararu ai'a sadoia, rarugu aho'i 'ari Jerusalem 'anai 'ome 'inia.

⁴⁶ 'E rua dangi na hako'a ma rarugu to'oanai heinagu ana beiraaui Ha'ausuri adaa'i Jiu na'i dora a'ora na'i maanai Ruma Maea ana God. 'A bahurongo suri'i taha narau maani'i ma sosonga'iniraaui.

⁴⁷ Miraui nei narau rongoa rau heimwaota'i di'u 'inia'i aidangi ana mana heiarami ana'i.

⁴⁸ Na'i 'oha 'ia inana mia amana raru 'omesia, raru kae heimwaota'i di'u ro'u 'inia. Mia inana 'a ha'atee o'ani 'inia, "Garegu, ni 'uaana na'o haua o'asi 'inia tana'amiria? 'T'amiria amamu 'a kae ta'aabemiria di'u 'ini'o, 'ini bonasiai sadoi'o."

⁴⁹ Mia Jisas 'a o'ani 'inirarua, "Ni 'uaana muru sibaniau 'inia suri'i mwani dora? Muru ga'i 'iraraa do 'inau wai awa na'i ruma ana Amagu!"

⁵⁰ Mia Josep mea Meri raru ai'a aidangisiai taha 'ia Jisas na 'unua tanararua.

⁵¹ Naasi 'ia Jisas 'a aho'i beirarua 'ari Nasaret ma awa bahainai heimarungi adarua. Mia inana 'a nuga'i mareho nara to'o 'isi na'i 'adoma'ina ma wai'ado'ado tarau suri'i.

⁵² Naasi mia Jisas 'a raha ara'a beiai madoma mia God miraui inoni rau wa'ewa'e 'inia.

3

Na Heitaroha'i Ana Jon Bwareomaea

(Matiu 3:1-12; Mak 1:1-8; Jon 1:19-28)

¹ Na'i ta'i tangahuru mana rimanai harisi na 'ia Taebirias na mwaeraha 'anai Rom, 'ia Pontias Paelat naasi na Primia 'anai Provensi Jiudea, mia

Herod Antipas naasi na heimarungi na'i Provensi Galili. 'Ia Pilip, do'orana Herod naasi na heimarungi na'i Provensi 'Ituria mana'i Trakonaetis mia Lisantias na heimarungi na'i Abilin.

² Ma na'i ro'u i 'ohasi, 'ia 'Anas mea Kaeafas nararu Na'ohadaaui Piriisi adaa'i Jiu. Hoita, na'i 'ohasi 'ia God 'a haa'i ha'atee ana'i tanaa Jon, garena Sakaraea, na'i 'oha na 'ia Jon 'a awa na'i 'omaa mangasara.

³ Mia Jon 'a 'ari suri'i 'omaa gaarangi'ai wai Jodan 'anai taroha'ini'i ha'atee ana'ia God tanaraaui inoni. 'A o'ani 'iniraaui, "Moi rihosi baani'i mwane baronga ta'a'i amoo'i mamoi bwareomaea, mia God 'ai 'adoma'i nugasi'i 'inomoo'i."

⁴ Na'i 'oha bwani 'ia rarabea Aisaea 'a usu taroha'iniai boi ana Jon. 'A o'ani,

"E nei nai totoro hura'a na'i dora mangasara. 'Ai ha'atee o'ani, 'Moi ha'aagau! 'Ia Araha 'a gaarangi boi'a.

Moi ha'a-odoodoai tara tanaa.

⁵ Moi anoi'i mwane marawai,

mana mwane bo'obo'o, mana hungahunga moi ha'a-auruhi'i.

Na tara mwakirukiru'a moi ha'a-odoodo'i,

mana tara nara kokekoke'a moi ha'a-aratarai.

⁶ Mana mwane inoni hako raigui 'omesia

do 'ia God 'ai ha'atahiraau.' '*"

⁷ Hoita, 'a ragoi inoni nara boi do'ia Jon 'ai bwareomaeeraau. Me tara'i nei 'iniraaui ra ai'a boi beiai huunai 'ado'ado 'anai rihosi. Mia Jon 'a ha'atee o'ani 'iniraaui, "'T'amou mwane mwaa ta'a'i! 'A 'ua? Mou 'adoma'inia doni bwareomaea moi nai 'a'auhi'amou 'anai bainihu baaniai ha'a-mama'ai na 'ia God 'ai ha'ataaria mai?"

⁸ 'Onaa namou 'irisiai bwareomaea mamoi nugasi'i barongamoo'i nara ta'a'i, mamoi hau'i mareho goro nai ha'ata'inia domou rihosi baani'i ora-ora'a amoo'i. Mou gasigu 'adoma'inia do'ia God 'a bwa'i ha'a-mama'ai'amou do 'iniai huta amooi mai 'onaai warowarona'i a Ebrahim. 'Inau wai 'unua tana'amou, 'ia God 'a matai ha'a-aho'ita'ini'i hau 'ini, marai ha'i warowarona'i a Ebrahim.

⁹ 'Ia God 'a ha'aagau'a 'anai ha'a-mama'airaau nei nara ai'a 'adoma'i orisi. 'A 'onaai nei na ha'aagau 'anai arai'i dioi mwane hasi'ei. 'Onaa nara bwa'i hungu 'ini'i hua goro, 'ai ara dio suri'i raridi mai gaasi'i ara'ai 'eu 'anai suu gata'ini'i."

¹⁰ Miraau inoni rau songa'inia Jon o'ani, "'Onaa na o'asi, ma'e taha namei haua 'anai ha'ata'inia domeu rihosi baani'i ora-ora'a amee'i?"

¹¹ Mia aramiraaui o'ani, "'Iatei 'ini'amou na to'o rua to'oni abe, 'ai hisungia mo'o na pohara 'inia ta ta'i nei, mia mo'o na to'o mahoingau 'ai hisungia mo'o na ai'a to'ora mahoingau."

¹² Ma ra'i sae haha'a takisi nara boi do'ai bwareomaeeraau, rau o'ani 'inia, "Ha'ausuri, me 'imeeu 'e taha namei haa?"

¹³ Mia Jon 'a aramiraaui o'ani, "Moi abui ha'angoni di'uai siha ha'a na gaumani na soia baaniraaui inoni 'anai takisi 'inia."

¹⁴ Ma tara'i hehei'oi ra boi beia mara o'ani 'inia, "Me 'imeeu 'a 'ua? 'E taha namei haa?"

Mia aramiraaui o'ani, "Moi abui ha'a-mama'usiraaui inoni 'anai ha'i ha'a tana'amou, ma'ua to'o haisubuni 'anai rahi ha'a baaniraaui. Moi wa'ewa'e 'iniai siha ra horimou 'inia."

¹⁵ Na 'ado'adodaui inoni hako ra wetewete 'anai 'omesiai Ha'atahi, marau 'adoma'inia do 'ia Jon naasi gasi na 'ia God na 'ome sigihia.

* 3:6 3:4-6 Aisaea 40:3-5

¹⁶ Mia Jon 'a aramiraau o'ani, "Inau 'au bwareomaea'amou 'iniaai wai, mia mo'o nai boi na'i murigu, 'ai bwareomaea'amou 'iniaai Hi'ona Maea mana 'eu. 'Iia 'a ororiu di'uau minau ai'a arari 'anai mwaoro auru 'anai wagasi'i sandol ana'i.

¹⁷ 'Iia 'a ha'aagau 'anai hoairaau noni goro baaniraau nei ta'a'i, 'onaai nei na hoai'i koradi wiit ana'i baani'i kahokahodi. 'Iia 'ai nugaraau noni goro na'i dora goro, ma'ai ha'a-mama'airaau noni ta'a'i, 'onaai nei na nuga ha'agorohi'i koradi wiit na'i dora 'ana mana kahokahodi 'a suu gata'ini'i na'i 'eu na bwarai kuru."

¹⁸ Ma ra'i mwane mamaani he'ete'i hairiu o'asi na 'ia Jon na hau'i 'anai taroha'iniaai Taroha Goro tanaraau inoni. Ma ha'ata'u'uraau wetewete 'anai orisi'i barongadaa'i nara ta'a'i.

¹⁹ Ma'e ta'i 'oha, 'ia Jon 'a raongia Herod Antipas 'iniaai waina ana Herodias, 'e urao ana ga'u a do'orana, ma 'ini'i ro'u i mwane mareho ta'a'i na haa'i.

²⁰ Mana ta'i mareho na ta'aa di'u ro'u wou na haua, naasi i 'unua ana tanaraau sae hehei'oi 'anai gaasia Jon Bwareomaea na'i rumanih'o.

'Ia Jon 'A Bwareomaeaa Jisas
(Matiu 3:13-17; Mak 1:9-11)

²¹ Na'i 'oha na 'ia Jon 'a bwareomaearaau inoni, 'oha narau ai'a nugaa mau na'i rumanih'o, 'ia 'a bwareomaeaa ro'ua Jisas. Ma na'i 'oha 'ia Jisas 'a ha'arahesi, na aro 'a heihoa,

²² mana Hi'ona Maea 'a dio na'i hungana na'i 'omehanai waibora. Ma'e ringe na ao diomai baaniai aro 'a o'ani, "Toe naasi garegu nau ta'ahi'o ororiu, mau ahugoro 'ini'o."

Burungana Jisas
(Matiu 1:1-17)

²³ 'Oha na 'ia Jisas 'a tari oru tangahurui harisi, nagu taraawa'a hura'a 'anai hauai tatau'aro ana 'anai ha'ausuriraau inoni. Na'i 'ado'adodaau inoni, rau 'adoma'inia do'ia Jisas 'e gare ana Josep.

Mia Josep 'e garena Hilae,

²⁴ mia Hilae 'e garena Matat,

'ia Matat 'e garena Livae,

mia Livae 'e garena Melkae.

'Ia Melkae 'e garena Janai,

mia Janai 'e garena Josep.

²⁵ 'Ia Josep 'e garena Matataeas,

'ia Matataeas 'e garena 'Emos.

'Ia 'Emos 'e garena Neham,

mia Neham 'e garena 'Eslae.

'Ia 'Eslae 'e garena Nagai,

²⁶ mia Nagai 'e garena Maat.

'Ia Maat 'e garena Matataeas,

mia Matataeas 'e garena Semein.

'Ia Semein 'e garena Josek,

mia Josek 'e garena Joda.

²⁷ 'Ia Joda 'e garena Joanan,

mia Joanan 'e garena Risa.

'Ia Risa 'e garena Serababel,

mia Serababel 'e garena Saltiel.

'Ia Saltiel 'e garena Nerae,

²⁸ mia Nerae 'e garena Melkae.

'Ia Melkae 'e garena Adae,
 mia Adae 'e garena Kosam.
 'Ia Kosam 'e garena Elmadam,
 mia Elmadam 'e garena 'Eri.
²⁹ 'Ia 'Eri 'e garena Josua,
 mia Josua 'e garena 'Eliesa.
 'Ia 'Eliesa 'e garena Jorim,
 mia Jorim 'e garena Matat.
 'Ia Matat 'e garena Livae,
³⁰ mia Livae 'e garena Simion.
 'Ia Simion 'e garena Jiuda,
 mia Jiuda 'e garena Josep.
 'Ia Josep 'e garena Jonam,
 mia Jonam 'e garena Elaeakim.
³¹ 'Ia Elaeakim 'e garena Milia,
 mia Milia 'e garena Mena.
 'Ia Mena 'e garena Matata,
 mia Matata 'e garena Netan.
 'Ia Netan 'e garena Deved,
³² mia Deved 'e garena Jesi.
 'Ia Jesi 'e garena Obed,
 mia Obed 'e garena Boas.
 'Ia Boas 'e garena Salmon,
 mia Salmon 'e garena Nason.
³³ 'Ia Nason 'e garena Aminadab,
 mia Aminadab 'e garena Admin.
 'Ia Admin 'e garena Anae,
 mia Anae 'e garena Hesron.
 'Ia Hesron 'e garena Peres,
 mia Peres 'e garena Jiuda.
³⁴ 'Ia Jiuda 'e garena Jekop,
 mia Jekop 'e garena Aisak.
 'Ia Aisak 'e garena Ebrahim,
 mia Ebrahim 'e garena Tera.
 'Ia Tera 'e garena Neho,
³⁵ mia Neho 'e garena Sirag.
 'Ia Sirag 'e garena Riu,
 mia Riu 'e garena Peleg.
 'Ia Peleg 'e garena Eba,
 mia Eba 'e garena Sila.
³⁶ 'Ia Sila 'e garena Keinan,
 mia Keinan 'e garena Afaksad.
 'Ia Afaksad 'e garena Siem,
 mia Siem 'e garena Noa.
 'Ia Noa 'e garena Lamek,
³⁷ mia Lamek 'e garena Metusala.
 'Ia Metusala 'e garena Inok,
 mia Inok 'e garena Jered.
 'Ia Jered 'e garena Mahelalel,
 mia Mahelalel 'e garena Kenan.
³⁸ 'Ia Kenan 'e garena Enos,
 mia Enos 'e garena Set.

'Ia Set 'e garena Adam,
mia Adam 'e garena God.

4

Saetan 'A Ohongia Jisas (*Matiu 4:1-11; Mak 1:12-13*)

¹ 'Ia Jisas 'a bwareomaea hako, magu hano baaniai wai Jodan. Na'i 'ohasi na Hi'ona Maea 'a rabe beia. Mana Hi'ona Maea 'a waia 'ari na'i dora mangasara.

² Ma'e hai tangahurui dangi na awa na'i dorasi na 'ia Saetan 'a ohongia na'iei. Na'i madoraasi 'a ai'a ngau, ma na'i ha'ahakona 'ia Jisas 'agu hioro.

³ Mia Saetan 'a ha'atee o'ani 'inia, "'Onaa i'oe garena God, 'oi ha'atee tanaai hauni mai aho'ita'i breidi."

⁴ Mia Jisas 'agu ha'atee o'ani 'inia, "'Na'i Usu-usu Maea ra usu o'ani, 'I sae 'a bwa'i tahi moi 'iniaai huai breidi.' '*"

⁵ Mia Saetan 'agu waia ara'a na'i dora ahaaha. Ma na'i moi gere madora, 'a ha'ata'ini'i hako tanaai mwane kantri na'i marewana hako,

⁶⁻⁷ magu ha'atee o'ani 'inia, "'Onaa na'oi topira'i ruru ma'oi ha'arahesia, 'oi marungi'i mwane kantri 'isi mana toto'ora adaa'i wai hau'i hako tana'o. 'Inia na mwane mareho 'isi ra hau'i hako tanaau, ma 'inau wai matai hau'i tanaa mo'o nawai raba hau'i tanaa."

⁸ Mia Jisas 'agu aramia o'ani, "'Ra usua na'i Usu-usu Maea o'ani, 'Moi ha'arahesia moi Araha God amou, me 'iia moi namoi tau'aro tanaa.' "†

⁹ Mia Saetan 'a waia 'ari Jerusalem ma ha'a-urasia na'i dora ahaaha na'i hunganai Ruma Maea ana God, magu o'ani 'inia, "'Onaa i'oe garena God, 'oi rege auru.

¹⁰ 'Inia ra usua na'i Usu-usu Maea o'ani, "'Ia God 'ai ha'a-taariraau enjel ana'i 'ana'i 'a'auhi'o.

¹¹ Rai dau bwarasi'o 'ini'i rimadaa'i mana uwamu'i ra bwa'i maara 'ini'i hau.' "

¹² Mia Jisas 'a aramia o'ani, "'Na Usu-usu Maea 'a o'ani, 'Moi abui ha'imaania Araha God amou.' "‡

¹³ 'Oha 'ia Saetan 'a ohongia hako Jisas 'ini'i heiohong'i 'isi, 'iia 'agu nugasia 'ana ta 'oha goro naigui sadoia 'ana'i ohongia ro'u.

Taraawa'anai Tatau'aro Ana Jisas (*Matiu 4:12-17; Mak 1:14-15*)

¹⁴ Mia Jisas 'a aho'i 'ari Provensi Galili, mana mena ana Hi'ona Maea 'a awa beia. Na tarohana 'a 'adarara hako 'ari suriai mwane 'omaa na'i Provens naasi, mei suri'i tara'i dora he'ete'i ro'u wou.

¹⁵ Ma na'i 'oha na ha'ausuri suri'i ruma ni ha'arahesi adaa'i Jiu, na mwane inoni hako ra ha'a-aneanea.

Jisas Ra 'Itaa Na'i 'Omaai Nasaret (*Matiu 13:53-58; Mak 6:1-6*)

¹⁶ Mia Jisas 'a aho'i 'ari Nasaret, i 'omaa na raha ara'a iei. Ma na'i dangi ni mamaro adaaui Jiu 'a siri na'i ruma ni ha'arahesi 'onaai bwane hahaua ana. Mia Jisas 'a ura ara'a ma 'oha'i baaniai Usu-usu Maea.

¹⁷ Mana usu-usu nara haua tanaa 'ana'i 'oha'iniasi, 'e dorai usu-usu na 'ia rarabea Aisaea na usua. 'A kehasiai bukasi, ma sadoiai dora 'ana'i 'oha'i ma 'oha'inia hura'a o'ani,

¹⁸ "Na Hi'ona Maea ana Araha God 'a awa beiau,
suria 'iia na 'ome sigihiau

* 4:4 4:4 Diutronomi 8:3 † 4:8 4:8 Diutronomi 6:13 ‡ 4:12 4:12 Diutronomi 6:16

'anai taroha'iniai Taroha Goro tanaraaui pohara.

'Iia 'a ha'ataariau 'anai taroha'inia hura'a

do 'iraau nei nara hunasiraau na'i rumaniho'o rai ha'a-hura'ahiraau dadara'a,

mana nei ra kuru rai 'ome'ome aho'i,

mana nei nara awa ha'ata'airaau rai dadara'a.

¹⁹ Mia Araha God 'a ha'ataariau mai 'anai taroha'inia hura'a

do 'a bwa'i orema mai ha'ata'iniai heita'ahi ana tanaraaui inoni ana'i."§

²⁰ Mia Jisas 'a honosiai buka ma haua aho'i tanaai nei na na'otaranai rihunga'i ma heinagu auru 'anai ha'ausuriraau inoni. Na mwane inoni na'i rumasi rau wana to'obuu 'inia.

²¹ Mia Jisas 'agu ha'atee o'ani 'iniraau, "Na dorai Usu-usu Maea namou rongoa nau 'oha'inia ani, 'a to'o ha'a-momori na'i 'ohani."

²² Miraau hakoi nei narau awa 'isi, ra ha'atee wa'ewa'e 'inia Jisas marau heimwaota'i 'ini'i mwane mareho rongoro goro na maani'i. Miraangu ha'atee o'ani, "E gare moi ana Josep naasi."

²³ Jisas 'a o'ani 'iniraau, "Au 'iraraa domou raba 'unuai dora i ha'atee na o'ani 'iniau, 'Na nei na matai ha'agorohi'i inoni baani'i daoha, 'ai ha'agorohia ga'u haaria 'anai ha'ata'iniai mena ana.' 'Ado'ado 'ana, "Onaa i'oe naasi Ha'atahi, 'oi haa'i na'i 'omaa amua haari'o i ha'abu'oahu nameu rongoa na'o hau'i na'i Kapaniam.' "

²⁴ Mia Jisas 'a o'ani ro'u, "Wai 'unua ha'a-momori tana'amou, ai'a rarabea'a do 'iraau inoni na'i 'omaa ana rai ha'ahoua.

²⁵ Na'i madoraa ana rarabea Elaija na'i 'oha bwani, 'a ragoi nao na'i Israel narau rongomaata'i. Na'i madoraasi, 'e oru harisi mana aba na ai'a rangi ma 'e hioro raha na to'o 'ari hako suri'i 'omaa hako na'i dorasi.

²⁶ Rei'uaa na towa'i o'asi, 'ia God 'a ai'a ha'ataaria Elaija 'anai 'a'auhia ta ta'i nao na'i kantri ana haaria, ma'ata 'e nao na'i 'omaai Sarefat na'i dora ra 'unua 'iniai Saedon na 'ia God na ha'ataaria Elaija do'ai 'a'auhia.

²⁷ Ma na'i madoraa ana rarabea Elaesa, 'a ragoi inoni na'i Israel na sadoiraau i daoha nara 'unua 'iniai lepa. Ma ai'a ta ta'i nei 'iniraau 'ia God 'ai ha'agorohia, ma'ata 'e inoni ni Siria moi na atana 'ia Neman, na 'ia God nagu ha'agorohia."

²⁸ Na'i 'oha na 'iraau inoni na'i ruma ni ha'arahesi rau rongoro'i mareho 'isi, rau taesu'a di'u 'ana Jisas.

²⁹ Naasi rau suruta'e 'anai tariha'inia hura'a Jisas baaniai 'omaasi. Ni 'omaasi 'a awa ta'eha na'i hungahunga. Naasi rau waia 'ari na'i bwaunai rihua na awa gaarangiai 'omaa dorai gaasia dio.

³⁰ Mia Jisas 'a siri hokahoka na'i 'uruhadaau ma hano baaniraau.

*Mamaani 'Iniai Sae Na Bwaunia i Adaro
(Mak 1:21-28)*

³¹ Mia Jisas 'a 'ari Kapaniam, 'e 'omaa na'i Provensi Galili. Ma na'i dangi ni mamaro adaui Jiu, 'a ha-ha'ausuriraau inoni na'i ruma ni ha'arahesi.

³² Mana inoni hako rau heimwaota'i di'u 'ini'i ha'ausuringa'i ana'i, 'inia rau 'ome 'iraraa do'ia 'a huunai 'irara'i mareho na maani'i.

³³ Ma na'i ruma ni ha'arahesi na'i madoraasi, 'e sae na bwaunia adaro na awa 'isi, mana saesi 'a awara raha ara'a o'ani,

³⁴ "Eii! Jisas, saeni Nasaret! 'O raba 'uaameuni? 'O boi 'anai ha-ta'ai'ameu? 'Inau 'au 'iraraa ha'agorohi'o! I'oe nei na maea na'o boi baania God."

³⁵ Mia Jisas 'a ha'atee hurasi tanaai adarosi. 'A o'ani, "'Oi papaku, ma'oi hura'a mai baania mo'osi!" Mana adarosi 'a 'idira'inia mo'osi dio na'i ano huniraa, magu hura'a baania, ma'ata 'a ai'a ha'amaaraai saesi.

³⁶ Na mwane inoni hako ra heimwaota'i di'u mara heisosonga'i hairiu o'ani, "Romwane! 'E tahasi? Ni ha'atee ana'i ra to'o mena mara wetewete di'u! 'A ha'atee moi tanaraaui adaro 'anai hura'a mara hura'a'a."

³⁷ Mana tarohana Jisas 'a 'adarara hako 'ari suri'i mwane 'omaa he'ete'i ro'u wou gariai Kapaniam.

Jisas 'A Ha'agorohi'i Mwani Daoha

He'ete'i Hairiu

(Matiu 8:14-17; Mak 1:29-34)

³⁸ Mia Jisas 'a hura'a baaniai ruma ni ha'arahesi ma 'ari ruma ana Saemon. Ma na'i rumasi 'e urao na mata'i raha di'u na awa iei ma raorao di'u i abena. Mana uraosi 'e hungona Saemon. Miraaugu ha'angonia Jisas 'anai 'a'auhia.

³⁹ Jisas 'a 'ariwou na'i bobonai be'anai uraosi, ma ha'atee wetewete tanaai mata'isi do'ai hura'a baania. Na'i mau 'ohasi, mana mata'i 'a rigisia'a, ma suruta'e ma ha'aagau mahoingau 'adaau.

⁴⁰ Na'i 'oha na aurui sina, ra ragoi nei nara waa'i mai inoni nara sadoi'i mwane daoha he'ete'i hairiu. Mia Jisas 'a dau wou na'i hungadi, mara goro aho'i.

⁴¹ Mia Jisas 'a taari'i hura'a i adaro baaniraaui tara'i sae, mana adaro ra ha'atee hurasi o'ani, "Toesi garena God."

Mia Jisas 'a ha'a-aburaaui wetewete dorai abui ha'atee'a ro'u, suria 'a 'iraraa dorau aidangisia do'ia naasi Ha'atahi.

Jisas 'A Taroha'iniai Ha'atee Ana God

Suri'i Mwane Ruma ni Ha'arahesi

(Mak 1:35-39)

⁴² Ma na'i mau i haho'oa ta'aa na'i nata dangi, 'ia Jisas 'a 'ari haaria na'i dora bwaranga. Miraaui inoni rau siba suria naraugu buna sadoia. Na'i 'oha narau sadoia, raugu ha'atee ha'abwarasia, marau 'unua tanaa do'ai awa ga'u beiraaui na'i Kapaniam.

⁴³ Mia Jisas 'a o'ani 'iniraaui, "Nau wai taroha'inia ma'ata i Taroha Goro 'iniai heimarungi ana God 'ari suri'i tara'i 'omaa ro'u wou, 'inia naasi tarana na 'ia God 'a ha'ataariaui mai 'inia."

⁴⁴ Naasi, mia Jisas 'a 'aariha hairiu 'anai taroha'iniai Taroha Goro suri'i ruma ni ha'arahesi na'i Provensi Jiudea.

5

Jisas 'A 'Ome Sigihiraaui

Rongoiusuri Tahamora Ana'i

(Matiu 4:18-22; Mak 1:16-20)

¹ 'E ta'i 'oha 'ia Jisas 'a ura na'i one na'i bobonai kae bwera i Galili,* mana inoni rau goni mai hunia 'anai bahurongo'i ha'atee ana'ia God, rau ha'asu'isu'ia di'u.

² Ma 'omesiai rua ora na'i wai, gaarangiai one. Miraaui sae ahu-ahuasi narau nuga'i ora 'isi, rau poru wasi orima'ini'i hu'o adaa'i.

* 5:1 5:1 Suri'i mwani Baebol ra ai'a 'unua "kae bwera i Galili," ra 'unua moi "kae bwera i Geneserat." Ma'ata raru ta'isada moi. Geneserat 'e dora na'i bobonai kae bwera i Galili.

³ Miagu ta'e ara'a na'i ora ana Saemon, ma 'unua tanaa do'ai gere usuha'inia hura'a baaniai bobonai one, mia Jisas 'agu heinagu na'i ora 'anai ha'ausuriraaui inoni narau goni wou beia.

⁴ Ma na'i 'oha na mamaani hako tanaraaui inoni, 'agu o'ani 'inia Saemon, "O'i saraa hura'a i ora amua na'i dora su'u mamoi gaasia dioi hu'o, mamoi to'oi'i tara'i mwane ii'a."

⁵ Mia Saemon 'a o'ani 'inia, "Saemaua, meu bona matoo suriai rodo bubu nabongi ani, ma ai'a ta ta'i ii'a namei to'oi'a. Ma'ata mei haua ro'u suriai 'unua amua."

⁶ 'Oha naraugu haua 'onaai 'unua ana Jisas tanaraau, mana hu'o 'a honu'a 'iniai ii'a, 'a gaarangi moi maai ohogao.

⁷ Miraaui booriraaui tara'i abe adaa'i na'i nata ora 'anai boi 'a'au. 'Oha narau ataha mai beiraaui, raugu buna ha'ahonua ro'u i rua ora 'ini'i ii'a, mana ora ra gaarangi marai dodo.

⁸ Na'i 'oha 'ia Pita 'a 'omesia o'asi, 'a topiruru auru tanaa Jisas ma o'ani, "O'i 'ari wou baaniau Araha, 'inau 'e inoni ora-ora'a!"

⁹ 'Ia Pita 'a ha'atee o'asi suria 'a bu'o i ahudaa'i 'ini'i mwane ii'a narau ngahui'i.

¹⁰ Mirarua rua garena Sebedi, 'ia Jems mea Jon nararu 'a'auhia Pita, raru heimwaota'i di'u ro'u.

Mia Jisas 'a o'ani 'inia Pita, "O'i abui maaa'u! Taraawa'a na'i 'ohani ma 'ari'a, 'oi wairaaui mai sae beiau 'onaai rau'i amu'i ii'a na'i wai."

¹¹ Miraaugu usu'i ora ara'ai dora mamata. Rau nugasi'i mwane mareho marau suria Jisas.

*Jisas 'A Ha'agorohia Aho'i Sae Lepa
(Matiu 8:1-4; Mak 1:40-45)*

¹² Mia Jisas 'a 'ariwou ma taha na'i 'omaa na awa iei sae na to'ia i daoha nara 'unua 'iniai lepa. Ni abena 'a 'ome ta'aa hako 'iniai lepa. Mana 'oha na saesi 'a 'omesia Jisas, 'a boi beia ma topiruru ma mwaoro auru na'i ano. Ma ha'angonia wetewetea Jisas o'ani, "Araha, 'onaa 'o mwa'emwa'e, ma'o ga'i ha'agorohiau aho'i baaniai daoha na to'iauni."

¹³ Mia Jisas 'a taranga'inia hura'a i rimana, 'a dau wou beia ma o'ani, "Io, 'au mwa'emwa'e moi, 'oi goro'a aho'i!" Na'i mau 'ohasi, na abena 'agu goro aho'i.

¹⁴ Mia Jisas 'a ha'aabua wetewete o'ani, "O'i abu maania ga'u tanaa ta sae i maho na to'o bei'o. 'O'i 'ari odo-odo beiai Piriisi mai 'iraraa haaria do i'oe 'o goro aho'i. Naasi ma'oi hauai bane amua tanaai Piriisi maai ho'asi 'inia 'onaai 'unua ana Moses, 'anai ha'ata'inia tanaraaui noni do'o goro'a."

¹⁵ Ma rei'uaa na ha'aabua mo'osi, na taroha 'inia Jisas 'agu 'adarara ro'u wou baaniai na'o. Ma ragoi nei ra boi 'anai bahurongo'i ha'ausuringa'i ana'i, ma 'anai ha'agorohiraaui baani'i daoha adaa'i.

¹⁶ Ma'ata 'a ragoi 'oha 'ia Jisas 'a nugasiraaui inoni 'anai 'ari haaria na'i dora bwaranga 'anai ha'arahesi.

*Jisas 'A Ha'agorohiai Nei Na Nugui Abena
(Matiu 9:1-8; Mak 2:1-12)*

¹⁷ Ma'e ta'i dangi na 'ia Jisas 'a ha-ha'ausuri, ra'i Farisei ma tara'i Ha'ausuri ro'u 'anai Ringe ana'ia Moses narau heinagu na'i dorasi. Rau boi baani'i 'omaa na'i Provensi Galili mei Jiudea mei baaniai 'omaa raha i Jerusalem. Mana mena ana Araha God 'a awa beia Jisas 'anai ha'agorohirai nei ra daoha.

¹⁸ Ma na'i 'ohasi, ra'i inoni ra suru'ia mai sae na sadoiai abe nugu mana saesi 'a dadao na'i be'ana. Rau ha'imaania dorai waia siri tanaa Jisas,

¹⁹ magu bwara 'inia rago di'u anai inoni. Mei suriai bwara ana tanaraau, rau suru'ia ta'eha suriai tara hanehane 'anai ta'ehai hunganai rumasi. Hunganai rumasi 'a sada moi. Rau tahangiai dora na'i hunganai ruma, marau toto'oa dioi saesi na'i 'uruhadaaui inoni na'i gaarangiai dora na 'ia Jisas na ura iei.

²⁰ 'Oha 'ia Jisas 'a 'ome 'iraraai hinihinidaau, 'agu o'ani 'inia, "Geresae agua, na ora-ora'a amu'i 'au 'adoma'i nugasi'i hako tana'o."

²¹ Miraau na Farisei mana Ha'ausuri 'anai Ringe ana'ia Moses narau awa 'isi raugu 'adoma'i o'ani haarirau, "I sae he'ua naasi? 'A 'adoma'inia do 'iia naasia God? 'Ia moia God nagau 'iraraa na matai 'adoma'i nugasi'i ora-ora'a! 'Iia 'a ha'atee ha'ata'aia God!"

²² Jisas 'a aidangisiai taha na awa suri'i 'adoma'idaa'i, magu o'ani 'inirau, "A 'ua namou to'oraa 'inia 'adoma'isi?"

²³ Taha na mwada'u? 'Anai 'unua tanaa saesi do'au 'adoma'i nugasi'i ora-ora'a ana'i, ma'ua 'anai 'unua tanaa do'ai ura maai hahano? 'Anai 'unua tanaa mo'osi do'au 'adoma'i nugasi'i ora-ora'a ana'i 'a mwada'u, 'inia 'a bwarai 'iraraa 'onaa ra 'adoma'i nugasi'i ora-ora'a ana'i ma'ua ai'a.

²⁴ Naasi, 'inau i Garee Inoni wai hauai maho namou 'adoma'i ha'abwaraa ma moigu'i 'iraraa do 'au to'oraa ro'u i mena 'anai 'adoma'i nugasi'i ora-ora'a na'i marewanani."

Naasi magu o'ani 'inia sae na abe nugusi, "Nau wai 'unua tana'o, 'oi ura ara'a, 'oi suru'iai be'amu, ma'oi 'ari ruma amua!"

²⁵ Na'i mau 'ohasi na saesi 'a ura ara'a na'i maadau hakoi inoni. 'A rahiai be'ana na dadao iei ma aho'i 'ari 'omaa ana, 'a ha'aasaa God.

²⁶ Miraaui mwane inoni narau 'omesiai marehosi ra bu'o hakoi ahudaa'i, marau ha'aasaa God. Rau honu 'inia mamaa'u marau ha'atee o'ani, "E kae mareho raha di'u nagau 'omesia na'i dangini."

Jisas 'A Soia Livae

(Matiu 9:9-13; Mak 2:13-17)

²⁷ Na'i muri 'ia Jisas 'agu hura'a wou ma 'omesiai sae na heinagu na'i dora ni horihori takisi. Na atanai saesi 'ia Livae. 'Iiasi 'e sae na tatau'aro tanaa gaumani 'anai si'ogoni'i takisi. Jisas 'agu o'ani 'inia, "Livae, 'oi boi suriau 'onaa rongoiusuri agua."

²⁸ Na'i mau 'ohasi, mia Livae 'a ura ara'a ma nugasi'i mwane mareho ana'i ma suria'a Jisas.

²⁹ Naasi 'ia Livae 'agu hauai kae ngaugoni tanaa Jisas na'i ruma ana. Ma ragoi inoni ha-ha'atakisi mana taraani inoni moi nara boi na'i ngaugonisi.

³⁰ Miraau na Farisei, ma tara'i Ha'ausuri 'anai Ringe ana'ia Moses nara aba beirau Farisei raugu ha'atee ha'a-ta'airau rongoiusuri ana'ia Jisas o'ani, "Ni 'uaana namou ngau 'inia beirau sae ha-ha'atakisi mirau sae ta'a'isi?"

³¹ Mia Jisas 'agu aramirau o'ani, "Na sae nara goro moi abedi ra bwa'i rabasiai 'a'au baaniai sae na matai ha'agorohi'i daoha, me 'irau moi nei nara daoha nara rabasiai 'a'au.

³² 'A o'asi ro'u, 'inau boi na'i marewanani, ai'a do 'anai 'a'auhirau inoni odo-odo, ma'ata 'au boi 'anai 'a'auhirau inoni ora-ora'a dorai rihosi baani'i ora-ora'a adaa'i."

Ha'ausuringa'i Bwani 'A Bwa'i 'Ari Goni

Beiai Ha'ausuringa'i Haoru

(Matiu 9:14-17; Mak 2:18-22)

³³ Ma tara'i inoni ra ha'atee o'ani 'inia Jisas, "'Ado 'oha 'irau rongoiusuri ana'ia Jon Bwareomaea mana rongoiusuri adaa'i Farisei ra ha'aririta'i ngau

'anai ha'arahesi. Mi'oe na rongoiusuri amu'i rau ai'a ha'aririta'i ngau moe'a, rau ngau mara gono moi."

³⁴ Mia Jisas 'a aramiraaui o'ani, "'A 'ua? 'T'amou mou 'adoma'inia do 'iraui nei ra awa na'i rongo ni ha'iwai rai ha'aririta'i ngau 'oha na awa beiraaui a mo'o ra ha'aha'iwaia? 'Abwa'i!

³⁵ Ma'ata tari 'oha na nei na ha'iwai rai waia baaniraaui maraigui matai ha'aririta'i ngau 'inia ahutotou adaui."†

³⁶ Mia Jisas 'agu ha'ausuriraaui ro'u o'ani, "'Abwa'i nei 'ai karia mwada'u ta maakari na'i to'oni haoru ana 'anai tata ponosia 'inia dora na maakari na'i to'oni bwani. 'Onaa nai haua o'asi, 'ai here ha'ata'aiai to'oni haoru ana, mana maakari to'oni haorusi, 'a bwa'i 'ome ta'isada beiai to'oni bwanisi.

³⁷ "Nata mareho ro'u, 'abwa'i nei nai matai nuga waen haoru suri'i bei bwani nara tagora'i 'ini'i uri-uri mwamwaa, 'inia na bei bwani ra bwane 'a'asi. Na'i 'oha na waen haoru 'ai su'u, na bei bwani rai pusu. Naasi mana waen rai ahe gata'ini'i, mana bei rai maakari ta'a'i.

³⁸ Na waen haoru rai niga'i ma'ata na'i bei haoru ro'u.

³⁹ Na nei na gonohiai waen bwani na'i na'o, 'agu ai'a rabasia'a ro'u i waen haoru. 'Ai 'unua doni waen bwani na goro di'uai waen haoru."

6

'Iraui Sae Rau Ororiu Di'uai

Dangi ni Mamaro

(Matiu 12:1-14; Mak 2:23—3:6)

¹ Ma'e ta'i dangi ni mamaro adaui Jiu, na'i 'oha 'ia Jisas mana rongoiusuri ana'i rau tahahoro na'i 'ubutadi moui wiit, 'iraui rongoiusuri raugu rahi'i tara'i nei marau rogaroga'i baani'i kahokahodi marau ngaa'i dora ngaungau.

² Ma tara'i Farisei rau o'ani 'iniraaui, "Mou ga'i bwa'i husi'i wiit 'isi. Na'i dangi ni mamaro, i Ringe ana'ia Moses 'a ha'aabuui tau'aro na'i dangisi!"

³ Mia Jisas 'a aramiraaui o'ani, "'A 'ua? Mou ai'a 'oha'inia mamaani 'inia Mwaeraha Deved mana nei narau ta'i hano na'i 'oha narau hioro?

⁴ 'Ia Deved 'a siri na'i Ruma Maea Saira ana God ma ngaa'i bredi nara ha'amaeaa ma hanganiraaui ro'u i nei rau ta'i hano. Na bredisi 'iraui moi na Piriisi narau matai ngaa. Naasi 'ia Deved 'a horosia ro'u i Ringe mia God 'a ai'a taesu'a 'ana."

⁵ Mia Jisas 'a o'ani ro'u 'iniraaui, "'Inau Gare'i Inoni, 'inau 'au matai 'unu'i maho 'iraui sae ra matai haa'i na'i dangi ni mamaro. 'Inia 'inau naasi Araha 'anai dangi ni mamaro."

Sae Na Mae i Rimana

(Mak 3:1-6; Matiui 12:9-14)

⁶ Ma'e ta'i dangi ni mamaro ro'u, 'ia Jisas 'a siri na'i ruma ni ha'arahesi adaui Jiu ma ha'ausuriraaui inoni. Ma na'i 'ohasi 'e sae na mae i rima odona na awa ro'u 'isi.

⁷ Miraaui na Farisei mana Ha'ausuri 'anai Ringe ana'ia Moses rau 'ome'ome 'onaa 'ia Jisas 'ai ha'agorohia aho'i sae na mae i rimanasi, do nei narai subunia do'a hauai tau'aro na'i dangi ni mamaro.

† 5:35 5:34-35 Ni 'ado'ado 'anai heiha'auuni 'a o'ani: Ai'a ta'isada do 'iraui rongoiusuri ana'ia Jisas rai ha'aririta'i ngau 'oha 'ia Jisas 'a awa mau beiraaui. Na'i 'oha 'ia God 'ai waia Jisas baaniraaui, naasi madoraaui goro 'anai ha'aririta'i ngau 'inia ahutotou adaui.

⁸ 'Ia Jisas 'a 'iraraai 'adoma'idaa'i ma o'ani 'inia sae na mae i rimanasi, "O'i suruta'e ma'oi ara'a mai na'i na'o." Mana saesi 'a ura ara'a ma ara'a ura na'i dora na mwane inoni rai matai 'omesia.

⁹ Mia Jisas 'agu o'ani 'iniraau, "Wai songa'ini'amou. 'E taha na Ringe ana'ia Moses 'a ha'awategaau 'anai haua na'i dangi ni mamaro? 'Anai haa'i mareho goro, ma'uasi 'anai haa'i mareho ta'a'i? 'Anai ha'atahiai noni ma'ua 'anai ha'amaesia?"

¹⁰ Mia Jisas 'a wanasiraau hakoi inoni magu o'ani 'inia saesi, "O'i taranga'inia hura'a i rimamu." 'Oha na taranga'inia hura'a i rimana, na rima na ta'aasi 'a goro aho'i.

¹¹ Na'i 'oha na 'iraau Ha'ausuri 'anai Ringe ana'ia Moses miraau na Farisei rau 'omesia o'asi, rau kaeni taesu'a di'u marau ha'aradorado 'inia ta here narai haua 'ana Jisas.

Jisas 'A 'Ome Sigihiai Waira Ta'i Tangahuru

Mana Rua Ha'ataari (Matiu 10:1-4; Mak 3:13-19)

¹² 'E ta'i dangi ro'u, 'ia Jisas 'agu ta'eha ara'a na'i hungahunga 'anai ha'arahesi. Ma'e rodo bubu na ha'arahesi suria tanaa God.

¹³ Na'i haho'oa 'a 'unuraau mai rongoiusuri ana'i beia, ma 'ome sigihiai waira ta'i tangahuru mana rua, na 'unuraau 'inia Ha'ataari.

¹⁴ 'Ia Saemon (na 'ia Jisas na 'unua 'inia Pita),

'ia Andru, do'orana Saemon,

'ia Jems,

'ia Jon,

'ia Pilip

'ia Batolomiu,

¹⁵ 'ia Mati,

'ia Tomas,

mana nata Jems gare ana Alfias,

'ia Saemon baaniai ruruha ra raba taaria hura'a i gaumani adaui Rom baania Israel,

¹⁶ 'ia Jiudas gare ana Jems,

mea Jiudas Iskariot, 'ia mo'o na usuha'inia Jisas tanaraui maerongana'i.

Ni Tatau'aro Ana Jisas Na'i Galili

(Matiu 4:23-25)

¹⁷ 'Ia Jisas 'a dio wou baaniai hungahunga beiraui Ha'ataari ana'i marau ura na'i dora sada. Ma na'i 'ohasi 'a ragoi rongoiusuri ana'i ma tara'i inoni na'i Jerusalem mei suria hako 'ari i Provensi Jiudea nara rurugoni mai na'i dorasi. Ma ra'i nei ra boi ro'u baaniai rua kae 'omaai Taea mana Saedon nararu awa na'i bobonai asi.

¹⁸ Rau boi goni 'anai rongo'i ha'ausuringa'i ana'ia Jisas, ma 'anai ha'agorohiraui baani'i daoha nara sadoiraui. Miraui nei na adaro 'a bwauniraui, 'ia Jisas 'a taari'i hura'a baaniraui.

¹⁹ Na mwane inoni hako rau bonasia dorai hataria, suria na mena ana God na awa beia 'a ha'agorohiraui nei rau daoha.

Wa'ewa'e Mana Ahutotou

(Matiu 5:1-12)

²⁰ Mia Jisas 'a wanasiraui rongoiusuri ana'i ma o'ani, "Ia God 'ai ha'agorohi'amou i nei namou pohara, 'inia 'i'amou moi awa na'i bahainai heimarungi ana God.

²¹ 'Ia God 'ai ha'agorohi'amou i nei namou hioro,

- 'inia 'i'amou moi dauai taha namou 'irisiasi.
 'Ia God 'ai ha'agorohi'amou i nei namou angi,
 'e madoraa nai boi mau namoi da'a ha'i wa'ewa'e.
 22 'Ia God 'ai ha'agorohi'amou i nei ra 'utai'amou
 mara dingai'amou mara 'isi'isi'amou mara ha'atee ha'a-ta'ai'amou,
 suria 'i'amou ra'i rongoiusuri agu'i, 'inau i Gare'i Inoni.
 23 "'Oha na o'asi, moi honu 'inia wa'ewa'e mamoi maomao. 'Inia 'e
 heitahari na raha na 'ia God 'a ha'aagau mamasi'amou 'inia na'i aro. Mamoi
 abui kaku'aa doni wauwa adaa'i ra here ha'ata'airaaui o'asi ro'u i rarabea
 na'i 'oha bwani.
 24 Ma'ata 'ai ta'aa di'u tana'amoui nei namou toto'ora,
 suria mou bwane awa na'i tahitahi na mwada'u
 mana madoraa ni pohara tana'amou 'ai boi mau.
 25 'Ai ta'aa di'u tana'amoui nei namou ngaungau goro 'ohani,
 'inia ni madoraa ni hioro tana'amou 'ai boi mau.
 'Ai ta'aa di'u tana'amoui nei namou da'a 'ege'ege'amou,
 'inia ni madoraa ni angi mana ahutotou tana'amou 'ai boi mau.
 26 'Ai ta'aa di'u tana'amoui nei na 'iraui noni rau ha'atee ha'agorohi'amou
 do 'i'amou ra'i sae goro.
 'Inia na wauwa adaa'i ra ha'atee o'asi ro'u
 'iniraui rarabea pwapwaari'i na'i 'oha bwani.
 Ma rei'uaa na o'asi, mia God 'a ha'a-mama'airaaui moi."

Ha'ausuringa'i 'Anai Ta'ahiraui

Maerongamu'i

(Matiu 5:38-48; 7:12a)

- 27 Mia Jisas 'a o'ani ro'u, "Nau wai 'unua tana'amoui nei namou
 bahurongoau! Moi ta'ahiraui maerongamoo'i mamoi goro tanaraui nei
 ra 'itamou.
 28 Moi ha'angonia God maai ha'agorohiraui nei ra 'uaasi'amou, mamoi
 ha'arahesi 'iniraui nei ra here ha'a-ta'ai'amou.
 29 'Onaa 'ia tei nai hidariai babamu, 'oi rihota'i maai hida ro'u na'i nata
 aba, ma 'onaa 'iatei nai rahia baani'o i to'oni bohura'a amua, nugasiasia mai
 rahia ro'u i to'oni bo siri.
 30 'Iatei nai ha'angoni'o 'inia ta mareho, 'oi haua tanaa. Ma 'onaa ra'i
 mareho amu'i nara rahi'i baani'o, 'oi abu bonasiai rahi'i aho'i.
 31 Ni here na'oi haua tanaa nata sae, 'ai suriai here na'o 'irisia dorai haua
 tana'o.
 32 "'Onaa na'oi ta'ahiraui moi nei narau ta'ahi'o, 'a bwa'i heitahari na'oi
 daua 'inia. Rei'uaa inoni ta'a'i, mara heita'ahi ro'u moi o'asi.
 33 Ma 'onaa 'o goro moi 'iniraui nei nara goro 'ini'o, 'a bwa'i heitahari
 na'oi daua 'inia. 'Iraui inoni ta'a'i mara matai haua ro'u moi o'asi.
 34 Ma 'onaa na'oi hisuhisu moi tanaraui nei na'o 'iraraa dorai hisu aho'i
 tana'o, 'a bwa'i heitahari na'oi daua 'inia. Rei'uaa 'iraui sae ta'a'i mara
 matai hisuhisu ro'u moi o'asi, 'inia 'i'irisia adaaui dorai su'u'i hako tanaraui
 aho'i taha narau hisu 'ini'i.
 35 "Mi'amou moi ta'ahiraui maerongamoo'i mamoi goro 'iniraui. Moi
 hisu tanaraui, mamoi abui 'adoma'inia dorai su'u'i aho'i tana'amou i taha
 namoi hisu 'ini'i. Naasi na heitahari amou 'ai raha, marai 'ome 'iraraa
 do 'i'amou ra'i garena God na ororiu ara'a. 'Inia 'ia God 'a goro 'iniraui
 inoni, rei'uaa na 'iraui inoni rau ai'a ha'atee ha'agorohia ma'ua rau haa'i
 mwane here ta'a'i.
 36 Moi ta'ahiraui inoni 'onaa God na ta'ahiraui hako mwane inoni."

Ha'ausuringa'i 'Iniai Hiiriai Nata Nei

(Matiu 7:1-5)

³⁷ 'Ia Jisas 'a o'ani ro'u 'iniraa, "'Oi abui hiiriai nata nei, mara bwa'i hiiri'o ro'u. 'Oi abui hiiri ha'a-mama'aiatai nata nei, maragu bwa'i hiiri ha'a-mama'ai'o ro'u. 'Oi 'adoma'i nugasiai 'inonai nata nei maraigui 'adoma'i nugasii ro'u i 'inomui.

³⁸ Moi hisuhisu maraigui hisu ro'u tana'amou. 'Inia 'onaa moi hi-hisuhisu, na hisu narai haua tana'amou 'ai di'u ro'u wou, mai honu aharau 'onaai baegi nara ha'aburu ha'agorohia mara ha'ahonua ro'u mau. Na hisu narai haa tana'amou, 'ai suriai hisu namou haua tanaai nata nei."

³⁹ Mia Jisas 'a haa'i ro'u tara'i ha'atee heiha'auu tanaraau o'ani, "Na nei na kuru 'a bwa'i matai uruai nata sae kuru. 'Onaa 'ai urua, 'irarua rarui ahoda hako dio na'i giru.

⁴⁰ Mana rongoiusuri 'a ai'a ahaaha di'uai ha'ausuri ana. Ma'ata na'i 'oha nai daa'i hakoi mwane ha'ausuringa'i ana'i, naasi 'aigui ta'isada beiai ha'ausuri ana.

⁴¹ "Ni 'uaana na'o bonasiai rahia 'iniaai gere mamamo na'i maanai nata nei, ma'ogu ai'a aidangisiai kae mamamo na'i maamu haari'o?

⁴² 'A he'uai 'unua amua tanaai nata nei do'oi 'a'auhia 'anai rahiai gere mamamo baaniai maana, na'i 'oha na i'oe 'o ai'a wana goro 'iniaai kae mamamo na'i maamu haari'o? 'O pwari'i ta'aa! 'Oi rahia ga'u na'i na'o i kae mamamo baaniai maamu neina 'oi matai wana goro 'anai rahiai mamamo baaniai maanai nata nei."

Na Hasi'ei Mana Huana'i

(Matiu 7:16-20, 24-27; 12:33-35)

⁴³ Mia Jisas 'a ha'atee ro'u o'ani, "Na hasi'ei goro 'a bwa'i matai hungu 'ini'i hua ta'a'i, mana hasi'ei ta'aa 'a bwa'i matai hungu 'ini'i hua goro.

⁴⁴ Na hasi'ei goro mana hasi'ei ta'aa 'oi matai 'iraraa 'iniaai huadi. 'A bwa'i nei nai matai husiai huai 'aai mana memeapu suri'i waroraraki, ma'ua suri'i taraani hasi'ei ta'a'i moi.

⁴⁵ 'A o'asi ro'u, ni sae goro ra hura'a mai mareho goro baaniai ngoona, suria ni raromana 'a honu 'iniaai maho goro. Mana sae ta'aa, ra hura'a mai mareho ta'a'i baaniai ngoona, suria ni raromana 'a honu 'iniaai maho ta'aa. 'Inia ni ngoo, naasi na ha'arangasia hura'a i taha na honu 'inia 'i raromanai noni.

⁴⁶ "Ni 'uaana namou 'unu Araha 'iniau mamougu ai'a ha'isuri'i taha nau 'unu'i tana'amou?

⁴⁷ 'Iatei na boi na baturongo ma ha'isuri'i mareho nau 'unu'i, wai ha'ata'inia tana'amou i 'omehana.

⁴⁸ 'Iia 'a 'onaai sae na tagoraai ruma. 'A 'e'eri ganu dio tarana na'i hunganai hau. Na'i 'oha na to'o i rangi raha mana ahe 'a to'iai rumasi, ni rumasi 'a ai'a 'iha'iha, suria 'ia mo'o na tagoraa 'a tagora ha'ababaua goro.

⁴⁹ Mia mo'o na rongo'i ha'atee agu'i magu ai'a ha'isuri'i taha nau 'unu'i, 'a 'onaai sae na tagoraai ruma ana moi na'i ano na ai'a 'e'eri ganu dio tarana. Na'i 'oha na rangi mana wai 'a ahe to'iai rumasi, mana rumasi 'a arobo ma 'adarara!"

7

Hinihinai Ta'i Sae Mwanemaau

Adaui Hehei'oi

(Matiu 8:5-13)

¹ 'Ia Jisas 'a ha'ausuriraa hako inoni na'i dorasi, maagu aho'i 'ari Kapaniam.

² Ma na'i 'omaasi 'e sae na daoha iei 'a gaarangi mae, 'ia mo'osi 'e sae tatau'aro anai ta'i saemaua na'i ruruhani hehei'oi adaui Rom. Mana sae tatau'arosi 'e sae na ta'ahia di'u.

³ Ma na'i 'oha na saemauasi 'a rongo tarohana Jisas, 'agu ha'a-taariraaui tara'i saemaua adaa'i Jiu 'anai 'unua tanaa do'ai boi 'anai ha'agorohia aho'i sae tatau'aro ana.

⁴ Miraau 'ariwou beia Jisas marau ha'abonga'inia wetewete o'ani, "Ia mo'o na ha'ataari'ameu maini, 'a arari do'oi 'a'auhia, suria 'iia 'e sae goro.

⁵ 'A ta'ahigaau i Jiu ma 'a'au 'anai ha'a-uriasiai ruma ni ha'arahesi tana'ameu."

⁶ Mia Jisas 'agu hano beiraaui 'anai 'ari na'i ruma anai saemauasi. Na'i 'oha na gaarangia wou i ruma, ni saemauasi 'a ha'ataari'i ro'u wou tara'i sae 'anai heisadoi beia Jisas 'anai o'ani 'inia, "Araha, 'oi abui tau'aro raha 'anai hano ha'atau, 'inia 'inau 'au ai'a arari do'oi boi na'i ruma agua.

⁷ Minau ai'a ta'isada ro'u 'anai heisadoi bei'o. Ma'ata 'au 'iraraa do 'onaa na'oi ha'atee moi mana sae tatau'aro agua 'ai matai goro'a aho'i.

⁸ 'Au 'iraraa o'asi, suria 'inau 'au to'oraai nei na marungiau na 'inau wai ha'isuri'i heiatenga'i ana'i, minau ro'u 'au to'ora'i ro'u i sae hehei'oi na 'iraaui rai ha'isuri'i ro'u i heiatenga'i agu'i. Na'i 'oha nawai o'ani 'inia ta ta'i 'iniraaui, "Oi 'ariwou 'isi,' 'iia 'ai ha'isuria'a ma'ata. Ma 'onaa nawai o'ani 'inia ta nei 'iniraaui, "Oi boi 'ini,' 'iia 'ai boi'a ro'u ma'ata. Ma 'onaa wai o'ani 'iniai sae tatau'aro agua, "Oi hauai tau'aroni,' 'iia 'ai haua'a ma'ata."

⁹ Na'i 'oha na 'ia Jisas 'a rongo'i mareho na 'unu'ia mo'osi, 'a heimwaota'i di'u ma rihota'i ma o'ani 'iniraaui noni hunga rau surisuria, "Romwane! Nau wai 'unua tana'amou, ai'a ta ta'i saeni Israel nawai 'omesia do'ai hinihini tari 'onaaia mo'osi."

¹⁰ Na'i 'oha narau aho'i wou na'i ruma, i mwane nara ha'a-taariraaui wou beia Jisas ani, rau 'omesia doni sae na daohasi 'a goro'a aho'i.

Jisas 'A Ha'atahia Aho'i

Gare Mwane Anai Nao

¹¹ Na'i muri, 'ia Jisas 'a 'ari 'omaa ra 'unua 'iniai Nein, 'iraaui rongoiusuri mana mwane inoni rago rau ta'i hano beia.

¹² Na'i 'oha na gaarangia wou i maanai bara 'anai 'omaasi, 'a 'omesiai suru'ia ada hura'a mai bwea na awa iei sae na mae na'i 'omaasi, mana sae na maesi 'e gare mwane ana 'e nao. Mana garesi, na'asi'a i ta'i gare ana. Ma ragoi inoni na'i 'omaasi narau awa beiai naosi.

¹³ Na'i 'oha na 'ia Araha 'a 'omesiai naosi, 'a kae ahutotou di'u ma o'ani 'inia, "Oi abui angi."

¹⁴ Naasi 'a 'ariwou ma dau na'i bwea. Miraau nei narau suru'iai bweasi rau ura papaku. Mia Jisas 'a o'ani 'iniai gare na maesi, "Geresae, 'oi suruta'e!"

¹⁵ Na'i 'oha nagu ha'atee o'asi moia Jisas, na gare na maesi 'a heinagu ara'a ma ha'atee. Mia Jisas 'a waia aho'i wou tanaa inana.

¹⁶ Mana mwane inoni hako rau maaa'u, rau ginata'inia God marau ha'aasaa. Rau ha'atee o'ani, "E rarabea hauasa na ha'ata'i mai beigaau na'i 'ohani. 'Ia God 'a ha'ataaria mai 'anai 'a'auhiraau inoni ana'i."

¹⁷ Mana taroha 'inia Jisas 'a 'adarara hako 'ari suri'i mwane dora na'i Provensi Jiudea, mei suri'i mwane dora hura'a wou gariai Provensisi.

Na Tatau'aro Ana Jisas

Mea Jon Bwareomaea (Matiu 11:1-19)

18 Miraau i rongoiusuri ana'ia Jon rau mamaani tanaa 'ini'i mareho na 'ia Jisas na haa'i. Mia Jon 'a soirarua mai waira rua 'ini'i rongoiusuri ana'i

19 'anai ha'a-taarirarua 'ari beia Araha 'anai songa'inia o'ani, "I'oe naasi nei nara 'unua do'ai boi 'anai ha'atahi'ameu, ma'uasi 'e nei he'ete'i namei mamasia ro'u mau?"

20 Na'i 'oha nararu ataha wou beia Jisas raru o'ani 'inia, "'Ia Jon na ha'ataarimiria mai do 'anai songa'ini'o o'ani, "A 'ua? I'oe naasi nei nara 'unua do'ai boi 'anai ha'atahi'ameu, ma'uasi 'e nei he'ete'i namei mamasia ro'u mau?"

21 Na'i ro'u mau madoraa nararu 'ari wousi, na 'ia Jisas 'a ha'agorohi'i mwane inoni nara sadoi'i mwane daoha he'ete'i hairiu, ma taari'i hura'a i adaro baani'i tara'i nei, ma ragoi nei ra kuru na ha'a-'ome'omeraau ro'u.

22 'Ia Jisas 'agu o'ani 'iniraruai rua rongoiusuri ana Jon, "Murui aho'i 'ari ma murui 'unu'i tanaa Jon i mareho namuru rongo'i mana mareho na muru 'omesi'i nau haa'i. Nei ra kuru ra wanawana'a, nei ra pwaki ra hahano'a, nei nara lepa ra goro aho'i, nei ra pwarongo ra rongorongo'a, nei ra mae ra suruta'e aho'i baaniai mae, miraau pohara ra baturongoi Taroha Goro.

23 'Ia God 'ai ha'agorohiai nei na 'omesi'i mareho nau haa'i, ma ai'a 'adoma'i heiruarua'a 'iniau."

24 Na rua rongoiusuri ana'ia Jon raru aho'i 'ari, mia Jisas 'agu mamaani tanaraau inoni 'inia Jon. 'A o'ani, "'A 'ua? Na'i 'oha namou 'ari na'i dora mangasara 'anai baturongoa Jon, 'e taha namou 'adoma'inia domoi 'omesia? 'E sae na orisia tarau i 'adoma'ina 'onaai ade na gegewao?"

25 'E sae he'ua namou hura'a 'anai re'ia? 'E sae na siri suri'i to'oni goro nara 'ome goro di'u? Ai'a! 'Iraau nei ra siri suri'i bwana goro miraau sae toto'ora ra awa suri'i ruma adaa'i mwaeraha, ai'a suri'i dora mangasara.

26 Ma'e tahata namou hura'a 'anai 'omesia na'i dora mangasara? 'E rarabea? Ha'amomori, 'e rarabea, ma'ata 'iia ai'a do'e rarabea moi.

27 'Ia Jon naasi nei na 'ia God na taroha'i 'abaia o'ani na'i Usu-usu Maea, 'Nau wai ha'ataaria wou i noni heitaroha'i agua na'i na'o 'ini'o.

'Iia nai ha'aagaurau noni 'anai boi amua.'*

28 Nau wai 'unua tana'amou, 'ia Jon naasi na ororiu di'u'i hakoi mwane inoni nara huta mai na'i marewanani. Ma'ata, namoiwou ta sae na ai'a taraa ororiu na awa na'i heimarungi ana God, 'a ororiu di'ua Jon."

29 Na'i 'oha na 'iraau mwane inoni, goni beiraau nei 'anai si'ogoni takisi, rau rongo'i ha'atee ana'ia Jisas, rau 'adoma'i aratara doni ha'a-aratara ana God 'a odo-odo. 'Iraausi na 'ia Jon na bwareomaearau ani.

30 Miraau Farisei mana Ha'ausuri 'anai Ringe ana'ia Moses rau 'itaa i taha God na 'irisia tanaraau, suria rau ai'a raba rihosi marau ai'a 'irisia do'ia Jon 'ai bwareomaearau.

31 Mia Jisas 'a o'ani ro'u, "'E taha nawai heiha'auu 'inia nai ta'isada beiraau inoni na'i 'ohani? 'Iraau rau 'ome he'ua?"

32 'Iraau rau 'onaai'i gare na matai ha'ariaria nara hainonora na'i dora ni maketi nara awara o'ani 'ari tanaai nata ruruha, "Ei, meu uuhi'i gana ni hainonora mamou ai'a raba mao, mameu ganari'i gana ni heitori mamou ai'a raba angi."

33 'T'amou mou haha'ariaria o'asi ro'u! Na'i 'oha na 'ia Jon 'a boi na ha'aririta'i ngau breidi mana gono waen, mou 'unua do 'e adaro na bwaunia.

34 Ma na'i 'oha nau boi, Gare i Inoni, mou re'ia do 'au matai gono waen mau matai ngaungau, mamou 'unua do'au ngangaura'a mau bweu 'ini

* 7:27 7:27 Malakae 3:1

gonohiai waen, ma do 'inau 'e sae goro adaau i noni ha-ha'atakisi miraaui inoni ta'a'i.

³⁵ Ma'ata, na awaha odo-odo adaa'i nei narau hinihini'i ha'ausuringa'i amiria Jon 'ai ha'ata'inia hura'a i madoma nara haa'i ha'ausuringa'i 'isi."

Jisas 'A 'Adoma'i Nugasiai

'Inonai Urao Ora-ora'a

³⁶ Ma'e ta'i 'iniraaui Farisei na ari'ahua Jisas 'anai ngau beia na'i ruma ana. Mia Jisas 'a siri wou na'i rumasi ma heinagu auru 'anai ngau.

³⁷ Ma na'i 'omaasi 'e urao na ora-ora'a di'u na awaiei. Na'i 'oha na uraosi 'a 'iraraa do'ia Jisas 'a awa na'i rumasi, 'a siri mai beiai gere bei 'ome goro na honu 'iniai rumu na si'ini goro di'u.

³⁸ 'A siriwou ma ura na'i odohanai uwana Jisas ma angi. Na'i 'oha na angi, 'a ha'abunibuniai uwana'ia Jisas 'iniai wainai maana, ma ha'amaahaa 'iniai warihuna. 'A ngooniai uwana'i, ma ringisiai rumusi na'i uwana'i.

³⁹ Ma na'i 'oha na Fariseisi 'a 'omesiai mareho na haua i uraosi, 'agu 'adoma'i o'ani haaria, "'Onaa 'e rarabea naasi, 'a ga'i 'iraraa moia mo'o na daai uwanasi, ma ga'i 'iraraa doni uraosi 'e urao ta'aa."

⁴⁰ 'Ia Jisas 'a o'ani 'iniai Farisei, "Saemon, 'e mareho nau raba 'unua tana'o."

Mia Saemon 'a o'ani, "'E taha ha'ausuri?"

⁴¹ Mia Jisas 'agu o'ani 'inia, "'E waira rua nararu kaoni ha'a beiai noni toto'ora na matai wate'i ha'a tanaraau nei narau raba kaoni 'iniai siha ha'a narau 'irisi'i. 'E ta'i na kaoni 'iniai rima merui korai silva, ma'e ta'i 'e rima 'arangi.

⁴² 'Iraruai waira ruasi, ai'a ta ta'i 'iniraru naigui su'ua aho'i kaoni ana, suria raru ai'a to'o ha'a arari. Mana mareho na hauai noni toto'orasi, 'a kaku'a'i kaoni adaru'i ma 'adoma'i nugasiraru. Hoita, 'o 'adoma'inia do 'iatei 'iniraruai waira ruasi nai ta'ahia di'ua mo'o nararu kaoni beiasi?"

⁴³ Mia Saemon 'a o'ani, "'Inau 'au 'adoma'inia do'ia mo'o na kaoni raha."

Mia Jisas 'agu o'ani 'inia Saemon, "'O odo ha'atai."

⁴⁴ Mia Jisas 'a rihota'i wou, 'a wanasiai uraosi ma o'ani 'inia Saemon, "'O 'iraraai uraoni? 'Ioe 'o ai'a haa ta wai tanaau 'anai wasi'i uwagu na'i 'oha nau sirimai na'i ruma amua, me'ia 'a ha'abunibuni'i uwagu 'iniai wainai maana, ma ha'amaha'i 'iniai warihuna.

⁴⁵ Mi'oe 'o ai'a ha'amaotoau 'inia ta haingoni. Me'ia 'a ai'a mamarota'i ngoonia moe'a mau i uwagu'i, taraawa'a mau na'i 'oha nau sirimai.

⁴⁶ Ma ai'a rumu na'oi haua 'anai bwaugu, me uraoni 'a hauai rumu na si'ini goro di'u 'anai uwagu'i.

⁴⁷ Mawai 'unua tana'o, na mwane ora-ora'a ana'i ra 'adoma'i nugasi'i hako tanaa. Naia na ta'ahiau di'u 'iniasi. Mana nei na ai'a to'ora'i mwane ora-ora'a rago 'anai 'adoma'i nugasi'i, na heita'ahi ana 'ai kekerei moi."

⁴⁸ Mia Jisas 'agu o'ani 'iniai uraosi, "Na ora-ora'a amu'i ra 'adoma'i nugasi'i hako tana'o."

⁴⁹ Miraaui nei narau heinagu na'i dora ngaungau raugu o'ani haariraaui, "'E sae he'ua naani na matai 'adoma'i nugasi'i 'ini'i ora-ora'a adaa'i inoni?"

⁵⁰ Mia Jisas 'agu o'ani 'iniai uraosi, "I hinihinimu na 'ia God na ha'atahi'o 'inia. 'Oi 'ariwou dadara'a."

8

Urao Narau Matai Hano Beia Jisas

'Anai 'A'uhia

¹ Na'i muri, 'ia Jisas 'agu 'aariha ro'u 'ari suri'i 'omaa raha mei gere 'omaa na'i Provensi Galili 'anai taroha'iniai Taroha Goro 'iniai heimarungi ana God. Mana waira ta'i tangahuru mana rua Ha'ataari ana'i rau ro'u beia.

² Ma ro'u ra'i urao na 'ia Jisas 'a taari'i adaro baaniraa, ma ra'i nei na ha'agorohiraa ro'u baani'i daoha. Tara'i nei 'iniraa naasia Meri ni Magdala na 'ia Jisas 'a taariai biu adaro baania,

³ mia Susana, mia Joana, i urao anai sae ra 'unua 'inia Kusa. 'Ia Kusa 'e sae na tatau'aro tanaa Herod 'anai 'omesuri'i mwane toto'ora ana'i. 'Iraaui urao 'isi beiraa tara'i urao ro'u narau wate'i ha'a adaa'i 'anai 'a'auhia Jisas mana rongoiusuri ana'i 'ini'i taha narau 'irisi'i.

Ha'atee Heiha'auu 'Iniai Sae

Na Rarasanga'ini'i Korai Wiit

(Matiu 13:1-9; Mak 4:1-9)

⁴ 'E ta'i dangi, 'e kae ruruhai inoni baani'i mwane 'omaa he'ete'i hairiu rau boi 'anai bahurongoa Jisas. Mia Jisas 'agu hua tanaraaui ha'atee heiha'auu na o'ani,

⁵ "'E ta'i 'oha na 'e ta'i sae na hura'a 'anai hasi korai wiit na'i mou ana. Ma na'i 'oha na rarasanga'ini'i kora, ra'i nei nara to'o na'i tara na sae ra buuri'i, mana gere manu ra dio mara ngaa'i.

⁶ Ra'i kora ra to'o na'i ano hunganai hau. Ma na'i 'oha nara tahi ara'a nagu raongi'i sina, mana kora nara tahi ra mae moi aho'i, suria 'a maamaha i dora ra tahi ei.

⁷ Ra'i kora ra to'o suri'i dora nara tahi suri'i waroraraki. Naasi na'i 'oha nara tahi ara'a, ra mae aho'i moi suria ni waroraraki ra agu ha'amaesi'i.

⁸ Ma ra'i nei ra to'o na'i ano goro, mara tahi goro ara'a mara hungu. Mana hungu nara haa'i ra rago di'u'i ro'u wou i siha korai wiit na hasi'i." Jisas 'agu ha'ahakoai hadahada ana o'ani, "Tei na to'o karinga 'anai rongo 'ai bahurongoa, mai aidangi tarihana."

Taranai Taha Jisas Na Haa'i

'Ini'i Ha'atee Heiha'auu

(Matiu 13:10-17; Mak 4:10-12)

⁹ Miraau na rongoiusuri ana'ia Jisas rau songa'inia 'iniai 'ado'ado 'anai ha'atee heiha'auu na hauasi.

¹⁰ Mia Jisas 'agu o'ani 'iniraa, "Na'i na'o, 'ia God ai'a ha'arangasia he'ua i marungiraa nai haai noni ana'i. Me na'i 'ohani 'a ha'ata'inia tana'amou. Mei tanaraaui nei narau ai'a hinihini mau, wai hau'i ha'atee heiha'auu tanaraaui. Wai hua o'asi neina rei'uaa narai towa'i 'ome'ome marau bwa'i matai 'ome 'iraraa, ma'uasi rai towa'i bahurongo marau bwa'i aidangisia."*

Jisas 'A Ha'atee Ruhasiai Heiha'auu

'Iniai Sae Na Hasi Korai Wiit

(Matiu 13:18-23; Mak 4:13-20)

¹¹ "Naani 'ana 'ado'ado i ha'atee heiha'auu 'iniai sae na hasi korai wiit: Ni korai wiit, naasi ha'atee ana'ia God.

¹² Mana kora na'i tara, naasi 'iraaui nei ra rongo'i ha'atee ana'ia God, mia Saetan 'a boi ma ha'akaku'araaui aho'i 'ini'i, dorau gasi hinihini marau tahi.

¹³ Ni kora na'i hunganai hau, naasi 'iraaui nei ra dau'i ha'i wa'ewa'e i ha'atee ana'ia God. Mara ai'a daa'i ore'a 'inia na ha'atee ra ai'a ganu dio na'i tahingadaa'i 'onaai hasi'ei ra ai'a ganu i raridi. Tari 'oha raugu siri sadoi'i moi mareho bwara suri'i tahingadaa'i, marau gagata'ini'i hako aho'i mwane ha'atee.

* 8:10 8:10 Aisaea 6:9

¹⁴ Ni kora nara awa suri'i waroraraki, naasi 'iraau nei rau rongo'i ha'atee ana'ia God ma ai'a orea mana 'adoma'idaa'i ra torakoke 'ini taraani mareho marau 'adoma'i riu 'iniaai toto'ora mana mwane hei'irisi anai abe. Tarana naasi, 'a ai'a ta mareho nai goro do'ai hura'a mai baani'i tahingadaa'i.

¹⁵ Mana kora na'i ano goro, 'a ura 'iniraau nei ra rongo'i ha'atee ana'ia God mara nuga ha'agorohi'i suri'i tahingadaa'i nara goro mara odo-odo. Rau dau baabau tarau suri'i ha'atee ana'ia God mana mwane mareho goro ra hura'a mai baani'i tahingadaa'i."

Marewa 'Ai Rara Hura'a
(Mak 4:21-25)

¹⁶ Mia Jisas 'a o'ani ro'u, "A bwa'i nei nai suu raita moi 'anai nugaa na'i bahainai rabo'o ma'ua bahainai bwea, 'ai nugaa ma'ata na'i dora ni toki raita 'anai bewaasiraau inoni nara sirimai na'i ruma.

¹⁷ 'A o'asi ro'u. Na mwane mareho nara awa bainihu suri'i ha'atee agu'i, raigui ha'ata'i hura'a mau.

¹⁸ Naasi moi bahubahu rongo goro suri'i taha namou rongo'i. Suria 'iatei na aidangisi'i mareho nau maani'i ma araisuri'i, 'ia God 'ai a'oa tanaai aidangi na bwane to'oraa. Mia mo'o na 'adoma'inia do 'a aidangisi'i mareho nau maani'i magu ai'a araisuri'i, na gere aidangi na to'oraasi, 'ia God 'ai rahia baania."

Huudi Nei Ana'ia Jisas
(Matiu 12:46-50; Mak 3:31-35)

¹⁹ 'Ia inana Jisas miraau do'orana'i rau 'ariwou 'anai 'omesia, mei suriai rago anai inoni, 'a bwara tanaraau taha beia na'i ruma na awa iei.

²⁰ Ma'e ta'i sae na o'ani 'inia Jisas, "Inamu miraau do'oramu'i neiraau hura'asi, maraugu raba re'i'o."

²¹ 'Ia Jisas 'agu ha'atee o'ani, "Na huunai inagu mana do'oragu'i naasi 'iraau nei nara bahurongo'i ha'atee ana'ia God marau ha'isuri'i."

Jisas 'A Ha'apapaku'i Tabaosi
(Matiu 8:23-27; Mak 4:35-41)

²² Ma'e ta'i dangi 'ia Jisas miraau rongoiusuri ana'i rau ta'e ara'a na'i ora ma ha'atee o'ani 'iniraau, "Gaau magai 'ari nata batarau 'iniaai bwera." Miraaugu tahamora ha'aro'asi 'ari.

²³ Na'i 'oha narau 'a'ari mau, 'ia Jisas 'a dadao moi auru ma mauru'a. Raugu 'asu'a ma'e ro'a mana tabaosi raha na to'iraau'a na'i bwersi, mana ora 'a gaarangi moi maai dodo suria 'a honu 'iniaai wai.

²⁴ Miraau rongoiusuri rau 'ariwou ha'araia Jisas, rau ha'atee o'ani, "Saemaua, Saemaua! Gai dodo'a naani."

'Ia Jisas 'a suruta'e ara'a ma ha'atee wetewete tanaai ro'a mana tabaosi do rarui papaku. Na'i 'ohasi, na ro'a mana tabaosi raru araisuria, ma biowaa goro aho'i.

²⁵ Mia Jisas 'agu ha'atee o'ani 'iniraau rongoiusuri ana'i, "A 'ua? Nahei hinihinimoo'i?"

Miraaugu mamaa'u marau kae heimwaota'i di'u, rau heisonga'i hairiu o'ani, "Romwane, 'e sae he'ua naasi? Na'i 'oha na ha'atee tanaai ro'a mana tabaosi, raru araisuria."

Sae Na Ragoi Adaro Ra Bwaunia
(Matiu 8:28-34; Mak 5:1-20)

²⁶ 'Ia Jisas miraau rongoiusuri ana'i raugu taha wou na'i dora ra 'unua 'iniaai Gerasa, na'i nata batarau 'iniaai kae bwera i Galili.

²⁷ Na'i 'oha na 'ia Jisas 'a siriwou na'i one, 'a heisadoi beiai sae ni dorasi na ragoi adaro na bwaunia. 'Iia 'a awa ha'i wa'aroko mai ore'a, ma ai'a awa na'i ruma, 'a awa moi suri'i wabwa nara toringi'i ei sae mae.

²⁸⁻²⁹ 'A ragoi 'oha na adaro 'isi ra ha'a-bweubweu'aa. Ma rei'uaa narai ho'osi'i uwana'i mana rimana'i 'ini'i arihau marai nuga'i sae 'anai 'omesuria, 'iia 'ai 'idira'i mosi'i moi arihau, mana adaro 'isi rai ha'a-'usu'usua 'anai 'ari 'anai awa na'i dora mangasara. Hoita, na'i 'oha na 'ome to'oana Jisas, 'a boi ma topiruru auru tanaa. Mia Jisas 'a o'ani, "Adaro, 'oi hura'a baaniai saeni!" Mana saesi 'a awara raha ma o'ani, "Jisas garena God ororiu ara'a, 'o raba 'uaauni? Nau ha'angoni'o, 'oi abui ha'a-mama'aiiau!"

³⁰ Mia Jisas 'a songa'iniai saesi o'ani, "'Iatei atamu?"

Mia aramia Jisas o'ani, "Ni atagu 'ia Kae Ruruha." 'A 'unua o'asi suria 'e kae ruruhai adaro narau bwaunia.

³¹ Marau ha'anongia wetewetea Jisas do'ai abui ha'a-taariraaui 'ari na'i dora ni rongomaata'i 'anai ha'a-mama'airaaui.

³² Ma na'i bobonai abaaba gaarangiraaui, ra'i mwane boo nara suasua 'isi. Mana adaro 'isi rau bongania Jisas 'anai ha'a-taariraaui 'anai siri suri'i boo 'isi. Mia Jisas 'agu ha'awateraaui.

³³ Na'i 'oha na adaro 'isi ra hura'a baaniai saesi, rau siri suri'i boo 'isi. Mana mwani boo 'isi ra 'eba dio suriai ahana mara rege dio na'i wai mara dodo hako.

³⁴ Na'i 'oha 'iraau nei nara 'omesuri'i boo 'isi rau 'omesia o'asi, rau 'eba 'ari 'anai taroha'inia tanaraau inoni na'i 'omaa, mei tanaraui nei narau awa hura'a wou baaniai 'omaa.

³⁵ Na mwane inoni ra 'ari 'anai 'omesiai taha na to'o. Na'i 'oha narau ataha wou beia Jisas, rau 'omesiai sae na taari'i hura'a baania i adaro 'isi, 'a heheinagu gaarangia Jisas. 'A ho'o bwana aho'i mana aidangina 'a odo-odo aho'i. Na'i 'ohasi na inoni rau maaa'u hako.

³⁶ Miraau nei narau 'omesiai maho na hauasi a Jisas, rau taroha'inia hura'a hako tanaraui noni i he'ua nagu goro aho'i 'inia i saesi.

³⁷ Miraau saenai dorasi rau 'unua tanaa Jisas do 'ai hura'a baaniai dorasi, 'inia rau maaa'u raha di'u. Mia Jisas 'a ta'e ara'a na'i ora ma ha'aagau 'anai hano baaniai dorasi.

³⁸ Mana nei na 'ia Jisas 'a taari'i adaro baania, 'a ha'angonia wetewete 'anai hano beia, mia Jisas 'a o'ani 'inia,

³⁹ "Abu, ma'ata 'oi 'ari 'omaa ma'oi taroha'inia tanaraui inoni taha na 'ia God na haua tana'o."

Naasi 'ia mo'osi 'agu aho'i 'ari 'omaa ma taroha'inia tanaraui mwane inoni hako i mareho na 'ia Jisas 'a haa'i tanaa.

'E Gare Urao Na Mae

Mana Urao Na Adoiai 'Abu Raha (Matiu 9:18-26; Mak 5:21-43)

⁴⁰ Na'i 'oha 'ia Jisas 'a ta'e ataha aho'i mai, 'e kae ruruhai inoni narau ha'amaotoa, suria rau 'iraraa do'ia 'ai aho'i mau mai.

⁴¹ Ma'e ta'i 'iniraaui na'otara na'i ruma ni ha'aragesi na'i 'omaasi 'a boi ma topiruru auru tanaa ma bongania do rarui ta'i 'ari na'i ruma ana. Atanai saesi 'ia Jaeras.

⁴² 'Iia 'a bongania Jisas, suria na gare urao ana na harisina 'e ta'i tangahuru mana rua, 'a gaarangi mae maagu naasi'a i ta'i gare urao'a ana.

Na'i 'oha na 'ia Jisas 'a hano 'anai 'ari na'i ruma ana Jaeras, rau ha'asu'isu'ia di'u 'iniai rago anai inoni.

⁴³ Ma'e urao na to'ia i 'abu raha suriai ta'i tangahurui harisi mana rua na awa ro'u na'i 'ohasi. Mana daohasi 'a bwara dona ta sae 'ai ha'agorohia baania.†

⁴⁴ Na uraosi 'a 'ariwou na'i murina Jisas ma karohiai gaonai to'oni tewa ana. Ma na'i 'oha na karohia mau wou, na'i mau i 'ohasi na 'abu 'a papaku.

⁴⁵ Mia Jisas 'a ha'atee o'ani, "Ia tei 'ini'amou na karohiau?"

Miraaui noni rau tohe hako, mia Pita 'a ha'atee o'ani, "Araha, 'a bwarai 'iraraa, 'inia na inoni ra rago mara ha'asu'isu'i di'u!"

⁴⁶ Mia Jisas 'a ha'atee o'ani, "Magu 'e sae na karohiau 'inia 'au arungana do mena agua, 'e sae na goro aho'i 'inia baaniai daoha."

⁴⁷ Na'i 'oha na uraosi 'a 'iraraa do 'a bwa'i matai bainihu mwada'u, 'a 'idi'idi 'iniai maaa'u. 'A boi ma topira'i ruru auru tanaa Jisas. Ma na'i maadaa hako inoni 'a ha'arangasia hura'a i taranai taha nagu karohia 'inia i to'oni ana Jisas, ma taroha'inia tanaraau i hasi goro aho'i ana moi na'i 'ohasi baaniai daoha.

⁴⁸ Mia Jisas 'a o'ani 'inia, "Ina, na hinihinimu na ha'agorohi'o aho'i. 'Oi 'ariwou dadara'a."

⁴⁹ Mau na'i 'oha na 'ia Jisas 'a ha-hadahada mau, 'e sae na ataha mai baaniai ruma ana Jaeras na o'ani, "Jaeras, ni gare amua 'a hako'a. 'Oigu abu 'unua'a i ha'ausurisi 'anai 'ari!"

⁵⁰ 'Oha na 'ia Jisas 'a rongoa o'asi, 'a ha'atee o'ani 'inia Jaeras, "Oi abui maaa'u, 'oi hinihini moi mana gare amua 'ai goro aho'i."

⁵¹ Na'i 'oha na ataha wou na'i ruma ana Jaeras, 'agu ai'a 'irisia'a do mwane sae rago rai siri ruma. Naasi 'a waia moia Pita, 'ia Jems mea Jon, mirarua'a i amana mana inanai gare uraosi.

⁵² Na'i 'ohasi na inoni ra angi mara ago-ago. Mia Jisas 'a ha'atee o'ani 'iniraaui, "Moi abui angi, na garesi 'a ai'a mae, 'iia 'a mauru moi."

⁵³ Na'i 'ohasi na inoni ra da'ata'inia, suria rau 'iraraa doni garesi 'a bwane mae.

⁵⁴ Mia Jisas 'a siriwou, 'a dau na'i rimana ma ha'atee o'ani, "Garegu, 'oi suruta'e!"

⁵⁵ Na'i mau 'ohasi mana garesi 'a manawa aho'i ma ura ara'a. Mia Jisas 'a 'unua tanaa amana mia inana do rarui haua tanaa ta mahoingau.

⁵⁶ Na'i 'ohasi, 'ia amana mana inanai garesi raru kae heimwaota'i di'u. Mia Jisas 'a ha'atee wetewete tanararua do rarui abui taroha'inia'a ro'u tanaa ta sae i marehosi.

9

Jisas 'A Ha'ataariraaui Hura'a

i Ha'ataari Ana'i

(Matiu 10:5-15; Mak 6:7-13)

¹ Mia Jisas 'a soi goniraaui mai Ha'ataari ana'i ma haua tanaraaui tatau'aro mana mena 'anai taari'i hura'a i adaro ma 'anai ha'agorohi'i mwani daoha.

² Ma ha'a-taariraaui hura'a 'anai taroha'inia i heimarungi ana God ma 'anai ha'agorohiraaui aho'i nei ra daoha.

³ 'A o'ani 'iniraaui, "Na'i hano namoi haua, abu tanei 'ini'amou nai waia ta mareho. Abu ta 'a'abi, ma'ua ta anga ni 'aariha, ta huai breidi, ta ha'a, ma'ua do ta to'oni madara ro'u.

⁴ 'E ruma rai ha'amaoto'amou na'iei 'oha moi ataha wou ta 'omaa, moi mauru iei tari 'oha moi hano baaniai 'omaasi.

† 8:43 8:43 Tara'i kopi bwani 'inia Baebol ra 'unua doni uraosi 'a gaasi'i hakoi ha'a ana'i 'anai horiraaui sae nara bonasiai ha'agorohia.

⁵ Me 'onaa 'iraaui inoni rau bwa'i ha'amaoto'amou 'anai rongo'i taha namoi hadanga'ini'i, moi hura'a baaniai 'omaasi. Ma na'i 'oha moi hura'a, moi tarohi'i kahua baani'i uwamoo'i. Naasi 'e ha'abasu tanaraau do'ia God 'ai ha'a-mama'airaaui."

⁶ Miraau na Ha'ataari raugu hura'a marau 'ari suri'i 'omaa 'anai taroha'iniai Taroha Goro, ma 'anai ha'agorohiraaui aho'i nei ra daoha.

Herod 'A Rongo Tarohana Jisas
(Matiu 14:1-12; Mak 6:14-29)

⁷ Ma na'i 'ohasi 'ia Herod Antipas 'a rongo'i mwane mareho na 'ia Jisas 'a haa'i. Ma kae kakui ahuna, 'inia tara'i nei ra 'unua do'ia Jon Bwareomaea 'a suruta'e aho'i baaniai mae,

⁸ ma tara'i nei ra 'unua do'ia rarabea Elaija na ha'amaranga, ma tara'i nei ro'u rau 'adoma'inia do'e nei 'iniraaui rarabea nara mae mau na'i 'oha bwani na tahi aho'i.

⁹ Mia Herod 'a o'ani, "Ia Jon Bwareomaea 'a mae'a, 'inia 'inau bwane 'unua dorai horosiai 'u'una! Naasi 'iatei ro'u nagu hau'i mareho nara rongo o'asi ro'u 'isi?" Na'i 'ohasi 'ia Herod 'a bonasiai heisadoi beia Jisas.

Jisas 'A Hanganiai Rima Merui Mwane
(Matiu 14:13-21; Mak 6:30-44; Jon 6:1-14)

¹⁰ Na'i 'oha na 'iraaui Ha'ataari rau aho'i mai, rau maani'i tanaa Jisas mwane mareho narau haa'i. Mia Jisas 'agu wairaaui marau 'ari na'i dora na gaarangiai 'omaa nara 'unua 'iniai Betsaeda, dora rai matai awa haariraaui na'iei.

¹¹ Miraauui inoni rau 'iraraa moi marau 'ari haisuri. Mia Jisas 'a ha'amaotoraau ma taroha'inia tanaraauui heimarungi ana God, ma ha'agorohiraaui nei nara daoha.

¹² Na'i 'oha na sina 'a abari'i'a, i Ha'ataari ana'ia Jisas rau boi beia marau o'ani, "Oi ha'a-taariraaui hako inoni hura'a, marai 'ari suri'i 'omaa 'isi mana ruma suriai dorasi, marai siba 'adaau mahoi'ingau mana dora ni mauru, 'inia 'igaau gau awa na'i dora na bwarai mwane mareho naani."

¹³ Mia Jisas 'agu aramiraaui o'ani, "T'amou namoi ha'i 'adaau mahoi'ingau."

Miraaugu ha'atee o'ani 'inia Jisas, "E rima huai brede ma'e rua ii'a moi na bei'ameu. 'O 'irisia domei 'ari 'anai hori mahoi'ingau 'anai kae ruruhasi?"

¹⁴ Ma 'onaai rima merui mwane nara goni na'i dorasi.

Mia Jisas 'agu o'ani 'iniraaui rongoiusuri ana'i, "Moi 'unua tanaraauui inoni marai heinagu suri'i ruruha, 'a ga'i rima tangahuru ta'i ruruha."

¹⁵ Naasi miraaui rongoiusuri rau hua 'onaai 'unua ana tanaraau. Ma na'i 'oha 'iraaui inoni rau heinagu hako auru,

¹⁶ 'ia Jisas 'a dauai rima huai brede mana rua ii'a. 'A wana ara'ai aro ma ha'atee ha'agorohia God 'inia. Naasi ma uubi'i magu hau'i tanaraauui rongoiusuri ana'i 'anai ha'atora'ini'i tanaraauui inoni.

¹⁷ Rau ngau hako, marau masu. Miraauui rongoiusuri ana'i rau ha'ahonuai ta'i tangahuru mana rua abira 'ini'i taha narau ngau tahi'i.

'Ia Pita 'A 'Unu Ha'arangasia Hura'a

Do'ia Jisas Na Ha'atahi
(Matiu 16:13-20; Mak 8:27-30)

¹⁸ Ma'e ta'i dangi 'oha 'ia Jisas 'a ha'arahesi haaria, 'iraaui rongoiusuri ana'i rau boi beia. Miagu songa'iniraaui o'ani, "Iraauui inoni rau 'unua do 'inau atei?"

¹⁹ Miraau aramia o'ani, "Tara'i nei ra 'unua do i'oe a Jon Bwareomaea, ma tara'i nei ra 'unua do i'oe a rarabea Elaija, na ha'amaranga. Tara'i nei ra 'unua do'e rarabea ni 'oha bwani na suruta'e aho'i baaniai mae."

²⁰ Mia Jisas 'agu songa'iniraaui ro'u o'ani, "Mi'amou, mou 'adoma'inia do 'inau atei?"

Mia Pita 'a aramia o'ani, "I'oe naasi Ha'atahi na 'ia God na duruduru 'inia 'anai ha'ataaria mai."

²¹ Mia Jisas 'agu ha'abasuraaui wetewete dorai abui maania ro'u tanaa tanei marehosi.

Jisas 'A Maania Hura'a i Rongomaata'i

Mana Mae Ana

(Matiu 16:21-28; Mak 8:31—9:1)

²² Mia Jisas 'a 'unua ro'u o'ani, "Inau, Gare'i Inoni, rai ha'a-rongomaata'iau di'u. 'Iraaui Na'ohadaa'i Piriisi miraau'i Ha'ausuri 'anai Ringe ana'ia Moses ma tara'i saemaua ro'u rai 'utai'au marai ha'amaesiau. Ma 'e rua dangi nai hako mana'i oruna, waigu suruta'e aho'i."

²³ Mia Jisas 'a ha'atee tanaraau ro'u o'ani, "Iatei na raba ha'i rongoiusuri agua, 'ai nugasiai hei'irisina haaria, 'ai mwa'emwa'e 'ado dangi 'anai suru'iai dadaahoro ana,* maai suriau.

²⁴ 'Iatei na raba dau baabau na'i tahingana na'i marewanani, 'a bwa'i to'oraai huunai tahi. Me 'iatei na mwa'emwa'e 'anai ha'a-ai'aai tahingana 'iniai suriau ana, 'ai to'oraai nana i tahi.

²⁵ 'A 'ua? 'Onaa ta sae 'ai daa'i hako nana i mwani mareho na'i marewana, mana saesi 'ai mae ma'ai siri na'i dora ni rongomaata'i, ni mareho 'isi rai 'a'auhia? 'A bwa'i!

²⁶ 'Inau na Gare'i Inoni, wai boi aho'i mau ta 'oha ha'i raraha beiraaui enjel ana'ia God beiai mena na ta'isada beia amagu. Mana 'oha wai boi, waigui 'utairaaui nei nara ninimata'inaui na'i 'ohani. Ma wai 'utairaaui ro'u i nei ra ninimata'i taroha'ini'i ha'atee agu'i.

²⁷ Nau wai 'unua ha'a-momori tana'amou, ra'i nei 'ini'amou 'ini moi awa tari mau 'anai 'omesiai heimarungi ana God."

Jisas 'A Aho'ita'i Raraha

(Matiu 17:1-8; Mak 9:2-8)

²⁸ 'A ga'i 'onaai ta'i sade na hako, 'ia Jisas 'a waia Pita, 'ia Jon, mia Jems marau ta'eha ara'a na'i hungahunga 'anai ha'arahesi.

²⁹ Na'i madoraa na ha'arahesi, ni 'omeha na'i hauraena tari auru na'i 'u'una 'a orisi, mana bwana ana'i ra mamaahui wadora'i.

³⁰ Na'i 'ohasi 'e waira rua sae nararu mamaani beia, na rua saesi 'ia Moses mia Elaija.

³¹ 'Irarua raru ha'amaranga 'iniai raraha nara to'oraai i enjel na'i aro, mararu maania tanaa Jisas i mae nai haa na'i Jerusalem 'anai ha'ato'oai i ha'a-aratara na haua God na bwani awa.

³² Na'i madoraasi 'ia Pita mana nata rua rongoiusurisi, rau mauru. Na'i 'oha narau rarai, rau 'omesiai rarahana Jisas mana rua sae nararu ura beia.

³³ Na'i 'oha na rua saesi raru taraawa'a hano baania Jisas, 'ia Pita 'a ha'atee o'ani 'inia Jisas, "Saemaua, 'a goro nagau awa 'ini! Mei ha'a-urasia ta oru hare, 'e ta'i tana'o, 'e ta'i tanaa Moses, ma ta ta'i tanaa Elaija." 'Ia Pita 'agu to'o ha'atee o'asi moi.

* **9:23 Mwa'emwa'e 'anai suru'iai dadaahoro:** Ni 'ado'ado 'ana 'a o'ani. Gai mwa'emwa'e 'anai rongomaata'i mana mae. 'Inia ni sae na suru'iai dadaahoro 'a hano 'anai mae.

³⁴ Na'i 'oha 'ia Pita 'a ha-hadahada mau, 'e rorodo na dio huniraau ma marumarusiraau. Na oru rongoiusurisi rau maaaa'u raha di'u na'i 'oha na rorodosi 'a dio huniraau.

³⁵ Na'i 'ohasi rau rongoai ringe na ao mai baaniai rorodosi, 'a o'ani, "Naani garegu nau 'ome sigihia, moi rongosuria."

³⁶ Na'i 'oha narau rongoa hakoi ringesi, raugu 'ome mia moia Jisas nagu ura 'isi. Na'i 'ohasi rau papakunga'inia moi haariraau marehosi. 'Ariwou na ore'a maraugu tano maani'i mareho rau 'omesi'i tanaraau tara'i nei.

Jisas 'A Taariai Adaro

Baaniai Gare Mwane

(Matiu 17:14-18; Mak 9:14-27)

³⁷ Na'i nata dangi, 'oha narau aho'i dio baaniai hungahunga, rau heisadoi beiai kae ruruhai inoni nara goni mai 'anai mamasia Jisas.

³⁸ Ma'e ta'i 'iniraau na ha'atee hura'a o'ani, "Ha'ausuri, 'au 'irisia do'oi 'a'auhia'i gare agua, naasi'a i ta'i gare agua.

³⁹ 'E adaro ta'aa na bwaunia. Na'i 'oha 'ai hurasia, na gare agua 'ai awara raha mana abena 'ai 'idi'idi. 'Ai rahuta'i dio na'i ano, mana hutohuto ra hura'a mai na'i ngoona. Ni marehosi 'a bwarai hako baania, ma here ha'ata'aia di'ui abena.

⁴⁰ 'Au bonga'iniraau rongoiusuri amu'i dorai taaria hura'a, magu bwara."

⁴¹ Mia Jisas 'agu ha'atee o'ani 'iniraau, "'T'amou inoni na'i 'ohani mou ha'i sae ta'a'i, mamou bwarai hinihini! 'Ai ore'a he'uai maratanoa nawai haua bei'amou, ma'ua wai awa ore'a tari he'ua bei'amou mamoigu hinihini?"

Mia Jisas 'a o'ani 'inia'i amanai garesi, "'O'i waia mai gare amua."

⁴² Na'i 'oha na garesi 'agu boboi mau beia Jisas, mana adarosi 'a ha'ahugea dio na'i ano ma 'idi'idi na'iei. Mia Jisas 'a ha'atee wetewete tanaai adarosi do'ai hura'a, magu hura'a baaniai garesi. Mia Jisas 'agu haua aho'i garesi tanaa amana.

⁴³ Na'i 'oha na 'iraau inoni rau 'omesiai ha'abu'oahu na 'ia Jisas na hauasi, rau ta'i kaeni heimwaota'i di'u 'inia'i mena ana God na ha'agorohiai garesi.

Ruanai 'Oha Na 'Ia Jisas

'A Hadanga'inia'i Mae Nai Haua

(Matiu 17:22-23; Mak 9:30-32)

Na'i 'oha 'iraau inoni rau heimwaota'i mau 'ini'i mareho na haa'ia Jisas, 'ia Jisas 'a o'ani 'iniraau rongoiusuri ana'i,

⁴⁴ "Moi bahurongoai taha nawai maania tana'amou. 'Inau'i Gare'i Inoni, ta nei nai usuha'iniau tanaraau nei narau ha'ima'e beiau."

⁴⁵ Miraau rongoiusuri ana'i rau ai'a aidangisiai 'ado'ado 'anai maho na maania tanaraausi. 'Ia God 'a girua baaniraau neina rai abui 'irara'i taha narai to'o, miraau ro'u i rongoiusuri rau maguguta'i songa'inia Jisas 'inia.

'Iatei Nai Ororiu?

(Matiu 18:1-5; Mak 9:33-37)

⁴⁶ 'E heitohetohe na to'o beiraau rongoiusuri 'inia tei 'iniraau nai ororiu di'u.

⁴⁷ 'Ia Jisas 'a 'irara'i 'ado'adodaa'i ma soia mai gare kekerei, 'a ha'a-urasia na'i bobona

⁴⁸ magu o'ani 'iniraau, "'Onaa 'o ha'amaotoa ta nei 'onaai garen'i suria 'o ta'ahiau, 'a damana ro'u moi do'o ha'amaotoau. Ma 'onaa 'o ha'amaotoau, 'o ai'a ha'amaotoau moi, mia ro'ua God na ha'ataariau mai. Naasi, 'iatei na ha'a-anoanoa haaria, naasia mo'o na ororiu di'u 'ini'amou."

*Tei Na Ai'a Ura Bwarasi'amou,**Ia Mo'osi 'Iaamoou
(Mak 9:38-40)*

⁴⁹ Mia Jon 'a ha'atee o'ani 'inia Jisas, "Saemaua, 'i'ameu meu 'omesiai sae na taari'i adaro baaniraau inoni 'inia atamu mameu ha'aabua, suria 'iia 'a ai'a awa na'i ruruha agaau."

⁵⁰ Mia Jisas 'agu o'ani 'inia, "Moi abui ha'aabua, 'inia 'iatei na ai'a ura bwarasigaau, 'iiasi 'e nei 'inia ruruha agaau."

*Ra'i Sae ni Samaria Rau Ai'a Raba**Ha'amaotoa Jisas*

⁵¹ Na madoraa na 'ia God 'ai waia Jisas ara'a aho'i aro 'a raumwadu. Mia Jisas 'a 'irisia wetewete 'anai 'ari taha na'i Jerusalem.

⁵² Naasi 'ia Jisas 'a ha'ataari'i 'ari na'i na'o tara'i sae na'i 'omaa adaui sae ni Samaria 'anai ha'aagau tarana Jisas.

⁵³ Miraau sae na'i 'omaasi rau ai'a 'irisia Jisas 'anai awa na'i 'omaa adaau, suria rau 'iraraa dorau hano 'anai ha'arahesi na'i Jerusalem, ai'a na'i Samaria.

⁵⁴ Na'i 'oha na 'ia Jems mea Jon raru rongoa do'iraau inoni nai 'omaasi rau kakawata'inia Jisas, rarugu o'ani 'inia Jisas, "A 'ua Araha? Mirii ha'angonia God 'anai ha'adiohiai 'eu 'anai suu gaasinga'iniraa?"

⁵⁵ Mia Jisas 'a rihota'i ma ha'a-aburarua wetewete,

⁵⁶ maraugu hano daara'i baaniai 'omaasi 'anai 'ari nata 'omaa.

*Ra'i Sae Narau Raba Suria Jisas**Magu Bwara**(Matiu 8:19-22)*

⁵⁷ Na'i 'oha 'ia Jisas mana rongoiusuri ana'i rau 'ariwou suriai tara, 'e sae na o'ani 'inia Jisas, "'Inau wai suri'o rei'uaa ta dora na'oi 'ari iei."

⁵⁸ Mia Jisas 'agu ha'atee o'ani 'inia, "Na mwane mwamwaa wasi ra to'o dora ni mauru, mana manu ra to'ora'i nu'i. Minau, na Gare'i Inoni, 'au ai'a to'o dora ni mono."

⁵⁹ Mia Jisas 'agu ha'atee o'ani ro'u 'inia nata sae, "'Oi suriau 'onaai rongoiusuri agua."

Mana saesi 'agu o'ani, "Araha, wai 'ari ga'u mawai toringia amagu."

⁶⁰ Mia Jisas 'agu ha'atee o'ani 'inia, "Nugasiraau nei ra suriai tara 'anai mae tarau marai toringiraau nei nara mae. Mi'oe 'oi hura'a ma'oi taroha'iniai heimarungi ana God."

⁶¹ Ma'e ta'i sae na o'ani 'inia Jisas, "'Inau nawai suri'o Araha, ma'ata wai 'ari gau mawai haiha'ari beiraau sae agu'i."

⁶² Mia Jisas 'agu ha'atee o'ani, "'Iatei na taraawa'a suriau, ma na'i muri 'a 'adoma'ini'i aho'i moi mareho na bwani nugasi'i, 'a ai'a arari 'anai awa na'i bahainai heimarungi ana God."

10*Jisas 'A Ha'ataariraa Hura'a**i Biu Tangahuru Mana Rua Rongoiusuri*

¹ Na'i muri 'ia Araha 'agu 'ome sigihia ro'u i biu tangahuru mana waira rua 'anai tatau'aro suri'i 'omaa nai ataha suri'i. 'E waira rua ma ha'a-taariraa hura'a 'ari na'i ta'i 'omaa.

² Na'i na'o magu ha'a-taariraa hura'a, 'a ha'atee o'ani 'iniraa, "Na nei nara ha'aagau 'anai hinihiniau ra rago di'u'a 'onaai mwane hua nara

maua'a suri'i hasi'ei. Ma ai'a rago i nei 'anai husi'i. Naasi, moi ha'arahesi tanaa God maai ha'ataari'i hura'a tara'i mwane sae tatau'aro 'anai 'a'au na'i mou hasi'eisi.

³ Moi 'ari'a, ma'ata moi mamataihere, suria 'i'amou mou 'onaa'i garei siip nau ha'ataari'i hura'a na'i 'uruhadi misu hahairete.

⁴ 'A bwa'i tanei 'ini'amou nai waa ta pwaosi, ma'uasi ta anga ni 'aariha, ma'ua ta sandol. Na'i 'oha namoi 'ariwou, moi abui mamaani ore'a bei'i sae namoi heito'oi bei'i suriai tara.

⁵ "Na'i 'oha namoi siriwou ta ruma moi ha'atee o'ani, 'Gooroha ana God 'ai awa bei'amou na'i rumani.' Naasi mareho namoi 'unua tahamora.

⁶ 'Onaa 'ia mo'o na to'oraai rumasi 'ai ha'amaoto'amou goro, na ha'agorohi ana God 'ai awa tarau na'i rumasi, ma 'onaa 'a bwa'i, mana ha'agorohisi 'a bwa'i awa ro'u.

⁷ Suri'i mwane 'omaa namoi taha suri'i, moi mauru na'i ruma tahamora narai ha'amaoto'amou na'iei. Moi abui mauru ta ruma he'ete'i ro'u. Mana taha narai hau'i tana'amou 'anai ngaa'i mana gonohi'i, moi ngaa'i mamoi gonohi'i. Suria na inoni tatau'aro 'a arari dorai taharia 'inia'i tau'aro na haua.

⁸ "'Onaa namoi 'ariwou ta 'omaa marai ha'amaoto'amou, taha narai ha'aagauhia tana'amou 'anai ngaua, moi ngaua.

⁹ Moi ha'agorohirai nei ra daoha, mamoi taroha'inia tanaraaui inoni dona heimarungi ana God 'a raumwadu.

¹⁰ Ma 'onaa namoi ataha wou ta 'omaa mana inoni na'i 'omaasi rau bwa'i ha'amaoto'amou, moi hura'a suri'i tara raha na'i 'omaasi mamoi o'ani,

¹¹ 'Rei'uaa na kahuanai 'omaa amoouni nara awa suri'i uwamee'i, meu tarohi'i hunimou. 'E ha'ara ni ha'abasu tana'amou. Ma'ata, moi aidangisia do na heimarungi ana God 'a raumwadu'a.'

¹² Wai 'unua tana'amou, na'i dangi ni hihiri na ha'a-mama'ai na 'ia God 'ai haua tanaai 'omaasi 'ai di'u ro'u wou baaniai ha'a-mama'ai nai haua tanaraaui sae ni Sodom."*

*Oru 'Omaa Narau Ai'a Hinihini
(Matiu 11:20-24)*

¹³ Mia Jisas 'agu ha'atee o'ani ro'u, "'T'amoui Koresin mi'amoui Betsaeda, 'ai ta'aa di'u tana'amou! 'Onaa ha'abu'oahu nau haa'i tana'amou 'au ga'i haa'i tanaraaui sae ta'a'i na'i 'omaai Taea mei Saedon, rau ga'i bwane rihosi ore'a mau tanaa God. Ra ga'i bwane ho'osi'i bwana do'odo'o'a mana nuga dohu 'ada'i bwaudaa'i 'anai ha'ata'inia do rau ahutotou 'ini'i ora-ora'a adaa'i.

¹⁴ Ma na'i 'oha na 'ia God 'ai hiiriraau inoni hako, na ha'a-mama'ai nai haua tana'amou 'ai di'ua ro'u wou i ha'a-mama'ai nai haua tanaraaui Taea mei Saedon.

¹⁵ 'A 'ua? 'T'amoui Kapaniam, mou 'adoma'inia do'ia God 'ai wai'amou ara'ai aro 'anai ha'a-ahaaha'amou? 'A bwa'i! 'Iia 'ai gaasi'amou auru na'i 'eu na'i dora ni rongomaata'i."

¹⁶ Mia Jisas 'agu o'ani ro'u 'iniraau rongoiusuri ana'i, "'Iatei na bahurongo'amou ma daa'i ha'atee amoo'i, 'iia 'a bahurongoau ma daa'i ro'u ha'atee agu'i. Mia tei na gagata'ini'amou, 'iia 'a gagata'iniau beia mo'o na ha'ataariau mai."

Aho'i Wa'ewa'e Narau Haua

i Biu Tangahuru Mana Rua Rongoiusuri

¹⁷ 'Ia Jisas 'agu ha'a-taarirau hura'a i biu tangahuru mana rua rongoiusuri ani. Ma na'i muri, rau aho'i mai ha'i wa'ewa'e marau ha'atee

* **10:12** 10:12 'O'i 'ome na'i Jenesis 19 'anai 'oha'inia mamaani 'inia Sodom.

o'ani, "Araha, ni adaro mara araisuri'ameu ro'u na'i 'oha nameu taari'i hura'a 'inia atamu."

¹⁸ Mia Jisas 'a ha'atee o'ani, "Ha'amomori. 'Inau 'au 'omesiai ahoda ana Saetan 'onaai mararea na dio baaniai aro.

¹⁹ 'Inau 'au haa tana'amoui mena 'anai ha'ahehoai mena ana Saetan, ma rei'uaa namoi buu hungadi mwaa mamaesi'i ma'ua suhari, mara bwa'i ha'amaesi'amou. 'A bwa'i mareho nai ha'a-ta'ai'amou.

²⁰ Naasi moi abui wa'ewa'e 'inia moi do 'iraau adaro rau araisuri'amou, ma'ata moi wa'ewa'e ro'u 'inia usu'i ana God atamoo'i na'i aro."

*Jisas 'A Honu 'Iniai Wa'ewa'e
(Matiu 11:25-27; 13:16-17)*

²¹ Na'i madoraasi 'ia Jisas 'a honura'i wa'ewa'e na boi baaniai Hi'ona Maea ma ha'atee o'ani, "Ama, i'oe na'o marungiai aro mana ano. 'Au ha'atee ha'agorohi'o suria 'o giru'i mareho 'isi ta'iniraau nei nara madoma mara aidangi, ma'o ha'ata'ini'i tanaraau nei 'ini nara 'onaai gare. 'Io Ama, 'a o'asi 'inia naasi huunai hei'irisimu."

²² Na'i 'oha na 'ia Jisas 'a ha'arahesi hako tanaa God, magu ha'atee o'ani 'iniraau inoni, "Na mwane mareho hako 'ia Amagu 'a hau'i hako tanaau. Ai'a tanei nai huunai aidangisiai garena God, me 'iia moia Amagu. Ma ai'a tanei nai huunai aidangisiai Ama, ma'ata 'iia moi garena, miraau nei na 'inau 'au sigihiraau 'anai ha'a-aidangisiraau 'inia."

²³ 'Ia Jisas 'agu rihota'i ma ha'atee o'ani 'iniraau rongoiusuri ana'i haariraau, "Ha'amwaniraau nei narau 'omesi'i taha namou re'i'i.

²⁴ Mawai 'unua tana'amou, 'a ragoi rarabea mana mwaeraha nara mae hako'a narau raba 'omesi'i taha namou re'i'i, maraugu ai'a 'omesi'i. Marau raba rongo'i taha namou rongo'i, maraugu ai'a rongo'i."

Ha'atee Heiha'auu 'Iniai

Sae Raroma Goro ni Samaria

²⁵ Ma'e ta'i 'oha 'e Ha'ausuri 'anai Ringe ana'ia Moses na ura ara'a 'anai raba ha'imaania Jisas. 'A o'ani, "Ha'ausuri, 'e taha nawai haua nawai to'oraa 'inia i tahi tarau?"

²⁶ Mia Jisas 'a songa'inia aho'i o'ani, "'E taha nara usua na'i Ringe ana'ia Moses? 'A he'ua i aidangisia amua?"

²⁷ Mana ha'ausurisi 'a aramia o'ani, "'Oi ta'ahia Araha God 'inia tahingamu hako mana ahumu hako, me 'inia 'adoma'imu hako mana wetewete amua hako. Ma'oi ta'ahiraau noni amu'i 'onaai ta'ahi'o amua haari'o."

²⁸ Mia Jisas 'a o'ani 'inia, "'A goro i heiarani na'o haua. 'Onaa na'oi haua o'asi, 'oi to'oraa 'inia namua i tahi tarau."

²⁹ Mana saesi 'a rabasia dorai 'unua do 'iia 'e inoni odo-odo. Naasi ma o'ani, "'Ira tei inoni agu'i?"

³⁰ Mia Jisas 'a aramia 'inia ta'i mamaani. "'E ta'i ai Jiu na hano baaniai Jerusalem 'anai aurui Jeriko. Na'i 'oha na auru wou suriai tara, 'iraau sae heingahu beri rau daua marau rahi'i hako'i bwana mana mwane mareho ana'i. Rau ha'amaara ha'ata'aia marau hano baania o'asi moi ha'i mae horo na'i bobonai tara.

³¹ "Ma na'i 'ohasi, 'e Piriisi na hano ro'u suriai tarasi, 'iia ro'u 'e ai Jiu. Na'i 'oha na ataha wou na'i dorasi, 'a re'iai sae nara ngahuiasi ma tariri baania 'ari nata abai tara.

³² Ma na'i ro'u moi muri, 'e sae tatau'aro na'i Ruma Maea ana God na auru mai ro'u suriai tarasi. Ma na'i 'oha na ataha na'i dorasi, 'a re'iai sae nara ngahuiasi, ma taha beira'i ro'u moi baania 'ari nata abai tara.

³³ Ma na'i muri, 'e ta'i sae ro'u na auru ro'u wou suriai tarasi. 'Iia 'e sae ni Samaria, 'e sae ni dora nara wana bodio 'iniraaui. Ma na'i 'oha na ataha wou na'i dorasi, 'a 'omesiai sae ni Jiu nara ngahuiasi, ma kae ahutotou di'u suria.

³⁴ Naasi 'a 'ariwou ma ringi rumu mana waen 'ada'i dora ra maara 'anai hunu'i, ma bibii bwarasi'i 'iniai bwana. 'A suru'ia ara'a na'i dongki ana ma waia 'ari na'i ruma ni mahuara nagu taguma'inia iei.

³⁵ Na'i nata dangi 'a rahia hura'a i rua korai ha'a na arari 'anai tahariai ruma 'anai rua dangi. 'A haua tanaa mo'o na 'omesuriai rumasi, ma o'ani 'inia, "O'i 'omesuria mo'oni. 'Onaa 'oi gaasi ha'a di'uai siha nau haua tana'osi, mawaigui orisia aho'i tana'o i siha ha'a na'i 'oha nawaigui aho'i mai.' "

³⁶ Mia Jisas 'agu songa'iniai ha'ausurisi o'ani, "A 'ua? 'O 'adoma'inia do 'iatei 'iniraaui waira orusi na here 'onaa do na to'oraa mo'o nara ngahuiasi?"

³⁷ Mia aramia Jisas o'ani, "Ia mo'o na 'a'auhia."

Mia Jisas 'agu ha'atee o'ani 'inia, "O'i 'ariwou ma'oi haua o'asi ro'u."

Jisas 'A Garihia Maata Mea Meri

³⁸ Na'i 'oha naraugu hano ro'u a Jisas mana rongoiusuri ana'i, rau taha na'i 'omaa na awaiei urao ra 'unua 'inia Maata. Mia Maata 'a ha'amaotoa siri na'i ruma ana.

³⁹ Ma'e do'orana Maata na awa na'i rumasi, atana 'ia Meri. 'Ia Meri 'a heinagu auru na'i gaarangiai uwana Jisas ma bahurongo'i mareho na 'ia Jisas 'a maani'i.

⁴⁰ Mia Maata 'a torakoke i 'adoma'ina 'ini'i mareho 'anai ha'aagau'i. Naasi 'a boi beia Jisas ma ha'atee o'ani 'inia, "Araha, 'a ai'a 'ua tana'o i nugasiau ana do'oragu 'anai haa'i mwane tagora 'ini haariau? 'O'i 'unua mai, maai 'a'auhiau."

⁴¹ Mia Jisas 'agu ha'atee o'ani 'inia, "Maata, Maata. I'oe 'a torakoke i 'adoma'imu, ma ta'abemu 'ini'i mwane mareho rago.

⁴² Ma'ata 'e ta'i maho moi na ororiu, mia Meri na sigihia nana. Mana marehosi ra bwa'i rahia mwada'u baania."†

11

Jisas 'A Ha'ausuriraau Rongoiusuri Ana'i

'Iniai Ha'arahesi (Matiu 6:9-13; 7:7-11)

¹ 'E ta'i dangi 'ia Jisas 'a 'ari ha'arahesi na'i ta'i dora. Na'i 'oha na ha'arahesi hako, 'e rongoiusuri ana na boi ma o'ani 'inia, "Araha, 'oi ha'ausuri'ameu 'anai ha'arahesi 'onaa ha'ausuriraau ana Jon i rongoiusuri ana'i."

² Mia Jisas 'a o'ani 'iniraaui, "Na'i 'oha moi ha'arahesi moi ha'atee o'ani: Amameeu,

na atamu 'ai maea.

Na houramu 'ai boi.

³ Haa tana'ameu i mahoingau 'anai 'ado dangi.

⁴ 'O'i 'adoma'i nugasi'ameu 'ini'i ora-ora'a amee'i,

'onaai 'adoma'i nugasi'i amee'i nei ra haa'i 'ino bwarasi'ameu.

Ma'oi 'a'auhi'ameu 'anai ura bwarasi'i heiohong'i."

⁵ Mia Jisas 'agu hauai mamaani 'anai ha'ausuriraau ro'u 'iniai ha'arahesi. 'A o'ani, "Onaa tanei 'ini'amou nai 'ari ataha beiai geresae goro amua na'i

† 10:42 10:42 Ni mareho na 'ia Meri na sigihia, naasi 'anai bahurongo'i ha'atee ana'ia Jisas.

'ubutanai rodo 'anai ha'angoni mahoingau. Gasi 'oi o'ani 'inia, 'Geresae, 'oi hasi waa mai ga'u ta oru huai breidi.

⁶ 'E geresae agua na boi ha'atau na ataha beiau 'anai mauru na'i ruma agua, magu ai'a mahoingau nai agau 'anai hangania 'inia.'

⁷ 'Ariwou mia mo'o na awa siri raronai rumasi 'ai ha'atee hurasi o'ani, "Oi abui ha'ata'aabe, 'au bwane ha'ababauai honohono, minau bei'i gare agu'i meu dadao hako'a 'anai mauru. 'Au bwa'i suruta'e 'anai haua tana'o ta mareho.'

⁸ "Wai 'unua tana'amou, rei'uaa na 'iia 'e geresae goro amua, 'iia 'ai 'ageta'i suruta'e 'anai haua tana'o ta mahoingau. Ma'ata 'onaa 'o bwa'i agoheta'i ha'angoni, 'aigui buna suruta'e 'anai hau'i hako tana'o i mareho na'o 'irisi'i.

⁹ "Naasi, wai 'unua tana'amou, moi abui agoheta'i ha'angoni. Ma naasi na mareho namoi ha'angonia, 'ia God 'aigui watea tana'amou. Moi abui agoheta'i siba. Ma naasi na mareho namou sibania, moigui sadoia. Moi abui agoheta'i pwepwee. Ma naasi 'ia God 'aigui tahangiai maraaruma tana'amou.

¹⁰ 'Inia 'iatei nai ha'angonia God 'ini'i taha na 'irisi'i, 'ai hau'i tanaa. Mia tei nai siba, 'ia God 'ai haua tanaai taha na sibania. Mia tei nai pwepwee, 'ia God 'ai tahangia tanaai maraaruma.

¹¹ "Iatei 'ini'amoui ama, na'i 'oha na gare amua 'ai ha'angoni'o 'inia ta ii'a, 'oi haua tanaa ta mwaa.

¹² Ma'ua 'ai ha'angoni popoui kua ma'oi haua tanaa ta suhari.

¹³ Rei'uaa na'o ta'aa he'ua, me ma'ata 'o 'irara'i taha na goro 'anai haua tana'i gare amu'i. 'Onaa na o'asi, 'a ha'ata'inia goro'a hura'a doni Amamouu ara'ai aro 'ai hauai Hi'ona Maea tanaraau nei narau ha'angonia."

Jisas 'A Mena Di'ua Saetan

(Matiu 12:22-30; Mak 3:20-27)

¹⁴ 'E ta'i 'oha 'ia Jisas 'a taaria hura'a i adaro baaniai sae na baanguu. Na'i 'oha na adarosi 'a hura'a, na saesi 'agu ha-hadahada aho'i. Na'i 'oha na 'iraaui inoni rau 'omesia o'asi, rau kae heimwaota'i di'u.

¹⁵ Ma tara'i nei 'iniraaui rau 'unua doni mwaeraha adaui adaro 'ia Saetan,* na hauai menasi tanaa Jisas 'anai taari'i hura'a i adaro.

¹⁶ Ma tara'i nei ra raba ha'imaania Jisas. Ra ha'angonia 'anai haua ta ha'abu'oahu ma dorai 'iraraa do'ia God na hauai mena tanaa.

¹⁷ Jisas 'a 'iraraai 'adoma'idaa'i inoni ma o'ani 'iniraaui, "'Onaa 'e kantri na 'iraaui inoni rai hei'oi haariraaui, na kantrisi 'ai ai'aa. Ma 'onaa na 'e ta'i ruruha na'i ruma ra awa heheihoa'a moi, ni ruruhasi 'ai 'adarara.

¹⁸ 'T'amou mou 'unua do 'inau 'au taari'i hura'a i adaro 'inia mena ana Saetan. Me 'onaa 'ia Saetan na haua tanaaui mena 'anai ha'ata'aiai ruruha ana haaria, ni ruruha ana 'ai hako raurau moi.

¹⁹ Hoita, ma 'onaa na ga'i ha'a-momori do 'inau taari'i adaro hura'a 'inia mena ana Saetan, naasi mena ana tei na 'iraaui rongoiusuri amoo'i narau taari'i adaro 'inia? Ni mena ro'u ana Saetan? Ai'a! 'Iraaui rongoiusuri amoo'i rau haua 'onaai haua agua, ma ha'ata'inia do 'i'amou mou taritari'a.

²⁰ Ma 'onaa nau taari'i adaro hura'a 'inia mena ana God, ma 'a ha'ata'inia doni heimarungi ana God 'a taha'a bei'amou."

²¹ Mia Jisas 'a o'ani ro'u, "'Ia Saetan 'a 'onaai sae wetewete nai ha'aagau 'ini'i mwane mareho hehei'oi ana'i 'anai 'omesuriai ruma ana mana mwane toto'ora ana'i, ma 'adoma'inia doni toto'ora ana'i ra awa goro.

* **11:15 Saetan:** Na'i ha'atee ni Grik ra 'unua Saetan 'inia Belsabul.

²² Ma'ata 'onaa tanei nai wetewete di'ua nai hei'oi beia maai ha'ahehoa, 'iia 'ai waa'i mwane mareho hehei'oi na 'ia mo'osi 'a 'u'uri'i, mai hoai'i bori ana'i beiraau'i geresae ana'i.

²³ "Iatei na ai'a aba beiau, 'a ha'imae beiau. Mia tei na ai'a 'a'auhiau 'anai wai'i inoni tanaa God, 'a adara'inirau inoni baania God."

Ni Awanganai Adaro

(Matiu 12:43-45)

²⁴ Mia Jisas 'a ha'atee o'ani ro'u, "Na'i 'oha na adaro 'a hura'a baaniai inoni, 'iia 'a hano 'ari suriai dora mangasara 'anai siba dora ni mono. Ma 'onaa na bwa'i sadoia ta dora, 'iia 'aigui o'ani 'inia haaria, 'Wai aho'i 'ari mawai siri aho'i na'i sae nau hano baania ani.'

²⁵ Na'i 'oha na aho'i wou 'a re'ia doni tahinganai saesi 'a 'onaa'i ruma nara tatara 'orima'inia goro mara nuga ha'a-odoodo'i goro i mareho na'i raronai.

²⁶ Na'i 'oha na 'omesia o'asi, 'agu 'ari 'anai waia ro'u mai beia i biu adaro narau ta'aa di'u ro'u wou baania. Na'i 'oha narau siri 'anai mono na'i raronai saesi, ni saesi 'a ta'aa di'u ro'u wou baaniai na'o."

²⁷ Na'i 'oha na 'ia Jisas 'a maani'i mareho 'isi, 'e urao na'i raronai kae ruruha narau bahurongoa Jisas 'a ha'atee raha ara'a o'ani, "Ha'amwania di'u i urao na ha'ahuta'o, ma ha'asuui'o."

²⁸ Mia Jisas 'agu ha'atee o'ani, "Ha'amomori, ma'ata 'a ha'amwania di'u ro'u woua mo'o na bahurongo'i ha'atee ana'ia God ma ha'isuri'i."

Ra Raba 'Omesia Ta Ha'abu'oahu 'Anai

Ha'ata'inia Do 'Ia Jisas Naasi Ha'atahi

(Matiu 12:38-42)

²⁹ 'Ia Jisas 'a ha'atee o'ani 'oha nara goni moe'a mai inoni beia, "'T'amou inoni nai 'ohani mou ta'aa di'u. Mou raba 'omesia ta ha'abu'oahu magu 'a bwa'i nei nawai haua tana'amou. 'E ta'i ha'abu'oahu moi namoi re'ia, naasi ha'abu'oahu 'onaaiai nei na to'o tanaa Jona.

³⁰ Ni taha na to'o tanaa Jona 'e ha'ara tanaraau'i inoni na'i Ninive do'ia God na ha'ataaria mai. Ma o'asi ro'u, ni taha nai to'o tanaau, i Gare'i Inoni, 'e ha'ara tana'amou do 'inau 'au boi baania God.

³¹ Na'i dangi ni hihiri, ni urao mwaeraha baania Shiba 'ai ura ara'a mai 'unua do 'i'amoui noni na'i 'ohani mou taritari'a mora. 'Inia rei'uaa na awa ha'atau 'ari nata aba 'inia'i marewana, me 'iia 'a boi 'anai bahurongo'i mwane ha'ausuringa'i ana'ia Mwaeraha Solomon. Minau wai 'unua tana'amou, 'e nei na ororiu di'ua ro'ua Solomon na ataha'a bei'amou mamou ai'a raba bahurongoa.

³² Na'i dangi ni hihiri, 'iraau saeni Ninive rai ura ara'a 'anai 'unua hura'a do 'i'amoui noni 'ohani mou taritari'a mora. 'Inia na'i 'oha na 'ia Jona 'a heitaroha'i tanaraau, 'iraau rau rihosi baani'i ora-ora'a adaa'i. Mawai 'unua tana'amou, 'e nei na ororiu di'ua ro'ua Jona na ataha'a bei'amou, mi'amou ai'a raba rihosi baani'i ora-ora'a amoo'i."

Ni Ha'ausuringa'i Ana Jisas 'A 'Onaa'i Raita

(Matiu 5:15; 6:22-23)

³³ "'A bwa'i tanei nai suungia ta raita 'anai girua, ma'ua 'ai nugaa na'i bahaina ta rabo'o. Ma'ata 'ai nugaa na'i dora ni toki raita 'anai bewaasiraau'i inoni nara sirimai na'i ruma.

³⁴ Ni maamu ra 'onaa'i raita tanaai abemu. Na'i 'oha na maamu ra goro, na abemu 'a honura'i marewa. Ma 'onaa na maamu ra ta'a'i, na abemu hako 'a honura'i kuhi.

³⁵ 'Oi herehere goro, 'o gasi 'adoma'inia do'o awa na'i marewa, me ni kuhita na awa bei'o.

³⁶ 'Onaa na tahingamu 'a honu 'inia marewa ma ai'a kuhi na'iei, i'oe 'oi 'onaai nei na awa na'i dora na bewaasia i raita."

Jisas 'A Ha'atee Ha'ata'airaau

Saemaaua Adaa'i Jiu

(Matiu 23:1-36; Mak 12:38-40)

³⁷ Na'i 'oha na hadahada hako Jisas tanaraau inoni, 'e Farisei na 'unua do rarui 'ari ngau na'i ruma ana. Na'i 'oha nararu siriwou 'anai heinagu auru 'anai ngau'a,

³⁸ na Farisei 'a heimwaota'i di'u na'i 'oha na 'omesia do'ia Jisas 'a ai'a dorima suriai ringe adaau.

³⁹ Mia Jisas 'a ha'atee o'ani 'inia, "'T'amou Farisei, mou 'onaai sae na wasi ha'a-wadiwadi'i abedi paniken mana abedi rabo'o, mana rarodi ra do'o'a moi. 'Inia 'omehamoou 'a kae goro na'i maadaui sae, ma na'i raromamoo'i, naia haaria moi hairaurau mana 'ado'ado ta'a'i.

⁴⁰ Oru bweu! Mou ai'a 'iraraa do'ia God na hauai abega, ma haua ro'u i raromaga? 'A rabasia do 'irarua hako rarui 'ome goro.

⁴¹ Naasi, moi 'adoma'i ororiu 'iniraau pohara baani'i mwane ringe namou suri'isi, mamougui wadiwadi hako na'i maana God.

⁴² "'Ai ta'aa di'u tana'amou Farisei. 'Inia rei'uaa namou wate'i tanaa God tangahurudi gere mareho rawa kekerei ta'a'i nara ha'anguoro mahoingau, ma'ua tara'i mareho ro'u suri'i mou amoo'i, mi'amou mou ai'a ta'ahia God mamou ai'a hauai here na odo-odo tanaraau inoni. 'A goro domou wate'i mareho kekerei 'isi tanaa God, me mou ga'i ta'ahia ro'ua God mamou ga'i hauai here na odo-odo tanaraau noni.

⁴³ "'Ai ta'aa di'u tana'amou Farisei! 'Inia 'i'amou domoi heinagu moe'a suri'i dora ororiu na'i 'oha mou siri suri'i ruma ni ha'arahesi. Ma na'i 'oha namou 'ari suri'i dora ni maketi, mou 'irisia moe'a dorai ha'atee ha'ahaaha'amou.

⁴⁴ "'Ai ta'aa di'u tana'amou! 'T'amou mou 'onaai hera nara ai'a ha'ara'i, na 'iraau inoni rau buu suri'i mareho ta'a'i ha'i ai'a 'iraraa."

⁴⁵ Ma'e ta'i 'iniraau Ha'ausuri 'anai Ringe ana'ia Moses na ha'atee o'ani 'inia, "Ha'ausuri, i'oe 'o ha'a-ta'ai'ameu ro'u 'oha na'o 'unu'i mareho 'isi."

⁴⁶ Mia Jisas 'agu aramia o'ani, "'Ai ta'aa di'u ro'u tana'amou Ha'ausuri 'anai Ringe ana'ia Moses! 'Inia 'i'amou mou ha'ausuriraau inoni 'ini'i taha nara bwara tanaraau 'anai ha'isuri'i, mamougu bwa'i gere 'a'auhiraau moe'a.

⁴⁷ "'Ai ta'aa di'u tana'amou! Suria 'i'amou mou tau'aro ha'agorohi'i barabaradaa'i rarabea na 'iraau wauwa amoo'i rau ngahu ha'amaesi'i na'i 'oha bwani. Mou haua o'asi domou ha'ahouraa mamougu ai'a awasuri'i mareho ra 'unu'i.

⁴⁸ Naasi 'a ha'ata'inia do 'i'amou mou ahu aratara 'inia heingahu narau haasi. 'Iraau narau ngahu ha'amaesiraau, mi'amou namougu tau'aro ha'agorohi'i barabaradaa'i.

⁴⁹ Tarana naasi, 'ia God na madoma 'a ha'atee o'ani, "Inau wai ha'ataariraau 'ari rarabea mana Ha'ataari tanaraau noni. Ra'i nei rai ngahu ha'amaesiraau, ma ra'i nei rai norata'airaau.'

⁵⁰ 'Iniai o'asi ana, 'i'amou inoni na'i 'ohani namougui dau ha'a-mama'ai 'ini'i rarabea nara ngahu ha'amaesiraau mau mai na'i taraawa'anai marewana,

⁵¹ taraawa'a mau na'i 'oha 'ia Kein 'a ngahu ha'amaesia Ebol, tari mai na'i 'oha nara ngahu ha'amaesia Sakaraea na'i ahoanai dora ni ho'asi mana Ruma Maea ana God. Ha'amomori! Wai 'unua tana'amou, 'i'amou inoni na'i 'ohani namougui dau ha'a-mama'ai 'ini'i heingahu nara to'o 'isi.

⁵² “Ai ta'aa di'u tana'amoui Ha'ausuri 'anai Ringe ana'ia Moses! 'T'amou mou girua baaniraau noni i tara 'anai aidangisia God. 'T'amou mou ai'a hano ro'u na'iei, mamougu ha'a-bwarasiraau nei narau bonasiai hano na'iei.”

⁵³ Mia Jisas 'a hano baaniai dorasi. Ma taraawa'a na'i 'ohasi, 'iraau Ha'ausuri 'anai Ringe ana'ia Moses mana Farisei rau taraawa'a ura bwarasia Jisas marau songa'inia 'ini'i mwane heisonga'i bwara.

⁵⁴ Rau bonasia do'ai 'unua ta mareho taritari'a nei narai here ha'ata'aia 'inia.

12

Ha'abasu 'Iniai Ringei Pwari'i

(Matiu 10:26-27)

¹ Na'i mau 'ohasi, 'e taringai merui inoni narau goni mai 'anai bahurongoa Jisas. Me 'inia rago di'u adaau, rau haisu'isu'i di'u. Mia Jisas 'a ha'atee o'ani tahamora tanaraau rongoiusuri ana'i, “Moi 'omesuri'amou haarimoo baaniai herehere adaa'i Farisei narau ai'a awa suriai taha ra ha'ausuriraau noni 'inia.

² Mwane maho hako nara awa bainihu suri'i tahingamoo'i mana taha namou giru'i, rai ha'ata'ini'i hura'a.

³ Taha namou maani'i na'i dora kuhi, rai rongo'i na'i dora marewa, mana taha namou ha'a-natanga'ini'i na'i ahii rai totoronga'ini'i hura'a tanaraau inoni 'anai rongo'i.”

Gai Mamaa'usia God, Ai'a Inoni

(Matiu 10:28-31)

⁴ Mia Jisas 'a ha'atee o'ani ro'u, “Inau wai 'unua tana'amou mwani sae goro agu'i, moi abui mamaa'usiraau nei narai ngahu ha'amaesia moi abe mara bwa'i matai haua ta mareho 'anai ha'ata'ai'o na'i muri.

⁵ Inau wai ha'ata'inia tana'amou a mo'o namoi mamaa'usia. 'Ia God namoi mamaa'usia, 'inia 'iia 'a to'o mena 'anai ha'amaesia'i abe, mai matai gaasi'o ro'u na'i dora ni ha'a-mama'ai. Ma wai 'unua aho'i tana'amou, 'ia God namoi mamaa'usia.”

⁶ “Mou 'iraraai rima gere manu nara raonga'i rua sereni moi 'ini'i na'i maketi? Rei'uaa nara hori mwada'u o'asi, 'ia God 'a ai'a tanei 'ini'i garei manu 'isi nai kaku'aa.

⁷ Naasi moi abui mamaa'u, 'inia 'i'amou namou ororiu di'u'i mwani manu rago. Na rei'uaa warihu suri'i bwaumoo'i, 'ia God 'a uduma'ini'i hako.”

Taroha'inia Kraest

(Matiu 10:32-33; 12:32)

⁸ Mia Jisas 'a o'ani ro'u, “Iatei nai ha'arangasia tanaraau inoni do'ia 'e rongoiusuri agua, 'inau na Gare'i Inoni wai ha'arangasia ro'u na'i maadi enjel ana'ia God do'ia 'e rongoiusuri agua.

⁹ Ma 'onaa 'iatei nai gagata'inau, 'inau wai gagata'inia o'asi ro'u na'i maadi enjel ana'ia God.

¹⁰ “Onaa 'iatei nai ha'atee ha'ata'aiau i Gare'i Inoni, 'ia God 'a matai 'adoma'i nugasia. Ma 'onaa na ha'atee ha'ata'aiai Hi'ona Maea, 'iia ra bwa'i 'adoma'i nugasia mwada'u.

¹¹ “Ta 'oha rai wai'amou suri'i ruma ni gonigoniha agaa'i Jiu 'anai 'i'amou mamoi ura na'i maadi na'otara miraaui Primia. Na'i 'ohasi moi abui 'adoma'i raha 'ini'i taha namoi 'unu'i 'anai arami'i taha rai subuni'amou 'ini'i.

¹² 'Inia na'i 'ohasi na Hi'ona Maea nai 'unu'i tana'amoui mareho 'anai 'unu'i.”

'E Sae Toto'ora Bweu

¹³ Ma'e ta'i 'iniraau sae narau ura 'anai bahurongoa Jisas na o'ani 'inia, "Ha'ausuri, 'oi 'unua tanaai do'oragu mai hoai'i na'i ahoaamiria i toto'ora na maeta'ini'i amamiria."

¹⁴ Mia Jisas 'agu ha'atee o'ani 'inia, "'Ei, ai'a aba agua 'anai ha'a-aratarai mahosi na'i ahoaamurua i do'oramu."

¹⁵ Magu o'ani 'iniraau inoni, "Moi 'ome'ome goro! Mou gasi naga 'ini'i mwani toto'ora ni marewana. 'Inia na huunai tahitahi anai inoni ra ai'a awa suri'i mareho na to'ora'i, rei'uaa na towa'i toto'ora he'ua."

¹⁶ Magu hauai ha'atee heiha'auu tanaraau, "'E sae toto'ora na to'oraai ano nara hungu goro hakoi mwane mareho na hasi'i na'iei."

¹⁷ 'Ariwou ma o'asi 'inia haaria, "E taha gasi nawai haua? 'Inau 'au ai'a to'o dora arari'i mahoingau nau to'ora'i."

¹⁸ Naasi ma o'ani, 'Oo, 'augu 'iraraa, wai kaii ruma ni niga mahoingau agua mawai torai'i ara'a tara'i kae ruma narai arari 'anai nuga'i hako siri mwane mareho nau to'ora'i.

¹⁹ Naasi ma waigui o'ani, 'Mwaniau! 'Au to'o mwane mareho goro 'ada'i harisi narai boi mau. Wai mamarota'i tau'aro'a! Wai heinagu moi 'anai gono mana ngau, ma 'anai hauai taha nawai wa'ewa'e 'ini'i.'

²⁰ Mia God 'a o'ani 'inia, 'Bweubweu'a! Na'i rodoni 'oi mae, mia tei naigui to'ora'i mwane mareho na'o ha'aagau 'ini'isi?' "

²¹ Mia Jisas 'a o'ani ro'u, "Naasi taha nai to'o tanaraau mwane narau nuga goni'i toto'ora nadaa'i haarirau maraugu ai'a toto'ora beia God."

*'U'uria God
(Matiu 6:25-34)*

²² 'Ia Jisas 'agu o'ani 'iniraau rongoiusuri ana'i, "Naasi taranai taha nau 'unua 'inia do 'ai abui ta'aabemoou 'inia'i tahingamu 'ado dangi, 'inia'i taha 'anai ngaa mana bwana na'oi ho'osia."

²³ 'Inia na tahingamu, ai'a moi 'anai ngaa'i mahoingau, mana abemu, ai'a moi 'anai ho'osiai bwana.

²⁴ Moisu 'adoma'i suri'i manu. Raau ai'a hasi mahoingau ma'ua ai'a 'e'eri, marau ai'a to'o ruma 'anai nuga mahoingau na'iei, me 'ia God 'a hanganirau. Mi'amou tanaa God, mou ororiu di'u baani'i manu 'isi.

²⁵ Ma rei'uaa na towa'i ta'aabemoou, me mareho nara ta'aabemoou 'ini'isi, ra bwa'i 'a'auhi'amou 'anai ha'atewaa 'ari tahi namou haa na'i marewana.

²⁶ Ma 'onaa na bwara tana'amou 'anai ha'atewaa 'ari tahitahi amou, ma'ua na ta'aabemoou 'ini'i mwani mareho he'ete'i hairiu 'isi?

²⁷ "Moisu 'adoma'i suri'i raraaua ni hasimou nara 'ome goro di'usi. Rau ai'a haua ta tau'aro ma'ua tata nadaau bwana. Mawai 'unua tana'amou, rei'uaa 'ia Mwaeraha Solomon 'a toto'ora, ma'ata ai'a ta ta'i bwana ana nai 'ome goro ta'isada beia ta ta'i tagai raraaua.

²⁸ Na hinihinimoo'i ra kekerei! 'Onaa 'ia God na ha'a-'omegoro'i tagai raraaua nara ahurara moi gere madoraa maraigui suungi'i, ni 'ua ana na bwa'i haa'i bwana 'inia tana'amou?

²⁹ "Naasi moi abui 'adoma'i raha 'inia'i taha namoi gonohia mana taha namoi ngaa. 'Ai abui ta'aabemoou 'ini'i mareho 'isi."

³⁰ Na'isi mareho na 'iraau inoni nara ai'a hinihini na'i marewanani rau 'adoma'i raha 'ini'i. Naasi 'ai abui ta'aabemoou, 'inia 'ia Amamoou 'a 'iraraa do 'i'amou mou 'irisi'i mareho 'isi.

³¹ Maho na ororiu di'u domoi haua, naasi 'anai awa tarau bahainai heimarungi ana God mia God 'aigui haua tana'amou mwane mareho 'isi."

*Ha'ausuringa'i 'Iniai Toto'ora Na'i Aro
(Matiu 6:19-21)*

³² 'Ia Jisas 'agu o'ani ro'u 'iniraa, "Moi abui maaaa'u, rei'uaa mou gere ruruha moi, me 'ia Amamoou 'a 'ome sigihi'amou 'anai heimarungi beia na'i hourana ana.

³³ Moi raonga'ini'i mareho namou to'ora'i, mamoi haa'i ha'a 'ada'i tanaraaui pohara. 'Onaa moi haua o'asi, 'ai 'onaa domoi nuga'i toto'ora amoo'i ara'ai aro na'i anga na bwa'i 'oha nai ta'aa. Na toto'ora amoo'i rai awa na'i dora na bwa'i 'oha rai hako, 'inia 'a bwa'i sae nai beri'i, mana 'adi ra bwa'i here ha'ata'ai'i.

³⁴ Moi haua o'asi, 'inia na 'adoma'imu 'ai awa tarau na'i dora na toto'ora amu'i ra awa na'iei."

Sae Tatau'aro Na Ha'aagau Tarau

'Iniai Boi Aho'i Ana Araha

³⁵⁻³⁶ "Moi ha'aagau tarau. Moi 'onaai'i sae tatau'aro nara totoriai saemaua adaau 'anai aho'i mai baaniai ha'aha'iwai. Rau suungiai raita marau ho'osi'i agaau bwana adaa'i. Ma na'i 'oha na ataha aho'i mai, 'a pwepwee na'i maraaruma marau tahangia raurau tanaa.

³⁷ Ha'amwaniraaui di'ui sae tatau'aro narau rarai marau ha'aagau na'i 'oha ni saemaua adaau 'a aho'i mai. Wai 'unua tana'amou, na saemaua adaau 'ai siri suri'i bwana ni tagora, maai 'unua tanaraaui 'anai heinagu, maai waa'i mai mahoingau tanaraaui.

³⁸ Ha'amwaniraaui di'ui sae tatau'aro narai ha'aagau rei'uaa na saemaua 'aigui boi na'i 'ubutanai rodo ma'ua gaarangiai wa'aria.

³⁹ "Moisu 'adoma'inia taha nau maaniani. 'Onaa sae na to'oraai ruma 'ai 'iraraai 'oha na sae beriberi 'ai siri na'i ruma ana, 'a bwa'i mauru. 'Ai awa ha'aagau ma bwa'i ha'awatea doni saesi 'ai siri 'anai beri na'i ruma ana.

⁴⁰ Naasi 'i'amou ro'u moi ha'aagau tarau, 'inia 'inau na Gare'i Inoni wai aho'i mai na'i madoraa namou bwa'i 'iraraa ro'u."

*Sae Tatau'aro Goro
(Matiu 24:45-51)*

⁴¹ Mia Pita 'a songa'inia Jisas o'ani, "Araha, ni ha'atee heiha'auusi 'o haua tana'ameu moi rongoiusuri, ma'ua tanaraaui ro'u hako'i inoni?"

⁴² Mia Jisas 'a aramia o'ani, "Sae tatau'aro he'ua ni saemaua 'ai ha'a-omesuria 'ini'i mwane mareho na'i ruma ana, ma 'anai ha'atora'ini'i hura'a i mahoingau tanaraaui sae tatau'aro na'i madoraa 'ana? Naia i sae tatau'aro na madoma ma here goro suri'i mwane mareho nara ha'a-u'uria 'ini'i.

⁴³ Ha'amwaniai sae tatau'arosi na'i 'oha na saemaua ana 'ai boi sadoia do'ia 'a here ha'agorohiai tatau'aro ana.

⁴⁴ Mawai 'unua ha'a-momori tana'amou, ni saemauasi 'ai ha'a-u'uria mo'osi 'ini'i mwane mareho na to'ora'i.

⁴⁵ Ma 'onaa ni sae tatau'arosi 'ai 'adoma'i o'ani, 'Ni saemaua agua 'a bwa'i aho'i raurau.' Naasi ma taraawa'a ngahu ngahuraui urao mana saemwane narau ta'i tau'aro, ma awa moi 'anai ngau mana gonogono raha 'ini wai ni bweu.

⁴⁶ 'Aigui 'asu'a mana saemaua ana 'ai ataha na'i madoraa na saesi 'a bwa'i 'adoma'inia do 'a ga'i ataha. Na'i 'oha nai ataha, 'ai ha'a-mama'aia di'ui sae tatau'arosi, mai nugaa 'anai maaaa'a beiraui inoni hahairaesi.

⁴⁷ "Ni sae tatau'aro na 'iraraa moi taha na saemaua ana 'a 'irisia do'ai haa magu ai'a ha'aagau ma'ua hauai taha na ga'i haa, 'ia rai ha'a-mama'aia di'u.

⁴⁸ Mana sae tatau'aro na ai'a 'iraraai taha na saemaua ana 'a 'irisia magu hauai maho na taritari'a, 'iia 'a bwa'i raha tanaai ha'a-mama'ai. Mana nei nara ha'aragoa tanaa, ni saemaua 'a 'irisia do'ai ha'aragoa ro'u wou, mana nei nara ha'a-'u'uria 'ini'i mwane mareho rago, ni saemaua 'a 'irisia do'ai haa'i mwane mareho goro 'ini'i."

Na Ha'ausuringa'i Ana'ia Jisas

'A Hoahoa'ai'araaui Inoni (Matiu 10:34-36)

⁴⁹ Mia Jisas 'a ha'atee o'ani ro'u, "'Inau 'au waa mai tanaai marewana i hihiri ana God na 'onaai 'eu, mau 'irisia doni 'eusi 'a ga'i taraawa'a noro'a.

⁵⁰ Ma'ata na'i na'o wai siri ga'u na'i rongomaata'i. 'Ado 'oha moi na ta'aa 'inia i 'adoma'igu, tari 'oha nai di'uai madoraa nai to'o i marehosi.

⁵¹ 'A 'ua? 'T'amou mou 'adoma'inia do 'inau 'au boi 'anai ha'awagorohiraau goni inoni na'i marewana? Ai'a! Nau waa mai heihoa.

⁵² Taraawa'a na'i 'ohani ma 'ari'a, na heihoa 'ai ta'eha mai suri'i ruruha 'ado ruma. 'Onaa na'i ta'i ruma 'e waira rima, 'e waira rua nararui ta'ahiau ma'e waira oru narau bwa'i, ma'ua waira oru narai ta'ahiau ma'e waira rua nararu bwa'i.

⁵³ Ni ama 'ai heihoa beiai gare mwane ana, mana ina 'ai heihoa beiai gare urao ana, mana ha'ihungo adai urao rai o'asi ro'u."

Ra Ga'i Aidangisia Do'ia Jisas

Naasi Ha'atahi (Matiu 16:2-3)

⁵⁴ Ma o'ani ro'u 'iniraau inoni, "Na'i 'oha mou re'iai rorodo na ara'a na'i dora na susuu iei sina, mou o'ani, "Oo, 'a bwa'i orema mai rangi'a.' Naasi 'a bwa'i hasi orema maai rangi'a.

⁵⁵ Ma na'i 'oha na ro'a siri mai, mou 'iraraa do'ai raorao. Ma o'asi mora.

⁵⁶ Oru pwari'i ta'aa! 'T'amou mou matai aidangisiai 'ari na haa'i dangi. Ni 'uaana namou ai'a aidangisiai 'ado'ado 'ada'i mareho nau haa'i na'i madoraa 'ini?"

Ha'a-odoodoai Taha Na'o Ha'atari'aa (Matiu 5:25-26)

⁵⁷ 'Ia Jisas 'a o'ani ro'u 'iniraau, "Ni 'uaana namou ai'a raba hiiria ro'u moi 'inia haarimoou i taha na odo-odo 'anai haua?

⁵⁸ 'Onaa 'e nei na raba wai'o na'i kooti, 'oi bonasiai ha'a-odoodoa beia i taha na'o ha'atari'aa na'i 'oha na'o ai'a taha mau na'i dora ni hihiri. 'Onaa 'o bwa'i, mea mo'o na hihiri 'ai wate'o tanaai pulis 'anai gaasi'o na'i rumanih'o.

⁵⁹ 'Inau wai 'unua tana'amou, 'oi awa 'isi tari 'oha 'oi horia hakoi siha ha'a narai 'unua tana'o do'oi horia."

13

Rihota'i Baaniai Ora-ora'a

¹ Ma ra'i nei 'iniraau inoni narau awa 'isi rau maania tanaa Jisas 'iraau ai Galili na 'ia Paelat 'a ha'amaesiraau na'i 'oha narau hau'i ho'asi adaa'i tanaa God.

² 'Ia Jisas 'a o'ani 'iniraau, "'A 'ua? Mou 'adoma'inia doni mae ta'aa narau haasi, 'a ha'ata'inia do 'iraau rau ta'aa di'u baaniraau tara'i sae ni Galili?

³ Ai'a! Mou ai'a 'iraraa do 'i'amou moi mae ro'u 'onaa namou bwa'i rihosi baani'i ora-ora'a amoo'i?

⁴ Ma 'ua i waira ta'i tangahuru mana warui sae narau mae na'i 'oha na kokohu huniraau kae ruma ahaaha na'i Saeloam? Mou 'adoma'inia do

'iraaui rau ta'aa di'u'i tara'i nei ro'u narau ta'i awa ro'u na'i Jerusalem na'i madoraasi?

⁵ Ai'a! Wai 'unua tana'amou. 'T'amou moi mae ro'u mau 'onaa namou bwa'i rihosi baani'i ora-ora'a amoo'i!"

Ha'atee Heiha'auu 'Iniai Fig

Na Bwarai Hungu

⁶ Mia Jisas 'agu hua ro'u i ha'atee heiha'auuni, "'E sae na hasiai hasi'ei nara 'unua 'iniai fig na'i mou ana. 'Ado 'oha 'a 'ari 'anai garihia, ma bwa'i hua nai sadoia na'iei.

⁷ Naasi ma o'ani 'inia mo'o na 'omesuriai mousi, "'E oru harisi na hako'a ma ai'a hua mau nai hua i hasi'eisi. 'Oi ara gata'inia baaniai dorasi, 'ai abui ura 'isi 'anai ha'agata'iniai gorohanai ano.'

⁸ Mana nei na 'omesuriai mou 'a o'ani, 'Abu ga'u saemaua. Gai gere ha'atoria ga'u suria ta ta'i harisi ro'u mawai ha'imaaniai taguma'inia. Wai 'e'eri garigaria mawai nuga 'ana ano goro i wa'ana.

⁹ 'Onaa 'ai hungu na'i harisi haoru, ma goro! Ma 'onaa 'a bwa'i, ma naasi waigui ara gata'inia.' "

Jisas 'A Ha'agorohiai Urao

Na'i Dangi ni Mamaro

¹⁰ Ma'e ta'i dangi ni mamaro, 'ia Jisas 'a ha'ausuriraau inoni na'i ruma ni ha'arahesi.

¹¹ Ma'e ta'i urao na awa 'isi, 'e adaro na ha'adaohaa suriai ta'i tangahurui harisi mana waru. Ni uraosi 'a rorosu, ma bwarai ura arasi.

¹² Na'i 'oha na 'ia Jisas 'a 'omesia 'a 'unua do'ai ara'a mai beia ma o'ani 'inia, "Urao, 'o dadara'a baaniai daoha na here ha'ata'ai'o."

¹³ Ma dau wou beia. Na'i mau 'ohasi mana uraosi 'a goro'a aho'i. 'A ura arasi ara'a ma ha'aasaa God.

¹⁴ Mana na'otara 'anai ruma ni ha'arahesi na'i 'omaasi 'a taesu'a di'u na'i 'oha na 'omesia do'ia Jisas 'a ha'agorohiai uraosi na'i dangi ni mamaro, ma ha'atee tanaraau inoni o'ani, "'E ono dangi tatau'aro na'i ta'i sade. Na'isi dangi namoi boi bei'i daoha amoo'i neina rai ha'agorohi'i, ma 'ai abu na'i dangi ni mamaro."

¹⁵ Mia Araha 'agu ha'atee o'ani, "Oru pwari'i ta'aa! Rei'uaa na'i dangi ni mamaro mi'amou matai ruhasi'i kau mana dongki amoo'i baani'i dora namou hunasi'i suri'i, 'anai waa'i 'anai ha'agonohi'i.

¹⁶ Naasi 'a ga'i goro ro'u 'anai ruhasiai uraoni na'i dangi ni mamaro baaniai daoha na ha'ata'aia! 'Inia 'iiani 'e warowarona ro'u a Ebrahim, mia Saetan 'a ha'adaohaa orea'a mai suriai ta'i tangahurui harisi mana waru."

¹⁷ Na'i 'oha na 'ia Jisas 'a ha'atee o'asi, 'a ha'a-ninimairaau nei narau ha'ima'e beia, ma'ata 'iraaui noni hunga rau wa'ewa'e 'ini'i mwane mareho goro na hau'i.

Raha Nai Hauai Heimarungi Ana God

(Matiu 13:31-33; Mak 4:30-32)

¹⁸ Mia Jisas 'a songa'iniraaui ro'u o'ani, "'A he'uai 'adoma'imoou 'iniai heimarungi ana God? 'E taha nawai heiha'auu 'inia namoi aidangisia 'inia?

¹⁹ 'Io, na heimarungi ana God 'a 'onaai koranai hasi'ei nara 'unua 'iniai mastad nara hasia na'i mou. Rei'uaa na korasi 'a kekerei ta'aa na'i na'o, ma na'i 'oha na tahi ara'a, 'a ha'i hasi'ei mana manu ra matai boi 'anai tagora nu'i suri'i raraana."

20 'Ariwou ma heisonga'i ro'u, "'E taha nawai heiha'auu 'inia namoi aidangisia 'inia i heimarungi ana God?

21 Na heimarungi ana God 'a 'onaai urao na dorariai gere dorai draebam beiai ta'i baegi flaoa bubu. Na'i muri, na gere dorai draebamusi 'a ha'asu'uai flaoa ma ha'arahaa'a."

*Maraaruma Na 'Ogo
(Matiu 7:13-14, 21-23)*

22 Na'i 'oha na 'ia Jisas 'a hano mau 'anai Jerusalem, 'a ha-ha'ausuriraau inoni suri'i 'omaa na taha horo suri'i.

23 Naasi ma'e ta'i sae na songa'inia o'ani, "Araha, 'e taringai sae moi nai dauai tahi tarau?"

Mia Jisas 'a aramia o'ani,

24 "Moi bonasiai siri na'i heimarungi ana God 'inia na maraaruma ana 'a 'ogo. Wai 'unua tana'amou, 'ai ragoi nei narai bonasiai siri maraugu bwa'i mwada'u.

25 Na'i 'oha na nei na to'oraai ruma 'ai ura 'anai honosiai maraaruma, 'i'amou moi ura hura'a i abau 'omaa 'anai pwepwee mamoi o'ani siri, 'Araha, 'oi tahangiai maraaruma tana'ameu mamei siriwou!' Mia mo'o na to'oraai ruma 'ai ha'atee o'ani hura'a mai, "Inau ai'a matai'amou, mau ai'a 'iraraai dora namou boi eisi.'

26 Mi'amou moigui o'ani, "I'ameu meu ngau mameu gono bei'o, ma'o ha-ha'ausuri suri'i 'omaa amee'i.'

27 Me'iaa 'aigui arami'amou o'ani, "Inau ai'a matai'amou, moi su'a wou baaniau, oru hehere ta'aa.'

28 "Moi angiangi mana rihomoo'i rai ngadingadi 'iniai taesu'a na'i 'oha moi 'omesia Ebrahim, 'ia Aisak, mea Jekop, miraau mwane rarabea na'i heimarungi ana God. Mi'amou 'ia God 'ai gaasi'amou hura'a.

29 Na inoni rai boi baani'i mwani dora hako na'i marewana 'anai hauai ngaugoni na'i heimarungi ana God.

30 Mawai 'unua tana'amou, 'iraau nei nara ai'a 'adoma'i ororiu 'iniraa na'i marewanani, 'ia God 'ai ha'a-ororiuraau, miraau nei nara 'adoma'i ororiu 'iniraa, 'ia God 'ai ha'a-auruhiraau."

*Heita'ahi Ana Jisas Tanaai Jerusalem
(Matiu 23:37-39)*

31 Na'i 'ohasi ra'i Farisei ra boi mara o'ani 'inia Jisas, "'Onaa na'o raba tahi ma'oi hano baaniai dorani, 'inia 'ia Herod Antipas 'a siba suri'o 'anai ngahu ha'amaesi'o."

32 Mia Jisas 'a aramiraa o'ani, "Mou 'ari mamoi 'unua tanaa mo'o na 'onaai misu tarisi, do 'inau wai tau'aro mau 'anai taari'i adaro baaniraau inoni, ma 'anai ha'agorohiraau baani'i daoaha. Ma bwa'i orea mawaigui ha'ahakoa goro i tau'aro agua.

33 Na'i dangini mana'i ho'oa ma tara'i dangi ro'u, wai hua mau i 'aariha agua tari 'oha waigui ataha na'i Jerusalem. Suria 'a ai'a ta'isada dorai ha'amaesiai rarabea ta dora he'ete'i, ma'ata na'i Jerusalem."

34 Mia Jisas 'a ha'atee o'ani, "'Ei, Jerusalem, Jerusalem! 'T'amou namou ngahu ha'amaesi'i rarabea mamou buta ha'amaesi'i sae heitaroha'i ana'ia God 'ini'i hau. 'A ragoi 'oha nau rabasia domoi boi beiau 'anai 'omesuri'amou 'onaai bi'ai kua na abwa bwarasi'i gare ana'i. Mi'amou ai'a rabasia.

35 Naasi moi rongoa! 'Ia God 'a hano'a baaniai 'omaa mana Ruma Maea amou. Ma wai 'unua tana'amou, 'a bwa'i ta 'oha namoigui 'omesiau tari 'oha namoi ha'atee o'ani, 'Araha God, 'oi ha'agorohia mo'o na'o ha'ataaria mai!' "

14

Jisas 'A Ha'agorohiai Sae Daoha

Na'i Dangi ni Mamaro

¹ Ma'e ta'i dangi ni mamaro adaui Jiu na 'ia Jisas 'a 'ari ngau na'i ruma anai ta'i bwauodo adaa'i Farisei. Miraui inoni rau wanawana surisuria goro,

² 'inia na'i 'ohasi 'e sae na uwana mana rimana ra su'u na boi beia Jisas.

³ Mia Jisas 'agu songa'iniraaui Farisei miraui Ha'ausuri 'anai Ringe ana'ia Moses o'ani, "A 'ua? Na Ringe ana'ia Moses 'a ha'awategaau 'anai ha'agorohiai sae na daoha na'i dangi ni mamaro?"

⁴ Ai'a ta ta'i nei 'iniraaui nai 'unua ta ta'i maho. Mia Jisas 'a dau wou beiai saesi ma ha'agorohia baaniai daoha na to'ia magu ha'ahanoria.

⁵ Mia Jisas 'agu songa'iniraaui ro'u o'ani, "A 'ua? 'O ga'i rahia moi hura'a i gare amua, ma'ua ta kau amua nai ahoda dio ta girui wai na'i dangi ni mamaro?"

⁶ Na'i 'ohasi rau nuga nguu hako, ma ai'a ta nei 'iniraaui nai 'unua ta ta'i maho tanaa Jisas.

Ha'atee Ha'ausuringa'i 'Iniai Ha'a-anoano

⁷ Mia Jisas 'a 'omesia do 'iraaui sae nara boi 'anai ngau rau rabasia dorai heinagu moe'a suri'i dora ni heheinagu adaa'i saemaua. Ma haua tanaraui ha'atee heiha'auu na o'ani,

⁸ "Onaa tanei nai ari'ahu'o 'inia ta rongo ni ha'iwai, 'oi abui bonasiai heinagu suri'i dora heheinagu adaa'i saemaua, 'inia 'a gasi 'idi ma'e sae nai ororiu di'u'o nara bwane ari'ahua ro'u mai.

⁹ 'Inia 'onaa nai o'asi, ni sae na hauai rongosi 'ai matai o'ani 'ini'o, "Oi su'a baaniai dorasi maai heinagu 'isi a mo'oni." Na'i 'ohasi i'oe 'oi kae arunga ta'aa di'u na'i 'oha na'oi su'a auru 'anai heinagu na'i dora ha'ahako.

¹⁰ "Ma'ata naani taha na'o ga'i haua na'i 'oha narai ari'ahu'o. 'Oi heinagu na'i dora heheinagu ha'ahako, neina 'oha nai boi sae na hauai rongosi, 'iia 'ai o'ani 'ini'o, "Ei geresae agua, 'oi ara'a mai heinagu na'i na'o, na'i dora goro." Na'i 'ohasi 'ai ha'a-ara'ahi'o na'i maadi inoni.

¹¹ 'Au ha'atee o'asi 'anai ha'a-aidangisi'amou do 'iatei nai ha'a-ara'ahia haaria, 'ia God 'ai ha'a-auruhia, mia tei nai ha'a-anoanoa haaria, 'ia God 'ai ha'a-ara'ahia."

¹² 'Ia Jisas 'agu ha'atee o'ani 'iniai Farisei na ngau beiasi, "Na'i 'oha na'oi haua ta ngaugoni, 'oi abui ari'ahuraaui geresae goro amu'i, ma'ua 'iraaui do'oramu'i mana sae amu'i, ma'ua sae toto'ora namou awa heigaarangi'i. 'Inia 'iraaui rai matai ari'ahu'o aho'i 'anai orisia aho'i tana'o.

¹³ Ma'ata na'i 'oha na'oi haua ta ngaugoni, 'oi ari'ahuraaui pohara, miraui sae ta'ata'a'i, 'iraaui na pwaki, miraui na kuru.

¹⁴ Naasi 'ia God 'aigui ha'agorohi'o, 'inia 'a bwa'i tanei 'iniraaui nai matai orisia aho'i tana'o. Ma'ata 'ia God naigui orisia tana'o na'i 'oha 'iraaui inoni odo-odo rai suruta'e aho'i baaniai mae."

Ha'atee Heiha'auu 'Iniai Kae Rongo (Matiu 22:1-10)

¹⁵ Ma'e ta'i beiraaui nei narau heinagu 'isi na ha'atee o'ani, "Ha'amwania di'ua mo'o nai heinagu 'anai ngauai rongo na'i heimarungi ana God."

¹⁶ Mia Jisas 'a ha'atee o'ani, "E sae na hauai rongo, ma ari'ahuraaui mai inoni 'anai boi na'i rongosi.

17 Na'i 'oha na mwane mareho ra agau, 'a ha'ataaria hura'a i inoni tatau'aro ana 'anai 'unuraau mai sae na ari'ahuraau. 'A hura'a wou ma o'ani, 'Moi boi! Na mwane mareho ra agau'a.'

18 Na'i 'ohasi 'e nei ma 'unua ta mareho. Ma 'etanai sae na o'ani, "Inau 'e dorai ano nau bura'i horia moi, naasi wai 'ari 'anai 'omesia ga'u. Ha'arohaia di'u! Inau 'au bwa'i boi, 'oigui 'unua moi tanaa.'

19 Mana nata sae 'a o'ani, "Inau 'au bura'i horia moi ta'i tangahurui kau 'anai tagora. Naasi wai 'ari 'anai ha'atagora'i mawai 'omesia 'onaa narai tagora goro ma'ua 'a bwa'i. Naasi 'oigui 'unua moi tanaa, ha'arohaia di'u, 'inau 'au bwa'i boi.'

20 Mana nata sae na o'ani, "Inau 'au bura'i ha'iwai moi, tarana naasi nau bwa'i boi 'inia.'

21 "Na'i 'oha na aho'i wou i sae tatau'arosi, 'a maani'i mareho 'isi tanaai saemaua ana. Na'i 'oha na rongoa o'asi, 'a kaeni taesu'a di'u, ma o'ani 'iniai sae tatau'aro ana, "Oi raurau 'ari suriai tara raha mei suri'i gere tara suriai 'omaa, ma'oi wairau mai pohara, miraui sae ta'ata'a'i, miraui nei nara kuru mara pwaki.' Mana sae tatau'aro 'a hura'a ma haua 'onaa 'unua ana tanaa. Ma na'i 'oha na aho'i mai 'a o'ani,

22 'Saemaua, ni mareho na'o 'unua 'au bwane ha'ahakoa, magu na ruma 'a ai'a honu mau.'

23 Mana saemaua 'agu o'ani ro'u 'inia, "Oi 'ari ma'oi 'unuraau mai nei nara awa beira'i baaniai 'omaa, ma'oi 'ari suri'i mwane gere tara suriai hasimou, ma'oi 'unu'i hako mai inoni, neina 'ai honu i ruma agau.

24 'Inau wai 'unua tana'o, 'a bwa'i tanei 'iniraui nei nau ari'ahuraau ga'u na'i na'o ani naigui ngau mania ta mahoingau 'ini'i mahoingau nau ha'aagau'i tanaraau.' "

Wai'ado'ado Goro Ma'oigui

Ha'i Rongoiusuri Ana Jisas (Matiu 10:37-38)

25 'E ta'i 'oha na 'e kae ruruhai inoni narau surisuria Jisas. Mia Jisas 'a rihota'i ma ha'atee o'ani 'iniraau,

26 "'Iatei na suriau ma raba ha'i rongoiusuri agau, 'ai ta'ahiau di'uai inana mana amana. 'Ai ta'ahiau di'uai urao ana mana gare ana'i, ma'ua koana'i mana do'orana'i, ma'uasi tahingana haaria.

27 Ma 'onaa 'iatei na bwa'i suru'iai dadaahoro ana maai suriau, ai'a arari ro'u 'anai ha'i rongoiusuri agau.

28 "'Onaa tanei nai raba tagoraa ta ruma. Ni mareho tahamora nai haua, naasi 'ai heinagu mai wai'ado'ado suriai siha ha'a na matai arariai rumasi mana siha na bwane to'oraa.

29 Ma 'onaa na bwa'i haua o'asi, rei'uaa na ha'a-urasi'i mwane auu, ma 'a bwa'i ha'aagaua mwada'u i rumasi, suria 'a pwapwaku 'iniai ha'a. Me'iraui nei narai 'omesia rai da'ata'inia, marai o'ani,

30 "Ome, 'ia mo'osi 'a taraawa'ana moi ruma, ma bwara'ai ha'ahakoa.'

31 "Ma 'onaa 'e mwaeraha na ha'aagau 'anai hura'a beiai ta'i tangahuru merui sae hehei'oi ana, 'anai hei'oi beiai nata mwaeraha na to'oraai rua tangahuru merui sae hehei'oi. Ni mareho tahamora nai haua ga'u, 'ai heinagu mai wai'ado'ado goro suria, 'onaa ni ruruha ana 'a matai ha'ahahoai nata ruruha anai nata mwaerahasi ma'ua 'a bwa'i.

32 'Onaa nai 'iraraa do'a bwara, ma'ai ha'ataari'i 'ari tara'i inoni heheitaroha'i ana'i na'i na'o 'oha narau awa ha'atau mau 'anai ha'arataraa'i taha na taritari'a na'i ahoaadau marai abui hei'oi.

³³ 'A o'asi ro'u, moi wai'ado'ado goro suria mamoi'gui ha'i rongoiusuri agua. 'Inia 'a bwa'i nei nai ha'i rongoiusuri agua 'onaa na bwa'i nugasi'i mwani mareho na to'ora'i."

Ni Rongoiusuri Na Murisia Jisas

'A 'Onaai Solt Ta'aa

³⁴ "Solt 'a goro 'anai ha'angaugoroai mahoingau. Me ma'ata 'onaa nagu ai'aa'i asi'ahana, ma naasi 'agu bwa'i here'a ro'u naraigui haua 'anai ha'asi'aa ro'u.

³⁵ 'A bwa'i goro'a 'anai haa 'inia ta mareho'a ro'u, rei'uaa 'anai doraria beiai ano na'i mou ma'ua bei'i ha'aro'a 'anai ha'agorohiai ano ma bwa'i goro'a ro'u. 'A ta'isada dorai rasaha'inia moi. 'Iatei na to'o karinga 'anai rongo 'ai bahurongo, maai aidangi tarihana."

15

Ha'atee Heiha'auu 'Iniai Siip Na Ai'aa

(Matiu 18:12-14)

¹ Miraau'i inoni si'ogoni takisi, ma tara'i inoni ta'a'i ro'u rau goni mai beia Jisas 'anai bahurongo'i mareho na maani'i.

² Miraau na Farisei miraau'i Ha'ausuri 'anai Ringe ana'ia Moses rau ha'atee ha'ata'aia Jisas, rau o'ani, "'Ia mo'osi 'a wa'ewa'e 'anai awa beiraaui inoni ta'a'i ma ngau ro'u beiraaui."

³ Mia Jisas 'a hauai ha'atee heiha'auu tanaraau o'ani,

⁴ "'Onaa ta ta'i 'ini'amou nai to'oraa ta ta'i 'arangi siip, ma'e ta'i nai ai'aa, 'e taha nai haua? 'Ai nugasiraaui siwa tangahuru mana siwa na awa mausi na'i dora narau ngaungau ei, ma'ai hano 'anai sibaniai ta'i na ai'aasi tari 'oha nai sadoia.

⁵ Ma na'i 'oha nai to'oana, 'ai wa'ewa'e di'u 'inia. 'Ai suru'ia ara'a na'i 'aba'abana,

⁶ maai waia aho'i 'ari na'i 'omaa. Na'i 'oha nai ataha aho'i wou na'i 'omaa, 'ai 'unuraaui mai geresae ana'i miraau'i inoni narau mono goni na'i ta'i dora mai o'ani 'iniraaui, 'Naani 'au kaeni wa'ewa'e di'u suria 'au sadoia aho'i siip agua na ai'aa. Gaau magai wa'ewa'e goni 'inia.'

⁷ "'Inau wai 'unua tana'amou, 'a o'asi ro'u na'i 'oha na'e ta'i inoni ta'aa nai rihosi baani'i ora-ora'a ana'i. 'Iraau'i nei ara'ai aro rai wa'ewa'e raha di'u 'inia mo'osi. Na wa'ewa'e narai haua 'ai raha di'uai wa'ewa'e narau haua 'iniai siwa tangahuru mana siwa sae narau odo-odo na ai'a ororiu dorai rihosi."

Ha'atee Heiha'auu

'Iniai Korai Ha'a Na Ai'aa

⁸ "Ma 'onaa 'e urao nai to'oraa ta ta'i tangahurui korai ha'a, maigui ha'a-ai'aa ta ta'i, 'e taha nai haua? 'Iia 'ai suungiai raita maai tatara 'orima'inia goro hako ha'atai ruma ana maigu sibania tari 'oha nai to'oana.

⁹ Ma na'i 'oha nai to'oana, 'ai soi goniraaui hako mai gere urao ana'i miraau'i nei narau mono goni na'i ta'i dora mai o'ani 'iniraaui, 'Naani 'au kaeni wa'ewa'e di'u suria 'au sadoia aho'i korai ha'a agua na ai'aa. Gaau magai wa'ewa'e goni 'inia.'

¹⁰ "Mawai 'unua ro'u tana'amou. Na'i beiraaui enjel ana'ia God na'i aro, 'e wa'ewa'e na raha di'u ro'u wou 'iniai ta'i inoni ta'aa na rihosi baani'i ora-ora'a ana'i."

Ha'atee Heiha'auu 'Iniai Geresae Na Ai'aa

¹¹ 'Ia Jisas 'a ha'atee o'ani ro'u, "'E ta'i sae na to'oraai rua gare.

¹² 'A 'ariwou mana gare na hutai muri 'a o'ani 'inia amadarua, 'Ama, 'au 'irisia do'oi haua tanaau abā 'ohagu 'ini'i toto'ora amu'i na'o ga'i hoai'i tana'amiria i do'oragu.' Mana amadarua 'a hoai'i toto'ora ana'i tanararua i rua gare anasi.

¹³ "Na'i muri, na gare na hutai murisi 'a raonga'ini'i mwane mareho na to'ora'i ma waa'i ha'a ana'i ma hano 'anai awa na'i dora ha'atau. Na'i 'oha na awa 'isi, 'a ha'agata'ini'i ha'a ana'i suri'i mwane here to'o bweubweu'a nara ai'a goro.

¹⁴ Na'i 'oha na ha'agata'ini'i hakoi ha'a ana'i, 'e kae hioro raha na to'o hako 'ari suriai dorasi, maagu taraawa'a toho 'inia ha'a 'anai hori nana mahoingau.

¹⁵ Naasi 'a 'ari ma ha'angoni tagora beiai ta'i sae toto'ora na'i dorasi. Mana saesi 'a ha'ataaria 'ari 'anai 'omesuri'i boo ana'i.

¹⁶ I geresaei 'a naga di'u 'anai ngaa'i mareho na hangani boo 'ini'i, 'inia ai'a tanei nai haua tanaa ta mahoingau.

¹⁷ "Na'i muri 'agu boi aho'i 'adoma'ina magu o'ani, 'Mwane! 'Iraaui sae tatau'aro ana'ia amagu rau to'ora mahoingau di'u maugu awa moi 'anai hioroni.

¹⁸ Wai suruta'e mawai 'ari aho'i beia amagu mawai o'ani 'inia, "Ama, 'inau 'au here ta'aa. 'Au hairaesī beia God, mau hairaesī bei'o ro'u!

¹⁹ Ai'a arari do'oigui 'unuau ro'u 'inia garemū. 'Oi here mara sae tatau'aro moi 'iniau.'"

²⁰ "Naasi na geresaei 'a suruta'e ma hano 'anai 'ari aho'i beia amana. Ma na'i 'oha na amana 'a 'omesia ha'atau mau, 'a kae ahutotou di'u suria, 'inia 'a 'ome ha'ata'ata'ahi. Naasi ma 'eba 'anai heisadoi beia, 'a 'agoia ma ngoonia.

²¹ Mana gare anasi 'agu o'ani 'inia amana, 'Ama, 'inau 'au here ta'aa. 'Au hairaesī beia God, mau hairaesī bei'o ro'u. 'A ai'a ta'isada do'oigui 'unuau 'inia gare amua.'

²² "Mana amanai garesi 'a o'ani 'iniraauī sae tatau'aro ana'i, 'Moi 'ari raurau na'i ruma mamoi waa mai ta to'oni nai 'omegoro di'u mamoi ha'asirihia 'inia. Moi haua ta ringi mamoi daraha'inia na'i kaka'una mana sandol 'anai uwana.

²³ Naasi moi 'ari mamoi sigihia ta garei kau nagau hangani ha'arahaa ani magai ngahuia 'anai ngau goni, magai wa'ewa'e beiai gare agua.

²⁴ 'Inia na gare aguani 'a 'onaa do'a mae ga'u, magu tahi aho'i ro'u. 'A 'onaa do'a ai'aa ma na'i 'ohani 'au adoia aho'i.' Na'i 'oha ra agau hakoi mwane maho, mana ngaugoni 'agu taraawa'a.

²⁵ "Ma na'i 'ohasi na gare na hutai na'o 'a awa mau 'ari na'i mou. Na'i 'oha na gaarangiai ruma 'inia aho'i'a ana mai baaniai mou, 'a rongo'i mareho nara ha'a-angiangi'i mana sae ra mao.

²⁶ Naasi ma soia mai ta'i 'iniraauī sae tatau'aro ma songa'inia 'inia taha na to'o na'i ruma.

²⁷ Mana sae tatau'arosi 'a o'ani 'inia, 'I do'oramu na hano ani 'a ataha aho'i mai, mia amamu 'a 'unua dorai ngahuiai garei kau nara hangani ha'arahaa ani 'anai ngaugoni beia 'inia, suria 'iia 'a hano ma ataha aho'i mai dadara'a.'

²⁸ "Na'i 'ohasi ni gare na hutai na'osi 'a kaeni taesu'a di'u, ma kakawata'i siri ruma. Mana amana 'a hura'a wou ma bonga'inia do rarui siri.

²⁹ Miagu o'ani 'inia amana, "O 'iraraa, 'ado harisi 'inau 'au tau'aro raha di'u tana'o, ma ai'a do ta ta'i 'oha nawai hairaesī bei'o. Ma ai'a do ta gere garei gout ro'u moi na do'oi haua tanaau 'anai ngau wa'ewa'e bei'i geresae agu'i!

³⁰ Ma na'i 'oha na ataha i gare amua na ha'agata'ini'i toto'ora amu'i 'ini'i urao horihori, 'o ngahuia tanaa i garei kau nara hangani ha'agorohia 'anai ngaugoni beia.'

³¹ "Mana amana 'a o'ani, 'Mama, 'o 'iraraa, i'oe 'o awa tarau beiau mana mwane mareho nau to'ora'i 'iaamu'i.

³² Ma'ata 'a goro dogai ngau wa'ewa'e beiai do'oramu. 'Inia 'a 'onaa do'a mae ga'u magu tahi aho'i ro'u, ma 'onaa do'a ai'aa ma na'i 'ohani 'au sadoia aho'i.' "

16

Ha'atee Heiha'auu

'Iniai Sae Tatau'aro Na Aidangi

¹ 'Ia Jisas 'a hauai mamaani tanaraau rongoiusuri ana'i o'ani, "E ta'i sae toto'ora na rongoa doni sae na 'omesuri'i tanaa i toto'ora ana'i 'a here ha'ata'ai'i ha'a ana'i.

² 'Ariwou mana sae toto'orasi 'a 'unua mai sae tatau'aro anasi ma o'ani 'inia, "A ha'a-momori gasi mareho nau rongoa 'ini'o? 'Oi usu'i dio i 'omesuri na'o haa mai 'ada'i ha'a mana toto'ora agu'i. 'Inia na'i 'ohani 'oi hako baaniai tau'aro amua.'

³ "Mana sae tatau'arosi 'a wai'ado'ado ma o'ani 'inia haaria, "E taha gasi nawai haua? 'Inia ni bwauodo agua 'a 'unua do'ai ha'ahakoau baaniai tau'aro agua, minau 'au ai'a wetewete arari 'anai 'e'eri tarea suri'i mou, mau ninimata'i ha'angoni ha'a ro'u.

⁴ 'Oo, 'au 'iraraai mareho nawai haa neina rei'uaa nawai hako baaniai tau'aro agua me 'iraaui noni rai matai ha'amaotoau siri moi suri'i ruma adaa'i.'

⁵ "Naasi ma 'unuraau mai mwane narau kaoni ha'a beiai bwauodo ana ma o'ani 'iniai sae tahamora, "E siha na'o kaoni 'inia beiai bwauodo agua?' Mia aramia o'ani,

⁶ "E waru 'arangi galon rumui 'oliv.' Mana sae tatau'arosi 'a o'ani 'inia, 'Naani pepa na ha'ata'iniai kaoni amua. 'Oi kaia ma'oi hasi usua auru do'e hai 'arangi moi.'

⁷ "Naasi ma songa'inia ro'u i nata abe, 'Mi'oe 'e siha na'o kaoni 'inia?' Mia aramia o'ani, "Inau 'au kaoni 'iniai ta'i 'arangi baegi wiit.' Mana sae tatau'arosi 'a o'ani 'inia, 'Naani pepa na ha'ata'iniai kaoni amua. 'Oi kaia ma'oi hasi usua dio do'e waru tangahuru moi.'

⁸ "Agu 'ariwou mana bwauodo 'agu 'iraraai mareho ta'aa na haua i sae tatau'aro anasi. Me ma'ata 'a ha'atee ha'agorohia mo'osi, 'inia 'a madoma di'u 'anai hau'i mwane here o'asi 'anai 'a'auhia haaria. 'A ha'a-momori do 'iraaui inoni ahurodo rau aidangisi'i mwane here o'asi di'uraau inoni nara awa na'i bewaa."

⁹ Mia Jisas 'agu o'ani, "Naasi, 'inau wai 'unua tana'amou. Moi 'a'uhiai nata nei 'ini'i toto'ora amoo'i, neina na'i 'oha narai hako, raigui ha'amaoto'amou na'i dora ni tahi tarau.

¹⁰ 'Onaa ra matai 'u'uri'amou suri'i gere mareho, ra matai 'u'uri'amou ro'u suri'i kae mareho. Me 'onaa ra bwa'i 'u'uri'amou suri'i gere mareho, 'ai bwara ro'u tanaraau 'anai 'u'uri'amou suri'i kae mareho.

¹¹ Naasi 'onaa ra bwa'i 'u'uri'amou 'anai 'omesuri'i toto'ora na'i marewanani, 'ai he'ua igui 'u'uri'amou ada suri'i huudi toto'ora ana'ia God?

¹² Ma 'onaa ra bwa'i 'u'uri'amou 'anai 'omesuri'i toto'ora adaa'i sae he'ete'i na'i marewanani, ra bwa'i haua tana'amou i toto'ora namou ga'i to'oraa na'i aro.

¹³ "A bwara doni sae tatau'aro 'ai tau'aro goro tanaai rua bwauodo. 'Onaa nai o'asi, me 'iia 'ai 'itaa ta nei maai ta'ahiai nata nei. Ma'ua 'ai

'adoma'i ha'ahoua tanei mana nata nei 'a bwa'i. Naasi 'a bwara 'anai tau'aro tanaa God ma do'oigui ta'ahia ro'u i ha'a."

¹⁴ Miraau na Farisei narau rongoa Jisas rau haikou 'inia, suria rau ta'ahia di'u i ha'a.

¹⁵ Mia Jisas 'a ha'atee o'ani 'iniraaui, "'T'amou mou here 'onaa domou goro na'i maadaui inoni, mia God 'a aidangisi'i hakoi taha nara awa suri'i tahingamoo'i. Moi 'ome'ome goro! 'Inia 'a ragoi mareho na 'iraaui inoni ra 'adoma'i ha'agorohi'i, me tanaa God ra'i mareho ta'a'i moi."

*Ha'ausuringa'i 'Iniai Ringe Ana'ia Moses
(Matiu 11:12-13; 5:31-32; Mak 10:11-12)*

¹⁶ Mia Jisas 'agu o'ani ro'u, "Na'i na'o, gau suri'i Ringe ana'ia Moses bei'i ha'ausuringa'i adaa'i Rarabea. Me taraawa'a beia Jon Bwareomaea nara taraawa'a 'anai taroha'inia ro'u i heimarungi ana God, mana mwane inoni rau bonasia di'u dona rai siri na'iei.

¹⁷ Ma'ata ai'a do ta gere dora 'iniai Ringe ana'ia Moses do'ai ai'aa. Ni aro mana ano rarui hako, ma'ata na Ringeringe 'isi ra bwa'i hako ta'oha.

¹⁸ "'Iatei na gaasiai urao ana ma wainai urao he'ete'i, 'iia 'a ora-ora'a 'inia 'a taritari'a baaniai urao ana. Ma 'onaa 'e sae na wainai urao ha'iwai na mwane ana 'a gaasia, na sae na wainai uraosi 'a ora-ora'a, 'inia 'a taritari'a beiai urao ha'iwai."

Ha'atee Heiha'auu 'Inia Lasarus

Mana Sae Toto'ora

¹⁹ 'Ia Jisas 'a o'ani ro'u, "'E sae toto'ora na ho'o bwana 'ome goro tarau, ma ngaungau goro, mana mwane mareho ra mwada'u tanaa na'i awa na haa na'i marewanani.

²⁰ Ma'e mwaeta'aa keokeo'a na atana 'ia Lasarus, ra waia wou 'ado 'oha 'anai ha'adaohia na'i maanai baraaruma anai saesi.

²¹ 'Ia Lasarus 'a maesia ngaa'i dorai mahoingau nara ahoda baaniai dora ngaungau anai sae toto'orasi. I misu ra boi ro'u 'anai namiri'i keona Lasarus.

²² "Na'i 'oha na mwaeta'aasi 'a mae, 'iraaui enjel rau waia 'anai awa beia Ebrahim. 'Ariwou mana sae toto'orasi 'a mae ro'u mara toringia.

²³ 'Iia 'a awa 'anai rongomaata'i na'i dora nara awaiei inoni ta'a'i nara mae. Na'i 'oha na wana ara'a 'a 'omesia Ebrahim ha'atau ma re'ia Lasarus na'i bobona.

²⁴ Mana sae toto'orasi 'a tooro tanaa Ebrahim o'ani, "'Ei, Ama Ebrahim, 'oi ta'ahiau. 'Oi ha'ataaria maia Lasarus maai ha'abuniai kaka'una mai boi ha'abunibuniai meameagu, 'inia 'au kaeni rongomaata'i di'u 'iniai 'euni.'

²⁵ "Mia Ebrahim 'a aramia sae toto'orasi o'ani, "'O 'iraraa garegu, 'I'oe 'o to'ora mwane mareho goro na'i 'oha na'o awa na'i marewana. Na'i 'ohasi 'ia Lasarus 'a to'ora'i mwane mareho ta'a'i. Ma na'i 'ohani 'iia 'a wa'ewa'e di'u mi'oe 'ogu rongomaata'i moe'a.

²⁶ Mana nata mareho ro'u, 'e kaeni marawai ganu na awa hoaignaau, ma bwara do tanei 'ai tarau wou ma'ua tarau mai bei'amiria.'

²⁷ "Mana sae toto'orasi 'agu o'ani 'inia Ebrahim, 'Na o'asi ana Ebrahim, 'au ha'angoni'o, 'oi ha'ataaria 'aria Lasarus 'ari na'i ruma ana amagu.

²⁸ 'Ai 'ariwou maai ha'abasuraui rima do'oragu neina rai abui boi na'i dora ni rongomaata'ini.'

²⁹ "Mia Ebrahim 'a o'ani, 'Ni usu-usu na haa'ia Moses miraaui Rarabea ra bwani awa 'anai ha'abasuraui. 'Iraau rau ga'i rongo'i marai ha'isuri'i.' "

³⁰ "Mana sae toto'orasi 'a aramia Ebrahim o'ani, 'Ai'a Ama Ebrahim, rau bwa'i orisi 'onaa 'a bwa'i sae nai tahi aho'i baaniai mae nai 'ari 'anai mamaani tanaraui.'

31 “Mia Ebrahim 'a o'ani, “Onaa narau bwa'i ha'isuri'i taha na 'ia Moses miraaui Karabea narau 'unu'i, ma'ai bwara tanaraau ro'u i orisi rei'uaa nai 'ari mamaani tanaraau ta sae nai suruta'e aho'i baaniai mae.’ ”

17

Ora-ora'a

(*Matiu 18:6-7, 21-22; Mak 9:42*)

1 Mia Jisas 'agu ha'atee ro'u o'ani 'iniraaui rongoiusuri ana'i, “Ni mareho narai hauai ora-ora'a tanaai inoni rai to'o. Ma'ata ha'arohaia di'ua mo'o nai ha'a-ahodariai sae na'i ora-ora'a.

2 'Onaa 'iatei nai raba ha'atehaa tanei 'iniraaui nei kekerei 'ini, 'a goro do ra ga'i ho'osia ta kae hau na'i 'u'una marai hura'a ha'adodohia dio na'i asi rodo. 'Inia na ha'a-mama'ai na 'ia God nai haua tanaai nei nai ha'atehaa tanei 'iniraaui, 'ai ta'aa di'u ro'u wou.

3 Naasi, moi 'ome tarihadi mareho namoi haa'i!

“Onaa 'e nei muru hei'irara'i na hauai maho na ta'aa tana'o, 'oi ha'a-aidangisia 'inia taritari'asi. Ma 'onaa 'a 'adoma'i orisi, ma'oi 'adoma'i nugasia.

4 'Onaa na here ha'ata'ai'o ha'abiu na'i raronā moi ta'i dangi, ma na'i 'ado 'oha, 'a 'ariwou bei'o 'anai o'ani 'ini'o, “Au aidangisia do 'ināu 'au taritari'a, 'ohani 'au orisi.’ I'oe 'oi 'adoma'i nugasiai taritari'a ana.”

Hinihini

5 Miraaui na Ha'ataari rau o'ani 'inia Araha, “O'i ha'araha'i hinihinimee'i.”

6 'Ia Jisas 'agu aramiraaui o'ani, “Onaa na hinihinimoo'i 'ai kekerei ta'aa 'onaai gere korai hasi'ei nara 'unua 'inia mastad, na kae hasi'ei 'ariani 'a ga'i araisuri'o moi 'onaa na'oi 'unua tanaa 'anai rangu'ia ara'a haaria maai hasia haaria hura'a i asi.”

7 Mia Jisas 'a o'ani ro'u 'iniraaui, “Onaa tanei 'ini'amou nai to'oraa ta sae tatau'aro na tau'aro na'i mou ana, ma'ua 'omesuri'i mwamwaa ana'i. 'A 'ua? Na'i 'oha na bura'i aho'i mai baaniai tagora 'o 'adoma'inia do'oi o'ani 'inia? “O'i heinagu auru ma'oi ngau.’

8 'A bwa'i! Na mareho na'oi 'unua tahamora tanaa 'ai o'ani, “O'i ha'aagaua ga'u i mahoingau agua. 'Oha nai agau, 'oi ha'a-orisi goro ma'oi waa mai tanaau. Na'i 'oha nawai ngau hako ma 'oigui ngau ro'uta.’

9 Mana sae tatau'arosi 'a bwa'i 'adoma'inia do'oi tagio tanaa, 'inia 'iia 'a suri'i moi heiatenga'i amu'i.

10 'Ai o'asi ro'u tana'amou. Na'i 'oha namou araisuri'i taha nau 'unua tana'amou 'anai haa'i, moi o'ani, “I'ameu ra'i inoni tatau'aro moi. 'A ai'a ta'isada do'oi ha'atee ha'agorohi'ameu, suria 'i'ameu meu uranga'ini'i moi taha na'o ha'atora'ameu 'ini'i.’ ”

Jisas 'A Ha'agorohiraaui Aho'i

Ta'i Tangahurui Sae Lepa

11 Na'i 'oha na 'ia Jisas 'a hano mau 'anai Jerusalem, 'a ataha wou na'i tarihanai Provensi Samaria mei Galili.

12 Ma na'i 'oha na siri wou na'i ta'i 'omaa na'i raronai dorasi, 'a heisadoi beiai ta'i tangahurui sae lepa. Rau gere ura ha'atau

13 marau totoro o'ani tanaa Jisas, “Jisas, saemaua, 'oi ahu ta'ahi'ameu ma'oi 'a'auhi'ameu!”

14 Mia Jisas 'a 'omesiraaui ma o'ani 'iniraaui, “Moi 'ari beiraaui Piriisi marai 'iraraa domou goro'a aho'i.” Na'i 'oha naraugu hano 'anai 'ari, rau 'omesia dona abedaa'i ra goro'a.

¹⁵ Ma'e ta'i 'iniraau 'a hasi aho'i mai 'oha na 'ome 'iraraa do'a goro aho'i. 'A ha'atee ha'agorohia God beiai ringe raha.

¹⁶ 'A topira'i ruru auru tanaa Jisas, ma tagio tanaa. Mana sae na aho'i maisi 'e sae ni Samaria.

¹⁷ Mia Jisas 'agu ha'atee o'ani, "'E waira ta'i tangahurui sae nau ha'agorohia ani, neiraau hei nata waira siwa?"

¹⁸ Ni 'uaana na 'ia mo'o na ha'i sae mahuaara moi nagu boi 'anai ha'aasaa God?"

¹⁹ Mia Jisas 'agu ha'atee o'ani 'inia, "'Oi suruta'e ara'a ma'oi 'ari, na hinihinimu 'a ha'agorohi'o baaniai daoha."

Heimarungi Ana God
(*Matiu 24:23-28, 37-41*)

²⁰ Ma ra'i Farisei rau songa'inia Jisas 'inia 'oha he'ua na 'ia God 'ai taraawa'ai marungiraau noni ana'i. Mia Jisas 'a aramiraau o'ani, "Na heimarungi ana God gau bwa'i 'omesia 'ini'i maagaa'i.

²¹ Ma bwa'i sae do'ai o'ani, 'Naani'a' ma'uasi "Ome, na 'ari ani!' Suria na heimarungi ana God na bei'amou."

²² Magu o'ani ro'u 'iniraau rongoiusuri ana'i, "'E 'oha nai boi mau na 'i'amou moi raba 'omesiau i Gare'i Inoni rei'uaa ta ta'i dangi moi. Ma'ata na'i 'ohasi mou bwa'i 'omesiau mau.

²³ Ra'i nei rai o'ani, "Ome, na 'ari ani!' Ma'ua rai o'ani, 'Na maini!' Rei'uaa na o'asi ma'oi abui suriraau 'anai wanasia.

²⁴ 'Inia na'i 'oha na 'inau i Gare'i Inoni wai aho'i mai, wai ha'ata'i goro hura'a tanaraau hako inoni 'onaai mararea na 'ora ma marewasia hako ahoasara.

²⁵ Ma'ata na'i na'o na Gare'i Inoni 'ai siri na'i rongomaata'i na raha, miraau inoni na'i 'ohani rai gagata'inia.

²⁶ "Ni mareho na 'iraau inoni ra hahaa'i na'i madoraa ana Noa rai to'o ro'u na'i 'oha 'inau i Gare'i Inoni wai aho'i mai.

²⁷ Mou 'iraraai 'oha ana Noa, 'iraau sae rau poru ahuare moi 'inia ngaungau mana gonogono mana ha'aha'iwai tari na'i 'oha na 'ia Noa 'agu buna siri na'i raronai haka. 'Agu haa mana rangi raha 'a dio, mana ahe 'a ngahuiraa hako.

²⁸ "Ma 'ai 'onaa ro'u i madoraa ana Lot. Na'i 'ohasi, na inoni ra ngau mara gono, ra horihori, mara raoraonga'i, ra hasihasi mahoingau, mara tatagora ruma.

²⁹ Ma na'i 'oha na 'ia Lot 'a hora hura'a baaniai Sodom, ni 'eu mana memei hau ngarungaru ra rasaha'i dio baaniai aro mara suungia hako 'omaasi goni bei'i inoni.

³⁰ 'Ai o'asi ro'u na'i 'oha 'inau i Gare'i Inoni nawai aho'i mai. 'Iraau noni nara bwa'i ha'aagau rai 'asu'a 'inia."

³¹ "Na'i 'ohasi 'ia mo'o nai awa hura'a na'i abau 'omaa baani'i mareho ana'i na'i raronai ruma, 'ai abui siri aho'i'a ro'u 'anai waa'i bori ana'i. Ma'ua 'ia mo'o nai awa na'i mou ana, 'aigu abui 'ari'a ro'u aho'i ruma do'aigu waa'i bori ana'i 'anai hora bei'i.

³² Moi wai'ado'ado suriai urao ana Lot. 'Iia 'a poruporu'a ma wana aho'i, mia God 'a ha'a-ai'aa.

³³ "'Iatei na raba dau baabau na'i tahingana na'i marewanani, 'a bwa'i to'oraai huunai tahi. Mia tei na mwa'emwa'e 'anai ha'a-ai'aai tahingana 'iniau, 'ia 'ai to'oraa nana i huunai tahi.

³⁴ Mawai 'unua tana'amou, na'i madoraa nawai aho'i mai, 'onaa 'e waira rua nararui mauru na'i rodo na'i ta'i be'a, 'iraau enjel agu'i rai waia ta nei mana nata nei 'ai awa mau.

³⁵ 'E rua urao nararui tau'aro mahoingau goni, 'e ta'i narai waia ma'e ta'i nai awa mau.

³⁶ 'E waira rua nararui tau'aro goni na'i mou, 'e ta'i narai waia ma'e ta'i nai awa mau."

³⁷ Miraau rongoiusuri ana'i raugu songa'inia o'ani, "Araha, na'i hei narai to'o i mareho 'isi?"

Mia Jisas 'a aramiraau o'ani 'iniaai heiha'auu, "Na'i dora na awaiei mareho mae, rai ruru wou ei manu nara matai ngaa'i mareho mae."*

18

Mamaani 'Iniai Nao Na Taha

Beiai Sae Haha'akooti

¹ Mia Jisas 'a hauai ha'atee heiha'auu tanaraau rongoiusuri ana'i do nei narai abui maemae'a 'anai ha'arahesi.

² 'A o'ani, "E sae haha'akooti na awa na'i 'omaa. 'Ia mo'osi 'a ai'a 'adoma'i ha'ahoua God ma ai'a rongo suriraau noni.

³ Ma'e ta'i nao na'i dorasi na boi tarau beia ma ha'angonia wetewete do'ai 'a'auhia na'i kooti mai ha'ahehoai sae na here ha'ata'aia.

⁴ Na'i na'o 'a kakawa ga'u, 'agu towa'i 'a'ariwou mana sae haha'akootisi 'a o'ani'a 'inia haaria, 'Rei'uaa nau ai'a ha'ahoua God, mau ai'a rongo suriraau noni,

⁵ me ma'ata wai hauai taha na 'unua tanaau naosi 'inia 'a ha'ata'aabegu di'u'a. 'Inia 'onaa nau bwa'i ha'a-odoodoa tanaa, me 'aigui buna ha'abweuau 'iniaai here na haa guguasi.' "

⁶ Mia Araha 'agu ha'atee o'ani, "Moisu 'adoma'i suriai mahosi. 'Onaa na sae haha'akooti ta'aasi

⁷ 'agu buna 'a'auhia naosi, 'ia God 'ai 'a'auhiraau ma'ata i nei na bwane 'ome sigihiraau mau mai narau ha'angonia tarau i hei'a'auhi baania. Mou 'adoma'inia do 'ai poruporu'a 'anai 'a'auhiraau?

⁸ 'Inau wai 'unua tana'amou, 'iia 'ai raurau 'anai 'a'auhiraau. Ma 'ua? Na'i 'oha nawai aho'i mai, 'inau i Gare'i Inoni, 'e waira siha nawai sadoirau narai hinihiniau?"

Ha'atee Heiha'auu 'Iniai Farisei

Mana Sae Haha'atakisi

⁹ Mia Jisas 'a haua ro'u i ha'atee heiha'auu tanaraau nei narau 'adoma'inia dorau odo-odo na'i maana God, maraugu 'adoma'i ha'auruhiraau inoni. Magu o'ani 'iniraau,

¹⁰ "E waira rua nararu 'ari 'anai ha'arahesi na'i Ruma Maea ana God. 'E ta'i 'iniraru 'e Farisei, ma'e ta'i, 'e sae ha-ha'atakisi.

¹¹ Na Farisei 'a ura haaria na'i na'o ma ha'arahesi o'ani, 'God 'au ha'atee ha'agorohi'o, 'inia 'inau 'au ai'a 'onaa'i tara'i sae nara beriberi mara taritari'a baaniai urao adaa'i, ma'ua haa'i tara'i here ta'a'i ro'u. Mau ha'atee ha'agorohi'o di'u do 'inau 'au ai'a 'onaaiai sae ha-ha'atakisi 'ariani.

¹² 'Inau 'au ha'aririta'i ngau rua dangi na'i ta'i sade, mau matai wate'i tana'o i tangahurudi ha'a 'iniaai horihorigu.'

¹³ "Mana sae ha-ha'atakisi 'a ura gere ha'atau moi baaniai Farisei ma totopwau auru, suria 'a 'iraraa haaria do'a ai'a ta'isada 'anai wana ara'ai aro. 'A hidai waiburuna 'inia 'a ahutotou 'ini'i taritari'a ana'i, ma ha'arahesi o'ani, 'God 'oi ahu ta'ahiau! 'Inau 'e inoni ora-ora.' "

* **17:37** 17:37 Ta'i 'ado'ado 'anai tatarani 'a o'ani: Na'i 'oha na 'ia Jisas 'ai aho'i mai, na mwani inoni hako rai 'omesia 'onaa'i 'omesi'i adaa'i manu narau roho garigariai dora na awa iei maho na mae.

14 Mia Jisas 'agu ha'atee o'ani, "'Inau wai 'unua tana'amou, na'i 'oha nararu ha'arahesi hako, ai'a Farisei, ma'ata na sae ha-ha'atakisi ani na 'ia God na ahugoro 'inia. 'Onaa na'oi ha'a-ororiu'o di'uraau inoni, 'ia God 'ai ha'a-auruhi'o, ma 'onaa na'oi ha'a-anoano'o haari'o, 'ia God 'ai ha'a-ororiu'o."

Jisas 'A Ha'agorohiraau Gare Kekerei

(Matiu 19:13-15; Mak 10:13-16)

15 Ma ra'i sae ra waa'i mai kakae adaa'i do'ia Jisas 'ai karohiraau maai ha'agorohiraau. Na'i 'oha na 'iraau rongoiusuri rau 'omesia o'asi, rau ha'aburaau sae.

16 Mia Jisas 'a 'unuraau gare mai beia ma o'ani 'iniraau rongoiusuri, "Moi abui ha'a-bwarasiraau. Moi wateraau gare marai boi beiau. 'Inia 'iraau nei ra 'onaairausi, naasi nei nara arari 'anai awa bahainai heimarungi ana God.

17 'Inau wai 'unua ha'a-momori tana'amou: 'Iatei na bwa'i 'u'uria God 'onaai gare, 'a bwa'i siri na'i heimarungi ana God."

'E Sae Na Toto'ora

(Matiu 19:16-30; Mak 10:17-31)

18 'E saemaua na boi ma songa'inia Jisas o'ani, "Ha'ausuri. I'oe 'e sae goro. 'E taha nawai haua nawai daua 'inia tahi tarau?"

19 Mia Jisas 'a aramia o'ani, "Ni 'uaana na'o 'unua 'inia do 'inau 'au goro? Ai'a tanei do 'ai goro, me 'iia moia God.

20 I'oe 'o bwani aidangisiai Ha'atora: Abui taritari'a baaniai urao amua ma'ua mwane amua, abui ngahu ha'amaesia sae, abui beri, abui pwari'i na'i kooti, ma'oi ha'ahoua amamu mea inamu."

21 Mana saemauasi 'a o'ani, "Na mwane mareho 'isi 'au bwane ha'isuri'i mau mai na'i 'oha nau kekerei."

22 Na'i 'oha 'ia Jisas 'a rongoa o'asi, 'agu o'ani 'inia, "'E ta'i mareho na i'oe 'o ai'a haua mau. 'Oi raonga'ini'i hakoi mareho na'o to'ora'i. Mana ha'a 'ada'i, 'oi hisungiraau 'ini'i pohara. 'Onaa 'oi haua o'asi, 'oi toto'ora na'i aro. Na'i muri 'oigui boi suriau."

23 Na'i 'oha na saesi 'a rongoa o'asi, 'a kaeni ahutotou raha di'u, 'inia 'iia 'a toto'ora di'u.

24 Mia Jisas 'a wanasia ma ha'atee o'ani, "'Ai bwara di'u tanaraau sae ra toto'ora 'anai siri na'i heimarungi ana God.

25 'A 'ua? I mwamwaa nara 'unua 'inia kamel 'a matai siri daara'i na'i maanai nira? 'A bwara! Ma bwara di'u ro'u wou tanaai nei na toto'ora 'anai siri na'i heimarungi ana God."

26 Miraau inoni narau rongoai marehosi rau ha'atee o'ani, "Romwane, 'onaa na o'asi, ma 'ome 'onaa do 'a bwa'i ta sae nai dauai tahi tarau!"

27 Mia Jisas 'agu aramiraau o'ani, "I taha na bwara tanaai inoni 'anai haua, 'a mwada'u moi tanaa God."

28 Mia Pita 'a o'ani 'inia, "'Ome Araha, 'i'ameu meu nugasi'i hakoi mareho nameu to'ora'i mameu suri'o."

29 Jisas 'agu o'ani 'iniraau, "Wai 'unua ha'a-momori tana'amou, 'iatei na 'adoma'i ororiu 'inia heimarungi ana God ma nugasiai ruma ana, mana urao ana, mana do'orana'i, inana mana amana, ma'ua gare ana'i,

30 'ai dau'i mwane mareho na'i marewanani di'u'i mareho na nugasi'i. Ma na'i marewana nai boi ta'oha, 'ai daua nana i tahi tarau."

Orunai 'Oha Na 'Ia Jisas 'A Mamaani

Suriai Mae Nai Haua

(Matiu 20:17-19; Mak 10:32-34)

³¹ 'Ia Jisas 'a wairaaui ta'i tangahuru mana rua rongoiusuri ana beia ma o'ani 'iniraaui, "Moi bahurongo goro. Na'i 'ohanisi gau hahano'a 'anai Jerusalem. Ma na'i 'oha nagai ataha wou, na mwane ha'atee duruduru narau haa'i rarabea na'i 'oha bwani, rai to'o ha'a-momori tanaau i Gare'i Inoni.

³² Rai usuha'iniau tanaraaui nei narau ai'a Jiu 'anai haikou 'iniau. Rai 'isi'isiau, marai ngisuai abegu.

³³ Rai rorohoau marai ha'amaesiau. Ma'ata 'e rua dangi nai hako mana'i oruna wai suruta'e aho'i baaniai mae."

³⁴ Miraau'i rongoiusuri ana'i rau ai'a aidangisi'i moe'a i mareho 'isi. Na 'ado'ado 'ada'i ha'atee na haa'isi ra bainihu, marau ai'a aidangisi'i taha na 'ia Jisas 'a hadanga'ini'i.

Jisas 'A Ha'a-wanawanaai Sae Na Kuru
(*Matiu 20:29-34; Mak 10:46-52*)

³⁵ Na'i 'oha 'ia Jisas 'a 'ariwou gaarangiai 'omaai Jeriko, 'e sae na kuru na heinagu na'i bobonai tara 'anai haha'angoni ha'a.

³⁶ Na'i 'oha na rongoi tahahoro adaui inoni, 'agu heisonga'i o'ani, "'E taha na to'o?"

³⁷ Rau 'unua tanaa do'ia Jisas ni Nasaret 'a tahahoro.

³⁸ Miagu tooro ara'a o'ani, "Jisas, warowarona Deved, 'oi arunga ta'ahiau ma'oi 'a'auhiau!"

³⁹ Miraau'i nei narau na'o 'inia Jisas rau 'unua tanaai sae na kurusi do'ai papaku, miagu awaawara raha baaniai na'o. "T'oe warowarona Deved, 'oi arunga ta'ahiau ma'oi 'a'auhiau!"

⁴⁰ Mia Jisas 'a ura papaku, ma 'unua dorai urua maia mo'o na kurusi tanaa. Na'i 'oha na boi gaarangia, 'ia Jisas 'agu o'ani 'inia,

⁴¹ "'E taha na'o 'irisia dowai haua tana'o?"

Mana sae na kurusi 'a o'ani, "Araha, 'au raba 'ome'ome."

⁴² Mia Jisas 'a o'ani 'inia, "'Oi wana, na hinihinimu na ha'agorohi'o."

⁴³ Na'i mau 'ohasi mana sae kurusi 'a wana'a. 'A suria Jisas ma 'unu ha'aasaa God. Ma na'i 'oha na 'iraaui inoni rau 'omesia o'asi, rau 'unu ha'aasaa ro'ua God 'inia.

19

Sakias 'A 'Omesia Jisas

¹ Na'i 'oha 'ia Jisas 'a tahahoro wou na'i 'omaai Jeriko,

² 'e sae na atana 'ia Sakias na awa 'isi. 'Ia Sakias 'e bwauodo adaui ruruha narau si'ogoni takisi, me 'iiasi 'e sae to'ora ha'a.

³ 'Ia Sakias 'e sae pwapwaku, magu raba 'omesia di'u a Jisas. Me suriai pwapwaku di'u ana 'a bwara tanaa do 'ai 'omesia, 'inia 'a rago di'ui sae narau surisuria Jisas.

⁴ Hoita, mia Sakias 'a 'eba na'i na'o ma hane ara'a na'i hasi'ei nara 'unua 'iniaai Sikamo, do neina 'ai 'omesia goro a Jisas 'oha nai taha wou.

⁵ Na'i 'oha 'ia Jisas 'a ataha wou na'i marunai hasi'eisi, 'a wana ara'a ma o'ani 'inia Sakias, "Sakias, 'oi dio mai'a, 'inia na'i dangini wai awa'a ma'ata'a na'i ruma amua."

⁶ Mia Sakias 'a dio raurau baaniai hasi'eisi, ma waia Jisas 'ari ruma ana ha'i wa'ewa'e.

⁷ Miraau'i nei narau 'omesia o'asi rau taesu'a marau o'ani, "'Ome! 'Ia Jisas 'ai siri awa na'i ruma anai sae ora-ora'a na!"

⁸ Hoita, 'ia Sakias 'a ura ma ha'atee o'ani, "'Ome Araha. Naani 'au duruduru doni aba 'ini'i mareho hako nau to'ora'i wai haa'i tanaraaui

pohara, ma 'onaa 'e sae nau ha'a-bweubweu'aa, 'inau wai su'ua ha'ahai aho'i tanaai siha ha'a nau ha'a-bweubweu'aa 'inia."

⁹ Mia Jisas 'a o'ani 'inia, "Dangini 'ia God 'a ha'atahi'o beiraaui hakoi nei na'i ruruha amua, suria i'oe 'o to'oraai hinihini na 'onaai hinihinina Ebrahim.

¹⁰ 'Inau Gare'i Inoni, 'au boi 'anai sibaniraaui nei nara teha ma 'anai ha'atahiraau."

Na Ha'atee Heiha'auu 'Iniraaui

*Sae Tatau'aro Mana Ha'a Adaa'i
(Matiu 25:14-30)*

¹¹ 'Iraaui inoni rau bahurongo'i mau i ha'atee ha'ausuringa'i ana'ia Jisas. Me 'inia gaarangi ataha wou adaaui na'i Jerusalem, 'ia Jisas 'a haua ro'u tanaraaui ha'atee heiha'auu 'anai ha'a-odoodoai 'ado'adodaau. 'Inia 'iraaui inoni rau 'adoma'inia dona heimarungi ana God 'ai taraawa'a na'i 'oha 'ia Jisas 'ai ada na'i 'omaasi.

¹² Naasi ma o'ani, "E saemaua na ha'aagau 'anai hano ha'atau 'ari na'i marau raha dorai ha'amwaeraha, maigui aho'i mai.

¹³ Ma na'i na'o magu hano, 'a soiraaui mai waira ta'i tangahurui sae tatau'aro ana, ma ha'a-'u'uriraaui 'ini'i kae ha'a* ma o'ani 'iniraaui, 'Moi ha'atagora'i ha'a 'isi mamoi ha'arago'i tari 'oha wai aho'i mai.'

¹⁴ Miraauui noni na'i dora ana rau 'itaai saemauasi. Naasi marau ha'ataari'i 'ari haisuri tara'i sae 'anai 'unua tanaai mwaeraha do'ai abui ha'amwaerahaai saemauasi, 'inia rau 'itaa do 'ai mwaeraha tanaraau.

¹⁵ "Ma'ata rei'uaa na o'asi, ni mwaeraha 'a ha'amwaerahaai saemauasi do'ai heimarungi na'i dora na ha'a-'omesuria 'inia. Na'i 'oha na aho'i mai na'i 'omaa, 'a soiraaui mai sae tatau'aro ana'i 'anai sadoiai siha ha'a narau sadoi'i 'ini'i ha'a na haa'i tanaraau 'anai ha'atagora'i.

¹⁶ Mana sae tahamora 'a boi ma o'ani, 'Saemaua, ni ha'a amua nau ha'atau'aroa, 'au a'oia ara'a ha'atangahuru.'

¹⁷ Mana mwaeraha 'agu o'ani, "A goro ha'atai sae tatau'aro agua. Suria 'o mangudisi'i gere mareho, 'inau wai ha'a-'omesuri'o 'inia ta ta'i tangahurui kae 'omaa.'

¹⁸ "Na ruanai sae 'a boi ma o'ani, 'Saemaua, na ha'a amua nau ha'atau'aroa, 'au a'oia ara'a ha'arima.'

¹⁹ Mana mwaeraha 'agu aramia o'ani, 'Toe 'o kae here goro di'u ro'u. I'oe wai ha'a-'omesuri'o 'inia ta rima kae 'omaa.'

²⁰⁻²¹ "Mana nata sae 'a boi ma o'ani, 'Saemaua, naani ha'a amua. 'Au maaa'usi'o, mau giru ha'agorohia na'i hangete, suria i'oe 'e sae hahaungarimu. 'Au 'iraraa do 'oi rahi'i ha'a na 'iraaui sae tatau'aro amu'i nara a'oi'i ara'a 'ini'i ha'a na'o ha'a-'u'uriraaui 'ini'i, ma'o 'adoma'iniai dau ha'a baani'i mahoingau na 'iraaui sae tatau'aro amu'i ra hasi'i.'

²² "Mana mwaeraha 'a o'ani, 'Toe 'e sae tatau'aro ta'aa! Na ha'atee na'o haa'i wai hiiri'o aho'i 'ini'i! Ni 'iraraa amua do 'inau 'e sae o'asi,

²³ 'o ga'i ha'atagoraai ha'a agua na'i ruma ni niga ha'a! Neina na'i 'oha nawai aho'i mai, wai matai daa goni beia ta gere ha'a narai a'oia ara'a ro'u na'i hungana.'

²⁴ Naasi magu o'asi 'iniraaui nei narau ura 'isi, 'Moi rahiai ha'asi baania mamoi haua tanaai sae tatau'aro nara rago di'u i ha'a ana'isi.'

²⁵ "Miraau aramia o'ani, 'Saemaua, 'iia ha'a ana'i ra bwani rago'a.'

²⁶ "Mana saemauasi 'a o'ani 'iniraaui, "Inau wai 'unua tana'amou, tanaa mo'o na here ha'agorohiai taha nau haua tanaa, 'inau wai ha'arago'a ro'u

* **19:13 Kae ha'a:** Na ha'a nara haua tanaraau 'a ta'isada 'onaa ra ga'i tagora maena suria ta oru hura.

wou tanaa. Mei tanaa mo'o na ai'a here ha'agorohiai mareho nau haua tanaa, rei'uaa mareho kekerei he'ua na to'oraa, wai rahia aho'i baania.

²⁷ Mei tanaraaui nei narau ha'imae beiau ani narau ai'a 'irisia dowai mwaeraha 'anai marungiraau, moi wairaaui mai, mamoi ngahu ha'amaesiraau 'ini na'i maagu.' "

Jisas 'A Ha'ata'inia Haaria

Do 'Tia Na Mwaeraha

(Matiu 21:1-11; Mak 11:1-11; Jon 12:12-19)

²⁸ Na'i 'oha na 'ia Jisas 'a maani'i hakoi mareho 'isi, 'agu hano 'anai na'o 'ari 'anai Jerusalem.

²⁹ Ma na'i 'oha na 'ia Jisas 'a gaarangia wou i 'omaai Betfeis mei Betani gaarangiai hungahungai 'Oliv, 'a ha'a-taarirarua 'ari na'i na'o i rua rongoiusuri ana. 'A o'ani 'inirarua,

³⁰ "Murui hano mamurui 'ari nai 'omaa nagau 'ari wou 'ana. Na'i 'oha namurui tahawou na'i 'omaa, murui 'omesiai garei dongki nara ho'osia. Na dongkisi 'a ai'a ta sae mau nai ta'e na'iei. Naasi murui wagasia mamurui waia mai tanaau.

³¹ Ma 'onaa ta sae nai songa'inimurua 'inia taranai taha namuru wagasia 'inia i mwamwaasi, murui 'unua tanaa do'ia Araha na 'irisia."

³² Hoita, na'i 'oha na raru 'ariwou na'i 'omaasi, raru 'omesiai dongki 'onaai 'unua ana Jisas tanararua.

³³ Na'i 'oha nararu wagasiai mwamwaasi, ni sae narau to'oraa rau o'ani 'inirarua, "'E taha na muru wagasia 'ana i mwamwaasi?"

³⁴ Miraru o'ani, "'Ia Araha na 'irisia."

³⁵ Naasi ma rarugu waa mai dongkisi tanaa Jisas, raru nuga'i to'oni bo hura'a adaru'i na'i hungana, marau ha'ata'ehahia Jisas 'anai heinagu na'i hungana.

³⁶ Na'i 'oha na ta'e 'anai 'ari Jerusalem, 'iraau inoni rau haari'i to'oni adaa'i na'i tara.

³⁷ Na'i 'oha narau gaarangia wou i Jerusalem narau taraawa'ai dio suriai hungahungai 'Oliv, na kae ruruhai sae narau rongosuria Jisas rau ha'atee ha'agorohia ha'i wa'ewa'e marau ha'aasaa God beiai ringe raha 'ini'i mwane ha'abu'oahu na 'ia Jisas 'a haa'i narau 'omesi'i.

³⁸ Rau o'ani,

"Araha God, 'oi ha'agorohia mo'o na'o ha'ataaria mai 'anai mwaeraha!

Goroha 'ai awa na'i aro.

Gau magari ha'aasaa God na awa ara'ai aro!"

³⁹ Ma tara'i Farisei narau awa na'i 'ohasi, rau ha'atee o'ani 'inia Jisas, "Ha'ausuri, 'oi ha'a-papakuraau sae narau suri'osi."

⁴⁰ Mia Jisas 'a o'ani 'iniraau, "Wai 'unua tana'amou, 'onaa 'iraau rongoiusuri agu'i rai papaku, na mwane hau hako suriai tarasi naraigu ha'atee ha'aasaa God."

Jisas 'A Angisiai Jerusalem

⁴¹ Na'i 'oha na gaarangia wou i Jerusalem, 'a wanasia 'ari 'omaa ma angi, 'inia 'a ahutotou di'u suria.

⁴² Ma ha'atee ha'i angiangi o'ani, "'Onaa namou ga'i aidangisiai taha na matai ha'ahagumou aho'i beia God, 'a ga'i goro, me na'i 'ohani ra girua baani'amou.

⁴³ 'E 'oha nai boi mau na 'iraau maerongamoo'i rai hei'oi bei'amou. Rai haa'i ariari ara'a na'i bara 'anai 'omaa amoou 'anai ta'eha suri'i marai siri wou na'i raronai 'omaa. Rai raroi'amou na bwa'i nei 'ini'amou nai matai hora.

⁴⁴ Rai ngahu ha'a-ai'a'amou goni bei'i mwane mareho na'i raronai 'omaa amouusi mana mwane ruma amoo'i rai kokohu ro'u. 'Ai o'asi suria mou ai'a 'ome 'iraraa do 'ia God 'a boi 'anai ha'atahi'amou!"

Jisas 'A Taariraa Hura'a i Sae

Baaniai Ruma Maea Ana God

(Matiu 21:12-17; Mak 11:15-19; Jon 2:13-22)

⁴⁵ Ma na'i 'oha 'ia Jisas 'a ataha wou, 'a siri wou na'i dora a'ora na'i maanai Ruma Maea ana God ma taariraa hura'a i noni nara raoraonga'i na'i raronai.

⁴⁶ Ma o'ani 'iniraaui, "Na'i Usu-usu Maea 'ia God 'a o'ani, 'Na ruma agua 'e ruma 'anai ha'arahesi.' Mi'amou mou ha'i dora ni bainihu 'inia nadaui sae beriberi."

⁴⁷ 'Ado dangi 'ia Jisas 'a ha-ha'ausuri na'i Ruma Maea. Miraau Na'ohadaa'i Piriisi, miraau Ha'ausuri 'anai Ringe ana'ia Moses, ma tara'i saemaua adaa'i Jiu rau bonasia dorai sadoia ta here narai ngahu ha'amaesia 'inia.

⁴⁸ Magu 'a bwara tanaraau, suria ra ragoi inoni narau goni wou 'anai bahurongo'i ha'ausuringa'i ana'i, 'inia rau ai'a rabasia dorai adarahia ta ta'i ha'atee.

20

Heisonga'i 'Iniai Mena Na To'oraa Jisas

(Matiu 21:23-27; Mak 11:27-33)

¹ Ma'e ta'i dangi na 'ia Jisas 'a ha-ha'ausuri raau noni na'i Ruma Maea ana God, ma taroha'iniai Taroha Goro tanaraau. Miraau na Na'ohadaa'i Piriisi, miraau Ha'ausuri 'anai Ringe ana'ia Moses ma tara'i saemaua'a ro'u, rau boi beia marau o'ani 'inia,

² "'Oi 'unua tana'ameu, 'iatei na 'unua tana'o do'oi matai haa'i mareho 'isi?"

³ Mia Jisas 'a o'ani 'iniraaui, "'Inau wai songa'ini'amou ga'u. Moi 'unua tanaau,

⁴ 'ia tei na 'unua tanaa Jon 'anai bwareomaearaui inoni? 'Ia God ma'ua inoni?"

⁵ Miraaugu hadahada haariraaui hairiu o'ani, "'Onaa nagai 'unua do'ia God, me'iia 'ai o'ani, 'Ma 'ua namou ai'a hinihinia 'inia Jon?"

⁶ Ma 'onaa nagai 'unua do 'iraaui moi inoni nara 'unua tanaa, ma 'iraaui inoni rai buta ha'amaesigaau 'iniai hau, 'inia 'iraaui hakoi inoni rau hinihini wetewete do'ia Jon 'e rarabea."

⁷ Miraaugu o'ani 'inia, "Meu ai'a 'iraraa mo'o na 'unua tanaa."

⁸ Mia Jisas 'agu o'ani 'iniraaui, "Nau bwa'i rangasia ro'u tana'amou 'iatei na 'unua tanaau do wai matai haa'i mareho 'isi."

Ha'atee Heiha'auu 'Ini'i Sae Ta'a'i

Nara 'Omesuriai Moui Grep

(Matiu 21:33-46; Mak 12:1-12)

⁹ Mia Jisas 'a haa ro'u i ha'atee heiha'auu o'ani tanaraau inoni, "'E ta'i sae na hasiai moui grep. Na'i 'oha na hasia hako, 'agu raonga'inia hura'a tanaraau tara'i sae narau raba 'omesuria 'anai haa'i nadaa'i hua. Na'i 'oha na ha'a-omesuriraaui 'inia, 'iia 'a hano ma 'ari awa orea na'i kantri he'ete'i.

¹⁰ Na'i 'oha na tari mai madoraa 'anai husi, ni sae na to'oraai mousi 'a ha'ataaria 'ari ta'i 'iniraaui inoni tatau'aro ana'i 'anai 'ari waa'i mai hua narau ga'i haa'i tanaa baaniai moui grep anasi. Na'i 'oha na ataha wou,

'iraaui mwane narau 'omesuriai mousi rau ngahu ngahua moi, marau ha'ataaria aho'i 'ari ha'i pwaranga.

¹¹ “Naasi 'a 'ariwou ma ha'ataaria ro'u 'ari ta'i inoni tatau'aro ana. Na'i 'oha na 'ariwou, 'iraaui sae 'isi rau ngahu ngahua ro'u marau here ha'ata'aia marau ha'ataaria aho'i ro'u 'ari ha'i pwaranga.

¹² Naasi ma ha'ataaria ro'u 'ari orunai sae tatau'aro ana, mana sae 'isi rau ha'amaaraa marau gaasia hura'a baaniai dorasi.

¹³ “Hahakona mia mo'o na to'oraai mousi 'a o'ani, “E taha gasi nawai haua? Wai ha'ataaria 'ari gare agua nau huunai ta'ahia ororiu, 'iia gasi narai ha'ahoua.’

¹⁴ “Na'i 'oha na 'ariwou i gare ana, 'iraaui sae ta'a'i 'isi rau hadanga'inia hairiu o'ani na'i ahoaadaau, 'Naasia mo'o naigu to'oraai mousi na'i 'oha nai mae amana. Gau magai ngahu ha'amaesia magai to'ora nagaau i moui grepisi.’

¹⁵ Rau 'ariwou marau daua. Rau waia hura'a na'i murinai mou naraugu ngahu ha'amaesia na'iei.

“Hoita, 'e taha nai haua mo'o na to'oraai mou 'adaui mwane narau 'omesuriasa?

¹⁶ 'Iia 'ai boi, maai ngahu ha'amaesiraau hako maai wateai mou tanaraau tara'i nei he'ete'i ro'u.”

Na'i 'oha na 'iraaui inoni rau rongoai ha'atee o'asi ana, raugu ha'atee o'ani, “Ai abui to'o o'asi!”

¹⁷ Mia Jisas 'a wana wetewete 'iniraaui ma ha'atee o'ani, “Onaa 'a bwa'i o'asi, ma 'e taha naasi 'ado'ado 'anai dorai Usu-usu Maea na o'ani, 'Na hau na 'iraaui sae tatau'aro ruma rau 'itaa,

naia naagu ha'i hau na ororiu di'u na'i bani anai ruma.’*

¹⁸ Mia tei nai agusu na'i hausi, 'ai maara ta'aa. Mia tei na hausi 'ai ahoda hunia, 'ai meme'a.”†

¹⁹ Na'i 'ohasi 'iraaui Na'ohadaa'i Piriisi, miraaui Ha'ausuri 'anai Ringe ana'ia Moses, rau siba herehere 'anai daua dorai ha'a-mama'aia, 'inia rau 'iraraa do na ha'atee heiha'auu na haua 'a to'iraaui. Maraugu ai'a buna daua suria rau magugu do ra gasigu ha'agogoru i noni.

Heisonga'i 'Iniai Hori Takisi

(Matiu 22:15-22; Mak 12:13-17)

²⁰ 'Iraau na saemaua adaa'i Jiu rau bonasia moe'a mau 'anai sadoia ta here narai matai daua 'inia Jisas. Naasi rau ha'ataari'i sae tanaa Jisas dorai here 'onaa sae goro marai ha'imaania Jisas 'ini'i heisonga'i adaa'i. Rau bonasia do'ia Jisas 'ai 'unua ta mareho narai taarai waia 'inia 'ari tanaai sae ni Rom na Primia na'i 'ohasi, maai ha'a-mama'aia.

²¹ Miraaui nei nara raba ha'imaania Jisas rau 'ariwou beia marau o'ani, “Ha'ausuri, meu 'iraraa dona mwane ha'ausuringa'i amu'i ra ha'a-momori hako ma'o ha'ausuriraaui noni 'ini'i taha 'ia God na 'irisiai noni 'anai haa. Ma na'i 'oha na'o ha'ausuriraaui, rei'uaa na 'e sae he'ua nara bahurongo'o, mana ha'ausuringa'i amu'i ra ta'isada moi.

²² Naasi, 'oi 'unua tana'ameu. 'A 'ua? Na'i ringeringe agaau, 'a odo-odo dogai hori takisi tanaai mwaeraha raha na'i Rom ma'ua ai'a?”

²³ 'Ia Jisas 'a 'iraraa dorau raba pwari'ia, ma o'ani 'iniraaui,

* **20:17** 20:17 Psalm 118:22 † **20:18** 20:17-18 Ni hau na ororiu di'usi, 'a ura 'inia Jisas. 'Iraaui Jiu rau 'itaa Jisas marau ai'a raba hinihinia. Ma rei'uaa na o'asi, 'ia Jisas naasi nei na ororiu di'u. 'Iraaui Jiu 'a 'onaa dorau agusu na'i hausi, 'inia 'a bwara tanaraau 'anai hinihinia do 'ia Jisas naasi Ha'atahi 'inia 'iia 'e noni moi 'onaairaaui.

24 “Moisu waa mai ta korai ha'a.” Rau haua tanaa, magu o'ani 'iniraau, “Na atana mana nununa tei na awa na'i korai ha'ani?”

25 Miraaugu aramia o'ani, “I atana mana nununai Mwaeraha adaau Rom.”

Miagu o'ani 'iniraau, “Onaa na o'asi, mamoi haua tanaai Mwaeraha i taha 'iia na to'oraa, mamoi haua tanaa God taha 'ia God na to'oraa.”

26 Naasi, 'a bwara tanaraau dorai ha'aagauhia Jisas, rei'uaa narau bonasia do'ai 'unua ta maho taritari'a na'i maadaa'i noni. Raugu bahu moi 'iniai heimwaosi hako adaau 'iniai heiarani na haua.

Heisonga'i 'Iniai Suruta'e Aho'i
(*Matiu 22:23-33; Mak 12:18-27*)

27 Ma na'i muri, ra'i Sadiusi ra boi beia Jisas. 'Iraausi rau ai'a hinihinia do 'irai noni rai suruta'e aho'i baaniai mae, miraaugui songa'inia Jisas o'ani,

28 “Ha'ausuri, 'ia Moses 'a nugaai Ha'atora tanagaau do 'onaa 'e sae ha'iwai nai mae baaniai urao ana mararu ai'a to'o gare, na do'orana 'ai orisia, mai waina ro'u i uraosi. Mana gare na rarui to'ora'i, rai 'unu'i 'ini'i gare ana'i do'orana na maesi, neina burungana 'a bwa'i hako.

29 Hoita, 'e heiha'auu naani. 'E ta'i 'oha 'e biu ha'ido'orada narau awa wou, mana gare na hutai na'o 'a ha'iwai. Raru ai'a to'o gare mau i urao anasi ma mae'a baania.

30 'Ariwou mana gare na hutai muri 'a waina ro'u i naosi. Raru ai'a to'o gare mau ma mae'a ro'u baaniai uraosi.

31 'Ariwou mana orunai do'oradaau 'a waina ro'u. Raru ai'a to'o gare ro'u mau ma mae'a ro'u baaniai uraosi. 'A o'asi moe'a naraugu buna mae hako biu ha'ido'oradasi ha'i ai'a to'o gare beiai uraosi.

32 Na'i muri mana uraosi 'a mae ro'u.

33 Hoita, na'i 'oha na 'iraau biu ha'ido'oradasi rau waina hako o'asi uraosi, 'iatei 'iniraau nararugui ha'iwai uraosi na'i 'oha na 'ia God 'aigui ha'a-suruta'eraau aho'i baaniai mae?”

34 Mia Jisas 'a aramiraau o'ani, “Na'i marewanani na mwane mana urao ra matai ha'iwai.

35 Mei tanaraau nei nara arari 'anai suruta'e aho'i baaniai mae 'anai awa na'i marewana nai boi ta'oha, ra bwa'i ha'iwai

36 mara bwa'i mae'a ro'u. 'Inia 'iraau rai 'onaairaaui enjel nara bwa'i mae. 'Iraau ra'i garena God, 'inia 'ia God a ha'a-suruta'eraau baaniai mae.

37 'Ia Moses 'a ha'ata'inia goro moi hura'a tanagaau dona sae 'ai suruta'e aho'i baaniai mae. Na'i dora nara maaniai gere hasi'ei na ngarungaru ani, 'ia Moses 'a 'unua do 'ia Araha God 'e God ana Ebrahim, Aisak, mea Jekop.‡

38 Mana God naasi, ai'a God adaui nei ra mae, me 'e God adaui nei ra tahi. Naasi 'a ha'ata'inia doni waira orusi rau tahi mau, rei'uaa narau bwane mae. 'Inia na'i beia God, na mwane inoni ra tahi.”

39 Ma tara'i Ha'ausuri 'anai Ringe ana'ia Moses raugu o'ani, “Ha'ausuri, 'o heiarani goro ha'atai!”

40 Ma ai'a ta ta'i nei 'iniraau'a ro'u naigui raba haua ro'u ta ta'i heisonga'i.

Heisonga'i 'Iniai Ha'atahi
(*Matiu 22:41-46; Mak 12:35-37*)

41 Mia Jisas 'a o'ani 'iniraau, “'Iniai 'uaana naragu 'unua 'inia do ni Ha'atahi 'e warowarona moia Deved?”

42 Na'i buka Psalm 'ia Deved 'a 'unu ha'arangasia hura'a o'ani, “'Ia Araha God a ha'atee tanaai Araha agua o'ani:

'O'i heinagu na'i aba odogu
'anai heimarungi beiau,

‡ 20:37 20:37 Eksodas 3:6

⁴³ tari 'oha wai nugaraaui maerongamu
na'i bahainai heimarungi amua.'§

⁴⁴ Na'i 'oha na 'ia Deved 'a 'unua do 'ia Ha'atahi 'e Araha ana, 'a ha'ata'inia do 'ia Araha ai'a do'e warowarona moi, ma'ata 'iia Araha ro'u ana."

Ha'abasu 'Iniai Barongadi

Saemaui Adaa'i Jiu

(Matiu 23:1-36; Mak 12:38-40; Luk 11:37-54)

⁴⁵ Na'i 'oha na 'iraui inoni rau bahurongo, 'ia Jisas 'a o'ani 'iniraui rongoiusuri ana'i,

⁴⁶ "Moi hehere goro 'iniraui Ha'ausuri 'anai Ringe ana'ia Moses. 'A goro adaui hano hairiu na'i maketi bei'i to'oni ororiu adaa'i do neina 'iraui inoni rai 'ome 'irararaui marai ha'ahouraaui. Na'i 'oha narau siri suri'i ruma ni ha'arahesi, mei suri'i ngau goni nara haa'i, rau 'irisia dorai heinagu moe'a suri'i dora ororiu.

⁴⁷ Rau matai ha'a-bweubweu'araui nao 'ini'i ruma adaa'i mana mareho narau to'ora'i. Mana 'oha rai ha'arahesi, rau pwari'i ha'amaesiraui inoni 'anai haa'i rihunga'i tewa. Moi 'iraraa do na ha'a-mama'ai, 'ia God 'ai ha'arahaa ro'u wou tanaraui."

21

Jisas 'A Ha'atee Ha'ata'eta'ei

Nao Na Pohara

(Mak 12:41-44)

¹ Na'i 'oha na 'ia Jisas 'a awa mau na'i Ruma Maea ana God, 'a wana ara'a ma 'omesi'i sae toto'ora nara 'ariwou nuga ha'a na'i bakosi ni wawate.

² Naasi ma 'omesia ro'u i nao pohara na 'ariwou gaasia dioi rua gere korai ha'a.

³ Mia Jisas 'agu ha'atee o'ani, "Inau wai 'unua ha'a-momori tana'amou, na naosi 'a nuga ha'a di'uraui hako'i mwane sae 'isi.

⁴ 'Iraui mwane sae 'isi rau hisu moi 'ini'i taha nara madara suri'i toto'ora adaa'i. Mana uraosi, 'oha na wateai ha'a ana, 'agu ai'a to'ora'a ro'u tanei."

Jisas 'A 'Unua Hura'a

Do Na Ruma Maea Ana God Rai Kaia

(Matiu 24:1-2; Mak 13:1-2)

⁵ Miraui tara'i rongoiusuri rau hadanga'iniai 'ome goro na haai Ruma Maea, mana hau 'ome goro ra tagorahia 'ini'i ma 'ini'i mwane mareho 'ome goro na 'iraui noni ra wate'i 'anai ha'araunia 'ini'i.

⁶ Mia Jisas 'a o'ani, "Mou 'omesi'i mwane mareho 'isi? 'E 'oha nai boi mau na bwa'i ta ta'i hau 'ini'i hau 'isi naraigui awa suri'i dora nara heinagu suri'i. Na mwane hau 'isi rai gaasi'i dio."

Ha'abasu 'Ini'i Maho Ta'a'i Narai Siri Mai

(Matiu 24:3-21; Mak 13:3-19)

⁷ Miraui ha'atee o'ani 'inia, "Araha, na'i 'oha he'ua narai to'o i mareho 'isi? 'E ha'ara he'ua namei re'ia nameigu 'iraraa 'inia do 'a tari'a i madoraa 'ana?"

⁸ Mia Jisas 'agu aramiraui o'ani, "Moi 'ome'ome goro, ra gasigu ha'ateha'amou tara'i sae. 'Ai ragoi nei narai boi heitaroha'i na'i atagu narai o'ani, "Tia'a ninauni. Ni ha'ahakonai dangi naani'a.' 'Oha nai o'asi, moi abui araisuriraui.

⁹ Moi abui mamaa'u na'i 'oha namoi rongoi tarohani hei'oi ma'ua taroha 'inia marau nara hei'oi haariraa. Rei'uaa narai to'o i mareho o'asi, ma'ata ai'a do na ha'ahakonai dangi naasi'a."

¹⁰ Ma o'ani 'iniraa, "'Iraaui sae na'i ta'i kantri rai 'ari 'anai heingahui bei'i sae na'i nata kantri.

¹¹ Rai' nunu raha mana mwane riunga ta'a'i rai to'o suri'i tara'i dora, ma tara'i dora na inoni rai mae 'inia hioro. Mwane mareho ha'amamaa'u mana mwane mareho ha'abu'oahu rai to'o na'i ahoasara.

¹² "Ma'ata na'i na'o maraigui to'o i mareho 'isi, rai dau'amou 'anai nora ta'ai'amou. Rai 'i'i'amou suri'i ruma ni ha'arahesi marai gaasi'amou siri na'i rumaniho'o. 'Iniai hinihiniau amou, rai wai'amou tanaraaui Primia mana Mwaeraha 'anai hiiri'amou.

¹³ Ma naasi madoraa goro 'anai taroha'inia hura'a i Taroha Goro tanaraaui.

¹⁴ Na'i na'o maraigui hiiri'amou, 'ai abui ta'aabemoou 'inia taha moi 'unua 'anai taatahi bwarasi'amou.

¹⁵ 'Inia 'inau nawai haa'i tana'amoui heiarani nara madoma na 'a bwa'i ta ta'i nei 'iniraaui maerongamoo'i naigu ura bwarasi'i ma'ua tohe'i.

¹⁶ Ai'a do 'iraaui moi narai here ha'a-ta'ai'amou, me ni ama mana ina mana do'oramoo'i, miraaui sae amoo'i, ma'ua geresae amoo'i moi, narai usua'ini'amou tanaraaui maerongamoo. Miraaui na'otara rai ngahu ha'amaesi'i tara'i nei 'ini'amou.

¹⁷ Na mwane inoni rai 'utai'amou, suria 'i'amou rai rongoiusuri agu'i.

¹⁸ Ma'ata 'a bwa'i do ta ta'i warihu suri'i bwaumoo'i nai ai'aa ha'atai.

¹⁹ 'Onaa namoi ura baabau, moi daua namooui huunai tahi.

²⁰ "Na'i 'oha namoi 'omesia do'iraaui sae hehei'oi rai ura garigariai Jerusalem, 'a ha'ata'inia do naasi'a i 'oha narai here ha'ata'aiai 'omaasi.

²¹ Na'i 'ohasi, 'i'amou inoni namou awa na'i Provensi Jiudea moi hora ta'eha suri'i hungahunga 'anai bainihu. 'I'amoui nei namou awa na'i Jerusalem moi hora hura'a baania, mi'amoui nei namou awa hura'a baaniai 'omaasi, moi abui siriwou.

²² 'Inia naasi madoraa na 'ia God 'ai ha'a-mama'airaui inoni na'i dorasi, mana mareho na 'iraaui rarabea rau usu'i rai to'o ha'a-momori.

²³ Ha'a-arohai'araui di'ui urao ra pote mana hasuuri'i, 'inia 'ai bwara tanaraaui hora. 'E kae rongomaata'i nai raha di'u nai boi hungadaaui inoni nai Israel, mana taesu'a ana God 'ai boi hungadaaui.

²⁴ Tara'i nei rai ngahui'i 'ini'i naihi, tara'i nei rai dauraaui 'anai wairaaui 'ari suri'i marau he'ete'i 'anai ha'a-tau'aroraui. 'Iraaui nei nara ai'a Jiu rai here ha'ata'aiai Jerusalem 'aigui tari na'i ha'ahakonai madoraa adaau."

*Jisas 'A 'Unua Hura'a Do'ai Aho'i Mai
(Matiu 24:29-31; Mak 13:24-27)*

²⁵ Mia Jisas 'a o'ani ro'u, "Mwane mareho ha'amamaa'u rai to'o na'i sina, ma na'i hura, mana'i bei'i hee'u. Mana mwane inoni hako na'i marewana rai mamaa'usia aohanai asi mana mwane tabaosi raha ma'ai kakui ahudaa'i 'inia.

²⁶ Na inoni 'ai sadoi'i 'oi'oimae 'ini mamaa'usia adaa'i mareho narai boi 'anai ha'ata'aiai marewana. 'Inia na mwane mareho na'i ahoasara rai 'iha'iha.

²⁷ Miraaui inoni raigui 'omesiau i Gare'i Inoni na'i 'oha nawai aho'i mai na'i rorodo beiai mena mana raraha na wetewete.

²⁸ Na'i 'oha narai taraawa'a to'o i mareho 'isi, moi ura arasi mamoi wana ara'a! 'Inia na Ha'atahi amou 'a gaarangi'a."

Ha'ausuringa'i Baaniai Hasi'ei

*Nara 'Unua 'Iniai Fig**(Matiu 24:32-35; Mak 13:28-31)*

²⁹ Mia Jisas 'agu hauai ha'atee heiha'auu tanaraau o'ani, "Moisu 'adoma'i surisuriai hasi'ei nara 'unua 'iniai fig, ma'ua taraani hasi'ei moi.

³⁰ Na'i 'oha namou 'omesia dora asuru, mou 'iraraa do madoraa raorao 'a gaarangi'a.

³¹ 'A o'asi ro'u, na'i 'oha namoi 'omesi'i mareho ha'amamaa'u o'asi, 'a ha'ata'inia do na madoraa na 'ia God 'ai marungiraau inoni 'a gaarangi.

³² 'Inau wai 'unua ha'a-momori tana'amou, maho 'isi rai to'o, miraau sae nara awa na'i madoraa ni ra bwa'i mae mau.

³³ I ahoasara mana ano rarui anoro mana ha'atee agu'i rai awa tarau."

*Jisas 'A Ha'abasuraau Rongoiusuri Ana'i**'Anai Ha'aagau*

³⁴ "Moi herehere goro. Moi abui gono raha 'iniai wai ni bweu namoi here 'ome to'obweubweu'a 'inia. Mamoi abui 'ado'ado raha 'ini'i mareho namou 'irisi'i 'anai tahitahi amoo na'i marewanani. 'Onaa moi o'asi, moi 'asu'a 'iniai boi aho'i agua. 'Ai 'onaa mwamwaa na 'asu'a 'iniai huna na to'o na'iei.

³⁵ 'Inia na boi nawai haa, 'ai ha'a-'asu'araau hakoi mwane inoni nai marewanani.

³⁶ Moi 'ome'ome goro mamoi ha'arahesi tarau neina moi matai tahi dadara'a suri'i mareho ha'amamaa'u abe narai to'o, ma ro'u do na'i 'oha namoi ura gaarangiau na'i maagu, 'inau i Gare'i Inoni, wai wa'ewa'e 'ini'o."

³⁷ Suri'i dangi 'ia Jisas 'a ha-ha'ausuriraau noni na'i Ruma Maea ana God, ma su'urahi mai ma ta'eha 'anai mauru na'i hungahungai 'Oliv.

³⁸ 'Ado dangi na'i haho'oa ta'aa, 'irai inoni ra goni wou na'i Ruma Maea 'anai bahurongo'i taha na 'ia Jisas 'a maani'i.

22*Jiudas 'A 'Adoma'i Aratara 'Anai Watea**Jisas Tanaraau Na'ohadaa'i Piriisi**(Matiu 26:1-5; Mak 14:1-2; Jon 11:45-53)*

¹ Mana Rongo 'iniai Bredi nara ai'a doraria 'iniai draebam nara 'unua ro'u 'iniai Rongo ni Roho Aharau 'a raumwadu.

² Miraau Na'ohadaa'i Piriisi mana Ha'ausuri 'anai Ringe ana'ia Moses, rau bonasia siba 'inia ta here na bwa'i sae rago nai 'iraraa narai ha'amaesia 'inia Jisas. Rau 'irisia o'asi, suria rau magugu do 'a gasigu to'o ta ha'agogoru na'i 'oha narai daua.

³ Naasi mia Saetan 'a tau'aro na'i 'adoma'ina Jiudas Iskariot, 'e ta'i 'iniraau ta'i tangahuru mana rua Ha'ataari ana'ia Jisas.

⁴ 'Ia Jiudas 'a taha beiraau Na'ohadaa'i Piriisi miraau na'ohadaau hehei'oi narau 'omesuriai Ruma Maea ana God 'anai ha'aradorado beiraau 'iniai here nai haua narai daua 'inia Jisas.

⁵ Miraau wa'ewa'e di'u na'i 'oha narau rongoa do'ia Jiudas 'ai 'a'auhiraau, marau 'adoma'i aratara 'anai horia.

⁶ Mia 'a 'adoma'i aratara beiraau, magu sibasiba madoraa goro 'anai usuha'inia Jisas tanaraau, na'i 'oha na 'iraau inoni ra bwa'i awa.

*Ha'aagau 'Anai Ha'ato'oai Roho Aharau**(Matiu 26:17-25; Mak 14:12-21; Jon 13:21-30)*

⁷ Na'i 'ohasi, 'a tari mai madoraa 'anai ha'ato'oai Rongo 'ini'i Bredi nara ai'a dorari'i 'ini'i draebam. Ma na'i dangisi ra ngahui'i tara'i garei siip 'anai 'adoma'i aho'isiai Roho Aharau.

⁸ Mia Jisas 'a 'unua mai Pita mia Jon ma o'ani 'inirarua, "Muru 'ari mamurui ha'aagau tanagaau 'anai ngauai Rongo ni Roho Aharau."

⁹ Miraru songa'inia o'ani, "Na'i hei na'o 'irisia do miri ha'aagauhia iei?"

¹⁰ Mia o'ani 'inirarua, "Na'i 'oha namurui siriwou na'i Jerusalem, 'e sae na suru'iai bei wai nai heisadoi bei'amurua. Murui suria, ma murui siri suria na'i ruma nai siri na'iei.

¹¹ Na'i 'oha namurui siriwou, murui songa'iniai sae na to'oraai rumasi. Murui o'ani, 'I Ha'ausuri ameeu 'a raba 'iraraa, na hei ahii nai matai ngau iei beiraaui rongoiusuri ana'i 'anai 'adoma'i aho'isiai Roho Aharau?"

¹² 'Ia mo'osi 'aigui wai'amurua ta'eha 'anai ha'ata'inia tana'amuruai kae ahii nara bwane ha'a-aratara ha'agorohia. Na'i 'isi namurui ha'aagauhi'i ei mwane mareho."

¹³ Na'i 'oha raru 'ariwou, raru 'omesia do na mwane mareho ra to'o 'onaai bwane 'unua ana Jisas tanararua. Mararu ha'aagauai ngaugoni 'anai 'adoma'i aho'isiai Roho Aharau na'i rumasi.

Ngau 'Anai 'Adoma'i Aho'isiai

Roho Aharau

(Matiu 26:26-30; Mak 14:22-26; 1 Korin 11:23-25)

¹⁴ Na'i 'oha na tari mai madoraa 'anai ngau, 'ia Jisas mana rongoiusuri ana'i rau heinagu auru ha'aagau 'anai ngau.

¹⁵ Mia Jisas 'agu ha'atee o'ani 'iniraaui, "'A orea'a mai 'adoma'i raorao agua dowai ngau bei'amou 'anai ha'ato'oai Roho Aharau mawaigu rongomaata'i.

¹⁶ 'Inia wai 'unua tana'amou, 'a bwa'i ta'oha ro'u na waigui awa 'anai ngaa i Roho Aharausi bei'amou, tari 'oha na huunai 'ado'ado 'ana 'ai to'o ha'a-momori na'i hourana ana God."

¹⁷ Mia Jisas 'a dauai panikeni waen. Na'i 'oha na ha'atee ha'agorohia God 'inia 'a o'ani, "Moi daua mamoi gono hasura'i 'inia.

¹⁸ Wai 'unua tana'amou, 'a bwa'i ta'oha ro'u nawai gonohiai waen, 'ai tari 'oha nai boi heimarungi ana God."

¹⁹ Naasi ma dauai huai bredi, ma ha'atee ha'agorohia God 'inia. 'A uubia ma haua tanaraaui rongoiusuri ana'i, 'a o'ani, "Naani abegu nawai watea 'ini'amou, moi haua o'ani 'anai 'adoma'i aho'isiau."

²⁰ Ma o'asi ro'u na'i murinai ngau. 'A dauai panikeni waen ma o'ani, "Ni waen naani 'e duruduru haoru ana God nawai ha'a-o'oria 'iniai 'abugu nai ahe 'anai ha'atahi'amou.

²¹ Ma moisui 'ome, 'e ta'i abe na ngau goni beigaau 'ini nai usuha'iniau tanaraaui maerongagu.

²² 'Inau i Gare'i Inoni wai mae 'onaai 'irisia ana God, ma'ata 'a ha'arohaia di'u a mo'osi nai usuha'iniau!"

²³ Miraau na rongoiusuri raugu heisosonga'i hairiu 'inia tei 'iniraaui nai hauai heresi.

Tei Nai Ororiu

²⁴ Ma'e heitohetohe na to'o ro'u na'i ahoadaaui rongoiusuri 'inia tei nai ororiu 'iniraaui.

²⁵ Mia Jisas 'a ha'atee o'ani 'iniraaui, "'Iraaui mwaeraha 'anai marewanani, ni heimarungi nara haa 'a bwara tanaraaui inoni. Ma rei'uaa na towa'i o'asi, miraau rau 'unua do rau 'a'auhiraauui inoni.

²⁶ Mei bei'amou 'a ga'i bwa'i o'asi. 'Iatei na ororiu 'ini'amou, naasi nai ha'i sae haraaria, mia tei na na'otara 'ini'amou 'ai ha'i sae tatau'aro tana'amou.

27 Na'i 'ado'adomoou, 'ia tei na ororiu di'u? 'Ia mo'o na heinagu 'anai ngau moi, ma'ua 'ia mo'o na ha'aagau mahoingau tanaa? Mou 'adoma'inia do'ia mo'o na heinagu moi 'anai ngau, nita? Me 'inau 'au awa bei'amou 'onaai inoni tatau'aro.

28 "'I'amou bwane ura wetewete beiau suri'i madoraa bwara nau siri suri'i.

29 'Ia Amagu 'a haua tanaaui mena 'anai heimarungi, ma naasi 'inau wai haua ro'u o'asi tana'amou.

30 Neina 'i'amou moi heinagu 'anai ngau mana gono na'i dora ngaungau na'i dora ni heimarungi agua, mamoi heinagu suri'i dora ni mwaeraha 'anai marungiraui ta'i tangahuru mana rua burungai inoni nai Israel."

Jisas 'A 'Unua Do 'Ia Pita 'Ai Tohea

(Matiu 26:31-35; Mak 14:27-31; Jon 13:36-38)

31 Mia Jisas 'a o'ani 'inia Saemon Pita, "Saemon, Saemon, 'oisui rongo! 'Ia Saetan 'a ha'angonia God 'anai ohongi'amou 'anai 'iraraa tei 'ini'amou na wetewete i hinihinina.

32 Ma'ata Saemon, 'au bwane ha'arahesi doni hinihinimu 'a bwa'i ai'aa ha'atai. Ma na'i 'oha na'oi rihota'i aho'i mai tanaau, 'oi ha'a-o'oriraui do'oramu'i 'ini marai wetewete ro'u suri'i hinihinidaa'i."

33 Mia Pita 'a ha'atee o'ani, "Araha, 'inau 'au ha'aagau 'anai 'ari bei'o na'i rumaniho'o, ma 'anai mae bei'o."

34 Mia Jisas 'a o'ani 'inia, "Wai 'unua tana'o Pita, na kua 'a bwa'i tataraoke mau na'i wa'aria, mi'oe 'oi bwane tohe ha'a-oru do'o ai'a 'iraraau."

Jisas 'A 'Unua Tanaraau 'Anai Ha'aagau

35 Mia Jisas 'a songa'iniraui rongoiusuri o'ani, "'A 'ua? Na'i 'oha nau ha'ataari'amou hura'a ani nau 'unua domoi abui waiwai anga mana pwaosi mana sandol, ra'i mareho he'ua namou toho 'ini'i?"

Miraui o'ani, "Ai'a ta mareho namei toho 'inia."

36 Magu o'ani 'iniraui, "Me na'i 'ohani 'iatei na to'o pwaosi 'ai waa, ma 'onaa 'o to'o anga ma'oi waa ro'u, 'onaa 'iatei na ai'a to'o naihi ni hei'oi, 'ai raonga'iniai to'oni ana mai horia tana naihi.

37 'Inia wai 'unua tana'amou: 'Ai to'o ha'a-momori mareho nara usua 'iniau na'i Usu-usu Maea na o'ani, "'Iia ra 'unugonia beiraui inoni hehereta'a'i.* Ha'amomori, ni mwane mareho na Usu-usu Maea na 'unu'i 'iniau, rai to'o ha'a-momori."

38 Miraui rongoiusuri rau o'ani 'inia, "'Ome Araha, 'e rua naihi ni hei'oi naani."

Mia Jisas 'a o'ani, "'Io, 'a goro'a!"

Jisas 'A Ha'arahesi Na'i Hungahungai 'Oliv

(Matiu 26:36-46; Mak 14:32-42)

39 Mia Jisas 'a hura'a baaniai 'omaa ma ta'eha i hungahungai 'Oliv 'onaai bwane hahaa ana. Mana rongoiusuri ana'i 'iraui ro'u beia.

40 Mia Jisas 'agu o'ani 'iniraui rongoiusuri ana'i, "Moi ha'arahesi neina moi abui ahoda na'i 'oha moi siri na'i heiohongi."

41 Ma gere hano beira'i baaniraui. 'A topiruru auru ma ha'arahesi o'ani,

42 "Ama, 'onaa 'ai suriai hei'irisimu, ma'oi abui wateau 'anai siri na'i rongoomaata'ini. Me 'ai abu 'onaai 'irisia agua, ma'ata 'ai suriai hei'irisimu."

43 Ma'e enjel na diomai baaniai aro na ha'amaranga tanaa 'anai ha'a-wetewetea.

44 Beiai ahutotou raha na'i tahingana, 'a ha'arahesi wetewete ro'u wou, mana mada'a na haua 'a 'onaai 'abu na udu dio na'i ano.

* 22:37 22:37 Aisaea 53:12

⁴⁵ 'A suruta'e ara'a 'oha na ha'arahesi hako, ma 'ari aho'i wou beiraau rongoiusuri ana'i. Ma sadoia dorau mauru hako, suria rau rahe 'ini ahutotou raha adaau.

⁴⁶ Mia Jisas 'a o'ani 'iniraa, "'A 'ua namou mauru 'inia? Moi suruta'e mamoi ha'arahesi, neina moi abui ahoda na'i 'oha moi siri na'i heiohong'i."

Ra Boi 'Anai Daa Jisas

(Matiu 26:47-56; Mak 14:43-50; Jon 18:3-11)

⁴⁷ Na'i 'oha na ha-hadahada mau, ma ataha'a mai kae ruruhai inoni. 'Ia Jiudas 'e ta'i 'iniraaui Ha'ataari ana'ia Jisas na na'otaradaau. Mia Jiudas 'a 'ariwou odo-odo beia Jisas 'anai ngoonia.

⁴⁸ Mia Jisas 'a o'ani 'inia, "Jiudas, naia naasi here na'oi haa 'anai ha'ahaingahu 'iniau, 'inau i Gare'i Inoni?"

⁴⁹ Na'i 'oha na 'iraaui rongoiusuri nara awa 'isi rau 'ome 'iraraai taha nai to'o, rau o'ani 'inia Jisas, "'A 'ua Araha, mei haa'i naihi?"

⁵⁰ Ma'e ta'i 'iniraaui na rahiai naihi ana ma taba taahiai karinga odonai sae tatau'aro anai Na'ohadaaui Piriisi.

⁵¹ Mia Jisas 'a ha'atee o'ani, "Abu'a!" Ma dau wou na'i karinganai inoni tatau'arosi ma ha'agorohia aho'i.

⁵² Mia Jisas 'a o'ani 'iniraaui Na'ohadaa'i Piriisi miraaui sae hehei'oi nara 'omesuriai Ruma Maea ana God, miraaui hakoi saemaua narau boi 'ana Jisas, "'A 'ua? Mou 'adoma'inia do 'inau 'e sae hehere ta'aa namou boi 'inia bei'i naihi mana hasi'ei 'anai heingahu 'anai dauau?"

⁵³ 'Ado dangi 'au awa bei'amou na'i Ruma Maea ana God mamou ai'a raba dauau. Ma'ata naani 'oha na mena anai adaro 'a marungi'amou. Moi hauai taha namou 'adoma'inia."

Pita 'A Tohe Ha'a-oru Do Ai'a 'Iraraa Jisas

(Matiu 26:57-58, 69-75; Mak 14:53-54, 66-72; Jon 18:12-18, 25-27)

⁵⁴ Miraaui na hehei'oi rau daua Jisas mara waia 'ari na'i ruma anai Na'ohadaaui Piriisi. Mia Pita 'a susuriraaui ha'atau moi.

⁵⁵ Na'i 'oha narau taha wou, 'e 'eu ni waari'u nara togaa na'i 'ubutanai dora a'ora hura'a i abau 'omaa anai rumasi. Miraaui heinagu totoa 'anai waari'u, mia Pita ro'u beiraau.

⁵⁶ Ma'e gere urao na tatau'aro na'isi 'a 'ome 'iraraa Pita ma wana wetewete 'inia. 'A o'ani, "'Ia mo'oni 'au re'ia ro'u beia Jisas."

⁵⁷ Mia Pita 'a tohea, 'a o'ani, "Gere urao, 'inau ai'a 'iraraa mo'osi."

⁵⁸ Ai'a orea mau ma'e ta'i abe 'iniraaui na 'ome 'iraraa ro'u, 'a o'ani 'inia, "'Toe 'e ta'i 'iniraaui ro'u i rongoiusuri ana'i."

Mia Pita 'a o'ani 'inia, "'Ei mwane, 'inau 'au ai'a."

⁵⁹ 'A ga'i 'onaai ta'i 'aoa ro'u moi na'i muri ma'e ta'i nei 'iniraaui na ha'atee wetewete o'ani ro'u 'inia, "Ha'amomori di'u, 'ia mo'oni 'e ta'i ro'u 'iniraaui, 'inia 'iaani 'e ai Galili."

⁶⁰ Mia Pita 'a ha'atee o'ani, "Ai'a ha'a-momori moe'a i maho na 'o 'unuasi." Na'i 'oha na ha-hadahada mau, na kua 'a tataraoke.

⁶¹ Mia Jisas 'a rihota'i ma wana wetewete 'inia Pita. Mia Pita 'agu 'adoma'i aho'isiai maho na 'ia Jisas 'a 'unua tanaa na o'ani, "'A bwa'i tataraoke mau i kua na'i wa'aria, mi'oe 'oi bwane tohe ha'a-oru do'o ai'a 'iraraau."

⁶² Maagu hura'a na'i maanai bara anai rumasi ma ru'uhiai angi.

Jisas Ra Haikou 'Inia

⁶³ Miraaui nei narau awa beia Jisas 'anai 'omesuria, ra haikou 'inia. Ra hidaria mara rubu'ia 'ini'i rimadaa'i.

⁶⁴ Rau hiri ha'abwarasiai maana 'iniaai bwana marau hidaria maragu o'ani 'inia, "'Oi 'unua 'iatei na ngahui'o! 'Inia i'oe 'e rarabea, nita?"

⁶⁵ Miraau 'unu'i ro'u i mwane mareho ta'a'i 'ana Jisas 'anai here ha'ata'aia.

Jisas Ra Waia 'Ari Tanaraaui Kansol
(*Matiu 26:59-66; Mak 14:55-64; Jon 18:19-24*)

⁶⁶ Na'i haho'oa ta'aa, 'iraau saemaua beiraau Ha'ausuri 'anai Ringe ana'ia Moses mana Na'ohadaa'i Piriisi rau goni na'i ta'i dora. Naasi ruruha nara 'unuraau 'inia Kansol. Maragu waia Jisas mai tanaraau.

⁶⁷ Miraaugu o'ani 'inia, "O'i 'unua tana'ameu: 'A 'ua? I'oe naasi Ha'atahi?"
Magu aramirau o'ani, "Rei'uaa nawai 'unua tana'amou, mamou bwa'i hinihini,

⁶⁸ ma 'onaa nawai songa'ini'amou, mamou bwa'i matai aramiau ro'u.

⁶⁹ Ma na'i 'ohani ma 'ari'a, na Gare'i Inoni 'ai heinagu na'i dora ororiu na'i odona God huunai mena."

⁷⁰ Miraaugu songa'inia ro'u o'ani, "A 'ua? I'oe naasi garena God?"

Miagu aramirau o'ani, "Naia namou 'unua'asi."

⁷¹ Naasi maraugu o'ani 'inirau haarirau, "A goro'a! Gaugu bwa'i bonasiai sibania'a ro'u tanei 'anai 'unua ta mareho 'anai subunia 'inia. 'Inia 'igaau haarigaau gau rongoa'a i 'unua ana do'ia naasi garena God!"

23

Jisas Ra Waia 'Ari Tanaa Paelat
(*Matiu 27:1-2, 11-14; Mak 15:1-5; Jon 18:28-38*)

¹ Miraau hakoi ruruha rau suruta'e ara'a marau waia Jisas 'ari tanaai Primia, 'ia Paelat, do'ai hiiria.

² Miraaugu taraawa'a ha'ahunia 'ini'i mareho, rau o'ani, "Ia mo'osi meu sadoia do'a na'otaradaaui inoni 'anai ura bwarasiai Gaumani anai Rom. Ma 'unua ro'u tanaraau dorai abui hori takisi tanaai Mwaeraha, ma 'unua do'ia naasi mwaeraha mana Ha'atahi."

³ Mia Paelat 'agu songa'inia Jisas o'ani, "A 'ua? I'oe naasi Mwaeraha adaui Jiu?"

Mia Jisas 'a aramia o'ani, "Naia na'o 'unuasi."

⁴ Mia Paelat 'a rihota'i ma o'ani 'inirau Na'ohadaa'i Piriisi mana ruruha nara boi 'anai baturongo, "Ai'a ta mareho wai to'oana beia mo'oni na do'ai horosia 'inia ta ringe."

⁵ Miraaugu ha'atee wetewete ro'u ara'a o'ani, "Ia mo'osi 'a ha'a awata'airaui inoni suri'i mwane dora hako na'i Jiudea 'ini'i ha'ausuringa'i ana'isi. 'A taraawa'a na'i Provensi Galili, nagu buna boi tari 'ini beigaau."

Jisas Ra Waia 'Ari Tanaa Herod

⁶ Na'i 'oha na 'ia Paelat 'a rongoa do 'a taraawa'a na'i Galili, 'agu songa'inirau ro'u o'ani, "A 'ua? 'Ia mo'osi 'e ai Galili?"

⁷ Miraau aramia do'ia Jisas baaniai Galili. Na'i 'oha na 'iraraa o'asi do'ia Jisas 'a boi baaniai aba na heimarungi ieia Herod, 'agu ha'ataaria 'ari tanaa Herod. Na'i madoraasi 'ia Herod 'a awa ro'u 'isi na'i Jerusalem.

⁸ 'Ia Herod 'a rongo tarohana Jisas mau mai orema magu kaeni raba 'omesia. Ma raba 'omesia ro'u 'oha na 'ia Jisas 'ai hau'i tara'i ha'abu'ohu. Naasi na'i 'oha na 'ia Paelat 'a ha'ataaria woua Jisas tanaa, 'a kaeni wa'ewa'e di'u.

⁹ 'A hau'i mwane heisonga'i tanaa Jisas, mia Jisas 'a ai'a raba arami'i.

¹⁰ Miraau Na'ohadaa'i Piriisi mana Ha'ausuri 'anai Ringe ana'ia Moses, rau ura gaarangi marau ha'ahunia wetewete a Jisas 'ini'i mwane mareho ta'a'i.

11 Mia Herod miraaui sae hehei'oi ana'i rau heiheia marau haikou 'inia. Rau ha'ato'onia Jisas 'onaai mwaeraha 'inia to'oni tewa 'ome goro, maraugu ha'ataaria aho'i 'ari tanaa Paelat.

12 Taraawa'a mau mai, 'ia Paelat mia Herod raru ha'imae hairiu, tari mai na'i madoraa nagu to'o i marehosi, ma rarugu hagu hagu goro'a.

Jisas Ra Hiiria 'Anai Mae

(Matiu 27:15-26; Mak 15:6-15; Jon 18:39—19:16)

13 Mia Paelat 'a 'unuraau goni Na'ohadaa'i Piriisi, 'iraau saemaua adaa'i Jiu miraaui inoni,

14 ma o'ani 'iniraau, "'T'amou mou waia mai a mo'oni mamou 'unua do'a na'otaradaaui inoni 'anai ura bwarasiai Gaumani anai Rom. Hoita, minau 'au songa'i hegahegaa na'i maamou hako ma ai'a ta ta'i maho 'ini'i mareho namou subunia 'ini'i nawai to'oana beia.

15 'Ia Herod ma 'unua ro'u do 'a ai'a to'oana ta mareho taritari'a beia, tarana naasi na ha'ataaria aho'i 'inia mai. Ai'a ta mareho na 'ia mo'oni nai haua na ta'isada do'ai mae 'inia.

16 Tarana naasi wai 'unua tanaraaui sae hehei'oi marai rohoa, mawai ha'ahura'ahia dadara'a."

17 'E ringe na awa do na'i 'ado 'oha nara ha'ato'oai Rongo ni Roho Aharau, 'iraau inoni rau matai ha'angonia Paelat anai ha'ahura'ahia baaniai rumaniho'o tanei na 'iraau rai rabasia.*

18 Miraaui hako inoni raugu totoro aratara o'ani, "Ngahu ha'amaesia mo'osi! 'Ia Barabas nameu 'irisia do'oi ha'ahura'ahia baaniai rumaniho'o!"

19 'Ia Barabas 'e sae ra gaasia na'i rumaniho'o 'inia taraawa'ana ana i ha'agogoru na'i Jerusalem, ma 'ini ngahu ha'amaesia sae.

20 'Ia Paelat 'a 'unua ro'u tanaraau do'ai ha'ahura'ahia Jisas.

21 Miraaui hako rau totoro aho'i tanaa Paelat o'ani, "Rabu ahita'inia na'i dadaahoro! Rabu ahita'inia na'i dadaahoro!"

22 Mia Paelat 'a o'ani 'iniraau, "'Iniai 'uaana? 'E 'ino he'ua na haa? 'Inau ai'a to'oana ta mareho nai haua na ta'isada do'ai mae 'inia! Wai 'unua tanaraaui sae hehei'oi marai rohoa, mawai ha'ahura'ahia dadara'a." Naasi orunai 'oha na 'ia Paelat 'a ha'atee o'asi.

23 Miraaugui totoro raha ara'a ro'u baaniai na'o dorai rabu ahita'inia ma'ata Jisas na'i dadaahoro. 'Ariwou naraugu buna ha'ahoea Paelat.

24 Naasi 'ia Paelat 'agu 'adoma'i aratara beiraau.

25 'A ha'ahura'ahia Barabas 'onaai 'irisia adaaui, 'ia mo'o nara gaasia ani na'i rumaniho'o 'inia heingahu ma 'inia ha'ato'oa na haa i ha'agogoru na'i Jerusalem. Ma watea Jisas tanaraau 'anai haua tanaa i maho narau 'irisiasi.

Jisas Ra Rabu Ahita'inia Na'i Dadaahoro

(Matiu 27:32-44; Mak 15:21-32; Jon 19:17-27)

26 Na'i 'oha na 'iraau hehei'oi rau waia Jisas, rau 'ariwou marau heisadoi beiai ai Saerin na atana 'ia Saemon. 'Agu boi baaniai dora na gere ha'atau baaniai 'omaasi ma riutaha mai ro'u na'i tarasi. 'Iraau hehei'oi rau ha'a-'usu'usua do'ai suru'iai dadaahoro, mai suria Jisas.

27 'E kae ruruha raha narau surisuria Jisas. Ma na'i ruruhasi tara'i urao nara ahutotou 'inia Jisas. Rau ago-ago marau angi hahano.

28 Mia Jisas 'a rihota'i, ma ha'atee o'ani 'iniraau, "Mwane urao ni Jerusalem, mou abui angisiau. Moi angisi'amou haari'amou miraaui gare amoo'i.

29 'Inia 'e madoraa nai boi mau narai o'ani, 'Ha'amwaniraau di'u i urao nara 'amara, mana nei nara ai'a to'ora gare mara ai'a matai ha'asusu gare.'

* 23:17 23:17 Tara'i Baebol bwani ra ai'a to'oraai tatarani.

³⁰ Na'i 'ohasi na inoni hako rai totoro, marai o'ani 'ini'i hungahunga mana bo'obo'o, 'Moi ahoda auru hunimeeu, mamoi anoiaumeu!'

³¹ Hoita, 'onaa narau here 'oniau, 'aigui he'ua tana'amou? 'Inia 'onaa ni 'eu 'ai noro ha'ata'aiai hasi'ei mamarewa'a, 'ai noro ha'ata'aia ro'u wou i hasi'ei na maria!'

³² Ma'e rua inoni hehere ta'aa nara wairarua ro'u 'anai ha'amaesirarua beia Jisas.

³³ Na'i 'oha narau ataha wou na'i dora ra 'unua 'inia Korai Bwau Sae raugu rabu ahita'inia ieia Jisas na'i dadaahoro, beiraruai rua inoni hehere ta'aasi. 'E ta'i na'i dadaahoro na'i odona, mana nata abe na'i dadaahoro na'i mahana.

³⁴ Mia Jisas 'a ha'atee o'ani, "Ama, 'oi 'adoma'i nugasiai maho ra haua tanaauni, 'inia rau ai'a aidangisiai taha narau haua."

Miraau sae hehei'oi rau gaasi ha'ara 'anai sadoia tei nai to'ora'i to'oni ana'i.

³⁵ 'Iraau inoni rau ura maraugu boresuria, miraau saemaua adaa'i Jiu rau haikou 'inia. Rau o'ani, "'Iia na ha'atahi'i tara'i sae he'ete'i ani. Nugaa mai ha'atahia haaria 'onaa 'iia naasi Ha'atahi na 'ia God na 'ome sigihia!'"

³⁶ Miraau hehei'oi rau haikou ro'u 'inia. Rau haua tanaai waen mahai,

³⁷ marau o'ani 'inia, "'Onaa i'oe naasi Mwaeraha adaaui Jiu, ma'oi ha'atahi'o haari'o."

³⁸ Mara usuai usu-usu na'i baba ma rau nugaa na'i bwaunai dadaahoro. Rau usua o'ani:

NAANI MWAERAHA ADAAUI JIU

³⁹ Ma'e ta'i 'iniraruai rua inoni hehere ta'aasi na ha'atee ha'ata'aia Jisas 'a o'ani, "'Onaa i'oe naasi Ha'atahi, ma'oi ha'atahigaau!'"

⁴⁰ Mana nata abe 'a ha'atee wetewete tanaa mo'osi, 'a o'ani, "'Ei. 'O ga'i ha'ahoua God, 'inia mae amua ro'u 'onaaia mo'osi!'"

⁴¹ 'Igaraa 'a arari do garai mae, suria 'igaraa ra'i sae hehereta'a'i. Mia mo'oni, ai'a ta ta'i mareho nai ha'atari'aa."

⁴² 'A ha'atee o'asi hako magu o'ani 'inia Jisas, "Jisas, 'oi 'adoma'iniau na'i 'oha 'oi mwaeraha!'"

⁴³ Mia Jisas 'a ha'atee o'ani 'inia, "Wai 'unua tana'o, de'eni 'oi awa beiau na'i paradaes."

Jisas 'A Mae

(Matiu 27:45-56; Mak 15:33-41; Jon 19:28-30)

⁴⁴ Ma na'i angi ta'i tangahuru mana rua na'i dangisi, 'a kuhi bwarasiai kantri hako tari na'i angi oru.

⁴⁵ 'Inia na sina 'a ai'a rara. Mana kae bwana ubu-ubu'a nara rohe bwarasia 'inia dora maea na'i Ruma Maea ana God, 'a maakari heihoa.

⁴⁶ Mia Jisas 'a totoro 'ini ringe raha o'ani, "Ama, na'i rimamu 'au nugaa tahingagu!" 'A ha'atee o'asi hako magu mae.

⁴⁷ Na'i 'oha na na'ohadaui hehei'oi 'a 'omesi'i mareho 'isi, 'a ha'aasaa God ma o'ani, "Ha'amomori, 'ia mo'oni 'e inoni odo-odo!"

⁴⁸ Miraau inoni nara goni wou na'i 'isi narau 'omesi'i taha nara to'o na'i madoraasi, rau hida suri'i waiburudaa'i 'inia ahutotou, marau aho'i 'ari suri'i ruma adaa'i.

⁴⁹ Me 'iraau hakoi nei narau hei'irara'i goro beia Jisas, goni bei'i urao narau ta'i boi beia baaniai Galili, rau ura ha'atau moi marau 'omesi'i 'ari taha nara to'o na'i 'ohasi.

Josep Ni 'Arimatea 'A Toringia Jisas

(Matiu 27:57-61; Mak 15:42-47; Jon 19:38-42)

⁵⁰⁻⁵¹ Ma'e ta'i sae na awa na'i Kansol na atana 'ia Josep. 'Iia 'e saeni 'Arimatea, 'e 'omaa na'i Jiudea. 'Ia Josep 'e sae goro ma odo-odo, me 'iia 'a totoriai 'oha na 'ia God 'ai boi na'i marewana 'anai marungiraau inoni. Mia Josep 'a ai'a 'adoma'i aratara beiraaui Kansol 'inia mareho narau haua tanaa Jisas.

⁵² 'Iia 'a ada beia Paelat ma ha'angoniai abena Jisas.

⁵³ 'A rahia dioi abena Jisas, ma ho'ua 'inia bwana mamaahui. 'A aoraa na'i wabwa nara 'eria na'i abenai kae hau. Ma na'i wabwasi, 'a ai'a ta sae mau narai toringia iei.

⁵⁴ Ni dangisi 'e rimana dangi. Naasi dangi na 'iraaui Jiu ra ha'aagau 'anai dangi ni mamaro adaau, 'inia 'aigui taraawa'a na'i su'urahi.

⁵⁵ Miraaui urao narau ta'i boi beia Jisas baaniai Galili, rau suria Josep. Rau 'omesiai wabwasi, marau 'omesiai nuga ra haa 'anai abena Jisas na'iei.

⁵⁶ Maraugu aho'i 'ari 'omaa 'anai ha'aagau'i tara'i rumu si'ini goro 'anai roga'i na'i abena Jisas. Ma na'i dangi ni mamaro rau mamaro 'anai suriai taha na Ha'atora na 'unua.

24

Jisas 'A Suruta'e Baaniai Mae

(Matiu 28:1-10; Mak 16:1-8; Jon 20:1-10)

¹ Na'i wa'aria i dangi sade, 'iraaui mwani urao 'ani rau ho'orai 'ari wabwa bei'i rumu si'ini goro narau bwane ha'aagauhi'i.

² Na'i 'oha narau ataha wou, rau 'omesia dona hau nara ha'abwarasia 'inia maana wabwa ra bwane burusia beira'i.

³ Na'i 'oha naraugu siri wou, maraugu ai'a 'omesia'ai abena Araha Jisas.

⁴ Ma na'i 'oha narau wai'ado'ado mau suriai marehosi, raugu 'asu'a ma'e rua enjel nararu siri suri'i to'oni mamaahui wadowado raru ura na'i bobodaau.

⁵ Na'i 'ohasi, rau mamaa'u di'u marau topira'i ruru marau mwaoro dio aurui ano. Mana enjel raru o'ani, "'A 'ua namou sibania 'inia na'i dora ni mae, 'ia mo'o na tahi'a aho'i?"

⁶ 'Iia 'a ai'a awa 'ini. 'Iia 'a suruta'e aho'i baaniai mae. Moi 'adoma'inia aho'i taha na maania tana'amou na'i 'oha na awa bei'amou na'i Galili. 'A 'unua do

⁷ na Gare'i Inoni rai watea tanaraau inoni ora-ora'a 'anai rabu ahita'inia na'i dadaahoro, ma na'i orunai dangi murina mae na haa, 'ai suruta'e aho'i baaniai mae."

⁸ Na'i 'ohasi, na urao 'isi raugu 'adoma'ini'i aho'i ha'atee 'isi.

⁹ Rau aho'i 'ari baaniai wabwa, ma rau maani'i mwane mareho 'isi tanaraau ta'i tangahuru mana ta'i Ha'ataari, mei tanaraau ro'u i haru nei.

¹⁰ Mana atadaa'i urao narau 'ari heitaroha'i tanaraau Ha'ataari, 'ia Meri ni Magdala, 'ia Joana, mia Meri inana Jems, ma tara'i urao ro'u.

¹¹ Na'i 'oha na 'iraaui Ha'ataari rau rongo, rau ai'a hinihiniraaui 'inia rau 'adoma'inia dora'i mamaani to'obweubweu'a moi.

¹² Mia Pita 'a suruta'e ma 'eba 'ari wabwa. Na'i 'oha na mwaoro 'anai wana siri, 'a 'omesia doni bwana moi nara ho'ua 'inia abena Jisas naragu awa. 'Oha na 'omesia o'asi, 'a aho'i 'ari 'omaa ma wai'ado'ado suriai mareho na to'osi.

'Ia Jisas 'A Ha'ata'i Tanararuai Wairarua

Nararu 'Ari 'Anai 'Omaai Emeas

(Mak 16:12-13)

¹³ Mau na'i dangisi 'e rua rongoiusuri ana Jisas nararu auru 'ana'i 'omaai Emeas, mana ha'atau na hauai 'omaasi baaniai Jerusalem 'a ga'i 'onaai ta'i tangahuru mana ta'i kilomita.

¹⁴ 'Oha nararu auru wou, raru maani'i hahano i mareho nara to'o 'isi.

¹⁵ Na'i 'oha nararu ma-mamaani mau, 'ia Jisas 'a 'ariwou gaarangirarua ma hano beirarua.

¹⁶ Ma'ata 'ia God 'a ha'abwaraa tanararua 'ana'i 'ome 'iraraa Jisas.

¹⁷ Mia songa'inirarua o'ani, "E taha namuru maania mai suriai tarasi?" Miraru ura sua ha'i 'ome ahutotou'a.

¹⁸ Ma'e ta'i 'inirarua na atana 'ia Kleopas na o'ani, "Gasi i'oe moi naasi ta'i sae na boi na'i Jerusalem na'o ai'a 'irara'i kae mareho nara to'o suri'i dangi nara hako'a 'ani."

¹⁹ Mia Jisas 'a o'ani, "Mareho he'ua?"

Miraru aramia o'ani, "Here nara haua 'ana Jisas ni Nasaret! 'Ia 'e Rarabea, mana ha'atee ana'i mana mwane mareho na hau'i ra mena di'u na'i maadaaui inoni ma na'i maana God.

²⁰ Me 'iraaui Na'ohadaa'i Piriisi miraaui saemaua agaa'i rau daua marau haua tanaai Gaumani 'ana'i Rom dorai hiiria 'ana'i ha'amaesia. Ma rau rabu ahita'inia na'i dadaahoro.

²¹ 'Tameu meu 'adoma'inia do 'iia naasi Ha'atahi na ga'i boi 'ana'i ha'atahiraau Israel baaniraau maeronga. Mana nata mareho ro'u na ai'a goro, naani'a i orunai dangi murinai to'o na hauai marehosi.

²² Mameu ta'i kaeni heimwaota'i 'inia mareho narau maania i urao narau awa na'i ruruha ameeu. Nade'eni wa'aria rau 'ari wabwa nara nugaaiei a Jisas.

²³ Ma na'i 'oha narau ataha wou na'i wabwasi, rau sadoia do ni abena Jisas 'a bwane ai'aa baaniai dora nara nugaaiei. Marau 'unua dora'i enjel narau re'i'i, nara 'unua tanaraau do'ia Jisas 'a tahi aho'i!

²⁴ 'Ariwou ma tara'i abe ro'u na'i ruruha ameeu, rau 'ari ro'u na'i muri marau 'omesia do ni abena Jisas 'a bwane ai'aa 'onaai 'unua nara haa i urao 'isi."

²⁵ Mia Jisas 'agu o'ani 'inirarua, "Muru bweu, ma muru ai'a raurau 'ana'i hinihini'i taha na 'iraaui rarabea ra 'unu'i!

²⁶ 'A 'ua? Muru ai'a aidangisia do na Ha'atahi 'ai mamaa'a ga'u, maigui heimarungi ara'ai aro beiai mena na raha?"

²⁷ Mia Jisas 'a hadanga'i ha'agorohi'i tanararuai taha nara usu'i 'abaia na'i Usu-usu Maea. 'A taraawa'a bei'i buka na usu'ia Moses tari bei'i buka adaa'i Rarabea.

²⁸ Na'i 'oha narau 'ariwou ada na'i 'omaa na 'iraruai rua mwanesi raru hano 'ana, 'ia Jisas 'a 'ome 'onaa do'ai hano daara'i.

²⁹ Miraru bonga'inia wetewete, raru o'ani 'inia, "Ei, 'a su'urahi'a, gai mauru ga'u moi." Miagu surirarua 'ana'i mauru beirarua.

³⁰ Na'i 'oha narau ha'aagau 'ana'i ngau, 'ia Jisas 'a rahiai breidi, ma ha'atee ha'agorohia God 'inia. 'A uubia ma ha'atora'inia tanararua.

³¹ Na'i 'ohasi 'ia God 'agu ha'awatea dorarui aidangisia do 'ia Jisas ma rarugu 'ome 'iraraa'a. Mia Jisas 'a hasi ai'aa baanirarua moi na'i 'ohasi.

³² Naasi mararu o'asi 'inirarua hairiu, "Na'i 'oha na 'unu tahanga'ini'i tanagaraai mareho nara usua na'i Usu-usu Maea 'oha gau boi suri tara ani, 'a 'onaai 'eu na noro suri'i tahingagara'i."

³³ Raru suruta'e mau 'ohasi, mararu aho'i 'ari Jerusalem. Raru 'ariwou mararu sadoiraau ta'i tangahuru mana waira ta'i rongoiusuri ana Jisas beiraau ro'u tara'i nei nara goni wou beiraau.

³⁴ Miraau o'ani 'inirarua, "Ha'amomori! 'Ia Araha 'a suruta'e aho'i baaniai mae ma ha'ata'i tanaa Pita."

³⁵ Mirarua maania ro'u tanaraaui taha na to'o na'i tara 'oha nararu hano 'anai Emeas, mararu maania ro'u tanaraaui 'oha nararugu 'ome 'iraraa do'ia Jisas 'oha na uubia tanararua i bredi.

Jisas 'A Ha'ata'i

Tanaraaui Rongoiusuri Ana'i

(Matiu 28:16-20; Mak 16:14-18; Jon 20:19-23; Buka Tatau'aro 1:6-8)

³⁶ Raugu 'asu'a 'oha nararu ma-mamaani mau, mia Jisas 'a ura beiraaui na'i 'ubutadaau ma o'ani 'iniraaui, "Na gorohana God 'ai awa bei'amou."

³⁷ Na'i 'ohasi rau kaeni 'asu'a marau maaa'u, suria rau 'adoma'inia do'e anoa.

³⁸ Mia o'ani 'iniraaui, "A 'ua mou maaa'u mana 'adoma'imoo'i ra heiruarua'a?"

³⁹ 'Inau moina, moisu 'omesiai rimagui mana uwagui. Moi hatariau, mamoi 'iraraa do 'inau ha'a-momori, 'inia na anoa ra ai'a to'o abe mana surisuri 'onaiauni."

⁴⁰ Maagu ha'ata'ini'i tanaraaui rimana'i mana uwana'i.

⁴¹ Miraau kae wa'ewa'e di'u, ma'ata beia mau i 'adoma'i heiruarua'a. 'Ia Jisas 'a 'iraraa o'asi, magu o'ani, "E mahoingau matota na bei'amou?"

⁴² Marau o'ani, "Io." Marau taranga'inia tanaai dorai ii'a matota.

⁴³ Mia Jisas 'a rahia ma ngaa na'i maadaau hako.

⁴⁴ Ma o'ani 'iniraaui, "Ni mareho na to'o tanaausi, 'au bwane 'unua mau na'i 'oha nau awa bei'amou doni mwane mareho nara usu'i 'iniau suri'i buka ana'ia Moses, mei suri'i buka adaa'i rarabea, ma na'i buka ni Psalm, rai to'o hako ma'ata."

⁴⁵ Miagu tahangi'i 'adoma'idaa'i dorai aidangisi'i goro i usu-usu na'i Ususu Maea.

⁴⁶ 'A o'ani, "Naani mareho na Ususu Maea 'a 'unua 'iniau. Ni Ha'atahi 'ai rongomaata'i maai mae. Ma 'e rua dangi nai hako mana'i oruna 'ai suruta'e aho'i baaniai mae.

⁴⁷ Ma na'i atagu, rai taroha'inia do'ia God 'ai 'adoma'i nugasi'i 'inodaa'i nei narau rihosi baani'i ora-ora'a adaa'i. Rai taraawa'a heitaroha'i na'i Jerusalem marai 'adarara 'ari suri'i 'ado marau na'i marewana hako.

⁴⁸ 'I'amou namoi hura'a taroha'ini'i mareho 'isi tanaraaui inoni suria 'i'amou namou re'i'i.

⁴⁹ "Inau waigui ha'ataaria mai tana'amoui nei na 'ia Amagu 'a duruduru 'inia do'ai ha'ataaria tana'amou. Naasi moi awa hatara'i 'ini na'i Jerusalem, tari 'oha na Hi'ona Maea 'ai diomai hungamoou mamoi honu 'inia mena na boi baaniai aro."

Ia Jisas 'A Ara'ai Aro

(Mak 16:19-20; Buka Tatau'aro 1:9-11)

⁵⁰ 'Ia Jisas 'a wairaaui hura'a baaniai Jerusalem marau 'ari Betani. Mia Jisas 'a taranga'ini'i ara'ai rimana'i ma ha'agorohiraaui.

⁵¹ Na'i 'oha na ha'agorohiraaui mau, 'ia God 'a waia baaniraaui ara'ai aro.

⁵² Na'i 'ohasi, rau taraawa'ai ha'arahaesia. Marau aho'i 'ari Jerusalem beiai wa'ewa'e na raha di'u.

⁵³ 'Ado dangi rau siri awa na'i Ruma Maea 'anai ha'a-aneanea God.

Na Taroha Goro 'Onaai Usua Ana St. Jon

Gere Mamaani 'Iniai Bukani

Ra'i taha nara awa na'i 'adoma'imu na'ogu taarai hinihinia 'inia Jisas? 'A 'ome he'ua i hagu na'o haua beia. 'Ia Jon 'a usuai Taroha Goro ana 'anai 'unu'i hura'a i taha na ororiu na'i hinihinia Jisas. 'Ia Jon naasi ta'i 'iniraau ta'i tangahuru mana rua rongoiusuri ma'e ta'i 'ini'i geresae goro ana'i na'i 'oha na 'ia Jisas 'a tahi mau na'i marewanani. 'Ia Jon 'a hinihinia do 'iraau nei narai 'oha'iniai bukani ra bwane aidangisi'i taha nara ha'a-momori 'inia Jisas. 'Ia Jon 'a ai'a raba 'unu'i hako hura'ai mwane mareho na haa'ia Jisas, ma'ata 'a maania hura'a atei naasia Jisas. Na tarana naasi, 'ia Jon 'a 'adoma'i hihi'a 'anai usu'i dio i taha na 'ia Jisas 'a 'unu'i 'inia haaria ma'e taha na boi 'ana na'i marewanani.

'Ia Jisas 'a haa'i mwane ata he'ete'i 'inia haaria 'anai 'a'auhiraau noni 'anai aidangisia ma 'anai hinihinia. 'Ia Jon 'a usu'i dio hako i mwane ata 'isi, 'onaai Jisas naasi na breidi ni tahi, 'iia na bewaa 'anai marewana, 'iia na sae 'omesuri siip goro mana maanai bara 'ada'i siip, 'iia naasi na tara, me 'iia naasi ha'a-momori, mana tahi, me 'iia naasi 'i abe odonai hasi'ei.

Tana'o haari'o, 'o 'adoma'inia do'ia tei naasi a Jisas? Na'i 'oha na 'oi 'oha'iniai bukani 'oi 'ome'ome 'ini'i mareho narai ha'ababauai hinihinimu.

'Ia Kraest Naasi Ha'atee

¹ Na'i taraawa'ana maragu pwa'ara i mwani mareho, ni Ha'atee 'a bwani awa'a. 'Iia 'a awa beia God, me 'iia naasi God.

² Na'i na'o maragu pwa'ara i mwani mareho, 'iia 'a bwani awa beia God.

³ 'Ia God 'a hauai Ha'atee 'anai ha'apwa'ara'i mwane mareho hako. Ha'amomori, 'ia God 'a ha'apwa'ara'i mwane mareho hako 'iniai Ha'atee naasi.

⁴ Na huunai tahi 'a hura'a mai na'i Ha'atee naasi, mana tahi naasi 'e bewaa tanaraau mwani noni.

⁵ Na bewaasi 'a marewa na'i kuhi, mana kuhi 'a bwa'i matai ha'a-ai'aa mwada'u.

⁶ 'Ia God 'a ha'ataaria maia Jon Bwareomaea 'onaai noni heheitaroha'i ana,

⁷ 'anai taroha'iniai bewaasi tanaraau sae do neina rai rongo marai hinihini.

⁸ Ai'a do 'iia Jon naasi bewaa, ma'ata 'iia 'a boi 'anai ha'arangasia hura'ai bewaa naasi.

⁹ Na bewaasi, naasi huunai bewaa na boi na'i marewana anai bewaasir-aau hakoi noni nai marewanani.

¹⁰ Ni Ha'ateesi 'a awa na'i marewana, ma rei'uaa na 'ia God na ha'apwa'araai marewana 'iniai Ha'ateesi, ma'ata 'iraau noni nai marewana rau ai'a 'ome 'iraraa do 'iia naasi Ha'atahi.

¹¹ 'A boi beiraau noni ana'i, 'iraau ai Jiu, miraau inoni ana'i rau ai'a ha'amaotoa.

¹² Mei tanaraau nei narau ha'amaotoa marau hinihinia, 'iraau rau ha'i arai gare ana'ia God.

¹³ Ai'a dorau huta 'onaai hutahuta adai noni, ma'ua suriai 'adoma'inai noni. Ma'ata rau huta haoru 'onaai gare ana'ia God suriai 'adoma'ina.

¹⁴ Na Ha'ateesi 'a ha'i noni, ma awa na'i 'uruhagaau na'i marewanani. 'Iia 'a honu 'iniai heita'ahi mana mwane mareho na 'unu'i ra ha'a-momori

hako. Meu 'omesiai mena ana mana gorohana, 'inia 'iia naasi ta'i gare otohuu ana God.

¹⁵ 'Ia Jon 'a ha'arangasia hura'a tanaraaui noni na'i 'oha na totoro o'ani, "Naani'a a mo'o nau bwane 'unua tana'amou ga'u na'i 'oha nau o'ani ani, "Iia 'ai boi na'i murigu, ma'ata 'iia 'a ororiu di'uau, 'inia 'iia 'a bwani awa maugu huta.' "

¹⁶ Ni Ha'ateesi 'a ha'agorohigia ma bane waiori tanagia, 'inia 'iia 'a honu 'iniai heita'ahi.

¹⁷ 'Ia Moses 'a waa'i mai ringe ana'ia God tanaraaui noni, ma'ata ni heita'ahi mana ha'a-momori 'a boi baania Jisas Kraest.

¹⁸ Ai'a tanei nai 'omesia God. Ma'ata na garena otohuu na awa beia ma 'iia haaria 'e God, na ha'ata'inia tanagia 'a he'uai barongana God.

Jon Bwareomaea 'A Taroha'inia

Hura'a Jisas Tanaraaui Noni

(Matiu 3:1-12; Mak 1:1-8; Luk 3:1-18)

¹⁹ 'E ta'i 'oha 'iraau saemaua adaa'i Jiu na'i Jerusalem rau ha'a-taariraau Piriisi ma tara'i sae ro'u nara 'a'auhiraau Piriisi 'anai songa'inia Jon 'onaa 'iia naasi Ha'atahi.

²⁰ Mia Jon 'a tohe ma o'ani, "Inau ai'a Ha'atahi."

²¹ Miraangu o'ani 'inia, "Me i'oe atei, 'ia Elaija?"

Mia aramiraau o'ani, "Inau ai'a."

Miraangu o'ani ro'u 'inia, "Mi'oea teita? I'oe naasi Rarabea nameu mamasia?"

Mia o'ani 'iniraau, "Inau ai'a."

²² Miraangu ha'atee o'ani 'inia, "Oi 'unua tana'ameu, i'oe 'iatei? Mamei 'unua tanaraaui mwane narau ha'ataari'ameu maini. 'E taha na'oi 'unu'o 'ini'o haari'o?"

²³ Mia Jon 'a aramiraau 'ini'i ha'atee ana'ia rarabea Aisaea. 'A o'ani, "Inau nei na totoro na'i dora mangasara o'ani. Moi ha'aagau! 'Ia Araha 'a gaarangi boi'a. Moi ha'a-odoodoai tara tanaa!"

²⁴⁻²⁵ Miraau nei na 'iraau Farisei rau ha'a-taariraau mai raugu songa'inia ro'u a Jon o'ani, "Onaa i'oe ai'a naasi Ha'atahi, ma'ua ai'a Elaija, ma'ua ni Rarabea nameu mamasia, ma 'iatei na 'unua tana'o 'anai bwareomaeeraui noni?"

²⁶ Mia Jon 'a aramiraau o'ani, "Inau 'au bwareomaeeraui noni 'iniai wai. Ma'ata 'e nei namou ai'a 'iraraa na awa beigaau 'ini na'i 'ohani.

²⁷ 'Iia 'a boi na'i murigu, ma'ata 'inau 'au ai'a arari ro'u do 'anai mwaoro auru 'anai wagasi'i sandol ana'i."

²⁸ Na marehosi 'a to'o na'i dora nara 'unua 'iniai Betani, na'i nata batarau 'iniai wai raha Jordan, dora na 'ia Jon 'a bwa-bwareomaeeraau iei sae.

Jisas 'A 'Onaai Gare'i Siip Ana God

²⁹ Na'i dangi ahora 'ia Jon 'a 'omesiai boi ana Jisas ma ha'atee o'ani, "Ome, naasi garei siip ana God na wai'i beira'i 'inodai noni nai marewana.

³⁰ Naasia mo'o nau 'unua na'i 'oha nau ha'atee o'ani, "E nei nai boi mau na'i muri, 'a ororiu di'uau, 'inia 'iia 'a bwani awa, maugu huta mai.'

³¹ Na'i na'o, nau ai'a 'iraraa 'iatei, ma'ata 'inau 'au bwareomaeeraui saenai Israel 'iniai wai 'anai ha'ata'inia hura'a mo'osi tanaraau."

³² Mia Jon 'a taroha'i ha'arangasia hura'a o'ani, "Inau 'au 'omesiai Hi'ona Maea na dio mai baaniai aro 'onaai waibora, ma awa na'i hungana Jisas.

³³ Na'i na'o magu to'o i marehosi, 'inau 'au ai'a aidangisia mau do 'iia naasi Ha'atahi. Ma na'i 'oha na 'ia God na ha'ataariau mai 'anai bwareomaea 'iniai wai, nagu 'unua tanaau o'ani, 'Na'i 'oha na 'oi re'iai

Hi'ona Maea 'ai dio mai nai awa na'i hungana tanei, 'iia naasia mo'o na boi 'anai bwareomaea'amou 'inia Hi'ona Maea.'

³⁴ 'Inau 'au 'omesia, ma wai 'unua tana'amou, 'iia naasi Garena God."

Rongoiusuri Tahamora Ana'ia Jisas

³⁵ Mana'i nata dangi ro'u murinai dangisi, 'ia Jon 'a ura beiai waira rua 'ini'i rongoiusuri ana'i.

³⁶ 'Oha na 'omesiai taha horo ana Jisas, 'a o'ani, "'Ome, naasi garei siip ana God."

³⁷ Na'i 'oha na 'iraruai rua rongoiusuri anasia Jon rarugu rongo o'asi moi, mararu suria'a Jisas.

³⁸ 'Ia Jisas 'a rihota'i ma 'omesirarua, raru suria, ma o'ani 'inirarua, "'E taha muru rabasia?"

Miraru aramia o'ani, "Rabae, na'i hei na'o awaiei?" (Ni 'ado'ado 'anai Rabae naasi Ha'ausuri.)

³⁹ Mia o'ani 'inirarua, "Murui boi ma murui 'omesia." Na'i 'ohasi 'a ga'i 'onaai angi hai na'i dangisi. Naasi raru hano beia 'anai 'omesiai dora na awaiei, mararu awa beia na'i dangisi.

⁴⁰ Ma'e ta'i 'inirarua naasia Andru, do'orana Saemon Pita.

⁴¹ Mana mareho tahamora na 'ia Andru 'a haua, 'a sibaniai do'orana, 'ia Saemon ma o'ani 'inia, "'Tameu meu 'omesiai Ha'atahi." (Ni 'ado'ado 'anai Ha'atahi naasi Kraest.)

⁴² Magu waia 'aria Saemon tanaa Jisas.

'Ia Jisas 'a wanasia Saemon ma o'ani, "Atamu 'ia Saemon, garena Jon. Mana'i 'ohani rai 'unu'o 'inia Keifas." (Ado'ado 'ana, naasi hau. Ai'a he'ete'i baania Pita.)

Jisas 'A Soia Pilip Mea Nataniel

⁴³ Mana'i ro'u i nata dangi, 'ia Jisas 'a 'adoma'inia do'a raba 'ari Provens i Galili. Ma to'oana Pilip ma o'ani 'inia, "Pilip, 'oi suriau."

⁴⁴ 'Ia Pilip 'e saeni Betsaeda, 'onaia Andru mea Pita.

⁴⁵ Na'i 'ohasi 'ia Pilip 'a sibania Nataniel ma o'ani 'inia, "Na nei na 'ia Moses mirauai Rarabea rau usu-usu 'abaia na'i 'ohabwani, meu to'oana'a. 'Ia Jisas naasi atana, 'iia 'e garena Josep ni Nasaret."

⁴⁶ Mia Nataniel 'agu ha'atee o'ani, "Na'i Nasaret! 'A bwa'i mareho goro nai hura'a mai baaniai 'omaasi!"

Mia Pilip 'a aramia o'ani, "'Oi boi ma'oi 'omesia."

⁴⁷ Na'i 'oha na 'ia Nataniel 'a boboi gaarangia Jisas, 'ia Jisas 'a o'ani, "'Ia mo'osi 'e huunai saeni Israel, me 'iia 'e sae na ha'a-momori tarau."

⁴⁸ Mia Nataniel 'a o'ani 'inia Jisas, "'A he'uai 'iraraa amua i barongagu?"

Mia Jisas 'a aramia o'ani, "'Inau 'au bwane 'omesi'o na'i marunai fig, 'oha na 'ia Pilip 'a ai'a soi'o mau."

⁴⁹ 'Ia Nataniel 'agu o'ani 'inia, "Ha'ausuri, i'oe naasi garena God! Mi'oe naasi mwaeraha 'anai Israel!"

⁵⁰ Mia Jisas 'a o'ani 'inia, "'A 'ua? 'O hinihini 'inia 'unua agua do'au 'omesi'o na'i marunai fig ani? 'Ai ragoi mareho ha'abu'oahu na'oi 'omesi'i narai di'u ro'u mau wou."

⁵¹ Magu ha'atee o'ani ro'u 'inirauai noni, "'T'amou moi 'omesiai aro 'ai heihoa ro'u, mana enjel ana'ia God rai tataa'eha marai didio mai na'i ahoranai Gare'i Inoni."*

2

Ha'aha'iwai Na To'o Na'i Kena

* 1:51 1:51 Jenesis 28:12

¹ Murinai rua dangi, 'ia inana Jisas 'a 'ari 'anai ngau goni 'inia ha'iwai na to'o na'i Provens i Galili na'i 'omaa ra 'unua 'inia Kena.

² 'Ia Jisas miraaui rongoiusuri ana'i ra ari'ahuraa ro'u wou 'anai ngaugonisi.

³ 'A 'ariwou mana waen 'a hakota'iniraaui 'oha na ai'a hako mau i ngaugonisi. Mia inana Jisas 'a ha'atee o'ani 'inia, "Ei, na waen 'a hako'a."

⁴ Mia Jisas 'agu ha'atee o'ani 'inia, "Ina, ai'a aba amua, 'iaagua. 'A ai'a tari mau i madoraa agua."

⁵ Mana inana Jisas 'a ha'atee o'ani 'iniraaui nei nara tau'aro na'i ngaugonisi, "Moi ha'isuriai taha nai 'unua tana'amou."

⁶ Suri'i ringe adaa'i Jiu rau to'ora'i herehere 'anai dorima. Tarana naasi nara nugaa 'inia ono kae bei tataruwai na'i 'isi, ma na'i ta'i bei 'a matai awaiei rua tangahuru ma'ua oru tangahurui galon. Na bei 'isi ra tagoradi 'ini'i hau.

⁷ Naasi 'ia Jisas 'a o'ani 'iniraaui nei narau tau'aro na'i ngaugonisi, "Moi ha'ahonu'i bei 'isi 'ini'i wai." Na'i 'oha narau ha'ahonu ha'agorohi'i hako,

⁸ 'ia Jisas 'agu o'ani 'iniraaui, "Moi waa 'ari ta gere dora 'inia waisi tanaa mo'o na bwauodo 'inia ha'aha'iwaisi." Naasi maraagu haua 'onaai 'unua ana tanaraau.

⁹ Na'i 'oha na bwauodo 'anai ha'aha'iwai 'a gono maaniai wai ani, ma bwani aho'ita'i waeni'a. 'Ia 'a ai'a aidangisia na'i hei na boi waenisi, ma'ata 'iraaui nei narau waa mai waisi rau aidangisia moi. Miagu soia maia mo'o nara ha'aha'iwaiasi magu o'ani 'inia,

¹⁰ "Ado 'oha, ni waen na goro nara ha'agonohiraaui ga'u 'inia noni. Na'i 'oha nara gono ha'ahakoa wou, maragu haua tanaraau i waen na ai'a taraa goro na'i muri. Mi'oe, na waen na goro di'u na'ogu nugaa 'anai muri!"

¹¹ Hoita, na'i 'omaa Kena na'i Provens i Galili'a na 'ia Jisas 'agu hauai 'etanai ha'abu'oahu ana, ma ha'ata'inia mena ana na hauasa, miraaui rongoiusuri ana'i raugu hinihinia.

¹² Na'i murinai ha'aha'iwaisi, 'ia Jisas mea inana miraaui do'orana'i mana rongoiusuri ana'i rau 'ari 'omaa Kapaniam marau awa 'isi suriai taringai dangi.

'Ia Jisas 'A Taariraaui Hura'ai Sae

Baaniai Ruma Maea Ana God

(Matiu 21:12-13; Mak 11:15-17; Luk 19:45-46)

¹³ Ma gaarangi mai madoraa 'anai ha'ato'oai rongo 'ini 'adoma'i aho'isiai Roho Aharau, mia Jisas 'a ta'ehai Jerusalem.

¹⁴ Mana'i 'oha na siriwou na'i dora a'ora na'i maaniai Ruma Maea ana God, 'a re'iraaui noni narau raoraonga'i kau mana siip mana waibora, miraaui sae 'anai orisi ha'a rau heinagu suri'i dora ni ori-orisi ha'a adaa'i.

¹⁵ Naasi mia Jisas 'a hau'i hasiwaro ma tagorahiai roroho ma taariraaui hako hura'ai mwamwaa baaniai dorasi. 'A rihota'ini'i tebol 'anai ori-orisi ha'a mana ha'a ra asira'i 'ari suriai dorasi.

¹⁶ Ma ha'atee wetewete o'ani 'iniraaui nei narau raoraonga'i waibora, "Moi waa'i hura'a baaniai dorani. Moi abui ha'i dora ni raoraonga'i 'inia ruma ana Amagu!"

¹⁷ Na'i 'oha na 'iraaui rongoiusuri ana'i rau 'omesia o'asi, raugu 'adoma'i aho'isiai dorai Usu-usu Maea na o'ani, "Ni ta'ahia nau haua i ruma amua God, 'a 'onaai 'eu na noro na'i tahingagu."*

* 2:17 2:17 Psalm 69:9

¹⁸ Miraau i saemaua adaa'i Jiu rau songa'inia Jisas o'ani, "'E ha'abu'oahu he'ua na'oi haua namei 'omesia, mameigui 'iraraa do'ia God na 'unua tana'o 'anai hauai heresi?"

¹⁹ Mia Jisas 'agu o'ani 'iniraa, "'Onaa namoi kaii Ruma Maeani, 'e oru dangi moi mau ha'a-urasia'a aho'i."

²⁰ Na'i 'oha narau rongoa o'asi, rau o'ani 'inia, "'O ga'i ha'a-urasia moi na'i raronai oru dangi? 'E hai tangahuru mana ono harisi ha'atai nara tagoraa suriai rumanisi!"

²¹ Mana taha na 'ia Jisas na hadahada 'abaiasi, 'a hadanga'inia haariai abena.

²² Hoita, na'i murinai 'oha na 'ia Jisas 'agu suruta'e aho'i baaniai mae na 'iraaui rongoiusuri ana'i raugu 'adoma'ini'i aho'i taha na 'unu'i. Na'i 'ohasi raugu hinihini'i ha'atee ana'ia Jisas mana taha na Usu-usu Maea ra 'unu'i 'abaia Jisas.

Jisas 'A Aidangisiai 'Ado'adonai Noni

²³ Na'i 'oha na 'ia Jisas 'a awa mau na'i Jerusalem na'i 'oha nara ha'ato'oai Roho Aharau, 'a ragoi nei nara hinihinia 'inia 'omesi'i adaa'i ha'abu'oahu na haa'i.

²⁴ Ma'ata 'ia Jisas 'a ai'a taraa 'u'uriraaui goro suria 'ia 'a aidangisi'i goro 'adoma'idaa'i.

²⁵ 'A ai'a ta'isada do tanei nai ha'a-aidangisia Jisas 'ini'i barongadi noni, 'inia 'a bwane 'iraraa ha'agorohi'i.

3

Jisas Mea Nikodimas

¹ Ma'e ta'i na'otara adaaui Jiu na atana 'ia Nikodimas, 'ia 'e ta'i 'iniraaui ruruha nara 'unuraaui 'inia Farisei.

² 'E ta'i rodo 'a boi beia Jisas ma o'ani, "'Ha'ausuri, meu 'iraraa do'ia God na ha'ataari'o do 'anai ha'ausuri'ameu. Na mwani ha'abu'oahu na'o haa'i 'a ha'ata'inia do'ia God 'a awa bei'o."

³ Mia Jisas 'a ha'atee o'ani 'inia, "'Inau wai 'unua tana'o ha'a-momori, na inoni 'a bwa'i siri na'i heimarungi ana God 'onaa 'a bwa'i huta haoru."

⁴ Mia Nikodimas 'agu o'ani 'inia Jisas, "'A bwara do 'oha na mwanemaua i noni do'aigu siri aho'i ro'u na'i ahuna inana ma do'aigu huta haoru aho'i ro'u."

⁵ Mia Jisas 'a o'ani ro'u 'inia, "'Inau wai 'unua tana'o ha'a-momori, na inoni 'a bwa'i siri na'i heimarungi ana God 'onaa na bwa'i huta 'inia wai mana mena ana Hi'ona Maea.

⁶ I nei na huta beiai urao 'a huta 'onaai noni, ma'ata i nei na huta haoru 'inia mena anai Hi'ona Maea, 'ia 'a huta 'onaai garena God.

⁷ Abui heimwaota'i 'inia 'unua agua tana'o do'oi huta haoru.

⁸ Na'i 'oha na ro'a 'a uhi 'ari na'i dora na 'adoma'inia uhi 'ariei, 'o matai rongoai aohana. Ma'ata 'o bwa'i matai 'iraraai dora na boi iei mana dora na hano 'ana. Naasi 'a o'asi ro'u beiraaui nei nara huta haoru 'inia mena anai Hi'ona Maea."

⁹ Mia Nikodimas 'a o'ani, "'A he'ua naasi?"

¹⁰ Mia Jisas 'a aramia o'ani, "'T'oe 'e kae ha'ausuri bwarabwara na'i Israel. Ma 'ua na 'o ai'a aidangisi'i 'ini'i mareho 'isi?"

¹¹ 'Inau wai 'unua tana'o ha'a-momori, 'i'ameu meu hadanga'ini'i taha nameu aidangisi'i mameu 'omesi'i, magu ai'a tanei 'ini'amou nai mwa'emwa'e 'anai hinihini'i.

¹² Ma 'onaa mou ai'a hinihiniau 'oha nau maani'i mareho nara to'oto'o na'i marewanani, 'aigui he'uai hinihini'i amoo'i mareho ni aro nawai maani'i?

¹³ 'Inau Garej Inoni, nau aidangisi'i mareho ni aro, 'inia 'inau nau dio mai baaniai aro. Ai'a tanei'a ro'u naigui dio mai baaniai aro.

¹⁴ "Na'i 'oha na 'ia Moses miraaui Jiu rau awa na'i dora mangasara, 'ia Moses 'a ha'a-urasia ara'ai hasi'ei na awa iei mwaa nara tagorahia 'iniai bras.* 'A o'asi ro'u, 'inau na Garej Inoni rai ha'a-urasiau ro'u ara'a,

¹⁵ neina 'irai nei narai hinihiniau rai daua nadaau tahi tarau.

¹⁶ Suria 'ia God 'a ta'ahiraau hakoi noni nai marewana, 'a hisu 'inia ta'i garena othuu, neina 'iraau nei narai hinihinia rau bwa'i siri na'i mae tarau, ma'ata rai daua nadaau tahi tarau.

¹⁷ 'Ia God 'a ai'a ha'ataaria mai garena 'anai hiiri ha'a-mama'airaau inoni nai marewana, ma'ata 'anai ha'atahiraau baaniai ha'a-mama'ai.

¹⁸ "'Iatei nai hinihiniai garena God, 'ia God 'a bwa'i hiiri ha'a-mama'aia. Ma 'onaa 'iatei na bwa'i hinihinia, 'ia God 'a bwane hiiria, suria 'iia 'a ai'a hinihiniai ta'i gare othuu ana.

¹⁹ Mana taranai maho na 'ia God 'ai hiiriraau noni 'inia 'a o'ani. Na marewa 'a boi na'i marewana, maagu 'iraau noni nai marewanani ra ta'ahia di'u i kuhi baaniai marewa, suria na barongadaa'i ra ta'a'i.

²⁰ Na sae hehere ta'aa 'a 'itaai marewa ma bwa'i gaarangia wou, suria 'a ai'a 'irisia doni ta'aa ana'i rai ha'ata'i.

²¹ Me 'ia mo'o na hau'i mareho nara odo-odo 'a wa'ewa'e 'anai gaarangia woui marewa, do neina 'ai ha'ata'inia hura'a do na mwane mareho na haa'i ra suriai taha na 'ia God na 'irisia."

Jisas Mea Jon Bwareomaea

²² Ma na'i moi muri, 'ia Jisas miraaui rongoiusuri ana'i rau 'ari Provens i Jiudea. Rau awa 'isi ga'u marau bwareomaea'i tara'i sae.

²³ Mia Jon 'a bwa-bwareomaeerau sae ro'u na'i 'omaai Aenon, gaarangiai Salim, suria na'i 'isi 'a ragoi hurahurai wai ma ragoi noni nara boboi 'anai bwareomaea.

²⁴ Ma na'i 'ohasi 'ia Herod 'a ai'a nugaa maua Jon na'i rumaniho'o.

²⁵ Hoita, 'ohasi 'e ai Jiu na heita'ia beiraau rongoiusuri ana'ia Jon. Rau heita'ia suriai ringe adaau Jiu 'inia mwa'anau narau haua 'anai ha'arariraau na'i maana God.

²⁶ Naasi miraaui rongoiusuri ana'ia Jon rau 'ariwou beia marau o'ani 'inia, "Ha'ausuri, 'o 'iraraa mo'o namuru heisadoi ani na'i nata batarau 'inia wai rahai Jodan na'o hadanga'inia ani? Na'i 'ohanisi 'a bwa-bwareomaea'a ro'u, mana mwane inoni ra 'ari hako beia!"

²⁷ Mia Jon 'agu aramiraau o'ani, "'A bwa'i nei nai matai haua o'asi 'onaa na 'ia God 'a bwa'i 'ome sigihia.

²⁸ 'T'amou mou rongoa hakoi 'unua agua tana'amou do 'inau ai'a i Ha'atahi, ma'ata 'inau ra ha'ataariau mai 'anai ha'aagauraau noni tanaa.

²⁹ Na'i ha'aha'iwai, ni urao na ha'aagau 'anai ha'iwai, 'iia anai mwane na ha'aagau 'anai waina. Ma rei'uaa na o'asi, na geresae anai mwane na ha'aagau 'anai ha'iwaisi, 'a wa'ewa'e moi 'anai 'a'auhia ma 'anai bahurongo'i ha'atee ana'i. Minau 'au wa'ewa'e o'asi ro'u 'anai bahurongo'i ha'atee ana'i Ha'atahi.

³⁰ 'Au 'irisia do'ia rai ha'a-ororiua, minau wai ano-ano moi."

Na Nei Na Dio Mai Ara'ai Aro

* 3:14 3:14 Nambas 21:4-9

³¹ “Na nei na boi baaniai marewana, 'iia anai marewana me 'iia 'a hadanga'ini'i taha nara to'oto'o na'i marewana. Ma'ata 'ia mo'o na dio mai baaniai aro naasi na ororiu di'u.

³² 'Iia 'a maani'i taha na rongo'i ma 'omesi'i, magu ai'a rago i nei narai mwa'emwa'e 'anai hinihini'i taha na maani'i.

³³ Miraau nei narau hinihini, rau ha'ata'inia doni mareho na 'ia God na 'unu'i ra ha'a-momori.

³⁴ Na nei na 'ia God 'a ha'ataaria 'a ha'arangasi'i ha'atee ana'ia God, suria 'iia 'a honu 'inia Hi'ona Maea ana God.

³⁵ 'Ia Ama 'a ta'ahiai garena, ma hauai mena tanaa 'anai marungi'i mwane mareho hako.

³⁶ 'Iraau nei narau hinihiniai garena God rau daua'a i tahi tarau. Mei tanaraau nei nara bwa'i hinihinia, ra bwa'i dauai tahi tarau mia God 'ai hiiri ha'a-mama'airaau.”

4

Jisas Mana Urao Ni Samaria

¹⁻³ 'Ia Jisas 'a 'iraraa do 'iraaui Farisei rau rongoa do 'iia 'a bwareomaeearaau sae, ma waiwai rongoiusuri di'ua ro'ua Jon. Na'i 'oha na 'ia Jisas 'a rongoai mareho narau 'unua 'inia, 'a hano baaniai Jiudea ma aho'i 'ari Galili. Ma'ata 'ia Jisas 'a ai'a bwareomaeaa tanei, 'iraau moi rongoiusuri ana'i narau bwa-bwareomaeearaau sae.

⁴ 'Oha na aho'i 'anai Galili, 'a taha horo na'i Provensi Samaria.

⁵ Mana'i Samaria 'a taha na'i 'omaa nara 'unua 'inia Saeka, gaarangi'ai dorai ano na 'ia Jekop na haua nanai gare ana 'ia Josep.

⁶ Mana giruiwai ana Jekop 'a awa mau 'isi. Mia Jisas 'a 'ariwou heinagu na'i bobonai giruiwaisi 'inia rahe ana 'inia hahano, mana madoraa i dangi 'a 'onaai atoa.

⁷⁻⁸ 'Ariwou ma'e uraoni Samaria na boi do'ai taru wai na'i giruiwaisi. Na'i 'ohasi 'iraau rongoiusuri ana'ia Jisas rau 'ari 'omaa 'anai hori nadaau mahoingau. Mia Jisas 'a o'ani 'inia uraosi, “A 'ua? 'O ga'i taru gugua wai mawai gono?”

⁹ Na'i 'ohasi, na uraosi 'a kaeni heimwaota'i di'u, suria 'iraau Jiu rau ai'a matai hagu goro beiraau Samaria. Mana uraosi 'agu o'ani 'inia Jisas, “'Toe 'e ai Jiu me 'inau 'e ai Samaria. Ni 'uaana na'ogu 'unua 'iniasi dowai taru mumua waini gono?”

¹⁰ Mia Jisas 'agu o'ani 'inia, “'Toe 'o ai'a 'ome 'iraraai bane ana God tana'o, ma'o ai'a aidangisia tei na ha'atora'o 'anai taru 'ana wai. 'Onaa na'oi aidangisia, 'o ga'i ha'angoniau mawai haua tana'o i wai nai hauai tahi tana'o.”

¹¹ Mana uraosi 'a o'ani 'inia Jisas, “Saemaua, na wai 'a awa ha'atau dio magu i'oe 'o ai'a to'ora ta mareho 'anai taru wai hunia. Na'i hei na'oi taruhiai waini tahi naasi?”

¹² Ma ro'u, i'oe 'o 'adoma'inia do i'oe 'o ororiu di'u wauwa agaaua Jekop na haua tanagaau girui wainisi? Naani'a 'i wai na 'ia Jekop mana gare ana'i, mana mwamwaa adaa'i narau gogonohiasi.”

¹³ Mia Jisas 'a o'ani 'inia, “'Iatei nai gono na'i waisi 'ai matai maesiai gono ro'u mau aho'i.”

¹⁴ Ma'ata 'iatei nai gonohiai wai na 'inau wai haua tanaa, 'agu bwa'i maesiai gono'a ro'u ta'oha. 'Inia na wai nawai haua tanaa 'ai 'onaai hurahura nai haua tarau tanaa i waini tahi, mana waisi 'ai haua tanaai tahi tarau.”

15 Mana uraosi 'a o'ani 'inia Jisas, “Ha'ausuri, 'oi hua tanaau waisi nei nawai abui maesi gono'a ro'u ta'oha, ma'ua boi'a ro'u na'i 'ini 'anai taru wai.”

16 Mia Jisas 'agu o'ani 'inia, “‘O'i 'ari ma'oi waa mai mwane amua.”

17 Mana uraosi 'a ha'atee o'ani, “Inau ai'a ha'iwai.”

'Ia Jisas 'agu o'ani 'inia, “Ha'amomori, i'oe 'o ai'a ha'iwai 'ohani,

18 ma'ata 'e rima mwane na'o bwane waina'a ga'u, mana mwane na'o awa beia 'ohanisi ai'a mwane amua.”

19 Mana uraosi 'a ha'atee o'ani, “Ha'ausuri, nau 'iraraa'a do i'oe 'e rarabea.

20 Hoita, 'i'ameui Samaria meu ha'arahesi na'i hungahungai Gerisim 'onaairaaui wauwa amee'i, mi'amoui Jiu mou 'unua do na'i Jerusalem, naasi huunai dora 'anai ha'arahesi. 'O'i 'unua tanaau, nei he'ua na ha'a-momori?”

21-24 Mia Jisas 'agu o'ani 'inia, “‘O'i hinihiniai mareho nawai 'unuani! Na madoraa 'ai boi ma naani'a i madoraaasi na 'iraaui noni ra bwa'i ha'arahesia God na'i hungahungani ma'ua na'i Jerusalem. 'Inia 'ia God 'e hi'ona. Tarana naasi 'iraaui huudi noni ana'i rai ha'arahesia beiai hei'a'auhi anai Hi'ona Maea ma beiai ha'a-momori. Neiraausi nei na 'ia Amagu 'a 'irisia dorai ha'arahesia. 'T'amou sae ni Samaria mou haha'arahesi, mamou ai'a aidangisia goro atei namou ha'arahesia. Me 'i'ameui Jiu meu aidangisia goro, suria na'i bei'ameui Jiu na hura'a mai nei 'anai ruhasiraaui noni.”

25 Mana uraosi 'a o'ani, “Inau 'iraraa doni Ha'atahi 'ai boi, ni nei nara 'unua 'inia Kraest. Mana'i 'oha nai boi 'ai mamaani ruharuhasi'i hako hura'ai mwane mareho tana'ameu.”

26 Mia Jisas 'a o'ani 'inia, “‘Ia mo'o na ha-hadahada bei'o 'ohanisi naasi Ha'atahi!”

27 Na'i moi 'ohasi miraaui rongoiusuri rau ataha aho'i mai. Rau kaeni heimwaota'i di'u na'i 'oha narau 'omesia do'ia Jisas 'a mamaani beiai urao ni Samariasi. Ma ai'a do tanei 'iniraaui na do'ai songa'inia 'inia tarana taha, ma'ua taha nararu maani'i.

28 Mana uraosi 'a hanota'iniai bei tataruwai ana ma 'ari 'omaa 'anai soiraaui noni. 'A o'ani,

29 “Moi boi mamoi 'omesiai sae na 'unu'i hako hura'ai mwane mareho na 'inau 'au haa'i. 'Iia gasi naasi Ha'atahi?”

30 Na'i 'ohasi 'iraaui noni rau hura'a baaniai 'omaa, marau 'ari 'anai heisadoi beia Jisas.

31 Na'i 'oha na uraosi 'a hano 'anai 'ari 'unua tanaraaui noni nai 'omaasi, 'iraaui rongoiusuri ana'ia Jisas rau o'ani 'inia, “Araha, 'oi ngau'a!”

32 Mia Jisas 'a o'ani 'iniraaui, “Ai'a tanei 'ini'amou nai 'iraraa gugua mahoingau.”

33 Miraaui rongoiusuri ana'i raugu heisosonga'i hairiu o'ani, “Nii? 'Iatei na ha'i nana mahoingau?”

34 Mia Jisas 'a o'ani 'iniraaui, “Gugua mahoingau, naasi 'anai hauai hei'irisina God, ma 'anai ha'ahakoai tau'aro na ha'ataariau mai 'ana.

35 'T'amou 'iraraai ha'atee nara hahaa na o'ani, “E hai hura namau maraigui mauai wiit 'anai ha'igoni'i.’ 'Inau wai 'unua tana'amou, moi 'ome'ome goro na'i mou, 'inia na mou 'a bwane maua 'anai ha'igoni'i hua.

36 'Iraaui nei nara tagora 'anai ha'igoni'i hua na'i mousi rai dauai heitahari, mana hua narau ha'igoni'i 'isi, naasi 'iraaui noni nara wai'i mai 'anai dauai tahi tarau. Naasi 'ia mo'o na hasiai mou, mea mo'o na ha'igoni'i hua na'i mousi rarui wa'ewa'e goni!

37 Mana ha'atee na o'ani, 'a ha'a-momori 'ohani, “E nei na hasi mana nata nei nagu ha'igoni'i hua.’

³⁸ 'Inau 'au 'onaai nei na ha'ataari'amou 'ari 'anai ha'igoni'i hua na'i mou na 'i'amou mou ai'a hasia. Ra'i sae he'ete'i nara hasiai mou, mi'amou namoigui dau maenai tau'aro raha adaau."

³⁹ Ma ragoi noni Samaria na'i 'omaasi nara hinihini 'inia'i 'unua anai uraosi do'ia Jisas 'a 'unu'i hako hura'a mwane mareho na haa'i.

⁴⁰ Na'i 'oha narau hura'a 'anai 'omesia Jisas, rau ha'angonia wetewete do'ai awa beiraaui na'i 'omaa adaau. Mia Jisas 'a awa beiraaui suriai rua dangi.

⁴¹ Ma rago ro'u i nei nara hinihini na'i 'oha ra rongoi mamaani ana'i.

⁴² Miraaugu o'ani 'inia'i uraosi, "Naasi meugu hinihini, suria meu rongorongoa haarimeeu, ai'a do 'ini'i moi mareho na'o 'unu'i tana'ameu. Ha'amomori, 'iia'a naasi nei na boi 'anai ha'atahiraui noni nai marewana."

Jisas 'A Ha'agorohia Aho'i Baaniai Daoha

i Gare Anai Sae Mwanemaua

⁴³ Na'i muri, na'i 'oha na 'ia Jisas 'a ha'ahakoai rua dangi na'i 'omaasi, 'iia 'a hano ma 'ari Galili.

⁴⁴ 'Ia Jisas 'a bwane 'unua mau do na rarabea ra ai'a ha'ahoua na'i huunai kantri ana.

⁴⁵ Na'i 'oha na ataha wou na'i Provensi Galili, 'iraui noni rau ha'amaotoa, suria rau bwane 'omesi'i ha'abu'oahu na haa'i na'i Jerusalem na'i 'oha narau 'ari 'isi 'inia'i ngaugoni 'anai 'adoma'i aho'isiai Roho Aharau.

⁴⁶ Mana 'ariwou na haa na'i Provensi Galili, 'ia Jisas 'a taha na'i 'omaai Kena, i 'omaa na ha'a-aho'ita'inia wai ani 'inia waen. Hoita, na'i 'omaa raha na'i Kapaniam, 'e sae mwanemaua na'i gaumani na awa iei. Mana gare anai saemauasi 'a daoha.

⁴⁷ Na'i 'oha na saemauasi 'a rongoa do'ia Jisas 'a hano baaniai Jiudea ma bwane ada aho'i na'i Galili, 'iia 'a 'ari na'i Kena. Na'i 'oha na ada beia Jisas, 'a bonga'inia dorai ta'i 'ari Kapaniam mai ha'agorohia aho'i gare ana na gaarangi mae.

⁴⁸ Mia Jisas 'a o'ani 'inia, "A 'ua? Domoi 'omesia moe'a ta ha'abu'oahu mamoi'gui hinihini?"

⁴⁹ Mana saemauasi 'a ha'a-osaosaa di'u, 'a o'ani, "'Oi boi, na gare agua 'ai mae'a!"

⁵⁰ Mia Jisas 'agu o'ani 'inia, "'Oi aho'i 'ari 'omaa, na gare amua 'ai tahi moi!" Mana saesi 'a hinihinia Jisas ma aho'i 'ari 'omaa.

⁵¹ Na'i 'oha na 'ariwou mau suriai tara, ra'i sae tatau'aro ana'i rau boi 'anai heisadoi beia, marau 'unua tanaa doni gare ana 'a bwane 'awaa, ma awa goro'a aho'i.

⁵² Mia songa'iniraaui 'inia'i madoraa he'ua na taraawa'a 'awaa, miraaui o'ani 'inia, "A taraawa'a 'awaa mau na'i angi ta'i na'i atoaa nanora."

⁵³ Mana amanai garesi 'agu 'iraraa do naasi madoraa na 'ia Jisas 'a o'ani 'inia, "Na gare amua 'ai tahi moi." Na'i 'ohasi, ni sae mwanemauasi mana ruruha ana hako rau hinihinia'a Jisas.

⁵⁴ Naasi ruanai ha'abu'oahu na 'ia Jisas 'agu hua na'i Galili. Mana rua ha'abu'oahusi 'a hua na'i 'oha na hano baaniai Jiudea magu taha aho'i na'i Galili.

5

Jisas 'A Ha'agorohiai Nei Na Pwaki

¹ Na'i muri 'ia Jisas 'a 'ari Jerusalem 'anai ta'i dangi ororiu adaui Jiu.

² Hoita, mana'i raronai 'omaa rahasi 'e oboi wai na awa iei nara 'unua 'inia Betsata na'i ha'ateeni Jiu. Mana obosi 'a awa na'i dora ra 'unua 'inia "Maana barai Siip." Na'i bobonai obosi, 'e rima ruma ni bwebwero na awa na'iei.

³ 'A ragoi sae nara to'iraau i mwani daoha he'ete'i hairiu narau dadao suri'i ruma 'isi. Tara'i nei ra kuru, tara'i nei ra pwaki, ma tara'i nei abedaa'i hako ra nugu. Ra mamasiai 'oha na 'iha'iha i wai.

⁴ 'Inia tara'i 'oha 'e enjel ana Araha 'ai boi 'anai ha'a-'iha'ihaa. Mana 'etanai sae 'anai buu dio na'i raronai wai 'ai goro aho'i baaniai daoha na to'ia.*

⁵ Ma'e ta'i 'iniraau sae nara dadao 'isi, 'a daoha suriai oru tangahuru mana waru harisi.

⁶ 'Oha na 'ia Jisas 'a re'ia, 'a bwane aidangisia do'a bwane daoha ore'a mai. Mia Jisas 'a songa'inia o'ani, "'O 'irisia do 'ai goro aho'i i abemu?"

⁷ Mia aramia Jisas o'ani, "Saemaua, 'a bwara di'u, 'inia ai'a sae 'anai wai'au dio na'i obo na'i madoraa na 'iha'iha i wai. Na'i 'oha nawaigui bonasia dio, ma'e sae nai bwane dio'a na'i na'o baaniau."

⁸ Mia Jisas 'a o'ani 'inia, "'Oi ura ara'a ma'oi suru'iai be'amu ma'oi hahano!"

⁹ Na saesi 'a goro mau na'i 'ohasi! 'A suru'iai be'ana ma hahano'a!

Mana dangi na to'o i ha'abu'oahusi, 'e dangi ni mamaro adaui Jiu.

¹⁰ Miraau saemaua adaa'i Jiu rau haungaridaau, marau o'ani 'inia mo'o na goro baaniai daohasi, "Ra ha'aabua 'anai waiwai hi'o na'i dangini, 'inia dangini 'e dangi ni mamaro!"

¹¹ Mia mo'osi 'a o'ani, "'Ia mo'o na ha'agorohiau baaniai daoha na 'unua tanausi dowai rahiai hi'o agua mawai hahano."

¹² Miraau ha'atee haungaridaau o'ani, "'Iatei na 'unua tana'o 'i marehosi?"

¹³ Mia mo'osi 'a ai'a 'iraraai atana mo'o na ha'agorohia baaniai daoha, suria 'a ragoi sae, mia Jisas 'a bwane hano'a.

¹⁴ Na'i muri, na 'ia Jisas 'agu to'oana ro'u na'i Ruma Maea ana God ma o'ani 'inia, "'Ome, i'oe 'o goro'a. Naasi 'oigui abui haua'a ro'u ta ora-ora'a. 'A gasigu to'i'o ta mareho nai ta'aa di'u ro'u wou."

¹⁵ Mia mo'osi 'a 'ari ma maania tanaraui saemaua adaa'i Jiu do'ia Jisas na ha'agorohia aho'i baaniai daoha.

¹⁶ Na'i 'ohasi, 'iraui saemaua adaa'i Jiu raugu taraawa'a here ha'ata'aia Jisas, 'inia hahaa'i ana'i mareho o'asi na'i dangi ni mamaro.

¹⁷ Mia Jisas 'a o'ani 'iniraau, "I Amagu ai'a dangi do'ai agoheta'i tagora. Tarana naasi 'inau 'au o'asi ro'u."

¹⁸ Na'i 'oha naraugu rongoa o'asi, raugu 'adoma'i wetewete ro'u wou 'anai ha'amaesia, ai'a do 'inia moi horosia ana i ringe anai dangi ni mamaro, me 'inia ro'u i 'unua anasi do'ia God naasi amana, mana'i 'oha na 'unua o'asi, 'a here 'onaa do 'iia 'a ta'isada beia God.

Ni Mena Anai Garena God

¹⁹ Mia Jisas 'a ha'atee o'ani, "'Inau wai 'unua tana'amou ha'a-momori, na Gare 'abwa'i haua mwada'u ta mareho suria moi 'adoma'ina haaria, ma'ata 'a ha'isuriai taha na Amana 'a haua. Ni taha na Ama 'ai haa, ni Gare 'ai haua ro'u.

²⁰ 'Ia Ama 'a ta'ahiai Gare, ma ha'ata'ini'i hako tanaa i mwane mareho na 'iia 'a haa'i. Mana Ama 'ai ha'ata'inia tanaai Gare tara'i kae mareho raha 'anai haua narai di'u ro'u wou baaniai ha'agorohia na haa i saeni baaniai daoha. Mana mareho nai haa'i, moi heimwaota'i hako 'ini'i.

* 5:4 5:4 Tara'i kopi bwani 'inia Baebol ra ai'a to'oraai tatarani.

²¹ 'Ia Ama 'a matai ha'a-suruta'eraau aho'i nei nara mae maai haua tanaraau tahi. I Gare 'ai o'asi ro'u. 'Iia 'ai hauai tahi tanaraau nei na 'ome sigihiraau.

²² Mana Ama 'a ai'a hiiria tanei, suria 'iia 'a bwane haua'a tanaai Gare 'i mena 'anai hiiriraau inoni.

²³ 'A haua o'asi do neina 'iraau noni rai ha'ahouai Gare, 'onaai ha'ahoua adaui Ama. 'Iatei na ai'a ha'ahouai Gare, 'a ai'a ha'ahouai Ama na ha'ataaria mai.

²⁴ "Wai 'unua tana'amou ha'a-momori, 'iatei nai hinihini'i ha'atee agu'i mai hinihinia ro'ua God na ha'ataariau mai, 'ai dauai tahi tarau. 'Iia 'au bwa'i hiiria 'ini'i ora-ora'a ana'i, suria 'iia 'a 'onaai nei na hano baaniai mae na 'ari na'i tahi.

²⁵ Ha'amomori. 'Inau wai 'unua tana'amou, ni madoraa 'ai boi ma naani'a i madoraaasi na 'iraau nei ra hano 'anai mae tarau rai rongoai ringenai garena God. 'Iraau nei narai bahurongoa rai dauai tahi tarau.

²⁶ 'Inia i Ama naasi na to'o mena 'anai hauai tahi tanaraau noni. Me 'iia 'a watea ro'u i menasi tanaai garena neina garena 'ai haua ro'u i tahi tanaraau noni.

²⁷ Ma haua ro'u tanaai garena 'i mena 'anai hiirirai noni, 'inia 'iia naasi Gare Inoni.

²⁸ Moi abui heimwaota'i. 'E madoraa nai boi mau, 'iraau nei nara mae nara awa na'i hera rai rongoai ringenai garena God.

²⁹ Na'i 'ohasi raigu suruta'e baani'i hera. 'Iraau nei narau haa'i mwani mareho goro rai siri na'i tahi tarau, miraaui nei ra haa'i mwani mareho ta'a'i rai siri na'i mae tarau."

³⁰ 'Ia Jisas 'a ha'atee o'ani ro'u 'iniraau, "'Inau 'au bwa'i matai haua mwada'u ta maho suriai 'adoma'igu haariau. 'Inau 'au hihiri suriai 'unua ana God tanaau. Naasi na hihiri nau haa 'a odo-odo, suria 'inau ai'a ha'isuriai 'adoma'igu haariau, ma'ata 'au hihiri suriai 'adoma'ina God na ha'ataariau mai."

Nei Na Ha'arangasia Hura'a Jisas

³¹ "'Onaa na 'inau moi wai ha'arangasiau haariau hura'a, na mareho nawai 'unu'i hura'a 'iniau haariau 'ai gere bwara tana'amou 'anai hinihini'i.

³² Ma'ata 'e sae he'ete'i ro'u na ha'arangasiau hura'a tana'amou, ma wai 'unua tana'amou, na mwane mareho na maani'i hura'a 'iniau ra ha'a-momori.

³³ 'T'amou mou bwani ha'ataari'i 'ari tara'i sae 'anai bahurongoa Jon Bwareomaea, mana mareho na maani'i hura'a 'iniau ra ha'a-momori.

³⁴ Ai'a do 'a ororiu tanaau dorai ha'arangasiau hura'a, ma'ata 'au ha'a-'adoma'i aho'isi'amou moi 'iniai heitaroha'i ana Jon nei namoi 'iraraai here namoi daua 'inia i tahi tarau.

³⁵ 'Ia Jon 'a 'onaai raita na ha'amarewa'i 'adoma'imoo'i. Mi'amou mou wa'ewa'e moi 'inia, suriai gere 'oha.

³⁶ Minau, 'e mareho na ha'ata'inia hura'a ha'a-momori do'ia God na ha'ataariau mai. Naia naasi tatau'aro nau haua na 'ia Amagu 'a 'irisia dowai haua. Marehosi 'a ha'arangasiau goro hura'a di'u'i ro'u i taha na 'ia Jon 'a maani'i 'iniau.

³⁷ Mia Amagu na ha'ataariau mai 'a bwane 'unu'i hako hura'ai mwane mareho 'iniau. 'T'amou mou ai'a rongoai ringena, mamou ai'a wanara'i maa 'inia,

³⁸ mamou ai'a hinihini'i ha'atee ana'i. 'Au 'iraraa o'asi suria mou ai'a hinihiniau, i nei na 'ia God na ha'ataariau mai.

³⁹ Mou siba suri'i usu-usu na'i Usu-usu Maea, 'inia mou hinihinia do na'i suri'i namoi sadoiai tahi tarau. Na'i 'isi nara ha'arangasiau hura'a suri'i!

40 Mia mougou ai'a raba boi beiau mawai haua tana'amou tahi tarau.
 41 "Au ai'a bonasia domoi ha'a-ta'eta'eau,
 42 'inia 'au aidangisia do 'i'amou mou ai'a ta'ahia God suri'i talingamoo'i.
 43 'Inau 'au boi bei'i ha'atee ana'ia Amagu, mi'amou ai'a ha'amaotoau. Ma 'onaa tanei he'ete'i nai boi hadanga'ini'i mareho 'inia moi haaria, 'i'amou ga'i mwa'emwa'e goro 'anai ha'amaotoa.
 44 To'oana moi mou bwarai hinihini! Mou 'irisia do'iraau noni rai ha'a-ta'eta'e'amou, mamougou ai'a 'irisiai ha'a-ta'eta'e baania God.
 45 Moi abui 'adoma'inia do 'inau nawai ha'huni'amou na'i maana Amagu. 'A bwa'i! 'Ia Moses namou 'u'uria gorosi do 'iia nai 'a'auhi'amou, 'iia nai ha'a-huni'amousi.
 46 Ma 'onaa namou hinihinia mora Moses, 'i'amou ga'i hinihiniau ro'u, 'inia na mareho na usu'i, 'a usu'i 'iniau.
 47 Ma 'onaa namou ai'a hinihini'i mareho na usu'i, moigui hinihini'i he'uai mareho nau maani'i?"

6

*Jisas 'A Hanganiai Rima Merui Mwane
 (Matiu 14:13-21; Mak 6:30-44; Luk 9:10-17)*

1 Mana'i muri, 'ia Jisas miraaui rongoiusuri ana'i rau ta'e horo 'ari na'i nata batarau 'inia kae bwera i Galili, na tara'i 'oha ra 'unua 'inia bwera i Taebirias.

2 Ma'e kae ruruhai noni narau susuria tarau 'inia rau 'omesi'i ha'abu'oahu na haa'i na'i 'oha na ha'agorohiraau aho'i nei nara daoha.

3 Mana'i 'oha narau ataha 'ari nata batarau, 'ia Jisas mana rongoiusuri ana'i rau ta'eha ara'a na'i gere hungahunga marau heinagu.

4 Mana'i 'ohasi na dangi hauasa adaui Jiu 'anai ha'ato'oai Roho Aharau 'a gaarangi.

5 'Ia Jisas 'a wana 'ari ma 'omesia 'ari goni adaau mai mwane noni beia, ma rihota'i tanaa Pilip ma o'ani 'inia, "Na'i hei nagai matai hori bredi arari'i mwane sae 'ini?"

6 'A 'unuai marehosi, do 'a raba ha'imaania moia Pilip, me 'ia Jisas 'a bwane 'iraraai taha nai haua 'anai hanganiraau noni.

7 Mia Pilip 'a o'ani 'inia, "'Ei! Rei'uaa nagai to'oraa ta kae ha'a* ma bwa'i arari mau ro'u."

8 Ma'e ta'i rongoiusuri ro'u na atana 'ia Andru, 'e do'orana Saemon Pita, na o'ani,

9 "'Ei! Ni gere gare mwaneni 'e rima huai bredi ma'e rua ii'a na beia. Magu 'a bwa'i arariraau hakoi mwane inoni 'ini."

10 Mia Jisas 'agu o'ani 'iniraau rongoiusuri, "Moi 'unua tanaraau inoni marai heinagu." Mana hahaarisi 'a rago na'i dorasi, miraaui noni raugu heinagu auru hako. Mana goni nara haasi 'a gaarangi 'onaai rima merui mwane.

11 Mia Jisas 'a dauai rima huai bredisi ma ha'atee ha'agorohia God 'ini'i ma haa'i tanaraau noni. Ma haa o'asi ro'u 'ini'i ii'a. Na'i 'ohasi rau ngau, marau masu hako.

12 Mia Jisas 'agu o'ani 'iniraau rongoiusuri ana'i, "Moi si'o goni'i mareho na 'iraau noni rau ngau tahi'i neina abu ta mahoingau nagai ha'agata'inia."

13 Na'i 'oha narau si'o goni'i dora narau ngau tahi'i baaniai rima huai bredi moi na 'ia Jisas na ha'atora'ini'i ani, rau ha'ahonuai ta'i tangahuru mana rua abira.

* **6:7 Kae ha'a:** Na'i ha'ateeni Grik ra 'unua "200 denari." Mana ta'i denari 'a 'onaai horihorinai ta'i sae 'anai ta'i dangi.

¹⁴ Na'i 'oha na 'iraaui noni rau 'omesiai ha'abu'oahusi, raugu ha'atee o'ani, "Ha'amomori, naia'a naasi rarabea nagau mamasiyasi!"

¹⁵ 'Ia Jisas 'a 'omesia do 'iraaui noni rai waia 'anai ha'a-'usu'usua do'ai mwaeraha tanaraau. Naasi ma hano ma ta'eha bo ta'eha ro'u na'i hungahunga haaria.

Jisas 'A Hahano Na'i Hunganai Wai
(Matiu 14:22-33; Mak 6:45-52)

¹⁶ Na'i su'urahi 'iraaui rongoiusuri ana'i rau dio mamasia dioi bobonai bwera.

¹⁷ Ma hanoria woui kuhi 'ohasi mia Jisas ai'a ataha mau beiraaui. Naasi marau ta'e baania ara'a na'i ora, marau haruta 'ari 'anai 'omaai Kapaniam.

¹⁸ Raugu 'asu'a ma diohiraaui ro'a raha mana wai 'a taraawa'a abwao.

¹⁹ Na'i 'oha na 'iraaui rongoiusuri rau bwane su'ara'i ha'atau hura'a 'onaai rima ma'ua ono kilomita, maraugu 'omesia Jisas hahano ana mai gaarangiraaui na'i hunganai wai. Na'i 'ohasi rau kae maaa'u di'u.

²⁰ Mia Jisas 'a ha'atee 'ari tanaraau o'ani, "Inau moi! Mou abui maaa'u."

²¹ Na'i 'ohasi ragu wa'ewa'e do'ai ta'e ara'a beiraaui na'i ora. Raugu 'asu'a marau 'oto siriwou na'i dora narau hano 'ana.

'Iraaui Noni Rau Siba Surisuria Jisas

²²⁻²³ Na'i haho'oa, 'iraaui noni 'ari nata batarau 'iniaai bwerasi rau goni na'i one 'anai totoria Jisas, 'inia rau 'adoma'inia do 'a awa mau na'i 'isi. Dorasi 'a awa gaangiai dora narau ngau iei na'i 'oha na 'ia Araha 'a ha'atee ha'agorohia God 'ini'i huai brede mana ii'a 'ani. Rau 'iraraa do'ia Jisas 'a ai'a hano beiraaui rongoiusuri ana'i, 'inia ta'i ora'a na awa 'isi na 'iraaui rongoiusuri rau bwane ta'e na'iei 'anai 'ari nata batarau. Hoita, na'i 'ohasi, tara'i ora ni Taebirias nara 'oto gaarangiraaui.

²⁴ Na'i 'oha na 'iraaui noni hunga rau 'ome 'iraraa do'ia Jisas mana rongoiusuri ana'i raugu ai'a awa'a 'isi, rau ta'e suri'i ora marau 'ari Kapaniam 'anai sibania Jisas.

Jisas Na Bredi Ni Tahi

²⁵ Na'i 'oha narau ataha wou nata batarau, rau sadoia Jisas marau songa'inia o'ani, "Ha'ausuri, 'oha he'ua na'o boi 'ini?"

²⁶ Mia Jisas 'a aramiraaui o'ani, "Ai'a! Wai 'unua ha'a-momori tana'amou, 'i'amou mou raba suriaui 'inia 'au hangani'amou mamou masu, ai'a domou aidangisi'i ha'abu'oahu nau haa'i.

²⁷ Moi abui bona 'iniaai mareho na bwa'i matai awa orea 'onaai mahoingau, ma'ata moi bonasiai mareho nai matai awa tarau na 'inau i Gare'i Inoni nau matai hua tana'amou. 'Inia 'ia Amagu na hua tanaaui mena 'anai hua o'asi."

²⁸ Miraaui ha'atee o'ani 'inia, "Ra'i taha na 'ia God 'a 'irisia domei haa'i?"

²⁹ Mia Jisas 'a aramiraaui o'ani, "Naani taha na 'ia God 'a 'irisia domoi hua. Moi hinihiniai nei na 'iia na ha'ataaria mai."

³⁰⁻³¹ Miraaui ha'atee o'ani ro'u 'inia, "'Onaa na'o 'irisia domei hinihini'o, ma'oi hua ta ha'ara mamei 'omesia ta. 'Ia Moses 'a hauai ha'abu'oahu tanaraaui wauwa agaa'i 'ohabwani na'i madoraa narau hano 'ari suriaui dora mangasara. 'A hanganiraaui 'iniaai mahoingau nara 'unua 'iniaai Mana na dio mai baaniai aro! 'Onaaui usua ada na'i Usu-usu Maea o'ani, 'Ni mahoingau na dio mai baaniai aro, naasi mahoingau na hua tanaraau 'anai ngaa.'† 'E ha'abu'oahu he'ua na'oi hua tana'ameu?"

† 6:30-31 6:31 Eksodas 16:4

³² Mia Jisas 'a o'ani 'iniraau, "'Inau wai 'unua ha'a-momori tana'amou, 'ia Moses 'a ai'a hauai mahoingau tanaraau wauwa agaa'i dio mai baaniai aro. I Amagu naasi na haua tanaraau. Mana'i 'ohani 'a haua tana'amou huunai brede na dio mai ara'ai aro.

³³ Mana huunai brede ana God naasi 'ia mo'o na dio mai ara'ai aro 'anai hauai huunai tahi tanaraau hako noni nai marewana."

³⁴ Miraau o'ani 'inia Jisas, "Saemaua, 'oi haua tarau tana'ameu i bredisi."

³⁵ Mia Jisas 'a o'ani 'iniraau, "'Inau naasi brede ni tahi. 'Iatei nai boi beiau, 'agu bwa'i hioro'a ro'u ta'oha. Mia tei na hinihiniau 'agu bwa'i raba gono'a ro'u.

³⁶ 'Onaai bwane 'unua agua tana'amou, rei'uaa namou 'omesiau, me mou ai'a hinihini mau ro'u.

³⁷ Ma'ata 'iraau nei na 'ia Amagu na hau'i tanaau, rai boi beiau, mau bwa'i 'itaraau.

³⁸ 'Inia 'inau 'au dio mai 'anai hauai taha na Amagu 'a ha'ataariau mai 'ana, ai'a 'anai suria moi 'adoma'igu haariau.

³⁹ Ma naani hei'irisina God, do abu ta ta'i nei 'iniraau nei na haa'i mai tanaau nawai ha'a-ai'aa, ma'ata na'i ha'ahakonai dangi wai ha'a-suruta'eraau hako baaniai mae.

⁴⁰ I Amagu 'a 'irisia do 'iraau nei ra 'ome 'iraraai garena marau hinihinia, rai to'oraai tahi tarau. Mana'i hahakonai dangi wai ha'a-suruta'eraau baaniai mae."

⁴¹ Na'i 'ohasi 'iraau Jiu raugu taraawa'a mangurunguru 'iniai 'unua ana do'ia naasi brede na dio mai baaniai aro.

⁴² Marau o'ani ro'u, "'Iia moia Jisas garena Josep naasi! 'Igaau mataia amana mia inana. 'A he'ua na 'unua 'inia do 'iia 'a dio mai baaniai aro?"

⁴³ Mia Jisas 'a o'ani 'iniraau, "'Ei! Mou abui mangurunguru 'iniai marehosi!

⁴⁴ 'A bwa'i nei nai boi beiau 'onaa na 'ia Amagu na ha'ataariau mai 'a bwa'i waia mai tanaau. Mia mo'o nai boi beiau, wai ha'a-suruta'ea baaniai mae na'i ha'ahakonai dangi.

⁴⁵ Na'i buka adaa'i rarabea ra usua o'ani, "'Ia God 'ai ha'ausurirau hako.† Naasi 'iraau nei narau bahurongo marau ha'isuri'i taha na Ama na ha'ausurirau 'ini'i, naasi narau boi beiau.

⁴⁶ Ai'a do ta nei nai re'ia Ama. Ta'i, 'inau moi na 'ia Ama na ha'ataariau mai nau re'ia.

⁴⁷ Ma wai 'unua ha'a-momori tana'amou, 'iatei na hinihiniau 'a daua'a i tahi tarau.

⁴⁸ 'Inau naasi brede ni tahi!

⁴⁹ 'Iraau na wauwa agaa'i na'i 'oha bwani, rau ngau Mana na'i dora mangasara maraugu buna mae mau.

⁵⁰ Ma'ata 'iraau nei narai ngauai brede na dio mai baaniai aro, rai daua nadaau tahi tarau.

⁵¹ 'Inau naasi brede ni tahi nau dio mai baaniai aro. 'Iatei nai ngauai bredisi 'ai awa tarau, mana bredisi naasi abegu nau haua tanaraau mwane inoni nai marewana hako do 'iraau rai tahi 'inia."

⁵² Miraau noni raugu heitohe tohe hairiu 'iniai 'ado'ado 'anai mareho na 'unuasi. Marau o'ani, "'Ai he'ua nai haa 'inia tanagaau abena 'anai ngaua?"

⁵³ Mia Jisas 'agu o'ani 'iniraau, "'Inau wai 'unua ha'a-momori tana'amou, 'onaa namou bwa'i ngauai abena mana gonohiai 'abunai Gare Inoni, mou bwa'i dauai tahi tarau.

⁵⁴ 'Irai nei ra ngauai abegu mara gonohiai 'abugu, rau daua'a i tahi tarau, minau wai ha'a-suruta'eraau na'i ha'ahakonai dangi.

† 6:45 6:45 Aisaea 54:13

⁵⁵ Suria na abegu naasi huunai mahoingau, mana 'abugu naasi huunai waini gono.

⁵⁶ 'Iraui nei nara ngauai abegu mara gonohiai 'abugu rau ha'i ta'i beiau minau 'e ta'i beiraau.

⁵⁷ 'Ia Ama na tahitahi na ha'ataariau mai, me'ia na haua tanaui tahi. 'A o'asi ro'u, 'iraui nei narau ngauai abegu wai hauai tahi tanaraau.

⁵⁸ 'Inau naasi breidi na dio mai baaniai aro. 'Iatei nai ngauai breidi naasi, 'ai dauai tahi tarau. 'A bwa'i 'onaairau wauwa agaa'i narau ngauai Mana na'i dora mangasara maraugu mae ro'u mau."

⁵⁹ Ni mareho 'isi 'ia Jisas 'a maani'i na'i 'oha na ha'ausurirau noni na'i ruma ni ha'arahesi na'i Kapaniam.

I Ha'ausuringa'i 'Iniai Tahi Tarau

'A Bwara 'Anai Aidangisia

⁶⁰ 'A ragoi nei 'inirau nei rau araisuria Jisas narau o'ani, "Araha, ni ha'ausuringa'i 'isi ra bwara di'u 'anai aidangisi'i. Bwa'i ta sae naigui mwa'emwa'e 'anai araisuri'i!"

⁶¹ 'Ia Jisas 'a aidangisia do 'iraui rongoiusuri rau mangurunguru hairiu 'iniai marehosi, ma o'ani 'inirau, "'A 'ua? Na mamaani nau hau'isi ra ha'awauni'i tahingamoo'i?"

⁶² 'Onaa na o'asi, ma'ai he'ua 'onaa namoi 'omesiau 'i Gare'i Inoni wai aho'i ara'ai dora na 'inau 'au boi baania?

⁶³ Na Hi'ona Maea moi na matai hauai tahi tarau, inoni 'a bwa'i matai haua. Mana mwane mareho nau hadanga'ini'i tana'amou 'isi, ra boi baaniai Hi'ona Maea mara matai hauai tahi tarau tana'amou.

⁶⁴ Ma'ata rei'uaa na o'asi, me tara'i nei 'ini'amou mou ai'a hinihiniau ro'u mau." 'Ia Jisas 'a bwane aidangisiraau mau na'i na'o i nei narau bwa'i hinihinia mia tei nai usuha'inia tanaraui maerongana.

⁶⁵ Mia Jisas 'a o'ani ro'u 'inirau, "Namoisi mareho nau bwane 'unua 'inia do 'a bwa'i nei nai matai boi beiau 'onaa na 'ia Amagu 'a bwa'i waia mai tanaau."

⁶⁶ Na'i 'ohasi 'a ragoi nei rau suria ga'u a Jisas narau rihota'i aho'i maraugu ai'a raba suria'a ro'u.

⁶⁷ Mia Jisas 'a rihota'i wou tanaraui ta'i tangahuru mana rua rongoiusuri ana ma o'ani 'inirau, "'A 'ua? 'T'amou moi nugasiau o'asi ro'u?"

⁶⁸ Mia Saemon Pita 'a aramia o'ani, "Araha, 'iatei ro'u nameigui suria, 'inia suri'i ha'atee amu'i'a naasi namei matai sadoiai tahi tarau.

⁶⁹ Meu hinihini mameu 'iraraa do 'ioe naasi noni maea na'o boi baania God."

⁷⁰ Naasi mia Jisas 'a o'ani 'inirau, "'A ha'a-momori, 'e waira ta'i tangahuru mana rua rongoiusuri nau 'ome sigihi'amou. Magu 'e ta'i 'ini'amou 'e adaro."

⁷¹ Na'i 'oha na ha'atee o'asi, 'a hadanga'inia Judas garena Saemon Iskariot. 'Ia 'e ta'i 'inirau ta'i tangahuru mana rua rongoiusuri nai usuha'inia Jisas tanaraui maerongana.

7

Jisas Mana Do'orana'i

¹ Ma na'i muri 'ia Jisas 'a awa na'i Provensi Galili, ma 'a'aariha 'ari suri'i 'omaa. 'Ia 'a ai'a raba 'ari na'i Provensi Jiudea suria 'iraui saemaua adaa'i Jiu rau bonasiai ngahu ha'amaesia.

² Mana rongo 'anai 'adoma'i aho'isiai 'oha na 'iraui wauwa adaa'i rau awa suri'i ruma saira na'i dora mangasara 'a gaarangi.

³ Miraau i do'orana'i a Jisas rau ha'ata'u'ua 'anai 'ari na'i Jiudea 'anai ha'ato'oai rongosi. Rau o'ani, "O'i hano ma'oi 'ari Jiudea miraau rongoiusuri amu'i rai 'omesi'i ha'abu'oahu na'oi haa'i!

⁴ 'Onaa 'oi awa hatara'i moi 'ini, ma 'a bwa'i taro i atamu. 'Iniai to'oraa amua i mena 'anai hau'i mareho ha'abu'oahu o'asi, ma'oi ha'ata'ini'i tanaraau mwani noni hako marai 'iraraa!"

⁵ Rau ha'atee o'asi, 'inia rei'uaa na 'iraaui ra'i huunai do'orana'i, me 'iraaui rau ai'a hinihinia.

⁶ Mia Jisas 'agu aramiraaui o'ani, "Na'i 'ohani ai'a huunai madoraa goro tanaau 'anai 'ari Jiudea. 'T'amou rei'uaa namoi 'ari namoiwou ta madoraa, ma bwa'i 'ua tana'amou.

⁷ 'Iraau noni nai marewanani ra bwa'i 'itamou, me 'inau rai 'itaau suria 'au 'unua tanaraau doni barongadaa'i ra ta'a'i.

⁸ Moi 'ari mamoi ha'ato'oai rongosi. 'Inau 'au bwa'i 'ariwou mau 'inia 'a ai'a tari mau i madoraa agua."

⁹ Na'i 'oha na 'ia Jisas 'a 'unu'i hako'i mareho 'isi, 'agu awa suriai taringai dangi na'i Provens i Galili.

Jisas 'A Ha'ausuriraaui Noni

Na'i Ruma Maea Ana God

¹⁰ Mana'i murina'i 'oha na 'iraaui do'orana'ia Jisas rau 'ari 'anai ha'ato'oai rongosi, 'ia Jisas 'a 'ari ro'u, ma'ata 'iia 'a hano haaria do 'iraaui sae rau gasi 'omesia.

¹¹ Miraau na saemaua adaa'i Jiu rau 'ome sibasiba 'inia marau heisosonga'i 'inia.

¹² Mei beiraaui noni hunga, ra ragoi nei nara hadanga'inia Jisas. Tara'i nei rau o'ani, "E sae goro naasi." Ma tara'i nei rau o'ani, "Ai'a na! 'Ia mo'osi 'a pwari'iraaui noni."

¹³ Ma bwara do tanei nai ramoramo 'anai ha'atee ha'a-aneanea Jisas na'i maadaau hako'i noni, suria rau mamaa'usiraaui saemaua adaa'i Jiu.

¹⁴ Murina tara'i dangi, 'oha narau gaarangi tari wou na'i 'ubutanai rongo narau hauasi, 'ia Jisas 'a 'ari na'i Ruma Maea ana God ma ha'ausuriraaui noni.

¹⁵ Mana'i 'oha na 'iraaui saemaua adaa'i Jiu rau rongo'i ha'ausuringa'i na haa'i, rau kaeni heimwaota'i di'u marau ha'atee o'ani, "A he'ua na aidangi di'u 'inia, 'inia 'iia ai'a ha'ausuringa'ini'i beigaau'i mareho na 'igaau gau ha'ausuringa'ini'i?"

¹⁶ Mia Jisas 'a o'ani 'iniraaui, "Ni taha nau maani'i ai'a mareho na dowai 'adoma'ini'i moi haariau, ma'ata ra'i 'adoma'ina'i a God na ha'ataariau mai.

¹⁷ 'Iatei na mwa'emwa'e 'anai ha'isuriai hei'irisina God nai matai aidangisia 'onaa ha'ausuringa'i nau haa'i 'isi ra boi baania God, ma'uasi ra'i mareho na 'inau 'au 'adoma'ini'i moi haariau.

¹⁸ 'Iatei na hadanga'ini'i taha na 'adoma'ini'i moi haaria, 'a 'irisia moi do 'iraaui noni rai ha'a-aneanea. Ma'ata 'iatei na haa'i mareho 'anai ha'a-aneanea mo'o na ha'ataaria mai, ni ha'atee ana'i ra ha'a-momori, ma ai'a ta pwari'i na'i beia.

¹⁹ 'Ia Moses 'a haa'i ringeringe tana'amou, magu ai'a ta ta'i nei 'ini'amou na do'ai araisuri'i hako. Naasi, ni 'uaana namou raba ngahu ha'amaesiaui 'inia!"

²⁰ Miraau noni raugu o'ani 'inia, "T'oe 'e adaro na bwauni'o gasi! Ai'a ta nei nai 'unua do'a raba ngahu ha'amaesi'o!"

²¹ Mia Jisas 'a o'ani 'iniraaui, "E ta'i ha'abu'oahu moi nau haua na'i dangi ni mamaro namou 'omesia ani, mamou heimwaota'i di'u'a 'iniai tau'aro nau hauasi.

²² Me 'i'amou mou haua ro'u i tau'aro na'i dangi ni mamaro na'i 'oha namou suriai ringei aha ha'ara 'onaai 'unua ana Moses. (Na ringesi 'a ai'a huunai boi baania Moses. 'A taraawa'a mau mai na'i madoraa ana Ebrahim.)

²³ 'Onaa na taha mai madoraa 'anai hauai ringei aha ha'ara tanaai gare ma to'o na'i dangi ni mamaro, moi haua'a 'onaai ringe ana Moses na 'unua. Hoita, 'onaa namou hauai ringei aha ha'ara na'i dangi ni mamaro, ma'ua mou haungarimou 'inia na'i 'oha nau ha'agorohia aho'i noni na'i dangi ni mamaro?

²⁴ 'A ai'a goro 'anai hiiria raurau i noni na'i 'oha namou ai'a aidangisia goroi taha na haua, ma'ata 'a goro domoi sadoia ha'agorohia, neina 'ai odo-odo i hihiri namoi haua."

Jisas i Nei Na 'Ia God Na 'Ome Sigihia

²⁵ Miraau tara'i saeni Jerusalem rau o'ani, "Naasia mo'o nara raba ngahu ha'amaesiasi?

²⁶ 'Ome, 'iia 'a ha-hadahada hurasu tanaraaui noni magu ai'a ta nei 'iniraau na'otara agaa'i naigui heitohetohe beia. Gasi raugu 'iraraa do 'iia naasi Ha'atahi?

²⁷ 'A ga'i bwa'i o'asi, 'inia 'igaau hako gau 'iraraai dora na 'ia mo'osi 'a boi baania. 'Inia na Ha'atahi 'ai ha'amaranga moi, ma 'abwa'i tanei nai 'iraraai dora na boi iei."

²⁸ Mia Jisas 'a ha'atee raha ara'a na'i 'oha na ha-ha'ausuri raau noni na'i Ruma Maea ana God, 'a o'ani, "Ha'amomori! Mou 'adoma'inia domou 'iraraau mamou 'iraraai dora nau boi iei. Ma'ata, 'inau 'au ai'a boi suriai 'adoma'igu haariau, 'e nei na ha'ataariau mai me 'iia naasi na ha'a-momori tarau.

²⁹ 'Inau 'au aidangisia mo'osi suria 'inau 'au boi baania, me 'iia na ha'ataariau mai tana'amou."

³⁰ Miraau tara'i sae rau bonasiai daua 'anai ha'a-mama'aia magu bwara tanaraau suria 'a ai'a tari mau i madoraa.

³¹ Me 'a ragoi noni nara goni na'i 'isi narau hinihinia'a na'i 'ohasi marau ha'atee o'ani, "'Iia gasi Ha'atahi! 'Inia 'abwa'i ta sae'a ro'u naigui haa'i tara'i mwani ha'abu'oahu di'ua ro'ua mo'osi!"

Ra Bonasiai Daua Jisas

'Anai Ha'amama'aia

³² Na'i 'oha na 'iraau Farisei rau rongoa do 'e mareho o'asi na 'iraau noni rau hahaanata nga'inia 'inia Jisas, 'iraau Farisei beiraau Na'ohadaa'i Piriisi rau ha'a-taariraau hehei'oi narau 'omesuriai Ruma Maea 'anai daua Jisas.

³³ Mia Jisas 'a o'ani 'iniraau, "'Inau wai awa gere madoraa moi bei'amou mawai 'ari aho'i'a beia mo'o na ha'ataariau maini.

³⁴ Moi towa'i sibaniau mamou bwa'i to'oagu, mana dora nawai awa iei, mou bwa'i matai taha iei."

³⁵ Miraau saemau adaa'i Jiu ra kakui ahudaau hako marau o'ani, "Na'i hei gasi naigui 'arieisi nai bwara 'inia tanagaau 'anai sadoia? Gasi 'ai 'ari beiraau tara'i ai Jiu ta marau he'ete'i? 'Onaa 'abwa'i, ma'ai hanoriai awa beiraau nei narau ai'a Jiu 'anai ha'ausuriraau!

³⁶ 'E taha gasi 'ado'ado 'anai mareho na 'unuasi, do gai towa'i sibania magau bwa'i matai to'oana, mana dora nai awa iei, gau bwa'i matai taha na'iei?"

Waini Tahii

³⁷ Na'i ha'ahakonai dangi anai rongosi, ma naasi dangi na ororiu di'u, 'ia Jisas 'a ura ara'a ma totoro tanaraau'i noni o'ani, "'Onaa namou raba gono mamoi boi beiau!

³⁸ 'Inia i Usu-usu Maea 'a o'ani, "'Iatei nai hinihiniau, na hurahurai waini tahi 'ai hurahura hura'a baania.' "

³⁹ (Na'i 'oha na hadanga'iniai waini tahi, 'iia 'a hadanga'iniai Hi'ona Maea narai haua tanaraau nei narau hinihinia. Na Hi'ona Maeasi ra ai'a haua mau tanaraau, suria 'ia Jisas ai'a mae mau ma ai'a suruta'e 'anai ara'a mau i aro.)

Mwane Inoni Ra Ai'a To'oraai

Ta'i 'Ado'ado 'Inia Jisas

⁴⁰ Na'i 'oha na 'iraaui noni rau rongoa o'asi, raugu ha'atee o'ani, "Ha'amomori, 'ia mo'osi naasi rarabea nagau mamasia."*

⁴¹ Tara'i nei rau o'ani, "'Iia naasi Ha'atahi." Ma tara'i nei 'iniraaui rau heitohe ro'u mau, marau o'ani, "Mou 'adoma'inia do ni Ha'atahi 'ai hura'a mai baaniai Galili?"

⁴² 'Inia na'i Usu-usu Maea ra 'unu ha'agorohia do ni Ha'atahi 'ai huta mai baaniai burungana Deved i mwaeraha. Mana'i Betlehem naasi 'omaa na 'ia Deved na huta iei."

⁴³ Mana mwane inoni ra ai'a to'oraai ta'i 'ado'ado 'inia Jisas.

⁴⁴ Ra'i nei rau raba daua 'anai ha'a-mama'aia maraugu ai'a ha'aagauhia.

'Iraau Na'otara Ra 'Utaia Jisas

⁴⁵ Na'i 'oha narau aho'i mai sae hehei'oi na 'iraaui Piriisi mana Farisei ra ha'a-taariraaui 'ari 'anai daua maia Jisas, ra songa'iniraaui sae hehei'oi o'ani, "Ni 'uaana namou ai'a waia mai 'inia?"

⁴⁶ Miraaui aramiraaui o'ani, "'Ei, ai'a ta sae namei rongoa mau do'ai mamaani tari o'asi."

⁴⁷ Miraaui haikou o'ani 'iniraaui sae hehei'oi, "'A 'ua? 'A rihota'ini'i ro'u 'adoma'imoo'i mamou hinihinia'a?"

⁴⁸ 'A 'ua? 'E nei 'ini'ameu i na'otara ma'ua Farisei na hinihinia mo'osi? Ai'a na!

⁴⁹ Na kaeni ruruha hako rau hinihinia 'inia rau ai'a huunai aidangisiai ringe ana'ia Moses. Nigaraau mia God 'ai ha'a-mama'airaaui!"

⁵⁰ Ma'e ta'i 'iniraaui saemaua adaa'i Jiu, naasi 'ia Nikodimas, 'ia mo'o na boi ga'u haaria ani beia Jisas. 'Iia 'a ha'atee o'ani 'iniraaui,

⁵¹ "Na ringe agaau 'a 'unua do gau bwa'i matai hiiriai noni na'i 'oha nagau ai'a rongo ha'agorohia mau ta mamaani beia."

⁵² Miraaugu ha'atee o'ani 'inia, "'Oe 'e ai Galili ro'u? 'Onaa 'oi 'ome riariaa goroi Usu-usu Maea, 'o ga'i 'omesia do ai'a do ta rarabea nai boi baaniai Galili."

⁵³ Miraaugu hano 'anai aho'i 'ari suri'i ruma adaa'i.†

8

Urao Na Horosiai Ringei Ha'iwai

¹ Mia Jisas 'a 'ari aho'i hungahungai 'Oliv,

² mana'i haho'oa ta'aa na'i nata dangi 'a aho'i 'ari Ruma Maea. Miraaui mwane inoni rau goni hako mai. Mia Jisas 'a heinagu auru ma ha'ausuriraaui.

* **7:40** 7:40 'Oha'inia Diutronomi 18:15-19 † **7:53** 7:53-8:11 Tara'i Baebol bwani ra ai'a to'ora'i mwani tatara 'ini.

³ Na'i 'oha na ha-hadahada mau, 'iraau Ha'ausuri 'anai Ringe ana'ia Moses, miraau Farisei rau waia mai urao ha'iwai narau sadoia na'i 'oha na taritari'a beiai sae he'ete'i, marau ha'a-urasia na'i maadaau hako inoni.

⁴ Naasi marau o'ani 'inia Jisas, "Ha'ausuri, na uraoni ra sadoia na'i 'oha na taritari'a beiai sae he'ete'i.

⁵ Na'i ringe ana Moses, 'a 'unua do ra ga'i buta ha'amaesia mo'o nai haua o'asi. I'oe 'o 'adoma'i he'ua?"

⁶ Rau hauai heisonga'isi suria rau raba sadoia ta maho dorai subunia Jisas 'inia. Mia Jisas 'a mwaoro auru ma usu-usu na'i ano 'iniai kaka'una.

⁷ Na'i 'ohasi rau songa'inia wetewete moe'a, mia Jisas 'a ura arasi ara'a ma o'ani, "Hoita, moi buta'ia, ma'ata 'iatei na 'iraraa do 'a ai'a haua ta ta'i ora-ora'a, nai buta'ia 'iniai hau tahamora."

⁸ Mia Jisas 'a mwaoro aho'i auru ma usu-usu ro'u 'iniai kaka'una na'i ano.

⁹ Na'i 'oha na 'iraau mwane 'ani raugu rongoa o'asi, marau haihanori hako baaniai dorasi, taraawa'a beiraau sae wari. 'Iia moia Jisas mana uraosi nararugu awa 'isi.

¹⁰ 'Ia Jisas 'a ura arasi aho'i ara'a ma o'ani 'iniai uraosi, "Neiraau hei mwane 'ani? 'A 'ua? Ai'a tanei 'iniraaui naigui ha'a-mama'ai'o?"

¹¹ Mana uraosi 'a o'ani, "Agu ai'aa'a Araha." Mia Jisas 'a o'ani 'inia, "'Inau bwa'i ha'a-mama'ai'o ro'u. 'Oi 'ariwou ma'oigu abui ora-ora'a'a ro'u."

Jisas Na Bewaa 'Anai Marewana

¹² 'Ia Jisas 'a o'ani 'iniraaui noni, "'Inau naasi bewaa tanaraau saenai marewana. 'Onaa namoi suriau, mou bwa'i matai awa na'i kuhi, suria moi hano na'i bewaa nai wai'amou 'ari 'anai tahi tarau."

¹³ Miraau Farisei rau ha'atee o'ani, "Na mwane mareho na'o 'unu'i 'ini'o 'o 'unu'i moi haari'o, naasi meu bwa'i hinihini'o!"

¹⁴ Mia Jisas 'a o'ani 'iniraaui, "Rei'uaa na mareho nau 'unu'i 'isi 'au 'unu'i 'iniau haariau, ma'ata na mareho 'isi ra ha'a-momori. 'Inia 'inau 'au aidangisia na'i hei nau boi iei mana'i hei nau hano 'ana. 'T'amou ai'a 'iraraai dora nau boi iei, mana dora nawai 'ariei.

¹⁵ 'T'amou mou hiiriai noni na'i wanawana 'onaai noni ni marewana moi. 'Inau ai'a hihiri o'asi.

¹⁶ Ma 'onaa 'inau wai hihiri, na hihiri agua 'a ga'i ha'a-momori, 'inia 'inau ai'a hiiriai noni haariau, ma'ata 'ia Amagu na ha'ataariau mai 'a awa beiau.

¹⁷ Ni ringeringe amou 'a o'ani, "Onaa 'e waira rua rarui maaniai ta'i mamaani na'i kooti, ni marehosi 'a mena ma ha'a-momori."

¹⁸ 'Inau 'au 'unu'i mareho 'iniau haariau, mana ruana naasi 'i Amagu na ha'ataariau mai."

¹⁹ Miraangu songa'inia o'ani, "Nahei'a amamu?"

Mia Jisas 'a aramiraaui o'ani, "Mou ai'a aidangisiau, me mou ai'a aidangisia ro'ua Amagu, 'inia 'onaa namoi aidangisiau, ma naasi moigui aidangisia ro'ua Amagu."

²⁰ 'Ia Jisas 'a 'unu'i mareho 'isi na'i 'oha na ha-ha'ausuri na'i raronai Ruma Maea ana God, gaarangiai dora ra nuga iei bakosi ni nuga ha'a. Ma ai'a tanei nai daua Jisas 'anai ha'amaesia, suria 'a ai'a tari mau i madoraa 'ana.

Jisas 'A Ha'atee Ha'abasuraau

i Saemaua Adaa'i Jiu

²¹ Mia Jisas 'a o'ani ro'u 'iniraaui, "'Inau wai hano. 'T'amou moi sibaniau mamou bwa'i sadoiau mamouigui buna mae bei'i ora-ora'a amoo'i. Na dora na 'inau wai 'ariei mou bwa'i matai ataha na'iei."

²² Miraau na saemaua adaa'i Jiu raugu o'ani 'iniraaau haariraaau, "'A 'ua gasi? 'Ai ngahuia haaria? 'E taha gasi na 'adoma'inia na'i 'oha na 'unua do gau bwa'i matai ataha na'i dora na 'iia 'ai 'ariei."

²³ Mia Jisas 'a o'ani 'iniraaau, "'T'amou baaniai ano, 'inau baaniai aro. 'T'amou anai marewana, 'inau ai'a anai marewana.

²⁴ Naasi tarana nau 'unua 'inia do 'i'amou moi mae bei'i ora-ora'a amoo'i. 'Onaa namou bwa'i hinihinia do 'inau 'iatei nau 'unua 'iniau, moi mae bei'i ora-ora'a amoo'i."

²⁵ Miraau ha'atee o'ani 'inia, "'Oi 'unua tana'ameu, i'oe atei?"

Mia Jisas 'a aramiraaau o'ani, "'Inaua mo'o nau bwane 'unua tana'amou ani.

²⁶ 'A ragoi mareho na 'inau 'au ga'i 'unu'i 'ini'amou, ma 'anai hiiri'amou 'ini'i, ma'ata 'au bwa'i. 'Inia 'inau wai 'unu'i moi tanaraau noni i taha nau rongo'i beia mo'o na ha'ataariau mai. Mana taha na 'iia na 'unu'i ra ha'a-momori hako."

²⁷ Miraau ai'a aidangisia do'ia Jisas 'a mamaani 'abaiai Amana tanaraau.

²⁸ Mia Jisas 'a o'ani, "'Na'i madoraa namoi nugaau ara'a i Gare Inoni na'i dadaahoro mamoi'gui aidangisia do 'inau i nei nau 'unua do 'inau, mamoi'gui aidangisia ro'u do 'inau ai'a ha'isuri'i 'adoma'igu haariau 'ini'i mareho nau haa'i. Mana mareho nau maani'i ra'i mareho na 'ia Amagu na 'unu'i tanaau.

²⁹ Mana nei na ha'ataariau mai 'a awa tarau beiau, 'iia 'a ai'a nugasiau. 'Inia 'inau 'au haa'i tarau i taha na rabasia dowai haa'i."

³⁰ Mara ragoi nei narau hinihini na'i 'oha narau rongo'i mareho na 'ia Jisas 'a maani'i.

³¹ Mia Jisas 'a o'ani 'iniraaui Jiu narau hinihinia, "'Onaa namoi ha'isuri'i tarau i ha'ausuringa'i agu'i, 'i'amou ra'i rongoiusuri ha'a-momori agu'i.

³² Moi aidangisiai taha na ha'a-momori, mana taha na ha'a-momori 'ai ha'a-dadara'amou."

³³ Miraaugu o'ani 'inia Jisas, "'T'ameu ra'i warowarona'i a Ebrahim, ma ai'a ta nei na'i marewanani namei ha'i slev tanaa. 'E taha na'o 'adoma'inia na'i 'oha na'o 'unua do'ai ha'a-dadara'ameu?"

³⁴ Mia Jisas 'a aramiraaau o'ani, "'Inau wai 'unua ha'a-momori tana'amou, 'iatei na hauai ta'aa, 'iia 'e slev tanaai ora-ora'a.

³⁵ Ni slev ra ai'a 'unua do 'iia 'e huunai gare anai bwauodo, ma'ata ni gare anai sae na bwauodo ra 'unua 'inia huunai gare ana tarau'a.

³⁶ Naasi 'onaa ni Garena God 'ai ha'a-dadara'amou, 'i'amou moi dadara'a tarau'a.

³⁷ Ha'amomori! 'Au 'iraraa do rei'uaa na 'i'amou ra'i warowarona'i a Ebrahim, me tara'i abe 'ini'amou mou raba ngahu ha'amaesiau, suria mou ai'a dau'i ha'ausuringa'i agu'i.

³⁸ 'Inau 'au maani'i tana'amou i mareho nau 'omesi'i na'i 'oha nau awa beia Amagu. Mi'amou mou suri'i ha'ausuringa'i ana amamoou."

³⁹ Miraaugu 'unu ha'arangasia hura'a o'ani, "'Ia Ebrahim naasi amameeu."

Mia Jisas 'agu o'ani 'iniraaau, "'Onaa 'ia Ebrahim naasi amamoou, mou ga'i ha'isuri'i herehere goro ana'i.

⁴⁰ 'Inau 'au 'unu'i tana'amoui mareho nara ha'a-momori nau rongo'i beia Amagu, mamougu raba ngahu ha'amaesiau. 'Ia Ebrahim 'a bwa'i haa'i here o'asi.

⁴¹ Naasi 'a ha'ata'inia domou suria amamoou na'i 'oha namou hau'i here 'isi."

Miraau ha'atee o'ani 'inia, "'Ia God moi naasi huunai amameeu, mi'ameu ra'i huudi gare ana'i."

⁴² Mia Jisas 'a o'ani 'iniraa, "'Onaa 'ia God naasi Amamoou, 'i'amou mou ga'i ta'ahiau, suria na dio mai nau haa bei'amou, 'au boi baania God. 'Inau ai'a boi suriai 'adoma'igu haariau, ma'ata 'ia Ama na ha'ataariau mai.

⁴³ Ni 'uaana namou ai'a aidangisi'i 'ini'i mareho nau hadanga'ini'i? 'A o'asi suria mou ai'a raba ha'isuri'i ha'ausuringa'i agu'i!

⁴⁴ 'I'amou amamoou 'ia Saetan. Na mareho ta'a'i na haa'i, na'isi mareho namou raba haa'i. Taraawa'ana mau mai, 'iia 'e inoni hahaingahu ma 'itaai taha na ha'a-momori suria 'iia 'a honu 'inia pware'i. Mana 'i oha nai pware'i, 'e mareho goro moi tanaa, suria 'iia 'e sae 'anai pware'i, me 'iia 'e amadaaui mwane pware'i hako.

⁴⁵ Naasi na'i 'oha nau hadanga'ini'i taha nara ha'a-momori, 'i'amou ai'a hinihiniau, suria 'i'amou ra'i gare ana'i!

⁴⁶ 'Iatei 'ini'amou nai matai ha'ata'inia hura'a do 'inau 'au ora-ora'a? Ma 'onaa nau ha'a-momori, ma 'ua namou ai'a hinihiniau 'inia?

⁴⁷ 'Iatei na ha'i garena God, 'a wa'ewa'e 'anai bahurongo'i ha'atee ana'ia God, mana 'i oha namou ai'a, 'a ha'ata'inia do 'i'amou ai'a gare ana'ia God."

Jisas Mea Ebrahim

⁴⁸ Miraau saemaua adaa'i Jiu raugu o'ani 'inia, "'Agu ai'a 'ome bwara'a! 'I'oe 'e sae ni Samaria ma'e adaro na bwauni'o!"

⁴⁹ Mia Jisas 'a o'ani 'iniraa, "'Inau ai'a adaro nai bwauniau. 'Inau 'au ha'ahoua Amagu me 'i'amou mou ai'a ha'ahouau.

⁵⁰ 'Inau ai'a bonasia dorai ha'ahauasaau, ma'ata 'e nei na raba ha'ahauasaau, mia mo'osi naasia mo'o na hihiri odo-odo.

⁵¹ 'Inau wai 'unua ha'a-momori tana'amou, 'iatei nai ha'isuri'i ha'ausuringa'i agu'i, 'a bwa'i mae!"

⁵² Miraau noni raugu o'ani, "'Naasi meugu 'iraraa goro do'e adaro mora na bwauni'o. 'Ia Ebrahim miraau rarabea rau mae, mi'oe 'o 'unua do tanei nai ha'isuri'i ha'ausuringa'i amu'i, 'a bwa'i mae!

⁵³ 'O 'adoma'inia do 'i'oe 'o ororiu di'uai wauwa agaaua Ebrahim, miraau rarabea narau bwane mae'a? 'I'oe 'o 'adoma'inia do 'i'oe atei?"

⁵⁴ Mia Jisas 'a o'ani 'iniraa, "'Onaa na 'inau haariau moi nau ha'ahauasaau haariau, ma ni mareho nau hauasi 'e mareho haaria moi. Me 'ia mo'o na ha'ahauasaau naasi Amagu, 'ia mo'o namou 'unua do 'iia naasi God amou.

⁵⁵ Ma rei'uaa namou 'unua do 'iia naasi God amou, me 'i'amou ai'a gere aidangisia moe'a. 'Inau nau aidangisia goro. Ma 'onaa nawai 'unua do 'inau ai'a aidangisia, ma naasi 'inau wai pware'i 'onaiamou'a na. Me 'inau 'au aidangisia Amagu, mau araisuri'i ha'atee ana'i.

⁵⁶ 'I amamoou a Ebrahim 'a wa'ewa'e 'oha na 'adoma'iniai 'oha do 'inau wai boi. Mana 'oha na 'omesiai boi agu, 'a wa'ewa'e 'inia."

⁵⁷ Miraaugu o'ani 'inia, "'Na harisimu ai'a gere tari moe'a i rima tangahuru ma'o 'unua'asi do muru hairee'i!"

⁵⁸ Mia Jisas 'a o'ani, "'Ha'amomori, 'inau wai 'unua tana'amou, 'oha 'ia Ebrahim ai'a awa mau, 'inau bwani awa!"*

⁵⁹ Na'i 'ohasi 'iraaui noni raugu si'o hau 'anai buta'ia. Mia Jisas 'a bainihu ta'iniraa, ma kumusi hura'a baaniai Ruma Maea ana God.

9

Jisas 'A Ha'a-wanawanaai Sae Kuru

* **8:58 'Inau bwani awa:** 'Oha na 'ia Jisas 'a 'unua do "'inau bwani awa," 'iraaui Jiu rau aidangisia do 'iia 'a 'unua haaria do 'iia naasi God. 'Inia na'i ha'ateeni Jiu, ni atana God na maea di'u, naasi "Iawe." Mana 'ado'ado 'anai Iawe, naasi "'Inau awa." Wana na'i Diutronomi 32:39.

¹ Na'i 'oha na 'ia Jisas 'a 'ari wou, 'a 'omesiai sae na huta ha'i kuru.

² Miraau rongoiusuri ana'ia Jisas raugu songa'inia o'ani, "Ha'ausuri, ni 'uaana nagu huta ha'i kuru 'inia mo'osi? 'E 'inona haaria nagu o'asi 'iniasi, ma'ua 'e 'inona amana mea inana?"

³ Mia Jisas 'a aramiraaui o'ani, "Ni kuru na to'iasi, ai'a do 'a kuru 'iniai 'inona, ma'ua 'inona amana mia inana. 'Ia 'a kuru do neina 'ia God 'ai ha'ata'iniai mena ana na'i tau'aro goro nai haua tanaa na'i tahitahi ana.

⁴ Na'i 'oha na ai'a rodo mau, gai haa'i tatau'aro ana'ia mo'o na ha'ataariau mai, 'inia na rodo 'a raumwadu na bwa'i sae naigui haa ta tau'aro.

⁵ Na'i 'oha na 'inau awa mau na'i marewanani, 'inau naasi bewaa tanaraau noni nai marewana."

⁶ Mana'i 'oha na 'ia Jisas 'a ha'atee o'asi hako, 'a ngisu dioi ano. 'A dorariai mwagiuro beiai ngisungisuna, ma tarohiai maana'i mo'osi 'iniai mwagirosi.

⁷ Naasi ma o'ani 'inia, "'Oi 'ari ma'oi aromaa na'i oboi wai ra 'unua 'inia Saeloam." (Mana 'ado'ado 'anai Saeloam naasi "ra ha'ataaria 'ari.")

Na'i 'oha na 'ia mo'osi 'a 'ari ma aromaa hako na'i oboi waisi, 'agu aho'i mai na'i 'omaa ana ma wanawana'a.

⁸ Miraau nei rau mono gaaranga mo'osi, ma tara'i nei narau 'iraraa do 'iia naasi sae kuru na haha'angoni ha'a ani, raugu heisosonga'i hairiu o'ani, "Naasi sae na kuru na heheinagu 'anai ha'angoni ha'a ani?"

⁹ Tara'i nei rau 'unua do 'iia, ma tara'i nei rau o'ani, "Ai'a, 'e sae he'ete'i na, magu 'ome 'onaaia moi!"

Mana nei na haha'angonisi 'agu o'ani, "'Inau na, 'inau moi!"

¹⁰ Maraugu songa'inia o'ani, "Ma 'a he'ua na'ogu wanawana 'inia? 'Iatei na ha'a-wanawana'o?"

¹¹ Mia o'ani 'iniraaui, "'E sae nara 'unua 'inia Jisas na hauai mwagiuro ma tarohia suri'i maagu, ma 'unua tanaau 'anai 'ari arohiai maagu na'i oboi wai na'i Saeloam. Hoita, na'i 'oha nau 'ari naugu aromaa na'i waisi, naasi mau wanawana'asi!"

¹² Miraaugu songa'inia ro'u o'ani, "Ma naheia mo'osi?"

Miagu aramiraaui o'ani, "'Inaugu ai'a 'iraraa'a."

'Traau Farisei Rau Mamaani Beiai Sae

Na Kuru Ga'u

¹³ Naasi maraugu waia mo'osi 'ari tanaraau Farisei.

¹⁴ Mana'i dangi na 'ia Jisas 'a ha'agorohiai saesi, 'e dangi ni mamaro.

¹⁵ Miraau na Farisei raugu sosonga'inia 'iniai taha na to'o. Mia o'ani 'iniraaui, "Na'i 'oha na tarohi'i maagu hako 'iniai mwagiuro, 'a 'unua dowai 'ari arohiai maagu na'i oboi wai na'i Saeloam. Na'i 'oha nau 'ariwou mau aromaa hako, mau wanawana'asi."

¹⁶ Ma tara'i Farisei rau o'ani, "'Ia mo'osi 'a ai'a boi baania God, suria 'a tau'aro na'i dangi ni mamaro." Ma tara'i nei ra o'ani, "'Onaa 'e sae ora-ora'a moi, ma'ua na haua 'inia i ha'abu'oahu o'asi?"

Na'i 'ohasi, 'e kae heihoa na to'o na'i ahoaadaau hairiu.

¹⁷ Miraaugu songa'inia ro'ua mo'o na huta ha'i kurusi o'ani, "I'oe 'o 'unua do 'ia mo'osi na ha'a-wanawana'o. I'oe 'o 'adoma'i he'ua 'inia mo'osi?"

Miagu aramiraaui o'ani, "'Inau 'au 'adoma'inia do 'iia 'e rarabea."

¹⁸ Naasi miraau saemau adaa'i Jiu raugu ai'a raba hinihini'a ro'u do 'ia mo'osi 'a kuru ga'u. Naasi marau soia inana mana amana,

¹⁹ rau songa'inirarua o'ani, "'A ha'amori do'e gare amurua na huta ha'i kuru naanisi? Ma'ua nagu wanawana 'inia?"

²⁰ Mia inana mana amana mo'osi raru o'ani, "Miria miri 'iraraa do'e gare amiria na huta ha'i kuru.

21 Mana 'iraraai taha nagu taarai wanawana 'inia, ma'ua 'iatei nagu ha'agorohia, na miri ai'a mataia. 'Iia 'a mwanemaua'a, 'a matai hadahada haaria. Moi songa'inia mai mamaani haaria."

22 Raru ha'atee o'asi, suria raru mamaa'usiraaui saemaua adaa'i Jiu, 'inia 'iraaui rau bwani 'unua do 'onaa tanei nai 'unua do'ia Jisas naasi Ha'atahi, rai ha'aabua 'anai siri suri'i ruma ni ha'arahesi 'anai rihunga'i.

23 Tarana naasi nararu 'unua 'inia dorai songa'inia maai mamaani haraaria.

24 Naasi marau 'unua aho'i ro'u siri maia mo'o na huta ha'i kurusi marau o'ani 'inia, "'O duruduru na'i maana God doni mareho na'oi 'unu'i rai ha'a-momori, 'inia 'i'ameu meu 'iraraa do 'ia Jisas 'e inoni ora-ora'a."

25 Mia o'ani 'iniraaui, "'Inau ai'a 'iraraa gasi 'e inoni ora-ora'a ma'ua ai'a. Ni mareho moi nau 'iraraa naasi, 'inau 'au huta ha'i kuru, mana'i 'ohani 'au matai wanawana'a!"

26 Miraaui o'ani 'inia, "'E taha na haua, ma here he'ua 'oha na ha'agorohi'o?"

27 Mia mo'osi 'a o'ani 'iniraaui, "'Mou ai'a bwane rongoai 'unua agua ani? Ni 'uaana namougu raba rongoa ro'u 'inia? 'A 'ua? Mou raba ha'i rongoiusuri ana ro'u?"

28 Naasi marau ha'atee ha'ata'aia mo'osi, marau o'ani, "'I'oe naasi rongoiusuri ana, 'i'ameu ai'a! 'I'ameu ra'i rongoiusuri ana'ia Moses.

29 'I'ameu 'iraraa do'ia Moses naasia mo'o na 'ia God na hadahada beia, me 'ia mo'osi, ai'a ta ta'i maho namei 'iraraa 'inia. Rei'uaa dora na boi baania, meu ai'a 'iraraa ro'u."

30 Mana saesi 'a ha'atee o'ani, "'Ini 'uaana? 'Au kaeni heimwaota'i di'u 'ini'amou! 'Iia na ha'a-wanawanaausi, mamougu 'unua domou ai'a 'iraraai dora na boi baania!

31 'Igaau gau 'iraraa do'ia God 'a bwa'i matai arami'i ha'arahesi adaa'i noni ora-ora'a, ma'ata 'a wa'ewa'e 'anai aramiraaui nei ra ha'ahoua marau ha'isuriai hei'irisina.

32 Na'i taraawa'a na haua mai marewana, ai'a do ta sae nagai rongoa do'ai ha'a-wanawanaa aho'i tanei nai huta ha'i kuru.

33 Naasi 'ia mo'osi 'a bwa'i matai haua o'asi 'onaa na ai'a boi baania God."

34 Miraaui o'ani 'inia, "'Taraawa'a mau mai 'oha na'o huta 'o honu 'ini ora-ora'a, ma'ogu raba ha'ausuri'ameu aho'i!" Naasi rau asihura marau taaria hura'a baaniai ruma ni ha'arahesi.

Kuru Ha'i Hi'ona

35 'Oha na 'ia Jisas 'a rongoai mareho na to'osi, 'a heisadoi beia mo'osi ma songa'inia o'ani, "'A 'ua? 'O hinihiniai Gare'i Inoni?"

36 Mia mo'osi 'agu o'ani 'inia, "'Saemaua, 'oi ha'a-aidangisiau 'inia mo'osi mawai hinihinia."

37 Mia Jisas 'agu o'ani 'inia, "'Iia na'o 'omesia'asi, 'iia namuru ta'i ha-hadahada na'i 'ohanisi."

38 Na'i mau 'ohasi mana saesi 'a topira'i ruru auru tanaa Jisas ma o'ani, "'Araha, 'inau hinihini'a!"

39 Mia Jisas 'a o'ani 'inia, "'Inau 'au boi 'anai hiiriai marewana. 'Iraaui nei ra kuru rai 'ome'ome, miraaui nei narau 'adoma'inia dorau 'ome'ome, raigui aidangisia do 'iraaui rau kuru."

40 Miraaui Farisei narau ura 'isi na'i 'ohasi raugu o'ani 'inia, "'A 'ua? 'I'oe 'o 'unua do 'i'ameu meu kuru ro'u?"

⁴¹ Mia Jisas 'a o'ani 'iniraa, "'Onaa namou ga'i kuru, mou ga'i bwa'i haai ora-ora'a namou hauasi.* Mana 'unua amoo domou 'ome'ome nagu ha'ata'inia 'inia doni ora-ora'a amoo'i ra awa mau bei'amou."

10

Na 'Omesuri Siip Bei'i Siip Ana'i

¹ Mia Jisas 'a ha'atee o'ani, "'Inau wai 'unua ha'a-momori tana'amou, 'iatei nai hane aharau nai barai siip, ma ai'a siri nai maanai bara, 'iia 'e sae beriberi!

² 'Inia na nei na huunai 'omesuri siip, 'ai siri ma'ata'a nai maanai bara.

³ Na nei na 'omesuriai bara 'ai tahangiai maanai bara tanaa, miraaui siip rau rongo 'iraraai ringena marau boi beia. 'A 'unu'i atadi siip ana'i ma wairaaui hura'a.

⁴ Na'i 'oha na soi goniraaui hakoi siip ana'i, 'a na'otaradaaui, miraaui suria 'inia rau rongo 'iraraai ringena.

⁵ Me 'onaa ta sae he'ete'i nai 'unuraui mai, rai horata'inia. 'Inia rau bwa'i taraa to'o suria moi sae he'ete'i narau ai'a matanga'i rongoai ringena."

⁶ 'Ia Jisas 'a hauai heiha'auusi tanaraui, miraaui noni rau ai'a aidangisiai taha na bonasiai ha'ausuriraaui 'inia.

⁷ Naasi magu ha'atee o'ani ro'u, "'Inau wai 'unua ha'a-momori tana'amou, 'inau naasi maanai barai siip.

⁸ Tara'i nei nara boi na'o 'iniau rau 'onaai sae beriberi, 'inia rau here ha'ata'airaaui noni 'ini'i ha'ausuringa'i pwapwaaui'i adaa'i. Me ni siip agu'i rau ai'a araisuriraaui.

⁹ 'Inau naasi maanai barai siip. 'Iatei nai boi beiau 'anai siri nai raronai bara wai ha'atahia. 'Iia 'ai dadara'a 'onaai siip na matai hano hairiu 'anai siba 'ana mahoingau.

¹⁰ Na sae beriberi 'a boi moi 'anai beri, heingahu, ma 'anai hereta'aa. 'Inau 'au boi 'anai hauai huunai tahi tanaraui noni, tahitahi na honu 'ini'i mwane mareho goro.

¹¹ "'Inau naasi 'omesuri siip goro. 'I nei na 'omesuri siip goro 'a mwa'emwa'e 'anai mae 'ini'i siip.

¹² Na nei nara horia moi 'anai 'omesuri, 'a matai hora moi na'i 'oha nai 'omesia'i misu tari na boi 'anai ngaa'i siip. 'Iia 'a matai hora moi baani'i, suria 'iia ai'a to'ora'i siip 'isi, me 'iia 'a ai'a huunai sae 'omesuri siip. Mana'i 'oha nai hora, na misu tari 'ai tariha'ini'i siip, mana siip rai 'adarara.

¹³ Na nei nara horia 'anai 'omesuri 'a hora suria 'iia ra horia moi 'anai 'omesuri, ai'a do 'a huunai 'adoma'i ororiu 'ini'i siip.

¹⁴⁻¹⁵ "'Inau naasi 'omesuri siip goro minau mwa'emwa'e 'anai mae 'ini'i siip agu'i. 'Inau 'au 'irara'i siip agu'i, mana siip agu'i ra 'iraraui ro'u. 'A 'onaai 'iraraui ana Amagu, minau 'iraraui ro'u a Ama.

¹⁶ Na'i raronai bara, rai siip agu'i ra ai'a awa mau na'iei na 'inau wai wairaaui ro'u mau mai. 'Iraui rai rongo 'iraraui ringegu. Rai ha'i ta'i ruruhai siip, marai to'oraai ta'i 'omesuri.

¹⁷ "'Ia Amagu 'a huunai ta'ahiau suria 'au mwa'emwa'e 'anai wateai tahingagu 'anai mae. 'Au wateai tahingagu neina 'inau wai matai tahi aho'i ro'u.

¹⁸ 'A bwa'i nei nai matai ha'amaesiaui 'onaa 'inau 'au bwa'i wateau. 'Inau 'au wateai tahingagu dadara'a. 'Inau nau to'oraai mena 'anai wateau, mau to'oraai mena 'anai tahi aho'i, 'inia naasi taha na 'ia Amagu 'a ha'atoraaui 'inia."

* **9:41 Ora-ora'a namou haasi:** Ni ora-ora'a narau haua, naasi 'anai kakawata'i hinihinia Jisas.

19 Na'i 'oha na 'unu'i mareho 'isi, 'iraau Jiu 'a heiruarua'a i 'ado'adodaa'i 'ini'i.

20 Tara'i nei 'iniraaui rau o'ani, "'Ia mo'osi 'e adaro na bwaunia ma bweu'asi. Moi abui bahurongo'i mareho na maani'i."

21 Ma tara'i nei 'iniraaui rau o'ani, "Ra ai'a rongo o'asi sae ra bwaunira i adaro. Ni adaro 'a bwa'i matai ha'a-'ome'omeai sae na huta ha'i kuru!"

'Iraau Jiu Rau Bonasiai

Ngahu Ha'amaesia Jisas

22 Ma tari mai madoraa ni wanusi. 'Ia Jisas 'a awa na'i Jerusalem na'i 'oha nara hauai rongo 'anai 'adoma'i aho'isiai 'oha nara tahangiai Ruma Maea ana God.

23 Mana'i raronai Ruma Maea, 'ia Jisas 'a 'ariwou na'i dora nara 'unua 'inia Abaihare ana Solomon.

24 Miraau saemaua adaa'i Jiu rau goni wou hunia marau o'ani 'inia, "'Tameu 'a kakui ahumeu ore'a mai 'ini'o. 'Onaa i'oe naasi Ha'atahi, ma'oi 'unua ha'a-momori tana'ameu."

25 Mia Jisas 'a o'ani 'iniraaui, "'Inau bwane 'unua tana'amou memou ai'a hinihiniau. Ni mwane mareho nau hau'i beiai mena ana Amagu naasi nara ha'ata'inia hura'a do 'inaua tei.

26 Mou ai'a hinihiniau suria mou ai'a aba 'ini'i siip agu'i.

27 Na siip agu'i ra rongo 'iraraai ringegu. 'Inau 'irararaau, miraaui rau suriaui.

28 'Inau 'au hauai tahi tarau tanaraau, miraaui rau bwa'i siri na'i mae tarau. 'A bwa'i nei nai hasuiraaui baaniaui,

29 'inia 'ia Amagu na wateraau mai tanaau, me 'iia 'a wetewete ma mena di'u'i mwane mareho hako. Naasi, 'a bwa'i nei nai matai hasuiraaui hura'a baania Amagu.

30 'Inau mea Amagu 'e ta'i."

31 Na'i 'ohasi, 'iraau saemaua adaa'i Jiu rau si'o hau ro'u dorai buta ha'amaesia.

32 Mia Jisas 'a o'ani 'iniraaui, "'Inau 'au hau'i mwane mareho goro na 'ia Amagu na 'unu'i tanaau. 'E nei he'ua 'ini'i tatau'aro goro 'isi namou raba ha'amaesiaui 'inia?"

33 Miraau o'ani 'inia, "'Tameu ai'a raba buta'i'o 'ini'i mareho goro na'o haa'i, me 'o hadahada ha'ata'aia God. I'oe 'e taraani noni moi ma'ogu 'unua haari'o do i'oe God!"

34 Mia Jisas 'a o'ani ro'u 'iniraaui, "Na'i Usu-usu Maea agaau ra usua dio do'ia God 'a o'ani 'iniraaui tara'i na'otara, "T'amou ra'i god."*

35 Mana mareho na awa dio na'i Usu-usu Maea 'a ha'a-momori tarau. Naasi, 'onaa 'iraau nei narau dau'i ha'atee ana'ia God ra 'unu god 'iniraaui,

36 ni 'uaana namou 'unua 'inia do'au ha'atee ha'ata'aia God na'i 'oha na 'inau 'au 'unua do 'inau 'e gare ana moi? 'Inia 'inau naasi nei na 'ia God na 'ome sigihiau ma ha'ataariaui mai na'i marewana.

37 'Onaa na 'inau ai'a hau'i taha na 'ia Amagu na haa'i, mamoi abui hinihiniau.

38 Ma 'onaa nau haa'i taha 'ia Amagu na hau'i, rei'uaa namou ai'a hinihini'i ha'atee agu'i, me moi hinihini'i taha nau haa'i mamoi tano aidangisia do 'ia Ama 'e ta'i beiau, me 'inau 'e ta'i beiai Ama."

39 Na'i 'ohasi rau raba daua ro'u 'anai hiiria magu bwara, 'ia Jisas 'a hano moi baaniraaui.

40 Mia Jisas 'a aho'i 'ari nata batarau wai rahai Jodan, ma awa na'i dora na 'ia Jon na bwa-bwareomaearaaui ga'u i sae.

* 10:34 10:34 Psalm 82:6

⁴¹ Ma ra ragoi noni ra boi beia. Miraaugu o'ani 'iniraaui hairiu, "Ia Jon 'a ai'a haa'i tara'i ha'abu'oahu, ma'ata na mwane mareho na 'unu'i 'inia mo'oni ra ha'a-momori hako."

⁴² Mana'i 'ohasi, rau ragoi nei narau hinihinia.

11

Lasarus 'A Mae

¹ Ma'e sae na atana 'ia Lasarus 'a daoha. 'Iia 'a awa na'i Betani beiraruai rua asina, 'ia Meri mea Maata.

² 'Iiasi a Meri, naasi Meri na erisiai bei rumu na si'ini goro na'i uwana'ia Jisas, ma ha'amaha'i 'inia warihuna.

³ Mia Meri mea Maata raru ha'ataari hadahada 'ari tanaa Jisas o'ani, "Araha, na nei na'o ta'ahia di'u 'a daoha."

⁴ Na'i 'oha na'ia Jisas 'a rongoa, 'a o'ani, "Ni daoha na to'ia Lasarus 'a bwa'i maesia. 'Iia 'a daoha neina mena ana God 'ai ha'ata'i marai ha'a-aneaneai Garena 'inia."

⁵ Ma rei'uaa na 'ia Jisas 'a ta'ahia Maata mea Meri mea Lasarus,

⁶ 'iia 'a awa ro'u mau suriai rua dangi na'i dora na awa 'ieisi.

⁷ Ma o'ani 'iniraaui rongoiusuri ana'i, "Gau magari aho'i 'ari Jiudea."

⁸ Miraauui rongoiusuri ana'i rau ha'atee ha'abwarasia o'ani, "Ha'ausuri, na'i moi dangi ani narau raba buta ha'amaesi'o i saemaua adaa'i Jiu, ma'o 'unua'a do gai 'ari aho'i ro'usi?"

⁹ Mia Jisas 'a o'ani 'iniraaui, "Na dangi 'a marewa suriai ta'i tangahuru mana rua 'aoa. Naasi 'onaa 'iatei nai hahano na'i dangi, 'a bwa'i tora'i, 'inia na sina 'a bewaasia.

¹⁰ Me 'onaa nai hano na'i rodo, 'iia 'a matai tora'i suria 'a ai'a marewa."*

¹¹ Naasi ma ha'atee o'ani, "I geresae agaaua Lasarus 'a mauru'a, ma'ata 'inau wai 'ari mawai ha'araia."

¹² Miraauui rongoiusuri ana'i rau o'ani 'inia, "Araha, 'onaa na mauru moi, me 'a ha'ata'inia do 'iia 'ai goro moi."

¹³ Rau ha'atee o'asi suria rau 'adoma'inia do 'ia Lasarus 'a mauru mora moi, ma'ata 'ia Jisas 'a 'iraraa do'a mae'a.

¹⁴ Naasi magu 'unu ha'agorohia o'ani tanaraau, "Ia Lasarus 'a mae'a.

¹⁵ Me 'ini'amou, 'a goro do'au ai'a awa 'oha na mae, 'inia naani'a i madoraa goro tana'amou 'anai nugaai hinihinimoou beiau. Boi, magari 'ari 'omesia."

¹⁶ Mia Tomas, 'ia mo'o nara 'unua 'inia 'Iu, 'a o'ani 'iniraaui hakoi rongoiusuri, "Gau magari 'ari, magari mae ro'u beia Jisas."

¹⁷ Na'i 'oha na 'ia Jisas 'a ataha woui Betani, rau 'unua tanaa do'e hai dangi na hako'a murinai aoraa ada Lasarus na'i wabwa.

¹⁸ I Betani 'a ga'i 'onaai oru kilomita moi baaniai Jerusalem.

¹⁹ Ma naasi ra ragoi Jiu nara boi 'anai ada'imaie mara bonasiai ha'a-aro'i ahudaru'i a Meri mea Maata 'inia koadarua na mae.

²⁰ Na'i 'oha na 'ia Maata 'a 'iraraa do'ia Jisas 'a gaarangi ataha, 'a hura'a 'anai heisadoi beia. Na'i 'ohasi 'ia Meri 'a awa moi siri na'i ruma.

²¹ Mia Maata 'a o'ani 'inia Jisas, "Araha, 'onaa na'o ga'i bwane awa 'ini, ni koagua Lasarus 'a ga'i bwa'i mae.

²² Ma'ata rei'uaa na'i 'ohani, 'au 'iraraa do'ia God 'ai matai haua tana'o i taha na'oi ha'angonia 'inia."

²³ Mia Jisas 'a o'ani 'inia Maata, "Ia koamu 'ai suruta'e aho'i."

* **11:10** 11:9-10 Ni 'ado'ado 'anai dorasi, 'iia God 'a sigihiai madoraa na 'ia Jisas 'ai mae. Ma na'i 'oha na ai'a tari mau madoraasi, 'a bwa'i maho nai ha'ata'aia Jisas. 'A 'onaai nei na hahano na'i dangi na bwa'i maara, 'inia 'a bwa'i tora'i.

²⁴ Mia Maata 'a o'ani 'inia, “Io, 'au 'iraraa do'ai suruta'e aho'i beiraau nei narai suruta'e aho'i na'i ha'ahakonai dangi.”

²⁵ Mia Jisas 'a 'unua tanaa, 'a o'ani, “Inau naasi nei 'anai ha-suruta'eraau aho'i noni ma 'anai haa tanaraau i tahi tarau. 'Iatei nai hinihiniau, rei'uaa nai mae, 'iia 'ai tahi mau.

²⁶ Mia tei na tahi ma hinihiniau, 'ai dauai tahi tarau. 'O hinihiniai mareho nau 'unuasi Maata?”

²⁷ Mia Maata 'a o'ani 'inia Jisas, “Io Aaha, 'inau 'au hinihini do i'oe naasi Ha'atahi, 'i garena God nameu 'adoma'inia do'ai boi marewana.”

Jisas 'A Angi

²⁸ Naasi mia Maata 'a hano baania Jisas, ma aho'i 'ari beia Meri. 'A siriwou na'i ruma ma waia beira'i a Meri ma o'ani 'inia, “Na ha'ausuri 'a ada'a magu raba re'i'o.”

²⁹⁻³⁰ Na'i 'ohasi 'ia Jisas 'a awa mau bohura'a 'inia 'omaa na'i dora na 'ia Maata 'a heisadoi beia ei. Hoita, 'ia Meri 'a suruta'e raharaha moi ma hura'a 'anai 'ari heisadoi beia Jisas.

³¹ Na'i 'oha narau re'ia o'asi, 'iraau sae narau awa beia 'anai bonasiai ha'a-aroahuna, rau suruta'e ro'u marau suria hura'a, 'inia rau 'adoma'inia do 'ai 'ari hera 'anai angi na'iei.

³² 'Ia Meri 'a hura'a ma 'ari odo-odo na'i dora na 'ia Jisas 'a awa iei. Mana'i 'oha na 'omesia Jisas, 'a 'ariwou ma topiruru auru tanaa ma o'ani, “Aaha, 'onaa na'o ga'i bwane awa 'ini, ni koagua Lasarus 'a ga'i bwa'i mae!”

³³ Mia Jisas 'a re'iai 'omehana Meri 'oha na angiangi, miraaui ro'u i sae narau suria rau angi ro'u. 'Ia Jisas 'a ahutotou di'u, ma ta'aa tahingana,

³⁴ ma o'ani, “Na'i hei namou nugaa ieia Lasarus?”

Miraaui o'ani 'inia, “Aaha, gai 'ari ma'oi 'omesia.”

³⁵ Mia Jisas 'a angi.

³⁶ Miraaui nei narau ura gaarangi rau o'ani, “Moisu 'omesiai ta'ahia na haua.”

³⁷ Ma tara'i nei ra o'ani, “'Ia mo'osi 'a ha'a-'ome'omeai sae kuru. Ni 'uaana na ai'a boi 'inia 'anai ha'agorohia aho'i a Lasarus neina 'ai abui mae?”

Jisas 'A Ha'asuruta'ea Lasarus Baaniai Mae

³⁸ Mia Jisas 'a ataha na'i dora nara toringia iei abena Lasarus ma ahutotou di'u. Mana dorasi, 'e wabwa nara ha'abwarasiai maana 'inia hau.

³⁹ Mia Jisas 'a o'ani 'iniraaui, “Moi rahia baira'i hausi baaniai maanai wabwa.”

Mia Maata, asina mo'o na maesi, 'a ha'atee o'ani, “Aaha, 'ai si'ini ta'aa di'u'a, 'inia 'e hai dangi na hako'a murinai mae ana.”

⁴⁰ Mia Jisas 'a o'ani 'inia, “Nau bwane 'unua tana'o do'oi 'omesiai mena ana God, 'onaa na'oi hinihini!”

⁴¹ Naasi maraugu rahia baira'i hau baaniai maanai wabwa. Mia Jisas 'a wana ara'ai aro ma o'ani, “Ama, 'au ha'atee ha'agorohi'o 'ini rongoau amua.

⁴² Mau 'iraraa do 'ado 'oha 'o rongoau. Ma'ata 'iniraaui mwane inoni 'ini, nau ha'atee raha 'inia hura'a, marai hinihini do i'oe na'o ha'ataariau mai.”

⁴³ Mia Jisas 'agu totoro o'ani, “Lasarus, 'oi hura'a mai!”

⁴⁴ Mia Lasarus 'a hura'a mai bei'i mau i bwana ra ho'ua 'ini'i rima mana uwana'i mana bwana nara kukuhaia 'inia bwauna. Mia Jisas 'a o'ani 'iniraaui, “Moi rahi'i baania i bwana ra ho'ua 'ini'i maai hahano a'ora!”

'E Ha'aradorado 'Anai

*Ngahu Ha'amaesia Jisas**(Matiu 26:1-5; Mak 14:1-2; Luk 22:1-2)*

⁴⁵ 'A ragoi nei 'iniraau Jiu nara boi beia Meri narau hinihinia Jisas 'oha narau re'ia do 'a ha'a-suruta'ea Lasarus baaniai mae.

⁴⁶ Ma tara'i nei he'ete'i, rau 'ari ataha beiraau Farisei marau rangasia tanaraau taha na 'ia Jisas 'a haua.

⁴⁷ Miraau Na'otara adaa'i Piriisi, miraau Farisei rau soiraau goni ruruha adaa'u nara 'unua 'iniai Kansol 'anai hadanga'iniai marehosi. Rau songa'iniraau hairiu o'ani, "E taha nagai haua? Ra'i mwane ha'abu'ohu na bwane haa'i a mo'osi.

⁴⁸ Ma 'onaa nagai nugasia moi o'asi, mana mwane inoni hako rai suria. 'Aigu 'ariwou miraau bwauodo anai Gaumani anai Rom rai matai boi 'anai here ha'ata'aiai Ruma Maea ana God mana inoni agaa'i!"

⁴⁹⁻⁵⁰ Ma'e ta'i 'iniraau na atana 'ia Kaeafas 'a o'ani, "Oru bweu! Ai'a goro do rai urumota'iniraau hako noni. Nigasia mo'osi mai mae dingadaau hako." Na'i harisisi, 'ia Kaeafas na Na'ohadaau Piriisi.

⁵¹ 'Ia Kaeafas ai'a do 'a 'unuai marehosi suriai 'adoma'ina haaria. Na'i tatau'aro ana 'onaa Na'ohadaau Piriisi, 'ia God na tau'aro na'i 'adoma'ina 'anai ha'arangasia hura'a do'ia Jisas 'a ga'i mae dingadaau hako noni.

⁵² Mana ha'atee duruduru naasi, ai'a do'ia Jisas 'ai mae 'iniraau moi garenai Israel. Me 'ai mae ro'u 'iniraau nei ana'ia God nara awa 'adarara 'ari suriai marewana marai boi goni beiraau Jiu marai awa 'onaa ta'i ruruha.

⁵³ Taraawa'a na'i dangisi 'iraau saemaua adaa'i Jiu rau taraawa'a ha'aradorado 'anai ha'amaesia Jisas.

⁵⁴ Naasi suriai o'asi ana, 'ia Jisas 'a mamaro 'anai haai tau'aro ana beiraau Jiu ma hura'a baaniai Jerusalem. 'A hano beiraau rongoiusuri ana'i marau 'ari awa na'i Efrem, 'e 'omaa gaarangi'ae kae dora mangasara.

⁵⁵ Mana madoraa 'anai 'adoma'i aho'isiai Roho Aharau 'a gaarangi'a. Ra ragoi noni baani'i mwane 'omaa he'ete'i hairiu nara 'ari Jerusalem 'anai hauai ringe 'anai ha'a-arariraau na'i maana God maigui taraawa'a i rongosi.

⁵⁶ 'Iraau noni 'isi rau wanawana sibasiba 'inia Jisas. Ma na'i 'oha ra goni mai na'i Ruma Maea rau songa'i hairiu o'ani, "Mou 'adoma'i he'ua? Mou 'adoma'inia do 'a ga'i boi na'i 'oha nagai ha'ato'oa i Roho Aharau?"

⁵⁷ Rau 'unua o'asi suria 'iraau Na'ohadaa'i Piriisi, rau bwane 'unua tanaraau noni do 'onaa tanei 'iniraau nai 'ome sadoia Jisas, 'ai 'unua raurau tanaraau marai daua.

12*Meri 'A Ringisiai Rumu**Na'i Uwana'i a Jisas**(Matiu 26:6-13; Mak 14:3-9)*

¹ 'E ono dangi namau maraigui ha'ato'oai rongo 'anai 'adoma'i aho'isiai Roho Aharau. 'Ia Jisas 'a aho'i 'ari na'i Betani, i 'omaa na 'ia Lasarus na awaiei, 'ia mo'o na 'ia Jisas 'a ha'a-suruta'ea aho'i baaniai mae.

² Miraau ha'aagauai mahoingau tanaa Jisas na'isi, 'ia Maata naasi na 'a'au 'anai ha'atora'iniai mahoingau tanaraau. Mia Lasarus naasi ta'i 'iniraau nei narau heinagu na'i dora ngaungau.

³ Mia Meri 'a siri mai beiai gere bei na honu 'ini rumu na hori bwara di'u.* 'A ringisia na'i uwana'i a Jisas 'anai ha'ahoua, magu ha'amaha'i 'inia warihuna. Mana si'inihanai rumusi 'a adaahusia hako i rumasi.

⁴ Mia Jiudas Iskariot, 'e ta'i 'iniraaui rongoiusuri ana'i na awa ro'u 'isi. 'Ia Jiudas naasia mo'o nai usuha'inia Jisas tanaraau maerongana. Mia Jiudas 'a ha'atee o'ani,

⁵ “‘Ei, 'a ga'i raonga'iniai rumusi, mana ha'a 'ana 'a ga'i 'a'auhiraau 'iniai pohara. Na rumusi ra ga'i horia 'iniai oru 'arangi korai ha'a.”†

⁶ Rei'uaa na ha'atee o'asi a Jiudas, ai'a do'a huunai ta'aabena 'iniraaui pohara, me suria 'iia 'e sae beri. 'Iia naasi na 'omesuriai ha'a adaui rongoiusuri, magu tara'i 'oha 'a rahi ha'a moi nana haaria.

⁷ Mia Jisas 'agu ha'atee o'ani, “Nigaa! 'Ia Meri 'a haua o'asi 'anai ha'aagauau 'anai 'oha narai toringiau.

⁸ 'Iraui nei pohara rai awa tarau moi bei'amou. 'Inau na bwa'i.”

⁹ Na'i 'oha na 'iraaui noni rau 'iraraa do'ia Jisas 'a ataha, rau goni hako mai 'anai 'omesia, ma 'anai 'omesia ro'ua Lasarus, mo'o na 'ia Jisas 'a ha-suruta'ea aho'i baaniai mae.

¹⁰⁻¹¹ Na'i 'ohasi 'a ragoi Jiu naraugu ai'a raba suriraau'a i Na'ohadaa'i Piriisi marau hinihinia Jisas 'iniai maho na to'o beia Lasarus. Naasi miraaui Na'ohadaa'i Piriisi rau hauai ha'aradorado 'anai ha'amaesia ro'ua Lasarus.

Jisas 'A Ha'ata'inia Do 'Tia Na Mwaeraha
(Matiu 21:1-11; Mak 11:1-11; Luk 19:28-40)

¹² Mana'i nata dangi, 'iraaui noni nara boi 'anai ha'ato'oai Roho Aharau na'i Jerusalem rau rongoa do'ia Jisas 'a boi'a 'anai Jerusalem.

¹³ Naasi rau hano marau haa'i hahaa' niu, marau 'ari suri tara 'anai heisadoi beia Jisas. Na'i 'oha narau 'ariwou suri tara, rau tooro o'ani, “Ha'aasaa God!

Araha God, 'oi ha'agorohia mo'o na'o ha'ataaria mai!

'Oi ha'agorohiai mwaeraha ameeui Israel!”‡

¹⁴ Jisas 'a hauai dongki ma heinagu na'i hungana, 'a 'onaai taha na Ususu Maea na 'unua na o'ani,

¹⁵ “Mou abui maaa'u i noni nai Jerusalem.§

'Ome, na mwaeraha amoou 'a ta'e mai

na'i hunganai garei dongki.”*

¹⁶ Na'i 'ohasi 'iraaui rongoiusuri ana'i rau ai'a aidangisia do ni mareho 'isi ra'i mareho na 'iraaui rarabea rau bwane 'unu'i na'i Ususu Maea. Mana'i 'oha na 'ia Jisas 'a suruta'ea aho'i ma ara'ai aro, naraugu aidangisia doni mareho nara usu'i dio na'i Ususu Maea ra to'o ha'a-momori.

¹⁷ 'Iraui nei narau 'omesia Jisas 'oha na ha'a-suruta'ea Lasarus baaniai mae, rau taroha'inia ro'u tanaraau tara'i noni.

¹⁸ Ma ragoi noni narau 'ariwou 'anai heisadoi beia Jisas 'iniai rongoa ada i ha'abu'oahu na hauasi.

¹⁹ Miraaui Farisei raugu ha'atee o'ani hairiu, “‘Ome, gau heho'a! 'A bwa'i maho na gaigui haua. 'Inia 'a 'ome 'onaa doni mwane inoni hako rau suria'a!”

Jisas 'A Hadanga'iniai Mae Nai Haa

²⁰ Ma tara'i ai Grik narau boi 'anai ha'ato'oai Roho Aharau na'i Jerusalem,

* 12:3 12:3 Ni beisi, 'e ta'i abai lita na awai raron. † 12:5 12:5 Oru 'arangi korai ha'a 'a ta'isada beiai horihorinai ta'i sae na tagora suriai ta'i harisi. ‡ 12:13 12:13 Psalm 118:25-26 § 12:15 12:15 Na'i ha'ateeni Grik ra usuai Saeon, ai'a Jerusalem. Ma'ata raru ta'isada moi. * 12:15 12:15 Sakaraea 9:9

²¹ rau 'ari ataha beia Pilip, 'e rongoiusuri na boi baania 'omaai Betsaeda na'i Galili. Rau o'ani 'inia, "Saemaua, meu raba 'omesia Jisas."

²² Mia Pilip 'a 'unua tanaa Andru mararu 'ari 'anai 'unua tanaa Jisas.

²³ Na'i 'oha nararu 'unua tanaa, 'ia Jisas 'a ha'atee o'ani, "'Ohani 'a tari'a i madoraa 'anai Garei Inoni 'anai mae, neina 'ai ara'ai aro 'anai ha'ahoua.

²⁴ Ha'amomori, wai 'unua ha'a-momori tana'amou, ni korai wiit 'ai ahoda aurui ano maai mae ma'ata'a, ma ta wiit haoru nai raboa ara'a maigui haa'i mwane kora haoru. Ma 'onaa na bwa'i mae, na korai wiitisi 'ai tara tata'isada moi.

²⁵ 'Iatei nai ta'ahia di'u haariai tahingana na'i marewanani, 'ai ha'a-ai'aai huunai tahi. Mia mo'o na ai'a ta'ahia di'ui tahingana na'i marewanani, 'ai daua nana haariai tahi na bwa'i hako.

²⁶ 'Iatei na raba ha'i noni tatau'aro agua, 'ai boi suriau, 'inia na inoni tatau'aro agua 'ai awa tarau na'i dora na 'inau wai awaiei. Ma 'onaa narai suriau, 'ia Amagu 'ai ha'ahouraa."

²⁷ Maagu o'ani ro'u, "Na 'adoma'igu 'a ha'a-arungata'aiau di'u. Wai 'ua? Wai ha'arahesi o'ani gasi? 'Ama, 'oi abui watea dowai rongomaata'i o'asi!' Ma'ata naasi taranai taha nau boi 'inia!

²⁸ Wai ha'arahesi o'ani. 'Ama, 'oi hauai taha narai ha'aasaa 'inia i atamu.'"

Ma'e ringe na ao dio mai baaniai aro, 'a o'ani, "'Au bwane hauai taha narai ha'aasaa 'inia i atagu, mawai haua ro'u mau."

²⁹ Na'i 'oha 'iraau noni rau rongoai ringe, tara'i nei rau 'adoma'inia do'e hita, ma tara'i nei rau 'unua hura'a do'e enjel na ha'atee tanaa.

³⁰ Mia Jisas 'agu o'ani 'iniraa, "Na ringe nagau rongoa, ai'a do 'anai 'a'auhia, me 'anai 'a'auhi'amou 'anai hinihiniau.

³¹ Na'i 'ohani 'ia God 'ai hiiriraa hako noni nai marewana, mai ha'ahoea Saetan na marungiai marewanani.

³² Mana'i 'oha narai nugaa ara'a, wai taragoni'i mwane inoni hako tanaa."

³³ 'A ha'atee o'asi 'anai ha'a-aidangisiraa 'inia here narai ha'amaesia 'inia na'i dadaahoro.

³⁴ Miraau noni rau o'ani, "'Iameu meu 'omesia na'i Usu-usu Maea doni Ha'atahi 'a bwa'i mae. Ni 'uaana na'o 'unua 'inia dorai nugaa ara'ai Garei Inoni? 'Iatei Garei Inoni na'o hadanga'iniasi?"

³⁵ Mia Jisas 'a o'ani 'iniraa, "Ni bewaa 'ai awa bei'amou ta gere madoraa moi. Naasi moi hahano na'iei na'i 'oha na awa mau bei'amou, neina mou bwa'i suapou, mana kuhi 'a bwa'i kuhisi'amou. 'Inia 'onaa namoi awa na'i kuhi, mou bwa'i aidangisiai dora namou hahano 'ana.

³⁶ Moi hinihiniai bewaa na'i madoraa na awa mau bei'amou, naasi mamoi'gui ha'i gare ni bewaa." Na'i 'oha na ha'atee o'asi hako tanaraa, 'ia Jisas 'a hano ma awa baira'i baaniraa.

'Iraau Jiu Rau Ai'a Hinihinia Jisas

³⁷ Ma rei'uaa na 'ia Jisas 'a hau'i mwane ha'abu'oahu na'i maadaui noni, me 'a ragoi nei narau ai'a hinihinia ro'u mau.

³⁸ Ma naasi taha na 'ia Rarabea Aisaea 'a bwane 'unua do'ai to'o. 'A o'ani, "Araha God, 'e taringai sae moi nara hinihiniai taroha nameu maania. Ma ai'a ragoi nei nara 'ome 'iraraai mena amua na'o ha'ata'inia!"†

³⁹ Mana taranai taha narau ai'a hinihini 'inia, 'ia Aisaea 'a 'unua hura'a o'ani,

⁴⁰ "'Ia Araha God 'a ha'akuru'i maadaa'i, ma ha'ababau'i 'adoma'idaa'i.

† 12:38 12:38 Aisaea 53:1

'Onaa 'a ga'i bwa'i o'asi, rau ga'i 'ome 'irara'i mareho 'ini'i maadaa'i,
 marau ga'i aidangisi'i mareho 'ini'i 'adoma'idaa'i,
 marau ga'i rihota'i tanaau
 mawai ha'agorohiraau baaniai taha na to'iraau."‡

41 Na ha'atee duruduru na 'ia Aisaea na hauasi, 'a haua 'abaiai Ha'atahi,
 'inia 'ia Aisaea 'a 'omesia na'i na'o i ha'ahou na 'ia Jisas 'ai daua 'oha nai
 tahi aho'i baaniai mae.

42 Hoita, rei'uaa rau ragoi nei narau ai'a hinihinia Jisas, me rau rago
 ro'u i nei narau hinihinia. Tara'i saemaua adaa'i Jiu rau hinihinia ro'u,
 maraugu ai'a ha'arangasia hura'a 'iniaai mamaa'usiraau ada i Farisei, dora
 gasigu ha'a-aburaau 'anai siri suri'i rumani ha'arahesi 'anai rihunga'i.

43 Rau ta'ahia di'u i ha'atee ha'a-ta'eta'e baaniraau noni, marau ai'a
 ta'ahiai ha'atee ha'a-ta'eta'e baania God.

44 Mia Jisas 'a totoro o'ani tanaraau noni, "'Onaa namou hinihiniau, mou
 ai'a hinihiniau moi, memou hinihinia ro'ua God na ha'ataariau mai.

45 Na'i 'oha namou re'iau, 'i'amou re'ia ro'u a mo'o na ha'ataariau mai.

46 'Inau 'au boi 'onaai raita na marewa na'i marewanani, neina 'iraau
 nei ra hinihiniau rai abui taraa awa-awa na'i kuhi.

47 'Onaa 'iatei na rongo'i ha'atee agu'i ma bwa'i ha'isuri'i, 'inau 'au bwa'i
 hiiria. 'Inia 'inau ai'a boi 'anai hiirirai noni nai marewana me 'au boi 'anai
 ha'atahiraau.

48 Me 'iraau nei nara 'itaau bei'i ha'atee agu'i, ni ha'a-momori nara haa'i
 ha'atee agu'i naasi narai hiiriraau na'i ha'ahakonai dangi.

49 Na mareho na 'inau 'au maani'i, ai'a do ra'i 'ado'adogu haariau, me ra'i
 ha'ausuringa'i baania mo'o na ha'ataariau 'anai 'unu'i tana'amou.

50 Mau 'iraraa doni ha'ausuringa'i ana'i rai wai'amou 'anai tahi tarau.
 Naasi, nau maani'i moi mwane mareho na 'ia Amagu na 'unu'i tanaau
 'anai maani'i."

13

Jisas 'A Wasi'i Uwadaa'i Rongoiusuri

1 Na'i na'o magu to'o i rongo 'anai 'adoma'i aho'isiai Roho Aharau, 'ia Jisas
 'a 'iraraa do madoraa ana 'a gaarangi 'anai hano baaniai marewanani 'anai
 aho'i 'ari beia Amana. Mana heita'ahi ana tanaraau nei narau suria na'i
 marewanani, 'a 'ari tari na'i mae ana.*

2 Ma tari madoraa 'anai ngau su'urahi. Na'i 'ohasi 'ia Saetan 'a bwane
 tau'aro na'i 'ado'adona Jjudas, garena Saemon Iskariot, 'anai ha'ato'oi
 'ado'adona 'anai usuha'inia Jisas tanaraau maerongana.

3 'Ia Jisas 'a 'iraraa do ni Ama 'a hau'i hako tanaai mena 'anai marungi'i
 mwane mareho hako, ma 'iraraa do'iaa 'a boi baania God, ma'ai aho'i ro'u
 'ari beia God.

4 Naasi mia Jisas 'a ura ara'a na'i 'oha narau ngau ma rahiai to'oni
 bohura'a ana. 'A daai mamango ma hiri'ia na'i wa'ana.

5 Naasi ma ringisiai wai auru na'i raronai rabo'o magu taraawa'a dori'i
 uwadaa'i rongoiusuri ana'i, ma ha'amamaha 'iniaai mamango na hiri'ia na'i
 wa'ana.

6 Na'i 'oha na tari mai beia Saemon Pita, 'ia Pita 'a o'ani 'inia, "Araha, ni
 'uaana na'oigui dori'i 'iniaai uwagu?"

7 Mia Jisas 'a o'ani 'inia, "Na'i 'ohani 'o ai'a aidangisia mau taranai taha
 naugu haa o'asi 'inia, ma'ata ta 'oha 'oigui aidangisia mau."

‡ 12:40 12:40 Aisaea 6:10 * 13:1 13:1 'E nata herehere 'anai orisiai tatarani 'a o'ani. "Taraawa'a
 mau mai, 'ia Jisas 'a ta'ahiraau nei narau suria na'i marewanani. Ma na'i 'ohani, 'a ha'ata'inia
 tanaraau raha na haua i heita'ahi ana tanaraau."

8 Mia Pita 'agu ha'atee ha'abwarasia o'ani, "Ai'a, 'inau 'o bwa'i dori'i uwagu!"

Mia Jisas 'a o'ani 'inia, "'Onaa 'au bwa'i dori'i uwamu, i'oe ai'a ta'i 'iniraaui noni agu'i."

9 Mia Saemon Pita 'a o'ani, "Araha, na'oi abui dori'i moi uwagu'i, 'oi dori'i ro'u i rimagu, mana bwaugu ro'u."

10 Mia Jisas 'agu o'ani 'inia, "'Ia mo'o na bwane mwa'anuu wadiwadi'a, ai'a ta'isada do'aigu'i mwa'anuu aho'i ro'u, ma'ata ni uwana'i moi naigu dori'i. 'T'amou mou wadiwadi, ma ai'a do 'i'amou hako."

11 'A ha'atee o'asi, suria 'a 'iraraa do'e ta'i 'iniraaui nai usuha'inia tanaraaui maerongana. Naasi tarana'i taha na o'ani 'inia, "Ai'a do 'i'amou hako namou wadiwadi."

12 Na'i 'oha na wasi'i hako'i uwadaa'i, 'a siri aho'i na'i to'oni ana ma heinagu auru, magu songa'iniraaui o'ani, "Mou aidangisiai mareho nau hauasi?"

13-14 'T'amou mou 'unuau 'inia'i ha'ausuri mana Araha. Ma ha'a-momori, 'inia 'inau naasi Araha mana ha'ausuri amou. Tarana naasi, 'i'amou moi wasi'i hairiu i uwamoo'i haari'amou, suria 'inau 'au wasi'i uwamoo'i.

15 'Inau 'au ha'ata'inia tana'amou'i heiha'auu 'anai suria. Moi haua 'onaa haua aqua tana'amou.

16 Wai 'unua ha'a-momori tana'amou, 'a bwa'i sae tatau'aro do'ai ororiu di'uai bwauodo ana, ma bwa'i sae heheitaro'ha'i nai ororiu di'ua mo'o na ha'ataaria hura'a.

17 Na mareho 'isi mou bwane aidangisi'i hako. Naasi 'ia God 'ai ha'agorohi'amou 'onaa namoi ha'isuri'i.

18 "Na mareho nau 'unu'i 'isi, ai'a do'au hadanga'ini'amou hako. 'Inau 'au aidangisi'amou'i nei nau 'ome sigihi'amou. Na Usu-usu Maea 'a ha'arangasia hura'a o'ani, 'Na nei na ngau hasura'i beiau, 'iia nagu ha'ima'e beiau.'†

19 'Inau 'au 'unua agau tana'amou do neina 'oha nai to'o, moigu 'iraraa do 'inau naasi Ha'atahi.

20 'Inau wai 'unua ha'a-momori tana'amou, 'iatei na ha'amaotora'ui noni heheitaro'ha'i agu'i, 'a ha'amaotoau ro'u. Ma 'onaa 'iatei na ha'amaotoau, 'iia 'a ha'amaotoa ro'u a mo'o na ha'ataariau mai."

Jisas 'A Ha'arangasia Hura'a Do 'Ia Jiudas

'Ai Usuha'inia Tanaraaui Maerongana

(Matiu 26:20-25; Mak 14:17-21; Luk 22:21-23)

21 'Ia Jisas 'a ha'atee o'asi, mana 'adoma'ina 'a ha'a-arungata'aia di'ua ma ha'atee hura'a o'ani, "'Inau wai 'unua ha'a-momori tana'amou, 'e ta'i 'ini'amou nai usuha'iniau tanaraaui maerongagu!"

22 Mira'ui rongoiusuri rau wanasiraaui hairiu marau 'ado'ado sibasiba 'inia tei 'iniraaui gasi na 'ia Jisas na 'unuasi.

23 Ma'e ta'i 'iniraaui rongoiusuri na 'ia Jisas 'a ta'ahia di'u.‡ Mana rongoiusurisi 'a heinagu na'i bobona Jisas na'i dora ngaungau.

24 Mia Saemon Pita 'a hauai ha'ara 'inia'i rimana tanaai rongoiusurisi do'ai songa'inia Jisas 'inia tei nai hauai heresi.

25 Mana rongoiusurisi 'a abesua wou beia Jisas ma o'ani 'inia, "Araha, 'iatei nai hauai heresi?"

26 Mia Jisas 'a aramia o'ani, "'Ia mo'o na wai haua tanaai dorai bre'di nawai toha'inia dio na'i rabo'o, naasia mo'o nai usuha'iniau tanaraaui

† 13:18 13:18 Psalm 41:9 ‡ 13:23 13:23 Na'i Jon 21:24 'a 'unua do ni rongoiusuri na 'ia Jisas na ta'ahia di'u, naasi a mo'o na usuai bukani, ma rago i nei ra 'unua do 'iia naasi St. Jon.

maerongagu.” Mia Jisas 'a dauai dorai breidi ma toha'inia dio na'i rabo'o, magu huaa tanaa Jiudas garena Saemon Iskariot.

²⁷ Na'i 'oha na 'ia Jiudas 'agu dauai bredisi, 'ia Saetan 'a rabe'a beia. Mia Jisas 'a o'ani 'inia, “Oi raurau beiai taha na'o 'adoma'iniasi.”

²⁸ Na'i 'oha na 'unua o'asi, ai'a ta ta'i 'iniraau nei narau awa 'isi nai 'iraraai tarana'i taha nagu ha'atee o'asi 'inia tanaa Jiudas.

²⁹ Tara'i nei 'iniraau rau 'adoma'inia do'ia Jisas 'a 'unua tanaa Jiudas 'anai 'ari hori'i ro'u tara'i mahoi'ingau, ma'ua 'anai ha'i ha'a tanaraau pohara. 'Inia 'ia Jiudas naasi na 'omesuriai ha'a adaau.

³⁰ Na'i 'oha na ngaua hako'i breidi, 'ia Jiudas 'a hasi suruta'e ma hura'a baaniraau. 'Ohasi 'a rodo'a.

Ha'atora Haoru

³¹ Murina moi hura'a na haa Jiudas baaniraau, 'ia Jisas 'a o'ani 'iniraau, “Naasi 'a tari'a i madoraa narai ha'ahauasaa 'i Gare'i Inoni, mia God rai ha'ahauasaa 'ini'i mwane mareho nara to'o tanaau.

³² Ma na'i 'oha narai ha'ahauasaa God 'iniai garena, 'ia God 'a bwa'i mamasi orea 'anai ha'ahauasaa o'asi ro'u i garena.”

³³ Magu o'ani ro'u 'iniraau, “Arai garegu, 'inau bwa'i awa orea bei'amou. Moi sibaniau mamou bwa'i to'oagu. 'Onaai bwane 'unua agua tanaraau Jiu, mawai 'unua tana'amou ro'u. Na dora nawai 'ariei, mou bwa'i matai taha na'iei.

³⁴ Naasi 'au huaa tana'amou i ha'atora haoru. Moi ta'ahi'amou hairiu. 'Onaai ta'ahi'amou agua, 'i'amou mou ga'i ta'ahi'amou hairiu o'asi ro'u.

³⁵ Na heita'ahi namou huaa tana'amou hairiu, 'ai ha'ata'inia tanaraau mwane inoni nai marewana hako do 'i'amou ra'i rongoiusuri agu'i.”

Jisas 'A 'Unua Tanaa Pita Do 'Ai Tohea

(Matiu 26:31-35; Mak 14:27-31; Luk 22:31-34)

³⁶ 'Ia Saemon Pita 'a songa'inia Jisas o'ani, “Araha, na'i hei na'oi 'ariei?”

Mia Jisas 'a aramia o'ani, “Na'i 'ohani 'o bwa'i matai suriau na'i dora na 'inau wai 'ari na'iei, ma'ata 'oigui haisuri mau na'i muri.”

³⁷ Mia Pita 'a ha'atee o'ani, “Ni 'uaana na'o 'unua 'inia do'au bwa'i suri'o 'ohani? 'Inau 'au ha'aagau 'ohani 'anai mae taramu!”

³⁸ Mia Jisas 'a o'ani 'inia, “Nii? 'Oi mae mora taragu? Wai 'unua ha'a-momori tana'o, na kua 'a bwa'i tataraoke mau na'i de'eni wa'aria mi'oe 'oi bwane tohe ha'a-oru do'o ai'a 'iraraau.”

14

Jisas Na Tara 'Anai Ama

¹ Mia Jisas 'a o'ani ro'u, “Mou abui ahutotou mai abui ta'aabemoou, ma'ata moi 'u'uria God, mamoi 'u'uriau.

² Na'i raronai ruma ana Amagu ra ragoi ahii, minau wai 'ari 'anai ha'aagau'i dora taramoou. 'Onaa na ga'i bwa'i o'asi, 'au ga'i bwa'i 'unua o'asi tana'amou.

³ Na'i 'oha na mwane mareho rai agau, 'inau wai boi 'anai wai'amou 'ari neina moi awa tarau beiau na'i dora na 'inau awaiei.

⁴ 'I'amou 'iraraai dora na 'inau wai 'ari na'iei, mana tara he'ua namou ga'i ataha 'inia na'iei.”

⁵ Mia Tomas 'a o'ani, “Ai'a Araha, 'i'ameu ai'a aidangisiai dora na'oi 'ariei! 'Ai he'uaigu 'iraraa ameeui tara?”

⁶ Mia Jisas 'a o'ani, “'Inau na tara, 'i ha'a-momori, mana tahi. 'A bwa'i nei nai taha beiai Ama 'onaa na bwa'i suriau.

7 Tari 'ohani, mou ai'a aidangisia Amagu, 'inia mou ai'a huunai aidangisiau. Me taraawa'a na'i 'ohani ma 'ari'a, mou aidangisia mamou 'omesia'a."

8 Mia Pilip 'a o'ani 'inia, "Araha, 'oi ha'ata'inia tana'ameu i Ama, maigu aro i ahumee'i."

9 Mia Jisas 'a o'ani, "Pilip, 'inau 'au awa ore'a'a bei'amou, ma'o ai'a aidangisiau mau? 'Iatei na 'omesiau, 'iia 'a 'omesiai Ama! Hoita, ni 'uaana na'o 'unua 'inia do wai ha'ata'inia tana'amou?"

10 Ma 'ua Pilip? 'O ai'a hinihini do 'inau mia Amagu 'e ta'i? Taha nau maani'i tana'amou, ai'a do ra'i 'ado'adogu haariau, ma'ata ra'i 'adoma'ina'i a Amagu na awa beiau.

11 Mou ga'i hinihiniau na'i 'oha nau 'unua do 'inau 'e ta'i be'inia Ama, mia Ama 'e ta'i beiau. 'Onaa bwa'i, mamoi hinihini 'ini'i mareho nau haa'i.

12 Wai 'unua ha'a-momori tana'amou, na nei na hinihiniau, 'ai matai hau'i mareho na 'inau haa'i, maai matai haa'i maho raha di'u'i ro'u wou, 'inia 'inau wai 'ari 'anai awa beia Ama.

13 'Iniai suriau amou, 'inau wai 'a'auhi'amou 'anai haua ta mareho namoi ha'anongia, neina 'iraau noni rai ha'ahauasaa Ama 'iniai tatau'aro anai garena.

14 Ha'amomori, 'iniai suriau amou, 'inau wai 'a'auhi'amou 'anai haua ta mareho namoi ha'anongia."

Jisas 'A Duruduru 'Iniai Hi'ona Maea

15 "'Onaa mou ta'ahiau, mamoi araisuri'i ha'atora agu'i.

16 Minau wai ha'anongia Ama mai haua tana'amou ta hei'a'auhi nai awa tarau bei'amou.

17 'Ia naasi Hi'ona Maea, 'ia mo'o na ha'ata'ini'i hura'ai mwane mareho ha'a-momori. 'Iraau nei nara ai'a hinihiniau rau bwa'i dauai Hi'ona Maea, suria rau ai'a 'ome 'iraraa marau ai'a aidangisia. Mi'amou mou aidangisia. 'Ohani, 'iia 'a awa'a bei'amou, ma 'ai mono na'i raromou tarau.

18 "'Inau bwa'i nugasi'amou mamoi awa 'onaai gare a'osi, 'inia 'inau wai 'ari mawai aho'i ro'u mau mai bei'amou.

19 'A bwa'i ore'a miraui nei narau ai'a hinihiniau ra bwa'i 'omesiau'a, ma'ata 'i'amou moi 'omesiau, suria 'inau wai tahi aho'i. Mi'amou moi tahi aho'i ro'u.

20 Na'i 'oha nawai suruta'e aho'i baaniai mae, namoigui 'iraraa do 'inau 'e ta'i be'inia Ama. Mamoigui 'iraraa ro'u do 'inau 'e ta'i bei'amou, mi'amou ta'i beiau.

21 "'Iraui nei narau ha'isuri'i ha'atora agu'i, naasi narau ta'ahiau, ma suria rau ta'ahiau, 'ia Amagu 'ai ta'ahiraau ro'u. 'Inau wai ta'ahiraau, mawai ha'a-aidangisiraau 'inau."

22 Mia Jiudas, ai'a Jiudas Iskariot, ma'ata 'i nata Jiudas 'a o'ani, "Araha, ni 'uaana na 'i'ameu moi na 'oi ha'a-aidangisi'ameu 'ini'o, ma bwa'i tanaraui noni nai marewana hako?"

23 Mia Jisas 'a o'ani, "'Iatei na ta'ahiau, 'ai araisuri'i ha'atee agu'i. Mia Amagu 'ai ta'ahia, me 'imiria miri boi 'anai awa beia.

24 Miraui nei narau ai'a ta'ahiau, rau bwa'i raba araisuri'i ha'atee agu'i. Mamoi 'iraraa do ni mareho nau 'unu'i ai'a ha'atee agu'i haariau. Ni mareho nau maani'i ra boi baania Ama na ha'ataariau mai.

25 "Nau 'unu'i tana'amou mareho 'isi na'i 'oha nau awa mau bei'amou.

26 Ma'ata na'i 'oha nawai hano baani'amou, ni Hei'a'auhi 'ai boi 'anai ha'a-aidangisi'amou 'ini'i mwane maho, mai ha'a 'adoma'i aho'isi'amou tarau 'ini'i taha nau 'unu'i tana'amou. Mana Hei'a'auhisi naasi 'i Hi'ona Maea na 'ia Amagu 'ai ha'ataaria mai 'anai ura 'inau.

27 'Ai abui ta'aabemoou ma'ua moi abu mamaa'u. 'Inia 'inau wai ha'apapaku'i 'adoma'imoo'i nara torako. 'Iraui noni nai marewana ra bwa'i matai ha'apapaku'i o'asi 'adoma'imoo'i.

28 Moi 'adoma'i aho'isiai taha nau 'unua tana'amou do 'inau wai 'ari baani'amou, ma'ata wai aho'i ro'u mau mai bei'amou. 'Onaa namou huunai ta'ahiau mou ga'i wa'ewa'e 'inia hano nawai haua 'ari beia Ama, 'inia 'ia 'a ororiu di'u ro'u baaniau.

29 'Inau 'unu'i agau tana'amou i mareho 'isi, do nei namoi hinihini na'i 'oha narai to'o.

30 'Augu ai'a to'oraa'a ro'u ta madoraa tewa 'anai 'unu'i tara'i mareho ro'u tana'amou, 'inia na mwaeraha ta'aa anai marewanani 'a gaarangi'a. 'Ia ai'a to'o mena 'anai marungiau,

31 ma'ata 'inau wai hauai mareho na 'ia Amagu 'a 'irisia dowai haua, miraaui noni rai aidangisia do 'inau 'au ta'ahia. Hoita, moi suruta'e magai hano."

15

Jisas Na Huunai Abe Odonai Hasi'ei

1 Mia Jisas 'a ha'atee o'ani ro'u tanaraui rongoiusuri ana'i, "'Inau naasi huunai abe odonai hasi'ei nara 'unua 'inia grep, me 'ia Amagu naasi na odora'iniai mou.

2 'Ia 'a ruhuusi'i raraa nara ai'a hungu ma taapuru orima'ini'i raraa nara matai hungu marai hungu goro ro'u wou.

3 'T'amou, ni tahingamoo'i ra wadiwadi hako'a 'iniai dau'i amou i ha'atee agu'i.

4 Moi hasi tarau beiau, minau wai hasi tarau bei'amou. 'Inia na raraai hasi'ei 'a bwa'i matai hungu haaria 'onaa na bwa'i hasi wou na'i abe odo. 'A matai hungu moi 'oha na hasi wou na'i abena. Hoita, 'i'amou bwa'i matai hungu ro'u 'onaa namou bwa'i hasi mai beiau.

5 "'Io, 'inau naasi abe odonai hasi'ei, me 'i'amou naasi raraa. 'Iatei na hasi beiau minau hasi beia, 'ai hungu rago goro. 'Inia 'a bwa'i maho namoi matai haua ta'inau.

6 'Onaa 'iatei na ai'a hasi beiau, 'ia 'a 'onaai raraa nara taba gata'inia ma maria'a. 'Inia na raraa o'asi, rai gaasi goni'i na'i robo 'anai suu gata'ini'i.

7 Ma 'onaa na'oi hasi tarau beiau, mana ha'atee agu'i rai awa tarau bei'o, 'ia God 'a matai haua tana'o ta maho na i'oe 'oi ha'anongia.

8 'Onaa moi hungu goro, rai ha'ahauasaa i Amagu marai aidangisia do 'i'amou ra'i huudi rongoiusuri agu'i.

9 "'Inau 'au ta'ahi'amou 'onaai ta'ahiau na haa Amagu. Naasi moi hasi tarau beiau neina moi awa tarau na'i heita'ahi agua.

10 'Inau 'au araisuri'i ha'atora ana'ia Amagu, mana heita'ahi ana 'a awa tarau beiau. 'A o'asi ro'u, 'onaa namoi araisuri'i ha'atora agu'i, na heita'ahi agua 'ai awa tarau ro'u bei'amou.

11 "'Inau 'au 'unua o'asi tana'amou, do neina moi honu 'iniai wa'ewa'e 'onaai, mana wa'ewa'e amou 'ai honu aharau.

12 Naani ha'atora agua tana'amou—moi ta'ahi'amou hairiu 'onaai ta'ahi'amou agua.

13 'Oha na 'e sae na mae dingadi geresae ana'i, ai'a ta here'a ro'u naigui goro di'uai heresi 'anai ha'ata'iniai heita'ahi ana tanaraui!

14 'T'amou ra'i geresae agu'i 'onaa namoi araisuri'i ha'atora agu'i.

15 'Ohani 'au bwa'i 'unu noni tatau'aro agu'i 'ini'amou. 'Inia na bwauodo 'a bwa'i ha'a-aidangisiraui noni tatau'aro ana'i 'ini'i mwani mareho na

haa'i. Naasi 'inau wai 'unu'amou 'ini'i geresae agu'i, 'inia ni mareho na 'ia Amagu 'a 'unu'i tanaau, 'au ha'a-aidangisi'amou hako 'ini'i.

¹⁶ 'T'amou ai'a 'ome sigihiau. 'Inau nau 'ome sigihi'amou, mau haua tana'amou i tau'aro domoi hura'a 'anai hungu 'ini'i hua narai awa tarau. Naasi 'ia Amagu 'aigui haua tana'amoui taha namoi ha'anongia, 'inia suriau amoou.

¹⁷ Naani ha'atora agua tana'amou—moi ta'ahi'amou hairiu.”

Jisas 'A Ha'abasuraui Rongoiusuri Ana'i

¹⁸ “Onaa 'iraaui nei narau ai'a hinihiniau ra 'utai'amou, moi 'iraraa do 'inau naasi nara 'utai'au na'i na'o maragu 'utai'amou ro'u na'i muri.

¹⁹ 'Onaa namoi awa moi 'onaairaausi, rau ga'i ta'ahi'amou, magu ai'a. 'Inau 'au sigihi'amou 'anai sigi baaniraaui, neina moi abui awa 'onaairaaui. Naasi tarana narau 'utai'amou 'inia.

²⁰ Moi aidangisiai taha nau bwane 'unua tana'amou. Na inoni tatau'aro 'a ai'a ororiu di'uai bwauodo ana. Naasi 'onaa namou 'iraraa do ra no-rata'iaui, 'ai o'asi ro'u tana'amou. Ma 'onaa nara araisuri'i ha'ausuringa'i agu'i, 'ai o'asi ro'u tana'amou!

²¹ 'Iraaui nei narau ai'a hinihiniau rai haua o'asi, suria 'i'amou ra'i noni agu'i, miraaui ai'a aidangisia God na ha'ataariaui mai.

²² 'Onaa nau ga'i bwa'i boi 'anai hadahada tanaraau ani, 'iraaui rau ga'i bwa'i arunga 'ino'a na'i maana God 'iniaui 'utai'au narau haa. Me na'i 'ohani rau 'utai'au'a, maigu bwara tanaraau 'anai 'unua do rau ai'a taritari'a.

²³ 'Iatei na 'utai'au, 'iia 'a 'utaia ro'ua Amagu.

²⁴ 'Onaa nau ga'i bwa'i hau'i ha'abu'oahu na ai'a tanei'a ro'u nai haa'i, rau ga'i bwa'i arunga 'ino'a ro'u. Me na'i 'ohani, rei'uaa narau 'omesi'i ha'abu'oahu nau hau'i, miraaui 'utaimiria moe'a mau i Amagu.

²⁵ Ma'ata 'a o'asi do neina 'ai to'o ha'a-momori Usu-usu Maea na o'ani, 'Ra to'o 'utai'au moi.’*

²⁶ 'Inau wai ha'ataaria mai hei'a'auhi baaniai Ama. 'Iia naasi Hi'ona Maea, 'ia mo'o na ha'ata'ini'i hura'ai mwane mareho ha'a-momori. Mana'i 'oha nai boi, 'ai 'unu'i tana'amou i mwane mareho 'iniaui.

²⁷ Mi'amou moigui hura'a 'anai taroha'iniaui ro'u tanaraaui noni, 'inia 'i'amou namou awa mau mai beiau 'oha nau taraawa'a hauai tatau'aro agua tari mau na'i 'ohani.”

16

¹ “'Inau 'au 'unu'i mareho 'isi tana'amou, do neina 'i'amou moi abui 'adoma'i wanusi 'iniaui na'i 'oha narai here ha'a-ta'ai'amou.

² 'Iraaui noni rai ha'a-abu'amou 'anai siri suri'i rumani ha'arahesi 'anai ha'arahesi, mana'i 'oha nai boi mau, 'iraaui nei narai ngahu ha'amaesi'amou rai 'adoma'inia do here narau hauasi rau haa tanaa God.

³ Rai haa o'asi, suria rau ai'a aidangisia Ama, marau ai'a aidangisiaui.

⁴ 'Inau 'au 'unu'i tana'amoui mareho 'isi, do na'i 'oha naraigui to'o, moigui aidangisia do 'inau 'au bwane ha'abasu'amou 'ini'i. Nau ai'a bwane 'unu'i tana'amou mau na'i na'o, 'iniaui awa agua orea mau bei'amou.”

Na Tatau'aro Anai Hi'ona Maea

⁵ “Mana'i 'ohani, wai 'ari aho'i'a beia mo'o na ha'ataariaui mai, ma ai'a ta ta'i abe 'ini'amou nai songa'iniaui 'iniaui dora na 'inau wai 'ariei.

⁶ 'Au 'iraraa do mou ahutotou di'u 'ini'i mareho nau 'unu'i tana'amousi.

⁷ Ma'ata 'a goro di'u do 'inau wai hano, 'inia 'onaa nau bwa'i hano, na Hi'ona Maea 'a bwa'i boi 'anai 'a'auhi'amou. Me 'onaa nawai hano, naasi nawai ha'ataaria mai.

* 15:25 15:25 Psalm 35:19; 69:4

⁸ Mana'i 'oha nai boi, 'ai ha'a-'ome 'irararaau noni nai marewana 'ini'i ora-ora'a adaa'i, ma he'ua i awaha na odo-odo ma 'inia hihiri nai boi ta'oha.

⁹ 'Ai ha'a-'ome 'irararaau 'ini'i ora-ora'a adaa'i suria rau ai'a hinihiniau.

¹⁰ 'Ai ha'a-aidangisiraau 'inia awaha na odo-odo, 'inia 'inau wai 'ari beia Ama mamougu bwa'i 'omesiau'a ro'u.

¹¹ Ma'ai ha'a-aidangisiraau 'inia hihiri, 'inia 'ia God 'a bwani hiiria Saetan na heimarungi na'i marewanani.

¹² "A rago di'u i mareho 'anai maani'i tana'amou, maigui bwara tana'amou 'anai aidangisi'i hako.

¹³ Ma'ata, na'i 'oha na Hi'ona Maea ni ha'a-momori 'ai boi, 'ia 'ai ha'a-aidangisi'amou 'ini'i mwane mareho nara ha'a-momori. 'ia 'a bwa'i maani'i mareho moi suriai 'adoma'ina, ma'ata 'ai maani'i taha na rongo'i beia God. 'ia 'ai maani'i tana'amou taha naraigui to'o mau.

¹⁴ 'ia 'ai ha'ahauasaau, 'inia 'ia 'ai maani'i tana'amou taha na 'inau 'au maani'i tanaa.

¹⁵ Na mwane mareho na 'ia Ama na to'ora'i, 'ia agu'i. Naasi mareho nau 'unua 'inia do ni Hi'ona Maea 'ai maani'i tana'amou taha na 'inau 'au maani'i."

Ahutotou 'Ai Aho'ita'i Wa'ewa'e

¹⁶ Mia Jisas 'a o'ani ro'u 'iniraau rongoiusuri ana'i, "A bwa'i orema mamou bwa'i 'omesiau ga'u, ma bwa'i orema mamoi 'omesiau aho'i ro'u."

¹⁷ Ma tara'i nei 'iniraau rongoiusuri ana'i raugu heisosonga'i hairiu o'ani, "Ini 'uaana na 'unua 'inia do ta gere madora ga'u bwa'i 'omesia ga'u, ma na'i muri gaigui 'omesia aho'i ro'u? Ma'ua na 'unua 'inia do 'ia 'ai 'ari beia Amana?

¹⁸ 'Igaau gau ai'a aidangisiai 'ado'ado 'anai gere madoraasi."

¹⁹ 'ia Jisas 'a 'iraraa do 'iraa rau raba songa'ina, magu o'ani 'iniraau, "A 'ua, 'a kakui ahumou 'ini 'unua agua do 'a bwa'i orema mamou bwa'i 'omesiau ga'u, ma bwa'i orema mamoi 'omesiau ro'u aho'i?

²⁰ Wai 'unua ha'a-momori tana'amou, 'iamou moi angi mamoi ahutotou di'u 'inia here narai haua gugua, ma'ata 'iraa noni nara ai'a hinihiniau rai wa'ewa'e 'inia. Moi ahutotou, ma'ata ni ahutotou namoi haa 'ai aho'ita'i wa'ewa'e 'ini 'omesia amou i boi aho'i agua.

²¹ 'Ai 'onaai urao na maesi ahu 'anai ha'ahutaai gare. Mana'i 'oha na gare ana 'a huta, 'a kaku'aai mata'i, ma wa'ewa'e, 'inia i gare 'a huta mai na'i marewana.

²² 'Ai o'asi ro'uta tana'amou. Na'i 'ohani mou ahutotou. Ma'ata na'i 'oha nagai hairee'i ro'u, 'iamou moigui wa'ewa'e di'u ro'u wou, mana wa'ewa'e namoi to'ora 'a bwa'i tanei nai ha'a-ai'aa baani'amou.

²³ Na'i 'ohasi, 'a bwa'i mareho namoi ha'anongia beiau. Wai 'unua ha'a-momori tana'amou, 'ia Ama 'ai haua tana'amou taha namoi ha'angonia, 'inia 'iamou ra'i rongoiusuri agu'i.

²⁴ Tari mai 'ohani, ai'a ta mareho mau namoi ha'anongia mau 'onaai rongoiusuri agu'i. Moi ha'anongi, naasi mamougu dauai taha namoi ha'anongia, mamougu honu 'inia wa'ewa'e."

Jisas 'A Ha'ahoho'i Hako'i Mwane Mena

Anai Marewanani

²⁵ Mia Jisas 'a o'ani ro'u 'iniraau rongoiusuri ana'i, "Inau 'au maani'i mareho 'isi tana'amou 'ini'i heiha'auu. Ma 'e 'oha nai boi mau 'au bwa'i hau'i heiha'auu, ma'ata wai mamaani odo-odo moi tana'amou 'inia Ama.

²⁶ Naasi mamougu ha'anongia haarimou 'inia hagu amou beiau. 'Inau 'augu bwa'i ha'anongi'a tana'amou,

27 'inia 'ia Ama 'a ta'ahi'amou suria 'i'amou mou ta'ahiau mamou hinihinia do'inau 'au boi baania God.

28 'Inau 'au boi baania Ama mau boi na'i marewana, mana'i 'ohani wai hano baaniai marewana mawai aho'i 'ari beia Ama."

29 Miraau rongoiusuri ana'i rau o'ani 'inia, "Na'i 'ohani meugu aidangisi'i goro i mareho na'o 'unu'i, 'inia 'o ai'a haa'i ha'atee heiha'auu suri'i mamaani amu'i.

30 Naasi meu 'iraraa do i'oe 'o aidangisi'i mwane mareho hako, ma rei'uaa nameu ai'a songa'ini'o mau 'inia ta maho, me i'oe 'o bwane aidangisi'i 'adoma'imee'i. Naasi meugu hinihini do i'oe 'o boi baania God."

31 'Ia Jisas 'agu songa'iniraaui o'ani, "Nii? Naasi mougu hinihiniau ha'a-momori'a?

32 'E madoraa nai boi, mana madoraa naani'a na 'i'amou hako moi 'adarara, 'e nei ma hano baaniau 'ari 'omaa ana. Ma'ata 'inau bwa'i awa haraariau, 'inia 'ia Ama na awa beiau.

33 'Inau 'au 'unu'i o'asi tana'amou mareho 'isi, neina 'inia hagu amou beiau, rai abui torako ke 'adoma'imoo'i. Na'i marewanani moi to'oadi mwane mareho bwarā. Ma'ata moi ura baabau! Suria 'inau bwane ha'ahehoai mena anai marewanani."

17

Jisas 'A Ha'arahesi 'Iniraaui Noni Hinihini

1 'Oha 'ia Jisas 'a 'unu'i hako mareho 'isi, 'a wana ara'ai Aro ma ha'atee o'ani,

"Ama, ni madoraa naani'a. 'Oi ha'ahauasaai Garemu, neina 'inau, 'i Garemu, waigui ha'ahauasa'o ro'u.

2 I'oe na'o ha'awateau 'anai marungiraaui hako noni neina wai hauai tahi tarau tanaraau noni na'o hauraaui mai tanaau.

3 Mana tahi tarau naani, do 'iraaui noni rai aidangisi'o, 'i ta'i huunai God ha'a-momori, marai aidangisiau ro'ua Jisas Kraest na'o ha'ataariau mai.

4 'Inau 'au ha'ahauasa'o na'i marewanani, 'inia 'au haa'i'a i tatau'aro na'o ha'ataariau mai 'anai haa'i.

5 Ama, na'i 'oha nawai awa aho'i bei'o, 'au 'irisia do'oi ha'ahauasaau 'onaai ha'ahauasaau ga'u amua na'i 'oha na 'inau awa ga'u bei'o mau mai maagu pwa'ara i marewana.

6 'Inau 'au ha'ata'ini'o tanaraau mwane 'ini. Rau awa ga'u 'onaairaaui noni nai marewanani, ma'o hauraaui mai tanaau. 'Iraau ra'i noni amu'i ma'o hau'i mai tanaau. 'Iraau rau araisuri'i ha'atee amu'i.

7 Naasi rau aidangisia do ni mwane mareho hako nau 'unu'i mau haa'i, ra boi baani'o.

8 Ni mwane ha'ausuringa'i na'o hau'i mai tanaau 'au hau'i hako tanaraau, marau dau'i. Rau aidangisia goro do 'inau 'au boi baani'o, me i'oe na'o ha'ataariau mai.

9 Ni ha'arahesi aguani, 'au ai'a hua 'iniraaui noni nara ai'a hinihiniau. Me 'au ha'arahesi 'iniraaui nei na'o hau'i mai tanaau, suria 'iraaui ra'i nei amu'i.

10 Miraau nei amu'i 'iia agu'i, mana nei agu'i 'iia amu'i. Mei suri'i tahingadaa'i, na mena mana gorohagu ra ha'ata'inia hura'a tanaraau noni.

11 Naani wai hano'a baaniai marewana maugu bwa'i awa'a ro'u na'iei. Wai aho'i 'ariwou bei'o miraau nei amu'i rai awa mau. Ama Maea, 'oi taatahi bwarasiraaui ma'oi 'omesuriraaui 'inia mena amua, 'i ta'i mena na'o hua mai tanaau. 'Oi hua o'asi neina rai ha'i ta'i 'onaigaraa.

12 Na'i 'oha na 'inau 'au awa beiraaui, 'au taatahi bwarasiraaui 'inia mena amua. 'Au 'omesuriraaui goro ma 'e ta'i nei moi 'iniraaui na ai'aa baaniau.

Naasia mo'o na ta'aasi* na ta'isada do'ai siri na'i mae tarau, do neina 'i Usu-usu Maea 'ai to'o ha'a-momori.

¹³ Naani wai 'ari'a wou bei'o. 'Inau 'unu'i mwane mareho 'ini tanaraau na'i 'oha nau awa mau beiraa, do neina rai honu 'inia wa'ewa'e 'onaai wa'ewa'e nau haa.

¹⁴ 'Au hau'i tanaraau ha'ausuringa'i amu'i, miraaui nei narau ai'a hinihiniau ra 'itaraau suria 'iraaui ai'a ha'isuri'i barongadaa'i, 'onaai nau ai'a ha'isuri'i ro'u.

¹⁵ Nau ai'a ha'anongia do'oi wairaaui baaniai marewana, ma'ata 'au ha'angoni'o do'oi 'omesuriraaui baania mo'o na ta'aa di'usi, 'ia Saetan.

¹⁶ 'Iraaui ai'a anai marewanani, 'onaai nau ai'a anai marewanani.

¹⁷ 'Oi ha'amaearaaui 'ini'i ha'ausuringa'i amu'i neina rai hauai tau'aro amua. 'Inia na ha'ausuringa'i amu'i ra ha'ata'inia taha na ha'a-momori.

¹⁸ 'Inau 'au ha'a-taariraaui hura'a na'i marewana hako 'onaai ha'ataariau amua mai na'i marewanani.

¹⁹ 'Inau 'au wateau haariau tana'o 'anai 'a'auhiraau, do neina 'iraaui rai wateraaui haraariraaui hako tana'o 'anai hauai tau'aro amua.

²⁰ Hoita. Nau ai'a ha'arahesi 'iniraaui moi rongoiusuri 'ini, me 'iniraaui ro'u i nei narai hinihiniau na'i 'oha rai maaniai tarohagu tanaraau.

²¹ Ama! 'Au ha'arahesi do 'iraaui hako nei narai hinihiniau rai ta'i, 'onaai 'inau mi'oe gara ta'i, i'oe na'i beiau minau na'i bei'o. Mau ha'arahesi do 'iraaui rai ha'i ta'i beigaraa, neina inoni nai marewana hako raigui hinihinia do i'oe na'o ha'ataariau.

²² 'Au hua tanaraau mena mana goroha na'o hua tanaau. 'Au hua tanaraau do neina rai ha'i ta'i, 'onaai ha'i ta'i agaraa.

²³ 'Inau na'i beiraaui, mi'oe na'i beiau, neina 'iraaui rai ha'i ta'i ha'a-momori. Naasi na mwane inoni nai marewana hako rai aidangisia do i'oe na'o ha'ataariau mai, ma'o ta'ahiraaui noni hinihini ta'isada moi 'onaai ta'ahiau na'o haa.

²⁴ Ama. 'Au 'irisia do 'iraaui nei na'o hau'i mai tanaau rai awa beiau na'i dora na wai awa iei, neina rai 'omesiai rarahagu mana hua hua hua, ni raraha mana hua hua na'o hua tanaau 'inia ta'ahiau mai mau amua maagu pwa'ara i marewana.

²⁵ Ama! I'oe 'o odo-odo. 'Iraaui noni narau ai'a hinihiniau, rau ai'a aidangisi'o. Ma'ata 'inau 'au aidangisi'o, miraaui nei agu'i rau 'iraraa do i'oe na'o ha'ataariau mai.

²⁶ 'Inau 'au ha'a-aidangiraaui 'ini'o, mau bwa'i agohe 'anai hua o'asi, neina heita'ahi amua tanaau 'ai awa beiraaui, minau ro'u beiraaui."

18

Jisas Ra Daua

(Matiu 26:47-56; Mak 14:43-50; Luk 22:47-53)

¹ 'Oha na 'ia Jisas 'a ha'arahesi hako, 'a wairaaui rongoiusuri ana'i 'ari na'i nata batarau 'inia marawai Kidron. Marau 'ariwou awa na'i dora ra hasi 'ana hasi'ei 'oliv.

² Mia Jiudas, 'ia mo'o na hano ani 'anai usuha'inia Jisas tanaraau maerongana, 'a 'iraraui dorasi, suria na'i dorasi 'ia Jisas 'a wairaaui tarau 'ariei rongoiusuri ana'i.

³ Hoita, na'i 'ohasi 'ia Jiudas 'a wairaaui mai ruruhai hehei'oi ni Rom beiraaui ro'u tara'i sae hehei'oi narau 'omesuriai Ruma Maea na 'iraaui Na'ohadaa'i Piriisi mana Farisei rau ha'ataari'i. Rau waa'i mareho hehei'oi adaa'i, mana mareho ni ha'amarewa, marau ataha wou na'i dorasi.

* **17:12 Mo'o na ta'aasi:** 'Ia Jiudas Iskariot

⁴ Jisas 'a bwane aidangisi'i hakoi taha narai to'o tanaa. Naasi ma 'ariwou 'anai heisadoi beiraaui, ma o'ani, "Iatei namou sibania?"

⁵ Miraaui o'ani, "Ia Jisas ni Nasaret."

Mia Jisas 'a o'ani, "Nei nauni."

Mana'i 'ohasi, 'ia Jiudas 'a ura ro'u moi beiraaui sae hehei'oi.

⁶ Hoita, mana'i 'oha na o'ani 'iniraaui, "Nei nauni," rau su'a marau ahurenga hako aurui ano!

⁷ Magu songa'iniraaui ro'u o'ani, "Iatei namou sibania?"

Miraaui o'ani ro'u 'inia, "Ia Jisas ni Nasaret."

⁸ Mia Jisas 'agu o'ani 'iniraaui, "Au bwane 'unua tana'amou niani do neinauni. Ma 'onaa na 'inau namou sibaniaui, mamoi nugasiraaui rongoiusuri agu'i 'ini marai hano."

⁹ 'A haua o'asi neina 'ai to'o ha'a-momori mareho na 'unua na'i 'oha na o'ani, "Ai'a ta ta'i 'iniraaui nei na'o hau'i tanaau nai ai'aa."*

¹⁰ Mia Saemon Pita na awa beiai naihi. 'A rahia hura'a ma taba taahiai karinga odonai sae tatau'aro anai Na'ohadaaui Piriisi. Na atana 'ia Malkas.

¹¹ Mia Jisas 'a o'ani 'inia Pita, "Oi nugaa aho'i naihi amua na'i dora 'ana! 'O ai'a 'iraraa do 'inau wai rongomaata'i 'onaa'i 'irisia ana Amagu?"

Jisas Ra Waia 'Ari Tanaa 'Anas

¹² Naasi miraaui hehei'oi mana bwauodo adaa'i, beiraaui sae hehei'oi narau 'omesuriai Ruma Maea ana God, rau daua Jisas marau ho'o goni'i rimana'i.

¹³ Na'i na'o rau waia ga'u tanaa 'Anas, i amana urao ana Kaeafas. 'Ia Kaeafas naasi Na'ohadaaui Piriisi 'anai harisi naasi mia 'Anas na Na'ohadaaui Piriisi ga'u na'i na'o.

¹⁴ Mia Kaeafas naasia mo'o na bwane 'unua tanaraaui saemaua adaa'i Jiu do 'a ga'i goro do 'onaa ta ta'i nei 'ai mae dingadaaui mwane inoni hako.

'Etanai Tohe Na Haua Pita

(Matiu 26:69-70; Mak 14:66-68; Luk 22:55-57)

¹⁵ 'Ia Pita beiai ta'i rongoiusuri ro'u raru hano suria Jisas. Mana nata rongoiusurisi, raru haimatai'i Na'ohadaaui Piriisi naasi. Na tarana naasi 'iia ra ha'awatea 'anai siri na'i dora a'ora na'i maanai ruma anai Na'ohadaaui Piriisi nara waia siri eia Jisas.

¹⁶ Mia Pita 'a ura moi hura'a na'i maanai bara. Mana nata rongoiusurisi 'a siri ma aho'i hura'a ma hadahada beiai gere urao na 'omesuriai maanai barasi magu waia siri a Pita.

¹⁷ 'Oha nararu siri, na uraosi 'a wanasia Pita ma o'ani 'inia, "Ni'oe ro'usi ta'i rongoiusuri ana Jisas gasi!"

Mia Pita 'a tohe ma o'ani 'inia, "Ai'a, 'inau ai'a."

¹⁸ Miraaui noni tatau'aro na'i rumasi, miraaui sae hehei'oi narau 'omesuriai Ruma Maea ana God rau ura garigariai 'eu narau togaa na'isi 'anai waari'u, 'inia na'i 'ohasi 'e madoraa na rodo 'a wanusi. Mia Pita 'a 'ariwou 'anai waari'u ro'u beiraaui.

'Ia 'Anas 'A Sosonga'inia Jisas

(Matiu 26:59-66; Mak 14:55-64; Luk 22:66-71)

¹⁹ Mia 'Anas 'agu songa'inia Jisas 'iniraaui rongoiusuri ana'i, ma 'ini'i ro'u i ha'ausuringa'i ana'i.

²⁰ Mia Jisas 'a aramia o'ani, "Ni mareho nau maani'i 'au maani'i hako hura'a tanaraaui noni. Suria 'ado 'oha 'au mamaani suri'i dora ni rurugoni

* **18:9 Ai'aa:** Wanasiai koment na'i Jon 17:12

aga'i 'onaai ruma ni ha'arahesi, mana'i Ruma Maea ana God. Ai'a ta ta'i maho nawai girua ta'iniraau.

²¹ Ni 'uaana na'ogu hau'i 'inia heisonga'i 'isi tanaau? 'Oi songa'iniraau nei narau rongo'i taha nau maani'i. 'Iraau narau 'irara'i mareho nau maani'i."

²² Ma'e ta'i 'iniraau sae hehei'oi na 'omesuriai Ruma Maea ana God 'a boi ma hidariai babana Jisas ma o'ani, "Toe 'o ga'i bwa'i hadahada o'asi tanaa Na'ohadaau Piriisi!"

²³ Mia Jisas 'a o'ani, "'Onaa 'e maho ta'aa nau 'unua hura'a ma'oi 'unua hura'a magari rongoa. Ma 'onaa 'a odo-odo i mareho nau 'unua, ma 'e tarana'i taha na'o hidariau 'inia?"

²⁴ Mia 'Anas 'a ha'ataaria Jisas 'ari tanaa Kaeafas bei'i mau i ho'oho'o na'i rimana'i.

*Ruana Mana Orunai Tohe Na Haua Pita
(Matiu 26:71-75; Mak 14:69-72; Luk 22:58-62)*

²⁵ 'Oha na 'ia Pita 'a ura mau 'isi 'anai waari'u, 'e ta'i 'iniraau sae 'isi na o'ani 'inia, "'A 'ua? I'oe ro'u ta'i 'iniraau rongoiusuri ana'ia mo'osi?"

Mia Pita 'a tohe, 'a o'ani, "Ai'a, 'inau ai'a."

²⁶ Ma'e ta'i 'ini'i noni tatau'aro anai Na'ohadaau Piriisi, 'e sae na heito'oranga'i beia mo'o na 'ia Pita na taba taahiai karingana ani, 'a o'ani, "'Inau 'au 'omesi'o ro'u beia mo'osi na'i 'oha nara daua 'ari moui hasi'ei ani."

²⁷ Mia Pita 'a tohe ro'u mau. Raugu rongo mana kua 'a tataraoke'a.

*Jisas Ra Waia 'Ari Tanaa Paelat
(Matiu 27:1-2, 11-31; Mak 15:1-20; Luk 23:1-25)*

²⁸ Na heisonga'i narau haa'i tanaa Jisas na'i ruma ana Kaeafas 'a wairaaui tari 'ari na'i haho'oa ta'aa. Naasi maraugu waia 'ari na'i kae ruma raha anai ai Rom na Primia 'anai Provensi naasi. Miraau ai Jiu 'isi rau ai'a siri na'i rumasi, 'inia 'onaa narai siri na'i ruma anai nei na ai'a Jiu, rau 'adoma'inia dorai do'o'a na'i maana God marau bwa'igui ha'i ta'i'a beiraau noni 'oha rai ha'ato'oai rongo ni Roho Aharau.

²⁹ Mana Primia, 'ia Paelat, 'a hura'a wou na'i abau 'omaa beiraau ma o'ani 'iniraau, "'E taha namou ha'ahunia 'inia mo'oni?"

³⁰ Naasi marau aramia o'ani, "'Tameu ga'i bwa'i waia mai tana'o 'onaa na ga'i bwa'i ha'i sae hehere ta'aa!"

³¹ Mia Paelat 'agu o'ani 'iniraau, "Namoi waia mamoi hiiria suriai ringe amouu."

Miraaugu aramia Paelat o'ani, "'T'amoui Rom mou ai'a ha'awatea domei ngahu ha'amaesia ta sae."

³² Naasi 'a to'o ha'a-momori'a 'i mareho 'ia Jisas na 'unua 'inia he'uai mae nai haa.

³³ Mia Paelat 'a siri aho'i ruma ma 'unua dorai waia siri a Jisas, ma o'ani 'inia, "'A 'ua? I'oe naasi Mwaeraha adaui Jiu?"

³⁴ Mia Jisas 'a aramia o'ani, "'A 'ua? I'oe na'o 'adoma'inia haari'o i heisonga'i na'o haua tanaausi, ma'ua 'e sae moi na 'unua tana'o?"

³⁵ Mia Paelat 'a o'ani, "'Eii, 'inau ai'a ai Jiu! 'Iraau haariraui nei amu'i narau wai'o maini nara raba 'iraraai mahosi. 'E taha na'o ha'atari'aa?"

³⁶ Mia Jisas 'agu aramia o'ani, "'Inau ai'a mwaeraha anai marewanani. 'Onaa nawai mwaeraha anai marewana, 'iraui nei agu'i rau ga'i heingahui beiraui saemaua adaa'i Jiu narau boi 'anai dauau. Ma'ata ni dora ni heimarungi agua ai'a na'i marewanani."

³⁷ 'Ia Paelat 'a o'ani 'inia Jisas, "Naasi, i'oe 'e mwaeraha? Nita?"

Mia Jisas 'agu aramia o'ani, "T'oe na'o 'unua do 'inau 'e mwaeraha, ma'o ha'a-momori. Naasi tarana nau huta mai 'inia. 'Au boi na'i marewana 'anai taroha'iniai taha na ha'a-momori, miraaui nei narau ta'ahiai taha na ha'a-momori, rau araisuriau."

³⁸ Mia Paelat 'a songa'inia ro'u o'ani, "'E taha naasi ha'a-momori?"

Magu aho'i ro'u hura'ai abau 'omaa beiraau Jiu ma o'ani 'iniraaui, "'Inau ai'a to'oana ta mareho taritari'a nai haua.

³⁹ Ma'ata 'i'amou mou to'oraai ringe 'anai ha'anongiau 'anai ha'ahura'ahia ta sae baaniai rumaniho'o 'ado harisi na'i madoraa ni Roho Aharau. Ma 'ua? Mou 'irisia dowai ruhasiai Mwaeraha amou i Jiu?"

⁴⁰ Miraau kae awara aho'i tanaa o'ani, "'Ta mo'osi 'oi abui ruhasia, ma'ata 'ia Barabas nameu 'irisia!" ('Iasia Barabas 'e sae hehere ta'aa na awa na'i rumaniho'o).

19

¹ Mia Paelat 'a 'unua tanaraau noni hehei'oi dorai waia Jisas marai rohoa 'iniai hasiwaro baabau.

² 'Oha narau rohoa hako, rau tau'aronai hihiri bwau waroraraki marau darasia na'i bwauna. Naasi marau ha'asirihia 'iniai bwana ni mwaeraha. Bwanasi 'a tewa magu raba 'ome wangawanga.

³ Naasi marau boi gaarangia marau haikou 'inia, rau o'ani, "Ha'aasaai Mwaeraha adaui Jiu!" Maraugu awanga'i hidaria.

⁴ Mia Paelat 'a hura'a ro'u i abau 'omaa ma o'ani 'iniraaui noni, "Na'i 'ohani wai waia hura'a mai tana'amou, ma'ata moi aidangisia do 'inau ai'a to'oana ta mareho nai ha'atari'aa."

⁵ Mia Jisas a hura'a mai beiai hihiri bwau waroraraki na'i bwauna, mei beiai bwana tewa nara ha'asirihia 'inia. Mia Paelat 'a o'ani, "Naani'a mo'o ani!"

⁶ Mana'i 'oha na 'iraaui Na'ohadaui Piriisi miraaui sae hehei'oi nara 'omesuriai Ruma Maea ana God rau 'omesia, raugu totoro ara'a o'ani, "Rabu ahita'inia na'i dadaahoro! Rabu ahita'inia na'i dadaahoro!"

Mia Paelat 'a o'ani, "'T'amou namoi waia mamoi rabu ahita'inia na'i dadaahoro, 'inia 'inau ai'a to'oana ta maho nai ha'atari'aa."

⁷ Miraau saemaua adaa'i Jiu raugu ha'atee o'ani, "Na'i ringeringe ameeu, 'iia 'a ta'isada do'ai mae, suria 'a 'unua haaria do'iia garena God."

⁸ Na'i 'oha nagu rongoa o'asi ro'ua Paelat, 'agu mamaa'u ro'u di'u wou baaniai na'o.

⁹ Naasi ma waia Jisas aho'i siri na'i ruma ma o'ani 'inia, "Na'i dora he'ua na'o boi baania?" Mia Jisas 'a ai'a aramia.

¹⁰ Mia Paelat 'a ha'atee wetewete o'ani, "'Oi aramiau! 'A 'ua? 'O ai'a 'iraraa do'inau nau to'o mena 'ini'o 'anai ruhasi'o ma 'anai rabu ahita'ini'o na'i dadaahoro?"

¹¹ Mia Jisas 'agu ha'atee o'ani 'inia, "Ni mena moi na'o to'oraai 'in角度 naasi mena na 'ia God na haua tana'o. Naasi 'ia mo'o na wai'au mai tana'osi, 'a haai ora-ora'a na raha di'u baaniai ora-ora'a amua."

¹² Na'i 'oha na 'ia Paelat 'a rongoa o'asi, 'a bonasia do'ai sibania ta here nai ruhasia 'inia Jisas mai hura'a dadara'a. Miraau saemaua adaa'i Jiu raugu totoro raha ro'u o'ani, "'Onaa na'oi ruhasia mo'osi mai hura'a dadara'a, ma ha'ata'inia do i'oe 'o ai'a aba beiai mwaeraha anai Rom. 'Inia 'iatei na 'unua hura'a haaria do'iia 'e mwaeraha, 'a ha'ima'e beiai mwaeraha anai Rom."

¹³ Na'i 'oha na 'ia Paelat 'a rongoi 'unu o'asi adaaui, 'a waia aho'i hura'a maia Jisas, ma heinagu auru na'i dorani heihiri nara 'unua 'iniai dorani hau bubuu. (Na'i ha'atee ni Jiu ra 'unua 'iniai Gabata.)

14 Ma 'ariwou'a 'anai atoa na'i dangi 'anai ha'aagau 'anai rongo ni Roho Aharau. Mia Paelat 'a o'ani 'iniraui Jiu, "Naani mwaeraha amoou!"

15 Miraaugu awara aho'i wou tanaa o'ani, "Waia beira'i! Waia beira'i! Rabu ahita'inia na'i dadaahoro!"

Mia Paelat 'a o'ani, "A 'ua? Mei rabu ahita'iniai mwaeraha amoou?"

Miraaui na Na'ohadaui Piriisi raugu totoro aho'i ro'u o'ani tanaa, "Ai'a ta mwaeraha he'ete'i'a ro'u nameigui to'oraa, 'iia moi 'etea Mwaeraha anai Rom."

16 Mia Paelat 'agu watea Jisas tanaraui hehei'oi 'anai rabua na'i dadaahoro.

Jisas Ra Rabu Ahita'inia Na'i Dadaahoro

(Matiu 27:32-44; Mak 15:21-32; Luk 23:26-43)

Miraaui waia Jisas marau hano beira'i beia.

17 Na'i 'ohasi 'ia Jisas 'a suru'ia haariai dadaahoro ana, marau ta'eha ara'a na'i gere hungahunga nara 'unua 'iniai dora ni Korai Bwau Sae. (Na'i ha'ateeni Jiu, ra 'unua 'iniai Golgota.)

18 Na'i 'isi naraugu rabu ahita'inia iei na'i dadaahoro. Ma'e wairarua nara raburarua ro'u na'i dadaahoro adaru'i. Raru 'ado bobo 'inia Jisas.

19 Mia Paelat 'a 'unua dorai usuai usu-usu na'i baba 'anai nugaa ara'a na'i bwaunai dadaahoro ana Jisas. 'A o'ani,

JISAS NI NASARET, MWAERAHA ADAUI JIU

20 Mana usu-usu naasi 'a usua 'iniai ha'atee ni Jiu, Rom, mana Grik. Ma ragoi Jiu narau 'oha'iniai usu-ususi, 'inia ni dorasi 'a gaarangia moi 'omaa rahai Jerusalem.

21 Mana 'oha na Na'ohadaui Piriisi 'a 'omesia o'asi, 'a o'ani 'inia Paelat, "Oi orisia ma'oi usu 'oniaa, "Iia 'a 'unua do 'iiani 'e mwaeraha adaui Jiu.'"

22 Mia Paelat 'a o'ani, "Ni taha nau usua dio, ragu bwa'i matai orisia'a."

23 'E waira hai hehei'oi nara rabu ahita'inia Jisas na'i dadaahoro. 'Oha rau rabua hako, rau 'adodi bwana ana'i. Marau rahia ro'u i to'oni tewa ana nara tagoraa 'inia ta'i kae tahangai bwana.

24 Marau o'ani, "Gai abui karia. Ma'ata gai gaasi ha'ara 'ana, magari 'omesia tei nai to'oraa." Naasi ma to'o ha'a-momori'a i taha na Usu-usu Maea na 'unu 'oniaa, "Ra hatora'ini'i bwana agu'i, mana to'oni tewa agua ra gaasi ha'ara 'ana."* Naasi taha na 'iraui noni hehei'oi rau haua.

25 Hoita, neiraauni nei narau ura gaarangiai dadaahoro ana Jisas. Ni inana, mana do'orana inana, mea Meri urao ana Klopas, mea Meri ni Magdala.

26 'Oha na 'ia Jisas 'a 'omesia inana mana rongoiusuri ana na ta'ahia 'a o'ani 'inia inana, "Iiasi 'a 'onaa do 'e garemu."

27 Magu o'asi ro'u 'iniai rongoiusurisi, "Iiasi 'a 'onaa do 'e inamu." Ma taraawa'a na'i 'ohasi, na rongoiusuri naasi 'agu ha'a-awahia inana Jisas na'i ruma ana.

Na Mae Ana Jisas

(Matiu 27:45-56; Mak 15:33-41; Luk 23:44-49)

28 'Ia Jisas 'a aidangisia do ni mwane mareho na boi 'anai haa'i 'a ha'a-arotaha'i goro hako, me ma'ata 'anai ha'a-ha'a-momoriai taha na Usu-usu Maea na 'unua, 'ia Jisas 'a o'ani, "Inau raba gono."†

29 Ma'e bei wai na honu 'iniai waen mahai na awa na'isi. Rau hauai mareho na matai omiai wai marau ha'ahonua 'iniai waen. Naasi maraugu ha'ababaua na'i raraai hasi'ei nara 'unua 'iniai Hisop, marau taranga'inia ara'a tanaai ngoona Jisas do'ai gono.

* 19:24 19:24 Psalm 22:18 † 19:28 19:28 Psalm 22:15; 69:21

³⁰ Na'i 'oha na gono hako, 'a o'ani, "A agaau'a!" Na'i 'oha na ha'atee o'asi hako, 'a arabwau auru ma nuga manawa.

³¹ Miraau saemaua adaa'i Jiu rau ai'a rabasia doni abedaa'i waira orusi do raigui awa ro'u mau hunganai dadaahoro tari nata dangi, 'inia ni nata dangi naasi dangi ni mamaro. (Na dangi ni mamarosi 'a ororiu di'u suria 'a to'o na'i sade nara 'adoma'i aho'isiai Roho Aharau.) Naasi rau ha'angonia Paelat do'ai 'unua tanaraau hehei'oi 'anai raesi'i uwadaa'i marai rahi'i dioi abedaa'i baani'i dadaahoro.

³² Miraau hehei'oi rau 'ariwou marau raesi'i uwadaru'i rua mwane nararu 'ado bobo 'iniasi a Jisas.

³³ Mana'i 'oha naraugu boi beia Jisas, rau sadoia do'ia 'a bwani mae, naasi marau ai'a raesi'i uwana'i.

³⁴ Ma'ata 'e ta'i 'iniraau hehei'oi na 'ariwou ma rubu'iai rageragena 'iniaai oo'o, mana 'abu mana wai ra ahe hura'a.

³⁵ Ni mareho na to'osi 'a ha'a-momori, 'inia 'ia mo'o na 'ome'ome haraaria 'inia maana na taroha'inia hura'a do neina moi hinihini.

³⁶ Ni mareho 'isi ra to'o neina 'ai ha'a-ha'a-momoriai Usu-usu Maea na o'ani, "A bwa'i ta ta'i susuri na'i abena nai bwaro,"‡

³⁷ "marau bore suria mo'o nara rubu'ia 'iniaai oo'o."§

Jisas Ra Toringia

(Matiu 27:56-61; Mak 15:42-47; Luk 23:50-56)

³⁸ Na'i muri 'ia Josep ni 'Arimatea 'a taha beia Paelat ma songa'inia 'onaa 'a ga'i wateai abena Jisas 'anai rahia dio baaniai dadaahoro. ('Iiasia Josep 'e ta'i sae na suria Jisas, magu ai'a raba ha'ata'inia haaria, suria 'a mamaa'usiraau saemaua adaa'i Jiu.) 'Ia Paelat 'a watea, mia Josep 'a 'ari ma rahia dioi abena Jisas ma waia.

³⁹ Mia Nikodimas, 'ia mo'o na ataha ga'u beia ani a Jisas na'i rodo, 'a hano ro'u beia Josep. Mia 'a waai bibii nara awaiei merisini nara 'unua 'iniaai "Myrrh" mana "Alos" 'anai nuga'i na'i abena Jisas na'i 'oha rai ha'aagauai abena 'anai toringia. Mana hihi'adi mareho 'isi ra ga'i 'onaai oru tangahurui kilo.

⁴⁰ Miraruai rua mwanesi raru haa'i tahangai bwana mamaahui mararu ho'u'i 'iniaai abena bei'i merisini 'isi. Naasi here adaau Jiu 'anai ha'aagau'i abedi sae adaa'i nara mae 'anai toringi'i.

⁴¹ Ni dora nara rabua eisia Jisas na'i dadaahoro 'a awa gaarangi'ai moui hasi'ei. Mana'i moui hasi'eisi, 'e wabwa na awa 'isi, mana wabwasi ai'a ta sae mau narai aoraa ei.

⁴² Hoita, me suria ra ha'a-osaosa 'iniaai tari'a ana i 'oha 'anai ha'aagau 'anai dangi ni mamaro ma naasi'a i wabwa na gaarangi'ai dorasi, rau waiai abena Jisas marau aoraa na'i wabwasi.

20

Na Suruta'e Aho'i Ana Jisas

(Matiu 28:1-8; Mak 16:1-8; Luk 24:1-12)

¹ Mana'i 'oha na kuhi mau na'i haho'oai Sade, 'ia Meri ni Magdala 'a ho'orai 'ari hera, ma 'omesia do ni hau nara ha'abwarasia 'iniaai maanai wabwa ra bwane nigaa baira'i.

² Naasi ma 'eba aho'i ma sadoia Saemon Pita mana nata rongoiusuri na 'ia Jisas 'a ta'ahia. Mia Meri 'a o'ani 'iniraru, "Ei, ra rahiai abena Araha baaniai wabwa, maugu ai'a 'iraraai dora ra nugaa iei!"

‡ 19:36 19:36 Eksodas 12:46; Nambas 9:12; Psalm 34:20 § 19:37 19:37 Sakaraea 12:10

³ Na'i 'oha nararugu rongo o'asi, mararu 'eba moe'a 'anai 'ari 'omesiai wabwa.

⁴ Na'i 'oha raru 'eba mau wou, mana nata rongoiusurisi 'a 'eba di'ua Pita ma ataha 'ari na'i na'o na'i wabwa.

⁵ 'Oha na 'ariwou na'i maanai wabwa 'a mwaoro dio magu wana siri na'i dora ra ha'adaohia eia Jisas. 'A 'omesi'i bwana ra ho'ua 'ini'i, ma'ata 'a ai'a siri.

⁶ Na'i 'oha na 'ia Saemon Pita 'agu ataha, 'a siri daara'i ma re'i'i dadao ada'i bwana,

⁷ ma 'omesia doni bwana ra bibiia 'inia bwauna 'a awa sigi haaria, ma 'ome 'onaa dora roku taguma'inia goro.

⁸ Naasi mana nata rongoiusurisi na ada na'i na'o 'inia Pita 'agu siri ro'u haisuri. Na'i 'ohasi 'a 'ome ma hinihini do 'ia Jisas 'a suruta'e'a aho'i.

⁹ Rei'uaa tari mai 'ohasi raru ai'a aidangi tarihanai Usu-usu Maea na 'unua hura'a do'ia Jisas 'ai suruta'e aho'i baaniai mae.

¹⁰ Naasi ma rarugu aho'i 'ari ruma.

*Jisas 'A Ha'ata'i Tanaa Meri Ni Magdala
(Matiu 28:9-10; Mak 16:9-11)*

¹¹ Mia Meri 'a awa mau hura'ai maanai wabwa, magu angiangi. Mana'i mau i 'oha na angiangisi 'a mwaoro auru do'ai wana siri raronai wabwa.

¹² Na'i 'oha nagu wana siriwou na'i dora ra nuga iei abena Jisas, 'a 'omesiai heheinagu adaruai rua enjel nararu siri suri'i to'oni mamaahui, 'e ta'i tanaai dora na awai bwauna, ma'e ta'i tanaai dora ra awaiei uwana.

¹³ Mana rua enjelisi raru songa'inia Meri o'ani, "E taha na'o angi 'inia?" Mia Meri 'a o'ani, "Ra waiai abena Araha agua, maugu ai'a 'iraraai dora ra nuga iei."

¹⁴ Na'i 'oha nagu agario aho'i, ma re'iai sae na ura na'i murina. Na saesi 'ia Jisas, ma'ata 'a ai'a 'ome 'iraraa do'ia Jisas.

¹⁵ Mia Jisas 'a ha'atee o'ani 'inia, "E taha 'o angi 'inia? 'Iatei na'o sibania?" 'Ia Meri 'a 'adoma'inia do'ia mo'o na 'omesuriai moui hasi'eisi, magu o'ani 'inia, "Saemaua, 'onaa i'oe na'o waia, ma'oi 'unua tanaaui dora na'o nuga iei, mawai 'arihia."

¹⁶ Mia Jisas 'agu o'ani, "Meri!"

Mia Meri 'a rihota'i wou tanaa ma o'ani, "Raboni!" Ni 'ado'ado 'anai ha'ateesi naasi, "Ha'ausuri."

¹⁷ Mia Jisas 'a o'ani 'inia, "Oi abui dau mai beiau, suriai 'inau ai'a ara'a mau beia Amagu. Ma'ata 'oi 'ari beiraau rongoiusuri agu'i ma'oi 'unua tanaraau do 'inau wai ara'a beia Amagu, 'e Amamoou ro'u, i God agua, ma'e God amoou ro'u."

¹⁸ Mia Meri ni Magdala 'a aho'i 'ari ma o'ani 'iniraau rongoiusuri, "Inau 'omesia Araha!" Ma maani'i hakoi mwane mareho na 'unu'ia Jisas.

Jisas 'A Ha'ata'i Tanaraaui

*Rongoiusuri Ana'i
(Matiu 28:16-20; Mak 16:14-18; Luk 24:36-49)*

¹⁹ Mwane mareho 'isi ra to'o na'i dangi sade. Mana'i mau su'urahinai dangisi, 'iraau rongoiusuri rau awa na'i raronai ruma narau honohono ha'ababaua, suria rau maaa'usiraau saemaua adaa'i Jiu. Raugu 'asu'a mia Jisas 'a ura beiraau ma o'ani 'iniraau, "Na gooroha ana God 'ai awa bei'amou!"

²⁰ 'Oha na ha'atee o'asi, 'a taranga'ini'i hura'ai rimana'i dorai 'omesi'i, ma ha'ata'inia tanaraaui rageragena. 'Oha na 'iraaui rongoiusuri rau 'ome 'iraraai Araha adaau, rau honu 'inia wa'ewa'e.

²¹ Magu ha'atee aho'i ro'u o'ani 'iniraaui, "Na gooroha ana God 'ai awa bei'amou. 'Onaai ha'ataariau mai ana Ama, 'inau 'au ha'ataari'amou ro'u."

²² Ma manawasiraaui magu o'ani, "Moi dauai Hi'ona Maea.

²³ 'Onaa namoi 'unua tanaa tanei domou 'adoma'i nugasi'i ora-ora'a ana'i, 'ia God 'ai 'adoma'i nugasi'i ma'ata'a. Ma 'onaa namou bwa'i 'unua, 'ia God a bwa'i 'adoma'i nugasi'i."

Jisas 'A Ha'ata'inia Haaria Tanaa Tomas

²⁴ Ma'e ta'i 'iniraaui rongoiusuri na atana 'ia Tomas nara 'unua ro'u 'inia 'Iu, na ai'a awa na'i 'oha na 'ia Jisas 'a ha'ata'i tanaraau.

²⁵ Na'i 'oha nagu boi aho'i, 'iraaui rongoiusuri rau o'ani 'inia, "'Tameu meu 'omesia Araha!"

Mia Tomas 'a o'ani 'iniraaui, "'Inau ai'a hinihinimoou. Wai hinihini 'onaa wai re'i'i ma'ua karohi'i dora ra maara na'i rimana'i, ma 'onaa wai karo siri na'i dora na maara na'i rageragena."

²⁶ Mana'i nata sade haisuri, 'iraaui rongoiusuri ana'ia Jisas rau goni na'i ta'i ruma ro'u mausi, mia Tomas 'a awa ro'u beiraaui na'i 'ohasi, mana maraaruma rau honohono ha'ababau'i goro. Raugu 'asu'a mia Jisas 'a ura ro'u na'i beiraaui ma o'ani 'iniraaui, "Na gooroha ana God 'ai awa bei'amou."

²⁷ Naasi ma o'ani 'inia Tomas, "'Oi nugaai kaka'umu na'i 'ini, ma'oi 'omesi'i rimagu. 'Oi karo siri na'i dora na maara na'i rageragegu. 'Oi hinihini, ma'oi abui 'adoma'i heiruarua'a!"

²⁸ Mia Tomas 'a o'ani, "'T'oe Araha agua, mana God agua!"

²⁹ Mia Jisas 'agu o'ani 'inia, "'T'oe 'o hinihini suria 'o re'iau. Ma'ata ha'amwaniraaui di'u i nei ra hinihini ha'i ai'a 'omesiau."

'Ado'adona Jon Nagu Taarai

Usua 'Inia i Bukani

³⁰ Ra rago di'ui ha'abu'oahu na 'ia Jisas na haa'i na 'iraaui rongoiusuri rau 'omesi'i, maragu ai'a nuga'i dio na'i bukani.

³¹ Ma'ata ni mareho nara nuga'i dio 'isi, ra nuga'i dio do neina moi hinihini do'ia Jisas naasi Ha'atahi, me 'iia naasi Garena God. Ma 'onaa moi hinihini o'asi, moi daua namooui tahi tarau.

21

Jisas 'A Ha'ata'i Tanaraaui

Biu Rongoiusuri

¹ Na'i muri, 'ia Jisas 'a ha'ata'i ro'u tanaraaui rongoiusuri ana'i na'i bobonai kae bwera i Galili.* Ma to'o o'ani.

² Ra'i nei 'ini'i rongoiusuri ana'i narau awa 'ohasi. 'Ia Saemon Pita, 'ia Tomas nara 'unua ro'u 'inia 'Iu, 'ia Nataniel baaniai 'omaai Kena na'i Provensi Galili, mana rua garena Sebedi, beiai nata rua rongoiusuri ro'u.

³ Mia Pita 'a o'ani 'iniraaui, "'Inau wai hanoriai ahuasi."

Miraaui hako raugu o'ani 'inia, "'Gai ta'i hano." Rau hano marau ta'e hura'a na'i ora. Na'i rodo bubusi ai'a ta ta'i ii'a narai ngahuia.

⁴ Mana'i 'oha na dangi 'a hane mai, rau 'omesia Jisas ura-ura ana na'i one, ma'ata rau ai'a 'ome 'iraraa do'ia Jisas.

* **21:1 Galili:** Tara'i 'oha ra 'unua Galili 'inia Taebirias.

⁵ Mia Jisas 'agu awara hura'a o'ani 'iniraa, "Mwane geresae, ra'i ii'a namou ngahui'i?"

Miraa o'ani 'inia, "Ai'a."

⁶ Miagu o'ani ro'u 'iniraa, "Moi gaasia aurui hu'o na'i aba odo 'iniai ora mamoi to'i'i tara'i nei!" Na'i 'oha naraugu gaasia auru 'onaai 'unua ana, ma naasi ma bwara'a tanaraaui raua aho'i 'iniai honu'a ana 'iniai ii'a.

⁷ Naasi mana rongoiusuri na 'ia Jisas na ta'ahia 'a o'ani 'inia Pita, "'Ia Aaha naasi!" 'Oha na rongoa o'asi a Pita, 'a hasi siri aho'i na'i bwana bo hura'a ana ma rege dioi wai, ma arasi siri one.

⁸ Miraaui haru rongoiusuri rau awa moi na'i ora 'anai ogea siri one 'i hu'o na honu 'iniai ii'a. Mana'i dora narau awaieisi ai'a taraa ha'atau, 'a ga'i 'onaa moi ta'i 'arangi mita baaniai one.

⁹ Na'i 'oha narau ataha siriwou, rau 'omesiai ii'a matota na awa na'i hunganai mwagaraha na'i 'eu. Ma ra'i brede ra awa ro'u.

¹⁰ Mia Jisas 'a o'ani 'iniraa, "Moi waa'i mai tara'i ii'a namougu bura'i ngahui'i 'isi."

¹¹ Mia Saemon Pita 'a ta'eha na'i ora ma 'aauhiraau 'anai ogea siri one 'i hu'o na honu 'iniai ii'a. Rau ngahui'ai ta'i 'arangi rima tangahuru mana oru kae ii'a, mana hu'o ai'a do'ai ohogao.

¹² Mia Jisas 'a o'ani 'iniraa, "Mou boi mamoi ngau." Ma ai'a do ta ta'i 'iniraa naigui songa'inia o'ani, "'Iatei nei'oesi?" Suria rau bwane aidangisia hako do 'ia Aaha.

¹³ Jisas 'a hua tanaraaui brede 'anai ngaa, ma hua ro'u i ii'a tanaraa.

¹⁴ Naasi orunai 'oha na 'ia Jisas 'a ha'ata'i tanaraaui rongoiusuri ana'i murinai suruta'e aho'i ana baaniai mae.

Jisas 'A Ha'atee Wetewete Tanaa Pita

¹⁵ Na'i 'oha narau ngau hako, 'ia Jisas 'a ha'atee o'ani 'inia Pita, "Saemon, garena Jon. 'A 'ua? I heita'ahi amua tanaa 'a raha di'uai heita'ahi narau hua i mwane 'ini tanaa?"

Mia Pita 'a aramia o'ani, "'Io Aaha, 'o 'iraraa do'au ta'ahi'o."

Mia Jisas 'a o'ani 'inia, "'Oi hangani'i garei siip agu'i."

¹⁶ Mia Jisas 'a songa'inia ro'u aho'i a Pita o'ani, "Saemon, garena Jon. 'A 'ua? 'O ta'ahiau?"

Mia Pita 'a aramia ro'u o'ani, "'Io Aaha, 'o 'iraraa do'au ta'ahi'o."

Mia Jisas 'a o'ani 'inia, "'Oi 'omesuri ha'agorohi'i siip agu'i."

¹⁷ Mia Jisas 'a songa'inia aho'i ro'ua Pita o'ani, "Saemon, garena Jon. 'A 'ua? 'O ta'ahiau?"

Na'i 'ohasi mia Pita 'a arunga ta'aa'a, suria 'ia Jisas 'a songa'inia ha'atoru 'iniai ta'i heisonga'i moi. Mia Pita 'agu o'ani 'inia, "Aaha, ni mwane mareho 'o aidangisi'i hako'a, 'o 'iraraa do 'inau 'au ta'ahi'o."

Mia Jisas 'a o'ani 'inia, "'Oi hangani'i siip agu'i."

¹⁸ Wai 'unua ha'a-momori tana'o, na'i 'oha 'o haoru, 'o matai ho'osia haari'o i bwana amua, ma'o matai 'ari na'i dora na'oi raba 'ari na'iei. Ma'ata na'i 'oha 'oi wari, 'oi taranga'ini'i rimamu'i hura'a ma ra'i sae he'ete'i narai tosi'o marai wai'o 'ari na'i dora na'o bwa'i raba 'ari na'iei."

¹⁹ 'Ia Jisas 'a hadahada o'asi 'inia Pita, do neina 'ia Pita 'ai aidangisiai mae he'ua nai hua 'anai ha'ahauasaa God. Mia Jisas 'agu o'ani 'inia, "'Oi suriau tarau."

Na Rongoiusuri Na 'Ia Jisas

Na Ta'ahia Di'u

²⁰ 'Ia Pita 'a rihota'i ma 'omesiai haisuri anai rongoiusuri na 'ia Jisas na ta'ahia. (Naasi ni rongoiusuri na abesua wou beia Jisas na'i 'oha narau ngau ani ma songa'inia 'inia mo'o nai usuha'inia tanaraaui maerongana.)

²¹ Hoita, mia Pita 'a songa'inia Jisas o'ani, "Mia mo'osi 'ai 'ua Araha?"

²² Mia Jisas 'a aramia o'ani, "'Onaa na wai 'irisia do'ai tahi tari na'i 'oha nawai aho'i mai, 'e taha na ta'aabemu 'inia? I'oe 'oi suriau."

²³ Na maho na 'unuasi 'a 'adarara 'ari tanaraaui noni hinihini marau 'adoma'inia doni rongoiusurisi 'agu bwa'i mae'a. Ma'ata 'ia Jisas 'a ai'a 'unua o'asi. Ni mareho na 'unua Jisas 'a o'ani, "'Onaa nawai 'irisia do'ai tahi tari na'i 'oha nawai aho'i mai, 'e taha na ta'aabemu 'inia?"

Ha'ahakona

²⁴ 'Inau naasi rongoiusuri nau re'i'i mwane mareho nau usu'i dio 'ini. Mi'ameu hako meu 'iraraa doni mareho nau usu'isi ra ha'a-momori.

²⁵ 'A rago di'u i mareho na haa'ia Jisas nau ai'a usu'i dio na'i bukani. Ma 'onaa nawai usu'i hako dio, 'au 'adoma'inia do ni marewana hako 'a bwa'i 'ohadi buka nawai usu'i 'ini'i mwane mareho 'isi.

Na Tatau'aro Adaa'i Ha'ataari

Gere Mamaani 'Iniai Bukani

'Ira tei nara 'a'auhi'o 'anai aidangisiai ha'atee ana God ma 'anai raha ara'a na'i tahitahi amua beia Jisas Kraest. 'Oi 'adoma'i surisuriai he'ete'i naga'i haa i tahitahi amua 'onaa nara ga'i bwa'i ha'ausuri'o ma'ua 'a'auhi'o.

Na'i Buka Tatau'aro 'a mamaani 'abai'i ha'ausuri 'anai heisoi. 'A hadanga'iniraau noni hinihini tahamora, miraaui na'otara tahamora, miraaui sae tahamora narau hura'a 'anai taroha'inia Taroha Goro. 'Iraau rau haa'i hako i madoraa adaa'i mana ha'a adaa'i mana wetewete adaa'i 'anai tau'aro tanaa God, 'anai 'a'auhiraau nei narau rabasiai hei'a'auhi, ma 'anai mania tanaraau haru sae i taha na 'ia Jisas 'a hau'i tanaraau.

'Iraau sae hinihini na'i madoraasi rau wa'ewa'e di'u ana'i taroha'inia Jisas. Tara'i sae 'onaaia Pol mia Banabas raru hano ha'atau 'anai waa i Taroha Goro. 'Iraau nei narau awa hatara'i moi na'i 'omaa 'onaaia Pita mia Jems raru heitaroha'i suri'i 'omaa bobodaau.

'Igaau ro'u gau to'o madoraa 'anai taroha'inia Jisas tanaraau haru nei. Na'i 'oha na 'oi 'oha'inia Buka Tatau'aro adaaui Ha'ataari 'oi 'adoma'i suriraau mwane narau ha'ausuri'o 'inia Jisas, ma 'oi 'adoma'i suriraau nei na 'o ga'i taroha'inia Jisas tanaraau.

¹ Tana'o Tiofilas:

Na'i buka tahamora agua, 'au usu'i mwani maho na 'ia Jisas 'a haa'i ma ha'ausuringa'ini'i, na'i madoraa na taraawa'a hauai tau'aro ana

² tari dangi nara waia ara'ai aro. Na'i na'o maragu waia ara'ai aro, 'a heiatenga'i 'inia mena anai Hi'ona Maea tanaraau Ha'ataari ana'i na 'ome sigihiraau.

³ Na'i murinai mae ana, 'e hai tangahurui dangi na ha'ata'inia haaria tanaraau na'i 'ado herehere 'anai ha'ata'inia mora do'ia 'a tahi aho'i ha'amomori. Rau re'ia ma hadanga'inia tanaraau heimarungi ana God.

⁴ Na'i 'oha na awa mau beiraau, 'a o'ani, "Moi abu hano baaniai Jerusalem. Moi mamasiai Hi'ona Maea na 'ia Amagu na duruduru 'inia, me'inau ro'u 'au bwane mania tana'amou.

⁵ 'Ia Jon 'a bwareomaea'amou 'inia wai, ma bwa'i orea mia God 'ai bwareomaea'amou 'inia Hi'ona Maea."

'Ia Jisas 'A Ara'ai Aro

⁶ 'Oha 'iraau Ha'ataari rau awa goni beia Jisas, rau songa'inia o'ani, "Araha. 'A 'ua? I'oe 'oi haua aho'i heimarungi na'i 'ohani tanagaau ai Jiu?"

⁷ Mia Jisas 'a o'ani, "'Ia moi Amagu na to'oraai mena 'anai ha'a-arataraai madoraa 'ana. Ma ai'a 'iaamou 'anai 'iraraa 'oha he'ua nai to'o.

⁸ Ma'ata 'i'amou moi honu 'inia mena anai Hi'ona Maea na'i 'oha nai dio maai sirih'amou. Ma moi taroha'iniau na'i Jerusalem, ma na'i hako'i Provensi Jiudea ma na'i Provensi Samaria mana 'ari suria hako'i marewana."

⁹ 'Agu ha'atee hako mia God 'a waia ara'a 'oha rau wanasia maua Jisas. Mana rorodo 'a kukuha bwarasia maraugu ai'a re'ia'a.

¹⁰ Miraaui rau wana to'o buu mau ara'ai aro. Raugu 'asu'a ma'e rua sae raru to'oni 'ini to'oni mamaahui raru ura na'i bobodaau.

¹¹ Raru o'ani, "'A 'ua na 'i'amou saeni Galili mou ura 'inia na'i 'ini mamougu wana ara'ai aro? 'Ia Jisas nara waia ara'ai aro ani, 'ai boi aho'i ro'u mau 'onaa herehere namou re'ia na'i 'oha 'ia 'a aho'i ara'ai aro."

Sae 'Anai Orisia Jiudas

¹² Na'i muri 'iraaui Ha'ataari rau hano baaniai hungahungai 'Oliv marau 'ari aho'i 'omaai Jerusalem. I hungahungai 'Oliv 'a gai 'onaa moi ta'i kilomita baaniai Jerusalem.

¹³ Rau ta'eha na'i ahii na'i ruma ahaaha narau bwane awa-awa na'iei. 'Iraaui Ha'ataari narau awa 'isi, 'ia Pita, Jon, Jems, Andru, Pilip, Tomas, Batolomiu, Matiu, Jems garena Alfias, Saemon—'ia mo'o na raba ha'ahakoai Mwaeraha adaui Rom, mea Jiudas garena Jems.

¹⁴ 'Iraaui Ha'ataari rau boi goni tarau na'i 'isi beiai ta'i 'ado'ado 'anai ha'arahesi. 'Iraau tara'i urao ro'u beia Meri inana Jisas, miraaui do'orana'ia Jisas, rau matai boi goni ro'u beiraaui.

¹⁵ 'E ta'i 'oha, 'a gaarangi 'onaai ta'i 'arangi mana rua tangahuru 'iniraaui noni hinihini rau rurugoni ro'u. Mia Pita 'a ura ara'a ma ha'atee tanaraau.

¹⁶⁻¹⁷ 'A o'ani, "Arai do'ora, na'i 'oha bwani 'ia Deved 'a ha'atee 'iniaai mena anai Hi'ona Maea 'anai 'unuai maho 'abaia Jiudas. Mana maho na 'unua 'a to'o'a. 'Ia Jiudas 'e ta'i 'inigaau ma tau'aro beigaau miagu waia mai ruruha 'anai daua Jisas.

¹⁸ "Mia Jiudas 'agu horiai dorai ano 'iniaai ha'a nara haua tanaa 'iniaai hereta'aa na haua. Ma na'i 'isi nagu ahoda abwa-abwa na'iei mana ahuna 'a pusu mana mwane maho na'i raroni ragu teteho hura'a.

¹⁹ Ma na'i 'oha 'iraaui sae na'i Jerusalem rau sadoia o'asi, rau 'unua 'iniaai dorasi Akeldama. 'Ado'ado 'ana 'e Ano ni 'Abu.

²⁰ "Na'i buka ni Psalm, 'ia Deved 'a usua o'ani, 'Ruma ana 'ai awa bwaranga moi mamoi abu watea ta sae nai mono na'iei.*

Ma o'ani ro'u,

"A goro 'onaa ta sae he'ete'i naigu tagora orisiai saesi.†

²¹⁻²² "Naasi gau rabasia ta sae he'ete'i nai 'a'auhigaau 'anai taroha'inia do 'ia Jisas 'a suruta'e aho'i baaniai mae. Tarana naasi gai 'ome sigihia ta ta'i 'iniraaui nei narau bwane awa-awa beigaau taraawa'au mau na'i madoraa 'ia Jon 'a bwareomaeaa Jisas tari madoraa 'ia God 'a waia aho'i ara'ai aro."

²³ Hoita, 'e rua sae narau wai'ado'ado 'inia, 'ia Mataeas mia Josep Basabas, nata atana 'ia Jastas.

²⁴ Marau ha'arahesi o'ani, "Araha, i'oe 'o aidangisi'i 'ado'ado adaa'i mwani noni hako. 'Oi ha'ata'inia tana'ameui nei na'o 'ome sigihia

²⁵ 'anai ha'i Ha'ataari orisia Jiudas, 'ia mo'o na rihota'i baanigaau ma 'ari na'i huunai dora na araria."

²⁶ Maraugu gaasi ha'ara ma auru na'i hungana Mataeas. 'Iia ro'u naagu siri beiraaui ta'i tangahuru mana ta'i Ha'ataari.

2

Boi Anai Hi'ona Maea

¹ Ma na'i dangi na 'iraaui Jiu ra ha'ato'oai Rongo nara 'unua 'iniaai Pentikos,* 'iraaui hako sae hinihini rau rurugoni na'i ta'i dora.

² Raugu 'asu'a marau rongoa'ai maho na rongo raha na dio mai baaniai aro. 'A rongo 'onaai kae ro'a raha. Mana aohanai ro'asi 'a rongo raha hako 'ari raronai ruma narau awa 'ieisi.

³ Miraaui re'i'i maho ra 'ome 'onaai gere ngarungarui 'eu ra 'adarara na'i raronai rumasi. Ra dio na'i hungadaau hako.

* **1:20** 1:20 Psalm 69:25 † **1:20** 1:20 Psalm 109:8 * **2:1 Rongo nara 'unua 'inia Pentikos:** Wanasia na'i Diksonari.

⁴ Mana Hi'ona Maea 'agu sirihiraau maraugu taraawa'a hadahada 'ini'i mwani hadahada he'ete'i hairiu na Hi'ona Maea na hau'i tanaraau.

⁵ Ma na'i 'ohasi, 'a ragoi saeni Jiu na'i Jerusalem narau boi baani'i mwani kantri he'ete'i hairiu na'i marewana narau ai'a aidangisia maua Jisas, ma'ata ra 'adoma'i ha'ahihi'aa God.

⁶ Na'i 'oha rau rongoai maho na rongo 'onaai ro'a rahasi, rau goni ro'u mai beiraau noni hinihini. Marau heimwaota'i, 'inia 'iraau noni hinihini rau hadahada 'ini'i hadahada adaa'i.

⁷ Rau heimwaota'i ma bu'o i ahudaa'i marau o'ani, "Romwane! Sae 'inisi ra'i saeni Galili moi neiraaunisi!

⁸ 'A he'ua naraugu 'irara'i 'ini'i hadahada agaa'isi?

⁹ Tara'i sae gau boi baaniai Patia, Midia, ma na'i Elam. Tara'i abe baaniai Mesopotemia, Jiudea, Kapadosia, Pontas, Eisia,

¹⁰ Frijia, Pamfilia, Ijip, mana'i Libia gaarangi'ai Saerin. Ma tara'i abe gau boi ro'u baaniai Rom.

¹¹ Tara'i nei ra'i sae ni Jiu ha'a-momori ma tara'i nei ra awa suria moi ringeringe agaau Jiu. Tara'i sae gau boi baaniai Krit mana'i Araibia. Me'igaau hako gau rongoai hadahada adaa'u 'ini'i hadahada agaa'i 'abai'i kae maho na hau'ia God."

¹² Rau heimwaota'i ma kakui ahudaa'u ro'u, marau taraawa'a songa'iniraa'u hairiu o'ani, "'E taha gasi naasi romwane?"

¹³ Tara'i abe rau ha'ada'ada'a 'iniraa'u, rau o'ani, "Rau gonogono gasi marau bweu'a."

Hadahada Ana Pita

¹⁴ Miraau hako'i ta'i tangahuru mana rua Ha'ataari rau ura ara'a mia Pita 'a ha'atee raha tanaraau sae narau goni mai 'isi o'ani, "'T'amoui sae ni Jiu me 'i'amou ro'u i sae namou awa na'i Jerusalem, moi bahurongo goro mawai ha'a-aidangisi'amou 'inia maho na to'o na'i 'ohanisi.

¹⁵ 'T'amou mou 'adoma'inia do 'iraau sae 'ini rau gonogono marau bweu'a. Magu ai'a! 'Agu angi siwa moi haho'oa 'ohanisi.

¹⁶ Ma'ata maho namou re'ia na to'o na'i 'ohanisi, 'ia Rarabea Joel 'a bwane taroha'inia mai ga'u na'i 'oha bwani.

¹⁷ 'Ia God 'a o'ani,

'Na'i 'oha nai raumwadu mai hahakonai dangi,

wai ha'ataaria dio i Hi'ona Maea agua maai sirihiai tahinganai 'ado sae.

Miraau gare amoo'i rai haa'i ha'atee rarabea.

'Iraau sae haoru amoo'i rai re'i'i ha'amaranga,

miraau noni wari amoo'i rai re'i'i ha'amaranga na'i mauru.

¹⁸ Ha'amomori! Na'i 'ohasi wai ha'ataaria dio i Hi'ona Maea agua maai sirihiraau noni tatau'aro agu'i, rei'uaa sae mwane ma'ua urao, marai haa'i ha'atee rarabea.

¹⁹ Mamoi re'i'i ha'ara mana ha'abu'oahu nawai haa'i na'i ahoasara mana'i ano.

I 'abu, ma 'eu mana kaeni asuasua raha rai ha'ata'i.

²⁰ Na sina 'abwa'i rara, mana hura 'ai wangawanga 'onaai 'abu, maigu to'o i dangina Araha na ororiu di'u ma hauasa.

²¹ Miraau nei rau ha'arahesia God rai tahi.'†

²² "Moi rongo'i ha'atee 'ini noni nai Israel! Mou 'iraraa goro do 'ia Jisas ni Nasaret 'a haa'i mwani ha'abu'oahu mana ha'ara, 'inia mareho 'isi ra to'o na'i kantri agaau. Ni mwani ha'abu'oahu na haa'isi, ra ha'ata'inia goro hura'a do'ia God naasi na ha'ataaria mai.

† 2:21 2:17-21 Joel 2:28-32

²³ Me suriai hei'irisina mau mai, 'ia God 'a ha'awatea do moi daua Jisas. Mamou ha'amaesia 'oha mou taranga'inia tanaraau noni ta'a'i 'anai rabu ahita'inia na'i dadaahoro.

²⁴ Mia God 'a ruhasia baaniai mena anai mae ma ha'atahia aho'i. 'Iniai mae, 'abwa'i ha'abwarasia baaniai tahi aho'i.

²⁵ Na'i buka ni Psalm, 'ia Deved 'a hadanga'iniai mae ana Jisas o'ani, "A bwa'i ta 'oha'a ro'u nawaigu mamaa'usia ta maho, 'inia i'oe a Araha God na'o awa tarau beiau. I'oe 'o na'otaragu.

²⁶ Naasi, 'au wa'ewa'e raha, mau hadahada ha'i wa'ewa'e ro'u.

'Inau 'au 'iraraa dowai tahi aho'i,

²⁷ 'inia 'o bwa'i wateai abenai noni maea amua 'anai ngabo na'i ano, mana aungagu do'ai awa tarau na'i dora adaui nei nara mae.

²⁸ I'oe 'o ha'ata'inia tanaau i tara 'anai tahi tarau, minau wa'ewa'e 'iniai awa amua beiau.†

²⁹ "Inau raba 'unua tana'amou mwani sae agu'i, 'abaiai wauwa agaau na'i 'oha bwani, 'ia Mwaeraha Deved. 'Iia 'a bwani mae mara bwani toringia orea mana barabarana 'a awa mau tari dangini.

³⁰ 'Ia Deved 'e Rarabea, ma 'iraraa do 'ia God 'a haua tanaa i duruduru hihi'a do baaniai burungana haaria nai ha'amwaeraha iei ta sae 'onaai haaria.

³¹ 'Ia Deved 'a bwane 'iraraai maho na'ia God nai haua. Naia na ha'atee rarabeanga'iniai suruta'e nai haa Ha'atahi ma ro'u do 'iia 'a bwa'i awa tarau na'i dora adaui nei nara mae, mana abena 'a bwa'i ngabo.

³² "Ia God 'a ha'a-suruta'ea ha'a-momori a Jisas baaniai mae. 'Iameu hako meu re'ia 'ini'i maamee'i.

³³ 'Ia Godi Ama 'a waia ara'a ma ha'aheinagua na'i aba odona 'anai ha'a-ororiua. Mana Ama 'a ha'awatea Jisas 'anai ha'ataariai Hi'ona Maea tana'ameu 'onaai bwane durua ana God. Ma naasi maho namou rongoa mamou re'ia na'i 'ohanisi.

³⁴ Ma'ata 'ia Deved 'a ai'a ara'ai aro 'anai heinagu na'i aba odona God, me 'iia 'a o'ani,

"Ia Araha God 'a o'ani 'inia Araha agua,

"Oi heinagu na'i aba odogu,

³⁵ tari 'oha wai nugaraau dio i maerongamu na'i bahainai heimarungi amua." †§

³⁶ "Ma naasi 'i'amou hakoi sae ni Israel, mou ga'i aidangisia dona 'ia Jisas na mou ngahu ha'amaesia na'i dadaahoro ani, 'ia God 'a 'ome sigihia na Araha mana Ha'atahi."

³⁷ Na'i 'oha raugu rongoa o'asi, rau ta'i kaeni arunga ta'aa di'u marau songa'inia Pita miraaui tara'i Ha'ataari ro'u o'ani, "Romwane! 'E taha meigu haua?"

³⁸ Mia Pita 'a aramiraau, 'a o'ani, "Moi rihosi baani'i ora-ora'a amoo'i mamoi bwareomaea 'iniai atana Jisas Kraest. Mia God 'a duruduru 'inia do 'ai 'adoma'i nugasi'i ora-ora'a amoo'i maai watea mai Hi'ona Maea tana'amou.

³⁹ Na durudurusi, 'a haua tana'amou beiraui gare amoo'i, miraaui ro'u i nei rau awa ha'atau. Ha'amomori, na durudurusi 'a haa tanaraau hako ro'u i nei na 'ia God na 'unuraau."

⁴⁰ 'Ia Pita 'a hadahada orea tanaraau ma ha'ata'u'uraui wetewete o'ani, "Moi 'ome'ome goro, mou gasigu siri na'i ha'a-mama'ai na'i dangi ni hihiri 'onaairaaui sae ta'a'i na'i 'ohanisi."

⁴¹ Naasi 'iraau nei rau rongo'i ha'atee ana'ia Pita marau hinihini, ra bwareomaeaa na'i 'ohasi. Na'i madoraasi, 'a ga'i 'onaai oru merui sae narau aho'ita'i sae hinihini.

⁴² Miraausi rau mwa'emwa'e goro 'anai baturongo'i ha'ausuringa'i adaa'i Ha'ataari marau 'a'auhiraau hairiu. Marau matai boi goni ro'u 'anai ngau* mana ha'arahesi.

Tahingadaaui Noni Hinihini

⁴³ 'Iraau Ha'ataari rau haa'i mwani ha'ara mana ha'abu'oahu 'inia mena na'ia God 'a haua tanaraau. Miraaui noni hunga rau heimwaota'i di'u.

⁴⁴ Me 'iraau noni hinihini rau ruru goni tarau marau taraawa'a hisu hairiu 'ini'i bori adaa'i 'ini'i 'ado maho rau rabasi'i.

⁴⁵ Marau raonga'ini'i ro'u i toto'ora adaa'i, ma tara'i maho ro'u 'anai 'a'auhiraau ro'u i nei rau awa ha-ha'aroha'a.

⁴⁶ Rau boi goni 'anai ha'arahesi 'ado dangi na'i Ruma Maea ana God marau mwa'emwa'e goro 'anai 'ari goni ro'u suri'i ruma adaa'i 'anai ngaugoni beiai ahu wa'ewa'e.

⁴⁷ 'Ado 'oha moi narau 'unu ha'aasaa God, miraaui noni rau 'adoma'i ha'ahouraaui. Mana ruruha adaaui 'a rago hanehane ara'a moe'a 'ado dangi 'iniraaui nei na 'ia God 'a ruhasiraau baani'i ora-ora'a adaa'i.

3

Sae Pwaki

¹ 'E ta'i dangi na'i angi oru abaidangi, 'ia Pita mea Jon raru 'ari Ruma Maea ana God, 'inia naasi madora nara matai ririhunga'i.

² 'Ado dangi 'e sae na pwaki mau mai 'oha na huta, ra suru'ia mai 'anai ha'aheinagua na'i bobonai maraaruma anai bara na'i Ruma Maeasi 'anai ha'angoni ha'a beiraau sae rai siri 'anai ha'arahesi. Na maraarumasi ra 'unua 'inia "Maana Bara 'Ome Goro."

³ Ma na'i 'oha na re'ia Pita mea Jon raru boi 'anai siri Ruma Maea, ma ha'angoni ha'a beiraru'a.

⁴ Mia Pita mea Jon raru wanasia mia Pita 'a o'ani, "'Osu wana ga'u mai 'ini.'"

⁵ Mia mo'osi 'a wanasiraru ma 'adoma'inia do rarui hisungia 'inia ta maho.

⁶ Mia Pita 'agu o'ani moi 'inia, "'Inau ai'a to'o ha'a. Ma'ata 'e maho he'ete'i moi nau to'ora, ma naia nawai haua tana'o. Wai 'unua tana'o na'i atana Jisas Kraest ni Nasaret, 'oi ura ara'a ma'oi hahano!'"

⁷ Ma dau na'i rima odona ma ha'a-suruta'ea. Na'i mau 'ohasi na rua uwana rarugu wetewete aho'i,

⁸ ma ura ara'a ma taraawa'a hahano. Marau ta'i siri wou na'i Ruma Maea mia mo'osi 'a regerege ma 'unu ha'aasaa God.

⁹ Ma na'i 'oha 'iraau sae rau re'iai hahano ana ma 'unu ha'aasaa God,

¹⁰ rau 'ome 'iraraa do'ia mo'osi na heinagu tarau na'i bobonai maraaruma anai bara na'i Ruma Maea 'anai ha'angoni ha'a ani. Ra bu'o hakoi ahudaa'i 'inia hahano aho'i na haa mo'osi.

Hadahada Na Haua Pita

Na'i Ruma Maea ana God

¹¹ 'Iraau sae rau heimwaota'i di'u marau 'eba mai beiraau na'i Ruma Maea na'i dora ra 'unua 'inia "Abaihare ana Solomon." Na'i 'ohasi, na sae na pwaki ga'u ani, 'a dau mau wou beia Pita mea Jon.

* 2:42 *Ngau*: Rau boi goni 'anai ngau mana'i muri rau hauai ngau maea.

12 Ma na'i 'oha 'ia Pita 'a re'ia do rau goni mai beia, 'a o'ani 'iniraa, "Mwani noni ni Israel, 'a 'ua namou heimwaota'i mamou wana wetewete 'ini'amiria? Mou 'adoma'inia do miri ha'ahahanoa mo'oni 'inia mena amiria haarimiria ma'uasi mou 'adoma'iniai do miri odo-odo na'i maana God na miri ha'ahahanoa 'inia mo'oni? Ai'a!

13 God adaui wauwagaa'i, 'iraaui Ebrahim mea Aisak mea Jekop, na hauai maho namou re'iani, neina 'igaau gai ha'aasaai atanai noni tatau'aro ana, 'ia Jisas. Mi'amougu taranga'inia Jisas tanaraui saemaua adaa'i Rom 'anai ha'amaesia. Rei'uaa na'ia Paelat 'a raba ruhasia dadara'a mi'amou mou ai'a rabasia o'asi.

14 T'amou mougu ha'angonia do'ai ruhasia dadara'a i sae hahaingahu. Mamougu 'itaai sae na awa maea ma odo-odo.

15 Mougu ha'amaesia mo'o na matai haua tana'amoui huunai tahi. Ma'ata 'ia God 'a ha'a-suruta'ea aho'i baaniai mae. T'ameu nameu 'omera'i maa 'iniai mahosi.

16 T'amou mou re'iai sae pwakini mamou aidangisia ro'u. T'amiria miri ha'ahahanoa mo'oni 'iniai mena ana Jisas. Meu hinihiniai atana Jisas ma naia nagu hahano aho'i 'inia i sae pwakini.

17 "Mwani sae agu'i, 'au 'iraraa do 'imoou mana na'otara amoo'i mou hauai maho ta'aa tanaa Jisas 'inia mou ai'a aidangisia do'ia God na ha'ataaria mai.

18 Ma'ata 'ia God 'a bwane ha'ateenga'inia tanaraui Rarabea doni Ha'atahi 'ai rongomaata'i, ma naanigu ha'ato'oanai maho na bwane ha'atee duruduru 'inia ani.

19 Naasi moi orisi mamoi rihota'i tanaa God mia God 'ai ha'a-ai'a'i ora-ora'a amoo'i.

20 'Onaa moi haua o'asi, 'ia Araha God 'ai ha'a-o'ori'i 'adoma'imoo'i maigui ha'ataaria aho'i maia Jisas Kraest tana'amou. 'Ia naasia mo'o na 'ome sigihia 'anai Ha'atahi aga.

21 Ma'ata 'ia Jisas 'ai awa ga'u na'i aro tari madoraa na'ia God 'ai ha'ahaoru'i hakoi mwani maho, 'onaai bwani 'unua adaui Rarabea maea na'i 'oha bwani.

22 Ma 'onaai bwani 'unua ana Moses. 'A o'ani, "Ia God 'ai 'ome sigihia ta Rarabea 'onaaiu baaniraui sae amoo'i, 'iraaui Jiu. Moi rongosuri'i mwani mareho nai 'unu'i.

23 Mia tei na bwa'i rongosuriai Rarabeasi, 'a bwa'i awa bei'amou na'i ta'i ruruha mia God 'ai ha'a-ai'aa.'

24 "Maho naragu to'oto'o na'i madoraanisi, 'ia Samiuel miraaui Rarabea naraugu awa ro'u na'i muri, rau bwani maani'i hako'a.

25 T'amou ra'i gare adaa'i Rarabea 'isi, ma naasi ni duruduru na'ia God 'a haua tanaraui wauwa amoo'i 'ai 'ari ro'u tana'amou. 'Inia God 'a duruduru tanaa Ebrahim do 'iraaui hakoi sae ni marewana rai dauai ha'agorohi baaniai burungana Ebrahim.

26 Ma naasi, 'ia God 'a 'ome sigihiai sae tatau'aro ana, 'ia Jisas, ma ha'ataaria mai neina moi dauai ha'agorohi ana mamoi rihosi mamoi nugasi'i baronga ta'a'i amoo'i."

4

'Ia Pita Mea Jon Raru Ura

Na'i Maadaui Kansol

1 'Ia Pita mea Jon raru hadahada mau tanaraui noni hunga, me 'iraaui tara'i Piriisi beiai bwauodo adaui sae hehei'oi nara 'omesuriai Ruma Maea ana God, miraaui ro'u tara'i Sadiusi rau ada'a.

² Rau taesu'a di'u 'ana Pita mea Jon 'inia maania adarua doni suruta'e aho'i ana Jisas 'a ha'ata'inia do 'iraau sae rai matai suruta'e aho'i ro'u baaniai mae.

³ Raugu ha marau daurarua'a. Ma 'inia 'a su'urahi'a marau nugararua na'i rumaniho'o tari haho'oa.

⁴ Ma ragoi nei rau bahurongorarua rau aho'ita'i sae hinihini. Ma naasi goni beiraaui nei narau bwani hinihini, 'a 'onaai rima merui sae.

⁵ Na'i moi nata dangi, me 'iraau bwauodo miraaui saemaua adaa'i Jiu, beiraaui Ha'ausuri 'anai Ringe ana'ia Moses rau goni'a mai na'i Jerusalem.

⁶ 'Ia 'Anas, i Na'ohadaaui Piriisi, mea Kaeafas, mea Jon, mea Aleksanda miraaui ro'u tara'i nei na'i burungana 'Anas rau boi ro'u.

⁷ Marau waia maia Pita mea Jon. Rau ha'a-urasirarua na'i 'ubutadaau maraugu songa'inirarua o'ani, "Mena ana tei mana mena he'ua namuru haua 'anai ha'agorohia aho'i a mo'oni?"

⁸ Mia Pita i Hi'ona Maea 'a rabe beia ma aramiraaui o'ani, "Tana'amou bwauodo adaa'i Jiu, mi'amou tara'i saemaua ro'u,

⁹ na'i 'ohani mou raba kootimiria 'inia haua amiriai maho na goro tanaai sae na pwaki uwana. Mamou raba aidangisia ro'u i here miri haua nagu goro aho'i 'inia.

¹⁰ Mawai rangasia tana'amou miraaui hako ro'u sae ni Israel do sae na ura na'i maamouu nisi, 'a goro aho'i 'inia mena ana Jisas Kraest ni Nasaret namou ngahu ha'amaesia na'i hunganai dadaahoro ani, mia God 'a ha'atahia aho'i ro'u moi.

¹¹ Mia Jisas naasi na Usu-usu Maea 'a hadanga'inia o'ani, 'Na hau 'i'amou sae tatau'aro ruma mou 'itaa,

'agu buna ha'i hau ororiu di'u na'i bani anai ruma.'*

¹² 'Ia moia Jisas na matai ruhasigia baaniai ora-ora'a. 'A bwa'i ta sae'a ro'u na'i marewana nagaigui 'u'uria!"

¹³ 'Iraau sae rau ha'akootia Pita mea Jon, rau heimwaota'i, 'inia raru ai'a mamaa'usiraaui, rei'uaa raru ai'a sae ororiu mararu ai'a skuru goro. Ma'ata 'iraau sae 'isi, raugu 'adoma'i aho'isia do 'iraruasi raru matai 'aariha beia Jisas.

¹⁴ Mana sae na goro aho'isi, rau ta'i ura ro'u. Ma bwara'a 'anai 'unua ro'u ta maho.

¹⁵ Raugu bairaaui moi wera orusi hura'a, 'inia dorasi 'iaadaaui Kansol† 'Iraau moi haariraaui naraugu tara mamaaniai mahosi.

¹⁶ Rau o'ani, "Gaigu ha'ahe'uararua rua mwanesi? 'Inia 'iraau hakoi sae ni Jerusalem rau bwane 'iraraa'ai haua adaruai ta'i ha'abu'oahu ani, rau bwa'i hinihinigaau 'onaa gai 'unua do 'a ai'a ha'a-momori.

¹⁷ Magu ai'a goro i ha'ausuringa'i 'osi, rau gasi rongoa ro'u tara'i sae. Gai ha'atee ha'abasurarua wetewete mararui abu taroha'inia'a a Jisas."

¹⁸ Miraaui 'unurarua aho'i mai marau ha'atee wetewete tanararua do rarui abu maania ma'uasi ha'ausuria ro'u ta sae 'inia Jisas.

¹⁹ Mia Pita mea Jon raru aramiraaui o'ani, "Moi wai'ado'ado goro. Nei he'ua na odo-odo? Mirii araisuri'amou ma'uasi araisuria God?"

²⁰ 'I'amiria miri bwa'i agoheta'i maani'i maho namiri re'i'i mamiri rongoi."

²¹ Miraaui saemaua na'i Kansol rau ha'abasurarua wetewete di'u ro'u wou. Maraugu nugasirarua. 'Inia 'a bwara di'u 'anai ha'a-mama'airarua, 'inia rau 'ome 'iraraa do 'iraau noni hunga rau ha'aasaa moe'a God 'inia maho narau re'ia ani.

* 4:11 4:11 Psalm 118:22 † 4:15 **Kansol:** Wanasia na'i Diksonari.

22 Mana sae pwaki na to'o tanaa i ha'abu'oahusi, na harisina 'a di'ua'ai hai tangahuru.

Ha'arahesi Adaau Sae Hinihini

23 Rau nugasirarua woua Pita mea Jon mararu 'ari aho'i beiraaui sae hinihini mararu maani'i mwani maho 'iraau Na'ohadaa'i Piriisi miraaui saemaua rau 'unu'i tanararua.

24 Ma na'i 'oha rau rongoi maho raru maaniasi, 'iraau hako rau ha'arahesi goni o'ani, "God, i'oe na'o Mwaeraha, mi'oe na'o ha'apwa'araai ahoasara mana ano mana asi mana mwani maho na'i rarodi.

25 Mana Hi'ona Maea amua na ha'atee hura'a na'i ngoonai wauwa ameeu, i sae tatau'aro amua Deved. 'A ha'atee o'ani,

'Ni 'uaana 'iraau sae rau ai'a Jiu rau taesu'a 'inia?

Ni 'uaana narau hau'i 'inia i ha'aradorado nara bwa'i uranga'ini'i?

26 'Iraau mwaeraha ni marewanani rau ha'aagau 'anai hei'oi.

Miraaui nei rau marungiai marewanani rau hauai ta'i ruruha marau ha'aagau 'anai hei'oi beia God

mana nei na 'ome sigihia 'anai Ha'atahi.'‡

27 "Ma naasi taha na to'o na'i 'omaanisi! 'Ia Herod Antipas mea Pontias Paelat raru hauai ta'i ruruha beiraaui nei rau ai'a Jiu mei beiraaui ro'u i Israel 'anai ura bwarasia Jisas, sae tatau'aro maea amua na'o 'ome sigihia 'anai Ha'atahi.

28 Ni here raugu hauasi, 'a 'ari moi suriai maho na'o bwane ha'arangasia mau mai 'oha bwani do 'ai o'asi suriai hei'irisi mana mena amua.

29 God, 'oi 'ome riariaa goro na'i 'ohani hadahada wetewete adaau saemaua tana'ameu. 'Oi 'a'auhi'ameu sae tatau'aro amu'i, mei abui maaa'u 'anai taroha'iniai ha'atee amua.

30 'Oi ha'ata'iniai mena amua mamei ha'agorohi'i aho'i nei ra daoha, mamei haa'i ha'abu'oahu mana ha'ara ro'u 'iniai atana Jisas, sae tatau'aro maea amua."

31 Raugu ha'arahesi hako moi wou, mana ruma narau awa na'ieisi 'a 'ihara'i'a. Mana Hi'ona Maea 'agu sirihiraaui hako ma na'i muri raugu wetewete 'anai taroha'iniai Taroha Goro 'inia Araha.

'Iraau Noni Hinihini Rau Hisu Hairiu

32 Na'i 'ohani, 'iraau sae hinihini rau to'oraai ta'i 'ado'ado, ma ai'a ta ta'i nei beiraaui nai 'adoma'inia 'anai to'oraa haaria ta maho. Na maho rau to'ora'i 'iaadaa'i goni hako.

33 'Iraau Ha'ataari rau wetewete di'u 'anai maaniai suruta'e aho'i ana Araha Jisas baaniai mae. Mia God 'a ha'agorohiraaui di'u.

34 Ma ai'a ta nei ro'u beiraaui noni hinihini nai pwapwaku 'inia ta maho. 'Inia 'iraau nei rau to'o dorai ano ma'ua to'o ruma rau matai raonga'ini'i ro'u mana ha'a ra hori'i 'ini'i

35 raugu haa'i tanaraau Ha'ataari. 'Iraau naraugu ha'atora'ini'i tanaraau i nei narau 'irisiai hei'a'auhi.

36 Ma 'e ta'i sae baaniai burungana Livae na huta na'i marau Saepras na atana 'ia Josep. Ma'ata 'iraau Ha'ataari rau matai 'unua ro'u 'inia Banabas, ni 'ado'ado 'anai atasi "Sae na ha'a-o'oriai 'ado'adonai sae."

37 'Ia ro'u 'a raonga'iniai dorai ano ana mana ha'a 'a haua tanaraau Ha'ataari.

5

Ta Ananaeas Mea Safaera Raru Pwari'iraau Ha'ataari

‡ 4:26 4:25-26 Psalm 2:1-2

¹ 'E ta'i 'oha, 'e sae na atana 'ia Ananaeas beiai urao ana, 'ia Safaera, raru raonga'inia ro'u ta'i dorai ano adarua.

² Raru 'adoma'i aratara 'anai pwari'iraau Ha'ataari mararu giruai dora 'inia ha'asi do raruigu to'oraa haarirarua. Mana nata dora raru haua tanaraau.

³ Mia Pita 'a o'ani 'inia Ananaeas, "'Iniai 'uaana na'o ha'awatea 'inia Saetan 'anai tau'aro na'i 'adoma'imu? 'Iniai 'uaana na'o pwari'ia 'inia Hi'ona Maea, na'ogu girua 'inia nata aba 'inia ha'a nara horia 'inia dorai ano na'o raonga'iniasi?

⁴ Na'i 'oha 'o ai'a raonga'inia mau i dorai anosi, dorai anosi 'iaamua haari'o. Ma rei'uaa no'o raonga'inia mana ha'a ra horia 'inia 'iaamua ro'u mau. Naasi, ni 'uaana no'ogu raba pwari'i 'inia? I'oe 'o ai'a pwari'iraau moi inoni, ma'ata 'o pwari'ia ro'ua God."

⁵ Na'i 'oha 'ia Ananaeas 'agu rongoa moi 'unu o'asi ana Pita, ma rahuta'i dioi ano ma mae'a. Miraau nei rau rongoai maho na to'osi rau mamaa'u raha di'u.

⁶ Tara'i gere sae rau siri mai marau hiri ho'uai abena Ananaeas marau waia hura'a wou marau 'ari toringia.

⁷ 'A gaarangi 'onaai oru 'aoa na hako maagu siri mai ro'u urao ana Ananaeas na'i rumasi. 'Ia 'a ai'a 'iraraai maho na to'o beiai mwane ana.

⁸ 'Ia Pita 'a o'ani 'inia, "'A 'ua? Naia hako'ai ha'a nara horia 'inia dorai ano amurua ani naanisi?"

Mia aramia o'ani, "Naia moi naasi."

⁹ 'Ia Pita 'agu o'ani 'inia, "Ni 'uaana namuru 'adoma'i aratara 'inia 'anai pwari'iai Hi'ona Maea ana God 'anai sadoia 'onaa 'ai ha'a-mama'ai'amou ma'ua bwa'i? 'Ome, 'iraau gere sae narau toringiai mwane amua neirau'a hura'a wou maraarumasi. 'Iraau rai suru'i'o hura'a ro'ua'ana!"

¹⁰ Na'i moi 'ohasi 'a rahuta'i dio na'i maana Pita ma mae'a. Miraau gere sae rau siri mai marau 'omesia do 'a mae'a ro'u. Rau suru'ia hura'a marau toringia na'i bobonai mwane ana.

¹¹ Miraau sae hinihini beirau nei rau rongoai maho na to'osi, rau mamaa'u hako.

Mwani Ha'abu'oahu Mana Ha'ara

¹² 'Iraau sae hinihini rau matai boboi goni na'i "Abaihare ana Solomon," 'e ta'i dora na'i Ruma Maea ana God. Miraau Ha'ataari rau haa'i mwani ha'abu'oahu mana ha'ara na'i maadaui noni hunga.

¹³ 'Iraau nei rau ai'a noni hinihini rau mamaa'u 'anai boi goni beirau. Rei'uaa na o'asi, 'iraau sae 'isi rau 'adoma'i ha'a-hihi'araui nei hinihini.

¹⁴ Ma rago ro'u i sae mwane mana urao rau aho'ita'i sae hinihini marau siri wou 'anai ha'i ta'i ruruha beirau sae hinihini.

¹⁵ Suriai re'ia adaui mwani ha'abu'oahu narau haa'i Ha'ataari, 'iraau sae rago rau waa'i mai sae daoha marau ha'adaohi'i suri'i hi'o mana be'a na'i bobonai tara. Na'i 'adoma'idaa'i do na'i 'oha 'ia Pita 'ai tahahoro mai mana nununa 'ai marumarusirau sae daoha 'isi marai goro'a aho'i.

¹⁶ 'A rago di'u i sae suri'i gere 'omaa gariai Jerusalem narau goni mai ro'u. Rau waa'i mai sae daoha mana nei ra bwauni'i adaro marau goro hako aho'i.

Ra Kootirau Ha'ataari

¹⁷ I Na'ohadaui Piriisi mirau nei rau tau'aro beia na'i ruruha adaui Sadiusi, rau taesu'a di'u 'inia rago anai sae nara boi 'ado 'oha beirau Ha'ataari.

¹⁸ Marau daurau mara nugarau na'i rumanih'o.

19 Ma na'i moi rodo, 'ia God 'a ha'ataariai enjel ana ma tahangiai maraaruma anai rumanoho'o tanaraaui Ha'ataari. 'A na'otaradaau hura'a ma o'ani,

20 “Moi 'ari Ruma Maea ana God mamoi maani'i mwani maho hako 'abaiai tahinga haorusi tanaraaui sae.”

21 Na'i mau haho'oa ta'aa miraaui Ha'ataari rau 'ari'a na'i Ruma Maea 'onaai 'unua anai enjel tanaraau marau ha'ausuriraaui'a i noni hunga.

Mana Na'ohadaaui Piriisi miraaui nei rau tau'aro beia, rau 'unuraau mai hakoi sae mwanemaua ni Jiu narau awa na'i ruruha nara 'unua 'iniai Kansol. Marau ha'a-taariraaui sae hehei'oi nara 'omesuriai Ruma Maea 'ari rumanoho'o 'anai wairaaui aho'i mai Ha'ataari.

22 Raugu 'ari wou marau ai'a sadoiraaui'a. Marau aho'i mai marau heimaani o'ani,

23 “Meu ada wou na'i rumanoho'o mana maraaruma ra honohono baabau mau, miraaui hehei'oi narau 'omesuri'i maraaruma rau ura-ura mau ro'u. Ma na'i 'oha meugu tahangi'i maraaruma nameugu siri wou 'ome, ma ai'a ta sae nameigu re'ia.”

24 Na'i 'oha na bwauodo adaui sae hehei'oi nara 'omesuriai Ruma Maea miraaui Na'ohadaa'i Piriisi raugu rongoa o'asi, ma kakui ahudaau marau wai'ado'ado 'inia taha naigu to'o ro'u na'i muri.

25 Ma na'i 'ohasi, 'e ta'i sae na boi ma o'ani 'iniraaui, “Romwane! 'Iraau sae namou nugaraui na'i rumanoho'o ani, na'i 'ohanisi raugu ha'ausuriraaui moe'ai sae na'i Ruma Maea!”

26 Mana bwauodo adaui sae hehei'oi nara 'omesuriai Ruma Maea beiraaui sae tatau'aro ana'i rau 'ari marau 'abenga'i wairaaui moi hura'a i Ha'ataari, 'inia rau maaaa'usiraaui noni hunga. Rau gasigu buta'iraaui 'ini'i hau.

27 Mara wairaaui mai Ha'ataari mara ha'a-urasiraaui na'i maadaui Kansol. Mana Na'ohadaaui Piriisi 'agu o'ani,

28 “Meu bwane 'unua tana'amou domoi abu ha'ausuri 'inia ha'ausuringa'i ana Jisas, mana ha'ausuringa'isi 'a garia hako'ai Jerusalem. Mamou subuni'ameu ro'u 'inia mae na haua ani a Jisas.”

29 Mia Pita na heiarahi tanaraui Ha'ataari, 'a o'ani, “'Tameu mei araisuriai taha 'ia God na 'irisia, meu bwa'i araisuriai hei'irisidai inoni.

30 'Tameu namou rabu ahita'inia Jisas na'i dadaahoro mamou ha'amaesia, mia God adaui wauwa agaa'i, 'a ha'atahia aho'i baaniai mae.

31 Ma waia ara'a ma ha'aheinagua na'i aba odona 'anai marungigaui mana ruhasigaui inoni nai Israel baaniai ora-ora'a. 'A haua o'asi do 'igaui gai nugasi'i baronga ta'a'i agaa'i maai 'adoma'i nugasi'i ora-ora'a agaa'i.

32 'Tameu naasi 'anai ha'arangasi'i maho 'ini tana'amou, mana Hi'ona Maea 'a ha'arangasia ro'u do ra ha'a-momori. Mana Hi'ona Maeasi, 'ia God 'a haua tanaraui nei rau araisuria.”

33 Na'i 'oha 'iraaui Kansol rau rongoi ha'atee o'asi ana Pita, rau kae taesu'a di'u marau raba ha'amaesiraaui Ha'ataari.

34 Ma'e ta'i beiraaui Kansol na atana 'ia Gamaliel, 'a ura ara'a ma 'unua dorai ha'a-hura'ahiraaui ga'u i Ha'ataari. 'Iani 'e Farisei ma'e ta'i 'iniraaui Ha'ausuri adaa'i Ringe nara ha'ahoua.

35 Maagu ha'atee tanaraui o'ani, “'Igaui saeni Jiu, gai wai'ado'ado goro ga'u suriai maho mou raba hauasi!

36 'E ta'i 'oha, 'e sae nara 'unua 'inia Tiudas 'a 'adoma'inia do 'iia 'e ta'i sae ro'u, ma gaarangi 'onaai hai 'arangi sae narau suria. Ma na'i moi murinai ngahuia ada, miraaui sae ana'i rau 'adarara'a aho'i mana ruruha ana 'a ai'aa moi.

³⁷ Na'i muri, 'oha na to'o i usu ata, 'ia Jiudas saeni Galili, 'a rago ro'u i nei na ogeraau 'anai suria. Ma na'i 'oha ragu ngahuia, 'iraau sae ana'i raugu ha marau 'adarara'a aho'i ro'u moi.

³⁸ “Naasi gai nugasiraau wou. 'Onaa ni maho rau hauasi 'a suria moi 'adoma'idaau haariraau, mana mahosi 'a bwa'i orema mai ai'aa'a aho'i ro'u.

³⁹ Ma 'onaa rau hauai hei'irisina God, ma mou bwa'i matai ha'abwarasiraau mwada'u. Mou gasi ura bwarasia God.”

⁴⁰ Miraau hako rau 'adoma'i aratara 'iniai maho na 'unua Gamaliel. Rau 'unuraau aho'i sirimai Ha'ataari, mara 'unua tanaraau sae tatau'aro adaa'i dorai rohoraau'a. Marau ha'abasuraau wetewete dorai abu maania'a ro'ua Jisas. Naasi maraugu ha'a-hura'ahiraau.

⁴¹ Na'i 'oha rau hura'a rau wa'ewa'e di'u, 'inia 'ia God 'a ha'ata'inia do'a arari rai here ha'a-ninimairaau o'asi 'iniai suria adaa'u Jisas.

⁴² 'Ado dangi rau ai'a agoheta'i ha'ausuriraau noni hunga na'i Ruma Maea ana God ma na'i ro'u suri'i moi ruma adaa'i. Rau maaniai Taroha Goro 'inia Jisas, 'iia na Ha'atahi.

6

Biu Sae 'Anai 'Aau Na'i Heisoi

¹ Rau rago hanehane moe'a ara'a i nei rau hinihinia Jisas. Miraau Jiu hinihini narau boi baani'i dora nara mamaramara Grik rau taraawa'a 'ubwa tanaraau Jiu hinihini narau huta na'i Israel. Rau o'ani, “'Ado 'oha mou 'a'auhiraau nei ra pwapwaku 'iniai mahoingau, ma'ata 'i'amou mou ai'a 'a'auhiraau goroi nao amee'i.”

² Naasi 'iraau ta'i tangahuru mana rua Ha'ataari rau 'unuraau goni mai noni hinihini marau o'ani 'iniraau, “'A ai'a goro domei mamarota'i ha'ausuriraau noni 'iniai ha'atee ana God, mameigu poru moi 'iniai 'omesuriraau pohara.

³ Naasi arai do'ora, 'a ga'i goro 'onaa moi 'ome sigihia ta biu sae madoma namou ha'ahourau. Me'iraau mwane 'isi na Hi'ona Maea 'ai rabe ro'u beirau, mamei nugasia tau'arosi tanaraau.

⁴ 'Tameu mei matai awa moi 'anai ha'arahesi mana taroha'iniai Taroha Goro 'inia Araha.”

⁵ 'Iraau hako rau 'adoma'i aratara beiraau Ha'ataari. Rau 'ome sigihia Stivin, 'ia mo'o na hinihinina 'a wetewete di'u ma rabe beiai Hi'ona Maea. Marau 'ome sigihia ro'ua Pilip, mea Prokoras, mea Nikeno, mea Timon, mea Pamenas mea Nikolas. 'Ia Nikolas 'e saeni Antiok ma awa suriai ringeringe adaa'i Jiu.

⁶ Rau ha'a-urasiraau wera biusi na'i maadaui Ha'ataari, maragu dau'i bwaudaa'i marau ha'arahesi 'adaau.

⁷ Mana tarohana Araha 'a 'adarara'a 'ari suri'i mwani 'omaa. Miraau noni hinihini na'i Jerusalem rau rago hanehane ro'u moe'a ara'a. Ma rago ro'u i Piriisi narau taraawa'a hinihiniai ha'ausuringa'i 'inia Jisas.

Ra Daua Stivin

⁸ Mia God 'a ha'agorohia Stivin mana mena ana God 'a awa beia. 'Ia Stivin 'a haa'i mwani ha'abu'oahu mana ha'ara rago na'i maadaui sae.

⁹ Ma tara'i sae baaniai ruma ni ha'arahesi nara 'unua 'iniai “Ruma ni ha'arahesi adaaui Slev nara Awa Dadara'a,” rau taraawa'a ura bwarasia Stivin. 'Iraau sae 'isi rau boi baaniai 'omai Saerin mana Aleksandria, mana'i Provensi Silisia mana Eisia. Rau heita'ia beia Stivin.

¹⁰ Maragu ai'a gere arari moe'a 'anai heiraeraesi beia, 'inia 'iia 'a madoma di'u mana Hi'ona Maea 'a 'a'auhia.

¹¹ Rau 'unuraau girugiru tara'i sae marau bonasiraaui dorai pwari'i 'ana o'ani, "Meu rongoa mo'oni na ha'atee ha'ata'aia Moses ma ha'atee ha'ata'aia ro'ua God."

¹² Suriyai haua adaau o'asi, 'iraaui sae rago miraaui saemaua adaa'i Jiu miraaui Ha'ausuri 'anai Ringe ana'ia Moses, rau taesu'a di'u 'ana Stivin. Rau daua marau waia 'ari na'i rurugoni adaauui Kansol.

¹³ Rau waa'i mai tara'i abe 'anai pwari'i 'ana o'ani, "Ia mo'oni 'ado 'oha'a na ha'atee ha'ata'aiai Ruma Maea agaau mana ringeringe ana'ia Moses.

¹⁴ Meu rongoa ro'u na 'unua do'ia Jisas ni Nasaret 'ai kaii Ruma Maea agaau, mai orisi'i ringeringe agaai na haa'ia Moses."

¹⁵ Miraaui hakoi ruruhai Kansol, rau wana wetewete 'inia Stivin marau re'iai hauraena auru tari na'i 'u'una, 'a 'ome 'onaai enjel.

7

Hadahada Ana Stivin

¹ Mana Na'ohadaui Piriisi 'a songa'inia Stivin o'ani, "A 'ua? Maho rau maani'isi, ra ha'a-momori ma'ua ai'a?"

² Mia Stivin 'a o'ani, "Mwani sae agu'i mana mwani sae mwanimaua, moisu rongoi maho wai maaniani. 'Ia wauwa agaaua Ebrahim 'a awa mau na'i Mesopotemia na'i madoraa 'ia God, na hauasa, 'a ha'ata'inia haaria tanaa. Na'i muri 'agu sara 'ari 'omaai Haran.

³ 'Ia God 'a o'ani, "Oi hano baaniraui sae amu'i mana dorani, ma'oi 'ari na'i dora nawaigu ha'ata'inia tana'o."

⁴ Naasi, 'ia Ebrahim 'a hano baaniai Mesopotemia, dora adaui Kaldia, ma hano ma awa ga'u na'i Haran. Ma na'i murinai mae na haua amana, 'ia God 'agu 'unua tanaa do'ai sara mai na'i dora nagaugu mono na'iei 'ohanisi.

⁵ Na'i madoraasi, 'ia God 'a ai'a haua ta dorai ano tanaa Ebrahim, rei'uaa ta gere dora ma ai'a ro'u. Ma'ata 'ia God 'a duruduru tanaa do na'i muri, 'ia Ebrahim 'ai to'oraai dorasi. Rei'uaa na 'iia 'a ai'a to'oraai mau ta gare, mia God 'a bwane duruduru tanaa do 'iraaui warowarona'i narai to'oraai dorasi.

⁶ 'Ia God 'a ha'atee o'ani ro'u, "Iraau warowaromu'i rai 'ari marai awa na'i dora narau ai'a to'oraai. Miraaui sae na'i dorasi rai ha'i slev 'iniraaui. Rai awa ha'ata'airaaui suria ta hai 'arangi harisi.

⁷ Minau wai ha'a-mama'aiai kantrisi 'inia ha'i slev adaaui 'iniraaui burungamu. Na'i muri raigu hura'a baaniai kantrisi maraigu boi 'anai ha'arahesiau na'i 'ini."

⁸ "Hoita, 'ia God 'a 'unua ro'u tanaa Ebrahim 'anai aha ha'araraui gare mwane, 'e ha'ara 'inia duruduru na haua tanaraui warowarona'i. Naia na 'ia Ebrahim 'a aha ha'araa 'inia Aisak na'i warunai dangi murinai huta ana. Mia Aisak 'a aha ha'araai garena, 'ia Jekop, mia Jekop 'a aha ha'araraui ro'u i ta'i tangahuru mana rua gare ana. 'Iraau naasi ta'i tangahuru mana rua wauwa agaau.

⁹ "Miraaui gare ana'ia Jekop rau kakawa 'omesiai do'oradaui 'ia Josep marau 'ubwania. Marau raonga'inia tanaraui tara'i sae maraui waia aurui Ijip 'anai ha'i slev 'inia. Mia God 'a awa beia Josep

¹⁰ ma taatahi bwarasia suri'i madoraa bwara na siri suri'i. 'Ia God 'a ha'amadomaa Josep mana mwaeraha na'i Ijip 'a 'ome taenia ma ha'abwauodoa 'anai 'omesuriraui saeni Ijip bei'i toto'ora ana'i.

¹¹ Ma'e ta'i kaeni hioro raha na to'o 'ari suria hakoi Ijip tari Kenan. 'A bwara hako tanaraui sae rago. 'Iraau wauwa agaai rau ai'a to'o mahoingau ro'u na'i madoraasi.

12 Mia Jekop 'a rongoa do ra'i mahoingau ra awa na'i Ijip ma ha'a-taariraau wauwa agaa'i 'ari 'isi.

13 Na'i ruanai boi adaau mia Josep 'a ha'arangasia'a haaria do'ia naasi do'oradaau ani. Na'i 'ohasi 'ia Mwaeraha adaau Ijip 'agu 'irararaui sae ana'ia Josep.

14 'Ia Josep 'a ha'ataariai taroha tanaa amana miraau sae ana'i ma 'unua dorai auru hako na'i Ijip. 'Iraausi 'a tari biu tangahuru mana rima goni adaau hako.

15 Naasi 'ia Jekop 'a auru ma awa na'i Ijip. 'Iia goni beiraui gare ana'i rau awa marau mae na'i 'isi.

16 Mana'i 'oha rau mae, na abedaa'i ra wai'i aho'i 'ari na'i Sekem naragu aora'i na'i wabwa na'ia Ebrahim 'a horia baaniraui gare ana'ia Hamo.

17 "Ari wou mana madoraa na 'ia God 'a duruduru 'inia tanaa Ebrahim 'anai ruhasiraui Jiu baania Ijip 'a gaarangi'a. Na'i 'ohasi, 'iraaui sae agaa'i na'i Ijip rau kaeni rago hanehane moe'a ara'a.

18 Ma na'i 'ohasi 'e sae he'ete'i na mwaeraha na'i Ijip. Sae na ai'a 'iraraa Josep.

19 'A ha'a-bweubweu'araui wauwa agaa'i ma here ha'ata'airaaui di'u 'oha na ha'a-'usu'usuraui dorai nuga'i gere gare adaa'i hura'ai abau 'omaa marai mae.

20 "Na'i madoraasi na huta maia Moses, 'iia 'e gare na 'ome goro di'u. 'E oru hura narau 'omesuria moi na'i ruma.

21 Raugu nugaa hura'ai abau 'omaa mana gare urao anai mwaeraha ni Ijip 'a waia'a ma 'omesuria 'onaai huunai gare ana.

22 Rau ha'ausuri ha'agorohia 'ini'i maho rau 'irara'i ma here goro di'u suri'i mwani maho na hadanga'ini'i ma haa'i.

23 "Na'i 'oha na tari hai tangahurui harisi, 'a raba 'ari garihiraui saeni Israel, 'iraaui sae ana'i.

24 Na'i madoraasi, 'a re'iai saeni Ijip na ngahu ha'ata'ai saeni Israel ma 'a'uhiai saeni Israel ma ngahu ha'amaesiai saeni Ijip.

25 'Ia Moses 'a 'adoma'inia do 'iraaui sae ana'i rai 'ome 'iraraa do 'ia God 'a 'ome sigihia 'anai ruhasiraui maraugu ai'a 'ome 'iraraa moe'a.

26 "Na'i nata dangi ma re'ia ro'u rua saeni Israel nararu heingahui ma bonasia do rarui abu heingahui. 'A o'ani 'iniraru, 'Tamura ra'i saeni Israel hako moi neimuruasi. Ni 'uaana namurugu heingahui 'inia?'

27 Mia mo'o na taraawa'anai heingahuisi 'a burusia beira'i a Moses ma o'ani 'inia, 'Iatei na niga'o 'anai saemaua ma'ua 'anai hiiri'amiria?'

28 'A 'ua? 'O raba ngahu ha'amaesiau 'onaai saeni Ijip na'o ngahu ha'amaesia nanora ani?'

29 Na'i 'oha 'ia Moses 'agu rongoa o'asi, ma hora'a baaniai Ijip ma 'ari na awa 'onaai mahuara na'i Midia ma ha'iwai na'iei na to'oraai rua gare mwane.

30 "E hai tangahurui harisi na hako mana enjel 'a ha'amaranga tanaa na'i dora mangasara gaarangi'ai hungahungai Saeni. 'A ha'amaranga na'i urunai gere hasi'ei na noro.

31 'Oha 'ia Moses 'a re'iai 'eusi, 'a heimwaota'i di'u ma 'ari wou gaarangi 'anai wana ha'agorohia. Ma rongoai ringena Araha God na o'ani,

32 "Inau God adaau wauwa amu'i. God ana Ebrahim mea Aisak mea Jekop.' 'Ia Moses 'a 'idi'idi ma maaa'uta'i wanasiai 'eu.

33 "Mia God 'a o'ani 'inia, "Oi rehi'i sandol amu'i baaniai uwamu, 'inia dora na'o awa 'ieisi, 'e dora maea.

34 'Inau re'iai rongomaata'i narau haai noni agu'i na'i Ijip mau rongoai ohoho adaau mau dio mai 'anai ruhasiraui. Naasi wai ha'ataari'o aho'i 'ari Ijip.' "

³⁵ Mia Stivin 'a o'ani ro'u, "'Ia God 'a ha'ataariai enjel ana 'anai hadahada beia Moses baaniai gere hasi'ei na norosi. Ma 'unua tanaa do'ia God 'ai ha'ataaria 'anai ruhasiraaui ma 'anai marungiraaui inoni ana'i. 'Iia mau a Moses narau 'itaa ani naanisi nararu 'unua do 'iatei na nigaa 'anai saemaua ma'ua 'anai hiiriraru.

³⁶ Mia Moses 'a aho'i 'ari ma na'otaradaaui sae ana'i hura'a baaniai Ijip ma haa'i mwani ha'abu'oahu mana ha'ara rago na'i Ijip ma na'i asi meramera'a ma na'i 'omaa mangasara suriai hai tangahurui harisi.

³⁷ "'Ia Moses na 'unua tanaraaui Israel do'ia God 'ai 'ome sigihia ta Rarabea 'onaaia baani'i warowarodaa'i.

³⁸ Ma na'i 'oha 'iraaui wauwa agaa'i rau awa na'i 'omaa mangasara na'i hungahungai Saenai, 'ia Moses 'a awa beiraaui me 'iia naasi i enjel na ha'atee tanaa ma haa'i tanaa ha'atee ni tahi nagu haa'i mai tanagia.

³⁹ "Me 'iraaui wauwa agaa'i rau ai'a raba araisuria Moses. Rau 'itaa moi marau raba aho'i 'ari Ijip.

⁴⁰ Na'i 'oha 'ia Moses 'a awa mau ta'eha na'i hungahunga, rau 'unua tanaa Eron do'ai tagora'i tadaa'i god 'anai na'otaradaaui. 'Inia raugu ai'a 'iraraa'ai taha na to'o beia Moses na wairaaui hura'a baaniai Ijip.

⁴¹ Na'i madoraasi narau araaranununai garei kau marau suu ho'asi tanaa. Marau hauai kae ngaugoni wa'ewa'e 'inia god adaaui narau tagorahia.

⁴² Mia God 'a rihota'i beira'i baaniraaui ma ha'awateraau rai ha'arahesi'i hee'u mana hura mana sina 'onaa'i ha'arangasia ana na'i Usu-usu Maea adaaui Rarabea na o'ani,

"T'amou saeni Israel, na'i raronai hai tangahurui harisi namou awa na'i 'omaa mangasara, mou ai'a suu ho'asi tanaaui.

⁴³ 'Ado 'oha mougu suru'ia moi ruma saira ana god Molek mana araaranununai god hee'u 'ia Refan.

'T'amou namou tagoradi araaranunu 'isi 'anai ha'arahesi'i. Ma naasi 'inau wai ha'awatea dorai wai'amou ha'atau 'ari di'uui Babilon 'anai ha'a-rongomaata'i'amou.'*

⁴⁴ "Na'i madora 'iraaui wauwa agaa'i rau awa na'i 'omaa mangasara rau waa ro'u i ruma saira na awa iei God. Naia mau i rumu saira na'ia God 'a 'unua tanaa Moses 'anai tagoraa, mia Moses 'a tagorahia ma suria goro i nunu na'ia God na ha'ata'inia tanaa.

⁴⁵ Na'i muri 'oha nagu na'otara Josua, 'iraaui wauwa agaa'i rau saguai dorai ano na'ia God 'a tariha'iniraaui sae he'ete'i baania. Ma na'i 'oha narau siri wou na'i dorasi, rau waia mau i ruma sairasi na wauwa adaa'i rau haua mai tanaraaui. Na ruma sairasi rau ha'arahesia moe'a mau a God na'iei tari madora ana Mwaeraha Deved.

⁴⁶ "'Ia God 'a 'ome taenia Deved. Mia Deved 'a ha'angonia God do 'ai watea tanaa maai tagoraa ta Ruma Maea tanaraaui saeni Israel.

⁴⁷ Mia God 'a ai'a ha'awatea. 'Ia Solomon nagu tagorahiai Ruma Maea ana God na'i 'oha 'iia nagu mwaeraha.

⁴⁸ "Ma'ata, 'ia God na ororiu ara'ai aro, 'a ai'a matai awa suri'i ruma ra tagorahi'i sae. 'Onaa'i Rarabea na 'unua o'ani,

⁴⁹ "Ia Araha God 'a ha'atee o'ani,
"I aro naasi dora heheinagu agua 'anai heimarungi
mana ano naasi dora ni buubuu agua.

Naasi 'e ruma taha namoi tagorahia naigu marasigu?

'A bwara tana'amou 'anai tagorahia ta dora nawai mamaro iei.

⁵⁰ 'Inia 'inau nau ha'apwa'ara'i mwani mareho hako." ' "†

* 7:43 7:42-43 Amos 5:25-27 † 7:50 7:49-50 Aisaea 66:1-2

⁵¹ Mia Stivin 'a o'ani ro'u, "Romwane! 'T'amou mou rongoasa di'u. 'Adoma'imoo'i ra 'onaairaaui ahurodo mamou ai'a raba araisuri'i ha'atee ana'ia God. Mou hairaesii tarau beiai Hi'ona Maea 'onaairaaui wauwa amoo'i na'i 'oha bwani.

⁵² Gaarangi 'iraaui hakoii Rarabea na'i 'oha bwani, 'iraaui wauwa amoo'i rau norata'airaaui. Rau ngahu ha'amaesi'i sae ana'ia God narau taroha'iniiai boi nai haaui mo'o na odo-odo hako na'i maana God. 'Iia naasi Ha'atahi namou ha'awatea tanaraaui maeronga, mamou ngahu ha'amaesia.

⁵³ 'Onaai 'iraraa amooi, 'iraaui enjel rau waa'i mai ringeringe agaa'i Jiu tanaa Moses nagu haa'i ro'u tana'amousi. Ma rei'uaa na o'asi, 'i'amou mou ai'a araisuri'i."

Ra Ngahu Ha'amaesia Stivin

⁵⁴ Na'i 'oha 'iraaui saemaua adaa'i Jiu rau rongoai ha'atee o'asi ana Stivin, rau 'ara ha'a-ngadingadi'i rihodaa'i 'inia na ahudaa'i 'a honu 'iniiai taesu'a.

⁵⁵ Mia Stivin na Hi'ona Maea 'a rabe beia. 'A wana ara'ai aro ma re'iai rarahana God, ma re'ia Jisas na ura na'i aba odona God.

⁵⁶ Mia Stivin 'a o'ani, "'Au re'iai aro 'a heihoa mana Gareii Inoni 'a ura na'i aba odona God."

⁵⁷ Miraau saemaua rau awaawara marau here ponopono'i karingadaa'i marau 'eba wou 'anai daua.

⁵⁸ Rau ogea hura'a na'i murinai 'omaa mara taraawa'ai buta ha'amaesia na'iei. 'Iraau mwane narau ha'ahunia ania Stivin, rau rahi'i to'oni bohura'a adaa'i marau haa'i tanaai geresae ra 'unua 'inia Sol maraugu buta'ia ro'ua Stivin.

⁵⁹ Na'i 'oha rau buta'ia Stivin, 'a ha'atee o'ani, "Araha Jisas, 'oi waia woui aungagu bei'o."

⁶⁰ Ma topira'i ruru dioi ano ma awara o'ani, "Araha, 'oi abu su'ua tanaraaui ora-ora'a rau hauani," maagu mae.

8

¹ 'Ia Sol 'a 'adoma'inia do 'a goro moi ngahuia ada Stivin.

'Ia Sol 'A Norata'airaaui Saeni Heisoi

Taraawa'a na'i madoraa na 'ia Stivin 'a mae, ra taraawa'a norata'airaaui sae ni heisoi na'i Jerusalem. Miraau hako rau hora 'ari suri'i tara'i dora na'i Jiudea ma na'i Samaria. 'Iraau moi Ha'ataari naraugu awa na'i Jerusalem.

² Tara'i sae narau 'adoma'i ha'ahihi'aa God rau waa'i abena Stivin marau toringia. Rau angisia marau ahutotou di'u 'inia.

³ Mia Sol 'a bonasia do'ai ha'a-ai'aa'i heisoi. 'A siri suri ruma ma daa'i sae mwane mana urao ni heisoi ma nuga'i na'i rumanih'o.

Taroha Goro 'A Taha

Na'i Provensi Samaria

⁴ 'Iraau sae hinihini narau hora baaniai Jerusalem rau 'adara'inia 'ari tarohana Araha suri'i mwani 'omaa narau taha suri'i.

⁵ 'Ia Pilip 'a 'ari ro'u na'i 'omaa raha i Samaria, ma taroha'inia ro'u ieia mo'o na Ha'atahi.

⁶ 'Iraau sae rau raba bahurongoa di'u na'i 'oha rau rongo'i maho na maani'i marau re'i'i ha'abu'oahu na haa'i.

⁷ 'Iraau nei na bwauniraau adaro, 'iraaui adaro rau awaawara marau hura'a. 'Iraau nei ra pwaki mana nei ra ngadi abedi ra goro aho'i ro'u.

⁸ 'Iraau sae rau awa na'i kae 'omaasi rau wa'ewa'e di'u.

⁹ Na'i 'omaasi, 'e ta'i sae na awa iei, atana 'ia Saemon. 'Ia mo'osi 'a matai haa'i ha'abu'oahu 'iniiai mena anai adaro miraau saeni Samaria rau heimwaota'i di'u 'ini'i. 'Ia mo'osi 'a 'unua ro'u haaria do'ia 'e saemaua.

¹⁰ 'Iraau hakoi sae na'i 'omaasi goni beiraaui saemaua rau bahunongo'i maho na 'unu'i a mo'osi, marau 'unua do'ia 'a to'oraai mena. I menasi rau 'unua 'inia ta'i kaeni mena ana God.

¹¹ Rau suria 'inia 'a orea mai haa'i ana'i mwani maho rau heimwaota'i 'ini'i.

¹² Na'i 'oha 'ia Pilip 'a maaniai Taroha Goro 'inia Jisas Kraest mana tahinga 'ia God na marungia, 'iraau sae mwane mana urao rau hinihinia marau 'ari wou ma bwareomaea'araau.

¹³ Mia Saemon ro'u 'a hinihini ma 'ari ro'u wou na bwareomaea. 'Ado 'oha 'a awa beia Pilip ma heimwaota'i di'u 'ini'i ha'abu'oahu mana ha'ara na haa'i.

¹⁴ 'Iraau Ha'ataari na'i Jerusalem rau rongoa do 'iraau Samaria rau hinihinia'ai tarohana Araha. Naasi marau ha'ataaria Pita mea Jon 'anai garihiraau.

¹⁵ Na'i 'oha raru taha beiraaui nei ra hinihini, raru ha'arahesi 'adaau neina Hi'ona Maea 'ai sirihiraau.

¹⁶ Rei'uaa narau bwane bwareomaea 'inia atana Araha Jisas, mana Hi'ona Maea 'a ai'a awa mau beia tanei 'iniraau.

¹⁷ Naasi 'ia Pita mea Jon raru dau'i bwaudaa'i mana Hi'ona Maea 'a sirihiraau'a.

¹⁸ Na'i 'oha 'ia Saemon 'a re'ia dona Hi'ona Maea 'a sirihiraau sae na'i 'oha 'ia Pita mia Jon raru dau'i bwaudaa'i, 'agu ha ma waia'a mai ha'a tanararua ma o'ani,

¹⁹ "Murui haua ro'u tanaaui mena, neina 'iatei sae nawai dau na'i bwauna, na Hi'ona Maea 'ai sirihia ro'u."

²⁰ Mia Pita 'a ha'atee wetewete tanaa o'ani, "T'oe 'adoma'inia do'o ga'i matai horia moi maho na watea dadara'a God tanaraui sae? 'A goro do'o ga'i mae na'i dora ni rongomaata'i bei'i ha'a amu'isi.

²¹ T'oe 'o bwa'i aba 'inia ruruha ameeu na'i tau'aroni, suria na 'adoma'imu 'a ai'a odo-odo na'i maana God.

²² 'Oi rihosi ma'oi nugasi'i herehere amu'i nara ai'a goro, ma'oi ha'arahesi tanaa God maai 'adoma'i nugasiai 'ado'adomu na ta'aa.

²³ 'Inau 'iraraa 'o ta'i kaeni naga di'u 'inia to'oraai menasi, me ni ora-ora'a 'a marungi'o."

²⁴ Mia Saemon 'a 'unua tanaa Pita mea Jon do rarui ha'arahesi 'a'auhia mana maho raru 'unu'i rai abu to'ia.

²⁵ Na'i 'oha 'ia Pita mea Jon raru taroha'inia hakoi tarohana Araha mararu maani'i taha nararu re'i'i na haa'i, naasi ma rarugu aho'i 'ari Jerusalem. Na'i 'oha nararu hano 'anai 'ari Jerusalem, raru taroha'inia mau ro'u i Taroha Goro suri'i tara'i 'omaa na'i Samaria.

'Ia Pilip 'A Mamaani Beiai Saeni Itiopia

²⁶ 'E ta'i 'oha, i enjel ana God 'a ha'atee tanaa Pilip o'ani, "'Oi hura'a suriai tara na tahamora na'i Jerusalem ma dio na'i dora mangasara ma 'ari 'anai Gasa."

²⁷ Mia Pilip 'a hura'a suria ma re'iai saeni Itiopia. 'Ia mo'osi 'e sae mwanemaua na 'omesuri'i ha'a anai urao mwaeraha na'i Itiopia. 'Iia 'a 'ari Jerusalem 'anai ha'arahesi

²⁸ ma aho'i 'ari 'omaa ana. 'A heinagu na'i bwea na'e hoosi na ogea, magu 'oha'iniai buka anai rarabea Aisaea.

²⁹ Mana Hi'ona Maea 'a o'ani 'inia Pilip, "'Oi 'ari wou beia mo'osi ma'oi hahano na'i bobona."

³⁰ Na'i 'oha nagu 'eba wou gaarungia ma rongoi 'oha'inia anai Usu-usu Maea ana Aisaea, mia Pilip 'a o'ani 'inia, "'A 'ua? 'O aidangisiai maho na'o 'oha'iniasi?"

31 Mia mo'osi 'a o'ani 'inia Pilip, “Ai he'ua nawai aidangisia 'inia 'onaa na ai'a ta sae nai ha'a-aidangisiau 'inia?” Ma 'unua tanaa Pilip do'ai hane ta'eha maai heinagu beia na'i bwea.

32 Maho na 'oha'inia mo'osi na'i Usu-usu Maea 'a o'ani, “Ra waia 'onaai siip nara waa 'anai ngahuia. Ma 'onaaii garei siip na ai'a angi na'i 'oha ra taapuruai warihuna, 'iia 'a agohe moi.

33 Ra ha'atee ha'ata'aia ma na'i 'oha ra hiiria ra ai'a haua beiai here na odo-odo. 'Abwa'i ta sae nai hadanga'ini'i gare ana'i, 'inia na tahingana ra ha'a-ai'aa moi baania 'oha 'iia 'a ai'a to'o gare mau.”*

34 Mana saemauasi 'a songa'inia Pilip o'ani, “Iatei na 'ia Aisaea na hadanga'iniasi? 'A hadanga'inia haaria ma'uasi 'e sae he'ete'i?”

35 Mia Pilip 'a taraawa'a maania tanaai Taroha Goro 'inia Jisas. 'A maania ga'u tanaa i gere dora baaniai buka ana Aisaea, magu maani'i tanaa ro'u tara'i dora he'ete'i ro'u.

36 Rarugu ha mararu taha'a na'i wai mana saesi 'a o'ani'a 'inia Pilip, “Wai naani'a, 'e taha na ha'abwarasiau nau bwa'i matai bwareomaea 'inia?”

37 Mia Pilip 'a aramia o'ani, “Onaa na'o hinihini beiai tahingamu hako, ma'oi bwareomaea.” Mana saemauasi 'a o'ani, “Au hinihini do'ia Jisas Kraest naasi Garena God.”†

38 Mana saemauasi 'a 'unua dorai ha'apapakuai maho raru ta'e na'ieisi, mararu dio na'i wai mea Pilip 'agu bwareomaeai saesi.

39 Na'i 'oha raru tarau baaniai wai, na Hi'ona Maea ana God 'a waia Pilip mana saemauasi 'agu ai'a re'ia'a. 'Agu haa ma hano'a ro'u ma wa'ewa'e raha di'u.

40 'Agu 'asu'a Pilip ma ada na'i 'omaai Asotas. 'A maaniai Taroha Goro na'i 'omaasi ma ro'u suri'i mwani 'omaa na taha suri'i tari 'oha na ada na'i 'omaai Sisaria.

9

'Ia Sol 'A Aho'ita'i Sae Hinihini

1 Mana'i 'ohasi, 'ia Sol 'a 'unua wetewete moe'a mau 'anai ngahu ha'amaesiraau nei narau suria Araha. 'A 'ari beiai Na'ohadaau Piriisi

2 ma ha'angonia do'ai usu'i tara'i usu-usu tanaraau bwauodo suri'i ruma ni ha'arahesi adaa'i Jiu na'i 'omaai Damaskas. 'A haua o'asi marai aidangisia do'ia Sol ra haua tanaa i mena 'anai दौराau urao mana sae mwane nara hinihinia Jisas 'anai wairau 'ari na'i Jerusalem.

3 Mia Sol 'a 'ari Damaskas ma na'i 'oha na gaarangia wou i 'omaa, 'e raraha na boi baaniai aro na raangia.

4 Ma ahoda aurui ano ma rongoai ha'atee na o'ani, “Sol, Sol, 'inia 'uaana na'o norata'aiau 'inia?”

5 Mia Sol 'a o'ani, “Saemaua, i'oe atei?”

Mia o'ani, “Inaua Jisas na'o norata'aiausi.

6 Ma'ata, 'oi ura ara'a ma'oi 'ari 'omaa 'ariani. 'E sae na'iei naigui 'unua tana'o i maho na'oi haua.”

7 'Iraau hakoi mwane rau hano beia Sol, 'a bu'o i ahudaau marau ai'a 'unua ta mareho. Rau rongoa moi ha'atee marau ai'a re'ia ta sae.

8 Mia Sol 'a ura ara'a ma ragata'iniai maana ma ai'a 'omesia'a ta maho. Rau dau na'i rimana marau urua 'ari Damaskas.

9 'E oru dangi na ai'a 'ome'ome ma ai'a ngau mana gono.

* 8:33 8:32-33 Aisaea 53:7-8 † 8:37 8:37 Suri'i tara'i kopi bwani 'inia Baebol, ra ai'a nugaai tatarani.

¹⁰ Na'i Damaskas 'e ta'i sae hinihini na awa na'iei na atana 'ia Ananaeas. Ma na'i 'omesia na haua Araha 'a 'onaai maho na mauru'aa. 'Ia Araha 'a o'ani, "Ananaeas!"

Mia Ananaeas 'a o'ani 'inia, "Inau neinauni Araha."

¹¹ Mia Araha 'agu o'ani, "O'i 'ari suriai tara nara 'unua 'iniai Tara Odo-odo ma'oi taha na'i ruma ana Jiudas ma'oi songa'i 'iniai saeni Tasas na atana 'ia Sol. 'Ia 'a ha'arahesi na'i madoraanisi.

¹² Mia Sol 'a 'onaa do 'a mauru'aa maho. 'A re'iai saena 'ome 'onaaiai sae ra 'unua 'inia Ananaeas na boi ma nugaai rimana hungana do'ai 'ome'ome aho'i."

¹³ Mia Ananaeas 'a o'ani 'inia, "Araha, 'inau bwane rongo'i mwani ma-maani 'inia mo'osi 'iniai here ha'ata'airaau 'anai sae amu'i na'i Jerusalem.

¹⁴ Ma na'i 'ohani 'iraau Na'ohadaa'i Piriisi rau ha'awatea 'anai daa'i sae ra hinihini'o."

¹⁵ Mia Araha 'a o'ani, "O'i 'ari! 'Inau nau 'ome sigihia 'anai hauai tau'aro agua, 'anai taroha'iniau tanaraau sae nara ai'a Jiu miraaui mwaeraha mei tanaraau ro'u i Jiu.

¹⁶ Mawai ha'a-aidangisia 'iniai rongomaata'i nai to'o tanaa na'i 'oha nai taroha'iniai atagu."

¹⁷ Mia Ananaeas 'a 'ari ma siri wou na'i ruma ma nugaai rimana hungana Sol ma o'ani, "Do'oragu Sol, 'ia Araha Jisas na ha'ataariau mai. 'Ia na ha'ata'i tana'o ani na'i tara. 'A ha'ataariau do'oi wanawana aho'i mana Hi'ona Maea 'ai sirihi'o."

¹⁸ Na'i mau 'ohasi, ra'i maho nara 'ome 'onaai una-unai ii'a ra ahoda baaniai maana maagu wanawana aho'i. Ma ura ara'a mara bwareomaeaa.

¹⁹ Na'i muri 'agu ngau mana abena 'a wetewete aho'i.

'Ia Sol 'A Heitaroha'i Na'i Damaskas

'A ga'i 'onaai rua ma'ua oru dangi na'ia Sol 'a awa na'i Damaskas beiraau sae hinihini.

²⁰ Ma siri odo-odo suri'i ruma ni ha'arahesi adaa'i Jiu na heitaroha'i tanaraau sae do'ia Jisas naasi huunai Garena God.

²¹ 'Iraau nei rau bahurongoa rau heimwaota'i di'u marau o'ani, "Ia mo'oni gasi na norata'airaau nei rau hinihinia Jisas na'i Jerusalem? Magu boi 'ini 'anai dauraau sae hinihini 'anai wairaau tanaraau Na'ohadaaui Piriisi! 'Agu he'ua naani?"

²² Hadahada ana'ia Sol 'inia Jisas ra wetewete di'u ro'u wou. Ma rei'uaa narau bwarai hinihini, 'iraau Jiu na'i Damaskas ra bwarai tohea 'inia ta maho, 'inia Sol 'a ha'ata'inia goro tanaraau do 'ia Jisas naasi huunai Ha'atahi.

²³ 'A rago'ai dangi ra hako miraaui saemaua adaa'i Jiu raugu rurugoni 'anai siba herehere narai matai ha'amaesia 'inia Sol.

²⁴ 'Ado rodo mana dangi rau matoo 'ana suri'i maadi bara na'i barahau anai 'omaasi. Mia Sol 'a rongoai ha'aradorado adaau

²⁵ ma na'i ta'i rodo 'iraau rongoiusuri ana'i rau ha'ahura'ahia na'i riwa na'i abenai barahau na'i 'omaasi. Rau toto'oa dio hura'ai abau 'omaa na'i kae abira.

'Ia Sol 'A Awa Na'i Jerusalem

²⁶ Na'i 'oha na ada aho'i a Sol na'i Jerusalem, 'a bonasia do 'iraau sae hinihini na'i 'isi rai aidangisia do'ia 'e ta'i'a ro'u beiraau, maraagu ai'a hinihinia marau maaa'usia.

²⁷ Mia Banabas, 'e ta'i 'iniraau noni hinihini, 'a waia 'aria Sol beiraau Ha'ataari ma maania tanaraau re'ia na haua Araha na'i tara. Mia Banabas 'a maania ro'u i taha na 'unua Araha tanaa Sol mana ramoramo na haua Sol 'anai taroha'inia Jisas na'i Damaskas.

²⁸ Naasi maraugu hinihinia, mia Sol 'agu awa tarau beiraaui. 'A 'ari suri'i mwani dora na'i Jerusalem. 'Iiasi 'a ramoramo 'anai taroha'inia Araha.

²⁹ Ma heiraeraesi beiraaui Jiu narau matai maramara Grik, marau bonasia dorai sadoia ta herehere narai ha'amaesia 'inia Sol.

³⁰ Na'i 'oha 'iraaui noni hinihini rau rongo sadoiai ha'aradorado narau hauasi, rau waia'a Sol dio na'i Sisaria naraugu ha'ataaria 'ari Tasas.

³¹ Na'i 'ohasi, na mwani mareho ragu papaku mara goro tanaraaui sae hinihini na'i Provens na'i Jiudea mei Galili ma na'i Samaria mara ragoi nei nara hinihinia Jisas. Rau ha'ahoua Araha mana Hi'ona Maea 'a ha'a-'o'ori'i 'adoma'idai'i.

Pita 'A Ha'agorohia Aho'i Sae Na Daoha

³² Na'i 'oha 'ia Pita 'a 'aariha suri'i 'omaa, 'a ada beiraaui sae ni heiso na'i Lida.

³³ Ma na'i 'omaasi 'a sadoia iei sae na nugu i abena. Suriai waru harisi 'a taraa dadao moi na'i be'a. Na atanai saesi, 'ia Aenias.

³⁴ Mia Pita 'a o'ani 'inia Aenias, "'Ia Jisas Kraest 'ai ha'agorohi'o aho'i. 'Oi ura ara'a mo'oi ha'a-aratarai be'amu!" Mia Aenias 'agu haa ma ura ara'a.

³⁵ Miraau saeni Lida mei Saron rau taraawa'a hinihinia Araha na'i 'oha rau re'iai taha na to'o tanaa Aenias.

Pita 'A Ha'atahia Aho'i Urao Na Mae

³⁶ Ma na'i Jopa 'e ta'i urao hinihini na awa na'iei na atana 'ia Tabita, atani Grik ana 'ia Dokas. Ni uraosi 'a haa'i mwane herehere goro ma 'a'auhiraau tarau ro'u i pohara.

³⁷ Na'i 'ohasi, 'a daoha raha ma mae'a. Mara taguma'iniai abena mara nugaa na'i ta'i ahii na'i ruana bwea anai rumasi.

³⁸ I 'omaai Jopa 'a gaarangia moi Lida. 'Oha 'iraaui sae hinihini rau rongoa do'ia Pita 'a awa na'i Lida, rau ha'ataariai rua sae 'anai bongah'inia do'ai raurau mai.

³⁹ Mia Pita 'a 'ari beiraru na'i Jopa. Na'i 'oha rau ada wou na'i 'omaa, rau waia ta'eha na'i ahii na awa iei urao maesi. 'A ragoi nao rau ura garia Pita marau ago-ago marau ha'ata'ini'i tanaai bwana na tai'i a Tabita na'i 'oha na tahi mau.

⁴⁰ Mia Pita 'a ha'a-hura'ahiraau baaniai ahii. Magu topira'i ruru ma ha'arahesi. Ma rihota'i wou tanaai urao maesi ma 'unuai atana, "'Tabita, 'oi ura ta'e!" 'Agu haa ma ragata'iniai maana ma re'ia Pita ma heinagu ara'a.

⁴¹ Mia Pita 'a dau na'i rimana ma ha'a-urasia maagu 'unuraau aho'i siri mai nao miraau ro'u i sae hinihini. 'Ia Pita 'a ha'ata'inia tanaraaua Tabita na tahi aho'i baaniai mae.

⁴² Taroha 'iniai maho na to'osi 'a 'adarara 'ari suriai 'omaai Jopa ma ragoi nei raugu hinihinia ro'ua Araha.

⁴³ 'Ia Pita 'a gere awa orea na'i ruma ana Saemon na'i 'omaasi. 'Iiasi 'e sae na matai tatau'arodi mareho 'ini uri-uri mwamwaa.

10

Pita Mea Konilias

¹ Na'i Sisaria 'e ta'i saeni Rom na atana 'ia Konilias, 'iiani 'e na'ohadaau ruruha hehei'oi ni Itali.

² 'Ia Konilias mana urao ana beiraaui gare adaru'i rau 'adoma'i ha'ahihi'aa marau ha'arahesia God. Ma hisungiraau tarau i Jiu pohara ma ha'arahesia tarau a God.

³ Ta'i 'oha na gaarangia mai angi oru na'i abaidangi, 'a re'iai maho na 'onaa do 'a mauru'aa moi. 'A re'iai enjel ana God na araiiai atana. 'A o'ani, "'Konilias!"

4 Mia Konilias 'a maaaa'u raha ma wana wetewete 'inia ma o'ani, "'E taha saemaua?"

Mana enjel 'a o'ani, "'Ia God 'a rongo'i ha'arahesi amu'i ma re'iai 'a'auhiraau amuai pohara ma wa'ewa'e 'inia.

5 'Oi ha'ataari'i 'ari tara'i sae na'i Jopa marai 'unua mai sae na atana 'ia Saemon Pita.

6 'Ia 'a awa beiai sae nara 'unua ro'u 'inia Saemon na ruma ana 'a awa na'i bobonai asi. Saesi 'a tatau'arodi mareho 'ini uri-uri mwamwaa."

7 Na'i 'oha nagu ha'atee hako o'asi moi enjel ma ai'aa'a. Naasi mia Konilias 'a 'unua mai rua sae tatau'aro ana beiai ta'i sae hehei'oi. Ni sae hehei'oisi, 'a tau'aro 'a'auhia Konilias mana saesi 'a 'adoma'i ha'ahihia'aa ro'ua God.

8 'Ia Konilias 'agu 'unua hako moi tanaraau maho na to'osi ma ha'taariraau'a 'ari Jopa.

9 Na'i nata dangi na'i atoa, 'iraau wera orusi rau gaarangi ada'a wou na'i Jopa. Na'i madoraasi, 'ia Pita 'a ta'ehai hunganai ruma 'anai ha'arahesi. Hunganai rumasi 'a sada moi.

10 'Ohasi 'ia Pita 'a hioro ma raba ngau. Ma'ata na mahoingau ana ra tau'arodi moe'a na'i 'ohasi, mia re'iai maho na ha'amaranga tanaa.

11 'A 'omesiai aro na heihoa ma re'iai maho na 'ome 'onaai kae bwana bwabwanahora. Ma na'i hai di'una hairiu bwanasi, ra toto'oa dio baanai aro ma dio tari na'i ano.

12 Na'i hunganai bwanasi, 'a re'i'i mwani taraani mwamwaa he'ete'i, ra'i mwaa mana popo'usuri mana mwani manu hehe'ete'i.

13 Ma rongoai ha'atee na o'ani, "'Ura ara'a Pita, 'oi ngahui'i ma'oi ngaa'i."

14 Mia Pita 'a o'ani, "'Araha, 'a bwa'i. Ai'a ta 'oha mau wai ngaa ta mareho na ai'a arari 'anai ngaua."

15 Ma rongoa ro'u i ha'atee na o'ani, "'Ni maho 'ia God 'a 'unua dora arari 'anai ngaua, 'ogu bwa'i 'unua'a ro'u do ra ai'a arari."

16 'A rongoa ha'a-oru i ha'atesi mana bwana kakasi na re'iasi 'agu ara'a aho'i aro.

17 'Ia Pita 'a wai'ado'ado suriai maho na ha'ata'i tanaasi, taha huunai 'ado'ado 'ana. Ma na'i 'ohasi, i waira oru na ha'a-taariraau'i a Konilias raugu sadoiai ruma ana Saemon marau ura na'i maanai bara anai ruma.

18 Marau awara siri, rau songa'iniraau sae na'i rumasi 'inia Saemon Pita, 'onaa 'a awa 'isi ma'ua ai'a.

19 'Ia Pita 'a wai'ado'ado mau suriai taha naasi 'ana 'ado'ado i maho na re'iasi, mana Hi'ona Maea 'a o'ani'a 'inia Saemon, "'E wera oru rau sibani'o.

20 'Oi dio raurau ma'oi abu 'adoma'i heiruarua'a 'anai hano beiraau, suria 'inau nau ha'a-taariraau mai."

21 Mia Pita 'a dio wou ma o'ani 'iniraau, "'Inau naasi namou sibaniausi. 'E taha namou rabasia?"

22 Miraau wera orusi rau o'ani, "'E na'ohadaau hehei'oi ra 'unua 'inia Konilias na ha'ataari'ameu. 'Ia mo'osi 'e sae odo-odo ma ha'arahesia God miraau Jiu rau ha'ahoua di'u ro'u. 'E enjel ana God na 'unua tanaa do'ai 'unu'o 'ari na'i ruma ana maai rongo'i maho no'oi maani'i."

23 Mia Pita 'a 'unuraau siri na'i ruma ma dorai mauru ga'u na'i rodosi. Na'i nata dangi, 'iia ma tara'i sae hinihini ro'u ni Jopa rau ta'i hano beiraau waira orusi.

24 Mana'i nata dangi'a ro'u, naraugu ataha na'i Sisaria. 'Ia Konilias 'a 'unuraau hako mai na'i ruma ana 'iraau nei narau heito'oranga'i, beiraau gere sae goro ana'i narau totoria Pita.

25 'Oha na ataha Pita, 'ia Konilias 'a 'ari wou ma topira'i ruru tanaa 'anai ha'a-ororiua.

26 Mia Pita 'a ha'aurata'ea ara'a ma o'ani, "'Inau 'e sae ro'u moi 'onaai'osi."

27 Mararu mamaani hahano siri na'i ruma. Mia Pita 'a re'i'i mwani sae rau goni mai na'i rumasi

28 ma o'ani 'iniraau, "I'amou bwani 'iraraa do'a horosiai ringeringe amee'i Jiu do mei garihiraau nei ra ai'a Jiu ma'uasi hagu hagu beiraau. Ma'ata 'ia God 'a ha'ata'inia tanaau do 'a odo-odo 'anai hagu hagu beiraau mwani sae hako.

29 Tarana naasi, na'i 'oha 'o ha'ataari'i wou sae 'anai 'unuau mai, 'au ai'a kakawa, 'au boi moi. Hoita, mau raba songa'ini'o. Ni 'uaana na'o rabasia 'inia dowai boi?"

30 Mia Konilias 'a o'ani, "Naani hainai dangi murinai 'oha nau ha'arahesi na'i ruma agua na'i angi oru 'onaai 'ohanisi. 'Augu 'asu'a mana sae na ho'osiai bwana na wadowado di'u 'a ura'a na'i maagu.

31 Ma o'ani, 'Konilias, 'ia God 'a rongo'i ha'arahesi amu'i ma re'iai 'a'auhiraau amuai pohara.

32 'Oi ha'ataaria 'ari tara'i sae na'i Jopa marai 'unua mai sae ra 'unua 'inia Saemon Pita. 'Iia 'a awa beiai sae nara 'unua ro'u 'inia Saemon na ruma ana 'a awa na'i bobonai asi. Saesi 'a tatau'arodi mareho 'ini uri-uri mwamwaa.'

33 Ma naasi naugu ha'ataari'i raurau wou 'ini'i sae 'ani ma goro di'u na'o boi. Na'i 'ohanisi, 'i'ameu sae nameu goni 'ini na'i maana God, meu ha'aagau 'anai rongo'i taha 'ia Araha na 'unu'i tana'o do'oi maani'i tana'ameu."

Hadahada Ana Pita

34 'Ia Pita 'a o'ani, "Naasi 'augu aidangisia do mwani sae hako ra ta'isada moi na'i maana God.

35 'Iatei nai ha'ahoua maai haa'i maho ra odo-odo, 'ia God 'ai wa'ewa'e 'inia, rei'uaa dora he'ua na'i marewana na boi baania.

36 Mou bwane 'iraraai taroha goro na 'unua tanaraau Israel do gau matai hagu goro beia God 'iniai hinihinia agaaua Jisas Kraest, i Araha aga hako.

37 'Au 'iraraa domou aidangisiai taha na to'o na'i Jiudea. 'A taraawa'a na'i Galili murinai 'unua ana Jon tanaraau sae dorai bwareomaea.

38 Ni mareho na to'osi, 'a o'ani: 'Ia God 'a hauai Hi'ona Maea mana mena tanaa Jisas ni Nasaret. 'Ia God 'a awa beia mia Jisas 'a 'ari suri'i mwani dora 'anai haa'i tau'aro goro mana ha'agorohiraau aho'i nei ra awa na'i bahainai mena ana Saetan.

39 "I'ameu Ha'ataari meu re'iai taha na hua na'i Israel ma na'i 'omaai Jerusalem. Ra ha'amaesia na'i hunganai dadaahoro.

40 Ma'ata 'e rua dangi mana'i oruna 'ia God 'a ha'a-suruta'ea aho'i ma ha'a-omesiraau sae 'inia.

41 Ma ai'a 'iraau hakoi sae rau re'ia, 'i'ameu moi nei na 'ome sigihi'ameu a God, nameu ngau mameu gono beia na'i murinai suruta'e aho'i ana.

42 'Ia God 'a 'unua wetewete tana'ameu domei maania tanaraau noni do'ia Jisas naasi nei na 'ome sigihia 'anai hiiriraau nei ra tahi mau mana nei ra mae.

43 Miraau rarabea rau bwani ha'arangasia do 'iatei nai hinihinia Jisas rai 'adoma'i nugasi'i ora-ora'a ana'i."

Na Hi'ona Maea 'A Sirihiraau Nei

Ra Ai'a Jiu

44 'Ia Pita 'a mamaani mau mana Hi'ona Maea 'a sirihiraau'ai sae rau bahurongoa.

45 Miraau ai Jiu hinihini narau ta'i boia Pita, rau heimwaota'i di'u 'iniraau sae ra ai'a Jiu, i daua adaau ro'u i Hi'ona Maea.

⁴⁶ Rau rongoraau, rau haa'i ha'atee hehe'ete'i hairiu marau 'unu ha'aasaa God. Mia Pita 'a o'ani,

⁴⁷ “Iraau sae 'ini, 'ia God 'a haua'a tanaraau Hi'ona Maea 'onaai haua ana tanagaau. 'A bwa'i sae naigu ha'aabua dorai abu bwareomaearaau.”

⁴⁸ Mia Pita 'a 'unua tanaraau dorai bwareomaea 'iniai hinihinia adaaua Jisas Kraest. Miraau ha'angonia Pita do'ai awa ro'u ga'u beiraaui suria ta taringai dangi.

11

'Ia Pita 'A Mamaani Na'i Jerusalem

¹ 'Iraau Ha'ataari mana sae hinihini na'i Jiudea rau rongoa do tara'i sae ra ai'a Jiu rau hinihinia'ai tarohana Araha.*

² Na'i 'oha na ataha Pita na'i Jerusalem, 'iraau tara'i Jiu hinihini narau 'adoma'i ororiu 'iniai aha ha'ara rau 'unu'unu ha'ata'aia.

³ Marau o'ani, “Toe 'o awa beiraaui nei narau ai'a aha ha'ara ma'o ngau ro'u beiraaui!”

⁴ Mia Pita 'a maania goro tanaraau maho na to'o. 'A o'ani,

⁵ “Inau awa na'i Jopa, ma na'i madoraa nau ha'arahesi, 'e mareho na ha'amaranga tanaau. 'Au 'omesiai aro na heihoa mau re'iai maho na 'ome 'onaai kae bwana bwabwanahora. Ma na'i hai di'una hairiu bwanasi, ra toto'oa dio baaniai aro ma tari dio na'i bobogu.

⁶ 'Au wanawana mau 'omesi'i mwani mwamwaa, nei wasi mana mwaa mana popo'usuri mana manu na'i hungana.

⁷ Mau rongoi ha'atee na o'ani, 'Ura ara'a Pita, mo'oi ngahui'i ma'oi ngaa'i.’

⁸ “Minau o'ani, 'Araha, 'au bwa'i matai haua o'asi. Ai'a ta 'oha mau wai ngaa ta mareho na ai'a arari 'anai ngaa.’

⁹ “Mana ha'atee na boi baaniai aro 'a o'ani ro'u, 'Ni maho 'ia God 'a 'unua dora arari 'anai ngaa, 'ogu bwa'i 'unua'a ro'u do ra ai'a arari.’

¹⁰ “'Au rongoa ha'a-oru i ha'ateesi maragu ara'a aho'i aroi maho 'isi.

¹¹ 'Augu 'asu'a ma'e oru saeni Sisaria rau ataha na'i ruma nau awa na'ieisi.

¹² Mana Hi'ona Maea 'a 'unua dowai abu 'adoma'i heiruarua'a, wai hano beiraaui. 'Iraau waira ono do'oragu'i beia Kraest 'ini, nameu ta'i 'ari ruma ana Konilias.

¹³ Mia Konilias 'a maania tana'ameu do'e enjel na ha'ata'i tanaa na'i ruma ana. Mana enjel 'a o'ani 'inia, “Oi ha'ataaria 'ari tara'i sae na'i Jopa marai 'unua mai sae ra 'unua 'inia Saemon Pita,

¹⁴ maai maania tana'o miraui sae na'i ruma amua i herehere moi tahi 'inia.’

¹⁵ “Hoita, 'augu taraawa'a hadahada moi, mana Hi'ona Maea 'a sirihiraau'a 'onaai here na to'o tanagaau na'i na'o ani.

¹⁶ Mau 'adoma'i aho'isiai ha'atee na haua Araha o'ani, “'Ia Jon 'a bwareomaearaui inoni 'iniai wai mi'amou rai bwareomaea'amou 'iniai Hi'ona Maea.’

¹⁷ Na'i 'ohasi naugu aidangisia do 'ia God 'a banea ro'u tanaraui nei ra ai'a Jiu i ta'i bane na haua tanagaau na'i 'oha gau hinihinia Araha aga Jisas Kraest. Naasi, 'inau 'au bwa'i ura bwarasiai hei'irisina God tanaraau.”

¹⁸ Na'i 'oha 'iraau Jiu 'isi rau rongoi mamaani na haua Pita rau haa marau agoheta'i heiraeraesi'a beia, marau taraawa'a 'unu ha'aasaa God. Rau o'ani, “'Ohani, 'ia God 'a ha'awatea do 'iraui nei ra ai'a Jiu rai rihosi marai dauai tahi tarau.”

* **11:1 Tarohana Araha:** Na'i ha'ateeni Grik ra 'unua moi “Ha'atee ana God.” Ma'ata ni huunai 'ado'ado 'ana na'i bukani, naasi Taroha Goro 'inia Jisas.

Heisoi Na'i Antiok

¹⁹ Murinai ngahuaia ada Stivin ani, ra taraawa'a norata'airaaui di'u i sae hinihini na'i Jerusalem. Me ni 'adarara rau haa i sae hinihini na'i madoraasi, 'a taha na'i Ponisia ma na'i maraui Saepras ma na'i 'omaa rahai Antiok. Rau taroha'iniai Taroha Goro, ma'ata rau heitaroha'i moi tanaraaui Jiu.

²⁰ Ma'ata tara'i sae hinihini ni Saepras mei Saerin naraugu 'ari 'omaa Antiok marau taroha'iniai Taroha Goro 'inia Araha Jisas tanaraaui sae ra ai'a Jiu.

²¹ Na mena ana God 'a awa beiraaui, mara rago i sae narau hinihini marau rihota'i tanaa Araha.

²² Na'i 'oha na taroha 'inia mahosi 'a tari beiraaui saeni heisoi na'i Jerusalem, rau ha'ataaria Banabas 'ari Antiok.

²³ Na'i 'oha na ada wou 'a re'ia do'ia God 'a goro di'u 'iniraaui ma wa'ewa'e raha 'inia. Ma ha'ata'u'uraaui dorai ura baabau na'i tahingadaa'i beia Araha.

²⁴ 'Ia Banabas 'e sae goro na hinihinina 'a wetewete di'u, mana Hi'ona Maea 'a rabe beia. Na tarana naasi, 'a rago ro'u i nei rau hinihinia Araha na'i madoraasi.

²⁵ 'Ia Banabas 'a 'ari sibania Sol na'i Tasas

²⁶ ma waia mai na'i Antiok mararu awa beiraaui sae hinihini na'isi. Suriai ta'i harisi bubu raru awa 'isi ma ragoi nei nararu ha'ausuriraaui. Antiok naasi 'omaa tahamora narau 'unuraaui sae hinihini 'ini'i "Kristin."

²⁷ Na'i madoraasi tara'i rarabea rau boi na'i Antiok baaniai Jerusalem.

²⁸ 'E ta'i 'iniraaui naasia Agabas. 'Iniai mena anai Hi'ona Maea 'a 'unua hura'a do'e hioro raha nai to'o suria 'ari hakoi marewana.† (Ni hioro rahasi 'a to'o na'i madoraai na heimarungi a Klodias.)

²⁹ Miraaui sae hinihini na'i Antiok rau 'adoma'inia dorai haua ta gere hei'a'auhi tanaraaui nei hinihini na'i Jiudea. 'E nei ma hisu 'inia ha'a tari dora na matai hisu tari na'iei.

³⁰ Naasi 'ia Banabas mia Sol nararugu waiai wawate adaau tanaraaui bwauodonai heisoi na'i Jerusalem.

12*Herod 'A Here Ha'ata'aii Heisoi*

¹ Na'i madoraasi, i Mwaeraha Herod 'a daa'i tara'i sae ni heisoi 'anai ha'a-rongomaata'iraaui.

² 'Ia Herod 'a 'unua tanaraaui hehei'oi dorai ha'amaesia Jems, do'orana Jon, 'inia naihi.

³⁻⁴ Na'i 'oha 'ia Herod 'a re'ia do 'iraaui sae mwanemaua adaa'i Jiu rau wa'ewa'e 'inia mahi na hauasi, ma daua ro'ua Pita ma nugaa na'i rumaniho'o. (A haua na'i 'oha 'iraaui Jiu ra ha'ato'oai rongo ni Roho Aharau.)* 'E hai ruruhai hehei'oi narau 'omesuria Pita. 'E hai sae hehei'oi ta'i ruruha. 'Ia Herod 'a 'adoma'inia do 'aigui hiiria Pita na'i maadaui noni hunga na'i murinai rongo ni Roho Aharau.

⁵ Na'i 'oha na awa Pita na'i rumaniho'o, na heisoi 'a ha'arahesi 'a'auhia wetewete.

Pita 'A Hura'a Baaniai Rumaniho'o

⁶ 'E ta'i dangi moe'a namau mia Pita 'ai siri'a na'i hihiri. Na'i rodo 'a mauru mana rua hehei'oi raru 'omesuria, raru 'ado bobo 'inia. Raru 'ado

† 11:28 11:28 Mwani sae madoma ra 'adoma'inia do na'i 'oha nara 'unuai marewana hako, ai'a do naia hako i marewana, ma'ata na'i moi dora na Gaumani anai Rom na marungia. * 12:3-4 12:3-4 Na'i ha'ateeni Grik ra o'ani, "A haua na'i 'oha 'iraaui Jiu ra ngau goni 'inia i bredi nara ai'a ha'asu'ua."

arihau nararu tosi'i suri'i rimadaru'i ma rarugu tosi'i beia Pita. Ma tara'i hehei'oi ro'u rau 'omesuriai maraaruma anai rumanih'o.

⁷ Mana enjel ana Araha 'a boi mana rarahana 'a marewa hako 'ari suriai ahiisi. 'A tatakiriai 'aba'abana Pita ma ha'araia, 'a o'ani, "Urata'e! Raurau!" Mana arihau ra tosi'i beia ra ahoda baaniai rimana'i

⁸ mana enjel 'a o'ani, "O'i siri na'i to'oni amua ma'oi nuga'i sandol amu'i na'i uwamu." Mia Pita 'a haua 'onaai 'unua anai enjel mana enjel 'a o'ani ro'u, "O'i siri ro'u na'i to'oni bohura'a amua mo'oi boi suriau."

⁹ Ma suria mana maho na to'osi 'a 'onaa moi do'a mauru'aa. 'A ai'a 'iraraa 'onaa 'a to'o ha'a-momori ma'ua ai'a.

¹⁰ Raru di'ua hura'ai rua dora nara matai ura-ura iei sae hehei'oi mararu ataha na'i honohono 'aeana na'i maana'i bara anai rumanih'o'osi. Na'i 'oha nararu ataha wou, na honohono 'a wawaa haaria mararu hura'a'a wou i abau 'omaa. Raru 'ari suri tara mana enjel 'agu ai'aa baania Pita.

¹¹ Mia Pita 'agu aidangisiai maho na to'o ma o'ani, "Naani 'augu 'iraraa, 'ia God 'a ha'ataariai enjel ana 'anai ruhasiau baania Herod mei baani'i maho 'iraau na'otara adaa'i Jiu rau bonasia haa'i tanaau."

¹² 'A wai'ado'ado wou ma 'ari ruma ana Meri, inana Jon Mak. Ma ragoi nei hinihini rau awa na'i rumasi, rau ha'arahesi.

¹³ Mia Pita 'a boi ma pwepwee na'i honohono anai bara nara baragaria 'inia'i rumasi. Mana urao na tagora na'i rumasi, 'a hura'a wou 'anai tahangiai honohono. Atana'i uraosi 'ia Roda.

¹⁴ 'Oha na rongoai ringena Pita, 'a wa'ewa'e di'u ma kaku'aa'i tahangiai maraaruma. Ma 'eba aho'i siri ruma ma o'ani, "Ia Pita na ura hura'asi!"

¹⁵ Miraau hako rau o'ani, "T'oe 'o bweu gasi!" Mia 'unua moe'a do'ia Pita. Miraau 'unua do ni enjel na 'omesuria gasia Pita na pwepweesi.

¹⁶ Mia Pita 'a pwepwee moe'a tari 'oha narau tahangia tanaa i maraaruma. Ma na'i 'oha narau re'ia, rau heimwaota'i di'u.

¹⁷ Mia Pita 'a haai ha'ara 'inia'i rimana 'anai ha'a-papakuraau ma maania tanaraau here na haua Araha tanaa ma ha'ahura'ahia baaniai rumanih'o. Ma 'unua tanaraau dorai maania tanaa Jems mei tanaraau hako'i sae hinihini 'abaiai maho na to'osi. Miagu hura'a ma 'ari dora he'ete'i.

¹⁸ Na'i haho'oa, 'iraau sae hehei'oi na'i rumanih'o, 'a ta'abedaa'u ma kakui ahudaau 'inia'i maho na to'o tanaa Pita.

¹⁹ 'Ia Herod 'a 'unua tanaraau sae hehei'oi ana'i dorai sibania Pita maraugu ai'a sadoia. Ma songa'iniraau sae hehei'oi rau 'omesuria Pita magu 'unua dorai ha'amaesiraau.

Mia Herod 'a hano baania Jiudea ma 'ari na awa ga'u na'i Sisaria.

'Ia Herod 'A Mae

²⁰ 'Ia Herod 'a taesu'a di'u 'adaau saeni Taea mei Saedon. 'Iraau sae 'isi, mahoingau adaa'i ra boi baaniai dora na heimarungi iei Herod. Naasi rau ha'ataariai ruruhai sae 'ari beia Herod 'anai ha'a-arataraai heihoa na awa na'i ahoadaau neina rai matai to'ora mahoingau aho'i. Ma na'i na'o, rau ataha beia Blastas, 'e saemaua na tatau'aro tanaa Herod. Rau mamaani beia ma 'adoma'i aratara 'anai 'a'auhiraau.

²¹ Marau duruai dangi beia Blastas 'anai hauai ha'a-aratara beia Herod. Ma na'i dangisi, 'ia Herod 'a siri suri'i to'oni hauasa ana'i ma heinagu na'i dora ni mwaeraha ana magu hadahada.

²² Miraau sae rau awara o'ani, "T'oe 'o ai'a hadahada 'onaai inoni, 'o rongo hauasa 'onaai hi'ona."

²³ Mana enjel ana God 'a ha'adaohaa Herod suria 'a wa'ewa'e 'inia'i ha'a-ta'eta'e ada magu ai'a rabasia dorai ha'aasaa God. 'Ari wou mana mwamwaa ni ahu ra ha'amaesia.

²⁴ Na tarohana Araha 'a 'adarara 'ari suriai mwani dora ma ragoi nei nara aho'ita'i sae hinihini.

²⁵ Hoita, 'ia Banabas mia Sol raru haua hakoi wawate tanaraaui sae hinihini na'i Jerusalem, mararu aho'i 'ari Antiok. Raru waia Jon Mak beirarua.

13

Ra 'Ome Sigihia Banabas Mia Sol

Mara Ha'ataarirarua

¹ I heisoi na'i Antiok, ra'i rarabea mana ha'ausuri ra awa na'iei. 'Ia Banabas mia Simion nara 'unua ro'u 'inia mo'o na abeburu, mia Lusias baaniai Saerin, mia Sol mia Manaen. 'Ia Manaen 'a raha ara'a goni beia Herod Antipas na'i ruma adaau.*

² Hoita, 'e ta'i 'oha na'i madoraa rau ha'arahesi marau ha'aririta'i ngau, i Hi'ona Maea 'a 'unua tanaraau dorai 'ome sigihia Banabas mea Sol 'anai hauai tau'aro na 'unurarua 'ana.

³ 'Oha na ha'arahesi mana ha'ariri 'a hako, marau dau na'i bwardaru'i a Banabas mia Sol marau ha'a-taarirarua hura'a 'anai hauai tau'aro adarua.

'Ia Banabas Mea Sol Na'i Marau i Saepras

⁴ Ma naasi na Hi'ona Maea 'a ha'a-taarirarua Banabas mea Sol mararu 'ari Selusia. Na'i 'isi nararugu ta'e iei 'anai marau Saepras.

⁵ Na'i 'oha raru taha na'i 'omaai Salamis raru taraawa'a taroha'iniai tarohana Araha suri'i ruma ni ha'arahesi adaa'i Jiu. 'Ia Jon Mak 'a hano ro'u beirarua 'anai 'a'auhirarua.

⁶ Rau 'ari tari na'i 'omaa rahai Pefos na'i nata ngongoo 'iniai marau. Na'isi rau heisadoi beia ta'i ai Jiu na atana 'ia Bajisas. 'Iiasi 'e rarabea pwapwari'i na matai haa'i ha'abu'oahu 'iniai mena anai adaro.

⁷ 'A hagu goro beia Sejas Polas, 'iiani 'e sae aidangi na Primia 'anai marausi. Na Primia 'a raba rongoai tarohana Araha ma 'unua Banabas mia Sol.

⁸ Mia Bajisas, nata ata ro'u 'ia Elimas,† 'a ura bwarasia Banabas mia Sol, 'a ai'a rabasia Sejas Polas do'ai hinihinia Jisas.

⁹ Mia Sol, 'iiasi ra 'unua ro'u 'inia Pol, i Hi'ona Maea 'a rabe beia. 'A wanasia Elimas

¹⁰ ma o'ani 'inia, "I'oe 'e gare ana Saetan! 'O pwari'iraaui tarau noni 'anai ha'a-bweubweu'araui, mi'oe 'e maeronga 'ada'i mwani maho goro. 'Oha he'ua na'oigui agoheta'i hiosi'i ha'ausuringa'i odo-odo ana'ia Araha?"

¹¹ Na'i 'ohani, 'ia God 'ai ha'a-mama'ai'o! Naasi, ta madoraa 'o bwa'i wanawana. Rei'uaa marewahanai sina, ma 'o bwa'i re'ia ro'u."

'Agu 'asu'a Elimas mana maana ra gahu'a mara kuhi ma to'o karokaro 'inia ta sae do'ai urua.

¹² Na'i 'oha 'ia Sajias Polas 'a re'iai maho na to'osi 'a hinihinia'a Araha, 'inia 'a heimwaota'i di'u 'iniai ha'ausuringa'i 'inia Araha.

'Ia Pol Mea Banabas Raru 'Ari Pisidia

¹³ 'Ia Pol miraaui nei rau hano beia, rau hano baaniai Pefos marau ta'e na'i haka 'ari Provensi nara 'unua 'iniai Pamfilia marau siri na'i 'omaai Paga. Na'isi nagu aho'i eia Jon Mak baania Pol mea Banabas 'ari Jerusalem.

* **13:1 Herod Antipas:** Herod Antipas, 'a he'ete'i baania Mwaeraha Herod. 'Ia Herod Antipas 'a heimarungi na'i Provensi Galili mana Paraea me 'iia na ngahuia ania Jon Bwareomaea. † **13:8 Elimas:** Na 'ado'ado 'anai atasi "Sae na matai haa'i ha'abu'oahu 'iniai mena anai adaro."

14 Rau hano baaniai Paga marau hatare 'anai Antiok. Antiok 'e 'omaa na'i Provensi Pisidia. Ma na'i dangi ni mamaro rau siri heinagu na'i ruma ni ha'arahesi adaui Jiu.

15 Na'i murinai 'oha'inia ada i Ringeringe ana'ia Moses mana Usu-usu Maea adaa'i rarabea, 'iraui na'otara 'anai ruma ni ha'arahesi rau ha'ataari ha'atee 'ari tanaa Pol mea Banabas. Rau o'ani, "Rua do'ora, 'onaa muru raba maania ta maho 'anai 'a'auhiraui sae, ma murui mamaani'a."

16 Mia Pol 'a hauai ha'ara 'inia rimana do'a raba 'unua ta maho ma o'ani, "Igaau saeni Israel mi'amou sae he'ete'i namou ha'arahesia God, moi rongobahuau.

17 I God agaui Israel 'a 'ome sigihiraui wauwa agaa'i ma ha'awateraau dorai tabara na'i Ijip. 'Iniai mena ana na wetewete 'a wairaau hura'a baaniai dorasi.

18 Rei'uaa narau hau'i here nara ta'a'i di'u, me 'ia 'a oosi suriraau moi na'i 'omaa mangasara suriai hai tangahurui harisi.

19 Ma here ha'ata'ai biu burungai noni na awa na'i Kenan ma ha'a-to'oraraui wauwa agaa'i 'inia dorasi.

20 Taraawa'a mau na'i 'oha rau ataha i wauwa agaa'i na'i Ijip, tari na'i 'oha na gare adaa'i raugu awa goro na'i Kenan 'a 'onaai hai 'arangi mana rima tangahurui harisi.

"Na'i muri, 'a nuga'i sae hihiri 'anai marungiraui tari mai madoraa ana Rarabea Samiuel.

21 Miraui rabasia ta mwaeraha. Mia God 'a ha'amwaeraha Sol, garena Kis. 'Ia Sol baaniai burungana Benjamin, ma heimarungi suriai hai tangahurui harisi.

22 Mia God 'a nugaa dioa Sol ma orisia 'inia Deved. 'A o'ani, "Ia Deved, garena Jesi, naasia mo'o na suriai barongagu. 'Ia nai haa'i mwani mareho nau 'irisi'i."

23 "Ma durua do ta sae baaniai burungana Deved 'ai huta, ma'ai ruhasiraui saeni Israel. Mana saesi naasi 'ia Jisas.

24 Na'i na'o maagu boia Jisas, 'ia Jon 'a 'unua tanaraui hakoi saeni Israel dorai rihosi baani'i ora-ora'a adaa'i marai bwareomaea.

25 'A gaarangi ha'ahakoa'ai tagora ana maagu songa'iniraui o'ani, "T'amou 'adoma'inia do'inau naasi Ha'atahi? Ai'a! 'Ia 'ai boi mau na'i muri. 'Inau ai'a arari 'anai dunasi'i sandol ana'i."

26 Mia Pol 'a 'unua o'ani ro'u, "Arai do'ora, na'i 'ohani moi bahurongo goro, 'i'amou warowarona'i a Ebrahim mi'amou ro'u i nei namou ai'a Jiu namou ha'arahesia God. 'Igaau hako na haua God 'i taroha tanagaui do'ai ruhasigaui baaniai ora-ora'a.

27 'Iraui saeni Jerusalem miraui bwauodo adaa'i rau ai'a 'ome 'iraraa do'ia Jisas naasi Ha'atahi aga. Marau ai'a aidangisi'i Usu-usu Maea adaa'i Rarabea nara 'oha'ini'i 'ado dangi ni mamaro. Ma rei'uaa na o'asi, rau hiiri ha'amaesia 'onaai bwane ha'arangasia adaui Rarabea.

28 Ma rei'uaa rau ai'a sadoia ta maho ta'aa nai haua nai arari 'inia 'anai mae, maraui buna ha'angonia Paelat do'ai ha'amaesia.

29 "Na'i 'oha nara ha'ato'o'i tanaa hako i mwani mareho na Usu-usu Maea na 'unua 'inia, ra rahia dioi abena baaniai dadaahoro mara aoraa na'i wabwa.

30 Mia God 'a ha'a-suruta'ea aho'i baaniai mae.

31 'A ragoi 'oha na ha'ata'i tanaraui nei narau bwane ta'i hano ani baaniai Galili 'anai 'ari Jerusalem 'oha na tahi mau. Ma na'i 'ohani rau taroha'inia tanaraui sae agaa'i.

32-33 "Miria Banabas miri boi 'ohani 'anai maaniai Taroha Goronisi tana'amou. Ni maho na 'ia God na bwane durua tanaraui wauwa agaa'i

'anai haua, 'a haua na'i madoraa agaau 'oha na ha'atahia aho'i ania Jisas.
 'A 'onaai 'unua ana na'i ruanai Psalm o'ani,
 'Toe gare agua.

Dangini wai ha'ata'inia tanaraaui noni

do 'inau naasi amamu.' ‡

34 'Ia God 'a ha'a-suruta'ea Jisas baaniai mae 'inia 'a ai'a rabasia do'ai mae'a
 ro'u ta 'oha. 'A 'onaai 'unua anai Usu-usu Maea na o'ani,
 'Wai haua tana'amoui ha'agorohi maea nau durua tanaa Deved.' §

35 Ma na'i nata Psalm 'ia Deved 'a 'unua ro'u o'ani,
 "Ia God 'a bwa'i wateai abenai noni maea ana nai ngabo.'*

36 Na'i Psalm naasi, 'ia Deved 'a ai'a hadanga'inia haaria. 'Oha na tahi maua
 Deved, 'a araisuria goro i hei'irisina God. Ma na'i 'oha na mae, ra toringia
 na'i hera adaui burungana mana abena 'a ngabo.

37 Ma'ata, 'ia mo'o na mae mia God 'a ha'a-suruta'ea aho'i, 'a ai'a ngabo i
 abena.

38-39 "Sae agu'i, 'inau rabasia domoi aidangisia do'ia Jisas 'a matai
 'adoma'i nugasi'i 'inomoo'i. Rei'uaa namoi suri'i mwani Ringe ana'ia Moses,
 'ia God 'a bwa'i matai 'unua domou odo-odo na'i maana. Ma'ata 'iatei nai
 hinihinia Jisas, 'ia God 'ai 'unua do 'a odo-odo'a na'i maana.

40 Naasi moi 'ome'ome goro, 'a gasi to'i'amou i maho rau 'unua i rarabea
 o'ani,

41 "T'amou nei mou haikou 'inia God,

'ai bu'oi ahumoo'i mamoi mae!

'Inia na'i madoraa amoou,

'inau wai hauai maho namou bwa'i hinihinia,

rei'uaa rai maania tana'amou.' †

42 Hoita, 'ia Pol mea Banabas raru taraawa'ai hura'a baaniai ruma ni
 ha'arahesi miraui sae rau ha'angonirarua 'anai aho'i mai ro'u na'i nata
 dangi ni mamaro 'anai maani'i tara'i maho ro'u.

43 Na'i murinai rihunga'i, rau ragoi ai Jiu mana nei ra ai'a Jiu narau
 boi 'anai ha'arahesi rau surisuria Pol mea Banabas. Mararu ha'atee
 ha'ata'u'uraau hako dorai ura baabau na'i hinihinidaau beia God 'inia 'ia
 'a goro 'iniraau.

44 Na'i nata dangi ni mamaro, gaarangi 'iraau hakoi sae na'i 'omaasi rau
 boi 'anai rongoai tarohana Araha.

45 Na'i 'oha 'iraau bwauodo adaa'i Jiu raugu re'ia o'asi, rau taesu'a di'u
 'iniai rago anai sae nara boboi beirarua. Rau hadahada ha'ata'aia Pol
 marau 'unu'unu'i maho na maani'isi.

46 Mia Pol mea Banabas raru ai'a mamaa'usiraau, raru o'ani, "Ia God
 'a 'irisia do miri taroha'iniai tarohana Araha tana'amoui Jiu na'i na'o.
 Mi'amou mou 'itaa. Naasi ha'ata'i ana do 'i'amou mou ai'a 'adoma'inia
 domou arari 'anai dauai tahi tarau. 'Imiria mirii 'ari'a beiraui nei rau ai'a
 Jiu.

47 'Inia 'ia Araha na 'unua tana'amiria. 'A o'ani,

"Au nuga'o 'onaai raita na marewasiraui nei ra ai'a Jiu,

ma'oi ha'ata'iniai tara 'anai tahi tarau tanaraau hako i sae suriai
 marewana hako.' ‡

48 Na'i 'oha 'iraui sae ra ai'a Jiu rau rongoai tarohasi, rau wa'ewa'e di'u
 'inia, marau ha'atee ha'agorohiai tarohana Araha. Miraui nei na 'ome
 sigihiraaua God 'anai dauai tahi tarau, rau nugaai hinihinidaau beia.

49 Ni tarohana Araha 'a 'adarara 'ari suria hakoi mwani dora na'i 'isi.

‡ 13:32-33 13:33 Psalm 2:7 Nata herehere 'anai orisia 'a o'ani, "Toe gare agua. Taraawa'a na'i
 dangini, 'inau naasi amamu." § 13:34 13:34 Aisaea 55:3 * 13:35 13:35 Psalm 16:10 † 13:41
 13:41 Habakak 1:5 ‡ 13:47 13:47 Aisaea 49:6

⁵⁰ Miraau i bwauodo adaa'i Jiu rau 'ari beiraaui tara'i saemaua mana urao mwanemaua na'i 'omaasi narau 'adoma'i ha'ahihi'aa God. Rau mamaani ha'a-taesu'araau ma do neina rai ura bwarasia Pol mea Banabas. 'Agu haa marau taraawa'ai haa'i here ta'a'i tanararua. Marau tariha'inirarua hura'a baaniai Antiok.

⁵¹ 'Ia Pol mea Banabas raru tarohi'i moi kahua baani'i uwadaru'i, 'anai ha'ata'inia tanaraau doni here narau hauasi, 'a taritari'a. Ma rarugu 'ari 'anai 'omaai Aekoniam.

⁵² 'Iraau sae ni heisoi na'i Antiok rau wa'ewa'e di'u mana Hi'ona Maea 'a rabe beiraaui.

14

'Ia Pol Mea Banabas Na'i Aekoniam

¹ 'Ia Pol mea Banabas raru siri ruma ni ha'arahesi adaaui Jiu na'i Aekoniam mararu heitaroha'i na'iei 'onaai bwane haua adarua ga'u na'i Antiok. Mana hadahada nararu haua, raru mataihere mamaani di'u. Ma ragoi Jiu miraau nei nara ai'a Jiu narau aho'ita'i sae hinihini.

² Miraau Jiu narau kakawata'i hinihinia Jisas, rau 'ari beiraaui nei ra ai'a Jiu nara ai'a hinihini ro'u, marau mamaani ha'a-taesu'araau, ma dorai 'itaraau sae hinihini.

³ 'Ia Pol mea Banabas raru awa orea ga'u na'i 'isi. Raru ramoramo 'anai taroha'iniai Taroha Goro tanaraau sae 'i goro ana God tanagia. 'Ia Araha God 'a hauai mena tanararua 'anai haa'i mwani ha'abu'oahu ma 'anai ha'ata'inia doni ha'atee adaru'i ra ha'a-momori.

⁴ Miraau noni hunga rau heihua marau hauai rua ruruha. 'E ta'i ruruha rau aba beiraaui saemaua adaa'i Jiu mana nata ruruha rau aba beia Pol mea Banabas.

⁵ Ma tara'i Jiu mana nei ra ai'a Jiu beiraaui na'otara adaa'i, rau hauai ha'aradorado 'anai ngahua Pol mea Banabas dorai buta'irarua 'ini'i hau.

⁶⁻⁷ Na'i 'oha raru rongo sadoiai ha'aradorado rau hauasi, mararu hora'a 'ari na'i Provensi Likeonia. Rarugu taroha'iniai Taroha Goro na'i Listra ma na'i Debe mei suri'i 'omaa garigariai rua 'omaasi.

Na'i Listra Mei Debe

⁸ Na'i Listra 'e sae na awa na'iei na huta ha'i pwaki ma ai'a hahano.

⁹ 'A rongobahua Pol 'oha na maaniai Taroha Goro. Mia Pol 'a wanasia mo'osi ma 'ome 'iraraa do 'a hinihiniai heitaroha'i na haasi, ma ga'i matai goro aho'i moi.

¹⁰ Mia Pol 'a awara tanaa, 'a o'ani, "'Oi ura ara'a!" Mia mo'osi 'a kae suruta'e raha moi ara'a ma taraawa'ai hahano hairiu.

¹¹ 'Oha 'iraau noni hunga rau re'iai maho na haua Pol, rau awara 'iniai ha'ateeni Likeonia o'ani, "I rua hi'ona agaau, raru aho'ita'i sae mararu dio mai'a beigaau!"

¹² Rau 'unua Banabas 'iniai Sus, 'e hi'ona adaaui Grik, mia Pol 'ia Hamis, suria 'iia naasi sae 'anai 'unu'i hura'ai maho.

¹³ Na ruma ni suu ho'asi tanaa Sus 'a awa moi na'i gaarangiai 'omaasi. Mana Piriisi 'anai rumasi mana noni hunga rau raba suu ho'asi tanaa Banabas mea Pol. Naasi rau waa'i mai kau nara ha'arauni'i 'ini'i tagai hasi'ei marau ataha na'i maanai bara 'anai 'omaa.

¹⁴ Na'i 'oha raru rongoai mareho rau raba haua, raru kari'i to'oni adaru'i 'anai ha'ata'inia do raru ai'a 'adoma'i aratara 'iniai marehosi. Mararu 'eba wou huniraaui noni hunga mararu awara o'ani,

¹⁵ "Romwane, ni 'uaana mou haua o'asi 'inia? 'Imiria ra'i sae ro'u moi 'onaaimousi! Miri boi 'anai waa mai Taroha Goro tana'amou. Moi abui ha'arahesi'i hi'ona nara bwa'i 'a'auhi'amou, ma'ata moi rihota'i tanaai God

tahitahi na ha'apwa'araai ahoaa mana ano mana asi mana mwani maho na'i rarodi.

¹⁶ Taraawa'a mau mai, 'ia God 'a nugasiraau noni dorai suri'i hinihinidaa'i haariraau.

¹⁷ Ma'ata rei'uaa na o'asi, 'iia 'a ha'ata'inia ro'u mau haaria tana'amou suri'i maho goro na haa'i. 'A ha'adiohia'i rangi baaniai aro 'anai ha'atahi'i maho mou hasi'i, ma haa'i mahoingau tana'amou mamou wa'ewa'e 'ini'i."

¹⁸ Rei'uaa na'ia Pol mea Banabas raru 'unu'i maho 'isi, ma rarugu buna wetewete mau ro'u 'anai bonasia dorai abu suu ho'asi tanararua.

¹⁹ Ma tara'i na'otara adaa'i Jiu na'i Antiok ma na'i Aekoniam rau boi marau mamaani ha'a-taesu'araau noni hunga 'anai ura bwarasia Pol. Naasi marau buta'ia Pol 'ini'i hau marau oge tatarasia hura'a baaniai 'omaasi. Rau 'adoma'inia do'a mae'a.

²⁰ Na'i 'oha 'iraau sae hinihini rau boi ura garigaria Pol, mia 'a urata'e ma siri aho'i na'i 'omaa. Ma na'i nata dangi, 'ia Pol mea Banabas raru 'ari Debe.

Ia Pol Mea Banabas Raru Aho'i 'Ari Antiok

²¹ 'Ia Pol mea Banabas raru taroha'iniai Taroha Goro na'i Debe ma ragoi nei ra siri ro'u na'i heisoi. Mararu aho'i 'ari Listra mei Aekoniam mei Antiok na'i Provensi Pisidia.

²² Raru mamaani ha'a-o'oriraau sae ni heisoi na'i 'isi dorai ura baabau hinihinidaau beia Jisas. Mararu o'ani, "Ai ragoi maho rai ha'aboobo abe na'i tahingagaa'i nagai siri suri'i magaigu matai siri na'i hourana ana God."

²³ Mararu 'ome sigihi'i tara'i saemwane narau bwane hinihinia Araha 'anai bwauodo na'i heisoi suri'i 'omaa 'isi. Rau ha'aririta'i ngau marau ha'arahesi maraugu wate'i woui sae 'isi tanaa Araha 'anai na'otara na'i heisoi.

²⁴ 'Ia Pol mea Banabas raru hano baaniai Antiok na'i Provensi Pisidia mararu 'ari Provensi Pamfilia

²⁵ mararu taroha'iniai Taroha Goro na'i 'omaai Paga. Raru dio 'anai Atalia

²⁶ ma na'i 'isi nararugu ta'e iei 'anai 'omaa ra 'unu Antiok ro'u 'inia. 'A awa na'i Provensi Siria. Na'i Antiok na'i Provensi Siria, naasi dora ra waterarua ani na'i bwabwahlenai rimana God, 'anai hauai tau'aro nararu bura'i ha'ahakoasi.

²⁷ 'Oha raru ada na'isi, raru soigoniraau mai sae ni heisoi, mararu maani'i tanaraau mwane mareho na haa'ia God suri'i mwane 'aariha nararu bwane haa'i. Mararu maania ro'u do'ia God 'a ha'awateraau nei nara ai'a Jiu do 'anai hinihinia ro'ua Jisas.

²⁸ Raru awa orea na'i 'omaasi beiraau sae hinihini.

15

Gonigoniha Adaaui Bwauodo

Na'i Heisoi Na'i Jerusalem

¹ Tara'i Jiu hinihini na'i Jiudea rau boi na'i Antiok marau maania tanaraau sae ni heisoi na'isi do 'onaa rau bwa'i dauai ringei aha ha'ara 'onaai 'unua ana Moses, 'ia God 'a bwa'i ruhasiraau baani'i ora-ora'a adaa'i.

² Pol mea Banabas raru ai'a 'adoma'i aratara beiraau 'iniai mahosi mararu hauai kaeni heiraeraesi beiraau. Naasi mara 'ome sigihirua bei'i tara'i sae ro'u 'anai 'ari aho'i Jerusalem 'anai hadanga'iniai mahosi beiraau Ha'ataari ma tara'i na'otara ro'u na'i heisoi.

³ 'Iraau sae hinihini na'i Antiok rau ha'a-taariraau 'ari, marau riuho na'i Ponisia mana Samaria. Rau maania tanaraau sae ni heisoi 'isi, do tara'i nei nara ai'a Jiu rau hinihinia'a Jisas. Miraau sae ni heisoi rau wa'ewa'e di'u 'iniai tarohasi 'oha rau rongoa.

⁴ Na'i 'oha 'iraau ruruha ana Pol rau ada na'i Jerusalem, 'iraau sae ni heiso'i na'isi goni beiraui Ha'ataari miraui na'otara rau ha'amaotaraui. Mia Pol mea Banabas raru maani'i mwani maho na haa'ia God suri'i mwane 'aariha nararu bwane haa'i.

⁵ Tara'i Farisei nara siri mai na'i heiso'i rau ura ara'a marau o'ani, "Iraui sae ra ai'a Jiu narau siri mai na'i heiso'i rai daua ma'ata 'i ringei aha ha'ara, marai ha'isuri'i Ringe ana'ia Moses."

⁶ Miraui Ha'ataari mana na'otara rau rurugoni marau hadanga'inia haiu'au'a na to'o beiraui nei ra ai'a Jiu.

⁷ Rau hadanga'inia orea di'u i mahosi. Mia Pita 'a ura ara'a ma o'ani, "Arai do'ora, mou aidangisia do'ia God 'a bwane 'ome sigihiau mau mai baaniai ruruhani 'anai taroha'inia Taroha Goro tanaraui nei ra ai'a Jiu. 'Ia God 'a haua o'asi dorai rongoai Taroha Goro marai hinihinia.

⁸ Mia God 'a 'ome 'iraraa do rau hinihinia ha'a-momori, 'inia 'iia 'a 'irara'i hako'i 'adoma'igaa'i. Ma ha'ata'inia do'a 'ome sigihirau ro'u i nei ra ai'a Jiu na'i 'oha na banea tanaraui Hi'ona Maea 'onaa'i banea ana ro'u tanagia.

⁹ Mana here na haua tanaraui 'a ta'isada beiai here na haua nagaui. 'Inia 'oha raugu hinihinia ma ha'a-ai'a'i ora-ora'a adaa'i 'onaa'i bwane haua ana beigaui.

¹⁰ Naasi, ni 'uaana namou raba ha'ataesu'aa 'inia God na'i 'oha namou ha'a-'usu'usuraui nei nara ai'a Jiu 'anai suri'i mwane ringe ana'ia Moses? Ai'a odo-odo 'anai ha'a-hihi'araui sae hinihini nara ai'a Jiu 'ini'i ringe na 'igaaui miraui wauwa agaa'i rau bwara ro'u 'anai ha'isuri'i!

¹¹ 'Igaui gau hinihinia do 'ia Araha aga Jisas 'a ruhasigia 'inia goro ana 'inigia, 'onaa'i ruhasirau ana ro'u i nei narau ai'a Jiu."

¹² 'Iraui hako rau ngotoburu marau rongobahua Banabas mea Pol, maania adaruai mena na haua God tanararu nararugu haa'i 'ini'i mwani ha'abu'oahu mana ha'ara tanaraui nei ra ai'a Jiu.

¹³ 'Oha raru mamaani hako, mia Jems 'a o'ani, "Arai do'ora, moisu rongoai maho wai maaniani.

¹⁴ 'Ia Saemon Pita 'a bura'i maania moi tanagaui do'ia God 'a ta'ahirau nei narau ai'a Jiu ma 'ome sigihi'i tara'i nei 'anai ha'i noni ana'i.

¹⁵ 'A ta'isada 'onaa'i maho narau usuai rarabea o'ani,

¹⁶ "Inaua God wai aho'i mai mawai ha'a-urasa aho'i ruma ana Deved* na kokohu. Wai tagoraa aho'i 'ini'i hau 'ana nara 'adarara.

¹⁷ Wai haua o'asi neina 'iraui nei narau ai'a Jiu rai matai rihosi mai tanaui, marai ha'i inoni agu'i.

'Ia God na ha'atee o'asi,†

¹⁸ 'iia 'a bwane 'unu'i mau mai doni mwane mareho 'isi rai to'o.' "

¹⁹ Mia Jems 'a o'ani ro'u, "Naasi, na'i 'ado'adogu, gai abu ha'a-hihi'araui nei narau ai'a Jiu narau rihota'i tanaa God 'anai araisuri'i hako'i ringe agaa'i Jiu.

²⁰ Gai usu-usu moi tanaraui magai 'unua tanaraui dorai abui wawaa-sua'a ma'ua ngaa'i mahoingau ra ho'asi'i 'inia araanunu. Marai abu ngaa'i 'abudi mwamwaa ma'uasi ngaa'i hasi'odi mwamwaa nara ri'o'i.

²¹ Rai abui hau'i mareho o'asi, suria na ringe 'isi, ra'i ringe ana'ia Moses nara bwane maani'i tarau suri'i mwani 'omaa hako mara 'oha'ini'i 'ado 'oha gau boi goni suri'i dangi ni mamaro."

Usu-usu Baaniai Heiso'i Na'i Jerusalem

* **15:16 Ruma ana Deved:** 'Oha ra 'unua "ruma ana Deved," 'ana i 'ado'ado 'iraui i sae na'ia Mwaeraha Deved na marungirau. † **15:17** 15:16-17 Amos 9:11-12

22 'Iraaui Ha'ataari miraau na'otara miraau hakoi sae hinihini na'i Jerusalem, rau 'adoma'inia dorai ha'ataari'i tara'i sae beia Pol mea Banabas 'ari Antiok. Rau 'ome sigihia Saelas mea Jiudas Basabas, 'irarua 'e rua na'otara na'i heisoi.

23 Ra hauai usu-usu 'anai ha'ataaria beirarua. Ma na'i raronai usu-ususi 'a o'ani,

'Tameui Ha'ataari miraau na'otara, meu haua woui ha'atee wa'ewa'e ameeu tana'amoui nei mou ai'a Jiu na'i 'omaai Antiok mei Siria mana'i Silisia namou aho'ita'i sae hinihini.

Arai do'oramee'i na'i Kraest,

24 meu rongoa do ra'i sae nara hano 'ini, rau 'ari wou marau maani'i mareho tana'amou nara torakoke 'ini'i 'adoma'imoo'i. 'Tameu meu ai'a ha'ataari'i sae 'isi.

25 Meu rurugoni mameu 'adoma'i aratara hako 'anai 'ome sigihi'i sae 'anai ha'ataari'i wou tana'amou. Rai hano beiraruai rua gere sae goro ameeu, 'ia Banabas mea Pol,

26 nararu bwane siri'a ga'u na'i maemaeha 'iniau tau'aro adarua tanaa Araha aga Jisas Kraest.

27 Naasi mei ha'ataaria woua Jiudas mea Saelas, 'irarua rarui maani'i ro'u mau tana'amoui maho nameu maani'i na'i usu-usuni.

28 I Hi'ona Maea 'a ha'ata'inia tana'ameu mameu 'adoma'i aratara beia domei abu ha'ahihi'amou 'ini'i mwani ringeringe. Ma'ata 'a ga'i goro do moi ha'isuri'i mareho 'ini.

29 Moi abui ngaa'i mahoingau nara ho'asi'i 'iniau araaranunu, mana ngaa'i 'abudi mwamwaa, ma'uasi ngaa'i hasi'odi mwamwaa nara ri'oi'i, mamoi abui wawaasua'a. 'Onaa moi ha'isuri'i ringeringe 'ini, 'i'amou mou suriai taha na odo-odo.

'Io, moigui mauru goro'a.

30 Miraau waira haisi rau hano baaniai Jerusalem marau ada na'i Antiok. Rau soigonirau mai sae hinihini marau taranga'inia tanaraau usu-usu.

31 'Oha rau 'oha'iniau usu-usu, rau wa'ewa'e di'u, 'inia 'a ha'a-o'ori'i tahingadaa'i.

32 'Ia Jiudas mea Saelas 'e rua sae nararu matai ha'arangasi'i hura'a i 'ado'adona'i a God, raru hadahada orea tanaraau sae hinihini mararu ha'a-weteweteai hinihinidaau.

33 Raru awa gere orea ga'u na'i Antiok. Mana'i 'oha raru ha'aagau 'anai 'ari aho'i Jerusalem, 'irau sae hinihini rau hauai ha'atee ha'agorohi mana haiha'ari adaa tanararua.

34 Mia Saelas 'agu 'adoma'inia do'ai awa moi.‡

35 Mia Pol mea Banabas raru awa mau na'i Antiok. 'Iraau goni tara'i sae ro'u, rau ha'ausuri marau taroha'iniau Taroha Goro ana Araha tanaraau sae.

'Ia Pol Mea Banabas Raru Heiho

36 Na'i muri, mia Pol 'a 'unua tanaa Banabas do rarui 'ari gaariri suri'i 'omaa raru bwane taroha'iniau tarohana Araha suri'i mararui aidangisia 'a he'uai tahingadaa'i sae hinihini.

37 Mea Banabas 'a rabasia do rarui waia Jon Mak.

38 Mia Pol 'a ai'a rabasia o'asi, 'inia Mak 'a aho'i moi baanirarua na'i 'oha rau taha ga'u na'i Pamfilia, maagu ai'a tagora'a beirarua.

39 Raru kae heiraeraesi suria mararu heihoahoa'a. 'Ia Banabas 'a waia Mak mararu ta'e na'i haka 'anai hura'ai Saepras.

‡ 15:34 15:34 Suri'i tara'i kopi bwani 'iniau Baebol, ra ai'a nugaa dio i tatarani.

⁴⁰ Mia Pol 'a 'ome sigihia Saelas 'anai 'a'auhia. Miraau sae hinihini rau ha'arahesi 'a'auhirarua marau ha'angonia God 'anai 'omesurirarua.

⁴¹ Naasi, raru 'ari daara'inia Siria mei Silisia, raru hadahada ha'a-'o'oriraa sae ni heiso.

16

'Ia Timoti 'A Hano Beirarua Pol Mea Saelas

¹ 'Ia Pol mea Saelas raru 'ari Debe mei Listra, mararu sadoiai sae hinihini na atana 'ia Timoti. 'Ia inana 'e urao hinihini ni Jiu mia amana 'e ai Grik.

² 'Iraau sae hinihini na'i Listra mei Aekoniam rau haa'i mamaani rongo goro 'inia Timoti.

³ Naasi mia Pol 'a rabasia dorai ta'i hanoa Timoti. Ma aha ha'ara ga'ua Timoti, 'inia 'ia Pol 'a rabasia do 'iraau Jiu na'i dorasi rai wa'ewa'e 'anai bahurongoa Timoti. 'Iraau Jiu 'isi rau 'iraraa do 'ia Timoti, ai'a 'oha nai aha ha'ara, 'inia amana 'e ai Grik.

⁴ Na'i 'oha 'iraaua Pol rau 'aariha suri'i 'omaa, rau maani'i tanaraau sae hinihini ringe 'iraau Ha'ataari miraau na'otara na'i Jerusalem rau 'unua tanaraau sae 'anai araisuri'i.

⁵ Mana hinihinidaa'i sae hinihini 'agu wetewete di'u ro'u wou. Ma ragoi nei rau hinihinia Jisas 'ado dangi.

'Ia God 'A 'Unua Tanaa Pol

Do 'Ai 'Ari Provensi Masidonia

⁶ 'Iraaua Pol rau riuhoru na'i Provensi Frijia mana Galesia 'inia Hi'ona Maea 'a ai'a ha'awateraa dorai heitaroha'i na'i Provensi Eisia na'i 'ohasi.

⁷ Na'i 'oha rau ada na'i tariha anai Provensi Mesia, rau taraawa'ai siri na'i Provensi Bitinia mana Hi'ona Maea 'a ai'a ha'awateraa.

⁸ Marau riuhoru na'i Mesia naraugu boi na'i 'omaa Troas.

⁹ Na'i rodo mia Pol 'a 'omesia na'i mauru'aa do'e saeni Masidonia na ura ma bong'ania do'ai 'ari beiraa na'i Masidonia maai 'a'auhiraa.

¹⁰ Na'i moi murinai mauru na hauasi, mameu ha'ataura'i'a 'anai 'ari Masidonia. 'Inia meu aidangisia ha'a-momori do'ia God 'a 'irisia domei taroha'inia Taroha Goro na'isi.

'Ia Lidia 'A Aho'ita'i Sae Hinihini

¹¹ Meu ta'e na'i haka na'i Troas mameu hano daara'i 'anai Samotres. Na'i nata dangi mameu ada na'i Niapolis.

¹² Meu hano na'i 'isi mameu 'ari Pilipae, 'e 'omaa ororiu na'i Provensi Masidonia na 'iraau Rom ra tagorahia mana saemaua adaa'i ra marungia. Meu awa suriai taringai dangi na'i Pilipae.

¹³ Ma na'i dangi ni mamaro adaaui Jiu, meu hano beira'i hura'a baaniai 'omaa mameu dio na'i bobonai wai. Meu 'adoma'inia do'e dora narau matai goni ei saeni Jiu 'anai ha'arahesi. Meu heinagu mameu mamaani beiraaui urao narau goni 'isi.

¹⁴ 'E ta'i 'iniraa naasia Lidia. 'Iia 'e urao ni Taeataera na 'adoma'i ha'ahi'aa God. Mana tau'aro ana 'anai raoraonga'i bwana wangawanga nara hori bwara di'u. Hoita, na'i 'oha na rongobahua Pol, 'ia God 'a ha'amarewaai 'adoma'ina ma hinihini'i maho na maani'ia Pol.

¹⁵ Mia Lidia miraau hako'i ruma ana ra bwareomaeaaui. Ma taringai 'unua tana'ameu 'onaa meu 'adoma'inia do 'iia 'a hinihinia ha'a-momoria Araha mamei 'ari awa na'i ruma ana. Mameugu buna 'ari mameu awa na'i ruma ana.

'Ia Pol Mea Saelas Ra Nugararua

Na'i Rumaniho'o

16 'E ta'i dangi, nameu 'ari na'i dora ni ha'arahesi ani ma meu heisadoi beiai gare urao nara ha'i slev 'inia. 'E adaro na bwaunia ma matai maani'i maho nara ai'a to'o mau. Ma tatari kae ha'a 'iniai mahosi tanaraau saemaua narau ha'atau'aroa.

17 Mana gare uraosi 'a suri'ameua Pol ma awaawara o'ani, "Iraaui sae 'ini, ra'i sae tatau'aro ana'ia God na ahaaha. Rai maani'i tana'amoui here namoi tahi 'inia."

18 'A hauai heresi suria'ai taringai dangi. Mia Pol 'a wai'ate'a nga'iniai here na hauasi, ma rihota'i ma ha'atee tanaai adaro o'ani, "Na'i atana Jisas Kraest, 'oi hura'a baaniai gare uraoni!" Na'i mau 'ohasi, mana adaro 'a hura'a baania.

19 Na'i 'oha 'iraaui sae narau tatari ha'a 'iniai gare uraosi raugu 'iraraa doni garesi 'agu bwa'i tatari ha'a-'a ro'u nadaau, rau taesu'a di'u marau daua Pol mea Saelas. Naasi marau wairarua 'ari tanaraau sae hihiiri nara awa na'i dora ni rurugoni.

20 Rau o'ani, "Iraruai rua ai Jiuni, raru ha'a-awata'airaaui noni na'i 'omaa agaauni.

21 Raru 'unu'i tanagaau ai Rom dogai haa'i maho ra ai'a ha'awategaau 'anai haa'i."

22 'Iraaui sae rau 'ari wou, rau goni 'ana Pol mea Saelas, rau regehirarua. Miraau sae hihiiri rau 'unua tanaraau sae hehei'oi dorai rahi'i bwana adaru'i marai rabusirarua 'iniai hasi'ei.

23 Na'i 'oha ra roho ha'ata'airarua hako maragu nugararua na'i rumanih'o. Rau 'unua tanaa mo'o na 'omesuriai rumanih'o do'ai ha'a-bwarasi'ararua goro.

24 Mia araisuriraaui, 'a nugararua ha'atau siri raronai rumanih'o. Ma ha'abwarasi'i uwadaru'i suri'i riwa na'i rua kae wahidai baba hihi'a.

25 Na'i gaarangiai 'ubutanai rodo, 'ia Pol mia Saelas raru rihunga'i mararu gana ha'aasaa God. 'Iraau tara'i sae rau awa ro'u na'i rumanih'o rau bahurongorarua.

26 Raugu 'asu'a mana ta'i kaeni nunu raha 'a 'ihara'inia'ai rumanih'o. Ni maraaruma ra wawaa hako mana arihau nara ho'osiraaui 'ini'i sae na'i rumanih'o ra ahoda hako.

27 'Ia mo'o na 'omesuriai rumanih'o 'a rarai ma re'ia dona honohono ra wawaa hako. Ma 'adoma'inia doni mwani sae na'i rumanih'o ra hora hako'a ma rahiai naihi ana do'ai ngahuia haaria.

28 Mia Pol 'a awaraia, 'a o'ani, "O'i abu ngahui'o haari'o! Ai'a ta abe nai hura'a!"

29 Mia mo'osi 'a ha'angoniai raita ma 'eba siri raronai rumanih'o. Ma topira'i ruru tanaa Pol mea Saelas ha'i 'idi'idi.

30 Ma wairarua hura'a baaniai rumanih'o ma songa'inirarua o'ani, "Rua saemaua, 'e taha nawai haua nawai tahi 'inia?"

31 Mirarua aramia o'ani, "O'i hinihinia Araha Jisas, mia God 'ai ha'atahi'o baani'i ora-ora'a amu'i miraau hakoi ruma amua rai o'asi ro'u."

32 Naasi 'ia Pol mea Saelas raru maaniai Taroha Goro 'inia Araha tanaa mo'osi miraau hakoi sae na'i ruma ana.

33 Na'i mau i rodo, mia mo'osi 'a waia Pol mea Saelas 'anai wasi ha'a-wadiwadi'i maaradaru'i. Ma na'i 'ohasi ro'u, 'iia miraau hakoi sae na'i ruma ana rau bwareomaea.

34 Marau wa'ewa'e di'u 'iniai hinihinia adaaua God. Mia mo'osi 'a waia Pol mea Saelas 'ari ruma ana ma hanganirarua.

35 Na'i muri rau aho'i 'ari rumanih'o. Ma na'i nata haho'oa, 'iraaui sae hihiiri rau ha'ataari'i tara'i pulis 'anai 'unua tanaa mo'o na 'omesuriai rumanih'o do'ai ha'ahura'ahia Pol mea Saelas.

³⁶ 'Ia mo'osi 'a 'unua tanaa Pol mea Saelas do 'iraau hihiri rau 'unua tanaa do'ai ha'a-hura'ahirarua baaniai rumanih'o. Magu o'ani 'inirarua, "Murugui awa goro'a."

³⁷ Mia Pol 'a 'unua tanaraau pulis o'ani, "'Tamiria ra'i sae auhenua ni Rom neimiriani. Ma rei'uaa na o'asi, rau ai'a 'i'amiria ga'u. Rau rohoamiria moi na'i maadaui noni hunga marau nugamiria na'i rumanih'o. Ma na'i 'ohani rau raba ha'a-hura'ahi'amiria girugiru moi! 'A bwa'i! 'Iraau sae hihiri rai boi haarirau marai ha'a-hura'ahi'amiria."

³⁸ 'Oha 'iraau pulis rau maania mahosi tanaraau noni hihiri 'a rigi ahudaa'i 'inia rongo adaau do'ia Pol mea Saelas ra'i ai Rom.

³⁹ Rau boi marau sore tanararua, maraugu wairau hura'a baaniai rumanih'o. Marau ha'angonirarua do rarui hura'a baaniai 'omaasi.

⁴⁰ Raru 'ari aho'i ruma ana Lidia. Raru rurugoni beirau sae ni heisoi mararu hadahada ha'a-o'orirau ma rarugu hano.

17

'E Kae Heita'ia Raha Na To'o

Na'i Tesalonaeka

¹ 'Ia Pol mea Saelas raru riuoro na'i 'omaai Amfipolis mana'i Apolonia 'anai Tesalonaeka. Na'i Tesalonaeka 'e ruma ni ha'arahesi adaui Jiu na awa na'iei.

² Ma 'onaai bwane hahaua ana, 'ia Pol 'a 'ari ruma ni ha'arahesi 'anai rihunga'i. 'E oru dangi 'ini'i dangi ni mamaro na 'oha'iniai Usu-usu Maea tanaraau sae ma ha'ausurirau 'inia.

³ 'A ha'a-aidangisirau 'ini'i dora ra hadanga'i ha'arawamataa na'iei doni Ha'atahi 'ai rongomaata'i ma'ai suruta'e aho'i ro'u baaniai mae. Mia Pol 'a maania ro'u tanaraau do'ia Jisas naasi Ha'atahi.

⁴ Tara'i Jiu rau hinihinia Jisas marau aba beia Pol mea Saelas. Ma 'e kae ruruhani ai Grik narau bwane 'adoma'i ha'ahi'aa God, goni bei'i tara'i urao mwanimaua na'i 'omaasi, 'iraau hako rau hinihinia ro'ua Jisas.

⁵ 'Iraau bwauodo adaui Jiu rau taesu'a di'u 'inia rago anai sae nara boboi beia Pol. Rau soi gonirau sae hehere ta'aa narau awa pwaranga moi na'i maketi 'anai taraawa'ana ta ha'agogoru. 'Iraau hako i sae 'isi rau 'ari ruma ana Jeson ma tara'i abe rau rubu tahangiai honohono marau siri wou 'anai sibania Pol mea Saelas dorai wairarua hura'a tanaraau noni hunga.

⁶ Maraugu ai'a sadoirarua, raugu daua moia Jeson bei'i tara'i sae hinihini mara wairau tanaraau bwauodo na'i 'omaasi. Rau awara o'ani, "'Ia Pol mea Saelas raru ha'a-awata'airau noni suri'i mwani 'omaa. Ma na'i 'ohani raru ada'a ro'u mai 'ini.

⁷ Mia mo'oni, 'ia Jeson, 'a ha'awaterarua 'anai awa na'i ruma ana. 'Iraau hako rau horosiai ringerige ana'i Mwaeraha ni Rom. Rau 'unua do 'e sae he'ete'i na huunai Mwaeraha, ma do sae naasi 'ia Jisas."

⁸ 'Oha 'iraau saeni 'omaasi mirau bwauodo rau rongoa o'asi, 'a ha'atorakoke'i di'u i 'adoma'idaa'i.

⁹ Mirau bwauodo rau ha'agaasi ha'a* a Jeson beirau tara'i sae hinihini ro'u maragu nugasirau.

'Iraau Saeni Berea

Rau Aho'ita'i Sae Hinihini

* **17:9 Ha'agaasi ha'a:** 'E duruduru tanaraau bwauodo do 'onaa 'ia Pol mea Saelas rarugu bwa'i haua'a ta mareho mana ha'a rai ha'a-aho'isia. Ma 'onaa na rarui bwa'i agohe, mana ha'a ragu bwa'i ha'a-aho'isia'a tanaa Jeson.

¹⁰ Na'i rodo miraaui sae ni heiso'i rau ha'ahanoria Pol mea Saelas 'ari Berea. 'Oha raru ada na'i 'omaasi, raru 'ari ruma ni ha'arahesi adaui Jiu.

¹¹ 'Iraau sae na'i 'omaasi rau ai'a rongoasa 'onaairaaui saeni Tesalonaeka. Rau mwa'emwa'e di'u 'anai bahurongo'i mamaani ana'ia Pol. 'Ado dangi rau sibani'i mamaani na haa'ia Pol na'i Usu-usu Maea, 'onaa ra'i mareho ha'a-momori ma'ua ai'a.

¹² 'A ragoi saeni Jiu rau taraawa'ai hinihinia Jisas. Miraau ro'u i Grik, 'a ragoi urao mwanimaua mana sae mwane adaa'i nara hinihini ro'u.

¹³ Na'i 'oha 'iraau'i bwauodo adaa'i Jiu na'i Tesalonaeka rau rongoa do'ia Pol 'a taroha'iniai tarohana Araha na'i Berea, rau 'ari marau mamaani ha'ataesu'araui sae na'i 'isi 'anai ura bwarasia Pol.

¹⁴⁻¹⁵ Naasi miraaui sae ni heiso'i na'i Berea rau ha'ataaria Pol dioi one 'anai ha'ahanoria 'ari 'omaai Atens. Tara'i sae hinihini narau atongia Pol, 'ia Saelas mea Timoti raru awa moi na'i Berea. Na'i 'oha narau taha wou na'i Atens, 'iraau sae 'isi raugu aho'i baania Pol 'ari Berea marau maania tanaa Saelas mea Timoti do'ia Pol 'a 'irisia do rarui ada 'ari raurau beia.

'Ia Pol Na'i Atens

¹⁶ Na'i 'oha 'ia Pol 'a mamasi 'inia Saelas mea Timoti na'i Atens, 'a arunga ta'aa di'u 'iniai re'i'i ana'i mwani araaranunu na'i 'omaasi.

¹⁷ Naasi 'a siri ruma ni ha'arahesi adaui Jiu ma heitohetohe beiraaui miraaui ro'u i nei ra ai'a Jiu nara 'adoma'i ha'ahihi'aa God. 'Ado dangi 'a hadahada tanaraui sae na heisadoi bei'i na'i maketi.

¹⁸ Tara'i ha'ausuri baani'i ruruha narau 'unuraaui 'iniai Epikiurian mana Stoik rau taraawa'a heitohetohe beia Pol 'ini'i hinihini adaa'i. Na'i 'oha 'ia Pol 'a maania Jisas ma maania ro'u i suruta'e aho'i ana, tara'i nei rau o'ani, "Ia mo'osi 'a taraa to'o hadahada moina. 'E taha na raba maaniasi?" Ma tara'i nei rau o'ani, "Gasi 'idi 'a rabasia dogai ha'arahesi'i tara'i hi'ona ni dora he'ete'i."

¹⁹ Marau waia 'ari beiai ruruhai Kansol adaaui nara 'unuraaui 'iniai Ariopagas, rau o'ani 'inia, "Tameu meu raba aidangisiai ha'ausuringa'i haoru na'o hadanga'iniasi.

²⁰ Tara'i maho no'o maani'isi ra rongo he'ete'i di'u, meu ai'a aidangisi'i."

²¹ (Rau ha'atee o'asi, 'inia 'iraau saeni dorasi miraaui sae narau boi awa beiraaui na'i 'omaasi, rau rabasia moi 'anai rongo'i marau raba maani'i mwani 'ado'ado haoru na'i marewana.)

²² Mia Pol 'a ura ara'a na'i maadaui Kansol ma o'ani, "T'amou saeni Atens, 'au 'iraramou do 'i'amou ra'i sae namou ha'ahou'i di'u i hi'ona namou ha'arahesi'i.

²³ Na'i 'oha nau hano gariai 'omaa amoouni, 'au 'omesi'i mwane araaranunu namou ha'arahesi'i, mau sadoiai ta'i dora maea amou nara usuai usu-usu na'iei na o'ani, "Tanaai hi'ona na ai'a sae nai 'iraraa.' I hi'ona namou ha'arahesia mamou ai'a 'iraraasi, 'au raba ha'a-'irara'amou goro 'inia.

²⁴ "Ia na ha'apwa'araai marewana mana mwani maho na'i rarona. 'A marungi'i mwani maho na'i aro mana ano, ma ai'a mono suri'i ruma maea nara tagorahi'i sae.

²⁵ 'Ia God 'a ai'a toho 'inia ta maho neina do gai 'a'auhia. Me 'iia haaria na hauai tahi mana mwane mareho tanaraui mwane noni hako.

²⁶ Baania moi ta'i sae, na ha'apwa'ara'i hako 'ini'i mwani burungai noni 'anai awa suri'i mwani dora hako na'i marewanani. 'Iia haaria na nugaa mau mai madoraa 'ada'i 'anai heimarungi, mana tariha 'ada'i dora ra awa suri'i.

²⁷ 'Ia God 'a haua o'asi do 'iraau noni rai sibania. Ma 'onaa rai sibania, rai matai sadoia, 'inia 'iia ai'a ha'atau baanigia.

28 'Iia na hauai tahi tanagia neina gai matai awa mana hahano hairiu na'i marewana. 'A 'onaai usu ha'arangasia adaa'i tara'i sae madoma amoo'i o'ani, "Igaau ra'i warowarona'i."

29 "Naasi, suria 'igaau ra'i warowarona'i a God, 'igaau gai abu 'adoma'inia do ai'a tahitahi 'onaai araaranunu nara tagorana 'iniai gol ma'ua silva ma'ua huai hau. 'Iia 'a ai'a 'onaai araaranunu na 'adoma'inia moi sae ma tagorahia'a.

30 Na'i na'o, 'ia God 'a ai'a ha'a-mama'airaui sae nara ha'arahesi'i araaranunu, suria rau ai'a aidangisia God. Ma'ata na'i 'ohani, 'a 'unua do 'iraaui hakoi sae rai rihota'i tanaa.

31 'Inia 'iia 'a bwani nugaa'i madoraa nai hauai hihiri odo-odo tanaraui hakoi noni na'i marewana. 'A 'ome sigihia ro'ua mo'o nai hauai hihiri naasi. 'Oha na ha'a-suruta'ea aho'i mo'osi baaniai mae, 'a ha'ata'inia tanagia do 'iia naasi nei na'ia God na 'ome sigihia."

32 Na'i 'oha 'iraaui sae rau rongoai 'unua ana Pol do'e sae na suruta'ea aho'i baaniai mae, tara'i sae raugu haa marau taraawa'a da'ata'inia'a. Ma tara'i sae rau o'ani 'inia, "'Oigu maaniai marehosi tana'ameu ta madoraa he'ete'i ro'u."

33 'Oha nagu hanoa Pol baaniraui Kansol,

34 marau ta'i hano'a tara'i sae, marau taraawa'ai hinihinia Araha. 'E ta'i abe naasi 'e ta'i 'iniraui ruruhai Kansol na atana 'ia Daeoniasias, ma'e ta'i 'e urao na atana 'ia Damaris, ma tara'i sae ro'u.

18

'Ia Pol 'A 'Ari Korin

1 Na'i murinai hadahada ana Pol beiraui i Kansol, 'ia Pol 'a hano baaniai Atens ma 'ari Korin.

2 Na'i 'isi 'a heisadoi beia Akuila, 'e ai Jiu na huta na'i Provensi Pontas. 'Iia mana urao ana, 'ia Prisila, rarugu bura'i boi baaniai 'omaai Rom na'i Itali, suria na mwaeraha anai Rom na atana 'ia Klodias, 'a 'unua do 'iraaui hakoi saeni Jiu na'i dorasi rai hura'a. Mia Pol 'a 'ari garihia Akuila mea Prisila,

3 ma sadoia do 'iraruasi raru matai tai'i ro'u i ruma saira 'onaia. 'Irarua raru hauai mahosi 'anai tatari ha'a mia Pol 'a awa beiraru 'anai 'a'auhiraru.

4 'Ado dangi ni mamaro 'a 'ari ruma ni ha'arahesi adaaui Jiu ma mamaani tanaraui Jiu miraaui ro'u i nei ra ai'a Jiu, 'a bonasia dora'i hinihini.

5 Na'i murinai boi ana Saelas mea Timoti baaniai Masidonia, 'ia Pol 'a mamaro'a 'anai tau'aro beia Akuila. Ma 'ado dangi 'a awa moi 'anai mania tanaraui Jiu do 'ia Jisas naasi Ha'atahi.

6 Raugu haa marau ura bwarasia'a marau ha'atee ha'ata'aia. Mia kakahuru nga'ini'i kahuadi bwana ana'i, 'e ha'ara do'ai su'amuriraaui ma o'ani, "'Onaa namoi mae mamoi 'ari na'i dora ni rongomaata'i, 'e taritari'a amou haari'amou. Moi abui ha'ahuniau 'inia. Taraawa'a na'i 'ohani ma 'ari'a, wai heitaroha'i moi tanaraui sae ra ai'a Jiu."

7 Naasi ma sara 'ari ruma anai sae na atana 'ia Titias Jastas. 'Ia mo'osi 'a 'adoma'i ha'ahihi'aa ro'ua God. Ni ruma ana 'a awa moi na'i bobonai ruma ni ha'arahesi adaaui Jiu.

8 'Ia Krispas naasi bwauodo anai ruma ni ha'arahesisi. 'Ia Krispas miraaui hakoi ruma ana rau hinihinia Araha. Ma rago ro'u i nei na'i Korin narau bahurongoa Pol marau hinihini. Naasi marau dauai bwareomaea.

9 'E ta'i rodo, 'ia Araha 'a ha'atee tanaa Pol na'i mauru'aa. 'A o'ani, "'Oi abui mamaa'u, 'oi heitaroha'i moi. 'Oi abu agohe!

10 'Inau 'au awa bei'o, 'abwa'i sae nai ha'amaara'o, 'inia rau ragoi sae agu'i na'i 'omaani narai 'a'auhi'o."

11 Naasi mia Pol 'a awa moi na'i Korin suriai ta'i harisi mana aba 'anai ha'ausuriraaui sae 'iniai ha'atee ana God.

12 Na'i madoraasi, 'ia Galio na ha'i Primia na'i Provensi Akaea. Ma tara'i Jiu rau 'adoma'i aratara 'anai daua Pol. Rau waia 'ari tanaa Galio 'anai hiiria.

13 Rau o'ani, "'Ia mo'oni 'a bonasiraaui sae dorai ha'arahesia God na'i here na horosiai ringeringe anai gaumani."

14 'Ia Pol 'agu raba aramiraaui Jiu mia Galio 'a o'ani'a, "'Onaa moi ha'ahunia mo'oni 'iniai maho taritari'a ma'uasi ta maho ta'aa na haua, 'au ga'i matai rongosuri'amou moi.

15 Me mou heita'ia moi 'ini'i 'ado'ado 'ada'i ha'atee mana ata mana ringeringe amoo'i. Naasi moi hiiria moi haari'amou. 'Inau 'au bwa'i haua."

16 Ma ha'a-hura'ahiraau baaniai ruma ni hihiri.

17 Miraau noni hunga rau dauai bwauodo anai ruma ni ha'arahesi adaui Jiu, 'ia Sostenes, marau ngahuia na'i moi maanai ruma ni hihiri. 'Ia Galio 'a ai'a ta'aabena 'iniai maho narau hauasi.

Ia Pol 'A Aho'i 'Ari Antiok

18 'Ia Pol 'a gere awa orea beiraaui sae ni heisoi na'i Korin, magu haiha'ari beiraaui ma hano beia Akuila mea Prisila marau 'ari Kenkria. Na'i 'isi, 'ia Pol 'a risi pou 'anai ha'ata'inia do 'a hauai duruduru tanaa God. Na'i muri, rau ta'e na'i haka 'anai 'ari Siria.

19 Rau siri ga'u na'i Efesas. Na'i 'omaasi 'ia Pol 'a 'adoma'inia do'ai hano baania Akuila mea Prisila mararui awa ga'u. Ma'ata 'ia Pol 'a 'ari ga'u i ruma ni ha'arahesi adaui Jiu na mamaani beiraaui.

20 Rau 'unua tanaa do'ai gere awa ga'u, me 'iia 'a 'unua tanaraau dona 'abwa'i.

21 'A haua moi ha'atee haiha'ari tanaraau ma 'unua do 'onaa 'ia God 'ai ha'awatea, maai aho'i ro'u mau mai. Na'i muri, 'a sadoiai haka ma hano baania Efesas

22 ma 'ari Sisaria. Naasi 'a hano ma ta'eha i Jerusalem na garihiraau sae ni heisoi magu hano ro'u 'anai Antiok.

23 'A awa ga'u suriai gere madora maagu gaariri suri'i tara'i 'omaa na'i Galesia ma na'i Frijia. 'A hadahada ha'a-'o'ori'i hinihinidaa'i sae ni heisoi na'isi.

Tagora Na Haua Apolos

24 Na'i mau 'ohasi, 'e ta'i ai Jiu na huta na'i Aleksandria 'a boi na'i Efesas, na atana 'ia Apolos. 'Iiani 'e sae na matai mamaani di'u ma aidangisia goroi Usu-usu Maea.

25 Ra bwane ha'ausuria 'iniai Taroha Goro 'inia Araha ma goro ana di'u 'anai maania. Mana maho na maani'i 'inia Araha ra ha'a-momori. Na'i 'ohasi, 'a ai'a mataia do 'iraau noni hinihini rai bwareomaea 'iniai hinihinia adaaua Jisas. Na bwareomaea moi ana Jon na aidangisia.

26 Na'i 'oha na mamaani na'i ruma ni ha'arahesi adaui Jiu, 'a mamaani ramoramo'a di'u. Mia Akuila mea Prisila raru rongobahua mararu waia 'ari ruma adarua nararu ha'a-aidangisia ro'u di'u wou 'iniai Taroha Goro 'abaia Araha.

27 Mia Apolos 'a raba 'ari Akaea miraau sae ni heisoi na'i Efesas rau ha'a-weteweteai 'adoma'ina 'anai hano marau hauai usu-usu tanaraau sae hinihini na'i 'omaasi. Rau ha'ata'u'uraau dorai ha'amaotoa Apolos. 'Iraau sae 'isi na'i Akaea rau bwane hinihinia Jisas 'inia i goro na haua God tanaraau. Hoita, na'i 'oha na ada Apolos na'i Akaea, 'a 'a'auhiraau di'u.

²⁸ 'Inia na'i 'oha 'ia Apolos 'a heitohetohe beiraaui Jiu na'i maadaaui noni hunga, 'a ha'ata'inia tanaraaui taha ra awa na'i Usu-usu Maea na ha'ata'inia ha'a-momori do'ia Jisas naasi Ha'atahi.

19

'Ia Pol 'A Awa Na'i Efesas

¹ Na'i 'oha na 'ia Apolos 'a awa na'i Korin, 'ia Pol 'a tahahoro na'i 'ubutanai Provensi Eisia maagu hura'a na'i Efesas ma heisadoi bei'i tara'i sae ni heiso na'i 'omaasi.

² Ma songa'iniraaui o'ani, "Na'i 'oha mou hinihinia Araha, mou daua ro'u i Hi'ona Maea?"

Miraaui o'ani, "Ai'a. 'Tameu meu ai'a rongoa ro'u ta mamaani 'inia mahosi."

³ Mia Pol 'a o'ani, "Bwareomaea he'ua namou daua?"

Miraaui o'ani, "Meu dauai bwareomaea na 'ia Jon na maania."

⁴ Mia Pol 'a o'ani, "'Ia Jon 'a bwareomaeeraaui nei narau rihosi baani'i ora-ora'a adaa'i. Ma 'unua tanaraaui do 'e sae nai boi mau rai hinihinia. 'Ia Jisas naasia mo'o na 'ia Jon 'a hadanga'iniasi."

⁵ Na'i 'oha rau rongo'i ha'atee ana'ia Pol maraugu bwareomaea 'anai ha'ata'inia dorau hinihinia Araha Jisas.

⁶ 'A dau'i bwaudaa'i mana Hi'ona Maea 'a sirihiraaui. Rau hadahada 'ini'i tara'i ha'atee he'ete'i hairiu marau ha'arangasi'i hura'a i 'ado'adona'i a God.

⁷ 'A 'onaai ta'i tangahuru mana rua mwane na'i ruruhasi.

⁸ 'E oru hura na'ia Pol 'a hadahada ramoramo tanaraaui Jiu na'i ruma ni ha'arahesi adaaui 'abaiai heimarungi ana God. 'A bonasia dorai hinihini.

⁹ Tara'i sae ra rongoasa di'u mara kakawa hinihini. Ra ha'atee ha'ata'ai Taroha Goro na'i maadaa'i noni hunga. Mia Pol 'a wairaaui hura'ai noni hinihini 'ari rumani skuru ana Tiranasi. Na'i 'isi naagu mamaani na'iei 'ado dangi tanaraaui

¹⁰ suriaui rua harisi. Ma naasi, 'a gaarangi 'iraaui hakoi ai Grik mana ai Jiu na'i Provensi Eisia narau rongoai Taroha Goro 'inia Araha.

Gare Mwane Ana'ia Skiva

¹¹ 'Ia God 'a hauai mena tanaa Pol ma haa'i kae ha'abu'oahu raha.

¹² Rei'uaa na hangete mana bwana na 'ia Pol 'a karohi'i, 'oha nara waa'i tanaraaui nei ra daoha mana nei na adaro 'a bwauni'i, na daoha ra goro mana adaro ra hura'a.

¹³ Tara'i ai Jiu ra taraawa'a hano hairiu 'anai taari'i hura'ai adaro baanirai sae 'inia atana Araha Jisas. Ra o'ani 'inia adaro, "Na'i atana Jisas na taroha'inia Pol, 'oi hura'a!"

¹⁴ Ma'e Na'ohadaaui Piriisi na atana 'ia Skiva 'a to'oraai biu gare mwane narau haua o'asi ro'u.

¹⁵ Ma na'i 'oha rau ha'imaania taariai adaro, ni adaro 'a o'ani 'iniraaui, "Inau 'iraraaui Jisas mau rongo tarohana Pol. Mi'amou 'iatei?"

¹⁶ Mia mo'o na bwauniaui adaro, 'a asihura ma diohiraaui. Miraaui hora hura'a baaniai ruma ha'i wa'aroko, na abedaa'i ra maara hako.

¹⁷ 'Oha 'iraaui Jiu mana ai Grik narau awa na'i Efesas rau rongoa, rau mamaa'u di'u marau 'adoma'i ha'ahouai atana Araha Jisas.

¹⁸ Miraaui nei raugu bura'i hinihinia Jisas rau taraawa'a ha'arangasi'i here ta'a'i narau haa'i.

19 'Iraau nei ra hahai'uaasi ra waa'i mai buka ni hahai'uaasi adaa'i mara suungi'i na'i maadaa'i noni hunga. Ni horihoridi buka 'isi 'a 'onaai rima tangahurui merui korai silva.*

20 Suriai to'o ada'i mwani maho 'isi, na tarohana Araha 'a 'adarara 'ari suriai mwani dora mara rago i sae narau hinihini.

'E Ha'agogoru Raha Na To'o

Na'i Efesas

21 Na'i muri, 'ia Pol 'a 'adoma'i wetewete 'anai 'ari Jerusalem. Ma 'adoma'inia do 'ai tahahoro na'i Provensi Masidonia ma na'i Provensi Akaea maigui taha na'i Jerusalem. Ma na'i muri 'aigu 'ari ro'u i Rom.

22 Mia ha'ataariai rua hei'a'auhi ana na'i na'o 'ari Masidonia, 'ia Timoti mea Erastus. 'Iia 'a awa ga'u suriai gere madoraa na'i Eisia.

23 Na'i madoraasi, tara'i saeni Efesas rau ha'ato'oai kae ha'agogoru. Rau taesu'a suria ra ragoi nei nara taraawa'ai hinihinia Jisas.

24 'E ta'i sae, atana 'ia Dimitrias, 'iia 'a taarai ha'a 'ini'i gere ruma na tau'arodi 'ini'i silva, nununai ruma maea anai godi urao ra 'unua 'inia Atemis. 'Iraau nei rau tau'aro tanaa, rau dau ha'a raha di'u.

25 Mia Dimitrias 'a 'unuraau goni mai sae tatau'aro ana'i beiraaui nei rau taarai ha'a 'inia ta'i tagora ma o'ani 'iniraaui, "Romwane! Moi aidangisia do 'igaau gau kae to'o ha'a 'inia tau'aro gau hauani.

26 Mi'amou mou re'ia mamou rongoai maho na haua Pol. 'A ha'ataihi'i 'adoma'idaa'i sae rago, ai'a do na'i moi Efesas, me gaarangi hakoi mwani dora na'i Eisia. 'A 'unua dona araaranunu na sae moi nara tagoradi ra ai'a huunai god!

27 Raigu haa marai taraawa'a ha'atee ha'ata'aiai maho gau taarai ha'a 'inia. Maragu bwa'i ha'ahoua'ai ruma maea anai urao god Atemis nara ha'arahesia na'i 'ini na'i Eisia ma na'i marewana hako. Ni godi urao hauasa agaausi, 'aigui 'ariwou marai 'adoma'i mara maho haaria moe'a 'inia!"

28 Na'i 'oha 'iraaui sae tatau'aro 'isi raugu rongoai maho na 'unuasia Dimitrias, marau taesu'a di'u'a, rau taraawa'ai awara o'ani, "'Ia Atemis, i godi urao agaaui Efesas, na ororiu di'u'i mwane god."

29 Gaarangi 'iraaui hakoi kae 'omaasi rau siri na'i ha'agogorusi. Miraaui hakoi sae rau 'eba 'ari na'i kae dora ni gonigoniha. Tara'i sae ra daua Gaeas mea Aristakas marau wairarua ro'u 'ari. 'Iraruani rau ta'i boia Pol baaniai Masidonia.

30 'Ia Pol 'a raba 'ari 'anai hadahada tanaraau i noni hunga, miraaui sae ni heisoi rau ura bwarasia.

31 Tara'i saemaua na'i Provensi naasi narau haguha'guro goro beia Pol, rau ha'ataari hadahada tanaa marau ha'abasua do'ai abu 'ari na'i dora ra goni na'ieisi.

32 'Iraau sae rau goni 'isi, rau rongo raha di'u. Ta'i ruruha ra awaranga'inia ta'i maho mana nata ruruha ra awaranga'iniai nata maho 'etea ro'u. 'A kakui ahudaau, 'inia 'a ragoi nei ra ai'a aidangisiai maho ra goni wou 'ana.

33 Ma tara'i bwauodo adaa'i Jiu rau burusia hura'ai sae nara 'unua 'inia Aleksanda na'i maadaui noni hunga marau 'unua tanaa i taha nai maania. 'Oha 'iraaui i noni rau 'omesia, rau 'adoma'inia do 'ia mo'osi na taraawa'anai ha'agogorusi. Mia Aleksanda 'a hauai ha'ara 'iniai rimana dorai papaku, 'inia 'a raba mamaani ruhasia tanaraau do 'iraaui Jiu na'i Efesas rau ai'a aba beia Pol.

* 19:19 19:19 50,000 korai silva 'a ta'isada 'onaai taringai milion dola.

³⁴ Me na'i 'oha rau 'ome 'iraraa do'ia 'e ai Jiu, rau awara o'ani suriai rua 'aoa, "Ia Atemis, i godi urao ameeu Efesas na ororiu di'u'i mwane god!"

³⁵ 'E ta'i sae mwanimaau ni 'omaasi nagu ha'a-papakuraau, 'a o'ani, "T'amou saeni Efesas, mwani sae hako rau 'iraraa doni ahuinai dora anai ha'aronesia ei godi urao Atemis na'i 'omaa agaaunisi. Marau aidangisia ro'u doni araaranununa na ahoda baaniai aro 'a awa na'i 'ini.

³⁶ 'A bwa'i sae nai matai tohe huniai mahosi! Naasi moi papaku mamoi abu haa'i maho bweubweu'a.

³⁷ T'amou namou wairarua mai rua mwaneni, ma ai'a ta maho rarui rahia baaniai ruma maea agaau ma'uasi rarui ha'atee ha'ata'aiai god agaau.

³⁸ 'Onaa 'ia Dimitrias miraau sae tatau'aro ana'i rau raba ha'ahunia ta sae 'inia ta maho, 'iraaui 'irara'i moi dora agaa'i 'anai kooti miraau sae hihiri ra awa moi 'anai bahurongo.

³⁹ Ma 'onaa mou raba 'unua ta maho ro'u mamoi ha'a-aratara na'i 'oha rai hauai gonigoniha raha 'anai 'omaani.

⁴⁰ I ha'agogoru na to'o na'i danginisi, gaumani na'i Rom ra ga'i matai ha'ahunigaau moi 'inia do 'igaau nagau taraawa'ana. Ma bwa'i maho nagaigu 'unua 'inia taranai taha nagau ha'agogoru 'inia."

⁴¹ 'A ha'atee hako ma 'unua tanaraau do rai 'ari aho'i suri'i ruma adaa'i.

20

'Ia Pol 'A 'Ari Masidonia

¹ Na'i murinai ha'agogoru, 'ia Pol 'a 'unuraau goni noni hinihini ma hadahada ha'a-o'oriraaui. Ma hauai ha'atee haiha'ari tanaraau magu hano 'anai Provensi Masidonia.

² Na'i Masidonia 'a haa'i mwani hadahada ha'a-o'ori tanaraau noni hinihini suri'i 'omaa na ada suri'i. Magu 'ari Gris

³ na awa na'i 'isi suriai oru hura. Mia raba ta'e na'i haka 'anai 'ari Siria magu rongo sadoia moi do 'iraaui saemaau adaa'i Jiu rau ha'a-radonga'inia 'anai ngahu ha'amaesia, ma 'adoma'inia do'ai aho'i ga'u 'ari na'i Masidonia maigu tano'i 'ari Siria.

⁴ Tara'i sae rau ta'i hanoa Pol, 'ia Sopata garena Piras baaniai Berea, mia Aristakas mea Sekandas baaniai Tesalonaeka. Mia Gaeas saeni Debe rau ta'i hano ro'u, mia Timoti mana rua saeni Eisia, 'ia Tikikas mia Trofimas.

⁵ 'Iraausi rau na'o 'ari Troas na'i haka naraugu mamasi'ameu na'isi.

⁶ Mi'ameua Pol meu 'ari Pilipae. Ma na'i murinai rongo 'inia bredi nara ai'a doraria 'inia draebam, meu hano baaniai Pilipae na'i haka suriai rima dangi mameugu ada ro'u beiraaui na'i Troas. Meu awa na'i 'isi suriai ta'i sade.

'Ia Pol 'A Ha'atahia Aho'i a Iutikas

Na'i Troas

⁷ Na'i su'urahi dangi sade meu goni 'anai ngau maea na'i ta'i dora. Mia Pol 'a taraawa'a skuru hadahada na'i su'urahi tari 'ubutanai rodo, 'inia na'i haho'oa maai hano'a.

⁸ I ahii nameu goni na'iei, 'a awa na'i orunai bwea na'i ruma ahaaha. Ra'i mwani raita ra marewa na'isi.

⁹ Ma 'e ta'i geresae na atana 'ia Iutikas, 'a heinagu na'i windo magu rongobahua Pol 'oha na mamaani ma mamauru'a'a. 'Agu haa ma mauru ma ahoda'a na to'o na'i ano. Raugu suru'ia, mia bwane mae.

¹⁰ Mia Pol 'a dio ma topira'i ruru auru ma 'agoia ma o'ani, "Ai abu ta'aabemoou, 'a tahi'a aho'i."

¹¹ Naasi meu ta'eha aho'i na'i ahisi mameu hauai ngau maea mameu ta'i ngau. Mia Pol 'agu mamaani aho'i ro'u 'ari tari haho'oa mameugu hano.

12 Miraau i noni hinihini rau waia Iutikas 'ari ruma ana mana 'adoma'idaa'i ragu goro aho'i 'inia tahi aho'i ana.

'Ia Pol 'A 'Ari Maelitas

13 'Iameu meu ta'e na'i haka 'ari Asos, mia Pol 'a hatatare. Na'i na'o mameugu hano, 'ia Pol 'a bwane 'unua do meigui heisadoi aho'i na'i Asos.

14 'Oha na ada magu ta'e bei'ameu mameu 'ari Mitilini.

15 Meu hura'a baaniai Mitilini mana'i nata dangi meu boi gaarangi marau Kios. Mana'i nata dangi haisuri meu ada na'i marau Samos. Na'i moi nata dangi ahora mameu ada ro'u na'i Maelitas.

16 'Ia Pol 'a 'unua domei di'ua moi Efesas, suria 'a ai'a raba awa orea na'i Provensi Eisia. 'A rabasia do 'onaa nai mwada'u, mei ataha na'i Jerusalem na'i dangi na 'iraau Jiu rau ha'ato'oai Rongo nara 'unua 'inia Pentikos, tarana naasi na ha'a-osaosa 'inia.

'Ia Pol 'A Ha'atee Haiha'ari Beirauu

Bwauodo Adaa'i Heiso Na'i Efesas

17 Na'i Maelitas 'ia Pol 'a ha'ataariai taroha tanaraau bwauodo adaa'i heiso na'i Efesas dorai boi re'ia.

18 'Oha rau ada, 'a o'ani 'inirau, "'T'amou mou 'irara'i hako mwani maho nau haa'i 'oha nau awa bei'amou taraawa'a na'i 'oha nau ada tahamora na'i Eisia.

19 Rei'uaa na 'iraau Jiu rau haa'i mwane ha'aradorado ta'a'i nara ha-arongomaata'iau, 'inau 'au tau'aro moi tanaa Araha ha'i manego ma ragoi madoraa na wai ra udu baaniai maagu.

20 'Onaa 'iraraa amou, nau ha'ausuri'amou 'inia Taroha Goro na'i maadi noni hunga ma ro'u suri'i ruma amoo'i. Ma na'i 'oha nau haa, 'au ai'a girua ta'ini'amou ta maho do nau ga'i maania 'ana 'a'auhi'amou.

21 Mau 'unua tanaraau Jiu miraau nei ra ai'a Jiu dorai rihosi baani'i ora-ora'a adaa'i tanaa God marai hinihinia Araha aga Jisas.

22 Ni Hi'ona Maea 'a 'unua tanaau dowai 'ari Jerusalem. Ma rei'uaa nau ai'a 'iraraa taha nai to'iau na'i 'oha wai ada 'isi, wai araisuria moi.

23 'Ado 'omaa nau gaariri suri'i, Hi'ona Maea 'a ha'abasuau moe'a do 'inau rai nugaau na'i rumaniho'o marai ha-arongomaata'iau na'i 'oha wai ada na'i Jerusalem.

24 Ma'ata 'inau 'a ai'a ta'aabegu 'inia taha nai to'iau. Maho moi nau rabasia, naasi dowai ha'ahakoai tau'aro na ha'a-'u'uriau 'inia Araha Jisas—'ana taroha'inia Taroha Goro 'inia goro ana God 'inigia.

25 "Ni maho nau awa ga'u 'inia bei'amou ani, naasi 'ana taroha'inia heimarungi ana God tana'amou. Mana'i 'ohani nau 'iraraa do 'a bwa'i abe 'ini'amou naigu 'omesiau'a ro'u ta 'oha.

26 Naasi wai 'unua tana'amou, 'onaa tanei 'ini'amou na ai'a daua nanai tahi tarau, 'a ai'a taritari'a agua,

27 'inia 'inau 'au bwane maani'i hako'ai maho na 'irisia God domoi aidangisi'i.

28 "Naasi moi 'omesuri'amou haari'amou, beirau ro'u i nei na Hi'ona Maea 'a ha'a-'u'uri'amou 'inirau. Moi 'onaa 'omesuri siip nara 'omesuri ha'agorohi'i siip na'i heiso ana God na horia 'inia 'abunai garena.

29 'Au 'iraraa do na'i 'oha wai hano, tara'i ha'ausuri pwapwari'i rai siri mai bei'amou 'onaa misutari marai bonasiai ha'ata'ai'i siip amoo'i.

30 Ma ro'u, tara'i sae hinihini ro'u moi na'i 'omaa amou narai hiosiai huunai ha'ausuringa'i neina tara'i nei rai surirau haarirau.

31 Naasi moi 'ome'ome goro! Moi 'ado'adoai 'oha nau awa bei'amou ani. Suri rodo mana dangi suriai oru harisi nau ha'abasu'amou ha'i angiangi.

32 “Naani 'au nuga'amou na'i bwabwahenai rimana God. Mana taroha 'iniaia goro ana God 'inigia 'ai 'a'auhi'amou ro'u. Ni tarohasi, 'ai 'a'auhi'amou 'anai ha'a-wetewete'amou suri'i hinihinimoo'i maai haa'i tana'amoui maho goro na'ia God nai wate'i tanaraau hakoi inoni ana'i.

33 “Ai'a 'oha nawai naga 'ini'i ha'a ma'uasi bwana ana ta sae.

34 T'amou mou 'iraraa do 'inau 'au tau'aro 'iniaia rimagu 'anai hori'i taha nau rabasi'i, miraaui sae nameu ta'i hano.

35 'Au tau'aro raha o'asi 'anai ha'ata'inia tana'amoui herehere namou ga'i haua 'anai 'a'auhiraau nei ra ha-ha'aroha'a. Ma moi 'ado'adoai ha'atee ana Araha Jisas na o'ani, “Ia mo'o na hisu, 'a wa'ewa'e di'ua mo'o na daai mareho nara hisungia 'inia.’ ”

36 'Ia Pol 'agu ha'atee o'asi ma topira'i ruru auru beiraaui ma ha'arahesi.

37 'Iraau hako rau angi marau 'agoia marau ngoonia.

38 Mana maho rau ahutotou di'u 'inia, i 'unua ana Pol do'a bwa'i ta 'oha'a ro'u raigu re'ia. Marau ta'i hano dioi one 'anai ha'ahanoria na'i haka.

21

'Ia Pol 'A 'Ari Jerusalem

1 Meu haiha'ari mameu ta'e odo-odo 'anai maraui Kous. Na'i nata dangi meu ada na'i maraui Rodis, mameugu hano ro'u 'anai 'omaai Patara.

2 Na'i 'isi meu adoiai haka na 'ari Ponisia mameu ta'e'a iei.

3 'Oha meu boi na'i marau Saepras, meu taha na'i aba bo hura'a 'inia mameugu siri na'i Taea, 'e 'omaa na'i Siria. Na haka 'ai gaasi bori na'i 'isi.

4 Meu siri one mameu siba suriraau sae ni heisoi na'i 'omaasi, mameu awa beiraaui suriai ta'i sade. Rau ha'abasua Pol do'ai abu 'ari Jerusalem, 'inia na Hi'ona Maea 'a bwane ha'ata'inia tanaraau i taha nai to'o tanaa Pol na'i 'isi.

5 'A hakoi ta'i sade mameu hano ro'u. 'Iraau hakoi sae ni heisoi na'i 'omaasi, 'iraau mwane mana urao mana gare, meu ta'i hura'ai one. Meu topira'i ruru auru na'i nunu'u mameu ha'arahesi.

6 Meu haiha'ari mameugu hura'a aho'i haka, miraaui rau siri aho'i suri'i ruma adaa'i.

7 Meu hano baaniai Taea 'anai 'omaai Tolemes. 'Oha meu ada, meu bae beiraui sae ni heisoi na'i 'isi. 'E ta'i dangi nameu awa beiraaui.

8 Na'i dangi ahora meu 'ari Sisaria mameu awa beia Pilip, 'e sae na matai taroha'inia ro'u i Taroha Goro. 'Ia 'e ta'i 'iniraui waira biu nara 'ome sigihia 'anai 'a'auhiraui Ha'ataari.

9 'A to'oraai hai gare urao nara ai'a ha'iwai mau narau matai ha'atee rarabeanga'ini'i mareho.

10 Meu awa na'i Sisaria suriai taringai dangi. Ma'e Rarabea na atana 'ia Agabas 'a boi bei'ameu, 'iani baaniai Jiudea.

11 'A hauai rorowa'a ana Pol ma ho'osi'i 'iniaia rimana mana uwana haaria. Ma o'ani 'ini'ameu, “I Hi'ona Maea 'a ha'arangasia do ra'i bwauodo adaa'i Jiu na'i Jerusalem rai ho'osia mo'o na to'oraai rorowa'ani. Marai usuha'inia tanaraui nei ra ai'a Jiu.”

12 Na'i murinai ha'atee o'asi ana Agabas, 'i'ameu miraaui sae ni heisoi na'i 'omaasi, meu bongahinia Pol do'ai abu 'ari Jerusalem.

13 Mia Pol 'a o'ani, “Ni 'uaana na mou angi ha'a-ahutotouau 'inia? 'Onaa rai ho'osiau na'i rumanih'o na'i Jerusalem 'iniaia hinihinia agua Araha Jisas, 'inau 'au mwa'emwa'e moi. Mau mwa'emwa'e ro'u moi 'onaa nawai mae.”

14 Meugu ai'a matai rihosia'ai 'adoma'ina Pol, mameu agohe'a. Mameu o'ani, “A goro moi. 'Oi haua suriai hei'irisina Araha.”

15 Mameu ha'aagau 'anai 'ari Jerusalem.

16 Tara'i sae hinihini na'i Sisaria meu ta'i hano ro'u. Rau wai'ameu 'ari ruma ana Nason nameu awa na'iei. 'Ia mo'osi 'e saeni Saepras na bwane hinihinia mau mai a Jisas.

'Ia Pol 'A Garihia Jems

17 'Iraaui sae ni heisoi na'i Jerusalem rau ha'amaoto'ameu goro.

18 Na'i nata dangi mia Pol 'a hano bei'ameu 'anai 'ari garihia Jems. 'Iraaui bwauodo na'i heisoi ni Jerusalem rau awa ro'u na'i 'isi.

19 Mia Pol 'a bae beiraaui ma maania tanaraaui mwani mareho na'ia God na haua suri'i tahingadaa'i nei ra ai'a Jiu 'oha na'ia Pol 'a heitaroha'i tanaraau.

20 Rau ha'aasaa God 'inia mahi na maani'i Pol marau o'ani 'inia, "Do'ora, i'oe 'iraraa do'e taringai merui Jiu narau hinihinia'a Jisas marau hinihini'i wetewete ro'u mau i Ringe ana'ia Moses.

21 Maraugu rongo ha'atari'aa do i'oe 'o ha'ausuriraaui Jiu narau awa beiraaui nei ra ai'a Jiu dorai abu suri'i Ringe ana'ia Moses, marau 'unua do i'oe 'o ha'aabua dorai aha ha'ara'i gare mwane adaa'i mana suri'i ringeringe adaa'i wauwa agaa'i.

22 "Hoita naasi, 'e taha gaigu haua? 'Inia 'a bwa'i adara'a rai rongoa do 'o awa'a 'ini.

23 Naani mahi nameu 'adoma'inia do'oi haua. I waira haini rau hauai duruduru tanaa God.

24 Moi ta'i 'ari Ruma Maea ana God mamoi hauai herehere 'anai ha'a-wariwari'amou na'i maana God* 'inia awa namou haua beiraaui nei ra ai'a Jiu. Na'i muri, 'oigu hori'i hakoi mareho 'anai suu ho'asi 'ini'i. Miraaui waira haisi, raigui risi pou'i bwaudaa'i. 'Oha rai re'iai haua amua o'asi, maraugu bwa'i hinihinia'ai mahi na maani'i 'ini'o do ra ha'a-momori. Rai 'iraraa do i'oe 'o daa'i baabau mau i Ringe ana'ia Moses.

25 "Miraaui nei ra ai'a Jiu narau hinihini, meu bwane haua hura'ai usu-usu tanaraau 'ini'i ringeringe narai suri'i. Meu ha'abasuraaui dorai abu ngaa'i mahoi ngau nara ho'asi'i 'ini'i araanunu. Mameu 'unua tanaraau dorai abui wawaasua'a marai abui ngau 'abu mana ngaa'i hasi'odi mwamwaa nara ri'oi'i."

26 Na'i nata dangi 'ia Pol 'a hano beiraaui wera hai marau hauai ringei ha'a-wariwarisi. Na'i muri 'a siri Ruma Maea ana God ma ha'arongoraaui Piriisi 'inia madoraa naigu hakoi biunai dangi 'anai ha'ahakoai duruduru adaaui waira haisi, neina rai suu ho'asi tanaraau na'i 'ohasi.

Ra Daua Pol

27 Na'i 'oha na biu dangi ni ha'ahakoai duruduru 'a gaarangi hako'a, tara'i Jiu baaniai Eisia rau re'ia Pol na'i Ruma Maea ana God. Rau hauai ruruha raha marau daua Pol.

28 Marau awara o'ani, "'T'amou saeni Israel, moi 'a'auhi'ameu! 'Ia mo'oni 'a 'ari suri'i mwani 'omaa rago na mamaani ha'a-ta'aigaui Jiu mana Ringe ana'ia Moses mana Ruma Maeani. Ma ha'ado'oa ro'u i Ruma Maea, 'a waa siri sae nara ai'a Jiu na'iei."

29 Rau ha'atee o'asi, 'inia tara'i abe rau 'adoma'inia do'ia Pol 'a waia Trofimas, saeni Efesas, siri na'i Ruma Maea ana God. 'Inia rau re'iai ta'i hahano goni adarua na'i 'omaasi.

* **21:24 Ha'a-wariwari'amou na'i maana God:** 'Iraaui Jiu ra 'unua i ringesi 'inia "Ringei Ha'awariwari." Ma'ata a he'ete'i baaniai Ringei Ha'awariwari narau hahaa na'i heisoi Anglican. 'Iraaui Jiu rau 'adoma'inia dorau do'o'a na'i maana God 'oha nara haigaau beiraaui nei ra ai'a Jiu. Naasi, 'onaa rai awa ga'u beiraaui nei ra ai'a Jiu, rai hauai ringesi marai wadiwadi aho'i na'i maana God.

³⁰ Mana 'omaa hako rau rongo raha'a, rau 'eba mai marau goni na'i dorasi. Rau daua Pol, rau oge ra'ira'i'a hura'a baaniai Ruma Maea ana God. Raugu 'asu'a mana maraaruma ra honohono'a.

³¹ Rau taraawa'a ngahua Pol 'anai ha'amaesia mana na'ohadaaui hehei'oi-ni Rom 'a rongoa do 'iraau hako'i Jerusalem rau taraawa'a ha'agogoru'a.

³² Ma 'unuraau tara'i hehei'oi ma tara'i bwauodo adaa'i narau 'eba 'ari na'i dora ra goni na'iei. 'Oha rau re'iai na'ohanai hehei'oi beiraaui hehei'oi ana'i maraugu mamarota'i rubua Pol.

³³ Mana na'ohanai hehei'oi 'a 'ariwou ma daua Pol ma 'unua dorai tosia 'inia rua arihau. Ma songa'iniraaui noni 'inia 'iatei naasia mo'osi ma 'e taha na haua.

³⁴ 'E ta'i aba 'inia ruruhasi rau awaranga'inia ta'i maho mana nata aba rau awaranga'inia maho he'ete'i ro'u. Rau rongo raha di'u na na'ohadaaui hehei'oi 'agu ai'a rongo taha'a. Ma 'unua tanaraaui sae hehei'oi dorai waia Pol 'ari ruma baabau adaaui hehei'oi.

³⁵ 'Oha rau waia Pol tari na'i buuhane anai dora adaaui hehei'oi, me 'iraau noni hunga rau wetewete di'u ro'u wou. Na'i 'ohasi 'iraau hehei'oi raugu suru'ia Pol.

³⁶ Mana kae ruruhasi, rau haisuri rau awaawara o'ani, "Ha'amaesia, ha'amaesia!"

'Ia Pol 'A Hadahada

Tanaraaui Noni Hunga

³⁷ Na'i 'oha ra gaarangi wai'a Pol siri ruma adaaui sae hehei'oi, 'a ha'atoho beiai na'ohadaaui sae hehei'oi do'a raba 'unua ta maho tanaa.

Mana na'ohadaaui sae hehei'oi 'a o'ani 'inia, "Toe 'o matai maramara Grik!

³⁸ Nau 'adoma'inia ga'u do i'oe naasi ai Ijip na taraawa'anai ha'agogoru beiai Gaumani na'i 'ohaani, ma na'otaranai hai merui sae ta'aa ana'i 'anai awa na'i dora mangasara."

³⁹ Mia Pol 'a aramia o'ani, "'Inau ai'a! 'Inau 'e ai Jiu baaniai Tasas, 'e 'omaa ororiu na'i Silisia. 'Oi ha'awateau mawai hadahada tanaraaui sae 'ini."

⁴⁰ Mana na'ohadaaui sae hehei'oi 'a ha'awatea do'ai hadahada. Mia Pol 'a ura ara'a na'i buuhane maagu hauai ha'ara 'inia rimana tanaraaui noni hunga dorai papaku. 'Oha rau papaku maagu hadahada tanaraau, 'a maramara Jiu.

22

¹ "Mwani sae agu'i, moisu rongobahuau mawai ha'a-aidangisi'amou 'inia taha nau haua!"

² Na'i 'oha rau rongoai maramara Jiu ana Pol maraugu papaku ha'atai. Magu o'ani,

³ "'Inau 'e ai Jiu nau huta na'i 'omaai Tasas na'i Silisia. Me 'au raha ara'a na'i 'ini na'i Jerusalem. 'Au awa 'anai ha'ausuringa'i baania Gamaliel ma ha'ausuriau 'ini'i mwani ringeringe adaa'i wauwa agaa'i neina wai araisuri'i. Mau ha'isuri'i ha'a-momori 'inia rabasia agua dowai araisuria God 'onaai rabasia amou 'anai araisuria ro'u na'i 'ohani.

⁴ 'Au norata'airaaui nei rau hinihinia Jisas. Tara'i nei 'au ha'ahaingahu 'iniraaui, ma tara'i nei 'au daa'i mau gaasi'i na'i rumaniho'o. 'Au ai'a hihiri. Urao mana mwane ra ta'isada hako moi.

⁵ I Na'ohadaaui Piriisi miraaui ruruhai Kansol rau matai maania moi tana'amou do maho nau maaniasi 'a ha'a-momori. 'Inia 'iraau narau haa'i usu-usu nau waa'i tanaraaui bwauodo adaa'i Jiu na'i Damaskas neina wai

matai daa'i mana ho'osi'i sae hinihini na'isi 'anai wai'i mai 'anai ha'amama'ai'i."

'Ia Pol 'A Maaniai 'Oha

Na Taraawa'a Hinihini

⁶ "E ta'i dangi na'i atoa, 'au gaarangia'a wou i Damaskas. 'Augu 'asu'a mana marewa na boi baaniai aro 'a wadoriau'a.

⁷ Mau ahoda aurui ano mau rongoai ha'atee na o'ani, 'Sol, Sol. 'A 'ua 'o norata'aiu 'inia?'

⁸ "Minau o'ani, 'Saemaua, i'oe atei?' Mia o'ani, "Inaua Jisas ni Nasaret na'o norata'aiusi.'

⁹ 'Iraui sae meu ta'i hano, rau re'ia moi marewa marau ai'a rongoa ta ha'atee.

¹⁰ "Mau o'ani, 'Araha, 'e taha na'o rabasia dowai haua?' Mia o'ani, "Oi urata'e ma'oi 'ari Damaskas. 'E sae na'i 'isi naigu 'unua tana'oi maho nau bwane 'adoma'i nunuga 'inia tana'o 'anai haua.'

¹¹ "Ni marewasi 'a wadora'i di'u, 'a ha'akurua'ai maagu ma bwara'a do waigu wana. 'Iraui nei nameu ta'i hanosi, raugu uruau moe'a 'ari Damaskas.

¹² Na'i Damaskas 'e sae na awa 'isi, atana 'ia Ananaeas, 'ia 'a ha'isuri'i goroi Ringe ana'ia Moses. 'Iraui Jiu narau awa 'isi rau ha'ahoua di'u.

¹³ 'A boi ma ura na'i bobogu ma o'ani, 'Do'ora Sol, 'oi wanawana aho'i.' Na'i 'ohasi 'augu 'ome'ome aho'i, mau wanasia.

¹⁴ "Mia Ananaeas 'a o'ani 'iniau, "Ia God narau ha'arahesia i wauwa agaa'i, 'a 'ome sigihi'o 'anai aidangisiai hei'irisina. 'A 'ome sigihi'o ro'u do'oi re'iai garena na odo-odo hako na'i maana ma'oi rongoai ringena.

¹⁵ Ma'oi mania tanaraau hakoi mwani sae i taha na'o rongoa ma'o re'ia.'

¹⁶ Ma o'ani ro'ua Ananaeas, "E taha na'ogu mamasia? 'Oi ura ara'a ma'oi bwareomaea mia Araha 'ai ha'a-ai'ai ora-ora'a amu'i 'iniai ha'angonia amua 'anai 'adoma'i nugasi'o.'

¹⁷ "Hoita, na'i muri 'oha nau boi aho'i na'i Jerusalem, 'e ta'i dangi nau siri na'i Ruma Maea ana God 'anai ha'arahesi. Mana'i 'omesia agua Araha 'a 'onaai maho nau mauru'aa.

¹⁸ 'A o'ani 'iniau, "Oi hura'a raurau baaniai Jerusalem! 'Inia 'iraui sae 'ini rau bwa'i raba rongo'i maho na'oi maani'i 'iniau.'

¹⁹ "Mau o'ani 'inia, 'Araha, 'iraui sae 'ini rau 'iraraa do'au siri suri'i mwani ruma ni ha'arahesi amee'i Jiu 'anai dauraui sae ra hinihini'o 'anai gaasiraau na'i rumaniho'o marai rohoraau.

²⁰ Mana'i 'oha ra ha'amaesia Stivin, i sae heheitaroha'i amua, 'inau 'au awa ro'u, mau 'adoma'i aratara beiraau. 'Au 'omesuri'i bwana adaa'i mwane rau buta ha'amaesiasi.'

²¹ "Mia Araha 'a o'ani 'iniau, "Oi hura'a! Wai ha'ataari'o hura'a ha'atau beiraui nei ra ai'a Jiu.' "

²² 'Iraui noni hunga rau rongobahua Pol tari 'oha nagu ha'atee o'asi, marau taraawa'a awara'a 'iniai ringe raha, rau o'ani, "Ha'amaesia! 'Ia mo'osi 'a ai'a arari 'anai tahi."

²³ Rau awara marau rahi'i bwana bohura'a adaa'i marau ra'u ano narau gaasi'i 'ari aro.

²⁴ Mana na'ohanai sae hehei'oi adaaui Rom 'a 'unua dorai waia Pol siri ruma adaaui sae hehei'oi marai rohoa na'iei. 'A haua o'asi do'ia Pol 'ai ha'arangasiai taranai taha naraugu awaraia 'inia.

²⁵ Na'i 'oha 'iraui sae hehei'oi raugu tosia Pol 'anai rohoa, ma songa'inia'ai ta'i saemaua adaaui na ura na'i bobona. 'A o'ani, "A 'ua? 'A odo-odo na'i ringe dorai rohoai sae auhenua ni Rom maraigu 'i'ia?"

26 'Oha nagu rongoa o'asi ma 'ari beiai na'ohanai sae hehei'oi ma o'ani 'inia, "E taha na'o hauani? 'Ia mo'oni 'e sae auhenua ni Rom naani!"

27 Mia mo'osi 'a 'ari beia Pol ma songa'inia, "O'i 'unua tanaau. I'oe 'e sae auhenua ni Rom?"

Mia Pol 'a aramia o'ani, "Inau 'e nei."

28 Mana na'ohanai sae hehei'oi 'a o'ani, "Inau 'e kae ha'a nau horia maugu ha'i sae auhenua ni Rom."

Mia Pol 'a o'ani, "Inau 'au huta ha'i ai Rom."

29 Miraau'i nei rau raba songa'inia Pol 'oha rau gaarangi rohoa ani, raugu hano baania. Mana na'ohadaau'i sae hehei'oi 'a maaa'u di'u, 'iniai ho'osia ana Pol magu aidangisia na'i muri do 'iia 'e sae auhenua ni Rom.

Ra 'Tia Pol

30 Na'i nata dangi, i na'ohanai sae hehei'oi 'a raba aidangisia goro taha na 'iraau'i bwauodo adaa'i Jiu raugu ha'ahunia 'inia Pol. 'A wagasia Pol ma 'unuraau mai na'ohadaa'i Piriisi miraau'i Kansol, magu waia maia Pol na ha'a-urasia na'i maadaau.

23

1 Mia Pol 'a wanasiraau'i Kansol magu o'ani, "Mwani sae agu'i, 'inau 'au ai'a ninima na'i maana God, 'inia mwani 'oha tari dangini 'au haa'i moe'ai maho na 'irisia dowai haa'i."

2 Mia Ananaeas, Na'ohadaau'i Piriisi, 'a 'unua tanaraau'i nei rau ura na'i bobona Pol dorai hidariai ngoona.

3 Mia Pol 'a rihota'i tanaai Na'ohadaau'i Piriisi ma o'ani 'inia, "Ia God 'ai hidari'o ro'u. I'oe 'o 'onaai bani na bwani ngabo ta'aa maragu peda ha'ahaorua moi. 'O hiiriau suriai Ringe ana Moses magu i'oe 'o horosia ro'u moi ringesi. Ni ringe 'a ha'aabua do'oi 'unua tanaraau'i mwane 'ini dorai hidariau."

4 Miraau'i nei rau ura gaarangia Pol, rau o'ani 'inia, "Ni 'uaana no'o ha'atee ha'ata'aia 'iniai Na'ohadaau'i Piriisi ana God?"

5 Mia Pol 'a o'ani, "Au ai'a aidangisia do 'iia 'e Na'ohadaau'i Piriisi. Ni Usu-usu Maea 'a 'unua dogai abu ha'atee ha'ata'ai'i na'otara agaa'i."

6 Na'i 'oha 'ia Pol 'a re'ia do ra'i abe 'iniraau'i Kansol ra'i Sadiusi ma ra'i nei ra'i Farisei, ma ha'atee raha'a, 'a o'ani, "Romwane! 'Inau 'e Farisei miraau'i wauwa agu'i ra'i Farisei ro'u. Maragu 'i'iau 'iniai hinihinia agua do 'irai nei ra mae rai ha'a-suruta'era aho'i ro'u."

7 Na'i 'oha naagu ha'atee o'asi a Pol, miraau'i Farisei mana Sadiusi rau taraawa'a haita'ia'a. Mana Kansol 'a heihoa 'iniai rua ruruha.

8 'Iraau'i Sadiusi narau ai'a hinihini'i enjel mana adaro mana aunga mana suruta'e aho'i adaa'i sae baaniai mae, miraau'i Farisei narau hinihini'i hakoi maho 'isi.

9 'Iraau'i rua ruruhasi, raugu haa marau awaawara'a. Tara'i ha'ausuri 'anai Ringe ana'ia Moses ra'i Farisei, rau ura marau ha'atee wetewete o'ani'a, "Ai'a maho taritari'a mei sadoia beia mo'oni. Gasi 'idi 'e aunganai sae ma'ua enjel na hadahada ga'u tanaa."

10 Ni heita'ia narau hauasi 'agu haa ma kae raha'a. Mana na'ohanai sae hehei'oi 'a magugu'a do rau gasi 'ado dorana Pol. Ma 'unua tanaraau'i sae hehei'oi dorai siri marai waia hura'a'a Pol. Marau sirihia Pol narau waia aho'i 'ari ruma baabau adaau.

11 Na'i moi rodo mia Araha 'a boi na ura na'i bobona Pol magu o'ani 'inia, "O'i abu maaa'u. 'Onaai taroha'inau amua na'o haa na'i Jerusalem, i'oe 'oi haua o'asi ro'u na'i Rom."

Ha'aradorado 'Anai Ha'amaesia Pol

12-13 Na'i haho'oa, 'a di'uai hai tangahurui sae mwane ni Jiu rau rurugoni marau duruduru dorau bwa'i ngau ma'ua gono tari 'oha rai ha'amaesia Pol.

14 Tara'i abe 'iniraau ra 'ari beiraau Na'ohadaui Piriisi ma tara'i saemaua ro'u marau o'ani 'iniraau, "Tameu meu tohe tanaa God domeu bwa'i ngau tari 'oha mei ha'amaesia Pol.

15 T'amou hako beiraui Kansol moi ha'ataariai taroha tanaai na'ohanai sae hehei'oi mamoi pwari'ia domou raba sadoi'i goroi maho taritari'a na haa'ia Pol. Mamoi ha'angonia marai waia mai tana'amou 'anai 'i'ia. T'ameu mei matoo 'ana na'i tara 'anai ngahu ha'amaesia."

16 Ma'e ta'i gare mwane anai asina Pol 'a rongo sadoiai ha'aradoradi ma 'ari dora adaui hehei'oi ma maaniai mahosi tanaa Pol.

17 Mia Pol 'a o'ani 'iniai ta'i 'iniraui na'ohadaui hehei'oi, "Oi waia 'ari gere saeni tanaai bwauodo amou. 'E maho na raba 'unua tanaa."

18 Mana sae hehei'oisi 'a waia 'ari'a garesi ma o'ani 'iniai bwauodo ana, "Ia Pol, mo'o na awa na'i rumaniho'o agaau ani, 'a 'unua tanaau dowai waia maia mo'oni tana'o. 'E mareho na raba 'unua tana'o."

19 Mana bwauodosi 'a dauai rimana ma gere waia beira'i ma o'ani 'inia, "E taha na'o raba maania tanaau?"

20 Mia aramia o'ani, "Ra'i Jiu rau ha'a-radonga'inia dorai ha'angonia do'oi waia dioa Pol tanaraui Kansol adaui ho'oa. Rai pwari'i'o dorau raba sadoi'i goroi maho taritari'a na haa'i.

21 Ma'ata 'oi abu araisurirau! 'Inia 'a di'uai hai tangahurui sae rau matoo 'ana Pol na'i tara 'anai ngahu ha'amaesia. Rau tohe tanaa God dorau bwa'i ngau ma'ua gono tari 'oha rai ha'amaesia Pol. Na'i 'ohanisi rau mamasi moe'a, 'inia rau 'adoma'inia do i'oe 'oi 'adoma'i aratara 'anai ha'ataaria Pol tanaraui."

22 Mana bwauodosi 'a ha'ataaria gere saesi hura'a ma o'ani 'inia, "Oi abu maania tanaa ta sae do'o rangasia tanaau i mahosi."

Ta Pol Ra Waia 'Ari

Tanaa Primia Filiks

23 Mana bwauodonai hehei'oi 'a 'unua mai rua na'ohadaui hehei'oi ma o'ani 'iniraru, "Murui ha'aagaua ta rua 'arangi sae hehei'oi 'anai 'ari Sisaria na'i angi siwa de'eni rodo. Mamoi ha'aagaua ro'u ta biu tangahurui sae hehei'oi narai ta'e suri'i hoosi, ma ta rua 'arangi sae hehei'oi 'ini'i oo'o.

24 Mamoi ha'aagau'i tara'i hoosi ro'u tanaa Pol. Moi ha'a-adahia dadara'a beja Primia Filiks."

25 Mana bwauodonai hehei'oi 'a hauai usu-usu ma o'ani,

26 Tana'o Primia Filiks. 'Inau moia Klodias Lisias nau hauai usu-usuni.

27 'Io, tara'i ai Jiu rau daua mo'oni marau taraawa'a 'anai ngahu ha'amaesia. Na'i 'oha naugu aidangisia do 'iia 'e sae auhenua ni Rom, 'au wairau sae hehei'oi agu'i mameugu waia Pol baanirau.

28 Hoita, 'au waia 'ari beiai Kansol adaui 'inia 'au raba aidangisiai taha rau ha'ahunia 'inia.

29 Mau sadoia do maho rau ha'ahunia 'ini'i ra'i maho moi 'abai'i ringeringe adaa'i haarirau. 'A ai'a haua ta maho nai arari do mei ha'amaesia 'inia ma'uasi do mei nugaa 'inia na'i rumaniho'o.

30 Mana'i 'oha naugu aidangisia do rau hauai ha'aradorado 'anai ha'amaesia, mau ha'ataaria'a wousi. 'Au 'unua tanaraui bwauodo adaa'i do taha rai ha'ahunia 'ini'i raigu maani'i tana'o na'i madoraa na'oi 'i'ia.

31 Hoita, mirau hehei'oi rau haa'i maho na bwauododaaui 'a atenga'ini'i. Na'i mau rodosi marau wai'a Pol 'ari 'omaai Antipatris.

³² Na'i nata dangi, 'iraau hehei'oi narau hahano ra'i uwa-uwa rau aho'i, 'iraau moi nei rau ta'e suri'i hoosi naraugu waia Pol daara'i 'ari.

³³ 'Oha rau ada na'i Sisaria rau hauai usu-usu tanaa Primia, marau waia woua Pol tanaa.

³⁴ 'A 'oha'ini'ai usu-usu ma songa'inia Pol ma sadoia do'ia Pol 'e saeni Provensi Silisia.

³⁵ Ma o'ani 'inia, "Na'i 'oha narai ada mai mwane narau ha'ahuni'osi, mawaigui rongo'i mamaani amoo'i." Mana Primia 'a 'unua tanaraau hehei'oi dorai ha'abwarasia goroa Pol na'i raronai kae ruma ana.

24

'Ia Primia Filiks 'A Bahurongoai Mareho

Nara Ha'ahunia 'Inia Pol

¹ 'E rima dangi na hako mana Na'ohadaau Piriisi, 'ia Ananaeas, miraau tara'i bwauodo adaa'i Jiu mana sae madoma 'anai hadahada na'i kooti na atana 'ia Tetalas, rau dio mai baania Jerusalem marau ada na'i Sisaria. Rau boi 'anai 'unu'i tanaa Primia Filiks i mareho narau ha'ahuni'i 'ini'i a Pol.

² Ra 'unua siria Pol, mia Tetalas 'a maani'i hura'ai taha rau ha'ahunia 'ini'i. 'A o'ani 'inia Filiks,

"Saemaua ameeu, i'oe 'o madoma di'u na'i heimarungi na'o haua tana'ameu ma'o ha'a-awagoro goni'ameu mai ore'a. 'O ha'a-aratara'i ro'u i mwani maho nara to'o bei'ameu Jiu nara ai'a odo-odo.

³ 'Tameu hako meu kae wa'ewa'e 'ini'ai here na'o haua.

⁴ Ma'ata 'inau 'au ai'a raba ha'ata'aabemu, mau ha'angoni'o 'oi maraahutanoa beiau ma'oi rongobahuau ta gere madoraa moi.

⁵ 'Ia mo'oni ra sadoia do 'a awata'i ha'a-hairosiraau tarau moi ai Jiu nara awa 'ari suriai marewana ma ragoi ha'agogoru na ha'ato'o'i. 'Iia 'e bwauodo ro'u na'i ruruha ta'aa anai saeni Nasaret ani.

⁶ 'Oha nagu bonasiai haa'i here ra ai'a goro tanaai Ruma Maea ana God mameu daua'a. 'Tameu meu raba hiiria suriai ringeringe ameeu.

⁷ Mia Lisias, ni na'ohanai hehei'oi, 'a boi bei'i mwani sae hehei'oi ana'i marau daua Pol marau waia baani'ameu.*

⁸ Mia Lisias 'a 'unua tana'ameu doni mareho nameu raba ha'ahunia 'ini'i, mei ha'arongo'o ga'u 'ini'i. 'Onaa 'oi songa'inia 'o ga'i sadoia haari'o doni mareho meu ha'ahunia 'ini'i ra ha'a-momori."

⁹ Miraau hako ruruha adaaui Jiu rau ha'atee raha o'ani, "Ra ha'a-momori maho na maani'ia Tetalas."

'Ia Pol 'A Ura Bwarasia Haaria

¹⁰ Mia Primia Filiks 'a hauai ha'ara tanaa Pol do'ai hadahada mia Pol 'a o'ani, "Filiks, 'au aidangisi'o, do i'oe na'o hihiri na'i Israel suri mwani harisi'a. Naasi, 'au wa'ewa'e 'anai ura bwarasiau haariau na'i maamu.

¹¹ 'A ai'a di'ua mau i ta'i tangahuru mana rua dangi murina'i 'ari agua na'i Jerusalem 'anai rihunga'i. 'Onaa 'oi siba suria 'a ai'a bwarai sadoiai mahosi.

¹² 'Iraau bwauodo amee'i rau ai'a sadoia do ta sae nawai heiraeraesi beia na'i Ruma Maea ana God ma'uasi dowai taraawa'ana ta ha'agogoru suri'i ruma ni ha'arahesi amee'i Jiu, ma'uasi ta dora moi na'i raronai 'omaa.

¹³ Rau bwarai ha'ata'inia tana'o doni maho ra ha'ahuniau 'ini'i ra ha'a-momori.

¹⁴ "Ma'ata wai ha'arangasia tana'o saemaua, 'inau 'au hinihinia Jisas miraui sae 'isi rau 'adoma'inia do 'a taritari'a. Me'e ta'i God moi mau nara

* 24:7 24:7 Tara'i kopi bwani 'ini'ai Baebol ra ai'a to'oraai tatarani.

ha'arahesia wauwa amee'i na 'inau 'au ha'arahesia ro'usi. Mau hinihini'i hakoi Ringe ana'ia Moses mana maho ra usu'i Rarabea.

¹⁵ Mau hinihinia ro'u 'onaai hinihinia adaau, do'ia God 'ai ha'a-suruta'eraau nei ra odo-odo mana nei ra ai'a baaniai mae.

¹⁶ Mana 'adoma'inia agua o'asi, 'au bonasia dona awangagu 'ai odo-odo tarau na'i maana God mei maadai noni.

¹⁷ "Na'i murinai hano agua baania Jerusalem suriai taringai harisi, 'au ada aho'i mai bei'i maho nau raba hisungirau 'ini'i Jiu nara pohara ma 'ana ro'u i suu ho'asi.

¹⁸ Ma naasi, raugu re'iau na'i Ruma Maea ana God na'i 'oha nau hauai ringe 'anai ha'a-wariwariau aho'i na'i maana God 'inia awa agua beiraau nei ra ai'a Jiu. Na'i 'ohasi, 'a ai'a ta kae ruruha nawai awa beia, ma'uasi ai'a do ta ha'agogoru nawai ha'ato'oa.

¹⁹ Ma'ata tara'i ai Jiu narau boi baania Eisia, rau awa na'i 'ohasi. 'Onaa rau ga'i ha'ahuniau 'inia ta maho rau ga'i awa ro'u 'ini na'i 'ohanisi.

²⁰ Ma'ua 'onaa 'oi songa'iniraau mwane 'ini, rau ga'i maania tana'o do ai'a ta maho taritari'a na wai 'ino'a 'inia 'oha na Kansol adaau 'a 'i'iau.

²¹ 'E ta'i maho moi narau ga'i ha'ahuniau 'inia nau haua naasi. 'Au awara o'ani, 'Dangini, 'iamou mou 'i'iau suriai hinihinia agua doni nei nara mae, 'ia God 'ai ha'a-suruta'eraau aho'i.' "

²² Mia Filiks 'a bwane aidangisia goroi hinihinidaa'i sae hinihini. Naasi 'a ha'ahakoai 'i'i narau hauasi ma o'ani, "Waigu ha'ahura'ahiai 'ado'adogu 'inia 'i'i gau hauani na'i 'oha naigu ada a Lisias, i bwauododaau hehei'oi."

²³ Ma 'unua tanaraau tara'i sae mwanimaua na'i ruruhai hehei'oi do rai waia Pol marai nugaa na'i rumaniho'o. Ma'ata rai abui here ha'ata'aia ma'ua ha'a-bwarasiraau gere sae ana'i baania marai taguma'inia.

²⁴ Taringai dangi na'i muri, 'ia Filiks mana urao ana, 'ia Drusila, raru 'ari dora ra 'omesuria ieia Pol. 'Ia Drusila 'e ai Jiu. Hoita, raru 'unua maia Pol 'anai mamaani tanararua 'abaiai tahingadaa'i sae nara hinihinia Jisas Kraest.

²⁵ Mia Filiks 'a maaa'u na'i 'oha 'ia Pol 'a maania tanaa do'iraau sae ra ga'i awa odo-odo mara ga'i 'omesurirau haarirau baaniai ora-ora'a mana dangi ni hihiri 'ai boi mau ta 'oha. Ma o'ani 'inia Pol, "A goroa. 'Oi hura'a'a. Waigu 'unu'o ro'u mai ta 'oha nawai to'ora ta madoraa."

²⁶ Na'i muri, 'ado 'oha 'ia Filiks 'a 'unua mai a Pol 'anai mamaani beia. 'A haua o'asi 'inia 'a 'adoma'inia do'ia Pol 'ai horia, maai 'a'auhia 'inia ha'ahunia nara haua.

²⁷ Hoita, na'i murinai rua harisi, 'ia Posias Festas nagu Primia orisia Filiks. Me suria Filiks 'a raba ha'a-wa'ewa'eraau Jiu, 'agu ai'a raba ha'ahura'ahia Pol baaniai rumaniho'o.

25

Ia Festas 'A T'ia Pol

¹ 'E oru dangi moi murinai ada ana Primia Festas na'i Sisaria 'anai taraawa'anai tau'aro ana, 'a hano ma 'ari Jerusalem.

² Miraau Na'ohadaau Piriisi miraau saemaua adaa'i Jiu, rau maani'i tanaa i maho rau ha'ahunia 'ini'i a Pol.

³ Rau ha'angonia wetewete do 'onaa 'ai mwada'u ma ga'i ha'aboihia Pol na'i Jerusalem. Rau ha'angonia o'asi 'inia rau raba matoo 'ana Pol dorai daua 'anai ha'amaesia na'i tara na'i 'oha nai 'ari 'anai Jerusalem.

⁴ Mia Festas 'a o'ani, "Ia Pol ra nugaa na'i rumaniho'o na'i Sisaria, ma bwa'i orema mawai aho'i'a 'ari.

⁵ 'Onaa 'e maho taritari'a na haua, miraau saemaua amoo'i mei ta'i hano mawaigu rongoai taha rau ha'ahunia 'ini'i a Pol 'ari 'ani."

⁶ 'Ia Festas 'a awa ga'u na'i Jerusalem suriai waru ma'ua ta'i tangahurui dangi magu aho'i 'ari Sisaria. Na'i nata dangi, 'a heinagu na'i dora-ni-hihiiri ana maragu waia siria Pol tanaa 'anai 'i'ia.

⁷ Na'i 'oha na siri a Pol, 'iraau saemaua adaa'i Jiu baania Jerusalem, rau ura garigaria marau 'unua do 'a 'ino'a 'ini'i mwani maho rago ra ta'a'i di'u. Mana mwani maho ra ha'ahunia 'ini'i, ra bwarai ha'ata'inia do ra ha'a-momori.

⁸ Mia Pol 'a ura bwarasia haaria, 'a o'ani, "Inau 'au ai'a horosia ta ringe adaa'i sae agu'i. Mau ai'a haua ta maho taritari'a tanaai Ruma Maea ana God, ma'uasi tanaai Mwaeraha ni Rom."

⁹ Me suria 'ia Festas 'a raba ha'a-wa'ewa'eraau saemaua adaa'i Jiu, 'a o'ani 'inia Pol, "A 'ua? I'oe 'o mwa'emwa'e moi 'anai 'ari Jerusalem mawaigu rongo'i iei taha ra ha'ahuni'o 'ini'isi?"

¹⁰ Mia Pol 'a aramia o'ani, "Na'i 'ohanisi, 'au ura na'i dora ni 'i'i anai Mwaeraha ni Rom ma na'i 'ini nara ga'i 'i'iau iei. I'oe 'o aidangisia goro do ai'a ta maho ta'aa nawai haua tanaraau Jiu.

¹¹ 'Onaa wai haua ta maho taritari'a nai arari 'inia domoi ha'amaesiau, 'au ga'i mwa'emwa'e moi 'anai mae. Ma'ata, suria 'au ai'a haua ta maho nai taritari'a, ai'a odo-odo do i'oe ma'ua ta sae he'ete'i ro'u nai taranga'iniau tanaraau mwane 'ini. Naasi, 'au ha'angonia dona Mwaeraha ni Rom 'ai bahurongoai taha nara ha'ahuniau 'ini'i."

¹² Primia Festas 'a hadanga'iniai mahosi beiraau saemaua ana'i, magu o'ani 'inia Pol, "Iniai rabasia amua do Mwaeraha ni Rom nai bahurongoai taha nara ha'ahuni'o 'ini'i, wai ha'ataari'o 'ari tanaa."

'Ia Mwaeraha Agripa 'A Raba Re'ia Pol

¹³ 'E taringai dangi na'i muri, i mwaeraha ni Jiudea, 'ia Agripa, mia asina 'ia Benis, raru boi garihia Festas na'i Sisaria.

¹⁴ Raru awa 'isi suriai taringai dangi. 'Oha narau awa 'isi, 'ia Festas 'a mamaani tanaai mwaeraha 'inia Pol. 'A o'ani, "E ta'i sae 'ia Filiks 'a nugaa na'i rumanih'o magu hako baaniai Primia.

¹⁵ Ma na'i 'oha nau 'ari Jerusalem, 'iraau na'ohadaa'i Piriisi miraaui saemaua adaa'i Jiu rau ha'ahunia Pol 'ini'i mwani maho marau ha'angoniau dowai hiiria 'anai ha'a-mama'aia.

¹⁶ Mau 'unua tanaraau do 'a ai'a suriai herehere adaa'i Rom 'anai ha'a-mama'aiai sae 'onaa ra ai'a 'i'ia mau. 'Ia mo'o nara ha'ahunia, 'ai to'ora ma'ata ta madoraa 'anai ura bwarasia haaria na'i maadaa'i nei ra ha'ahunia.

¹⁷ Hoita, na'i 'oha raugu ada mai saemaua adaa'i Jiu, maugu ai'a mamasi'a. Na'i moi nata dangi, mau 'ari heinagu na'i dora-ni-hihiiri mau 'unua'a dorai waia siri maia Pol.

¹⁸ Na'i 'oha 'iraau saemaua adaa'i Jiu raugu ura ara'a 'anai mamaani, ma ai'a ta maho ta'aa 'onaa 'adoma'inia agua dora ga'i ha'ahunia 'ini'i narai maani'i.

¹⁹ Rau heiraeraesi moi beia 'ini'i maho rau hinihini'i Jiu mana 'abaiai sae na bwane mae na atana 'ia Jisas. Mia Pol 'a 'unua do 'a tahi mau i saesi.

²⁰ Me suria ai'a 'iraraa aguai here wai haua nawai matai 'iraraa goro 'inia do maho 'ini ra ha'a-momori, 'au songa'inia Pol do 'onaa 'ai mwa'emwa'e marai 'ari Jerusalem naraigu 'i'ia iei.

²¹ Mia Pol 'a ha'angonia do'ai awa na'i rumanih'o tari 'oha na Mwaeraha ni Rom naigu hiiriai taha ra ha'ahuni'i 'inia. Naia naugu heresia 'inia na'i rumanih'o tari madoraa nawaigu ha'ataaria 'ari tanaai Mwaeraha."

²² 'Oha nagu rongo o'asi a Agripa, ma o'ani 'inia Festas, "Au raba rongoai taha nai maania mo'osi."

Mia Festas 'a o'ani, "'Oigu baturongoa ho'oa."

²³ Na'i nata dangi, 'ia Agripa mea Benis, raru ho'osi'i mwani bwana 'omegoro nara ha'a-wanariuraa 'ini'i sae ma rarugu siri na'i kae ruma ra goni na'iei. 'Iraaui sae bwauodo na'i ruruhai hehei'oi miraaui saemaua na'i 'omaasi, rau ta'i siri mai ro'u na'i 'ohasi. Mia Festas 'a 'unua dorai waia siri a Pol.

²⁴ Ma o'ani, "Mwaeraha Agripa mi'amou hakoi noni, moisu wanasia mo'oni! 'Iraau hakoi Jiu na'i Jerusalem mei Sisaria rau boi beiau 'anai ha'abonga'inia dowai ha'amaesia.

²⁵ Maugu ai'a sadoia ta maho taritari'a nai haua nai arari 'inia 'anai mae. Me rabasia ana doni Mwaeraha ni Rom nai hiiria, naia naugu 'adoma'inia 'inia dowai ha'ataaria 'ari Rom.

²⁶ Mau ga'i usu ha'arangasi'i tara'i maho 'inia mo'oni tanaai mwaeraha. Ma naani 'au waia siri mai na'i maamouu, ororiu na'i maanai mwaeraha Agripa, neina na'i murinai hadanga'iniai taha ra ha'ahunia 'inia, mau ga'igu to'oraa ta maho 'anai usu taroha'inia 'inia.

²⁷ 'A ai'a 'ome odo-odo i ha'ataariai sae na awai rumanih'o tanaai Mwaeraha ni Rom ha'i ai'a ha'a-aidangisia 'iniai taha ra ha'ahunia 'inia."

26

'Ia Pol 'A Ura Bwarasia Haaria

Na'i Maana Agripa

¹ Mia Agripa 'a o'ani 'inia Pol, "'Ohani 'au ha'awate'o 'anai ha'atee 'ini'o haari'o."

Mia Pol 'a hauai ha'ara 'iniai rimana ma o'ani,

² "Mwaeraha Agripa, 'au wa'ewa'e na'i 'ohani 'iniai ura agua na'i maamu 'anai taatahi bwarasiau haariau baaniai taha 'iraui saemaua agu'i rau ha'ahuniau 'ini'i.

³ 'Au wa'ewa'e raha suria i'oe 'o 'irara'i herehere amee'i Jiu mana hinihini nara hoameeu. 'Au ha'angoni'o, 'oi 'abenga'i baturongoi maho wai maani'i tana'o.

⁴ "'Iraui Jiu rau aidangisiau mau mai taraawa'a na'i 'oha nau gare nau raha ara'a na'i 'omaa agua tari 'oha nau awa na'i Jerusalem.

⁵ 'Onaa rau ga'i raba maania, rau ga'i matai maania moi tana'o do 'inau 'e Farisei. Naasi ruruha nara dau'i baabau ringeringe di'uraau mwani ruruha.

⁶ Ma naani ra 'i'iau 'iniai hinihinia aguai duruduru na haua God tanaraui wauwa amee'i na'i 'oha bwani.

⁷ 'O 'iraraa, suriai rodo mana dangi 'iraui ta'i tangahuru mana rua burungameeu ra ha'arahesia God, mamasia adaui duruduru na haua tanaraui naigu ha'ato'oa. Naia na hinihinia aguai durudurusu na 'iraui Jiu 'ini rau ura bwarasiau 'inia, Mwaeraha Agripa.

⁸ Ni 'uaana namou bwarai hinihinia 'inia do'ia God 'a matai ha'atahira aho'i nei ra mae?

⁹ "Na'i na'o ga'u, nau 'adoma'inia dowai bonasiai ura bwarasia Jisas ni Nasaret beiai 'amaui agua hako.

¹⁰ Suriai 'unua adaui na'ohadaa'i Piriisi, 'a ragoi sae hinihini nau gaasi'i siri na'i rumanih'o na'i Jerusalem. Ma na'i 'oha ra ha'amaesiraaui, 'inau 'adoma'i aratara ro'u 'inia.

¹¹ 'A ragoi 'oha 'au 'ari suri'i ruma ni ha'arahesi 'anai ha'a-mama'ai'i sae hinihini 'isi, 'au bonasia dorai ha'atee ha'ata'aia Jisas. 'Au kae taesu'a di'u nadaau mau siba suriraaui suri'i 'omaa he'ete'i ro'u wou, rei'uaa kantri he'ua.

12 “Mwaeraha Agripa, 'e ta'i dangi 'iraau Na'ohadaui Piriisi rau ha'ataariau 'ari Damaskas, rau ha'awatea dowai dau'i sae hinihini na'i 'omaasi.

13 Ma na'i atoa, 'oha meu 'ariwou suriai tara, 'au re'iai marewa na wadora'i di'uai sina. 'A wadoria mai baaniai aro beirau ro'u i nei rau hano beiau.

14 Meu ahoda dioi ano, mau rongoai ringe na ao mai. 'A maramara Jiu, 'a o'ani, 'Sol, Sol, 'inia 'uaana 'o norata'iaiu 'inia? 'O hereta'ai'o haari'o moi 'oha na'o bonasiai ura bwarasiau.'

15 “Mau heisonga'i o'ani, 'Saemaua, i'oe atei?’

“Mia o'ani, “Inau Jisas na'o norata'iausi.

16 Ma'oi ura ara'a! 'Inau 'au ha'ata'i tana'o 'inia 'au 'ome sigihi'o 'anai ha'i sae tatau'aro agua. 'Oi taroha'ini'i tanaraui sae i maho na to'o tana'o na'i 'ohanisi mana taha waigu ha'ata'ini'i ro'u mau tana'o.'

17 Mia o'ani ro'u 'iniau, 'Wai taatahi bwarasi'o baaniraui Jiu miraaui nei ra ai'a Jiu nawai ha'ataari'o 'ari beirau.

18 'Oi ha'a-ragata'ini'i maadaa'i marai rihota'i baaniai kuhi tanaai marewa, mei baaniai mena ana Saetan tanaa God. Wai 'adoma'i nugasi'i ora-ora'a adaa'i maraigui ha'i ta'i beirau noni na'ia God na bwane 'ome sigihirau 'inia hinihiniau adaaui.'

19 “Ma naasi Mwaeraha Agripa, 'au araisuriai taha na ha'amaranga mai tanaau baaniai aro.

20 'Au heitaroha'i tahamora tanaraui sae na'i Damaskas maugu 'ari Jerusalem mei suri'i 'omaa hako na'i Provensi Jiudea, maugu 'ari hahako beirau nei ra ai'a Jiu. 'Au 'unua tanaraui dorai abu ora-ora'a'a, rai rihosi tanaa God. Marai ha'ata'iniai rihosi adaaui na'i awahadaui na odo-odo.

21 Naia na heitaroha'i o'asi agua naraugu taarai dauau 'inia i Jiu na'i Ruma Maea ana God marau bonasiai ha'amaesiau.

22 Ma tari mai madoraani, 'ia God 'a taatahi bwarasiau mau. Naia naugu taarai ura 'inia na'i 'ini 'anai heitaroha'i tanaraui hako noni, rei'uaa saemaua ma'ua sae haraaria moi. I maho nau taroha'inia 'a ta'isada ro'u moi beiai taha 'ia Moses miraaui Rarabea rau maani'i dorai to'o—

23 doni Ha'atahi 'ai rongomaata'i me 'ia ro'u 'ai suruta'e aho'i tahamora baaniai mae, mai hauai bewaa tana'ameui Jiu beirau nei ra ai'a Jiu.”

24 Na'i na'o magu hauai hadahada ha'ahako ana Pol 'anai ura bwarasia haaria, 'ia Festas 'a awaraia Pol, 'a o'ani, “I'oe 'o bweu'a na! Naia na 'oha'i tarau amua na'o bweu'a 'iniasi!”

25 Mia Pol 'a o'ani, “Primia Festas, 'inau 'au ai'a bweu! Maho nau maani'ini ra ha'a-momori mara ha'amadomaahu.

26 Mau aidangisia do'ia Mwaeraha Agripa 'a bwane rongoai tarohana Jisas. 'Inia na mareho na 'ia Jisas na haa'i mana mae na haua na'i dadaahoro ra ai'a to'o na'i dora bainihu. Naasi tarana nau arunga a'ora 'inia 'anai hadahada na'i 'ohani.

27 Mi'oe Mwaeraha Agripa, 'au 'iraraa do i'oe ro'u 'o hinihini'i mareho rau usu'i Rarabea.”

28 Mia Agripa 'a o'ani 'inia Pol, “A 'ua? 'O 'adoma'inia dowai taraawa'ai hinihinia Kraest na'i moi gere madoraani 'inia mamaani na 'o haasi?”

29 Mia Pol 'a o'ani, “Rei'uaa na madora 'a pwapwaku ma'ua 'a tewa, 'au ha'arahesi tanaa God taramu miraaui nei rau bahurongoau domoi hinihinia Kraest 'onaiaui. Ma'ata na arihau moi 'ini nau ai'a rabasia dorai tosi'i be'amou.”

30 Mia Mwaeraha Agripa mia Primia Festas mia Benis miraaui hako nei rau ta'i awa, rau ura ara'a

³¹ marau hura'a. Marau ha'atee o'ani hairiu, "Ia mo'oni 'a ai'a ta maho nai 'inosia. 'A ai'a arari 'anai mae ma'uasi dorai nugaa 'inia na'i rumaniho'o."

³² Mia Agripa 'a o'ani 'inia Festas, "Ia mo'oni ra ga'i bwane ruhasia naani, 'onaa 'ai abui raba mamasiai Mwaeraha ni Rom do'ai 'i'ia."

27

Ia Pol Ra Waia 'Ari Rom

¹ Na'i 'oha 'iraau saemaua ra ha'awatea, meu ha'aagau 'anai ta'e na'i haka 'anai 'ari Itali. Ra taranga'inia Pol tanaa Jiulus, i saemaua na'i ruruhai hehei'oi 'anai Mwaeraha ni Rom. Do 'iia naasi nai 'omesuria Pol miraa ro'u tara'i sae narau ta'i awa Pol na'i rumaniho'o.

² Mia Aristakas baaniai 'omaai Tesalonaeka na'i Masidonia, meu ta'i ta'e ro'u na'i haka. Ni haka nameu ta'e eisi, 'e haka nagu bura'i boi moi baaniai Adramitiam ma ha'aagau 'anai 'ari suri'i 'omaai na'i Eisia.

³ Na'i nata dangi, meu siri na'i Saedon. 'Ia Jiulus 'a goro di'u 'inia Pol. 'A ha'awatea moi na 'ari garihiraui geresae ana'i na'i 'omaasi, neina rai matai 'a'auhia 'ini'i maho nai 'irisi'i.

⁴ 'Oha meu hano baania Saedon, meu hano suaai ro'a. Meu 'ari na'i nata aba 'inia marau Saepras, dora na ai'a taraa wetewete i ro'a.

⁵ Meu tahahoro mameugu taha suriai bobonai marau na'i Provens na'i Silisia mei Pamfilia mameugu siri na'i 'omaai Maera na'i Provens na'i Lisia.

⁶ Na'isi na saemaua 'anai hehei'oi, 'agu sadoiai haka na boi baaniai Aleksandria na'i Ijip ma ha'aagau 'anai 'ari Itali. Na'i hakasi na saemaua 'anai hehei'oi nagu ha'ata'e'ameu na'iei.

⁷ 'E taringai dangi na haka 'a 'abenga'i ono moi suaai ro'a. Meu bona matoo mameugu gaarangiai 'omaai Nidas. Na'i 'isi ma bwara di'u'a tana'ameu 'anai su'a ro'u nameugu buna rihota'i 'anai marau Krit. Na'i marausi meu gaira'i na'i sura'ina nara 'unua 'inia Salmoni, mameu 'ariwou suriai aba na ai'a taraa ro'a wetewete di'u.

⁸ Meu 'abenga'i hano moi suriai bobonai marau. Meu bona matoo mameugu ada na'i su'u nara 'unua 'inia Su'u Goro. 'A gaarangia moi 'omaai Lasea.

⁹ Na'i 'ohasi, 'a rago'a i dangi nameu bwane awa na'i asi. Ma na'i madoraasi, 'e madora ta'aa 'anai hano na'i asi, suria 'a tari'a mai madora ni awarosi.*

Mia Pol 'a ha'abasuraau o'ani,

¹⁰ "Romwane! 'Inau 'ome 'iraraai hano gau raba hauani, 'a ai'a goro. Gai ha'a-ai'aai haka mana bori nagau waa'i, ma'uasi ra gasi ai'a'i ro'u tara'i abe 'inigaau."

¹¹ Mana saemaua 'anai hehei'oi 'a ai'a rongosuria Pol, 'a rongosuria moia mo'o na waai haka mea mo'o na to'ora.

¹² Na'i su'usi, 'a ai'a ta dora goro ro'u 'anai ohi na'iei na'i madora ni awarosi. Ma naasi, gaarangi 'iraau hakoi sae nameu ta'i ta'e, rau rabasia moe'a domei hano daara'i moi. Rau rabasia domei ada ma'ata'a na'i 'omaai Finiks, neina mei matai ohi goro baaniai dangi ta'aa. Suria na'i 'isi, 'e ta'i su'u na'i Krit na goro i ohi baaniai ro'a. Suria ni maanai su'u 'a awa tanaai dora na suu ei sina.

Awarosi Raha Na'i Asi

* **27:9 Madora ni awarosi:** Na'i ha'atee ni Grik ra o'ani, "Mana dangi ra suu ho'asi 'ada'i ora-ora'a adaa'i Jiu 'a di'u'a." 'Iraui Jiu ra ha'ato'oai dangi hauasa naasi na'i madora ni awarosi. Naasi 'ia Pol 'a ha'atee o'asi 'anai ha'ata'inia tanaraui sae do 'iraui rau awa'a na'i madora ni awarosi.

13 'E ro'a na ai'a taraa wetewete na uhi hura'a mai miraaui sae tatau'aro na'i haka rau 'adoma'inia do naasi 'a goro 'anai ha'aro'asi na'iei. Rau raua ara'ai huna mameu ha'aro'asia suriai marau Krit.

14 Meugu 'asu'a ma'e ro'a raha† na hura'a mai'a baaniai marau

15 ma to'iai haka. Meu bona matoo 'anai hano suaai ro'a nameugu buna agohe hako. Na'i 'ohasi meu mamasi do ta dora moi naigui ro'asi'ameu 'ari na'iei beiai haka.

16 'Oha meu boi gaarangi'ai gere marau Kaoda, meu taha na'i aba na gere ohi. Meu bonasia do mei nuga ha'agorohiai bwauta anai haka,

17 mameugu 'usura'i nugaa moe'a na'i dora ana. Miraaui sae tatau'aro na'i haka, rau roro'i'i ari gariai haka. Rau magugu 'inia do 'a gasi hakaka. Rau ha'adiohia'i ha'aro'asi mameugu tare, 'inia rau magugu do 'a gasi hane i haka ara'ai hungana ta o'u too na'i odohanai Libia.

18 Na'i nata dangi mana awarosi 'a wetewete di'u mau, marau gaasi'i bori na'i asi baaniai haka.

19 Ma na'i nata dangi ro'u, rau gaasi'i mwani maho rau tagora 'ini'i na'i haka.

20 'E taringai dangi nameu ai'a re'i'i hee'u mana sina. Ni awarosi 'a wetewete di'u moe'a mau, meugu ai'a 'adoma'inia'a domei tahi.

21 'A orea'a mana sae ra ai'a raba ngau, mia Pol 'a 'unuraaui mai sae na'i haka ma o'ani, "Onaa mou ga'i rongosuriau ani, magai awa moi na'i Krit, 'a ga'i bwa'i ta'aa 'oni haka ma bwa'i bori rai gaasia.

22 Ma'ata, moi wa'ewa'e, 'inia 'a bwa'i abe 'ini'amou nai mae. Ni haka moi nai ta'aa.

23 'Inau 'e sae ana God. Na bongi, i enjel ana Godi agua nau tau'aro tanaa 'a ha'amaranga tanaau

24 ma o'ani 'iniau, "Oi abu mamaa'u Pol. 'Oi ura mau na'i maanai Mwaeraha ni Rom. Me 'iniau gorohana God, 'a bwa'i ta ta'i nei na'i hakani nai dodo.'

25 Naasi moi wa'ewa'e mwani sae! 'Au aidangisia do'ia God 'ai haua ha'a-momori maho na duruduru 'inia.

26 Ma'ata 'igaau gai abe ta marau."

27 'E rua sade na ro'a hairiunga'ini'ameu moi na'i Asi Mediterenian. Na'i ta'i tangahuru mana hainai dangi na'i 'ubutanai rodo, 'iraau sae tatau'aro na'i haka rau 'adoma'inia'a domeu gaarangi'ai dora mamata.

28 Rau tohongiai dodo na haua marau sadoia do'e rua tangahuru tahanga. Meu gere awa ro'u wou marau tohongia ro'u ma'e ta'i tangahuru mana rima tahanga moe'a.

29 Marau magugu do haka 'a gasi hane ara'a na'i hungana ta mwaro, marau ha'adiohia'ai hai hauni huna aurui murinai haka. Maraugu ha'arahesi do'ai dangi raurau.

30 'Iraau sae tatau'aro na'i haka, rau raba hora baaniai haka. Rau ha'adiohia'i bwauta na'i asi maraugu ha'i nununa dorai ha'adiohia ta huna ara'ai na'o.

31 Mia Pol 'a o'ani 'inia Julius miraaui tara'i sae hehei'oi, "Onaa 'iraau mwane 'ini rau bwa'i awa hatara'i na'i haka, ma bwa'i abe 'ini'amou nai tahi."

32 Miraaui hehei'oi rau taba mosi'i ari ra ho'osia 'iniau bwauta mana bwauta 'a ai'aa'a wou.

33 Na'i wa'aria, mia Pol 'a ha'a-ta'u'uraui sae dorai ngau. 'A o'ani, "E ta'i tangahuru dangi mana hai namou taraa awa-awa moi mamou ai'a ngau.

† 27:14 **Ro'a raha:** Ra 'unuai ro'a rahasi 'iniau "Iurokuila" na'i ha'atee adaaui.

³⁴ Naasi moi ngau neina mou bwa'i mae 'inia hioro, 'inia 'a bwa'i abe 'ini'amou nai maara ma'ua maesiai dangi ta'aasi."

³⁵ Mia Pol 'a dauai dorai bredi magu ha'atee ha'agorohia God 'inia na'i maadaau hako. 'A uubia magu ngaua.

³⁶ Miraau hako rau arunga goro 'inia maho na hauasia Pol marau ngau ro'u.

³⁷ 'E rua 'arangi mana biu tangahuru mana ono sae nameu awa na'i haka.

³⁸ Na'i 'oha narau masu hako, rau gaasi'i wiit dioi asi 'anai ha'a-mwaheaheai haka.

Haka 'A Abe

³⁹ Na'i haho'oa, miraau sae tatau'aro na'i haka rau re'ia'ai marau maraugu ai'a 'ome 'iraraa. Ma'ata rau re'ia siri su'u na awa iei nunu'u. Marau 'adoma'inia do na'i 'isi narai ha'asirihia iei haka na'i nunu'usi.

⁴⁰ Rau taba mosi'i ari ra daa'i huna mana huna ra ai'a'i wou marau ha'a-auruhi'i baba 'ada'i ta'e muri. Rau ha'a-ara'ahiai bwana anai na'o mameugu taraawa'ai ha'aro'asi siri 'anai one.

⁴¹ 'Oha nameu siri wou mau, na haka 'a arabuu na'i o'u na too ma hasi baabau na'iei. Na na'onai haka 'a ganu dioi nunu'u mana murinai haka 'a hakaka hako 'inia taraa hihidaria anai naho.

⁴² Miraau hehei'oi rau 'adoma'inia dorai ha'amaesiraau nei ra wai'i baaniai rumanih'o, dora gasi oro taraau siri one marai hora.

⁴³ Mia Julius, suria 'a raba ha'atahia Pol, 'a ha'a-abu'araau 'inia maho rau raba hauasi. Ma atenga'inia do 'iraau nei ra matai oro rai rege dioi asi marai oro siri one.

⁴⁴ Miraau nei ra bwabwae oro rai haa'i tara'i wahidai baba ma'uasi tara'i dora 'inia haka marai oro taraau siri one suri'i. Ma naasi here meu haa nameugu ada goro hako 'inia siri na'i one.

28

Na'i Marau i Molta

¹ Na'i 'oha meu ada goro hako na'i one mameugu aidangisia doni marausi ra 'unua 'inia Molta.

² 'Iraau sae ni marausi, rau goro di'u 'ini'ameu. Rau ha'amaoto'ameu marau togaai 'eu tana'ameu, 'inia na'i 'ohasi 'a rangi ma wauni.

³ 'Oha 'ia Pol 'a rahi'i dunga ma nuga'i ara'ai 'eu, 'e mwaa na kakaro hura'a 'inia arunganai raorao anai 'eu ma rete'a na'i rimana Pol.

⁴ Na'i 'oha 'iraau sae ni marausi rau re'iai kurukuru anai mwaasi na'i rimana Pol, marau o'ani 'inirau hairiu, "Ia mo'oni 'e sae hahaingahu naani! Magu rei'uaa na ai'a dodo hura'ai asisi, magu i hi'ona ra 'unua 'inia Hi'ona ni Hihiri, 'a bwa'i ha'awatea do'ai tahi."

⁵ Mia Pol 'a namuta'inia rimana mana mwaa 'a ahoda ara'ai 'eu. Ma ai'a ta maho nai taritari'a beia Pol.

⁶ 'Iraau sae 'isi, rau 'adoma'inia'a do raigu 'ome moi mea Pol 'ai rahuta'i ha'i mae'a dioi ano ma'uasi 'ai su'ui abena. Raugu mamasi wou ma ai'a maho nai to'o marau 'adoma'inia'a do 'ia Pol 'e hi'ona.

⁷ Gaarangi'ai dora na gaasi taraunga'ini'ameu eisi, 'e saemau anai marausi na atana 'ia Pablias 'a to'ora'i mwani mou na'isi. 'Ia mo'osi 'a goro di'u 'ini'ameu, 'a wai'ameu 'ari ruma ana nameu awa beia suriai oru dangi.

⁸ 'Ia mo'osi, amana 'a awa moi na'i be'a, 'a mata'i goni beiai daraniahu. 'Ia Pol 'a 'ariwou beia ma ha'arahesi 'ana. 'A dau wou beia ma goro'a aho'i.

⁹ Ma taraawa'a na'i 'ohasi, 'iraau hako sae ni marausi nara daoha, ra boi beia Pol ma ha'agorohirau aho'i baaniai daoha.

¹⁰ 'Iraaui sae ni marausi rau ha'ahou'ameu di'u marau hisungi'ameu 'ini'i mwane maho. Ma na'i 'oha nameu ha'aagau 'anai hano baaniraaui na'i haka, rau 'a'auhi'ameu 'ini'i mwane mareho nameu 'irisi'i na'i hahano ameeu.

Ta Pol 'A Hano Baaniai Molta

'Anai Rom

¹¹ Meu awa suriai oru hura na'i marau Molta mameugu ta'e na'i haka. Mana haka nameu ta'e eisi 'e haka na ohi na'i Molta na'i madoraa ni awarosi. Ni hakasi 'a boi baaniai Aleksandria na'i Ijip, mara aranununai 'iu hi'ona adaau na'i na'ona.

¹² Meu ada ga'u na'i Sirakius mameu awa 'isi suriai oru dangi.

¹³ Naasi meu hano baaniai Sirakius mameu hano 'anai dora ra 'unua 'iniai Rejam. Na'i nata dangi ma naasi ma ro'a'a hura'a mai, na'i ruanai dangi naasi nameu ada na'i Piutiola.

¹⁴ Na'i 'isi meu heisadoi bei'i tara'i sae hinihini marau 'unua tana'ameu do mei awa ga'u beiraaui. Meu awa 'isi ta'i sade mameugu taraawa'a hatara 'anai Rom.

¹⁵ Tara'i sae hinihini na'i Rom rau rongo tarohameeu ma tara'i nei rau boi heisadoi bei'ameu na'i maketi raha na'i Apias ma tara'i nei na'i dora ra 'unua 'iniai Oru Rumani Mahuara. Ma na'i 'oha 'ia Pol 'a re'iraaui, 'a ha'a-'o'oriai 'adoma'ina ma ha'atee ha'agorohia God.

Ta Pol 'A Awa Na'i Rom

¹⁶ Na'i 'oha meu ada na'i Rom, ra ha'awatea Pol do 'ai awa na'i ruma haaria beiai sae hehei'oi na 'omesuria.

¹⁷ Na'i murinai oru dangi, 'ia Pol 'a soigoniraaui tara'i saemaua adaa'i Jiu nara awa 'isi ma o'ani 'iniraaui, "Mwani sae agu'i, 'inau ra ha'ahuniaui 'inia do 'au here ha'a-ta'airaaui sae agaa'i ma do 'au horosi'i ringeringe adaa'i wauwa agaa'i. Maagu 'inau 'au ai'a. Naia na mahosi 'iraaui sae na'i Jerusalem raugu dauau 'inia marau taranga'inaui'a tanaraaui saemaua adaa'i Rom.

¹⁸ Me 'iraaui Rom rau wana riariaai taha ra ha'ahuniaui 'ini'i marau raba ruhasiaui aho'i, 'inia rau ai'a sadoia ta maho ta'aa nawai haua nau ga'i arari 'inia 'anai mae.

¹⁹ Magu 'iraaui saemaua agaa'i Jiu rau ai'a rabasia o'asi. Me suriai o'asi ana, naia naugu ha'angonia 'inia doni Mwaeraha ni Rom nai hiiriau. Ai'a do 'au raba ha'ahuniraaui sae agu'i na'i Israel 'inia ta maho.

²⁰ Naia nau rabasia 'inia domoi boi mawai maania tana'amoui mahosi. Naia na hinihinia aguai sae na 'igaaui Israel gau hinihinia do'ai boi naragu ho'osiaui 'inia 'ini'i arihau 'ini.'

²¹ Miraaui saemaua adaa'i Jiu na'i Rom rau o'ani, "Ai'a ta maho ta'aa nameu rongoa 'ini'o ma'uasi do ta ai Jiu nai boi 'anai mamaani ha'ata'ai'o. Ma ai'a ta usu-usu ro'u 'ini'o baaniai Jiudea mei daua.

²² Ma'ata 'i'ameu meu raba rongo'i maho na'o hinihini'i. 'Inia 'i'ameu meu aidangisia do 'a ragoi sae suri'i mwani dora hako nara ha'atee ha'ata'ai'ai ruruha na'o awa na'ieisi."

²³ Naasi marau duruai madoraa naraigu boi beia Pol. Ma na'i dangisi, 'a ragoi sae nara taha beia na'i ruma na awa iei. Taraawa'a na'i haho'oa tari su'urahi, 'ia Pol 'a mamaani 'anai bonasia dorai hinihinia Jisas. 'A hadanga'inia tanaraaui heimarungi ana God ma ha'ata'ini'i ro'u tanaraaui dora ra hadanga'inia ieia Jisas na'i rima buka na usu'ia Moses ma suri'i usu-usu adaa'i Rarabea.

²⁴ Tara'i nei 'iniraaui ra hinihinia, ma'ata tara'i nei ra ai'a.

25 Marau taraawa'ai heita'ia haariraau. Ma na'i na'ona maraugu haihanori, 'ia Pol 'a hauai hadahada ha'ahako ana tanaraau, 'a o'ani, "Maho na 'unua i Hi'ona Maea tanaa Aisaea 'anai 'unua tanaraau wauwa agaa'i ra ha'a-momori di'u. 'A o'ani 'inia Aisaea,

26 "Oi 'ari beiraau sae ma'oi 'unua tanaraau o'ani. Rei'uaa moi bahurongo mamoi bahurongo, mamou bwa'i aidangisi'i maho moi rongo'i.

Mamoi wana mamoi wana, mamou bwa'i wana 'irara'i maho mou wanasi'i.

27 Suria 'iraaui sae 'isi, na 'ado'adodaa'i ra baabau mana karingadaa'i ra ai'a raba rongo'i ta maho mana maadaa'i ra kuruha'ini'i.

'Onaa nara ga'i bwa'i o'asi, rau ga'i 'ome 'irara'i maho rau re'i'i 'ini'i maadaa'i,

marau ga'i 'adoma'i tarihadi maho rau rongo'i 'ini'i karingadaa'i,

mana 'adoma'idaa'i 'a ga'i aidangisi'i,

marau ga'i rihota'i mai tanaau

mawai ha'agorohiraau aho'i.' **

28 Magu o'ani a Pol, "Moi aidangisia do taroha goro 'anai tahi tarau beia God 'ai 'ari ro'u tanaraau nei ra ai'a Jiu, miraau rai hinihinia."

29 'Oha 'ia Pol 'agu ha'atee o'asi, 'iraaui Jiu raugu hano marau hauai kae heita'ia haariraau.†

30 'Ia Pol 'a awa na'i 'isi suriai rua harisi na'i ruma ra hohoria ma ha'amaotoraau nei ra bwabwabwahe mai beia.

31 'Iia ai'a maaa'u 'anai hadanga'inia tanaraau Taroha Goro 'abaiai heimarungi ana God ma ha'ausuriraau ro'u 'inia Araha aga Jisas Kraest. Ai'a ta ta'i sae nai ha'abwarasia.

* 28:27 28:26-27 Aisaea 6:9-10 † 28:29 28:29 Tara'i Baebol bwani ra ai'a to'oraai tatarani.

Na Usu-usu Ana Pol Tanaraaui Noni Hinihini Na'i Rom

Gere Mamaani 'Iniai Bukani

Ra'i heisonga'i he'ua na'o to'ora'i na'i taha na'o hinihinia? Na'i Buka Rom 'ia Pol 'a arami'i tara'i kae heisonga'i 'ini'i mareho nagau hinihini'i.

'Ia Pol 'a usuai bukani tanaraaui noni hinihini narau awa na'i Rom. Ai'a 'oha na do 'ia Pol 'ai heisadoi beiraau, ma'ata 'a kae rabasia do'ai garihiraau. Rom naasi kae 'omaa raha na awaiei mwaeraha na marungia hako i gaumani 'anai Rom. Ra ragoi saeni Rom narau hinihini'i mwane hi'ona he'ete'i hairiu. Ma'ata haru nei rau hinihinia Jisas. 'Iraau rau to'ora'i mwane heisonga'i 'iniai tahitahi adaau 'onaai sae hinihini ma 'iniai taha narai haua 'anai raha ara'a na'i tahingadaau beia Jisas Kraest.

Nara 'ini tara'i kae heisonga'i na 'ia Pol na arami'i. 'A 'ua? Na mwane sae hako 'a arari do 'ia God 'ai ha'a-mama'airaau? Ma 'ua? 'Onaa gai haa'i mwani here goro, gau matai daua i tahi tarau 'ini'i? 'E taha nai ha'ata'inia do 'igaau ra'i sae hinihini mora? 'E taha nai 'a'auhigaau 'anai ura bwarasi'i maho ta'a'i nagau 'adoma'iniai haa'i? 'A 'ua? 'Ia God 'agu bwa'i ta'ahigaau'a na'i 'oha nagau haa i maho na ta'aa di'u? 'Ai he'ua i barongagaa'i tanaai nata sae hinihini? Ma 'ai he'ua tanaai nei na ai'a hinihini?

Na'i 'oha na 'oi 'oha'iniai Buka Rom, 'oi sibani'i heiarami 'ada'i heisonga'i 'isi, ma'ua tara'i heisonga'i ro'u na 'oi to'ora'i. 'O'i ha'arahesi ma 'oi ha'angonia God mai 'a'auhi'o 'anai aidangisi'i heiarami 'ada'i heisonga'i 'isi.

Ha'atee Ha'agorohi Ana Pol

¹ 'Inaua Pol, sae tatau'aro ana Jisas Kraest, nau hauai usu-usuni. 'Ia God 'a sigihiau 'anai ha'i Ha'ataari, ma ha'ataariau hura'a 'anai taroha'iniai Taroha Goro.

² Mana Taroha Gorosi naasi Taroha Goro narau bwane ha'atee duruduru mau mai 'inia na'i 'ohabwani narau ha'ateenga'inia i rarabea na'i Usu-usu Maea.

³⁻⁴ Ni Taroha Goro naasi 'e Taroha Goro 'inia Araha aga Jisas Kraest, i garena God na huta mai 'onaai inoni na'i burungana Mwaeraha Deved. Ma 'anai ha'ata'inia do 'iia 'e garena God ha'a-momori, 'ia God 'a ha'a-suruta'ea aho'i baaniai mae 'iniai mena 'anai Hi'ona Maea na wetewete.

⁵ Tarana 'inia Kraest, naasi na 'ia God nagu goro 'iniau ma soiau 'inia dowai ha'i Ha'ataari 'anai heitaroha'i tanaraaui sae suri 'ado marau, marai hinihinia mana araisuria marai ha'aasaa'i atana.

⁶ 'T'amou sae hinihini na'i Rom, 'ia God 'a sigihi'amou ro'u 'anai ha'i sae ana'ia Jisas Kraest.

⁷ Hoita, i usu-usuni 'au haua tana'amou hakoi sae hinihini mou awa na'i Rom. 'Ia God 'a huunai ta'ahi'amou ma 'ome sigihi'amou mamoi ha'i huudi sae ana'i. 'Au ha'arahesi mia God i Amaga, mia Araha aga, 'ia Jisas Kraest, rarui ha'agorohi'amou mararui ha'a-awa ha'agorohi'amou.

'Ia Pol 'A Raba Gaariri Na'i Rom

⁸ Tahamorana, 'au raba ha'arangasia ga'u tana'amou do atamoou 'a taro 'ari suriai mwane dora na'i marewana 'iniai ha'i sae hinihini amou. Naasi 'au ha'atee ha'agorohia God 'iniai 'adonai nei 'ini'amou na'i atana Jisas Kraest.

9 'Inau 'au tau'aro mangudi tanaa God 'anai taroha'inia Taroha Goro 'abaiai Garena. Mia God naasi 'a 'iraraa do 'ado 'oha nau ha'arahesi 'au 'adoma'ini'amou tarau suri'i ha'arahesi agu'i.

10 Ta'i maho nau ha'arahesi waiori 'inia naani, do 'ia God 'ai wateau 'anai 'ari wou gaariri'amou.

11 'Au kaeni 'irisia dowai ada bei'amou neina wai maani'i tara'i mamaani 'inia God tana'amou 'anai ha'arahaa hanehanea ara'a i hinihinimoou.

12 'Inau 'irisia di'u do suri'i hinihinigaa'i 'inau wai 'a'auhi'amou mi'amou moi 'a'auhiau o'asi ro'u.

13 Arai do'ora mana asigu'i, 'au rabasia domoi 'iraraa do ra rago i 'oha nau 'adoma'inia dowai gaariri bei'amou, ma 'au bwara moe'a mau tari 'ohani. 'Au raba 'ari wou bei'amou neina wai heitaroha'i tanaraaui sae 'isi marai hinihini 'onaai haua agua ro'u suri'i tara'i 'omaa adaa'i nei ra ai'a Jiu 'onaaimousi.

14 'Ia God 'a nugaa tanaau i tau'arosi, ma naasi 'au 'adoma'i wetewete dowai taroha'inia ma'ata i Taroha Goro tanaraaui hako mwane noni. Wai heitaroha'i tanaraaui nei ra maramara Grik miraui nei ra ai'a maramara Grik, mawai heitaroha'i ro'u tanaraaui nei ra skuru goro miraui nei rau ai'a.

15 Tarana naasi nau 'adoma'i raorao 'inia 'anai ada bei'amou na'i Rom neina wai taroha'inia ro'u i Taroha Goro tana'amou.

16 'Inau 'au ai'a arunga ninima 'anai taroha'inia Taroha Goro. 'Inia naasi'a i ta'i herehere wetewete na 'ia God 'a haua 'anai ruhasiraui nei ra hinihini. I Taroha naasi 'a ataha ga'u bei'ameu Jiu maagu taha wou bei'amou.

17 I Taroha Gorosi 'a ha'ata'inia tanagiai here na 'ia God na haua 'anai ha'a-odoodoraui noni na'i maana. I hereheresi 'a taraawa'a beiai hinihini ma ha'ahako beiai hinihini 'onaai ha'arangasia ada na'i Usu-usu Maea o'ani, "Iraui nei narau odo-odo na'i maana God suria rau hinihinia, rai to'oraa i huunai tahi."*

Ia God 'A Taesu'a 'Adaui Sae Ora-ora'

18 Mia God ara'ai aro 'a ha'ata'inia taesu'a ana 'adaui inoni ora-ora'a mana inoni ta'ai narau ha'a-bwarasiraui haariraui baaniai huunai ha'ausuringa'i 'inia God.

19 'A ga'i mwada'u tanaraaui 'anai 'irara'i tara'i mareho 'inia God, 'inia 'ia God 'a bwane ha'ata'inia haaria tanaraaui.

20 Taraawa'ana mau mai 'iraui inoni rau 'omesiai aro mana ano mana ngarutanai mareho na'i raroda na 'ia God na ha'apwa'ara'i. I mena mana barongana God nagau bwa'i matai 'omesia, ra ha'ata'i hako suri'i mwane mareho na ha'apwa'ara'i. Naasi 'a bwa'i sae nai pwari'i do ai'a 'iraraa God.

21 Ha'amomori, rau 'iraraa God maraugu ai'a ha'arahesia ma'ua ha'atee ha'agorohia 'ini'i bane na haa'i tanaraaui. Rau hau'i mwane 'adoma'i to'obweubweu'a 'inia God. Naasi ra kuhi wou i 'adoma'idaa'i marau bwara'a i aidangisiai taha na 'ia God 'a rabasia dorai aidangisia.

22 Rau 'unua dorau madoma maraugu bweu.

23 Rau nugasiai huunai God na hauasa ma awa tarau maraugu ha'arahesi'i moi mareho narau aranunudi 'ini'i sae nara matai mae moi. Rau ha'arahesi'i ro'u mareho narau aranunudi 'ini'i manu mana mwaa mana taraani mwamwaa ro'u moi.

24 Naasi 'ia God 'a nugasiraui ma dorai ha'isuri'i 'ado'adodaa'i. Mana 'adoma'idaa'i naasi 'anai hau'i mareho nara ha'aninimai inoni, mana hau'i mwane here wawaasua'a moi 'ini'i abedaa'i hairiu.

25 Rau 'ita'i mareho nara ha'a-momori 'inia God maraugu hinihini'i mareho ra pwari'i moi. Mara ha'arahesi'i mana araisuri'i mareho na

* 1:17 1:17 Habakuk 2:4

'ia God ro'u moi na ha'apwa'ara'i. Rau ai'a ha'arahesia'i huunai God na ha'apwa'ara'i mwane mareho 'isi, na 'iia naasi na ta'isada 'anai ha'aasaa tarau. Amen.

²⁶ Na tarana naasi na 'ia God nagu taarai nugasiraaui 'inia dorai suri'i moi hei'irisidaa'i nara ha'aninimai abe. 'Iraaui urao ra ai'a raba 'ari bei'i saemwane, rau raba 'ari moi bei'i urao.

²⁷ 'Iraaui mwane rau o'asi ro'u, ra ai'a raba 'ari bei'i urao, ra 'adoma'i sisiwa moi 'iniraau'i saemwane. Rau hau'i mareho ha'aninimai noni beiai nata saemwane. Ni ha'a-mama'ai na to'iraausi, naasi heitahari na arariraaui 'ada'i here taritari'a narau haa'i.

²⁸ Na'i 'oha na 'ia God 'a 'iraraa do rau ai'a 'adoma'i ororiu 'anai aidangisia, 'iia 'a nugasiraaui'a. Naasi ni 'adoma'idaa'i ra honu 'iniai ta'aa marau haa'i mareho nara ai'a ta'isada 'anai haa'i.

²⁹ Na tahingadaa'i ra honu 'ini'i ora-ora'a mana mwani maho ta'a'i. Rau hairaurau, rau haa'i here ra arunga ta'a'i 'ini'i nata sae, rau hai'ubwani, rau heingahu, rau awa heheita'ia'a, rau pwapwaari'i, rau ha'ata'airaaui hairiu, rau hadanga'iniai nata abe,

³⁰ rau mamaani ha'ata'aiatai nata sae, rau ha'imae beia God, rau ai'a to'oraai ha'ahou, rau ha'a-ororiuraaui haariraaui di'uraau'i nata sae, rau ha'a-ta'eta'eraaui haariraaui, rau haa'i herehere haoru 'anai haa'i here ta'aa, rau ai'a raba rongo suriraaui amadaa'i mana inadaa'i,

³¹ rau haa'i here nara 'ome to'obweubweu'a, rau hau'i duruduru maraugu ai'a ha'isuri'i, rau ai'a ta'ahiai nata sae mana 'a'auhia ro'u.

³² Rei'uaa narau aidangisia moi doni heitahari na 'ia God na nugaa nadaa'i sae o'asi, naasi mae tarau, miraaui ai'a nugasi'i herengada nara ai'a goro, mara ha'atee ha'a-ta'eta'eraaui sae nara haa'i mareho 'isi.

2

Hihiiri Ana God 'A Odo-odo

Tanaraau Hakoi Inoni

¹ Gasi tara'i nei 'ini'amou mou 'adoma'inia do 'iraaui nei nara haa'i ora-ora'a 'isi rau ta'aa di'u mara ga'i ha'a-mama'airaaui. Ma'ata 'i'amou mou ta'aa o'asi ro'u ma bwara tana'amou 'anai tohe 'inia. 'Oha namou hiiriai nata nei 'ini'i ora-ora'a na haa'i, na hihiiri namou hauasi mou haua ro'u moi tana'amou haari'amou. 'Inia 'imoou mou haa'i ro'u i ora-ora'a namou hiiria 'ini'isi.

² Gau 'iraraa do suria 'ia God 'e God 'anai hihiiri odo-odo, 'iia 'ai ha'a-mama'airaaui nei narau hau'i taritari'a nara tari o'asi.

³ 'A 'ua? Na'i 'oha na 'ia God 'a ha'a-mama'airaaui haru nei 'ini'i taritari'a o'asi nara haa'i, mou 'adoma'inia do 'a bwa'i ha'a-mama'ai'amou na'i 'oha namou hau'i ro'u i taritari'a nara tari o'asi?

⁴ 'Ia God 'a goro 'ini'amou ma 'abenga'i mamasi'amou domoi orisi magu mou 'adoma'i mara maho haaria moi 'iniai goro na haa tana'amou. 'A 'ua? Mou 'iraraai taranai taha na 'ia God na taarai goro 'ini'amou 'inia? 'Inia 'a 'irisia domoi rihosi baani'i ora-ora'a amoo'i!

⁵ Ma'ata 'i'amou mou rongoasa mamougu ai'a raba rihosi. Naasi, na'i here namou hauasi, mou ha'araharaha'a ara'a tana'amou haari'amou i ha'a-mama'ai 'anai madoraa na 'ia God 'ai ha'ata'iniai taesu'a ana. Na'i madoraasi 'iraaui mwane inoni raigui aidangisiai hihiiri odo-odo na 'ia God nai haa tanaraau hakoi mwane inoni.

⁶ 'Iia 'ai taharigiai 'adonai inoni suriai taha gau haa'i.

⁷ 'Ai hauai tahi tarau tanaraau nei ra ura wetewete 'anai hauai taha na odo-odo. Ra awa odo-odo o'asi suria ra rabasia do'ia God 'ai ha'a-ororiuraaui maai ha'atee ha'agorohiraaui maai haua tanaraau tahitahi nai awa tarau.

⁸ Miraau nei narau 'adoma'iniraaui moi haraariraaui, marau 'itaai taha na odo-odo 'anai hauai taha na taritari'a, 'ia God 'ai ha'adiohiaia taesu'a mana ha'a-mama'ai ana hungadaau.

⁹ 'Iia 'ai haa'i mwane mareho ta'a'i mana rongomaata'i tanaraau sae ta'a'i, rei'uaa i'oe 'e ai Jiu ma'ua ai'a.

¹⁰ Miraau nei ra haa'i here odo-odo, 'ia God 'ai ha'a-ororiuraaui ma'ai ha'atee ha'agorohiraaui ma'ai ha'a-awahiraaui goro. 'Ia God 'ai haua o'asi tana'ameui Jiu ma ro'u tana'amou ro'u i nei mou ai'a Jiu.

¹¹ 'Inia na'i maana God, gau ta'isada hako.

¹² 'Irai nei ra ai'a Jiu, 'ia God ai'a hauai Ha'atora tanaraau. Ma rei'uaa na o'asi, 'ia God 'ai ha'a-taariraaui nei nara ora-ora'a na'i dora ni rongomaata'i. Ma'ai hiiriraaui ro'u i Jiu 'ini'i ora-ora'a adaa'i ma'ai hiiriraaui suria Ha'atora.

¹³ Na inoni 'a odo-odo na'i maana God na'i 'oha na ha'isuria hako i taha na Ha'atora na 'unua. Ai'a do 'iraraa ana i Ha'atora na odo-odo 'inia na'i maana God.

¹⁴ 'Irai nei ra ai'a Jiu ra ai'a haua tanaraau i Ha'atora 'anai awasuria. Rei'uaa na o'asi, tara'i nei 'iniraaui ra matai ha'isuria moi taha na 'unua. Naasi 'a ha'ata'inia do ra aidangisia i goro mana ta'aa rei'uaa nara ai'a haua tanaraau Ha'atora.

¹⁵ 'A ha'ata'inia do Ha'atora ra awa na'i tahingadaa'i. Ma na'i 'adoma'idaa'i ro'u, rau matai hiiria 'onaa maho rau haua 'a odo-odo ma'ua 'a taritari'a.

¹⁶ 'Inau 'au bwane ha'arangasia tanaraau sae na'i 'oha nau taroha'inia tanaraau Taroha Goro do'ia God 'ai ha'a-mama'airaaui nei ora-ora'a. 'Ai haua na'i madoraa nai haua tanaa Jisas Kraest i mena 'anai hiiriraaui sae 'ini'i taha rau haa'i mana mareho ta'a'i nara awa bainihu suri'i tahingadaa'i.

'Iraau Jiu Mana Ha'atora

¹⁷ 'Io. 'T'amoui ai Jiu, mou 'u'uriai Ha'atora do naasi mareho na ha'ahagu'amou beia God. Mou ha'aba'o do mou aidangisia goroa God.

¹⁸ 'T'amou mou 'unua domou aidangisiai hei'irisina mamou aidangisia i goro mana ta'aa suria 'i'amou nara ha'ausuri'amou 'inia Ha'atora.

¹⁹ Mou 'adoma'inia do 'i'amou naasi namoi na'otaradaaui nei narau ai'a 'iraraa God, ma mou 'onaa marewa tanaraau nei ra awa na'i kuhi.

²⁰ Mou 'adoma'inia do 'i'amou naasi namoi ha'ausuriraaui nei ra ai'a aidangisia God, miraau nei nara ai'a aidangisi'i mwani maho 'onaa gare. 'Inia mou 'adoma'inia dona mwane aidangi mana taha na ha'a-momori ra boi baaniai Ha'atora namou to'oraasi.

²¹ Hoita. 'Onaa namou ha'ausuriraaui noni o'asi, 'a 'ua namou ai'a ha'isuri'i taha namou ha'ausuriraaui 'ini'i? Mou 'unua do 'a ta'aa i beri. Ma 'ua? 'T'amou mou ai'a beriberi?

²² Mou 'unua tanaraau noni ha'iwai dorai abui taritari'a beia ta nei. Ma 'ua? 'T'amou mou ai'a taritari'a baani'i urao amoo'i? Mou 'unua domou 'ita'i hi'ona nara aranunudi. Mi'amou mou 'ari beri moi suri'i ruma maea adaa'i sae ahurodo na araanunu 'isi ra awa suri'i!

²³ Mou wa'ewa'e 'inia Ha'atora mamougu ha'aninimaia God na'i 'oha namou ai'a araisuria.

²⁴ To'oana na Usu-usu Maea 'a ha'arangasia o'ani, "'T'amoui Jiu, 'iraau nei ra ai'a Jiu rau taarai ha'atee ha'ata'aia God 'inia haa'i amoo'i here nara ai'a odo-odo.'" *

²⁵ I aha ha'ara 'a ha'ata'inia do 'igaau Jiu ra'i inoni ana'ia God. 'Onaa 'o ha'isuriai Ha'atora, ni aha ha'ara 'e mareho goro na matai 'a'auhi'o. Me 'onaa 'o ai'a ha'isuria, 'o ai'a he'ete'i baaniraaui nei narau ai'a dauai ringei aha ha'ara.

* 2:24 2:24 Aisaea 52:5

26 'Onaa 'iraau nei ra ai'a dauai aha ha'ara ra ha'isuriai Ha'atora, 'ia God 'ai 'unua do 'iraau ra'i inoni ana'i ro'u 'onaairaaui nei rau dauai ringei aha ha'ara.

27 Naasi, ni tahingadaa'i nei ra ha'isuriai Ha'atora maraugu ai'a dauai ringei aha ha'ara, ra ha'ata'inia do 'ia God 'ai ha'a-mama'ai'amou. 'Inia 'i'amou namou dauai aha ha'ara mara haua tana'amoui Ha'atora, mamougu ai'a araisuria.

28 Ai'a do awa amua 'onaai ai Jiu ma'o dauai aha ha'ara na'o ha'i huunai saeni Jiu 'inia.

29 'Anai ha'i huunai saeni Jiu na'i maana God, ni tahingamu nai orisi beiai hei'a'auhi anai Hi'ona Maea. Ma naia ro'u naasi huunai here 'anai ha'i noni ana'ia God, ai'a aha ha'ara nara haua moi 'anai abe hasi'o. 'Iraau sae na tahingadaa'i ra orisi o'asi, ra 'irisia do 'ia God naasi nai ha'atee ha'agorohiraau; ai'a 'iraau sae.

3

'Ia God 'A Ha'amomori Tarau

Suri'i Duruduru Ana'i

1 Hoita naasi, 'e taha na goro 'inia ha'i saeni Jiu? Ma 'e taha na goro 'inia aha ha'ara?

2 Ra'i mwane maho na goro 'inia ha'i saeni Jiu. 'Etana, 'ia God 'a hau'i ha'atee ana'i tanaraau Jiu.

3 'A ha'a-momori do 'iraau Jiu rau duruduru 'inia dorai araisuri'i ha'atee ana'i magu tara'i nei ra ai'a. Ma 'ua? Ni o'asi anasi 'ia God 'agu bwa'i hau'a a i taha na duruduru 'inia?

4 Ai'a do 'a o'asi! 'Ia God 'a ha'a-momori tarau suri'i duruduru ana'i rei'uaa na inoni hako ra pwapwaari'i. I Usu-usu Maea 'a ha'ateenga'inia God o'ani, "I ha'atee amu'i, rai aidangisia dora ha'a-momori. Ma 'onaa rai ha'ahuni'o 'inia ta maho, 'oi ha'ata'inia goro hura'a do 'a pwari'i i mareho nara ha'ahuni'o 'inia."*

5 Gasi tara'i nei 'ini'amou rai taraa to'o ha'atee o'ani, "Na'i 'oha 'igaau Jiu gau hau'i mareho ta'a'i, 'a ha'ata'inia goro hura'a do 'ia God 'a odo-odo. Naasi, 'ia God 'a taritari'a na'i 'oha na ha'a-mama'aigaau 'ini'i ora-ora'a agaa'i!"

6 Minau wai o'ani, "Ai'a o'asi! 'Onaa na bwa'i ha'a-mama'aigaau Jiu, ma 'ai he'ua na 'ia God 'aigu arari 'anai hiiriraau noni nai marewana?"

7 Gasi tara'i nei 'ini'amou rai taraa to'o ha'atee o'ani ro'u, "Na pwari'i gau haa'i 'a ha'ata'inia goro tanaraau sae do 'ia God 'a ha'a-momori tarau miraau sae 'isi raigui ha'atee ha'aasaa God 'inia. Naasi 'a ai'a odo-odo do 'ia God 'aigu hiiri ha'a-mama'aigaau ro'u 'ini'i ora-ora'a agaa'i, 'inia 'e mareho goro na hura'a mai baani'i pwari'i na gau haa'i!"

8 'Onaa 'o 'adoma'i o'asi, gasi 'oi taraa to'o ha'atee o'ani ro'u, "Gai haa'i here ta'a'i neina maho goro 'ai hura'a mai." Tara'i sae ra subunia do 'inau 'au ha'ausuriraau sae o'asi. 'A odo-odo do 'ia God 'ai ha'a-mama'airaau.

Mwani Inoni Hako Ra Ora-ora'a

9 'A 'ua? 'Igaau Jiu gau goro baaniraau nei nara ai'a Jiu? Ai'a do 'a o'asi! 'Onaa bwane 'unua agua, gasi i'oe 'e ai Jiu ma'ua ai'a, 'igaau hako gau awa na'i bahainai mena anai ora-ora'a.

10 'Onaa ha'arangasia ada o'ani na'i Usu-usu Maea, "Ai'a ta sae nai odo-odo.

Ai'a! Ai'a ta ta'i sae!

11 Ai'a ta ta'i sae nai huunai aidangisia God,

* 3:4 3:4 Psalm 51:4

- ma'ua bonasiai aidangisia God.
 12 'Iraau hakoi sae ra murisia God.
 Ra ha'i sae ta'a'i.
 Ai'a do ta ta'i 'iniraau na do'ai haua ta maho nai goro.
 Ai'a! Ai'a ta'i nei.†
 13 Maho ra 'unu'i ra ta'a'i di'u 'onaai si'ini ta'a'i nara haa'i sae mae nara ai'a ahuni'i.
 Mana mamaani adaa'i, ra pwari'i hari'ete.
 Ha'atee adaa'i ra matai ha'a-ta'airaau sae,
 'inia ra 'onaai maho haha'amaesi nara awa suri'i ngoodi mwaa ta'a'i.‡
 14 Na ngoodaa'i ra honu 'ini'i hei'isi'isi,
 mana ha'atee 'anai ha'ata'aiatai nata sae.
 15 Rau raurau di'u 'anai ha'amaesi'i sae.
 16 Ta dora rai 'ariei rai ha'a-ta'airaau sae,
 ma'ua ha'a-arungata'airaau.
 17 Rau ai'a 'iraraai here 'anai awa goro beiraaui sae.§
 18 Rau ai'a ginata'inia God,
 ma'uasi ha'ahoua."*
 19 Gau 'iraraa do mwane maho nara awa na'i Ha'atora, ra usu'i tanaraau
 nei ra awa na'i bahainai Ha'atora. Naia na odo-odo 'inia do'ia God 'ai
 hiiriraaui hakoi mwane sae na'i marewana ma bwara do ta sae 'ai 'unua
 do 'ia 'a ai'a ta'aa.
 20 'Inia 'a bwa'i sae nai odo-odo na'i maana God do 'inia suria ana i
 ha'ausuringa'i 'anai Ha'atora. 'Ia God 'a hauai Ha'atora 'anai ha'a-'ome
 'iraraai sae 'ini'i ora-ora'a ana'i.

Herehere Na Haua God

'Anai Ha'a-odoodoi Sae

- 21 Mana'i 'ohani 'ia God 'a ha'ata'inia nata herehere 'anai ha'a-odoodoi
 sae na'i maana. Ai'a 'inia suria ana i Ha'atora, ma'ata 'e herehere nara
 bwani ha'arangasia mau mai na'i Usu-usu Maea.
 22 'Ia God 'a ha'a-odoodogia na'i maana na'i 'oha gau hinihinia do'ia Jisas
 Kraest 'a to'o mena 'anai ruhasi'i ora-ora'a agaa'i baanigia. Namoiwou ta
 sae nai matai hinihinia Jisas, 'inia 'igaau gau ta'isada hako na'i maana God.
 23 'Iraau hakoi mwane inoni ra ora-ora'a mana barongadaa'i ra ai'a gere
 gaarangi tari beiai barongana God na hauasa.
 24 Rei'uaa na o'asi, suriai goro na haua God 'inigia na 'onaai bane, 'a
 'unua dogau odo-odo na'i maana, 'inia Jisas Kraest na ruhasigaau baaniai
 ora-ora'a.
 25-26 Mia God 'a ha'ataaria Jisas 'anai mae 'inigia neina 'ia God 'ai matai
 'adoma'i nugasi'i ora-ora'a agaa'i. 'Ia God 'a ha'a-odoodogia na'i maana na'i
 'oha gau hinihinia do'ia Jisas 'a ha'aaheai 'abuna, ma wateai tahingana
 'inigia. Na'i 'oha i na'o, 'ia God 'a ahumaratanoa beiraaui sae ma ai'a
 ha'a-mama'airaau 'ini'i ora-ora'a adaa'i. Mana'i 'ohani 'a 'onaa do'ia God
 'a ha'a-mama'aia Jisas Kraest 'ini'i ora-ora'a agaa'i. 'Ia God 'a haua o'asi
 'anai ha'ata'inia doni hihiri na haua 'a odo-odo hako ma ro'u 'anai ha'a-
 odoodogia na'i maana 'inia hinihinia agaaua Jisas.
 27 Naasi 'e taha nagai matai ha'aba'o 'inia? 'A bwa'i ta maho! 'Inia 'ia
 God 'a ai'a ha'atahigia baaniai ora-ora'a do 'inia suria agaaua Ha'atora, me
 'inia hinihinia agaaua Jisas Kraest.
 28 Naia na hinihini nagau odo-odo 'inia na'i maana God, ai'a do 'inia
 suria agaaua Ha'atora.

† 3:12 3:10-12 Psalm 14:1-3; 53:1-3; Eccles. 7:20 ‡ 3:13 3:13 Psalm 5:9; 140:3 § 3:17 3:17 Aisaea
 59:7-8 * 3:18 3:18 Psalm 36:1

29 'A 'ua? 'Ia God 'e God ameeu moi Jiu ma'ua 'e God agaau hako? 'Iia 'e God agaau hako,

30 'inia 'e ta'i God moi na awa. 'A to'oraa moi ta'i herehere na'oi matai odo-odo 'inia na'i maana, naasi hinihini, rei'uaa na i'oe 'e ai Jiu ma'ua ai'a.

31 'A 'ua? 'Iniai 'unua agaau doni hinihini moi na ha'atahigaau, gaugu bwa'i rabasia'a i Ha'atora? 'Abwa'i! Gai ha'ahouai Ha'atora 'inia 'i Ha'atora 'a ororiu mau.

4

'Ia Ebrahim 'A Hinihinia God

1 Ma naasi gai 'adoma'i surisuria Ebrahim, i wauwa ameeui Jiu. 'A he'ua i herehere nagu odo-odo 'inia na'i maana God?

2 'Onaa ni here goro na haa'i naasi na odo-odo 'inia na'i maana God, me 'iia 'a to'o marehota 'anai ha'a-ta'eta'ea haaria 'inia. Ma'ata 'ia God 'a ga'i bwa'i matai ha'a-ta'eta'ea 'inia.

3 'Inia ni Usu-usu Maea 'a 'unua o'ani, "Ia Ebrahim 'a hinihinia God. Naasi suriai hinihinina 'iia 'a odo-odo na'i maana."*

4 I ha'a nara horia 'iniai sae na tagora, ai'a ha'a narai hisu pwaranga 'inia, ma'ata 'e ha'a nara taharia 'inia 'iniai tagora na haa.

5 Ma na'i beia God, 'a ai'a haua o'asi tanagaau sae ora-ora'a. 'Inia ai'a do 'iniai tatau'aro goro agaa'i nagu 'unua 'inia God dogau odo-odo na'i maana, me 'iniai hinihinigaau beia. 'Inia 'ia naasi a mo'o na matai ha'a-odoodoi sae ora-ora'a.

6 'Ia Deved 'a ha'arangasia na'i Usu-usu Maea do'ia God 'a ha'a-wa'ewa'erau nei ra odo-odo na'i maana, rei'uaa narau ai'a haa'i mwane tatau'aro goro 'anai ha'a-wa'ewa'ea God 'ini'i. 'Ia Deved 'a o'ani,

7 "Wa'ewa'e tanaraau nei na 'ia God 'a 'adoma'i nugasi'i ora-ora'a adaa'i, ma kaku'a'i mareho taritari'a narau haa'i.

8 Ha'amomori! Wa'ewa'e di'u tanaa mo'o na 'ia God 'agu ai'a 'adoma'ini'i'a aho'i ora-ora'a ana'i."†

9 Ma 'ua? Ni wa'ewa'e na 'ia Deved 'a hadanga'iniasi ra haua moi tanaraau Jiu? Ai'a! Ni wa'ewa'esi tanaraau ro'u i nei ra ai'a Jiu. Gai 'adoma'i surisuria ro'u mau i dorai Usu-usu Maea ani na ha'arangasia do 'ia Ebrahim 'a odo-odo na'i maana God 'iniai hinihinia ana God.

10 Na'i 'oha he'ua na 'ia God 'a ha'arangasia do'ia Ebrahim 'a odo-odo na'i maana? Na'i na'o magu dauai aha ha'ara ma'ua na'i muri? Mau na'i na'o, ai'a na'i muri.

11 Ni aha ha'ara nagu daua na'i murisi, 'e ha'ara moi 'anai ha'ata'inia do 'iia 'a odo-odo na'i maana God 'iniai hinihinia ana 'oha na ai'a aha ha'ara mau. Naasi 'ia Ebrahim 'a ga'i 'onaa do'e ama ma'ua na'otara adaa hako nei ra ai'a dauai aha ha'ara nara hinihinia God neina rai odo-odo na'i maana.

12 Ma'e amadaau ro'u i Jiu nara dauai aha ha'ara. Ai'a do 'iia 'e amadaau 'inia moi daua adaaui aha ha'ara, me 'iniai hinihinia adaaui God 'onaaia Ebrahim na bwani hinihini magu tano'i dauai aha ha'ara.

Ni Duruduru Ana God 'Ai 'Ari Tanaraau

Hakoi Nei Nara Hinihini

13 'Oha 'ia God 'a duruduru tanaa Ebrahim 'anai hauai marewana hako tanaraau warowarona'i, i durudurusi ra ai'a haua tanaa Ebrahim do 'iniai ha'isuria ana i Ha'atora me 'iniai odo-odo ana na'i maana God suriai hinihinina.

* 4:3 4:3 Jenesis 15:6 † 4:8 4:7-8 Psalm 32:1

¹⁴ Do 'onaa na inoni 'a dauai taha na 'ia God na duruduru 'inia suriai ha'isuria ana i Ha'atora, naasi 'a ha'ata'inia do hinihini 'e maho haaria moi, mana duruduru ana God 'a ai'a ororiu.

¹⁵ Ni Ha'atora 'a bwa'i waa mai tanagia i taha na 'ia God na duruduru 'inia. Me 'a matai haua moi ha'a-mama'ai tanaraaui nei narau horosia. 'Onaa na ha'atora 'a ga'i bwa'i awa, 'a bwa'i sae nai horosia ta ha'atora.

¹⁶ Naasi na hinihinina moi noni na matai daua 'inia i taha na 'ia God na duruduru 'inia. 'A o'asi, neina 'ai hisungigaau kongari moi 'inia i taha na duruduru 'inia. I durudurusi 'iaadaau hako i warowarona'i a Ebrahim. Ai'a do 'iaadaau moi warowarona'i a Ebrahim nara awa suri'i Ringe ana'ia Moses. 'Iaadaau ro'u i nei narau ai'a awa na'i bahaidi ringe 'isi maraugu hinihini 'onaaia Ebrahim. 'Inia 'ia Ebrahim 'e wauwa agaau hako.

¹⁷ Naasi 'ado'ado 'anai taha na Usu-usu Maea na 'unua na'i 'oha na 'ia God 'a o'ani 'inia, "Inau wai hau'o 'anai amadaau i mwane burunga hako na'i marewana."‡ Naasi 'ia God 'a ha'a-o'oriai duruduru ana, 'inia Ebrahim 'a hinihinia God na ha'a-suruta'era i nei ra mae, ma matai ha'apwa'ara'i mareho ra ai'a awa ga'u.

¹⁸ Na'i 'oha na 'ia God 'a duruduru tanaa Ebrahim do'ai ha'i ama tanaraau hako i mwane burunga, 'ia Ebrahim 'a hinihinia. Naasi magu o'ani ro'u 'inia Ebrahim, "Na warowaromu'i rai rago 'onaa'i hee'u."§ Rei'uaa na 'ome 'onaa do 'abwa'i to'o i durudurusi, 'ia Ebrahim 'a 'u'uria God do mareho 'isi rai to'o'a ma'ata.

¹⁹ Hinihinina Ebrahim ai'a maemae'a rei'uaa na harisina 'a gaarangi tari'a i ta'i 'arangi, ma rei'uaa nagu ai'a 'ome arari'a do 'aigu matai haua'a ta gare, mana urao ana 'ia Sera 'a 'amara.

²⁰ 'Ia ai'a 'adoma'i heiruarua'a moe'a 'inia i duruduru na haua God tanaa. Ma'ata, na hinihinina 'a raha hanehane ara'a ma ha'atee ha'aasaa God 'inia i duruduru ana.

²¹ 'Inia 'ia Ebrahim 'a huunai 'iraraa goro do'ia God 'ai ha'ato'oa ma'ata i durudurusi.

²² Naia naragu usua 'inia na'i Usu-usu Maea do 'iia 'a odo-odo na'i maana God.

²³ Hoita, mana mareho nara usuasi, ai'a do 'anai 'a'auhia moia Ebrahim,

²⁴ me 'anai 'a'auhigaau ro'u. Ra usua 'anai ha'a-aidangisigaau do 'igaau hako i nei nagau hinihinia God na ha'a-suruta'ea Araha aga Jisas baaniai mae, gai odo-odo ro'u na'i maana.

²⁵ 'Ia God 'a ha'awatea Jisas 'anai mae 'ini'i ora-ora'a aga'a'i ma ha'a-suruta'ea baaniai mae 'anai ha'a-odoodogia na'i maana.

5

Hinihini 'A Haua Tanagiai Wa'ewa'e

¹ Hoita naasi, 'inia i odo-odo agaau na'i maana God 'inia i hinihinia agaau, na'i 'ohani gau hagu goro beia 'inia i maho na 'ia Araha aga Jisas Kraest na haua 'inigia.

² Ma suriai hinihinia agaau Kraest, gau aidangisia'a i goro ana God 'inigia nagau daua na'i 'ohanisi. Magau wa'ewa'e 'inia i 'adoma'i heitotori nagau haua 'anai awa beia God na'i rarahana ta'oha.

³ Gau wa'ewa'e ro'u 'ini'i mwane mareho ha'abooboo abe mana rongomaata'i nagau siri suri'i, 'inia baani'i mareho 'isi gau to'oraai ahumaratanoa.

‡ 4:17 4:17 Jenesis 17:5 § 4:18 4:18 Jenesis 15:5

⁴ Mana to'oraa agaau ahumaratanoa na 'ia God naigu ahugoro 'inia 'inigia. Mana'i 'oha 'ia God 'a ahugoro 'inigia, gau to'oraai 'adoma'i heitotori 'ini'i mareho nai haa'i tanagia.

⁵ Ma na'i 'oha nagau to'oraai 'adoma'i heitotori, gau bwa'i totori pwaranga. 'Inia 'a bwane ha'ata'inia goro i heita'ahi ana tanagia 'oha na ha'ataaria mai Hi'ona Maea 'anai ha'ahonusigia 'iniai heita'ahi ana.

⁶ Mau na'i 'oha gau ora-ora'a magau ha-ha'aroha'a na 'ia God 'a ha'ataaria maia Kraest na'i madoraa na sigihia 'anai mae 'inigia.

⁷ 'E mareho na bwara naasi do ta sae nai mae 'inia ta sae odo-odo, gasi 'ai matai mae moi 'inia ta sae nai huunai odo-odo.

⁸ Ma'ata 'ia God 'a ha'ata'inia tanagiai heita'ahi ana na raha. 'A ha'ataariai garena na mae 'inigiiai inoni ora-ora'a.

⁹ Ma suriai ha'a-odoodogaau ana Kraest na'i maana God 'iniai ahe na haai 'abuna, 'agu ai'a 'ome bwara'a do 'iia 'ai ha'a-dadara'agaau baaniai ha'a-mama'ai ana God.

¹⁰ Na'i na'o, 'oha 'ia Kraest ai'a boi mau, 'igaau gau 'onaai maerongana'ia God. Mia God 'a ha'a-hagugonigaau beia haaria 'iniai mae na haua i garena. Ma naasi, 'ia Kraest 'ai ha'a-dadara'agaau ma'ata'a baaniai ha'a-mama'ai 'iniai tahi aho'i ana.

¹¹ Naasi gai wa'ewa'e, ai'a do 'ini'i moi mareho 'isi, ma ro'u do 'ia God 'a ha'ataaria mai Araha aga Jisas Kraest 'anai ha'a-hagugonigaau beia God.

'Ia Adam Mia Kraest

¹² I ora-ora'a 'a sirimai na'i marewana suriai here ta'aa na haua Adam. Mana'i ora-ora'a naasi na sirimai mae. Tarana 'inia na mwane sae hako rai mae ma'ata, suria ni 'adonai sae hako ra ora-ora'a.

¹³ 'Oha ni Ha'atora ai'a boi mau, 'iraau sae ra bwane ora-ora'a. Mia God 'a ai'a hiiriraa, suria na Ha'atora 'a ai'a awa mau.

¹⁴ Ma rei'uaa na o'asi, sae 'a to'i'araau moi mae, taraawa'a beia Adam tari beia Moses, rei'uaa narau ai'a horosiai ringe na 'ia God haaria na 'unua 'onaai haua ana Adam.

'Ia Adam, na huta na'i na'o, 'e damana maua Kraest nagu huta mai na'i muri.

¹⁵ Ma'ata raru ai'a ta'isada, 'inia i ora-ora'a ana Adam 'a he'ete'i di'u baaniai bane ni 'adoma'i nugasi. 'Inia 'a ha'a-momori doni ora-ora'a ana Adam 'a waia mai mae tanaraau noni. Ma ha'a-momori di'u ro'u wou do ra rago i nei na 'ia God 'a goro 'iniraa ma hauai bane naasi tanaraau. Mia God 'a matai haua o'asi 'iniai goro ana Jisas Kraest 'iniraa.

¹⁶ Wai 'unua ro'u, ni bane ana God 'a ai'a 'onaai ora-ora'a ana Adam. Ni ta'i ora-ora'a ana Adam 'a haai hihiri mana ha'a-mama'ai tanaraau sae, mana bane ana God 'a ha'a-odoodoraau sae na'i maana, rei'uaa nara rago di'ui ora-ora'a narau haa'i.

¹⁷ 'A ha'a-momori do ora-ora'a ana moi ta'i sae na hauai mae tanaraau hako noni. Ma'ata 'a ha'a-momori di'u ro'u wou do 'iraau nei narau wa'ewa'e 'iniai goro ana God 'iniraa marau dauai bane anasia God naasi na ha'a-odoodoraau na'i maana, rai dauai tahi tarau 'inia Jisas Kraest marai heimarungi beia.

¹⁸ Hoita, ora-ora'a na haua Adam 'a hauai hihiri mana ha'a-mama'ai tanaraau hako inoni. Ma'ata, i here odo-odo na haua Kraest 'a ha'a-odoodoraau noni na'i maana God ma haua tanaraau huunai tahi.

¹⁹ Hairaesi na hauai ta'i sae beia God, na haua 'inia i ora-ora'a tanaraau hako mwane inoni. Naasi 'a o'asi ro'u, 'inia 'e ta'i sae na araisuria God, 'a rago i nei narai odo-odo na'i maana God.

²⁰ 'Ia God 'a haua mai Ha'atora do 'iraau noni rai 'ome 'irara'i ora-ora'a adaa'i. Ma'ata rei'uaa na ora-ora'a adaa'i ra rago hanehane ara'a, ni goro ana God 'iniraau 'a raha aharau ro'u ara'a.

²¹ Naasi, na'i na'o, 'iraau sae rau awa na'i bahainai mena anai ora-ora'a ma wairau 'anai mae. Ma na'i 'ohani, gau awa na'i bahainai heita'ahi ana God nagaugu taarai odo-odo 'inia na'i maana ma naia nagaigui taarai daua 'inia tahi tarau. 'Ai o'asi 'inia here na 'ia Jisas Kraest, i Araha aga, na haua 'inigia.

6

Tahi Beia Kraest

¹ Naasi, 'e taha nagai haua? 'A 'ua? Gai ora-ora'a moe'a mai raha hanehane ara'a i goro ana God 'inigia 'oha nai 'adoma'i nugasi'i ora-ora'a 'isi?

² 'Abwa'i! 'Onaa nagaugu ai'a awa'a na'i bahainai mena anai ora-ora'a, ni 'uaana nagaigui ora-ora'a moe'a ro'u mau 'inia?

³ 'A 'ua? Mou kaku'aa doni bwareomaea nagau daua 'a ha'ata'inia dogau ha'i ta'i beia Jisas Kraest? Ma na'i 'oha gau dauai bwareomaea, gau 'onaa dogau mae beia.

⁴ Ha'amomori, 'onaa gau ha'i ta'i beia na'i bwareomaea, 'a 'onaa dora toringigia beia ro'u na'i madoraa na mae, neina rai ha'a-suruta'egia 'anai to'oraai tahinga haoru 'onaa ha'a-suruta'ea ada Kraest baaniai mae 'inia mena na raha ana God i Ama.

⁵ Suria 'igaau 'e ta'i beia Kraest na'i mae na haua, 'ia God 'ai ha'a-suruta'egia ro'u 'onaa haua ana tanaa magai to'oraai tahinga haoru.

⁶ 'Inia 'a 'onaa dora rabu'i tahinga bwani agaa'i beia na'i dadaahoro neina baronga ta'a'i agaa'i rai ai'a'i, neina gaugu bwa'i ha'i sae tatau'aro'a tanaa ora-ora'a.

⁷ 'Inia na'i 'oha gau mae beia Kraest, 'a ruhasigia baaniai mena anai ora-ora'a.

⁸ Ma gau hinihini do suriai mae agaau beia Kraest, 'igaau gai tahi ro'u beia.

⁹ Gau 'iraraa o'asi 'inia 'ia Kraest 'a suruta'e baaniai mae, magu bwa'i mae'a ro'u ta 'oha. I mae, 'agu ai'a to'o mena'a ro'u do 'anai marungia ro'ua Kraest.

¹⁰ 'Ia 'a mae ha'atai moi magu bwa'i mae'a ro'u ta 'oha. Mana mae na haua 'a mae 'anai ha'a-ai'aa'i mena anai ora-ora'a, mana'i 'ohani 'a awa 'anai tau'aro tanaa God.

¹¹ Hoita, 'i'amou mou o'asi ro'u. Mou ga'i aidangisia do 'i'amou mougu ai'a awa'a na'i bahainai mena anai ora-ora'a, mamou awa 'anai tau'aro tanaa God 'inia Jisas Kraest.

¹² Moi abui ha'awateai ora-ora'a 'anai marungiai tahingamoou 'anai hau'i hei'irisi ta'a'i 'anai abe hasi'o.

¹³ Abu ta ta'i dora na'i abemu na'oi watea 'anai haa'i here ta'a'i mana ora-ora'a. Moi ha'awate'amou ha'ibubu tanaa God 'onaa nei na mae ma suruta'e ma dauai tahinga haoru. Na abemoo'i hako moi wate'i tanaa 'anai hauai taha na odo-odo.

¹⁴ Ora-ora'a 'agu ai'a marungi'amou'a, suria 'i'amou mougu ai'a awa'a na'i bahaidi Ringe ana'ia Moses nara ha'abwaraa tana'amou 'anai agoheta'i ora-ora'a. Na'i 'ohani, mou awa na'i bahainai heita'ahi ana God mia God 'a 'a'auhi'amou 'anai awa odo-odo.

Sae Tatau'aro Nara Hauai Taha

Na Odo-odo

15 Naasi gai 'ua? Suria i ai'a marungigaau'a 'anai Ringe ana'ia Moses magau awa'a na'i bahainai heita'ahi ana God, gai ora-ora'a moi? 'Abwa'i!

16 'A 'ua? Mou ai'a aidangisia do 'oha mou sigihiai taha 'anai ha'isuria, naasi taha namou ha'i slev tanaa? 'Onaa mou sigihiai ora-ora'a 'anai awasuria, mamoi dauai mae tarau. Ma 'onaa mou 'ome sigihia God 'anai awasuria, mamoi hauai awaha na odo-odo.

17 'Au ha'atee ha'agorohia God, 'inia na'i na'o mou tau'aro 'onaai slev tanaai ora-ora'a, mana'i 'ohani mou huunai suriai ha'ausuringa'i na haua tana'amoua God.

18 Na'i 'ohani 'ia God 'a ruhasi'amou baaniai ora-ora'a, mamou ha'i sae tatau'aro ana'i nara tau'aro raha 'anai haa'i here nara odo-odo.

19 'Au hauai heiha'auu 'iniaai slev, 'inia 'onaa nau bwa'i, 'ai bwara di'u tana'amou 'anai aidangi tarihanai mareho nau maaniani. Na'i na'o mou wate'i abemoo'i 'anai ha'i slev tanaai ora-ora'a. Mou haa'i mwane here wawaasua'a mamou haa'i mwane mareho ta'a'i he'ete'i hairiu. Naasi, na'i 'ohani mou ga'i wate'i abemoo'i tanaa God 'anai hau'i maho odo-odo neina moi awa maea.

20 Na'i na'o, 'oha namou 'onaai slev tanaai ora-ora'a, mou ai'a 'adoma'i raha 'anai hauai taha na odo-odo.

21 Ma ai'a ta ta'i maho nai goro namoi daua 'ini'i mareho ta'a'i namou haa'i ga'u na'i na'o. Na'i 'ohani mougu ninima 'ini'i mareho 'isi nara matai wai'i sae 'anai mae tarau.

22 Mana'i 'ohani 'ia God 'a ruhasi'amou baaniai mena anai ora-ora'a mamou ha'i sae tatau'aro'a tanaa. Mou haa'i'a i mareho namou awa maea 'ini'i, mana heitahari naasi tahi tarau.

23 I heitaharinai ora-ora'a naasi mae tarau, mana bane ana God na watea dadara'a tanagia, naasi tahi tarau 'inia Jisas Kraest, 'ia Araha aga.

7

Heiha'auu 'Iniai Ha'iwai

1 Arai do'ora mana asigu'i, 'au 'iraraa domoi aidangisiai mareho na 'inau wai maani'ini, suria 'i'amou hako mou aidangisi'i ringeringe 'anai gaumani. Mou 'iraraa do na sae 'a awa na'i bahainai ringe na'i madoraa na tahi mau na'i marewana.

2 Wai haua ta heiha'auu tana'amou 'iniaai ha'iwai. Na'i 'oha na urao 'a wainai mwane, ni ringe 'a 'unua do 'ai awa tarau beiai mwane ana. Tari na'i 'oha na mwane ana 'a mae, naasi 'agu dadara'a aho'i baaniai ringei ha'iwai.

3 Ma 'onaa na urao ha'iwaishi 'a awa beiai mwane he'ete'i 'oha na mwane ana 'a tahi mau, 'iia 'a taritari'a baaniai mwane ana. Ma'ata 'onaa mwane ana 'a mae, 'iia 'a dadara'a baaniai ringei ha'iwai. Ma 'onaa 'ai ha'iwai he'ete'i, 'a ai'a here taritari'a baaniai mwane ana.

4 Naasi 'a o'asi ro'u tana'amou, arai do'ora mana asigu'i. Na'i 'ohani mou dadara'a baaniai Ringe ana'ia Moses, 'inia 'a 'onaa domou mae beia Kraest na'i dadaahoro. Ma naasi, mou matai hasi wou beiai nata sae, 'ia Kraest nara ha'a-suruta'ea baaniai mae. 'Ia God 'a ha'a-dadara'agia neina gai haa'i mwane here goro marai ha'aasaa God 'ini'i.

5 Na'i na'o gau araisuri'i hei'irisi ta'aa agaa'i. Mana mareho na Ringe ana'ia Moses ra ha'aabu'i, naasi mareho ta'a'i nagau 'adoma'i wetewete 'anai haa'i 'ini'i abegaa'i. Mana mareho ta'a'i 'isi ra hoaigia baania God.

6 Me na'i 'ohani 'ia God 'a ruhasigia baani'i Ringe nara ho'osigia magau dadara'a baani'i, 'inia ni tahinga bwani agaa'i ra mae'a. Na'i 'ohani, gau tau'aro tanaa God suriai herehere haoru. Gau tau'aro suriai hei'irisinai Hi'ona Maea, ai'a suriai Ringe ana'ia Moses.

Ni Ringe Ra Ha'ata'iniai Ora-ora'a

⁷ Naasi, 'a 'ua? Mou 'adoma'inia do 'inau 'au 'unua doni Ringe ana'ia Moses ra ta'a'i? Ai'a do 'a o'asi! Naia na Ringe naasi na ha'ata'inia do 'inau 'e ora-ora'a nau haa. 'Au ga'i bwa'i 'iraraa do naga 'a taritari'a 'onaa ni Ringe 'a ga'i bwa'i rangasia o'ani, "'Oi abui naga."

⁸ Ma'ata, 'oha nau aidangisia do 'ia God 'a ha'aabuai naga, na'i 'ohasi 'a 'onaa doni ora-ora'a 'a ha'asirihi'i mai mwane hei'irisi ta'a'i na'i 'adoma'igu mau naga'a. 'Onaa ni Ha'atora 'a ga'i bwa'i awa, ni 'ado'ado 'anai hauai ora-ora'a 'a ga'i bwa'i awa ro'u.

⁹ Na'i na'o, 'oha nau ai'a 'iraraa mau i taha naasi Ha'atora, nau ai'a arunga 'ino'a 'inia ta maho. Ma'ata na'i 'oha naugu aidangisiai Ha'atora, ni ora-ora'a 'a taraawa'a tau'aro wetewete na'i tahingagu ma hoaiiu baania God 'onaai sae na mae.

¹⁰ Naasi Ha'atora ana God na ga'i ha'ata'inia tanaau i tara 'anai tahi tarau, nagu hoaiiu baania God.

¹¹ 'A 'onaa doni ora-ora'a 'a pwari'iau do 'inau 'au matai araisuria moi Ha'atora rei'uaa na 'ia God 'a bwa'i 'a'auhiau. I ora-ora'a 'a ha'atau'aroai Ha'atora 'anai ha'a-'ino'aau neina wai heihoa baania God.

¹² Ma'ata, ni Ringe ana'ia Moses mana Ha'atora ra maea mara goro mara odo-odo.

¹³ Ma 'ua? Naia na Ha'atora gorosi na hoaiiu baania God? Ai'a do 'a o'asi! Naia na ora-ora'a na ha'atau'aroai Ha'atora naugu taarai heihoa 'inia baania God. Naasi gau rei'iai he'uai ta'aa anai ora-ora'a. 'A ha'atau'aroai Ha'atora ana God 'anai hauai hereta'aa ma ha'ata'inia doni ora-ora'a 'e mareho na ta'aa di'u ro'u wou.

Hei'oi Beiai Ora-ora'a

¹⁴ Ni Ringe ana'ia Moses ra goro 'inia ra boi baaniai Hi'ona Maea. Me 'inau 'au matai hauai ta'aa 'inia 'inau 'e inoni moi. 'Au awa na'i bahainai heimarungi anai ora-ora'a mau tau'aro tanaa 'onaai slev.

¹⁵ 'Inau 'au ai'a huunai aidangisia taranai taha naugu taarai hau'i 'ini'i mareho nau haa'i, 'inia 'au 'adoma'i wetewete 'anai haa'i maho ra odo-odo maugu ai'a haa'i. Mana here na 'inau 'au 'ita'i, naasi naugu hahaa'i.

¹⁶ 'Au 'iraraa goro do here nau haa'i ra ai'a odo-odo, naasi 'a ha'ata'inia do 'inau 'au 'adoma'i aratara ro'u 'inia doni Ringe ana'ia Moses ra goro.

¹⁷ Naasi, ai'a do naia na 'adoma'igu haraariau nau haua 'inia, ma'ata naia na ora-ora'a na awa na'i raromagu na ha'ahauau 'inia.

¹⁸ 'Inau 'au 'iraraa do 'a bwa'i ta maho goro nawai haua 'oha nau suri'i hei'irisigu'i haariau. Rei'uaa nawai raba haua ta maho goro ma 'au bwa'i matai haua mwada'u.

¹⁹ Na'i 'oha nau 'adoma'i wetewete 'anai hauai maho goro, 'a bwara di'u tanaau 'anai haua. Mana'i 'oha nau bonasia do wai abui hauai here na ta'aa, naia naugu hahaa 'inia.

²⁰ Ma'ata, 'onaa nau hauai here nau ai'a raba haua, ai'a do 'inau nau haua, naia na ora-ora'a na awa beiausi na ha'ahauau 'iniasi.

²¹ Naasi 'e maho na o'asi'a. 'Oha nawai 'adoma'i wetewete 'anai haai maho goro nau ga'i haua, 'augu haua moi maho ta'aa nau ga'i bwa'i haua.

²² Ni tahingagu hako 'a wa'ewa'e 'ini'i Ha'atora ana'ia God mau raba araisuri'i mora.

²³ Maagu 'e mareho he'ete'i ro'u na tau'aro na'i tahingagu na ha'abwarabwaraai 'adoma'igu 'anai araisuri'i Ha'atora 'isi. Naia na ora-ora'a na hei'oi bwarasiai goro, ma naia naugu taarai tau'aro 'onaai slev 'inia tanaai ora-ora'a na awa na'i tahingagu.

²⁴ Ha'arohaiu di'u! 'Iatei naigu ruhasiau baaniai ora-ora'a na awa na'i abegu na waiauni 'anai mae tarau?

²⁵ 'Au ha'atee ha'agorohia God, 'inia na heiarami 'anai mahosi a Jisas Kraest, Araha aga.

Naasi mou aidangi tarihana'a. Na'i 'adoma'igu hako 'au raba araisuri'i Ha'atora ana'ia God. Me 'iniai hei'irisi ta'aa nara awa beiau, naugu taarai ha'i slev 'inia tanaai ora-ora'a.

8

Awasuriai Hei'irisiinai Hi'ona Maea

¹ Naasi, tanagaau nei nagau hagu beia Jisas Kraest, 'ia God 'a bwa'i hiiri ha'a-mama'aigia.

² 'Iniai hagu agaau beia Jisas Kraest, na Hi'ona Maea 'a haua tanagia i tahinga haoru ma ruhasigia baaniai mena anai ora-ora'a na waigia 'anai mae tarau.

³ I Ringe ana'ia Moses ra bwa'i ruhasigaau mwada'u suria ra ai'a wetewete arari 'anai ha'aheho'i hei'irisi ta'aa agaa'i. Ma'ata 'ia God 'a 'adoma'iniai here he'ete'i 'anai ruhasigia. 'A ha'ataaria mai ta'i garena 'ia Jisas Kraest na boi 'onaai noni. 'A watea mai do'ai mae 'onaai ho'asi 'anai ha'a-ai'a'i ora-ora'a agaa'i. Ma 'iniai heresi, 'a ha'a-ai'aa'i mena anai ora-ora'a na marungigia.

⁴ 'Ia God 'a haua o'asi dogai hauai awaha na odo-odo na Ha'atora 'a atenga'inia. Na'i 'ohani gau matai awa odo-odo o'asi suria gau ai'a araisuri'i'a i hei'irisi ta'aa agaa'i, gau awasuriai Hi'ona Maea.

⁵ 'Iraui nei nara araisuri'i hei'irisi ta'aa adaa'i, rau 'adoma'i raorao 'anai hau'i moi mareho ta'a'i na abe hasi'o na 'irisia. Miraau nei rau awasuriai Hi'ona Maea, rau 'adoma'i raorao 'anai haa'i mareho na Hi'ona Maea na 'irisia.

⁶ 'Iatei na wateai hei'irisi ta'aa 'anai na'otarana, i heitahari naasi mae tarau. Mia tei na wateai Hi'ona Maea 'anai na'otarana, 'ai daua nana i tahi tarau ma 'ai hagu goro aho'i beia God.

⁷ 'Iatei na wateai hei'irisi ta'aa 'anai na'otarana, 'a ha'imaie beia God, 'inia 'a kakawata'i araisuriai Ha'atora ana God. Me 'onaa naigui raba araisuriai Ha'atora ana God, 'ai bwara ro'u tanaa 'anai araisuria.

⁸ Tarana naasi, 'irai nei nara araisuriai hei'irisi ta'aa adaa'i, ra bwa'i matai ha'a-wa'ewa'ea God.

⁹ Ma'ata 'i'amou mougu ai'a araisuri'i'a i hei'irisi ta'aa amoo'i, mou awasuriai Hi'ona Maea 'onaa 'a ha'a-momori doni Hi'ona Maea ana God na awa suri'i raromoo'i. Ma moi aidangisia do 'iatei na ai'a to'oraai Hi'ona Maea na ha'ataaria maia Kraest, 'ia Kraest 'a ai'a to'oraa mo'osi.

¹⁰ Ma'ata 'i'amou, suriai to'oraa amooua Kraest suri'i tahingamoo'i, rei'uaa na abemoo'i ra mae 'iniai ora-ora'a na haua Adam, ma'ata ni aungamoo'i rai tahi mau, 'inia 'ia God 'a bwane 'unua domou odo-odo'a na'i maana.

¹¹ 'Ia God 'a ha'a-suruta'ea Jisas baaniai mae mana Hi'ona Maea ana 'a awa na'i raromoo'i. Ha'amomori, 'ia God 'a ha'atahia aho'i a Kraest baaniai mae. Ma naasi 'ai ha'atahi'i aho'i ro'u i abemoo'i nara matai mae 'inia mena anai Hi'ona Maeasi na awa bei'amou.

¹² Naasi arai do'ora mana asigu'i, 'e mareho na awa tanagaau 'anai haua tanaa God. Naasi 'anai awasuriai Hi'ona Maea, ai'a 'anai suri'i hei'irisi ta'aa agaa'i.

¹³ 'Onaa namoi araisuriai hei'irisi ta'aa amoo'i, mamoi dauai mae tarau. Ma 'onaa moi ha'awateai Hi'ona Maea maai 'a'auhi'amou 'anai nugasi'i baronga ta'a'i amoo'i, mamoi to'oraai tahi tarau.

¹⁴ 'Iraaui nei na Hi'ona Maea ana God 'a na'otaradaau, rai ha'i gare ana'ia God.

¹⁵ I Hi'ona Maea nagau daua na'i tahingaga 'a ai'a 'anai ha'amamaa'usigaau 'onaai sae tatau'aro na mamaa'usiai bwauodo ana. Ma'ata, na Hi'ona Maea 'a haugia 'anai ha'i gare ana'ia God. Ma 'iniaai awa ana beigaau nagau matai totoro 'inia hura'a tanaa God o'ani, "Mama."

¹⁶ I Hi'ona Maea naasi na ha'a-o'ori'i 'adoma'igaa'i do 'igaau ra'i gare ana'ia God.

¹⁷ Ma suria 'igaau ra'i gare ana'i, gai dau'i mwane mareho goro na duruduru 'ini'i a God tanaraaui noni ana'i. Magai daua ro'u i taha na 'ia God 'a duruduru 'inia tanaa Kraest. Me 'iniaai rongomaata'i agaau 'onaai rongomaata'i ana Kraest, 'ia God 'ai waigia ara'a ro'u 'anai ha'ahauasagia goni beia Kraest.

Tahinga Haoru Ta'oha

¹⁸ Au 'iraraa doni rongomaata'i nagau haua na'i 'ohanisi 'e maho haaria moi 'oha nau 'adoma'i suria do'ia God 'aigui waigaau ara'a 'anai ha'ahauasagia ta 'oha.

¹⁹ Mwane mareho na 'ia God 'a ha'apwa'ara'i na'i marewanani ra mamasi beiai 'adoma'i wetewete moe'a mau 'anai 'omesiai 'oha na 'ia God 'ai ha'ahauasaraaui gare ana'i.

²⁰ Me na'i 'ohani, mwane maho na 'ia God 'a ha'apwa'ara'i ra matai mae ma'ua ta'a'i. Ma ai'a do 'a o'asi suriai hei'irisi adaa'i haari'i, 'ia God na 'irisia o'asi. Mana mwane mareho 'isi ra 'adoma'i heitotori 'iniaai madoraa

²¹ na 'ia God 'ai ruhasi'i baaniai mae mana ta'aa marai awa dadara'a 'onaai awa dadara'a nara haa'i huudi gare ana'ia God.

²² 'Onaai aidangisia aga, taraawa'a mau mai tari 'ohani, mwane maho na ha'apwa'ara'i a God na'i marewana 'a 'onaa dora mamasi ha'i rongomaata'i, 'onaai urao pote na mamasi ha'i rongomaata'i 'anai ha'ahutaai gare.

²³ Ma ai'a do marewana moi haaria na mamasi ha'i rongomaata'i o'asi. 'Igaau ro'u i nei nagau dauai Hi'ona Maea 'onaai 'etanai bane na duruduru 'inia God tanagia, gau mamasi ha'i rongomaata'i ro'u. Gau 'adoma'i wetewete 'iniaai madoraa 'ia God 'ai ha'arangasia hura'a do 'igaau huudi gare ana'i, ma'ai haa'i ro'u abe haoru tanagia.

²⁴ Ma naasi 'iniaai ruhasigaau ana God, 'igaau gau to'oraai 'adoma'i heimamasi 'iniaai 'oha narai to'o i mareho goro 'isi. Ma 'onaa gau ga'i bwane dauai taha gau 'adoma'i heimamasi 'inia, naasi ai'a ta'isada do gai 'adoma'i heimamasi mau 'inia. 'Inia 'a bwa'i nei nai 'adoma'i heimamasi 'iniaai taha na 'iia 'a bwane daua.

²⁵ Ma'ata 'igaau ai'a daua mau i taha nagau 'adoma'i heimamasi 'ana, naasi 'igaau gai 'abenga'i mamasi moi tari 'oha nagaigui daa.

²⁶ Mana Hi'ona Maea 'a awa 'anai 'a'auhigia ro'u suri'i maemae'a agaa'i. Rei'uaa gau ai'a 'iraraai ha'arahesi he'ua nagai haua, ma'ua 'e taha gai ha'arahesi 'ana, me na Hi'ona Maea nai ha'arahesi wetewete taraga. 'A bonga'inia God 'ini'i ha'atee na sae 'a bwa'i matai haa'i.

²⁷ 'Ia God 'a aidangisi'i hako i 'adoma'igaa'i ma 'iraraa ro'u i 'adoma'inai Hi'ona Maea. 'A 'iraraa doni Hi'ona Maea 'a ha'arahesi wetewete taragaau i noni maea ana'i, suriai hei'irisina God.

²⁸ Gau 'iraraa do mwane mareho nara to'o tanaraaui nei nara ta'ahia God, 'ia God 'a tatau'aro suri'i 'anai 'a'auhiraau. Neiraausi nei na 'ome sigihiraau suriai 'ado'ado na to'oraa nadaau.

²⁹ 'Ia God 'a bwane 'irararaau mau mai nei ana'i, ma 'adoma'i nunuga 'iniraaui dorai 'onaai Garena. 'A haua o'asi, neina Garena 'ai 'onaai gare tahamora 'iniraaui mwane ha'ido'orada mana ha'iasida.

³⁰ Ma naasi 'iraaui nei na 'ia God 'a bwane 'adoma'i nunuga 'iniraaui, 'ia God 'a 'ome sigihiraaui ma ha'arangasia hura'a dorau odo-odo'a na'i maana ma durua do ta 'oha 'ai wairaaui ara'ai aro 'anai ha'ahauasaraau.

'A Bwa'i Ta Maho Nai Hoaigaau

Baaniai Heita'ahi Ana God

³¹ 'Oha gau 'adoma'i surisuri'i mwane maho goro 'isi, gau aidangisia do 'onaa 'ia God na aba beigaau, 'a bwa'i ta sae nai matai ha'ahehogaaui.

³² 'Ia ai'a ha'aabuui ta'i garena otohoo, ma'ata 'a watea dadara'a 'anai mae 'inigia. Naasi 'a ha'ata'inia do na mwane mareho goro 'a matai wate'i hako ro'u o'asi tanagia!

³³ 'A 'ua? 'Iatei na ga'i matai ha'ahunigaau nei na 'ia God 'a 'ome sigihigaau 'inia ta maho? 'A bwa'i ta sae, suria 'iia 'a bwane ha'arangasia hura'a do gau odo-odo'a na'i maana.

³⁴ Ma 'ua? 'Iatei na ga'i matai hiiri ha'a-mama'aigia? 'A bwa'i ta sae! 'Inia 'ia Jisas Kraest 'a mae taraga mara ha'a-suruta'ea aho'i ma heinagu na'i dora ororiu na'i aba odona God ma bonga'inia 'anai 'a'auhigia.

³⁵ 'E taha na matai hoaigia baaniai heita'ahi ana Kraest? 'A bwa'i ta maho! 'Ia Kraest 'ai ta'ahigia tarau rei'uaa gau awa na'i madoraa bwara, ma'ua na'i raronai rongomaata'i, ma'ua na'i 'oha ra norata'aigia, ma'ua na'i madoraa ni hioro, ma'ua na'i 'oha gau pohara, ma'ua na'i 'uruhanai maemaeha ma'ua na'i 'oha ra ha'a-mamaa'usigia 'iniai mae!

³⁶ Rai ha'ata'aigaau o'asi, 'iniai Usu-usu Maea 'a ha'arangasia o'ani, "Tarana i'oe nameugu waiburuhia 'iniai mae 'ado dangi, mara here 'onaai'ameu 'onaai siip nara ha'aagau 'anai ngahuia."*

³⁷ Na'i 'uruhanai mwane mareho ta'aa nagau siri suri'i, 'igaau gau bwa'i heho, 'inia 'ia Kraest na ta'ahigia.

³⁸ 'Inau 'au huunai 'iraraa goro do 'a bwa'i ta maho nai matai hoaigia baaniai heita'ahi ana God. Rei'uaa gau tahi ma'ua mae ma bwa'i ro'u. 'A bwa'i do ta maho nai to'o dangini ma'ua maho nai to'o mau nai matai hoaigia baaniai heita'ahi ana God. Bwa'i ta enjel ma'ua adaro ma'ua mareho nara mena.

³⁹ Bwa'i ta maho na to'o mena ara'ai aro marawa ma'ua dioi ano, ma bwa'i ta maho'a ro'u na'i raronai ha'apwa'ara nai matai hoaigia baaniai heita'ahi ana God na ha'ata'inia beia Araha aga 'ia Jisas Kraest.

9

'Iraaui Inoni Nai Israel

Ra Gagata'inia Kraest

¹ 'Inau 'au ha'a-momori, 'au ai'a pwari'i 'inia 'inau 'iaana Kraest. I Hi'ona Maea 'a marungiai tahingagu, naasi nau 'unua 'inia do 'au ai'a pwari'i 'oha nau 'unua do

² 'au ahutotou di'u ma ta'aa di'u i 'adoma'igu 'iniraaui do'oragu'i mana asigu'i, 'iraaui Jiu, suria ra gagata'inia Kraest.

³ 'Onaa 'a ga'i mwada'u, 'au 'adoma'inia do'ia God 'a ga'i ha'a-mama'aiau ma'ua 'ai hoaiiu baania Kraest 'onaa naasi here na ga'i matai 'a'auhiraaui 'inia i Jiu, 'iraaui noni agu'i, 'anai hinihinia Kraest.

⁴ 'Iraaui saeni Israel 'isi naasi na 'ia God na 'ome sigihiraaui ma wairaaui 'onaai huunai gare ana'i. 'Iraaui naasi narau re'iai rarahana mana mena ana God. Miraaui na 'ia God na haa'i duruduru beiraaui ma hau'i Ringe ana'i

* 8:36 8:36 Psalm 44:22

tanaraau. Miraau na 'ia God 'a ha'a-aidangisiraau 'inia huunai herehere 'anai rihunga'i ma haa'i duruduru tanaraau do'ai 'a'auhiraau.

⁵ Miraau wauwa adaa'i, ra'i saemaua 'onaaiasi a Ebrahim, Aisak, mia Jekop. Mia Kraest ro'u 'a huta mai 'onaai noni na'i burungadaau. 'Iia naasi God na marungi'i mwane mareho hako. Gaau magai ha'a-aneanea taraua God. Amen!

⁶ Hoita. Rei'uaa ra ragoi Jiu nara gagata'inia Kraest, 'a ai'a do 'ia God 'a kaku'aa'i duruduru ana tanaraau 'anai ha'agorohiraau. 'A ha'ato'oa, ma'ata ai'a do 'iraau hako'i nei ra huta na'i burungadaau Jiu narau ha'i huunai Jiu.

⁷ Ma ai'a do 'iraau hako'i pwirana'i a Ebrahim narau ha'i huunai pwirana'i. 'Inia rei'uaa na 'ia Ebrahim 'agu to'ora'i tara'i gare ro'u, 'ia God 'a o'ani 'inia, "I huudi pwiramu'i rai hura'a mai baaniai burungana Aisak."

⁸ Ma naasi 'a ai'a do 'iraau hako'i nei ra huta na'i burungana Ebrahim narau ha'i huunai gare ana'ia God. 'Iraau moi nei narau to'oraai hinihina 'onaai hinihiniasi a Ebrahim 'oha na hinihiniai duruduru ana God tanaa, narau ha'i huunai pwirana'i a Ebrahim.

⁹ Naani duruduru na 'ia God 'a hua tanaa Ebrahim 'abaia Aisak. 'A o'ani, "Na'i huunai madoraa 'ana, wai boi aho'i bei'o mia Sera 'ai to'ora ta gare mwane."

¹⁰ Ma ai'a do namoisi ta'i mamaani na ha'arangasia hura'a i 'ome sigihi na haa God na'i 'oha na sigihiraau noni. Moisu 'adoma'inia ro'u i mamaani 'inia rua 'iu anasi wauwa agaaua Aisak mana urao ana, 'ia Rebeka.

¹¹⁻¹² Na'i na'o ma rarugu huta i rua gare mwanesi, 'ia God 'a o'ani 'inia Rebeka, "I gare na hutai na'o nai tau'aro tanaai gare na hutai muri."* Na'i 'ohasi raru ai'a hua mau ta here goro ma'ua ta here ta'aa. Naasi 'a ha'ata'inia do na nei na 'ia God 'a 'ome sigihia, 'a 'ome sigihia suriai hei'irisina haraaria, ai'a do 'a 'ome sigihia 'inia taha na hua na goro ma'ua ta'aa.

¹³ Tarana naia na Usu-usu Maea 'a ha'arangasia o'ani 'inia, "Inau 'au 'ome sigihia Jekop, mau dingaia Iso."

¹⁴ 'E taha nagai matai 'unua 'inia here na hauasi a God? 'A odo-odo ma'ua 'a ai'a? 'A odo-odo ha'atai.

¹⁵ 'inia 'ia God 'a ha'atee o'ani 'inia Moses, "Inau wai 'ome sigihiai nei nawai raba sigihia, minau wai 'ome sigihiai nei nawai arunga ta'ahia."†

¹⁶ Ma naasi gau re'ia do 'ia God 'a ai'a 'ome sigihiraau noni suri'i hei'irisidaa'i ma'ua suri'i here nara haa'i. 'Ia God 'a 'ome sigihiraau suriai arunga ta'ahiraau na hua.

¹⁷ 'Inia na'i Usu-usu Maea 'ia Moses 'a usua do'ia God 'a 'unua tanaai Mwaeraha ni Ijip o'ani, "Inau 'au 'ome sigihi'o 'anai mwaeraha do 'inia rongoasa na'o haa, ni mena agua 'ai ha'ata'i hura'a mana atagu 'ai taro 'ari suriai marewana hako."‡

¹⁸ Naasi na mwane maho hako 'a 'ari suriai hei'irisina God. 'Onaa 'ai raba arunga ta'ahiraau sae ma'ai arunga ta'ahiraau, ma 'onaa 'a rabasia dorai rongoasa, ma'ai ha'a-rongoasaraau 'onaai Mwaeraha ni Ijip ani.

Heita'ahi Mana Taesu'a Ana God

¹⁹ Gasi tanei 'ini'amou 'ai taraa to'o ha'atee o'ani, "Onaa mwane mareho hako gau haa'i ra 'ari moi suriai hei'irisina God, 'a ga'i bwa'i hiirigaau ro'u 'ini'i taritari'a agaa'i! 'Inia taritari'a agaa'i ra 'ari moi ro'u suriai hei'irisina."

* 9:11-12 9:11-12 Jenesis 25:23 † 9:15 9:15 Eksodas 33:19 ‡ 9:17 9:17 Eksodas 9:16

²⁰ Wai 'unua tana'o do'ora. 'O 'adoma'inia do i'oe 'iatei na'o ha'atee o'asi 'inia tanaa God? 'Igaau ra'i inoni moi ai'a ta'isada 'anai ha'atee o'asi. I rabo'o 'a bwa'i matai ha'atee o'ani 'inia mo'o na tau'arona, "A 'ua na'o ai'a tau'arogu 'onaai nei wou 'ani?"

²¹ 'Ia mo'o na tau'arodi rabo'o 'a 'ari moi suriai 'adoma'ina haaria. 'Onaa 'ai raba tau'arona ta rua rabo'o he'ete'i hairiu 'inia moi ta'i bahoroi bou ma'ai matai haua moi 'onaai 'irisia na haa. Gasi ta ta'i nei nai reoreoa maai haua 'ada'i mareho ororiu mana nata nei 'anai here namoiwou 'inia.

²² 'A ta'isada goro o'asi ro'u beia God. 'Iia 'a matai haua moi taha na 'adoma'iniai haua. 'Iia 'a matai ha'ata'iniai taesu'a ana mana mena ana tanaraau nei nara haa'i here ta'a'i. Ma'ata 'iia 'a matai ahumaratanoa ro'u beiraaui nei na taesu'a 'adaau na ha'aagau 'anai ha'a-ai'araau.

²³ 'A matai haua o'asi 'anai ha'ata'iniai goro ana na raha tanaraau nei na arunga ta'ahiraau ma bwane 'adoma'i nunuga 'iniraau do 'ai ha'ahausaraau ara'ai aro.

²⁴ 'Igaau naasi inoni na 'ia God na 'ome sigihiraaui. 'A ai'a 'ome sigihi moi baaniraau Jiu, me 'a 'ome sigihi baaniraau ro'u i nei nara ai'a Jiu.

²⁵ Tana'amoui nei namou ai'a Jiu, naani taha na 'unua God na ha'arangasia Rarabea Hosea. 'A 'unua o'ani,

"Iraaui nei nau ai'a 'ome sigihiraaui ani 'anai ha'i noni agu'i,
na'i 'ohani wai 'unuraau 'ini'i noni agu'i,

mawai ta'ahiraau nei nau ai'a ta'ahiraau ga'u na'i na'o."§

²⁶ Mia Hosea 'a o'ani ro'u,

"Na'i mau i ta'i dora na 'ia God 'a 'unua ga'u do 'i'amou ai'a noni ana'i,
rai 'unua hura'a do 'i'amou ra'i gare ana'ia God na tahitahi."*

²⁷ Ma naani maho na 'ia Rarabea Aisaea 'a 'unua 'iniraau saeni Israel.
"Iraaui Israel rau rago 'onaai nunu'u ni one,

maagu 'e gere aba moi 'iniraau na 'ia God 'aigui ha'atahiraau.

²⁸ 'Inia 'ia God 'ai raurau ta'aa moi tanaa 'oha nai ha'a-mama'airaaui hako
noni nai marewana."†

²⁹ 'Ia Aisaea 'a ha'arangasia ro'u hura'a o'ani,

"Onaa Araha God huunai mena 'a ga'i bwa'i ha'awatea do tara'i warowaro-
gaa'i rai tahi baaniai ha'a-mama'ai nai haua tanagaau,
'a ga'i bwane ai'agaau 'onaai 'omaai Sodom mana 'omaai Gomora."‡

'Iraau Israel Rau Bwarai Hinihinia Kraest

³⁰ Taha naasi 'ado'ado 'ada'i maho 'ini? 'Ado'ado 'ada'i 'a o'ani. 'Iraaui nei nara ai'a Jiu rau ai'a bonasia sadoia ta here do naraigui odo-odo 'inia na'i maana God. Me raugu ara'a mai odo-odo na'i maana God na'i 'oha naraugu to'oraai hinihini beia Kraest.

³¹ Miraau Jiu narau bonasia suriai Ringe, rau ha'imaania dorai odo-odo na'i maana God maraugu ai'a.

³² Ni 'uaana naraugu ai'a odo-odo 'inia na'i maana God? Rau ai'a odo-odo na'i maana God, suria rau 'adoma'inia dorai odo-odo 'iniai taguma'inia adaui Ringe ana'ia Moses. 'Iraau ai'a nugaai hinihinidaau beia Kraest. 'A 'onaa do rau tora'i na'i kae hau nara matai tora'i ei.

³³ 'Ia God 'a bwani ha'arangasia tanaraau na'i Usu-usu Maea o'ani,
"Moi bahurongo goro!

'Inau 'au nugaai huai hau na'i Jerusalem, na'i hungahungai Saeon.

Hau nara matai tora'i ei mara agusu 'inia.

Ma'ata 'iatei nai 'u'uria, 'a bwa'i ahutotou ta 'oha 'iniai 'u'uri na nugaa
beia."§

§ 9:25 9:25 Hosea 2:23 * 9:26 9:26 Hosea 1:10 † 9:28 9:27-28 Aisaea 10:22-23 ‡ 9:29 9:29
Aisaea 1:9 § 9:33 9:33 Aisaea 8:14; 28:16

10

¹ Arai do'ora mana asigu'i, 'au 'irisia di'u, mau ha'arahesi waiori tanaa God 'anai ha'atahiraau sae agu'i na'i Israel baani'i ora-ora'a adaa'i.

² 'Au 'iraraa dorau bonasiai ha'a-wa'ewa'ea God, maraugu ai'a 'iraraai huunai here 'anai ha'a-wa'ewa'ea.

³ Suria rau ai'a aidangisiai here narai matai odo-odo 'inia na'i maana God, rau 'itaai heresi marau bonasiai ha'a-odoodoraau haariraau 'inia araisuriai Ringe ana'ia Moses.

⁴ Maagu na Ringe 'isi rau bwa'i matai odo-odo 'inia na'i maana God, suria 'ia Kraest 'a bwane orisia'a. Naia moi na hinihini naasi na matai ha'a-odoodoraau noni na'i maana God.

God 'A Raba Ruhasiraau Hakoi Sae

⁵ I herehere na 'ia Moses 'a 'unua tanaraau sae 'anai odo-odo 'inia na'i maana God naasi 'anai araisuri'i ringe ana'i. 'A ha'arangasia o'asi na'i Ususu Maea na 'unua o'ani, "'Onaa 'o raba dauai tahi tarau, 'oi araisuri'i hakoi Ringe na hau'i maia God tanagia."

⁶ Ma'ata, i herehere nagai odo-odo 'inia suriai hinihinia agaaua Kraest 'a ai'a bwara o'asi. 'Inia na Ususu Maea 'a o'ani, "'Oi abui o'ani, 'Iatei nai ta'ehai Aro?' " 'Inia 'a ai'a ororiu do ta sae 'ai tau'aro raha 'anai waia dioa Kraest 'anai ha'a-odoodogia.

⁷ Mana Ususu Maea 'a o'ani ro'u, "'Oi abui heisonga'i o'ani, 'Iatei nai 'ari dora adaaui nei ra mae?' " 'Onaa do 'ai 'ari 'anai ha'atahia aho'ia Kraest.

⁸ I herehere nagai odo-odo 'inia suriai hinihini 'a ai'a bwara o'asi 'anai sadoia. 'Inia ni Ususu Maea 'a 'unua o'ani, "'I taroha baania God 'a ada'a bei'o, 'ia'a na'i ngoomu ma awa'a na'i tahingamu.'"* Ma naasi taroha 'abaiiai hinihini nameu taroha'inia.

⁹ 'Onaa na 'oi ha'arangasia 'inia ngoomu do'ia Jisas na Araha ma'oi hinihini do'ia God 'a ha'a-suruta'ea Jisas baaniai mae, 'oi daua namuai tahi tarau.

¹⁰ Naasi, naia moi na hinihini na 'oi matai odo-odo 'inia na'i maana God, ma naia na ha'arangasia amua hura'ai taha na'o hinihinia na 'ia God naigui ruhasi'o 'inia.

¹¹ I Ususu Maea 'a ha'arangasia o'ani tanagia, "'Iatei nai hinihinia, 'a bwa'i ahutotou ta 'oha 'inia 'u'uri na nugaa beia.'"†

¹² Rei'uaa i'oe 'e ai Jiu ma'ua 'o ai'a, 'i'amou hako mou matai hinihinia, 'inia na'i 'adoma'ina God 'i'amou mou ta'isada hako. Mou to'oraai ta'i Araha na huunai 'a'auhi'amou na'i madoraa namou ha'angoniai hei'a'auhi.

¹³ 'Inia ra ha'arangasia na'i Ususu Maea do "'Iatei nai ha'angonia Araha God 'anai ruhasia, 'ia Araha God 'ai ruhasia.'"‡

¹⁴ Marai ha'angonia he'ua God 'anai ruhasiraau 'onaa narau ai'a hinihinia? Marai hinihini he'ua 'onaa narau ai'a rongoai tarohana? Marai rongoa he'ua i taroha 'onaa ai'a nei 'anai taroha'inia?

¹⁵ Marai taroha'inia he'ua 'onaa ra ai'a ha'ataaria tanei 'anai taroha'inia? Ma'ata, ai'a do ra ai'a ha'ataaria tanei 'anai heitaroha'i. Naia nara ha'arangasia o'ani 'inia na'i Ususu Maea, "'A goro di'u i 'omesiraau nei ra boi 'anai taroha'iniai Taroha Goro.'"§

¹⁶ Rei'uaa na o'asi, ai'a do 'iraau hakoi saeni Israel narau mwa'emwa'e 'anai dauai Taroha Goro 'inia Kraest suri'i tahingadaa'i. 'Onai 'unua ana Aisaea na'i Ususu Maea o'ani, "'Araha God, 'a 'ome 'onaa do ai'a nei nai hinihiniai taha nameu maani'i.'"*

¹⁷ Naasi, hinihini 'a boi na'i rongoai Taroha Goro, mana Taroha Goro 'a boi baaniraau nei narau taroha'inia Kraest.

* **10:8** 10:6-8 Diutronomi 30:12-14 † **10:11** 10:11 Aisaea 28:16 ‡ **10:13** 10:13 Joel 2:32 § **10:15** 10:15 Aisaea 52:7 * **10:16** 10:16 Aisaea 53:1

18 Naasi wai heisonga'i. 'A 'ua? 'Iraaui noni nai Israel rau ai'a rongoai tarohana Kraest? Ai'a! Rau rongoa! 'Inia i Usu-usu Maea 'a 'unua o'ani, "I ha'atee adaa'i sae heheitaroha'i ana'ia God ra 'adarara hura'a suriai marewana,

mara taha 'ari suri'i mwane dora hako."†

19 'A 'ua? 'Iraaui saeni Israel rau aidangisia hako tarohasi ma'ua ai'a? Rau aidangisia moi. Naia narau taesu'a 'inia na'i 'oha na 'iraaui nei ra ai'a Jiu rau hinihinia. Naani ha'atee ana'ia God na 'ia Moses 'a maani'i hura'a tanaraaui Jiu. 'A o'ani,

"Inau wai 'a'auhiraau nei nara ai'a huunai noni agu'i,

mamoi kakawa 'omesiraau 'inia,

mawai ha'agorohiraau nei nara ai'a aidangisiau ga'u,

mamoi taesu'a 'inia."‡

20 Ma na'i muri, 'ia Aisaea 'a ai'a maaa'uta'i ha'arangasia ro'u hura'a do'ia God 'a ha'atee o'ani,

"Iraaui nei narau ai'a bonasiai aidangisiau naraugu aidangisiau,

mau ha'ata'iniai barongagu tanaraaui nei ra ai'a songa'i suriau."§

21 Mei tanaraaui Israel 'ia God 'a ha'atee o'ani 'iniraaui,

"Ado 'oha 'au ura mamasiraau nei ra rongoasa mara hairaes'i 'anai rihota'i mai tanaau."*

11

'Ia God 'A Ta'ahiraau Jiu

1 Naasi, 'a 'ua? 'Ia God 'a gagata'iniraaui Jiu? 'A ai'a, 'inia 'inau 'e ai Jiu ro'u, 'e ta'i 'iniraaui pwirana'ia Ebrahim nau huta mai na'i burungana Benjamin.

2 'Ia God 'a ai'a gagata'iniraaui nei ana'i na bwane 'ome sigihiraau mau mai na'i na'o. Mou 'iraraa ha'agorohiai dora i Usu-usu Maea na maaniai 'oha na 'ia Elaija 'a ha'atee ha'a-ta'airaui Israel. 'Ia Elaija 'a o'ani 'inia God,

3 "Araha God, ra ngahu ha'amaesiraau hako'a i rarabea amu'i, marau here ha'ata'ai'i hako i dorani ho'asi amu'i. 'Inauni naasi ta'i rarabea hahako naugu tahi mau, mana'i 'ohanisi raugu ha'aagau ro'u moi 'anai ngahu ha'amaesiau."*

4 Mia God 'a aramia Elaija o'ani, "Ai'a do i'oe moi na'ogu awasi. 'Inau 'e biu merui saeni Israel narau rongo suriau nau to'ora mau, mana biu merui sae naasi rau ai'a ha'arahesia'i araaranunu nara 'unua 'inia Baal."†

5 Na'i 'ohani 'a o'asi ro'u. 'E gere aba moi 'iniraaui Jiu narau hinihinia Kraest. Neiraausi nei na 'ia God na 'ome sigihiraau suriai goro ana 'iniraaui.

6 Naasi 'onaa 'ia God 'a 'ome sigihiraau 'iniai goro ana 'iniraaui, naasi 'a ha'ata'inia do 'a ai'a 'ome sigihiraau 'ini'i here goro narau haa'i. 'Onaa 'a ga'i 'ome sigihiraau 'ini'i here goro narau haa'i, me gaugu bwa'i 'unua'a do 'a 'ari suriai goro ana God 'iniraaui.

7 Naasi 'a ha'ata'inia do 'iraaui hako noni nai Israel rau bonasia sadoiai here narai odo-odo 'inia na'i mana God, ma'e gere aba moi 'iniraaui naraugu sadoia. 'Iraaui moi nei na 'ome sigihiraau a God. Nata aba 'iniraaui 'ia God 'a ha'a-rongoasa'araau.

8 'Onaai ha'arangasia anai Usu-usu Maea o'ani,

"Ia God 'a ha'akuhi'i 'adoma'idaa'i.

Ma naasi, taraawa'a mau mai tari 'ohani,

rau ai'a aidangisi'i mareho rau 'omesi'i 'ini maadaa'i,

† 10:18 10:18 Psalm 19:4 ‡ 10:19 10:19 Diutronomi 32:21 § 10:20 10:20 Aisaea 65:1 * 10:21 10:21 Aisaea 65:2 * 11:3 11:3 1 Kings 19:10-14 † 11:4 11:4 1 Kings 19:18

mana mareho rau rongo'i 'ini'i karingadaa'i."‡

9 'Ia Deved 'a ha'arangasia ro'u mau i ta'i mahosi. 'A o'ani,

"God, 'au rabasia do rai 'onaai ii'a nara raua 'iniaai baa nara gaasia 'ana, ma'ua 'onaai mwamwaa na kawi na'i huna.

Na'i 'oha narai wa'ewa'e 'ini'i mwane mareho goro na'o wate'i tanaraau, 'iraau rai 'asu'a 'iniaai ha'a-mama'ai narau arari 'anai daua.

10 'Au ha'arahesi marai kuru i maadaa'i, neina rai abui aidangisia ta mareho 'ini'i,

mau ha'arahesi do neina rai arunga hihi'a tarau 'ini'i mwane mareho bwara narai to'iraau."§

11 'A ha'a-momori do 'iraau Jiu rau taritari'a 'oha narau gagata'inia Kraest, me ai'a do raugu bwa'i rihota'i'a aho'i ro'u tanaa. Naia na taritari'a adausi na 'ia God 'agu hauai madoraa tanaraau nei nara ai'a Jiu 'anai dauai tahi tarau, do neina 'iraau Jiu rai naga 'iniaai tahi haorusi marai arunga rabasia ro'u.

12 'Ia God 'a haua i ha'agorohisi tanaraau nei nara ai'a Jiu 'iniaai taritari'a adauu Jiu ma 'iniaai nugasias adauu here narai tahi 'inia. Ma naasi, 'a bwa'i adara do 'ai huunai ha'agorohiraau di'u i saenai marewana 'oha 'iraau Jiu rai 'adoma'i aratara 'iniaai heresi marai hinihinia.

'Ia God 'Ai Ruhasiraau Nei Rau Ai'a Jiu

13 'Io, 'au raba hadahada tana'amoui sae mou ai'a Jiu, 'inia 'inau naasi Ha'ataari nara ha'ataariau mai 'anai heitaroha'i tana'amou. 'Au 'adoma'i ororiu 'iniaai tau'aro aguani,

14 'inia 'au 'irisia do 'iraau noni agu'i rai naga 'iniaai tahi haoru namou to'oraa marai matai rihosi aho'i tanaa God marai tahi.

15 Na'i 'oha 'ia God 'a nugasiraau Jiu, 'a hauai madoraa tanaraau sae he'ete'i na'i marewana 'anai hagu beia God. Ma 'ua? 'E taha na ga'i to'o 'onaa 'ia God 'a ga'i wa'ewa'e aho'i 'iniraau Jiu? Rau ga'i 'onaai sae na suruta'e aho'i baaniai mae.

16 'Oha ra wateai 'etanai huai bred tanaa God, 'a ha'ata'inia do mwane hua hako 'iaana'i a God. Ma 'onaa na rarinau hasi'ei ra maea, na raraa rai maea ro'u. 'A o'asi ro'u, suria 'ia Ebrahim, Aisak mea Jekop ra'i sae maea ana'ia God, na pwiradaa'i 'iaana'i God ro'u.

17 'Iraau Jiu ra 'onaai hasi'ei nara 'unua 'iniaai 'oliv na 'ia God 'a hasia. Miraau Jiu nara ai'a hinihini ra 'onaai raraa ra ruhuusi'i baaniai abe odonai hasi'eisi. Mi'amoui nei namou ai'a Jiu namou 'onaai raraadi hasi'ei 'oliv na to'o tahi moi na'i hasimou. Mia God 'a ha'a-hasira'ini'i wou suri'i dora na ruhuusi'i raraa baani'i. Naia namougu daa'i 'ini'i bane na 'ia God na duruduru 'ini'i tanaa Ebrahim miraau warowarona'i.

18 Ma'ata moi abui 'adoma'inia domou goro di'u'i raraa ra ruhuusi'i baaniai abe odonai 'oliv. Suria 'i'amou mou ai'a hauai tahi tanaai abenai hasi'ei, naia na abenai hasi'ei na hauai tahi tana'amou.

19 Mamoi matai ha'atee o'ani, "Ia God 'a ruhuusi'i raraa 'isi 'anai ha'i tarameeu 'anai rado'ameu wou na'i abenai hasi'ei."

20 Ha'amomori! I raraa 'isi, 'ia God 'a ruhuusiraau baaniai abenai hasi'ei suria rau ai'a hinihinia Kraest. Mi'amou na rado'amou wou na'i abenai hasi'ei 'inia moi hinihinia amou. Naasi moi abui ha'aba'o, ma'ata moi arunga magugu.

21 'Inia 'onaa 'ia God 'a ruhuusi'i huunai raraanai hasi'ei, mou 'adoma'inia do 'ai bwara tanaa 'anai ruhu gata'ini'amou 'onaa namou bwa'i hinihini?

‡ 11:8 11:8 Diutronomi 29:4; Aisaea 29:10 § 11:10 11:9-10 Psalm 69:22-23

22 Naasi, moi wai'ado'ado goro 'inia barongana God. 'Iia 'a matai goro 'iniraau noni ma 'a matai haua ro'u tanaraau ha'a-mama'ai. 'A ha'a-mama'airaui nei ra gagata'inia, ma matai goro 'ini'amoui nei mou 'u'uria, 'onaa namoi 'u'uria tarau. Ma 'onaa namou bwa'i 'u'uria tarau, 'iia 'ai ruhuusi'amou ro'u.

23 Ma 'onaa 'iraui Jiu rai rihosi marai hinihinia Kraest, 'ia God 'ai matai radoraau aho'i suri'i dora na rahiraau baani'i. 'Iia 'a to'oraai mena 'anai haua o'asi.

24 'Ia God 'a rado'amou wou na'i huunai 'oliv, rei'uaa 'i'amou ra'i raraana moi 'oliv na taraa to'o tahi moi na'i hasimou. Naasi 'a ha'ata'inia do 'a mwada'u moi tanaa 'anai radoraau aho'i Jiu na'i abenai 'oliv na ruhuusiraau baania.

'Ia God 'A Ta'ahiraau Hakoi Mwani Inoni

25 Arai do'ora mana asigu'i, 'au rabasia domoi aidangisiai taha na ha'a-momori na awa bainihu ga'u, neina moi abui to'oraai arunga ha'aba'o mana ha'a-ta'eta'e na'i tahitahi amou. 'Iraui Jiu narau kakawata'i hinihinia Kraest ra bwa'i do rai kakawata'i hinihinia tarau'a o'asi. Rai kakawata'i hinihinia moi tari na'i madoraa na 'iraui sae hinihini nara ai'a Jiu rai rago tari 'onaai 'irisia ana God.

26 Ma naasi 'ia God 'aigui ruhasiraau hakoi saeni Israel. 'Inia ni Usu-usu Maea 'a o'ani,

“E sae 'anai ruhasiraau noni 'ai hura'a mai baaniai dora adaui Jiu.*

'Ai rihosiraau warowarona'i a Jekop baani'i baronga ta'a'i adaa'i.

27 Naasi waigui ha'ato'oai duruduru nau haua tanaraau, mawai 'adoma'i nugasi'i ora-ora'a adaa'i.”†

28 'A ragoi nei 'iniraui Jiu narau 'itaai Taroha Goro 'abaia Kraest miraaui 'onaa do ra'i maerongana'i a God. Me 'inia o'asi ana, i nei namou ai'a ha'i saeni Jiu mou to'o madoraa 'anai hagu beia God. Rei'uaa na o'asi, 'ia God 'a ta'ahiraau mau i Jiu suria 'iia na 'ome sigihiraau 'onaai ha'atee duruduru ana 'inia tanaa Ebrahim, Aisak mea Jekop.

29 'Ia God 'agu bwa'i orisiai 'adoma'ina 'iniraui nei na 'ome sigihiraau ma bwa'i matai rahi'i aho'i baaniraui taha na bane'i tanaraau.

30 Na'i na'o, 'i'amou namou hairaes beia God. Ma na'i 'ohani 'ia God 'a goro 'ini'amou ma 'a'auhi'amou, 'inia 'iraui Jiu rau hairaes beia.

31 'A o'asi ro'u beiraui Jiu. Na'i 'ohani, 'iraui Jiu rau hairaes beia God. Ma'ata ta 'oha 'ai goro 'iniraui mai 'a'auhiraau ro'u 'onaai 'a'auhi'amou na haa.

32 'A 'onaa do'ia God 'a ho'osiraui mwane inoni hako na'i rumaniho'o 'inia hairaes adaaui beia, ma do na'i muri 'aigu goro 'iniraui mai 'a'auhiraui.

33 Ei romwane, 'igaau gau to'oraai God na huunai goro. 'A huunai madoma ma bwa'i sae nai aidangi 'onaia. Gau bwa'i matai 'iraraui 'adoma'ina magau bwa'i aidangi tarihana i herengana.

34 Ra ha'arangasia o'ani na'i Usu-usu Maea,

“Iatei na mataiai 'adoma'ina God?

Iatei na ga'i matai ha'ausuria aho'i?

35 Iatei na hisungia ga'ua God 'inia ta maho,

neina 'ia God 'ai su'ua aho'i tanaa?”‡

36 'Ia God na ha'apwa'ara'i mwane mareho hako, mara ura 'inia mena ana. Mana mareho 'isi ra awa neina gai ha'aasaa God 'ini'i. Gau magai ha'atee ha'agorohia waiori a God. Amen.

* **11:26 Dora adaui Jiu:** Na'i ha'ateeni Grik ra 'unua “baania Saeon.” † **11:27** 11:26-27 Aisaea 59:20-21; 27:9 ‡ **11:35** 11:35 Job 41:11

12

Barongani Sae Hinihini

¹ Naasi arai do'ora mana asigu'i, suriai goro ana God 'inigia ma ta'ahigia, wai ha'a-ta'u'u'amou. Moi ha'awate'amou tanaa God 'onaai ho'asi tahitahi, neina moi awa odo-odo mamoi ha'a-wa'ewa'ea. Naasi huunai here namou ga'i haua 'anai ha'a-aneanea God.

² Moi abu ha'isuri'i baronga ta'a'i adaa'i sae ahurodo na'i marewana. Moi ha'awatea God mai orisi'i 'adoma'imoo'i mamoi to'oraai baronga haoru. Ma naasi namoigui 'iraraa 'iniaia taha na 'irisia God domoi haua, mamoi 'irara'i maho nara goro mara odo-odo na wa'ewa'e 'ini'i a God.

³ Suria 'ia God 'a goro 'iniau ma 'ome sigihiau 'anai ha'i Ha'ataari, 'e mareho nau raba 'unua tanaai 'adonai nei 'ini'amou. Moi abui 'adoma'i ha'ata'e'amou haraari'amou. Ma'ata na 'adoma'i na'oi to'oraa 'ini'o haari'o 'ai suriai bane ni tatau'aro na 'ia God na haua tana'o suriai hinihinimu.

⁴ I abega 'a to'ora'i mwane dora he'ete'i hairiu, mana 'ado dora 'a to'oraa haaria i tau'aro ana.

⁵ 'A o'asi ro'u beigaau sae hinihini. Rei'uaa nagau rago, 'igaau 'onaai ta'i abe 'iniaia hagu agaau beia Kraest. Mana 'adonai nei 'inigaau 'a to'oraa haaria i tau'aro ana 'anai 'a'auhigaau hairiu.

⁶ Naasi 'ia God 'a haa'i tanagai mwane bane ni tatau'aro he'ete'i hairiu suriai goro ana 'inigia. 'Onaa 'ia God 'a haua tana'o i bane 'anai ha'arangasi'i hura'a i 'ado'adonai a God, 'oi maani'i hura'ai taha na'o hinihinia do 'ia God na 'unu'i tana'o.

⁷ Ma 'onaa 'ia God 'a haua tana'o i bane 'anai 'a'auhiraau noni, 'oi 'a'auhiraau goro. 'Onaa 'o to'oraai bane 'anai ha'ausuri, 'oi ha'ausuri goro.

⁸ 'Onaa na bane amua naasi 'anai ha'a-'o'ori, ma'oi ha'a-'o'oriraau sae. Ma 'onaa bane amua naasi 'anai hisuhisu, 'oi hisu raha. 'Onaa 'ia God 'a haua tana'o i bane 'anai na'otara, 'oi haua beiai mangudi, ma 'onaa 'o to'oraai bane 'anai ha'ata'iniaia heita'ahi tanaraau sae ha'aroha'a, 'oi haua ha'i wa'ewa'e.

⁹ Na'i 'oha namoi ta'ahiraau inoni, moi ta'ahiraau ha'a-momori. Mou abui haa'i moi here na 'ome 'onaa 'inia domou ta'ahiraau mamougu ai'a. Moi 'itaa i mareho ta'aa, mamoi dau baabau suri'i mareho ra odo-odo.

¹⁰ Moi ta'ahi'amou hairiu 'onaai ha'ido'orada mamoi 'adoma'i raorao 'anai ha'ata'iniaia ha'ahou tana'amou hairiu.

¹¹ Moi abui wai'ate'a, moi tau'aro wetewete tanaa Araha bei'i tahing-amoo'i hako.

¹² Moi wa'ewa'e, 'inia mou 'iraraa do 'ia God 'ai ha'ato'o'i duruduru na haa'i tana'amou. Moi ahumaratanoa suri'i madoraa ni rongomaata'i, mamoi ha'arahesi tarau.

¹³ Moi hisu tanaraau sae ana'ia God na'i 'oha ra rabasiai hei'a'auhi mamoi 'omesuriraau goro i sae ra boi na'i 'omaa amou.

¹⁴ Moi abui ha'angonia God 'anai here ha'a-ta'airaau nei ra nora ta'ai'amou. Moi ha'arahesi 'a'auhiraau mia God 'ai ha'agorohiraau.

¹⁵ Moi wa'ewa'e na'i 'oha mou awa beiraau nei ra wa'ewa'e, mamoi ahutotou na'i 'oha mou awa beiraau nei ra ahutotou.

¹⁶ Moi hagu goni goro. Moi abui ha'apa'o mamoi abui to'oraai arunga ha'a-ta'eta'e do'o aidangi di'uraau nata nei. Ma'ata moi wa'ewa'e 'anai hagu beiraau sae rau ai'a ororiu.

¹⁷ Moi abui su'uai ta'aa tanaai nata sae, ma'ata moi haa'i moi maho ra odo-odo na'i 'ado'adodaa'i sae.

¹⁸ Na'i aba amou, moi bonasiai awa hagugoni hako beiraau mwane inoni.

¹⁹ Arai do'ora mana asigu'i, moi abu bonasiai su'uai ta'aa tanaai nata sae. Moi nugaa tanaa God, 'iia naigu hauai aba ana. 'Inia na'i Usu-usu Maea 'ia God 'a 'unua o'ani,

“Aba agua 'anai ha'a-mama'airaau nei nara hauai ta'aa.

'Inau nawaigui su'ua tanaraau taha rau haua tana'amou.”*

²⁰ Moi araisuriai dorai Usu-usu Maea na o'ani,
“Onaa maerongamu 'a hioro, 'oi hangania.

Ma 'onaa 'a raba gono, 'oi ha'agonohia.

'Inia 'onaa 'oi haua o'asi, 'ai mae 'iniai ninima.”†

²¹ 'Onaa moi su'uai ta'aa 'iniai ta'aa, mamou ha'awateai ta'aa 'anai ha'aheho'amou. Me 'onaa moi su'uai ta'aa 'iniai goro, ma naasi namoi ha'ahehoai ta'aa.

13

Ha'ahou Tanaraau Saemaua Na'i Gaumani

¹ 'Igaau hako gai araisuriraaui ma'ata i saemaua na'i gaumani, 'inia 'iraau na 'ia God na haua tanaraau mena 'anai 'omesurira i noni, ma nugaraau 'anai heimarungi.

² Naasi 'onaa tanei nai ura bwarasiraau saemaua o'asi, 'iia 'a ura bwarasia God na nugaraau, mia 'a arari dorai ha'a-mama'aia.

³ 'Iraau nei nara haa'i taha nara odo-odo ra ai'a ta'isada 'anai maa'usiraau saemaua na'i gaumani. 'Iraau moi sae hehere ta'aa naasi nara matai maa'usiraau. Naasi 'onaa namou ai'a raba maa'usiraau saemaua na'i gaumani, mamoi abui hairaesii. Moi haa'i maho ra odo-odo neina rai ha'atee wa'ewa'e 'ini'amou.

⁴ 'Inia 'iraau saemaua 'isi ra'i sae tatau'aro ana'ia God 'anai 'a'auhi'amou. Me 'onaa moigu haa'i maho taritari'a, mamoi matai maa'usiraau'a, 'inia rau to'oraai mena 'anai hauai ha'a-mama'ai tana'amou. 'Iraau ra'i sae tatau'aro ana'ia God 'anai ha'a-mama'ai'i sae ra haa'i here ta'a'i.

⁵ Naia na goro 'inia domoi araisuri'i saemaua o'asi. Ma'ata moi abui araisuriraaui do 'inia moi maa'usi'i amoo'i ha'a-mama'ai, ma'ata moi araisuriraaui 'inia aidangisia amoo do naasi mareho na odo-odo 'anai haua.

⁶ Naasi tarana 'inia namou hori takisi 'inia tanaai gaumani. 'Inia 'a ta'isada do 'iraau rai hori'i ro'u i sae tatau'aro adaa'i. 'Inia 'iraau sae tatau'aro na'i gaumani rau hauai tau'aro na 'ia God na nuga'i tanaraau, me 'iraau rau tau'aro raha 'anai 'omesuriraaui noni.

⁷ Mana taha na ta'isada domoi watea tanaai gaumani, moi watea. Taha narau 'unua tana'amou 'anai gaasi ha'a 'ada'i, moi gaasi ha'a. Moi hori takisi tanaraau, mamoi 'adoma'i hihii'a mana ha'ahouraaui.

⁸ Abui kaoni ore a beiai nata sae. Na kaoni moi na ta'isada domoi to'ora a tarau, naasi heita'ahi amoo tanaraau hakoi mwane noni. 'Iatei na ta'ahiraaui hakoi mwane inoni, 'a araisuriai taha na 'irisia i Ha'atora ana God.

⁹ 'Inia na Ha'atora 'a 'unua dogai abui taritari'a baani'i urao agaa'i ma'ua mwane agaa'i, gai abui beri, abui heingahu, abui naga, ma tara'i mareho ro'u. Ma'ata, mwane mareho 'isi ra awa hako na'i bahainai ha'atora na 'unua do'oi ta'ahiai nata sae 'onaai ta'ahi'o amua haari'o.

¹⁰ 'Iatei na to'oraai heita'ahi 'a bwa'i matai haua ta maho taritari'a tanaai nata sae. 'Inia 'oha na 'o ha'ata'inia heita'ahi suri'i mwani maho na'o haa'i, 'o ha'isuri'i hako'a i mwani Ha'atora.

¹¹ Nau 'unua o'asi tana'amou 'inia mou aidangisia do 'a bwa'i ore a mia Kraest 'ai aho'i mai 'anai ha'atahigaaui baaniai marewanani. Na'i madoraa

* **12:19** 12:19 Diutronomi 32:35 † **12:20** 12:20 Proverbs 25:21-22

nagau bura'i hinihini, ni madoraa ana 'anai aho'i mai 'a gere ha'atau. Me na'i 'ohani 'a gere gaarangi. Naasi mou ga'i awa odo-odo mamoi 'ome'ome 'onaai sae na rarai tarau 'ado 'oha.

¹² Rodo 'a gaarangi maai di'u'a mana dangi 'a gaarangi'a. Naasi gai nugasi'i tatau'aro 'anai kuhi magai awa odo-odo neina gai ura bwarasiai ta'aa.

¹³ Gai awa odo-odo 'onaai sae na awa na'i dora marewa. Gai abui gono raha 'ini'i waini bweu mana haa'i ngaugoni nara hau'i mwane mareho to'obweubweu'a suri'i. Gai abui taritari'a baani'i urao agaa'i ma'ua mwane agaa'i, ma'ua haa'i taraani here wawaasua'a ro'u. Gai abui heita'ia ma'ua hai'ubwani.

¹⁴ Moi bonasia doni barongamoo'i rai 'onaai barongana Araha aga Jisas Kraest neina moi matai ha'aagau 'anai hei'oi bwarasi'i maho ta'a'i. Moi abui 'adoma'inia moi haa'i hei'irisi ta'aa amoo'i.

14

Abui Ha'atee Ha'ata'airaau Nei

Nara Maemae'a i Hinihinidaa'i

¹ Moi mwa'emwa'e 'anai hagu beiraau sae hinihini nara maemae'a i hinihinidaa'i, mamoi abui heitohetohe beiraau 'ini'i maho rau 'adoma'ini'i do ra taritari'a ma'ua ra odo-odo.

² 'Iraau nei nara wetewete i hinihinidaa'i, rau 'adoma'inia do mwane mahoi ngau ra goro hako 'anai ngaa'i. Miraau nei nara maemae'a i hinihinidaa'i, rau 'adoma'inia do 'a taritari'a 'anai ngaa'i hasi'odi mwamwaa nara wate'i tanaai araanunu nara raonga'ini'i na'i maketi.

³ Ma'ata, 'iraau nei ra matai ngaa'i mwane taraani mahoi ngau moi, rai abui wana bodio 'iniraau nei narau ai'a, miraau nei ra ai'a, rai abui hiiriraau nei narau matai ngaa'i moi taraani mahoi ngau. 'Inia 'ia God 'a bwane wairaa ro'u na'i ruruha ana.

⁴ 'O 'adoma'inia do i'oe 'iatei na'o hiiria 'inia i noni tatau'aro anai sae he'ete'i? 'Ia moia Araha na tau'aro tanaasi nai 'iraraa dona here na haua 'a goro ma'ua 'a ta'aa. Mana here nai haua rai goro, 'inia 'ia Araha nai 'a'auhia.

⁵ Tara'i sae ra 'adoma'inia do tara'i dangi ra ororiu di'u'i tara'i dangi ro'u, ma tara'i sae ra 'adoma'inia do mwane dangi ra ta'isada hako moi. Naasi 'adonai nei 'ai wai'ado'ado suriai mahosi maai ura baabau na'i taha na 'adoma'inia.

⁶ 'Iraau nei narau 'adoma'inia do 'e ta'i dangi na ororiu di'u, rau haua o'asi 'anai ha'ahoua Araha. Miraau nei narau matai ngaa'i mwane mahoi ngau hako, rau haua o'asi 'anai ha'ahoua Araha, 'inia 'iraau rau ha'atee ha'agorohia God maraugu ngau. Miraau nei rau ai'a matai ngaa'i hasi'odi mwamwaa, rau o'asi ro'u.

⁷ Na'i tahitahi agaa sae hinihini na'i marewana, gau ai'a awa 'anai ha'a-wa'ewa'egaau haarigaau, ma o'asi ro'u na'i mae nagai haua.

⁸ Na'i 'oha gau tahi, gau tahitahi 'anai ha'a-wa'ewa'ea Araha. Ma na'i 'oha gai mae, gai bonasia dogai ha'a-wa'ewa'ea ro'u Araha. Naasi 'oha gau tahi ma'ua 'oha gau mae 'igaau 'iaana'ia Araha.

⁹ 'Ia Kraest 'a mae ma suruta'e aho'i do 'ai ha'i Araha maai marungiraau nei ra mae mana nei ra tahi.

¹⁰ Naasi, 'inia 'uaana na'o hiiria 'inia i do'oramu beia Kraest? Me i'oe, 'inia 'uaana na'o wana bodio 'inia do'oramu? Moi aidangisia do 'igaau hako gai ura na'i maana God na'i 'oha nai hiiriraau noni.

¹¹ 'Inia na'i Usu-usu Maea 'ia God 'a 'unua o'ani,
 "Inau 'au tahi ha'a-momori,

ma ha'a-momori o'asi ro'u do 'iraui mwane sae hako rai topira'i ruru tanaau,

marai ha'arangasiau hura'a do 'inau naasi God.”*

¹² Naasi gau aidangisia do 'adonai nei 'inigaau 'ai ha'arangasi'i hura'a tanaa God i taranai taha na haa'i 'ini'i mwane maho na haa'i na'i marewanani.

¹³ Naasi gai agohe 'anai hiiriai nata sae hinihini. Gai 'adoma'i wetewete do gai abui hau'i mareho 'anai ha'asirihia mo'osi na'i ora-ora'a.

¹⁴ 'Iniai hagu agua beia Arahā Jisas, 'inau 'au aidangisia do ai'a ta ta'i mahoingau nai taritari'a 'anai ngaa. Ma'ata 'onaa ta sae hinihini nai 'adoma'inia do tara'i mahoingau ra ai'a goro 'anai ngaa'i, naasi 'a ha'ata'inia do'e ora-ora'a tanaa na'i 'oha nai ngaa'i.

¹⁵ Ma 'onaa 'o ha'a-arungata'aia ta sae hinihini 'iniai mahoingau na'o matai ngaua, 'a ha'ata'inia do i'oe, ai'a heita'ahi nai awa bei'o. 'Oi abui kaku'aa do'ia Kraest na mae ro'u taranai saesi. Naasi 'oi abui ha'ata'ai ai hinihinina 'inia moi mahoingau.

¹⁶ Rei'uaa na'o aidangisia doni mareho na'o haua 'a odo-odo moi, 'oi abui haua 'onaa na nata sae hinihini 'a 'adoma'inia do 'a ta'aa. 'A gasi 'unua ta sae doni barongadi sae hinihini ra ta'a'i.

¹⁷ 'Oha na 'ia God 'a marungi'i tahingagaa'i, ni mareho na ororiu, ai'a do ni taha nagau matai ngaa ma'ua gonohia. Ni mareho na ororiu, naasi 'anai awa odo-odo, hagugoni goro beiraui noni, ma 'anai to'oraai wa'ewa'e na boi baaniai Hi'ona Maea.

¹⁸ 'Onaa 'oi here o'asi na'i tau'aro na'o haua tanaa Kraest, 'ia God 'ai wa'ewa'e 'ini'o, miraui noni rai ha'ahou'o ro'u.

¹⁹ Naasi gai bonasiai haa'i mareho nara ha'a-hagugonigaau goro mana mareho nara ha'a-wetewete'i hinihinigaa'i.

²⁰ Moi abui ha'ata'ai ai tau'aro na haua God na'i tahinganai sae 'inia moi mahoingau. Ai'a ta mahoingau nai taritari'a 'anai ngaa. Ma'ata 'a taritari'a 'anai ha'atehaai nata sae hinihini 'iniai mahoingau na'o matai ngaa.

²¹ Naasi 'a goro domoi abui ngaa'i mwamwaa nara wate'i tanaai araaranunu mana gono waeni mana haa'i tara'i maho ro'u nai matai ha'ateharaau 'ini'i tara'i sae hinihini.

²² Ni 'ado'adomu 'ini'i mareho 'isi, naasi aba amua'a haari'o beia God. 'A ai'a goro 'anai to'o maani'i. Wa'ewa'e tanaraui nei rau ai'a 'adoma'i heiruarua'a 'ini'i haa'i adaa'i maho rau 'adoma'ini'i dora odo-odo.

²³ Ma 'onaa 'ia tei sae na 'adoma'i heiruarua'a 'inia ta mahoingau magu ngaa moi, 'ia 'a taritari'a. Suria 'ia 'a ai'a hinihini wetewete doni mareho na hauasi 'a odo-odo. 'Oha nagau hauai maho nagau ai'a taraa hinihinia do 'a odo-odo, naasi gau hauai ora-ora'a.

15

Suriai Awangana Kraest

¹ 'Igaui nei na hinihinigaau 'a wetewete, 'a goro dogau ga'i 'abenga'i 'a'auhiraui nei nara suria Arahā nara maemae'a i hinihinidaa'i. Gai abui hau'i moi taha 'anai ha'a-wa'ewa'egaau haarigaau,

² ma'ata gai hau'i maho na 'iraui rai wa'ewa'e 'ini'i mana maho narai ha'a-wetewete'i hinihinidaa'i.

³ Rei'uaa 'ia Kraest, ma ai'a 'adoma'inia moi haraaria 'anai hauai taha nai wa'ewa'e 'inia haaria. 'Inia na'i Usu-usu Maea 'a ha'arangasia o'ani, "God, 'iraui nei ra ha'atee ha'ata'ai'o, 'a 'onaa do rau ha'atee ha'ata'ai au ro'u.”*

* **14:11** 14:11 Aisaea 49:18; 45:23 * **15:3** 15:3 Psalm 69:9

⁴ Mwani maho na'i raronai Usu-usu Maea ra usu'i 'anai ha'ausurigia. Ma na'i 'oha na gai 'oha'ini'i, rai 'a'auhigia 'anai ahumaratanoa marai ha'a-o'origaau. Ma naasi, gaigui to'oraai 'adoma'i heitotori 'ini'i taha na duruduru 'ini'i a God tanagia.

⁵ 'Au ha'arahesi, do 'ia God na matai haua tana'amoui ahumaratanoa mana ha'a-o'ori, 'ai 'a'auhi'amou 'anai hagugoni beiai ta'i 'ado'ado suriai barongana Jisas Kraest.

⁶ Naasi 'i'amou moigui boi goni beiai ta'i 'ado'ado 'anai ha'atee ha'agorohia God i Amana Araha aga Jisas Kraest.

⁷ Hoita, moi wa'ewa'e 'anai hagu bei'amou hairiu 'onaaia ro'u wa'ewa'e mana hagu ana Kraest bei'amou. 'Onaa moi haua o'asi, 'iraui noni rai ha'atee ha'agorohia God.

⁸ Wai 'unua tana'amou. Na'i 'oha na boia Kraest, 'a boi 'onaa sae tatau'aro tanaraui Jiu 'anai ha'ata'inia do'ia God ai'a kaku'aa duruduru na haua tanaraui wauwa adaa'i.

⁹ 'Ia Kraest 'a boi ro'u do 'iraui nei ra ai'a ha'i saeni Jiu rai ha'a-aneanea God 'inia goro ana 'iniraaui. 'Onaa ha'arangasia ada na'i Psalm o'ani, "Inau wai ha'a-aneane'o na'i 'uruhadaui nei ra ai'a Jiu,

mawai gana ha'ahauasaa i atamu."†

¹⁰ Na'i nata dora ra usua o'ani ro'u,

"Moi wa'ewa'e, 'i'amoui nei namou ai'a Jiu,

moi wa'ewa'e beiraui inoni ana'ia God; 'iraui Jiu!"‡

¹¹ Na'i nata dora 'a 'unua ro'u mau o'ani,

"T'amoui nei mou ai'a Jiu,

moi ha'a-aneanea Araha God.

T'amou hako inoni nai marewana,

moi ha'a-aneanea."§

¹² Mia Aisaea 'a 'unua ro'u o'ani,

"E nei baaniai burungana Jesi* 'ai boi,

ma'ai marungiraui nei ra ai'a Jiu.

'Iraui rai nugaai 'u'uridaau na'i hungana."†

¹³ 'Ia God naasi ahuinai mwani mareho nagau 'adoma'i heitotori 'ini'i. Naasi 'au ha'arahesi mia God 'ai ha'a-wa'ewa'e'amou ma'ai haua tana'amoui gooroha 'inia 'u'uria amoo. 'Onaa nai o'asi, na mena anai Hi'ona Maea 'ai ha'a-wetewetei hinihinimoo 'anai dau'i taha namou 'adoma'i heitotori 'ini'i.

Tau'aro Ana Pol

¹⁴ Arai do'ora mana asigu'i, 'inau 'au 'iraraa domou goro. Mou aidangisi'i baronga nara goro 'anai ha'isuri'i, mamou arari 'anai ha'ausuri'amou hairiu 'ini'i.

¹⁵ Rei'uaa na o'asi, na'i usu-usuni 'inau 'au ha'atee wetewete 'ini'i tara'i maho do 'anai ha'a-'adoma'i aho'isi'amou 'ini'i. 'Au matai haua o'asi, 'inia 'ia God 'a goro 'iniau

¹⁶ ma 'ome sigihiau dowai ha'i sae tatau'aro ana Jisas Kraest 'anai tau'aro tana'amoui nei na mou ai'a Jiu. Na'i tatau'aro agua 'au tau'aro 'onaa Piriisi 'anai waia woui Taroha Goro tana'amou mawai wate'amou tanaa God 'onaa wawate na Hi'ona Maea na ha'amaeaa mia God 'ai wa'ewa'e 'inia.

¹⁷ Naasi, 'inia hagu agua beia Jisas Kraest, 'a arari dowai ha'aba'o 'inia tau'aro nau haua tanaa God.

† 15:9 15:9 Psalm 18:49 ‡ 15:10 15:10 Diutronomi 32:43 § 15:11 15:11 Psalm 117:1 * 15:12
Jesi: 'iia naasi amana Mwaeraha Deved. † 15:12 15:12 Aisaea 11:10

¹⁸ 'E ta'i maho moi nawai ha'a-ta'eta'eau 'inia, naia na tau'aro na 'ia Kraest na 'a'auhiau 'anai haua 'oha nau wairaau nei ra ai'a Jiu tanaa God. Rau hinihinia God 'inia rongoa adaui heitaroha'i agua mana 'omesi'i adaa'i mareho nau haa'i,

¹⁹ 'onaai ha'abu'oahu mana ha'ara nau haa'i 'inia mena anai Hi'ona Maea. Ma naasi, taraawa'a na'i Jerusalem tari Provensi Ilirikam, 'au ha'arosia goro i tau'aro agua 'anai taroha'inia Taroha Goro ana Kraest suri'i dora 'isi.

²⁰ 'Au bonasia dowai taroha'inia Taroha Goro suri'i dora ra ai'a taroha'inia mau iei a Kraest. Nau 'onaai sae na ai'a raba tagoriai ruma na 'e sae he'ete'i na bwane taraawa'ana, 'inia 'inau ai'a raba heitaroha'i suri'i dora na 'e sae he'ete'i na bwane heitaroha'i suri'i.

²¹ Nau ai'a haua o'asi. Me 'au ha'isuriai taha nara ha'arangasia 'abaia Kraest na'i Usu-usu Maea na o'ani,

“Iraui nei ra ai'a taroha'inia mau tanaraau, rai 'ome 'iraraa.

Miraui nei ra ai'a rongo tarohana rai aidangisia.”‡

'Ia Pol 'A Raba 'Ari Rom

²² 'Aariha nau raba haua bei'amou 'au ai'a haua mau, suriai heitaroha'i agua mau suri'i mwane dora 'ini.

²³ Ma'ata, na'i 'ohani 'au ha'ahakoa'a i tau'aro nau haua suriai dorani. Suri'i harisi nara hako'a 'au bwane raba ada wou bei'amou.

²⁴ Naasi 'au 'adoma'inia do 'oha wai hano 'anai Spein wai garihi'amou ga'u na'i Rom. Na'i 'oha nagai wa'ewa'e goni hairiu ga'u, mamoigui ha'ataariau ro'u 'anai Spein beiai gere 'a'au namou matai haua tanaau.

²⁵ Ma'ata na'i na'o mawaigui 'ari wou bei'amou, wai aho'i ga'u 'ari Jerusalem 'anai 'a'uhiraui sae hinihini na'isi.

²⁶ Wai waa'i 'ari ha'a narau goni'i sae hinihini na'i Provensi Masidonia mana'i Akaea. Rau haa'i tanaraui sae hinihini nara pohara na'i Jerusalem.

²⁷ Rau wa'ewa'e 'anai haua o'asi me 'a marasina ro'u dorau ga'i haua o'asi. 'Inia 'a 'onaa dorau kaoni beiraui Jiu hinihini na'i Jerusalem. 'Inia 'iraui Jiu hinihini rau hisungirau 'inia Taroha Goro ma marasina do 'iraui rau ga'i hisungirau aho'i 'ini'i toto'ora adaa'i.

²⁸ Waigui ha'a-atahaa moi ha'a ra ha'a-'u'uriau 'inia, mawai 'ari wou re'i'amou'a 'oha wai hano 'anai Spein.

²⁹ 'Au 'iraraa goro do 'oha wai 'ari wou bei'amou, wai boi beiai ha'agorohi ha'ibubu ana Kraest tana'amou.

³⁰ Arai do'ora mana asigu'i, 'inia hagu agaau hako beia Jisas Kraest i Araha aga, 'au ha'angoni'amou wetewete 'anai 'a'auhiau 'ini ha'arahesi tanaa God taragu. Moi haua o'asi 'anai ha'ata'inia heita'ahi amou tanaau na haua tana'amou i Hi'ona Maea.

³¹ Moi ha'arahesi tanaa God maai taatahi bwarasiau baaniraui sae na'i Provensi Jiudea narau ai'a raba araisuria God. Moi ha'arahesi 'a'uhiraui ro'u i sae hinihini na'i Jerusalem marai wa'ewa'e 'anai dauai ha'a nawai waia tanaraui.

³² Na'i muri, 'onaa 'a suriai hei'irisina God, waigui boi ha'i wa'ewa'e bei'amou magari ha'a-wetewete'i hairiu 'adoma'igaa'i.

³³ 'Au ha'arahesi tanaa God na hauai gooroha 'ai awa bei'amou hako. Amen.

16

Ha'atee Wa'ewa'e Ana Pol

¹ 'Au ha'atee wa'ewa'e 'inia koagaau a Fibi, 'e urao na tau'aro 'a'auhiraau sae ni heiso'i na'i 'omaai Kenkria. 'Iia 'a bwa'i ore'a mai 'ari wou gaariri'amou.

² 'Oha nai 'ari wou, moi ha'amaotoa 'onaai nei na hinihinia ro'u Araha, 'inia naasi here na ta'isada dorai haua i noni ana'ia God. Moi 'a'auhia 'ini'i taha na 'irisi'i, 'inia 'a ragoi sae na 'iia 'a 'a'auhiraau, mia 'a'auhiau ro'u.

³ Moi 'unua ro'u i ha'atee wa'ewa'e agua tanaa Prisila mia Akuila nararu 'a'auhiau na'i tau'aro agua tanaa Kraest Jisas.

⁴ 'E ta'i 'oha, raru gaarangi mae 'inia 'a'auhiau adarua. Ma naasi, ai'a do 'inau moi nau ha'atee ha'agorohirarua, me 'iraau ro'u i inoni hinihini nara ai'a Jiu, rau ha'atee ha'agorohirarua ro'u.

⁵ Moi 'unua ro'u i ha'atee wa'ewa'e agua tanaraau sae hinihini narau matai boboi 'anai ha'arahesi goni na'i ruma adarua.

Ha'atee wa'ewa'e ro'u tanaai gere sae goro agua, 'ia Epaenitas. 'Iia naasi 'etanai sae na hinihini tahamora na'i Provensi Eisia.

⁶ Ha'atee wa'ewa'e tanaa Meri. 'Iia 'a tau'aro raha di'u 'anai 'a'auhi'amou.

⁷ Ha'atee wa'ewa'e tanaa Andronikas mana urao ana 'ia Jiunia, 'e rua ai Jiu 'onaaiau nameu ta'i awa ga'u na'i rumaniho'o. 'Irarua raru hinihinia na'i na'o a Kraest 'iniau me 'irarua 'e rua Ha'ataari nararu here goro di'u.

⁸ Ha'atee wa'ewa'e tanaa Ampliatas, 'e huunai sae goro agua na hinihinia ro'ua Araha.

⁹ Ha'atee wa'ewa'e ro'u tanaa Abanas. 'Iia 'a tau'aro ro'u beigaau tanaa Kraest. Ha'atee wa'ewa'e ro'u tanaa Stakis, 'e huunai sae goro agua.

¹⁰ Ha'atee wa'ewa'e tanaa Apelis. 'Iia 'e ta'i sae na ha'ata'inia haaria do'a mangudi na'i tau'aro tanaa Kraest. Ha'atee wa'ewa'e tanaraau ruruha ana Aristobiulas.

¹¹ Ha'atee wa'ewa'e tanaa Herodion, 'iia 'e ai Jiu ro'u 'onaaiau. Ha'atee wa'ewa'e tanaraau sae hinihini na'i ruruha ana Nasisas.

¹² Ha'atee wa'ewa'e tanaa Trefaena mia Traefosa, rua urao tatau'aro ana Araha. Ha'atee wa'ewa'e tanaa Pesis, 'e urao goro na tau'aro raha ro'u tanaa Araha.

¹³ Ha'atee wa'ewa'e tanaa Rufas, 'e huunai sae ororiu na'i tau'aro ana Araha. Ha'atee wa'ewa'e ro'u tanaai nanae ana. 'A huunai 'omesuriau goro 'onaa do 'inau 'e huunai gare ana.

¹⁴ Ha'atee wa'ewa'e tanaa Asinkritas, 'ia Fligon, 'ia Hamis, 'ia Patrobas, 'ia Hamas, miraau ro'u tara'i sae hinihini nara awa ro'u beiraau.

¹⁵ Ha'atee wa'ewa'e ro'u tanaa Filologas, 'ia Jiulia, 'ia Nerias mana asina, mei tanaa Olimp asina miraau tara'i sae hinihini nara awa ro'u beiraau.

¹⁶ 'Oha moi awa goni noni hinihini 'onaai ta'i ruruha, moi here beiai nata nei* 'anai ha'ata'iniai heita'ahi amou tana'amou hairiu.

'Iraau hakoi sae na'i heiso'i ana Kraest rau ha'ataari'i woui ha'atee wa'ewa'e adaa'i tana'amou.

Hadahada Ha'ahako Ana Pol

¹⁷ Arai do'ora mana asigu'i, wai ha'a-ta'u'u'amou. Moi 'ome'ome goro 'iniraau nei nara raba ha'a-heita'iamou hairiu marau raba ha'ateha'amou baania God 'ini maani'i adaa'i maho nara ai'a ta'isada bei'i ha'ausuringa'i namou bwane rongo'i. Moi abui hagu bei'i sae o'asi.

¹⁸ Rau raba suri'i moi hei'irisida'i haraariraa. Rau ai'a raba suriai hei'irisina Kraest, na Araha aga. Rau pwari'iraau nei nara matai hinihini'i

* **16:16 Here beiai nata nei:** Na'i ha'atee ni Grik ra 'unua "ngooniai nata nei beiai heingooni ni heita'ahi." Na'i madoraasi, 'iraau sae mwane rau ngooniai babanai nata sae mwane, miraau urao rau ngooniai babanai nata urao 'anai ha'ata'iniai heita'ahi tanaraau hairiu. 'A ta'isada beiai herehere agaau na'i 'ohanisi 'oha gau here beiai nata nei.

mwada'u i mamaani rongo goro mana mamaani ha'agorogoro nara hahaa'i.

¹⁹ Ma'ata 'inau 'au wa'ewa'e raha suria 'iraau hako'i mwane sae rau 'iraraa domou awasuriai Taroha Goro. Ma rei'uaa na o'asi, 'au 'irisia domoi aidangisi'i taha ra goro mamoi abui hau'i taha nara ai'a goro.

²⁰ Ma naasi, 'ia God ni gooroha, 'ai raurau 'anai 'a'auhi'amou mamoi ha'ahehoa Saetan.

Mau ha'arahesi neina 'ia Araha Jisas 'ai goro 'ini'amou.

²¹ 'Ia Timoti na tau'aro beiau 'a hua ro'u i ha'atee wa'ewa'e ana tana'amou. Mia Lusias mia Jeson, mia Sosipata, ra'i ai Jiu ro'u 'onaaiau, rau 'unu'i wou i ha'atee wa'ewa'e adaa'i tana'amou.

²² 'Inaua Tatias, i do'oramooou beia Araha, nau usuai usu-usu anani a Pol. 'Au ha'ataaria ro'u wou i ha'atee wa'ewa'e agua tana'amou.

²³⁻²⁴ 'Ia Gaeas 'a 'unua ro'u i ha'atee wa'ewa'e ana tana'amou. 'Iia na ha'awahiau na'i ruma ana ma ha'awateraa'u ro'u i sae hinihini 'anai ha'arahesi na'i ruma ana. 'Ia Erastus, mo'o na 'omesuri ha'a 'anai 'omaani mia do'oragaaua Kuatas, raru 'unu'i ro'u i ha'atee wa'ewa'e adaru'i tana'amou.

Ha'arahesi Ana Pol

²⁵ Gai ha'atee ha'agorohia God, 'inia 'iia na matai ha'a-o'oriai hinihini-mooou 'inia Taroha Goro nau taroha'inia tana'amou, 'e taroha 'abaia Jisas Kraest. Ni tarohasi 'a awa bainihu mau mai.

²⁶ Ma'ata na'i 'ohani, 'a ha'ata'i goro hura'a tanagaau suri'i Usu-usu Maea adaa'i rarabea. Mia God na awa mau mai, 'a ha'atorameu 'anai taroha'inia hura'a do neina 'iraau'i mwane inoni hako rai hinihinia marai araisuria.

²⁷ Naasi 'inia moi ta'i God na madoma, gai ha'atee ha'aasaa tarau tarau 'inia Jisas Kraest. Amen.

Na 'Etanai Usu-usu Ana Pol Tanaraaui Noni Hinihini Na'i Korin

Gere Mamaani 'Iniai Bukani

'A 'ua? Tara'i 'oha 'o wai'ado'ado suria 'onaa na maho na'o haa'i ra odo-odo ma'ua ra ai'a? 'E kae aba na'i Buka Rom 'a maania tanagaau taha nagai hinihinia. Ma na'i 'etanai Buka Korin 'ia Pol 'a ha'ausurigia 'iniai he'ua i here nagai haa ma'ua 'ai he'ua i barongagaa'i na'i 'oha gau hinihinia Jisas.

Korin 'e kae 'omaa ororiu na'i 'oha na 'ia Pol 'a usuai usu-usuni. Mana dorasi 'e dora na ragoi saeni dora he'ete'i hairiu, goni beiraau sae narau boboi na'i 'isi 'anai hohori ma 'anai raoraonga'i. Ra 'unua do ni 'omaasi 'e 'omaa ta'aa suria 'iraau sae ra hahaa'i mwani ora-ora'a ta'a'i.

'E 'aariha na 'ia Pol na haa na ura 'inia 'i heiso na'i 'omaasi. 'Ariwou ma rongoa do 'iraau tara'i sae hinihini rau taraawa'a haa'i ro'u i mareho ta'a'i na 'iraau sae na'i 'omaasi rau haa'i. 'Ariwou me 'iraau sae hinihini rau usu-usu tanaa marau songa'inia 'ini'i tara'i mareho. Mia Pol 'a orisiai usu-usu adaau ma arami'i tara'i heisonga'i narau songa'inia 'ini'i, ma ha'ata'u'uraau 'anai ha'a-odoodoraau nei narau haa'i mareho ta'a'i.

'A o'asi ro'u tanaraaui mwane noni hinihini na'i 'ohani. 'A ororiu 'anai ha'ausuringa'ini'i taha na 'ia Pol 'a ha'ausuriraaui 'ini'i noni na'i Korin. Na'i 'oha na 'oi 'oha'i, 'oi wai'ado'ado suri'i mareho na 'oi matai haa'i 'anai ha'ata'inia hura'a i taha na'o hinihinia.

¹ 'Inaua Pol na 'ia God na sigihiau 'anai Ha'ataari ana Jisas Kraest, mea Sostenes i do'oragaaui na'i Kraest,

² namiri hauai usu-usuni tana'amou sae ni heiso na'i Korin. 'Ia God 'a sigihi'amou 'anai ha'i noni ma'ea ana'i neina mou matai hagu beia Jisas Kraest. 'Ia God 'a haa o'asi ro'u tanaraau hako noni nara hinihinia Araha aga Jisas Kraest suri'i mwani dora. 'Ia Jisas naasi Araha aga hako.

³ 'Au ha'arahesi mia Godi Amaga mea Jisas Kraest, Araha aga, rarui ha'agorohi'amou mararui ha'a-awa ha'agorohi'amou.

Pol 'A Ha'atee Ha'agorohia God

⁴ 'Au ha'atee ha'agorohia God 'ado 'oha 'ini'i mwani bane rago na haa'i tana'amou 'iniai hagu amou beia Kraest Jisas.

⁵ Suriai o'asi ana, na tahingamoo'i ra honu 'ini'i mwani mareho goro, 'onaai huunai aidangisia amoua God ma ro'u 'iniai aidangi namou to'ora'a 'anai maania ro'u tanaraau haru nei.

⁶ 'A ha'ata'inia doni ha'ausuringa'i amee'i tana'amou 'inia Kraest ra ha'a-momori.

⁷ Naasi na mwani bane ni tatau'aro tanaa God, mou dau'i hako na'i mamasia namou haa i boi aho'i mai ana Araha aga 'ia Jisas Kraest.

⁸ 'Iia 'ai 'a'auhi'amou 'anai ura baabau na'i hinihinimooi neina 'a bwa'i mareho taritari'a namoi haa narai hiiri'amou 'inia na'i 'oha nai aho'i mai Araha aga, 'ia Jisas Kraest.

⁹ Mia God 'ai 'a'auhi'amou 'anai ura baabau, 'inia 'iia 'a mangudi suri'i duruduru ana'i. Me 'iia ro'u na soi'amou 'anai hagu goni beiai garena, 'ia Jisas Kraest, i Araha aga.

Heiho Na To'o Na'i Heiso

¹⁰ Arai do'ora mana asigu'i, na'i atana Araha aga Jisas Kraest wai ha'ata'u'u'amou. Moi 'adoma'i aratara neina heiho 'abwa'i awa na'i ahoaamou hairiu. Moi ahu aratara goni goro 'anai haa ta'i 'ado'ado.

11 Arai do'ora mana asigu'i, ra'i nei 'iniraaui ruruha ana Kloui narau 'unu ha'agorohia tanaau do ra'i ha'atee heiraeraesi nara to'o na'i ahoaamou hairiu.

12 'E nei ma o'ani, "'Inau 'au suria Pol," ma'e nei ma o'ani, "'Inau 'au suria Apolos." 'E nei ma o'ani, "'Inau 'au suria Pita," ma'e nei ma o'ani, "'Inau 'au suria Kraest."

13 'I'amou mou hoahoai abena Kraest 'inia taringai dora. 'A 'ua? 'Inaua Pol nau mae 'ini'o na'i dadaahoro ani? 'A 'ua? 'Inau nara bwareomaea'amou 'inia atagu?

14 'Au ha'atee ha'agorohia God 'inia ai'a tanei 'ini'amou nawai bwareomaeaa na'i murinai bwareomaeearua agua Krispas mea Gaeas.

15 Naasi 'a bwa'i nei nai 'unua do 'i'amou mou bwareomaea 'anai ha'i rongoiusuri tanaau.

16 'Au 'iraraa do ruruha ana ro'u moia Stefanas nau bwareomaeearau, ma ai'a tanei'a nawaigui 'iraraa ro'u do'au bwareomaeearau.

17 'Inia 'ia Kraest 'a ai'a ha'ataariau mai 'anai bwareomaeearaui sae, me 'anai taroha'inia Taroha Goro. Mau ai'a heitaroha'i 'ini'i mwani ha'atee nara rongo aidangi di'u. Ra gasigu hinihinia Kraest 'inia moi hadahadangagu nara rongo goro di'u. 'Onaa 'ai o'asi, ni mae na haua Kraest na'i dadaahoro 'ai 'ari pwaranga moi.

Na Huunai Madoma Ana God

18 Na taroha 'inia mae na haa Kraest 'ini'i ora-ora'a agaa'i na'i dadaahoro, 'e maho na rongo to'obweubweu'a tanaraui nei ra suriai tara 'anai mae. Me tanagiai nei na 'ia God na ruhasigia, ni tarohasi 'e mena 'anai ruhasigia baaniai ora-ora'a.

19 Na Usu-usu Maea 'a o'ani,
"'Inau wai ha'a-ai'ai aidangidi nei ra madoma,
mawai ha'ata'ai'i taha nara 'adoma'inia haa'i."*

20 Ma naasi ragui 'ua, 'ira nei ra madoma ma'ua 'iraaui nei ra madomasi'i Ringe ana'ia Moses ma'ua 'iraaui nei ra mataihere heitohetohe? 'Ia God 'a ha'a-ome to'o bweubweu'araau ma ha'ata'inia hura'a doni madomani marewana 'a to'o bweubweu'a.

21 'Inia na'i madoma ana God 'a ha'abwarasia baaniraaui noni 'anai aidangi tarihana God suri'i madoma adaa'i. Ma'ata tanaraui nei ra hinihiniai taroha nameu taroha'inia na rongo to'obweubweu'a tanarai saeni marewana, 'ia God 'ai ruhasiraaui.

22 'A rongo to'obweubweu'a tanaraui Jiu 'inia rau 'irisia di'u 'anai 'omesi'i ha'abu'oahu miraaui na Grik rau hinihinia moi maho na rongo madoma.

23 Mi'ameu meu ha'arangasia hura'a i mae na haa Kraest na'i dadaahoro. 'Iraau na Jiu rau 'itaai taroha naasi, miraaui nei narau ai'a Jiu, rau 'adoma'inia do ra'i ha'atee rongo to'obweubweu'a moi.

24 Ma'ata tanagaui nei na 'ia God na soigaaui 'anai ha'i noni ana'i, rei'uaa Jiu ma'ua ai'a, 'ia Kraest 'a ha'ata'inia mena mana madoma ana God.

25 'Inia ni 'ado'adona God na 'ome to'obweubweu'a tanaai noni, 'e aidangi na di'uai aidangina noni, mana taha na haa God na 'ome maemae'a tanaai noni, 'a mena di'uai taha na noni na matai haua.

26 Arai do'ora mana asigu'i, moisu 'adoma'inia madoraa na 'ia God na soi'amou 'anai suria Kraest. Na'i 'ado'adodaui ahurodo, taringai nei moi 'ini'amou nara 'adoma'inia domou madoma. Taringai nei moi namou ha'i na'otara, ma'uasi huta suri'i ruruha ororiu.

* 1:19 1:19 Aisaea 29:14

²⁷ Mia God 'a sigihiraau nei nara ai'a madoma do neina 'iraau nei ra madoma rai ninima, ma sigihiraau ro'u i nei ra 'adoma'i hunihuniraau moi, neina rai ninima i nei narau 'adoma'inia dorau ororiu.

²⁸ God 'a sigihiraau nei na 'iraau inoni na'i marewanani ra 'adoma'i hunihuniraau moi mara 'adoma'inia do rau ta'aa, neina 'iraau nei nara 'adoma'inia do rau ororiu, rai ha'i inoni nara ai'a ororiu moi.

²⁹ Naasi 'a ha'ata'inia do 'a bwa'i nei nai matai ha'a-ta'eta'ea haaria na'i maana God.

³⁰ 'Ia God haaria na wai'amou 'anai hagu beia Jisas Kraest. Mia Kraest 'a ha'ata'inia tanagiai huunai madoma ana God. 'A horigia hura'a baaniai ora-ora'a, ma 'inia hagu agaau beia, gau ha'i inoni ana'ia God ma ha'odoodogaau na'i maana.

³¹ Tarana naasi na Usu-usu Maea 'a o'ani,
 "Iatei na raba ha'atee ha'aba'o,
 'ai ha'atee ha'aba'o moi 'inia taha 'ia Araha na haua."†

2

Taroha 'Iniai Mae Na Haa Kraest

¹ Arai do'ora mana asigu'i, na'i 'oha nau boi bei'amou 'anai taroha'inia taroha 'inia God tana'amou,* 'inau ai'a haa'i ha'atee bwara tana'amou, ma'uasi dowai ha'atee 'onaai sae na madoma.

² 'Inia nau 'adoma'inia do ai'a ta mareho he'ete'i'a ro'u dowai gu'i hadanga'inia, me 'iia moia Jisas Kraest mana mae na haua na'i dadaahoro.

³ Na'i 'oha nau taha bei'amou, na abegu 'a maemae'a mau mamaa'u ha'i 'idi'idi.

⁴ Me suri'i hadahada agu'i mana ha'ausuringa'i agu'i, 'au ai'a bonasi'amou domoi hinihini 'ini'i mwani ha'atee nara rongo madoma di'u. Ma'ata 'oha nau hadahada, mou re'iai mena anai Hi'ona Maea na ha'ata'inia doni taroha naasi, 'e taroha na boi baania God.

⁵ 'Au haua o'asi, 'inia 'au 'irisia domoi hinihini 'inia re'ia amooui mena ana God, ma 'ai abu do 'inia rongoa amooui madoma anai noni.

Madoma Ana God

⁶ Ma'ata tanaraau nei ra wetewete mara baabau goroi hinihinidaa'i, 'i'ameu meu hadahada beiai madoma, mana madoma naasi, ai'a mado-mani marewanani, ma'ua ai'a madoma adaa'i mwaerahani marewanani narai hako moi.

⁷ 'I'ameu meu hadanga'iniai 'ado'ado madoma ana God na ai'a ha'ata'i ga'u tanaraau noni. 'Ia God na hauai 'ado'adosi 'anai 'a'auhigia dogai taha beia, ma 'adoma'inia mau mai na'i madoraa na marewana 'a ai'a pwa'ara mau.

⁸ Ai'a ta ta'i mwaeraha ni marewanani nai aidangisiai 'ado'ado madoma naasi. 'Inia 'onaa narai aidangisia, rau ga'i bwa'i rabuai Araha hauasa na'i hunganai dadaahoro.

⁹ Na Usu-usu Maea 'a o'ani,
 "Taha na ai'a noni nai re'ia ma'ua rongoa,
 mana taha na ai'a noni nai 'adoma'inia do'ai to'o,
 naasi taha na 'ia God na 'adoma'i ha'aagau 'inia tanaraau nei rau ta'ahia."†

¹⁰ Ma'ata na Hi'ona Maea ana God 'a ha'ata'ini'i maho 'isi tanagia, 'inia ni Hi'ona Maea 'a 'irara'i hakoi mwani maho, rei'uaa taha ra awa bainihu na'i 'ado'adona God.

† **1:31** 1:31 Jeremaea 9:24 * **2:1** 2:1 Tara'i Baebol ra o'ani, "Taroha Goro 'inia God na bainihu ga'u." † **2:9** 2:9 Aisaea 64:4

11 Na inoni haaria na aidangisia haariai taha na awa na'i 'adoma'ina. Ma o'asi ro'u, na Hi'ona Maea ana moia God na matai aidangisiai 'adoma'ina God.

12 'Igaau noni hinihini gau ai'a to'oraai 'adoma'idi noni ahurodo, ma'ata gau to'oraai Hi'ona Maea na 'ia God na ha'ataaria mai. 'A nugaa beigia magai aidangisi'i mwani mareho 'ia God na haa'i tanagia.

13 Naasi 'oha meu ha'ateenga'ini'i maho 'ini, meu ai'a ha'atee suriai madoma ni noni. Ma'ata meu ha'atee 'ini'i ha'atee na Hi'ona Maea na haa'i tana'ameu. Meu ha'atee 'ini'i ha'atee ni Hi'ona 'anai ha'ausuriraui noni 'ini'i mareho ni Hi'ona.

14 Me 'iatei na Hi'ona Maea ana God 'a ai'a awa beia, 'a bwa'i raba rongo'i mareho ni Hi'ona. Na nei nara o'asi, ra bwarai aidangi tarihadi mwane maho o'asi, 'inia na mareho o'asi ra rongo to'obweubweu'a moi tanaraau. Ni Hi'ona Maea naasi nai 'a'auhigia 'anai aidangisi'i mareho ni Hi'ona.

15 'Igiai nei na Hi'ona Maea 'a awa beigia, gau matai aidangisi'i mwane maho, mei tanaraui inoni ahurodo 'a bwara tanaraui aidangisi'i barongagaa'i.

16 Na Usu-usu Maea 'a o'ani,
"Iatei na aidangisiai 'adoma'ina Araha?

Iatei na matai ha'ausuria?"‡

Me 'igaaui gau matai aidangisi'i mareho ni Hi'ona, 'inia 'igaaui naasi na awa beigia i 'adoma'ina Kraest.

3

Inoni Tatau'aro Ana'ia God

1 Arai do'ora mana asigu'i, na'i 'oha nau awa bei'amou ani, 'au ai'a ha'atee 'onaai ha-ha'atee agua tanara i nei na Hi'ona Maea na marungi'i tahingadaa'i. Ma'ata 'au ha'atee tana'amou 'onaa moi noni nara ai'a aidangisia God, 'inia na tahingamoou beia Kraest 'a 'onaa mau i gare.

2 Na ha'ausuringa'i agu'i tana'amou ra 'onaai wai susu nau hanangi'amou 'ini'i, ai'a 'iniai mahoingau baabau. 'Au haua o'asi, suria 'i'amou mou ai'a arari mau 'anai ngau mahoingau baabau. Ma rei'uaa na'i 'ohanisi mamou ai'a arari ro'u mau,

3 'inia na barongamoo'i ra ta'isada mau 'onaai barongani ahurodo. Na'i 'oha namou hai'ubwani hairiu mamou heita'ia hairiu, 'a ha'ata'inia do 'i'amou mou here ro'u mau 'onaairaaui sae ahurodo.

4 'Oha na tara'i nei 'ini'amou ra o'ani, "I'ameu meu suria Pol," ma tara'i nei ra o'ani, "I'ameu meu suria Apolos," naasi 'a ha'ata'inia domou suria mau i barongani ahurodo.

5 'A 'ua? 'Iatei naasia Apolos, mia tei 'inau? 'I'amiria ra'i noni tatau'aro moi namiri 'a'auhi'amou ani 'anai hinihinia Araha. Mamiri suriai tatau'aro na 'ia Araha na nugaa tana'amiria.

6 'Inaua Pol nau 'onaai sae na hasi'i kora na'i mou, 'inia 'inau nau mania tahamora tana'amoui Taroha Goro. 'Ia Apolos na 'onaai nei na ringi 'ada'i wai, 'inia 'iia na boi na'i murigu ma ha'a-weteweteai hinihinimoou. Ma'ata ai'a 'i'amiria, mia God moi na ha'atahi'i.

7 Naasi na nei na hasi, mana nei na ringi 'ada'i wai raru ai'a ororiu. 'Ia God naasi na ororiu di'u, suria 'iia na ha'atahi'i.

8 'Ia mo'o na hasi mea mo'o na ringi 'ada'i wai raru ta'isada moi. 'Ia God naigui tahariraru 'ohadi tatau'aro adaru'i.

9 'I'amiria hakosi ra'i noni tatau'aro ana'ia God, mi'amou namou 'onaai mou ana.

‡ 2:16 2:16 Aisaea 40:13

T'amou 'onaai ro'u ruma ana God.

¹⁰ 'Iniai goro ana God 'iniau, 'inau 'au 'onaai nei na goro na'i tau'aro ruma. Nau 'onaai nei na 'ome sigihiai ano goro na ha'ababauai ruma ma tara'i nei he'ete'i nara tora ha'ahakoa wou. Me 'iatei nai tau'aronai ruma na'i anosi 'ai 'ome'ome goro.

¹¹ Ra gasi orisiai anosi 'inia ta ano he'ete'i, 'inia 'iia moia Kraest naasi ta'i ano'a na goro.

¹² Hoita, na'i tau'aro nara haa'i, tara'i nei rai tau'aro 'ini'i mwani maho goro 'onaai gol, silva ma'ua mwani hau 'ome goro. Ma tara'i nei rai haa'i maho 'onaai hasi'ei, hahaarisi, ma'ua ao.

¹³ Mana mwani mareho narau tatau'aro 'ini'i 'isi raigui ha'ata'i hura'a na'i dangi ni hihiri. Ni hihiri ana God 'ai 'onaai 'eu nai ha'imaani'i, 'onaa ra goro ma'ua ra ta'a'i.

¹⁴ 'Onaa tei na bwa'i noro i taha na tau'arona na'i hunganai anosi, naasi 'iia 'ai daua nana i heitahari.

¹⁵ Ma 'onaa 'iatei nai noro i taha na tau'arona, na mwani mareho ana'i rai ai'a'i ma bwa'i dau heitahari. Ma'ata rei'uaa na o'asi, 'ia God 'a bwa'i hiiri ha'amaesia. 'Ai 'onaai nei nara ha'atahia baaniai 'eu na'i ruma na noro.

Ha'abasu 'Iniai Ha'ata'aiai Ruma Maea Ana God

¹⁶ 'A 'ua? Mou ai'a 'iraraa do 'i'amou naasi Ruma Maea ana God mana Hi'ona Maea 'a awa bei'amou?

¹⁷ Naasi 'onaa 'ia tei nai boi maai ha'ata'aiai Ruma Maea ana God, 'ia God 'ai ha'ata'aia. 'Inia na Ruma Maea ana God 'a maea, mi'amou naasi Ruma Maea.

¹⁸ 'Oi abui pwari'i'o haari'o. 'Onaa 'o 'adoma'inia do'o madoma suri'i maho ni marewana, 'a goro do 'o ga'i 'onaai noni haaria moi na ai'a madoma na'i marewana, ma naasi 'oigui huunai madoma.

¹⁹ 'Inia 'ia God 'a 'omesiai madoma ni marewana, 'e maho haaria moi. Na Usu-usu Maea 'a o'ani,
 "Ia God 'a ha'ata'inia hura'ai bweu adaui nei ra madoma suri'i madoma adaa'i haarirau."*

²⁰ Ma o'ani ro'u,
 "Ia Araha 'a 'iraraa doni 'adoma'idi nei ra madoma, 'e mareho haaria moi."†

²¹ Naasi, 'oi abui ha'apa'o 'iniai bwauodo na'o suria. 'Inia na mwani mareho hako, 'ia God 'a haa'i tana'amou.

²² 'A hauameua Apolos mea Pita 'anai 'a'auhi'amou. 'A hua tana'amoui marewanani, 'a haa'i tahi mana mae, 'a haa tana'amoui dangini mana mwani dangi narai boi mau. Ni mwani maho hako 'isi 'iaamoo'i.

²³ Ma'ata, 'i'amou 'ia ana'ia Kraest, mia Kraest 'ia ana God.

4

Ha'ataari Ana'ia Kraest

¹ Naasi na mwani noni hako rau ga'i 'adoma'ini'ameu 'onaai inoni tatau'aro ana'ia Kraest nara ha'a-u'uri'ameu 'anai ha'atee ruhasi'i 'ado'adona'i a God nara ai'a ha'ata'i ga'u hura'a.

² Hoita, taha na ororiu na noni tatau'aro nai hua, naasi 'anai ha'isuri'i mareho na bwauodo ana na 'unu'i.

³ 'Inau, ai'a 'ua moe'a tanaau do 'i'amou ma'ua tara'i sae ro'u domoi hiiriai tau'aro agua tanaa Kraest. 'Inau mau ai'a hiiria ro'u i tau'aro agua haariau.

⁴ 'Inia rei'uaa nau ai'a 'ome 'iraraa ta maho nawai hua na taritari'a, gasi 'ia Araha 'a 'ome 'irara'i tara'i maho. 'Iia moi Araha aga na ta'isada 'anai hiiriau.

* 3:19 3:19 Job 5:13 † 3:20 3:20 Psalm 94:11

⁵ Naasi, abui hiiriai nata nei. Moi mamasia moi 'oha 'ia Araha 'ai aho'i mai. 'Iia nai ha'ata'ini'i hura'a i taha nara awa bainihu mana 'ado'ado ta'a'i nara awa na'i tahingana hakoi noni. Ma na'i 'ohasi 'ia God naigui hadahada taeniraau noni suri'i tatau'aro adaa'i.

⁶ Naasi 'anai 'a'auhi'amou arai do'ora mana asigu'i, 'inau 'au heiha'auu 'inimiria Apolos tana'amou mamoi aidangisia goro i ha'atee na o'ani, "Moi ha'isuriai taha na Usu-usu Maea na 'unua." 'Onaa moi haua o'asi, ma naasi namou bwa'i 'adoma'i ha'a-ororiua ta na'otara di'u'ai nata nei.

⁷ Ai'a tanei 'ini'amou nai ororiu di'u'ai nata nei. Na mwani maho namou to'ora'i, 'ia moia God na haa'i tana'amou. Ma 'onaa na o'asi, ma ai'a ta'isada domoi ha'aba'o 'ini'i, 'inia na mareho 'isi mou ai'a daa'i suri'i wetewete amoo'i haari'amou.

⁸ 'A 'ua? Mou 'adoma'inia dona mwani mareho namou 'irisi'i na'i tahingamou beia Kraest mou daa'i hako'a? Mou 'adoma'inia domou toto'ora'a 'ini'i mwani bane ni Hi'ona Maea? Ma 'ua? Mou 'adoma'inia doni hinihinimoo'i ra wetewete di'u 'onaa wetewete na haa i mena na to'oraa i mwaeraha, mi'ameu ai'a? 'A ga'i goro do mou ga'i ha'i mwaeraha moi, neina mei heimarungi goni ro'u bei'amou.

⁹ Ma'ata na'i 'ado'adogu, 'a 'ome 'onaa do 'ia God 'a sigihi'ameui Ha'ataari 'anai siri suri'i mwani maho bwara. 'I'ameu meu 'onaa nei ra hiiria 'anai ha'amaesia ma 'anai ha'areirei 'inia na'i maadaau hakoi noni mana enjel.

¹⁰ 'A 'ome 'onaa do 'i'amou mou 'adoma'inia domeu bweu 'ini hinihinia ameeua Kraest. Ma he'ua namou 'adoma'inia do 'i'amou mou madoma 'ini hinihinia amoo'ua Kraest? Mou 'adoma'inia domeu maemae'a, mi'amou mou 'adoma'inia domou mena di'u! 'A he'ua nara ha'ahou'amou, mi'ameu ra 'itameu!

¹¹ Tari mai 'ohanisi meu awa hihioro'a ma maesi'ameui gono, mameu ho'o ngangatai bwana. Ra hidaari'ameu mameu ai'a to'ora ruma.

¹² Meu tau'aro raha haarimeeu 'anai hori'i maho nameu rabasi'i. Meu ha'agorohiraui nei ra 'isi'isi'ameu mameu ahumaratanoa 'oha ra nora ta'ai'ameu.

¹³ Na'i 'oha ra ha'atee ha'a-ta'ai'ameu, meu 'abenga'i ha'atee goro tanaraau. Ma tari mai 'ohani, 'a ragoi noni na'i marewanani ra 'adoma'i mara ha'aro'a ma'ua mareho ta'aa 'ini'ameu.

¹⁴ Na usu-usuni 'au ai'a haua do 'anai ha'a-arungata'ai'amou, me 'anai ha'ausuri'amou suria 'au ta'ahi'amou 'onaa ama na ta'ahi'i gare ana'i.

¹⁵ 'Au ha'atee o'asi, 'inia rei'uaa na 'e tangahuru merui noni narau ha'ausuri'amou 'inia Kraest, me 'i'amou mou to'oraa moi ta'i ama. Na'i tahingamou beia Kraest, 'inau nau 'onaa amamou 'inia waia mai aguai Taroha Goro tana'amou.

¹⁶ Naasi 'au ha'a-ta'u'u'amou 'anai awasuriau.

¹⁷ Tarana naasi nawai ha'ataaria wou 'inia Timoti.* 'Iia 'ai ha'a 'adoma'i aho'isi'amou 'ini'i ha'ausuringa'i agu'i mana awaha odo-odo nau haua 'onaa Ha'ataari ana Jisas Kraest. Mana mareho nai ha'ausuri'amou 'ini'i, naasi mareho nau bwane ha'ausuriraa ro'u i noni hinihini 'ini'i suri'i mwani dora hako nau taha suri'i. 'Ia Timoti 'e noni na mangudi suri'i tatau'aro ana'i tanaau, mei tanaau 'a 'onaa do 'ia 'e gare agua nau ta'ahia di'u.

¹⁸ 'Au 'iraraa do tara'i nei 'ini'amou mou ha'aba'o na'i 'ohani, 'inia mou 'adoma'inia do 'augu bwa'i ataha'a bei'amou.

¹⁹ Ma'ata 'onaa 'ia Araha 'a 'irisia, ma 'a bwa'i orea mawai ataha'a bei'amou ma waigui 'iraraa 'onaa 'i'amou nei namou ha'aba'o di'usi, mou hadahada rago kongari moi, ma'ua mou hadahada beiai mena.

* 4:17 4:17 Tara'i Baebol ra o'ani "Tarana naasi nau ha'ataaria wou 'inia Timoti."

²⁰ Mou 'iraraa, 'oha 'ia God 'a marungiai tahingamu, 'a ai'a ha'ata'i moi na'i hadahadangamu, me 'a ha'ata'i ro'u suri'i taha na'o haa'i beia i mena ana.

²¹ Hoita, 'e taha namou rabasia dowai haa 'oha wai ataha wou? Wai ataha wou 'anai ha'a-mama'ai'amou, ma'ua wai ataha wou beiai raromani heita'ahi mana awa 'abenga'i?

5

Here Wawaasua'a Na'i Heisoi

¹ 'Inau 'au heimwaota'i di'u 'iniaai rongoa agua do 'e nei 'ini'amou na hauai here na ta'aa di'u. Ni here naasi, rei'uaa nei ra ai'a hinihinia God ma bwara ro'u dorai haua! 'Au rongoa do 'e nei 'ini'amou na mamauru beiai ruanai urao ana mama ana.

² Ai'a ta'isada domoi ha'aba'o, ma'ata mou ga'i arunga ahutotou 'iniaai marehosi. Mia mo'o na hauai heresi, 'a ta'isada domou ga'i ha'ahura'ahia baaniai ruruha amoo.

³⁻⁴ Rei'uaa nau awa ha'atau, ma'ata na'i tahingagu hako 'inau bei'amou. Naasi 'a 'onaa do 'inau 'au awa moi bei'amou, ma 'iniaai mena ana Jisas, 'au bwane hiiria mo'o na hauai heresi. Naani maho namoi haua. Moi boi goni 'onaa noni hinihini mamoi 'iraraa ro'u do 'inau 'au awa ro'u bei'amou. Hoita naasi, 'iniaai mena ana Araha Jisas

⁵ moi watea mo'o na hauai heresi tanaa Saetan mai ha'a-rongomaata'ia na'i tahitahi ana. Ma 'onaa 'ai rihosi, 'ia Araha 'ai ha'atahia na'i dangi nai aho'i mai 'anai hiiriraau noni.

⁶ 'I'amou mou watea mo'osi 'anai awa mau na'i ruruha amoo. Ai'a ta'isada domoi ha'aba'o 'iniaai mahosi! 'I'amou bwani 'iraraai ha'atee na o'ani, "E gere meme i draebam kekerei ta'aa moi na matai ha'asu'ua hako flaoa."

⁷ Naasi moi nugaa hura'a i draebam baani'amou mamoi awa odo-odo. Ha'amomori di'u, na'i 'ado'adona God, 'i'amou mou odo-odo'a na'i maana. 'A o'asi suria 'ia Kraest 'a mae 'inigia 'onaa garei siip nara ho'asi 'inia ani 'anai ha'abwarasiai mae na'i Roho Aharau.

⁸ Naasi, 'oha gai boi goni 'anai ha'ato'oai Rongo ni Roho Aharau, gai abui boi beiai draebam ni ta'aa mana ora-ora'a, ma'ata beiai tahinga na ha'amomori tarau.

⁹ Na'i usu-usu agua tana'amou ani, nau bwane usua dio domoi abui mamaani bei'i nei ra awa moi 'anai wawaasua'a.

¹⁰ Nau ai'a 'unua domoi abui mamaani beiraau nei ra ahurodo nara wawaasua'a mara naga, ma'ua nara beri mara ha'arahesi'i araaranunu. 'Onaa 'o raba hora baani'i sae o'asi, ma'oi hanota baaniai marewana.

¹¹ Ma'ata, 'inau 'au 'unua domoi abui mamaani beiraau nei narau 'unuraau dora'i sae hinihini maragu awa moi 'anai wawaasua'a mara naga 'ini'i mareho adaa'i sae he'ete'i, nei ra ha'arahesi'i araaranunu mara ha'atee ha'ata'aiatai nata nei, nei ra gono raha 'iniaai waini bweu mara beri raha. Na inoni hinihini o'asi, moi abui haigaau beiraau. Rei'uaa domoi heinagu moi 'anai ngau hasura'i beiraau, mamoi abu ro'u.

¹²⁻¹³ 'Io, 'inau ai'a tanaau 'anai hiiriraau nei nara ai'a awa na'i heisoi, 'inia 'ia God naasi 'anai hiiriraau. Mi'amou naasi 'anai hiiriraau nei nara awa na'i heisoi. Na Usu-usu Maea 'a o'ani, "Iatei na ta'aa bei'amou, moi ha'ahura'ahia baaniai ruruha amoo."

6

Herehere 'Anai Ha'a-aratara'i Heita'ia

¹ Na'i 'oha na 'e nei 'ini'amou na heita'ia beiai nata sae hinihini, 'a 'ua namou 'irisia moe'a 'anai taranga'inia tanaraau sae hihiri nara

ai'a hinihinia God 'anai ha'a-arataraa? Marehosi, 'e maho namou ga'i taranga'inia tanaraaui noni ana'ia God 'anai ha'a-arataraa.

² 'A 'ua? Mou ai'a 'iraraa do'igaau noni ana'ia God nagai hiiriraaui hako noni ni marewana na'i madoraa nai boi mau? Ma 'onaa 'i'amou namoi hiiri'i hako noni nai marewana, ma'ua na bwara moi 'inia tana'amou i ha'a-aratara'i gere haiu'au'a o'asi?

³ Mamou ai'a 'iraraa do'igaau noni ana'ia God nagai hiiriraaui ro'u i enjel? 'Onaa na o'asi, 'a ga'i bwa'i bwara 'anai ha'a-aratara'i haiu'au'a ni marewanani.

⁴ 'Oha nara to'o i heita'ia bei'amou, mou ga'i bwa'i taranga'ini'i tanaraaui ahurodo na 'iraaui sae hinihini ra ai'a ha'ahouraaui na'i aba 'anai ha'a-aratara'i mareho o'asi.*

⁵ Romwane, mou ga'i ninima suriai heresi! 'A 'ua? 'Agu ai'a ta ta'i sae'a ro'u bei'amou naigui gere aidangi goro 'anai ha'a-aratara'i haiu'au'a nara to'oto'o o'asi na'i ahoaamou?

⁶ 'A ga'i goro 'onaa 'ai o'asi. Ma'ata mareho na to'oto'o na'i 'ohanisi, 'e noni hinihini ma waiai nata noni hinihini na'i kooti na'i maadaaui hako ahurodo!

⁷ Na'i 'oha namou waiai nata noni hinihini na'i kooti, 'i'amou mou bwane heho'a na'i maana God. 'A ga'i goro 'onaa moi 'adoma'i nugasia moi here ta'aa anai nata sae, ma'ua moi nugasia moi marai ha'a-bweubweu'amou 'ini'i ha'a amoo'i.

⁸ Mi'amou, rei'uaa na mou ha'i inoni hinihini, mou here ha'a-ta'ai'amou moi hairiu mamou ha'a-bweubweu'amou hairiu 'ini'i ha'a amoo'i.

⁹ Moi aidangisia do 'iraaui nei ra ta'a'i ra bwa'i siri mwada'u na'i hourana ana God. Abu pwari'i'amou haarimooi 'iniai mahosi. 'Iraaui nei ra wawaasua'a mana nei ra ha'arahesi'i araanunu, mana nei nara taritari'a baani'i mwane ma'ua urao adaa'i, mana mwane nara wawaasua'a bei'i ro'u moi sae mwane,

¹⁰ miraaui nei ra beriberi mana nei ra naga 'ini'i mwane maho, 'iraaui nei ra gono raha 'ini'i waini bweu mana nei ra ha'atee ha'ata'ai'ia nata nei mana nei ra ha'a-bweubweu'araaui noni 'anai rahi'i baaniraaui mareho narau to'ora'i, 'a bwa'i nei 'iniraaui nei o'asi nai siri mwada'u na'i hourana ana God.

¹¹ Tara'i nei 'ini'amou mou o'asi ga'u na'i na'o. Mana'i 'ohani, na mena ana Araha aga Jisas Kraest mana Hi'ona Maea ana God 'a ha'a-wariwari'amou baaniai ora-ora'a mamouga ha'i noni ana'ia God, naasi namouga odo-odo 'inia na'i maana.

Hora Baaniai Ora-ora'a Ni Wawaasua'a

¹² Gasi, ra'i nei 'ini'amou moi 'adoma'i o'ani, "Inau wai matai haua moi ta maho nawai 'adoma'iniai haua." Ha'amomori. Ma'ata 'inau wai 'unua tana'amou, ai'a do mwane mareho ra goro hako tanagia 'anai haa'i. Naasi 'inau 'a bwa'i mareho nawai watea na'i talingagu 'anai slev tanaa.

¹³ Mamoi o'ani ro'u, "Ni mahoingau ra haa'i 'ada'i ahugaa'i, mana ahugaa'i ra awa 'ada'i mahoingau. 'A o'asi ro'u, ni abegaa'i naasi 'anai wawaasua'a 'ini'i." Ma'ata 'inau wai 'unua ro'u tana'amou, na'i 'oha nagai to'oraai abe haoru ara'ai aro, 'ia God 'ai ha'a-ai'aai ahu mana mahoingau. Ni abegaa'i, 'ia God 'a ai'a haa tanagia do 'anai wawaasua'a, ma'ata 'a haua tanagia 'anai tau'aro tanaai Araha aga. Mia Araha naasi 'anai marungiai abega.

* **6:4** 6:4 I nata herehere 'anai orisiai tatarani 'a o'ani, "Rei'uaa ta sae namoiwou 'ini'amou sae hinihini, ma 'a ga'i matai ha'a-aratara'i moi taha nara taritari'a na'i ahoaamou hairiu."

¹⁴ Mana abegaa'i ra bwa'i ai'a'i tarau 'onaai mahoingau ani, 'inia 'ia God 'ai ha'a-suruta'egaau baaniai mae 'inia mena ana, 'onaai ha'a-suruta'ea ana aho'ia Araha.

¹⁵ 'A 'ua? Mou ai'a 'iraraa do 'oha namou ha'i ta'i beia Kraest 'a 'onaa do abemoo'i ra hasi beiai abena? Ma 'ua? 'A goro dowai haa ta aba 'inia Kraest mawai ha'ahasia wou na'i abenai urao rebirebi? 'A bwa'i!

¹⁶ 'Onaa 'iatei na hasi beiai urao rebirebi, 'iia 'e ta'i beia na'i abe. 'Inia na Usu-usu Maea 'a 'unua o'ani, "Irarua rarugui ha'i ta'i abe."

¹⁷ Ma'ata na nei na hagu beia Kraest, 'iia 'a ha'i ta'i beia na'i tahingana.

¹⁸ Naasi, moi hora baaniai ora-ora'a ni wawaasua'a. Mwane taraani ora-ora'a ra matai ha'ata'aiai abe, ma'ata ra ai'a ha'ata'aia di'u 'onaai ora-ora'a ni wawaasua'a.

¹⁹ 'A 'ua? Mou ai'a 'iraraa dona abemoo'i 'e Ruma Maea anai Hi'ona Maea na haua tana'amou a God do 'anai awa na'i raromoo? Na abemu 'a ai'a 'iaamua, ma'ata 'iaana God.

²⁰ Suria ni hori'o na haua 'a di'u baani'i hakoi mwani maho. Naasi 'oi haai abemu 'anai haua moi taha 'anai ha'a-wa'ewa'ea God.

7

Ha'ausuringa'i Na'i Ringei Ha'iwai

¹ 'Io. 'Au raba arami'i maho namou songa'iniau 'ini'i na'i usu-usu namou haua ani, na'i aba 'inia ha'iwai. 'A goro moi 'onaa ni mwane 'ai abui ha'iwai.

² Me suria 'a raha di'u i here wawaasua'a, naasi na goro 'inia do na mwane 'ai to'oraai urao ana haaria, mana urao 'ai to'oraai mwane ana haaria.

³ Na mwane 'ai watea haaria tanaai urao ana mana urao 'ai watea haaria tanaai mwane ana. Ma rarui wa'ewa'e suri'i hei'irisidaru'i.

⁴ Na abenai urao ai'a do 'iaana haaria, ma'ata 'iaana ro'u i mwane ana. Mana abenai saemwane ai'a do 'iaana haaria, ma'ata 'iaana ro'u i urao ana.

⁵ Murui abui kakawata'i watemurua tana'amurua haarimurua. Ma'ata, 'a goro moi 'onaa murui 'adoma'i aratara 'anai mamarota'i mauru goni 'anai nuga madoraa 'anai ha'arahesi. Me murui haua suriai gere madoraa moi ma murugui tano mauru goni aho'i. 'A gasi ohongi'amurua Saetan 'anai taritari'a beiai nata nei, suria 'i'amou mou ai'a wetewete arari 'anai ura baabau bwarasi'i 'adoma'i ta'a'i suri'i tahingamoo'i.

⁶ Nau 'unuai mahosi ai'a do'e ha'atora tana'amou, ma'ata 'anai ha'a-aidangisi'amou do 'inau 'au 'adoma'i ha'agorohia 'anai haua o'asi.

⁷ 'Au 'adoma'inia do 'a ga'i goro domou ga'i bwa'i ha'iwai 'onaai. Ma'ata 'ia God 'a haa'i tanagiai mwane bane he'ete'i hairiu, tara'i nei ra to'oraai bane 'anai ha'iwai ma tara'i nei ra to'oraai bane 'anai awa o'asi moi ha'i bwa'i ha'iwai.

⁸ Hoita, tana'amoui nei namou ai'a ha'iwai mana nao, 'au 'adoma'inia do'a goro domou ga'i awa o'asi moi 'onaai.

⁹ Ma'ata 'onaa na bwara tana'amou i ura bwarasi'i hei'irisi ta'a'i na'i tahingamoo'i ma 'a goro domou ga'i ha'iwai moi. Mou gasi awa moi 'anai 'adoma'i sisiwa 'inia nata nei.

¹⁰ Mau raba 'unua tana'amoui nei namou ha'iwai, ai'a mareho dowai 'unua moi suriai 'ado'adogu, ma'ata 'e ha'atora baania Araha. Na urao 'a ga'i bwa'i gaasiai mwane ana.

¹¹ Ma'ata 'onaa na gaasia, ma 'iia 'ai awa haaria o'asi'a 'onaa na bwa'i hagu aho'i beiai mwane ana. Ma o'asi ro'u, na mwane 'a ga'i bwa'i gaasiai urao ana.

¹²⁻¹³ Mei tana'amou tara'i nei, 'e maho nawai 'unua tana'amou. Mana mahosi ai'a ha'atora baania Araha, ma'ata 'e maho nau 'adoma'i ha'agorohia

moi. 'Onaa 'e rua sae raru ha'iwai nararu ai'a hinihini. Ma 'ari wou mana mwane 'a hinihini mana urao 'a ai'a, na mwane ana 'ai abui gaasia 'onaa uraosi 'a 'adoma'i aratara mau 'anai awa beia. Ma 'onaa 'e urao hinihini na to'oraai mwane na ai'a hinihini mana mwanesi 'a 'adoma'i ta'isada mau 'anai awa beia, ni urao 'ai abui gaasiai mwane ana.

¹⁴ Suria na mwane na ai'a hinihini, 'a matai ha'i ta'i na'i ruruha ana God 'iniaai awa ana beiai urao ana na hinihini. Mana urao na ai'a hinihini, 'a matai ha'i ta'i ro'u na'i ruruha ana God 'iniaai awa ana beiai mwane ana na hinihini. 'Onaa na ga'i bwa'i o'asi, na gare amoo'i ra ga'i 'onaai'i gare ahurodo. Ma'ata 'a ai'a o'asi! 'Ia God 'a wairaaui ro'u na'i ruruha ana.

¹⁵ Me ma'ata 'onaa na nata abe na ai'a hinihini 'iniraruai nai raba haigaasi, nugaa moi mai o'asi. 'Ia God 'a ha'awatea moi, 'inia 'iia ai'a soi'amou 'anai awa ta'aa me 'a soi'amou 'anai awa goni goro.

¹⁶ Ma rei'uaa na rarui awa goni tarau, 'a bwarai 'iraraa 'onaa ni nei na ai'a hinihini 'ai hinihini mau ma'ua bwa'i.

Awa Suriai Hei'irisina God

¹⁷ 'Ahutana hakoi noni ra ga'i wa'ewa'e 'iniaai awa he'ua na 'ia Araha na nugaa tanaraau na'i 'oha na 'ia God 'a soiraaui 'anai hinihinia Kraest. Naasi mareho nau ha'ausuriraaui 'inia i noni hinihini suri'i mwani dora nau taha suri'i.

¹⁸ 'Onaa 'e nei na bwani dauai ringei aha ha'ara maagu hinihinia Kraest, 'ai abui torakoke i 'adoma'ina 'inia. Ma 'onaa na ai'a haua maui ringe naasi, ma'ai abui ha'isuria.

¹⁹ 'Inia 'a ai'a ororiu 'onaa na'o suriai ringei aha ha'ara ma'uasi ai'a. Taha na ororiu di'u, naasi 'anai ha'isuri'i maho na 'ia God na 'unu'i.

²⁰ Rei'uaa awaha he'ua ma'ua tau'aro he'ua namou awasuria na'i 'oha 'ia God na soi'amou 'anai hinihinia Kraest, moi abu bonasiai orisi baania.

²¹ 'Onaa na i'oe 'e slev na'i 'oha na'o taraawa'a hinihinia Kraest, ma'ai abui ta'aabemu 'iniaai awa amua 'onaai slev. Ma'ata 'onaa bwauodo amua 'a raba ha'a-awa dadara'a'o, ma'oi ha'awatea moi.

²² Mamoi aidangisia, 'onaa 'e slev na 'ia Araha na soia, 'iia 'a awa dadara'a'a baaniai mena ni ora-ora'a. Ma 'onaa 'e sae na ai'a slev na'i 'oha nara soia, 'iia 'a ha'i slevi'a tanaa Kraest.

²³ Na mae na haua Kraest 'a hori raha 'ini'amou. Naasi mou abui bahurongoraaui nei nara 'unua domoi orisiai awa-awa namou bwani hahaa'i.

²⁴ Naasi arai do'ora mana asigu'i, rei'uaa awaha he'ua ma'ua tau'aro he'ua namou awasuria na'i 'oha na 'ia God na soi'amou, moi abu bonasiai orisi baania.

Heisonga'i 'Iniraau Nei Ra Ai'a Ha'iwai

²⁵ 'Io, 'au raba aramiai heisonga'i amooi 'iniraau nei nara ai'a ha'iwai. 'A ai'a ha'atora baania Araha nawai 'iraraa 'inia 'anai maania tana'amou, ma'ata wai 'unua tana'amoui 'adoma'igu 'iniaai marehosi. Mou matai 'u'uriau, 'inia 'ia Araha 'a ahu ta'ahiau ma haua tanaau i madoma.

²⁶ 'Au 'adoma'inia do, 'iniaai awa agaau inoni hinihini na'i madoraa bwara na'i 'ohani, 'a goro domoi awa moi 'onaai awa namou bwane hahaa.

²⁷ 'Onaa i'oe 'e sae na'o bwani ha'iwai, 'oi abui bonasia gaasiai urao amua, ma 'onaa na'o ai'a ha'iwai mau, ma'oi abui bonasiai ha'iwai.

²⁸ Me ma'ata 'onaa 'oi ha'iwai, 'o ai'a ora-ora'a bwarasia God. Ma ai'a ora-ora'a ro'u tanaai gere urao na ai'a ha'iwai mau ma do'aigui ha'iwai. Na mareho nau 'adoma'iniasi, naasi 'anai ha'abwarasi'i baani'amou i mwane mareho bwara narai to'o tana'amou i nei namoi ha'iwai.

²⁹ Na mareho na ororiu domoi aidangisia, do na madoraa 'anai hau'i tau'aro ana'ia Araha 'a pwapwaku tanagaau. Naasi, 'a goro do 'iraau

nei nara ha'iwai rai tau'aro raha tanaa Araha 'onaai nei na ai'a ha'iwai 'onaai'au.

³⁰ 'A o'asi ro'u, ai'a goro doni ahutotou ma'ua wa'ewa'e ma'ua toto'ora amua 'ai ha'abwarasi'o 'anai hauai tau'aro ana Araha.

³¹ Suri'i mwani maho nagai haa'i ma'ua to'ora'i na'i marewanani, gai abui 'adoma'i ororiu di'u 'ini'i. 'Inia na marewanani 'a bwa'i orea mai hako.

³² 'Au ai'a 'irisia domoi 'adoma'i ororiu 'inia ta maho na'i marewanani. Na nei na ai'a ha'iwai 'a matai 'adoma'i riu 'anai ha'a-wa'ewa'ea Araha na'i tatau'aro ana na haua tanaa.

³³ Ma'ata, na nei na ha'iwai 'a 'adoma'i riu moi 'ini'i tatau'aro ana'i haaria na'i marewanani ma 'anai ha'a-wa'ewa'ei urao ana.

³⁴ Na 'adoma'ina 'a heiruarua'a. 'A ta'isada ro'u o'asi i urao ha'iwai. 'Iia 'a 'adoma'i riu moi 'ini'i tatau'aro ana'i na'i marewana ma 'anai ha'a-wa'ewa'ei mwane ana. Ma'ata, na gere urao ma'ua urao raha na ai'a ha'iwai, 'a 'adoma'i riu 'anai wateai tahingana hako 'anai ha'a-wa'ewa'ea God na'i tatau'aro ana na haua tanaa.

³⁵ Nau 'unu'i mareho 'isi tana'amou suria 'au raba 'a'auhi'amou, ai'a dowai ha'a-bwarasi'amou baaniai ha'iwai. Me 'au 'irisia domoi wate'amou dadara'a 'anai tau'aro tanaa God ma 'anai hauai taha na goro ma odo-odo.

³⁶ 'Onaa 'e mwane na 'adoma'inia do'ai taritari'a beiai urao nararu hagu'hagu 'anai ha'iwai, ma 'onaa ni harisinai uraosi 'a ta'isada 'anai ha'iwai, 'a goro do'ai waina. Ai'a mareho nai taritari'a 'inia.

³⁷ Me 'onaa ai'a sae nai ha'a-'usu'usua do'ai ha'iwai ma 'onaa 'a matai 'omesuria haaria baaniai ora-ora'a ma 'adoma'i wetewete do'a bwa'i ha'iwai, 'a goro do rarui abui ha'iwai.

³⁸ Naasi, na'i 'ado'adogu, 'a goro moi 'onaa rarui ha'iwai. Ma'ata 'a goro di'u baania 'onaa nararu bwa'i ha'iwai.

³⁹ Na urao ha'iwai 'ai awa tarau beiai mwane ana, 'ai abui gaasia. Ma'ata na'i 'oha na mwane ana 'ai mae, naasi 'ai matai waina ta sae he'ete'i nai 'adoma'inia, 'onaa ni saesi 'e sae hinihini.

⁴⁰ Ma'ata 'onaa na ga'i bwa'i ha'iwai aho'i, 'au 'adoma'inia do 'a ga'i wa'ewa'e di'u ro'u wou. Naasi 'ado'adogu, me 'au 'adoma'inia doni Hi'ona Maea ana God 'a 'adoma'i o'asi ro'u.

8

Heisonga'i 'Ini'i Mahoingau Nara Wate'i

Tanaai Araaranunu

¹ 'Io, nau raba aramiai heisonga'i amouu 'iniai mahoingau nara ho'asi'i 'ini'i tana'i araaranunu. Ha'amomori, 'igaau hako'i noni gau 'adoma'inia dogau aidangisiai taha ra ha'a-momori mana maho ra ai'a. Na 'ado'adosi 'a haua moi ha'a-ta'eta'e na'i tahinganai noni. Ma'ata na heita'ahi 'a 'a'auhia nata nei.

² Tei na o'ani, "Inau 'au aidangisia goro doni mahosi 'a odo-odo moi 'anai haua." Na noni o'asi 'a ai'a huunai aidangisia mau i mahosi.

³ Ma'ata 'ia God 'a aidangisiraau nei narau ta'ahia.

⁴ Hoita, naani 'ado'adogu 'ini'i mahoingau nara ho'asi 'ini'i tana'i araaranunu, 'onaa ra odo-odo moi tanagaau 'anai ngaa'i ma'ua ai'a. Gau 'iraraa doni araaranunu ai'a huunai hi'ona. Magau 'iraraa do'e ta'i Hi'ona moi na awa.

⁵ Ha'amomori, 'a ragoi nei nara ha'arahesi'i maho na'i ahoasara ma na'i marewana nara 'unu hi'ona mana araha 'ini'i. Ma'ata rei'uaa na o'asi,

⁶ 'igaau gau hinihinia moi ta'i God. 'Iia naasi amaga hako, na ha'apwa'ara'i 'ahutadi mareho na'i ahoasara ma na'i marewana nagau awa 'anai tau'aro tanaa. Ma'e ta'i Araha, 'ia Jisas Kraest. 'Iia na 'a'auhia God

'anai ha'apwa'ara'i mwani mareho hako, me 'iia na haua tanagia i huunai tahi.

⁷ Ma'ata ai'a dona mwani noni hinihini hako narau aidangisiai mareho naasi. 'Inia taraawa'a mau mai 'oha rau kekerei, rau 'adoma'inia doni araaranunu 'e huunai hi'ona. Naasi na'i 'ohani, na'i 'oha narau ngaa'i mahoingau na 'irai ahurodo ra ho'asi'i tanaai araaranunu, rau arunga 'ino'a, suria rau 'adoma'inia dorau ngaa'i maho nara ho'asi 'ini'i tanaai hi'ona ta'aa.

⁸ Na mahoingau nagau ngaa'i, 'a bwa'i ha'ata'ai ai hagu hagu agaau beia God. Rei'uaa nagai ngaa'i ma'ua bwa'i, me na'i maana God, gau 'ome ta'isada moi.

⁹ Ma rei'uaa na o'asi, 'i'amou namou aidangisiai mahosi, moi 'ome'ome goro. Mou gasi ngaa'i mahoingau nara ho'asi 'ini'i tanaai araaranunu, mamougu ha'ata'ai'i hinihinidaa'i nei na hinihinidi ra maemae'a.

¹⁰ 'Inia 'onaa na'oi ngau na'i ruma nara ha'arahesia iei araaranunu, mana nei nai maemae'a i hinihinina 'ai 'omesi'o, 'aigui ha'a-weteweteai 'adoma'ina 'anai ngaa'i mahoingau nara ho'asi 'ini'i tanaai araaranunu maai matai arunga 'ino'a 'inia.

¹¹ Naasi na aidangi na'o to'oraa do mwani mahoingau hako ra odo-odo 'anai ngaa'i, 'ai ha'a-ai'aai hinihinina mo'o na ai'a wetewete i hinihinina beia God. Maagu 'iia ro'u 'e ta'i 'inigaau noni na 'ia Kraest na mae 'anai ha'atahigia.

¹² Naasi na'i 'oha na'o ha'a-weteweteai 'adoma'inai nata inoni hinihini 'anai hauai maho na arunga 'ino'a 'inia, i'oe 'o here ha'ata'aia mo'osi ma'o here ha'ata'aia ro'ua Kraest.

¹³ Naasi 'onaa nawai ngaa ta maho nai ha'ata'ai ai hinihinina nata inoni hinihini, ma naasi 'a bwa'i ta 'oha'a ro'u nawaigu'i ngaua ta mahoingau o'asi. 'Au gasigu taarai haua moi ta maho tanaai do'oragu nai ha'a-wetewetea 'anai haua ta maho nai 'adoma'inia moi do ai'a goro.

9

Pol Mana Tatau'aro Adaui Ha'ataari

¹ 'Inau 'au dadara'a 'anai suriai hei'irisina Kraest, minau 'e Ha'ataari, me 'inau 'au 'omesia Araha aga 'ia Jisas Kraest. Mana huanai tatau'aro agua tanaa Araha, naia i hinihini namou haua beia.

² Rei'uaa ra'i nei ra 'adoma'inia do 'inau ai'a Ha'ataari, ma'ata mou 'iraraa do 'inau 'e nei. 'Inia 'oha nau rihosi'amou 'anai hinihinia Kraest, 'a ha'ata'inia do 'inau ro'u 'e ta'i nei 'iniraau Ha'ataari.

³ Naani heiarami nau haa tanaraau nei narau 'unu'unuau.

⁴ Suria 'inau 'e Ha'ataari, 'inau 'au ta'isada 'anai ha'angoniraau noni hinihini 'anai 'a'auhiau 'ini'i taha nau 'irisi'i, 'onaai mahoingau mana waini gono.

⁵ Minau matai waina ro'u moi ta urao hinihini, ma 'iia 'ai matai 'aariha ro'u beiau na'i 'oha nau hura'a 'anai taroha'iniai Taroha Goro, 'onaai'i tara'i Ha'ataari mia Pita, miraaui do'orana'ia Araha.

⁶ Ma 'ua? 'A odo-odo do 'i'amiria moia Banabas namiri haa'i tara'i tau'aro he'ete'i 'anai siba ha'a 'anai hori'i maho namiri 'irisi'i, miraaui haru Ha'ataari, moi hihisungiraau moi?

⁷ 'Onaai 'iraraa amoou, ai'a tanei nai awa na'i ruruhani hehei'oi maai hori'i haariai taha na hau'i 'anai tatau'aro ana. Mia mo'o na tau'aronai mou 'ai matai ngaa moi taha na hasia na'i mou ana. Mia mo'o na 'omesuri siip naasi na matai rosi wai susu baani'i siip ana'i 'anai gono.

⁸ Na mareho 'isi 'au ai'a 'unu'i suria moi 'adoma'inai noni. Na Ringe ana'ia Moses 'a bwane 'unu'i ro'u mareho 'isi.

⁹ Ra usua o'ani na'i Ringe ana'ia Moses, "'Oha na'o ha'atau'aroai kau 'anai rahi'i kahokahodi korai wiit, 'abu hunasiai ngoona. 'Oi nugasia mai ngau.'" Ma 'ua? Mou 'adoma'inia doni kau moi na 'ia God na hadanga'iniasi?

¹⁰ Ai'a! 'A hadanga'inimeu ro'u i nei nameu tatau'aro tanaa. Na nei na tatau'aro tanaa Araha 'a ga'i dauai heitahari ana baaniraau noni hinihini. 'A 'onaai nei na hasi mana nei na 'e'eri, 'irarua rarui hasura'iniai taha nararu tau'aro goni 'inia.

¹¹ Na'i 'oha namiri taroha'iniai Taroha Goro tana'amou, miri 'onaai nei na hasiai kora bei'amou. Naasi 'a arari do miri ga'i daa'i tara'i mareho baani'amou 'anai 'a'auhi'amiria.

¹² 'Onaa 'a arari domoi hauai heresi tanaraau tara'i ha'ausuri nara 'a'auhi'amou, me 'a arari di'u ro'u wou do mou ga'i haua o'asi ro'u tana'amiria.

Ma'ata 'i'amiria miri ai'a rabasia domoi haua o'asi tana'amiria. Rei'uaa na mwane mareho ra bwara tana'amiria, 'i'amiria miri wa'ewa'e moi, ma miri ai'a ha'angoni'amou 'inia ta maho. Miri gasi haua ta here na 'iraau inoni rau bwa'i taarai raba hinihinia 'inia i Taroha Goro 'inia Jisas Kraest.

¹³ 'I'amou 'iraraa do 'iraau Piriisi nara tatau'aro na'i Ruma Maea ana God na'i Jerusalem, rau ngangaa'i mahoingau na 'iraau noni ra waa'i mai 'anai wate'i tanaa God. Miraau nei ra tatau'aro na'i dora hoho'asi ana God rau hasura'ini'i taha narau ho'asi 'ini'i tanaa God.

¹⁴ 'A o'asi ro'u, 'ia Araha 'a bwane 'unua wetewete hura'a do 'iraau nei ra taroha'iniai Taroha Goro, rai taharirau na'i tatau'aro adaau.

¹⁵ Ma'ata rei'uaa na o'asi, ai'a ta 'oha nawai ha'angonia ta ta'i korai ha'a. Mana usu-usu nau usuani, 'au ai'a haua 'anai ha'angoni'amou 'inia ta maho. 'Inau 'au arunga wa'ewa'e 'iniai here agua o'asi. Naasi 'a goro dowai mae 'iniai hioro mawaigui ha'angoni maho bei'amou, 'inia nau ai'a 'irisia doni arunga wa'ewa'e aguasi 'ai ai'aa.

¹⁶ Nau ai'a 'unua do'au ha'ata'eau haariau 'iniai taroha'inia nau haa i Taroha Goro, suria 'e tau'aro na 'ia Araha na ha'a-'u'uriau 'inia. Ma 'onaa nau bwa'i haua, me 'ia Araha 'ai hiiriau 'inia.

¹⁷ 'Onaa na tau'aro nau haani 'au 'ome sigihia moi haariau, naasi nau ga'i 'irisia dorai tahariau 'inia. Me ai'a. 'Ia God na 'ome sigihiau 'anai hauai tau'aroni, ma naasi 'au haua moi maho na ha'a-'u'uriau 'inia.

¹⁸ Naasi, 'e taha i heitahari agua? Ni heitahari agua, naasi wa'ewa'e nau to'oana 'oha nau taroha'iniai Taroha Goro ha'i bwa'i 'irisia ta horihori baania tanei, rei'uaa na 'inau matai haua moi o'asi.

¹⁹ 'Inau ai'a slev ana tanei, ma'ata 'au tau'aro raha 'onaai slev 'anai 'a'auhiraau noni hako do neina wai matai waa ta siha inoni nawai matai waia tanaa Kraest.

²⁰ 'Oha nau awa beiraau Jiu, 'au awa 'onaai Jiu neina rai baturongo'i ha'ausuringa'i agu'i mawai wairaa tanaa Kraest. Rei'uaa nau ai'a awa na'i bahaidi Ringe ana'ia Moses, ma'ata 'inau 'au araisuri'i ringe 'isi na'i 'oha nau awa beiraau nei narau awa na'i bahaidi ringe 'isi, do neina wai wairaa tanaa Kraest.

²¹ Ma na'i 'oha nau awa beiraau nei narau ai'a Jiu narau ai'a awa na'i bahaidi Ringe ana'ia Moses, 'inau awa ro'u 'onaairausi, do neina wai wairaa tanaa Kraest. Ma ai'a do 'au ai'a suri'i Ringe ana'ia God, 'inia 'inau 'au suri'i mwane mareho na 'ia Kraest na 'unu'i.

²² Na'i 'oha nau awa beiraau nei ra maemae'a i hinihinidaa'i, 'inau awa 'onaairaa ro'u do neina wai 'a'auhiraau 'anai ha'a-weteweteraa suri'i hinihinidaa'i. Nau 'au ha'ata'isadau bei'i mwani tahingai noni he'ete'i hairiu 'anai ha'imaaniai waa'i mai tara'i nei tanaa Kraest.

²³ Nau haua o'asi 'anai 'adara'iniai Taroha Goro hako 'ari suriai mwane dora, mia God 'ai ha'agorohiau 'inia beiraau nei narau hinihinia.

²⁴ Mou 'iraraa do na'i 'eba heiohooho ra ragoi nei ra 'eba, ma'ata na nei nai ataha na'i na'o naasi nai daua i heitahari. Naasi moi bona na'i tahingamoou beia Kraest 'onaai nei na 'eba odo-odo neina moi dauai heitahari amoou.

²⁵ 'Iraau hako na sae 'eba'eba ra ha'ausuringa'iniai ha'ahirihiri na'i ha'aagaurau narau haa 'anai 'eba 'anai dauai heitahari na matai ai'aa moi. Ma'ata 'igaau gau 'eba 'anai dauai heitahari na bwa'i ai'aa mwada'u ta'oha.

²⁶ Tarana naasi nau 'eba odo-odo 'inia 'onaai nei na aidangisiai taha na 'ebasia. Mau 'onaai ro'u i nei na hahai ruburubu na ai'a ha'agata'ini'i rubu na haa'i na'i 'oha na siri 'anai hainonora.

²⁷ 'Au ura bwarasi'i mwane hei'irisi ta'a'i na'i tahingagu. 'Au hua o'asi, 'inia 'au gasigu ha'a-aidangisiraau noni 'iniai here 'anai dauai heitahari ana God tanaraau, minau haariau 'au bwa'i dauai nei agua.

10

Ha'abasu 'Iniai Ha'arahesi'i Araaranunu

¹ Arai do'ora mana asigu'i, moi 'adoma'i aho'isiai taha na to'o tanaraau wauwa agaa'i na'i 'ohabwani 'oha narau suria Moses. 'Iraau hako rau hahano na'i bahainai rorodo marau ataha dadara'a na'i nata batarau 'iniai asi nara 'unua 'iniai Asi Meramera'a.

² Na'i 'oha narau suria Moses bahainai rorodosi marau riu horo na'i asi 'a 'onaa dorau bwareomaea. 'Inia rau ha'ata'inia hura'a dorau mwa'emwa'e 'anai suria Moses 'onaai rongiusuri ana'i.

³ Rau hasura'i na'i ta'i mahoingau na hua God tanaraau,

⁴ marau gono na'i ta'i wai na 'ia God na ha'ahura'ahia mai baaniai hau,* mana hausi 'a ura 'inia Kraest na awa tarau beirau.

⁵ Ma rei'uaa na 'a'auhiraau o'asi, 'a ragoi nei narau hairaes moi beia God. Mia God 'a ai'a wa'ewa'e 'iniraau ma ha'awatea dorai mae 'adarara 'ari suriai dora mangasara.

⁶ Hoita, na mareho 'isi ra'i heiha'auu 'anai ha'abasugia dogai abui ta'ahi'i maho ta'a'i 'onaairau.

⁷ Gai abui ha'arahesi'i araaranunu 'onaai hua ada tara'i nei. Ra usua 'iniraau na'i Usu-usu Maea o'ani, "'Iraau rau heinagu auru 'anai ngaungau mana gonogono, na'i muri rau suruta'e marau wawaasua'a."†

⁸ Gai abui wawaasua'a 'onaai tara'i nei 'iniraau. 'Inia 'ia God 'a ha'mama'airau ma'e rua tangahuru mana oru meru 'iniraau na mae moi na'i ta'i dangi.

⁹ Gai abui haa'i mareho ta'a'i 'anai bonasia 'iraraa do 'ia Aaha 'a ahumaratanoa ma'ua ai'a. Naasi here narau hua tara'i abe mana mwaa ra rete'iraau marau mae.‡

¹⁰ Gai abui mangurunguru 'onaai hua ada tara'i abe na enjel ni mae na ha'amaesiraau.§

¹¹ Hoita, na mareho nara to'o 'isi tanaraui wauwa agaa'i 'ohabwani, ra'i heiha'auu naragu usu'i 'anai ha'abasugia. 'Inia na'i 'ohani na ha'ahakonai dangi 'a raumwadu.

¹² Naasi 'onaa 'o 'adoma'inia do'o ura baabau bwarasi'i heiohongi o'asi, ma'oi herehere goro, 'o gasigu ahoda.

¹³ Na heiohongi na'o siri suri'i, ra'i heiohongi nara bwane to'oto'o o'asi'a tanaraui noni. Mia God 'a awa tarau 'anai 'a'auhi'o, 'iia 'a bwa'i wate'o dorai ohongi'o di'uai wetewete na'o to'oraa 'anai ura bwarasi'i heiohongi.

* **10:4** 10:4 Eksodas 17:6 † **10:7** 10:7 Eksodas 32:6 ‡ **10:9** 10:9 Nambas 21:4-7 § **10:10** 10:10 Nambas 14:1-38, 16:1-14

Ma na'i 'oha heiohong'i 'ai sirimai tana'o, 'ia God 'ai ha'ata'inia tana'o i here na i'oe 'oi ura baabau 'inia.

¹⁴ Naasi arai do'ora mana asigu'i, moi abui ha'arahesi'i araaranunu.

¹⁵ 'T'amou ra'i noni aidangi. Naasi, moi hiiri'i haarimoou i mareho nau 'unu'i, 'onaa ra odo-odo ma'ua ai'a.

¹⁶ Na'i 'oha nagau gonohiai waen na'i ngaumaea nagau ha'atee ha'agorohia God 'inia, 'a ha'ata'inia dogau ta'i beia Kraest 'iniai 'abuna na ahe 'inigia. Mana breidi nagau uubia, 'a ha'ata'inia ro'u dogau ta'i beia Kraest 'iniai mae na haua 'inigia.

¹⁷ Naasi rei'uaa nagau rago, 'igaau 'onaa ta'i abe, 'inia 'igaau gau hasura'i na'i ta'i breidi.

¹⁸ Moisu 'adoma'iniraa aho'i inoni ni Israel. Na'i 'oha narau ngaai taha nara ho'asi 'inia na'i dora hoho'asi, 'a ha'ata'inia do 'iraaui rau 'adoma'i aratara hako 'anai ha'arahesia God.

¹⁹ Na'i 'oha nau 'unua o'asi, 'au ai'a 'unua do ho'asi na 'iraaui ahurodo rau haa'i 'ada'i araaranunu ra goro. Ni araaranunu ra'i mareho haari'i moi.

²⁰ Ni mareho narau ho'asi 'ini'i sae narau ai'a hinihinia God, rau 'adoma'inia dorau ho'asi'i moi tanaai araaranunu, ma'ata rau huunai ho'asi'i tanara i adaro, ai'a tanaa God. 'Inau ai'a 'irisia domoi ha'i ta'i beiraaui adaro.

²¹ 'A ai'a odo-odo domoi gono na'i o'i ana Araha mamoiigu gono ro'u na'i o'i anai adaro, ma ai'a odo-odo domoi ngaai breidi na'i ngau maea 'anai ha'a-ororiua Araha, mamoiigu ngaa ro'u i mahoingau 'anai ha'a-ororiuai adaro.

²² Gai abui haua o'asi! 'A gasi taesu'a gagaau Araha! 'A 'ua? Gau 'adoma'inia dogau wetewete di'ua Araha maai bwara tanaa 'anai ha'a-mama'aigaau? Ai'a!

²³ Tara'i sae ni heisoi ra o'ani, "Gau dadara'a 'anai haua namoiwou ta here nagau 'irisia." Ma'ata ai'a do nai'i hako ra goro, ma ai'a do mwane herehere hako narai 'a'auhigia.

²⁴ Naasi 'oi abui 'adoma'ini'o moi haari'o, ma'ata gai 'adoma'inia ro'u i taha nai goro 'anai 'a'auhiai nata nei.

²⁵ Na'i 'oha na'oi hori mahoingau na'i maketi, ma'oi abui 'adoma'i rago 'ini'i 'anai bonasiai 'iraraa 'onaa ra ho'asi 'inia tanaai araaranunu ma'ua ai'a.

²⁶ Ai'a ta mahoingau nai taritari'a 'anai ngaa, 'inia na Usu-usu Maea 'a o'ani, "Ni marewana mana mwane mareho hako na'i raronaa, 'ia ana'ia Araha."*

²⁷ 'Onaa 'e noni ahurodo na ari'ahu'o 'ari ruma ana 'anai ngau beia ma'o mwa'emwa'e, 'oi ngaa'i taha nai waa'i mai tana'o 'anai ngaa'i. Ma'oi abui 'adoma'i rago 'ini'i 'anai bonasiai 'iraraa 'onaa ra ho'asi 'ini'i tanaai araaranunu ma'ua ai'a.

²⁸ Ma 'onaa 'e nei nai o'ani 'ini'o, "Ni mahoingausi ra ho'asi 'inia tanaai araaranunu." Naasi 'oi abui ngaa, suriai 'unua ana o'asi tana'o, me 'inia ro'u moi 'adoma'i nai haa 'ini'o na'i 'oha 'oi ngaa.

²⁹ Na'i 'adoma'imu haari'o 'a ai'a 'ua, ma'ata ni 'ado'adona mo'osi na'oi abui ha'ata'aia.

Ma 'oi o'ani, "Ni 'uaana doni 'ado'adonai sae he'ete'i naigu ha'abwarasiau 'inia 'anai hauai taha na odo-odo 'anai haua?"

³⁰ Ma 'onaa nau matai ha'atee ha'agorohia God 'ini'i mahoingau nau ngaa'i, ni 'uaana narai hiiriau 'iniai mahoingau nau ha'atee ha'agorohia God 'ini'i?"

* 10:26 10:26 Psalm 24:1

³¹ 'O'i abui 'adoma'i o'asi. Ma'ata, suri'i mwane mareho na'oi haa'i, rei'uaa ngau ma'ua 'o gono, 'oi haa'i neina 'iraaui noni rai ha'a-aneanea God 'ini'i.

³² Na'i awangamu, 'oi abui hauai here nai here ha'ata'aiai hinihininai nata nei beia Kraest, rei'uaa 'iia 'e ai Jiu ma'ua ai'a, ma'ua tanaraaui noni hinihini.

³³ 'Onaaiau, 'au ha'imaania doni mwani noni hako rai wa'ewa'e 'inau. Nau ai'a hauai taha nai 'a'auhiau haariau, ma'ata 'au hauai taha nai 'a'auhiraau marai daua nadaaui tahi tarau.

11

1 Naasi moi ha'isuriai herengagu, 'onaai ha'isuria aguai herengana Kraest.

Herehere Ni Urao Ni Heisoi

² 'Au ha'atee ha'agorohi'amou suria mou 'adoma'i aho'isiau tarau, mamou ha'isuri'i ha'ausuringa'i nau haa'i tana'amou.

³ Ma'ata, 'au 'irisia domoi aidangisia do'ia God naasi na bwauodona Kraest, mia Kraest naasi na bwauodonai sae mwane, mana mwane naasi na bwauodonai urao ana.

⁴ 'Onaa 'e sae mwane nai bobohiai bwauna na'i 'oha na ha'arahesi na'i Ruma Maea ma'ua 'oha na ha'arangasi'i hura'a 'ado'adona'i a God, 'iia 'a ai'a ha'ahoua Kraest.

⁵ Ma 'onaa 'e urao na ai'a bobohiai bwauna na'i 'oha na ha'arahesi, ma'ua 'oha na ha'arangasi'i hura'a 'ado'adona'i a God, 'iia 'a ai'a ha'ahouai mwane ana. 'Iia 'a ai'a he'ete'i baaniai urao ta'aa nara taapuru poua 'anai ha'aninimaia.

⁶ 'Onaa 'e urao na ai'a bobohi bwau, 'a ta'isada do'ai taapurua gata'iniiai warihuna. Ma'ata, 'e mareho ni-ninima 'inia tanaai uraosi 'anai risipou ma'ua taapuru gata'iniiai warihuna. Naasi 'iia 'a ga'i bobohi bwau.

⁷ Na mwane 'a ai'a ta'isada 'anai bobohi bwau, 'inia 'ia God 'a ha'apwa'araa do'ai 'onaaia ma do'ai ha'ata'inia hura'a i ororiu na haua God, mana urao 'a ha'ata'iniiai ororiu na haua i mwane ana.

⁸ 'Inia 'ia God 'a ai'a ha'apwa'araai saemwane baaniai urao, ma'ata ni urao baaniai saemwane.

⁹ Ma ai'a do 'ia God na ha'apwa'araai saemwane 'anai 'a'auhiaui urao, ma'ata 'a ha'apwa'araai urao 'anai 'a'auhiaui saemwane.

¹⁰ Taranai o'asi ana, na urao 'a ta'isada 'anai bobohiai bwauna miraauai enjel rai 'ome 'iraraa ro'u do'iia 'a awa na'i bahainai heimarungi anai mwane ana.

¹¹ Ma'ata, na'i beiraauai noni ana'ia Araha, na mwane mana urao raru ororiu ta'isada tanararua hairiu.

¹² 'Inia ra ha'apwa'araai urao baaniai saemwane, mana saemwane ra huta beiraauai urao. Ma'ata, mwane mareho hako ra hura'a mai baania God.

¹³ Moi 'adoma'i surisuria haari'amou. 'A 'ua? 'A odo-odo doni urao 'ai abui bobohi bwau na'i 'oha na ha'arahesi goni beiraauai mwani noni rago ma'ua 'a ai'a?

¹⁴ Na arunga nagau to'oraa 'oha gau re'iai saemwane na ha'a-agu warihu 'onaai urao, 'a ha'ata'inia tanagia do'e mareho ni-ninima 'inia tanaai saemwane 'anai haua.

¹⁵ Ma'ata tanaraaui urao, ni warihu 'e mareho goro 'anai taeniraau 'inia, 'inia 'ia God na haa tanaraau 'anai bobohi bwau.

¹⁶ Ma 'onaa 'iatei sae na raba heiraeraesi beiau 'ini'i mareho 'isi, naani heiarami agua tanaa. 'Tameu beiraauai sae ni heisoi suri'i mwani 'omaa, meugu ai'a ha'isuria'a ro'u ta here he'ete'i'a ro'u.

Ringeringe Na'i Ngau Maea

17 'E mareho ro'u nau raba 'unua tana'amou 'ohani, me 'inau 'au bwa'i ha'atee ha'ata'e'amou 'inia. Suria na'i 'oha na mou goni 'anai ha'arahesi, mou ai'a haa'i mwane mareho goro. Ai'a! Mou haa'i moi mwane mareho ta'a'i!

18 Na 'etanai maho nau rongoa 'a o'ani. Na'i 'oha namou rurugoni mou awa heihoa. Mau gere hinihini doni mahosi 'a ha'a-momori.

19 Na'i marewanani ni heihoa rai to'o ma'ata. Me ni maho nai goro 'ini'i, do gaigui 'ome 'irararaui nei narau odo-odo.

20 Hoita, na'i 'oha namou goni 'onaai ta'i ruruha 'anai ngaugoni ma 'anai hauai ngau maea, mou ai'a boi beiai huunai 'ado'ado 'anai 'adoma'i aho'isiai mae ana Araha.

21 Ai'a! Mou boi moi 'anai 'adoma'ini'amou haarimoou. 'Inia na'i 'oha 'anai ngau, mou ngau 'ome ta'aa mamou ai'a mamasiraau tara'i nei. Tarana naasi tara'i nei ra bweu 'iniai gono waen, ma tara'i nei ra hioro moi.

22 'T'amou mou ga'i ngau masu mana gono ga'u suri'i ruma amoo'i mamougui boi goni 'anai ngau maea. 'A 'ua? Mou ai'a aidangisia do na'i 'oha namou haua o'asi mou ha'ata'ai ai heiso'i ana God mamou ha'arungata'airaui mwaeta'a'i narau pohara? Mou 'adoma'inia do'e taha nawai 'unua tana'amou? 'Inau 'au bwa'i ha'atee ha'ata'e'amou!

23 Na ha'ausuringa'i nau bwane haua tana'amousi 'iniai ngau maea, 'e ha'ausuringa'i na 'ia Araha na haua tanaau. 'A o'ani: Na'i rodo na 'ia Jiudas 'a usuha'inia Jisas tanaraui maerongana'i, 'ia Jisas 'a dauai huai bredi,

24 ma na'i 'oha na ha'atee ha'agorohia hako a God 'inia, 'a uubia magu ha'atee o'ani, "Naani abegu nawai watea 'ini'amou. Moi haua o'ani 'anai 'adoma'i aho'isiau."

25 Ma o'asi ro'u na'i murinai ngau. 'A dauai panikeni waen ma ha'atee o'ani, "Ni waen naani 'e duruduru haoru ana God nawai ha'a-o'oria 'iniai 'abugu. Moi haua o'ani 'ado 'oha mou gonohia 'anai 'adoma'i aho'isiau."

26 'Inia na'i 'oha namou ngaai bredi naasi mamou gono na'i panikeni naasi, mou ha'arangasia hura'ai mae ana Araha tari 'oha 'ai aho'i mai.

27 Naasi 'onaa 'iatei nai ngaai bredi ana Araha maai gono na'i o'i naasi ma ai'a haua beiai 'adoma'i ha'ahou, 'iia 'a ha'ata'aia Araha, 'inia 'a ai'a ha'ahouai abena mana 'abuna.

28 Tarana naasi gai siba ha'a-odoodo'i goro i tahingagaa'i magaigui boi 'anai ngaai bredi, mana gono na'i o'i naasi.

29 'Iatei na ngaai bredi ma gono na'i o'i ma ai'a 'adoma'i ha'ananau do'e abena ma'e 'abuna Kraest na watea 'inigia, 'ia God 'ai ha'a-mama'aia.

30 Tarana naasi, 'a ragoi nei 'ini'amou namou maemae'a, mamou daoha, ma tara'i nei ra mae.

31 Ma'ata 'onaa gau siba ha'a-odoodo'i goro ga'u i tahingagaa'i, 'ia God 'a bwa'i ha'a-mama'aigia.

32 Me 'onaa 'ia Araha 'ai ha'a-mama'aigia, 'a haua 'anai ha'a-odoodogia, magari abui siri na'i ha'a-mama'ai ro'u ta'oha beiraui inoni ahurodo nai marewana.

33 Naasi arai do'ora mana asigu'i, na'i 'oha namoi goni 'anai ha'ato'oai ngau 'anai 'adoma'i aho'isia Araha, moi toteri tari 'oha moi ada hako.

34 'Onaa 'e nei na hioro, 'a goro do'ai ngau ga'u na'i ruma ana maigui tano boi 'anai ha'ato'oai ngau maea. 'A gasi hereta'aa 'oha namoi gonigoni 'anai ngau mia God 'aigui ha'a-mama'ai'amou 'inia.

'Io, ra'i mareho ro'u nau raba ha'ausuri'amou 'ini'i. Me waigui 'unu ha'agorohi'i 'oha nawai ada bei'amou.

12

Bane Ni Hi'ona Maea

¹ Arai do'ora mana asigu'i, nau 'irisia domoi aidangisi'i taha ra ha'a-momori 'ini'i bane na Hi'ona Maea na haa'i tanaraaui noni hinihini.

² Na'i 'oha mou ahurodo mau, mou 'iraraa do 'a ragoi mwani maho nara ha'ateha'amou 'anai ha'arahesi'i araaranunu na ai'a tahi nai awa suri'i.

³ Naasi 'au 'irisia domoi aidangisia do 'iatei na Hi'ona Maea na marungia, 'a bwa'i ha'atee su'amuria Jisas. Ma 'a bwa'i nei nai ha'arangasia mwada'u hura'a do'ia Jisas na Araha, 'onaa na Hi'ona Maea 'a bwa'i marungia.

⁴ 'A ragoi mwani bane ni Hi'ona Maea nara he'ete'i hairiu, ma'ata ra hura'a mai baania moi ta'i Hi'ona Maea.

⁵ 'A ragoi tatau'aro he'ete'i hairiu na'i heisoi, ma'ata 'e ta'i Araha moi 'anai tau'aro tanaa.

⁶ Ma ragoi herehere 'ada'i mwani tatau'aro 'isi, ma'ata 'e ta'i God moi na haa'i aidangi 'isi tanaraaui noni 'anai tau'aro.

⁷ Gau 'ome 'iraraa doni Hi'ona Maea 'a awa beigia suri'i mwani bane he'ete'i hairiu na haa'i tanagia. Mana bane 'isi, 'anai 'a'auhiraui mwani inoni hinihini hako.

⁸ Tara'i nei, na Hi'ona Maea 'a haa tanaraaui bane 'anai hadahada beiai madoma, ma tara'i nei beiai aidangi.

⁹ Na ta'i Hi'ona Maea naasi 'a hauai hinihini na wetewete tanaa tanei, mana nata nei, 'a haa tanaai bane 'anai ha'agorohi'i nei ra daoha.

¹⁰ Ma tara'i nei 'a haa tanaraaui bane 'anai hau'i ha'abu'oahu. Tara'i nei na Hi'ona Maea 'a haa tanaraaui bane 'anai ha'arangasi'i hura'a 'ado'adona'i a God, ma tara'i nei 'a haa tanaraaui bane 'anai 'ome 'iraraa 'onaa ni maho na ha'arangasi'i hura'a i nata nei, ra boi baania God ma'ua ai'a. Tara'i nei na Hi'ona Maea 'a haa tanaraaui bane 'anai hadahada 'ini'i mwane ha'atee he'ete'i hairiu, ma tara'i nei 'a haa bane tanaraaui 'anai ha'atee ruha-ruhasi'i hura'a.

¹¹ Ma'e ta'i Hi'ona Maea moi na haa'i mwani bane he'ete'i hairiu 'isi tanagia suriai hei'irisina.

Mwane Dora Na'i Ta'i Abe

¹² Ni abenai noni 'a to'ora'i mwane dora he'ete'i hairiu, ma'ata 'e ta'i abe mau. 'A ta'isada ro'u beigaui sae hinihini nagau 'onaa abena Kraest.

¹³ Rei'uaa i'oe 'e ai Jiu ma'ua ai'a, rei'uaa i'oe 'e slev ma'ua 'o ai'a, 'igaau hako gau bwareomaea 'inia ta'i Hi'ona Maea moi na'i ta'i abe naasi. Mia God 'a haa tanagiai ta'i Hi'ona Maea naasi suri'i talingagaa'i.

¹⁴ Mia God 'a ai'a tau'aronai abe 'inia moi ta'i dorai abe, ma'ata 'a tau'arona 'ini'i mwane dorai abe he'ete'i hairiu.

¹⁵ 'Onaa ni uwa-uwa 'ai o'ani, "Suria 'inau ai'a rimarima, 'inau ai'a dora 'inia abe." Rei'uaa na ha'atee o'asi, 'iia 'a hasi ro'u mau wou na'i ta'i abesi.

¹⁶ Ma 'onaa na karinga 'ai o'ani, "Suria 'inau ai'a ha'i maa, 'inau ai'a dora 'inia abe." Ma rei'uaa na ha'atee o'asi, 'iia 'a hasi ro'u mau wou na'i ta'i abesi.

¹⁷ Na abe 'ai rongorongo he'ua 'onaa ni abe 'ai aho'ita'i maa hako moi? Ma 'ai matai si-si'ini he'ua 'onaa 'ai aho'ita'i karinga hako moi?

¹⁸ 'A ai'a o'asi! 'Ia God 'a nuga'i mwane dora he'ete'i hairiu na'i abe suriai 'adoma'ina.

¹⁹ 'Inia 'onaa 'a bwa'i nuga'i mwane dora he'ete'i hairiu na'i abe, 'a bwa'i 'ome 'onaa abenai sae'a.

²⁰ Naasi 'anai hauai ta'i abei noni bubu, na mwane dorai abe he'ete'i hairiu rai hasigoni.

21 Naasi ni maa 'a bwa'i matai o'ani 'inia rimarima, "Inau 'au 'ita'o." Ma'uasi na bwau 'a bwa'i matai 'unua tanararuai rua uwa-uwa do'a 'itararua.

22 Hoita naasi, rei'uaa na gau 'adoma'inia do ra'i dora suri'i abegaa'i ra maemae'a, ma'ata ra ororiu di'u tanagia.

23 Mana dora nara ai'a taraa 'ome goro magau ni-ninima 'ini'i, nagaugu here taguma'ini'i goro magau ha'abwarasi'i.

24 Me ni dora nagau ai'a ni-ninima 'ini'i, ra ai'a taraa ororiu 'anai ha'abwarasi'i goro. 'Oha 'ia God 'a ha'apwa'ara'i abegaa'i, 'a haa'i tau'aro ororiu tanarai dora suri'i abegaa'i nagau ni-ninima 'ini'i.

25 'A haua o'asi, neina na mwane dora na'i abe rai abui 'itaraau hairiu, ma'ata rai taguma'iniraau hairiu.

26 'Onaa 'e ta'i dorai abe nai rongomaata'i, na mwani dorai abe hako rai rongomaata'i ro'u beia, ma 'onaa 'e ta'i dorai abe narai ha'ahoua, na mwane dorai abe hako rai wa'ewa'e ro'u beia.

27 Naasi, i'amou hako ra'i dora 'inia abena Kraest.

28 Ma na'i heisoi, na 'adonai nei 'a dauai tau'aro na 'ia God na nugaa tanaa. 'Etana, 'ia God 'a nugaraui Ha'ataari. Na'i ruana, 'a nugaraui nei narau ha'arangasi'i hura'a 'ado'adona'i a God. Na'i oruna, 'a nugaraui ha'ausuri. Tara'i nei 'a nugaraui 'anai hau'i ha'abu'oahu, ma tara'i nei 'anai ha'agorohiraui aho'i nei ra daoha, ma ra'i nei 'anai hei'a'auhi. Ra'i nei 'ia God 'a nugaraui 'anai na'otaranai heisoi, ma tara'i nei 'anai ha-hadahada 'ini'i mwani ha'atee he'ete'i hairiu.

29 Ai'a nugaraui hako dorai ha'i Ha'ataari, ma'ua ha'i sae 'anai ha'arangasi'i hura'a 'ado'adona'i a God, ma'ua dorai ha'ausuri. Ma ai'a dorau to'oraa hako bane 'anai hau'i ha'abu'oahu,

30 mana bane 'anai ha'agorohiraui nei ra daoha, ma'ua bane 'anai ha-hadahada 'ini'i mwane ha'atee he'ete'i hairiu, ma'ua bane 'anai ha'atee ruha-ruhasi'i hura'a.

31 Naasi, suri'i mwani bane 'isi, moi bonasiai daa'i nei nara ororiu di'u.

Heita'ahi Na Ororiu Di'u

Ma naani mareho na ororiu di'u'i ro'u i mwane bane 'isi.

13

1 'Onaa nau matai ha-hadahada 'ini'i mwani ha'atee he'ete'i hairiu, ma'ua 'ini'i ha'atee adaa'i enjel, minau ai'a to'oraai heita'ahi, ni hadahada agu'i ra 'onaai 'o'o ma'ua belo nara tabatabaa na rongo raha kongari moi.

2 'Onaa wai to'oraai bane 'anai ha'arangasi'i hura'ai 'ado'adona'i a God, ma'ua wai aidangisi'i mwane mareho hako mana mwane mareho na ai'a sae nai 'irara'i mau, minau ai'a to'oraai heita'ahi, 'inau 'e mareho haaria moi. Ma 'onaa wai to'oraai hinihini nai wetewete 'anai ha'atee tanaai hungahunga maai su'a, minau ai'a to'oraai heita'ahi, 'inau 'e mareho haaria ro'u.

3 Rei'uaa nawai hisungiraui pohara 'ini'i bori agu'i hako, ma'uasi wai ha'awatea dorai suu ha'amaesiau na'i 'eu 'inia suria agua Kraest, minau ai'a to'oraai heita'ahi, 'a bwa'i mareho goro nawai daua 'ini'i.

4 Na huunai heita'ahi 'a ha'ata'i hura'a na'i ahumaratanoa mana hei'a'auhi. Na heita'ahi ai'a 'anai kakawa 'omesiai nata nei 'ini'i mareho na to'ora'i, ma ai'a 'anai 'adoma'i ha'a-ta'eta'e ma'ua ha'aba'o.

5 Na heita'ahi ai'a 'anai hauai taha nai arunga ta'aa 'inia i nata nei, ai'a 'anai 'adoma'ini'o moi haraari'o, ma'ua taesu'a mwada'u. Ni heita'ahi ai'a 'anai taraa nunuga'i na'i 'ado'adomu i mareho ta'a'i nara hau'i tana'o.

6 Ni heita'ahi ai'a 'anai wa'ewa'e 'ini'i mareho ta'a'i, ma'ata 'anai wa'ewa'e 'ini'i mareho nara ha'a-momori.

⁷ Ni heita'ahi 'anai ta'ahia tarau nata nei rei'uaa na he'ua. Ni heita'ahi ai'a 'anai hinihini ha'ata'aiatai nata nei, ma'ata 'anai hinihinia mana mangudisia rei'uaa mwani mareho ha'abooboo abe rai sirimai.

⁸ Ni heita'ahi 'a ai'a to'o ha'a-arosina. Ma'ata, ra'i bane rai matai ai'a'i moi, 'onaai bane 'anai ha'arangasi'i hura'a 'ado'adona'i a God, bane 'anai ha-hadahada 'ini'i mwane ha'atee he'ete'i hairiu, mana bane 'iniaidangi.

⁹ 'Inia ni aidangi nagau to'oraa mana mareho nagau ha'arangasi'i hura'a ra ai'a tari dora nara ga'i tari iei.

¹⁰ Ma na'i 'oha nagai awa na'i aro, 'oha na mwani mareho rai goro hako, na bane 'isi rai ai'a'i moi.

¹¹ Na'i 'oha nau kekerei, na hadahadangu, 'adoma'igu, mana aidangi agua 'a 'onaai gare. Ma tari mai 'oha nau rahunimwane, na mwane here ni gare 'au nugasi'i hako.

¹² Hoita, na'i 'ohani gau ai'a taraa aidangisia goro a God. 'A 'onaai wana nagau haa na'i gilaasi iroiro na gahu. Na'i 'oha nagaigu heisadoi beia, gaigui aidangisia goro 'onaai aidangisigaau na haua.

¹³ Naasi 'e oru mareho narai awa tarau, na hinihini, 'adoma'i heitotori, mana heita'ahi. Mana nei na ororiu di'u 'iniraau, naasi heita'ahi.

14

'E Mamaani 'Ini Rua Bane Ni Hi'ona Maea

¹ Moi bonasiai awa tarau na'i heita'ahi, mamoi 'irisi'i ro'u i bane anai Hi'ona Maea, ororiu i bane 'anai ha'arangasi'i hura'ai 'ado'adona'i a God.

² 'Ia mo'o na to'orai bane 'anai ha-hadahada 'ini'i ha'atee he'ete'i hairiu, 'a ha-hadahada moi tanaa God, ai'a tanaraau noni. Suria na mareho na 'unu'i 'a bwa'i sae nai aidangisi'i. Na Hi'ona Maea na haua tanaai bane 'anai hadanga'ini'i mareho nara bwarai aidangisi'i.

³ Ma'ata na nei na ha'arangasi'i hura'ai 'ado'adona'i a God, 'a hadahada tanaraau noni 'anai 'a'auhiraau dorai wetewete suri'i hinihinidaa'i. 'A hadahada tanaraau 'ini'i hadahada ha'a-'o'ori mana ha'a-aroahu.

⁴ Na nei na to'orai bane 'anai ha-hadahada 'ini'i mwane ha'atee he'ete'i hairiu, 'a 'a'uhia moi hinihinina haraaria. Mia tei na to'orai bane 'anai ha'arangasi'i hura'ai 'ado'adona'i a God, 'iia 'a 'a'uhi'i hako hinihinidaa'i noni na'i heisoi.

⁵ 'Inau 'au 'irisia domoi matai ha-hadahada hako 'ini'i mwani ha'atee he'ete'i hairiu, ma'ata 'au huunai 'irisia domoi to'orai bane 'anai ha'arangasi'i hura'ai 'ado'adona'i a God. 'Inia na nei na haua o'asi, 'a rago i noni hinihini na 'a'auhiraau di'uraau nei narau ha-hadahada 'ini'i mwani ha'atee he'ete'i hairiu. Me 'onaa 'e nei 'anai ha'a-aidangisiraau noni 'ini'i 'ado'ado 'ada'i ha'atee he'ete'i o'asi, ma ni marehosi 'a matai 'a'auhiraau ro'u i noni nai heisoi.

⁶ Naasi arai do'ora mana asigu'i, 'onaa wai boi mawai hadahada tana'amou 'ini'i ha'atee he'ete'i nagau ai'a rongo 'irara'i, 'ai he'uaigui 'a'auhi'amou adaa'i mareho 'isi? Ma'ata, 'onaa wai boi mawai ha'a-aidangisi'amou 'iniaidangi maho na 'ia God na ha'ata'inia tanaau, ma'ua wai ha'ausuri'amou 'iniaidangi maho nau aidangisia 'abaia God, ma'ua wai ha'arangasi'i hura'ai 'ado'ado ana'i tana'amou, ni mareho 'isi rai 'a'auhi'amou di'u.

⁷ Na mareho 'onaai gitaa mana 'au na ai'a tahi awa suri'i ra o'asi ro'u. 'Onaa na sae 'a to'o uuhia moi 'au, 'ai he'ua nagai rongo 'iraraa 'inia i gana na uuhia?

⁸ Ma 'onaa 'ia mo'o na ha'arongo 'iniaidangi he'oi 'a bwa'i taba ha'agorohiai 'ahai, 'a bwa'i nei nai aidangisia do'e he'oi nai to'o.

9 'A o'asi ro'u, 'onaa na'o hadahada 'inia ha'atee he'ete'i na ai'a sae nai rongo 'iraraa, ma bwa'i sae nai aidangisi'i mareho na'o maani'i mana ha'atee amu'i rai hura'a pwaranga moi.

10 Na'i marewanani ra ragoi ha'atee he'ete'i hairiu, mana 'adonai ha'atee 'a to'o 'ana 'ado'ado.

11 'Onaa 'e ha'atee nara ha-hadahada 'inia nau ai'a aidangisia, ma 'inau 'onaai sae mahuara tanaraau nei narau ha-hadahada 'inia ha'atee naasi, ma'uasi 'iraaui rai 'onaai mahuara tanaau.

12 Naasi, suriai 'adoma'i wetewete amouu 'anai daa'i bane anai Hi'ona Maea, moi ha'angonia taraua God 'ini'i bane narai ha'a-weteweteai heiso.

13 Naasi, 'iatei na to'oraai bane 'anai ha-hadahada 'ini'i mwani ha'atee he'ete'i hairiu, 'ai ha'angonia God 'inia bane 'anai hadahada ruhasi'i hura'ai taha na maani'i tanaraau noni.

14 Na'i 'oha nau ha'arahesi 'inia ha'atee nau ai'a aidangisia, ni tahingagu na ha'arahesi, ma'ata nau ai'a aidangisi'i taha nau 'unu'i.

15 Naasi 'e taha nawai haa? 'A goro do'au ga'i haa'i hako. Wai ha'arahesi 'inia ha'atee he'ete'i, mawai ha'arahesi ro'u 'inia ha'atee nau aidangisia. Ma 'onaa nawai gana ha'aasaa God 'inia ha'atee he'ete'i, wai gana ha'aasaa ro'u 'inia ha'atee nau aidangisia.

16 Na'i 'oha na'o ha'atee ha'aasaa God na'i ha'atee he'ete'i na Hi'ona Maea na haa tana'o, 'a bwa'i tanei 'iniraaui nei narau goni wou 'anai ha'arahesi nai matai Amen 'anai 'adoma'i aratara 'ini'i hadahada amu'i, suria rau ai'a aidangisi'i taha na'o maani'i.

17 Rei'uaa na ha'arahesi amua 'anai ha'atee ha'aasaa God 'a rongo tahitahi goro, me na ha'arahesi naasi 'a ai'a 'a'auhiai nata nei, suria 'a ai'a aidangisia bei'o.

18 Nau 'au ha'atee ha'agorohia God, 'inia 'au matai hadahada 'ini'i ha'atee he'ete'i di'umouu hako.

19 Ma'ata na'i 'oha 'anai ha'arahesi goni beiraaui noni, rei'uaa 'e rima ha'atee ha'amadomaahu moi nau matai 'unua hura'a 'anai ha'ausuriraaui, 'a goro baaniai 'unua hura'ai taringai merui ha'atee na'i ha'atee he'ete'i nai kakui ahudaau 'ini'i.

20 Arai do'ora mana asigu'i, na 'adoma'imoo'i rai abui 'onaai gare 'ini'i mareho 'isi. Na 'adoma'imoo'i rai 'onaai saemaua. Ma'ata na'i aba anai ora-ora'a, moi awa odo-odo 'onaai gare mweramwera'a.

21 'Ia Araha God 'a 'unua o'ani na'i Usu-usu Maea,
 "Inau wai ha'a-taariraaui woui noni mahuara nara hadahada 'ini'i mwane ha'atee he'ete'i 'anai hadahada tanaraau noni agu'i.

Ma rei'uaa nai o'asi, 'iraaui noni agu'i rau bwa'i raba rongo'i hadahada agu'i."*

22 Naasi ni bane 'anai ha-hadahada suri'i ha'atee he'ete'i hairiu, 'e ha'ara tanaraau nei narau ai'a hinihini, ai'a tanaraau noni hinihini. Mana bane 'anai ha'arangasi'i hura'ai 'ado'adona'i a God, 'e bane na 'a'auhiraau noni hinihini, ai'a 'ada'i nei narau ai'a hinihini.

23 'Onaa na noni hinihini hako rai boi goni marai hadahada 'ini'i ha'atee he'ete'i hairiu, ma ra'i nei nara ai'a aidangisi'i ha'atee o'asi ma'ua ra'i sae ahurodo rai siri ro'u wou, na'i 'oha rai rongo'amou, rai 'adoma'inia domou bweu.

24 Ma 'onaa 'imoou hako mou ha'arangasi'i hura'a 'ado'adona'i a God na'i 'oha narau siriwou, 'iraaui raigu 'ome 'irara'i ora-ora'a adaa'i 'ini'i taha narau rongo'i, mana mareho rau rongo'i rai hiiri'i tahingadaa'i.

* 14:21 14:21 Aisaea 28:11-12

²⁵ Na mwani mareho ta'a'i nara bainihu suri'i tahingadaa'i rai ha'ata'i hura'a. Naasi raigui topiruru auru 'anai ha'arahesia God marai ha'arangasia hura'a o'ani, "Ha'amomori! 'Ia God 'a awa 'ini bei'amou."

Herehere 'Anai Rihunga'i

²⁶ Arai do'ora mana asigu'i, maho nau 'unua tana'amousi 'a o'ani. Na'i madoraa namoi boi goni 'anai rihunga'i, 'e nei beiai gana, 'e nei 'anai ha'ausuriraaui noni, 'e nei 'anai maani'i hura'ai taha na 'ia God na ha'ata'ini'i tanaa, 'e nei 'anai ha-hadahada 'ini'i mwani ha'atee he'ete'i hairiu, ma'e nei 'anai ha'atee ruhasi'i hura'ai taha na 'unu'i. Ma na'i 'oha namoi haa'i mareho 'isi, moi haa'i hako 'anai ha'a-wetewete'i hinihinidaa'i sae ni heisoi.

²⁷ Hoita, 'onaa tara'i nei narau raba hadahada 'ini'i mwane ha'atee he'ete'i hairiu, 'e waira rua ma'ua oru moi narai matai haua. Ma na'i 'oha narai hadahada, rai abui hadahada ta'i 'oha. 'Onaa ta'i abe nai hadahada, ma ta'i nei nai ha'aagau 'anai ha'atee ruhasi'i hura'a tanaraaui noni taha na 'unu'ia mo'o na hadahadasi.

²⁸ Ma 'onaa na bwa'i sae 'anai orisi hadahada, me'ia mo'o na ha-hadahada na'i ha'atee he'ete'i 'ai papaku. 'A goro do'ai hadahada haaria tanaa God.

²⁹ Na'i aba 'anai ha'arangasi'i hura'ai 'ado'adona'i a God, 'e waira rua ma'ua oru moi narai matai hadahada miraaui noni hinihini raigui wai'ado'ado goro suri'i mareho narau 'unu'i.

³⁰ Ma 'onaa 'e abe 'iniraaui nei narau bahurongo na 'ia God 'ai ha'ata'inia tanaai mareho 'anai maania, 'ia mo'o na hadahada 'ai papaku ga'u maai ha'awateai nata abe 'anai hadahada.

³¹ 'Onaa moi suriai heresi, 'i'amou hako moi matai to'o madoraa 'anai ha'arangasi'i hura'a i 'ado'adona'i a God. Ma naasi moi matai ha'ausuringa'i baani'amou, mamoi matai ha'a-o'ori'amou hairiu.

³² 'Iraaui nei narau to'oraai bane 'anai ha'arangasi'i hura'a i 'ado'adona'i a God, rau matai ha'a-bwarasiraaui haariraaui 'anai hadahada na'i madoraa na nata sae 'a hadahada.

³³ 'Inia 'ia God 'a 'irisia do mwani mareho rai abui sikoha'i, me dogai awa aratara goni goro. Ma naasi herehere adaa'i noni hinihini suri'i mwane 'omaa.

³⁴ 'Io, 'iraaui urao ra ga'i bahu na'i 'oha nara goni hako mai noni hinihini 'anai ha'arahesi. 'A ai'a ta'isada dorai hadahada, ma 'onaa 'unua ana tanagaau na'i Ringe ana'ia Moses, rai awa na'i bahaidi heimarungi adaa'i saemwane.

³⁵ 'Onaa 'e mareho narau raba aidangisia, 'a goro dorai songa'iniraaui mwane adaa'i 'oha narai aho'i 'ari suri'i ruma adaa'i. Ai'a 'ome arari tanaai urao do'ai 'unu'i hura'ai taha na 'adoma'ini'i na'i 'oha nara goni mai na'i ruma maea 'anai ha'arahesi.

³⁶ 'Onaa mou ai'a 'adoma'i aratara beiau, 'a 'ua? Mou 'adoma'inia dona Taroha Goro ana God 'a taraawa'a bei'amou ma do 'i'amou moi na taha bei'amou?

³⁷ 'Onaa 'e nei na 'adoma'inia do 'iia 'e sae 'anai ha'arangasi'i hura'a i 'ado'adona'i a God ma'ua 'e bane anai Hi'ona Maea na daua, 'a ga'i aidangisia doni maho nau usua dio tana'amou, ra'i ha'atora baania Araha.

³⁸ Ma 'onaa 'a 'ageta'i rongoai ha'ateeni, 'i'amou moi abui rongo'i ro'u i taha na maani'i.

³⁹ Hoita naasi arai do'ora mana asigu'i, moi 'adoma'i wetewete 'anai dauai bane 'anai ha'arangasi'i hura'a i 'ado'adona'i a God. Ma'ata mou abui ha'a-bwarasiraaui nei narau to'oraai bane 'anai ha-hadahada 'ini'i mwane ha'atee he'ete'i hairiu.

⁴⁰ Ma'ata moi 'iraraa do na mwane mareho hako namoi haa'i, moi haa'i suriai huunai herehere na goro ma odo-odo.

15

Na Suruta'e Aho'i Ana Kraest

¹ Arai do'ora mana asigu'i, nau raba ha'a-'adoma'i aho'isi'amou aho'i 'inia Taroha Goro nau bwani taroha'inia tana'amou. Mou bwani daua'a ma naasi mareho na ha'a-wetewete'i hinihinimoo'i.

² Ma 'onaa mou dau baabau na'iei, moi daua namoou i tahi tarau. 'Onaa mou ai'a, mana hinihinimooou 'ai 'ari pwaranga moi.

³ 'Inau maania tana'amou taha nara maania tanaau na ororiu di'u. Naasi mae na haua Kraest na'i dadaahoro 'ini'i ora-ora'a agaa'i 'onaai usua ada i rarabea na'i Usu-usu Maea na'i 'oha bwani.

⁴ Ra aoraa na'i wabwa, 'e rua dangi na hako mana'i oruna 'a suruta'e aho'i 'onaai ha'arangasia ada na'i Usu-usu Maea.

⁵ Ma ha'ata'i tanaa Pita, ma na'i muri 'agu ha'ata'i ro'u tanaraau hakoi ta'i tangahuru mana rua Ha'ataari.

⁶ Ma na'i muri 'e rima meru madara 'iniraaui noni hinihini na ha'ata'i ro'u tanaraau moi na'i ta'i 'oha, ma ragoi nei 'iniraaui nara tahi mau rei'uaa haru nei ra mae'a.

⁷ Naasi 'a ha'ata'i ro'u tanaa Jems, na'i muri 'agu ha'ata'i ro'u tanaraau hakoi Ha'ataari.

⁸ Na'i ha'ahakona 'agu ha'ata'i ro'u tanaau, 'inia 'inau 'onaai nei nau ai'a huta na'i huunai madoraa 'ana.

⁹ Nau ai'a ororiu di'u 'onaairaaui tara'i Ha'ataari, ma ai'a ta'isada dorai 'unuau 'inia Ha'ataari, suria 'au norata'aia heiso'i ana God.

¹⁰ Ma'ata suriai goro ana God 'iniau, na hauau o'asi 'inia 'onaai Ha'ataari, mana goro na haa 'iniau 'a ai'a 'ari pwaranga. 'Inau nau tau'aro raha di'u baaniraaui mwane Ha'ataari hako, ma ai'a do 'inau haariau, me 'inia hei'a'auhi ana God 'a awa beiau.

¹¹ Ma ai'a 'ua, rei'uaa 'inau ma'ua 'iraaui narau taroha'inia Taroha Goro. Taha na ororiu, naasi do 'i'amou mou hinihinia'a moi ta'i Taroha Goro naasi.

Na Suruta'e Aho'i Adaui Noni Hinihini

¹² 'Onaa namou hinihinia taroha'inia ameeu i suruta'e aho'i ana Kraest baaniai mae, ma he'ua i 'unua amooou do 'iraaui nei nara mae ra bwa'i suruta'e aho'i?

¹³ 'Onaa nara bwa'i suruta'e aho'i, ma ha'ata'inia do'ia Kraest ai'a suruta'e aho'i ro'uta baaniai mae.

¹⁴ Ma 'onaa 'ia Kraest 'a ai'a suruta'e aho'i baaniai mae, me 'i'ameu meu heitaroha'i pwaranga, mana hinihinimooou 'a 'ari pwaranga ro'u moi.

¹⁵⁻¹⁶ Mana nata mareho ro'u, 'onaa 'iraaui nei ra mae ra bwa'i suruta'e aho'i, mana maho nameu taroha'inia 'inia God do'a ha'a-suruta'ea Kraest baaniai mae 'a ai'a ha'a-momori. Ma 'onaa 'a ha'a-momori do 'iraaui sae ra mae ra bwa'i suruta'e baaniai mae, me 'ia Kraest 'a ai'a suruta'e baaniai mae.

¹⁷ Ma 'onaa 'ia God 'a ai'a ha'a-suruta'ea Kraest baaniai mae, na hinihinimooou 'a 'ari pwaranga moi mamou awa ro'u mau suri'i ora-ora'a amoo'i,

¹⁸ mana nei nara hinihinia Kraest nara bwane mae'a rau ai'a ataha beia God!

¹⁹ Ma 'onaa gau 'adoma'inia doni hinihinigaau beia Kraest do 'ana moi tahitahi agaau na'i marewanani, ma ha'arohaigaau di'u, suria na hinihinigaau 'e maho haaria moi.

²⁰ Ma'ata 'a ai'a o'asi! 'Ia God 'a bwani ha'a-suruta'ea Kraest baaniai mae, ma ha'ata'inia do'ia God 'ai ha'a-suruta'eraau ro'u baaniai mae 'i nei nara mae.

²¹ Mou 'iraraa, suria ni mae 'a boi moi baaniai ta'i sae, na suruta'e aho'i 'a boi ro'u moi baaniai ta'i sae.

²² 'Igaau hako gai mae suria 'igaau ra'i warowarona Adam, miraaui nei narau hinihinia Kraest rai suruta'e aho'i baaniai mae.

²³ Ma'ata 'e nei ma to'oraai madoraa ana 'anai suruta'e baaniai mae. 'Ia Kraest na suruta'e na'i na'o, mana nei ana'i raigui suruta'e ro'u na'i 'oha nai aho'i mai.

²⁴ Na'i muri 'aigui tari ha'ahakonai marewana. 'Ia Kraest 'ai hei'oi, maai ha'ahoho'i mwani adaro mana mwani mareho ta'a'i nara to'o mena. Ma na'i 'ohasi, 'ia Kraest 'aigui taranga'inia tanaa Godi Amana i hourana 'anai marungia.

²⁵ Ma na'i na'o, 'ia Kraest 'ai heimarungi tarau tari 'oha 'ai ha'ahohoraaui hakoi maerongana.

²⁶ Mana mae, naasi maeronga ha'ahako 'anai ha'a-ai'aa.

²⁷⁻²⁸ 'Inia na Usu-usu Maea 'a o'ani, "Ia God 'a nuga'i mwane mareho hako na'i bahainai heimarungi ana Kraest."* Hoita, na'i 'oha nara 'unua do mwane mareho hako 'ia God na nuga'i na'i bahainai heimarungi ana, gau aidangisia goro do'ia God 'a ai'a nugaa haaria na'i bahainai heimarungi ana Kraest. Ai'a! 'Ia God haaria na hauai mena tanaa Kraest 'anai marungi'i mwane mareho hako. Ma na'i 'oha na 'ia God 'a nuga'i mwane mareho hako na'i bahainai heimarungi anai garena 'ia Jisas Kraest, 'ia Kraest 'aigui nugaa auru haaria na'i bahainai heimarungi ana God. Ma naasi 'ia God naigui marungi'i mwani mareho hako.

²⁹ 'Onaai bwani 'iraraa amou, tara'i nei ra bwareomaea 'anai 'a'auhiraui sae ra mae. 'A 'ua narau daua 'iniai bwareomaea naasi, 'ona narau 'iraraa do'iraui sae ra mae ra bwa'i suruta'e aho'i?

³⁰ Ma 'onaa gau bwa'i suruta'e aho'i baaniai mae, 'i'ameu meu ga'i bwa'i mwa'emwa'e 'anai taroha'inia Kraest 'ado 'oha rei'uaa namei mae!

³¹ 'Ado dangi 'au hano suaai mae! 'A ha'a-momori naasi. 'Onaa 'a ai'a ha'a-momori, 'a ai'a ha'a-momori ro'u do 'inau 'au wa'ewa'e di'u 'iniai hagu amou beiai Arahaga 'ia Jisas Kraest.

³² Na'i Efesas 'iraui nei narau aba gugua rau 'onaai mwamwaa wawauru narau raba ha'ata'aiau di'u. 'E taha na goro 'iniai rongomaata'i 'onaa nagau bwa'i suruta'e aho'i baaniai mae? 'Onaa nagau bwa'i suruta'e aho'i baaniai mae, 'a goro gasi dogai ha'isuriai ha'atee na o'ani, "Gai ngaungau magari gonogono, 'inia na'i ho'oa gai mae."†

³³ Ra gasi pwari'i'amou 'ini'i mwane mamaani o'asi. 'T'amou mou aidangisiai ha'atee ra 'u'unua na o'ani, "Abui hagu beiraui nei na barongadi ra ta'a'i, rau gasi ha'ata'aiai barongamu na goro."

³⁴ Moji wai'i aho'i mai 'adoma'imoo'i mamoi hura'a mai baaniai ora-ora'a. Ra'i nei 'ini'amou, mou ai'a huunai aidangisia God. Ni mareho nau 'unua tana'amousi 'e mareho namou ga'i ninima suria.

'Omehanaui Abe 'Oha Nai Suruta'e Aho'i

³⁵ Ra'i nei rai o'ani, "Ai he'ua ni sae ra mae raigui suruta'e aho'i ro'u baaniai mae? Mana abeda rai 'ome he'ua?"

³⁶ Oru bweu! Na heiarani 'oi sadoia na'i baronganai kora. Na'i 'oha na'o hasiai kora na'i mou amua, na kora 'ai mae ga'u maigui tano'i raboa.

³⁷⁻³⁸ Na korai wiit ma'ua namoiwou ta kora na'o hasia 'a 'ome he'ete'i baaniai mareho na raboa, suria 'ia God na haa tanaai 'omeha na'i 'oha na raboa ara'a ma suriai 'omeha na 'ia God na 'irisia.

³⁹ Na mwane maho nagau hasi'i, na abedaa'i ra 'ome he'ete'i hairiu na'i 'oha ra tahi ara'a. 'A ta'isada ro'u bei'i mwane mareho tahitahi na'i marewana, 'onaigiai noni, ma'ua mwamwaa, manu, mana ii'a.

* 15:27-28 15:27-28 Psalm 8:6 † 15:32 15:32 Aisaea 22:13

⁴⁰ 'Ia God 'a ha'apwa'ara'i mwani mareho na'i marewana ma na'i aro marawa. Mana 'ome goro ni maho ni aro 'a he'ete'i baaniai 'ome goro ni maho ni marewanani.

⁴¹ Na sina 'e 'ome goro ana haaria, na hura 'e 'ome goro ana ro'u haaria, mana hee'u ra'i 'ome goro adaa'i ro'u haari'i. Mana hee'u ra'i 'ome goro adaa'i ro'u he'ete'i hairiu.

⁴² 'Ai o'asi ro'u i abegaa'i na'i 'oha 'ia God 'ai ha'a-suruta'egia baaniai mae. Na abe nagau toringia na'i 'oha nagai mae 'a bwa'i orema mai ngabo, ma'ata ni abe na 'ia God nai ha'a-suruta'ea aho'i 'ai awa tarau.

⁴³ Ni abe na 'ome ta'aa ma maemae'a ga'u, 'ia God 'ai ha'a-'omegoroa maai ha'a-wetewetea na'i 'oha 'ai ha'a-suruta'ea baaniai mae.

⁴⁴ Ni abe nagau toringia, 'e abe moi 'anai marewanani, mana abe nai suruta'e aho'i, 'e abe 'anai aro. 'Onaai to'oraa agaui abe 'anai marewana, 'a o'asi ro'u, na'i nata aba 'e abe 'anai aro.

⁴⁵ Na'i Usu-usu Maea ra usua dona 'etanai sae, 'ia Adam, 'ia God 'a ha'apwa'araa ma hauai tahi tanaa. Mana ruanai Adam, 'ia Kraest, 'e Hi'ona na matai hauai tahi tanagia.

⁴⁶ Naasi mou 'omesia doni abe 'anai aro 'a ai'a boi na'i na'o, ma'ata na abe ni marewana ga'u, maagu boi na'i muri 'i abe 'anai aro.

⁴⁷ Na 'etanai Adam 'ia God 'a tau'arona mai baaniai ano, mana ruanai Adam 'a boi baaniai aro.

⁴⁸ 'Igaau hako inoni nai marewanani, gau to'oraa abe 'onaai abenai nei na boi baaniai ano. Migaau nei nagai taha mau ara'ai aro, na abega rai 'onaai abenai nei na boi baaniai aro.

⁴⁹ Ha'amomori! Na abega na'i 'ohani 'e abe ni marewanani moi 'onaai abena Adam, ma na'i muri na abega 'ai ta'isada mau ro'u 'onaai abena Kraest na boi baaniai aro.

⁵⁰ Nau wai 'unua tana'amou arai do'ora mana asigu'i, na abe hasi'o mana 'abu 'a ai'a arari 'anai siri na'i hourana ana God. Ni abega 'ai ngabo ai'aa moi ma ai'a ta'isada 'anai awa tarau na'i aro.

⁵¹ 'Io. Wai 'unua tana'amoui mareho na bainihu namou ai'a aidangisia. 'Igaau gau bwa'i mae hako. 'Inia na'i 'oha nagai rongoa rai uuhiai ahuri ha'ahako, na abegaa'i rai orisi 'ini'i abe haoru

⁵² mana orisi nagai haua 'ai raurau di'u 'onaai maregugu anai mae. Na'i 'ohasi, ni nei ra mae raigui suruta'e mana abedi rai orisi mara bwa'i mae'a ro'u ta 'oha, mana nei nara tahi na'i 'ohasi na abedi rai orisi o'asi ro'u.

⁵³ 'Inia 'a ororiu doni abe na matai ngabo 'ai orisi 'inia abe na bwa'i matai ngabo, mana abe na matai mae 'ai orisi 'inia abe na bwa'i matai mae.

⁵⁴ Ma na'i 'oha naigui to'o o'asi, naasi 'aigui to'o ha'a-momori taha nara usua na'i Usu-usu Maea na o'ani, "Ni mae naasi 'ia God 'a ha'a-ai'aa ma bwane ha'ahaoa'a!"[‡]

⁵⁵ "Gaugu bwa'i maaa'usia'a i mae,

mana mae 'agu ai'a to'o mena'a 'anai ha'ata'aigaau!"[§]

⁵⁶ 'Irai noni ra maaa'usia'i mae 'ini'i ora-ora'a adaa'i. Marau ora-ora'a suriai horosi'i adaa'i Ringe ana'ia Moses.

⁵⁷ Ma'ata gau ha'atee ha'agorohia God, 'inia 'a ha'ahaoa tanagaui mae mana ora-ora'a 'inia mae ana Araha aga, Jisas Kraest!

⁵⁸ Naasi arai do'ora mana asigu'i, moi ura baabau mamoi abui su'a mwada'u baaniai taha na odo-odo. Moi abui agohe 'anai hau'i tau'aro amoo'i tanaa Araha, 'inia mou 'iraraa do 'abwa'i tau'aro namoi haua tanaa Araha nai 'ari pwaranga.

[‡] 15:54 15:54 Aisaea 25:8 [§] 15:55 15:55 Hosea 13:14

16

Goni Ha'a Nadaaui Inoni Hinihini

Na'i Jerusalem

¹ 'Io. Na'i 'oha namoi goni ha'a 'anai 'a'auhiraau noni ana'ia God na'i Jerusalem, moi haai here nau 'unua tanaraau noni hinihini na'i Provensi Galesia.

² Suri'i 'ado dangi sade, 'ahutanai noni 'ai nuga sigiai siha ha'a na matai haa mai taguma'inia. 'Ai suria moi siha na matai sadoia na'i sadesi. Moi haua o'asi neina 'oha nawai ataha mai bei'amou, ni ha'asi 'ai bwane awa agau'a, mamou bwa'i bonasiai soi ha'a ro'u'a baani'amou.

³ Na'i 'oha nawai ataha wou, 'au rabasia domoi sigihiraau tara'i sae 'anai waai bane amou 'ari Jerusalem. Minau wai haua ta usu-usu 'anai ha'ataaria beiraau maai ha'a-aidangisiraau sae hinihini na'i Jerusalem 'iniraau.

⁴ Ma 'onaa na 'ariwou mawai 'omesia do'a arari do 'au ga'i 'ari ro'u, me 'iraau ga'i hano ro'u moi beiau.

'Ado'adona'i a Pol 'Anai Haa'i

⁵ Na'i 'aariha agua, nau 'adoma'inia dowai taha ga'u na'i Provensi Masidonia mawaigui ataha bei'amou.

⁶ 'A 'ome 'onaa do 'au ga'i gere awa orea bei'amou, gasi tari 'oha nai hako i madoraani awarosi. Naasi mamougui 'a'auhiau ro'u na'i 'aariha agua 'ari suri'i dora nawaigui 'ari ro'u suri'i.

⁷ 'Au ai'a rabasia dowai garihi'amou moi suriai gere madoraau mawaigui hano ro'u 'ari ta dora he'ete'i, me 'au rabasia dowai awa bei'amou gere orea 'onaa 'ia Araha 'a 'irisia.

⁸ Ma'ata 'inau wai awa ga'u moi 'ini na'i Efesas, tari dangi na 'iraau Jiu rai ha'ato'oai Rongoi Pentikos.

⁹ 'Inia na'i 'ini 'au to'oraai kae madoraau goro 'anai hau'i mwane tau'aro goro, rei'uaa na ragoi nei ra ura bwarasiau.

¹⁰ Na'i madoraau na 'ia Timoti 'ai ataha bei'amou, moi ha'amaotoa goro, 'inia 'ia 'e noni tatau'aro ro'u ana Araha 'onaai.

¹¹ Abu tanei 'ini'amou nai 'ome heiheia, ma'ata moi 'a'auhia maai 'ari daara'i goro na'i 'aariha ana tari 'oha nai ataha aho'i mai beiau. 'Inia 'inau 'au totoriai aho'i mai ana beiraau ro'u haru noni hinihini narau hano beiasi.

¹² Hoita, i do'oragaaua Apolos 'au ha'ata'u'ua wetewete moe'a do'ai hano beiraau haru noni hinihini narai 'ariwou garihi'amou, ma'ata 'a ai'a 'adoma'inia do'ai hano beiraau na'i 'ohanisi. Ma'ata 'oha nai 'omesia ta madoraau goro, ma 'ai 'ariwou mau.

Ha'atee Ha'ahako Ana'ia Pol

¹³ Moi 'ome'ome goro, mamoi ura baabau suri'i hinihinimoo'i. Mou abui maaa'u, moi wetewete.

¹⁴ Na mwane mareho namoi haa'i moi hau'i beiai heita'ahi.

¹⁵ Mousu 'adoma'inia Stefanus miraau nei narau ta'i awa na'i ruma ana. 'Iraau naasi 'i noni hinihini narau rihosi tahamora na'i Akaea, marau wataaraau haariraau 'anai 'a'auhiraau noni ana'ia God. Mau ha'a-ta'u'amou arai do'ora mana asigu'i,

¹⁶ 'anai suriraau sae o'asi, ma'ua 'iatei na tatau'aro raha tanaai heisoi 'onaairaau.

¹⁷ 'Au ta'i kae wa'ewa'e di'u 'inia ataha mai adaaua Stefanus, Fotiunatas mea Akakas. Rei'uaa namou ai'a ataha mai, me 'iraau narau ataha 'ini'amou

¹⁸ marau ha'a-wetewetea di'u i 'adoma'igu, 'onaai ha'a-wetewetea adaau 'adoma'imoo'i na'i na'o. Na inoni o'asi, moi 'adoma'i ha'ahou'i.

¹⁹ 'Irai inoni hinihini suri'i 'omaa na'i Provensi Eisia rau 'unua woui ha'atee wa'ewa'e adaau tana'amou. 'Ia Akuila mea Prisila, miraaui inoni hinihini narau goni tarau wou 'anai ha'arahesi na'i ruma adarua, rau 'unua ro'u wou i ha'atee wa'ewa'e adaau tana'amou na'i atana Araha aga.

²⁰ Miraaui hakoi inoni hinihini na'i 'ini rau 'unua ro'u wou i ha'atee wa'ewa'e adaau tana'amou. 'Oha moi awa goni noni hinihini 'onaai ta'i ruruha, moi here beiai nata nei* 'anai ha'ata'iniai heita'ahi amou tana'amou hairiu.

²¹ 'Inau haariau a Pol nau usu ha'ahakoai usu-usuni 'iniai rimagu 'anai 'unuai ha'atee wa'ewa'e agua tana'amou.

²² 'Iatei na ai'a ta'ahia Araha, na ha'a-mama'ai ana God 'ai auru na'i hungana.

Araha, 'oi boi raurau!

²³ 'Au ha'arahesi mia Araha aga 'ia Jisas 'ai ha'agorohi'amou.

²⁴ 'Au ta'ahi'amou hako i nei namou hagu beia Jisas Kraest. Amen.

* **16:20 Here beiai nata nei:** Na'i ha'atee ni Grik ra 'unua "ngooniai nata nei beiai heingooni ni heita'ahi." Na'i madoraasi, 'iraaui sae mwane rau ngooniai babanai nata sae mwane, miraaui urao rau ngooniai babanai nata urao 'anai ha'ata'iniai heita'ahi tanaraau hairiu. 'A ta'isada beiai herehere agaaui na'i 'ohanisi 'oha gau here beiai nata nei.

Na Ruanai Usu-usu Ana Pol Tanaraaui Noni Hinihini Na'i Korin

Gere Mamaani 'Iniai Bukani

'A 'ua? Na'i 'oha na'o siri suri'i mwane mareho bwara, 'o arungana do'a goro do nata sae 'ai aidangisi'i ro'u bei'o i taha na'o siri na'iei? Na'i 'oha na 'ia Pol 'a usu'i usu-usu ana'i 'a matai ha'a-'o'oriraaui nei narau awa bwara, 'inia 'iia haaria 'a bwane siri suri'i mwane maho bwara na'i tahitahi ana.

Na'i 'oha na ha'ataariai 'etanai usu-usu ana tanaraaui noni hinihini nai Korin, gasi na'i muri 'ia Pol 'a taha ga'u beiraaui. Ma na'i 'oha na aho'i, 'a hauai nata usu-usu nagu raongiraaui na'iei neina rai araisuria God. Miraaui noni na'i Korin rau arunga ta'aa marau taesu'a 'iniai raongiraaui ana. Ma tara'i sae hinihini na'i Korin rau pwari'i 'ana Pol do 'iia ai'a huunai Ha'ataari.

Ni buka nagau 'unua 'iniai ruanai Korin 'a ga'i 'onaa do naasi oruna'a i usu-usu na 'ia Pol na haua tanaraaui noni hinihini nai Korin. Na'i raronai usu-usunisi 'ia Pol 'a raba ha'agorohi'i aho'i 'adoma'idaa'i marai aidangisiai heita'ahi na haua Pol tanaraaui. Mia Pol 'a maani'i mwani mareho nara to'o na'i tahingana nara ha'ata'inia do 'iia 'e huunai ha'ataari. 'Iraaui noni nai Korin rau siri suri'i mwane madoraa bwara suri'i tahingadaa'i. Naasi 'ia Pol 'a maani'i tanaraaui tara'i mareho bwara nara to'o na'i raronai tatau'aro ana 'anai ha'a-'aro'i ahudaa'i.

'Oha na 'oi 'oha'iniai ruanai Korin 'oigui 'omesia doni mareho bwara na 'ia Pol na siri suri'i, ra 'a'auhia 'anai ahu ta'ahiraaui nei narau siri suri'i mareho o'asi ro'u. 'Oi wai'ado'ado suriai taha na 'oi matai haua 'anai ha'ata'iniai heita'ahi tanaraaui nei narau siri suri'i mareho bwara.

¹ Tana'amoui noni ana'ia God na'i 'omaai Korin, mei tanaraaui hako inoni hinihini na'i Provens amou na'i Akaea. 'Inaua Pol na 'ia God na sigihiau 'anai Ha'ataari ana Jisas Kraest, mea Timoti 'i do'oragaui, namiri hauai usu-usuni.

² Mau ha'arahesi mia God mea Araha aga 'ia Jisas Kraest, rarui goro 'ini'amou mararui ha'a-awa ha'agorohi'amou.

Pol 'A Ha'atee Ha'agorohia God

³ Ha'atee ha'agorohia God, i amana Araha aga Jisas Kraest. 'E Ama ni heita'ahi, ma'e God ni ha'a-'o'ori.

⁴ 'Iia na ha'a-'o'ori'ameu suri'i madoraa nameu siri suri'i rongomaata'i, neina 'i'ameu mei ha'a-'o'oriraaui ro'u i nei narai rongomaata'i, 'onaai ha'a-'o'ori'ameu ana God.

⁵ 'Tameu meu rongomaata'i di'u 'ini suria ameeua Kraest, mana'i madoraa nameu rongomaata'i di'u o'asi, na ha'a-'o'ori ana God 'a raha di'u ro'u tana'ameu 'ini hagu ameeu beia Kraest.

⁶ Na rongomaata'i nameu siri suri'i, 'e mareho 'anai ha'a-'o'ori'amou ma 'e mareho na bwane 'a'auhi'amou 'anai aidangisia Kraest. 'Ia God 'a ha'a-'o'ori'ameu neina 'i'ameu mei ha'a-'o'ori'amou ro'u mamoi ahumaratanoa 'anai siri daara'ini'i rongomaata'i na 'i'ameu meu siri daara'ini'i ro'u.

⁷ Naasi 'i'ameu meu ai'a 'adoma'i heiruarua'a 'ini'amou, suria meu 'iraraa do na'i madoraa moi siri suri'i rongomaata'i 'onaai rongomaata'i nameu siri suri'i, moi daa'i ro'u i ha'a-'o'ori nameu daa'i.

⁸ Arai do'ora mana asigu'i, 'au 'irisia domoi aidangisiai maho nameu siri sadoia na'i Provens na'i Eisia. 'A arunga ta'aa, ma hihi'a di'u tana'ameu, mameu 'adoma'inia do meugu bwa'i tahi'a.

⁹ 'Ado 'oha meu arunga 'iraraa ra ha'aagau moi 'anai ha'amaesi'ameu! Ma'ata 'a o'asi do 'i'ameu mei abui 'u'uri'ameu haari'ameu me domei 'u'uria God, 'inia 'ia naasi nai ha'a-suruta'eraaui noni baaniai mae.

¹⁰ God 'a ha'atahi'ameu baaniai maemaeha naasi, ma'ai ha'atahi'ameu ro'u moe'a. Meu hinihini wetewete do 'ia 'ai ha'atahi'ameu mau ro'u,

¹¹ suriai 'a'auhi'ameu amoou suri'i ha'arahesi amoo'i. 'Ia God 'ai 'a'auhi'ameu 'ini rago adai noni nara ha'arahesi 'a'auhi'ameu. Ma 'ai ragoi nei rai ha'atee ha'agorohia God na'i 'oha rai 'omesiai hei'a'auhi na hua tana'ameu.

Pol 'A Orisiai Maho Na 'Adoma'inia

¹² 'T'ameu meu mari'ori'o, 'inia meu 'irara ha'agorohia doni barongamee'i ra odo-odo tanaraaui mwani noni hako 'onaai 'irisia ana God, me ororiu tana'amou. Ni awa odo-odo nameu hua, meu hua suriai goro ana God 'ini'ameu, ai'a suriai aidangina noni.

¹³⁻¹⁴ Suri'i usu-usu agu'i tana'amou, 'au ai'a ha'atee bibii ma'ua usu'i dio i taha narai bwara di'u tana'amou 'anai aidangisi'i 'onaai 'unua adaau tara'i nei. 'Au 'iraraa do mou ai'a aidangisi'i hako barongamee'i, ma'ata meu huunai rabasia domoi aidangisi'i goro mau. Ma naasi na'i 'oha Araha Jisas 'ai aho'i mai, moigui mari'ori'o 'ini'ameu, mi'ameu meigui mari'ori'o ro'u 'ini'amou.

¹⁵ 'Iniai 'iraraa agua domoi mari'ori'o 'ini'ameu, nau 'adoma'inia 'inia ani dowai ataha ha'arua bei'amou, neina wai 'a'auhi'amou ha'arua ro'u.

¹⁶ 'Au 'adoma'inia dowai taha bei'amou na'i 'oha nawai hano 'anai 'ari Provensi Masidonia, mana'i 'oha nawai aho'i mai. Ma na'i 'ohasi, moigui 'a'auhiau na'i 'aariha nawai haa 'ari na'i Provensi Jiudea.

¹⁷ 'A 'ua? Gasi, mou 'adoma'inia do 'inau 'au orisia raurau moi 'adoma'igu 'iniai ai'a taha agua bei'amou 'onaai 'unua agua ani. Ai'a! 'Inau ai'a 'onaairaaui sae ahurodo nara haa 'io maraugu orisi'i aho'i 'adoma'idaa'i na'i muri.

¹⁸ Mwane mareho nameu 'unu'i tana'amou ra ha'a-momori 'onaai God na ha'a-momori tarau. 'Oha nameu haa 'io tana'amou meugu bwa'i orisi'i'a i 'ado'adomee'i 'onaa na bwa'i tarana.

¹⁹ 'A o'asi suria 'ia Jisas Kraest i garena God na 'i'ameu a Saelas mea Timoti nameu taroha'inia tana'amou, 'a ai'a 'anai haa 'io na'i 'ohani ma do'aigui orisia aho'i 'ado'ado na'i muri. 'Ia Jisas 'a hua tarau i mareho na duruduru 'inia.

²⁰ Na mwane duruduru ana'ia God, 'ia Kraest na ha'ato'o'i. Ma naasi gau matai ha'aasaa God o'ani, "Ha'amomori, 'ia God 'a hua tarau i maho na duruduru 'inia. Amen."

²¹ 'Ia God naasi na 'a'auhigia 'anai ura baabau na'i hinihinigaau beia Kraest. 'A sigihigia 'anai ha'i inoni ana'i,

²² ma ha'ataaria mai Hi'ona Maea 'anai mono na'i raroga. 'A 'onaai ha'ara 'anai ha'ata'inia do'ia God na to'oragia ma ha'ata'inia doni duruduru ana'i rai ha'a-momori tanagia.

²³ 'Io, waigui ha'ata'inia tana'amou i taranai taha nau ai'a taha aho'i mai 'inia na'i Korin, mia God na 'iraraa doni mareho nau maaniani 'a ha'a-momori! Nau ai'a taha mai bei'amou ani suria 'au ai'a 'irisia domoi arunga ta'aa di'u 'oha wai hadahada ha'a-ta'ai'amou 'ini'i barongamoo'i nara ai'a goro.

²⁴ Ai'a domeu raba ha'a-'usu'usu'amou moi 'anai hinihini'i mareho nameu hinihini'i, 'inia meu 'iraraa do mou ura baabau na'i hinihinimoo'i. 'Tameu meu raba 'a'auhi'amou moi 'anai ha'a-wa'ewa'e'amou.

2

¹ 'Oha nau awa bei'amou na'i na'o ani, 'au ha'atee wetewete tana'amou mau ha'a-arungata'ai'amou. Na tarana naasi naugu orisia 'inia i 'adoma'igu 'anai boi garihi'amou ro'u. 'Au gasigu ha'a-arungata'ai'amou ro'u.

² 'Inia 'onaa nawai ha'a-ahutotou'amou, ma bwa'i nei'a ro'u naigui ha'a-wa'ewa'eau. Suria 'i'amou moi namou matai ha'a-wa'ewa'eau. 'Inia 'onaa nawai ha'a-ahutotou'amou, ma'ai bwara tana'amou 'anai ha'a-wa'ewa'eau!

³ Naasi tarana nau raongi'amou 'inia na'i nata usu-usu ani. 'Au ai'a 'irisia do 'iraaui mwane narau ga'i ha'a-wa'ewa'eau, naraigui ha'a-ahutotouau na'i 'oha nawai 'ari wou. Ma'ata 'inau 'au hinihini domou araisuri'i mareho nau usu'i tana'amou ani, ma naasi 'inau wai wa'ewa'e, mi'amou ro'u moi wa'ewa'e.

⁴ Na usu-usu nau haua ani 'au haua beiai ahutotou. Na wainai maagu ra ahe 'iniaia raha di'u anai ahutotou na'i tahingagu. Ma ai'a do 'au raba ha'a-ahutotou'amou, me 'au 'irisia domoi aidangisiai raha na haua i heita'ahi agua tana'amou.

'Adoma'i Nugasia Mo'o Na Hauai Taritari'a

⁵ 'Io. 'Ia mo'o 'ini'amou na taritari'a ani, 'a ai'a ha'a-arungata'aiau moi ma'ata 'a ha'a-arungata'ai'amou hako. Me 'a ai'a do 'a ha'a-arungata'ai'amou di'u hako. Nau 'au 'unua o'asi, suria 'au ai'a raba mamaani ha'ata'aia di'u a mo'o na taritari'asi.

⁶ Ni ha'a-mama'ai na ragoi nei 'ini'amou namou haua tanaa 'a arari'a.

⁷ Hoita, na mareho namou ga'i haua 'ai o'ani. Moi 'adoma'i nugasiai 'inona mamoi ha'a-o'oria na'i tahingana, 'a gasigu arunga ta'aa magu ta'aa di'u wou tanaa.

⁸ Naasi 'au ha'a-ta'u'u'amou 'anai ha'ata'inia tanaa domou ta'ahia mau.

⁹ Naani taranai taha nau usua 'iniaia usu-usu ani tana'amou. 'Au usu-usu 'anai ohooho'amou mawai sadoia 'onaa namoi araisuriai heiatenga'i agua tana'amou 'anai ha'a-mama'aia mo'osi.

¹⁰ Ma naani, 'au 'iraraa domou araisuria'a, ma naasi 'iatei namou 'adoma'i nugasia 'iniaia taritari'a ana, 'inau 'au 'adoma'i nugasia ro'u 'inia, 'onaa na ha'a-momori do 'a hauai mareho na ta'isada do 'au ga'i 'adoma'i nugasia 'inia. 'Ia Kraest 'a 'iraraa do 'au 'adoma'i nugasia neinai 'a'auhi'amou.

¹¹ 'Au haua o'asi, suria 'onaa nagau bwa'i 'adoma'i nugasia, 'ia Saetan 'ai siri mai 'anai ha'ata'aigaau. Migaau gau aidangisia do 'iia 'a honu 'ini'i mwane ha'aradorado ta'a'i.

¹² 'Io. Na'i madoraa nau 'ari na'i Troas 'anai taroha'iniaia Taroha Goro 'inia Jisas Kraest, 'au 'ome 'iraraa do'ia Araha 'a haua tanaau i madoraa goro 'anai heitaroha'i na'iei.

¹³ Ma'ata 'a ai'a goro i 'adoma'igu 'iniaia ai'a heisadoi agua beiai do'oragaau a Taetas, 'inia 'iia na ga'i waa mai taroha 'ini'amou. Naasi 'au ha'atee haiha'ari beiraau noni hinihini na'i Troas, mau daara'i mai 'ini na'i Masidonia 'anai sibania Taetas.

¹⁴ Ma'ata meu ha'atee ha'agorohia God! 'Inia 'ia Kraest 'a 'a'auhi'ameu 'anai ha'ahoea Saetan suri'i mwani dora na 'ia God 'a na'otarameeu 'ari suri'i. Mia God 'a ha'ataari'ameu hura'a 'anai taroha'inia Kraest suria 'ari mwane dora 'onaa 'adarara na haa i si'inihanai insens hako 'ari suria mwani dora.

¹⁵⁻¹⁶ Na heitaroha'i nameu haua 'inia Kraest, 'a 'onaa insens na si'ini mamagi na ha'a-wa'ewa'ea God ma 'adarara hako 'ari si'inihana beiraau

mwani inoni. Tanaraaui nei narai tahi beia God, na Taroha Goro 'a haua tanaraaui si'ini na mamagi, ma hauai tahi tarau tanaraau. Mei tanaraaui nei nara suriai tara 'anai mae, na si'inihana 'a ta'aa tanaraau, ma haua tanaraaui mae tarau. Hoita naasi, 'a 'ome 'onaa do ai'a ta nei nai arari 'anai hauai tau'aro na ororiu di'u o'asi!

¹⁷ Ma'ata 'i'ameu ra'i inoni tatau'aro ana'ia Kraest na 'ia God na ha'ataari'ameu hura'a 'anai taroha'iniai Taroha Goro beiai huunai 'adoma'i ni heitaroha'i na odo-odo na'i maana. 'I'ameu ai'a 'onaairaaui nei nara taroha'iniai ha'atee ana God 'anai dau ha'a 'inia.

3

Duruduru Haoru Ana God

¹ 'A 'ua? 'Oha nau usu-usu o'asi mou 'adoma'inia do 'au ha'imaania ha'a-ta'eta'e'ameu 'iniai tatau'aro ameeu? Ai'a! Tara'i sae heitaroha'i nara huhura'a, ra to'ora'i usu-usu baaniraau sae hinihini suri'i 'omaa adaa'i 'anai ha'arangasia hura'a do 'irau ra'i sae tatau'aro goro ana'ia God. Ma na'i 'oha nara hura'a 'anai garihiraau tara'i sae hinihini ro'u rai ha'ata'ini'i usu-usu 'isi tanaraau. 'I'ameu ai'a haua o'asi. 'I'ameu ai'a 'irisia ta usu-usu baania tanei 'anai ha'a-aidangisi'amou 'ini'ameu ma'ua baani'amou 'anai ha'a-aidangisiraau inoni 'ini'ameu.

² 'Inia 'i'amou naasi namou 'onaai usu-usu 'anai hadanga'ini'ameu tanaraaui noni. Na 'adona hakoi noni ra matai re'i'i tahingamoo'i marai aidangisia do 'i'ameu ra'i sae tatau'aro goro ana'ia God.

³ Na hinihini amou beia Kraest 'ohani, 'a 'onaai usu-usu na ha'ata'inia doni tatau'aro ameeu bei'amou 'a goro. 'Ia Kraest na usuai usu-ususi, 'inia 'ia na ha'ataari'ameu tana'amou. 'Ia Kraest 'a ai'a usu-usu 'inia ta mareho 'onaai ingki 'anai ha'a-aidangisiraau noni 'iniai hinihini amou beia, ma'ata rau aidangisia 'iniai Hi'ona Maea ana God tahitahi na awa bei'amou. Ma ai'a usu-usu na'i dorai hau papaheta'a, me ma'ata suri'i tahingamoo'i.

⁴ 'Ia Kraest na ha'a-'o'ori'i 'adoma'imee'i mameu 'iraraa ha'agorohia doni tatau'aro ameeu bei'amou 'a 'a'auhi'amou, mia God 'a 'iraraa do meu ha'atee ha'a-momori.

⁵ Ai'a do meu 'adoma'inia domeu wetewete arari haarimeeu 'anai hauai tatau'aro naani, ma'ata 'ia moia God na ha'a-arari'ameu 'anai haa.

⁶ 'Ia na ha'a-arari'ameu 'anai ha'ausuriraau noni 'iniai duruduru haoru ana. Meu ai'a 'unua tanaraau dorai araisuri'i mwani Ha'atora ana'ia Moses 'anai dauai tahi tarau, ma'ata na Hi'ona Maea naasi nai haua tanaraau. 'Onaa gai 'u'uri'i Ha'atora ana'ia Moses 'anai ha'atahigia, 'ai hauai mae tanagia, ma'ata na Hi'ona Maea 'ai hauai tahi tarau.

⁷ Na Ha'atora na 'ia God na usu'i dio na'i rua dorai hau papaheta'a na hauai mae tanaraaui noni. 'Inia 'iatei na bwa'i araisuri'i hako 'ai dauai mae tarau. Ma'ata rei'uaa na o'asi, ni Ha'atora 'a boi beiai rarahana God na wadoriai bwauna Moses. Ma rei'uaa na bwara tanaraaui noni nai Israel 'anai wana orea 'inia Moses, ma'ata ni raraha naasi 'agu buna ai'aa mau.

⁸ Naasi, 'onaa 'ia God 'a ha'ata'iniai ororiu anai Ha'atora o'asi, 'e taha i 'ado'adomoo'i 'iniai ororiu na haa i duruduru haoru na boi beiai Hi'ona Maea?

⁹ 'Onaa na mareho nai haua tanagiai mae 'a ororiu, 'a ha'ata'inia doni mareho nai hauai tahi tanagia 'a ororiu di'u!

¹⁰ Na'i 'oha bwani na Ha'atora 'a 'ome ororiu, ma na'i 'ohani ni ororiu anai duruduru haoru 'a di'uai ororiu anai Ha'atora.

¹¹ Ma 'onaa na Ha'atora nara bwa'i awa tarau ra ororiu, 'a ha'ata'inia doni duruduru haorusi 'a ororiu di'u, 'inia 'ai awa tarau.

¹² Suriai 'iraraa ameeu doni duruduru haoru naasi 'a ororiu di'u, 'a ha'a-ramoramo'ameu 'anai taroha'inia hura'a i Taroha Goro.

¹³ Ni heitaroha'i nameu haua, meu ai'a girua ta maho. Meu ai'a 'onaaia Moses na ha'abwarasiai bwauna 'iniai bwana baaniraaui inoni nai Israel dorau gasi 'omesia i 'oha na rarahanai bwauna 'a hanoria wou i ai'aa.

¹⁴ Na'i 'ohasi, ni 'adoma'idaa'i ra kuhi. Ma tari mai 'ohani, na'i madoraa na 'iraaui Jiu rau 'oha'iniai Buka Duruduru Bwani, rau bwarai aidangisia, suria na 'adoma'idaa'i ra kuhi mau. 'A 'onaaia bwana na ha'abwarasi'i. Ma'ata ni bwana naasi 'a matai ai'aa moi 'onaa rai hinihinia Kraest.

¹⁵ Ha'amomori, rei'uaa na'i 'ohani, suri'i 'oha ra 'oha'ini'i buka na usu'ia Moses, na bwana naasi 'a ha'akuhi'i mau i 'adoma'idaa'i.

¹⁶ Mia tei nai rihota'i tanaa Araha baani'i ora-ora'a ana'i, na bwana na ha'akuhiai 'adoma'ina, 'ai ai'aa.

¹⁷ Ni Araha nau 'unua ani, naasi Hi'ona Maea. Mia tei na Hi'ona Maea 'a awa beia, 'iia 'a awa dadara'a'a.

¹⁸ Naasi, 'igaaui noni hinihini ai'a bwana nai ha'akuhi'i 'adoma'igaa'i. 'Igaau gau wanawana suriai raraha mana gorohana Araha, mana Hi'ona Maea 'a 'abenga'i orisigia 'onaaia. 'Ari wou mana raraha mana gorohaga 'ai ta'isada beia.

4

Mangudi Na'i Taroha'iniai Taroha Goro

¹ 'Ia God 'a goro 'ini'ameu ma ha'a-'u'uri'ameu 'iniai tatau'aro ana 'anai taroha'iniai Taroha Goro. Tarana naasi nameu ai'a wai'ate'a 'inia 'anai hauai tatau'aro naasi.

² Mana heitaroha'i nameu haua, meu ha'imaania domei abui haua ta mareho namei ninima 'inia ma'uasi domei girua ta maho ta'iniraaui noni dorai abui 'iraraa. Meu bwa'i ha'a-bweubweu'aa tanei, ma'ua domei hiosi'i ha'atee ana'ia God. 'Ia God 'a 'iraraa do 'i'ameu meu taroha'inia hura'ai taha na ha'a-momori na'i ha'atee ana, neina 'iraaui noni rai matai 'u'uriai taha nameu ha'ausuriraaui 'inia.

³ Ma 'onaa na Taroha Goro nameu taroha'iniasi 'a bwarai aidangi tarihana, me 'a bwara tanaraau moi nei narau suriai tara 'anai mae tarau.

⁴ 'A bwara tanaraaui hinihini suria na hi'ona ta'aa na'i marewanani na ha'akuhi'i 'adoma'idaa'i, ma ha'abwarasiai marewa baaniraaui, do'a gasigu bewaasiraaui. Na bewaasi, naasi marewa na boi baaniai Taroha Goro 'inia Kraest na hauasa ma ta'isada beia God.

⁵ Mareho nameu taroha'inia, meu ai'a taroha'ini'ameu haarimeeu, ma'ata meu taroha'inia do'ia Jisas Kraest na Araha mi'ameu ra'i noni tatau'aro ana'i na ha'ataari'ameu 'anai 'a'auhi'amou.

⁶ 'Oha 'ia God 'a ha'apwa'araai marewa 'a ha'atee o'ani, "Ni marewa 'ai rara na'i kuhi." Na ta'i God mau naasi na hauai marewa na rara suri'i tahingagaa'i, ma ha'a-aidangisigaau 'iniai gorohana mana mena ana na gau re'ia beia Kraest.

⁷ 'I'ameu meu 'onaa taraani huai bei moi na awa i toto'ora na'i raronaa, 'inia 'ia God 'a ha'a-'u'uri'ameu i sae haari'i moi 'iniai Taroha Goro ana. 'A haua o'asi 'anai ha'ata'inia doni mena hauasa 'anai hauai tatau'aro naasi, ai'a 'iia ameeu me 'iia ana God.

⁸ Meu hano sua'i mwane mareho ta'a'i, ma'ata meu ai'a maemae'a. Tara'i 'oha 'a kakui ahumee'i mameu ai'a 'iraraai taha 'anai haa, ma'ata meu ai'a agohe.

⁹ Ra nora ta'ai'ameu, ma'ata 'ia God 'a ai'a nugasi'ameu. Ra ha'a-maata'i'ameu ma'ata ra ai'a ngahu ha'a-ai'ameu.

¹⁰⁻¹¹ 'Ado madoraa na'i tahitahi ameeu, meu awa na'i bahainai maemaeha 'iniau tau'aro ameeu tanaa Kraest, do neina tahingana 'ai ha'ata'i hura'a ro'u suri'i abemee'i nara matai mae moi ta'oha.

¹² Naasi meu hano sua tarau i mae, ma'ata tana'amou 'e tahi tarau.

¹³ Ra usua o'ani na'i Usu-usu Maea, "'Au ha'atee, suria 'au 'u'uria God.'"* Hoita, 'i'ameu meu o'asi ro'u, meu taroha'inia moe'a ro'u i Taroha Goro, suria 'i'ameu 'u'uria ro'ua God.

¹⁴ 'Inia meu aidangisia do ni God na ha'a-suruta'ea Araha aga Jisas Kraest baaniai mae, 'ai ha'a-suruta'e'ameu o'asi ro'u, maai wai'ameu goni bei'amou 'anai 'ari beia.

¹⁵ Na mwane rongomaata'i nara to'i'ameu, ra'i rongomaata'i 'anai 'a'auhi'amou neina rai rago i nei narai aidangisiai heita'ahi ana God tanaraau. Ma naasi 'aigui rago ro'u i nei 'anai ha'atee ha'agorohia ma 'anai ha'ahauasaa.

¹⁶ Naasi tarana nameu ai'a wai'ate'a 'iniasi 'anai tau'aro. Rei'uaa na abemee'i ra hanoria woui wari'a mameu maemae'a, ma'ata na tahingani hi'ona bei'ameu 'a wetewete raha ara'a tarau 'ado dangi.

¹⁷ Na rongomaata'i nameu siri suri'i suriai gere madoraa ra ai'a taraa ta'aa di'u na'i 'oha nameu aidangisia dorai 'a'auhi'ameu 'anai dauai mareho nai goro di'u ro'u wou. Naasi mwane bane goro narai awa tarau namei daua ara'ai aro.

¹⁸ Naasi 'i'ameu meu ai'a 'adoma'inia maho nameu matai 'omesia 'ohani, ma'ata meu 'adoma'inia maho nameu ai'a 'omesia. Ni rongomaata'i nagau siri suri'i ra bwa'i awa ore'i, ma'ata ni maho nagau ai'a matai 'omesia 'ai awa tarau.

5

Abe Haoru

¹ Gau 'iraraa do na'i 'oha gai mae mana abega na'i marewanani 'ai ngabo ai'aa wou, 'igaau gai awa beia God na'i aro beiai abe haoru nai haua tanagia. 'Ia God nai haua tanagiai abe haorusi, ma ai'a abe na inoni nai tau'arona, ma'ata 'e abe na 'ia God na tau'arona 'anai awa tarau.

² Me na'i 'ohani gau huunai raba hano baaniai marewanani neina gai awa ara'ai aro beiai abe haoru.

³ 'Inia gau rabasia doni aungagaa'i rai to'o dora taradi marai abui 'onaai nei na ore-ore.

⁴ Na'i awa nagau haa na'i marewanani, gau arunga hihi'a 'ini'i mwane mareho magau arunga wai'ate'a 'inia. Ma ai'a dogau rabasiai mae neina gai bwa'i to'o abe. Ai'a! Gau rabasia dogai dauai abe haoru nai tahi tarau, mana abe haoru naasi 'ai orisiai abe na matai mae moi.

⁵ 'E 'ado'adona ma'e hei'irisina God 'anai orisiai 'inia abe haorusi, ma haua tanagiai Hi'ona Maea 'anai ha'ata'inia tanagia doni taha na durua 'ai to'o ha'a-momori.

⁶ Naasi na 'ado'adogaa'i ra wetewete. Gau 'iraraa do na'i 'oha nagau awa beiai abe ha'i hasi'o na'i marewanani, gau awa ha'atau baaniai 'omaa ana Araha.

⁷ Ma'ata gau 'iraraa dogai taha mau na'iei, suria na hinihini na na'otaragaau, ai'a do 'e mareho nagau 'omesia.

⁸ Ha'amomori, na 'adoma'iga ra wetewete magau 'adoma'inia do 'a ga'i goro dogau ga'i nugasiai abega anai marewanani, 'anai awa beia Araha ara'ai aro.

⁹ Naasi rei'uaa nagau awa na'i marewana ma'ua na'i aro, gai ha'imaania do'ia Araha 'ai wa'ewa'e 'ini'i mwane mareho hako nagai haa'i.

* 4:13 4:13 Psalm 116:10

¹⁰ Suria 'igaau mwani inoni hako gai ura na'i maana Kraest 'anai hiirigaau. 'Iia 'ai taharigia hako aho'i inoni 'ini'i mwane mareho hako nagau haa'i, rei'uaa ra goro ma'ua ta'aa.

Hagu Beia God Na'i Garena

'Ta Jisas Kraest

¹¹ 'Onaai aidangisia ameeu doni hihiri ana Araha 'e mareho na ha'amamaa'u, naia nameu bonasia 'inia doni mwane inoni rai hinihiniai Taroha Goro. 'Ia God 'a aidangisia domeu heitaroha'i beiai 'adoma'i na odo-odo, ma 'au huunai 'irisia do 'i'amou moi aidangisia o'asi ro'u.

¹² Ai'a domeu bonasiai ha'a-ta'eta'e'ameu ro'u na'i maamou, ma'ata me rabasia domoi 'omesi'i mareho nameu haa'i mamoi mari'ori'o 'ini'ameu. Ma naasi moi matai aramiraau nei narau ha'atee ha'a-ta'ai'ameu. 'Inia 'iraausi, rau 'adoma'i ororiu moi 'iniai tatau'aro adaa'i nara ha'ata'i hura'a, maraugu ai'a taraa 'adoma'i ororiu 'iniai taha na awa na'i tahingadaa'i.

¹³ 'Onaa na me 'ome to'o bweubweu'a 'onaai 'unua ada tara'i sae, naia i tau'aro raha nameu haua tanaa God na ha'a-'osi'ameusi. Ma 'onaa nameu 'ome odo-odo, ma naasi 'e goro tana'amou.

¹⁴ Na tau'aro nameu haua, me haua 'iniai heita'ahi ana Kraest tana'ameu. Me aidangisia do 'iia naasia mo'o na mae 'inigia hakoi mwane inoni, ma naasi 'a 'onaa do 'igaau hako gau mae ro'u.

¹⁵ 'Ia Kraest 'a mae 'inigia, do'igaau 'i nei nagau dauai tahinga haoru, gai abui ha'isuri'i 'adoma'igaa'i, ma'ata gai suriai nei na mae ma suruta'e aho'i 'inigia.

¹⁶ Naasi, na'i 'ohani, ni 'adoma'i nagau ga'i haua 'anai nata sae, 'a ga'i bwa'i 'ari suriai ororiu na haua i saesi na'i marewana. Naasi 'adoma'i nagau to'oraa ga'u 'ana Kraest, 'oha gau 'adoma'inia do 'iia 'e noni haaria moi.

¹⁷ Naasi 'a ha'ata'inia do 'iatei na hinihinia Kraest, 'iia 'e inoni haoru. Ni baronga bwani ra ai'a'i, mana baronga haoru ra sirimai.

¹⁸ Ni baronga haoru 'isi, ra boi baania God. Me 'iia na ha'ataaria Kraest 'anai totoa aho'i heihoa na inoni na haa beia God, do 'iraaui rai matai hagu aho'i beia. 'Iia 'a haua tana'ameui tatau'aro 'anai wairaaui mai noni 'anai hagu aho'i beia.

¹⁹ Na mareho nameu taroha'inia, naasi do 'ia God 'a ha'haguraui mwane inoni beia 'inia Kraest. Mia God 'a matai 'adoma'i nugasi'i ora-ora'a adaa'i. 'Iia 'a haua tana'ameui tatau'aro 'anai taroha'iniai marehosi tanaraui noni.

²⁰ Naasi 'i'ameu nameu ura 'inia Kraest, ma 'onaa do'ia God na hau'i tana'ameui hadahada ana'i 'anai 'unu'i tana'amou. Naani maho na 'ia Kraest na 'irisia domei 'unua tana'amou, "Moi hagu aho'i beia God!"

²¹ 'Ia Kraest 'a ai'a ora-ora'a. Ma'ata 'anai 'a'auhigia, 'ia God 'a rahi'i ora-ora'a agaa'i, ma hau'i tanaa Jisas 'anai waa'i baanigia. Ma haua o'asi do 'igiai nei ga hagu beia Kraest, gai ha'i inoni odo-odo na'i maana God.

6

¹ Tarana i tau'aro goni ameeu beia God, me ha'a-ta'u'u'amou i nei namou aidangisiai heita'ahi ana God tana'amou, do mou gasi 'adoma'i mara maho haaria moi 'inia.

² Moi rongoai taha God na 'unua na'i Usu-usu Maea, 'a o'ani, "Oha na tari madoraa 'anai 'a'auhi'amou, 'au rongo'amou. Ma na'i madoraa 'anai ha'atahi'amou, 'au 'a'auhi'amou." Mou rongoa! Naani madoraa na 'ia God 'a raba 'a'auhi'amou, mana madoraa na raba ha'atahi'amou.

'Ta Pol 'A Siri Suri'i Mwani Rongomaata'i

³ Meu ha'imaania do mei abu haua ta maho nai 'ome ta'aa na'i maadai noni, suria meu ai'a rabasia do tanei 'ai ha'atee ha'ata'aiatau'aro ameeu tanaa Araha.

⁴ Ma'ata suri'i mwane mareho hako nameu haa'i, meu ha'ata'inia do 'i'ameu ra'i inoni tatau'aro ana'ia God. Meu ahumaratanoa suri'i 'oha nameu siri suri'i rongomaata'i, suri'i 'oha nameu bwara, mei suri'i 'oha nameu siri suri'i mwane mareho ta'a'i.

⁵ Tara'i 'oha ra roho'ameu, ma tara'i 'oha ra nugameu na'i rumaniho'o, ma tara'i 'oha ra hauai ha'agogoru 'anai ha'a-ta'ai'ameu. Meu tau'aro raha, tara'i 'oha meu awa ha'i hioro ma tara'i 'oha meu ai'a to'o madoraa 'anai mauru.

⁶ Ra'i mareho ro'u nara ha'ata'inia do 'i'ameu ra'i inoni tatau'aro ana'ia God. Meu awa odo-odo, meu aidangisia God, meu ahumaratanoa, mameu goro 'iniraau'i inoni. Na Hi'ona Maea 'a awa bei'ameu, mana heita'ahi ameeu 'a ha'a-momori.

⁷ Meu taroha'iniai taha na ha'a-momori, mana mena ana God na bei'ameu. Ni awahameeu na odo-odo 'a 'onaai naihi mana taatahi 'anai ura bwarasiraau'i maerongamee'i.

⁸ Na'i tau'aro ameeu tanaa God, tara'i nei ra ha'ahou'ameu, ma tara'i nei ra ai'a. Tara'i nei ra taeni'ameu, ma tara'i nei ra ha'atee ha'a-ta'ai'ameu. Tara'i nei ra 'unua domeu pwapwaari'i, ma'ata 'i'ameu meu taroha'iniai taha na ha'a-momori.

⁹ Tara'i nei ra aidangisia do 'i'ameu ra'i huudi sae tatau'aro ana'ia God, ma'ata tara'i nei ra heitohe. Tara'i 'oha meu gaarangi mae, ma'ata meugu buna tahi mau. Ra ha'a-mama'ai'ameu, ma'ata meu ai'a mae.

¹⁰ 'Oha nameu siri suri'i rongomaata'i nameu ga'i ahutotou 'ini'i, meu wa'ewa'e moi. Meu pohara, ma'ata 'a ragoi nei nameu ha'a-toto'oraraau. Ma rei'uaa nameu ai'a to'ora mareho, ma'ata na mwane mareho 'iia amee'i.

¹¹ Mwane sae goro agu'i na'i Korin, meu maani ha'agorohi'i hako'i mwane mareho tana'amou. Na heita'ahi ameeu tana'amou 'a hura'a mai baani'i hako'i tahingamee'i.

¹² 'I'ameu meu ta'ahi'amou mau, 'i'amou namougu ai'a ta'ahi'ameu'a.

¹³ Na hadahada nau haani, 'au hadahada tana'amou 'onaa do 'i'amou ra'i gare agu'i. Naasi 'au rabasia domoi ta'ahi'ameu aho'i 'onaai ta'ahi'amou ameeu.

Ha'abasu 'Iniai Baronga Ta'aa Adaa'i Nei

Nara Ai'a Hinihini

¹⁴ 'I'amou moi abui gaguniraau'i nei ra ai'a hinihini, suria na goro 'a bwa'i matai hagu beiai ta'aa. 'A 'ua? Na marewa 'a matai hagu beiai kuhi?

¹⁵ Mou 'adoma'inia do'ia Kraest 'a matai 'adoma'i aratara beia Saetan ma'uasi na nei na hinihinia Kraest 'a matai 'adoma'i aratara beiai nei na ai'a hinihini?

¹⁶ 'A 'ua? 'A goro doni Ruma Maea ana God, 'ai aho'ita'i ruma ni araaranunu? 'Igai inoni hinihini naasi Ruma Maea ana God na tahitahi! 'Inia God haaria 'a ha'atee o'ani,

“Inau wai mono beiraau'i noni agu'i

mawai tatariori na'i 'uruhadaau.

Inau wai ha'i God adaau,

me 'iraau rai ha'i inoni agu'i.”*

¹⁷ Tarana naasi na 'ia God na o'ani 'inia,

“Moi sigi baaniraau'i inoni o'asi,

mamoi awa beira'i baaniraau.

Mou abui hau'i here ta'a'i 'onaairaa,

* **6:16** 6:16 Levitikas 26:12; Jeremaea 32:38; Esikiel 37:27

ma naasi 'inau waigui wai'amou siri mai na'i ruruha agua.†
 18 'Inau wai ha'i ama tana'amou,
 mi'amou moigu ha'i arai garegu.
 'Inau Araha God huunai mena nau 'unua o'asi."‡

7

1 Mwane sae goro agu'i, na duruduru 'isi 'ia God na hau'i tanagia. Tarana naasi gai gaasi'i baanigiai mwane 'adoma'i ta'a'i mana mareho ta'a'i nagau matai haa'i 'ini'i abegaa'i. Gai bonasia doni tahingagaa'i rai odo-odo hako 'inia'i ha'ahoua agaau a God.

Wa'ewa'e Ana Pol

2 'Au ha'angoni'amou ma'ata'a domoi ha'ata'iniai heita'ahi amouu tana'ameu. 'Inia ai'a ta ta'i nei 'ini'amou na 'i'ameu mei here ha'ata'aia, ma ai'a do tanei namei ha'atehaa 'anai hauai ta'aa, ma'uasi domei ha'a-bweubweu'aa tanei 'anai rahi'i ha'a ana'i.

3 'A ha'a-momori do tara'i nei 'ini'amou mou subuni'ameu 'ini'i mareho 'isi. Me 'au ai'a hadanga'ini'i maho 'isi 'anai hiiriraaui 'ini'i. 'Inau 'au bwane 'unua doni heita'ahi ameeu 'a raha di'u tana'amou mamei ta'ahi'amou rei'uaa mei tahi ma'ua mei mae.

4 'Inau 'au 'iraraa ha'agorohia do mou aidangisia Kraest, mau mari'ori'o 'ini'amou! 'Oha nameu siri suri'i mwane mareho ta'a'i mou ha'a-weteweteai 'adoma'igu, mau honu 'iniai wa'ewa'e.

5 'Io, waigui ha'ahakoa wou i mamaani 'iniai 'aariha nau maania tana'amou ani. Na'i 'oha nameu ataha mai 'ini na'i Provensi Masidonia, meu ai'a arunga maarihu. Mwane mareho ta'a'i ra to'i'ameu na'i dorasi. Ra rago i nei ra heiraeraesi bei'ameu mara wairikoi ro'u i 'adoma'imee'i 'ini'amou.

6 Mia God na matai ha'a-o'oriraaui nei nara wairikoi 'adoma'ida, 'a ha'a-o'ori'ameu 'iniai ataha mai na haua Taetas bei'ameu.

7 Ai'a do 'inia moi boi ana na ha'a-o'ori'ameu, ma'ata meu wa'ewa'e ro'u 'iniai maania ana tana'ameu domou ha'a-o'oria ro'u. 'A 'unua ro'u tana'ameu i raba 'omesiau amouu, mana arunga ahutotou namou haua 'ini'i baronga ta'a'i amoo'i, mana heita'ahi raha amouu tanaau. 'Inau 'au kae wa'ewa'e di'u ro'u wou.

8 'Au 'iraraa domou arunga ahutotou suriai usu-usu nau haua tana'amou ani, ma'ata ni ahutotou amouu 'a ai'a orea. Na'i na'o, 'inau 'au arunga ta'aa ga'u 'iniai usu-usu nau haua ani.

9 Ma na'i 'ohani 'au wa'ewa'e! Ai'a do 'au wa'ewa'e 'iniai ha'a-ahutotou'amou agua, ma'ata suriai arunga ahutotou amouu mou rihosi baani'i baronga ta'a'i amoo'i. Ni ahutotou namou haa, 'e hei'irisina God tana'amou. Na tarana naasi, ni usu-usu nau usua ani 'a ai'a ha'a-ta'ai'amou.

10 'Inia na ahutotou na suriai hei'irisina God 'a hauai orisi na'i tahinganai inoni 'anai waia 'anai tahi tarau. Magau bwa'i 'itaai ahutotou o'asi. Mana ahutotou anai noni na ai'a hinihini, 'e ahutotou na matai haua tanaai mae, suria 'e ahutotou na ai'a matai orisiai tahingana.

11 Mousui 'omesiai 'a'auhi'amou na hauai ahutotou namou haa na suriai hei'irisina God. 'Ohani, mou bonasiai ha'ata'ini'amou haari'amou hura'a domou odo-odo, mou ha'ata'inia'a i taesu'a amouu tanaa mo'o na hauai taritari'a ani, mamou maaa'usiai ha'a-mama'ai ana God. Mou 'irisia di'u dowai 'ariwou bei'amou mamou raba 'a'auhiau tarau, mamou mwa'emwa'e 'anai ha'a-mama'ai nei na hauai taritari'a na'i ahoamou. Suri'i mwane mareho 'isi, mou bwane ha'ata'inia'a do 'i'amou mou ai'a 'adoma'i aratara beia mo'o na hauai taritari'a ani.

† 6:17 6:17 Aisaea 52:11; Esikiel 20:34 ‡ 6:18 6:18 2 Samiuel 7:14

¹² Naasi, na'i 'oha nau usuai usu-usu ani tana'amou, 'au ai'a haua moi 'anai hiiria mo'o na ha'a-taritari'aai mareho tanaa nata mo'o, ma'ua 'anai 'a'auhia mo'o nara here ha'ata'aia. Ma'ata na usu-usu ani 'au haua ro'u 'anai ha'a-aidangisi'amou goro 'inia doni ha'ahou mana heita'ahi amoou tana'ameu 'a kaeni raha di'u. Mia God 'a 'iraraa o'asi ro'u.

¹³ Na here namou haa memeeu, mou ha'a-wa'ewa'e'ameu.

Ha'amomori. Mou ha'a-wa'ewa'e'ameu, mameu wa'ewa'e di'u ro'u wou 'inia 'a'au amoou 'anai ha'a-'o'oriai 'adoma'ina Taetas.

¹⁴ 'Au bwani mamaani ha'a-ta'eta'e'amou tanaa Taetas, naasi mi'amou mou ai'a ha'aninimaiau, 'inia 'a re'ia doni barongamoo'i ra goro. Na barongamoo'i ra ha'ata'inia do na mwane mareho nameu ha'a-ta'eta'e'amou 'ini'i tanaa Taetas ra ha'a-momori 'onaai ha'a-momori ro'u adaa'i mwane mareho nameu maani'i tana'amou ani.

¹⁵ Na'i 'oha 'ia Taetas 'a 'adoma'i suriai mwa'emwa'e amoou 'anai ha'isuri'i mareho na 'unu'i, mana ha'ahou mana ginagina na mou haua tanaa na'i 'oha mou 'omesuria, na heita'ahi ana tana'amou 'a wetewete di'u ro'u wou.

¹⁶ 'Au kaeni wa'ewa'e di'u, suria 'au 'iraraa ha'agorohia domoi haa'i mwani mareho nara odo-odo 'anai haa'i.

8

Wawate Nadaaui Noni Hinihini

Na'i Jerusalem

¹ Arai do'ora mana asigu'i, 'au 'irisia domoi aidangisiai here na 'ia God na haua 'anai ha'ata'iniai goro ana 'iniraau noni hinihini na'i Provensi Masidonia.

² Ra ragoi mwane mareho ta'a'i narau siri suri'i, marau pohara di'u. Ma'ata na wa'ewa'e narau to'oraa 'a raha di'u marau hisu rago.

³ Ma wai 'unua tana'amou, na hisu narau haa, ai'a dorau hisu tari moi na'i dora na arari dorau ga'i hisu tari iei. Rau hisu di'uai siha taha narau ga'i hisu 'inia ha'i ai'a nei nai ha'a-'usu'usuraa 'inia.

⁴ Rau ha'anongi'ameu wetewete domei wateraau marai 'a'auhiraau ro'u inoni ana'ia God na'i Jerusalem.

⁵ Mana here narau haa, rau di'uai taha nameu 'adoma'inia dorai haua. 'Inia ni mareho tahamora narau haa, rau wateraau haariraau ga'u tanaa Araha maraugu wateraau ro'u o'asi tana'ameu suriai hei'irisina God.

⁶ Naasi meu ha'ata'u'ua Taetas 'anai aho'i wou bei'amou. 'Inia 'iia naasi nei na ha'a-wetewete'i ani 'adoma'imoo'i 'anai hisungiraau noni hinihini na'i Jerusalem. Ma na'i 'ohani, 'ai 'a'auhi'amou mamoi ha'ahakoa goroi tau'aro goro naasi.

⁷ T'amou mou goro suri'i mwane mareho. Na hinihinimoou 'a wetewete, mou mataihere heheitaroha'i, mou to'oraai huunai aidangi, mou mwa'emwa'e 'anai 'a'auhiai nata nei, mana heita'ahi amoou tana'ameu 'a raha di'u. Hoita naasi meu 'irisia domoi goro ro'u o'asi na'i aba 'anai hisu.

⁸ Nau ai'a nugaa ta ringe tana'amou domoi suria ma'ata'a. Ma'ata 'au maania tana'amou 'i tahingani hisu nara to'oraa na'i heisoi na'i Masidonia, 'inia 'au raba 'iraraa 'onaa ni heita'ahi amoou 'a matai tari o'asi ro'u.

⁹ T'amou aidangisia i goro ana Araha aga 'ia Jisas Kraest 'inigia. Rei'uaa na toto'ora, 'iia 'a ha'a-poharaa haaria 'ini'amou, do 'i'amou moi toto'ora beia God.

¹⁰ Ni 'adoma'igu 'a o'ani. 'A goro domou ga'i ha'a-arotahaa goro i taha namou 'adoma'inia na'i harisi na hakoani. 'Inia 'i'amou'a naasi 'etanai ruruha namou mwa'emwa'e 'anai hisungiraau noni pohara, mana 'etanai ruruha namougu hasura'i beiraau 'ini'i mareho namou to'ora'i.

¹¹ Naasi moi 'ari daara'i beiai tatau'arosi mamoi ha'ahakoa. 'I'amou mou mwa'emwa'e di'u 'anai hadanga'inia, mamoi mwa'emwa'e o'asi ro'u 'anai hisu suriai taha namou to'oraa.

¹² 'Onaa 'o mwa'emwa'e 'anai hisu suriai taha na'o to'oraa, 'ia God 'ai wa'ewa'e 'inia. 'A bwa'i taesu'a mumua, 'onaa 'o bwa'i hisu 'iniai ai'a to'oraa mareho amua.

¹³⁻¹⁴ Mareho nau 'unuasi, ai'a do 'anai ha'ahihi'amou di'u baaniraau tara'i sae, do neina 'iraaui rai awa goro mi'amou mou bwa'i. Me suriai to'ora mareho rago amou 'anai hisu, 'a goro domou ga'i 'a'auhiraau sae ra 'irisiai hei'a'auhi. Naasi na'i 'oha namoigu rabasia ro'u i hei'a'auhi, raigu 'a'auhi'amou ro'u na'i 'oha narai to'ora mareho. Naasi suriai heresi, 'aigu ta'isada hako tana'amou.

¹⁵ 'A suriai mareho ra usua na'i Usu-usu Maea na'i 'oha bwani. 'A o'ani, "Ia mo'o na si'o rago, ai'a nei naigu madara, mia mo'o na ai'a si'o rago, 'a bwa'i toho."*

Pol 'A Ha'ataaria Taetas 'Ari Korin

¹⁶ 'I'ameu meu ha'atee ha'agorohia God 'iniai ha'a-wetewetea ana i 'adoma'ina Taetas 'anai 'a'auhi'amou 'onaai raba 'a'auhi'amou ameeu.

¹⁷ Ma ai'a do suriai 'unua ameeu moi, ma'ata 'iia 'a mwa'emwa'e na'i tahingana hako 'anai 'a'auhi'amou, ma bwane 'adoma'inia mau do'ai taha bei'amou.

¹⁸ Meu raba ha'ataaria ta'i do'oragaau ro'u beia Taetas. 'Ia mo'osi 'e sae nara 'adoma'i ha'ahoua na'i heisoi 'ado 'omaa 'iniai tatau'aro ana 'anai taroha'iniai Taroha Goro.

¹⁹ Ma ai'a do namoisi, ma'ata 'iia 'iraaui sae ni heisoi rau bwane sigihia mau 'anai 'aariha bei'ameu 'anai waa'i ha'a nara wawate 'ini'i 'ari tanaraau noni hinihini na'i Jerusalem. Meu hua i tau'aro naasi 'anai ha'aasaa Araha, ma 'anai ha'ata'iniai wetewete adaa'i 'ado'adomee'i 'anai 'a'au.

²⁰ Meu hano goni na'i ta'i ruruha do neina abu tanei nai subuni'ameu 'iniai 'omesuri nameu haa 'anai kae ha'a naasi.

²¹ Na 'ado'adomeusi, doni taha namei hua 'ai goro na'i maana Araha, maai o'asi ro'u na'i maadaui inoni.

²² Mamei ha'ataaria ro'u ta'i do'oragaau beiraru, me 'iia meu bwane taringai ha'imaania'a ga'u mameu 'iraraa do 'iia 'a 'adoma'i wetewete 'anai 'a'au. Ma na'i 'ohani, 'a wetewete di'u i 'adoma'ina 'anai 'a'au, suria 'a 'adoma'i 'u'uri'amou 'anai hisu beiai ahu mwa'emwa'e.

²³ 'Onaa ta nei nai heisonga'i 'inia Taetas, 'iia 'e sae goro agua namiri bwane tatau'aro goni 'anai 'a'auhi'amou. Na rua do'oragaau nararui hano beia Taetas, raru hano na'i aba anai heisoi, miraaui noni ra ha'aasaa Kraest 'iniai tatau'aro adarua.

²⁴ Naasi moi ha'ata'iniai heita'ahi amou tanaraau 'anai ha'ata'ini'amou tanaraui sae ni heisoi na'i 'ini, marai 'iraraa do 'i'ameu meu ai'a ha'atee ha'a-ta'eta'emou kongari.

9

Herehere 'Anai 'A'auhiraui Noni Hinihini

¹ 'A ai'a taraa ororiu di'u dowai usu-usu ro'u tana'amou 'iniai bane nagai ha'ataaria 'ari Jerusalem 'anai 'a'auhiraui noni ana'ia God na'isi.

² 'Inau 'au aidangisia do 'i'amou mou mwa'emwa'e 'anai 'a'au, mau bwane ha'atee ha'a-ta'eta'e'amou 'inia tanaraui sae hinihini mai 'ini na'i Masidonia. 'Au o'ani 'iniraui, "Iraui do'oragaui na'i Provensi Akaea rau bwane ha'aagau mau na'i harisi na hakoani 'anai hisu." Mana 'adoma'i

* 8:15 8:15 Eksodas 16:18

wetewete namou to'oraa 'anai hisu, 'a 'ihara'ini'i tahingadaa'i sae hinihini na'i 'ini 'anai hisu.

³ Rei'uaa na o'asi, wai ha'a-taariraa woui waira orusi 'anai 'omesia domou ha'aagau'a 'inia bane amou 'onaai bwane 'unua agua ani tanaraaui sae hinihini na'i 'ini na'i Masidonia. Nau ai'a rabasia doni ha'atee ha'ata'e'amou nameu haua 'ai 'ari kongari.

⁴ Ma 'onaa ra'i saeni Masidonia rai hano beiau na'i 'oha wai boi bei'amou, marai 'omesia domou ai'a ha'aagau, 'e ninima nai raha na'i hungameeu, mi'amou moi ninima di'u ro'u. Mei ninima, suria meu bwane 'unu'i hako tanaraaui i mwane mareho goro 'ini'amou.

⁵ Naia nawai ha'a-taariraa wou 'inia na'i na'o i waira orusi do 'anai 'a'auhi'amou mamoi ha'aagau 'inia bane amou namou duruduru 'anai haua. Neina na'i 'oha nawai ataha wou, moigui haua tanaaui beiai ahu wa'ewa'e, ai'a beiai arunga na 'onaa dora ha'a-'usu'usu'amou.

⁶ Moi 'iraraa do na nei nai hasi rago, 'ai ragoi hua nai husia, mana nei na ai'a hasi rago, 'a bwa'i hua rago nai husia.

⁷ Naasi 'e nei nai hisu 'ai hisu suriai 'adoma'ina haaria. Abu beiai 'adoma'i heiruarua'a, ma'ua do'ai hisu suriai ha'a-'usu'usua ada. 'Inia God 'a ta'ahiai nei na hisu beiai ahu wa'ewa'e.

⁸ 'Onaa moi hisu o'asi, 'ia God 'a matai bane ha'aruani tana'amou. Mana mwane mareho na ta'isada domoi to'ora'i, 'ai bane'i hako tana'amou, neina 'i'amou moi matai 'a'auhiraau tarau i nei nara 'irisiai hei'a'auhi.

⁹ 'A 'onaai taha nara usua na'i Usu-usu Maea na o'ani, "Na nei na hisungiraau nei ra pohara beiai ahu mwa'emwa'e, 'ia God 'a bwa'i kaku'aa i here goro na haa."*

¹⁰ Mia God na haa'i tanagiai kora 'anai hasi mana mahoingau 'anai ngau, 'ai ha'arago'i mareho namou to'ora'i neina moi matai ha'arahaa ro'u i hei'a'auhi namou haua tanaraaui inoni.

¹¹ 'Ia God 'ai ha'agorohi'amou mana bane ana'i rai rago tarau tana'amou 'anai hisu 'ado 'oha. Miraau nei narai daa'i bane amou'i namei hau'i tanaraaui rai ha'atee ha'agorohia God 'ini'i.

¹² Na hisu namou haua, 'a ai'a do 'ana moi 'a'auhiraau noni hinihini na'i Jerusalem 'ini'i mareho narau pwapwaku 'ini'i, ma'ata moi 'a'auhiraau ro'u 'anai ha'atee ha'agorohia waiori a God.

¹³ Mana bane namou haua 'ai ha'ata'inia tanaraaui domou suriai Taroha Goro ana Kraest namou 'unua domou hinihinia. Rai ha'atee ha'agorohia God 'inia mwa'emwa'e amou 'anai hasura'i beiraau, mei beiraau hako mwane inoni hinihini.

¹⁴ Miraau rai ha'arahesi 'a'auhi'amou marai 'adoma'ini'amou tarau 'ini'i mwane mareho goro na 'ia God na hau'i suri'i tahingamoo'i.

¹⁵ Gau magau ha'atee ha'agorohia God 'inia bane ana tanagia i Garena. Nau ai'a to'o ha'atee goro 'ana 'anai 'unu ha'agorohia hura'a i goro na hauai bane naasi.

10

Pol 'A Taatahi Bwarasiai Tatau'aro Ana

'Onaai Ha'ataari

¹⁻² Ra'i nei rau 'adoma'inia do 'au ha-ha'atee wetewete moi na'i 'oha nau awa ha'atau, mana'i 'oha nau awa bei'amou 'au maaa'uta'i ha'atee wetewete tana'amou. Rau 'adoma'inia doni tatau'aro nameu haa, meu haua moi 'anai dau ha'a 'inia 'onaai'i tara'i sae. 'Inau wai ha'atee ha'a-maata'iraau i nei nara 'adoma'i o'asi. Me 'ia Kraest 'a maratanoa beiraau noni ma ai'a raba awa ahaaha. Naasi, 'inaua Pol 'au ha'angoni'amou beiai

* 9:9 9:9 Psalm 112:9

ta'i 'ado'adosi ro'u do moi abui haa'i mareho nawai taarai raongi'amou 'ini'i na'i 'oha nawai ataha bei'amou.

³ Ha'amomori, 'i'ameu meu awa na'i marewana, ma'ata na'i hei'oi nameu haa na'i marewanani, meu ai'a hei'oi suriai 'ado'ado ni marewana.

⁴ Na mareho ni heheingahu nameu heingahui 'ini'i, ai'a ta mareho ni marewana na inoni nai tau'arodi, ma'ata meu heingahui 'ini'i mareho ni heheingahu ana'ia God nara mena mara wetewete 'anai ha'aheho'i maerongagaa'i.

⁵ Bei'i mareho ni hehei'oi 'isi, meu matai ha'a-ai'a'i mwane 'ado'ado mana ringei ha'a-ta'eta'e nara haa'i nara ha'abwarasiai noni 'anai aidangisia God. Mana 'ado'ado ta'a'i adaa'i, meu 'a'auhiraau 'anai orisi'i neina rai araisuriai taha na 'ia Kraest na 'irisia.

⁶ Mana'i 'oha moi mwa'emwa'e 'anai araisuria taraua Kraest, 'i'ameu mei ha'a-mama'aia tei nai hairaesu mau.

⁷ 'I'amou mou wanawana moi na'i 'omehani abau 'omaa. Mou ga'i 'iraraa do 'i'ameu ra'i sae nameu ura 'inia ro'ua Kraest ta'isada beia tei 'ini'amou na ha'a-ta'eta'ea haaria do 'iia 'a ura 'inia Kraest.

⁸ 'A 'ome 'onaa do'au ha'a-ta'eta'ea 'inia'i tatau'aro na 'ia Araha na nugaa tana'ameu i Ha'ataari. Na tatau'aro naasi, 'ia Araha 'a haua tana'ameu 'anai ha'a-wetewete'i hinihinimoo'i, ai'a 'anai ha'a-ta'ai'amou. Naasi rei'uaa na 'ome 'onaa do'au ha'atee 'ege'egeau, me 'inau 'au bwa'i ninima.

⁹ 'Ai abui 'onaa do 'au bonasiai ha'a-mamaa'usi'amou suri'i usu-usu agu'i.

¹⁰ 'Inia tara'i nei 'ini'amou ra o'ani, "Na usu-usu ana'ia Pol ra rongo ha'a-usu-usu mara rongo wetewete, me na'i 'oha 'iia 'a awa beigaau, na ha'atee ana'i ra rongo to'o maemae'a moi mara rongo 'onaa dora'i mareho haari'i moi."

¹¹ 'Irai nei nara 'adoma'i o'asi, rai aidangisia do taha nameu usu'i na'i usu-usu, naasi taha namei haa'i na'i 'oha namei awa bei'amou.

¹² Meu ai'a raba 'unua domeu ororiu ta'isada beiraau nei 'ini'amou narau 'adoma'inia haraarirau dorau ororiu. 'Iraausi rau wana hegahegaraau hairiu moi marau 'adoma'inia do rau ororiu. Rau ai'a aidangisia ta maho!

¹³ 'I'ameu meu bwa'i matai ha'a-ta'eta'e'ameu di'ua taha na arari 'anai ha'a-ta'eta'e'ameu 'inia. Ma'ata 'a 'ari moi suriai tatau'aro na 'ia God na haua tana'ameu, ma ro'u, na'i tatau'aro nameu haa bei'amou.

¹⁴ Naasi meu ai'a di'uai taha na arari na'i 'oha meu ha'a-ta'eta'e'ameu 'inia'i tatau'aro nameu haua bei'amou. 'Inia 'i'ameu meu taha bei'amou tahamora beiai Taroha Goro 'inia Jisas Kraest.

¹⁵ 'I'ameu ai'a 'anai ha'a-ta'eta'e'ameu 'inia'i tau'aro na hauai nata sae. Ma'ata meu 'irisia dona hinihinimoo'i rai wetewete di'u ro'u wou, neina moi matai 'a'auhi'ameu 'anai hau'i mwane tatau'aro goro rago.

¹⁶ Naasi meigu matai hura'a 'anai taroha'inia Taroha Goro suri'i tara'i kantri he'ete'i ro'u wou na'i aba bo wou 'ini'amou. Meu raba 'ari suri'i dora na ai'a sae nai taroha'inia mau iei Taroha Goro, suria meu ai'a raba ha'a-ta'eta'e'ameu 'inia'i tau'aro nara haa'i sae he'ete'i.

¹⁷ Meu raba suriai mareho nara usua na'i Usu-usu Maea. 'A o'ani, "'Iatei na raba ha'atee ha'aba'o, 'ai ha'atee ha'aba'o 'inia'i taha na 'ia Araha na haua.'"

¹⁸ Suria na nei na 'ia Araha 'a 'adoma'i ha'agorohia, naasi nei na 'ia God na wa'ewa'e 'inia, ai'a i nei na ha'a-ta'eta'ea haaria.

11

Ta Pol Miraau Na Ha'ataari Pwapwaari'i

¹ Nau 'irisia domou ga'i ahumaratanoa beiau 'inia'i gere heiha'auu rongo to'o bweubweu'a nawai haua.

* 10:17 10:17 Jeremaea 9:24

² 'Inau 'au ta'ahi'amou 'onaai ta'ahi'amou na haa God. Mi'amou mou 'onaai gere urao nau bwane durua tanaa Kraest 'anaai waina. Ma naasi 'au raba 'omesuri ha'agorohi'amou neina waigui wate'amou tanaa 'onaai gere urao na awangana 'a odo-odo tarau.

³ Ma'ata 'inau 'au magugu do ra gasigu pwari'i'amou mamoi'gui su'a aho'i baaniai heita'ahi amou na odo-odo tanaa Kraest. 'Ai 'onaai 'oha na mwaa 'a pwari'ia Iv 'ini'i mwane ha'atee pwapwaari'i nara rongo goro.

⁴ Suria 'a 'ome 'onaa do 'i'amou mou mwa'eta 'anaai hinihinia atei na taroha'inaai Jisas na he'ete'i baaniai Jisas nameu taroha'inia. Ma rei'uaa ra maaniai Hi'ona Maea ma'ua Taroha Goro na he'ete'i di'u baaniai Hi'ona Maea mana Taroha Goro namou heresia baani'ameu, mou mwa'eta 'anaai hinihinia ro'u.

⁵ 'Iraau ha'ataari pwapwaari'i 'isi narau 'adoma'inia do ra'i Ha'ataari hauasa, nau ai'a arungana do rau ororiu di'uau.

⁶ Ma rei'uaa nau ai'a goro na'i aba 'anaai hadahada 'onaairau, ma'ata 'au aidangisia goro i huunai ha'ausuringa'i. Ma naasi mareho nameu ha'ausuri'amou tarau 'ini'i 'ado 'oha.

⁷ Na'i madoraa nau taroha'inaai Taroha Goro tana'amou, nau ai'a ha'angonia ta mareho baani'amou. 'Au ha'a-anoanoau, do 'i'amou moi awa ahaaha. 'A 'ua? Na mareho nau hauasi 'a taritari'a?

⁸ 'Iraau sae ni heiso'i suri'i tara'i 'omaa 'isi nau arunga 'onaa do'au berirau 'iniaai dau'i agu'i ha'a narau 'a'auhiau 'ini'i, neina wai tatau'aro bei'amou.

⁹ Mana'i 'oha nau awa bei'amou, 'au ai'a ha'ahihi'amou 'anaai hori'i tanaau i taha nau 'irisi'i. 'Inia na mareho nau 'irisi'i, 'iraau do'oragaa'i narau boi baaniai Masidonia narau hau'i tanaau. Naasi 'onaai haua agua mau mai tari 'ohani ma 'ari'a, 'a bwa'i ta mareho do 'inau wai 'irisia nawai ha'ahihi'amou 'inia.

¹⁰ Ma bwa'i tanei na'i Provens amou na'i Akaea nai ha'apapakuai ha'atee ha'a-ta'eta'e nau haua 'iniaai haua agua o'asi. 'A ha'a-momori 'onaai ha'a-momori adaa'i mareho nau maani'i 'inia Kraest.

¹¹ 'Au ai'a raba ha'angoni'amou 'inia ta mareho, ai'a do 'inau ai'a ta'ahi'amou. 'Ia God 'a 'iraraa do 'inau 'au ta'ahi'amou.

¹² 'Inau wai haua mau moe'a i here naasi nau bwane hahaua mau mai, maai bwara tanaraau ha'ataari pwapwaari'i 'isi 'anaai ha'a-ta'eta'erau do na tatau'aro adaa'u 'a ta'isada bei'ai tatau'aro nameu haua.

¹³ 'Inia 'iraau ai'a moranai ha'ataari. 'Iraau ra'i ha'ataari pwapwaari'i moi, narau pwari'iraau noni 'iniaai tau'aro adaa'u, marau here 'ome 'onaa do ra'i huudi morai Ha'ataari ana'ia Kraest.

¹⁴ Magau bwa'i heimwaota'i, 'ia Saetan ma here 'ome o'asi ro'u do'ia 'e huunai enjel ni bewaa.

¹⁵ Naasi gau bwa'i heimwaota'i 'onaa 'iraau inoni tatau'aro ana'i rai here o'asi ro'u 'onaa do 'iraau ra'i huudi inoni tatau'aro goro ana'ia God. Na'i ha'ahakonai dangi naasi raigui daa'i ha'a-mama'ai 'ada'i here ta'a'i adaa'i.

Ta Pol 'A Hadanga'ini'i

Rongomaata'i Na Haa'i

¹⁶ Mawai 'unua aho'i ro'u, moi abui 'adoma'inia do 'inau 'au bweu. Ma'ata 'onaa namou 'adoma'i o'asi, mamoi bahurongo mara sae bweu moi 'iniau, mawai mamaani ha'a-ta'eta'eau ga'u ro'u.

¹⁷ Mana ha'a-ta'eta'eau nawai haa, ai'a do'ia Araha na 'unu'i mareho nawai 'unu'i. Ni ha'a-ta'eta'eau nawai haa, 'au morai rongo 'onaai sae bweu.

¹⁸ 'Onaa 'iraau ha'ataari pwapwaari'i 'isi ra ha'a-ta'eta'erau 'ini'i mareho narau haa'i, 'inau wai haua o'asi ro'u.

19 Gasi moi bahurongo'i ha'atee ha'a-ta'eta'e agu'i, 'inia mou bwane bahurongo'i sae bweu nara awa bei'amou 'isi, rei'uaa namou 'adoma'inia domou aidangi di'u.

20 'Ome! Mou wateraau 'anai here mara slev 'ini'amou, ma 'anai here ha'a-bweubweu'amou, ma 'anai beri'amou ro'u. Ra wana bodio 'ini'amou mara pweengi'i bwaumoo'i.

21 Ra goro di'u'ameu gasi, 'inia 'i'ameu meu ai'a wetewete arari 'anai haa'i here ta'a'i o'asi tana'amou!

Ma'ata ni taha narau matai ha'atee ha'a-ta'eta'eraau 'ini'i, 'inau 'au matai haua o'asi ro'u, rei'uaa nau ha'atee rongo to'o bweubweu'a.

22 'Onaa 'iraau ra'i ai Jiu, me 'inau o'asi ro'u. 'Onaa 'iraau ra'i ai Israel, me 'inau o'asi ro'u. 'Onaa 'iraau ra'i warowarona'i a Ebrahim, me 'inau o'asi ro'u.

23 Ma 'onaa 'iraau ra'i noni tatau'aro ana'ia Kraest, me 'inau naasi noni tatau'aro ana Kraest nau goro di'u baaniraau. Rei'uaa nau rongo 'onaai sae bweu, ma'ata 'inau nau tau'aro raha di'uraau. 'A ragoi 'oha nara gaasiau na'i rumaniho'o di'uraau. Ra taringai rohoau ma ragoi 'oha nau gaarangi mae.

24 'E rima 'oha na 'iraau na'otara adaa'i Jiu rau rohoau. 'Ado 'oha narau rohoau, rau haua tanaau i oru tangahuru mana siwa roroho.

25 Oru 'oha ra tabariau 'iniaai hasi'ei, ma'e ta'i 'oha ra bonasiai buta ha'amaesiau 'iniaai hau. 'E oru 'oha ro'u nau hano suri'i haka nara ta'aa na'i asi, ma'e ta'i 'oha nau tare suriai dangi mana rodo bubu na'i asi dadara'a.

26 Suri'i mwane hano nau haa'i 'au siri suri'i mwane maemaeha rago. Ra'i 'oha suri'i wai ra ahe, tara'i 'oha beiraui sae beriberi, ra'i 'oha beiraui moi inoni agu'i, 'iraau na Jiu, ma ra'i 'oha beiraui nei narau ai'a Jiu. Tara'i 'oha 'au sadoi'i maemaeha suri'i 'omaa, tara'i 'oha na'i 'omaa mangasara, tara'i 'oha na'i asi, ma tara'i 'oha beiraui nei narau 'unuraau dora'i sae ni heiso maraugu ai'a.

27 'Au tau'aro raha mau rahe, ma ragoi rodo nau ai'a mauru. 'Au hioro ma maesiau i gono tara'i 'oha. Tara'i 'oha 'au baraato'o 'oha nau mauru, ma tara'i 'oha 'au pohara 'iniaai bwana.

28 Ma goni bei'i mareho nau bura'i 'unu 'isi, 'e ta'i mareho ro'u nau 'adoma'i hihia suria tarau 'ado dangi, naasi 'i noni hinihini hako suri'i 'ado 'omaa.

29 'Onaa 'e nei 'ini'amou nai maemae'a na'i hinihinina, 'inau wai arunga ta'ahia. Ma 'onaa 'e nei narai ha'atehaa 'anai hauai ora-ora'a, 'inau wai taesu'a di'u.

30 'Onaa nawai raba ha'a-ta'eta'eau, 'inau wai ha'a-ta'eta'eau 'ini'i mareho narai ha'ata'inau do 'inau 'au ai'a wetewete 'onaai 'adoma'inia ada tara'i nei.

31-33 'Oha nau awa na'i Damaskas, ni Primia na tau'aro tanaai Mwaeraha 'Aretas 'a ha'a-'ado'i hako maanai bara hau 'anai 'omaasi 'ini'i sae hehei'oi 'anai dauau. Ma rei'uaa na o'asi, 'iraau rau ai'a ha'aagauhiau. Ra'i noni hinihini narau ha'ahura'ahiau na'i diwawa na'i kae bara hau 'anai 'omaasi. 'Au heinagu na'i kae abira marau toto'oua dioi ano, mau hora'a. 'Ia God 'i amanai Araha aga Jisas Kraest 'a 'iraraa do 'inau ai'a pwari'i. Na atana rai ha'a-aneanea tarau.

12

Ra'i Mareho Na 'ia God

Na Ha'ata'ini'i Tanaa Pol

1 'A ororiu dowai ha'a-ta'eta'eau mau ro'u 'ini'i maemae'a agu'i, 'inia 'i'amou na mou ha'a-'osiausi. 'Au 'iraraa do 'abwa'i mareho nai goro na'i

ha'aba'o. Ma'ata 'inau wai ha'arangasi'i mareho na 'ia Araha na ha'ata'ini'i tanaau.

²⁻³ 'Au 'iraraa do na'i ta'i tangahuru mana hai harisi na hako, 'inau i noni tatau'aro ana Kraest, 'ia God 'a wai'au ara'a beia na'i aro.* Ma 'au ai'a aidangisia goro 'onaa 'ia God 'a waia moi aungagu ma'ua 'a waia ro'u i abegu. Ta'i 'iia moia God na 'iraraa.

⁴ Mau 'iraraa do 'ia God 'a wai'au 'ari paradaes mau rongo'i mareho baania God nara bwarai hadanga'ini'i suri'i ha'ateeni marewanani, mara abu di'u 'anai 'unu'i.

⁵ Naasi 'inau wai ha'atee ha'a-ta'eta'e 'inia'i maho na to'o tanaausi, mau bwa'i ha'a-ta'eta'eau haariau. Ma'ata wai ha'a-ta'eta'eau 'inia'i taha na ha'ata'inia haariau do 'inau 'e inoni nau maemae'a.

⁶ Ma rei'uaa nawai ha'a-ta'eta'eau me 'inau 'au bwa'i 'ome to'o bweubweu'a, suria na mareho nawai maani'i ra'i mareho mora. Ma'ata 'inau 'au bwa'i ha'a-ta'eta'eau, suria 'au ai'a 'irisia do 'iraui inoni rai 'adoma'i ha'a-aneaneau di'uai taha na arari dorai ha'a-ta'eta'eau 'inia. 'A goro do ra ga'i ha'a-aneaneau 'ini'i taha nara rongo'i nau hadanga'ini'i, mana mareho nara re'i'i nau haa'i.

⁷ Ma 'anai ha'abwarasiau do 'au gasigu honu 'inia'i ha'a-ta'eta'e 'ini'i mwane mareho goro na 'ia God na ha'ata'ini'i tanaau na'i aro, ra haua tanaui gere mareho na taritari'a na'i abegu. Mana marehosi 'a 'onaai noni tatau'aro ana Saetan na ha'a-rongomaata'iau.

⁸ 'E oru 'oha nau ha'arahesi mau ha'angonia Araha 'anai rahia baaniau i marehosi.

⁹ Mana heiarami ana naani, "Ni hei'a'auhi agua 'ai ohamu 'ado 'oha. 'Inia na mena agua 'a wetewete na'i 'oha 'o maemae'a." Ma naasi 'au wa'ewa'e 'anai ha'a-ta'eta'eau 'ini'i maemae'a agu'i, neina na mena ana Kraest 'ai awa beiau.

¹⁰ Rei'uaa nau maemae'a, ma'ua ra ha'atee ha'ata'aiau, rei'uaa ra nora ta'aiau mau siri suri'i rongomaata'i, ma rei'uaa na bwara tanaui mwane maho, 'inau 'au wa'ewa'e moi na'i tau'aro nau haua tanaa Kraest. 'Inia na'i 'oha nau maemae'a, 'ia Kraest 'a ha'a-weteweteau.

Pol 'A Ta'aabena 'Iniraui Korin

¹¹ Naani 'au here mora'a 'onaai sae na bweu 'oha nau ha'a-ta'eta'eau haariau. Ma'ata 'i'amou namou ha'a-osiausi. 'Inia, 'i'amou namou ga'i ha'a-ta'eta'eau 'inia'i tatau'aro nau haa mamougu ai'a. 'Inia rei'uaa 'au ai'a 'onaa ta maho, ma'ata 'au ai'a taraa ta'aa baabaa di'u ro'u baaniraui nei namou 'adoma'inia do ra'i Ha'ataari hauasa.

¹² Na'i madoraa nau awa bei'amou, 'au 'abenga'i bei'amou, mau haa'i mwane ha'abu'ohu mana mwane ha'ara 'anai ha'ata'inia tana'amou do 'inau 'e Ha'ataari.

¹³ Mwane 'a'au nau haa'i tanaraui sae ni heisoi suri'i mwani 'omaa, 'au bwane haa'i ro'u tana'amou. 'E ta'i maho moi nau ai'a haua. Nau ai'a ha'ahihi'amou 'anai hori'i tanaau i taha nau 'irisi'i. 'Onaa mou 'adoma'inia do 'au taritari'a, mamoi 'adoma'i nugasiau 'inia'i here goro nau hauasi.

¹⁴ Naani 'au 'adoma'inia dowagui haa i orunai 'aariha agua bei'amou. Ma 'a bwa'i mareho nawai ha'ahihi'amou 'inia, suria 'inau ai'a 'irisi'i ha'a amoo'i, ma'ata 'i'amou nau 'irisi'amou. Na gare kekerei 'a bwa'i wate'i mareho tanaai amana, ma'ata ni ama nai wate'i mareho tanaai gare ana. Minau 'onaai amamou.

¹⁵ 'Inau 'au wa'ewa'e di'u 'anai wateau haariau mana mwane mareho nau to'ora'i 'anai 'a'auhi'amou suri'i tahingamoo'i. 'Onaa na heita'ahi agua

* **12:2-3 Aro:** Na'i ha'ateeni Grik 'ia Pol 'a 'unua "oruna heven." Tara'i 'oha 'iraui Jiu ra hadanga'inia heven o'asi. Ra hoia heven na'i oru ma'ua biu ma'ua tangahuru dora.

tana'amou 'a raha di'u o'asi, 'a 'ua? Na heita'ahi amoou tanaau 'ai kekerei moi?

¹⁶ Hoita, 'i'amou 'iraraa'a do ai'a ta mareho nawai ha'a-hihi'amou 'inia. Ma rei'uaa na o'asi, tara'i nei mou 'adoma'inia do 'au ha'a-gorogoro'amou suria 'au raba ha'a-bweubweu'amou moi.

¹⁷ 'A 'ua? 'Iraaui mwane nau ha'a-taariraa wou ani, rau ha'a-bweubweu'amou? 'Inau 'au 'iraraa do ai'a.

¹⁸ 'Inau 'au ha'ata'u'ua ani a Taetas 'anai taha wou bei'amou mau ha'ataariai ta'i do'oragaau beia. 'A 'ua? Mou 'adoma'inia do'ia Taetas 'a ha'a-bweubweu'amou? Moi aidangisia do 'imiria Taetas miri to'oraa moi ta'i 'ado'ado, mana barongamiri'i ra ta'isada moi!

¹⁹ Gasi mou 'adoma'inia domeu bonasiai 'unu'i mareho 'isi 'anai taatahi bwarasi'ameu. Ai'a! 'I'ameu meu 'unu'i mareho 'isi na'i maana God 'onaai sae tatau'aro ana'ia Kraest. Mana mwane mareho hako nameu haa'i, mwani sae goro agu'i, meu haa'i 'anai ha'a-wetewete'amou!

²⁰ 'Au magugu do 'au gasigu ataha wou, mana barongamoo'i ra bwa'i goro 'onaai 'adoma'inia agua. Ma 'onaa naigui o'asi, 'inau 'augu bwa'i ha'atee goro'a tana'amou 'onaai 'adoma'inia amoou. 'Au magugu dora gasigu to'o tara'i mareho na'i ahoamoou, 'onaai awa heheita'ia'a, hai'ubwani, ma'ua awa tataesu'a'a, ma'ua ringei ha'a-ta'eta'e, ma'ua 'adoma'ini'o moi haari'o, ma'ua ha'atee ha'ata'iaia nata nei, ma'uasi hadanga'inia nata nei, ma'ua 'anai heita'ia hairiu suri'i 'oha mou boi goni 'ada'i ha'arahesi.

²¹ Mau magugu do'au gasi boi, mi'amou moigui here ha'aninimaiau na'i maana God 'ini'i here ta'a'i namou haa'i. 'Inia 'onaa nawai 'ariwou, 'inau wai angi, suria 'a ragoi nei mou dau baabau mau suri'i ora-ora'a amoo'i 'onaai taritari'a beiai nata nei mana here wawaasua'a ma'ua awa 'onaai mwamwaa.

13

Hadahada Wa'ewa'e Ha'ahako

Mana Ha'abasu

¹ Ha'amomori, 'au 'adoma'inia dowagui haa i orunai 'aariha agua bei'amou. Na Usu-usu Maea 'a o'ani, "Onaa 'e nei na ha'ahuniai nata nei 'inia ta maho, 'e waira rua ma'ua oru narai awa 'anai maani'i taha narau 'omesi'i marau 'irara'i 'inia mo'o nara ha'ahunia, naasi maraigui ha'a-mama'aia."*

² Na'i ruanai 'oha nau ataha bei'amou, 'au ha'abasu'amoui nei namou bwarai rihosi baani'i ora-ora'a amoo'i. Na'i 'ohani, rei'uaa nau awa ha'atau, 'au ha'abasu'amou ro'u goni beiraui nei narau ora-ora'a ro'u na'i 'ohani. Na'i 'oha nawaigui ataha bei'amou, wai ha'a-mama'ai'amou hako na bwa'i nei 'ai dadara'a.

³ Mawai haua o'asi mamoi aidangisia do'ia Kraest na haa'i tanaau i ha'atee nawai ha'a-odoodo'amou 'ini'i. 'Iia 'a bwa'i maemae'a na'i 'oha nai ha'a-odoodo'amou, ma'ata 'ai ha'ata'inia mena ana bei'amou hairiu.

⁴ Na'i abena 'onaai inoni 'a maemae'a na'i 'oha ra rabua na'i dadaahoro. Me 'a tahi aho'i baaniai mae 'inia mena ana God. 'I'ameu meu maemae'a o'asi ro'u na'i abe 'onaia Kraest, me na mena ana God 'a awa bei'ameu 'inia hinihinia ameeu a Kraest, ma ha'a-wetewete'ameu 'anai ha'a-odoodo'amou.

⁵ 'Adonai nei 'ai wana riariaa i tahingana ma'ua ha'imaania haaria 'anai 'iraraa 'onaa 'a nugaai hinihinina mora beia Kraest ma'uasi ai'a. Mou ga'i 'iraraa do'ia Jisas Kraest 'a awa suri'i tahingamoo'i. 'Onaa namou ai'a 'iraraa o'asi, ma 'a ha'ata'inia do mou ai'a nugaai hinihinimoou beia Kraest.

* 13:1 13:1 Diutronomi 19:15

⁶ 'Au 'adoma'inia domou aidangisia'a doni hinihinimeeu meu nugaa beia Kraest.

⁷ Meu ha'arahesi mameu ha'angonia God maai 'a'auhi'amou, mamoi awa odo-odo. Ai'a domei ha'arahesi domoi odo-odo neina 'iraaui inoni rai mwaosi'ameu. Ai'a! Meu 'irisia moi domoi odo-odo, rei'uaa rai mwaosi'ameu ma'ua bwa'i.

⁸ 'Tameu meu bwa'i matai ha'a-mama'ai'amou 'onaa moi suriai taha na ha'a-momori, ma'ata mei hauai mareho 'anai 'a'auhi'amou.

⁹ Rei'uaa nameu maemae'a, ma'ata meu wa'ewa'e suria 'i'amou mou ura wetewete. Ni mareho nameu 'irisia naasi, domoi raha ara'a wetewete suri'i tahingamoo'i beia Kraest.

¹⁰ Naasi tarana nau usua 'iniau usu-usuni na'i 'oha nau ai'a awa mau bei'amou. Neina 'oha nawaigui ataha bei'amou, 'inau 'au bwa'i ha'atee ha'a-maatai'amou beiai mena na 'ia Araha na haua tanaau. Ni mena naasi 'ia Kraest 'a haa tanaau 'anai ha'a-wetewete'amou, ai'a do 'anai ha'a-ta'ai'amou.

¹¹ 'Io, arai do'ora mana asigu'i, moi wa'ewa'e! Moi ha'a-odoodo'i tahingamoo'i. Moi 'adoma'ini'i tarau i ha'ata'u'u nau haa'i tana'amou. Moi ahu aratara, awa goroha, mana gooroha mana heita'ahi ana God 'aigui awa bei'amou.

¹² 'Oha moi awa goni noni hinihini 'onaai ta'i ruruha, moi here beiai nata nei† 'anai ha'ata'iniau heita'ahi amoou tana'amou hairiu.

'Iraaui mwane noni hinihini na'i 'ini rau 'unua ro'u wou i ha'atee wa'ewa'e adaau tana'amou.

¹³ 'Au ha'arahesi mia Araha aga 'ia Jisas Kraest 'ai goro 'ini'amou, mana heita'ahi ana God, mana hagu anai Hi'ona Maea 'ai awa bei'amou hako.

† **13:12 Here beiai nata nei:** Na'i ha'atee ni Grik ra 'unua "ngooniai nata nei beiai heingooni ni heita'ahi." Na'i madoraasi, 'iraaui sae mwane rau ngooniai babanai nata sae mwane, miraaui urao rau ngooniai babanai nata urao 'anai ha'ata'iniau heita'ahi tanaraau hairiu. 'A ta'isada beiai herehere agaaui na'i 'ohanisi 'oha gau here beiai nata nei.

Na Usu-usu Ana Pol Tanaraaui Noni Hinihini Na'i Galesia

Gere Mamaani 'Iniai Bukani

Ni 'ua ana na'ogu taarai araisuri'i 'ini'i ha'atee ana'ia God? 'O araisuri'i suria 'i Hi'ona Maea naasi na 'a'auhi'o 'anai awasuriai barongana Jisas? Ma'ua 'o araisuri'i 'iniai 'adoma'inia amua do'ia God 'ai ta'ahi'o di'u na'i 'oha na'oi haa'i tatau'aro goro?

Na'i 'oha na 'ia Pol 'a 'aariha na'i Galesia 'anai heitaroha'i, 'a ragoi noni naraugu hinihinia Kraest na'i 'ohasi. Ra'i nei 'iniraaui ra'i ai Jiu nara bwane ha'isuri'i mau mai Ringe ana'ia Moses. Na'i 'oha na 'ia Pol 'a hano baaniraaui, 'iraaui Jiu hinihini 'isi rau taraawa'ai ha'ausuriraaui noni do na inoni 'a bwa'i dauai tahi tarau 'onaa na bwa'i araisuri'i ringeringe na'i Buka Duruduru Bwani. Ororiu, rau ha'ausuriraaui dorai hauai ringe i aha ha'ara.

Na'i 'oha na 'ia Pol 'a rongoa o'asi 'a arunga ta'aa di'u. Naasi 'ia Pol 'a usuai usu-usuni tanaraaui 'anai ha'a-aidangisiraaui aho'i do 'ia God 'a bwa'i matai ha'atahiraaui baaniai ora-ora'a 'iniai haua adaau i taha na goro ma'uasi 'iniai ha'isuri'i adaa'i tara'i mwane ringeringe. 'Ia Pol 'a ha'atee wetewete tanaraaui, suria rau kaku'aa do 'ia God 'a bwane ha'atahiraaui 'iniai hinihinia adaau a Kraest, ai'a do 'iniai araisuri'i adaa'i mwane ringeringe o'asi.

Naasi na'i 'oha na 'oi 'oha'i, 'oi sibania ma 'oi sadoiai taha nai huunai ha'a-odoodogia na'i maana God.

¹ Inaua Pol nara soiau 'anai Ha'ataari, ai'a baaniai noni mei baania God i Ama, mea Jisas Kraest, na'ia God na ha'a-suruta'ea aho'i baaniai mae.

² Tameu hakoi noni hinihini na'i 'ini, meu 'unua wou i ha'atee wa'ewa'e ameeu tana'amou noni hinihini na'i Galesia.

³ Mau ha'arahesi mia God i Amaga mia Araha aga, 'ia Jisas Kraest, rarui ha'agorohi'amou ma rarui ha'a-awahi'amou goro.

⁴ 'Ia Kraest 'a suria tarau i hei'irisina God. Na tarana naasi na mae 'ini'i 'inoga 'anai ruhasigia baaniai ta'aa ni marewanani.

⁵ Naasi gai ha'a-aneanea taraua God 'inia, Amen.

Na Huunai Taroha Goro

⁶ 'Au heimwaota'i di'u 'iniai 'asu'ani rihota'i moi amouu baania God na soi'amou 'anai awa na'i bahainai heita'ahi ana Kraest, mamou ha'isuri'i ha'ausuringa'i he'ete'i.

⁷ 'Agu ai'a ha'ausuringa'i'a ro'u naigu 'onaaiai Taroha Goro 'inia Kraest. Ra kakui ahumoo'i, 'inia tara'i nei nara raba hiosiai Taroha Goro narau boi bei'amou 'anai ha'a-bweubweu'amou.

⁸ Wai 'unua tana'amou, 'onaa ta nei 'ini'ameu ma'ua 'e enjel baaniai aro nai taroha'inia ta Taroha Goro na he'ete'i baaniai nei nameu taroha'inia tana'amou, 'ia God 'ai ha'a-mama'aia tarau na'i 'eu na bwa'i kuru mwada'u.

⁹ Meu bwane 'unua, mawai 'unu aho'isia ro'u tana'amou. 'Onaa ta nei nai taroha'inia tana'amou ta Taroha Goro na he'ete'i baaniai nei namou bwane hinihinia, 'ia God 'ai ha'a-mama'aia tarau na'i 'eu na bwa'i kuru mwada'u.

¹⁰ Ma 'ua? 'Au 'irisia moi do 'iraaui noni rai wa'ewa'e 'iniau? Ai'a! 'Ia God nau raba ha'a-wa'ewa'ea. 'Onaa na ha'a-momori do 'inau 'au ha'akareraau moi inoni, naasi 'a ha'ata'inia do 'inau 'augu ai'a noni tatau'aro'a ana Kraest.

God 'A 'Ome Sigihia Pol 'Anai Ha'ataari

¹¹ Arai do'ora mana asimee'i na'i Kraest, 'au rabasia do moi aidangisia doni Taroha Goro nau maania tana'amou ani, ai'a baaniai noni.

¹² Ai'a tanei 'ai 'unua tanaau ma'ua 'ai ha'ausuriau 'inia, me'ia Jisas Kraest haaria na ha'ata'inia tanaau.

¹³ 'T'amou mou bwani aidangisiai herengagu na'i 'oha nau dau baabau mau suri'i ringeringe amee'i Jiu. 'Au norata'airaui noni na'i heiso'i ana God mau bonasia dowai ha'a-ai'araau.

¹⁴ Minau 'au dau baabau suri'i ha'ausuringa'i adaa'i wauwa amee'i di'uraau ro'u i nei meu haoru ta'isada.

¹⁵⁻¹⁶ Mei 'inia'i goro ana God 'iniau, 'iia 'a 'ome sigihiau mau mai 'oha nau toto na'i ahuna inagu. Ma na'i madoraa 'iia na 'irisia, 'a ha'ata'inia tanaau i Garena neina wai taroha'inia'i Taroha Goro tana'amou nei mou ai'a Jiu. Ma na'i 'ohasi, ai'a tanei 'ai ha'ausuriau ma'ua 'a'auhiau.

¹⁷ Ma ai'a do wai 'ari ro'u i Jerusalem 'anai 'omesiraui nei rau Ha'ataari na'i na'o 'iniau. Ma'ata 'au hano daara'i 'anai Araibia. 'Au awa-awa wou maugu aho'i 'ari Damaskas.

¹⁸ Oru harisi na hako murinai ha'ata'i na haua Jisas tanaau, 'au taha beia Pita na'i Jerusalem mau awa beia suriai ta'i tangahurui dangi mana rima.

¹⁹ 'E ta'i Ha'ataari ro'u moi nau re'ia, 'ia Jems do'orana Araha aga.

²⁰ Wai 'unua tana'amou na'i maana God. Na mareho nau usu'i 'isi ra ha'a-momori. Nau ai'a pwari'i!

²¹ Hoita, na'i muri 'augu 'ari Provensi Siria ma na'i Provensi Silisia.

²² Na'i 'ohasi, ai'a tanei 'iniraui noni hinihini na'i Provensi Jiudea nai 'omesiau ga'u.

²³ Rau rongoa moi taroha'inia ada 'ari do 'ia mo'o na norata'airaui noni hinihini, 'a taraawa'a taroha'inia'i Taroha Goro na raba ha'a-ai'aa ga'u.

²⁴ Miraau hako raugu ha'atee ha'agorohia God 'inia'i taha na haua na'i tahingagu.

2

'Iraau Na Ha'ataari Rau 'Adoma'i Aratara 'Inia Pol

¹ Ma hako'i ta'i tangahurui harisi mana hai, 'au waia Taetas mea Banabas mameu aho'i 'ari Jerusalem.

² 'Au aho'i 'ari, 'inia 'ia God na 'unua o'asi tanaau. Ma na'i goni nameu haua na'i Jerusalem beiraui moi na'otara na'i heiso'i, 'au maani ha'agorohia tanaraui Taroha Goro nau taroha'inia tana'amou nei namou ai'a Jiu. 'Au haua o'asi suria ra gasigu 'unua doni ha'ausuringa'i agu'i ra ai'a odo-odo, mana tau'aro nau bwani haua mai tari 'ohani ma 'ari'a 'ai 'ari pwaranga.

³ Ma'ata, 'iraui na'otara 'isi rau 'adoma'i aratara moi beiau. Rau ai'a ha'a-'usu'usua Taetas 'anai hauai ringei aha ha'ara, rei'uaa na 'iia 'e ai Grik.

⁴ Meu hadanga'inia'i marehosi, 'inia tara'i nei ra siri na'i heiso'i ana Kraest mara pwari'i do 'iraui ra'i noni hinihini. 'Irausi narau ha'a-'usu'usua Taetas 'anai hauai ringei aha ha'ara. 'Iraui rau boi 'anai bonasiai ha'ata'ai ai awa dadara'a nagau haua baani'i ringe o'asi 'inia'i suria agaui Jisas Kraest. Rau 'irisia dogai awa mau bahaidi ringe amee'i Jiu.

⁵ Meu ai'a nuga madoraa tanaraui 'anai bahurongoraui, 'inia meu ai'a 'irisia tanei 'ini'amou nai kakui ahuna 'inia'i huunai Taroha Goro nameu taroha'inia tana'amou.

⁶ Tara'i nei ra 'adoma'inia do 'iraui na'otara agaa'i na'i Jerusalem, rau ororiu di'u. Ai'a he'ete'i moe'a tanaau rei'uaa i'oe atei. 'Inia na'i maana God gau ta'isada hako. Miraui na'otara 'isi, rau ahu aratara 'inia'i ha'ausuringa'i agaa ma ai'a tanei do'aigu a'oi'a ro'u ta maho na'iei.

⁷ Rau 'ome 'iraraa 'ia God na 'ome sigihiau 'anai taroha'iniai Taroha Goro tana'amoui nei mou ai'a Jiu, 'onaai 'ome sigihia ana Pita 'anai taroha'iniai Taroha Goro tana'ameui Jiu.

⁸ 'Onaia God 'a 'ome sigihia Pita 'anai Ha'ataari tana'ameui Jiu, 'a o'asi ro'u, 'a 'ome sigihiau 'anai Ha'ataari tana'amoui nei mou ai'a Jiu.

⁹ 'Ia Jems mea Pita mea Jon, rau 'ome 'iraraa ro'u do'ia God na 'ome sigihiau 'anai taroha'iniai ha'atee ana. 'Iraau naasi oru na'otara na 'iraau noni hinihini ra ha'ahouraaui di'u. Ma naasi, rau here bei'amiria Banabas 'anai ha'ata'inia do 'i'ameu 'e ta'i ruruha. Mameu 'adoma'i aratara 'inia do'imiria Banabas miri tatau'aro bei'amoui nei namou ai'a Jiu, miraau bei'ameui Jiu.

¹⁰ Mana ta'i mareho narau ha'a-ngoni'amiria 'inia, naasi 'anai 'a'auhiraau tarau i noni hinihini pohara na'i Jerusalem, ma naasi ta'i maho nau bonasiai haua.

'Ia Pol 'A Ha'atee Wetewete Tanaa Pita

¹¹ 'E ta'i 'oha, 'ia Pita 'a taha wou bei'ameu na'i Antiok, mau ha'atee wetewete tanaa na'i maadaau hako noni hinihini. 'Inia 'au 'omesia doni mareho na haua 'a ai'a odo-odo.

¹² Na'i na'o, 'a here goro 'oha na ngau goni beiraau nei nara ai'a Jiu. 'A haua o'asi tari 'oha 'ia Jems 'a ha'a-taariraau tara'i Jiu 'ari na'i Antiok. 'Iraau Jiu 'isi ra 'irisia do'igaau hako noni hinihini gai dauai ringei aha ha'ara. 'Ia Pita 'a maaa'usiraau ma sigi baaniraau nei ra ai'a Jiu magu ai'a ngau'a beiraau.

¹³ Taranai haua o'asi ana Pita, 'a ragoi Jiu na'i 'omaasi narau suria Pita 'iniai here ta'aa na hauasi, tari beia Banabas.

¹⁴ 'Oha nau 'omesia doni here rau haa 'a ai'a suriai huunai ha'ausuringa'i anai Taroha Goro, 'augu ha'atee tanaa Pita o'ani na'i maadaau hako, "Toe 'e 'ai Jiu ma'ogu awa 'onaairaui sae nara ai'a Jiu. Naasi 'a ai'a odo-odo do'oi ha'a-'usu'usuraui nei rau ai'a Jiu 'anai suriai ringe agaui Jiu.

¹⁵ 'Igaau ra'i ai Jiu 'onaairaui amagaa'i magau ai'a 'onaairai nei ra ai'a Jiu nara ai'a suriai ringe agaui Jiu.

¹⁶ Ma'ata gau aidangisia doni noni 'a odo-odo na'i maana God, ai'a do 'iniai suri'i ana i ringe agaui Jiu me 'inia moi hinihinina beia Jisas Kraest. Migaau nugaa ro'u hinihinigaau beia Jisas Kraest, magau odo-odo'a na'i maana God. Ai'a 'iniai suri'i agaui ringe.

¹⁷ 'Igaau gau hagu beia Kraest magau 'u'uria 'anai ha'a-odoodogaau na'i maana God. 'A 'ua? 'Ia Kraest 'a ha'a-oraora'agaau 'oha gaugu ai'a suri'i hako ringe? Ai'a o'asi!

¹⁸ Ma'ata na'i 'oha nau aho'i 'anai suri'i aho'i i ringe nau bwane nugasi'i, naasi 'agu ha'ata'inia do 'inau 'au haua mora 'i ora-ora'a.

¹⁹ 'Inau awa ga'u na'i bahainai heimarungi anai ringe agaui Jiu. Mana 'oha nau aidangisia do ra bwarai ha'a-odoodoau na'i maana God, 'au nugasi'i hako mau suria God."

²⁰ 'A 'onaai 'inau 'au wateai tahingagu 'anai mae beia Kraest na'i dadaahoro. Ma na'i 'ohani nau ai'a marungiau haariau, me'ia Kraest na awa beiau ma marungiai tahingagu. Mana 'ado dangi, na hinihinigu 'au nugaa na'i garena God na ta'ahiau ma watea haaria 'anai mae taragu.

²¹ Nau bwa'i agoheta'i hinihini do'ia God 'a ruhasiau baaniai ora-ora'a 'iniai goro ana 'inau. 'Inia 'onaa ni ringe naasi nara ha'a-odoodoai noni beia God, naasi 'a ha'ata'inia doni mae na haua Kraest, 'a 'ari pwaranga moi.

3

Suri'i Ringe Ana'ia Moses

Ma'ua Hinihinia Kraest

¹ Oru bweu, 'i'amou ai Galesia! Nau bwane 'unua tana'amoui mae ana Jisas na'i dadaahoro. 'Iatei na ha'a-bweubweu'amou na kuhi 'inia 'adoma'imooou?

² 'E ta'i maho moi nau 'irisia domoi 'unua tanaau. Na'i 'oha he'ua namou dauai Hi'ona Maea ana God? Na'i madoraa namou suri'i ringe amee'i Jiu, ma'ua na'i madoraa mou hinihiniai Taroha Goro 'inia Jisas Kraest?

³ 'A 'ua mou bweu 'inia? Na'i na'o, mou taraawa'anai tahinga haoru amoou beia Kraest 'inia hei'a'auhi ana Hi'ona Maea. Ma 'ua? Na'i 'ohani mou 'adoma'inia do mou ga'i 'ari daara'i tari ha'a-arosina beiai tahinga haorusi, suri'i wetewete amoo'i haari'amou?

⁴ 'A rago i mareho namou bwane siri suri'i. Ma 'onaa moi aho'i 'anai suri'i aho'i ringe, mana mareho 'isi rai 'ari pwaranga moi! Ma'ata 'au ai'a 'adoma'inia do'ai o'asi!

⁵ 'Ia God 'a ai'a haua tana'amou i Hi'ona Maea ana mana ha'abu'oahu namou 'omesi'i do 'inia suri'i amoo'i ringe amee'i Jiu, me 'inia hinihinia amooi Taroha Goro.

⁶ Na Usu-usu Maea 'a 'unua o'ani, "Ia Ebrahim 'a odo-odo na'i maana God, suriai hinihinina beia."

⁷ Naasi mou ga'i 'iraraa do 'ira i huudi gare ana'ia Ebrahim, naasi 'iraau nei ra nugaai hinihinida beia God.

⁸ Mau na'i 'oha bwani, na Usu-usu Maea 'a ha'arangasia ro'u mau do 'i'amoui nei mou ai'a Jiu, moi matai odo-odo na'i maana God 'onaa moi hinihinia. Na tarana naasi na'ia God 'a 'unua 'inia taroha goroni tanaa Ebrahim, 'a o'ani, "Baani'o 'ia God 'ai ha'agorohira hako'i mwani noni na'i marewana."

⁹ Naasi gau 'iraraa do 'iraau nei ra hinihinia Kraest, 'ia God 'ai ha'agorohirau 'onaa ha'agorohia ana Ebrahim.

¹⁰ Mia tei na 'adoma'i 'u'uri'i ringe amee'i Jiu do naasi nai ha'a-odoodoa na'i maana God, 'ia God 'ai ha'a-mama'ia. 'Inia na Usu-usu Maea 'a 'unua ro'u do 'onaa 'iatei na'o bwa'i suri'i tarau i mareho ni ringe ra 'unu'i, 'ia God 'ai ha'a-mama'ai'o.

¹¹ 'A ha'ata'inia goro doni suria agaau i ringe amee'i Jiu, 'a bwa'i ha'a-odoodogaau na'i maana God. 'Inia na Usu-usu Maea 'a 'unua dona 'iatei na hinihinia God, 'iia naasi nei nai odo-odo na'i maana ma'ai to'oraai huunai tahi.

¹² Na'i madoraa na'ia God 'a 'unu'i ringe ana'i tanaa Moses, 'a 'unua do 'iatei nai ha'isuri'i hako 'ai tahi tarau. Ai'a 'unua do 'iatei nai hinihini'i nai tahi tarau. Naasi 'a ha'ata'inia doni ringe ra ai'a 'ari goni beiai hinihini.

¹³ 'A bwarai suri'i hako'i ringe 'isi. Naasi, 'ia Kraest 'a rongomaata'i na'i dadaahoro 'anai ruhasigia baaniai ha'a-mama'ai na ringe amee'i Jiu ra haua mai tanagia. Naia na Usu-usu Maea na ha'atee o'ani 'inia, "Iatei nara rabua na'i hasi'ei, 'a ha'ata'inia do'ia God 'a hiiria 'anai mae."

¹⁴ 'Ia Kraest 'a haua o'asi, doni ha'agorohi na 'ia God 'a haua tanaa Ebrahim, 'ai haa ro'u tana'amoui nei mou ai'a Jiu namou 'u'uria. Ma ro'u, do 'igaau nei nagau hinihinia, gau matai dauai Hi'ona Maea na'ia God na durua tanagia.

Na Duruduru Ana God

¹⁵ Arai noni ana'ia God, wai haua ta heiha'auu 'ini'i taha ga hahaa'i moi 'ado dangi. 'Oha na 'e wairarua nararu aratara nga'inia duruduru, 'a bwa'i nei 'ai horosia mwada'u, ma'ua 'ai ha'asirihia ro'u wou i 'adoma'ina.

¹⁶ Na'i 'oha bwani 'ia God 'a hauai duruduru beia Ebrahim ma beia ro'u ta'i 'iniraau warowarona'i. Mana Usu-usu Maea ai'a hadanga'inia hakoi warowarona'i a Ebrahim. 'A hadanga'inia moi ta'i 'iniraau. Na 'ado'ado 'ana, naasi 'ia Kraest.

¹⁷ Mana 'ado'adogu 'a o'ani. 'Ia God 'a hauai duruduru beia Ebrahim. Ma'e hai 'arangi mana oru tangahurui harisi na hako murina, magu haa'i ringe tana'ameui Jiu. Tarana naasi na ringe ra bwa'i ha'a-ai'aa mwada'u i taha 'ia God na bwane durua na'i na'o 'inia.

¹⁸ 'Ia God ai'a ha'agorohigaau 'iniai suri'i agaa'i ringe ana'ia Moses. 'A ha'agorohigaau suriai duruduru ana, 'onaai ha'agorohia ana Ebrahim suriai durua ana tanaa.

¹⁹ O'asi ana, 'e taha i 'ado'ado 'ada'i ringe? Na ringe ra awa 'anai ha'a-'ome 'irararaau noni 'ini'i taritari'a adaa'i. Mana ringe ra awa tari madoraa na 'ia God na ha'ataaria mai i Garena, na bwane ha'atee duruduru 'inia tanaa Ebrahim. Ni ringe 'isi, 'ia God 'a 'unu'i tanaraau enjel marau haa'i tanaa Moses 'anai maani'i tanaraau noni.

²⁰ Mia Moses naasi na awa i ahoaanai noni mia God. Mana'i 'oha 'ia God 'a hauai duruduru ana beia Ebrahim, 'ia God ai'a 'irisia tanei 'anai awai ahoadarua, 'a haua moi haaria. Naasi gau 'ome 'iraraa doni duruduru na haua beia Ebrahim na ororiu di'u.

Na 'Ado'ado 'Ada'i Ringe

²¹ Ma 'ua? Na ringe ra ura bwarasiai duruduru ana God? Ai'a! 'Onaa 'ia God 'a ga'i bwane haua tanagaau ta ringe dogai tahi tarau 'inia, me'igaau gau ga'i bwane odo-odo'a na'i maana, 'iniai suria agaau i ringesi.

²² Ma'ata, 'ia God ai'a haua o'asi. 'Inia na Usu-usu Maea 'a ha'arangasia do 'iraau hakoi noni ra awa na'i bahainai heimarungi anai ora-ora'a. 'Iniai o'asi ana, 'ia God 'a duruai huunai tahi tanaraau nei narau nugaai hinihinidaau beia Jisas Kraest.

²³ Ma na'i 'oha ni hinihini ai'a boi mau, 'igaau gau awa na'i bahainai heimarungi ada'i ringe. Ma o'asi tari 'oha 'ia God 'a ha'ata'iniai huunai here 'anai dauai tahi tarau, naasi hinihini.

²⁴ Naasi ni ringe ra marungigaau tari 'oha na 'ia Kraest 'a boi. Ma na'i 'ohasi gau nugaai hinihinigaau beia magau odo-odo'a na'i maana God.

²⁵ Ha'amomori! Na madoraa 'anai hinihini naani'a, na ringe ra bwa'igui marungigaau'a ro'u.

²⁶ T'amou ra'i gare ana'ia God 'iniai hinihinia amooua Jisas Kraest.

²⁷ T'amou mou ha'i ta'i beia Kraest na'i 'oha mou bwareomaea, mamou to'oraai barongana bei'amou.

²⁸ Naasi 'i'amou mou ta'isada hako na'i maana God. Rei'uaa Jiu ma'ua nei namou ai'a Jiu, rei'uaa slev ma'ua bwauodo, rei'uaa mwane ma'ua urao, 'i'amou hako 'e ta'i na'i ruruha ana Kraest.

²⁹ Ma 'onaa 'i'amou 'e ta'i beia Kraest, ma 'i'amou 'e ta'i ro'u 'iniraau warowarona'i a Ebrahim. Ma naasi moi daua ro'u i taha 'ia God na duruduru 'inia tanaa.

4

¹ Mawai 'unua ro'u tana'amou o'ani. Na gare, 'oha na kekerei mau, 'a 'onaa moi ro'u slev, rei'uaa 'iia naigui daai toto'ora ana'i amana.

² 'Inia 'oha na kekerei, 'iia mana toto'ora ana'i rau awa na'i bahainai heimarungi adaui nei ra 'omesuria, tari madoraa ni amana 'aigui sigihia.

³ 'A o'asi ro'u, na'i 'oha gau ai'a aidangisia maua Kraest, 'igaau awa na'i bahainai heimarungi adaa'i adaro na'i marewanani.

⁴ Ma tari mai madoraa 'ia God na sigihia, 'a ha'ataaria mai Garena ma huta beiai urao. 'A huta mai ma araisuri'i ringe amee'i Jiu.

⁵ Tarana naasi, 'a matai ruhasigia nei na ringe ra marungigia, neina 'igaau gau matai ha'i arai garena God.

⁶ 'Ia God 'a ha'ataaria mai Hi'ona Maea anai Garena tana'amou do'ai mono na'i raromou. Me 'inia awa ana bei'amou namou tooro 'inia hura'a tanaa God o'ani, "Mama" 'anai ha'ata'ania do 'imou ra'i gare ana'i.

⁷ Hoita naasi 'ohani 'imou mougu ai'a 'onaia'a i slev, ma'ata 'imou ra'i huunai gare ana'ia God. Ma 'inia o'asi ana, 'ia God 'ai wate'i tana'amou taha na bwane duruduru 'ini'i.

Na Heita'ahi Ana Pol

Tanaraaui Noni Hinihini Na'i Galesia

⁸ Na'i madoraa mou ai'a aidangisia maua God, mou awa na'i bahainai heimarungi adaa'i hi'ona nara ai'a ha'a-momori.

⁹ Na'i 'ohani, mou aidangisia God, ma'uasi 'ia God 'a aidangisi'amou. Naasi, ni 'uaana namou raba aho'isi'i mareho ta'a'i 'isi? 'A 'ua? Mou raba awa hunasia aho'i bahainai heimarungi adaa'i?

¹⁰ 'Au rongo to'oana domou ha'ato'o'i mau i dangi mana hura mana harisi hauasa namou taguma'ini'i.

¹¹ Mau kae magugu, 'a gasigu 'ari pwaranga moi tau'aro nau haua bei'amou.

¹² Mau ha'a-ta'u'u'amou arai do'ora mana asigu'i, moi dadara'a baani'i ringe 'onaai haua agua, 'inia 'inau 'au 'onaaimou 'oha mou dadara'a ga'u baaniai heimarungi adaa'i ringe. Ai'a do'e mareho namou ha'atari'aa tanaau nau usu-usu o'asi 'iniani.

¹³ 'Onaai bwane 'iraraa amou, 'au awa bei'amou ani 'inia daoha na to'iai abegu. Ma 'a goro, 'inia 'a haua tanaau i madoraa 'anai taroha'inia Taroha Goro tana'amou.

¹⁴ Na daoha na hauai abegu, 'e mareho tana'amou 'anai wana bodio 'iniau ma'ua gagata'iniau. Ma rei'uaa na o'asi, 'i'amou mou ha'amaotoau 'onaai nei na ha'amaotoai enjel ana God, ma'ua 'ia Jisas Kraest haaria.

¹⁵ Na'i 'ohasi mou wa'ewa'e raha 'iniau. Na wa'ewa'e namou haua, rei'uaa ni maamoo'i mamou ga'i rahi'i moi 'anai haa'i tanaau. 'E taha na taritari'a na mougu ha'a-ai'aa 'inia wa'ewa'esi?

¹⁶ Ma 'ua? Mou ha'ima'e 'iniau'a, 'inia taroha'inia agua tana'amou taha na ha'a-momori?

¹⁷ 'Iraaui nei ra raba suri'i ringe amee'i Jiu, rau bonasia domoi suriraau, ma'ata ai'a do rau haua 'anai 'a'auhi'amou. Rau 'irisia moi domoi nugasiau mamoi hagu beiraau.

¹⁸ 'A goro 'onaau rau to'oraai 'adoma'i wetewete 'ini'amou na'i ringe na goro ma odo-odo. 'A ga'i o'asi tarau, ai'a do 'inia moi awa agua bei'amou.

¹⁹ Arai noni agu'i, naani ruanai 'oha na arunga nau haa 'ini'amou 'a 'onaai arunga na haa i urao na ha'aagau 'anai ha'ahutaai gare. Mana arunga maata'i nau haua 'ai tari 'oha namoi huunai suriai barongana Kraest.

²⁰ Mau 'adoma'inia do 'a ga'i goro do'au ga'i awa bei'amou 'anai 'abenga'i mamaani bei'amou, 'inia 'a kae kakui ahugu di'u 'ini'amou.

Ha'atee Heiha'auu Inia Hega Mea Sera

²¹ 'T'amou nei mou raba dau baabau suri'i taha na ringe ra 'unu'i. 'A 'ua? Mou ai'a aidangisiai taha na Usu-usu Maea na 'unua 'inia Ebrahim?

²² 'Ia Ebrahim 'e rua gare na to'oraa, 'ia Ismael mea Aisak. 'Ia Ismael 'a huta beia Hega, 'e urao na awa na'i bahainai heimarungi, 'iiasi 'e urao

tatau'aro ana Ebrahim. 'Ia Aisak 'a huta beia Sera. 'Ia Sera 'a dadara'a baaniai heimarungi, 'inia 'iia 'e urao ana Ebrahim.

²³ Ni gare ana beia Hega, 'a huta suria moi 'ado'ado ni noni. Mana gare ana beia Sera, 'a huta suriai duruduru na haua God tanaa.

²⁴⁻²⁵ Hoita, na mareho 'isi ra'i nunu tanagia 'iniai rua duruduru na'ia God na haua. Ta'i nei naasi ringe na haa'i tanaa Moses na'i hungahungai Saenai na'i Araibia. 'Iraaui noni nara awa bahaidi ringe 'isi ra 'onaa ra'i garena Hega, 'inia 'iia 'a awa ro'u bahainai heimarungi. Naasi, 'ia Hega 'a ura 'iniraau noni narau awa na'i hungahungai Saenai, ma ro'u 'iniai Jerusalem. 'Iniai noni nara awa iei 'ohani, rau suri'i mau i ringe.

²⁶ Migaau ra'i garena Sera, mana 'omaa agaau naasi Jerusalem ara'ai aro na dadara'a baani'i ringe.

²⁷ Na Usu-usu Maea 'a o'ani, "Mou wa'ewa'e 'i'amoui 'amara. Mou totoro raha 'ini wa'ewa'e nei mou ai'a arunganai maata'i ni ha'ahuta gare. 'Inia na gare ana'i nei na 'amara rai rago di'u baani'i mwani urao hako."*

²⁸ Arai do'ora mana asimee'i, 'i'amou naasi ra'i gare na 'ia God 'a duru'i tanaa Ebrahim ani, 'onaaia Aisak.

²⁹ Na'i 'ohasi, na garena Hega na huta suriai hei'irisina Ebrahim, 'a awa ha'ata'ai gare na huta suriai hei'irisi anai Hi'ona Maea. 'A ta'isada 'onaa here ha'ata'aigaau adaui nei ra awasuri'i ringe.

³⁰ Ma'ata na Usu-usu Maea 'a o'ani, "Mou ha'ataaria beira'i i urao tatau'aro beiai garena. 'Inia na garena 'a bwa'i dauai toto'ora na amana 'ai watea. Na garenai urao na awa dadara'a naigui to'ora."†

³¹ Hoita, ma naasi arai do'ora mana asigu'i, 'igaau 'onaa ra'i arai garenai urao na awa dadara'a ma ai'a i urao na awa na'i bahainai heimarungi. 'Inia 'igaau gau awa dadara'a baani'i ringe.

5

Kraest 'A Ruhasigia

¹ 'Ia Kraest 'a ruhasigia do'igaau gai awa dadara'a tarau baani'i ringe! Moi ura baabau, abu tanei 'ini'amou 'aigui watea ro'u do'ai hunasia aho'i ro'u.

² Moi bahurongoau! 'Inaua Pol wai 'unua tana'amou, 'onaa mou wate'amou 'anai aha ha'ara 'anai ha'a-odoodo'amou na'i maana God, me 'a bwa'i hei'a'auhi namoi to'oana beia Kraest.

³ Mawai 'unu ha'agorohia hura'a wou ro'u tana'amou. 'Iatei na raba dauai ringei aha ha'ara, 'ai ha'isuri'i hako taha na ringe amee'i Jiu ra 'unu'i.

⁴ 'I'amoui nei mou 'adoma'inia domou odo-odo na'i maana God 'iniai suri'i amoou i ringe, mou ha'atau baania Kraest. Mou adarahiai gorohana God tana'amou.

⁵ Me 'i'ameu nameu 'u'uria Kraest, na Hi'ona Maea 'a ha'a-weteweteai hinihinimeeu mameu 'iraraa ha'agorohia do'ia God 'ai ha'a-odoodo'ameu na'i maana.

⁶ 'Anai ha'i ta'i beia Jisas Kraest, ai'a he'ete'i rei'uaa na 'o dauai ringei aha ha'ara ma'ua ai'a. Ni mahosi ai'a ororiu. Taha na ororiu naasi, hinihinimu na ha'ata'i hura'a na'i heita'ahi.

⁷ 'I'amou mou here goro moe'a ga'u mai na'i tahingamoou beia Kraest. 'Iatei na siri mai na pwari'i'amou, namougu ai'a suria'a 'iniai taha na odo-odo?

⁸ 'Onaa na 'ia God na soi'amou, ma 'iia 'a bwa'i matai pwari'i'amou o'asi.

* 4:27 4:27 Aisaea 54:1 † 4:30 4:30 Jenesis 21:10

⁹ Moi herehere goro! Gere dorai ha'ausuringa'i pwapwaari'i 'ai matai ha'ata'ai ai hinihini na'i kae ruruha 'onaai gere memei draebam na ha'asu'ua hakoi flaoa.

¹⁰ Rei'uaa na o'asi, 'inau 'au hinihini wetewete do'ia Araha 'ai 'a'auhi'amou mamoi abui suri'i ha'ausuringa'i he'ete'i o'asi. 'Ia God 'ai ha'a-mama'aia tei na siri mai 'anai ha'ata'ai'i 'adoma'imoo'i, rei'uaa 'ia tei.

¹¹ Arai do'ora mana asimee'i, 'onaa 'a ha'a-momori do 'inau 'au taroha'inia moe'a mau i ringei aha ha'ara, ni 'uaana 'iraau Jiu rau nora ta'ai au moe'a mau 'inia? 'Onaa nau taroha'inia mau, 'a ga'i bwa'i 'ua tanaraau Jiu. Ma'ata, nau taroha'iniai mae ana Kraest taragaau na'i dadaahoro. Tarana naasi narau nora ta'ai au mau 'inia.

¹² Mei tanaraau nei ra ha'ata'ai'i 'adoma'imoo'i 'anai dauai ringei aha ha'ara, 'a goro dorau ga'i aha ha'ata'airaau wou haariraau!

¹³ Arai do'ora mana asimee'i. Ha'amomori, 'ia God 'a soi'amou domoi dadara'a baaniai heimarungi 'ada'i ringe. Ma'ata 'a ai'a domou dadara'a 'anai haa'i mwani hei'irisi ta'a'i 'anai abe, ma'ata mou hari taguma'ini'amou hairiu beiai heita'ahi.

¹⁴ Na mwani ringe ana'ia Moses, ra awa hako moi bahainai ta'i ha'atora, "O'i ta'ahiai nata sae 'onaai ta'ahi'o amua haari'o."

¹⁵ Ma 'onaa moi awa 'onaai mwamwaa hahaingau na raba haidiohi tarau, mamoi herehere goro, mou gasi ha'a-ta'ai'amou hairiu.

Na Hi'ona Maea Ana God

Mana Hei'irisi Anai Abe

¹⁶ Mawai 'unua tana'amou, mou wate'amou tanaai Hi'ona Maea 'anai marungi'i tahingamoo'i, neina moi abui ha'isuriai taha na hei'irisi ta'aa anai abe na 'irisia.

¹⁷ 'Iniai hei'irisi ta'aa anai abe, 'a ai'a ta'isada beiai taha na Hi'ona Maea 'a 'irisia. Mana taha na Hi'ona Maea 'a 'irisia, ai'a ta'isada beiai hei'irisi ta'aa anai abe. 'Iraruasi raru ha'imae hairiu, tarana naasi 'o bwa'i haua mwada'u i taha 'o 'irisia.

¹⁸ Ma 'onaa na Hi'ona Maea na na'otaramoou, na ringe ragu bwa'i marungi'amou.

¹⁹ Na baronganai nei na suriai hei'irisi ta'aa anai abe ra ha'ata'i goro moi. Ra ha'ata'i hura'a na'i heikamori, haa'i here wawaasua'a, 'adoma'i sisiwa mana awa 'onaai mwamwaa,

²⁰ ho'asi'i araanunu, mana hai'uaasi, ha'imae hairiu mana awa heheita'ia'a mana hai'ubwani. Ma ha'ata'i hura'a ro'u na'i taesu'a mwako, 'adoma'ini'o moi haari'o, ha'a-heihoaraau noni,

²¹ naga 'iniai taha na to'oraai nata sae, mana gono raha 'ini'i waini bweu, haa'i ngau goni nara hau'i mwani mareho to'obweubweu'a suri'i, mana taraani mareho ta'a'i ro'u o'asi. 'Au bwane ha'abasu'amou mawai ha'abasu'amou ro'u i 'ohani. 'Ira tei narai suri'i ringe ta'a'i o'asi, rau bwa'i taha na'i hourana ana God.

²² Ma'ata, ni Hi'ona Maea 'a ha'ata'ini'i hua goro na'i tahinganai noni. 'A 'a'auhiai sae 'anai ta'ahirai noni hako, awa wa'ewa'e, awa goni goro beiraau noni, 'a'auhiai nata nei, ahumaratanoa, haa'i mwani maho goro, mangudisiai taha na 'unua,

²³ awa 'abenga'i, ma 'anai 'omesuria haaria baaniai ora-ora'a. Ai'a ta ta'i ringe nai awa nai ura bwarasi'i mareho goro 'isi.

²⁴ 'Iraau nei ana'ia Jisas Kraest ra ha'a-ai'a'i hakoi baronga mana mwane hei'irisi ta'aa na'i hunganai dadaahoro.

²⁵ Ma 'onaa ni Hi'ona Maea na haua tanagiai tahinga haoru, gaau magai suria tarau i taha na Hi'ona Maea na 'irisia.

²⁶ Gai abui 'adoma'i ha'a-ta'eta'egia haarigia, abui ha'ataesu'aai nata nei, ma'ua kakawa 'omesia.

6

Gai 'A'auhiraau Noni

¹ Arai do'ora mana asimee'i na'i Kraest, 'onaa tanei 'ini'amou 'ai siri na'i ora-ora'a, 'i'amou nei na baabau i hinihinimoou beia Kraest namoi 'abenga'inia 'anai ha'a-odoodoa. Ma'ata moi herehere goro, mou gasigu ahoda ro'u na'i ta'i heiohongu.

² 'A'auhia tei na hihi'a i tahingana 'ini'i mwani mareho bwara. 'Onaa moi haua o'asi, naasi moigui hauai taha 'ia Kraest na 'irisia.

³ 'Onaa 'iatei sae na ai'a raba 'a'auhiai nata nei, 'inia 'a 'adoma'i ha'ata'ea do'ia 'a ororiu, 'ia 'a pwari'ia haaria 'inia 'ia 'e sae haaria moi.

⁴ 'Adonai nei 'ai 'ome hegahegaa haariai tahingana. 'Onaa 'a goro, naasi 'a goro do'ai wa'ewa'e haaria 'inia, mai abui 'adoma'i ha'ata'ea do'ia 'a goro di'uai nata nei.

⁵ 'Inia 'adonai noni 'ai taguma'inia haariai tahingana.

⁶ Ma'ata, 'iraau nei nara ha'ausuri'amou 'ini'i ha'atee ana'ia God, 'a goro do moi hasura'ini'i beiraau mwani mareho goro na mou to'ora'i.

⁷ Mou abui 'adoma'i ha'atari'aa. 'A bwa'i sae nai matai ha'a-bweubweu'aa God. 'Adonai noni 'ai dauai taha na hasia na'i tahingana.

⁸ 'Onaa 'a hasi'i mareho ta'a'i na'i tahingana 'anai ha'a-wa'ewa'eai abe, 'ai daua nana i mae tarau. Ma 'onaa taha na hasia na'i tahingana 'anai ha'a-wa'ewa'eai Hi'ona Maea, baaniai Hi'ona Maea 'ai daua nana i tahi tarau.

⁹ Naasi gai abui maemae'a 'anai hauai taha na goro tanaai nata nei. 'Inia 'onaa gai wetewete moe'a, gai dauai taha na ha'aagau totorigia 'ini'i na'i huunai madoraa 'ana.

¹⁰ Tarana naasi, 'oha nagau to'o madoraa goro mau, gai 'a'auhiraau tarau i mwani noni hako, ororiu 'ira i nei hinihini nagau awa na'i ruruha ana God.

Pol 'A Ha'abasuraau Aho'i Ro'u

¹¹ Moisu 'omesi'i usu-usu raha nau haa'i, 'oha nau usuai usu-usuni tana'amou 'inia rimagu haariau.

¹² 'Irai nei nara ha'a-'usu'usu'amou 'anai dauai ringei aha ha'ara, rau 'irisia moi do 'iraau Jiu rai wa'ewa'e 'iniraau. Rau ai'a taroha'inia mae ana Kraest na'i dadaahoro, 'inia rau ai'a 'irisia do 'iraau Jiu rai norata'airaau.

¹³ Ma rei'uaa narau suria mau i ringei aha ha'ara, ai'a ta ta'i 'iniraau nai ha'isuri'i hakoi ringe amee'i Jiu. Rau 'irisia domoi dauai ringei aha ha'ara dorai ha'apa'o 'inia suria amou i ringesi.

¹⁴ Mei tanaau, 'inau wa'ewa'e moi 'inia mae na haua Araha aga, 'ia Jisas Kraest, na'i dadaahoro. 'Inia mae ana Kraest na'i dadaahoro, nau ai'a 'adoma'i ororiu 'ini'i mareho ni marewanani, mana noni ni marewana ra ai'a 'adoma'i ororiu ro'u 'iniau.

¹⁵ Namoiwou 'o aha ha'ara ma'ua 'o bwa'i, taha na ororiu, naasi dauai tahinga haoru beia Jisas Kraest.

¹⁶ Mei tanaraau nei rau suriai 'ado'adosi na'i tahingadaa'i, 'au ha'arahesi do'ia God 'ai ha'a-awagoniraau goro ma'ai ta'ahiraau hako. 'Iraau naasi huunai noni ana'ia God.

¹⁷ Naasi, moi abui ha'a-arungata'aiau'a ro'u, 'inia na wareware 'ini'i mwari nara awa na'i abegu 'a ha'ata'inia do'inau 'e noni tatau'aro ana Jisas.

¹⁸ Arai do'ora mana asimee'i, 'au ha'arahesi mia Araha aga, 'ia Jisas Kraest, 'ai ha'agorohi'amou hako. Amen.

Na Usu-usu Ana Pol Tanaraaui Noni Hinihini Na'i Efesas

Gere Mamaani 'Iniai Bukani

'E taha na 'o ha'angonia 'inia God na'i 'oha na'o ha'arahesi 'a'auhiraau haru sae? Tara'i 'oha 'a kakui ahugaau 'ini'i taha nagai 'unu'i. Gau o'ani moi, "God, 'oi awa beiraau ma 'oi 'a'auhiraau." Na'i Buka Efesas 'ia Pol 'a ha'ata'inia tanagaau i herehere goro 'anai ha'arahesi.

I mareho na 'ia Pol 'a 'irisia naasi, do 'iraau noni nai heiso rai taguma'iniraau hairiu. Ma 'irisia dorai aidangisiai taha narai haua 'anai ha'a-wa'ewa'ea God. 'Iia 'a 'adoma'i ororiu di'u ro'u 'iniai hagu hagu hairiu narau haua i sae ha'iwai. Ma 'idi nara 'isi gasi mareho na ha'arahesi wetewete 'ini'i.

'Ia Pol 'a 'irara'i ororiu nara haa'i ha'arahesi agaa'i. 'A 'iraraa do 'ia Saetan miraau adaro, ra'i mareho ha'a-momori. Na'i ha'arahesi, gau matai ha'aheho'i maeronga 'isi nara hei'oi beigaau. 'Ia Pol 'a usu'i dio tanagiai ha'ataura'i nagai haa 'anai hei'oisi.

Na'i 'oha na 'oi 'oha'iniai Buka Efesas 'oi wai'ado'ado suriai ororiu na haua i ha'arahesi. Ma 'oi 'ome'ome 'ini'i taha na'o matai ha'arahesi 'ada'i 'anai 'a'auhiraau nei na'i ruruha amua ma'ua na'i 'omaa amua.

¹ Tana'amoui noni ana'ia God na'i Efesas namou hagu beia Jisas Kraest mamou mangudi 'anai suria. 'Inaua Pol na'ia God na sigihiau 'anai Ha'ataari, nau hauai usu-usuni 'anai usu-usu garihi'amou wou.

² 'Au ha'arahesi mia Godi Amaga, mana Araha aga, 'ia Jisas Kraest, 'ai ha'agorohi'amou maai ha'a-awahi'amou goro.

Na Mwani Mareho Goro

Ra Boi Baania Kraest

³ Gai ha'atee ha'agorohia Godi Amana Araha aga Jisas Kraest, 'ini'i mwani bane ni aro na wate'i mai tanagiai nei gau hagu beia Jisas Kraest.

⁴ Mau mai 'oha God ai'a haua mau i marewana, 'iia 'a bwane sigihigaau dogai ha'i noni ana'i 'iniai hagu agaau beia Jisas Kraest. 'A haua o'asi do 'igaau gai odo-odo na'i maana mana ta'aa 'a bwa'i awa beigia.

⁵ Mei 'ini heita'ahi ana tanagia, 'iia 'a 'adoma'i nunuga 'inia do'igaau gai ha'i garena, 'iniai mae ana Jisas Kraest tanagia. Naasi huunai hei'irisina mana 'adoma'ina God.

⁶ Gau magau ha'aasaa God 'iniai goro ana 'inigia. 'A watea dadara'a tanagia i Garena na ta'ahia ororiu.

⁷⁻⁸ 'Ia Kraest 'a watea haaria 'anai mae 'inigia. Mana 'abuna na ahe 'a ruhasigia baaniai ora-ora'a. Ha'amomori, na 'inoga hako 'a 'adoma'i nugasi'i. 'Ia God 'a goro 'inigia suriai 'adoma'ina na goro ma madoma.

⁹ 'Ia God 'a suriai hei'irisina ma ha'ata'inia tanagiai 'adoma'ina na awa bainihu ga'u. Naasi maho na 'adoma'i nunuga 'inia mau mai 'anai haua na'i Garena, 'ia Jisas Kraest.

¹⁰ Ma naani mareho God na 'adoma'i nunuga 'anai haua. Na'i 'oha nai tari mai huunai madoraa 'ana, na mwani mareho na'i aro mana ano 'ai taragoni'i hako mai na'i bahainai heimarungi ana Kraest.

¹¹ Mwane mareho hako 'ia God 'a haua suriai hei'irisina haaria. Mau mai, 'ia God 'a suriai hei'irisina. Na tarana naasi na 'ome sigihigaau 'inia 'anai ha'i noni ana'i suriai hagu agaau beia Kraest.

¹² 'A hua o'asi do 'i'ameui Jiu nameu 'u'uria na'i na'o a Kraest mei ha'aasaa God 'iniai gorohana.

¹³ Mi'amou ro'u i nei namou ai'a Jiu, 'i'amou ra'i noni ana'ia God na'i madoraa mou rongoai huunai ha'ausuringa'i, naasi Taroha Goro na hua tana'amou i tahi tarau. Na'i 'oha mou hinihinia Kraest, 'ia God 'a hua tana'amou i Hi'ona Maea na durua, 'e ha'ara do 'i'amou ra'i arai gare ana'i.

¹⁴ 'Iniai awa ana Hi'ona Maea beigia, gau 'iraraa ha'agorohia do gai daa'i mwani mareho na'ia God na durua tanaraaui noni ana'i. Mana Hi'ona Maea 'ai awa beigia tari madoraa God 'ai aho'isiraau mai noni ana'i marai awa dadara'a tarau. Mawai 'unua ro'u, gaau magau ha'aasaa God 'inia 'iia 'a goro.

Ha'arahesi Ana Pol

¹⁵ 'Iniai o'asi ana, taraawa'a na'i 'oha nau rongoai hinihinimoou beiai Araha aga Jisas Kraest, mana heita'ahi amou tanaraau hako noni ana'ia God,

¹⁶ 'au ai'a mamaro 'anai ha'atee ha'agorohia God 'ini'amou suri'i ha'arahesi agu'i.

¹⁷ Mau ha'angonia God ana Araha aga Jisas Kraest, i Ama na hauasa, 'anai haa tana'amou aidangi baaniai Hi'ona Maea, mai ha'ata'ini'i barongana'ia God tana'amou mamoi aidangisia goro di'u wou.

¹⁸ Mau ha'arahesi mia God 'ai ha'amararaa i 'adoma'imoo'i mamoi 'ome 'irara'i mwani maho goro na'ia God nai haa'i tanagia na'i aro. Mamoi aidangisi'i ro'u i bane ororiu na'ia God na duru'i tanarai noni ana'i.

¹⁹ 'Au ha'arahesi mamoi aidangisia ro'u i mena ana na hauasa na 'a'auhigaau nei gau hinihini. Mana ta'i mena mausi,

²⁰ naasi na ha'a-suruta'ea Kraest baaniai mae ma ha'a-heinagua ara'ai aro na'i dora na ororiu na'i aba odona God.

²¹ Na'i aro, 'ia Kraest 'a marungiraau hako mwani mwaeraha, mana enjel mana mwani taraani mena hako ro'u na'i aro. Mia Kraest 'a dauai ata na ororiu di'u'i mwani ata nara to'o mena na'i marewanani ma na'i marewana nai boi ta'oha.

²² Mwani mareho hako, God 'a nuga'i na'i bahainai heimarungi ana Kraest. Ma nugaa Kraest na bwauodonai heiso'i 'onaai bwauodo ana ada'i mwani mareho hako.

²³ Na heiso'i 'e abena Kraest, ma honu 'iniai mena ana Kraest na marungi'i mwani mareho hako suri'i mwani dora 'iniai mena ana.

2

Tahinga Haoru Beia Kraest

¹ Na'i na'o, tahingamoo'i ra mae, 'inia mou awa na'i ora-ora'a mamou ai'a suriai hei'irisina God.

² Mou suri'i baronga ta'a'i 'anai marewana mamou araisuria Saetan na marungiraau adaro na'i ahoaa. Na mena ana 'a marungiraau hako nei ra ai'a araisuria God na'i marewanani.

³ Na'i na'o, 'igaau gau 'onaairaau ro'u i noni 'isi. Gau suria moi hei'irisigaa'i haarigia, gau ha'isuriai 'adoma'igaa'i mana taha na abegaa'i na 'irisia. 'Iniai o'asi ana, 'a ta'isada 'ia God 'ai ha'a-mama'aigia 'onaai hua ana tanaraau hako nei rau ai'a suria.

⁴ Ma'ata 'iia 'a ahu ta'ahigia, mei 'iniai heita'ahi ana tanagia

⁵ 'a ha'ahaoru'i tahingaga beia Kraest, rei'uaa na tahingaga ra mae 'ini'i ora-ora'a agaa'i. Ha'amomori, 'ia God 'a ha'atahi'amou 'iniai goro ana 'ini'amou!

⁶ Hoita, ma 'iniaia hagu agaau beia Kraest, 'ia God 'a ha'atahigia baaniai mae 'onaai ha'atahia aho'i ana Kraest. Mei ta'oha 'ai ha'a-suruta'egia 'anai heinagu 'anai heimarungi beia Kraest ara'ai aro.

⁷ 'Ia God 'a haua o'asi 'anai ha'ata'inia tarau tanaraaui noni i raha na haa i goro ana tanagia 'iniaia hagu agaau beia Jisas Kraest.

⁸⁻⁹ God 'a ruhasi'amou, ai'a do 'ini'i tatau'aro goro amoo'i, mei 'ini hinihinimou beia mana goro ana na banea tana'amou. Naasi 'a bwa'i nei 'ai ha'ata'ea haaria 'inia.

¹⁰ 'Ia God 'a ha'ahaoru'i'a i tahingaga 'iniaia hagu agaau beia Kraest, neina gai ta'isada 'anai hau'i mwani mareho goro na bwane ha'aagau'i tanagia.

'Igaau 'E Ta'i 'Inia Kraest

¹¹ Mou 'iraraa, 'i'ameu Jiu meu ha'a-ta'eta'e'ameu 'oha meu 'unumeeu haarimeeu 'ini'i noni aha ha'ara, 'inia na gare mwane hako meu haa tanaraaui ringei aha ha'ara. Ma'ata, marehosi 'e mareho moi na 'i'ameu inoni meu haa'i 'ada'i abemee'i, ai'a 'ia God. Mi'ameu 'unu'amou 'ini'i noni nara ai'a aha ha'ara, 'ini mou ai'a huta 'onaai Jiu.

¹² Na'i na'o, mou ha'atau baania Kraest mamou ai'a aba 'iniaia ruruha God na sigihia 'anai noni ana'i. Na'i 'ohasi, mou awa hura'a baaniai duruduru God na haa tanaraaui noni ana'i. Mou ai'a aidangisia God mamou ai'a to'oraai 'adoma'i heimamasi 'ini'i mwane mareho goro na'ia God na raba haa'i tana'amou.

¹³ Ha'amomori! Na'i na'o namou ha'atau baania God, ma'ata na'i 'ohani mou hagu beia Kraest. God 'a wai'amou mai gaarangi 'iniaia ahe anai 'abuna Kraest na'i dadaahoro.

¹⁴ 'Ia moia Kraest na ha'a-awagonigaau goro. Ni watea haaria na haa 'anai mae, 'a daugonimeu i Jiu, mi'amoui nei namou ai'a Jiu 'onaai ta'i ruruha. 'Ia Kraest 'a gaasi'i baanigaau i mwani 'adoma'i 'anai sigia i nata nei. Na 'ado'adogaa'i 'anai 'utaigaau hairiu 'a 'onaai bani hau na hoaigaau.

¹⁵ Na'i 'ohani, ai'a ororiu do 'anai suri'i hako mwani heiatenga'i ana'ia Moses mana mwani ringe na'i rarodi. 'Inia 'ia Kraest 'a orisiai herehere 'anai dauai tahi tarau. 'Ia Kraest 'a haua o'asi 'anai ha'a-hagugonimeeu i nei meu suri'i heiatenga'i 'isi bei'amoui nei mou ai'a. Naasi 'ia Kraest 'a wairaaui goni mai rua ruruhai noni beia, marai awa goni goro 'onaai ruruhai noni haoru.

¹⁶ Na mae na haua Kraest hunganai dadaahoro, 'a ha'ahakoa baaniraruai herehere 'anai 'itararua hairiu. 'A ha'ahagurarua 'onaai ta'i ruruha 'anai wairaaui aho'i mai tanaa God.

¹⁷ 'Ia Kraest 'a boi 'anai maania tanaraaui noni hako dorai awa goni goro, tana'amoui nei mou ai'a Jiu namou ha'atau ga'u baania God, mei tana'ameui Jiu nameu gaarangia God.

¹⁸ Na'i 'ohani, 'iniaia hagu agaau beia Kraest, 'agu mwada'u tanagaau hako 'anai boi goni na'i maana Godi Amaga 'iniaia hei'a'auhi anai ta'i Hi'ona Maea.

¹⁹ Tarana naasi, 'i'amou nei namou ai'a Jiu mougu ai'a mahuarua. 'T'amou ra'i sae auhenua anai aro 'onaairaaui hako noni ana'ia God. Mi'amou ro'u ra'i garena.

²⁰ 'T'amou 'onaai ruma God na toraia na'i ano baabau. Mana anosi, 'ia Jisas Kraest. Miraau na Ha'ataari mana Rarabea rau 'onaai'i auu nara ha'ababauai rumasi.

²¹ 'Ia Kraest na daugoni'i hako mwani dora na'i rumasi, ma ha'arahaa do'ai ha'i ruma maea ana Araha God.

²² 'Iniaia hagu amooi beia Kraest, 'i'amou hagu o'asi ro'u bei'amoui Jiu nameu hinihini, magai 'onaai ruma na Hi'ona Maea ana God na awai raron.

3

Tatau'aro Ana Pol Beiraaui Nei Ra Ai'a Jiu

¹ 'Inaua Pol, 'au awa na'i rumanih'o 'inia tau'aro nau haa tanaa Jisas Kraest 'anai 'a'auhi'amoui nei mou ai'a Jiu.

² Mau 'iraraa, mou rongoa do'ia God 'a banea tanaaui tau'aroni 'anai 'a'auhi'amou.

³ 'Onaai usua agua ga'u na'i usu-usuni, 'ia God 'a ha'ata'inia tanaaui taha na 'adoma'i nunuga 'inia 'anai hua na 'iraau noni nara ai'a aidangisia na'i na'o.

⁴ Ma 'onaa moi 'oha'inia goro i usu-usu nau haani, mou ga'i 'iraraa do 'inau aidangisi'i mwane mareho 'inia Kraest na mwani noni nara ai'a aidangisi'i na'i na'o.

⁵ Na'i na'o, 'ia God 'a giruai 'adoma'ina baaniai noni. Ma na'i 'ohani, na Hi'ona Maea 'a bwane ha'ata'inia hura'a tana'ameu i Ha'ataari mana Rarabea ana'ia God.

⁶ Mana taha God na 'adoma'i nunuga 'inia naani. God 'a 'irisia do 'i'amou nei namou ai'a Jiu bei'ameui Jiu gai ha'i ta'i na'i heisoi ana Kraest. Mana mwani maho 'ia God 'a duruduru 'ini'i tana'ameui Jiu rai 'ari tanagaau hakoi nei gau hinihiniai Taroha Goro 'inia Jisas Kraest.

⁷ Na tau'aro nau haa 'anai taroha'iniai Taroha Goro, 'e bane na'ia God na hua tanaau 'iniai mena ana.

⁸ Rei'uaa nau ano-ano di'u baanirai noni ana'ia God, 'ia God 'a banea tanaaui tau'aroni. 'A ha'ataariau bei'amoui nei mou ai'a Jiu 'anai taroha'iniai Taroha Goro 'ini'i mwani mareho goro na bwarai uduma'i tarihadi na'ia Kraest na matai haa'i suri'i tahingagaa'i.

⁹ Me 'iia 'a 'ome sigihiau ro'u 'anai ha'ata'inia tanaraaui noni i 'adoma'ina na bainihu. 'Inia mau mai taraawa'ana, 'ia God na ha'apwa'ara'i hakoi mwani mareho, 'a giruai 'adoma'ina baanirai noni.

¹⁰ Ma'ata 'a hauai heisoi 'anai ha'ata'ini'i mwani madoma he'ete'i hairiu ana tanaraaui enjel mana mwani mareho nara to'o mena na'i aro.

¹¹ Naasi taha God na 'adoma'i agau 'inia 'anai hua na'i madoraa na ai'a hua mau i marewanani. Mia God 'a ha'ato'oai mahosi, na'i 'oha na ha'ataaria maia Kraest, i Araha aga.

¹² Naasi, 'iniai hagu agaau beia Kraest ma 'ini hinihinigaau, 'a ha'aramoramogia mana 'adoma'iga 'a wetewete 'anai 'ariwou na'i maana God.

¹³ Naasi wai 'unua tana'amou, moi abui maemae'a 'oha mou re'iai rongomaata'i nau haa 'ini'amou, 'inia 'inau 'au hua 'anai 'a'auhi'amou mamou ga'i arunga wa'ewa'e 'inia.

Na Heita'ahi Ana Kraest

¹⁴ Tarana naasi, 'oha nau 'adoma'i suriai madoma ana God mana hei'irisina, 'au topira'i ruru auru tanaai Amaga 'anai ha'arahesi.

¹⁵ 'Inia 'iia na Amadaau i mwani ruruha hako na'i aro ma na'i ano nara hinihinia.

¹⁶ 'Au ha'angonia God, na to'ora'i mwani bane rago ara'ai aro, 'ai ha'awetewete'amou suri'i tahingamoo'i 'iniai mena ana Hi'ona Maea.

¹⁷ Mau ha'arahesi mia Hi'ona Maea ana Kraest 'ai mono na'i tahingamoo'i 'iniai hinihinia namou haa. Mau ha'arahesi ro'u doni mwani mareho moi haa'i, moi haa'i beiai heita'ahi na boi baania God.

¹⁸ Neina 'i'amou beiraaui hakoi noni ana'ia God, moi aidangisia i bwabwahora mana tewa ma'ua ahaaha mana ganu na haa i heita'ahi ana Kraest.

19 Ma rei'uaa na ai'a mwada'u 'anai aidangisia hakoi heita'ahisi, ma'ata 'au ha'angonia God mamoi to'oraai heita'ahi suri'i tahingamoo'i. Ma naasi, na barongamoo'i rai 'onaaiai barongana God mamoi honu 'ini mena ana.

20-21 Gaau magau ha'aasaa God! 'Iniai mena ana na tau'aro na'i raroga, 'a matai hau'i mwane mareho di'uai taha gau ha'angoni'i ma'ua 'adoma'ini'i. 'Igaau noni na'i heisoi nagau hagu beia Jisas Kraest, gai ha'aasaa God tarau tarau! Amen.

4

Gaau 'E Ta'i 'Inia Kraest

1 'Inau nau awa na'i rumanih'o 'iniaai tau'aro agua tanaa Kraest, 'au ha'a-ta'u'u'amou, moi awa suriai tahinga na arariraau nei na'ia God na soiraau.

2 Moi awa ano-ano, awa 'abenga'i, moi ahumaratanoa beiraui noni, mamoi ta'ahi'amou hairiu.

3 Moi bonasiai hagu hagu goro 'iniaai mena anai Hi'ona Maea. 'Onaa 'ai o'asi, na gooroha ana God 'ai dau goni'amou.

4 'Igaau 'e ta'i abe moi, mana Hi'ona Maea 'e ta'i. Mia God 'a soigia hako 'anai mamasiai ta'i mareho na goro na durua tanagia 'anai daua.

5 'Igaau to'oraai ta'i Araha, ta'i hinihini, magau suriai ta'i bwareomaea.

6 'E ta'i God i Amaga hako. 'A marungigia hako, 'a awa beigia hako, ma tatau'aro suri'i tahingagaa'i hako.

7 'Ia Kraest 'a wate'i tanagiai mwani bane ni tatau'aro hehe'ete'i hairiu suriai 'adoma'ina. Mana bane 'isi rai 'a'auhigia 'anai tau'aro tanaa God.

8 Tarana naasi na Usu-usu Maea 'a o'ani,

“Oha na ara'a na'i dora na ahaaha,

'a wairaui nei ra hunasiraau 'anai gawasiraau,

ma haa'i bane tanaraui noni 'anai tau'aro tanaa.”*

9 Ma'e taha naasi 'ana 'ado'ado i “ara'a na'i dora na ahaaha?” Na 'ado'ado 'ana naani, 'ia Kraest 'a bwane dio mai'a na'i marewanani.

10 Ha'amomori! Nei na dio mai, naasi nei na ara'a na'i dora na ahaaha baani'i mwani dora. 'A haua o'asi neina heimarungi ana 'ai 'adarara hako 'ari suriai mwani dora.

11 'Ia naasi na haa'i tanagiai bane 'anai tau'aro tanaa God. 'A 'ome sigihi'i tara'i nei 'anai Ha'ataari, tara'i nei 'anai ha'arangasi'i hura'a i 'ado'ado ana'ia God, tara'i nei 'anai taroha'iniaai Taroha Goro 'ari hako suri'i mwani dora, ma tara'i nei 'anai ha'ausuriraau mana 'omesuriraui noni hinihini.

12 'A haua o'asi 'anai ha'aagau'agau i noni ana'ia God 'anai hau'i tatau'aro ana'i, mana heisoi ana Kraest 'ai wetewete.

13 'A 'irisia doni heisoi ana Kraest 'ai wetewete ara'a tari 'oha gai ha'i ta'i na'i hinihiniga ma gai ha'i ta'i na'i aidangi gau to'ora 'abaiai Garena God. Ma na'i muri, tahingaga 'aigui 'onaa tahingana Kraest haaria.

14 Na'i 'ohasi gaugu bwa'i 'onaaia'a i gare na hinihini mwada'u. Rei'uaa rai sirimai mwani ha'ausuringa'i pwapwari'i ma'ua rai mamaani hiosiai taha na ha'a-momori, gau bwa'i matai su'a beira'i baaniai tara odo-odo.

15 Ma'ata, gai maaniai mareho na ha'a-momori beiai tahinga ni heita'ahi, mana tahingaga beia Kraest, na bwauodonai heisoi, 'ai wetewete di'u ro'u wou.

16 'Ia Kraest 'a daugoniraui hakoi noni ana'i, 'onaa'i hasi'o suri'i abega nara daugoni'i mwani dora na'i abega 'anai haa'i ta'i abe. 'Onaa na mwani dora 'anai abe rai haa'i tau'aro nara nuga'i 'ada'i, na abe 'aigu wetewete. 'A o'asi ro'u, 'onaa 'adonai sae hinihini 'ai hauai tau'aro God na haua tanaa, na heisoi 'ai ta'eha mai wetewete beiai heita'ahi.

* 4:8 4:8 Psalm 68:18

Baronga Haoru 'Ai Orisiai Baronga Bwani

¹⁷ Na'i atana Araha 'au ha'atee wetewete tana'amou, moi abui awa 'onaairaau ahurodo na 'adoma'ida ra ai'a 'onaaia ta maho.

¹⁸ Na 'adoma'idaa'i ra kuhi, ra baabau i tahingadaa'i marau bweu. Tarana naasi rau ha'atau baaniai huunai tahi na boi baania God.

¹⁹ Na'i 'oha ra haa'i ora-ora'a rau ai'a arunga ninima suri'i. Rau wateraau haariraau 'anai haa'i mwani maho ta'a'i mana mwani here ta'a'i naasi narau 'irisi'i.

²⁰ Ni mareho 'isi meu ai'a ha'ausuri'amou 'ini'i na'i 'oha nameu ha'ausuri'amou 'inia Kraest. Ai'a.

²¹ 'I'amou bwane rongoai Taroha Goro mana mwani mareho ha'a-momori nameu ha'ausuri'amou 'inia Jisas Kraest.

²² 'I'ameu meu ha'ausuri'amou 'anai nugasi'i baronga ta'a'i amoo'i namou suri'i na'i na'o. Mareho 'isi ra matai ha'a-ta'ai'amou 'inia ra ta'a'i di'u mara honu 'ini'i pwari'i.

²³ Meu ha'ausuri'amou 'anai wate'amou tanaa God maai ha'ahaoru'i 'adoma'imoo'i mana tahingamoo'i.

²⁴ Meu ha'ausuri'amou do 'i'amou moi awa na'i tahinga haoru na suriai tahingana God haaria. 'Onaa namoi haua o'asi, 'i'amou moi ha'ata'inia hura'ai awaha na maea ma odo-odo.

²⁵ 'Igaau hako ra'i aba 'iniai abena Kraest. Naasi moi abui pwapwari'i'a. Moi ha'atee ha'a-momori moi tanaraau sae hinihini.

²⁶ 'Onaa 'o taesu'a, 'oi abui hereta'aa. Mana sina 'ai abui suuta'ini'o beiai taesu'a na'o haa.

²⁷ 'O gasi nuga madoraa tanaa Saetan 'anai ha'ata'ai'o.

²⁸ 'Iatei noni hinihini na awa moi 'anai beri, 'ai agoheta'i beri maai tau'aro. Neina mareho nai to'ora'i ra'i mareho na tau'aro maedi, maai matai 'a'auhiraau pohara 'ini'i.

²⁹ Abui 'unu'i ha'atee nara rongo ta'a'i. Ma'ata 'oi 'unu'i moi ha'atee nara ta'isada mara goro 'anai rongo'i, neina mareho na'oi 'unu'i rai 'a'auhi'i 'adoma'idaa'i nei narau rongo'i.

³⁰ 'O abui ha'a-ahutotoua i Hi'ona Maea ana God. 'Inia na Hi'ona Maea 'e ha'ara ana God bei'o, do'ia na to'ora'o, me 'ia God 'ai ha'atahi'o na'i ha'ahakonai dangi.

³¹ Nuga'i beira'i mwani taesu'a bwara baaniai tahingamu, abui taesu'a 'anai nata nei, abui awa hahaungarimu, ma'ua 'unu ha'ata'aia i nata nei, ma'uasi 'itaa di'u i nata sae.

³² Ma'ata 'a goro do'oi 'a'auhai nata nei ma'oi awa heita'ahi. 'O'i 'adoma'i nugasias ro'u i 'inonai nata nei 'onaa God na 'adoma'i nugasias 'inomou 'iniai hinihinimu beia Kraest.

5

Awa Na'i Bewaa

¹ 'I'amou ra'i gare ana'ia God na ta'ahi'amou. Naasi moi bonasia doni barongamoo'i rai 'onaaiai barongana God.

² Moi ha'ata'iniai heita'ahi suri'i mwane maho hako mou haa'i, 'onaa ha'ata'inia ana Kraest heita'ahi ana tanagia, 'ini mae ana na'i dadaahoro. 'A wateai tahingana tanaa God 'onaa ho'asi mia God 'a wa'ewa'e 'inia.

³ 'I'amou ra'i inoni ana'ia God. Naasi 'a ai'a ta'isada domoi taritari'a beiai nata nei, ma'ua haa'i mwani here wawaasua'a ma'ua hairaurau.

⁴ Ma ai'a ta'isada domoi hadanga'ini'i maho ta'a'i mana mareho ra rongo wawaasua'a, mana haa'i mwane haikou ta'a'i. Ma'ata 'a goro domoi ha'atee ha'agorohia God.

⁵ Moi aidangisia do nei nai taritari'a beiai nata nei ma'ua haa'i here wawaasua'a, 'abwa'i siri mwada'u na'i hourana ana God mea Jisas Kraest. Ma'ai o'asi ro'u tanaai nei na naga 'inia mareho anai nata sae, 'inia na mareho 'isi ra ororiu na'i tahingana di'ua God.

⁶ Abu ha'awatea tanei 'ai pwari'i'amou 'ini'i maho nara ai'a ha'a-momori. 'Ia God 'ai ha'a-mama'airai nei ra ai'a araisuria mara haa'i moi here ta'a'i 'isi.

⁷ Naasi mou abui hagu beiraau noni o'asi.

⁸ Na'i na'o, 'i'amou awa na'i kuhi, ma na'i 'ohani mou awa na'i bewaa, 'ini 'i'amou ra'i inoni ana'ia Araha. Naasi tahingamoo'i mana here amoo'i rai 'onaai noni nara awa na'i bewaa.

⁹ 'Inia na'i 'oha gau awa na'i bewaa, na mwani mareho gai haa'i rai goro, rai odo-odo, marai ha'a-momori.

¹⁰ Moi bonasia domoi aidangisi'i taha na'ia Araha 'ai ahugoro 'ini'i.

¹¹ Abui hagu beiraau nei nara awa na'i kuhi 'anai haa'i mareho ta'a'i nara ha'ata'ai'i tahingadaa'i noni. Ma'ata moi ha'ata'inia hura'a tanaraau dona mareho narau haa'i ra ta'a'i.

¹² Gau ga'i arunga ninima moi 'anai 'unu ha'agorohi'i mareho ta'a'i nara giru'i na'i tahingadaa'i.

¹³ Ma'ata, na'i 'oha 'a marewasiraau bewaa, raigui 'ome 'irara'i mareho ta'a'i narau haa'i.

¹⁴ 'Inia na bewaa 'a ha'ata'ini'i hura'ai mwani maho. Tarana naasi ra ha'atee o'ani,

"Moi rarai nei namou mauru! Moi suruta'e baaniai mae mia Kraest 'ai marewasi'o."

¹⁵ Naasi moi 'ome'ome goro 'inia awa namou hahaa'i. Abui 'onaai noni na ai'a aidangisia ta maho, ma'ata moi 'onaai noni aidangi.

¹⁶ Na madoraa 'ini ra'i madoraa ta'a'i, naasi na mareho moi haa'i rai odo-odo tarau.

¹⁷ Moi abui bweu, ma'ata moi ha'imaania domoi sibaniai taha 'ia Araha na 'irisia domoi haua.

¹⁸ Abui gono 'anai bweu 'inia waini bweu, 'inia 'ai ha'ata'ai'i tahingamu. Ma'ata 'oi wate'o haari'o tanaai Hi'ona Maea maai marungiai tahingamu hako.

¹⁹ Ma na'i 'oha moi goni na'i ta'i dora, moi gana ha'aasaa God suri'i tahingamoo'i 'ini'i Psalm, mana hymn, ma tara'i gana ro'u na Hi'ona Maea na haa'i tana'amou.

²⁰ Ma na'i atana Araha aga Jisas Kraest, moi ha'atee ha'agorohia taraua Godi Amaga 'ini'i mwani mareho hako.

Ha'ausuringa'i Tanaai Mwane

Mana Urao Ana

²¹ 'Ini 'adoma'i ha'ahoua amooua Kraest, moi mwa'emwa'e 'anai awa bahaidi heimarungi amoou hairiu.

²² 'I'amoui urao ha'iwai moi mwa'emwa'e 'anai awa bahainai heimarungi adaa'i mwane amoo'i, 'onaai mwa'emwa'e amoou 'anai awa bahainai heimarungi ana Araha.

²³ Mou haua o'asi, 'inia na mwane naasi na bwauodonai urao ana, 'ona Kraest na bwauodonai heisoi. Na heisoi naasi i abena Kraest, na 'ia Kraest na ruhasia baaniai ora-ora'a.

²⁴ Naasi 'onaai mwa'emwa'e anai heisoi 'anai awa bahainai heimarungi ana Kraest, 'a o'asi ro'u bei'amoui urao ha'iwai, moi mwa'emwa'e 'anai awa bahainai heimarungi adaa'i mwane amoo'i.

²⁵⁻²⁶ Mi'amoui mwane ha'iwai, moi ta'ahi'i urao amoo'i 'onaia Kraest na ta'ahiai heisoi. 'A wateai tahingana 'anai mae 'inigia neina gai ha'i

noni ana'i, ma ro'u 'anai ha'a-wadiwadigia baaniai ora-ora'a. 'A ha'a-wadiwadigia 'iniaai wai ni bwareomaea mana ha'atee ana.

²⁷ 'A mae 'anai waia mai heisoi tanaa haaria 'onaai sae na wainai urao na 'ome ha'agorohia di'u. 'A mae neina ni heisoi 'ai awa maea maai odo-odo, mai abu ta ta'i maho ta'aa nai awa na'iei.

²⁸ Ma o'asi ro'u, na mwane 'ai ta'ahiai urao ana 'onaai ta'ahia ana haaria. Na mwane na ta'ahiai urao ana, 'a ha'ata'inia do'ia 'a ta'ahia haaria.

²⁹ 'A bwa'i nei 'ai 'itaa mwada'u haariai abena. Ma'ata gau ngaungau goro 'ada'i, magau taguma'i ha'agorohi'i. Ma naasi here na 'ia Kraest na haua 'anai heisoi

³⁰ 'inia 'igia ra'i aba 'iniaai abena.

³¹ Na Usu-usu Maea 'a o'ani, "Iniasi na mwane 'ai nugasia amana mea inana ma'ai hagu beiai urao ana. Ma 'iraruasi rarugui 'onaai ta'i abe."

³² 'E kae 'ado'ado na bainihu na'i raronai ha'atee naasi. Nau 'iraraa do'a hadanga'inia Kraest mana heisoi.

³³ Mana ha'ateesi 'a 'ari tana'amou ro'u. Naasi, 'adonai mwane ha'iwai 'ai ta'ahiai urao ana 'onaai ta'ahia ana haaria, mana 'adonai urao ha'iwai 'ai 'adoma'i ha'ahouai mwane ana.

6

Ha'ausuringa'i Tanaai Gare

Mana Ina Mana Ama

¹ 'T'amoui mwane gare hako, naani here na odoni 'anai suria. Moi araisuri'i amamoo'i mana inamoo'i, suria 'i'amou 'iaana'ia Araha.

² Na 'etanai ha'atora beiai duruduru 'a o'ani, "O'i 'adoma'i ha'ahoua amamu mea inamu,

³ ma naasi 'oi awa orea na'i marewanani mana mwani maho rai goro tana'o."

⁴ 'T'amoui ama, moi abui haa'i here 'anai ha'ataesu'a'i gare amoo'i. Ma'ata moi ha'a-odoodo'i mamoi ha'ausuri'i suriai hei'irisina Araha.

Ha'ausuringa'i Tanaraaui Slev

⁵ 'T'amoui slev, moi araisuri'i mamoi 'adoma'i ha'ahou'i bwauodo amoo'i namou tau'aro tanaraau na'i marewanani. Moi araisurirau beiai 'adoma'i na goro 'onaai araisuria amooia Kraest.

⁶ Abui tau'aro wetewete moi na'i madoraa narau 'ome'ome do neina rai taeni'o. Ma'ata na'i baaniai tahingamu hako, 'oi tau'aro 'onaai sae tatau'aro tanaa Kraest na'o raba araisuria tarau i hei'irisina God.

⁷ 'O'i hauai tau'aro amua ha'i wa'ewa'e ma'oi tau'aro 'onaa do'o tau'aro tanaa Araha, ai'a tanaai noni.

⁸ Mamoi 'iraraa do'ia Araha 'ai taharirau nei ra tau'aro goro, rei'uaa 'ia 'e slev ma'ua ai'a.

⁹ Mi'amoui bwauodo 'ada'i slev, moi here ha'agorohi'i ro'u sae tatau'aro amoo'i. Moi abui ha'atee ha'a-mama'usirau 'anai ha'a-mama'airau. Mou aidangisia do 'i'amou hako, 'e ta'i bwauodo moi namou to'oraa na'i aro, mana heita'ahi ana God tana'amou hako, 'a ta'isada moi.

Hei'oi Beia Saetan

¹⁰ I maho hahako nau raba 'unua naani. 'Iniai hagu amoo beia Araha, moi ura baabau ara'a beiai mena ana na wetewete.

¹¹ 'O'i ha'aagauhi'o haari'o 'ini'i mwani taura'i ni hei'oi na 'ia God na haa'i tana'o, mai mwada'u tana'o 'anai taatahi bwarasi'o baani'i mwani ha'aradorado ta'a'i ana'ia Saetan.

¹² 'Inia 'igaau gau ai'a hei'oi beiai noni ni marewanani, ma'ata gau hei'oi beia Saetan mana mena ana. Ha'amomori, gau hei'oi bei'i adaro mana bwauodo adaa'i nara heimarungi na'i marewanani na awa na'i kuhi.

¹³ Tarana naasi 'oi ha'aagauhi'o haari'o 'ini'i taura'i ni hei'oi na 'ia God na haa'i tana'o. Neina 'onaa na maeronga 'ai boi 'anai here ha'ata'ai'o, i'oe 'oi wetewete 'anai ura bwarasia. Ma na'i 'oha nai hakoi hei'oi, i'oe 'oi ura baabau mau.

¹⁴ 'Oi ura baabau beiai ha'ausuringa'i na ha'a-momori. 'Ai 'onaai rorowa'a na'o roro garia 'iniaai wa'amou, mana awaha odo-odo 'ai 'onaai to'oni baabau na'o ho'osia 'anai hei'oi.

¹⁵ Mana ha'aagau na'oi haua 'anai taroha'iniaai Taroha Goro 'abaiai hagu goro aho'i agaau beia God, 'ai 'onaai sandol na'o siri suri'i 'anai hei'oi.

¹⁶ Na hinihinimu beia Kraest 'ai 'onaai taatahi na'o taatahi bwarasi'o 'inia baani'i higai omo ngarungaru nai hanaasi'o 'ini'i a Saetan.

¹⁷ Mana mena ni ha'atahi ana God tana'o 'ai 'onaai didimaa hau 'anai ha'abwarasiai bwaumu. Ma'oi dauai ha'atee ana God 'onaai naihi na haa mai Hi'ona Maea.

¹⁸ Mei suri'i mwani mareho 'isi, moi ha'arahesi tarau na'i mena anai Hi'ona Maea mamoi ha'angonia God 'iniaai hei'a'auhi ana. Moi 'ome'ome goro mamou abui maemae'a 'anai ha'arahesi 'a'auhiraau noni ana'ia God.

¹⁹ Moi ha'arahesi 'a'auhiau ro'u mia God 'ai ha'a-aidangisiau 'iniaai taha nawai maani'i na'i madoraa nawai taroha'iniaai Taroha Goro. Ma naasi 'au bwa'i mamaa'u 'anai ha'a-aidangisiraau noni 'iniaai taha na bainihu ga'u na'i rarona.

²⁰ 'Ia Kraest 'a 'ome sigihiau 'anai taroha'iniaai Taroha Goro naasi. Tarana naasi nara gaasiau 'inia na'i rumaniho'o. Naasi moi ha'arahesi mawai abui mamaa'u 'anai taroha'inia ro'u i Taroha Goro 'ini, 'onaai ga'i haua agua.

Ha'atee Wa'ewa'e Ha'ahako Ana Pol

²¹⁻²² 'Inau wai ha'ataaria woua Tikikas tana'amou, i do'oragaau na'i Kraest nagau ta'ahia. 'Iia 'e noni tatau'aro goro na mangudi na'i tau'aro ana Araha. 'Iia naigui maani'i tana'amoui mwani mareho ra to'o tana'ameu na'i awa nameu haa na'ini mamougui aidangisiai awa nameu haua. Naasi tarana nau ha'ataaria wou 'iniasi, ma ro'u do 'anai ha'a-o'ori'i 'adoma'imoo'i.

²³ Mau ha'angonia Godi Amaga mea Araha aga 'ia Jisas Kraest, 'ai ha'a-awagorohi'amoui noni hinihini. Ma'ai 'a'auhi'amou mamoi ta'ahi'amou hairiu goni beiai hinihini beia Kraest.

²⁴ Mau ha'arahesi mia God 'ai ha'agorohi'amou hakoi nei mou ta'ahia taraua Araha aga 'ia Jisas Kraest.

Na Usu-usu Ana Pol Tanaraaui Noni Hinihini Na'i Pilipae

Gere Mamaani 'Iniai Bukani

'E taha na 'oi nugasia 'anai suria Kraest? 'A 'ua? 'O'i nugasiai urao amua ma'ua mwane amua ma'ua gare amu'i? 'A 'ua? 'O'i nugasiai ha'a-ororiu'o nara hauai sae? 'O'i nugasi'i ha'a amu'i mana tau'aro amua, ma'ua tahitahi goro na'o haa na'i marewana?

'Ia Pol 'a nugasi'i hako i mwane mareho 'isi 'anai suria Kraest. 'Ia Pol 'a hura'a mai baaniai burunga na 'iraaui mwane sae hako rau wana bo ta'eha 'inia. 'Iia 'e sae na ara'a na'i skuru ahaaha me 'iia 'e ta'i sae nara ha'ahoua suri'i 'ado rumani ha'arawesi adaui Jiu.

Mana'i madoraa na 'ia Pol 'a watea haraaria tanaa Jisas, 'iia 'a mamarota'i ha'ausuri na'i aba 'ada'i ringeringe adaa'i Jiu. 'Iraaui Jiu raugu ai'a ha'ahoua'a, mia Pol 'a aidangisia do ni mwane mareho nara wana bo ta'eha 'ini'i ra'i mareho haari'i moi. Hoita, na'i 'oha na taraawa'a ha'ausuriraui noni 'inia Jisas, rau rohoa marau norata'aia.

'Ia Pol 'a hauai usu-usu tanaraau noni hinihini na'i Pilipae ma 'unua tanaraau do ai'a ta mareho'a ro'u naigui goro tari 'onaai hei'irara'i na haua beia Jisas. Ni huunai 'ado'ado na to'ora na'i tahingana, naasi 'anai 'iraraa ha'agorohia Jisas, ma do 'anai 'onaaia. 'Ia Pol 'a nugasi'i hako i mwane mareho 'anai ha'ato'oai 'ado'adosi.

'E taha na 'o raba haua na'i tahitahi amua na'i marewanani? 'O raba 'iraraa ha'agorohia Jisas 'onaaia Pol ma'ua 'o raba ha'a-wa'ewa'e'o moi haari'o? Na'i 'oha na 'oi 'oha'i na'i Buka Pilipae 'oi wai'ado'ado suriai taha na 'oi matai haua 'anai 'iraraa ha'agorohia Jisas ma 'anai tau'aro tanaa.

¹ 'Inaua Pol beia Timoti namiri tatau'aro tanaa Jisas Kraest, miri haua i usu-usuni tana'amou hako i noni ana'ia God namou hinihinia Jisas Kraest na'i 'omaai Pilipae. Ma ai'a do tana'amou moi, mei tana'amou ro'u i na'otara mi'amou i nei mou 'a'au suri'i tatau'aro ni heiso'i na'i 'omaasi.

² Ma miri ha'arawesi do'ia God i Amaga, mia Araha aga, 'ia Jisas Kraest, rarui ha'agorohi'amou mararui ha'a-awahi'amou goro.

Ha'arawesi Ana Pol

³ 'Au ha'atee ha'agorohia God tarau 'ado 'oha nau 'adoma'ini'amou.

⁴ Mau honu 'inia i wa'ewa'e 'ado 'oha nau ha'arawesi 'ini'amou.

⁵ 'Au wa'ewa'e 'ini'amou 'inia i 'a'au amouu 'anai taroha'inia i Taroha Goro mau mai na'i madoraa mou taraawa'a hinihinia Jisas Kraest ma tari mai 'ohani.

⁶ Mau 'iraraa ha'agorohia do na tau'aro goro God na taraawa'ana bei'amou 'ai 'ari daara'i tari 'oha naigui agaau, na'i dangi 'ia Kraest 'ai aho'i mai.

⁷ 'A arari do 'au ga'i wa'ewa'e 'ini'amou o'asi, suria 'au ta'ahi'amou di'u mi'amou hako mou 'a'au na'i tau'aro God na banea tanagia. 'T'amou 'a'auhiau na'i madoraa nau taatahi bwarasiai Taroha Goro mau ha'ata'inia tanaraaui noni i ha'a-momori ana, rei'uaa na'i 'oha nau awa i rumaniho'o ma'ua awa dadara'a.

⁸ 'Au kae tarisi'amou di'u 'inia 'au ta'ahi'amou 'onaai ta'ahi'amou ana Jisas Kraest. 'Ia God na 'iraraa 'onaa 'au ha'a-momori ma'ua ai'a.

⁹ 'Au ha'arawesi dona heita'ahi amouu 'ai raha hanehane ara'a beiai huunai aidangi,

¹⁰ neina moi matai sigihiai maho na odo-odo. Naasi mougui wadiwadi baaniai ora-ora'a mara bwa'i sadoia ta maho narai hiiri'amou 'inia na'i madoraa Kraest 'ai aho'i mai.

¹¹ 'Au ha'arahesi mi'amou moi hau'i mwani maho goro nara odo-odo 'inia i hei'a'auhi ana Jisas Kraest, mana mwani inoni rai ha'aasaa marai ha'atee ha'agorohia God 'inia.

Rongomaata'i 'A Ha'agorohiai Tatau'aro

¹² Arai do'ora mana asimee'i na'i Kraest, 'au 'irisia domoi 'iraraa i madoraa bwara nau siri na'iei 'ohani, 'a 'a'auhiau 'anai taroha'iniai Taroha Goro.

¹³ 'Iraau na hehei'oi narau 'omesuriai ruma anai Mwaeraha adaui Rom miraaui tara'i sae ro'u 'ini, rau aidangisia do 'inau 'au awa na'i rumaniho'o 'iniai tatau'aro nau haua tanaa Kraest.

¹⁴ Ma 'inia i awa agua na'i rumaniho'oni, 'a rago i noni hinihini nau ha'a-wetewetea i hinihinidaau beia Kraest. Raugu ai'a mamaa'u'a 'anai taroha'inia hura'ai Taroha Goro na boi baania God.

¹⁵⁻¹⁷ 'Io, tara'i nei ra taroha'inia Kraest beiai ahugoro na'i tatau'aro adaui. Rau ta'ahiau 'inia rau aidangisia do'ia God na 'ome sigihiau 'anai ha'ata'inia i ha'a-momori na haua i Taroha Goro. Ma'ata, 'a ha'a-momori do ra'i nei ra taroha'inia Kraest 'inia ra kakawa 'omesiau marau rabasia moi do 'iraui sae hinihini rai suriraaui. Rau ai'a to'oraai huunai 'ado'ado 'anai heitaroha'i, 'inia rau raba ha'a-ororiuraui moi haariraaui. Rau haua o'asi dorai ha'a-arungata'aiu 'oha nau awa na'i rumaniho'o.

¹⁸ Ma'ata ai'a 'ua! Maho moi na ororiu, 'iraui hako rau taroha'iniai Taroha Goro 'inia Kraest. 'Inau wa'ewa'e moi, rei'uaa tara'i nei ra ai'a to'oraa ma'uasi ra to'oraai huunai 'ado'ado 'anai heitaroha'i.

Na wa'ewa'e agua 'ai 'ari daara'i,

¹⁹ 'inia 'au aidangisia dona ha'arahesi amoo'i 'iniau mana hei'a'auhi anai Hi'ona Maea ana Jisas Kraest 'ai ha'ahura'ahiau dadara'a baaniai rumaniho'o.

²⁰ 'Au rabasia mau hinihini wetewete dowai abui ninima 'anai ha'ata'inia i gorohana Kraest na'i tahingagu tanarai noni. Ma'ata, 'onaai bwane hahaua agua, 'au 'irisia dowai ramoramo 'ado 'oha 'anai ha'ata'inia, rei'uaa wai tahi ma'ua mae.

²¹ Mei tanaau, na tahi na'i marewana, naasi 'anai ha'ata'inia i gorohana Kraest, ma na'i mae 'ai haua tanaau i mareho nai goro di'u ro'u wou.

²² 'Onaa na wai awa mau, 'au ga'i hau'i mwani tatau'aro goro tanaraui noni. Ma 'au ai'a 'iraraa 'i nei he'ua na goro. Tahi ma'ua mae?

²³ Na 'adoma'igu 'a heiruarua'a. 'A goro dowai hano baaniai marewanani 'anai awa beia Kraest na'i aro, 'inia i tahingasi 'a goro di'u ro'u wou.

²⁴ Ma'ata, 'a ororiu ro'u dowai awa mau bei'amou 'anai 'a'auhi'amou.

²⁵ Mau aidangisia do neisi 'a ororiu di'u. Naasi, 'au aidangisia dowai awa mau bei'amou 'anai 'a'auhi'amou mamoi 'u'uria taraua Kraest beiai wa'ewa'e na'i hinihinimoou.

²⁶ Ma na'i 'oha wai aho'i mai bei'amou, moigui huunai ha'atee ha'agorohia Jisas Kraest 'iniai awa aho'i agua bei'amou.

²⁷ Maho na ororiu na moi 'iraraa, dona awangamou 'ai suriai ha'ausuringa'i anai Taroha Goro 'inia Jisas Kraest. Ma naasi, rei'uaa wai ataha wou bei'amou ma'ua bwa'i, wai rongoa do 'i'amou mou ura baabau na'i ta'i 'ado'ado, mamou tau'aro goni 'anai 'a'auhirai noni 'anai hinihiniai Taroha Goro.

²⁸ Moi abui mamaa'usiraaui nei nara ura bwarasi'amou marai 'ome 'iraraa do 'ia God 'ai ha'a-ai'araui me 'i'amou 'ia God haaria nai ha'atahi'amou.

29 'T'amou 'ia God 'a ha'awate'amou 'anai hinihinia Kraest, ma ha'awate'amou ro'u 'anai rongomaata'i 'inia.

30 'Oha nau awa bei'amou ani, mou 'omesiai tau'aro raha nau haa 'anai taatahi bwarasiai Taroha Goro. Ma na'i 'ohani mou rongoa do 'au tau'aro raha ro'u mau 'anai taatahi bwarasia. Hoita, mau 'iraraa do na'i 'ohani 'i'amou mou haua o'asi ro'u.

2

Suriai Barongana Kraest

1 'A 'ua? Ni hagu agaau beia Kraest 'a matai ha'a-o'ori'i 'adoma'igaa'i? 'A 'ua? Ni heita'ahi ana 'a matai ha'a-aro'i ahugaa'i? 'A 'ua? Gau hagu beiai Hi'ona Maea? Ma 'ua? Gau matai ta'ahiraau mana 'a'auhiraau noni?

2 Ma 'onaa na o'asi, moi ahu aratara mamoi ta'ahi'amou hairiu. Moi ha'i ta'i na'i ahumoo'i ma na'i 'adoma'imoo'i 'anai 'adoma'i aratara, mawaigui wa'ewa'e di'u 'ini'amou.

3 Abui haa'i maho dorai ha'a-ororiu'o 'ini'i, ma'ua haa'i mareho moi beiai ahu ha'a-ta'eta'e. Ma'ata 'oi ha'a-anoano'o haari'o ma'oi 'adoma'iniraau noni hako ra ororiu baani'o.

4 Abui 'adoma'i ororiu moi 'ini'i mareho na'o 'irisi'i haari'o. Ma'ata 'oi 'adoma'ini'i ro'u i taha nara 'irisi'i noni 'etea.

5 Na 'adoma'imoo'i mana awangamoo'i 'ai 'onaai 'adoma'i mana awahana Kraest.

6 Rei'uaa 'iia 'a ta'isada beia God,
me'iia ai'a bonasia do 'ai ura baabau na'i ta'isada na haua beia God.

7 Ma'ata 'a ha'a-anoanoa haaria 'onaai noni tatau'aro.

'A huta ha'i noni

ma boi na'i marewana 'onaai sae haaria.

8 'A ha'a-anoanoa haaria

ma araisuria God tari mae,

'a mae 'onaai sae hehere ta'aa na'i dadaahoro.

9 Tarana naasi, 'ia God 'a ha'a-suruta'ea ara'a ma nugaa na'i dora na ororiu,
ma haua tanaa i ata na ororiu baani'i hako i mwani ata.

10 Ma na'i atana Jisas 'adonai nei rai topira'i ruru tanaa,

'iraau nei na'i aro mana ano,

ma na'i dora adaa'i nei ra mae'a.

11 'Iraau hako rai ha'arangasia hura'a do'ia Jisas Kraest na Araha

marai ha'atee ha'agorohia God i Ama.

Hauai Taha God Na 'Irisia

12 Naasi arai noni agu'i, moi bonasiai araisuria God beiai ha'ahou suriai herehere na arariraau nei na 'ia God 'a bwani ha'atahiraau baaniai ora-ora'a. 'Onaa araisuriau amoo na'i madoraa nau awa bei'amou ani, mou abui agoheta'i araisuriau ro'u mau rei'uaa nau ai'a awa bei'amou.

13 'Ia God na tau'aro na'i ahumoo'i, 'ai ha'a-mwa'emwa'e'amou mai 'a'auhi'amou 'anai suriai hei'irisina.

14 Moi abui heitohetohe ma'ua hei'unu'unu suri'i mwani maho moi haa'i.

15 Naasi moigui wadiwadi baaniai ora-ora'a mara bwa'i sadoia ta maho narai ha'ahuni'amou 'inia. Rei'uaa mou awa 'uruhadaau noni nara awa na'i kuhi mana ora-ora'a, 'i'amou moigui awa 'onaai ra'i garena God mana tahingamoo'i rai goro na bwa'i ta'aa nai awa suri'i. Na tahingamoo'i rai rara na'i 'uruhadaau 'onaai'i hee'u nara rara dio baaniai aro na'i kuhi,

16 'oha moi haua tanaraau taroha rai tahi 'ini'i. 'Onaa 'ai o'asi, 'inau wai wa'ewa'e 'ini'amou na'i 'oha Kraest 'ai aho'i mai, suria na tau'aro raha nau haua, ai'a 'ari pwaranga.

17 Na tatau'aro mana hinihinimoou 'a 'onaai ho'asi namou watea tanaa God. Ma 'onaa narai ha'amaesia, na tahingagu 'ai 'onaai ho'asi nara nuga gonia beiai ho'asi amoo. 'Onaa 'ai o'asi, 'inau wai wa'ewa'e goni bei'amou.

18 Mi'amou mou ga'i wa'ewa'e ro'u 'inia beiau.

Timoti Mea Epafrodaetas

19 'Onaa 'ai suriai hei'irisina Araha aga, 'ia Jisas Kraest, 'a bwa'i orea mawai ha'ataaria'a woua Timoti 'anai garihi'amou, neina 'ai wa'ewa'e 'i 'adoma'igu 'oha wai rongoa ta taroha goro 'ini'amou.

20 Ai'a tanei ro'u 'aigui 'adoma'i ororiu ma'ua ta'ahi'amou 'onaaia Timoti. 'Iia 'a 'adoma'i raorao 'ini'amou dona mwani mareho rai 'ari goro tana'amou.

21 'Iia ai'a 'onaa mwani nei nara 'adoma'i raha moi 'ini'i hei'irisidaa'i marau ai'a bonasiai aidangisiai hei'irisina Jisas Kraest.

22 T'amou mou bwane aidangisiai barongana Timoti. 'Iia 'a tau'aro beiau 'anai taroha'iniai Taroha Goro, ma 'onaa gare na 'a'auhia amana.

23 Hoita, na'i madoraa wai 'omesiai taha nai to'o tanaau, 'au rabasia do waigu ha'ataaria wou.

24 Mau hinihini wetewete do 'a bwa'i orea mia Araha 'ai wateau 'anai ataha mau wou bei'amou.

25 I do'oragaaua Epafrodaetas namou ha'ataaria mai 'anai 'a'auhiau ani, nau 'adoma'inia dowai ha'ataaria aho'i 'ariwou bei'amou na'i na'o. 'Iia 'a tau'aro beiau ma 'a'auhiau 'anai ura bwarasiraau maerongagaa'i.

26 'Iia 'a 'adoma'ini'amou ma kae raba 'omesi'amou. 'Iia 'a 'ado'ado raha 'ini'amou 'iniai rongoa amou i daoha na haa.

27 Ha'amomori, na daoha na haa 'a gaarangi maesia. Ma'ata, 'ia God 'a ahu ta'ahia ma ha'agorohia aho'i. Ma ai'a do 'iia moi, 'iia 'a ahu ta'ahiau ro'u. 'Inia 'onaa 'a ga'i mae, ni ahutotou nawai haua 'ai raha di'u baaniai na'o.

28 Naasi 'au 'adoma'i raorao 'anai ha'ataaria aho'i wou mamoi wa'ewa'e 'oha moi 'omesia aho'i, minau wai abui 'ado'ado raha di'u'a 'inia 'onaa na'i na'o.

29 Na'i 'oha nai aho'i wou, moi wa'ewa'e 'inia mamoi ha'amaotoa 'onaa do'oramou beia Araha. 'A goro 'anai ha'ahou'i noni o'asi,

30 'inia 'iia 'a gaarangi mae 'oha na tau'aro tanaa Kraest. 'A siri na'i maemaeha 'inia i 'a'au na haa tanaau 'ini'amou, 'iniai awa ha'atau amou.

3

Odo-odo Na'i Maana God

1 Arai do'ora mana asimee'i na'i Kraest, moi wa'ewa'e 'iniai hagu amou beia Araha. Ai'a 'ua moe'a tanaau 'anai 'unu aho'isi'i taha nau bwane 'unu'i tana'amou, 'inia na'isi taatahi 'ada'i hinihinimoo'i.

2 Mou 'omesuri'amou baaniraau i nei nara 'unua dogai dauai ringei aha ha'ara 'anai ha'i noni ana'ia God. Na barongadi ra 'onaa boo wasi nara sibania moi hau'i here ra ta'a'i.

3 Gau 'iraraa do 'igaau naasi huudi noni ana'ia God. 'Inia rei'uaa nagau ai'a aha ha'ara, na Hi'ona Maea 'a awa na'i raroga ma 'a'auhigia 'anai ha'arahesia God. Gau wa'ewa'e 'ini'i maho na 'ia Jisas Kraest na hau'i tanagaau magau ai'a 'u'uriai maho nagau hau'i haarigaau 'anai ha'i noni ana'ia God.

4 'Inau 'e ta'i 'iniraau nei nau ga'i 'u'uri'i taha nau haa'i haariau, mau ga'i di'ua ro'u atei na matai haua o'asi. 'Inia 'inau 'a tarana do 'au ga'i haua o'asi.

5 'Inia 'inau 'e ai Jiu baaniai burungana Benjamin. Na wauwa agu'i ra'i ai Jiu, tarana naasi 'inau 'e huunai Jiu. 'Inau 'au dauai ringei aha ha'ara na'i warunai dangi murinai dangi nau huta. Minau ha'isuri'i goro i ringe amee'i, 'inia 'inau 'e ta'i 'iniraau Farisei nameu taguma'ini'i goro i ringe.

⁶ Minau 'au dau baabau suri'i ringe amee'i do 'ia God 'ai ahugoro 'iniau. Tarana naasi nau ha'a-mama'airau 'inia i nei rau suria Kraest. Mana 'adonai herehere mana ringeringe amee'i Jiu, 'au ha'isuri'i hako. Ma bwa'i nei nai ha'ahuniau do'au horosia ta nei.

⁷ Na'i na'o nau 'adoma'inia doni mareho 'isi ra'i mareho goro. Me na'i 'ohani, 'au hinihinia Kraest, mau aidangisia dona mwani mareho 'isi, ra'i mareho haari'i moi.

⁸ Ha'amomori! Na'i 'ome riaria nau haa, 'au sadoia doni mwani mareho nau haa'i na'i na'o, ra'i mareho haraari'i moi. Mana mareho na ororiu di'u, naasi 'anai aidangisia goro i Araha agua, 'ia Jisas Kraest. Me tarana 'inia 'iia, na mwani mareho 'au nugasi'i hako mau 'adoma'i mara ha'aro'a moi 'ini'i neina 'inau wai aidangisia Kraest

⁹ mawai ha'i ta'i beia. Ma naasi, ai'a 'iniai suria agu'i ringe amee'i Jiu nau odo-odo 'inia na'i maana God, ma na'i moi hinihinigu beia Jisas Kraest.

¹⁰ Taha nau 'irisia, naasi do 'inau wai aidangisia goro a Kraest mana mena na ha'a-suruta'ea aho'i 'ai awa beiau. Mau 'irisia wai rongomaata'i 'onaai rongomaata'i na haa mawai 'onaia na'i mae ana.

¹¹ Ma naasi nau 'adoma'inia dowai suruta'e aho'i ro'u baaniai mae 'onaia.

'Eba Tari Ha'a-rosina

¹² Mau ai'a 'unua do 'inau 'au aidangisia hako a Kraest ma'ua 'au tari mau na'i dora na 'ia God na 'irisia dowai tari iei. Ma'ata 'au bonasia do 'inau wai tari 'isi, 'inia naasi tarana na 'ome sigihiau 'inia.

¹³ Arai do'ora mana asimee'i, nau ai'a 'adoma'inia mau do'au ataha'a. Ma'ata ni here nau haa, 'a 'onaai sae na 'eba hei-ohoho. Nau ai'a 'adoma'ini'i mwani maho na'i murigu, ma'ata 'au bonasia i ataha na'i dora nau ai'a ataha mau na'iei.

¹⁴ 'Au bonasia dowai dauai heitahari, 'onaia nei na 'eba hei-ohoho. Ma naasi nagua heitahari, 'ia God 'ai soiau ara'a i aro 'iniai hinihinigu beia Jisas Kraest.

¹⁵ Ma 'igaau i nei na hinihinigaau 'a wetewete, 'a goro dogai to'ora i ta'i 'ado'ado 'ini'i mareho 'isi. Ma 'onaa 'ia tei na ai'a 'adoma'i aratara beiau 'ini'i tara'i mareho, 'ia God 'ai ha'ata'inia tanaa dona mareho 'isi ra ha'amomori.

¹⁶ Rei'uaa, taha na ororiu naasi, 'anai awa suriai mareho God na bwane ha'ata'ini'i tanagia.

¹⁷ Arai do'ora mana asimee'i, moi ha'isuriai awangagu mamoi ha'isuria ro'u atei na awa suriai ha'ausuringa'i nameu haua tana'amou ani.

¹⁸ 'Au ha'atee o'asi, 'inia ra ragoi nei nara here 'onaa do rau hinihinia Kraest, mana barongadaa'i ra ai'a goro. 'A ha'ata'inia do rau ura bwarasiai tarohanai mae ana Kraest na'i dadaahoro miraaui ra'i maerongana ro'u. Nau bwane taringai 'unua ga'u tana'amou, mawai 'unua ro'u tana'amou beiai ahutotou.

¹⁹ Nei ra o'asi, rai sadoia nadaau i mae tarau, 'inia na hei'irisi 'anai abe narau 'adoma'i ororiu 'inia. Na mareho narau ga'i ninima 'inia i haa'i, naraugu ha'apa'o 'ini'i. Marau 'adoma'i riu moi 'ini'i mareho ni marewana.

²⁰ Migaau ra'i noni auhenua anai aro, magau toteri ha'i wa'ewa'e 'inia i aho'i ana mai Ha'atahi, 'ia Araha aga, Jisas Kraest.

²¹ Ma na'i madoraasi, na abega na maemae'a moi ma 'ome ta'aa, 'ai orisia maai 'onaai abena na hauasa. 'Ai orisi'i abegaa'i 'iniai mena ana na marungi'i 'ini'i mwane mareho hako.

4

Pol 'A Ha'abasuraau Noni Hinihini

¹ Arai do'ora mana asimee'i, 'au tarisi'amou mau ta'ahi'amou di'u. Mou ha'a-wa'ewa'eau minau ha'atee ha'agorohia God 'ini'amou. Naasi, moi ha'isuri'i mareho nau 'unu'i 'isi neina moi ura baabau na'i hinihinimoo beia Araha.

² Mau ha'a-ta'u'u'amurua rua urao, i'oe a Iuodia mea Sinidiki, murui ha'arataraa i haiu'au'a na to'o na'i ahoaamurua ma murui 'adoma'i aratara, 'inia murua muru suria hako Araha.

³ Mau ha'angoni'o mo'o no'o mangudi 'anai tatau'aro beiau ani, 'oi 'a'auhirarua, 'inia rarua raru tau'aro 'a'auhiau 'anai taroha'iniai Taroha Goro. Ma ai'a do 'irarua moi rua uraosi nararu 'a'auhiau, miraau ro'u tara'i nei beia Klemen. 'Iraau na atadaa'i ra awa na'i buka nara usu'i atadi nei rai dauai tahi tarau.

⁴ Moi wa'ewa'e tarau 'iniai hagu amoo beia Araha. Mawai 'unua ro'u, moi wa'ewa'e!

⁵ Moi awa 'abenga'i beiraa hako i noni, 'inia Araha 'a gaarangi mai boi.

⁶ Abui ta'aa i 'adoma'imoo 'ini'i mwani maho. Mei suri'i mwani maho mou siri suri'i, mou ha'arahesia God. Mou ha'angonia 'ini'i taha mou 'irisi'i mamou ha'atee ha'agorohia ro'u.

⁷ Ma naasi 'ia God 'ai ha'apapaku'i 'adoma'imoo'i mana ahumoo'i nara torakoke, 'iniai 'u'uria amoo a Jisas Kraest. Mana herengana God 'anai ha'apapaku'i 'adoma'igaa'i 'a bwarai aidangi tarihana.

⁸ Mana maho hahako, arai do'ora mana asimee'i, 'a goro domoi 'adoma'ini'i tarau mareho 'ini. Moi 'adoma'inia tarau i maho na ha'atomori ma arari 'anai ha'ahoua, i maho na odo-odo ma wariwari baaniai ora-ora'a, mana maho na goro, mana maho na mwani noni hako ra 'adoma'i ha'agorohia.

⁹ Moi ha'isuri'i ha'ausuringa'i nau hau'i tana'amou ma moi hau'i ro'u mareho mou rongo'i nau 'unu'i ma mou 'omesi'i nau haa'i. Ma naasi 'ia God na ha'apapaku'i 'adoma'imoo'i nara torakoke 'ai awa bei'amou hako.

Ha'atee Ha'agorohi Ana Pol

¹⁰ 'Au wa'ewa'e di'u mau ha'atee ha'agorohia Araha 'ini'amou. 'Inia rei'uaa na gere ore'a, mou ha'ata'inia ro'u i 'adoma'i ororiu namou haua 'anai 'a'auhiau. 'Au 'iraraa moi do 'i'amou mou 'adoma'i ororiu 'inau, magu ai'a madoraa tana'amou 'anai 'a'auhiau.

¹¹ 'Au ha'atee o'asi, ai'a do'au 'irisi'i tara'i mareho baani'amou. Rei'uaa nau ai'a to'ora mareho, 'inau matanga'i awa na'i 'uruhadi mwani tahinga hehe'ete'i o'asi, mana mareho nau to'ora'i ra aro'a 'iniai ahugu.

¹² 'A matanga'i aro'a i ahugu, rei'uaa na mwani maho ra he'ua tanaau. Rei'uaa nau pohara ma'ua toto'ora, rei'uaa nau awa hihioro'a ma'ua 'au masu, rei'uaa nau to'ora mareho arari ma'ua na ai'a.

¹³ Beiai wetewete na'ia Kraest na haua tanaau, 'inau 'au matai awa suri'i mwani tahinga he'ete'i hairiu.

¹⁴ Ma'ata 'a goro i 'a'auhiau amoo na'i madoraa nau bwara o'ani.

¹⁵ 'I'amou noni hinihini na'i Pilipae, mou 'iraraa na'i madoraa nau awa bei'amou na'i Provensi Masidonia 'anai taroha'iniai Taroha Goro tari 'oha nau hura'a, ai'a ta ruruha i noni hinihini ro'u nai 'a'auhiau. 'I'amou moi namou 'a'auhiau na'i aba 'anai ha'a 'iniai tatau'aro agua.

¹⁶ Mamou taringai 'a'auhiau'a na'i awa nau haa na'i 'omaa i Tesalonaeka.

¹⁷ 'Au ha'atee o'asi, ai'a do'au 'irisi'i tara'i mareho ro'u baani'amou, me 'au 'irisia do 'ia God, 'ai tahari'amou 'iniai tau'aro goro amoo.

¹⁸ 'Io, na mwani mareho mou ha'ataari'i mai tanaau ani beia Epafrodaetas ra taha hako beiau. Mana hisu mou hau'i tanaau ra rago arari, ma ai'a ta mareho nawaigui pwapwaku 'inia. Na hisu mou haa'i ra 'onaai ho'asi na si-si'ini goro na 'ia God 'a ahugoro 'inia.

¹⁹ Na mwane mareho hako, 'iaana'i a God nau tau'aro tanaa. Naasi, mana mareho na ta'isada do'oi to'ora'i, 'ai haa'i tana'o, 'inia hagu amua beia Jisas Kraest.

²⁰ Gau magau ha'aasaa God i Amaga tarau tarau. Amen.

Ha'atee Ha'ahako

²¹ 'Io, 'oi 'unuai ha'atee wa'ewa'e agua tanaraaui noni ana'ia God 'isi nara hinihinia Jisas Kraest. 'Iraaui noni hinihini nameu ta'i awa 'ini, rau 'unua wou i ha'atee wa'ewa'e adaau ro'u tana'amou.

²² Miraau hako noni ana'ia God na'i 'omaani rau 'unua ro'u i ha'atee wa'ewa'e adaau tana'amou. Ororiu 'ira i nei ra tau'aro tanaai Mwaeraha adaui Rom.

²³ 'Au ha'arahesi mia Araha aga, 'ia Jisas Kraest, 'ai ha'agorohi'amou hako.

Na Usu-usu Ana Pol Tanaraaui Noni Hinihini Na'i Kolosa'e

Gere Mamaani 'Iniai Bukani

'A ga'i 'ome he'ua i tahinganai sae hinihini? Na Baebol 'a 'unua tanagia do na'i madoraa nagau hinihinia Kraest, 'ia 'a awa beigia. Na'i Buka Kolosa'e 'ia Pol 'a maania taha nagau to'oraa na'i madoraa na 'ia Jisas 'a awa suri'i tahingagaa'i.

'Ia Pol 'a 'unua do na'i 'oha nagau ai'a waia Jisas mau suri'i tahingagaa'i, gau ha'atau di'u baania God. Ma'ata 'ia Jisas 'a waigia mai gaarangia God. Gau to'oraa'a i tahinga haoru mana ora-ora'a agaa'i 'a 'adoma'i nugasi'i hako. 'Ia 'a bwane ha'a-dadara'agia baani'i mwane ha'ausuringa'i ni marewana nara 'unua dogai suri'i mwani ringeringe 'anai sadoiai tahi tarau.

Ni hagu nagau haua beia Kraest 'e kae mareho raha di'u. 'Oi wana na'i bukani 'anai sadoi'i taha narai to'o na'i tahingamu na'i madoraa na'o hagu beia Jisas.

1-2 Tana'amoui noni ana'ia God na'i 'omaa i Kolosa'e namou hinihinia wetewete a Jisas Kraest. 'Inaua Pol, Ha'ataari ana Jisas Kraest 'onaai 'irisia ana God, mea Timoti, 'i do'oragaau beia Jisas Kraest, miri haua i usu-usuni. Miri ha'arahesi mia God i Amaga 'ai ha'agorohi'amou ma'ai ha'a-awa goro'amou.

Ha'arahesi Ni Ha'atee Ha'agorohi

³ 'Ado 'oha nameu ha'arahesi 'a'auhi'amou, meu ha'atee ha'agorohia Godi Amana Araha aga 'ia Jisas Kraest.

⁴ 'Inia meu rongoai hinihinia amooua Kraest mana ta'ahiraau amoou hako'i noni ana'ia God.

⁵ Mou haua o'asi, suria mou hinihini wetewete domoi dauai tahinga haoru na goro di'u na 'ia God na ha'aagaua tana'amou na'i Aro. Mana mahosi mou bwane rongoa na'i madoraa ra taroha'inia tana'amou i Taroha Goro. Na tarohasi 'a ha'a-momori

⁶ ma 'adarara hura'a suriai marewana ma ada ro'u bei'amou. Na Taroha Gorosi na orisi'i moe'asi tahingadaa'i noni. Ma naia ro'u naasi na orisi'i tahingamoo'i taraawa'a mau na'i 'oha namou bura'i rongoa mamou bura'i 'irara ha'agorohiai goro na haua God 'ini'amou.

⁷ 'Ia Epafaras, i geresae goro agaa'u na tau'aro bei'ameu, naasi na taroha'inia tana'amou tahamora i Taroha Gorosi. Me 'ia 'a mangudi 'anai tau'aro tanaa Kraest 'anai 'a'auhi'amou.

⁸ 'Ia na maania tana'ameu i heita'ahi anai Hi'ona Maea na awa bei'amou namougu taarai ta'ahiraau 'inia i noni hinihini nara awa suriai mwani dora.

⁹ Tarana naasi, taraawa'a na'i 'oha meugu rongo mamaani 'ini'amou, meu ai'a agoheta'i ha'arahesi 'a'auhi'amou. Meu ha'arahesi waiori tanaa God 'ini'amou ma 'ai ha'ata'iniai taha na 'irisia domoi haua, mamoi to'oraa'i aidangi mana madoma baania God neina moi aidangisi'i barongana'i.

¹⁰ 'Onaa nai o'asi, moi matai awa na'i tahinga na arari na'i maana Araha ma 'ai wa'ewa'e 'ini'i mwane mareho goro moi haa'i. Ma ro'u, moi aidangisia goro di'u ro'u woua God.

11 Meu ha'arahesi mana mena ana God na raha 'ai ha'ahumaratanoa'amou ma 'ai ha'a-'o'ori'amou 'anai ura baabau ha'i wa'ewa'e na'i madoraa ni rongomaata'i.

12 Meu ha'arahesi neina moi ha'atee ha'agorohia God 'inia watea ana tana'amoui noni ana'i 'anai dau'i mwani mareho na duruduru 'ini'i tana'amou i sae namoi awa na'i dora marewa ara'ai aro.

13 'Ia God 'a waigaau hura'a baaniai mena ana Saetan na marungiraau nei nara awa na'i kuhi, ma nugagia bahainai heimarungi anai garena na ta'ahia.

14 Mana garena 'a bwane 'adoma'i nugasigia ma ruhasigia baani'i ora-ora'a agaa'i 'inia 'abuna.

'Ia Kraest 'A Ahaaha

Baani'i Mwani Maho Hako

15 'Ia Kraest na aho'i ta'i noni 'a ta'isada beia God, sae 'iia 'a ai'a aho'i ta'i noni. 'Iia 'a ahaaha baani'i hakoi mwani ha'apwa'ara.

16 'Ia Kraest 'a ha'apwa'ara'i mwane mareho hako na'i aro mei ano suriai hei'irisina God. 'A ha'apwa'ara'i maho ga re'i'i mana nei ga ai'a re'i'i, 'onaai'i enjel mana mareho ra to'o mena ni heimarungi. Mwani taraani maho hako 'ia Kraest na ha'apwa'ara'i suriai hei'irisina God, neina rai ha'aasaa 'ini'i.

17 'Ia Kraest 'a awa'a maragu pwa'ara ro'u i mwane maho hako, 'iia na daugoni'i.

18 'Iia naasi na bwauodonai heisoi, mana heisoi naasi na 'onaai abena. 'Iraau sae ni heisoi rai dauai huunai tahi baania, 'inia 'iia naasi nei tahamora na tahi aho'i baaniai mae nagu bwa'i mae'a ro'u ta'oha. 'A o'asi neina 'ai ahaaha baani'i mwane taraani maho hako.

19 Na'i 'oha na 'ia Kraest 'a boi marewana, 'a ta'isada hako beia God, 'inia naasi taha na 'ia God na 'irisia.

20 Ma ha'ahagugoni'i aho'i beia 'i mwane taraani maho hako na'i aro mei ano 'inia 'abunai garena na ahe na'i dadaahoro.

21 Na'i na'o 'i'amou mou ai'a hagu ga'u beia God. 'Tamousi mou ha'imae beia 'ini'i mareho ta'a'i namou 'adoma'ini'i mamou haa'i.

22 Mana Garena God 'a aho'ita'i noni ma mae, naia namougu hagu goni aho'i ro'u 'inia beia God. 'A haua o'asi nei namoi matai ura na'i maana 'onaai noni odo-odo na ai'a ta ta'i ta'aa nai awa beia.

23 Me ma'ata moi ura baabau na'i hinihinimoou. Moi abui 'adoma'i wanusi 'ini'i mwani mareho na 'ia God na duruduru 'ini'i tana'amou na'i Taroha Goro namou rongoa ani. Mana Taroha Gorosi ra taroha'inia ro'u 'ari suriai marewana hako. Minau Pol naasi 'e sae tatau'aro na 'ia God na sigihiau 'anai taroha'inia Taroha Gorosi.

Tau'aro Na Haua Pol Na'i Heisoi

24 Rei'uaa wai rongomaata'i 'inia tau'aro nau haua, mau wa'ewa'e moi, suria 'a 'a'auhi'amou. 'Ia Kraest 'a rongomaata'i ga'u 'anai 'a'auhai heisoi na 'onaai abena. Minau 'au mwa'emwa'e 'anai rongomaata'i o'asi ro'u 'anai 'a'auhai heisoi.

25 'Ia God 'a 'adoma'i nunuga 'inia do 'inau wai tau'aro tanaa na'i heisoi 'anai taroha'inia hakoi Taroha Goro tana'amou.

26 Na'i 'ohabwani, tarohasi 'a awa bainihu baanirau hakoi sae. Mana'i 'ohani 'ia God 'a ruhasia tanaraui noni ana'i.

27 'A haua o'asi, 'inia 'a 'irisia do 'i nei mou ai'a Jiu moi aidangisia doni taroha hauasa naasi 'a matai ha'ahonusiai tahingamoo'i 'ini'i mwani mareho goro. Mana tarohasi naia naani. 'Ia Kraest 'a awa na'i tahingamoo'i, naia namou to'oraa 'inia i 'adoma'i heimamasi 'anai awa goni beia God ara'ai Aro.

²⁸ Naasi, meu ha'arangasiai tarohana Kraest suri'i mwani dora meu ataha suri'i. Meu haua beiai ha'abasu mameu ha'ausuriraau sae hako beiai madoma, neina na'i 'oha nai boi mau, rai matai ura na'i maana God 'onaai inoni nara odo-odo'a suriai hagu adaau beia Kraest.

²⁹ Tarana naia nau tau'aro wetewete 'inia beiai mena na haua Kraest tanaau.

2

¹ 'Au rabasia domoi aidangisiai tau'aro raha agua 'ini'amou me 'iniraa ro'u i sae ni heisoi na'i Leodisia beiraau nei rau ai'a re'iau mau 'onaaiamou.

² 'Au tau'aro raha o'asi 'anai ha'a-'o'ori'i 'adoma'imoo'i ma 'au rabasia domoi hagu goni beiai heita'ahi. Ma naasi, 'i'amou moi aidangi tarihana doni taroha na awa bainihu ga'u beia God 'a ha'a-momori. Mana taroha naasi 'ia Jisas Kraest.

³ 'Iia naasi mamaai tara 'anai ha'ata'inia he'ua 'anai dauai huunai madoma mana aidangi.

⁴ Nau ha'atee o'asi suria nau ai'a rabasia domoi ha'awatea tanei 'ai ha'abweu'amou 'ini'i mamaani pwari'i, rei'uaa nara rongo goro he'ua.

⁵ Rei'uaa nau ai'a awa bei'amou na'i 'ohani, ma'ata 'inau 'ado'adomou tarau. 'Au wa'ewa'e 'inia rongoa aguai awaha odo-odo amou mana ura baabau amou na'i hinihinimou beia Kraest.

Huunai Tahinga Beia Kraest

⁶ 'I'amou mou waia Kraest hako'a na'i tahingamoo'i do 'iia nai Araha amou. Naasi moi awasuria tarau.

⁷ Moi nugaai rari odomou beia, me 'iia nai ahuina i tahingamou. Moi wetewete na'i hinihinimou 'onaai ha'ausuri'amou ada, mamoi ha'atee ha'agorohia tarau 'ini'i mwani mareho goro na haa'i tana'amou.

⁸ Moi abui watea tanei 'ai rau'amou baania Kraest 'ini'i moi ha'ausuringa'i pwari'i nara rongo goro me ra matai ha'ateha'amou baania. Ha'ausuringa'i 'isi ra ai'a boi baania Kraest, me ra'i ringeringe ni marewanani moi ma'uasi ra'i mareho nara mamaani usuringa'ini'i moi sae wari.

⁹ Ra gasi pwari'i'amou, 'inia 'ia Kraest 'a to'ora hako'i barongana mana mena ana God rei'uaa na aho'ita'i sae 'onaaigia.

¹⁰ Me 'inia hagu amou beia, mwani mareho na 'ia Kraest na to'ora'i, mou to'ora'i ro'u. Moi aidangisia do 'ia Kraest 'a ahaaha baani'i hako'i mwane enjel mana adaro mana mareho ra to'o mena ni heimarungi.

¹¹ 'Oha mou rado wou beia Kraest, 'a 'onaa do mou dauai aha ha'ara. Ma'ata ai'a do mou daai aha ha'arasi baaniraau noni.* Ai'a! Me 'a 'onaa do 'ia Kraest na haai aha ha'ara tana'amou 'oha na ha'agata'ini'i hei'irisi ta'a'i amoo'i nara haua tana'amou i ora-ora'a.

¹² Na'i 'oha mou bwareomaea, 'a 'onaa do 'ia God 'a toringiai tahinga bwani amou beia Kraest mamougu suruta'e aho'i ro'u 'anai dauai tahinga haoru. 'A o'asi suria mou hinihinia i mena ana God na ha'a-suruta'ea Kraest baaniai mae.

¹³ Na'i na'o, 'i'amou mou suriai tara 'anai mae tarau, 'inia mou awa moi 'anai haa'i here ta'a'i mana ora-ora'a amoo'i ra ai'a ha'agata'ini'i mau. Me na'i 'ohani 'a 'onaa domou suruta'e aho'i beia Kraest 'anai dauai tahinga haoru, 'inia 'ia God 'a 'adoma'i nugasi'i hako i ora-ora'a agaa'i.

¹⁴ 'Ia God 'a 'onaa do'a kaiai pepa nara awa iei mwane ora-ora'a agaa'i nara ga'i hiiri ha'amaesigaau 'ini'i. 'A waa ma rabua na'i hunganai dadaahoro.

* **2:11 Aha ha'ara:** 'Oha 'iraau Jiu ra hauai aha ha'ara, ra ha'agata'iniai gere uri-uri baaniai sae mwane. Wanasia "aha ha'ara" na'i Diksonari.

¹⁵ Na'i mae na haa na'i dadaahoro 'ia Kraest 'a rahi'i mena adaa'i adaro mana mareho ra to'o mena ni heimarungi. 'A ha'a-ninimairaa na'i maadaa'i sae rago na'i 'oha na ha'ata'inia haaria do 'a ha'ahehoraau.

¹⁶ Naasi moi abui rongo suriraau Jiu narau ha'atee ha'a-ta'ai'amou 'inia ai'a suri'i amoo'i ringe adaa'i. Ringe 'onaai taha namoi ngaua mana gonohia, ma'ua ringe 'ini'i dangi hauasa adaa'i 'onaai dangi ni mamaro mana dangi 'anai ha'ahouai hura gare.

¹⁷ Ringe 'isi ra'i nunu moi 'inia huunai maho nai boi mau. I huuna naasi 'ia Kraest.

¹⁸ Tara'i sae ra ha'ausuri'amou domoi awa ano-ano 'onaairaa mamoi ha'arahesi'i enjel 'inia mauru'a'i ada tara'i mareho. Ra 'unua domoi araisuri'i mareho 'isi 'anai dauai tahi tarau. Ma'ata moi abu wate'i sae o'asi do rai pwari'i'amou, 'inia ra ha'aba'o 'ini'i moi 'ado'adodaa'i haariraau. Mou gasi bwa'i dauai heitahari amoo.

¹⁹ 'Iraau sae o'asi ra ai'a hasi beia Kraest, i bwauododaa hako sae hinihini. 'Ia na marungia hako sae hinihini ma 'a'auhigia 'anai awa goni goro 'onaai'i wawaro'i raha mana rado nara daugoni'i mwane doranai abe 'onaai ta'i. Ma 'onaa gai hasi tarau beia Kraest, 'ia God 'ai 'a'auhigia magari wetewete ara'a mai na'i talingagaa'i beia Kraest.

Kraest Na Waa Mai Tahinga Haoru

²⁰ 'T'amou 'a 'onaa doni tahinga bwani amoo 'a mae goni beia Kraest na'i dadaahoro, ma na'i 'ohani mougu ai'a awa'a na'i bahaidi ringeringe adaa'i sae nara ai'a awasuria Kraest. Naasi, 'a 'ua namougu awa 'inia 'onaai sae ahurodo na suri'i ringe nara niga'i sae na 'unua o'ani,

²¹ "Abu dauai marehoni, ma'ua abu ngauai marehosi, ma'ua abu karohi'i mareho 'isi."

²² Ringe o'asi ra'i 'ado'adodi sae moi 'ini'i mareho nagau ngaa'i mara hako raurau moi.

²³ Araisuri'i ringe o'asi 'a 'onaa do'e mareho 'anai ha'amadomaa i sae. 'Inia na nei na suri'i ringe o'asi, tara'i 'oha 'a ha'a-rongomaata'ia i abena 'anai ha'a-wa'ewa'ea God ma 'ome 'onaa do'a ta'ahia di'u ma ha'a-auruhia haaria. Ma'ata 'anai 'a'auhia 'anai awa ha'ahirihiri bwarasi'i hei'irisi ta'aa anai abe, ai'a!

3

¹ 'T'amou 'a 'onaa do 'ia God 'a ha'a-suruta'e'amou baaniai mae beia Kraest 'anai to'orai tahinga haoru. Naasi moi 'adoma'i wetewete 'anai haa'i mareho nara ha'a-wa'ewa'ea God na awa ara'ai Aro, dora na heimarungi ieia Kraest na'i aba odona God.*

² Moi nuga'i 'ado'adomoo'i suri'i mahoni Aro, abu suri'i maho ni marewana moi.

³ 'Inia 'a 'onaa domou bwani mae'a, mana sae na mae 'agu bwa'i haa'i'a i here ta'a'i. Mana huunai tahitahi namoi haua beia Kraest na heinagu na'i bobona God, 'a ai'a ha'ata'i goro mau hura'a.

⁴ 'Ia Kraest naasi ahuina i tahinga haoru amoo. Ma na'i 'oha 'ia Kraest naigui aho'i mai 'anai ha'ata'inia haaria tanaraau noni, 'i'amou moi ha'ata'i ro'u mai beia. Na'i 'ohasi, moi odo-odo ha'atai mamoi dadara'a baani'i mwani ora-ora'a hako.

Baronga Bwani Mana Baronga Haoru

⁵ Naasi moi nugasi'i mwane here ta'a'i namou hahaa'i ga'u. Abui taritari'a beiai nata sae mana haa'i here wawaasua'a, abui 'adoma'i sisiwa 'inia nata nei mana haa'i hei'irisi ta'a'i. Abui hairaurau, 'inia na mahosi 'a ta'isada

* **3:1** 3:1 Aba odona God naasi dorani ha'ahou.

ro'u mau 'onaai ha'arahesi'i araaranunu. 'Inia na nei nara haua o'asi ra 'adoma'i ororiu 'inia marehoni marewana di'ua God.

⁶ 'Ia God 'a taesu'a di'u 'ada'i sae ra hairaesi mara haa'i here ta'a'i o'asi.

⁷ Nara 'isi here namou haa'i ga'u na'i 'oha mou ai'a aidangisia maua Kraest.

⁸ Naasi moi agoheta'i haa'i here o'asi. Moi agoheta'i taesu'a mana awaha haungari mana hereta'aa 'anai ha'ata'aiatai nata sae. Moi abui ha'atee ha'ata'ai'i sae, ma'uasi hei'isi'isi.

⁹ Moi agoheta'i pwari'i'amou hairiu, 'inia mou bwane nugasiasa i tahinga bwani amooou mana here ta'a'i o'asi.

¹⁰ Na'i 'ohani 'i'amou mou daua'a i tahinga haoru. Mia God na haua tana'amou i tahinga haorusi, 'ai ha'ahaoru'i barongamoo'i tarau tari 'oha na barongamoo'i rai ta'isada 'onaai barongana mamoi aidangisia hako a God.

¹¹ Naasi, beigaau nei nagau to'oraai tahinga haoru, 'igaau 'e ta'i moi na'i 'ado'adona God. 'A ai'a 'ua 'onaa i'oe 'e ai Jiu ma'ua ai'a, ma'ua 'o dauai ringei aha ha'ara ma'ua ai'a, ma'ua i'oe 'e sae na'o bwaahere maramara Grik ma'ua 'e sae na'i burungadaui nei nara awa hahaingahui'a,† ma'ua 'e slev ma'ua ai'a. 'Inia 'ia Kraest na ahaaha baani'i mwani maho, me 'ia na awa hako suri'i tahingagaa'i.

¹² 'Ia God 'a ta'ahi'amou ma 'ome sigihi'amou. 'T'amou ra'i huunai sae ororiu ana'i. Naasi moi ta'ahiraui nei nara awa ha-ha'aroha'a, moi goro 'iniraui noni, moi awa manego, awa 'abenga'i, mamoi ahumaratanoa.

¹³ Moi abui taesu'a mwada'u bei'amou hairiu, mamoi 'adoma'i nugasi'amou hairiu 'ini'i maho taritari'a namou haa'i tana'amou hairiu 'onaai 'adoma'i nugasi'amou ana Araha.

¹⁴ Heita'ahi na ororiu di'u'i hako mwani maho. Naasi maho na daugonigaau 'anai awa goni goro 'onaai ta'i abe.

¹⁵ 'Adomoo ra'i aba 'inia ta'i ruruha, mia God 'a 'ome sigihi'amou 'anai hagu goni goro. Naasi moi watea Kraest 'anai marungi'i 'adoma'imoo'i, 'inia 'ia 'a matai 'a'auhi'amou 'anai hagu goro o'asi. Mamoi abui kaku'aa 'anai ha'atee ha'agorohia ro'u a God.

¹⁶ Moi ha'awate'i ha'atee ana'ia Kraest rai honusi'i 'adoma'imoo'i neina moi ha'ausuri'amou mana ha'a-odoodo'amou hairiu bei'i madoma. 'Oha namoi gana, moi ganari'i Psalm mana hymn mana gana mae'i 'anai ha'atee ha'agorohia God 'ini'i mwani mareho na haa'i tana'amou.

¹⁷ Mana mwane mareho namoi 'unu'i ma'ua haa'i, moi haa'i 'onaai ra'i noni nara ura 'inia Araha. Ma 'inia hagu amooou beia Araha, moi ha'atee ha'agorohia taraua God i Ama.

Tara'i Ringeringe 'Ada'i Saeni Heisoi

¹⁸ Urao ha'iwai moi mwa'emwa'e 'anai awa bahainai heimarungi adaa'i mwane amoo'i. Naasi maho namou ga'i haua 'onaai rongoiusuri ana Araha.

¹⁹ Mi'amoui mwane, moi ta'ahi'i urao amoo'i. Moi abui haa'i ha'atee haungari tanaraau, moi 'abenga'i moi beiraau.

²⁰ Mi'amoui gare moi araisuri'i tarau i inamoo'i mana amamoo'i, 'inia 'ia God 'ai wa'ewa'e 'onaa namoi haua o'asi.

²¹ 'T'amoui ama moi abui ha'a-taesu'araui gare amoo'i 'oha moi ha'a-aidangiraau. Rau gasi arunga ahutotou tarau maraugu 'age'age tana'amou.

²² 'T'amoui slev moi araisuriraau tarau i bwauodo amoo'i. Moi abui araisuriraau moi na'i 'oha rau wanawana do nei narai taeni'amou. Ma'ata

† **3:11** 3:11 Na'i ha'ateeni Grik ra ai'a 'unuai "sae na hahaingahui'a." Ra 'unuai "saeni Sitia." 'Iraau 'ai Sitia ra mataihere heingahui ma goro adaau di'u.

moi ha'isuri'i tarau i heiatenga'i adaa'i, rei'uaa 'oha ra awa ma'ua ai'a. Moi haua o'asi 'inia ha'ahoua amou Araha.

²³ Moi here raorao 'inia tagora 'onaa domou tau'aro tanaa Araha, ai'a tanaa inoni.

²⁴ Moi abui kaku'aa do 'ia Kraest ma'ata namou tau'aro tanaasi. 'Iia nai tahari'amou 'ini'i mwani mareho goro na duruduru 'ini'i tanaraau noni ana'i.

²⁵ Mei moi aidangisia ro'u do 'ia God 'a ai'a matai aba dingana ta sae. 'A matai ha'a-mama'ai'i mwane sae hako nara haa'i here ta'a'i.

4

¹ T'amoui nei mou bwauodo 'iniraui slev, moi goro tatarasi 'iniraau hako mamoi here goro tanaraau. Mamoi abui kaku'aa do 'e nei na bwauodo 'ini'amou, 'ia ro'u mau na'i Aro.

Here Goro Nara Ga'i Haa'i Saeni Heiso

² Moi ha'arahesi waiori mana 'adoma'imoo'i ra ga'i bwa'i teha baani'i mareho namou ha'arahesi 'ini'i. Mamoi ha'atee ha'agorohia ro'u a God 'ini'i mwani maho na haa'i tana'amou.

³ Moi ha'arahesi 'a'auhi'ameu ro'u mia God 'ai ha'amwada'ua tana'ameu 'anai 'adara'inia tarohana Kraest na bainihu baaniraui noni na'i 'ohabwani. Naia na taroha'inia agua Kraest naragu nugaau 'inia na'i rumaniho'oni.

⁴ Moi ha'arahesi nei nawai maani ha'arawamataa i tarohasi, 'inia naasi taha nau ga'i haua.

⁵ Na'i 'oha moi awa beiraui nei narau ai'a hinihinia Kraest moi awa odo-odo goro suriai awa namoi haa'i. Ha'amomori, moi awa ha'aagau 'ado 'oha 'anai haa'i here nara goro neina rai hinihini ro'u.

⁶ Moi mamaani goro beiai heita'ahi tanaraau marai mwa'emwa'e tarau 'anai bahurongo'amou. 'Onaa moi haa'i mareho 'isi, mou matai arami'i goro i taha rai songa'ini'amou 'ini'i.

Ha'atee Ha'ahako

⁷⁻⁸ 'Inau wai ha'ataaria woua Tikikas bei'amou 'anai mamaani ha'awa'ewa'e'amou 'inia taha nameu haua na'i 'ohani. 'Ia Tikikas 'e sae goro agaau na tau'aro mangudi bei'ameu tanaa Araha.

⁹ 'Ia ro'ua Onesimas, na awa na'i ruruha amou, nawai ha'ataaria ro'u wou. 'Iiasi 'e sae goro ma mangudi ro'u. 'Irarua rarui maani'i tana'amoui taha ra to'o mai 'ini.

¹⁰ 'Ia Aristakas namiri ta'i awa na'i rumaniho'o, 'a ha'ataaria wou i ha'atee wa'ewa'e ana tana'amou. Mia ro'ua Mak, gere do'orana Banabas. 'Onaai bwani 'unua agua tana'amou, moi ha'amaotoa Mak 'onaa nai gaariri'amou.

¹¹ 'Ia Jisas, mo'o ra 'unua ro'u 'inia Jastas, 'a ha'ataaria ro'u wou i ha'atee wa'ewa'e ana tana'amou. Neiraau moisi oru ai Jiu hinihini narau tau'aro beiau 'anai ha'a-aidangisiraui inoni 'inia hourana ana God. Rau ha'a-wetewetea di'u i 'adoma'igu.

¹² 'E ta'i 'ini'amou ro'u na tau'aro tanaa Jisas Kraest 'a ha'ataaria ro'u wou i ha'atee wa'ewa'e ana tana'amou, 'ia Epafaras. 'Ado 'oha 'a ha'arahesi wetewete taramou neina moi ura baabau na'i hinihinimoo'i mamoi 'iraraa ha'agorohiai taha na 'irisia God domoi haua.

¹³ 'Au 'iraraa do 'ia mo'osi 'a tau'aro raha di'u 'anai 'a'auhi'amou miraui sae hinihini na'i Leodisia mana Hierapolis.

¹⁴ I sae goro agaaua Dokita Luk, 'a ha'ataaria ro'u wou i ha'atee wa'ewa'e ana tana'amou. Mia ro'ua Dimas.

¹⁵ Moi 'unuai ha'atee wa'ewa'e agua tanaraau sae hinihini na'i Leodisia, mei tanaai urao ra 'unua 'inia Nimfa miraaui nei rau matai boi goni 'anai rihunga'i na'i ruma ana.

¹⁶ Na'i 'oha moi 'oha'inia hakoi usu-usuni, moi ha'ataaria ro'u 'ari na'i Leodisia marai 'oha'inia na'i ruma maea. Mi'amou ga'i 'oha'inia ro'u i usu-usu nau usua tanaraau.

¹⁷ Moi 'unua tanaa Akipas maai hauai tau'aro 'ia Araha 'a 'unua tanaa do'ai haua.

¹⁸ 'Inaua Pol nau usu'i tatara ha'ahako 'ini 'iniai rimagu haariau. I sae na usu-usu tanaau 'a ai'a usu'i.

Moi abui kaku'aa do 'inau 'au awa na'i rumaniho'o. 'Au ha'arahesi mia God 'ai ha'agorohi'amou.

Na 'Etanai Usu-usu Ana Pol Tanaraaui Noni Hinihini Na'i Tesalonaeka

Gere Mamaani 'Iniai Bukani

'A 'ua? Na'i tahingamu 'o 'omesia do ra'i sae ra ha'ata'ini'i hura'a i baronga goro suri'i tahingadaa'i tana'o 'anai suri'i? Ra'i baronga he'ua na 'o ha'ata'ini'i tanaraaui geresae amu'i miraaui do'oramu'i mana asimu'i 'anai suria? Na'i madoraa na 'ia Pol 'a usuai 'etanai usu-usu ana tanaraaui sae hinihini na'i Tesalonaeka, 'a 'unua tanaraau do 'iraaui ra'i ha'ausuringa'i goro tanaraaui noni hinihini na'i Provens adaau.

'Ia Pol naasi na taraawa'anai heiso'i na'i Tesalonaeka na'i ruanai 'oha na 'aariha 'anai taroha'iniai Taroha Goro. Na'i madoraasi 'iraaui sae ahurodo na'i 'omaasi rau taraawa'a norata'airaaui sae hinihini. 'Ariwou mana heiso'i 'a ha'ataaria hura'a Pol baaniai 'omaa 'iniai magugu adaau 'inia, mia Pol 'a 'adoma'i wetewete di'u mau 'iniraaui.

Naasi mia Pol 'a ha'ataaria 'ari a Timoti neina 'iia 'ai matai waa'i mai taroha 'ini'i taha nara to'o na 'omesi'i ma rongo'i. Naasi na'i 'oha na 'ia Timoti 'a aho'i 'ari, 'a maani'i mwane mareho tanaa Pol 'ini'i taha nara to'o na 'omesi'i ma rongo'i. Mana'i mamaani na haua 'a 'unua do 'iraaui noni hinihini na'i Tesalonaeka rau awa na'i tahitahi na 'ia God 'ai wa'ewa'e 'inia. Naia naasi 'anai heitaguma'i hairiu, ma 'anai hasura'ini'i hinihinidaa'i beiai nata nei. Taranai o'asi ana na 'ia Pol 'a usu-usu 'inia tanaraau ma 'unua do 'iraaui ra'i ha'ausuringa'i goro tanaraau tara'i sae hinihini ro'u na'i Provens adaau.

Na'i usu-usu ana, 'ia Pol 'a ha'a-wetewete'i 'ado'adodaa'i noni hinihini na'i Tesalonaeka. Mia Pol 'a ha'ausuriraaui ro'u 'ini'i dora narau maemae'a suri'i, ma aramiai heisonga'i adaau 'iniai aho'i mai nai haua Jisas. Naasi na'i 'oha na'o 'oha'iniai Tesalonaeka 'oi sibaniai here na'oi suria 'inia i heiha'auu goro na 'iraaui noni hinihini na'i Tesalonaeka rau ha'ata'inia neina i'oe ro'u 'oi ha'ata'iniai taha nai goro tanaraau ro'u i haru nei.

¹ Inaui Pol, 'ia Saelas mea Timoti na meu haua i usu-usuni tana'amou i sae hinihini na'i 'omaa i Tesalonaeka, 'i'amou i sae ana'ia God Amaga mia Araha aga Jisas Kraest. Meu ha'arahesi mia God 'ai ha'agorohi'amou ma'ai ha'a-awahi'amou goro.

'Iraau Tesalonaeka 'E Ha'ausuringa'i

Tanaraau Tara'i Sae He'ete'i Ro'u

² Meu ha'atee ha'agorohia tarau God 'ini'amou, ma meu 'adoma'ini'amou tarau suri'i ha'arahesi amee'i.

³ Meu ha'atee ha'agorohia God i Amaga 'ini'i mwani mareho goro namou haa'i na ha'ata'iniai hinihinimoo mana heita'ahi amoo tanaa. Meu ha'atee ha'agorohia ro'u 'iniai 'adoma'i heitotori amoo 'iniai boi aho'i ana Araha aga, Jisas Kraest, na ura baabau.

⁴ Arai do'ora mana asimee'i na'i Kraest, meu 'iraraa do'ia God 'a ta'ahi'amou ma 'ome sigihi'amou nana.

⁵ 'Inia 'oha nameu 'ari wou ani 'anai maania tana'amou i Taroha Goro 'inia Jisas Kraest, ai'a domeu hadahada moi, ma'ata meu ha'ata'inia tana'amou i mena anai Hi'ona Maea. Ma na'i madoraa meu taroha'iniai Taroha Goro tana'amou, meu ha'ata'inia ro'u do meu huunai hinihiniai Taroha Gorosi. Ma na'i 'oha nameu awa bei'amou, mou 'omesi'i hako i taha na meu haa'i. Meu awa odo-odo 'anai ha'ausuri'amou 'anai haua o'asi ro'u.

⁶ Na'i 'ohasi, mougu taraawa'a awa suri'i barongamee'i nara goro mana baronga goro ana Araha. Rei'uaa nara ha'a-mama'ai'amou ma mou rongomaata'i di'u, me mou dauai Taroha Goro beiai wa'ewa'e na haa tana'amou i Hi'ona Maea.

⁷ Naasi 'i'amou 'e ha'ausuringa'i tanaraau sae hinihini na'i Provensi Masidonia ma na'i Provensi Akaea.

⁸ 'Iniai hinihini amouu, 'a ragoi nei nara rongoai Taroha Goro 'inia Araha. Ai'a do na'i moi Provensi Masidonia mana Akaea narau rongo tarohana do mou hinihinia God, me gaarangi 'iraaui hako i sae hinihini suri'i mwani dora. Naasi 'agu ai'a arari'a ro'u do meigui maani'amou tanaraau.

⁹ 'Inia 'iraaui haariraaui rau maani'amou tana'ameua Saelas mea Timoti, do mou ha'amaoto'ameu na'i 'oha tahamora na meu taha bei'amou. Ma ro'u do mou rihosi baaniai ha'arahesi'i araanunu mamou suriai huunai God na tahitahi.

¹⁰ Ma rau maania ro'u tana'ameu do mou totoriai Garena God, 'oha 'ai boi aho'i baaniai aro. Naasi 'ia Jisas, na 'ia God 'a ha'a-suruta'ea ani baaniai mae. 'E madoraa nai boi mau na'ia God 'ai ha'a-mama'airaaui noni 'iniai taesu'a ana 'adaau 'ini'i ora-ora'a adaa'i. Mia Jisas 'ai ha'atahigaaui baaniai ha'a-mama'aisi.

2

Na Tau'aro Ana Pol Na'i Tesalonaeka

¹ Arai do'ora mana asimee'i na'i Kraest, mou 'iraraa 'oha na meu taha bei'amou tahamora ani, ai'a do meu ha'a-gata'ini'i madoraa amee'i. 'Inia 'oha meu awa bei'amou, ra rago i mwani maho goro nara to'o.

² Mou 'iraraa do ra bwane ha'atee ha'a-ta'ai'ameu mara ha'a-mama'ai'ameu na'i Pilipae ma meugu boi ani bei'amou na'i Tesalonaeka. 'Oha meu awa bei'amou na'i Tesalonaeka, ra rago i sae ra ura bwarasi'ameu ro'u. Ma rei'uaa na o'asi, 'ia God 'a 'a'auhi'ameu do mei abui maaa'u mameugu taroha'inia hura'a i Taroha Goro ana tana'amou.

³ 'Oha nameu taroha'iniai Taroha Goro tana'amou, meu rabasia do moi hinihinia. Naasi, na ha'ausuringa'i amee'i ra ai'a pwari'i mameu ai'a to'ora'i 'ado'ado ta'ai ma ai'a do meu raba ha'a-bweubweu'amou.

⁴ God 'a 'omesi'i tahingamee'i do ra odo-odo, tarana naasi nagu 'u'uri'ameu 'inia 'anai taroha'iniai Taroha Goro tanaraau noni. Mana 'oha meu taroha'iniai Taroha Goro, meu ai'a maani'i maho do 'ira i noni rai wa'ewa'e 'ini'i. Ai'a! Meu 'unu'i moi mareho 'ia God 'a 'irisia do mei maani'i. Me 'iia naigui wa'ewa'e 'ini'ameu. 'Iia moia God na matai aidangisi'i 'ado'adomee'i, 'onaa ra goro ma'ua ta'aa.

⁵ Mou 'iraraa i 'oha na meu awa bei'amou, meu ai'a ha'a-gorogoro'amou do moi haa'i taha nameu rabasi'i. Mana heitaroha'i nameu haa tana'amou ai'a do 'anai ha'a-bweubweu'amou 'ini'i maho namou to'ora'i. 'Ia God 'a aidangisia do 'i'ameu meu ai'a haa o'asi!

⁶⁻⁷ 'A mwada'u tana'ameu 'anai ha'angoni'i tara'i mwani maho baani'amou ma'ua 'unua do 'i'amou beiraaui mwani noni rai ha'a-aneane'ameu, 'inia 'i'ameu rai Ha'ataari ana'ia Kraest, mi'ameu rai na'otara amoo'i ro'u. Me na'i 'oha nameu awa bei'amou, meu ai'a haa o'asi. 'Tameu meu ta'ahi'amou 'onaai ina na ta'ahiraau'i gare ana'i.

⁸ Meu ta'ahi'amou di'u! Na tarana naasi na meu taroha'inia 'inia tana'amou i Taroha Goro, mameu wa'ewa'e 'anai 'a'auhi'amou rei'uaa namei mae.

⁹ Mou 'iraraa meu ta'ahi'amou, 'inia na'i 'oha nameu awa bei'amou 'anai taroha'iniai Taroha Goro tana'amou, meu tagora raha ro'u suri rodo mana dangi 'anai siba nameu ha'a. Neina mei abui ha'ahihi'amou 'anai hori'i tana'ameu i taha nameu 'irisi'i.

¹⁰ 'Ia God mi'amou hako i sae hinihini, mou 'iraraai tahingameu bei'amou 'a maea, 'a odo-odo na'i maana God, ma 'a bwarai ha'ahuni'ameu 'inia ta maho.

¹¹ Mou 'iraraa ro'u doni here nameu haua tana'amou 'a 'onaai here na ama 'a haua tanaraaui huudi gare ana'i.

¹² Meu ha'a-ta'u'u'amou mameu bonga'ini'amou 'anai awasuriai tahinga na arariraau noni ana'ia God. 'Iia na 'ome sigihi'amou 'anai ta'i beiraau nei na marungiraau mana heimarungi ana 'a hauasa.

¹³ Nata maho ro'u na meu ha'atee ha'agorohia God tarau 'inia, naani. 'Oha nameu taraawa'a taroha'ini'i ha'atee ana'ia God tana'amou, 'i'amou mou hinihini'i. Mamou 'adoma'i o'ani, "Na ha'atee 'ini ai'a boi baani'i noni, me ra'i huudi ha'atee ana'ia God!" Ha'amomori! Na ha'atee 'isi 'iaana'ia God, marai 'a'auhi'amou 'anai orisi ha'agorohi'i tahingamoo'i.

¹⁴ Arai do'ora mana asimee'i na'i Kraest, na maho na to'i'amou 'a to'iraaui ro'u i noni hinihini ana'ia God na rau awa na'i Jiudea. 'Iniai suria adaaua Jisas Kraest, 'iraaui moi noni adaa'i, 'iraaui Jiu, nara ha'a-mama'airaaui. 'A 'onaai ha'a-rongomaata'i'amou adaui huudi sae amoo'i na'i kantri amooi.

¹⁵ Na'i 'oha bwani, 'iraaui Jiu ra ha'amaesiraau tara'i rarabea ana'ia God. Ma ro'u rau ha'amaesia Jisas, Araha aga. Me na'i 'ohani, 'iraaui Jiu rau ha'a-hura'ahi'ameu baaniai kantri adaau ma rau ha'a-mama'ai'ameu. 'Ia God 'a taesu'a 'adaau 'ini'i here ta'aa adaa'i, miraaui ura bwarasiai taha na matai 'a'auhiraau mwani noni.

¹⁶ 'Inia na'i 'oha meu tatariori 'anai heitaroha'i tanaraaui nei na ra ai'a Jiu do neina rai daua nadaui tahi tarau, 'iraaui Jiu rau bonasiai ha'a-papaku'ameu. 'Oha rau hau'i here 'isi, 'iraaui rau ha'arago'i ro'u i ora-ora'a adaa'i. Mana ha'a-mama'ai ana God 'ai auru na'i hungadaau'a 'iniai taesu'a ana 'adaau.

'Adoma'ina Pol 'Adaui Sae

Na'i Tesalonaeka

¹⁷ Arai do'ora mana asimee'i, mou 'iraraa do ra ha'a-hura'ahi'ameu tara'i sae baaniai 'omaa amooi. 'A ai'a orea ma meu tarisi'amou'a. Meu bonasia do mei garihi'amou maagu bwara tana'ameu. Rei'uaa na meu awa ha'atau baani'amou, mi'ameu meu 'adoma'ini'amou moe'a mau.

¹⁸ Ha'amomori, 'inau ro'ua Pol, 'a rago i madoraa nau raba ada wou bei'amou maagu 'ia Saetan na ha'a-bwarasi'ameu hako.

¹⁹⁻²⁰ Me na'i 'oha 'ai boi aho'i Araha aga Jisas Kraest, meigu wa'ewa'e mamei mari'ori'o 'ini'amou 'iniai hinihinia amooi taraua Jisas. 'Tameu mei mari'ori'o 'ini'amou 'onaai sae na dauai heitahari na'i 'eba hei-ohoho. Ha'amomori! 'Tameu moi ha'a-wa'ewa'e'ameu di'u mamei mari'ori'o 'ini'amou! Naia nameu raba ada aho'i 'iniasi bei'amou.

3

¹ 'Tameu hako meu 'ado'ado raorao ani 'anai adai'amou, 'inia meu tarisi'amou di'u maagu bwara tana'ameu. Na'i 'ohasi meu arunga ta'aa di'u mameu 'adoma'inia do 'i'amiria Saelas mirii awa ga'u moi na'i 'omaa i Atens

² mamiri ha'ataaria wou ania do'oragaau na'i Kraest, 'ia Timoti. 'Iiasi 'e ta'i sae tatau'aro ro'u ana God neani, me'iaa 'a 'a'auhimiria Saelas ro'u 'anai taroha'iniai Taroha Goro 'inia Jisas Kraest. Miri ha'ataaria wou ania Timoti 'anai ha'a-'o'ori'amou ma 'anai ha'a-'o'ori'i hinihinimoo'i.

³ Miri ha'ataaria wou bei'amou, 'inia 'a gasi rihota'i aho'i tanei baania God 'ini'i mwani rongomaata'i namou siri suri'i 'ohani. Mou ga'i 'iraraa moi doni noni rai ha'a-rongomaata'igaau 'iniai hinihinigaau beia Kraest.

⁴ 'Oha meu awa ga'u bei'amou ani, meu bwane 'u'unua tana'amou do 'ira i noni rai ha'a-mama'aigaau 'inia suria agaaua Kraest. Ma na'i 'ohani, na maho na meu 'unua ani, 'a to'o'a.

⁵ 'Au 'adoma'i raha di'u 'ini'amou 'oha nau rongoa do 'ira i noni rau ha'a-rongomaata'i'amou. 'Au 'adoma'inia, gasi 'ia Saetan 'a ohongi'amou 'anai ha'atehamou. Naasi maho nau ha'ataaria wou 'inia ania Timoti tana'amou, neina 'ia 'ai boi aho'i maigu'i maania tanaau 'onaa namou suria maua God. Ma 'onaa 'ia Saetan 'a ha'atehamou, ma 'a ha'ata'inia doni heitaroha'i nameu haua tana'amou 'inia i Taroha Goro, 'a 'ari pwaranga moi.

⁶ Ma'ata, na'i 'ohani 'ia Timoti 'a taha aho'i mai beiai taroha na goro 'ini'amou. Do 'i'amou mou hinihinia maua God mamou ta'ahi'amou hairiu. 'A 'unua ro'u i 'adoma'i goro namou haua 'ini'ameu, mamou raba 'omesi'ameu ro'u 'onaa raba 'omesi'amou ameeu.

⁷ Arai do'ora mana asimee'i na'i Kraest, rei'uaa meu rongomaata'i mana maho ra bwara tana'ameu 'ini, 'i'ameu meu wa'ewa'e moi. 'Inia meu 'iraraa do 'i'amou mou ura baabau suri'i hinihinimoo'i.

⁸ Mara aroi ahumee'i 'inia mou 'u'uria tarau Araha.

⁹ Madoraa meu ha'arahesi, na ha'atee ha'agorohi ameeu tanaa God 'a bwarai hako, 'inia wa'ewa'e ameeu 'ini'amou.

¹⁰ Ha'amomori, meu ha'arahesi wetewete suri rodo mana dangi 'anai boi garihi'amou aho'i. 'Inia meu raba ha'ausuri'amou 'ini'i tara'i mareho nara matai ha'a-wetewete'i hinihinimoo'i.

¹¹ Hoita, naani ha'arahesi ameeu tanaa God i Amaga mea Araha aga Jisas Kraest. "God i Ama, meu ha'arahesi dona mwani maho rai 'ari odo-odo maai mwada'u tana'ameu 'anai garihiraau noni hinihini na'i Tesalonaeka.

¹² 'Oi 'a'auhiraau neina heita'ahi adaau hairiu mei tanaraau noni 'ai raha di'u ro'u 'onaa heita'ahi ameeu tanaraau.

¹³ Ma 'onaa rai ta'ahiraau hairiu o'asi, meu ha'arahesi ma'oi ha'a-'o'ori'i 'adoma'idaa'i marai awa odo-odo. Ma naasi, na'i 'oha 'ia Araha aga 'ia Jisas Kraest 'ai aho'i mai goni beiraau noni maea ana'i, 'iraau rai 'onaa'iraau ro'u. Na'i madoraa rai ura na'i maamu, i'oe 'oigui 'unua do 'iraau rau odo-odo."

Naasi ha'arahesi ameeu 'ini'amou.

4

Na Tahinga 'Ia God 'A Wa'ewa'e 'Inia

¹ Arai do'ora mana asimee'i na'i Kraest, 'au raba 'unu'i ro'u tara'i maho tana'amou. Mou 'iraraa do meu bwane ha'ausuri'amou 'ini'i baronga na 'ia God 'a wa'ewa'e 'ini'i. Ma tari mai dangini, mamou susuri'i mau. Meu ura 'inia Araha aga Jisas Kraest, ma naasi meu ha'a-ta'u'u'amou 'anai suri'i moe'a i ha'ausuringa'i 'isi.

² Mou bwane aidangisi'i ringe nameu 'unu'i tana'amou. Na ringe 'isi ai'a baani'ameu moi, mei baania ro'u Araha aga, 'ia Jisas Kraest.

³ Nara 'ini maho 'ia God 'a rabasi'i do moi suri'i. 'A 'irisia do moi awa maea ma mou abui haa'i mwane here wawaasua'a.

⁴ Moi abui ha'awate'i hei'irisi ta'aa anai abe 'anai na'otaramoou, ma'ata moi ha'ahou'i abemoo'i mamoi haa'i 'ini'i here nara odo-odo.

⁵ Abui 'adoma'i sisiwa tarau 'onaa'i sae nara ai'a hinihini.

⁶ Abui ha'ata'ai ai nei na hinihini 'anai mauru beiai urao ana ma'ua i mwane ana. 'Oha na'o haua o'asi, 'a 'onaa do 'o beriai maho na'o ai'a to'oraa. Meu bwane ha'abasu'amou wetewete 'ia God 'ai ha'a-mama'airaa i nei rau haua o'asi.

⁷⁻⁸ 'Ia God ai'a 'ome sigihigaau 'anai hau'i mwani here wawaasua'a. Me 'a 'ome sigihigaau 'anai ha'i noni ana'i neina gai awa maea. Ma haua tanagaau i Hi'ona Maea 'anai 'a'uhigaau 'anai awa maea. 'Onaa tei na

gagata'inia ha'ausuringa'isi, 'iia 'a gagata'inia God, ai'a i noni. 'Inia ni ha'ausuringa'isi 'a boi baania God.

⁹ 'Io, 'a ai'a arari'a ro'u do meigu usu-usu tana'amou do moi ta'ahi'amou hairiu. 'Inia 'ia God 'a bwane ha'ata'inia tana'amou i here 'anai ta'ahi'amou hairiu. Ma'ata, rei'uaa na o'asi, mamei gere usu-usu tana'amou mau 'inia.

¹⁰ Meu aidangisia do mou ta'ahiraau sae hinihini na'i Provens amou i Masidonia. Mameu 'irisia doni heita'ahi amou 'ai raha di'u ro'u.

¹¹ 'Onaai bwane 'unua ameeu tana'amou, moi bonasia awa 'abenga'i, hau'i odo-odo i tau'aro amoo'i mamoi abui heiheiai tau'aro anai nata sae.

¹² 'Onaa moi hau'i maho nameu 'unu'i 'isi, naasi 'iraau nei rau ai'a hinihini raigui ha'ahou'amou. Ma ro'u, 'i'amou mou bwa'i 'u'uria'a ta sae 'anai ha'i ha'a tana'amou ma'ua mahoingau.

Na Boi Aho'i Ana Jisas Kraest

¹³ Arai do'ora mana asimee'i na'i Kraest, meu raba ha'a-aidangisi'amou 'inia i taha nai to'o tanaraau noni hinihini nara mae'a. Meu ai'a 'irisia do moi ahutotou 'iniraa 'onaai nei na ai'a hinihiniai suruta'e aho'i baaniai mae.

¹⁴ Gau 'iraraa, 'ia Jisas 'a mae ma suruta'e aho'i. Ma naasi, gau 'iraraa do 'ira i nei ra 'u'uria Jisas na'i marewanani, rai suruta'e aho'i ro'u baaniai mae. Ma gau hinihinia do'ia God mea Jisas rarui taragoniraa beiraru.

¹⁵⁻¹⁷ 'E ta'i maho ro'u na 'unua tana'ameu a Jisas, 'a o'ani. Do 'iia haaria 'ai dio mai baaniai aro, ma na'i 'ohasi gaigui rongoai na'ohadaui enjel, 'ai awara. Ma gaigui rongoa ro'u i trampet ana God narai 'uhia na rongo 'onaai ahuri. Na'i 'ohasi 'iraau noni hinihini narau mae'a, raigu tahi aho'i na'i na'o. Murina, 'onaa gau tahi mau na'i 'ohasi, 'ia God 'ai waigaau hako ara'a suri'i rorodo 'anai heisadoi beia Jisas 'anai awa beia tarau.

¹⁸ Na'i 'oha moi ahutotou 'inia nei hinihini na mae baani'amou, moi ha'a-o'ori'amou hairiu 'ini'i mareho 'isi.

5

Gai Ha'aagau 'Iniai Boi Ana Araha

¹ Arai do'ora mana asimee'i na'i Kraest, ai'a arari do mei 'unua ro'u tana'amou i 'oha 'ia Araha 'ai aho'i mai.

² 'Inia mou bwane 'iraraa do 'ai boi ta 'oha moi. 'Ai boi 'onaai sae beriberi na ha'aagau 'anai sirihiai ruma amua na'i rodo 'oha na'o ai'a 'iraraa.

³ Na'i 'oha maigui boi Araha, 'ira i noni rai ha'atee o'ani, "Na'i 'ini na ohi ma papaku, 'a bwa'i maho ta'aa nai to'igaau." Raigui 'asu'a mai to'iraau'a ta kae ha'a-mama'ai na bwa'i tanei'a nai hora baania. 'Ai 'onaai urao pote nagu 'asu'ani maesi ahu moi 'anai ha'ahutaai gare.

⁴ Arai do'ora mana asimee'i, mou ai'a 'onaaira i nei ra awa na'i kuhi narau ai'a ha'aagau 'anai boi ana Jisas. Naasi mou bwa'i 'asu'a 'oha 'ia Jisas 'ai boi raurau 'onaai sae beriberi na boi na'i 'oha na ai'a sae nai 'omesia.

⁵ 'I'amou hako mou awa na'i marewa. 'Igaau ai'a awa na'i kuhi magau ai'a haa'i maho ta'a'i 'onaaira i noni ra awa na'i dora kuhi.

⁶ Naasi gai abui 'onaai sae na mauru. Ma'ata gai awa ha'aagau mana 'ado'adogaa'i rai odo-odo tarau 'onaai sae na rarai.

⁷ Na'i rodo tara'i sae ra mauru, ma na'i rodo tara'i sae ra bweu 'ini'i waini bweu.

⁸ Me'igaau gau ai'a 'onaairaui sae 'isi. 'Igaau gau awa na'i marewa. Na tarana naasi nagai 'omesurigaau haarigaau 'inia baaniai ora-ora'a. Gai 'u'uria God, gai ta'ahia, gai ta'ahira i mwani noni, magai hinihinia tarau do'ia God 'ai ruhasigaau baaniai ora-ora'a. 'Onaa gai haa o'asi, gai

'onaai sae hehei'oi na nugaai didimaa hau 'anai ha'abwarasiai bwauna ma ho'osiai to'oni baabau 'anai ha'abwarasiai waiburuna.

⁹ 'Ia God ai'a 'ome sigihigaau 'anai ha'a-mama'aigaau. Ai'a! 'A 'ome sigihigaau do'ia Jisas 'ai ruhasigaau baani'i ora-ora'a agaa'i.

¹⁰ 'Ia Jisas 'a mae 'inigia do gai awa tarau beia. Na'i 'oha 'ia Jisas 'ai aho'i mai, rei'uaa nagau tahi mau ma'ua mae'a, 'igaau hako gai awa tarau beia.

¹¹ Hoita, 'onaa tanei 'ini'amou 'ai ahutotou 'inia ta nei hinihini na mae, moi ha'a-o'ori'amou hairiu 'ini'i mareho 'isi 'onaai bwane hahaua amou.

Ha'atee Ha'ahako Ana'ia Pol

¹² Arai do'ora mana asimee'i na'i Kraest, meu ha'a-ta'u'u'amou 'anai 'adoma'i ha'ahouraaui na'otara amoo'i narau tatau'aro bei'amou 'anai ha'a-o'ori'amou na'i tahingamou beia Kraest.

¹³ Moi 'adoma'i ha'ahouraaui mamoi ta'ahiraau 'ini tatau'aro adaau. Moi awa goni goro ma abu 'ini ringei heihoa.

¹⁴ Arai do'ora mana asimee'i, meu ha'a-ta'u'u'amou ro'u 'anai ha'atee wetewete tanaraau nei rau awa ahuare moi nara ai'a raba tau'aro. Moi ha'a-o'ori'i 'adoma'ida i nei ra maaa'u mara wairikoi'a i 'adoma'idi 'ini'i taraani maho moi. Moi 'a'auhira i nei ra bwarai 'a'auhiraau haariraau, mamoi ahumaratanoa beiraau mwani noni hako.

¹⁵ 'Onaa 'e nei na haai ta'aa tanaa tanei 'ini'amou, 'ai abui su'ua aho'i 'inia ta'aa. Mamoi bonasia do moi haa'i mwani maho goro tana'amou hairiu mei tanaraau ro'u i mwani noni.

¹⁶ Moi wa'ewa'e waiori,

¹⁷ mamoi ha'arahesi tarau,

¹⁸ ma rei'uaa ra hehe'ua i maho tana'amou, moi ha'atee ha'agorohia taraua God 'inia. Na'isi maho 'ia God na 'irisi'i do moi haa'i, suria 'i'amou 'iaana'ia Kraest.

¹⁹ 'Io, moi abui ha'abwarasiai Hi'ona Maea 'anai tatau'aro suri'i tahingamoo'i.

²⁰ 'Onaa tei nai 'unua do 'a raba ha'arangasi'i hura'a i 'ado'ado ana'ia God, moi abui rongo agoheta'iniai taha rai 'unua.

²¹ Ma na'i na'o, moi wai'ado'ado goro ga'u suriai taha rai 'unua. Ma 'onaa ra odo-odo, ma naasi moigui hinihini'i.

²² Ma'ata moi nugasi'i mwani maho ta'a'i.

²³ Meu ha'arahesi tanaa Godi ni gooroha, 'ai ha'amaea'i tahingamoo'i maai bwarai ha'ahuni'amou 'inia ta maho tari 'oha nai aho'i mai Araha aga, 'ia Jisas Kraest.

²⁴ 'Ia God na 'ome sigihi'amou, me 'iia moi nai 'a'auhi'amou 'anai awa odo-odo. 'Inia 'iia 'a haua tarau i taha na 'unua.

²⁵ Arai do'ora mana asimee'i, moi ha'arahesi 'a'auhi'ameu ro'u.

²⁶ 'Oha moi awa goni noni hinihini 'onaai ta'i ruruha, moi here beiai nata nei* 'anai ha'ata'iniai heita'ahi amou tana'amou hairiu.

²⁷ 'Inaua Pol 'au 'unua tana'amou na'i atana Araha aga Jisas Kraest, 'anai 'oha'iniai usu-usuni tanaraau noni hinihini na'i 'isi.

²⁸ 'Io, mameu ha'arahesi 'ini'amou, 'ia Araha aga Jisas Kraest 'ai ha'agorohi'amou hako.

* **5:26 Here beiai nata nei:** Na'i ha'atee ni Grik ra 'unua "ngooniai nata nei beiai heingooni ni heita'ahi." Na'i madoraasi, 'iraau sae mwane rau ngooniai babanai nata sae mwane, miraaui urao rau ngooniai babanai nata urao 'anai ha'ata'iniai heita'ahi tanaraau hairiu. 'A ta'isada beiai herehere agaau na'i 'ohanisi 'oha gau here beiai nata nei.

Na Ruanai Usu-usu Ana Pol Tanaraaui Noni Hinihini Na'i Tesalonaeka

Gere Mamaani 'Iniai Bukani

'Ai wetewete tari he'ua i 'adoma'imu 'anai ura baabau na'i hinihinimu? 'Io, na'i 'omaai Tesalonaeka 'iraaui noni ahurodo rau awa ha'ata'airaaui di'u i sae hinihini 'iniai suria adaaua Kraest. 'Ia Pol 'a ha'atee ha'agorohiraaui di'u i noni hinihini nai Tesalonaeka, suria rei'uaa narau siri suri'i mwane mareho ta'a'i, me 'iraaui ma'ata rau ura wetewete suri'i hinihinidaa'i beia Kraest.

'Ia Pol 'a usuai usu-usuni 'anai ha'a-weteweteraaui 'anai ta'ahia God miraaui ro'u i noni, marai abui rihota'i aho'i na'i hinihinidaau. 'Ia Pol 'a 'unua tanaraau do rai 'iraraa do 'iraaui nei narau haa'i mareho ta'a'i 'ia God 'ai ha'a-mama'airaaui, rei'uaa sae ahurodo ma'ua sae hinihini. Naasi 'iraaui noni hinihini rau ga'i bwa'i arunga ta'aa 'oha rau re'iai sae na haa'i here nara taritari'a maagu ai'a daua ta ha'a-mama'ai 'ini'i na'i marewanani.

Mia Pol 'a 'unua ro'u tanaraau dorai abui agohe 'anai tau'aro. Tara'i nei ra 'age'age di'u mara ai'a raba tau'aro 'anai siba ha'a nadaau, 'inia rau 'adoma'inia do 'ia Jisas 'ai boi aho'i raurau.

Na'i 'oha na'o bonasiai ura baabau na'i hinihinimu 'oha na'o siri na'i madoraa bwara, 'oi 'adoma'iniraaui tarau i noni hinihini na'i Tesalonaeka. Na'i 'oha na'o 'iraraa do ra here ha'ata'ai'o 'iniai suria amua Kraest, ma'ua 'o siri na'i heiohongi, 'oi 'iraraa do 'ia Kraest 'a awa tarau 'anai 'a'auhi'o. 'Oi sibaniai here na 'oi ura baabau 'inia 'oha na 'oi 'oha'iniai ruanai usu-usu tanaraaui Tesalonaeka.

¹ 'Inaua Pol, 'ia Saelas mea Timoti nameu hauai usu-usuni tana'amoui sae hinihini na'i 'omaai Tesalonaeka, 'i'amoui sae ana'ia God Amaga mana Araha aga Jisas Kraest.

² Meu ha'arahesi mia God Amaga mea Araha aga Jisas Kraest rarui ha'agorohi'amou ma rarui ha'a-awagorohi'amou.

God 'Ai Hiiriraaui Noni

'Oha Nai Aho'i Mai a Kraest

³ Arai do'ora mana asimee'i na'i Kraest, meu rongoa doni hinihinimoou beia God mana heita'ahi amouu hairiu 'a goro di'u ro'u baaniai na'o. Mameu hadahada wa'ewa'e tarau tanaa God 'ini'amou, 'inia 'a goro ma odo-odo do mei haua o'asi.

⁴ Ma naasi, na'i 'oha meu garihiraau ro'u tara'i noni hinihini, meu hadahada wa'ewa'e tanaraau 'iniai ura baabau amouu mana 'u'uria amouua Kraest, rei'uaa namou siri suri'i mwani madoraa bwara mana rongomaata'i 'iniai suria amouua Kraest.

⁵ Suria mou ura baabau suri'i rongomaata'i namou haa'i 'iniai awa amouu na'i bahainai heimarungi ana God, 'a ha'ata'inia doni heihiiri nai haua God 'a odo-odo. 'Inia na'i 'ohasi 'ai 'unua hura'a do mou arari 'anai awa tarau na'i hourana ana beiraaui noni ana'i.

⁶ Ha'amomori! 'Ia God 'ai haua tarau i maho na odo-odo. Naasi, 'ia God 'ai ha'a-rongomaata'iraaui nei ra ha'a-rongomaata'i'amou.

⁷ Maai ha'a-ai'a'i baanigaau ro'u i rongomaata'i agaa'i na'i 'oha 'ia Jisas Kraest 'ai dio mai baaniai aro na'i raronai ngarungarui 'eu beiraaui enjel wetewete ana'i.

⁸ 'Ia 'ai boi 'anai ha'a-mama'airaaui nei nara ai'a raba suria God ma rau ai'a hinihiniai Taroha Goro 'inia Araha aga Jisas Kraest.

⁹ 'Ia God 'ai ha'a-taariraaui 'ari na'i dora ni rongomaata'i tarau maai ha'a-mama'airaaui. Rai awa ha'atau baania Araha marau bwa'i 'omesia mwada'u i mena ana na hauasa.

¹⁰ Maho 'isi rai to'o na'i 'oha 'ia Jisas 'ai aho'i mai miraaui mwani noni ana'i rai ha'atee ha'a-ahaahaa beiai heimwaota'i nai raha di'u. Me 'i'amou moi awa ro'u beiraaui, 'inia mou hinihini'i ro'u i maho meu taroha'ini'i 'abaia Jisas Kraest.

¹¹ Hoita naasi, suria moi awa goni beiraaui na'i 'ohasi, meu ha'arahesi tarau 'ini'amou, do na'i 'ohasi 'ia God 'ai 'unua hura'a domou awasuriai tahinga na rabasia do gai awasuria. Meu 'iraraa moi do mou raba hau'i maho goro, 'inia 'u'uria amoua God. Na tarana naasi nameu ha'arahesi 'inia, mea God 'ai haua tana'amou i mena 'anai hau'i maho.

¹² Miraaui hako i nei hinihini raigu ha'atee ha'agorohia Araha aga Jisas Kraest 'ini 'omesi'i adaa'i baronga goro suri'i tahingamoo'i. Marai ha'atee ha'agorohi'amou ro'u 'inia hinihinia amoua Kraest. 'Ai o'asi, ai'a do 'igaau gau arari, me 'inia goro ana God mea Kraest 'inigia.

2

Sae Ta'aa Ana Saetan

¹ Arai do'ora mana asimee'i na'i Kraest, meu raba maania tana'amou aho'i mai ana Araha aga, 'ia Jisas Kraest, mana 'oha gai goni hako wou beia.

² Ra gasi pwari'i'amou tara'i sae do 'ia Jisas 'a bwane boi'a aho'i. Marai matai 'unua ro'u doni Hi'ona Maea na ha'arangasia tanaraau, ma'uasi do rau rongoa baani'ameu, ma'ua do rau 'oha'ini'i ro'u suri'i usu-usu nameu haa'i. Ma'ata 'inau 'au 'unua tana'amou do 'ai abui kakui ahumooi ma'ua ahutotou 'oha moi rongoi maho 'isi, 'inia maho 'isi ra ai'a ha'a-momori!

³ Moi abu watea tanei 'ai pwari'i'amou o'asi, 'inia 'e rua maho nai to'o ga'u maigui tano'i aho'i mai Araha. 'Etana, 'ai ragoi noni rai rihosi baania God, mana ruana, i sae ta'aa ana Saetan* 'ai ha'ata'i. Ma'ata, 'ia God 'a bwane 'adoma'i nunuga 'inia 'anai ngahu ha'a-ai'aa.

⁴ Hoita, na sae ta'aasi 'ai ha'atee ha'ata'ai'i mwani hi'ona ma'ua araanunu na 'iraau noni rau ha'arahesi'i, mai 'unua do 'iia na ororiu di'u. Ma'ai siri heinagu na'i Ruma Maea ana God mai 'unua do 'iia naasia God.

⁵ 'A 'ua? Mou kaku'aa do 'inau bwane 'unu'i hako i maho 'isi tana'amou 'oha nau awa bei'amou?

⁶ Mou bwane aidangisiai taha na ha'abwarasia 'inia i boi anai sae ta'aasi. 'Iia 'ai boi moi na'i huunai madoraa 'ana.

⁷ Suri'i dangi 'ini, 'ia Saetan 'a tau'aro na'i marewana 'anai ha'a-bweubweu'araui sae 'anai hau'i maho ta'a'i. 'Au 'iraraa o'asi suria 'ia God na ha'ata'inia tanagaau. Ma'ata na sae ta'aa ana Saetan 'a bwa'i ha'ata'i mau tari 'oha 'ia God 'ai waii nei na ha'abwarasiasi.

⁸ Na'i 'ohasi, na sae ta'aasi 'aigu ha'ata'i. Ma na'i 'oha nai aho'i maia Jisas, 'aigu ha'a-ai'aai sae ta'aasi 'inia manawana mana rarohana na hauasa.

⁹ Ma'ata, na'i na'o 'ia Saetan 'ai hauai mena tanaai sae ta'aasi maai haa'i mwani ha'abu'ohu ma tara'i maho ro'u 'anai ha'ata'inia mena ana. 'Oha na 'iraau noni rai re'i'i mareho 'isi, 'iraau raigu 'adoma'inia do'ia God na hauai mena tanaa.

¹⁰ Na saesi 'ai haa'i mwani mareho ta'a'i mai ha'a-bweubweu'araui noni narau suriai tara 'anai dora ni rongomaata'i. 'Ia God 'a ga'i ha'atahiraui 'onaa rau ga'i hinihiniai Taroha Goro. Me na'i 'oha narau rongoa, rau ai'a raba araisuria marau ai'a hinihinia ro'u.

* **2:3 Sae ta'aa ana Saetan:** Naasi sae nara 'unua 'inia Antichrist.

11 Naasi 'ia God 'ai ha'akuhi'i ahudaa'i marai hinihini'i pwari'i na haa'i sae ta'aasi.

12 Ma na'i dangi ni heihiiri, 'ia God 'aigu 'unua do'iraau ra'i sae ta'a'i, suria rau wa'ewa'e 'ini'i maho ta'a'i na rau haa'i marau ai'a hinihini'i maho ra ha'a-momori.

Moi Ura Baabau Suri'i Hinihinimoo'i

13 Arai do'ora mana asimee'i na'i Kraest, 'ia Araha 'a ta'ahi'amou. Taraawa'a mau mai, 'ia God 'a 'ome sigihi'amou 'anai ruhasi'amou baani'i ora-ora'a amoo'i. 'A ruhasi'amou 'oha mou hinihiniai Taroha Goro 'inia Jisas Kraest mana Hi'ona Maea 'a taraawa'ai tau'aro suri'i tahingamoo'i 'anai ha'amaea'amou. Naasi 'a arari do mei hadahada wa'ewa'e tarau tanaa God 'ini'amou.

14 Ha'amomori, 'ia God 'a 'ome sigihi'amou 'anai daua namou i tahi tarau. Mamou bwane daua mau na'i 'oha meu taroha'inia tana'amoui Taroha Goro. 'Ia God 'a 'ome sigihi'amou do ta'oha moigu rara ro'u 'onaaia Araha aga Jisas Kraest.

15 Naasi arai do'ora mana asimee'i, moi ura baabau mamoi hinihini'i tarau i mareho nameu ha'ausuri'amou 'ini'i suri'i usu-usu amee'i ma ro'u mareho mou rongoi baani'i ngoomee'i.

16-17 Mameu ha'arahesi do'ia Araha aga Jisas Kraest mea God Amaga, rarui ha'a-'o'ori'i 'ado'adomoo'i mararui 'a'auhi'amou neina ha'atee amoo'i mana maho namou haa'i rai goro. 'Ia God 'a ta'ahi'amou mai 'a'auhi'amou 'inia goro ana 'inigia. Ma ha'a-wetewete'i tarau i 'adoma'igaa'i magau 'iraraa do rei'uaa gai mae me 'igaau gai awa ro'u beia.

3

'Ia Pol 'A Ha'angoniraau

'Anai Ha'arahesi 'A'auhia

1 'Io, arai do'ora mana asimee'i na'i Kraest, moi ha'arahesi 'a'auhimeu. Moi ha'arahesi neina Taroha Goro 'ai 'adarara raurau hura'a 'ari tanaraau mwani noni suri'i mwani dora. Mamoi ha'arahesi marai 'adoma'i raorao 'inia Taroha Goro, marai hinihinia 'onaai hinihinia amoo.

2 'Onaai 'iraraa amoo, 'a ragoi sae ta'a'i nara raba ha'a-mama'ai'ameu suria rau ai'a hinihiniai Taroha Goro. Naasi moi ha'arahesi ro'u, mea God 'ai taatahi bwarasi'ameu baaniraau.

3 'Ia Araha 'a haa'i tarau i mareho na 'unu'i. 'Iia 'ai ha'a-wetewete'i 'adoma'imoo'i maai taatahi bwarasi'amou baania Saetan.

4 'Ia Araha 'a ha'a-'o'ori suri'i 'adoma'imee'i do 'i'amou mou suri'i taha nameu bwane 'unu'i tana'amou mamoi suri'i tarau.

5 Mameu ha'arahesi mea Araha 'ai ha'a-aidangisi'amou goro ro'u wou 'inia heita'ahi ana God tana'amou, me 'inia here 'anai ura baabau suri'i rongomaata'i namou siri suri'i 'onaaia Kraest.

Moi Abui 'Age'age

6 Arai do'ora mana asimee'i na'i Kraest, na'i atana Araha aga Jisas Kraest, meu 'unua wetewete tana'amou 'anai awa beira'i baaniraau sae ni heisoi nara 'age'age. 'Iraau nei nara awa moi 'anai to'o hano, rau ai'a araisuriai ringe nameu 'unua tanaraau 'anai suria.

7 'Onaai bwane 'iraraa amoo, 'i'ameu meu ai'a 'age na'i 'oha meu awa bei'amou. Naasi mou ga'i tau'aro wetewete ro'u 'onaimeeu.

8 'Iameu meu tahariraau noni 'oha rau hangani'ameu. Meu tau'aro tarau neina mei abui ha'ahihi'amou 'anai hori maho memeeu.

9 'A mwada'u di'u 'anai 'unu'i maho meu 'irisi'i tana'amou 'anai 'a'auhi'ameu pwaranga moi 'ini'i, suria 'i'ameu ra'i na'otara amoo'i. Me

'i'ameu meu ai'a haua o'asi, suria meu raba ha'ata'inia tana'amoui huunai baronga 'anai awaawaha.

¹⁰ Ma na'i 'oha meu awa bei'amou ani, meu o'ani 'ini'amou, "Iatei na ai'a raba tau'aro, moi abui haa'i 'ana mahoingau."

¹¹ Meu 'unu'i mareho 'ini, suria meu rongoa do tara'i nei bei'amou ra 'age 'anai haa'i tagora, rau hano hairiu moi 'anai ha'a-ta'aabedaau i nei narau raba tau'aro.

¹² Na'i atana Araha aga Jisas Kraest, meu ha'atee wetewete o'ani tanaraau sae o'asi, "Moi awa hatara'i mamoi tau'aro 'anai 'omesuri'amou haarimoo."

¹³ Mei tana'amoui nei namou ai'a 'age'age, meu o'ani, "Moi abui agoheta'i hauai taha na odo-odo."

¹⁴ Hoita, ma 'onaa 'iatei na ai'a araisuri'i taha nameu 'unu'i tana'amou na'i usu-usuni, moi aidangisia goro'a mo'osi mamoi abui hagu beia maigu ninima 'inia 'age'age ana.

¹⁵ Ma rei'uaa namou bwa'i hagu beiai sae o'asi, moi abui here mara maeronga 'inia. Ma 'a ga'i goro do moi ha'abasua 'ini'i maho ta'a'i na haa'i, 'inia 'iia 'e do'oramoo mau beia Kraest.

Ha'atee Ha'ahako

¹⁶ 'Io, meu ha'arahesi mea Araha 'ai awa bei'amou hako maai ha'apapaku'i 'adoma'imoo'i nara torakoake, rei'uaa narai to'oto'o tara'i maho bei'amou.

¹⁷ 'Io, 'inau haariau a Pol nawai usu ha'ahakoai usu-usuni 'inia rimagu, 'onaai bwane haua agua suri'i usu-usu agu'i. Ma na'i madoraa moi re'iai usu nau haua 'ana, moigui aidangisia do 'inau haariau nau usuai usu-usuni, ai'a ta sae'a ro'u.

¹⁸ Meu ha'arahesi mia Araha aga Jisas Kraest, 'ai ha'agorohi'amou hako.

Na 'Etanai Usu-usu Ana Pol Tanaa Timoti

Gere Mamaani 'Iniai Bukani

'E taha na ororiu na'i aba 'anai na'otaranai heiso'i? Na'i madora'a adaui Ha'ataari, 'e taha i tau'aro adaui na'otara 'anai heiso'i ma'e taha i tau'aro adaui noni hinihini? Ra'i gere mareho nagau 'irara'i 'abaia na'i 'etanai usu-usu ana Pol tanaa Timoti.

'Ia Timoti 'e geresae goro ana Pol ma tatau'aro mai ore'a beia suriai taringai harisi. Ma tara'i 'oha raru hano goni 'anai taroha'iniai Taroha Goro. 'Ia Pol 'a ha-ha'ausuria Timoti ma sigihia 'anai na'otara ma 'anai ha'ausuri suri'i tara'i heiso'i nararu taraawa'adi suri'i tara'i 'omaa. Na'i raronai usu-usunisi ra'i ha'ausuringa'i tanaa Timoti 'iniai taha nai ha'ausuriraaui 'ini'i noni hinihini na'i Efesas na'i madora'a na 'ia Pol 'a bwa'i awa beiraaui.

Tara'i ha'ausuri pwapwaari'i ra ha'ausuriraaui noni 'ini'i taha nara ai'a ha'a-momori 'inia Jisas. Tatau'aro ana Timoti naasi 'anai ha'ausuriraaui noni hinihini 'iniai taha na ha'a-momori neina rai abui hinihini'i taha nara ai'a ha'a-momori. Taha na 'ia Pol 'a ha'ausuria ro'u 'inia Timoti, naasi na'i aba 'anai rihunga'i mana ha'arahesi.

Ni usu-usuni, ni aba raha 'inia naasi na hadanga'iniai he'ua i baronganai na'otara na'i heiso'i. 'Ia Pol 'a hadanga'inia ro'u he'ua i 'omehanai barongadi noni hinihini.

Ni ha'ausuringa'i ana'ia Pol tanaraaui sae ni heiso'i na'i madoraasi ra ha'a-momori ro'u mau tanagaau sae ni heiso'i na'i madoraani. 'Oha na 'oi 'oha'iniai 'etanai Timoti 'oi 'ome'ome 'ini'i tara'i ha'ausuringa'i na 'ia Pol 'a hau'i na'oi matai ha'isuri'i.

1-2 Tana'o Timoti:

'Inaua Pol, i Ha'ataari ana Jisas Kraest. 'Ia God i ha'atahi aga mia Jisas Kraest nagau 'u'uria 'anai haa tanagia i tahi tarau, raru ha'ataariau hura'a 'anai tau'aro tanararua. Timoti, i'oe 'o 'onaa do'e huunai garegu 'inia gara to'oraa i ta'i hinihini. Mau ha'arahesi mia God i Amaga mana Araha aga, 'ia Jisas Kraest, rarui ha'agorohi'o, arunga ta'ahi'o ma rarui ha'a-awagorohi'o.

Ha'abasu 'Iniraau Nei

Ra Heitaroha'i Pwapwaari'i

³ 'Oha nau hano 'anai 'ari na'i Provens i Masidonia mau awa ga'u bei'o ani na'i Efesas, 'au ha'ata'u'u'o do'oi awa ga'u 'isi 'anai ha'a-papakuraaui i sae rau maani hiosi'i huudi ha'ausuringa'i 'inia Kraest. Ma na'i 'ohani 'au ha'ata'u'u'o ro'u!

⁴ 'Oi 'unua tanaraau marai abui pwarero 'anai maani'i mamaani ni 'ohabwani nara ai'a ha'a-momori mana bonasiai sadoi'i 'ado'ado adaui atadi burungadaa'i. Ni mareho 'isi ra ha'a-heiraeraesi'i moi noni, maragu ai'a 'a'auhiraaui 'anai hauai taha 'ia God na 'irisia tanaraau. Naia moi na hinihini nagau matai haua 'inia i mareho God na 'irisia.

⁵ Timoti, 'au 'unua do'oi ha'a-papakuraaui, 'inia 'au 'irisia do 'i'amou i nei hinihini na'isi, moi ta'ahi'amou hairiu. Me 'anai ta'ahi'amou hairiu, moi awa odo-odo tarau na'i maana God, na tahingamoo'i rai wadiwadi, mana hinihinimoo'u 'ai odo-odo ro'u.

⁶ Me 'onaaui bwani 'iraraa agaau, tara'i nei rau teha baani'i baronga goro 'isi marau tarisu moi 'anai hadanga'ini'i mareho ra bwa'i 'a'auhiraaui.

⁷ Rau raba ha'ausuriraau noni 'ini'i Ringe ana'ia Moses, miraau haariraau rau ai'a aidangisi'i ro'u. Rau here 'onaa do rau madoma, marau ai'a 'iraraa do rau to'o hadahada moi.

⁸ Me'igaau gau 'iraraa doni Ringe ana'ia Moses ra goro tanaraau i noni, 'onaa rai araisuri'i suria i herehere na odo-odo.

⁹ Ma gau 'iraraa 'i ringe 'isi, 'ia God 'a ai'a haa'i 'anai ha'a-odoodoraau i nei ra bwane odo-odo'a, me 'anai ha'a-odoodoraau i nei ra ta'a'i. 'Onaairaaui nei ra horosia i ringe, 'iraau sae hehereta'a'i, 'iraau ahurodo, 'iraau nei ra awa na'i ora-ora'a, 'iraau nei ra 'itaa God mana mwani mareho maea, 'iraau nei ra ha'amaesi'i amadi mana inadi mana taraani sae ro'u moi,

¹⁰ 'iraau nei ra wawaasua'a, 'iraau sae mwane nara 'ari ro'u moi beiai mwane, mana urao na 'ari ro'u moi beiai urao, 'iraau nei ra beri'i sae 'anai raonga'ini'i 'anai ha'i slev 'ini'i, 'iraau nei ra pwari'i raha mana nei ra matai pwari'i na'i 'ohani kooti, mei 'iraau hako ro'u i nei ra hau'i mareho nara ai'a suriai huunai ha'ausuringa'i.

¹¹ Mana huunai ha'ausuringa'i, naasi ha'ausuringa'i na suriai Taroha Goro 'abaia God na hauasa. Mia God 'a ha'a-'u'uriau 'anai taroha'inia hura'a i Taroha Goro naasi.

Pol 'A Ha'atee Ha'agorohia God

'Iniai Heita'ahi Ana

¹² 'Au ha'atee ha'agorohia Araha aga, 'ia Jisas Kraest, 'inia 'a 'ome sigihiau ma ha'a-'u'uriau ma ha'a-weteweteau 'anai tau'aro tanaa.

¹³ Na'i na'o, ha'arago 'au ha'atee ha'ata'aia Kraest, mau manuraau mau ha'a-rongomaata'iraau nei rau suria. Rei'uaa na o'asi, ma'ata 'ia God 'a ta'ahiau mau ma ai'a ha'a-mama'aiau, 'inia na'i madoraasi 'au ai'a aidangisiai maho nau haua, mau ai'a hinihinia ro'ua Kraest.

¹⁴ Me'ia God 'a goro di'u 'iniau ma haua tanaau i hinihini mana heita'ahi nararu boi baania Jisas Kraest.

¹⁵ 'Inau wai 'unua tana'amou, 'ia Jisas Kraest 'a boi marewanani 'anai ruhasiraau noni ta'a'i baaniai ora-ora'a. Na ha'ateesi 'a ha'a-momori di'u. Naasi 'a goro dona noni hako rai aidangisia marai daua mana hinihinia. Me 'inaua Pol 'au 'iraraa do 'inau naasi mo'o nau ta'aa di'u'a na'i marewanani.

¹⁶ Rei'uaa na o'asi, ma'ata 'ia God a arunga ta'ahiau ma ha'ataaria maia Jisas Kraest 'anai ruhasiau baaniai ora-ora'a. Mia Jisas 'a haua o'asi 'anai ha'ata'inia tanaraau noni ta'a'i do 'ia 'a ahumaratanoa di'u 'iniraau, miraaui rai hinihini marai daua nadaau i tahi tarau.

¹⁷ 'Io, gaau magau ha'aasaa God! Rei'uaa gau bwa'i re'ia, me 'ia 'a mwaeraha tarau tarau ma bwa'i mae ta 'oha! 'Iia moi naasi ta'i God! Gaau magai ha'aasaa tarau! Amen.

Tatau'aro Ana Pol

¹⁸ Timoti, nau ta'ahi'o 'onaai ama na ta'ahiai gare ana. Mau 'irisia do'oi aidangisia doni ha'atee nau usu'i na'i usu-usuni, ra suri'i moi mareho na 'iraau sae hinihini narau matai ha'arangasi'i 'ado'ado ana'ia God rau bwani 'unu'i 'ini'o. Ma 'onaa 'oi ha'isuri'i, na mareho 'isi rai 'a'auhi'o 'anai ura baabau na'i tahingamu beia Kraest.

¹⁹ 'O'i dau baabau na'i taha na'o hinihinia ma'oi bonasia do'oi awa odo-odo tarau na'i maana God. Tara'i nei ra ai'a raba awa odo-odo mana hinihinidi beia Kraest ra ai'a'i.

²⁰ Tara'i nei 'iniraau mwanesi naasia Haemeneas mea Aleksanda. 'Au raba ha'a-mama'airarua'a. Naasi 'au waterarua na'i bwabwahlenai rimana Saetan. Mana'i 'oha nararui rongomaata'i, rarui 'ome 'iraraa doni ha'atee ha'ata'aia adarua God ai'a goro.

2

Huunai Herehere 'Anai Ha'arahesi

¹ 'Io. 'Au ha'a-ta'u'u'amou hako i nei mou hinihini, moi ha'arahesi 'iniraaui noni hako. Moi ha'arahesi 'a'auhiraau mamoi ha'atee ha'agorohia God 'ini'i mwani mareho.

² Mamoi ha'arahesi 'iniraaui saemaua na'i Gaumani ma tara'i na'otara agaa'i ro'u 'anai na'otara goro magai awa 'abenga'i mana awa odo-odo suriai hei'irisina God.

³ A goro dogai ha'arahesi 'iniraaui mwani noni hako, mia God, ni Ha'atahi aga, 'ai ahugoro 'inia.

⁴ 'Inia God 'a 'irisia do 'iraaui inoni hako rai daua nadaau tahi tarau marai aidangisi'i mareho nara ha'a-momori.

⁵⁻⁶ Nara 'ini mareho nara ha'a-momori:
'E ta'i God moi na awa.

Ma 'e ta'i nei moi na awa i ahoaanai noni mia God, 'ia mo'o ra 'unua 'inia Jisas Kraest.

'Iia 'a watea haaria 'anai mae 'anai ruhasigia baaniai ora-ora'a.

'A mae na'i madoraa 'ia God na 'adoma'i nunuga 'inia.

Mana mae na haa, 'a ha'ata'inia goro do'ia God 'a 'irisia do'iraaui hako i noni rai dauai tahi tarau.

⁷ 'Ia God 'a 'irisia dowai taroha'iniai tarohasi tanaraaui nei nara ai'a Jiu marai hinihiniai huunai ha'ausuringa'i. Tarana naasi na 'ome sigihiau 'inia 'anai Ha'ataari ma ha'ataariau tanaraau. Nau ha'a-momori, nau ai'a pwari'i!

⁸ Mau 'irisia do'iraaui sae mwane hinihini suri'i mwani dora rai ha'arahesi. Na tahingadaa'i rai odo-odo marai abui heihoa ma'ua taesu'a 'ana tanei na'i madoraa rai taranga'ini'i rimadaa'i ara'a 'ini ha'arahesi.

⁹ 'A o'asi ro'u, 'iraaui mwani urao rai ha'arahesi suriai here ro'u na odo-odo. Rai abui ho'osi'i bwana na do 'iraaui sae rai wana tonabuu 'iniraaui. 'A ta'isada dorau ga'i ho'osi'i bwana na 'ome arari dorau ga'i ho'osi'i. Rai abui here riaria'i abedaa'i 'onaai hiohio ra haa'i 'ada'i warihudaa'i, ma'ua ha'araurauni 'ini'i gol mana pal, ma'ua dorai ho'osi'i moe'a i bwana ra hori bwara.

¹⁰ Ma'ata, na urao hinihini, 'ai ha'a-omegoroai tahingana 'ini'i moi tau'aro goro na haa'i. Naasi here na ta'isada dorai haa.

¹¹⁻¹³ Suri'i madoraa ni rihunga'i, 'iraaui urao rai awa papaku baturongoi ha'ausuringa'i adaa'i saemwane. 'Inau 'au ai'a watea do 'iraaui urao rai ha-ha'ausuri na'i heisoi, 'inia 'ia Adam naasi nara ha'apwa'araa na'i na'o, maragu ha'apwa'araa Iv na'i muri. Nau ai'a watea ro'u dorai marungiraaui mwane. 'Ini 'uaana?

¹⁴ 'Inia Saetan ai'a pwari'ia Adam, 'ia Iv naasi na pwari'ia ma horosiai ringe ana God.

¹⁵ Na tarana naasi nara rongomaata'i 'inia urao 'oha ra ha'ahutahuta. Ma'ata, 'ia God 'ai ha'atahiraau 'onaa rai hinihinia taraua God, awa heita'ahi, awa maea marai 'omesuriraau haariraau baaniai ora-ora'a.*

3

I Awaha Na Ga'i To'oraa

i Bwauodo Na'i Heisoi

* 2:15 2:15 Na'i ha'atee ni Grik ra o'ani, "Suria 'iraaui urao nara ha'ahutahuta, 'ia God 'ai ha'atahiraau 'onaa rai hinihinia taraua God, awa heita'ahi, awa maea marai 'omesuriraau haariraau baaniai ora-ora'a."

¹ Mawai 'unua tana'o Timoti, 'iatei na raba bwauodo na'i heiso, 'a sigihiai tatau'aro na goro di'u.

² Me 'anai hauai tau'arosi, abu ta maho nai taritari'a na'i tahingana, maigu arari 'anai na'otaradaui noni na'i heiso. Na tahingana beia Kraest 'ai odo-odo neina 'a bwa'i sae nai hiiria mwada'u 'inia ta maho. 'Ai to'oraa moi ta'i urao, mai abui ha'ata'aiai ha'iwai ana. 'Iia 'ai 'omesuria haaria baaniai ora-ora'a mai abui haua i awa 'ome to'o bweubweu'a. 'Iia 'ai wa'ewa'e 'anai taguma'iniraau mahua ma'ai ha'i sae ha-ha'ausuri goro.

³ 'Iia 'ai abui gono raha 'ini'i wai ni bweu 'anai ha'abweua. 'Ai abui awa hahingahui'a, me 'ai awa 'abenga'i beiraui noni. 'Ai abui awa ha'heita'iarau i noni mai abui ta'ahia di'u i ha'a.

⁴ 'Iia 'ai matai 'omesuri ha'agorohi'i gare ana'i mana urao ana. Miraau i gare adaru'i rai ha'ahoua marai abui hahairaesi.

⁵ 'Onaa 'ai bwara tanaa i 'omesuria haariai ruruha ana, 'ai bwara o'asi ro'u tanaa 'anai 'omesuri'i noni ana'ia God.

⁶ Na nei na bura'i hinihini, 'ai abui bwauodo ga'u na'i heiso. 'A gasigu ha'ata'ea haaria 'iniai sigihia raurau ada, magu 'onaaia Saetan na'ia God 'a ha'a-mama'aia 'iniai ha'ata'ea ana haaria.

⁷ 'A goro doni tahinganai sae nai na'otara na'i heiso 'ai odo-odo na'i maadaui noni nara ai'a hinihinia Kraest, marai 'ome 'iraraa do 'iia 'e sae goro. Ma 'onaa na tahingana 'a bwa'i odo-odo, 'iia 'ai ninima 'oha rai hiiria 'iniai taha na ha'atari'aa, mea Saetan 'ai wa'ewa'e 'iniai haua ana i taha na 'irisia.

I Awaha Na Ga'i To'oraa

i Nei Na 'Aau Na'i Heiso

⁸ 'Onaa 'iatei na raba 'aau suri'i tatau'aro ni heiso, 'iraau i noni ra ga'i ha'ahoua ro'u 'iniai awahana na goro, ma'aigu tagora na'i heiso. 'Iia 'ai abui pwapwari'i mai abui wai gono'a 'iniai wai ni bweu. 'Ai abui ha'bweubweu'araui noni 'ini'i ha'a adaa'i.

⁹ 'Iia 'a ga'i dau baabau suri'i huudi ha'ausuringa'i na'ia God na ha'ata'ini'i tanagaau mai abui 'adoma'i heiruarua'a 'ini'i.

¹⁰ Tei na raba 'aau na'i heiso, gau ga'i 'ome surisuria goro ga'u i awahana. 'Onaa na awa odo-odo ma bwa'i maho i ha'atari'aa, naasi 'iia 'a arari 'anai hauai tau'arosi.

¹¹ 'A o'asi ro'u, 'iraui noni rai ha'ahouai urao ana 'iniai awangana na goro. 'Iia 'a ga'i bwa'i to'o mamaani ma'uasi awa to'o bweubweu'a. Ma'e urao na gau ga'i 'u'uria 'ini'i mwani maho hako.

¹² Na nei na 'aau na'i heiso 'a ga'i to'oraa moi ta'i urao mai abui ha'ata'aia i ha'iwai ana. 'Iia 'ai 'omesuria goro i urao ana bei'i gare adaru'i.

¹³ Na nei na 'aau goro na'i heiso, 'iraui noni rai ha'ahoua mana 'adoma'ina 'ai wetewete ma bwa'i maaa'u 'anai taroha'iniai hinihinina beia Jisas Kraest.

Na Huunai Ha'ausuringa'i 'Inia Kraest

¹⁴⁻¹⁵ 'Io Timoti, rei'uaa nau 'adoma'inia dowai 'ariwou mau 'anai garihi'o, me 'a goro i haua agua i usu-usuni tana'o. 'Inia 'onaa nau bwa'i boi raurau, mi'amou ga'i bwane aidangisiai awaha nai goro tanagaau hairiu na'i heiso ana God na tahi tarau. Mana heiso naasi 'anai 'o'oridi huudi ha'ausuringa'i ana'ia God 'onaa'i auu nara ha'a-'o'oriai ruma.

¹⁶ Ma ha'a-momori di'u, na ha'ausuringa'i anai heiso na'ia God na ha'ata'ini'i tanagia, ra ororiu di'u. Naani taha nagau ha'a-momia: 'Ia Kraest 'a boi marewana 'onaa inoni.

Mana Hi'ona Maea 'a ha'ata'inia tanagia doni awangana 'a odo-odo. 'Iraau na enjel rau 'omesia.

Mia Kraest ra bwane taroha'inia 'ari gariai marewana hako.
 Mana mwani noni suri'i mwani 'omaa rau hinihinia.
 Mia God 'a waia ara'a i aro.

4

Ha'abasu 'Iniraau Nei

Rau Heitaroha'i Pwapwaari'i

¹ Na Hi'ona Maea 'a 'unu tahanga'inia goro hura'a do suri'i dangi ha'ahako tara'i nei rai su'a aho'i baania Kraest. Rai suri'i mwani ha'ausuringa'i ta'a'i adaa'i adaro ta'a'i 'anai pwari'iraau noni.

² 'Iraau sae 'isi, rau here 'onaa do 'iraau ra'i sae hinihini maraugu ai'a. Rau pwari'i suri'i ha'ausuringa'i adaa'i! Marau ai'a sigihia i goro mana ta'aa suria ra kuhi i 'adoma'idaa'i

³⁻⁵ Rau ha'a-bwarasiraau noni baaniai ringe i ha'iwai ma 'anai ngaa'i tara'i mahoingau. Ma'ata, 'ado'adosi 'a ai'a suriai 'ado'adona God. Na'i 'oha 'ia God na ha'apwa'ara'i mwani mareho na'i marewana, 'a 'unua dora goro hako. Ai'a ta mareho nai ta'aa! Mea God 'a ha'apwa'ara'i mahoingau tanagaau nei na gau hinihiniai huunai ha'ausuringa'i. Naasi, 'onaa bwane 'unua ana God, mwani mahoingau ra goro hako ma 'a goro 'anai ngaa'i taha gau 'adoma'inia 'anai ngaa'i. Ma'ata na'i na'o magaigui ngau, gai ha'arahesi ga'u 'anai ha'atee ha'agorohia God 'ini'i.

Sae Tatau'aro Goro Ana Jisas Kraest

⁶ Timoti, 'onaa na'o haa i ha'ausuringa'i 'ini tanaa hako i 'adonai noni hinihini, i'oe 'oi ha'i sae tatau'aro goro tanaa Jisas Kraest. Mai ha'ata'inia do'o raha ara'a wetewete na'i ha'ausuringa'i anai hinihinigaau mana mwani ha'ausuringa'i goro na'o ha'isuri'i.

⁷ Abui bahurongo'i mwani mamaani rongo to'o bweubweu'a ni marewana nara ai'a ha'a-momori. Ma'ata 'oi bonasia dona tahingamu beia Kraest 'ai wetewete ro'u wou.

⁸ Mawai 'unua tana'o, haa'i here 'anai ha'a-weteweteai abemu 'a goro, ma'ata here 'anai ha'a-weteweteai tahingamu beia Kraest 'a goro di'u ro'u wou. 'Inia na'i 'ohani 'ai 'a'auhi'o na'i marewanani, mei na'i ta'oha nai boi mau 'ai haua tana'o i tahi tarau.

⁹ 'A goro gai hinihini'i ha'atee 'isi magari ha'isuri'i.

¹⁰ 'Ia God na awa tarau, 'a ha'ataaria mai garena 'anai mae 'anai ruhasiraau hako i noni baaniai ora-ora'a, ororiu 'igaau nei gau hinihinia. Tarana naasi nagau tau'aro raha 'inia tanaa Jisas, suria 'igaau gau 'u'uria do 'iia nai ruhasigia.

¹¹ Naasi 'oi ha'ausuriraau noni hinihini 'ini'i mareho 'isi, ma'oi 'unua tanaraau 'anai ha'isuri'i.

¹² Abui tanei 'ai 'adoma'i ha'adiohi'o 'iniai haoru amua. Ma'ata na ha'atee amu'i mana barongamu, na heita'ahi amua mana hinihinimu mana tahingamu na odo-odo, 'e ha'ausuringa'i tanaraau noni hinihini 'anai suria.

¹³ Tari 'oha wai taha aho'i mai bei'amou, 'oi abui agoheta'i 'oha'inia hura'a i Usu-usu Maea tanaraau noni 'anai ha'ausuriraau mana ha'a-'o'oriraau 'inia.

¹⁴ 'A 'ua? 'O 'adoma'inia mau i madoraa 'iraau na rarabea ra ha'ateenga'ini'o ani, mana na'otara na'i heiso'i ra nuga'i rimadaa'i hungamu 'anai daubohi'o? Na'i 'ohasi 'ia God 'a haua tana'o i bane na ororiu di'u ma rabasia do'oi tau'aro tarau 'inia.

15 Abui kaku'a'i ma'oi abui agoheta'ini'i mareho nau 'unu'i tana'o 'isi. Me'iraau noni rai 'omesia do'o here ha'agorohiai tatau'aro amua tanaa God.

16 'Oi 'omesuri ha'agorohiai tahingamu mana ha'ausuringa'i amu'i. 'Onaa 'oi haua o'asi tarau, 'ia God 'ai ha'atahi'o beiraau nei rau bahurongo'o.

5

Barongamu Tanaraau Noni

1 Abui ha'atee haungarimu tanaai nei na wari, 'onaa ra'i mareho na ha'atari'a'i. 'Oi 'abenga'i ha'atee tanaa 'onaa do'iia 'e huunai amamu. Tanaraau geresae rau ga'i 'onaa do ra'i do'oramu,

2 'iraau urao wari 'onaa do ra'i inamu, miraau gere urao rau ga'i 'onaa do ra'i koamu. Tanaraau gere urao 'oi haua beiai 'adoma'i na odo-odo.

3 Moi taguma'iniraau nao nara bwarai taguma'iniraau haariraau.

4 Ma'ata 'onaa 'e nao na to'ora gare, 'iraau gare ana'i ma'uasi 'iraau wawae ana'i narai taguma'inia. Naasi taharia aho'i adaau inadaau ma'ua wae adaau 'ini'i taguma'i na hau'i tanaraau na'i 'oha narau kekerei. 'Ia God 'ai wa'ewa'e 'iniai mahosi. 'A ororiu do 'iraau nei rau 'unua haariraau do ra'i sae hinihini rai ha'ata'ini'i na'i tatau'aro adaa'i taha rau hadanga'ini'i.

5 'Irai nei nara rabasiai hei'a'auhi naasi 'iraau nao nara ai'a to'o nei 'anai 'a'auhira. Na 'u'uridaau 'a awa hako beia God mara ha'arahesi waiori tanaa God 'anai 'a'auhiraau.

6 Ma'ata 'onaa 'e nao na suria moi hei'irisi ta'aa anai abe, 'a ai'a ta'isada do moi taguma'inia, 'inia rei'uaa na abena 'a tahi, ma na'i tahingana beia Kraest 'a bwani mae'a.

7 Nera 'isi mareho na'oi ha'ausuriraau goro i nao 'ini'i 'anai ha'isuri'i. 'Onaa 'ai o'asi, mara bwa'i sadoia ta maho narai ha'ahuniraau 'inia.

8 Me 'onaa 'ia tei na ai'a haua ta mareho 'anai 'a'auhiraau nei na'i burungana ma'ua na'i ruruha ana haaria, na hinihinina beia God 'a ai'aa, ma ta'aa di'u ro'u wou baanira i nei ra ai'a hinihinia God.

9 'A goro do'o ga'i usu'i dio i atadi nao na ta'isada 'anai 'a'auhi'i. Ma'ata 'oi aidangisia dorai tari ono tangahuru harisi ma ara'a, ma'oi aidangisia ro'u do 'iraau rau ai'a ha'ata'ai'i ha'iwai adaa'i.

10 'Oi usu'i dio i atadi nao na 'iraau noni rau 'ome 'irara'i mwani tau'aro goro adaa'i. 'A 'ua? Rau 'omesuri ha'agorohi'i gare adaa'i? Rau ha'amaotoraau mahuara suri'i ruma adaa'i? Rau ha'a-anoanoraau haariraau 'anai 'a'auhiraau noni hinihini? 'A 'ua? Rau matai 'a'auhiraau noni narau bwara suri'i tahingadaa'i? 'Iraau ra'i urao nara bonasia haa'i tarau i mwane mareho goro? 'Onaa rau here goro o'asi, naasi 'a ta'isada 'anai usu'i dio i atadaa'i.

11 'Oi abui usu'i dio i atadi nao ra ai'a tari ono tangahuru harisi. 'Inia na'i 'oha nai wetewete i 'adoma'idaa'i 'ini raba ha'iwai aho'i, ra matai kaku'aa moi duruduru nara haua beia Kraest 'anai tau'aro tanaa.

12 'Oha na o'asi, 'ia God 'ai hiiriraau 'iniai horosia adaau duruduru naasi.

13 Ma ro'u, rau gasi wai'age'a 'onaa rai awa moi 'anai hano hairiu suri ruma 'anai mamaani. Ma gasigu 'ariwou maraugu taraawa'a 'anai hadanga'iniai nata nei, bonasiai rongo sibasiba nga'ini'i maho na nata sae na haua, mana hadanga'ini'i mareho nara ai'a ta'isada 'anai hadanga'ini'i.

14-15 'O 'iraraa, tara'i nao ra haoru nara bwane murisia Kraest 'anai suria Saetan. Naasi 'a goro do'iraau i nao nara haoru mau rai ha'iwai aho'i, neina rai to'o gare marai matai 'omesuriraau gare adaa'i. Ma naasi, na maerongagaau rau bwa'i 'unu ha'a-ta'ai'agaau, 'inia na nao ra awa to'o 'iniai ha'iwai adaau.

¹⁶ Naani ha'ahakonai mareho nau raba 'unua 'iniraaui nao. 'Onaa 'e urao hinihini na to'oraai nao na'i ruruha adaau, 'a goro do 'iia na ga'i taguma'inia. 'A ai'a goro do'ai ha'a-'u'uria 'iniai heisoi, neina heisoi 'a bwa'i hih'i'a di'u tanaa 'anai taguma'ini'i nao na ai'a ta sae 'anai 'omesuri'i.

Ha'ausuringa'i Tanaraaui

Na'otara 'Anai Heisoi

¹⁷ Timoti, 'a goro dona bwauodo na'i heisoi, moi 'adoma'i ha'ahouraaui mamoi tahariraaui goro 'iniai tau'aro goro adaau. Ororiu 'iraaui nei rau tau'aro raha 'anai taroha'iniai Taroha Goro marau ha'ausuriraaui noni 'inia.

¹⁸ Ni 'uaana nau 'unua 'inia domou ga'i tahariraaui goro? 'Inia na Ususu Maea 'a o'ani, "'Oha na'o ha'atauroai kau 'anai buu kahoi'i koradi wiit, 'abu hunasiai ngoona, maai ngau.'"* Ma o'ani ro'u, "'Iatei na tau'aro, 'a arari do rai taharia.'"†

¹⁹ Abui baturongoai mamaani na ha'ata'aia i na'otara 'anai heisoi 'onaa 'a hura'a baania moi waira ta'i. 'Onaa 'e waira rua ma'ua oru, naasi na odo-odo 'anai baturongoa.

²⁰ Ma 'onaa 'e na'otara na'i heisoi na hauai mareho na ai'a goro ma ai'a raba agoheta'inia, 'oi ha'atee wetewete tanaa na'i maadaaui noni hunga neina rai 'omesia. Naasi raigui mamaa'u 'anai ha'isuria ro'u i taha na haua.

²¹ Na'i maana God mea Jisas Kraest mei maadaaui hako i mwani enjel maea wai 'unua tana'o. 'Oi 'adoma'ini'i tarau i mareho 'isi ma'oi ha'isuri'i. 'Oi ha'ata'isadaa hako i tatau'aro amua tanaraaui noni ma'oi abui aba beia tanei.

²² 'Oi abui to'o sigihia raurau moi sae 'anai tatau'aro na'i heisoi. 'Inia 'onaa 'e maho ta'aa nai haua, 'ai 'ome 'onaa do i'oe 'o 'adoma'i aratara beia 'iniai maho na hauasi. 'A goro do'oi bonasiai awa beira'i baani'i mwane mareho ta'a'i.

²³ Ma'ata, 'a ai'a ta'aa 'onaa 'oi gonohia ta gere waen 'anai ha'agorohiai daoha na to'o tarau na'i ahumu. 'Oi abui gono wai tarau moi.

²⁴ Timoti, 'oi aidangisia doni 'inodi tara'i sae ra ha'ata'i goro moi hura'a mana noni 'a mwada'u 'anai hiiriraaui 'ini'i. Mana 'inodi tara'i nei ra bainihu tari 'oha raigui ha'ata'i mau ro'u hura'a.

²⁵ 'A o'asi ro'u na'i tatau'aro goro. Tara'i sae gau re'i'i tatau'aro goro ra hau'i. Ma tara'i nei gau ai'a re'i'i tatau'aro goro ra haa'i. Ma'ai tari mau mai madoraa rai ha'ata'ini'i hura'a i tau'aro goro adaai.

6

Tanaraaui Slev

¹ 'Iraau i slev nara hinihini, 'a goro dorai 'adoma'i ha'aasaa mana ha'ahouai nei na marungiraaui. Ma naasi 'iraaui noni rau bwa'i ha'atee ha'ata'aia mwada'ua God mana ha'ausuringa'i ana'i heisoi.

² 'Onaa i'oe 'e slev mana bwauodo amua 'e sae hinihini, 'oi abui 'ado'ado o'ani, "'Bwauodo agua, 'e sae hinihini ro'u. Naasi wai abui ha'ahoua ma'ua tau'aro raha tanaa.'" 'Ado'adosi ai'a goro! 'O ga'i tau'aro raha di'u 'anai 'a'auhia ma 'o ga'i tau'aro goro tanaa, 'inia 'iia 'e sae hinihini ro'u na'o ta'ahia.

Timoti, 'oi ha'ausuri ma'oi ha'ata'u'uraau hako i noni hinihini 'anai ha'isuri'i mwani mareho 'isi.

Huunai Toto'ora

* 5:18 5:18 Diutronomi 25:4 † 5:18 5:18 Levitikas 19:13; Luk 10:7

³ Ra'i nei ra haa'i ha'ausuringa'i he'ete'i tanara i noni. Marau ai'a suriai huunai ha'ausuringa'i 'inia Araha aga, 'ia Jisas Kraest, na ha'ausurigaau 'inia awaha na odo-odo.

⁴ 'Iraaui nei ra o'asi, ni 'adoma'ida 'a honu moi 'inia ha'a-ta'eta'e maraugu ai'a aidangisia'a ta maho. Rau awa moi 'anai heitohetohe nga'ini'i 'ado'ado 'ada'i ha'atee. Ma naasi ra kakawa 'omesiai nata nei mara heihoa, ra hei'isi'isi mara hinihini ha'ata'ai'i sae.

⁵ Rau awa moi 'anai heita'ia mana 'adoma'ida ra ai'a odo-odo. Ma bwara tanaraui 'ome 'iraraai taha na ha'a-momori. Rau 'adoma'i do 'onaa rai hinihinia God rai toto'ora.

⁶ Ma'ata, na nei na hinihinia God ma wa'ewa'e 'ini'i mareho na to'ora'i, naasia mo'o na huunai toto'ora.

⁷ 'Oha gau huta mai marewanani, ai'a mareho gai huta beia. Mana 'oha gai mae, 'a bwa'i mareho ro'u gai waa.

⁸ Naasi 'onaa gau to'o mahoingau 'anai ngau mana bwana 'anai ho'osi'i na'i awa gau haa, ma 'ai o'asi'a. Gau ga'i wa'ewa'e 'ini'i.

⁹ Mana nei ra bonasiai toto'ora, ra siri na'i heiohongi mara 'onaai sae na to'o na'i hu'o na bwarai hura'a baania. Na mwani 'adoma'i ta'a'i mana 'adoma'i bweubweu'a nara siri suri'i, rai ha'ata'ai'i hako i tahingadaa'i, mea God 'ai ha'a-mama'airaau 'ini'i.

¹⁰ 'A rago i mareho ta'a'i ra siri mai 'ini 'adoma'i riu 'inia ha'a. Tara'i nei nara rabasia di'u i ha'a, ra bwane teha baaniai hinihinidi beia Kraest mana ahutotou 'ai maata'i 'onaai naihi na ganu tauraga suri'i to'ohunudaa'i.

Maho Timoti Nai Haua

¹¹ Me i'oe, i'oe 'iia ana God, 'oi awa beira'i baani'i maho ta'a'i o'asi. Bonasia awa suriai maho na odo-odo na'i maana God. Na'i tahingamu beia Kraest 'oi awa suriai hei'irisina, 'oi ura baabau na'i hinihinimu, ma'oi 'u'uria tarau a God. 'Oi ta'ahia God mana mwani noni hako, 'oi ura baabau suri'i rongomaata'i na'o siri suri'i, ma'oi 'abenga'iniraui noni.

¹² 'Oi bona ma'oi here goro na'i hahano amua beia Kraest. 'Oi 'onaai sae na 'eba wetewete 'anai dauai heitahari. Mana heitahari, naasi 'i tahi tarau. 'Inia naasi tahi 'ia God na soi'o 'ana, na'i madoraa na'o taroha'inia hura'a i hinihinimu na'i maadaau hako i mwani noni rago.

¹³ Na'i maana God na haa'i tahi tanaa hako i 'ahutanai mareho, ma na'i maana Jisas Kraest na ha'ateenga'inia hura'a i hinihinina tanaa Pontias Paelat, wai 'unua tana'o.

¹⁴ 'Oi ha'isuri'i odo-odo maho God na ha'ata'u'u'o 'ini'i ma'oi 'omesuri'i goro daara'i tari 'oha 'ia Jisas Kraest, i Araha aga, 'ai aho'i mai.

¹⁵ Mia God 'ai ha'ataaria maia Jisas Kraest na'i madoraa 'iia haaria na sigihia. 'Ia God na hauasa, 'iia haaria na marungi'i mwani maho na'i marewana ma mena di'u'i mwani mwaeraha mana araha hako.

¹⁶ 'Ia God moi na awa tarau ma bwa'i mae ta'oha. 'A awa na'i bewaa na bwa'i sae 'ai taha mwada'u iei. Ai'a ta sae 'ai re'ia God ma bwa'i sae nai matai 'omesia. Gaau magau ha'a-aneanea God, 'inia 'iia 'a mena tarau ma bwa'i hako! Amen.

¹⁷ 'Io, 'oi ha'a-ta'u'uraui sae ni heisoi nara toto'ora 'ini'i bori ni marewana. Rai abui ha'ata'eraau haariraau. Rau ga'i bwa'i 'u'uri'i toto'ora adaa'i, 'inia mareho 'isi rai ai'a'i moi, ma'ata rai 'u'uri moi beia God. 'Inia 'iia na bane'i tanagiai mwani maho 'anai ha'a-wa'ewa'egia.

¹⁸ 'Oi ha'ata'u'uraui mana here rai haa'i rai goro 'anai 'a'auhiraau hako i noni. 'Unua tanaraui toto'ora 'anai ha'i inoni hisuhisu beiai ahu mwa'emwa'e. Na here goro o'asi, naasi huunai toto'ora adaa'i.

¹⁹ 'Onaa narai haua o'asi, 'iraaui rai ha'igoni'i nadaa'i ara'ai aro i toto'ora na matai 'a'auhiraau na'i madoraa nai boi ta'oha. Ma naasi raigu'i sadoia nadaaui huunai tahi.

²⁰ 'Io Timoti, 'omesuri ha'agorohiai maho God na ha'a-'u'uri'o 'inia. Abui bahurongo'i mwani mamaani rongo to'obweubweu'a ni marewana. Tara'i nei ra rongo madoma 'onaa dora ha'a-momori maragu pwari'i moi.

²¹ Tara'i nei ra suri'i ha'ausuringa'i 'isi mara bwani ha'a-ai'a'i hinihinidaa'i.

'Io, 'au ha'arahesi mia God 'ai ha'agorohi'amou hako.

Na Ruanai Usu-usu Ana Pol Tanaa Timoti

Gere Mamaani 'Iniai Bukani

'A 'ua? Tara'i 'oha 'o arunga 'onaa do i'oe 'o ai'a arari 'anai haa ta mareho goro tanaa God? 'Ia Timoti 'e heiha'auu goro tanagaau 'iniai he'ua God na matai tau'aro beia namoiwou moi ta sae 'anai haa'i tara'i mareho ororiu.

'I amana Timoti 'e ai Grik mana inana naasi 'e ai Jiu. Naasi 'a 'ome 'onaa do 'iraau Jiu, goni beiraau Grik rau bwa'i taraa wa'ewa'e 'anai baturongoa Timoti. Mana nata mareho ro'u, 'ia Timoti 'e sae na haoru di'u.

Mana'i herehere adaau na'i madoraasi, 'iraau saemaua naasi nara ha'ahou'i di'u'i sae haoru. Taringai 'oha na 'ia Pol 'a 'unua tanaa do 'ai abui maaa'usiraau noni 'anai ura 'anai hadahada na'i maadi. 'A 'ua? Sae o'asi 'a matai hauai tatau'aro na ororiu tanaa God ma'ua ai'a?

'Io. Na'i muri 'ia Timoti 'agu buna ha'i na'otara goro na 'a'uhia goro a Pol na'i tatau'aro ana, ma 'a'uhiraau di'u ro'u i noni hinihini suri'i ro'u tara'i 'omaa. 'Ia Timoti 'a hauai tatau'aro na ororiu tanaa God rei'uaa na 'ia Timoti 'a ai'a taraa goro suri'i tara'i mareho. Na'i usu-usunisi 'ia Pol 'a ha'a-weteweteai 'ado'adona Timoti mai ramoramo 'anai ha'ausuriraau noni hinihini 'iniai taha na ha'a-momori.

1-2 'Inaua Pol, nau usuai usu-usuni tana'o Timoti. 'Ia God 'a sigihiau 'anai Ha'ataari, mawai taroha'iniai tahi tarau na durua tanaraau nei ra hagu beia Jisas Kraest. Timoti, i'oe 'o 'onaa do'e huunai gare agua. 'Au ha'arahesi mia Godi Amaga, mea Araha aga Jisas Kraest, rarui ha'agorohi'o, rarui goro 'ini'o, mararui ha'a-awagorohi'o.

Abui Ninima

'Anai Taroha'iniai Taroha Goro

³ 'Au ha'atee tagio tanaa God nau tau'aro tanaa beiai awaha na odo-odo 'onaairai wauwa agu'i. 'Au ha'atee tagio tarau tanaa 'ini'o suri'i ha'arahesi agu'i suri rodo mana dangi.

⁴ 'Au 'adoma'iniai angisiau na'o haa na'i madoraau nau hano baani'o, maugu kae raba re'i'o aho'i. 'Au ga'i kae wa'ewa'e 'onaa garai hairee'i ro'u.

⁵ 'Au 'adoma'inia ro'u i hinihinimu na wetewete 'onaaiai hinihinina waeamu, 'ia Lois, mia inamu, 'ia 'Iunis. Mau hinihini wetewete dona hinihinimu 'a ta'isada ro'u o'asi.

⁶ Tarana naasi nawai 'unua ro'u 'inia tana'o. 'Oi tau'aro tarau 'iniai bane ni tatau'aro na 'ia God na haua tana'o na'i madoraau nau nuga'i rimagu na'i hungamu mau daubohi'o.

⁷ Na Hi'ona Maea na'ia God na haua tanagia ai'a 'anai ha'a-mamaa'usigia. Me 'a haa tanagaau i mena, heita'ahi, mana wetewete 'anai 'omesurigaau haarigaau baaniai ora-ora'a.

⁸ Naasi, 'o abui ninima 'anai taroha'inia Araha aga, ma'o abui ninima 'iniai awa agua na'i rumanihoo 'iniai suria agua Kraest. Ma'ata garai ta'i rongomaata'i 'anai taroha'iniai Taroha Goro. Ma'o abui maaa'u, 'inia 'ia God 'ai ha'a-wetewete'o 'iniai mena ana.

⁹ 'Iia 'a ruhasigaau baaniai ora-ora'a ma soigaau dogai ha'i noni ana'i, ai'a do 'ini'i tau'aro goro gau haa'i. Me 'a suriai hei'irisina mana heita'ahi ana tanagia. Ni heita'ahi ana, 'a haua tanagia na'i garena, 'ia Jisas Kraest, mau na'i na'onai pwa'ara na haa i marewana.

¹⁰ Ma na'i 'oha 'ia Jisas Kraest 'a huta mai, 'agu buna ha'ata'inia tanagiai heita'ahi anasi. Mana Taroha Goro 'a ha'ata'inia tanagia do'ia Jisas 'a ha'a-ai'aai mae tarau ma ha'ata'inia ro'u i tara 'anai dauai tahi tarau.

¹¹ 'Ia God 'a sigihiau 'anai Ha'ataari mana ha'ausuri 'anai taroha'iniai Taroha Goro naasi.

¹² Tarana naasi nau rongomaata'i o'ani 'inia na'i rumaniho'o. Ma rei'uaa na o'asi, 'inau ai'a ninima, 'inia 'au aidangisia Jisas Kraest nau 'u'uria. Mau 'iraraa do'ia 'ai 'omesuriai taha na ha'a-'u'uriau 'inia, 'aigui tari 'oha 'ai aho'i mai.

¹³ Timoti, ni ha'ausuringa'i nau 'unu'i tana'o 'oha nau awa bei'o, 'oi daa'i baabau, 'inia mareho 'isi ra ha'a-momori. Ra'i heiha'auu goro tana'o na'i here na'oi ha'ausuriraau noni. Ma 'oi haa'i mareho 'isi beiai hinihini mana heita'ahi nagau to'oraa 'iniai hagu agaau beia Jisas Kraest.

¹⁴ 'Oi taguma'inia goro i Taroha Goro 'ia God na ha'a-'u'uri'o 'inia. Na Hi'ona Maea na awa beigaau nai 'a'auhi'o.

¹⁵ 'Onaai bwane 'iraraa amua, 'ia Fijelas mea Hemojenis miraaui noni hinihini na'i Provensi Eisia ra gagata'inau 'iniai awa agua na'i rumaniho'o.

¹⁶⁻¹⁷ Me 'au ha'angonia Araha 'anai ha'agorohia Onesiforas mana urao ana bei'i gare adaru'i. Rei'uaa nau awa na'i rumaniho'o, mia 'a ai'a gagata'inau. Na'i madoraa na ataha wou i Rom, 'ia 'a siba suriau nagu buna sadoiau na'i rumaniho'o. 'Iia 'a ha'a-weteweteai 'adoma'igu 'ado 'oha.

¹⁸ I'oe 'o 'iraraa ha'agorohia ro'u i tatau'aro goro na hua tanaau na'i Efesas. Naasi, 'au ha'arahesi mea Araha 'ai goro 'inia na'i madoraa nai aho'i mai.

2

Sae Hehei'oi Goro Ana Jisas Kraest

¹ Garegu Timoti, 'oi ura baabau beia i wetewete na'ia Kraest na haa tanagia 'iniai ta'ahigia ana.

² Ni mareho na'o bwane rongo'i nau ha'ausuriraau 'ini'i inoni 'isi, 'oi taroha'ini'i hura'a tanaraau nei na'oi 'u'uriraau, marai taroha'ini'i hura'a ro'u tanaraau tara'i nei.

³ 'Oi awa ha'aagau 'anai rongomaata'i beiau, 'onaai sae hehei'oi goro ana Jisas Kraest.

⁴ Ni sae hehei'oi goro 'ai ha'a-wa'ewa'ea tarau i mwaeraha ana, tarana naasi 'a bwa'i bwarabwara'a 'ini'i mwane tatau'aro ni abau 'omaa.

⁵ 'A o'asi ro'u, 'iatei na 'eba heiohoo ma bwa'i suri'i ringe ra nuga'i, 'a bwa'i daa mwada'u ta heitahari.

⁶ Mea tei na tagora raha 'iniai mou, naasia mo'o na ta'isada 'anai ngau tahamora na'iei.

⁷ 'Io, 'oi wai'ado'ado suriai oru heiha'auusi, mea Araha 'aigui ha'a-aidangisi'o 'ini'i.

⁸ Timoti, 'oisu 'adoma'i suria Jisas Kraest. 'Iia 'a hura'a mai na'i burungana Deved ma ha'ata'inia do 'ia 'e noni. Mana mae mana suruta'e na hua 'a ha'ata'inia do 'ia 'ia God. Naasi Taroha Goro nau taroha'inia tanaraau noni.

⁹ Mei suriai taroha'inia o'asi agua, ra hunasiau na'i rumaniho'o 'anai ha'a-mama'aiu 'onaai sae hehere ta'aa. Rei'uaa na o'asi, na ha'atee ana God ra bwa'i hunasi'i mwada'u. Na Taroha Goro 'ai 'adarara hako 'ari suriai mwane dora.

¹⁰ Tarana naasi, rei'uaa nau rongomaata'i, 'au bwa'i agoheta'i tau'aro tanaa God. Nau raba 'a'auhiraau nei 'ia God na bwani 'ome sigihiraau marai hagu beia Kraest. Mia God 'ai ha'atahiraau baaniai ora-ora'a marai daua nadaau i tahi tarau.

- 11 'E ha'atee na huunai ha'a-momori na o'ani,
Rei'uaa gau mae 'inia suria agaaua Kraest,
'igaau gai tahi tarau beia.
- 12 Rei'uaa na bwarai mwani maho magau ura baabau na'i hinihinigaau,
'igaau gai heimarungi beia.
- Ma 'onaa gau 'unua dogau ai'a 'iraraa,
'iia 'ai 'unua do ai'a 'iraragaau ro'u.
- 13 Rei'uaa gau ai'a dau baabau suri'i duruduru agaa'i,
me 'iia 'a dau baabau suri'i duruduru ana'i, 'inia 'iia 'a bwa'i horosiai
taha na durua.

Sae Tatau'aro Goro Ana God

14 Timoti, 'o abui agohe 'anai maani'i mareho 'isi tanaraaui noni hinihini na'i 'isi. Na'i maana God 'oi ha'atee wetewete tanaraau do rai abui awa moi 'anai heiraeraesi suri'i 'ado'ado 'ada'i ha'atee suri'i ha'ausuringa'i agaa'i. 'A bwa'i mareho goro rai sadoia na'i heiraeraesi. Mareho 'isi rai ha'ata'ai'i 'adoma'ida i nei ra bahurongo.

15 'Oi bonasia doni tatau'aro amua tanaa God 'ai goro, mia God 'ai taeni'o 'inia. 'Oi ha'ausuriraau noni 'inia ha'atee ana na'i huunai ringe goro ma odo-odo. 'Onaa 'ai o'asi, i'oe 'o bwa'i arunga ninima 'inia tatau'aro amua na'i maana God.

16 'Oi abui bahurongo'i mwani mamaani rongo to'obweubweu'a ni marewana. 'Inia mamaani o'asi ra ha'atehaa i noni baania God.

17 Mareho ra maani'i ra ta'a'i di'u 'onaai keo ta'ata'aa na ngangau. 'Ia Haemeneas mea Filitas nararu haa'i mamaani o'asi.

18 Raru bwane ha'a-ai'aai huunai hinihinidarua na odo-odo. Mararu taroha'inia 'ari do gau bwa'i tahi aho'i ro'u ta'oha baaniai mae, 'inia 'igaau noni hinihini gau bwane to'oraai tahi haoru 'oha gau hinihinia Kraest. 'Iniai ha'ausuringa'isi, raru bwane ha'ata'ai'i hinihinidi tara'i nei ro'u.

19 Ma rei'uaa na o'asi, na huunai ha'ausuringa'i ana God 'ai ura baabau 'onaai kaeni hau na bwarai su'a. Ma na'i hunganai hausu ra usua o'ani, "Ia Araha 'a aidangisiraau noni ana'i." Ma ra o'ani ro'u, "Iraau nei ra 'unuraau do ra'i noni ana'ia Araha rai rihosi baani'i barongadaa'i nara ta'a'i."

20 Na'i raronai ruma raha ra'i rabo'o ma ra'i oba ra awa iei, 'e nei ma'e 'omehana. Ra'i nei ra tagora'i 'ini'i gol ma'ua silva, ra'i nei 'ini'i hasi'ei, ma ra'i nei 'ini'i mwago. Ra'i nei 'ada'i dangi ororiu ma ra'i nei 'ada'i dangi haari'i.

21 'Ia tei nai sigia haaria baani'i ta'a'i nau 'unu'isi, 'iia 'ai 'onaai rabo'o ra haa 'anai dangi ororiu. Na tahingana 'ai odo-odo mia Araha 'ai matai sigihia 'anai haa'i mwani tatau'aro goro tanaa.

22 Timoti, 'oi sigi baani'i mwani 'adoma'i ta'aa ada'i sae haoru. 'Oi bonasia awa odo-odo ma'oi 'u'uria taraua God. 'Oi ta'ahiraau noni, ma'oi hagu goro beiraau sae nara wariwari baaniai ora-ora'a.

23 'Onaa 'unua agua tana'o, 'oi abui bahurongo'i mwani heitohetohe rongo to'obweubweu'a. 'Inia mareho 'isi ra ha'asirihi'i mai moi heita'ia tanaraaui noni.

24 Na noni tatau'aro ana God ai'a 'anai ha'aheita'ia, ma'ata 'anai 'a'auhiraau noni. 'Iia 'ai ha'ausuri goro mai abui taesu'a mwada'u.

25 'Ai 'abenga'i beiraau nei nara ai'a 'adoma'i aratara bei'i ha'ausuringa'i ana'i. 'Onaa 'ai o'asi, 'ia God 'ai matai rihosiai 'adoma'ida'i marai aidangisiai huunai ha'ausuringa'i.

26 Ma na'i 'oha na 'adoma'ida 'ai odo-odo, rai hora baania Saetan na dauraau ma ha'a-araisuriraau 'inia hei'irisina.

3

Ta'a'i Suri'i Dangi Ha'ahako

¹ 'Oi aidangisia, do na'i gaarangiai madoraa na'ia Kraest 'ai aho'i mai, 'ai bwara di'u tanaraau noni hinihini.

² Na noni rai 'adoma'iniraaui moi haariraaui marai ta'ahia di'u i ha'a. Rai 'adoma'i ha'a-ororiuraui baaniai nata nei marai ha'ata'eraui haariraaui. Rai ha'atee ha'ata'aiiai nata sae, marai hairaesii bei'i amadaa'i mana inadaa'i. Ra bwa'i ha'atee tagio tanaai nata nei, mara bwa'i 'adoma'inia God.

³ Ra bwa'i to'oraai heita'ahi mana 'adoma'i nugasi tanaai nata nei. Rai to'o haisubuni, rai awa heheingahui'a mana sibania moi haa'i here ta'a'i. Rai 'ita'i mwani mareho goro.

⁴ Rai ha'ahaingahu 'ini'i nei adaa'i marau bwa'i matai 'ome taradi mareho ra haa'i. Na 'adoma'idaa'i rai honu 'inia'i ha'a-ta'eta'e. Rai mwa'emwa'e di'u 'ana'i hau'i taha 'ana'i ha'a-arungagoroai abe, mana ta'ahia God 'a bwa'i.

⁵ Rai here 'onaa do ra'i noni hinihini maragu ai'a, 'inia rau ai'a 'irisia'i mena ana God 'ana'i marungiraaui.

Timoti, 'oi sigi baani'i noni o'asi.

⁶ Tara'i nei o'asi, rau siri suri'i ruma adaa'i urao nara matai hinihini mwada'u. Rau raba pwari'iraaui moi 'ini'i mwani ha'ausuringa'i he'ete'i. Urao 'isi rau arunga 'ino'a 'ini'i mareho ta'a'i rau bwane hahaa'i maraugu raba araisuria moi hei'irisina'i abe.

⁷ Nei ra o'asi, namoiwou ta ha'ausuringa'i rai rongosuri'i, maraugu bwa'i aidangisia moe'a i huunai ha'ausuringa'i.

⁸ Nei ra hano hairiu suri'i ruma adaa'i urao 'isi, ra ha'atee ha'ata'aiiai huunai ha'ausuringa'i, 'onaaia Janis mea Jambris 'oha raru ha'atee ha'ata'aia Moses. Na 'adoma'ida i noni o'asi ra ta'a'i hako, mana hinihinidi ra o'asi ro'u.

⁹ Ma'ata 'a bwa'i orea miraaui noni rai 'ome 'iraraai here bweubweu'a adaausi, 'onaa'i 'oha 'iraaui noni rau 'ome 'iraraai here bweubweu'a na haua Janis mea Jambris.*

Heiatenga'i Ana'i Pol Tanaa Timoti

¹⁰ Timoti, i'oe 'o aidangisi'i hako i ha'ausuringa'i agu'i mana awangagu. 'O aidangisi'i ro'u mareho nau raba haa'i. 'O aidangisiai hinihinigu beia Kraest mana ahumaratanoa nau haa tanaraui noni. 'O aidangisiai heita'ahi nau haua tanaraui noni mana ura baabau nau haua mai suri'i mwani rongomaata'i.

¹¹ 'O aidangisiai norata'aiau mana ha'a-rongomaata'iau nara haa 'inia'i suria agua Kraest. Ha'amomori! Na'i madoraa nau awa suri'i 'omaa raha na'i Antiok ma na'i Aekoniam mei Listra na maerongagu ra norata'aiau di'u. Ma'ata 'ia Araha na 'a'auhiau ma ha'atahiau baani'i mwani rongomaata'i o'asi.

¹² Ma ha'a-momori di'u! 'Ira i nei ra hagu beia Jisas Kraest mara awa suria'i hei'irisina, rai norata'airaaui o'asi ro'u.

¹³ Mana nei ra heitaroha'i pwapwari'i miraaui noni ta'a'i rai ta'aa di'u ro'u wou. 'Ia Saetan 'ai awanga'i pwari'iraaui moi 'ana'i pwari'iraaui noni.

¹⁴ Mi'oe, 'oi dau baabau suri'i ha'ausuringa'i nameu haa'i tana'o na'o hinihini'i. 'Inia 'i'ameu, 'o aidangisi'ameu goro nameu ha'ausuri'o 'ini'i.

¹⁵ Taraawa'a na'i 'oha 'o kekerei mau, 'o bwane aidangisiai Usu-usu Maea. Mana Usu-usu Maea 'a matai haua tana'o i madoma 'ana'i daua namua i tahi tarau, 'inia'i hinihinimu beia Jisas Kraest.

* 3:9 3:9 Eksodas 7:11-12; 8:18-19

¹⁶ Ni mwani usu-usu raronai Usu-usu Maea, ra hura'a mai baaniai 'adoma'ina God maraugu usu'i dio i noni. Mana Usu-usu Maea 'a ororiu di'u 'anai ha'ausurigaau 'iniaia taha na ha'a-momori, ma 'anai ha'a-aidangisigaau 'ini'i awaha odo-odo. 'A ororiu ro'u 'anai ha'ata'ini'i tanagiai ha'ausuringa'i mana barongagaa'i nara ai'a odo-odo neina gai ha'adoodo'i.

¹⁷ Ma naasi, 'igaau noni ana'ia God, gaigui huunai arari 'anai haa'i mwani tau'aro goro.

4

¹ Na'i atana God ma na'i atana Jisas Kraest, mo'o nai boi aho'i 'anai marungiraau noni ana'i ma 'anai hiiriraau nei ra tahi mana nei narau mae'a, 'au ha'ata'u'u'o

² do'oi abui agohe 'anai taroha'inia ha'atee ana God. 'Oi wetewete 'anai taroha'inia, rei'uaa rai raba rongoa ma'ua bwa'i. 'Oi ha'atee wetewete tanaraau nei ra taritari'a, ma'oi ha'a-aidangisiraau noni 'anai 'ome 'irara'i 'inodaa'i. 'Oi ha'ata'u'uraau 'anai hauai taha na odo-odo ma'oi ha'ausuriraau beiai ahumaratanoa.

³ Ta madoraa wou 'isi, 'iraau noni ra bwa'i raba rongoi huudi ha'ausuringa'i. 'Inia rai raba suri'i moi 'adoma'idi 'anai suri'i taha ra 'irisi'i. Rai hano hairiu 'anai sibaniraau ha'ausuri narai maani'i mareho narai arunga goro 'ini'i.

⁴ Rai 'ita'i huudi ha'ausuringa'i 'abaia Kraest marai suri'i hinihinidi noni 'ohabwani nara ai'a ha'a-momori.

⁵ Mi'oe Timoti, 'oi taguma'inia tarau i 'adoma'imu na goro. 'Oi ura baabau suri'i rongomaata'i na'oi siri suri'i. 'Oi wetewete 'anai taroha'inia Taroha Goro ma 'anai ha'a-arotahaa i tau'aro God na hua tana'o.

'A Pwapwaku i Tahingana Pol

⁶ Na madoraa agua 'anai mae, naani'a. 'A bwa'i orea mana 'abugu 'ai ahe 'onaai waen nara ringisia na ahe na'i dora hoho'asi 'anai ho'asi 'inia.

⁷ 'Au tau'aro raha tanaa Araha, mana tagora na haa tanaau, 'au ha'ahakoa goro. Mana hinihinigu beia, 'a wetewete tari mau mai 'ohani.

⁸ Naasi na heitahari nai hua tanaau 'iniaia tau'aro goro nau haa, 'a bwani ha'aagau totoriau 'inia. Na'i dangi ni hihiri, 'ia Araha na hihiri odo-odo, 'ai 'unua do 'inau 'au odo-odo na'i maana, naasi heitahari agua. Ma ai'a tanaau moi, mei tanaraau ro'u i nei ra mamasiai aho'i ana mai.

Ha'atee Ha'ahako Ana'ia Pol

⁹ 'Oi bonasia do'oi taha raurau mai beiau.

¹⁰ 'Inia 'o 'iraraa, 'ia Dimas 'a nugasiau ma 'ari Tesalonaeka baaniau, 'inia 'a ta'ahiai tahinga ni marewana. 'Ia Kresens 'a bwani 'ari ro'u na'i Provensi Galesia, mea Taetas 'a bwani 'ari Provensi Dalmesia.

¹¹⁻¹² 'Ia moia Luk na awa mau beiau, 'inia 'ia Tikikas 'au bwane ha'ataaria 'ari Efesas. Na'i 'oha 'oi boi, 'oi 'unua Mak mamurui ta'i boi, 'inia 'iia na matai 'a'auhiau ro'u.

¹³ Mana nata maho ro'u, 'oha murui boi, murui waa mai to'oni tewa agua nau nugaa ani beia Kapus na'i 'omaai Troas. 'O abui kaku'a'i buka agu'i, ororiu nei ra tagoraa 'iniaia uri-uri mwamwaa.

¹⁴ 'O 'iraraa Aleksanda, na nei na mataihere tau'arodi mareho 'ini'i 'aeen, 'iia 'a ha'a-arungata'aiau di'u. 'Ia Araha 'ai su'ua tanaai here na haa gugua.

¹⁵ 'Oi herehere goro 'inia, 'inia 'ia mo'osi 'a huunai ura bwarasi'i ha'ausuringa'i nagau haa'i.

¹⁶ Na'i 'oha tahamora nara hiiriau na'i kooti, ra hora hako baaniau. Ai'a ta ta'i nei 'ai gaarangiau 'anai 'a'auhiau. Ma'ata 'au ha'arahesi mea God 'ai abui su'ua tanaraaui taritari'a adaau.

¹⁷ Rei'uaa ra nugasiau hako, 'ia Araha 'a awa beiau ma ha'a-weteweteau 'iniaia mena ana, do 'inau wai taroha'iniaia Taroha Goro hako 'ari tanaraaui noni nara ai'a Jiu marai rongoa. 'Iia 'a'auhiau baaniraaui noni rau gasi hiiri ha'amaesiau.

¹⁸ 'Ia Araha 'ai taatahi bwarasiau baaniai mwani maho ta'aa, mai waiiau taha i hourana ara'a i aro. Gau magari ha'aasaa tarau tarau. Amen.

¹⁹ Ha'atee wa'ewa'e agua tanaa Prisila mea Akuila, mei tanaa Onesiforas mana hasiwae ana bei'i gare adaru'i.

²⁰ 'Ia Erastus ai'a hano beiau 'ini, 'iia mau na'i Korin. Mia Trofimas na mata'i, mau hano baania mau i Maelitas.

²¹ Timoti, 'oi ha'imaania ataha mai, maigui tari madoraa ni awarosi.

'Ia Iubiulas, mea Piudens, 'ia Laenas mea Kilodia miraaui hako i noni hinihini na 'ini, rau 'unua wou i ha'atee wa'ewa'e adaau tana'o.

²² 'Io, Timoti, 'au ha'arahesi mia Araha 'ai awa bei'o na'i talingamu mia God 'ai ha'agorohi'amou hako.

Na Usu-usu Ana Pol Tanaa Taetas

Gere Mamaani 'Iniai Bukani

Tara'i 'oha ni baronga ta'a'i agaa'i ra 'onaa do ra'i mareho nagau haa'i tarau ma gau 'adoma'inia do 'a gere bwara 'anai gaasi'i. Naasi ta'i mareho na taritari'a beiraaui noni hinihini na'i marau Krit.

'Iraaui noni nai Krit rau to'ora'i gere herehere adaa'i haraariraaui. 'Iraaui ra'i sae nara pwari'i raha, ra'i sae 'ada'i 'agerosu, mara awa hahaingahui'a. Na'i madoraa na tara'i noni nai Krit raugu ha'i sae hinihini rau siri ro'u na'i heiso'i bei'i baronga ta'a'i adaa'isi. 'Ia Pol 'a usuai usu-usuni tanaa Taetas 'inia 'iia naasi na tatau'aro beiraaui sae hinihini na'i Krit. 'A usu-usu tanaa Taetas 'anai ha'a-aidangisia 'ini'i taha na ta'isada dorai aidangisi'i ma 'anai haa'i. 'Onaa narau huunai hinihinia Jisas rau ga'i ha'ata'inia hura'a suri'i tahitahi adaa'i.

Ma'ata 'a bwara 'anai orisi'i baronga ta'a'i agaa'i 'inia moi wetewete agaaui haarigaau. Naasi 'ia Pol 'a usu-usu ro'u 'abaiai tatau'aro anai Hi'ona Maea. Na'i 'oha nagau waia Jisas suri'i tahingagaa'i, na Hi'ona Maea 'a ha'a-wariwarigia baaniai ora-ora'a ma ha'ahaoru'i tahingagaa'i. Ni Hi'ona Maea na 'aauhigia 'anai orisi'i barongagaa'i nara ta'a'i 'anai awa suriai taha na 'ia God na 'irisia.

'A 'ua? 'I'oe 'o ha'a-haingahui'ai orisi'i barongamu'i nara ta'a'i? Na'i 'oha na 'oi 'oha'iniai buka Taetas 'oi 'omesi'i hei'a'auhi na matai haua i Hi'ona Maea ana God tana'o.

¹ Tana'o Taetas:

'Inau a Pol, sae tatau'aro ana God ma'e Ha'ataari ana Jisas Kraest. 'Iia 'a ha'ataariau 'anai 'a'auhiraau nei na 'ia God 'a bwane 'ome sigihiraau. 'Au 'a'auhiraau dorai hinihinia Jisas ma rai 'iraraai taha na ha'a-momori 'inia. Mana maho ha'a-momori 'isi rai 'a'auhiraau 'anai awa suriai hei'irisina God.

² Gau 'iraraa do na'i 'oha gai hinihiniai taha na ha'a-momori gai to'oraai 'adoma'i wetewete 'anai daua nagau i tahi tarau. 'Ia God 'a bwane durua tanagaau tahi tarau na'i madoraa na marewana ai'a awa mau, mea God 'a bwa'i pwari'i.

³ Ma na'i huunai madoraa na 'ia God 'a sigihia, 'agu ha'ata'inia hura'a i taroha gorosi tanaraau sae. Mea God na ha'atahigaau baaniai ora-ora'a, na ha'a-'u'uriau 'anai taroha'inia hura'a.

⁴ Taetas, 'i'oe 'o 'onaai huunai gare agua suria garaa to'oraai ta'i hinihini. 'Au ha'arahesi tanaa Godi Amaga mea Jisas Kraest i Ha'atahi aga, rarui ha'agorohi'o ma rarui ha'a-awagorohi'o.

Baronga Ni Na'otara Na'i Heiso'i

⁵ 'Au niga'o na'i marau i Krit do 'i'oe 'oi ha'a-arosiai tatau'aro ana Araha nau ai'a ha'ahakoa mau. Ma 'au rabasia do'oi sigihi'i tara'i sae 'anai na'otaranai heiso'i suri'i 'omaa na'i Krit nara hinihini. Ma'oi haa 'onaai bwane 'unua agua tana'o.

⁶ 'Au 'unua tana'o do na na'otara 'anai heiso'i, 'e sae na awangana 'ai odo-odo na'i maana God, neina 'iraau noni ra bwa'i ha'ahunia mwada'u 'inia ta maho. 'Iia 'ai awa moi beia ta ta'i urao mai abui ha'ata'ai ha'iwai ana. Mana gare ana'i rai hinihinia Jisas Kraest ma rai suriai barongana. Neina bwa'i ta sae 'ai matai 'unua do 'iraau ra'i gare ta'a'i ma'ua 'unua do rau hairaes di'u.

⁷ Na na'otara 'anai heisoi, 'ia God na 'ome sigihia 'anai 'omesuriai tatau'aro ana. Tarana naasi nai goro 'inia i awangana, neina bwa'i ta sae nai ha'ahunia 'inia ta maho. Ni bwauodo 'e sae na bwa'i ha'ata'ea haaria ma'ua taesu'a mwada'u. 'E sae na bwa'i gono raha 'ini'i waini bweu mana awa hahaingahui'a ma'ua pwari'i'i sae 'anai ha'a-bweubweu'araau 'ini'i ha'a adaa'i.

⁸ 'Iia 'ai abui haa'i maho ta'a'i 'isi, ma'ata 'iia 'ai ha'i sae baronga goro. 'Ai ha'amaotoraau mahua nara boi na'i 'omaa ma'ua ruma ana. 'Iia 'ai wa'ewa'e 'anai awa odo-odo. 'Ai wetewete 'anai ura bwarasi'i 'ado'ado ta'a'i na'i tahingana. 'Ai awa odo-odo beiraaui i noni ma'ai awa odo-odo na'i maana God.

⁹ Mana ha'ahakona, 'iia 'ai dau baabau suri'i huudi ha'ausuringa'i na garaa hau'i tanaraau ani. Ma naasi 'aigui arari 'anai ha'a-wetewete'i hinihinidaa'i noni 'ini'i ha'ausuringa'i nara odo-odo. Ma na'i 'oha na sae 'a ai'a 'adoma'i aratara 'ini'i huudi ha'ausuringa'i, 'iia 'ai ha'ata'ini'i hura'a i taritari'a ana'i.

¹⁰ 'O 'iraraa, 'a rago i nei na'i Krit nara ai'a raba rongosuriai Taroha Goro 'inia Jisas Kraest, ororiu 'iraaui i Jiu nara ha'i sae hinihini mara rabasia do gai ha'isuri'i mau i ringe adaa'i. 'Iraausi rau pwari'iraaui moi inoni 'ini'i ha'atee ra rongo to'o bweubweu'a narau haa'i.

¹¹ Taetas, 'oi ha'a-papakuraau nei ra heitaroha'i pwapwaari'i, 'inia ra rago'a i nei narau ha'ata'ai'i hinihinidi beia Jisas Kraest. Tara'i sae ha'iwai bei'i gare adaa'i rau rihosi hako'a. Ra pwari'iraaui noni 'ini'i ha'ausuringa'i pwapwaari'i 'anai rahi'i pwaranga i ha'a adaa'i.

¹² Na'i 'oha bwani, 'e sae ni Krit narau 'adoma'inia do'e sae madoma, 'a ha'atee o'ani, "'Iraaui sae ni Krit ra'i sae 'ada'i pwari'i! Ra hehere ta'aa 'onaai'i mwamwaa wawauru. Rau 'age'age marau ngangaura'a."

¹³ Mana ha'atee 'isi ra ha'a-momori di'u! 'Iraaui Krit rau o'asi mora, ma rai o'asi'a. Hoita, naasi nau 'irisia 'inia do'oi ha'atee wetewete tanaraau nei rau suri'i ha'ausuringa'i pwapwaari'i, marai hinihini'i huudi ha'ausuringa'i!

¹⁴ Marai abui suri'i moi mamaani 'oni'oni adaa'i ha'ausuri 'ada'i Jiu, ma'ua ringeringe adaa'i nei ra ai'a rabasi'i huudi ha'ausuringa'i.

¹⁵ Mwani maho hako ra goro tanaai sae na odo-odo na'i maana God. Me tanaai nei na do'o'a na'i maana God ma ai'a hinihinia Kraest, 'a 'adoma'inia dona mwani maho ra ta'a'i. 'Iraaui sae o'asi, na 'adoma'idaa'i ra ta'a'i mara ai'a 'iraraai maho na goro mana maho na ta'aa.

¹⁶ Rau 'unua do rau aidangisia God magu barongadaa'i mana tatau'aro adaa'i 'a ha'ata'inia do 'iraaui rau ai'a aidangisia God. Rau honu 'iniai ta'aa marau ai'a suri'i ringe ana'i a God. Rau ai'a arari 'anai haa'i maho goro.

2

Awanga Ni Sae Hinihini

¹ Taetas, 'oi abui 'onaairaaui sae ra heheitaroha'i pwapwaari'i. Ma'ata na ha'ausuringa'i amu'i tanaraau sae hinihini rai odo-odo 'onaai ha'ausuringa'i ana'i a God.

² 'Oi ha'ausuriraaui sae wari marai 'omesuriraaui haariraaui baaniai ora-ora'a. Na awahadaau 'ai odo-odo neina 'iraaui noni rai ha'ahouraaui. Mana hinihinidaau 'ai odo-odo ro'u marai ta'ahiraaui sae suri'i maho rau haa'i. Mana hinihinidaau 'ai hano daara'i, rei'uaa na mwani maho ta'a'i rai to'oto'o.

³ 'A o'asi ro'u, 'oi ha'ausuriraaui urao wari marai ha'ata'iniai ha'ahou tanaa God suri'i mwani maho narai hau'i. Rai abui to'o haisubuni

marai abui gono raha 'ini'i wai ni bweu. Rai abui haa o'asi, ma'ata rai ha'ausuriraaui noni 'ini'i baronga goro.

⁴ 'Iraaui urao wari rai ha'ausuriraaui urao haoru 'anai ta'ahiraau mwane mana gare adaa'i.

⁵ Rai ha'ausuriraaui marai 'omesuriraaui haariraaui baaniai ora-ora'a marai awa suri'i mwane adaa'i. Rai ha'ahou'i mwane adaa'i marai araisuriraaui ro'u. Rai 'omesuri ha'agorohi'i mwane adaa'i bei'i gare adaa'i marai 'a'auhiraau ro'u i noni 'etea. 'Onaa rai ha'isuri'i ha'ausuringa'i 'isi, 'a bwa'i nei 'ai 'unu ha'ata'aia mwada'u i awangadi sae hinihini.

⁶ Taetas, 'oi ha'ausuriraaui ro'u i sae mwane haoru. 'Oi ha'a-'o'oriraaui marai 'omesuriraaui haariraaui baaniai ora-ora'a.

⁷ Nai'i suri'i mwani maho, 'oi ha'ata'ini'i tanaraau taha nara goro ma odo-odo 'anai suri'i. Mana ha'ausuringa'i amu'i ra ga'i odo-odo tarau 'anai ha'ata'inia do'o 'adoma'i ha'a-ororiu'i.

⁸ Mana ha'atee amu'i ra ga'i ha'a-momori tarau neina abu ta sae 'ai ha'atee ha'ata'ai'i ha'ausuringa'i amu'i. Ma 'onaa 'ai o'asi, 'iraaui nei narau ura bwarasi'o raigui ninima 'oha rau bwa'i sadoia ta here 'anai 'unu ha'-ta'aigaau sae hinihini 'inia.

⁹ Ma 'oi ha'ausuriraaui ro'u i slev. Rai araisuriraaui bwauodo adaa'i suri'i mwani maho rau 'unu'i tanaraau. Marai haa'i maho na bwauodo adaa'i rai wa'ewa'e 'ini'i. Rai abui heiraeraesi beiraaui

¹⁰ ma'uasi beriraaui. Ma'ata rai tau'aro goro, neina 'iraaui bwauodo adaa'i rai ha'a-'u'uriraaui. Miraau sae rai 'ome 'iraraa i tau'aro mana barongadaau na goro. Mana awahadaau na goro rai re'ia marai raba suria ha'ausuringa'i ana'ia God na ruhasigaau baaniai ora-ora'a.

¹¹ Taetas, 'oi ha'ausuriraaui noni hinihini 'anai awa odo-odo, 'inia 'ia God 'a goro 'inigia rei'uaa gau ai'a arari. 'A ha'ata'iniai goro ana 'inigia 'oha na ha'ataaria mai a Jisas 'anai ruhasiraaui noni baaniai ora-ora'a.

¹² Mea God 'a ha'ausurigaau 'anai rihosi baaniai ringe i ahurodo mana 'adoma'i ta'a'i ni marewana. 'A ha'ausurigaau magai to'oraai wetewete 'anai 'omesurigaau haarigaau baaniai ora-ora'a, ma 'anai awa odo-odo mana awa suriai hei'irisina God na'i marewanani.

¹³ Gai awa odo-odo o'asi, 'oha gau totoriai boi aho'i ana God aga, 'ia Jisas Kraest, beiai mena mana raraha. Magai wa'ewa'e 'oha gai 'omesiai boi anai Ha'atahi.

¹⁴ 'Ia Jisas 'a watea haaria 'anai mae taragaau 'anai ruhasigaau baaniai ora-ora'a ma ro'u 'anai ha'a-ai'a'i ora-ora'a agaa'i neina 'igaau gai ha'i inoni ana'i magai 'adoma'i raorao 'anai hau'i mwani mareho goro.

¹⁵ Nara 'isi mareho nau 'irisi'i do'oi ha'ausuriraaui 'ini'i noni hinihini na'i Krit. 'Oi ha'a-'o'oriraaui 'anai araisuri'i marai ha'isuri'i ha'ausuringa'i amu'i. 'Oi ha'atee wetewete tanaraau nei nara ai'a raba araisuri'o 'inia i'oe naasi na'otara adaau. 'Oi abui watea do rai wana bodio 'ini'o.

3

Ha'ausuringa'i 'Ada'i

Barongadaa'i Sae Hinihini

¹ Taetas, 'oi ha'a-'adoma'i aho'isiraaui ro'u i noni hinihini marai 'adoma'i ha'ahouraaui mana araisuriraaui nei rau na'otara miraau nei ra to'oraai mena ni 'omesuri na'i gaumani. Rai 'adoma'i aratara ro'u 'anai hauai taha ra goro mara odo-odo 'anai 'a'auhiraau noni.

² Abu ta sae 'ai ha'atee ha'ata'aiai nata sae, ma'ua awa ha'a-heita'ia'i noni. Ma'ata rai awa 'abenga'i beiraaui sae marai ahumwa'eta 'anai 'a'auhiraau.

³ Gau ga'i 'a'auhiraau noni, 'inia na'i na'o, 'igaau gau ahurodo ga'ua mia God 'agu ruhasigaau. Gau bweu magau hairaesie beia God. Miraau

sae rau pwari'igaau dogai haa'i here ta'a'i. Gau bwarai ura bwarasiai hei'irisi anai abe mana awangagaau 'ado dangi 'anai hau'i moi mareho ta'a'i mana kakawa 'omesiraaui sae 'ini'i mareho narau to'ora'i. 'Iraaui sae rau 'utaigaau migaau 'utairaaui ro'u.

⁴⁻⁵ Rei'uaa na gau o'asi, 'ia God, na ruhasigia baania i ora-ora'a, 'a ha'ata'iniiai heita'ahi ana tanagaau na'i madoraa na ha'aboihia Jisas. 'A ruhasigia, ai'a do mareho gau haa'i ra odo-odo, me suriai heita'ahi ana tanagaau. 'A hua tanagaau Hi'ona Maea ana 'anai ha'a-wariwarigaau baaniai ora-ora'a ma gai to'oraai tahinga haoru.

⁶ God 'a watea dadara'a mai Hi'ona Maea ana tanagaau mai awa na'i raroga, 'inia Jisas Kraest 'a mae 'inigaau.

⁷ Rei'uaa gau ai'a arari, 'ia God 'a goro 'inigia ma 'unua do gau odo-odo na'i maana. Ma hua tanagaau Hi'ona Maea magai ha'i gare ana'i neina gai 'iraraa ha'a-momori do gau daua'a i tahi tarau.

⁸ Ni mareho nau 'unu'isi, ra odo-odo mara ha'a-momori. 'Io, 'au rabasia do'oi hadahada wetewete tanaraaui noni hinihini na'i Krit, neina 'iraaui nei ra 'u'uria God rai 'adoma'i raorao 'anai wate'i madoraa adaa'i 'anai hau'i mwani maho goro tanaraaui noni. 'Inia na mareho nau 'unu'i 'isi, ra goro hako mara matai 'a'auhiraau noni.

⁹ Taetas, tara'i sae ra ai'a here goro moe'a. Tara'i madoraa ra to'o heitohetohe moi, ma tara'i 'oha ra heitohetohe nga'ini'i burungadaa'i, ma tara'i 'oha ra heitohetohe nga'ini'i ringe ro'u na usu'i a Moses. I'oe 'oi abui awa beiraui noni o'asi, 'inia mareho 'isi ra ai'a goro mara bwa'i 'a'auhia ta sae.

¹⁰ 'Onaa ta sae hinihini 'ai heitohetohe tarau 'ini'i maho o'asi, 'oi ha'aabua. 'Onaa 'o 'unua tanaa ha'arua do'ai papaku mana saesi 'ai heitohetohe mau, 'oi abui ha'apapakua'a ro'u. Ma na'i 'ohasi, 'oi abui watea do'ai hadahada na'i ruma maea amou.

¹¹ Taetas, gau 'iraraa doni sae o'asi, ra mamaani hiosi'i huudi ha'ausuringa'i. Mana barongadaa'i ra ha'ata'inia goro do'ia God 'ai ha'a-mama'airaaui 'ini'i ora-ora'a adaa'i.

Ha'atee Ha'ausuringa'i Ha'ahako Ana Pol

¹² 'Inau wai awa na'i 'omaa i Nikopolis suri'i hura ni awarosi. Mawaigui 'ari Nikopolis, wai ha'ataaria ga'u wou a Atemas ma'ua Tikikas bei'o na'i Krit. Madoraa ta nei 'inirarua nai ataha bei'o, 'oi ha'imaania ma'ata'a do'oi ataha mai beiau na'i Nikopolis.

¹³ Ma 'au rabasia ro'u do'oi ha'imaania 'omesurirarua goro i rua mwaneni, 'ia Apolos mea Sinas, 'e loea. Na'i 'omesuri na'oi hua 'oi ha'imaania dona awa na rarui haa, abu ta mareho rarui pwapwaku 'inia na'i 'aariha adarua.

¹⁴ Taetas, 'oi ha'ausuriraaui moe'a i sae hinihini na'i Krit do rai tagora raha 'anai haa'i maho goro. Neina rai 'a'auhiraau nei ra rabasiai hei'a'auhi ma rai abui awa pwaranga.

¹⁵ 'Io, 'iraaui hako i noni hinihini 'ini rau ha'atee wa'ewa'e tana'o. 'O'i 'unuai ha'atee wa'ewa'e ameeu ro'u tanaraaui nei hinihini narau ta'ahi'ameu.

'Au ha'arahesi mia God 'ai ha'agorohi'amou hako.

Na Usu-usu Ana Pol Tanaa Pilimon

Gere Mamaani 'Iniai Bukani

'Oha na 'e sae na haa i taha nagau arunga ta'aa di'u 'inia, 'a gere bwara 'anai 'adoma'i nugasias. Ni marehosi 'ia Pol 'a aidangisia na'i 'oha na hauai usu-usuni tanaa Pilimon.

'Ia Pilimon 'e ta'i sae toto'ora na awa na'i 'omaai Kolosae. 'Iia 'a to'oraai kae ruma ma to'ora'i ro'u i mwani slev nara tau'aro tanaa. Hoita, 'a 'ariwou ma'e ta'i 'iniraau slev ana'isi 'a beriai ha'a ma hora'a. Mia Pilimon 'a taesu'a 'ana 'iniai here na hauasi.

'Ariwou ma'e ta'i 'oha na 'ia Pilimon 'a daa i usu-usu baania Pol. Na'i 'ohasi 'a kae heimwaota'i di'u na'i 'oha na aidangisia do 'ia Pol 'a heisadoi beia Onesimas na horasi. 'Irarua raru awa goni na'i rumanih'o, ma na'i madoraa nararu awa 'isi 'ia Onesimas 'a rihosi ma hinihini. 'Ariwou ma garangi'ai 'oha nara ga'i ha'ahura'ahia Onesimas baaniai rumanih'o. 'Ia Pol 'a hadahada wetewete tanaa do'ai 'ari aho'i beia Pilimon. 'Ia Pol 'a 'irisia do'ia Pilimon 'ai 'adoma'i nugasias Onesimas, mai waia aho'i siri na'i raronai ruruha ana. 'Ia Pol 'a 'unua do 'iia 'ai taha mau beia Pilimon na'i muri 'anai 'omesia do mwane maho ra 'ari odo-odo.

Na'i Baebol 'a ai'a ha'arangasia goro hura'a taha nagu haua Pilimon na'i murinai 'oha na 'oha'iniai usu-usuni. Ma'ata ni taha na'ia Pol 'a usu'i na'i usu-usuni ra rawamataa goro. 'Ia Pol 'a 'unua do na'i 'oha nagai ha'atari'aa ta maho tanaa ta sae gai aho'i 'ari beia 'anai ha'angonia 'anai 'adoma'i nugasias. Mana'i 'oha narai haa'i taha na taritari'a tanagia, gai to'oraai 'adoma'i nugasias tanaraau nei nara haa'i taritari'a tanagia. Na'i 'oha na'oi 'oha'iniai Pilimon, 'oi 'adoma'i sibasiba 'inia tei na 'o ga'i 'adoma'i nugasias 'inia ta maho.

¹ Tana'o Pilimon, sae goro agua na garaa tatau'aro tanaa God:

'Inaua Pol nau hauai usu-usuni na'i madoraa nau awa i rumanih'o 'iniai taroha'inia agua i Taroha Goro 'inia Jisas Kraest. Mia Timoti, do'oragaau na'i Kraest, 'a awa beiau ro'u 'ohani.

² 'O'i 'unuai ha'atee wa'ewa'e ameeu tanaai asimeeu beia Kraest, 'ia Apia, ma ro'u tanaa Akipas, na wetewete 'anai ura bwarasiraau maerongagaa'i. Ha'atee wa'ewa'e ameeu tanaraau hako ro'u i noni hinihini nara ririhunga'i na'i ruma amua.

³ Mau ha'arahesi mia God i Amaga, mea Araha aga, 'ia Jisas Kraest, rarui ha'agorohi'amou mararui ha'a-awahi'amou goro.

Heita'ahi Mana Hinihinina Pilimon

⁴ 'Oha nau ha'arahesi 'a'auhi'o Pilimon, 'au ha'atee ha'agorohia taraua God.

⁵ 'Inia 'au rongo to'oana i heita'ahi na'o haa tanaraau hako i noni hinihini mana hinihinimu beia Jisas, Araha aga.

⁶ Mau ha'arahesi dona hinihinimu beia Kraest 'ai 'a'auhi'o 'anai hauai taha na odo-odo. 'Onaa 'ai o'asi, 'ai ha'a-aidangisi'o ro'u wou 'ini'i mwani maho goro 'ia God na haa'i tanagia na'i tahingaga beia Kraest.

⁷ 'Au ha'atee ha'agorohia ro'ua God 'iniai heita'ahi amua tanaraau noni ana'i na ha'a-wetewete'i 'adoma'idaa'i. 'Au wa'ewa'e di'u 'inia, ma ha'a-wetewetea di'u ro'u wou i 'adoma'igu.

Pol 'A Ha'angonia Pilimon

Do 'Ai 'Adoma'i Nugasias 'Inona Onesimas

8-9 Tarana naasi, 'au raba ha'angoni'o 'anai hauai maho na odo-odo do'o ga'i haua. 'Onaa 'au rabasia, 'au ga'i matai ha'a-'usu'usu'o moi, 'inia 'inau 'e Ha'ataari ana Kraest. Ma'ata, wai ha'angoni'o moi 'inia heita'ahi agaraa hairiu. 'Onaai 'iraraa amua, 'inau 'au wari'a, mau awa na'i rumaniho'o 'inia i tatau'aro agua tanaa Kraest.

10 Naasi, 'au ha'angoni'o do'oi arunga ta'ahia Onesimas, * 'inia 'iia 'au waia mai tanaa Kraest na'i madoraa nau awa 'ini na'i rumaniho'o, ma 'iia 'a 'onaa do 'e gare agua.

11 'Iia ai'a 'a'auhi'o ga'u na'i na'o, me na'i 'ohani 'iia 'a matai 'a'auhigaraa di'u.

12 Ma rei'uaa nau ta'ahia di'u, me wai ha'ataaria'a aho'i wou tana'o.

13 'Au 'irisia do 'a ga'i awa moi 'ini beiau mai 'a'auhiau na'i 'oha nau awa i rumaniho'o 'inia taroha'inia agua i Taroha Goro. Me 'inia ai'a awa amua 'ini, 'iia 'a ga'i hauai tau'aro na i'oe 'o ga'i haua.

14 Ma'ata, 'a ai'a goro do'ai 'a'auhiau 'oha nau ai'a ha'a-tohonga'inia bei'o. 'A goro 'onaa 'oi ha'awatea, ma'ata 'oi watea beiai 'adoma'imu hako, 'a gasi 'onaa do'au ha'a-'usu'usu'o moi 'inia.

15 Gasi 'ia God 'a ha'awatea Onesimas do'ai hora baani'o suria ta gere madoraa moi, neina 'oha nai aho'i mai, naasi 'aigui awa tarau'a bei'o.

16 'Iia ai'a do'e slev moi tana'o, ma'ata 'ohani 'iia 'e huunai do'oramu na'i Kraest nau ta'ahia di'u. Ma na'i 'ohani, ni heita'ahi amua tanaa 'ai di'ua ro'u i heita'ahi agua. 'Inia 'oi ta'ahia, ai'a do 'onaa moi sae tatau'aro me 'ai 'onaa do 'iia 'e do'oramu ro'u beia Kraest.

17 'Inau 'e ta'i bei'o na'i ruruha ana Kraest. Naasi 'au rabasia do'oi ha'amaotoa aho'ia Onesimas 'onaai ha'amaotoau na'o ga'i haa.

18 'Onaa 'e mareho na ha'atari'aa tana'o ma'ua 'e ha'a na ai'a su'ua, 'inau na waigui orisia aho'i tana'o.

19 'Anai ha'ata'inia do 'inaua Pol wai su'u'i aho'i tana'o i mareho 'isi, 'au usua dio i tatarani 'inia i rimagu haariau. Sae tatau'aro agua 'agu ai'a usu-usu'a tanaau. Hoita, ma'oi aidangisia do'e maho na i'oe 'o ai'a su'ua ro'u mau tanaau na raha di'uai kaoni ana Onesimas. Naasi i 'a'auhi'o nau haa 'anai ha'a-aidangisi'o 'inia i tahinga haoru beia Kraest.

20 Hoita, do'oragu beia Kraest, 'au ha'angoni'o 'anai ha'amaotoa aho'i. 'A goro 'oi ha'a-wa'ewa'ea na'i tahingagu, 'inia 'igaraa 'e ta'i beia Kraest.

21 'Au hauai usu-usuni 'inia 'au 'iraraa do'oi ha'isuriai maho nau ha'angoni'o 'inia. Mau 'iraraa ro'u do'oi goro 'inia Onesimas di'u'i maho nau 'unu'i 'isi.

22 Ma'e ta'i mareho ro'u nau raba 'unua tana'o. 'Au 'irisia do 'oi ha'aagaua ta dora taragu na'i ruma amua, 'inia 'au hinihini do'ia God 'ai arami'i ha'arahesi amoo'i 'iniau. Ma bwa'i orea mawai ataha aho'i bei'amou.

Ha'atee Ha'ahako

23 'Io. 'Ia Epafaras 'a 'unuai ha'atee wa'ewa'e ana tana'o. 'Iia 'a awa ro'u beiau na'i rumani ho'oni, 'inia haua ana ro'u i tatau'aro ana Jisas Kraest.

24 'Ia Mak, 'ia Aristakas, 'ia Dimas mea Luk, mwane rau 'a'auhiau 'anai taroha'inia Taroha Goro, rau 'unua tanaau dowai ha'ataaria ro'u wou i ha'atee wa'ewa'e adaau tana'o.

25 'Au ha'arahesi mia Jisas Kraest, i Araha aga, 'ai ha'agorohi'amou hako.

* 1:10 10 Ni 'ado'ado 'anai Onesimas na'i ha'atee ni Grik naasi hei'a'auhi.

Na Usu-usu Tanaraaui Hibru

Gere Mamaani 'Iniai Bukani

Tara'i sae rau 'adoma'inia do'oi ha'isuri'i ma'ata i Ringe ma'oigui matai ha'i sae hinihini. Rau ai'a aidangisia do 'a 'ari moi suriai hinihini na'o haua beia Jisas.

Ni Hibru 'e usu-usu nara haua tanaraaui Jiu narau hinihini maragu ura wetewete di'u mau suri'i ringeringe mana ha'atora na'ia Moses na 'unu'i tanaraau. 'Ia mo'o na usuai usu-usuni 'a 'unua hura'a do ni mareho na ororiu di'u naasi 'anai 'irara ha'agorohia Jisas, 'inia 'ia naasi God. 'Ia Jisas naasi na ha'a-arotaha'i duruduru mana ha'atee rarabea nara haa'i rarabea 'ohabwani. Ma 'unua ro'u do ai'a ta'isada do gaigui suu ho'asi tarau'a ro'u, 'inia 'ia Jisas 'a watea haraaria 'onaai ho'asi 'ana'ai mwane 'oha 'anai horigia baani'i ora-ora'a agaa'i. 'Ia Jisas 'a tahangiai tara tanagiai noni 'anai 'ari daara'i beia God. Na'i ringeringe adaui Jiu, gau 'iraraa do 'iraaui moi tara'i sae ororiu 'onaai Piriisi narau matai siri na'i raronai Ruma Maea adaui 'anai ataha beia God.

'Ia mo'o na hauai usu-usuni, 'a raba ha'a-aidangisiraui Jiu do naia moi na hinihini naasi na'ia God nai wanawana na'iei. 'A ai'a rabasia do 'iraaui sae hinihini rai suria aho'i mwani ringeringe ana'ia Moses. 'A 'irisia moi dorai ura baabau na'i hinihini adaui beia Kraest.

Jisas Kraest Garena God

¹ Na'i 'oha bwani 'a ragoi 'oha ma ragoi herehere na 'ia God na haa'i 'anai hadahada tanaraaui wauwa agaa'i. Ma sigihiraui rarabea 'anai ha'arangasi'i hura'ai hadahada 'isi.

² Mei suri'i dangi ha'ahako nagau awa suri'i madoraa 'inisi, 'ia God 'a ha'ataaria mai Garena 'anai 'unu'i hura'ai ha'atee ana'i tanagiai inoni. Mia God 'a 'ome sigihiai Garena 'anai to'ora'i mwane mareho hako, mana Garena 'a ha'apwa'araai marewana mana ahoasara mana mwane mareho hako na'i raroda suriai hei'irisina God.

³ 'Ia na ha'ata'inia hura'ai rarahana mana gorohana God, mana barongana'i ra ta'isada hako bei'i barongana'ia God. 'A dau goni'i hako i mwane mareho 'iniai mena anai ha'atee ana na wetewete. 'A mae 'anai ha'a-wariwarigia baaniai ora-ora'a magu 'ari heinagu auru na'i dora ni mwaeraha na'i aba odona God na mena di'u'i mwane mareho hako.

Kraest 'A Ororiu Di'u'i Enjel

⁴ Ni mareho 'isi ra ha'ata'inia do'ia Kraest 'a ahaaha di'uraui enjel. Ma na'i 'oha na 'ia God 'a 'unua Kraest 'iniai Garena ma ai'a 'unua 'iniai enjel 'a ha'ata'inia ro'u i ahaaha ana Kraest.

⁵ Gau 'iraraa do 'ia Kraest 'a ahaaha di'uraui suria 'ia God 'a ai'a o'ani 'inia ta ta'i 'ini'i enjel ana'i,

“T'oe naasi gare agua,

na'i 'ohani 'inau naasi Amamu.”*

Mia God ai'a do 'ia 'ai o'ani 'inia ta enjel,

“Inau naasi Amamu,

me i'oe naasi gare agua.”†

⁶ Mana'i 'oha na 'ia God 'a ha'ataaria mai huunai ta'i Garena na'i marewana 'a o'ani,

* 1:5 1:5 Psalm 2:7 † 1:5 1:5 2 Samiuel 7:14

- “T'amoui enjel hako, moi ha'aasaa.”‡
 7 Mia God 'a ha'atee o'ani 'ini'i enjel ana'i,
 “T'amou mou tau'aro tanaau,
 ma 'onaa wai 'irisia, moi hura'a 'onaai ro'a,
 ma'ua 'onaai ngarungarui 'eu.”§
 8 Mei tanaai Garena 'ia God 'a o'ani,
 “T'oe God, na hourana amua 'ai awa tarau tarau.
 'O heimarungi beiai ahu odoni na'i hourana amua.
 9 'O ta'ahiai mareho na odo-odo na inoni na haa'i,
 ma'o 'ita'i maho nara ai'a odo-odo.
 Na tarana naasi nau 'ome sigihi'o 'inia,
 mau haua tana'o i wa'ewa'e mana ha'ahou na di'u baaniraau nei
 namou poru goni goro.”*
 10 Mia God 'a 'unua o'ani ro'u 'iniai Garena,
 “Araha, mau mai taraawa'ana, i'oe 'o ha'apwa'araai marewanani.
 Baaniai rimamu na'o tau'aronai ahoasara mana mwane mareho na'i
 rarona.
 11 Na mwane mareho 'isi rai ai'a'i moi, ma'ata i'oe 'oi awa tarau.
 Rai hanoriai ta'aa 'onaai'i bwana bwani.
 12 'Oi here rumirumi'i 'onaai to'oni ta'aa,
 ma'oi orisi'i moi 'onaai sae na orisi 'iniai bwana na ho'osia.
 Mi'oe 'o bwa'i orisi,
 ma'o bwa'i matai mae'a ta 'oha.”†
 13 'Ia God 'a ai'a o'ani 'inia ta ta'i enjel ana'i,
 “Oi heinagu auru na'i aba odogu,
 tari 'oha wai nugaraau maerongamu'i
 na'i bahainai heimarungi amua.”‡
 14 Ni enjel 'isi ra'i sae tatau'aro moi. Ra'i mareho tahitahi na 'ia God 'a
 ha'a-taarirau mai 'anai 'a'auhiraau nei naraai dauai tahi tarau.

2

'E Ha'abasu

1 'Iniai ororiu na haa i Garena, gai dau baabau suri'i ha'ausuringa'i ha'a-momori nagau bwane rongo'i, neina gau bwa'i matai su'a hairiu suri'i hinihinigaa'i.

2 Ha'atora na 'ia God 'a ha'a-taarirau mai enjel 'anai maani'i tanaraau wauwa agaa'i, ra'i mareho 'anai 'adoma'i hihi'a 'ini'i. 'Inia 'ia mo'o na ai'a araisuri'i, 'ai daua ma'ata'a i ha'a-mama'ai ohanai taha na ha'atari'aa.

3 Naasi, 'a ha'ata'inia do 'ia God 'ai ha'a-mama'aigaau ma'ata, 'onaa nagau bwa'i 'adoma'i ororiu 'iniai 'ado'ado ana 'anai ha'atahigia. Mana here na haua 'anai ha'atahigia 'a goro di'u. 'Ia Araha na ha'arangasia tahamora hura'a i 'ado'ado naasi, miraau nei narau awa beia marau rongoa rau ha'ata'inia hura'a tanagia do 'a ha'a-momori.

4 Ma 'anai ha'ata'iniai ha'a-momori adaa'i tanagia, 'ia God 'a hauai mena tanaraau 'anai hau'i mwane ha'abu'oahu mana ha'ara ma ha'atora'ini'i bane ni tatau'aro baaniai Hi'ona Maea tanaraau noni hinihini suriai hei'irisina.

'Ia Jisas 'A Aho'ita'i Noni

5 'Ia God 'a ai'a 'ome sigihiraau enjel 'anai heimarungi na'i marewana haoru nai boi ta'oha. Naasi marewana nagau hadanga'inia ani.

6 'E dorai Usu-usu Maea na o'ani,

‡ 1:6 1:6 Diutronomi 32:43 § 1:7 1:7 Psalm 104:4 * 1:9 1:8-9 Psalm 45:6-7 † 1:12 1:10-12 Psalm 102:25-27 ‡ 1:13 1:13 Psalm 110:1

“God, 'a 'ua 'o 'adoma'i ororiu 'iniraaui noni ma'o raba taguma'iniraaui?

⁷ Na'i na'o ga'u 'o ha'a-anoanoraaui baaniraaui enjel.

Mana'i 'oha nai boi mau, 'oi ha'a-ororiuraaui ma'oi haua tanaraaui ha'ahou na raha.

⁸ Mana mwane mareho hako 'oi nuga'i na'i bahainai heimarungi adaui noni.”*

Hoita, ra 'unua na'i dorai Usu-usu Maea naasi do 'e 'oha nai boi na 'iraaui inoni rai marungi'i mwane mareho hako na bwa'i do ta ta'i mareho na do 'aigui doe. Me na'i 'ohani, gau ai'a 'omesia mau doni inoni ra marungi'i hako mwane mareho.

⁹ Ma'ata, 'ia Jisas gau 'omesia do na'i na'o ga'u, 'ia God 'a ha'a-anoanoa baaniraaui enjel do neina 'ai ha'ata'iniai goro ana God na'i mae na haua 'iniraaui hako i noni. Ma 'iniai mae na haa 'inigia, 'ia God 'a ha'a-ororiua ma haua tanaai ha'ahou na raha.

¹⁰ 'Ia God 'a ha'apwa'ara'i mwane mareho hako neina gai ha'aasaa 'ini'i. Naasi 'a odo-odo do 'ai ha'awatea do 'ia Jisas 'ai rongomaata'i. 'Inia na mae na haua, 'a ha'a-araria 'onaai na'otara odo-odo 'anai na'otaranai kae ruruhai noni 'anai daua nadaui ha'ahou mana tahi tarau.

¹¹ Naasi 'ia Jisas miraaui noni na ha'amaearaaui 'e ta'i ruruha narau to'oraai ta'i Ama. Mia Jisas ai'a ninimata'i 'unuraaui 'ini'i do'orana'i mana asina'i.

¹² Mia o'ani 'inia God,

“Inau wai taroha'inia hura'a tanaraaui do'oragu'i mana asigu'i tau'aro hauasa na'o haa'i.

Wai gana ha'aasa'o na'i 'oha rai boi goni 'anai ha'arahesi'o.”†

¹³ Mia o'ani ro'u, “Inau wai 'u'uri na'i hungamu,” magu o'ani ro'u, “Ninauni, beiraaui gare na'o hau'i mai tanaau.”‡

¹⁴ Ni gare na 'unu'isi ra'i inoni moi. Naasi 'ia Jisas 'a boi ha'i inoni 'onaairaaui. 'A haua o'asi do 'iniai ha'i inoni ana, 'iia 'ai matai mae, mana'i mae nai haua 'ai matai ha'a-ai'aa i mena ana Saetan na to'oraai mena ni ha'amaesi.

¹⁵ Mana'i moi here naasi na matai ruhasiraaui nei na 'onaa doni 'ado'ado ni maaa'usiai mae 'a ho'osiraaui taraawa'a mau mai 'oha rau kekerei.

¹⁶ Gau hako gau aidangisia do boi na haua Jisas 'a ai'a boi 'anai 'a'auhiraui enjel, ma'ata 'a boi 'anai 'a'auhiraui warowarona'i a Ebraham.

¹⁷ Naasi 'anai 'a'auhigia goro, 'a ororiu do'ia Jisas 'ai ha'ata'isadaa beiraaui do'orana'i mana asina'i. 'A haua o'asi neina na'i tatau'aro ana tanaa God, 'iia 'ai 'onaai Bwauododaaui Piriisi nai mangudi nai ahu ta'ahiraui inoni ana'i. Ma ro'u, 'ai matai mae 'onaai ho'asi 'anai ha'a-ai'a'i ora-ora'a adaui noni.

¹⁸ Ma naasi 'a matai 'a'auhiraui nei na 'ia Saetan 'ai ohongiraaui, 'inia 'iia haaria Jisas 'a siri na'i rongomaata'i mana heiohongi.

3

Jisas 'A Ororiu Di'ua Moses

¹ Mwane do'ora mana asigu'i na 'ia God 'a soi'amou 'anai ha'i noni ana'i ma 'anai awa beia ara'ai Aro! Moi wai'ado'ado surisuria Jisas nagau hinihinia do'ia God na ha'ataaria mai 'onaai noni heitaroha'i ana ma 'onaai Bwauododaaui Piriisi.

* 2:8 2:6-8 Psalm 8:4-6 † 2:12 2:12 Psalm 22:22 ‡ 2:13 2:13 Aisaea 8:17,18

² 'Iia 'a mangudi na'i tatau'aro ana tanaa God na sigihia 'ana, 'onaai mangudi na haua Moses tanaa God 'oha na 'ia God 'a ha'a-'u'uria 'iniraau nei ana'i nara 'onaai ta'i ruruha.*

³ 'A 'ua? 'Onaa ta sae nai tagorahiai ruma 'anai ruruha ana, 'a odo-odo do gai ha'ahouai ruma ana di'ua mo'o na tagorahiasi? 'A o'asi ro'ua Jisas. 'Iia naasi nagau ga'i ha'ahoua di'u baania Moses.

⁴ 'Adona hakoi ruma ra to'o sae na tagorahi'i, ma'ata 'ia God naasi na tagorahi'i mwane mareho.

⁵ 'Ia Moses 'e inoni tatau'aro moi magu mangudi na'i tau'aro ana beiai ruruha ana God. Mana tatau'aro ana, naasi 'anai ha'ata'inia tanaai ruruha ana God i taha na 'ia God 'aigui 'unu'i mau ro'u na'i muri.

⁶ 'Ia Kraest 'a mangudi ro'u na'i tatau'aro ana. Ma'ata 'iiasi ai'a inoni tatau'aro me 'iia naasi bwauodo, suria 'iia 'e Garena God. Migaau naasi ruruha ana God 'onaa gai dau baabau tarau suri'i hinihinigaa'i, marai raorao i 'adoma'igaa'i 'iniai 'adoma'i heitotori 'ini'i duruduru ana'ia Kraest tanagia.

Dora ni Mamaro

Tanaraau Inoni Ana'ia God

⁷ Naasi 'a 'onaai ha'atee anai Hi'ona Maea na o'ani, "Dangini moi bahurongoai taha 'ia God amoo na 'unua tana'amou.

⁸ Moi abui rongoasa 'onaairau wauwa amoo'i 'ohabwani narau hairaes beia God,

marau haa'i mareho ta'a'i na'i dora mangasara 'anai sadoia 'onaa God 'a ahumaratanoa ma'ua ai'a."

⁹ Mia God 'a o'ani, "Rau bonasiai ha'imaaniau rei'uaa narau bwane 'omesi'i mareho nau hau'i tanaraau suriai hai tangahurui harisi.

¹⁰ Tarana naasi nau taesu'a 'inia 'adaau mau o'ani, "Iraau 'ageta'i awa suriau tarau marau kakawa suri'i ha'atee agu'i."

¹¹ 'Au taesu'a 'adaau mau hauai duruduru na wetewete o'ani, 'Rau bwa'i tari mwada'u beiau na'i dora ni mamaro!' "†

¹² Naasi moi 'ome'ome goro, arai do'ora mana asigu'i! Moi abu ha'awatea dona tahingamoo'i rai honu 'ini'i mareho ta'a'i ma'ua 'adoma'i heiruarua'a. Mou gasigu rihota'i baania God na tahitahi.

¹³ Ma naasi, na'i dangini, 'oha namou to'o madoraa mau 'anai bahurongoa God, 'a goro domoi ha'a-ta'u'u'amou hairiu 'ado dangi. Moi haua o'asi 'anai ha'a-bwarasi'amou baaniai ora-ora'a. Mou gasi pwari'i'amou haarimoo doni ora-ora'a 'e mareho goro mamougu bwarai rihosi tanaa God.

¹⁴ 'Onaa nagai wetewete 'anai 'u'uria God 'ari tari na'i ha'ahakona 'onaai bwane haua agaau na'i 'oha gau taraawa'a hinihini, 'igaau gai hagu tarau ro'u beia Kraest.

¹⁵ Ma'ata moi 'adoma'inia tarau i ha'abasu na o'ani, "Dangini moi bahurongoai taha 'ia God amoo na 'unua tana'amou.

Moi abui rongoasa 'onaairau wauwa amoo'i 'ohabwani narau hairaes beia God."‡

¹⁶ 'A 'ua? 'Iraau atei narau hairaes beia God na'i 'oha narau rongoai ringena? 'Iraui garen Israel na 'ia Moses na wairau hura'a baaniai Ijip.

¹⁷ 'A 'ua? 'Iraau atei na 'ia God 'a taesu'a 'adaau suriai hai tangahurui harisi? 'Iia 'a taesu'a 'adaui nei narau ora-ora'a. 'Ari wou marau haimaes hako moi na'i dora mangasara.

* **3:2 'Iniraau nei ana'i:** Na'i ha'atee ni Grik ra 'unua "'iniai ruma ana God." Ma'ata ni 'ado'ado 'ana 'a ta'isada moi. † **3:11** 3:7-11 Psalm 95:7-11 ‡ **3:15** 3:15 Psalm 95:11

¹⁸ Miraau atei 'ia God na duruduru wetewete tanaraau do'iraau rau bwa'i matai tari beia na'i dora ni mamaro ana? 'Ia 'a hadanga'iniraau sae narau hairaes beia.

¹⁹ Naasi gau aidangisia do suria ai'a hinihini adaau, rau ai'a matai ataha beia God na'i dora ni mamaro ana.

4

¹ Hoita naasi, ni duruduru ana God tanagia 'anai siri beia na'i dora ni mamaro ana, 'a ta'isada 'onaai mau. Naasi gai herehere goro, ra gasigu bwa'i siri tara'i nei 'ini'amou.

² 'Inia 'i Taroha Goro 'inia dora ni mamaro nara taroha'inia tanagaausi, ra taroha'inia o'asi ro'u tanaraau na'i 'oha bwani. Maagu rei'uaa narau rongoai marehosi, ma'ata 'a ai'a 'a'auhiraau. 'A ai'a 'a'auhiraau, suria 'oha narau rongoa, rau ai'a hinihinia.

³ Me 'igaau nei nagau hinihinia naasi nagai siri na'i dora ni mamaro na 'ia God na duruduru 'inia tanagia. Mei tanaraau nei narau bwa'i hinihini 'ai 'onaai 'unua ana God o'ani,

“Au taesu'a 'adaau mau hauai duruduru na wetewete o'ani,

‘Rau bwa'i tari mwada'u beiau na'i dora ni mamaro.’ ”*

'Ia God na 'unua o'asi rei'uaa na dora ni mamarosi 'a bwani ha'aagau mau na'i 'oha na hauai marewanani.

⁴ Gau 'iraraa o'asi, 'inia 'e dora na'i Usu-usu Maea 'a hadanga'iniai biunai dangi o'ani,

“Na'i biunai dangi 'ia God 'a mamaro baani'i tagora ana.i.”†

⁵ Ma o'ani ro'u na'i dora ani na'i Usu-usu Maea, “Rau bwa'i tari mwada'u beiau na'i dora ni mamaro!”

⁶ Naasi, ni dora ni mamarosi gau matai siri mau ro'u na'iei. Miraau nei narau bwane rongoa mau mai orea i Taroha Goro maraugu hairaes beia God, rau ai'a siri na'i dorasi.

⁷ Naasi mia God 'a nigaa ro'u i madoraa he'ete'i 'anai siri na'i dorasi, mana madoraa naasi na'i dangini. Gau 'iraraa o'asi suria 'a ragoi harisi nara hako'a murinai 'oha narau ai'a siri na'i dora ni mamarosi, mia God 'agu tau'aro na'i 'adoma'ina Deved 'anai usuai mareho nau bura'i 'unua tana'amou ani. 'A o'ani,

“Dangini moi bahurongoai taha 'ia God amoou na 'unua tana'amou.

‘Moi abui rongoasa.’ ”‡

⁸ Gau 'iraraa do ni dora na 'ia Josua na wairaau saeni Israel 'ana, ni dorasi ai'a dora ni mamaro. 'Inia 'onaa naasi'a i dora ni mamaro, 'ia God 'agu bwa'i 'unua'a ro'u ta 'oha he'ete'i 'anai siri ro'u na'i dora ni mamarosi.

⁹ Me suriai o'asi ana, 'e 'oha ni mamaro namau nadaau inoni ana'ia God, 'onaai mamaro na haua God na'i biunai dangi murinai ha'apwa'araa na haa i marewana.

¹⁰ Miraau nei narai siri na'i dora ni mamarosi rai mamaro baani'i tau'aro adaa'i 'onaai 'oha 'ia God 'a mamaro baaniai tagora ana.

¹¹ Gau magai bonasiai tari na'i dorasi. 'Inia 'onaa 'iatei na bwa'i araisuri'i ha'atee ana'ia God 'onaairaaui noni nai Israel, 'iia 'a bwa'i tari na'isi.

¹² Moi abui rongo agoheta'iniai Ha'atee ana God, 'inia ni Ha'atee ana God 'a honu 'iniai tahi mana mena na wetewete. 'A mwamwakarui di'u'i naihi ni hei'oi nara mwamwakarui rua aba hairiu, 'inia 'a matai ganu daara'i siri na'i dora na awaiei tahinga mana 'adoma'inai inoni. Na Ha'atee ana God naasi nai hiiriai 'ado'ado mana hei'irisinai inoni.

* 4:3 4:3 Psalm 95:11 † 4:4 4:4 Jenesis 2:2 ‡ 4:7 4:7 Psalm 95:7-8

¹³ 'A bwa'i do ta ta'i maho na'i marewanani na do'ai bainihu ta'inia God. Na mwane mareho hako ra dadao hako na'i dora marewa na'i maana, me 'iia naasi gaigu'i 'unu'i hura'a tanaa i taradi mwani mareho hako gau haa'i.

Jisas Naasi Huunai Bwauododaui Piriisi

¹⁴ Naasi, gai daua baabau i hinihini nagau hadanga'inia tarau hura'asi. 'Inia 'igaau gau to'oraai huunai Bwauododaui Piriisi 'anai 'a'auhigia. 'Iia naasia Jisas, garena God na bwane ara'ai aro 'anai awa beia God.

¹⁵ Na Bwauododaui Piriisi naasi 'a aidangisiai maemae'a nagau haa. Na'i 'oha na awa na'i marewanani, 'iia 'a siri ro'u o'asi suri'i mwane heiohong'i 'onaaigaaui, ma'ata 'a ai'a haua ta ora-ora'a.

¹⁶ Naasi, gau magari ramoramo 'anai boi gaaranga God na goro 'inigia. 'Iia 'a matai ahu ta'ahigia, maai 'a'auhigia na'i 'oha magari 'irisia hei'a'auhi.

5

¹ 'Adonai Bwauododaui Piriisi ra 'ome sigihia baaniraui noni 'anai ura 'iniraui noni na'i tatau'aro ana tanaa God, 'anai hau'i bane tanaa God, ma 'anai hau'i tanaa i ho'asi adaa'i noni 'anai ha'a-ai'a'i ora-ora'a.

² Ma suria 'iia 'e inoni moi na matai hauai ora-ora'a tara'i 'oha, 'iia 'a maratanoa beiraui nei nara taritari'a maraugu ai'a aidangisia dorau taritari'a marau teha baania God.

³ Ma suria 'iraui Bwauododaui Piriisi rau maemae'a ro'u moi 'onaa'iraui noni, na ho'asi narai haa'i 'ada'i ora-ora'a adaa'i inoni, rai haa ro'u 'ada'i ora-ora'a adaa'i haraariraaui.

⁴ 'Anai ha'i Bwauododaui Piriisi, 'e tau'aro na hauasa. 'A bwa'i sae nai matai ha'i Bwauododaui Piriisi suriai hei'irisina haaria. Naasi 'adonai Bwauododaui Piriisi, 'ia God na soiraaui 'ana, 'onaa soia na haa Eron, i 'etanai Bwauododaui Piriisi.

⁵ 'A o'asi ro'ua Kraest. 'Iia 'a ai'a 'ome sigihia haraaria 'anai hauai tau'aro hauasa naasi. 'Ia God naasi na 'ome sigihia. 'Ia God a ha'atee o'ani, "Toe naasi gare agua. Na'i 'ohani 'inau naasi Amamu."*

⁶ Ma na'i ta'i dorai Usu-usu Maea ro'u, 'ia God 'a o'ani, "Toe 'e Piriisi 'onaaia Melkisedek ma'oi ha'i Piriisi nai 'ari moe'a na bwa'i hako."†

⁷ Na'i 'oha 'ia Jisas 'a awa na'i marewanani, 'a ha'arahesi ha'i angiangi tanaa God do'ai 'a'auhia baaniai mae. 'Ia God 'a rongoai ha'arahesi ana, 'inia 'iia 'a ha'ahoua God.

⁸ Ma rei'uaa na 'ia Jisas 'e garena God, me 'iia 'a rongomaata'i di'u. Mana'i rongomaata'i na haua naasi nagu ha'ausuringa'inia 'inia huunai herehere 'anai araisuria God.

⁹ Ma 'inia araisuria ana God, 'ia God 'a ha'a-araria 'anai hauai tahi tarau tanaraui nei narau araisuria.

¹⁰ Mia God 'a sigihia Jisas 'anai Bwauododaui Piriisi 'onaaia Melkisedek.

Ha'abasu 'Iniai Teha Baaniai Hinihini

¹¹ Ra ragoi mareho nau ga'i 'unu'i ro'u mau 'inia he'ua Jisas nagu taarai ha'i huunai Bwauododaui Piriisi 'inia 'onaaia Melkisedek magu bwara, suria mou bwara aidangisi'i raurau i mareho.

¹² 'Tamou mou ha'i sae hinihini orea'a ma ta'isada domou ga'i bwane ha'ausuriraaui ro'u tara'i nei 'ini'i mareho nagau hinihini'i. Me 'a 'ome 'onaa do 'a ta'isada dora ga'i ha'ausuri'amou moe'a ro'u mau 'ini'i ha'atee ana'ia God nara mwada'u 'anai aidangisi'i. 'Tamou mou 'onaa gare na ta'isada'a do 'a ga'i bwane ngau mahoingau baabau, magu tara gonogono wai susu moi 'onaa kakae.

* 5:5 5:5 Psalm 2:7 † 5:6 5:6 Psalm 110:4; 'Oha'iniai mamaani 'inia Melkisedek na'i Jenesis 14:17-24.

¹³ I nei na 'onaai gare na go-gonogono wai susu moi, na aidangina 'a kekerei mau 'onaai gare ma ai'a aidangisiai taha na goro ma odo-odo.

¹⁴ Mia mo'o na matai ngaa'i mahoingau baabau 'a ha'ata'inia do'ia 'a mwanemaua'a. 'Iia 'a matanga'i 'usu haraaria, 'anai 'ome 'iraraa i goro mana ta'aa.

6

¹ Naasi gai abui hadanga'ini'i waiori i ha'ausuringa'i 'inia Kraest nara mwada'u 'anai aidangisi'i. Gai su'a ara'a suri'i ha'ausuringa'i 'abaia Kraest na ta'isada beiraau nei ra maua suri'i hinihinidi. Ai'a ta'isada dogai taraawa'a he'ete'i aho'i ro'u bei'i mareho nagau bwane rongo'i'a 'onaai herehere 'anai hinihinia God mana herehere 'anai rihosi baani'i baronga ta'a'i nara matai waigia 'anai mae tarau.

² Magau ga'i bwa'i 'ari aho'i suri'i ha'ausuringa'i 'ini'i mwani bwareo-maea he'ete'i hairiu,* mana ha'ausuringa'i 'iniai taranai taha nagau nuga'i 'ini'i rimagaa'i na'i hunganai sae, mana ha'ausuringa'i 'iniai suruta'e aho'i baaniai mae nagai haua, mana ha'ausuringa'i 'iniai hihiri na 'ia God 'ai haua na'i ha'ahakonai dangi.

³ Gau magai 'ari daara'i magai maua suri'i hinihinigaa'i. Naasi here nagai haua, 'onaa 'ia God 'ai ha'awatea o'asi.

⁴ 'Iraau nei narau hinihinia ga'ua Kraest maraugu rihota'i baania, 'ai bwara di'u tanaraau do raigu'i rihosi aho'i ro'u tanaa. 'Inia 'ia God 'a bwane ha'amarewa'i 'adoma'idaa'i, marau bwane arunganai goro ana God 'iniraa, marau bwane daua ro'u i Hi'ona Maea.

⁵ Rau aidangisia marau arungana i goro na haa i ha'atee ana God mana mena ana nai ha'ata'i hura'a na'i marewana nai boi mau.

⁶ Naasi na'i 'oha narau daa'i mwane mareho goro o'asi, maraugu rihota'i baania Kraest, 'a bwara do raigu'i orisi ro'u, 'inia 'a 'onaa dorau rabu ahita'inia aho'i ro'u i garena God na'i dadaahoro ma do 'iraaui inoni rai haikou ro'u aho'i 'inia.

⁷ Tara'i sae ra 'onaai dorai ano goro. Na rangi 'a didio na'i hungana mana mahoingau ra hungu goro mana sae nara ngaa'i ra tahi goro 'ini'i. 'Ia God 'ai ha'agorohiai nei na 'onaaii dorai anosi.

⁸ Ma tara'i nei ra 'onaai dorai ano na honu moi 'ini'i hahaarisi ta'a'i mana warorarak. 'A bwa'i mareho nai goro nai hura'a baania. Ni sae na to'oraii dorai ano, 'ai ha'atee ha'ata'aii mousi maai suu ha'a-ai'aa.

⁹ Mwane sae goro agu'i, rei'uaa nau ha'atee o'asi, ma'ata 'inau ai'a hinihinia domoi 'onaaii dorai ano na ta'aasi. Ma'ata 'au hinihini raorao do 'i'amou moi suri'i baronga goro nara arariai nei na 'ia God 'a ruhasia baaniai ora-ora'a.

¹⁰ 'Ia God, ai'a God 'anai ha'a-bweubweu'a. 'Iia 'ai haua ma'ata i heitahari tana'amou 'iniai tau'aro raha namou haa tanaa, ma 'ini ha'ata'inia amou mau mai, i heita'ahi amou tanaa na'i 'oha namou 'a'auhiraau inoni hinihini.

¹¹ 'Au kae 'irisia do 'adomoou hako moi ta'ahi'amou hairiu o'asi tari 'oha na 'ia Kraest 'ai aho'i mai. Ma naasi moigui 'iraraa do ni taha namou 'adoma'i heitotori 'ini'i rai to'o ha'a-momori.

¹² 'Inau ai'a rabasia domoi 'age, ma'ata moi here suriraau nei ra hinihini beiai ahumaratanoa. 'Iraau rau dau'i taha na 'ia God na duruduru 'ini'i tanaraau.

Duruduru Ana God 'A Haa Tanagia i 'Adoma'i Heitotori

* **6:2 Bwareomaea:** 'A 'ome 'onaa do ra ai'a hadanga'iniai bwareomaea 'onaai sae hinihini. Me ra hadanga'ini'i mwane herehere he'ete'i hairiu adaui Jiu 'anai ha'a-wadiwadiraau baaniai ora-ora'a 'iniai wai.

¹³ Ai'a tanei'a ro'u naigui ahaaha di'ua God. Naasi suriai o'asi ana, ai'a do tanei'a ro'u na 'ia God do'aigui duruduru na'i atana, ma'ata 'a tohe na'i atana haaria beiai duruduru na haua. 'A duruduru wetewete tanaa Ebrahim o'ani,

¹⁴ “Inau wai ha'agorohi'o mawai ha'aragoraau warowaromu.”†

¹⁵ 'Ia Ebrahim 'a mangudi 'anai totoriai taha na 'ia God na duruduru 'inia tanaa, mana'i ha'ahakona 'a to'o 'onaai durua ana God tanaa.

¹⁶ 'Oha na 'iraaui inoni rai duruduru wetewete, 'iraaui rai tohe na'i atanai nei na ahaaha di'uraaui. Na'i 'oha na o'asi, 'ai matai ha'abwarasiai heiraeraesi miraaui sae rau 'iraraa doni durudurusi 'ai to'o ha'a-momori.

¹⁷ Naasi, 'ia God 'a tohe na'i atana beiai duruduru na haua, do neina 'iraaui nei narai dauai taha na duruduru 'inia tanaraau, rai 'iraraa ha'agorohia do 'ia God a bwa'i matai orisiai 'ado'adona.

¹⁸ 'Ia God 'a hauai rua mahosi 'anai ha'ata'inia doni durudurusi 'ai boi ha'a-momori ma'ata. 'Etana, 'a hauai duruduru. Ma ruana, 'a tohe na'i atana beiai duruduru na haua. Rua mahosi raru bwa'i matai orisi, 'inia God 'a bwa'i matai pwari'i. Tarana naasi 'igaaui nei nagau 'ariwou beia nagau ha'i dorani ohi 'inia, 'a ha'a-wetewete'i 'ado'adogaa'i dogai dauai taha nagau 'adoma'i heitotori 'ini'i.

¹⁹ Ni 'iraraa agaau dogai dauai taha na 'ia God na duruduru 'inia tanagia, 'a 'onaai hauni huna ada'i tahingagaa'i na bwarai su'a. Mana hinihinia agaau o'asi, 'a 'onaa do 'a waigaau siri na'i dora na awaiei a God. 'A 'onaaiai 'oha na 'iraaui Piriisi rau siri di'uai dora na awaiei bwana ubu-ubu'a nara rohea na'i Ruma Maea marau siri na'i ahii na maea di'u.

²⁰ 'Ia Jisas na bwane siri na'i na'o beia God taragaau. Me'ia na Bwauododaaui Piriisi tanagia 'onaaia Melkisedek me 'ia 'ai ha'i Piriisi nai 'ari moe'a na bwa'i hako.

7

Melkisedek

¹⁻³ 'Ia Melkisedek naasi na Mwaeraha na'i 'omaa nara 'unua 'inia Salem me 'ia 'e Piriisi ana God ororiu ara'ai Aro. Na 'ado'ado 'anai atana, naasi “Mwaeraha Raroma Goro,” marau 'unua ro'u 'inia “Mwaeraha ni Ha'ahagu,” suria naasi 'ado'ado 'anai Salem. Ai'a ta ta'i mamaani narai 'iraraa na dorai usua dio 'inia tei naasi amana mia inana, ma'ua 'iiasi baaniai burungana tei. Ma ai'a tanei nai mataia 'oha na huta, mana 'oha na mae. Naasi 'a 'onaa do 'ia 'e Piriisi tarau'a 'onaai garena God.

Hoita, 'e ta'i 'oha 'ia Ebrahim 'a hei'oi bei'i mwane mwaeraha ma ha'aheho'i hako. 'Oha na aho'i 'anai 'omaa ana, 'ia Melkisedek 'a heisadoi beia ma ha'agorohia Ebrahim. Mia Ebrahim 'a hau'i tanaa Melkisedek tangahurudi mwane mareho na sagu'i suri'i hei'oi 'isi.

⁴ Gau magari 'adoma'i surisuriai ororiu na haa Melkisedek. Rei'uaa 'ia Ebrahim i 'etanai amadaa'i burungagaa'i nagau 'adoma'i ha'a-ahaaha 'inia, mia hau'i tanaa Melkisedek i tangahurudi mwane mareho na sagu'i suri'i hei'oi na siri suri'i.

⁵ Na'i Ringe ana Moses 'a ha'atoraraau Jiu 'anai hau'i tanaraau Piriisi narau awa na'i burungana Livae i 'adodi tangahurudi mareho narau to'ora'i. 'Iraaui Piriisi 'isi rau daa'i mareho 'isi baaniraau inoni adaa'i, rei'uaa na 'iraaui hako ra'i warowarona'i a Ebrahim.

⁶ Me 'ia Melkisedek ai'a baaniai burungana Livae, me 'ia Ebrahim 'a haa'i tanaa i tangahurudi mwane mareho na to'ora'i. Mia Melkisedek 'a ha'agorohia Ebrahim, 'ia mo'o na 'ia God na bwane duruduru tanaa.

† 6:14 6:14 Jenesis 22:16-17

7 Ma 'onaai 'iraraa agaau, na nei na haua i ha'agorohi tanaai nata nei, naasia mo'o na ahaaha di'u baania mo'o na dauai ha'agorohi.

8 Na'i aba beiraaui Piriisi narau dau'i tangahurudi mareho adaa'i Jiu, 'iraaui Piriisi rai matai mae moi. Me 'ia Melkisedek na dau'i tangahurudi mareho ana'ia Ebrahim, na Usu-usu Maea 'a ai'a ha'arangasia hura'a do'ia 'a mae.

9 Magai 'unu 'oniaa. 'Ia Livae miraaui warowarona'i narau matai dau'i tangahurudi mareho adaa'i Jiu, 'a 'onaa do 'iraaui rau haa'i tanaa Melkisedek tangahurudi mareho adaa'i na'i madoraa na 'ia Ebrahim 'a haa'i tanaa Melkisedek tangahurudi mareho ana'i.

10 'Inia rei'uaa na 'ia Livae 'a huta i muri, me 'ia 'e warowarona Ebrahim na hau'i tangahurudi mareho ana'i tanaa Melkisedek.

11 Hoita, gau 'iraraa do na'i 'oha na 'ia God 'a hau'i Ringe tanaraaui Jiu, 'a 'ome sigihiraaui nei baaniai burungana Livae 'anai taguma'ini'i Ringe 'isi. 'Iraaui Piriisi 'isi rau bwa'i matai ruhasiraaui inoni baani'i ora-ora'a adaa'i. Naia na ororiu 'inia do 'ia God 'ai ha'ataaria mai ta Piriisi he'ete'i nai 'onaia Melkisedek, ma'ai abui 'onaia Livae na boi baaniai burungana Eron.*

12 'Onaa 'ia God 'a orisiraaui Piriisi o'asi, 'a ha'ata'inia do ni ringeringe 'anai sigihiai Piriisi 'ai orisi ro'u.

13 'Inia 'ia Araha aga na gau hadanga'iniasi, 'a hura'a mai baaniai burunga he'ete'i na ruruha adaaui ra ai'a sigihiraaui 'anai tatau'aro 'onaia Piriisi na'i dora ni ho'asi.

14 Gau 'iraraa do'ia 'a hura'a mai baaniai burungana Jiuda, ma gau 'iraraa do 'ia Moses 'a ai'a hadanga'iniai burungasi na'i 'oha na hadanga'iniraaui Piriisi.

Jisas 'E Damana Melkisedek

15 Ni orisi na haua i ringe ana God gau aidangisia goro'a, suria 'e Piriisi he'ete'i nagu boi ro'u, mana Piriisi naasi 'a 'onaia Melkisedek.

16 'A he'ua nagu ta'eha mai 'inia 'onaia Piriisi? Ai'a do 'iniai ringeringe na 'unua do 'iraaui Piriisi rai hura'a mai baaniai burungana Livae, me 'iniai mena ana, suria 'ia 'a bwa'i matai mae ta'oha.

17 'Inia ni Usu-usu Maea 'a o'ani, "Toe 'e Piriisi 'onaia Melkisedek mi'oe 'oi ha'i Piriisi nai 'ari moe'a na bwa'i hako."†

18 Na ringe bwanisi 'anai sigihi Piriisi ra nugaa beira'i, suria 'a maemae'a ma ai'a 'a'auhigia.

19 Ha'amomori. Na Ringe ana'ia Moses ra bwa'i matai ruhasigia baani'i ora-ora'a agaa'i. Naasi 'ia God a ha'ata'inia tanagiai tara nagau matai 'u'uri na'iei, ma goro di'ua ro'u woui Ringe ana'ia Moses, ma matai waigia wou gaaranga God.

20-21 Mana nata mareho ro'u, 'ia God 'a hauai duruduru na wetewete tanaa Jisas. 'A o'ani,

“Inau Araha God, 'au duruduru tana'o na'i atagu

ma 'au bwa'i horosiai taha nau duruduru 'inia

do i'oe 'oi ha'i Piriisi nai 'ari moe'a na bwa'i hako.”‡

Ma na'i madoraa na 'iraaui burungana Livae ra sigihiraaui 'anai Piriisi, 'ia God 'a ai'a duruduru wetewete o'asi.

22 Hoita, na'i 'oha na 'ia God 'a duruduru na'i atana tanaa Jisas 'a ha'ata'inia doni duruduru haoru ana 'a ororiu di'u baaniai duruduru bwani.

* 7:11 7:11 'Ia Eron naasi 'etanai Bwauodoi Piriisi. Me 'ia na'i burungana ro'ua Livae. † 7:17 7:17 Psalm 110:4 ‡ 7:20-21 7:21 Psalm 110:4

²³ Mana nata mareho ro'u na ha'ata'iniiai ororiu na haua Jisas baaniraau Piriisi 'a o'ani. Ra rago di'u i sae nara tatau'aro 'onaai Piriisi, ma 'onaa na 'ariwou ma'e Piriisi nai mae, 'e nei he'ete'i narai orisia 'inia.

²⁴ Ma'ata 'ia Jisas 'a awa tarau. Mana tatau'aro ana 'onaai Piriisi 'a bwa'i matai hako.

²⁵ Ma naasi, 'iraau nei ra boi beia 'anai 'ari beia Ama, 'iia 'a matai ha'atahiraau odo-odo'a baaniai mae tarau. 'Iia 'a matai haua o'asi suria 'iia 'a ha'aagau tarau 'anai aba dingadaui nei ra boi beia God.

²⁶ 'Ia Jisas naasi Bwauododaui Piriisi na arari 'anai 'a'auhigia. 'Iia 'a maea, 'a ai'a haua ta ta'i ora-ora'a ma ai'a mareho nai taritari'a na'i aba ana dorai subunia 'inia. 'A he'ete'i baanigia inoni ora-ora'a mia God 'a ha'a-ororiua ara'ai aro.

²⁷ 'Iia ai'a ta'isada do'ai ho'asi ha'ataringa 'onaairaui haru Piriisi nara ho'asi ga'u na'i na'o 'ada'i ora-ora'a adaa'i haariraau, maraugu ho'asi na'i muri ro'u 'ada'i ora-ora'a adaa'i noni. Mia Jisas, ni ho'asi na haa 'iniiai abena haaria 'a haua ha'atai moi, mana ho'asi naasi 'a haua 'ana'ai mwane 'oha 'anai ha'a-gaasinga'ini'i ora-ora'a adaa'i noni.

²⁸ Na'i Ringe ana'ia Moses ra 'unua doni Bwauododaui Piriisi rai sigihiraau baaniraui inoni, rei'uaa rau ora-ora'a. Ma na'i duruduru wetewete ana ani a God na boi murinai Ringe ana'ia Moses, 'ia God 'a sigihiai garena na odo-odo tarau.

8

Kraest, Na Bwauododaui Piriisi Agaau

¹ Na huunai mareho nau ha-hadahadanga'iniasi naani. 'Igaau gau to'oraai Bwauododaui Piriisi na heinagu na'i dorani mwaeraha ara'ai aro na'i aba odona God.*

² 'Iia 'a tatau'aro 'onaai Bwauododaui Piriisi na'i huunai dora maea na 'ia God haaria na tau'arona, ai'a do 'iraui inoni.

³ Ma 'onaai 'iraraa agaau do 'adonai Bwauododaui Piriisi ra hau'i bane mara ho'asi tanaa God, na Bwauododaui Piriisi agaau 'ai haua ro'u i ho'asi mana bane ana.

⁴ Do 'onaa na'i marewanani 'ia Jisas 'a ga'i bwa'i ha'i Piriisi, suria ra'i Piriisi nara bwane awa na'i marewana narau ha'isuri'i Ringe ana'ia Moses 'anai ha'i bane tanaa God.

⁵ Mana tatau'aro adaaui 'onaai Piriisi na'i marewana 'a 'onaa do'e ha'inununa moi taha na to'o ara'ai Aro. 'A ta'isada o'asi ro'u 'oha na 'ia God 'a ha'atee o'ani 'inia Moses 'oha na ha'aagau 'anai ha'a-urasia ara'ai Ruma Maea Saira. 'Ia God 'a ha'abasua ma ha'atee o'ani 'inia,

“‘Oi here suria goro, ma'oi 'iraraa do'oi tagora suria ma'ata i nunu nau ha'ata'inia tana'o na'i hungahunga ani.”†

⁶ Ma'ata na'i 'ohani 'ia God 'a haua tanaa Jisas i tatau'aro ni Piriisi na ororiu di'u'i ro'u wou i tatau'aro adaa'i Piriisi narau tau'aro na'i marewana. Mana duruduru haoru na 'ia God na haua tanaa Jisas 'anai haua tanaraui inoni 'a ororiu di'u baaniai duruduru bwani. 'Inia ni mareho na 'ia God na duruduru 'ini'i tanagia na'i duruduru haorusi, ra goro di'u ro'u wou baani'i mareho na duruduru 'ini'i na'i duruduru bwani.

⁷ 'Onaa ai'a ta mareho nai taritari'a na'i duruduru bwani, ra ga'i bwa'igui orisia'a 'inia ta duruduru he'ete'i ro'u.

⁸ Me 'ia Araha God haraaria na 'omesiai mareho na taritari'a 'inia, na'i 'oha na ha'atee o'ani,

“‘E 'oha nai boi mau na 'inau wai haua ta duruduru he'ete'i beiraui inoni nai Israel mei Jiuda.

* 8:1 8:1 Psalm 110:1 † 8:5 8:5 Eksodas 25:40

- 9 Mana duruduru naasi 'a bwa'igui 'onaaia'a i duruduru bwani nau haua beiraaui wauwa adaa'i 'oha bwani, na'i 'oha nau wairaaui hura'a baaniai Ijip.
Suria ai'a awa suria adaui duruduru nau haa beiraaui, naugu taarai murisiraau 'inia."
- 10 Ma ha'atee o'ani ro'u,
"Naani duruduru haoru nawaigui haua ro'u na'i murinai nei bwani beiraaui noni nai Israel.
'Inau wai nuga'i ringeringe agu'i suri'i 'adoma'idaa'i mana tahingadaa'i, neina rai ha'isuri'i.
'Inau wai ha'i God adaui, miraui rai ha'i inoni agu'i.
- 11 Ai'a ororiu do ta sae nai 'unua'a ro'u tanaraui noni na'i 'omaa, ma'ua tanaraui nei ana'i, do 'ana'i aidangisia Araha.
'Inia taraawa'a beiraaui hasihasi inoni, ara'a tari beiraaui sae mwanemaui rai aidangisiau hako.
- 12 'Inau wai 'adoma'i nugasi'i taha nara taritari'a narau haa'i, mau bwa'i 'adoma'ini'i aho'i ora-ora'a adaa'i."‡
- 13 Hoita, 'oha na 'ia God 'a 'unua do ni duruduru naasi 'e duruduru haoru, 'a ha'ata'inia do duruduru na'i na'osi, 'a bwani'a. Mana mareho na bwani, 'onaai 'iraraa agaui, 'a hahanoria'a wou i ta'aa 'ana'i ai'aa.

9

Herehere Bwani Na'i Rihunga'i

1 Na'i duruduru tahamora, 'ia God 'a hau'i tanaa Moses tara'i herehere do 'ana'i suri'i na'i rihunga'i ma 'unua tanaa 'ana'i tau'arona ta ruma saira 'ana'i Ruma Maea na'i marewanani 'ana'i rihunga'i na'iei.

2 Mana'i raronai Ruma Maeasi, 'e rua ahii na awaiei. Mana'i 'etanai ahii 'e raita, ma'e tebol na awaiei, mana'i hunganai tebol naasi na awaiei bredi maea, mana ahiisi ra 'unua 'inia dora maea.*

3 'E kae bwana ubu-ubu'a nara rohe bwarasia 'inia ruanai ahii. Na ruanai ahii ra 'unua 'inia dora na maea di'u.†

4 Na'i raronai ahii naasi nara nugaa ei dora ni ho'asi nara matai suungi'i ei insens, mana dora ni ho'asi naasi ra tau'arona 'inia gol. Na'i ahii ro'usi na awaiei bakosi nara 'unua 'inia "Bakosi Duruduru ana God," mana abena hakoi bakosi naasi ra kuhaia 'inia gol. Mana'i raronai bakosi naasi 'e bei nara tagoraa 'inia gol nara awa i mahoingau nara 'unu'i 'ini'i "Mana," i 'a'abi ana Eron nara pwirai rawa na'iei, ma nai'i'ai hau hetaheta'a nara usua ei ta'i tangahurui ha'atora.‡

5 Mana'i hunganai bakosisi 'e rua cherubim, ra'i mareho gahogaho'a nara aranunudi nararu ura na'iei 'ana'i ha'ata'inia do ni rarahana God na awa 'isi. Mana gahogahodi rua cherubimisi ra adaahusia hako i dora na'i hunganai bakosi nara 'unua 'inia dora ni ha'a-gaasinga'ini'i ora-ora'a adaa'i inoni.§ Na'i 'ohani, 'inau ai'a to'o madoraa arari 'ana'i 'unu tahanga'ini'i goro hako i mwane maho.

6 Hoita naasi na'i 'oha nara ha'a-aratarai hako o'asi mareho 'isi, 'iraui Piriisi rau matai siri na'i 'etanai ahii 'ado dangi 'ana'i hauai tau'aro adaa'i.*

7 Ma'ata na'i ruanai ahii naasi, na Bwauododaaui moi Piriisi na matai siriei, ma matai siri ha'atai moi 'ado harisi. 'Oha nai siri 'ai waa ma'ata'a

‡ 8:12 8:8-12 Jeremaea 31:31-34 * 9:2 9:2 Eksodas 26:1-30; 25:23-30, 31-40 † 9:3 9:3 Eksodas 26:31-33 ‡ 9:4 9:4 Eksodas 30:1-6; 25:10-16; 16:33; Nambas 17:1-11; Eksodas 25:16; Diutronomi 10:35 § 9:5 9:5 Eksodas 25:18-22 * 9:6 9:6 Nambas 18:2-6

i 'abunai mwamwaa, ma waa siri 'anai ho'asi 'inia tanaa God 'ini'i ora-ora'a ana'i haaria mana ora-ora'a adaa'i inoni nara haa'i maraugu ai'a aidangisi'i.†

8 Suri'i herehere 'isi, na Hi'ona Maea 'a ha'ata'inia tanagia doni mwani inoni na'i 'oha bwani ra bwa'i matai ataha siri beia God na'i dora na maea di'usi. 'A bwara, suriai awa ana mau i 'etanai ahii na'i Ruma Maea Saira mana mwani herehere bwani na ura 'ana.

9 Ni mareho 'isi ra ha'ata'inia tanagiai noni nagau tahi na'i madoraani, doni bane mana ho'asi nara wate'i tanaa God, ra bwa'i matai ha'a-wariwari'i tahingadaa'i ma'ua ha'a-ai'a'i 'inodaa'i nei narau waa'i mai.

10 'Inia ni bane mana ho'asi nara haa'i, rau haa'i moi 'ada'i ringeringe 'ada'i mahoingau, mareho 'onaai gono, ma tara'i herehere 'anai ha'a-wadiwadi'i abedaa'i. Mana ringeringe 'isi ra'i ringe 'ana moi abe. 'Ia God 'a niga'i tanagia 'anai suri'i tari na'i 'oha na nigaa i herehere haoru.

Kraest Na Huunai Ho'asi

11 Naasi 'ia Kraest 'a boi'a ma tatau'aro 'onaai Bwauododaui Piriisi agaau. Me 'iia 'a waa'i mai mwane mareho goro nagau to'ora'i'a suri'i tahingagaa'i. 'Iia 'a siri 'ari na'i huunai dora maea ara'ai aro, mana dora maea naasi, ai'a dora na inoni nai tau'arona, ma'uasi do'e aba 'inia ha'apwa'ara na'i marewanani.

12 'Iia 'a siri ha'atai moi na'i dora na maea di'u magu bwa'i hura'a ro'u ta'oha. 'A wateai 'abuna tanaa God mana 'abu naasi, ai'a 'abui gout ma'ua 'abui kau. 'Iia 'a hauai 'abuna haaria, me 'inia 'abuna 'a ruhasigia tarau'a baaniai ora-ora'a.

13 Na'i herehere bwani, na 'abunai kau mana gout, dohudohunai garei kau bwabwa nara suu ho'asi 'inia, ra tamusia huniraau nei rau ora-ora'a.‡ Naasi 'anai ha'a-wadiwadiraau aho'i baani'i taha nara ha'ado'o'araau.

14 'Onaa na o'asi, moi 'adoma'i suriai wetewete na haai 'abuna Kraest. Ni 'abuna Kraest 'ai ha'a-wariwari'i tahingagaa'i baani'i here nara matai waigia 'anai mae tarau do nei nagai matai tau'aro tanaa God na tahitahi. Beiai mena anai Hi'ona Maea na awa tarau, 'ia Kraest 'a watea haaria tanaa God 'anai ho'asi 'inia haaria, 'e ho'asi na goro ma odo-odo hako.

15 Tarana naasi 'ia Kraest na waa mai duruduru haoru ana God tanaraau inoni, neina 'iraui nei na 'ia God na 'ome sigihiraau, rai dauai taha na 'ia God 'a duruduru tanaraau 'inia mana mareho 'isi rai awa tarau. Rai daa'i mareho 'isi, 'inia 'ia Kraest 'a mae 'anai ruhasi'i ora-ora'a adaa'i nei rau haai ta'aa na'i 'oha narau awa mau na'i bahainai heimarungi anai duruduru bwani.

16-17 Hoita, 'onaa 'e nei nai hauai duruduru, mai duruduru tanaa tanei do 'ai daa'i toto'ora ana'i na'i 'oha nai mae, na durudurusi ai'a wetewete na'i 'oha na 'ia mo'osi 'a ai'a mae mau. Ma'ata 'aigui wetewete na'i murinai mae ana.

18 Na tarana naasi narau haa 'inia 'abu na'i duruduru bwani, 'anai ha'ata'inia hura'a do'e mae na to'o.

19 Na'i 'oha na 'ia Moses 'a aoha'ini'i hako i ha'atora tanaraau inoni, 'a hiri'iai warihui siip nara ha'a-wangawangaa na'i gere raraan baaniai pwirapwirai hasi'ei nara 'unua 'inia hisop, ma ruha'inia dio na'i wai nara doraria 'inia 'abui kau mana gout. Naasi ma tamusia 'inia bukani ha'atora, magu tamusiraau ro'u inoni 'inia.

20 'A haua o'asi magu ha'atee o'ani, "Naasi 'abu 'anai ha'a-'o'oriai duruduru na 'ia God na ha'atora'amou 'anai suria."§

† 9:7 9:7 Levitikas 16:2-34 ‡ 9:13 9:13 Levitikas 16:15-16; Nambas 19:9, 17-19 § 9:20 9:19-20 Eksodas 24:6-8

21 Naasi magu tamusia ro'u i Ruma Maea Saira, mana mwane mareho na'i raronā na 'iraau Piriisi rau tatau'aro 'ini'i, 'a tamusi'i hako.*

22 Na'i Ringe ana'ia Moses, gaarangi 'adonai mareho hako rai tamusi'i 'inia'i 'abu, ma naasi 'agu ha'ata'inia do 'agu wadiwadi baaniai ora-ora'a. Ma 'onaa na 'abu 'a bwa'i ahe, 'ia God 'a bwa'i 'adoma'i nugasi'i ora-ora'a adaa'i inoni.†

23 Naasi 'a ororiu doni Ruma Maea Saira mana mwane mareho na'i raronā nara ha'inunudi mareho ni aro, rai ha'a-wariwari'i 'inia'i 'abu. Ma'ata na huudi mareho ni aro, rai ha'a-wariwari'i 'inia'i ho'asi na ororiu di'u baani'i ho'asi nara bwani hahaa'i na'i marewanani.

24 'Ia Kraest 'a aho'i ara'ai aro 'anai ura 'inigaau noni na'i maana God. 'Iia 'a ai'a siri na'i dora na maea di'u na'i Ruma Maea na'i marewanani na inoni moi nara tagoraa, 'inia ni Ruma Maeasi 'e nunu moi 'anai huunai nei na'i aro.

25 Mana ara'a na haua na'i aro, ai'a do'ai ho'asi 'inia haaria 'ado 'oha 'onaairaui Piriisi agaa'i Jiu nara siri 'ado harisi na'i Ruma Maea 'anai ho'asi 'inia'i 'abui mwamwaa.

26 'Onaa na ga'i o'asi, 'ia Kraest 'a ga'i bwane taringai mae mau mai taraawa'anai marewana. Me 'a ai'a. Na'i madoraa na raumwadu i hahakonai dangi, 'iia 'a boi ha'atai moi 'ana'ai mwane 'oha 'anai waia beira'i ora-ora'a 'inia'i ho'asi ana 'inia haaria.

27 'Adonai inoni 'ai mae ha'atai moi, mana'i murinai mae 'e hihiri.

28 Naasi 'ia Kraest 'a o'asi ro'u, 'iia 'a mae ha'atai moi 'anai wai'i beira'i ora-ora'a adaa'i hakoi mwane inoni. Mana aho'i mai nai haua, ai'a do 'anai mae ro'u 'ada'i ora-ora'a, ma'ata 'ai boi 'anai hauai tahi tarau tanaraui nei narau ha'aagau mamasia.

10

1 Ni mwani herehere na'i raronai Ringe ana'ia Moses ra'i nunu moi 'ada'i huudi mareho goro narai boi ta 'oha, ai'a do nara 'isi'a i huudi mareho. Ni ho'asi na Ringe ana'ia Moses na 'unu'i nara hahaa'i 'ado harisi, ra ai'a huunai ha'a-wariwariraaui nei narau boi 'anai rihunga'i.

2 'Onaa na ga'i huunai ha'a-wariwariraaui, na ho'asi naasi ra ga'i bwa'igui haua'a ro'u, marau ga'i bwa'i arunga 'ino'a mau 'ini'i ora-ora'a adaa'i.

3 Me ai'a o'asi. Ni ho'asi narau hau'i 'ado harisi, ra ha'a 'adoma'i aho'isiraau tarau 'ini'i ora-ora'a adaa'i.

4 Suria na 'abui kau mwane mana 'abui gout 'a bwa'i matai ha'a-gaasinga'inia'i ora-ora'a.

5 Tarana naasi 'ia Kraest 'a ha'atee o'ani tanaa God na'i 'oha na boi na'i marewana,

“T'oe 'o ai'a rabasi'i ho'asi mana wawate nara haa'i.

Me i'oe 'o hauai abe tanaau dona 'inau wai wateau haariau tana'o 'onaai ho'asi.

6 I'oe 'o ai'a ahugoro 'inia'i mwamwaa nara ho'asi susuu 'inia mana ho'asi 'anai ha'a-gaasinga'ini'i ora-ora'a.

7 Naasi mau o'ani, ‘God. 'Ome, ninauni. 'Inau 'au boi 'anai hauai taha na'o 'irisia 'onaai usu 'abaiau ada na'i Usu-usu Maea.’ ”*

8 Na Ringe ana'ia Moses 'a 'unua do 'iraau Piriisi rai suu ho'asi marai haa'i tara'i wawate tanaa God. Ma rei'uaa na o'asi, na'i dorai Usu-usu Maea ani, 'ia Kraest 'a ha'atee o'ani 'inia God, “T'oe 'o ai'a rabasi'i ho'asi mana wawate nara haa'i, ma'o ai'a ahugoro 'ini'i ho'asi susuu, mana ho'asi 'anai ha'a-gaasinga'ini'i ora-ora'a.”

* 9:21 9:21 Levitikas 8:15 † 9:22 9:22 Levitikas 17:11 * 10:7 10:5-7 Psalm 40:6-8

⁹ Naasi magu o'ani ro'u na'i muri, "Ninauni. 'Inau 'au boi 'anai hauai taha 'o 'irisia." Naasi ma ha'ahakoai duruduru bwani 'anai nugaai nata nei.

¹⁰ 'Ia Jisas Kraest 'a araisuriai hei'irisina God ma wateai abena 'anai mae ha'atai moi 'inigia 'onaai ho'asi. Ma naasi, 'igaau gau ha'i noni maea ana'ia God.

¹¹ Na'i duruduru bwani 'iraau Piriisi adaa'i Jiu ra ura 'ado dangi 'anai taraa hahaa'i moi ta'i ho'asi nara bwane hahaa'i mau mai nara ai'a matai ha'ahakoai ora-ora'a.

¹² Me 'ia Kraest, ni ho'asi na haua ha'atai moi 'ada'i ora-ora'a 'a goro daara'i 'ana'ai 'ado 'oha. Naasi magu heinagu na'i dora ni ha'ahou na'i odona God.

¹³ Ma totori tari madoraa na 'ia God 'ai nugaraau maerongana'i na'i bahainai heimarungi ana.

¹⁴ Me 'inia ta'i ho'asi naasi, 'a huunai ha'a-ararigaau i noni maea ana'ia God 'anai 'ari wou beia.

¹⁵ Na Hi'ona Maea 'a ha'ata'inia ro'u hura'a tanagia do 'a o'asi ha'a-momori. 'Inia na'i Usu-usu Maea ra usua o'ani,

¹⁶ "Ia Araha God 'a o'ani, 'Naani duruduru haoru nawai haua beiraui inoni na'i huunai madoraa 'ana.

Wai nuga'i ha'atora agu'i suri'i 'adoma'idaa'i mana'i tahingadaa'i marai aidangisi'i.' "†

¹⁷ Maagu o'ani ro'u,

"Augu bwa'i 'adoma'ini'i'a i ora-ora'a adaa'i mana taha nara taritari'a narau haa'i."‡

¹⁸ Hoita, 'onaa na bwane 'adoma'i nugasi'i ora-ora'a, ai'a ta'isada do raigui hau'i ro'u tara'i ho'asi 'anai ha'a-gaasinga'iniai ora-ora'a.

'Anai Dau Baabau Na'i Duruduru Ana God

¹⁹ Naasi arai do'ora mana asigu'i, suriai 'abuna Jisas 'a ahe 'inigia, 'igaau gau mwaridanga'a 'anai ataha siri beia God na'i dora na maea di'usi.

²⁰ Gau matai haua o'asi, suria gau to'oraai tara haoru na hano 'anai tahi tarau na 'ia Kraest na tahangia tanagia 'iniai mae na haa na'i dadaahoro. Mana mae na haa 'a 'onaa do'a rahiai kae bwana ubu-ubu'a nara rohe bwarasia 'iniai dora maea.

²¹ 'Igaau gau to'oraai Bwauododaui Piriisi hauasa 'anai 'omesurigaui inoni ana'ia God.

²² Naasi, gau magari boi gaarangia God beiai huunai tahinga na ha'a-momori ma huunai 'u'uria. 'Iia 'a bwane ha'a-wariwari'i tahingagaa'i 'iniai 'abuna, do neina gaigui abui arunga 'ino'a'a ro'u, ma 'onaa do'a ha'a-wariwarigia 'iniai wai na goro.§

²³ 'Igaau gau bwane maania hura'a tanaraui noni do ra'i mareho na gau 'adoma'i heitotori 'ini'i. Gai dau baabau magari abui 'adoma'i heiruarua'a 'ini'i mareho 'isi. 'Inia 'igaau gau matai 'u'uria taraua God suri'i duruduru ana'i tanagia.

²⁴ Gai 'adoma'i raha 'iniai taha na gau matai haua 'anai 'a'auhiai nata nei, neina 'iia 'ai ha'ata'iniai heita'ahi tanaa ro'u i nata nei, ma 'ai hau'i mwane mareho goro.

²⁵ Gai abui mamarota'i boi goni 'anai rihunga'i, rei'uaa na tara'i nei ra bwane mamaro'a. Ma'ata moi boi goni 'anai ha'a-o'ori'amou hairiu. 'A ororiu di'u domoi haua o'asi tarau, 'inia na dangi nai aho'i mai Araha 'a raumwadu.

† 10:16 10:16 Jeremaea 31:33 ‡ 10:17 10:17 Jeremaea 31:34 § 10:22 10:22 Tara'i sae ra 'adoma'inia do ra hadanga'iniai bwareomaea.

²⁶ 'Onaa nagau ta'ahia mau i ora-ora'a magau bwa'i agoheta'i haa'i mareho ta'a'i na'i 'oha nagau bwane aidangisiai huunai ha'ausuringa'i, me 'a bwa'i ho'asi'a ro'u naigui awa ro'u nai matai ha'a-gaasinga'ini'i ora-ora'a 'isi.

²⁷ Me 'igaau gai mamasi moi ha'i maaaa'u 'anai 'oha na 'ia God 'ai ha'a-mama'aigia na'i 'eu raha na matai noro ha'a-dorohuraaui nei narau ha'ima'e beia.

²⁸ 'Onaai bwane 'iraraa amou, 'onaa 'e waira rua ma'ua oru narai ha'arangasia hura'a do 'e sae na kakawata'i araisuri'i Ringe ana'ia Moses, 'ia mo'osi ra bwa'i arunga ta'ahia, rai ngahu gata'inia moi.*

²⁹ Naasi, moi 'adoma'iniai maaaa'a nai hauai ha'a-mama'ai tanaai nei na here bodio 'iniai Garena God, ma ai'a 'adoma'i hihia 'iniai 'abuna, rei'uaa na 'abu naasi na ahe 'anai ha'a-'oriai duruduru haoru ana God ma ha'a-wariwaria baaniai ora-ora'a. 'Ia mo'osi 'a here ha'ata'ai ai Hi'ona Maea na ha'ata'iniai goro ana God 'inigia.

³⁰ Magau 'iraraa do'ia God na o'ani,
 "Inau wai ha'a-mama'airaui sae hehereta'a'i.

'Inau wai su'ua aho'i tanaraau."
 Magu ha'atee o'ani ro'u,

"Inau a Araha God, 'inau wai hiiriraui inoni agu'i."†

³¹ 'E maho na ha'amagugu abe di'u naasi do'ia God na tahitahi, 'ai hiiri'o.

³² Abui kaku'aa'i 'oha namou taraawa'a hinihiniai Taroha Goro 'inia Kraest mamou siri mai na'i marewa. Moi 'adoma'i suria aho'i ura wetewete namou haua suri'i hinihinimoo'i, rei'uaa tara'i 'oha mou siri suri'i rongomaata'i nara raha di'u.

³³ Ra'i 'oha ra ha'atee ha'a-ta'ai'amou mara here ha'a-maata'i'amou suri'i maadi inoni. Tara'i 'oha mou 'a'auhiraui nei ra ha'a-maata'iraui ro'u o'asi.

³⁴ Mou arunga ta'ahiraui mamou 'a'auhiraui nei ra gaasiraui na'i rumanih'o. Ma rei'uaa ra waa'i baani'amou mareho namou to'ora'i, 'i'amou wa'ewa'e moi. Mou wa'ewa'e suria mou aidangisia do 'e mareho nai goro di'u ro'u wou nai awa tarau namoi dau'i mau ro'u ta'oha.

³⁵ Rei'uaa mwane mareho rai to'oto'o he'ua, me moi abui ha'a-ai'aa'i 'ado'ado wetewete 'anai 'u'uria Araha. 'Inia 'e kaeni heitahari raha namoi daua 'inia.

³⁶ Moi wetewete mamoi mangudi neina moi hauai hei'irisina God mamoi dauai taha na 'ia God na duruduru tana'amou 'inia.

³⁷ 'Inia na Usu-usu Maea 'a o'ani,
 "A bwa'i ore'a mia mo'o nai boi 'ai boi'a,
 'iia 'agu bwa'i mamasi'a ro'u.

³⁸ Miraui nei narau odo-odo na'i maagu narau hinihiniau rai to'oraa i huunai tahi,

mia tei nai rihota'i aho'i baaniau 'au bwa'i ahugoro 'inia."‡

³⁹ Me 'igaau gau ai'a 'onaairaaui nei narau rihota'i aho'i narai ha'a-mama'airaui na'i dora ni rongomaata'i. Ai'a. 'Igaau ra'i inoni nagau hinihinia God, mia God 'ai haua tanagaui i tahi tarau.

11

Tara'i Heiha'auu 'Iniai Taha Naasi Hinihini

¹ Taha naasi hinihini? Hinihini, naasi 'adoma'i wetewete nagau to'oraa do na mareho nagau 'adoma'i heitotori 'ini'i rai to'o ha'a-momori, rei'uaa nara ai'a to'o mau.

² Ma na'i 'oha i na'o, 'ia God 'a taeniraui inoni suriai hinihinia adaui.

* **10:28** 10:28 Diutronomi 17:6; 19:15 † **10:30** 10:30 Diutronomi 32:35-36 ‡ **10:38** 10:37-38 Habakuk 2:3-4

³ Suriai hinihini, naasi nagau aidangisia 'inia do na marewanani 'a pwa'ara moi 'iniai ha'atee ana God, do neina baaniai taha nagau ai'a matai 'omesia rai hura'a mai taha nagau matai 'omesi'i.

⁴ Suria Ebol 'a hinihinia God, 'ia Ebol 'a hauai ho'asi na arari goro na 'ia God na wa'ewa'e 'inia baaniai ho'asi na 'ia Kein na haa. Mia God 'a wa'ewa'e 'iniai ho'asi na haua, ma 'unua do 'iia 'e inoni odo-odo. Ma rei'uaa na 'iia 'a bwane mae, ma'ata ni hinihini na haua beia God 'e ha'ausuringa'i tanagiai noni mau tari mai na'i dangini.

⁵ Suria 'ia Inok 'a hinihinia God nara waia ha'i tahi 'inia ara'ai aro. 'Agu 'asu'ani ai'aa moi, suria 'ia God na waia.* Na'i Usu-usu Maea 'a 'unua do 'ia God 'a waia Inok, 'inia 'ia God 'a wa'ewa'e 'inia.

⁶ Naasi mou 'omesia do 'abwa'i nei nai matai ha'a-wa'ewa'ea God 'onaa na bwa'i to'oraai hinihini. 'Inia 'iatei na raba boi beia God, 'ai hinihini ma'ata'a do 'ia God 'a awa ha'a-momori ma matai tahariraaui nei narau siba suria.

⁷ Suria 'ia Noa 'a hinihinia God, 'ia Noa 'a araisuriai ha'abasu na haa God tanaa 'iniai mareho narau ai'a 'omesia do'ai to'o ga'u ta 'oha. 'Iia 'a araisuria God ma tagoraai haka 'anai ha'atahiraui ruruha ana. 'Iniai hinihinina beia God, 'iia 'e ta'i 'ini'i nei nara odo-odo na'i maana God. Mana barongana Noa 'a ha'ata'inia doni inoni na'i 'ohasi ra ta'aa ma arari do'ia God 'ai hiiri ha'amaesiraaui.

⁸ Suria 'ia Ebrahim 'a hinihinia God, 'ia Ebrahim 'a araisuria God 'oha na soia ma 'unua tanaa do'ai hura'a maai hano 'anai dora na duruduru 'inia tanaa do'ai haua tanaa. Na'i 'oha na hura'a na hano, 'iia 'a hano ha'i ai'a aidangisiai dora na 'ia God na duruduru tanaa 'inia.

⁹ Ma na'i 'oha na ataha na'i dorasi, 'iia 'a awa na'i 'isi mana hinihinina 'a awa mau na'i hungana God. 'Iia 'a awa suri'i ruma saira 'onaai mahuara. Mana garena, 'ia Aisak, mana wauwana, 'ia Jekop, raru awa o'asi ro'u rei'uaa na 'ia God na duruduru tanararua ro'u 'iniai dorasi.

¹⁰ 'Ia Ebrahim 'a mwa'emwa'e 'anai awa o'asi 'inia 'a 'adoma'i heitotori 'iniai 'omaa nai awa tarau. 'Omaasi 'ia God nai hauai nununa, me 'iia ro'u nai tagoraa.

¹¹ Suria 'ia Ebrahim mea Sera raru hinihini, rei'uaa raru wari di'u'a, mia Sera 'a 'amara ro'u, me rarugu buna to'o gare mau. 'A o'asi 'inia 'ia Ebrahim 'a hinihinia do'ia God 'a bwa'i horosia mwada'u i duruduru ana.

¹² Rei'uaa na 'ia Ebrahim 'a wari di'u'a 'anai haua ta gare, me baania 'a hura'a mai kae ruruha raha na bwa'i nei nai matai uduma'i arariraaui. Na rago rau haa 'a 'onaai'i hee'u nai aro mana nunu'u nai one.

¹³ 'Iraui inoni 'isi, rau hinihinia God tari mae, rei'uaa narau ai'a daa'i na'i marewanani taha na 'ia God na duruduru tanaraui 'ini'i. Ma'ata 'a 'onaa do rau wanasi'i 'ariwou i taha narai daua mau ta'oha, marau wa'ewa'e 'ini'i. Naasi, rau ha'ata'inia hura'a do 'iraui ra'i mahuara, ma ra'i inoni nara gaariri moi mai na'i marewanani.

¹⁴ 'Irai nei nara here o'asi, 'a ha'ata'inia dorau siba suria nadaui i huunai 'omaa.

¹⁵ 'Onaa narau ga'i 'adoma'inia doni 'omaa narau hano baania naasi huunai 'omaa, rau ga'i suria aho'i tara narau boi suria.

¹⁶ Me ai'a! Rau siba suriai 'omaa na goro di'u ro'u wou, 'e 'omaa goro na'i aro. Tarana naasi 'ia God 'a mari'ori'o 'iniraaui 'oha narau 'unua do'ia 'e God adaui. Gau 'iraraa o'asi, 'inia 'iia na tagoraai 'omaa tanaraui na'i aro.

¹⁷⁻¹⁸ Suria 'ia Ebrahim 'a hinihini na taarai mwa'emwa'e 'anai ho'asi 'inia Aisak, 'oha na 'ia God 'a ohongiai hinihinina Ebrahim. 'Ia Aisak naasi'a i ta'i gare ana, ma'ata 'a mwa'emwa'e 'anai ho'asi 'inia tanaa God rei'uaa na

* 11:5 11:5 Jenesis 5:24

'ia God 'a bwane duruduru o'ani tanaa, “Baania Aisak naasi narai hura'a mai inoni 'anai ha'arago'i warowaromu.”†

19 'Ia Ebrahim 'a hinihini do 'onaa 'ai mae a Aisak, 'ia God 'ai matai ha'-suruta'ea aho'i baaniai mae. Naasi na'i 'ohasi, 'ia Ebrahim 'a 'onaa do 'a waia aho'i garena na mae ga'u.

20 Suria 'ia Aisak 'a hinihinia God nagu taarai ha'agorohirarua 'inia i rua gare ana, 'ia Jekop mia Iso. 'A maania tanararua i ha'agorohi na 'ia God 'ai haua mau tanararua.‡

21 Suria 'ia Jekop 'a hinihinia God nagu taarai ha'agorohirarua 'inia i rua wauwa ana, ni rua gare mwane ana Josep. Na'i 'ohasi 'ia Jekop 'a wari di'u'a ma gaarangi mae'a, ma dau wou na'i 'a'abi ana ma ha'aasaa God.§

22 Suria 'ia Josep 'a hinihinia God, 'oha na gaarangiai 'oha ana 'anai mae, 'a hadanga'iniai hura'a wairaaui nai haa God inoni nai Israel baaniai Ijip, ma 'unua tanaraaui here narai haua 'ada'i surisurina'i 'oha nai mae.*

23 Suria inana mana amana Moses raru hinihinia God, nararugu taarai girua 'inia Moses suriai oru hura murinai huta ana. Ni 'omesia adarua do'ia 'e gare 'ome goro, rau ai'a araisuriai taha i mwaeraha na 'unua.

24 Suria 'ia Moses 'a hinihinia God, 'oha na raha ara'a, 'a ai'a rabasia dorai 'unua do 'ia 'e gare anai gare urao anai Mwaeraha ni Ijip.

25 'Iia 'a 'adoma'i nunuga na'i tahingana hako 'anai rongomaata'i goni beiraaui inoni ana'ia God. 'A 'iraraa doni heresi 'a goro di'u baaniai awa wa'ewa'e moi na'i gere madoraa na'i ora-ora'a.

26 'Iia 'a 'adoma'inia do, 'anai rongomaata'i 'iniai hinihinina do 'ia God 'ai ha'ataariai Ha'atahi 'anai ha'atahiraauui Jiu, 'a goro baaniai to'ora'i mwane mareho goro na'i Ijip. Suria 'ia 'a wana 'ari na'i 'oha nai boi mau 'anai kae heitahari raha na 'ia God nai haua tanaa.

27 Suria 'ia Moses 'a hinihinia God, nagu taarai hano 'inia baaniai Ijip ha'i ai'a maaa'usiai Mwaeraha. 'Iia 'a hano moi ma ai'a raba rihota'i aho'i, 'inia na'i 'adoma'ina 'a 'onaa do'a rere'ia'a woua God, rei'uaa na ai'a ta sae mau nai wana to'ia beia.

28 Suria 'ia Moses 'a hinihini nagu taarai haua 'inia tanaraaui inoni nai Israel i ringei Roho Aharau, ma 'unua tanaraau 'anai tamusi'i bwaudi maraaruma adaa'i 'iniai 'abui mwamwaa, do neina enjel 'anai ha'amaesi 'a bwa'i matai ha'amaesi'i garemwane hutai na'o adaa'i.

29 Suria rau hinihinia God, 'a hoaiasi meramera'a taradaaui inoni nai Israel marau hano horo na'i dora mamata. 'Oha na 'iraauui Ijip raugu ataha wou na'i 'isi 'iniai hano haisuri adaau, na asi 'a toto goni aho'i huniraau, marau dodo hako.

30 Suria rau hinihinia God, 'e biu dangi na 'iraauui inoni nai Israel rau hano gariai Jeriko, mana'i murinai biu dangisi, na banihau 'anai 'omaasi 'a kokohu.

31 'Ia Rehab 'e urao rebirebi na'i 'omaasi. Me suria 'a hinihinia God, ra ai'a ngahu ha'amaesia beiraaui inoni narau hairaesii beia God na'i 'omaa anasi. 'Inia 'ia naasi na ha'a-maotoraruai rua saeni Israel nara ha'a-taarirarua wou 'anai wana girugiru na'i 'omaasi.

32 'A goro'a ga'u! 'Au ai'a to'o madoraa 'anai mamaani surisuria 'aria Gidion, 'ia Barak, 'ia Samson, 'ia Jefta, 'ia Deved, 'ia Samiuel, miraauui rarabea.

33 Suriai hinihinia adaaua God, rau ha'ato'o'i kae mareho. Rau ha'aheho'i tara'i kantri narau hei'oi bei'i. Rau heimarungi beiai here odo-odo ma rau

† 11:17-18 11:17-18 Jenesis 21:12 ‡ 11:20 11:20 Jenesis 27:27-29, 39-40 § 11:21 11:21 Jenesis 47:31-48:20 * 11:22 11:22 Jenesis 50:24-25; Eksodas 13:19

daa'i taha na 'ia God na duruduru tanaraau 'ini'i. Tara'i nei 'iniraau, na laeon ai'a ngauraa suria 'ia God 'a ha'abwarasi'i ngoodi.

³⁴ Tara'i nei ra gaasiraau na'i kae 'eu mara ai'a noro. Tara'i nei, na naihi adaai maerongadaai ra ai'a to'iraau. Tara'i nei, rei'uaa narau maemae'a na'i na'o, na'i muri rau wetewete. Tara'i nei, rau ramo suri'i hei'oi marau ha'aheho'i maerongadaai marau ha'ahorahiraau.

³⁵ Suriai hinihinia adaaua God, ra'i urao na gare adaai ra mae, mara tahi aho'i.

Ma'ata, tara'i sae hinihini na maerongadaai ra here ha'a-rongomaata'iraau. 'Onaa rau ga'i nugasi'i hinihinidaai, ra ga'i ha'hura'ahiraau dadara'a, me rau wa'ewa'e moi 'anai rongomaata'i o'asi tari mae. 'Inia rau 'irisia do rai suruta'e aho'i 'anai dauai tahi na goro di'u ro'u wou.

³⁶ Tara'i nei ro'u ra haikou 'iniraau mara rabusi'i, ma tara'i nei ra tosi'i 'ini'i arihau mara gaasiraau siri na'i rumaniho'o.

³⁷ Tara'i nei ra buta ha'amaesi'i 'ini'i hau, ra'i nei ra horosi'i abedi 'ini rua aba, ra'i nei ra ha'amaesiraau 'ini'i naihi hehei'oi. Ra'i nei ra'i hasihasi inoni ma rau ho'osi'i moi uri-uri siip mana gout suria rau ai'a to'o bwana. 'Iraau sae ra here ha'a-mama'airaau mara norata'airaau.

³⁸ Rau hano hairiu 'ari suriai dora mangasara mei suri'i hungahunga 'anai bainihu suri'i giru mana wabwa. 'Iraau ra'i inoni goro na ai'a ta'isada dorai awa goni beiraau inoni ta'aa anai marewana.

³⁹ Hoita, 'ia God 'a taeniraau inoni o'asi 'ini'i hinihinidaai, magu ai'a tanei 'iniraau nai daua mau i taha na 'ia God na duruduru 'inia tanaraau.

⁴⁰ 'Inia 'ia God 'a to'oraai 'ado'ado na goro di'u ro'u wou. 'A rabasia dorai totorigaau, neina na'i ta'i 'oha 'igaau hako gai ha'i sae narau huunai arari 'anai 'ari wou beia God.

12

God Amagaau

¹ Naasi suriai wanasigaau adaui kaeni ruruha narau ha'ata'inia tanagaau i taha naasi hinihini, gau magai nuga'i beira'i taha nara matai ha'abwarasigia suri'i hinihinigaa'i beia God magai nugasi'i ro'u i ora-ora'a nara awa baabau suri'i tahingagaa'i, magai 'eba wetewete na'i 'eba heiohooho na 'ia God na haua tanagaau 'anai 'eba na'iei.

² Na 'adoma'igaa'i hako rai awa beia Jisas, 'onaai nei na wana wetewete 'anai dora na 'eba 'ana. 'Inia 'ia Jisas naasi ahuinai hinihinigaau me 'iia na ha'a-o'oriai hinihinigaau tari 'oha nagai ura baabau. 'Iia 'a mwa'emwa'e 'anai rongomaata'i tari mae ana na'i dadaahoro, 'inia 'a 'adoma'iniai wa'ewa'e nai to'oraa na'i muri. Mana ninima na ga'i haa 'iniai mae ana na'i dadaahoro, 'a 'adoma'i mara mareho haaria moi 'inia. Mana'i 'ohani 'a heinagu na'i odona God na'i dora ni Mwaeraha ara'ai aro.

³ 'Adoma'i aho'isia Jisas. Rei'uaa na 'iraau inoni ta'a'i ra hauai ta'aa tanaa, 'iia ai'a maemae'a. Naasi 'i'amou ro'u moi abui wai'ate'a ma'ua maemae'a na'i 'eba heiohooosi.

⁴ 'Inia na'i haisuasua mana heingahui namou haa beiai ora-ora'a, ai'a tanei 'ini'amou mau 'ai gaarangi mae.

⁵ 'A 'ua? Mou kaku'a'i ha'atee ha'a-o'ori na 'ia Araha God na haa'i tana'amou 'onaai gare ana'i? 'Iia 'a o'ani,

“Garegu, 'oi abui 'adoma'i mara mareho haari'i moi 'ini'i taha nau ha'a-odoodo'o 'ini'i na'i madoraa nau ha'a-odoodo'o, ma'oi abui arunga ta'aa na'i 'oha nau ha'a-aidangisi'o 'ini'i taritari'a amu'i.

6 'Inia 'inau 'au matai ha'a-odoodoraau nei nau ta'ahiraau,
 mau matai ha'a-mama'airaau nei nau 'unuraau 'ini'i gare agu'i."*

7 Naasi suri'i rongomaata'i namou siri suri'i, moi wa'ewa'e 'onaa do ni mareho o'asi, ra'i ha'a-odo-odo na 'ia God na hau'i tana'amoui gare ana'i. 'Inia 'adonai Ama, ra haha'a-odoodo'i gare adaa'i.

8 'Onaa na 'ia God 'a ai'a haha'a-odoodo'o 'onaai here na hau'i 'ada'i gare ana'i, naasi 'a ha'ata'inia do i'oe 'e gare na'o ai'a to'o amamu, ma'o ai'a ta'i beiraaui huudi gare ana'ia God.

9 Ni amagaa'i na'i marewanani, na'i 'oha narau haha'a-odoodogaau, gau ha'ahouraaui. Naasi 'a ororiu di'u do gai mwa'emwa'e 'anai awa na'i bahainai heimarungi ana Amagaaui ara'ai aro ma naasi nagaigui dauai huunai tahi.

10 Na'i madoraa na amagaa'i rau ha'a-odoodogia, rau haua moi 'anai gere madoraa suriai herehere narau 'adoma'i ha'agorohia. Me 'ia God 'a ha'a-odoodogia 'anai goro agaau do neina 'igaau ro'u gai awa odo-odo 'onaai.

11 Na'i 'oha nara ha'a-odoodogia, 'a arunga ta'aa di'u. Ai'a do 'e mareho na abe nai arunga goro 'inia. Ma'ata na'i muri, ra'i hua goro narai ta'eha mai na'i tahingagaa'i, 'igaau nei na 'ia God na ha'a-odoodogia. Mana ha'a-odo-odo ana'ia God rai 'a'auhigia 'anai awa odo-odo mana awa goro beiai nata sae.

Tahitahi Na 'Adonai

Inoni Hinihini Rai Suria

12 Na 'eba heiohooho namou haua, moi ha'a-wetewete'i aho'i 'i uwamoo'i mana rimamoo'i nara mamaera'a.

13 Moi hahano suriai tara na odo-odo neina 'iraaui nei na hinihinidaau ra maemae'a rai abui maemae'a di'u ro'u wou, ma'ata rai ara'a mai wetewete.

Ha'abasu 'Iniai Rihota'i Baania God

14 Moi bonasiai awa goni goro beiraaui hakoi inoni ma 'anai awa odo-odo tarau. Mou bwa'i matai 'omesia Araha 'onaa namou bwa'i haua o'asi.

15 Moi 'omesuri'amou hairiu neina abu tanei 'ini'amou 'ai hauai taha nai matai rihota'inia haaria baania God na bwane ha'ata'iniai goro ana tanaa. 'A gasi to'o o'asi mana tahitahi ana 'ai 'onaai haharisi ta'aa na tahi ara'a bei'amou. Suria ni ta'aahana 'ai matai here ha'a-ta'ai'amou.

16 Moi aidangisia do abu tanei 'ini'amou nai awa wawaasua'a, ma'uasi awa ahurodo'a 'onaai Iso. 'Iia 'a raonga'iniai mena ni heimarungi ana 'onaai gare na hutai na'o 'inia moi rabo'o i mahoingau.

17 Na'i muri, 'oha nagu raba dauai ha'agorohi baania amana 'onaai gare hutai na'o, ma bwara'a. Rei'uaa nagu angi ha'ata'ata'ahi he'ua, me 'a bwara'a do raigui sadoia ta here naigui orisia 'iniai hereta'aa na haua na do'aigui daua aho'i 'inia i ha'agorohi baania amana.

18 Ni boi na gau haua beia God na'i 'ohani, 'a ai'a 'onaairaaui wauwa agaa'i na'i 'ohabwani narau boi beia God na'i hungahungai Saenai. Na'i hungahungasi rau re'iai ngarungarui 'eu mana kuhi ma uhi ro'a raha na'iei.

19 Nai 'ohasi rau rongoai aohanai biugil goni beiai ringe na hadahada tanaraau. Na'i 'oha narau rongoai ringesi, rau ha'angoni wetewete do'aigu abui ha'atee'a ro'u tanaraau

20 suria ni mareho na 'unua 'a kae rongo ha'amamaa'u abe di'u. 'A o'ani, "Onaa ta sae, ma'uasi ta mwamwaa nai hatariai hungahungani, moi buta ha'amaesia ma'ata'a."†

21 Rei'uaa 'ia Moses, ma mamaa'usia ro'u i taha narau 'omesia ma o'ani, "Inau 'au 'idi'idi 'iniai mamaa'u."‡

* 12:6 12:5-6 Proverbs 3:11-12 † 12:20 12:20 Eksodas 19:13 ‡ 12:21 12:21 Diutronomi 9:19

²² Na'i 'ohani gau bwa'i mamaa'u o'asi. 'Inia 'igaau 'a 'onaa do gau boi beia God na'i hungahungai Saeon, na awa iei 'omaa raha ana God tahitahi, naasi Jerusalem na'i aro narau awaiei meru ma'e merui enjel nara rurugoni 'anai ha'aasaa God ha'i wa'ewa'e.

²³ 'A 'onaa do gau rurugoni beiraau nei nara 'onaai'i gare hutai na'o ana'ia God nara bwane usu'i atadaa'i na'i aro. 'Igaau gau ataha'a beia God, mo'o nai hiirirai mwani inoni hako. Gau taha na'i dora adaa'i aungadi noni hinihini nara bwani mae na 'ia God na ha'a-wariwariraa hako baani'i ora-ora'a adaa'i.

²⁴ Gau taha beia Jisas, mo'o na waa mai duruduru haoru ana God tanaraau inoni. Ni 'abuna na ahe 'anai ha'a-wariwarigia baaniai ora-ora'a 'a goro baaniai 'abuna Ebol. 'Inia na 'abuna Ebol 'a waa mai ha'a-mama'ai.

²⁵ Naasi moi herehere goro, mou gasigu 'ageta'i araisuria God na hadahada tana'amou na'i 'ohanisi. 'Onaa na bwara tanaraau inoni nai Israel 'anai horata'iniai ha'a-mama'ai 'inia ai'a baturongoa adaui ha'abasu na haa God tanaraau na'i marewanani, 'ai he'ua tanagiai nei nagau ai'a raba baturongoa God na ha'abasu dio mai baaniai aro?

²⁶ Na'i 'oha na 'ia God 'a ha'atee na'i hungahungai Saenai na'i 'oha bwani, na ringena 'a 'ihara'iniai ano. Mana'i 'ohani 'a hua ro'u i duruduru na o'ani, "Ta 'oha, wai 'ihara'inia ro'u i ano. Ma na'i 'ohasi, wai 'ihara'inia hako ano mana ahoasara."§

²⁷ 'Oha na 'ia God 'a 'unua do'ai 'ihara'inia ro'u i ano mana ahoasara, 'a ha'ata'inia do na mwane mareho na ha'apwa'ara'i rai ai'a'i. Mana taha nara bwa'i 'ihara'i naasi narai awa tarau.

²⁸ Gau magari ha'atee ha'agorohia God. 'Inia 'igaau gai awa na'i hourana ana God na bwa'i matai 'iha'iha ma'ua ai'aa. Gai ha'a-aneanea na'i here nai wa'ewa'e 'inia, magari hua beiai ha'ahou mana ginagina.

²⁹ 'Inia ni God agaau 'a matai ha'a-mama'airaui nei nara ai'a araisuria, 'onaai 'eu na matai suu gata'ini'i ha'aro'a.

13

¹ Mou ta'ahi'amou waiori 'onaai ha'ido'orada mana ha'iasida beia Kraest.

² Abui kaku'aa 'anai ha'amaoto'i mahuara nara boi suri'i 'omaa amoo'i. Ra'i nei nara hua o'asi, raugu buna ha'amaoto'i enjel suri'i ruma adaa'i ha'i ai'a 'iraraa.

³ Abui kaku'araui nei ra awa na'i rumaniho'o. Ni arunga namoi to'oraa 'adaau, 'ai 'onaa domou awa ro'u beiraau na'i rumaniho'o. 'Ado'adoraui nei narau rongomaata'i, mamoi arunga 'onaa domou rongomaata'i ro'u beiraau.

⁴ Ringei haiwai 'e mareho na 'iraui inoni hako ra ga'i ha'ahoua, mana mwane 'ai abui taritari'a baaniai urao ana mana urao 'ai o'asi ro'u. 'Inia 'ia God 'ai hiiri ha'a-mama'airaui nei ra wawaasua'a, miraui nei narau taritari'a baani'i urao adaa'i ma'ua mwane adaa'i.

⁵ 'Oi ha'imaania do na'i tahitahi amua 'oi abui ta'ahia di'ui ha'a. Ma'oi ha'imaania do na mareho na'o to'ora'i, rei'uaa raha ma'ua kekerei, 'oi arunga goro moi 'ini'i. 'Inia 'ia God 'a o'ani, "Inau bwa'i nugasi'o, mau bwa'i murisi'o."

⁶ Naasi nagau to'oraa 'iniai 'adoma'i wetewete 'anai o'ani, "Ia Arahanaasi na hei'a'auhi agua, 'inau bwa'i mamaa'usiai taha na 'iraui moi inoni rai hua tanaau."*

⁷ Moi 'adoma'i suri'i na'otara amoo'i na'i heisoi 'ohai na'o narau taroha'iniai Taroha Goro tana'amou. Moi 'adoma'i suri'i hua goro nara hura'a mai baani'i tahingadaa'i, mamoi suriai hinihinidaau beia Jisas.

§ 12:26 12:26 Haggai 2:6 * 13:6 13:6 Psalm 118:6

8 'Inia 'ia Jisas 'a ta'isada 'onaa mau i 'ohabwani, mei 'ohani, mai 'ari moe'a na bwa'i 'ohai hako.

9 Naasi moi abui suri'i mwane ha'ausuringa'i haoru namou rongo'i nara sisiri mai 'anai ha'ateha'amou baaniai huunai ha'ausuringa'i. Ni huunai mareho 'anai ha'a-weteweteai hinihinigaau, naasi i goro na haua God 'inigia. 'A ai'a 'ini'i mwane ringeringe 'ini'i mahoingau. 'Iraaui nei nara suri'i o'asi ringeringe 'ada'i mahoingau, na ringeringe 'isi ra bwa'i 'a'auhiraau.

10 'Igaau gau to'oraai dora 'anai ho'asi na'i aro na 'iraaui Piriisi nara tagora na'i Ruma Maea ana God ra bwa'i matai ngaai taha nara ho'asia na'i hungana.†

11 Na'i ringeringe adaui Jiu na'i raronai herehere 'anai ho'asi, 'iraaui Piriisi ra waa'i siri 'abudi mwamwaa na'i ahii na maea di'u 'anai ho'asi 'ada'i ora-ora'a. Mana abedi mwamwaa naasi nara suungi'i hura'ai abau 'omaa baaniai raronai 'omaa.

12 'A o'asi ro'ua Jisas, 'ia 'a rongomaata'i ma mae hura'ai abau 'omaa baaniai 'omaa raha 'anai ha'a-wariwariraau mwane inoni hako baani'i ora-ora'a adaa'i 'iniai 'abuna haaria.

13 Naasi gau magari hura'a beira'i baaniai 'omaa 'anai heisadoi beia Jisas magari arungana ro'u beia i ninima na siri na'iei.

14 'Inia na'i marewananisi, gau ai'a to'oraa ta 'omaa do nai awa tarau. Na huunai 'omaa agaau nai boi mau, gau 'adoma'i mamasia mau.

15 Naasi, 'iniai ho'asi na haua Jisas 'inigia, gau magari ha'a-aneanea taraua God. Ni ha'a-aneane nagai haua 'ai 'onaa ho'asi agaau tanaa 'anai ha'arangasia hura'a do'ia Jisas naasi Araha aga.

16 Abui kaku'aa 'anai goro tanaai nata nei ma 'anai hasura'i nga'ini'i beiraui mareho na'o to'ora'i. Nai'i nara 'isi ho'asi na 'ia God na ahugoro 'ini'i.

17 Ha'isuri'i taha na 'iraaui na'otara amoo'i na'i heisoi nara 'unu'i tana'amou. 'Iraau naasi narau awa 'anai 'omesuri'i tahingamoo'i beia Kraest. Mana'i muri rai ura 'anai ha'arangasi'i tanaa God i tatau'aro adaa'i. Moi araisuriraau neina 'iraaui rai haua ha'i wa'ewa'e i tatau'aro adaaui, ma abu beiai ahutotou. 'Onaa rai ahutotou, 'aigui bwara tanaraau 'anai 'a'auhi'amou.

18 Moi ha'arahesi 'a'auhi'ameu waiori. 'Tameu meu 'iraraa do meu ai'a haua ta maho nai ta'aa, 'inia meu 'irisia do mei hau'i tarau i mwane mareho odo-odo.

19 Mau ha'angoni'amou wetewete 'anai ha'arahesi do'ia God 'a bwa'i orea maai ha'ataariau aho'i wou bei'amou.

20-21 'Ia God 'a ha'a-suruta'ea Araha aga Jisas baaniai mae, 'inia 'a ahugoro 'iniai 'abuna na ahe. 'A mae 'anai ha'ato'oa i duruduru haoru beiraui noni na bwa'i 'oha nai hako. Ma na'i mae na haua, 'ia Jisas 'a 'onaa do 'a ha'i 'omesuri siip goro tanagaau. Hoita, 'au ha'arahesi mia God ni gooroha, 'ai hau'i tana'amoui taha namou ga'i to'ora'i 'anai araisuriai hei'irisina. Mau ha'arahesi ro'u do na'i mena ana Jisas Kraest, 'ia God 'ai tau'aro suri'i tahingamoo'i mamoi hau'i taha namoi ha'a-wa'ewa'ea 'ini'i. Naasi gau magari ha'ahauasaa Kraest tarau tarau. Amen.

22 Arai do'ora mana asigu'i, 'au ha'a-ta'u'u'amou, moi bahurongo ha'agorohi'i ha'atee ha'a-o'ori nau usu'i dio na'i gere usu-usuni.

† 13:10 13:10 Tara'i sae ra 'adoma'inia do ni tatarani 'a hadanga'inia Jisas. Ni dora 'anai ho'asi 'a 'onaa dadaahoro ma'ua Jisas. 'Iraaui nei narau 'u'uri'i mwane ringeringe 'anai ruhasiraau baaniai ora-ora'a, 'ia God 'a bwa'i matai 'adoma'i nugasi'i ora-ora'a adaa'i. Naasi 'ado'ado 'anai dora na o'ani, "Ra bwa'i matai ngaai taha nara ho'asia na'i hungana."

²³ 'Au rabasia domoi 'iraraa do ni do'oragaau a Timoti ra ha'a-hura'ahia'a baaniai rumanoho'o. 'Onaa nai ada mai raurau, ma wai 'unua tanaa mamiri ta'i boi 'anai 'omesi'amou.

²⁴ Moi 'unuai ha'atee wa'ewa'e agua tanaraaui na'otara amoo'i, miraaui haru sae hinihini narau awa 'isi bei'amou. 'Iraaui noni hinihini na'i Itali rau 'unuai ha'atee wa'ewa'e adaaui tana'amou.

²⁵ 'Ia God 'ai goro 'ini'amou hako.

Na Usu-usu Ana Jems

Gere Mamaani 'Iniai Bukani

'A 'ua? Ai'a ta 'oha narai 'unua tana'o 'anai ha'ata'ini'i hura'ai ha'a-momori adaa'i mareho na'o hadanga'ini'i? Ma'ua, ai'a ta 'oha na'oi 'unua tanaa tanei 'anai ha'ata'iniai awaha odo-odo mana 'amaua ma'ua aidangi ana? Taha na 'irisia Jems na'i usu-usu na hauani, do 'iraaui nei narau 'unua haraariraaui dora'i sae hinihini, rai ha'ata'inia hura'a suri'i barongadaa'i mana mareho nara haa'i.

Na'i na'o, 'iraaui nei nara dauai usu-usunisi rau suri'i ga'u i mwane ringeringe adaa'i Jiu maraugu tano'i ha'i sae hinihini. Na'i madoraa narau ha'i sae hinihini narau mwaridanga baani'i ringeringe 'isi, rau 'adoma'inia do rau matai ha'isuri'i moi 'ado'adodaa'i. 'Iniai aidangisia adaaui do'ia God 'a ha'atahiraau 'iniai hinihinia adaaui Kraest, ma ai'a do 'ini'i mareho goro narau haa'i, rau 'adoma'inia do ai'a ta'isada do raigui bonasia do raigui hau'i ro'u i mareho goro.

Na'i usu-usu na haua Jems, 'a 'unua do ni here 'anai ha'ata'inia hura'a do i'oe 'e sae hinihini, naasi 'anai ha'ata'iniai heita'ahi 'onaai ha'atoragia na haua God. Ni huunai sae hinihini 'ai 'u'uria God suri'i 'oha na siri suri'i madoraa bwara. 'A bwa'i here ha'agorohiraau moi nei narau toto'ora, ma'ata 'ai 'a'auhiraau ro'u i pohara. 'Ai 'ome'ome goro 'ini'i taha nai maani'i ma 'ai to'oraa ro'u i madoma ana God. Na'i madoraa na 'iraaui noni hinihini rau to'oraa heita'ahi o'asi 'a ha'ata'inia do 'iraaui ra'i huudi sae hinihini.

'A 'ua? Suri'i mareho na'o haa'i na'i tahitahi amua, 'o ha'ata'inia hura'a ha'a-momori do i'oe 'e huunai sae hinihini? Na'i 'oha na'oi 'oha'iniai bukani 'oi wai'ado'ado surisuri'i dora narai 'a'auhi'o neina barongamu 'ai ta'isada beiai hinihinimu.

¹ Wa'ewa'e tana'amou hakoi ai Jiu namou hinihini namou awa 'adarara 'ari suriai marewana hako. 'Inaua Jems, i noni tatau'aro ana God mia Araha aga Jisas Kraest nau hauai usu-usuni.

Hinihini Mana Madoma

² Arai do'ora mana asigu'i beia Kraest, moi wa'ewa'e na'i 'oha moi siri suri'i mwani heiohongu mana mwani mareho bwara.

³ 'Inia mou 'iraraa dona mareho nara ohongi'i hinihinimoo'i o'asi, rai 'a'auhi'amou 'anai ura baabau.

⁴ Moi bonasiai ura baabau na'i hinihinimoo'i, neina 'i'amou moi odo-odo mana barongamoo'i rai goro hako na'i maana God.

⁵ 'Onaa tanei 'ini'amou nai kakui ahuna 'iniai here nai haua nai ura baabau 'inia, ma 'ai ha'arahesi mai ha'angonia God, mia God 'ai haua tanaa i madoma. 'Inia 'ia God 'e God hisuhisu ma 'abwa'i ha'aninimaia tanei nai ha'angonia.

⁶ Ma'ata 'iatei nai ha'angoni, 'ai hinihini, ma'ai abui 'adoma'i heiruarua'a. 'Iatei na 'adoma'i heiruarua'a na'i tahingana, 'a 'onaai'i tabaosi nara ro'a hairiunga'ini'i na'i asi.

⁷ Na nei na o'asi 'ai abui 'adoma'inia do'ai daua ta maho nai ha'angonia Araha God 'inia.

⁸ Suria na 'adoma'ina 'a ai'a hatara'i na'i ta'i maho ma 'adoma'i heiruarua'a 'ini'i mwani maho na haa'i.

⁹ 'Io. Na sae hinihini na awa mwamwaeta'aa na'i marewanani 'a ga'i wa'ewa'e, 'inia 'ia God 'a 'adoma'i ha'a-ororia.

¹⁰ Mia tei na toto'ora na'i marewanani 'a ga'i goro 'onaa 'ai wa'ewa'e na'i 'oha 'ia God 'ai ha'a-auruhia. 'Inia rei'uuaa na toto'ora, mia mo'osi 'ai hako raurau ro'u moi 'onaai tagai raraaua.

¹¹ Na'i 'oha na ara'ai sina mana rarahana 'a raangiai raraaua, na taga 'a nugu ma ahoda, mana 'omegorohana 'agu ai'aa. 'A o'asi ro'u i noni toto'ora, 'iia 'ai matai mae ro'u moi na'i 'oha na tagora mau 'anai siba ha'a.

Heiohongi

¹² Ha'amwania di'u a mo'o na ura baabau na'i 'uruhadi mwani heiohongi ma'ua suri'i mwani mareho bwara, 'inia 'ai dauai heitahari ni tahi tarau na 'ia God na durua tanaraaui nei rau ta'ahia.

¹³ 'Onaa tei na siri na'i heiohongi, 'ai abui 'unua doni heiohongisi 'a boi baania God, 'inia 'ia God 'abwa'i ohongiai noni 'anai haa i maho na ta'aa. Ma 'abwa'i tanei ro'u nai matai ohongia God do 'ai hauai maho ta'aa.

¹⁴ Na noni 'a siri na'i heiohongi na'i madoraa na 'iia 'a wai'ado'ado suriai 'ado'ado ta'aa mana 'ado'ado ta'aasi 'a ha'a-bweubweu'aa 'anai ahoda na'i ora-ora'a.

¹⁵ Na 'adoma'i ta'aa 'a hauai ora-ora'a, mana ora-ora'a 'a hauai mae.

¹⁶ Arai do'ora mana asigu'i, 'oi abui pwari'i'o haari'o do 'ia God 'a matai ohongi'o 'anai hauai ta'aa.

¹⁷ 'Inia na mwani bane goro hako ra dio mai aro baania God na ha'apwa'araai sina mana hura mana mwani hee'u. 'Iia 'abwa'i orisia mwada'u i barongana, 'onaai ori-orisi ada'i mwani mareho na ha'apwa'ara'i na'i ahoasara.

¹⁸ 'Ia God 'a haua tanagiai tahinga haoru 'inia hinihinia agaau i Ha'atee ana na ha'a-momori. 'A haua o'asi suriai hei'irisina neina 'igaau gai ororiu baani'i mwani mareho hako na ha'apwa'ara'i.

Bahurongo Mana Haiaraisuri'i

¹⁹ Arai do'ora mana asigu'i, moi aidangisia domoi mwa'emwa'e 'anai bahurongo, mamoi abui raurau 'anai ha'atee ma'ua taesu'a.

²⁰ Na taesu'a 'a bwa'i 'a'auhiai sae 'anai awa odo-odo 'onaai 'irisia ana God.

²¹ Naasi moi nuga'i beira'i mwani baronga ta'a'i mana here ta'a'i nara raha di'u bei'amou. Moi ha'a-auruhi'amou mamoi suri'i ha'atee ana'ia God na nuga'i suri'i tahingamoo'i nara matai ha'atahi'amou.

²² Moi ha'isuri'i mareho na Ha'atee ana God na ha'ausuri'amou 'ini'i. 'Oi abui pwari'i'o haari'o do 'oi dauai tahi tarau 'onaa 'o taraa babahurongo moi ma'ogu ai'a ha'isuria.

²³ 'Iatei na rongoai Ha'atee ana God ma ai'a ha'isuria, 'a 'onaai nei na wanasia haariai nununa na'i gilaasi.

²⁴ 'Oha na wana na'iei, 'a 'ome ha'agorohia haariai nununa. Hoita, 'oha nagu hura'a wou, ma kaku'aa'a aho'i 'omehana maagu ai'a haua'a ro'u ta here 'anai ha'a-'omegoroa.

²⁵ Ma'ata, moi abui haua o'asi. 'Onaa moi wana hegahegaa mana ha'isuriai Ha'atee ana God, 'ia God 'ai ha'agorohi'amou suri'i mwani mareho hako namoi haa'i. 'Inia 'i'amou mou bahurongo mamou ha'isuriai Ha'atee ana God mamou ai'a matai kaku'aa raurau. 'Onaai 'iraraa amou, i Ha'atee ana God 'a odo-odo hako ma matai ha'adadara'aa'i noni.

²⁶ 'Iatei na 'adoma'inia do 'iia 'e sae ni heiso'i ma ai'a 'ome taranai hadahadangana, 'iia 'a hinihini kongari ma pwari'ia haaria.

²⁷ Mana huunai ha'i sae ni heiso'i na odo-odo na'i maana God i Amaga, naasia mo'o na 'omesuria haaria baani'i mwani mareho ta'a'i ni marewana, ma ro'u a mo'o na 'a'auhirai gare a'osi mana nao nara 'irisiai hei'a'auhi.

2

'Adoma'i Ha'ahouraau Pohara

¹ Arai do'ora mana asigu'i, 'oi abui 'unua do i'oe 'o hinihinia Jisas Kraest, 'i Araha hauasa, 'oha na i'oe 'o 'adoma'i ha'a-ororiuai nata sae baaniai nata nei.

² 'Onaa 'e sae toto'ora na siri suri'i to'oni hori bwara nara 'ome goro mana ringi gol na'i kaka'una nai sirimai na'i ruma-ni-ha'arahesi amou. Ma na'i moi ro'u i 'ohasi, ma siri ro'u mai sae na pohara na siri suri'i bwana ngangata'a.

³ Naasi me i'oe 'oi o'ani 'inia sae na toto'ora, "'Oi boi 'ini ma'oi heinagu 'ini na'i dora heheinagu." Mia mo'o na pohara 'o o'ani 'inia, "'Oi ura wou 'isi, 'onaa bwa'i ma'oi heinagu auru wou i anosi."

⁴ 'Onaa 'oi o'asi, i'oe 'o taritari'a, 'inia 'o ha'ata'inia doni nata nei 'a ororiu di'u baaniai nata nei. Beiai 'adoma'i ta'aa na'i tahingamu 'o 'adoma'inia do ra'i noni ra ororiu di'u baani'i tara'i nei.

⁵ Moi baturongo arai do'ora mana asigu'i. 'Ia God 'a sigihiraau pohara dorai toto'ora suri'i hinihinidaa'i. Mana dora na 'ia God na marungia, rai awa ro'u na'iei, 'inia naasi taha na 'ia God na duruduru 'inia tanaraau nei narau ta'ahia.

⁶ Mi'amou mou 'adoma'i ororiu 'iniraau noni toto'ora mamou ha'ata'airaau nei ra pohara. 'A 'ua? Mou 'irararaau noni toto'ora namou 'adoma'i ha'ahouraau? Neiraau nei narau here ha'a-ta'ai'amou marau wai'amou na'i kooti!

⁷ 'A 'ua? 'Iatei na haikou 'inia ma ha'atee ha'ata'ai ai atana Jisas, Araha aga? 'Iraau na toto'ora!

⁸ Ma'ata, naani ha'atora na ororiu di'u na'i Usu-usu Maea, "'Oi ta'ahiraau mwani noni hako 'onaai ta'ahi'o amua haari'o."* 'Onaa mou suriai ha'atorasi, 'i'amou mou hauai mareho na odo-odo.

⁹ Ma 'onaa mou 'adoma'i ha'a-ororiu'i tara'i noni baaniraau tara'i nei, 'i'amou mou bwane ora-ora'a'a mamou horosiai ha'atora ana God.

¹⁰ Mou 'iraraa, na nei na araisuri'i mwani ha'atora hako maagu horosiai ta'i, 'a ta'isada moi beia mo'o na horosi'i hako.

¹¹ 'Inia God na o'ani, "Abui taritari'a baaniai mwane amua ma'ua urao amua,"† ma o'ani ro'u, "'Oi abui heingahu."‡ 'Onaa 'o ngahu ha'amaesiai noni, i'oe 'o horosiai ha'atora, rei'uaa na'o ai'a taritari'a baaniai urao amua.

¹² Naasi na ha'atee mana mwani mareho hako mou haa'i ra ga'i odo-odo, 'inia 'ia God 'ai hiiri'amou na'i bahainai ha'atora na 'unua dogai ta'ahiai nata nei 'onaai ta'ahigia agaau haarigia. Naasi ha'atora na matai ha'adadara'ai noni.

¹³ Ma na'i 'oha na 'ia God nai hiiriraau noni, 'ia 'abwa'i goro 'ini'o 'onaa i'oe 'o ai'a goro 'iniraau nei narau awa ha-ha'aroha'a. Mei 'onaa 'oi goro 'inia nata nei, ai'a ta'isada do'oi maaa'usiai ha'a-mama'ai ana God.

Hinihini Mana Awaha

¹⁴ Arai do'ora mana asigu'i, 'a ai'a goro do'o 'unua do i'oe 'e noni hinihini ma 'ogu ai'a ha'ata'iniai hinihinimu 'anai hau'i mareho goro. Na hinihini o'asi 'abwa'i haua tana'o 'i tahi tarau!

¹⁵ 'Onaa 'e noni hinihini na 'irisiai hei'a'auhi 'inia bwana mana mahoingau,

¹⁶ ma'ogu o'ani moi 'inia, "'Io, 'oigu hano moe'ata, 'ia God 'ai ha'agorohi'o. 'Oi ha'abwarasi'o baaniai aruwai ma'oi ngaungau goro." 'A 'ua? Mou 'adoma'inia doni ha'atee pwaranga o'asi 'ai 'a'auhia 'onaa namou bwa'i haua tanaai taha na 'irisia? 'A bwa'i!

* 2:8 2:8 Levitikas 19:18 † 2:11 2:11 Eksodas 20:14; Diutronomi 5:18 ‡ 2:11 2:11 Eksodas 20:13; Diutronomi. 5:17

¹⁷ Ni hinihini na'o hua beia Kraest 'a o'asi ro'u. 'Onaa 'o hinihinia, ma'ogu ai'a ha'ata'iniai hinihinimu 'anai hau'i mareho goro, na hinihinisi 'e mareho haaria moi ma bwa'i ha'atahi'o.

¹⁸ 'Iatei na ai'a 'adoma'i aratara mai o'ani, "Ra ragoi tara 'anai dauai tahi tarau. Tara'i nei ra to'oraa moi hinihini, ma tara'i nei ra to'oraa moi here goro adaa'i." Minau 'unua tana'amou, 'onaa 'o to'oraa moi hinihini ma'ogu ai'a haa'i here nara goro, 'e taha nai ha'ata'iniai ha'a-momori anai hinihinimu? Minau wai ha'ata'iniai ha'a-momori anai hinihinigu 'ini'i here goro nau haa'i.

¹⁹ Mou hinihinia do 'e ta'i God moi na awa. Hinihinisi 'a goro, ma'ata 'oi aidangisia doni adaro ra hinihini o'asi ro'u, marau maaa'usiahihiiri ana God ha'i 'idi'idi.

²⁰ Oru bweu! 'A 'ua? Mou rabasia dowai ha'ata'inia goro tana'amou doni sae na hinihini moi ma ai'a haa'i mwani mareho goro, na hinihini naasi 'e mareho haaria moi?

²¹ Ni 'uaana na 'ia God 'a 'unua 'inia doni wauwa agaaua Ebrahim 'e noni odo-odo? 'Ia God 'a 'unua o'asi suriai here na hua Ebrahim, na'i 'oha do 'ai ho'asi tanaa God 'iniai garena 'ia Aisak.

²² Naasi mou 'omesiai 'ari goni anai hinihinina mana here ana Ebrahim. Ni here na hua 'a ha'ata'inia doni hinihinina 'a ha'a-momori.

²³ Mana taha na Usu-usu Maea na 'unua 'agu ha'a-momori, 'oha na o'ani, "Ia Ebrahim 'a hinihinia God mia God 'a 'unua do 'ia Ebrahim 'a odo-odo'a na'i maana," mara 'unua do'ia Ebrahim 'e sae goro ana God.

²⁴ Naasi mou 'omesia doni noni 'a odo-odo na'i maana God 'ini'i here goro na haa'i, ma ai'a 'inia moi hinihinina.

²⁵ 'E ta'i heihauu ro'u naasi 'inia Rehab. 'Ia 'e urao rebirebi, mia God 'a 'unua do'a odo-odo na'i maana 'iniai waterarua ana i rua saeni Israel 'anai bainihu na'i ruma ana, ma 'iniai 'a'auhirarua ana 'anai hano girugiru baani'i maerongadaru'i suriai tara he'ete'i.

²⁶ Naasi na nei na hinihini moi ma ai'a hau'i mareho goro, na hinihinina 'a mae ma 'onaai noni na ai'a to'o aunga.

3

Ngooga

¹ Arai do'ora mana asigu'i, 'a ai'a goro do 'ai rago i nei 'ini'amou moi ha'i ha'ausuri na'i heiso. 'Inia mou 'iraraa doni hihiri na 'ia God 'ai hua tana'ameu i ha'ausuri 'ini'i ora-ora'a amee'i 'ai raha di'u baaniai hihiri nai hua tanaraui nei narau ai'a ha'ausuri.

² 'Igaau hako gau matai ha'atari'a'i mareho 'ado dangi. Me 'onaa 'iatei na matai 'ome taranai hadahadanga, 'iia 'e noni odo-odo, me 'iia 'a matai 'omesuria haaria ro'u baani'i mwani mareho ta'a'i na'i marewana.

³ 'E gere dorai 'aeon moi 'anai ho'osia na'i ngoonai hoosi, 'anai rihota'inia 'ari na'i dora na'o 'irisia do'ai 'ari ei.

⁴ 'E kae ro'a nai wetewete maigui ono i kae haka ha'aro'asi, ma'ata 'ia mo'o na ta'e muri 'a rihota'inia 'anai waia 'ari dora na 'irisia 'inia moi gere dorai baba.

⁵ 'A o'asi ro'u i ngoogaa'i. 'E gere dora moi na'i abega, maagu wetewete di'u. Mamoisui 'adoma'iniai gere mwagarahai 'eu kekerei ta'aa moi. 'Oha ra ha'ahodaria na'i hasimou ma noro, 'a matai haa i kae 'eu.

⁶ Ma o'asi ro'u, na ngoogaa'i 'a 'onaai 'eu na 'ia Saetan na suungia. Na ngoogaa'i 'a honu 'iniai ta'aa ma matai oge'i mwani dora suri'i abega 'anai hauai ta'aa. Ha'amomori, 'a matai ha'ata'aia hakoi tahingaga.

⁷ Ngarutani mwamwaa wawauru, mwani manu, mana mwani ii'a, mana mwani maho 'onaai mwaa nara kakaro 'ini'i ahudi, gau matai ha'amanata'i.

⁸ Ma'ata 'a bwa'i noni 'ai ha'amanataa mwada'u i ngoo. 'Ado 'oha 'a ha'aagau 'anai ha'ahura'ahiai mareho na ta'aa 'anai ha'ata'ai noni 'onaai mwaa mamaesia.

⁹ Na ngoo, tara'i 'oha gau ha'aasaa Araha God i Amaga 'inia, ma tara'i 'oha gau haua ro'u 'anai ha'atee murisiai noni na 'ia God na ha'apwa'araa do'ai 'onaia.

¹⁰ Arai do'ora mana asigu'i, na ha'atee nara goro mana ha'atee ta'a'i ra ga'i bwa'i hura'a goni na'i ta'i ngoo!

¹¹ Na wai mana asi raru bwa'i matai hura'a na'i ta'i hurahura.

¹² Mana kokoke i asi ra bwa'i matai taruhiai wai baania. Na hasi'ei nara 'unua 'iniai fig 'a bwa'i matai hungu 'ini huai 'oliv mana hasi'ei grep 'abwa'i matai hungu 'ini huai fig.

Huunai Madoma

¹³ 'Iatei 'ini'amou na'o 'adoma'inia do'o madoma ma'o aidangisiai taha na odo-odo 'anai haua, ma'oi ha'ata'ini'i hura'a i mareho goro na'o haa'i mamei 'ome 'iraraai madoma na'o haa. 'Onaa 'o ai'a ha'aba'o 'ini'i mareho goro na'o haa'i, naasi i'oe 'o madoma ha'a-momori.

¹⁴ Ma 'onaa na tahingamoo'i ra honu 'iniai hai'ubwani, ma 'onaa mou 'adoma'ini'amou moi haarimoou, ma ai'a ta'isada domoi ha'ata'e'amou domou madoma, 'inia mou pwapwaari'i.

¹⁵ 'Onaa na 'adoma'imu 'a o'asi, na madoma amua 'a ai'a boi baania God, ma'ata 'e madoma ni marewana na boi baanira i adaro, ai'a baaniai Hi'ona Maea.

¹⁶ 'Inia 'onaa na tahinganai sae 'a honu 'iniai hai'ubwani mana saesi 'a 'adoma'inia moi haaria, na mwani mareho ra bwa'i hano goro, mana mwani mareho ta'a'i rai awa.

¹⁷ Mana nei na honu 'iniai madoma ana God, na tahingana 'a odo-odo goro. 'A raba awa goni goro beiraau mwani noni, 'a awa 'abenga'i ma mwa'emwa'e 'anai bahurongoai nata nei. 'Tia 'a 'a'auhiraau nei nara 'irisiai hei'a'auhi ma hau'i mwani here goro. 'A ai'a aba 'anai 'a'auhi'i moi tara'i noni, ma ha'a-momori tarau na'i awangana.

¹⁸ Na nei na 'a'auhiraau noni 'anai awa goni goro, 'ai 'a'auhiraau 'anai suriai awaha na odo-odo.

4

Abu Ta'ahi'i Mareho Ni Marewana

¹ 'A 'ua? 'E taha nara ha'ataarau 'ini'i heita'ia nara to'oto'o tarau na'i ahoaamou? Ni mareho 'isi ra to'o, suria na mwani hei'irisi ta'a'i nara awa suri'i tahingamoo'i ra ura bwarasi'i hei'irisi goro amoo'i.

² Mou naga 'ini'i mareho anai sae he'ete'i maagu bwarai domoi to'ora'i. 'Agu haa mamou heingahu'a. Mana'i 'oha namou 'irisi'i mareho mamougu ai'a to'ora'i, mou heita'ia. Ni 'uaana namou ai'a to'ora'i 'ini'i mareho namou 'irisi'i? Mou ai'a to'ora'i suria mou ai'a ha'angonia God 'ini'i!

³ Ma rei'uaa namoi ha'angonia God, mia God 'abwa'i wate'i tana'amou, 'inia na huudi 'adoma'imoo'i 'ada'i mareho namou ha'angoni'i ra taritari'a. Mou ha'angoni'i moi taha namoi goro 'ini'i moi haarimoou.

⁴ 'T'amou mou 'onaai urao na taritari'a baaniai mwane ana, suria mou murisia God 'anai ta'ahiai maho he'ete'i. 'A 'ua? 'T'amou ai'a 'iraraa dona nei na ta'ahi'i mareho ta'a'i na'i marewanani, 'a ha'imae beia God? Mawai 'unu aho'isia ro'u tana'amou, 'onaa mou raba hagu goro bei'i mwani maho ta'a'i na'i marewana, ma 'i'amou ra'i maerongana God.

⁵ 'A 'ua? Mou 'adoma'inia dona Usu-usu Maea 'a to'o hadahada moi 'oha na o'ani, "Ia God 'a huunai 'irisia dogai ta'ahia moi haaria, 'inia 'iia na ha'apwa'aragia."*

⁶ Ma rei'uaa na bwarai haua o'asi, 'iia 'a goro 'inigia ma 'a'auhigia. Na tarana naasi na Usu-usu Maea 'a 'unua ro'u o'ani, "Ia God 'a ura bwarasiraau nei narau ha'ata'eraau haariraau, ma goro 'iniraau nei rau ha'a-auruhiraau."

⁷ Naasi moi wate'amou haari'amou tanaa God. Mamoi ura wetewete bwarasia Saetan mai hora baani'amou.

⁸ Moi boi gaarangia God mia God 'ai gaarangi'amou. 'T'amoui noni ora-ora'a, moi nugasi'i baronga ta'a'i amoo'i. Mi'amoui nei namou 'adoma'i heiruarua'a, moi ha'a-wariwari'amou baaniai ta'aa na awa suri'i 'adoma'imoo'i!

⁹ Ai'a ta'isada domoi da'a ma ai'a ta'isada domoi wa'ewa'e. Ma'ata, mou ga'i angi mamou ga'i ahutotou 'ini'i mareho taritari'a namou haa'i.

¹⁰ Mana'i 'oha moi ha'a-auruhi'amou haarimoou na'i maana Araha God, 'iia 'aigui ha'a-ororiu'amou.

Abu Hiiriai Nata Sae Hinihini

¹¹ Arai do'ora mana asigu'i, mou abui hihiri ma'ua ha'atee ha'ata'aiiai nata nei. 'Onaa namou hihiri ma'ua mou ha'atee ha'ata'aiiai nata noni hinihini, 'i'amou mou hiiria mamou ha'atee ha'ata'aiiai ha'atora ana God tanagia 'anai ta'ahiai nata nei. 'Onaa moi 'unua doni ha'atorasi 'a ai'a goro, 'a ha'ata'inia domou ai'a araisuria'a.

¹² 'Ia moi 'etea God na matai haa'i ha'atora tanagia ma ta'isada 'anai hiirigia. 'Iia 'etea na 'iraraa, 'ai ha'atahigia ma'ua 'ai ha'amaesigia? Naasi ai'a tana'amou 'anai hiiria ma'ua ha'atee ha'ata'aiiai nata nei.

Ha'abasu 'Ini 'Unuai Taha Nai To'o Ho'oa

¹³ Moisu baturongo, 'i'amoui nei namou o'ani, "Na'i de'eni, ma'ua na'i ho'oa, gai hano magai 'ari awa na'i taon suria ta ta'i harisi 'anai siba here nagai toto'ora 'inia."

¹⁴ 'T'amou mou bwa'i 'iraraai taha nai to'o ho'oa! 'Inia ni awangagaau na'i marewana 'a 'onaaia moi waha na ha'ata'i moi gere madoraa ma ai'aa aho'i.

¹⁵ Ni mareho namoi 'unua 'ai o'ani, "Onaa 'ia Araha God 'a 'irisia, naasi gai tahi mau magai hauai taha nagau 'adoma'ini'i."

¹⁶ Mi'amou mou ha'apa'o mamou ha'ata'e'amou, 'inia mou 'adoma'inia domou bwani 'iraraai taha nai to'o ho'oa. Mou taritari'a 'inia heresi.

¹⁷ Hoita, moi aidangisia. 'Iatei na 'iraraai taha na odo-odo 'anai haua maagu ai'a haua, 'iia 'a bwane ora-ora'a.

5

Ha'abasu Tanaraau Sae Toto'ora

¹ Moisu baturongo, 'i'amoui sae toto'ora. Mou ga'i angi uru-uru 'inia ahutotou 'ini'i mwani mareho ta'a'i namoi siri suri'i.

²⁻³ Na'i marewanani mou boribori'i toto'ora amoo'i. Ma'ata moi 'iraraa doni marewanani 'a bwa'i orema hako. Na toto'ora amoo'i ra ta'a'i, mana 'adi ra ngaa'i hako i bwana goro amoo'i. Na silva mana gol amoo'i ra he'a'a, mana he'a 'isi 'a ha'ata'inia hura'a tanaa God i kikipau amoo'u. Mana kikipau namou haua 'ai ha'a-ta'ai'amou 'onaai 'eu na suu gata'ini'i ha'aro'a.

⁴ Moi baturongo, mamoi rongoraau sae mou ha'ata'aro'i suri'i mou amoo'i namou ha'a-bweubweu'araau suri'i horihoridaa'i. 'Iraau rau

* 4:5 4:5 Tara'i Baebol ra o'ani, "Na Hi'ona Maea na'ia God 'a nugaa beigia 'a 'irisia do 'igaau 'iaana moi haaria."

ha'angonia wetewete Araha God huunai mena 'anai hiiri'amou, mia Araha God 'a rongoraau.

⁵ Na tahitahi amoou na'i marewanani 'a mwada'u di'u 'inia moi toto'ora amoou, mamou haa'i mwani mareho namou arunga goro 'ini'i. Mou 'onaai boo ra hangani ha'abwi'aa 'anai ngahuia, 'inia mou 'adoma'inia ro'u do 'a bwa'i maho ta'aa nai to'i'amou ta 'oha.

⁶ 'I'amou mou hiiriraau sae goro na bwara tanaraau ura bwarasi'amou, mamou ha'amaesiraau.

'Abenga'i Mamasi Moi

⁷ Naasi arai do'ora mana asigu'i, tari 'oha nai boi aho'i Araha, moi mamasi beiai ahumaratanoa 'oha nara here ha'a-ta'ai'amou. Moi ahumaratanoa 'onaai nei na 'abenga'i totoriai mou ana dorai hungu goro i mareho na 'odora'ini'i. 'Iia 'a 'abenga'i totoriai rangi 'anai rangi ha'atahiai mou ana mai hua'a goro.

⁸ 'I'amou ro'u mou ga'i ahumaratanoa mamoi abui maemae'a, 'inia 'ia Araha 'a gaarangi mai boi'a.

⁹ Arai do'ora mana asigu'i, abui 'unu'unuai nata nei. 'Ia God 'a gasi hiiri'amou, 'inia 'ia 'a ha'aagau'a 'anai hiiriraau noni hako.

¹⁰ Moi 'adoma'ini'i mamoi ha'isuri'i barongadaa'i rarabea na'i 'oha bwani narau taroha'iniai ha'atee ana God. Rau ahumaratanoa suri'i mwani rongomaata'i narau siri suri'i.

¹¹ Magau 'iraraa, gau 'adoma'i ha'a-ororiuraau nei narau ura wetewete tari ha'ahakodi rongomaata'i o'asi. 'I'amou mou bwane 'iraraai noni ra 'unua 'inia Job. Na'i tahitahi ana, 'a siri suri'i mwani madoraa bwara mana rongomaata'i, ma'ata 'a ura wetewete na'i hinihinina. Ma 'onaai 'iraraa amoou, 'ia Araha God 'a ha'agorohia na'i ha'ahakonai rongomaata'i na haa. 'Inia 'ia God 'e God na honu 'iniai heita'ahi mana hei'a'auhi.

¹² Ta'i maho na ororiu ro'u arai do'ora mana asigu'i, mou abui tohe 'iniai aro mana ano, ma'ua namoiwou ta maho. 'Oha na ta'isadai 'unuai "Io," 'oi haa 'io odo-odo, mana'i 'oha na ta'isadai 'unuai "Ai'a," 'oi 'unua odo-odo moi "Ai'a," 'inia God 'a gasi hiiri'amou.

Ha'arahesi Beiai Hinihini

¹³ 'Onaa tanei 'ini'amou na rongomaata'i, ma 'ai ha'arahesi. Ma 'onaa tei na awa wa'ewa'e, 'ia 'ai gana ha'aasaa God.

¹⁴ Ma 'onaa tei nai daoha 'ini'amou, mamoi soiraau bwauodo anai heisoi marai ha'arahesi 'ana, marai rotohia 'iniai rumu na'i atana Araha.

¹⁵ 'Onaa mou hinihini na'i madoraa namou ha'arahesi 'anai nei na daoha, 'ia Araha 'ai ha'atahia baaniai daoha na sadoia. Ma 'onaa 'e daohani 'ino, 'ia Araha 'ai 'adoma'i nugasiai 'inona.

¹⁶ Naasi, 'onaa ra'i ora-ora'a namou to'ora'i mamoi ha'arangasi'i tana'amou hairiu, mamoi ha'arahesi 'a'auhi'amou hairiu ro'u. Moi haua o'asi, mia God 'ai ha'agorohi'amou baani'i daoha. Na ha'arahesi adaa'i noni odo-odo, ra to'orai mena na wetewete 'anai 'a'auhiraau noni.

¹⁷ 'Ia Elaija 'e noni 'onaigia moi, mana'i 'oha na ha'arahesi wetewete tanaa God do 'a bwa'i rangi nai to'o, 'e oru harisi mana ono hura na ai'a rangi nai to'o na'i dorasi.

¹⁸ Na'i muri 'agu ha'angonia God do'ai rangi. Ma na'i 'ohasi 'agu rangi ha'atahi'i mwane mareho na'i ano.

¹⁹ Arai do'ora mana asigu'i, 'onaa tanei 'ini'amou nai teha baaniai huunai ha'ausuringa'i, 'a goro domou ga'i 'a'auhia 'anai aho'i mai.

²⁰ Moi 'iraraa do na'i 'oha namou waia aho'i mai nei na teha na'i hinihinina, 'ia God 'ai ha'atahia baaniai mae tarau ma'ai 'adoma'i nugasi'i mwani ora-ora'a ana'i.

Na 'Etanai Usu-usu Ana Pita

Gere Mamaani 'Iniai Bukani

Ra'i mwane here he'ete'i hairiu nagau matai raharaha ara'a suri'i. Gau raha ara'a na'i abegaa'i tari 'oha gau maua. Gau raha ara'a suri'i aidangigaa'i na'i 'oha nagau ha'ausuringa'ini'i mareho na'i skuru. Nata mareho na 'igaau gau matai raha ro'u ara'a na'iei, naasi suri'i tahitahi agaa'i beia Kraest.

Na'i usu-usu naanisi 'ia Pita 'a 'unua do 'anai raha ara'a suri'i tahitahi agaa'i beia Kraest 'e mareho nagai bonasia 'onaa gau raba ara'a mai wetewete na'iei. 'A 'onaai ha'ausuringa'i na'i skuru. 'Onaa 'o bwa'i bona, 'a bwara do'oi here goro na'iei. 'I awa maea mana ano-ano, naasi mareho narai 'a'auhiai sae 'anai raha ara'a na'i tahitahi ana beia Kraest. Na'i usu-usuni 'ia Pita 'a maani'i hura'ai tara'i herehere 'anai awa maea, ma 'anai ano-ano.

'Ia Pita 'e ta'i 'iniraaui rongoiusuri ana'ia Jisas me 'iia 'e ta'i na'otara ororiu beiraaui noni hinihini na'i 'ohai na'o. 'Ia Pita 'a usuai usu-usuni tanaraaui noni hinihini 'anai ha'abasuraaui 'iniraaui sae narai norata'airaaui 'iniai suria adaaua Kraest. 'A 'unua tanaraau dorai ura wetewete na'i hinihinidaa'i neina 'ia God 'ai wa'ewa'e 'iniraaui. 'Ia Pita 'a 'irisia do 'iraaui noni hinihini rai raha ara'a goro suri'i tahitahi adaa'i beia Kraest maraigui siri suri'i mareho ta'a'i na 'iraaui maerongadaa'i rai haa'i tanaraau. 'Igaau gau ga'i matai bonasiai hua ro'u moi heresi 'anai raha ara'a suri'i tahitahi agaa'i beia Kraest.

Na'i 'oha na'oi 'oha'i na'i 'etanai buka ana Pita 'oi matai sadoi'i here narai 'a'auhi'o 'anai raha ara'a na'i tahitahi amua beia Kraest.

¹ 'Inaua Pita, Ha'ataari ana Jisas Kraest, nau usu-usu tana'amou sae ana'ia God namou awa 'onaai mahuara 'adarara suriai Provens na'i Pontas, Galesia, Kapadosia, Eisia ma na'i Bitinia.

² 'Ia Godi Ama na 'ome sigihi'amou suria i hei'irisina. 'A ha'amaea'amou 'iniai Hi'ona Maea ana, neina moi araisuria Jisas Kraest mana tahing-amoo'i rai wadiwadi 'iniai 'abuna. Mau ha'arahesi mia God 'ai huunai ha'agorohi'amou mai ha'a-awahi'amou goro.

'Adoma'i Heimamasi

³ Gaau ha'a-aneanea God Amana Araha aga Jisas Kraest. 'Iniai ahu ta'ahigia di'u ana, 'a hua tanagiai tahinga haoru 'iniai ha'a-suruta'ea ana Jisas Kraest baaniai mae. 'Iniai hua o'asi ana nagau to'oraa 'iniai 'adoma'i heimamasi

⁴ 'anai daa'i mwani mareho goro na'ia God na nuga'i tanaraaui sae ana'i. 'A nuga'i tana'amou na'i aro, dora ra bwa'i matai ngabo ma'ua ta'a'i ma'ua ai'a'i.

⁵ Me 'iniai hinihinia amooua God, 'iia 'ai taatahi bwarasi'amou 'iniai mena ana tari dangi hahako, 'oha nai ha'atahi'amou.

⁶ Moi wa'ewa'e 'iniai mahosi, rei'uaa moi ahutotou ta gere madoraa 'ini'i mwani rongomaata'i he'ete'i hairiu namou siri suri'i na'i 'ohani.

⁷ Mareho 'isi ra'i maho moi 'anai ha'a-ohoohoi hinihinimoou beia Kraest, 'onaa namou hinihini ha'a-momori ma'ua ai'a. 'A 'onaai 'oha 'iraaui sae ra raangiai gol 'iniai raoraohanai 'eu 'anai ha'agata'inia i do'o baania ma 'anai sadoia ha'a-momori 'onaa 'e gol ha'a-momori ma'ua ai'a. Ma rei'uaa ra hua o'asi, i gol 'a bwa'i matai awa tarau. Mea God 'a 'adoma'inia dona hinihinimoou 'e maho na ororiu di'ua i gol. Ma 'onaa rai sadoia domou

hinhini ha'a-momori, ma naasi, na'i 'oha nai aho'i maia Jisas Kraest, 'ia 'ai ha'a-aneane'amou mai ha'ahou'amou.

⁸ Rei'uaa namou ai'a re'ia, 'i'amou mou ta'ahia mamou hinhinia. Ma na'i 'ohani, na wa'ewa'e namou haua, 'e wa'ewa'e na raha di'u na bwarai sadoia ta ha'atee goro 'anai huunai ha'arangasia goro hura'a,

⁹ 'inia daua amou i tahi tarau suriai hinhinia namou haa.

¹⁰ Naia na tahi tarausi na 'iraau Rarabea na'i 'oha bwani, rau ha'atee rarabeanga'inia do'ia God 'ai banea tana'amou. Ma rei'uaa na o'asi, rau ai'a aidangisia mora maraugu siba suriai huunai 'ado'ado anai mahosi.

¹¹ Mana Hi'ona Maea ana Kraest na awa beirau 'a ha'arangasia do'ia Kraest 'ai siri na'i rongomaata'i raha maigu dauai mena mana raraha. Ma naasi ra bonasiai sadoiai 'oha he'ua mai he'ua i to'o nai haua.

¹² 'Ia God 'a ha'ata'inia tanaraui Rarabea do tau'aro adaau ai'a do 'anai 'a'auhiraau haariraau, me 'anai 'a'auhi'amou. Ma na'i 'ohani, tara'i sae rau maaniai Taroha Goro tana'amou 'inia mena anai Hi'ona Maea na'ia God 'a ha'ataaria dio mai baaniai aro. Ma 'ohani na mamaani narau haua, 'a ta'isada beiai mamaani ra haua Rarabea. Maho 'isi, ra'i mareho na 'iraui enjel rau raba aidangisi'i ro'u.

Ha'ata'u'u 'Anai Awa Maea

¹³ Hoita naasi, moi ha'aagau suri'i tahingamoo'i 'anai suria Araha mamoi 'omesuri'amou haarimooi ro'u baaniai ora-ora'a. Moi 'adoma'i heimamasi 'inia tahi tarau na'ia God 'ai banea tana'amou na'i 'oha nai aho'i maia Jisas Kraest.

¹⁴ Moi araisuria God mamoi abu haa'i'a i here ra ta'a'i namou haa'i ga'u na'i na'o, 'oha mou ai'a aidangisia maua God.

¹⁵ 'Ia God na 'ome sigihi'amou, 'a maea. Ma naasi, 'i'amou moi awa maea ro'u suri'i mwani maho moi haa'i.

¹⁶ Naia na Usu-usu Maea 'a ha'arangasia 'inia o'ani, "Moi awa maea, 'inia 'inau 'au maea."*

¹⁷ 'Ia God, namou 'unua 'inia Ama na'i 'oha mou ha'arahesi, 'a bwa'i 'adoma'i ha'a-ororiua ta noni 'oha nai hiiriraau 'ini'i taha ra haa'i. Naasi moi ha'ahoua God na'i madoraa mou awa mau na'i marewanani.

¹⁸ 'Inia 'ia God 'a hori'amou 'anai ruhasi'amou baaniai tahinga ta'aa namou ha'ausuringa'inia baaniraui wauwa amoo'i. Na tahingasi 'a bwarai 'a'auhi'amou. 'Ia God 'a ai'a hori'amou 'inia maho na matai ta'aa moi 'onaai silva ma'ua gol,

¹⁹ ma'ata 'inia huunai 'abuna Kraest na hauasa. 'Ia Kraest 'a 'onaai garei siip nara ha'aagaua 'anai suu ho'asi na ai'a ta ta'i maho nai ta'aa beia.

²⁰ Na'i na'o mia God 'agu ha'apwa'araai marewana, 'a bwane 'ome sigihia Kraest do'ai ruhasi'amou. Mia Kraest ai'a boi mau na'i marewana 'ohasi. 'Agu boi na'i 'ohani, gaarangiai hahakonai dangi, neina 'ai 'a'auhi'amou.

²¹ 'Iniai maho na haua Jisas, 'i'amou mou hinhinia God. 'Ia na ha'a-suruta'ea Jisas Kraest baaniai mae ma ha'a-ororiua. Na tarana naasi, na hinhini mana 'u'uri amou 'ai awa tarau beia God 'anai haua o'asi ro'u tana'amou.

²² 'Iniai araisuria amou huunai ha'ausuringa'i 'inia Jisas Kraest, 'i'amou mou ha'a-wadiwadi'i haarimooi tahingamoo'i mamou ta'ahiraau ro'u i noni hinhini. Naasi, moi ta'ahi'amou hairiu tarau 'ini'i tahingamoo'i hako.

²³ Mou matai haua o'asi, 'inia mou to'oraai tahinga haoru. Ma ai'a do mou to'oraai tahinga haorusi baanira i noni nara matai mae moi, ma'ata baaniai ha'atee ana God. Na ha'ateesi 'a tahitahi ma 'ai awa tarau.

²⁴ 'Inia na Usu-usu Maea 'a 'unua o'ani, "Iraui hako sae ra 'onaai moi raraaua,

* 1:16 1:16 Levitikas 11:45; 19:2; 20:7

mana mwani mareho goro ra hahaa'i ra 'onaai moi tagai raraaua. Raraaua na matai maria mana taga na matai anunu.

²⁵ Ma'ata, ha'atee ana Araha God 'a awa tarau."†

Mana ha'ateesi, naasi Taroha Goro nara bwane taroha'inia tana'amou.

2

'Ia Kraest 'A 'Onaai Hau Na Ororiu

¹ 'Iniai o'asi ana, moi nugasi'i mwani maho ta'a'i. Moi abui pwapwaari'i ma'ua here 'onaa domou goro. Abui kakawa 'ome ma'ua ha'atee ha'ata'ai ai nata nei.

²⁻³ 'T'amou mou aidangisiai gorohana Araha. Naasi, moi hioronga'inia ha'atee ana God neina moi raha ara'a mamoi tahi 'inia. Moi 'onaai'i gare mweramwera'a ra hioronga'inia suuhiai wai susu haoru.

⁴ Moi boi beia Araha. 'Iia na haua tanagia i tahi tarau. 'A 'onaai hau na 'iraui sae tatau'aro ruma rau 'itaa. Ma'ata, 'ia God 'a 'adoma'i ha'a-ororiua di'u ma 'ome sigihia.

⁵ 'T'amou namou dauai tahi tarau, mou 'onaai'i hau na 'ia God na hau'i 'anai ha'a-uraisiai ruma anai Hi'ona Maea, naasi heisoi. Me 'iniai hei'a'auhi ana Jisas Kraest, moi tau'aro 'onaai piriisi maea nara tau'aro beiai mena anai Hi'ona Maea mara wate'i mareho tanaa God 'anai ha'a-wa'ewa'ea.

⁶ Na Usu-usu Maea 'a o'ani,

"Au 'ome sigihiai hau na ororiu di'u

mau ha'a-uraisia na'i di'unai bani na'i 'omaa i Saeon.

'Iatei nai nugaa i 'u'uri ana beia, 'agu bwa'i ahutotou'a ta 'oha 'iniai 'u'uri na nugaa beiasi."*

⁷ 'A ororiu di'u i hausi tana'amoui nei mou hinihini.

Mei tanaraui nei ra ai'a hinihini,

"Na hau 'iraui sae tatau'aro ruma narau 'itaa, naia nagu 'onaai hau na ororiu di'u."†

⁸ Mana nata dora na'i Usu-usu Maea 'a o'ani ro'u,

"Naani hau ra matai tora'i ei mara matai agusu 'inia."‡

Ra agusu, 'inia ra ai'a araisuriai ha'atee ana God. Ra agusu, 'inia 'ia God 'a bwane 'adoma'inia mau mai do 'ai to'o o'asi.

⁹ Ma'ata 'i'amou 'e ruruhai sae na'ia God na 'ome sigihia. 'T'amou ra'i Piriisi anai Mwaeraha God ma ra'i noni maea ana'i. 'A wai'amou hura'a baaniai kuhi na'i dora marewa ma 'ome sigihi'amou domoi taroha'inia mwani mareho goro na haa'i.

¹⁰ Na'i na'o ga'u, 'i'amou ai'a noni ana'ia God, mia God ai'a ahu ta'ahi'amou. Ma na'i 'ohani, 'i'amou ra'i noni ana'i na 'ia God 'a ahu ta'ahi'amou.

Awa 'Onaai Sae Tatau'aro Ana God

¹¹ Arai do'ora mana asigu'i, 'i'amou mou awa moi 'onaai mahuara na'i marewanani, suria ni marewanani 'a ai'a huunai 'omaa amou. Wai ha'atee wetewete tana'amou! Moi abu suriai hei'irisi ta'aa anai abe hasi'o, 'iniai abe hasi'o 'a hei'oi bwarasiai tahinga haoru namou awa iei na'i 'ohani.

¹² Moi haa'i here nara goro neina 'oha 'iraui sae ahurodo rai ha'ahuni'amou, rai re'i'i mareho goro mou haa'i marai ha'atee ha'agorohia God na'i 'oha nai aho'i mai.

¹³ 'Anai ha'a-wa'ewa'ea Araha, moi araisuriraui nei ra marungi'amou, ororiu Mwaeraha ni Rom, 'inia 'iia na bwauodo na ororiu di'u na'i marewana.

† 1:25 1:24-25 Aisaea 40:6-8 * 2:6 2:6 Aisaea 28:16 † 2:7 2:7 Psalm 118:22 ‡ 2:8 2:8 Aisaea 8:14

14 Moi araisuriraau ro'u Primia, 'inia neiraausi sae tatau'aro anai mwaeraha 'anai ha'a-mama'ai'i sae ta'ai mana ha'atee ha'agorohi'i sae goro.

15 'Ia God 'a 'irisia domoi haa'i mwani here goro maai ha'apapaku'i ha'atee bweubweu'a adaa'i sae bweu nara ha'atee ha'a-ta'ai'amou.

16 Bwa'i ta sae nai matai ha'a-abu'amou 'inia ta maho namoi raba haua, 'inia 'ia Kraest 'a bwane ha'a-dadara'amou. Ma'ata rei'uaa na o'asi, me 'i'amou ra'i sae tatau'aro mau ana'ia God. Mou gasi 'adoma'inia domou dadara'a mamougu haa'i here nara ai'a odo-odo.

17 Moi ha'ahouraaui hakoi mwani sae mamoi ha'ata'iniai huunai heita'ahi tanaraaui nei ra hinihini. Moi 'adoma'i ha'ahoua God mamoi ha'ahouai Mwaeraha 'anai Rom.

Kraest 'A Ha'ata'iniai Huunai Herehere

Iniai Rongomaata'i Ana

18 'I'amou slev, moi awa na'i bahaidi heimarungi adaa'i na'otara amoo'i mamoi ha'ahouraaui tarau. Moi haua o'asi, rei'uaa tara'i nei 'iniraaui ra goro 'ini'amou ma tara'i nei ra here ha'a-ta'ai'amou.

19 'Inia 'onaa na 'oi siri na'i rongomaata'i na ai'a arari dorai haua tana'o, ma 'o mwa'emwa'e 'iniai 'adoma'inia amua tarau a God, 'ia God 'ai ha'agorohi'o.

20 'A 'ua? 'O 'adoma'inia do'oi dauai ha'agorohi 'onaa ra ha'a-mama'ai'o 'iniai maho ta'aa na'o haa ma'o mwa'emwa'e moi 'inia? 'Ia God 'ai matai ha'agorohi'o moi 'onaa ra ha'a-mama'ai'o 'iniai maho goro na'o haua ma'o mwa'emwa'e 'inia.

21 Naia na 'ia God 'a soi'amou 'inia, 'inia 'ia Kraest 'a rongomaata'i 'ini'amou ma ha'ata'inia tana'amou huunai herehere domoi suria.

22 'Ia Kraest 'a ai'a haua ta ora-ora'a ma ai'a ta pwari'i nai hura'a na'i ngoona ta 'oha.

23 Na'i 'oha ra ha'atee ha'ata'aia, 'a ai'a heiarami 'inia ta ha'atee ta'aa. 'Oha na rongomaata'i 'a ai'a 'unua do'ai su'ua aho'i ta'aa. 'A 'u'uria moia God, 'ia mo'o na hihiri odo-odo.

24 'Ia Kraest 'a waa'i ora-ora'a agaa'i na'i abena 'oha na hano 'anai mae na'i dadaahoro, neina gai nugasiai ora-ora'a magai awa odo-odo. 'Ini'i maara na'i abena nagaugu goro aho'i 'inia.

25 Na'i na'o, 'i'amou mou 'onaaia ga'u i siip na teha ma na'i 'ohani mou aho'i mai beia mo'o na 'omesuri'amou ma taguma'ini'i tahingamoo'i.

3

'Iraaui Sae Ha'iwai

1 'A o'asi ro'u, 'i'amou urao ha'iwai moi awa bahaidi heimarungi adaa'i mwane amoo'i. 'Inia 'onaa tara'i nei 'iniraaui rau ai'a hinihiniai ha'atee ana God, marai matai rihosi 'anai hinihini 'iniai re'ia adaa'i barongamoo'i nara goro. 'A ai'a ororiu domoi hadahada,

2 'inia 'iraaui rai re'i'i barongamoo'i ra goro mana ha'ahoua amoua God.

3 'A ai'a taraa ororiu domoi haa'i here do rai 'ome goro 'iniai abemoo'i, 'onaai hiohio warihu mana nuga ringi wadowado suri'i karingamoo'i mana ha'aha'abii mana ho'o bwana 'ome goro.

4 Ma'ata 'a ororiu di'u doni barongamoo'i rai 'ome goro. Moi awa manego, 'inia naasi maho na matai awa tarau mana maho na'ia God 'a 'adoma'i ha'ororiua.

5 Na tahingadaa'i urao nara awa mae na'i 'oha bwani ra 'ome goro o'asi. Rau 'u'uria God marau awa bahaidi heimarungi adaa'i mwane adaa'i. Naasi maho nara haua 'anai ha'a-'omegororaui haariraaui.

⁶ 'Ia Sera 'a haua o'asi. 'A araisuri'i taha na 'unu'ia Ebrahim ma ha'abwauodoa. Ma naasi 'onaa moi abu mamaa'u mamoi haa'i mwani mareho goro, mou ga'i 'onaai huunai gare ana'i.

⁷ 'T'amou ro'u i saemwane ha'iwai, 'oha mou awa bei'i urao amoo'i moi aidangisia do 'iraaui urao ra ai'a wetewete 'onaaimou. Moi ha'ahouraaui, 'inia 'i'amou hako moi daua baania God i ta'i bane, naasi i tahi tarau. 'Onaa moi haua o'asi, 'a bwa'i ta maho nai ha'abwarasi'i ha'arahesi amoo'i.

Rongomaata'i 'Iniai Hauai Mareho Na Goro

⁸ Maho hahako, 'au rabasia domoi to'oraai ta'i 'ado'ado mamoi ahu ta'ahi'amou hairiu ro'u. Moi ta'ahi'amou hairiu 'onaai ha'ido'orada, moi hauai here na goro tanaraaui noni hako, ma ro'u, moi ha'a-anoano'amou haari'amou.

⁹ Moi abu su'uui ta'aa 'iniai ta'aa ma'ua su'uui ha'atee ta'aa 'iniai ha'atee ta'aa. Ma'ata, moi ha'angonia God maai ha'agorohiraaui. 'Inia 'oha na'ia God na soi'amou 'anai suria, 'a durua do'ai ha'agorohi'amou ro'u.

¹⁰ 'A 'onaai ha'arangasia anai Usu-usu Maea o'ani,
 "'Onaa 'o raba to'oraai tahinga goro
 mana awa wa'ewa'e tarau,
 'oi abu haa'i ha'atee ta'a'i
 mana pwapwaari'i.

¹¹ 'Oi nugasi'i baronga ta'a'i
 ma'oi haa'i mwani baronga goro.

'Oi bonasia do'oi awa goro beiraaui mwani noni hako.

¹² 'Inia 'ia Araha 'a wanasiraaui nei ra odo-odo
 ma rongo'i ha'arahesi adaa'i,
 ma ura bwarasiraaui nei ra ta'a'i."*

¹³ 'Iatei nai matai ha'a-ta'ai'amou 'onaa moi bonasiai haa'i here goro?
 Bwa'i ta sae'a!

¹⁴ Ma'ata 'onaa moi rongomaata'i 'ini'i haa'i amoo'i maho odo-odo mamou ga'i wa'ewa'e! Moi abu ta'aabemoou ma'ua mamaa'usiraaui sae,

¹⁵ ma'ata moi ha'abwauodoa Kraest suri'i tahingamoo'i. Moi awa ha'aagau 'anai arami'i heisonga'i adaa'i nei rai songa'ini'amou 'iniai taranai taha namou hinihinia 'inia Jisas.

¹⁶ Ma'ata moi haua beiai ahu manego mana ha'ahou. Moi awasuri'i taha namou aidangisi'i do ra odo-odo neina 'oha rai ha'atee ha'a-ta'ai'amou 'ini'i maho goro mou haa'i 'iniai suria amooia Kraest, rai ninima 'ini'i maho rau 'unu'i.

¹⁷ 'Onaa 'ia God 'a 'irisia dogai rongomaata'i 'ini'i mareho goro gau haa'i, 'a goro baania rongomaata'i 'ini'i mareho ta'a'i nagau haa'i.

¹⁸ Mou wai'ado'ado ga'u suria Kraest. 'Iia 'a odo-odo na'i maana God maagu mae 'ini'i ora-ora'a agaa'i sae nagau ai'a odo-odo. Rei'uaa na ai'a ora-ora'a, 'a mae 'inigiai noni ora-ora'a 'anai wai'agaau 'ari beia God. 'A mae ha'atai moi, ma 'agu bwa'i mae'a ro'u 'ini'i ora-ora'a agaa'i ta 'oha. Ra ha'amaesia abena, ma'ata ni aungana 'a tahi mau.

¹⁹ Mana aungana 'a 'ari heitaroha'i tanaraaui aunga na'i rumanih'o.

²⁰ Aunga 'isi, naasi aungadaa'i nei ra hairaes beia God na'i 'oha na mamasiraaui dorai rihosi, na'i madoraa na'ia Noa 'a tagoraai haka. Ma'e waira waru moi narau ta'e na'i haka narau tahi 'iniai wai.

²¹ Mana waisi 'e heiha'auu 'iniai wai na'i bwareomaea na matai ha'atahigaau baaniai ha'a-mama'ai. Mana bwareomaea, 'a ai'a 'anai dori gaasinga'ini'i do'o ni abe, me'e duruduru gau haua tanaa God 'anai

* 3:12 3:10-12 Psalm 34:12-16

awasuri'i taha nagau aidangisi'i do ra odo-odo. Ma gau matai to'oraai tahi 'inia, suriai suruta'e aho'i ana Jisas Kraest baaniai mae.

²² 'Ia Jisas 'a ara'ai aro ma awa na'i aba odona Godi Ama ma marungi'i enjel hako mana mwani maho ra heimarungi mara mena na'i aro.

4

Tahinga Haoru Adaa'i Noni Hinihini

¹ 'Ia Kraest 'a rongomaata'i na'i madoraa na awa na'i marewanani. Naasi 'i'amou ro'u moi ha'aagau 'anai rongomaata'i 'onaai rongomaata'i na haua. 'Inia 'onaa moi rongomaata'i, 'a ha'ata'inia do 'i'amou mou nugasiai ora-ora'a.

² Ma naasi, 'oha mou awa na'i marewanani, moi nugasii hei'irisimoo'i mamoi suriai maho na'ia God na 'irisia.

³ Na tahingamoo na'i na'o mou awa 'onaai sae ahurodo. Na'i 'ohasi, mou to'ora'i mwani hei'irisi ta'a'i, mou awa 'onaai mwamwaa, mamou hano hairiu 'anai gonogono mana haa'i kae ngaugoni 'anai haa'i here wawaasua'a. Mana mareho na ta'aa di'u na mou haua, mou ha'arahesi'i araaranunu.

⁴ Na'i 'ohani 'iraau nei namou ta'i haa'i ga'u i here o'asi, 'a kakui ahudaau 'iniai taranai taha namougu nugasii 'ini'i here 'isi marau 'unu'unu'amou 'iniai haa amooou o'asi.

⁵ Ma'ata 'iraau rai ha'arangasi'i haariraau taha rau haa'i tanaa God na ha'aagau 'anai hiiriraau nei ra tahi mana nei nara bwani mae.

⁶ 'Inia naia nara taroha'inia ro'u 'iniai Taroha Goro tanaraau nei ra bwani mae,* neina rei'uaa abedaa'i ra mae 'onaai mae nai to'o beigaau hakoi noni, ni aungadaa'i rai tahi marai awa beia God.

⁷ Na hahakodi mwani maho 'a gaarangi'a. Naasi moi 'omesuri'amou haarimoo baaniai ora-ora'a mamoi wai'ado'ado goro neina mou matai ha'arahesi goro.

⁸ Maho na ororiu di'u, moi ha'ata'iniai heita'ahi na raha tana'amou hairiu, 'iniai heita'ahi 'a matai 'a'auhi'o 'anai 'adoma'i nugasiai ora-ora'a nara haua tana'o.

⁹ Moi ha'amaoto'amou hairiu surii ruma amoo'i mamoi haua beiai wa'ewa'e mana ahu mwa'emwa'e.

¹⁰ 'Adonai nei 'ini'amou 'ia God 'a banea tanaa 'e ta'i 'ini'i bane ana'i. Naasi moi tau'aro goro 'ini'i bane 'isi 'anai 'a'auhiraau noni mamoi haua suriai ringe na odo-odo.

¹¹ 'Iraau nei ra to'oraai bane 'anai heitaroha'i, rai heitaroha'i 'onaai nei na taroha'ini'i huudi ha'atee ana'ia God. 'Iraau nei nara to'oraai bane 'anai hei'a'auhi, rai 'a'auhiraau noni 'iniai wetewete na haua God tanaraau. Neina 'ado mareho namoi haa'i, rai ha'atee ha'agorohia God 'inia, na'i atana Jisas Kraest. Gau magari ha'a-aneanea God, 'ia mo'o na to'o mena tarau tarau. Amen.

Rongomaata'i 'Iniai Ha'i Sae Hinihini

¹² Arai do'ora mana asigu'i beia Kraest, moi abu heimwaota'i 'iniai siri amoo na'i rongomaata'i, 'onaa do'e maho haoru tana'amou. Mahosi 'a boi 'ana moi ha'a-ohoo'omou.

¹³ Ma'ata moi wa'ewa'e, 'inia mou rongomaata'i 'onaai rongomaata'i ana Kraest, neina wa'ewa'e amoo 'ai honu aharau na'i 'oha na 'ia Kraest 'ai boi aho'i beiai mena mana raraha.

* **4:6 Nei ra bwane mae:** 'Iraau noni hinihini nara rongoa i Taroha Goro ga'u maraugu mae, ma'ua 'iraau sae nara mae na'i ahe raha na'i madoraa anai Noa.

¹⁴ Mou ga'i wa'ewa'e 'onaa ra here ha'a-ta'ai'amou 'inia suria amoua Kraest, 'inia 'a ha'ata'i dona Hi'ona Maea ana God na mena di'u, 'a awa bei'amou.

¹⁵ 'Inau 'au ai'a raba rongoa domou rongomaata'i 'inia heingahu ma'ua beri, ma'ua raesiai ringe, ma'ua hadahada rago siri suri'i mareho na ai'a ta'isada do'oi 'a'au siriwou suri'i.

¹⁶ Ma 'onaa mou rongomaata'i 'inia 'i'amou ra'i sae ana'ia Kraest, ma ai'a ta'isada domoi ninima 'inia mahosi. Mou ga'i ha'atee ha'agorohia God, 'inia 'i'amou ra'i sae ana'ia Kraest.

¹⁷ Na madoraa anai taraawa'a hihiri 'a boi'a, miraaui sae tahamora na 'ia God nai hiiriraaui, 'iraau sae ana'ia God. Ma 'onaa 'ai taraawa'a beigaau, 'ai 'ome he'ua 'oha nai hako beiraaui nei ra ai'a hinihiniai Taroha Goro ana God?

¹⁸ Mana Usu-usu Maea 'a o'ani,
 "Onaa 'a ai'a mwada'u tanaraaui sae goro 'anai dauai tahi tarau,
 ma'ai he'ua tanaraaui ahurodo narau ora-ora'a?"[†]

¹⁹ Naasi 'onaa namou rongomaata'i suriai hei'irisina God, mamoi abu agoheta'i haa'i maho ra goro. Moi 'u'uria taraua God na ha'a-pwa'ara'amou, 'iia 'a bwa'i kakua'amou mwada'u.

5

Tanaraaui Na'otara Na'i Heisoi

¹ Tana'amou na'otara na'i heisoi, 'au raba ha'a-ta'u'u'amou. 'Inau 'e na'otara na'i heisoi ro'u, mau 'omesia 'inia maagu i rongomaata'i ana Kraest. Ma na'i maadi mwani noni hako rai ha'ahouau ro'u bei'amou na'i 'oha na 'ia Kraest 'ai aho'i mai.

² Naasi wai ha'a-ta'u'u'amou. 'Onaai 'omesuri siip na 'omesuriraaui siip ana'i, 'i'amou ro'u moi 'omesuriraaui nei na 'ia God na ha'a-u'uri'amou 'iniraaui. Moi haua ha'i mwa'emwa'e 'inia naasi hei'irisina God. Moi abu haua 'onaai nei nara ha'a-'usu'usua moi. 'A ai'a goro domoi hauai tau'arosi 'inia 'irisina moi amou i ha'a. Moi abui haua o'asi, ma'ata moi haua 'inia mou raba 'a'auhiraui nei ra ha'a-u'uri'amou 'iniraaui.

³ Moi abu na'otara beiai ha'a-ta'eta'e, ma'ata na'otara 'anai ha'ata'iniiai huunai herehere tanaraau 'anai suria.

⁴ Ma na'i 'oha nai aho'i mai 'i bwauododaui 'omesuri siip, 'ai tahari'amou 'inia heitahari na bwa'i ai'aa mwada'u. Moi awa tarau na'i rarahana ma na'i gorohana.

Tanaraaui Sae Mwane Haoru

⁵ 'I'amou sae mwane haoru, moi awa bahaidi heimarungi adaa'i sae wari amoo'i, mamoi ha'a-anoano'amou haarimoo 'anai 'a'auhi'amou hairiu. 'Iniai Usu-usu Maea 'a 'unua o'ani, "Ia God 'a 'itaai nei na ha'aba'o, ma 'a'auhiai nei na ha'a-anoanoa haaria."*

⁶ Moi ha'a-anoano'amou haarimoo 'anai awa na'i rimana God na mena di'u, neina 'ia God 'ai ha'a-hauasa'amou na'i 'oha nai tari madoraa 'ana.

⁷ Moi nuga'i hako tanaa God i taha ra torakoke 'ini'i 'adoma'imoo'i, 'inia 'iia na 'adoma'ini'amou ma 'omesuri'amou.

⁸ Moi awa ha'aagau tarau mamoi 'ome'ome goro. 'Iniai maerongamoo, 'ia Saetan, 'a hano hairiu 'anai 'ome'ome 'inia tanei do'ai ha'ata'aia. 'A 'onaai laeon na ngurunguru 'anai raba haingau.

⁹ Moi ura baabau na'i hinihinimoo mamoi ura bwarasia. 'Inia 'onaai 'iraraa amou, ai'a do 'i'amou moi, me'iraaui ro'u i sae hinihini hako na'i marewana narau siri ro'u na'i raronai rongomaata'i o'asi.

¹⁰ 'Ia God 'ai 'a'auhigaau tarau 'inia heita'ahi ana na raha di'u. Ma 'inia hagu amou beia Kraest, 'a soi'amou 'anai to'oraa beia Kraest i

[†] 4:18 4:18 Proverbs 11:31 * 5:5 5:5 Proverbs 3:34

ha'ahou mana ha'aasaa na matai awa tarau. Ma na'i 'oha naigui hakoi rongomaata'i namou haua 'ohani suriai gere madoraa, 'ia God 'ai ha'ahaoru'i tahingamoo'i, 'ai ha'ababauai hinihinimoo'u ma'ai ha'a-wetewete'i 'adoma'imoo'i.

¹¹ Gaau magai ha'aasaa God 'iniaia mena ana na awa tarau tarau. Amen.

Mareho Hahako

¹² 'Ia Saelas na 'a'auhiau 'anai usuai gere usu-usuni. 'Iia 'e do'oragaau na'i Kraest nau 'u'uria. Hoita, 'inau 'au hauai usu-usuni 'anai ha'a-wetewete'i hinihinimoo'i ma 'anai ha'arangasia tana'amou dona mwani mareho nau usu'i na'i usu-usuni rai ha'ata'iniaia huunai goro na haa God 'ini'amou. Naasi, moi ura baabau na'i gorohana God.

¹³ Ha'atee wa'ewa'e tana'amou baaniraaui sae hinihini na'i Babilon na 'ia God 'a 'ome sigihiraaui 'onaai 'ome sigihi'amou ro'u ana. 'Ia Mak 'a haua ro'u i ha'atee wa'ewa'e ana tana'amou. 'Iiasi 'a 'onaa do'e gare agua.

¹⁴ Moi ha'atee wa'ewa'e tana'amou hairiu beiai haingoni ni heita'ahi ni heisoi.

'Io, mau ha'arahesi mia God 'ai ha'a-awahi'amou goro, 'i'amou hakoi nei ana'ia Kraest.

Na Ruanai Usu-usu Ana Pita

Gere Mamaani 'Iniai Bukani

Tara'i 'oha 'a goro 'anai ha'a-'adoma'i aho'isi'o haari'o 'iniai taha na ororiu. 'A 'ua? Ha'asiha nara ha'a-'adoma'i aho'isi'o 'ini'i taha nara ororiu do'o ga'i haa'i?

'Ia Pita 'a hauai ruanai usu-usu ana 'anai ha'a-'adoma'i aho'isiraau inoni hinihini 'ini'i tara'i ha'ausuringa'i. 'Iraau noni hinihini narau daua i usu-usuni, rau bwane rongo'i ga'u'a i mwane ha'ausuringa'i 'isi na'i na'o. Ma'ata tara'i nei 'iniraau ra ai'a matai bahurongo goro ma 'ariwou mara hau'i aho'i ro'u moi taha na'ia God 'a ai'a wa'ewa'e 'ini'i.

Na'i usu-usuni 'ia Pita 'a ha'a-'adoma'i aho'isiraau wetewete inoni hinihini do 'a ororiu di'u tanaraau do rai abui agohe 'anai bonasiai aidangisia goroa God. Ma 'unua tanaraau do 'iia 'a bwa'i agoheta'i 'unua tanaraau. 'A ororiu di'u 'anai ha'ausuringa'inia tarau i Ha'atee ana God 'anai ha'ahaoru'i tarau i 'adoma'igaa'i 'inia tei naasia Jisas ma'ai he'ua nagai ha'a-wa'ewa'ea 'inia. Mana taha na ororiu di'u naasi, ai'a do'oi bahurongo moi; ma'ata 'oi bahurongo ma'oi ha'isuriai taha na'o rongoa na'i Ha'atee ana God.

'Oha na'oi 'oha'iniai ruanai usu-usu ana Pita, 'oi ha'a-'adoma'i aho'isi'o 'ini'i taha nara ha'a-momori 'inia Jisas.

¹ 'Inaua Saemon Pita, sae tatau'aro mana Ha'ataari ana Jisas Kraest, nau hauai usu-usuni tana'amoui nei namou dauai hinihini hauasa na ta'isada be'iniai hinihinimeeu. 'Ia Jisas Kraest, i Ha'atahi mana God aga, na haua tanagiai hinihinisi, 'inia 'iia 'a odo-odo tarau.

² Mau ha'arahesi mia God 'ai ha'agorohi'amou ma'ai ha'a-awahi'amou goro tarau 'iniai aidangisia amoua God mia Araha aga Jisas.

Taha 'Ia God Na 'Irisia

³ Beiai mena ana God, 'ia Kraest 'a hau'i tanagiai mwani mareho nagau ga'i to'ora'i 'anai awa 'inia na'i tahitahi na matai ha'a-wa'ewa'ea God. Ni mwane mareho 'isi 'iaagaa'i suria gau aidangisia goroa God na soigaaui 'iniai goro ana na hauasa.

⁴ 'Iniai o'asi ana, ra'i kae duruduru raha na 'ia God na hau'i tanagia neina 'i'amou moi to'oraa ro'u i barongana mamoi matai awa dadara'a baani'i hei'irisi ta'a'i na'i marewana nara ha'a-ta'airaau noni.

⁵ Naasi 'iniai hau'i ana'i mwani maho goro 'isi tanagia, moi tau'aro wetewete 'anai ha'a-weteweteai tahingamoo beia Kraest. Beiai hinihini namou to'oraa, moi a'oi 'iniai tahinga goro. Ma 'onaa moi to'oraai tahinga goro mamoi bonasiai aidangisia God.

⁶ Ma 'onaa moi aidangisia God, mamoi bonasiai 'omesuri'amou haarimoo baaniai ora-ora'a. Ma 'onaa moi 'omesuri'amou baaniai ora-ora'a mamoi bonasia domoi ahumaratanoa 'oha ra nora ta'ai'amou. Ma 'onaa moi ahumaratanoa, mamoi bonasiai hauai tahitahi na matai ha'a-wa'ewa'ea God.

⁷ Ma 'onaa moi hauai tahitahi o'asi, mamoi bonasiai 'a'auhiraau sae hinihini. Ma 'onaa moi 'a'auhiraau sae hinihini mamoi bonasiai ta'ahiraau noni hako.

⁸ 'Onaa ni baronga goro 'isi rai raha hanehane ara'a suri'i tahingamoo'i, naasi 'a ha'ata'inia do taha mou aidangisia 'abaia Araha aga Jisas Kraest 'a 'a'auhi'amou 'anai haa'i mwane mareho goro.

⁹ Mia tei na ai'a to'ora'i baronga goro o'asi na'i tahingana, 'iia 'a 'onaai nei na bwa'i wana ha'atau ma'ua nei na kuru, ma kaku'aa do ora-ora'a ana'i ra bwani 'adoma'i nugasi'i.

¹⁰ Arai do'ora mana asigu'i beia Kraest, moi bonasia to'ora'i baronga goro 'isi suri'i tahingamoo'i neina moi ha'ata'inia goro do 'ia God na 'ome sigihi'amou 'anai ha'i noni ana'i. 'Onaa moi haua o'asi, mou bwa'i matai ahoda mwada'u na'i hinihinimoou.

¹¹ Mia Araha mana Ha'atahi aga Jisas Kraest 'ai wa'ewa'e 'oha nai ha'amaoto'amou na'i hourana na awa tarau.

¹² 'T'amou mou bwani dau'i baabau i huudi ha'ausuringa'i nara hau'i tana'amou. Rei'uaa na o'asi, 'inau wai ha'a-'adoma'i aho'isi'amou tarau ro'u mau 'ini'i.

¹³ 'Au 'adoma'inia do 'au ga'i ha'a-'adoma'i aho'isi'amou 'ini'i tarau tari 'oha wai mae.

¹⁴ 'Ia Araha aga Jisas Kraest 'a ha'arangasia tanaau do ni tahi nawai haa na'i marewanani 'a bwa'i orea.

¹⁵ Naia nau bonasia 'inia domoi 'adoma'i aho'isi'i tarau 'inia i mareho 'isi, neina mou bwa'i kaku'a'i na'i murinai mae nawai haua.

Taha Rau Re'i'i Ha'ataari 'Ini'i Maadaa'i

¹⁶ Na'i 'oha meu maania tana'amou i aho'i mai nai haua Araha aga Jisas Kraest beiai mena, meu ai'a suriai mamaani adaa'i sae madoma nara tarau to'o mamaani moi. Ai'a! Meu re'iai rarahana Jisas 'ini'i maamee'i.

¹⁷⁻¹⁸ 'Tameu meu awa beia Jisas na'i hungahunga maea na'i 'oha na 'ia God 'a haua tanaai raraha ma ha'a-ororiua. Ma na'i madoraasi, na ha'atee 'a ao mai baaniai aro. 'Ia Godi Ama na hauasa 'a o'ani, "Naani gare agua nau ta'ahia mau wa'ewa'e 'inia."

¹⁹ Maho 'isi ragu ha'a-wetewete'i di'u ro'u wou i hinihinimee'i, do maho rau 'unu'i Rarabea ra ha'a-momori. Naasi moi wanawana riariaa goro i ha'atee adaa'i Rarabea, 'inia ra 'onaai raita na marewa na'i dora kuhi. Na raitasi 'ai marewa tari 'oha na 'ia Jisas Kraest 'ai aho'i mai. Na'i 'ohasi, 'ia Kraest na 'onaai hee'u ni dangi, 'ai boi mana marewahana 'ai marewasi'i 'adoma'imoo'i.

²⁰ 'A ororiu di'u domoi aidangisia do mwani ha'atee rarabea na'i Usu-usu Maea 'iraaui Rarabea rau ai'a 'unu'i mareho 'isi suri'i moi 'adoma'idaa'i haraariraaui.*

²¹ 'Inia ai'a ta ha'atee rarabea nai hura'a mai baania moi 'adoma'inai noni, ma'ata na Hi'ona Maea naasi na na'otaradaau 'ini'i.

2

Ha'ausuri Pwapwaari'i

¹ Na'i 'oha bwani ra'i Rarabea pwapwaari'i ra pwa'ara ara'a beiraaui Israel. Na'i 'ohani ra'i ha'ausuri pwapwaari'i rai pwa'ara ara'a ro'u bei'amou. Rai ha'a-sirimaihi'i ha'ausuringa'i nara matai ha'ata'ai ai hinihinimoou ma na'i 'oha narai haua o'asi 'i'amou mou bwa'i 'ome 'iraraa. Rei'uaa na 'ia Araha 'a ruhasi'i 'inodaa'i, miraaui rai su'amuria Araha. 'Iniai haua adaau o'asi, 'a bwa'i orea mia God 'ai ha'a-mama'airaaui.

² Rai ragoi sae hinihini narai suri'i herengadaa'i nara ta'a'i di'u mara ha'aninimai abe, miraaui ahurodo rai taraawa'ai ha'atee ha'ata'ai ai ha'ausuringa'i agaa'i nara ha'a-momori.

³ 'Iniai 'irisia di'u adaui ha'a, 'iraaui ha'ausuri 'isi rai haa'i ha'ausuringa'i pwapwaari'i 'anai rahi ha'a baani'amou. Here narau hauasi 'ia God 'a

* **1:20** 1:20 Nata here 'anai orisiai tatarani 'a o'ani, "A ororiu di'u domoi aidangisia do 'a bwa'i sae nai 'iraraa haaria ta ha'atee rarabea ra awa na'i Usu-usu Maea."

bwani hiiriraaui mau mai ore'a 'inia, mana ha'a-mama'ai adaau 'ai boi mau ma'ata'a.

⁴ Mou 'iraraa do'ia God ai'a wana agoheta'iniraaui moi enjel narau ora-ora'a. 'A gaasiraaui hura'a baaniai aro 'ari dora ni rongomaata'i. 'A ho'osiraaui 'ini'i arihau marai awa na'i kuhi mamasiai madoraa ni hihiri.

⁵ Ma na'i madoraa ana Noa, 'ia God 'a ai'a wana agoheta'iniraaui ro'u moi sae ta'a'i. 'A ha'ataariai ahe raha 'anai ngahu gata'iniraaui. 'E wera biu moi beia Noa naraugu tahi, 'inia 'ia Noa naasi na 'unua tanaraaui noni dorai awa odo-odo.

⁶ Mia God 'a suu ha'ata'aia ro'u i 'omaai Sodom mana 'omaai Gomora 'inia 'eu, 'e ha'ara 'inia ha'abasu tanaraaui nei ra ora-ora'a.

⁷⁻⁸ Ma ha'atahia Lot, 'e sae goro na arunga ta'aa 'ini'i here wawaasua'a narau haua i sae. 'Ado dangi 'a rongomaata'i 'inia ahutotou 'ini rongo'i mana re'i'i ana'i here ta'a'i narau haa'i sae na awa beiraaui.

⁹ Hoita naasi, mareho 'isi ra ha'ata'inia do'ia God 'a matai ha'atahiraui nei ra araisuria baani'i maho bwara nara siri suri'i. Ma matai ha'a-mama'airaui nei ra ora-ora'a tari dangi ni hihiri ma 'ari'a.

¹⁰ Na ha'a-mama'ai 'ai hih'i'a di'u tanaraaui nei ra haa'i hei'irisi ta'a'i anai abe hasi'o mana nei ra ai'a ha'ahouraaui na'otara adaa'i.

'Iraui ha'ausuri pwapwaari'i rau wetewete 'anai haa'i here ta'a'i, rau raba suri'i moi hei'irisidaa'i marau ai'a mama'uta'i ha'atee ha'a-ta'airaui nei hauasa na'i aro.

¹¹ Rei'uaa 'iraui enjel rau wetewete marau to'o mena di'uraui ha'ausuri pwapwaari'i 'isi, marau ai'a ha'atee ha'a-ta'airaui nei hauasa na'i maana Aaha God.

¹² 'Iraui ha'ausuri pwapwaari'i rau ha'atee ha'ata'ai'i maho narau ai'a aidangisi'i. Rau ai'a he'ete'i baani'i mwamwaa nara ai'a aidangi nara awasuria moi arunga. Ra huta mai 'ana moi daa'i mara ngahui'i'a. Miraui ha'ausuri ta'a'i 'isi, rai mae ro'u 'onaai'i mwamwaa 'isi 'oha 'ia God 'ai hiiriraaui 'anai ha'amaesiraaui.

¹³ 'Iniai haa'i adaa'i here nara ha'a-ta'airaui noni, 'ia God 'ai ha'ata'airaui o'asi ro'u. Rei'uaa na'i dangi, ma goro adaau moi haa'i here wawaasua'a mana ngangaura'a na'i maadaa'i noni. 'Oha rau boi 'anai ngaugoni bei'amou suri'i ngaungau mou haa'i, rau ha'apa'o 'inia rau awa moi 'anai pwari'i'amou. Ni awa adaau bei'amou 'e mareho na ha'a-ta'ai'amou mana mareho namou ga'i ninima 'inia.

¹⁴ Ni 'adoma'idaa'i ra honu 'ini wawaasua'a na'i 'oha ra wanasi'i urao mana here ta'a'i rau haa'i ra bwarai hako. Rau ha'a-bweubweu'araui ro'u i nei ra maemae'a i 'adoma'idaui dorai haa'i ro'u i here ta'a'i narau haa'i. 'Iraui ha'ausuri pwapwaari'i ra'i sae 'ada'i hairaurau. Ma'ata 'ia God 'ai ha'a-mama'airaui 'ini'i here rau hau'isi.

¹⁵ Rau teha baaniai tara odo-odo marau suriai tara ta'aa na suria Belam, gare ana Beo. 'Ia Belam 'a wa'ewa'e 'anai dauai ha'a 'anai hauai mareho na ai'a odo-odo.

¹⁶ Ma na'i 'ohasi, na dongki ana 'a ha'atee tanaa 'onaai inoni do'ai abui hauai here ta'aa na hauasi. Mia Belam 'a araisuria maagu ai'a hauai here bweubweu'a na raba haua ga'u.

¹⁷ 'Iraui ha'ausuri pwapwaari'i rau ai'a 'a'auhia tanei 'onaai hurahurai wai na mamata mana rorodo na ro'asia hairiu ro'a na bwa'i wai nai hura'a baania. 'Ia God 'a ha'aagauai dora na kuhi baabau tanaraui.

¹⁸ Rau ha'atee 'ege'ege'araui maagu mareho narau 'unu'i ra ai'a 'onaa moi'a ta maho. Rau 'unua tanaraui nei narau bura'i rihosi baaniraui ahurodo do rau matai suri'i moi hei'irisi ta'a'i anai abe. 'Iniai heresi, rau ha'a-bweubweu'araui 'anai haua aho'i ora-ora'a.

¹⁹ Rau durua do 'onaa 'e sae nai awasuri'i ha'ausuringa'i adaa'i, 'ai awa dadara'a. Ma'ata 'iraui haariraui ha'ausuri pwapwaari'i rau ai'a dadara'a,

'inia rau awa mau bahainai mena ni ora-ora'a nai ha'ata'airaau. 'A o'asi, suria 'i sae 'ai suria ma'ata i maho na marungia.

²⁰ Na'i 'oha rau nugasi'i here ta'a'i ni marewana 'iniaidangisia adaaau Jisas Kraest, na Araha mana Ha'atahi aga, maraugu aho'isi'i ro'u i here ta'a'i 'isi marau ha'awate'i 'anai marungiraau, na tahingadaa'i rai ta'aa di'u baaniai na'o.

²¹ Naasi 'a goro 'onaa rau ga'i bwa'i aidangisiai awaha na odo-odo. 'A o'asi, suria na'i 'oha rau aidangisiai awahasi, maraugu si'omuriai taha na 'ia God na 'unua tanaraau 'anai haua, ni ha'a-mama'ai 'ai raha di'u tanaraau.

²² Maho rau hauasi 'a ha'ata'inia do maho nara 'unu'i ha'atee 'ini ra ha'a-momori. "I misu na 'a'ana 'a ngaua aho'i ro'u i 'a'anana mana boo na mwa'anu wadiwadi'a 'a aho'i 'ari 'anai idu-idu na'i su'usu'u."

3

'Ia Araha 'Ai Aho'i Mau Mai

¹ Mwane sae goro agu'i, naani ruanai usu-usu agua tana'amou. Na'i usu-usu agu'i 'au bonasia domoi 'adoma'i aho'isi'i tara'i mareho narai 'a'auhi'amou 'anai to'ora'i mwane 'ado'ado goro suri'i 'adoma'imoo'i.

² 'Au 'irisia domoi 'adoma'i aho'isi'i tarau i maho rau maani'i Rarabea ana'ia God na'i 'oha bwani mana heiatenga'i ana'ia Araha, na Ha'atahi aga, narau maani'i Ha'ataari tana'amou.

³ 'A ororiu domoi aidangisia do gaarangiai madoraa na 'ia Kraest 'ai aho'i mai, ra'i sae rai suri'i moi hei'irisidaa'i nara ta'a'i marai haikou 'ini'amou.

⁴ Rai o'ani, "'Ia Araha 'a durua do'ai aho'i ro'u mau mai. Na'i hei na awa iei 'ohani? 'Iraau sae wari amee'i ra mae hako'a ma ai'a mareho nai he'ete'i, taraawa'ana mau mai pwa'ara na haai marewana."

⁵ Ma'ata 'a ai'a ha'a-momori do ai'a maho nai orisi, 'inia rau raba 'adoma'i kaku'aa moi do ahoasara mana ano 'a pwa'ara 'iniaidangisia ha'atee ana God. Na ano 'a pwa'ara na'i wai ma pwa'ara 'iniaidangisia wai.

⁶ Ma na'i muri na ano na awa na'i 'ohasi 'a ai'aa 'iniaidangisia ahe raha.

⁷ Mia God 'a bwane ha'ateenga'inia ro'u hura'a doni ahoasara mana ano nararu awa na'i 'ohanisi, rarui awa tari madoraa nai ha'a-ai'ararua 'iniaidangisia 'eu. Na'i 'ohasi 'ia God 'ai hiiriraau ma 'ai ha'a-ai'araau i nei ra ai'a araisuria.

⁸ 'E ta'i maho namoi abu kaku'aa sae goro agu'i. Na'i beia Araha God 'e ta'i merui harisi 'a 'onaa moi ta'i dangi, mana ta'i dangi 'a 'onaai ta'i merui harisi.

⁹ Naasi, 'ia God 'a ai'a poruporu'a 'anai ha'ato'oai duruduru ana 'anai ha'ataaria aho'i maia Kraest 'onaai 'adoma'inia ada tara'i sae. 'Iia 'a 'abenga'i mamasi'amou, 'inia 'a ai'a 'irisia do tanei 'ai siri na'i mae tarau, ma'ata 'a 'irisia do mwane inoni hako rai rihosi baani'i ora-ora'a adaa'i.

¹⁰ Dangina Araha 'ai boi 'onaai sae beriberi. Na'i dangisi ahoasara 'ai ai'aa beiai aoha na rongo raha 'onaai 'eu na nanara, mana mwani maho na'iei rai noro marai ta'a'i. I ano mana mwani maho na'iei rai anoro.*

¹¹ 'Onaa mwani maho hako rai ha'a-ai'a'i o'asi, 'e taha namou ga'i haa? Moi awa maea mamoi haa'i mareho na 'ia God nai wa'ewa'e 'ini'i

¹² na'i 'oha mou mamasiai aho'i mai ana. Gai bona neina dangisi 'ai to'o raurau. Na'i dangisi, na ahoasara 'ai noro mai ai'aa mana mwani maho na'iei rai dorohu 'iniaidangisia raorao.

¹³ Me 'igaau gau mamasiai ahoasara na haoru mana ano haoru na 'ia God na duruduru 'iniaidangisia tanagia, na 'iraau moi nei ra odo-odo narai awa iei.

* **3:10 I ano mana mwani maho na'iei rai anoro:** 'E nata here 'anai orisia 'a o'ani, "I ano mana mwani mareho na'iei rai noro" Ma 'e nata here ro'u 'a o'ani, "I ano mana mwani mareho na'iei rai sado'i."

¹⁴ Naasi mwani sae goro agu'i, 'inia mamasia amoou i dangisi, moi bonasiai awa ha'atau baaniai ora-ora'a neina 'ia God 'a bwa'i ha'ahuni'amou 'inia ta maho mamoi awa goro beia.

¹⁵⁻¹⁶ Moi abui kaku'aa do'ia Araha 'a 'abenga'i mamasi, 'inia 'a raba nuga madoraa tanaraau noni do neina rai rihosi marai tahi. 'Ia Pol, 'i do'oragaau nagau ta'ahia, na maani'i ro'u i mareho 'ini suri'i mwani usu-usu na haa'i. 'Oha na usu-usu tana'amou, 'a usu-usu beiai madoma na 'ia God na haua tanaa. Tara'i dora suri'i maho na maani'i 'a bwara dorai aidangisi'i. Tarana naasi na tara'i sae bweu nara maemae'a i hinihinidaa'i, rau maani hiosi'i mareho 'isi marau maani hiosi'i ro'u tara'i dora na'i Usu-usu Maea. Suriai haua adaau o'asi, 'ia God 'ai hiiri ha'a-mama'airaau.

¹⁷ Sae goro agu'i, mou aidangisia'a i here adaausi. Naasi, moi 'ome'ome goro. Mou gasigu hinihini'i ha'ausuringa'i pwapwaari'i adaa'i sae ta'a'i o'asi mamoi'gui su'a baaniai hinihinimoou na baabau.

¹⁸ Moi raha hanehane ara'a na'i gorohana mana aidangisia namou haa Araha Jisas Kraest, i Ha'atahi aga.

Gaa magai ha'aasaa tarau. Amen.

Na 'Etanai Usu-usu Ana St. Jon

Gere Mamaani 'Iniai Bukani

Ha'atora he'ua na bwara di'u tana'o 'anai ha'isuria? 'A 'ua? 'E 'oha nara ha'atora'o 'anai haua ta kae maho na rongo goro amu? Na'i 'etanai usu-usu ana Jon 'e kae maho na ororiu di'u nara ha'atoragaau 'anai haua. Ra ha'atoragaau 'anai ha'ata'inia hura'ai heita'ahi.

'Ia Jon 'a 'irisia do 'iraau 'adonai sae hinihini rai ha'ata'inia hura'ai heita'ahi ana Jisas tanaraau hakoi noni. Huunai 'ado'adona Jon naasi do 'iraau nei narau ta'ahia Jisas rai ta'ahiraau ro'u i haru nei. 'Onaa nara ai'a ta'ahiai nata nei 'a ha'ata'iniai dorau ai'a huunai ta'ahia ro'ua Jisas. Na ha'atora 'anai heita'ahi naasi 'a boi baania Jisas haraaria, mia haaria 'a ha'isuria 'onaai ha'atoragia ana. Tara'i herehere na'ia Jisas 'a ha'ata'inia hura'ai heita'ahi ana suri'i, ra 'unu'i hura'a na'i raronai usu-usu nisi.

'Ia Jon na usuai usu-usu naanisi 'ia ro'u mau i ta'i Jon na usuai Taroha Goro ana St. Jon, Ruanai Usu-usu ana Jon, Orunai Usu-usu ana Jon, beia ro'u i Buka Ha'ata'i. 'Ia Jon 'e ta'i 'ini'i rongoiusuri ana'ia Jisas me 'ia haraaria 'a 'iraraa goro do 'ia Jisas 'a ta'ahia.

'Oha na'oi 'oha'iniai 'etanai usu-usu ana Jon, 'oi wai'ado'ado surisuriai taha na'o matai haua 'anai ha'ata'iniai heita'ahi tanaai nata nei.

'Ia Jisas Naasi Ha'atee Ni Tahī

¹ Nau usu-usu tana'amou 'iniai Ha'atee ni Tahī. 'Iia 'a bwane awa maagu pwa'ara i marewana. 'Tameu meu rongoa'a i hadahada ana tana'ameu mameu wanara'i maa'a ro'u 'inia. Ha'amomori, meu re'ia'a mameu karohia ro'u i abena.

² Na nei na ha'ata'inia i huunai tahi, 'a ha'i noni. Meu re'ia mora'a mameu maaniai saesi tana'amou mameu ha'arangasia tana'amou dona saesi 'ai awa tarau. Taraawa'a mau mai, 'iia 'a bwane awa beia Amana. Ma na'i 'ohani 'ia Amana 'a ha'ata'inia'a mai tana'ameu.

³ Na maho nameu bwane re'i'i mameu rongo'i, naasi maho nameu 'unu ha'arangasi'i tana'amou neina moi hinihinia ro'u me 'igaau hako gaugui hagu goni beia Amaga mea Jisas Kraest i garena.

⁴ Ma naani 'au usu-usu 'abai'i mareho 'ini tana'amou mamoi hinihini goni bei'ameu magai honu 'iniai wa'ewa'e.

Gai Hagu Beia God

⁵ 'Ia God naasi marewa ma na'i beia ai'a ta kuhi.* Naasi mareho na 'ia Jisas 'a 'unua tana'ameu nameu ha'arangasia ro'u tana'amou.

⁶ 'Onaa 'igaau gau 'unua do gau hagu beia God, magaugu awa mau na'i kuhi, na mareho na gau 'unuasi 'a pwapwaari'i moi magau ai'a suri'i ha'atee ha'a-momori ana'i a God.

⁷ Me 'onaa gai awa na'i marewa 'onaaia God na awa na'i marewa, gai hagu goni goro. Mana 'abuna Jisas, naasi 'anai ha'a-wadiwadigaau baaniai ora-ora'a, 'inia 'iia naasi garena God.

⁸ 'Onaa gau 'unua do gau ai'a ra'i sae ta'a'i, gau pwari'igaau haarigaau. 'Onaa gau 'unua o'asi mana ha'a-momori ai'a awa beigaau.

⁹ Ma'ata, 'onaa gai ha'arangasi'i tanaa God i ora-ora'a agaa'i, 'iia 'ai 'adoma'i nugasi'i mai ha'a-wadiwadigaau baani'i ta'aa agaa'i hako. 'Ai haua

* **1:5 Ai'a ta kuhi:** 'A minimua do ai'a ta ta'i ora-ora'a nai awa beia God.

o'asi, 'inia 'ia God 'a mangudi suri'i duruduru ana'i ma haua tarau i maho nara odo-odo.

¹⁰ 'Onaa gau 'unua do gau ai'a ora-ora'a, 'a ha'ata'inia do gau 'adoma'inia do'ia God 'a pwapwaari'i magau ai'a hinihini'i ha'atee ana'i. 'Inia 'a bwane 'unua dona i noni hako ra to'o ora-ora'a.

2

Ta Kraest Na 'A'auhigaau

¹ Arai gare agu'i, 'au usuai usu-usuni tana'amou dona moi abui haa'i maho ra ta'a'i. Ma'ata 'onaa 'e nei 'inigaau 'ai hauai maho ta'aa, 'e sae na awa 'anai aba dingana mai 'a'uhia. 'Iia 'ai ha'angonia God 'anai 'adoma'i nugasia. Na saesi, 'ia Jisas Kraest, na nei na odo-odo na'i maana God.

² Mia moi a Kraest haaria na mae 'onaai ho'asi 'anai ha'a-ai'a'i ora-ora'a agaa'i. Ma ai'a do 'anai ora-ora'a agaa'i moi, me 'ada'i ro'u i ora-ora'a adaa'i mwani sae hako nai marewana.

³ 'Onaa gau suri'i maho na 'unu'i a God, ma naasi gaugui 'iraraa do gau aidangisia mora a God.

⁴ 'Onaa ta sae nai 'unua do'a aidangisia God maagu ai'a suri'i maho na 'unu'i, 'iia 'a pwari'i mana ha'a-momori 'a ai'a awa beia.

⁵ 'Onaa 'iatei sae nai araisuri'i ha'atee ana'ia God, 'iia 'a ta'ahia mora a God. Mana maho na ha'ata'inia do gau hagu beia God naanisi.

⁶ 'Onaa 'iatei sae nai 'unua do'a hagu beia God, 'iia 'ai awa suria ma'ata'a i barongana Jisas Kraest.

Na Ha'atora Haoru

⁷ Mwani sae goro agu'i, 'au ai'a usua ta ha'atora haoru tana'amou, me 'e ha'atora bwani moi namou bwane 'iraraa mau mai 'oha na mou taraawa'a suria Jisas Kraest. Na ha'atora bwanisi naasi hadahada namou bwane rongoa, dona gai ta'ahigaau hairiu.

⁸ Ma rei'uaa na gau bwane rongoa'a, 'a 'onaai ro'u moi i ha'atora haoru. 'Inia na heita'ahi na haua Kraest tanagaau, 'a ha'ata'inia tanagaau huunai herehere 'anai ta'ahiraau noni. Mana heita'ahi namou haua hairiu, 'a ha'ata'inia ro'u i haoru anai ha'atorasi. Ma na'i 'oha gau ta'ahigaau hairiu, na baronga nara ta'a'i ra taraawa'a ai'a'i mana baronga goro ana Kraest 'a ha'ata'i hura'a 'onaai marewa suri'i tahingagaa'i.

⁹ 'Onaa 'e sae na 'unua do'a awa na'i marewa ma awa ta'aa tanaai nata sae hinihini, na tahingana 'a awa mau na'i kuhu.

¹⁰ 'Onaa 'iatei sae nai ta'ahi'i sae hinihini, saesi 'a awa na'i marewa. Ma bwa'i ta mareho na'i tahingana 'ai ha'atehaa 'anai hauai ora-ora'a.

¹¹ Ma wai 'unua ro'u, 'onaa 'e nei nai awa ta'aa tanaai nata sae hinihini, 'iia 'a awa mau na'i kuhu. 'A kakui ahuna 'inia taha na goro mana taha na ta'aa. Ma ai'a 'iraraai taha na haua. 'A kakui ahuna 'inia na ta'aa 'a ha'akuhiai tahingana.

¹² 'Io, 'inau 'au usu-usu tana'amoui mwane gare, 'inia God 'a bwane 'adoma'i nugasi'i 'inomoo'i 'inia mae ana Jisas taragaau.

¹³ Nau usu-usu tana'amoui nei wari, 'inia mou aidangisia'a Kraest na bwane awa mau mai, maagu pwa'ara i marewana.

Nau usu-usu tana'amoui sae haoru, 'inia mou bwane ha'ahehoa'a Saetan. 'Au usu-usu tana'amoui mwane gare, 'inia mou bwane aidangisia'a i Ama.

¹⁴ 'Au usu-usu tana'amoui nei wari, 'inia mou aidangisia'a Kraest na bwane awa mau mai, maagu pwa'ara i marewana.

Nau usu-usu tana'amoui sae haoru, 'inia 'a wetewete i hinihinimoo, mana ha'atee ana God 'a awa tarau suri'i 'adoma'imoo'i, mi'amou mou bwane ha'ahehoa'a Saetan.

¹⁵ Hoita, wai 'unua tana'amou hako, moi abui ta'ahi'i maho ni marewana nara ta'a'i. 'Onaa 'o ta'ahi'i maho ni marewana, 'o ai'a ta'ahiai Ama.

¹⁶ Na baronga ta'a'i na'i marewana ra ai'a boi baania God, ra boi baaniraaui moi noni. Maho 'onaai haa'i maho 'anai ha'a-arungagoroai abe, naga 'ini'i maho na'o re'i'i, mana ha'aba'o 'ini'i toto'ora amu'i.

¹⁷ Ma'ata na mwani maho ta'a'i 'isi rai ai'a'i madoraa na marewana 'ai ai'aa. Mia tei sae nai suria i hei'irisina God 'ai tahi tarau.

Na Maerongana Kraest

¹⁸ Arai gare agu'i, na ha'ahakonai dangi 'a gaarangi'a. Na'i na'o meu 'unua tana'amou do gaarangiai ha'ahakonai dangi 'e sae ta'aa nai boi, 'iia naasi maerongana Kraest.* Ma na'i 'ohani, mou bwane 'iraraa do'a rago i maerongana Kraest nara bwane boi'a. 'A ha'ata'inia'a dona ha'ahakonai dangi 'a gaarangi mai boi'a.

¹⁹ 'Iraau sae 'isi, rau awa ga'u beigaau na'i ruruha ana Kraest. Ma na'i 'ohani rau nugasigaau ma rau hura'a. 'Iraausi rau ai'a huunai ruruha ana Kraest. 'Onaa rau huunai hinihini, rau ga'i awa mau beigaau. Ma naasi, gau 'iraraa do 'iraau rau ai'a huunai hinihinia Kraest.

²⁰ Mei tana'amoui huudi sae hinihini, 'ia Kraest 'a bwane haua'a tana'amoui Hi'ona Maea. Ma naasi mou 'irara'i hako i mareho nara ha'a-momori.

²¹ Nau usuai usu-usuni tana'amou, ai'a do mou ai'a 'irara'i maho nara ha'a-momori. Me 'au 'iraraa do mou bwane 'irara'i mamou 'iraraa ro'u dona pwari'i 'a bwa'i matai awa beiai ha'a-momori.

²² Wai 'unua tana'amou, 'ia mo'o na 'unua do 'ia Jisas ai'a naasi Ha'atahi, 'iia 'e sae pwapwaari'i mora ma'e maerongana Kraest. Mea mo'osi 'a 'itaa God mana Garena.

²³ 'Iatei na 'itaa'i Garena God, 'a 'itaa ro'u a God. Mia tei na ha'arangasia hura'a do 'a hinihiniai Garena God, Godi Ama 'a hagu ro'u beia.

²⁴ Moi hinihini moe'a i ha'ausuringa'i namou rongo'i na'i 'oha namou taraawa'a suria Kraest. 'Onaa moi haua o'asi, moi hagu goro tarau beia God mana Garena.

²⁵ Ma naasi gai dauai tahi tarau, 'onaai bwane durua ana God tanagaau.

²⁶ 'Inau 'au usuai usu-usuni tana'amou 'anai ha'abasu'amou 'iniraaui sae narau raba pwari'i'amou beiai ha'ausuringa'i pwapwaari'i 'inia'i Taroha Goro.

²⁷ Ma'ata 'ia Kraest 'a bwane haua'a tana'amoui Hi'ona Maea. Mana Hi'ona Maeasi 'a awa hatara'i bei'amou. Ma naasi ai'a ta'isada dona ta sae he'ete'i naigui haua ro'u tana'amou ta ha'ausuringa'i. 'Inia na Hi'ona Maea 'ai ha'ausuri'amou 'ini'i mwani maho hako. Mana mareho na Hi'ona Maea 'a ha'ausuri'amou 'inia, 'e maho mora, ai'a pwari'i. Naasi 'onaai 'unua ana Hi'ona Maea tana'amou, moi hagu tarau beia Kraest.

²⁸ Arai gare agu'i, moi hagu tarau beia Kraest neina na'i madoraa nai aho'i mai na'i marewanani, mou bwa'i maaa'u mamou bwa'i ninima 'anai 'ari wou beia.

²⁹ Mou 'iraraa dona barongana Kraest ra odo-odo hako. Ma naasi, 'i'amou mou ga'i 'iraraa ro'u dona sae na barongana ra odo-odo, 'iia 'e ta'i gare ana ro'u a God.

3

'Iraau Gare Ana'ia God

¹ Moisu wai'ado'ado suria mamoi 'omesiai heita'ahi ana God tanagaau. 'A 'unugaau 'ini'i gare ana'i! Ma ha'a-momori! Mara rago i sae nai

* **2:18 Maerongana Kraest:** Na'i ha'atee ni haka ra 'unua 'inia'i Antichrist.

marewanani narau ai'a aidangisia do 'igaau ra'i gare ana'i, suria rau ai'a aidangisia ro'u a God.

² Mwani sae goro agu'i, na'i 'ohani gau 'iraraa do 'igaau ra'i gare ana'i a God. Ma'ata gau ai'a 'iraraa goro mau 'e taha nagai 'onaaia na'i 'oha nai boi mau. Ni mareho nagau 'iraraa, dona 'oha 'ia Araha 'ai aho'i mai na'i marewanani, ma gaigui re'ia'a i huunai 'omehana, ma naasi gaigui 'onaaia.

³ Naasi 'adonai nei 'ini'amou namou hinihinia do i'oe 'oi 'onaaia Araha, 'oi awa odo-odo 'onaai awa odo-odo ana Kraest.

⁴ 'Onaa tanei nai ora-ora'a, 'a horosiai ha'atora ana God. 'Inia ni ora-ora'a, naasi horosiai ha'atora ana God.

⁵ Mou bwane aidangisia goro do 'ia Jisas Kraest 'a boi na'i marewana 'anai ruhasigia baani'i ora-ora'a agaa'i. Mamou 'iraraa dona 'iia 'agu ai'a haua ta ta'i ora-ora'a.

⁶ Ma naasi, 'a ha'ata'inia goro dona 'onaa 'e sae na hagu beia Kraest, 'ai abui awa moi 'anai ora-ora'a. Me 'onaa 'e sae nagu ora-ora'a tarau, 'a ha'ata'inia goro dona 'iia 'a ai'a aidangisia Kraest na'i tahingana.

⁷ Arai gare agu'i, moi 'ome'ome goro! Ra gasigu pwari'i'amou 'inia i maho na wai 'unu'ini. 'Iatei na haa'i maho ra odo-odo, 'iia 'a odo-odo na'i maana God 'onaaia Kraest na odo-odo.

⁸ Mia tei sae na ora-ora'a tarau 'a ha'ata'inia haaria dona 'iia 'a aba beia Saetan. 'Inia 'iia 'a ta'isada 'onaaia Saetan na ora-ora'a tarau taraawa'a mau mai na'i 'oha na marewana ai'a awa mau. Mia Jisas Kraest, garena God, 'a boi na'i marewanani 'anai ha'a-ai'ai mwani tatau'aro ta'a'i ana'ia Saetan.

⁹ 'Iatei sae na ha'i gare ana God, 'a ga'i bwa'i ora-ora'a tarau. 'Inia na barongana God, 'a awa beiai saesi. Magu bwa'i ora-ora'a tarau'a ro'u, tarana 'iia 'e gare ana God.

¹⁰ Ni maho 'anai ha'ata'iniai sae do'iia 'e gare ana God ma'ua gare ana Saetan naani. 'Onaa 'e sae na ai'a hauai maho na odo-odo ma ai'a ta'ahiraau sae hinihini, 'iia ai'a gare ana God.

Gai Ta'ahigaau Hairiu

¹¹ Taraawa'a mau mai 'oha mou bura'i suria Kraest tari mau 'ohani, 'ia God 'a 'unua do gai ta'ahigaau hairiu.

¹² Gai abu 'onaaia Kein na aba beia Saetan ma ngahu ha'amaesiai do'orana 'ia Ebol. 'Iniai ni 'uaana na 'ia Kein 'a ngahuiai do'orana? 'A o'ani. Na maho 'ia Kein na hau'i ra ta'a'i mea do'orana 'a hau'i maho nara odo-odo. Naasi 'ia Kein 'a taesu'a ma ngahuiai do'orana.

¹³ Ma naasi arai do'ora mana asigu'i, moi abui heimwaota'i 'oha na noni ta'a'i na'i marewana rai 'itamou. 'A ta'isada moi 'oha na'ia Kein na 'itaa do'orana 'ia Ebol.

¹⁴ 'Onaa gau ta'ahiraau sae hinihini, 'a ha'ata'inia do gau dadara'a baaniai heimarungi anai mae magau daua nagaau i tahi tarau. Mia tei na ai'a heita'ahi, 'iia 'a awa mau bahainai heimarungi anai mae.

¹⁵ 'Onaa 'i'amou sae hinihini mou 'utai'amou hairiu, mou 'onaai abe na ha'amaesiai nata sae. Magau bwane aidangisia dona 'e abe na ha'amaesiai nata sae, 'iia 'a ai'a daua nana mau i tahi tarau.

¹⁶ 'Oha 'ia Jisas 'a mae taragaau, 'a ha'ata'inia tanagaau herehere 'anai huunai ta'ahiraau mwani noni. Ma naasi 'igaau ro'u gau ga'i mwa'emwa'e ro'u 'anai mae taradaau sae hinihini.

¹⁷ 'A 'ua? 'Onaa 'e sae na to'o maho arari na ai'a raba 'a'auhiai sae na ha-ha'aroha'a. Mou 'adoma'inia dona heita'ahi ana God 'a awa beia?

¹⁸ Arai gare agu'i, 'igaau gai abui taraa 'u'unua moi do gau ta'ahiraau sae, ma gaugu ai'a 'a'auhiraau. Gai ha'ata'iniai huunai heita'ahi 'anai 'a'auhiraau.

¹⁹ 'Onaa gai huunai ta'ahiraau noni 'etea o'asi, magau 'iraraa do gau suriai huunai tara. Ma na'i 'oha gai ha'arahesi, na 'ado'adogaa'i rai arunga dadara'a.

²⁰ Ma rei'uaa ni 'ado'adogaa'i ra ha'ahunigaau do 'igaau ra'i sae ora-ora'a, gau 'iraraa doni 'ado'adona God ra di'u'i ro'u wou i 'ado'adogaa'i mia God 'a aidangisi'i mwani maho gau haa'i.

²¹ Naasi mwani sae goro agu'i, 'oha gau 'iraraa do gau wadiwadi baaniai ora-ora'a, gai abui magugu 'anai boi beia God na'i ha'arahesi.

²² Mia God 'ai haa'i tanagaau i mwani maho nagau ha'angonia 'ini'i, 'inia gau araisuri'i ha'atora ana'i magau hau'i maho na wa'ewa'e 'ini'i.

²³ Na maho 'ia God na 'unua tanagaau do gai haua nara 'ini. Do gai hinihinia Jisas Kraest i garena, magai ta'ahigaau hairiu 'onaai bwane 'unua ana Jisas tanagaau.

²⁴ 'Iatei sae na hauai taha na 'ia God na 'unua, 'iia 'a hagu beia God mea God 'a hagu ro'u beia. Mea God 'a haa tanagaau Hi'ona Maea 'anai ha'ata'inia do 'ia God 'a hagu tarau beigaau.

4

Herehere 'Anai 'Ome 'Irara'i

Sae Pwapwaari'i

¹ Mwani sae goro agu'i, 'a rago'a i ha'ausuri pwapwaari'i nara awa suri'i mwani dora. Naasi, moi abui hinihinia 'adonai nei na 'unua do'a to'oraa Hi'ona Maea beia. Ma'ata, moi wai'ado'ado goro ga'u suri'i taha na saesi na 'unu'i 'anai 'iraraa 'onaa 'a to'oraa mora i Hi'ona Maea beia ma'ua ai'a.

² Naani herehere 'anai aidangisia 'onaa 'e sae na huunai daua mora i ha'ausuringa'i ana baaniai Hi'ona Maea ma'ua ai'a. 'Iatei sae na 'unua do 'ia Jisas Kraest 'a ha'i noni, saesi 'a dauai ha'ausuringa'i ana baania God.

³ Me 'iatei sae na 'unua dona 'ia Jisas ai'a ha'i noni, saesi ai'a dauai ha'ausuringa'i ana baania God me baaniai maerongana Kraest. Mou bwane rongoa dona maerongana Kraest 'ai boi na'i marewana. Ma naasi 'a boi'a, ma bwane awa'a na'i 'ohani.

⁴ Mi'amou arai gare agu'i, 'i'amou ra'i noni ana'i a God. Mamou ha'aheho'i hako'a i ha'ausuri pwapwaari'i 'isi suria 'i'amou mou ai'a hinihiniraau. Mou haua o'asi 'inia na Hi'ona Maea 'iia bei'amou. Mana mena anai Hi'ona Maea 'a mena di'u'ai mena ana mo'o na marungiraau ahurodo na'i marewana.

⁵ 'Iraau ha'ausuri pwapwaari'i 'isi, rau ai'a aidangisia God marau ha'ausuriraau sae 'ini'i moi maho ta'a'i ni marewana. Naasi 'iraui saenai marewana nara ai'a aidangisia God, rau wa'ewa'e 'anai bahurongo'i ha'ausuringa'i adaa'i.

⁶ Mi'ameu Ha'ataari, meu ra'i noni ana'i a God. Ma naasi 'iraui sae narau aidangisia God, rau wa'ewa'e 'anai bahurongo'i ha'ausuringa'i amee'i. Me 'iatei sae na ai'a ta'i bei'i sae ana'i a God, 'a bwara 'anai bahurongo'i moe'a i ha'ausuringa'i amee'i. Naasi, baani'i maho 'isi, gau matai 'ome 'iraraa 'onaa 'e sae na maani'i mareho ha'a-momori nara boi baaniai Hi'ona Maea ma'ua 'a maani'i mareho nara pwari'i nara boi baania Saetan.

Na Heita'ahi 'A Boi Baania God

⁷ Mwani sae goro agu'i, 'igaau hako gai ta'ahigaau hairiu. 'Au 'unua o'asi tana'amou, 'inia na heita'ahi 'a boi baania God. Me 'iatei na ta'ahiraui sae, 'iiasi 'e gare ana God ma aidangisia God.

⁸ Mia tei na ai'a ta'ahiraui sae, 'a ai'a aidangisia God. 'Inia 'ia God 'a honu 'iniai heita'ahi.

⁹ Gau 'iraraa ha'agorohia do 'ia God 'a ta'ahigaau noni, 'inia tarana naasi 'a ha'ataaria mai gare otohoo ana 'ia Jisas Kraest na'i marewana neina gai matai dauai tahi tarau.

¹⁰ Na huunai herehere 'anai ta'ahiraau sae 'a boi baania God. Ai'a i here na do'igaau nagau haua tanaa God ma'e here na 'ia God na haua tanagaau. 'A ha'ataariai Garena 'anai mae 'inigaau 'onaai ho'asi 'anai ha'a-ai'a'i ora-ora'a agaa'i.

¹¹ Mwani sae goro agu'i, tarana 'ia God 'a ta'ahigaau o'asi, 'a goro do gai haua o'asi ro'u 'anai ta'ahigaau hairiu.

¹² Ai'a sae mau nai 'omesia God. Ma'ata, 'oha gau ta'ahigaau hairiu, 'ia God 'a hagu beigaau. Mana heita'ahi ana 'aigui ha'ata'i goro suri'i tahingagaa'i.

¹³ 'Ia God 'a banea tanagaau Hi'ona Maea ana, ma naasi gau aidangisia do 'igaau gau hagu beia God mia God 'a hagu ro'u beigaau.

¹⁴ 'Tameu meu re'iai Garena God mameu taroha'inia tanaraau sae do'ia God na ha'ataaria mai 'anai ruhasiraau noni baaniai ora-ora'a.

¹⁵ 'Iatei sae na ha'arangasia do'ia Jisas naasi Garena God, 'ia God 'a hagu beia, me 'iia 'a hagu ro'u beia God.

¹⁶ Ma naasi gau aidangisia do'ia God 'a ta'ahigaau magau hinihinia do 'a ha'a-momori.

'Ia God 'a honu 'inia heita'ahi. Ma naasi 'iatei sae na ta'ahia tarau a God beiraau noni 'etea, 'iiasi 'a hagu beia God mia God 'a hagu ro'u beia.

¹⁷ 'Oha gau hagu beia God, na heita'ahi ana 'ai ha'ata'i goro hura'a suri'i tahingagaa'i. Ma na'i dangi ni heihiri, gaugu bwa'i maaa'u'a. 'Inia na'i madoraa gau awa na'i marewana, gau awa suriai barongana Kraest.

¹⁸ 'Iatei na to'oraai huunai heita'ahi beia, 'a bwa'i maaa'u. 'Inia na huunai heita'ahi 'a ha'a-ai'aai maaa'u. Me 'iatei na ai'a to'oraai huunai heita'ahi beia, 'iia 'ai maaa'u. 'Inia 'ai maaa'usiai ha'a-mama'ai na 'ia God 'ai haa tanaa.

¹⁹ Gai ta'ahiraau noni, 'inia 'ia God na ta'ahigaau na'i na'o.

²⁰ 'Onaa 'iatei na 'unua do 'a ta'ahia God ma awa ta'aa tanaai nei na hinihini, 'iiasi 'a pwapwari'i. 'Inia 'a bwa'i ta'ahia mwada'u a God na ai'a re'ia mau, 'onaa 'a bwa'i ta'ahiai sae na re'ia!

²¹ 'Ia God 'a haua tanagaau ha'atorani 'anai suria, 'a o'ani, "'Iatei na ta'ahia God, 'ai ta'ahiraau ro'u i sae hinihini."

5

'Oi Hinihinia Jisas Ma'oi Ha'i Garena God

¹ 'Iraau atei rau hinihinia do'ia Jisas naasi Ha'atahi, 'iraau ra'i gare ana'i a God. Miraau atei rau ta'ahia Ama, rai ta'ahiraau ro'u i gare ana'i.

² 'Onaa gau ta'ahia God magau haa'i maho na 'unu'i tanagaau, naasi gaigu 'iraraa do gau ta'ahiraau ororiu i gare ana'i.

³ 'Onaa gau ta'ahia God, gai ha'isuri'i maho na 'unu'i mana maho na 'unu'i ra ai'a bwara 'anai suri'i,

⁴ 'inia 'igaau gau nugasi'i baronga ta'a'i ni marewana. Gau matai haua o'asi suria 'igaau ra'i gare ana'ia God magau hinihinia Jisas.

⁵ 'A 'ua? 'Iatei na matai nugasi'i baronga ta'a'i ni marewana? 'Iraau moi i nei ra hinihinia do'ia Jisas naasi Garena God.

⁶ Gau 'iraraa do 'ia Jisas Kraest naasi Garena God, 'inia 'iia 'a boi na'i marewana mea Jon 'a bwareomaeaa 'inia wai. Ma'ata 'a ai'a do'a bwareomaea moi, me 'a ahe ro'u i 'abuna 'oha na mae. Mana Hi'ona Maea 'a 'unua ro'u do 'ia Jisas naasi Garena God, mana Hi'ona Maea 'a ha'a-momori tarau.

⁷ Naasi gau re'ia 'e oru maho na ha'ata'iniai taha na ha'a-momori 'inia Jisas.

⁸ Na Hi'ona Maea, na bwareomaea ana Jisas 'iniai wai, mana 'abuna Jisas na ahe baaniai abena. Ni oru mahosi, ra ha'ata'inia moi tanagaau ta'i maho, do 'ia Jisas Kraest naasi Garena God.

⁹ Tara'i 'oha gau hinihini'i maho na 'iraaui moi noni rau maani'i. Ma'ata maho 'ia God na 'unu'i ra ororiu di'u ro'u wou. Ma naasi gau ga'i hinihini'i maho na 'ia God na 'unu'i 'iniai Garena, 'inia 'iia naasi God.

¹⁰ 'Onaa gau hinihiniai Garena God, 'a ha'ata'inia do gau hinihini'i maho na 'ia God na 'unu'i 'iniai Garena. Me 'onaa gau ai'a hinihini'i maho 'ia God na 'unu'i, 'a ha'ata'inia do gau 'adoma'inia do'ia God 'a pwari'i.

¹¹ Ma'e taha na 'ia God na 'unua? 'A 'unua do 'a bwane haua tanagaau tahi tarau. Mana Garena, naasi tara 'anai dauai tahi tarausi.

¹² Ma naasi, 'iatei na hagu beiai Garena, 'a to'oraa ro'u i tahi tarau. Me 'iatei na ai'a hagu beiai Garena, 'a ai'a daua mau i tahi tarau.

Ha'atee Ha'ahako

¹³ 'Au usu'i hako i mwani mareho na'i usu-usuni tana'amoui nei na mou hinihiniai garena God, neina moi 'iraraa ha'agorohia do mou to'oraa'a i tahi tarau.

¹⁴ Magau 'iraraa ha'agorohia ro'u do'ia God 'ai rongo'i ha'arahesi agaa'i, 'oha gau ha'angoni'i maho nara suriai hei'irisina.

¹⁵ Ma naasi 'inia gau 'iraraa do'a rongogaau, gau 'iraraa dona 'iia 'a watea'a tanagaau taha gau 'irisia.

¹⁶ 'Io, 'onaa mou re'iai sae hinihini na ahoda na'i ora-ora'a, mamou 'iraraa dona ora-ora'asi 'a bwa'i ha'asirihia na'i mae tarau, moi ha'arahesi 'a'auhia mea God 'ai ruhasia baaniai ora-ora'a ana. 'A he'ete'i baaniai sae na hauai ora-ora'a na matai ha'asirihia na'i mae tarau. 'Inia 'e ta'i ora-ora'a na awa na matai ha'asirihiai sae na'i dorasi. Mau ai'a 'unua do moi ha'arahesi 'a'auhia nei na hauai ora-ora'a o'asi.

¹⁷ Mwani maho ta'a'i na noni na haa'i, naasi ora-ora'a na'i maana God. Ma'ata ai'a do mwane ora-ora'a hako ra matai ha'asirihiai sae na'i mae tarau.

¹⁸ 'Igaau 'iraraa do 'iatei na ha'i garena God, 'a ai'a awa moi 'anai ora-ora'a. 'Inia Jisas Kraest 'a taatahi bwarasia mia Saetan 'a bwa'i ha'ata'aia.

¹⁹ Gau 'iraraa ro'u do 'igaau ra'i gare ana'i a God, ma'ata Saetan 'a marungiraau noni nara ai'a 'u'uria God.

²⁰ Gau 'iraraa ro'u dona Garena God 'a boi na'i marewana ma ha'a-aidangisigaau 'iniai huunai God. Ma gau hagu beiai huunai God, 'inia gau hagu ro'u beiai Garena, 'ia Jisas Kraest. 'Ia naasi huunai God me'iia na haa tanagaau tahi tarau.

²¹ Arai gare agu'i, moi abui ha'arahesi'i araaranunu.

Na Ruanai Usu-usu Ana St. Jon

Gere Mamaani 'Iniai Bukani

Na'i madoraa adaui Ha'ataari, 'iraui ha'ausuri ra matai hano baaniai nata 'omaa 'anai 'ari 'anai nata 'omaa. Mana inoni suri'i 'omaa ra matai ha'amaotoraau, ra matai hanganiraau mara matai ha'amaururaau. 'Iraui noni hinihini ra wa'ewa'e di'u 'ini'i sae ra boi baani'i dora he'ete'i 'anai ha'ausuriraau 'inia Jisas. Me tara'i nei nara 'unuraau haariraau dora'i ha'ausuri ra ai'a huudi ha'ausuri. 'Iraui ra'i sae nara 'agerosu nara ngau moi dora agau, ma na'i aba 'anai mono rau o'asi ro'u. Tara'i nei nara 'unuraau 'ini'i ha'ausuri rau ha'ausuriraui noni 'ini'i taha nara ai'a ha'a-momori 'inia Jisas.

'Iraui noni hinihini 'a kakui ahudaau 'ai he'uai ha'ata'inia narai haua i heita'ahi ana God tanaraui ha'ausuri pwapwaari'i o'asi. 'Ia Jon 'a 'unua na'i usu-usu ana do 'a ai'a goro do 'iraui noni hinihini rai 'a'uhiraui ha'ausuri pwapwaari'i 'isi. Ma ai'a goro ro'u do 'iraui ahurodo rai 'omesia do 'iraui noni hinihini rau 'a'uhiraui ha'ausuri nara haa'i mamaani nara ai'a odo-odo 'abaia Jisas. Naasi 'ia Jon 'a 'unua do 'anai 'a'uhiraui hako noni, 'a goro do rai abui 'a'uhiraui ha'ausuri pwapwaari'i.

'Anai ha'ata'iniai heita'ahi ana Jisas, tara'i 'oha 'a gere bwara. 'Oi 'oha'iniai ruanai usu-usu ana Jon ma'oi wai'ado'ado surisuria goro he'ua na'oi ha'ata'inia 'inia i huunai heita'ahi ana God.

¹ 'Inau na'otara 'anai heiso'i nau usua i usu-usuni tana'o i urao na 'ia God na 'ome sigihi'o, mau usua ro'u tanaraui gare amu'i.* Nau huunai ta'ahi'amou di'u. Ai'a do 'inau moi, me 'iraui ro'u i nei rau 'iraraai taha na ha'a-momori 'inia Kraest.

² Meu ta'ahi'amou suria 'igaau hako gau aidangisiai taha na ha'a-momori mana taha na ha'a-momori 'ai awa tarau beigaau.

³ Meu ha'arahesi mea God i Amaga mana Garena, 'ia Jisas Kraest, rarui ha'agorohigaau, ta'ahigaau, ma rarui ha'a-awahigaau goro, suria gau hinihiniai huunai ha'ausuringa'i magau ta'ahigaau hairiu.

Huunai Heita'ahi

⁴ 'Au kae wa'ewa'e di'u 'ini rongo'i agu'i mamaani 'ini'i tara'i gare amu'i do rau awa suriai huunai ha'ausuringa'i 'onaai ha'ausuringa'i ana God tanagia.

⁵ Mau ha'angoni'amou, gai ta'ahigaau hairiu! Na ha'atora nau usua tana'amousi, ai'a do'e ha'atora haoru ma'e ha'atora nagau bwane 'iraraa mau mai.

⁶ Mana 'ado'ado 'anai heita'ahi naasi, do gai araisuri'i ha'atora ana'i a God. Mau na'i 'oha namou taraawa'ai suria Kraest, 'ia God 'a bwane ha'atoragia do gai ta'ahigaau hairiu.

Ha'abasu 'Iniraui Ha'ausuri Pwapwaari'i

⁷ 'A rago'a i ha'ausuri pwapwaari'i ra hura'a na'i marewana. Rau 'unua do'ia Jisas ai'a ha'i noni. 'Iraui sae o'asi, ra awa moi 'anai pwari'i, miraaui ra'i maerongana Kraest.

⁸ Naasi moi 'omesuri'amou haari'amou baaniraui sae o'asi, rau gasi wai'amou baaniai huunai ha'ausuringa'i 'inia Kraest. Ma 'a gasi 'ari

* **1:1** 1:1 'Ia Jon 'a hauai usu-usuni tanaraui sae hinihini na'i ta'i 'omaa. 'A ai'a raba 'unua goro hura'a do 'a usu-usu tanaraui sae hinihini, ra gasi ngahuraui i maerongadaa'i. Na tarana naasi nagu 'unua 'iniai urao mana gare ana'i.

pwaranga i tau'aro raha amooou tanaa God. 'A ga'i goro di'u 'onaa 'i hinihini amooou 'ai 'ari daara'i, mia God 'aigui tahari'amou 'iniaia tau'aro goro amooou.

⁹ Wai 'unua tana'amou, 'iatei na a'oia wou i ha'ausuringa'i ana'i a Kraest suriaia 'adoma'ina moi, ma ai'a hinihini'i tarau i ha'ausuringa'i ana'i a Kraest, 'iiasi ai'a hagu beia God. Me 'iatei na hinihini'i tarau i ha'ausuringa'i ana'i a Kraest, 'iia 'a hagu beia God i Amaga mana Garena.

¹⁰ 'Onaa ta sae nai taha bei'amou 'anai ha'ausuri'amou, mana ha'ausuringa'i ana'i ra ai'a ta'isada bei'i ha'ausuringa'i ana'i a Kraest, moi abui ha'amaotoa ma'ua waia 'ari ruma amoo'i.

¹¹ 'Iatei nai ha'amaotoai sae o'asi, 'iia 'a aba beia ma tatau suri'i maho ta'a'i na haa'i.

Ha'atee Ha'ahako

¹² 'A rago di'u i maho nau raba maani'i tana'amou maugu ai'a raba maani'i na'i usu-usu. Na maho nau 'adoma'inia naasi do wai gaariri wou 'anai ada bei'amou magai mamaani neina gai wa'ewa'e goni.

¹³ 'Iraau gare ana'i do'oramu† 'ini na 'ia God na 'ome sigihiraaui ro'u, rau ha'ataaria wou i hadahada wa'ewa'e adaau tana'amou.

† **1:13 Gare ana'i do'oramui:** 'Ia Jon 'a hadanga'iniraaui sae hinihini nara awa na'i nata 'omaa. Wanasiai koment na'i tatara 'e ta'i.

Na Orunai Usu-usu Ana St. Jon

Gere Mamaani 'Iniai Bukani

Na'i Baebol 'a ha'ausurigia do 'a goro 'anai 'a'auhiraau noni hinihini narau 'irisi'ai hei'a'auhi, rei'uaa na 'iraau nei nagau ai'a 'irararaau. Ha'asiha na'i tahingamu na'o sadoiai madoraa 'anai 'a'auhia ma 'anai tau'aro tanaai noni hinihini na rabasiai hei'a'auhi?

'I usu-usuni 'ia Jon 'a usua tanaai ta'i geresae ana nara 'unua 'inia Gaeas. 'A haua 'anai ha'a-ta'eta'ea 'iniai kaeni tau'aro goro na haa na'i 'a'auhiraau na haa i haru nei. 'Ia Gaeas 'e sae ni heiso'i na awa ha'atau. Ma'ata na mamaani 'ini'i goro na haa na'i ha'amaoto, mana taguma'iniraau na hauai noni na'i ruma ana 'a taha beia Jon.

Suri'i 'oha na 'iraau ha'ausuri mana inoni narau hura'a 'anai taroha'iniai Taroha Goro, ma tara'i inoni hinihini ra taha na'i 'omaa na awa ieia Gaeas, 'iia 'ai bonasia doni sae 'isi rai to'o dorani mauru, goni bei'i tara'i mareho ro'u narau 'irisi'i. 'Ia Gaeas 'a aidangisia do 'oha na 'a'auhiraau o'asi noni narau 'aariha, 'iia 'a 'a'au 'anai ha'a-'arihia ro'u i Taroha Goro 'inia Jisas Kraest.

'Iraau atei na'o ga'i taguma'iniraau na'i 'oha narai ataha na'i 'omaa amua? 'Oha na'oi 'oha'iniai orunai usu-usu ana Jon 'oi 'adoma'i suri'i herehere he'ua na'oi haa 'anai 'a'auhiraau noni na'i heiso'i, 'iraau noni hinihini na'i 'omaa amua, mana'i gariai marewana hako.

¹ 'Inau i na'otara 'anai heiso'i nau hauai usu-usuni tana'o Gaeas, sae goro agua nau ta'ahi'o ha'a-momori.

² Sae goro agua, 'au ha'arahesi doni abemu 'ai tahi goro. 'Au 'iraraa doni tahingamu beia Kraest 'a goro, mau ha'arahesi doni mwani mareho hako rai hano goro o'asi ro'u tana'o.

³ 'Au wa'ewa'e di'u 'iniai rongoa agua beiraau tara'i do'oragaa'i beia Kraest narau ada mai, do i'oe 'o suria tarau i taha na ha'a-momori.

⁴ Ai'a ta wa'ewa'e ro'u nai di'u'ai wa'ewa'e nau to'oraa na'i 'oha nau rongoa do 'iraau nei nara 'onaai gare agu'i, rau awa suriai taha na ha'a-momori.

Tau'aro Goro Na Haua Gaeas

⁵ Sae goro agua Gaeas, 'a goro di'u i hei'a'auhi na'o hahaa'i 'oha na'o 'a'auhiraau do'oragaa'i beia Kraest narau hura'a 'anai taroha'iniai taroha goro, rei'uaa namou ai'a haimatai'i.

⁶ Ra'i nei 'iniraau nara boi bei'ameu, rau maania tana'ameu i heita'ahi amua tanaraau. 'Au wa'ewa'e di'u madoraa nau rongoa do'o haa'i tanaraau maho rau 'irisi'i na'i 'oha rau hano baani'amou. Mau rabasia do'oi haua o'asi moe'a, 'inia 'ia God 'a wa'ewa'e 'inia.

⁷ 'Irausi, ra hura'a 'anai hauai tau'aro ana Kraest, miraaui ai'a rabasi'i hei'a'auhi baaniraau sae ahurodo.

⁸ 'Igaau nei hinihini naasi gai 'a'auhiraau 'ini'i maho narau 'irisi'i, nei nagai tau'aro goni beiraau 'anai taroha'iniai taha na ha'a-momori tanaraau noni.

Sae Ta'aa 'Ia Daeotrepis

⁹ 'E usu-usu pwapwaku nau ha'ataaria ga'u wou tana'amoui sae hinihini na'i 'omaasi. Mea Daeotrepis ai'a raba araisuri'i maho nau usu'i 'isi. Suria 'a 'adoma'inia do 'iia'a naasi na'otara 'anai heiso'i.

¹⁰ Hoita, ma na'i madoraa nawai taha wou na'i 'omaa amoou, waigu maani'i hako tana'amoui maho 'ia Daeotrepis na hau'i. 'Iia 'a ha'atee ha'ata'aiu 'ini'i maho ra ai'a ha'a-momori. Mana maho na ta'aa di'u na haua, 'a ai'a raba 'a'auhiraau sae narau hano 'ari suri'i mwani dora 'anai heitaroha'i. Ma ha'a-bwarasiraau ro'u i nei narau raba 'a'auhiraau. Ma 'onaa rai 'a'auhiraau, 'a ai'a ha'awateraau 'anai ha'arahesi beiraau sae hinihini.

¹¹ Sae goro agua Gaeas, 'oi abui suri'i barongadaa'i sae ta'a'i, ma 'oi suriraau nei na barongadaa'i ra goro. 'Inia 'iatei na hau'i maho goro, 'iia 'e garena God. Me 'iatei na hau'i maho ta'a'i, 'iia 'a ai'a aidangisia God.

Sae Goro 'Ia Demitrias

¹² 'Iraau hako i noni hinihini, rau 'unua do'ia Demitrias 'e sae goro. 'Iia 'a awa suriai taha na ha'a-momori, naasi na ha'ata'inia 'inia do 'iia 'e sae goro. Minau 'unua ro'u tana'amou do 'iia 'e sae goro, mamou 'iraraa do maho nawai 'unua, 'a bwa'i pwari'i.

Ha'atee Ha'ahako

¹³ Ra rago mau i maho nau raba maani'i tana'o, maugu ai'a raba maani'i na'i usu-usu.

¹⁴ Na maho nau 'adoma'inia naasi, 'a bwa'i orema mawai gaariri wou 'anai 'omesi'o. Ma garai awa goni 'anai mamaani.

¹⁵ 'Iraau sae ni heiso'i 'ini, rau 'unu'i wa'ewa'e adaa'i tana'o ma'oi ha'atee wa'ewa'e ro'u tanaraau hako i sae ni heiso'i na'i 'omaasi.

'Io, 'au ha'arahesi do'ia God 'ai ha'a-awahi'o goro.

Na Usu-usu Ana Jiud

Gere Mamaani 'Iniai Bukani

'A ganu he'uai aidangisia na'o haa i taha na'o hinihinia? 'A 'ua? 'Onaa ta sae nai heitohetohe bei'o 'inia, 'o 'adoma'inia do 'o ga'i matai ura baabau na'i hinihinimu?

Na'i madoraa na 'ia Jiud 'a usuai usu-usu ana, 'a ragoi sae narau bwane ha'asirihi'i mai na'i heisoi ha'ausuringa'i 'abaia Kraest nara maani hiosi'i. 'Iraaui nei nara haa i heresi ra'i sae nara 'unua do 'iraaui ra'i sae ni heisoi maraugu ai'a raba hinihinia hako'i Taroha Goro. Rau hinihini'i moi dora narau rongo ha'agorohi'i maraugu bonasia do 'iraaui tara'i sae hinihini narai aba ro'u beiraaui na'i hinihinidaau na ai'a oodoodosi.

Rei'uaa na'i madoraanisi, ni marehosi 'a matai to'oto'o mau beigaau. 'Iraaui sae hinihini pwapwaari'i rai maani'i hura'ai mareho nara ai'a ha'amomori 'inia Jisas. Naasi 'a ororiu di'u do gai aidangisia goroi taha nagau hinihinia nei nagai matai ura wetewete bwarasiai mahosi.

'Oha na'oi 'oha'iniai Jiud 'oi wai'ado'ado surisuriai taha na ororiu 'inia 'anai aidangisia goroi taha na'o hinihini'i.

¹ 'Inaua Jiud, sae tatau'aro ana Jisas Kraest ma'e do'orana Jems nau hauai usu-usuni tana'amoui nei na 'ia God na 'ome sigihi'amou. 'Ia Godi Amaga 'a ta'ahi'amou mia Jisas Kraest 'a 'omesuri'amou.

² 'Au ha'arahesi mia God 'ai huunai ahu ta'ahi'amou, mai huunai ha'a-awa goroi'amou, mana goroi ana tana'amou 'a bwa'i hako.

Ha'ausuri Pwapwaari'i Ra Siri Mai

³ Tana'amoui sae goroi agu'i. Na'i na'o ga'u, 'inau 'au 'adoma'i wetewete 'anai usu-usu tana'amou 'abaiai tahinga haoru na 'igaau hako nagau daua. Ma naani 'au 'adoma'inia do 'e maho he'ete'i nawai usu-usu tana'amou 'inia. Na'i usu-usuni 'au raba ha'a-ta'u'u'amou domoi taatahi bwarasiai ha'ausuringa'i odo-odo na 'ia God na haua tanagia i noni ana'i. 'Ia God na hauai ha'ausuringa'isi tanagia inoni ana'i 'ana'a i mwane 'oha maagu bwa'i orisi'a.

⁴ 'Au ha'atee o'asi, suria ra'i sae narau ai'a 'adoma'i ha'ahoua God rau to'o sirimai na'i ruruha amouu mamou ai'a 'ome 'irararaau do ra'i sae pwapwaari'i. Rau hiosiai ha'ausuringa'i 'iniai heita'ahi ana God tanagia. Rau 'unua do 'ia God 'ai wa'ewa'e moi 'anai 'adoma'i nugasigaau rei'uaa nagai awa moi 'anai hauai wawaasua'a. Marau ai'a hinihinia do 'ia Jisas Kraest moi naasi ta'i bwauodo mana Araha agaau. Na'i 'oha bwani, ra usua na'i Usu-usu Maea i ha'a-mama'ai nai to'iraaui nei o'asi.

⁵ Rei'uaa mou bwane aidangisia, 'au rabasia domoi 'adoma'i aho'isiai taha na to'o tanaraau noni nai Israel. 'Ia Araha God 'a ha'atahiraaui baaniraau i Ijip. Ma'ata na'i muri 'agu buna ha'amaesiraau ro'u mau i nei narau ai'a hinihinia.

⁶ Mamoi 'adoma'i suriraau enjel narau hairaesii ani beia God. 'Ia God 'a nuga tanaraau i tau'aro 'anai haa. Ma 'ariwou ma tara'i nei rau 'ita'i tau'aro adaa'i, marau hano baaniai huunai 'omaa adausi. 'Ia God 'a ho'o ha'a-bwarasiraau na'i dora kuhi 'ini arihau na bwa'i 'ohai ta'aa 'anai awa 'isi totoriai dangi ni hihiri.

⁷ Mamoi 'adoma'i surisuriai rua 'omaai Sodom mana Gomora ma tara'i 'omaa ro'u gaarangiraru. 'Iraausi narau here to'obweubweu'a ro'u 'onaai'i enjel 'isi. Rau ai'a wawaasua'a moi beiai urao, marau hau'i ro'u here 'ini

abedaa'i nara ta'aa di'u ro'u wou beiai nata saemwane. Na ha'a-mama'ai adaau, naasi 'eu nagau 'iraraa na bwane suu gata'iniraaui ani. Gai 'iraraa do naasi 'e ha'ara 'anai ha'abasugia do 'irai nei narau haa'i mareho ta'ai o'asi, rai ha'a-mama'airaaui na'i 'eu na bwa'i matai kuru ta'oha.

⁸ 'Iraaui nei narau sirimai na'i ruruha amoousi 'anai pwari'i'amou, rau o'asi ro'u. Rau haa'i here wawaasua'a 'ini abedaa'i marau 'unua do rau suri'i moi taha narau mamauru'a'i. Rau ai'a raba awa na'i bahainai heimarungi ana God, marau ai'a mamaa'uta'i ha'atee ha'a-ta'airaaui nei hauasa na'i aro.

⁹ Rei'uaa 'ia Maekol, i na'ohadaaui enjel, ma ai'a ha'atee ha'ata'aia Saetan, ma'ata 'a o'ani 'inia, "Ia God nai raongi'o." Ni mareho naasi 'a to'o na'i 'oha na 'ia Maekol 'a heiraeraesi beia Saetan 'inia tei nai to'oraai abena Moses.

¹⁰ Hoita, 'iraaui ha'ausuri pwapwaari'i 'isi rau ha'atee ha'ata'aia namoi-wou ta maho narau ai'a aidangisia. 'Iraau rau here 'onaai mwamwaa nara ai'a wai'ado'ado surisuri'i maho. Ni mareho na abedaa'i ra 'irisi'i naasi mareho nara ta'ahia, ma nara 'isi ro'u i mareho na 'ia God 'ai hiiri ha'amaesiraaui 'ini'i.

¹¹ 'Ai ta'aa di'u tanaraau! Rau suriai herengana Kein na ngahu ha'amaesia Ebol, do'orana. Rau 'onaai rarabea nara 'unua 'inia Belam na awa moi 'anai ha'ateharaaui noni nai Israel suriai 'adoma'i ororiu ana 'inia ha'a. Rau 'onaia Kora na ura bwarasia God mia God 'ai hiiri ha'amaesiraaui 'onaai hiiri ha'amaesia ana Kora.*

¹² Suri'i madoraa namou boboi goni 'anai ngau 'onaai ruruhai sae hinihini, 'iraaui ha'ausuri pwapwaari'i 'isi rau ai'a ninima 'anai siriwou bei'amou. Rau ngau 'ome ta'aa 'inia rau 'adoma'iniraaui moi haraariraaui. 'Iraau rau matai ha'ata'ai'i hinihinimoo'i 'onaai mwaro na matai here ha'ata'aiai haka. Rau bwa'i 'a'auhia tanei 'onaai rorodo na ro'asia hairiu moi ro'a na ai'a haua moe'a ta rangi. Rau 'onaai'i hasi'ei nara ai'a matai hungu na'i madoraa nara ga'i hungu i hasi'ei, suria ra mae mara aihu ro'u.

¹³ 'Iraau rau ha'a-sirimaihi'i mwane maho ha'aninimai abe 'onaai'i huai naho nara ha'a-sirimaihi'i mwane agohu 'ome ta'ai. Rau 'onaai'i hee'u nara su'a baani'i dora nara ga'i awa suri'i. 'Iraau rai hano 'anai awa tarau na'i dora na kuhi baabau na 'ia God 'a ha'aagaua tanaraau.

¹⁴ 'Ia Inok, 'e ta'i 'iniraaui biunai ugui noni baaniai burungana Adam na bwane ha'atee agau ro'u o'ani 'iniraaui sae 'isi, "Ome, 'ia Araha 'ai boi beiai taringai merui enjel maea ana'i.

¹⁵ 'Iia 'ai boi 'anai hiiriraaui hakoi noni, ma 'ai ha'a-mama'airaaui nei narau ai'a ha'ahoua nara hau'i mareho ta'ai, goni beiraaui nei ora-ora'a narau ha'atee ha'ata'aia."

¹⁶ 'Iraau mwane 'isi ra'i sae moi 'ada'i mangurunguru mana hei'unu'unu. Rau ha'isuri'i moi maho ta'ai narau 'adoma'ini'i, marau awa moi 'anai ha'a-ta'eta'eraau. Rau ha'a-gorogororaaui noni do neina baaniraaui noni rai dauai taha 'anai goro adaau haariraaui.

'E Ha'abasu 'Anai Ura Baabau

¹⁷ Sae goro agu'i, 'i'amou moi 'adoma'ini'i tarau i taha 'iraaui na Ha'ataari ana'ia Araha aga Jisas Kraest narau bwani ha'atee agau mau mai 'ini'i.

¹⁸ Rau o'ani, "Suri'i dangi ha'ahako maigu tano ai'aa i marewanani, ra'i nei rai haikou 'ini'amou, miraaui rai ha'isuri'i moi 'adoma'idaa'i nara ai'a suriai hei'irisina God."

¹⁹ Hoita, neiraausi mwane narau ha'a-haihoa'amousi. 'Iraausi rau suria moi hei'irisi anai abe, mana Hi'ona Maea 'a ai'a awa beiraaui.

* 1:11 11 Nambas 16:1-35; 26:9-10

²⁰ Ma'ata tana'amoui sae goro agu'i, 'au raba ha'a-ta'u'u'amou. Moi ha'a-'o'ori'amou hairiu 'inia ha'ausuringa'i nagau daua baania God neina moi ura baabau. 'Oha namoi ha'arahesi, moi ha'awateai Hi'ona Maea maai na'otaramoou.

²¹ Na'i madoraanisi, 'oha namou mamasia Araha aga Jisas Kraest 'anai wai'amou na'i tahi tarau 'inia heita'ahi ana tana'amou, moi awa 'onaai sae na awa na'i bahainai heita'ahi ana God.

²² Moi ahu ta'ahira mamoi 'a'auhira i nei na heiruarua'a i 'adoma'ida 'ini'i taha nara hinihini'i.

²³ Moi 'a'auhiraau nei nara suriai tara 'anai 'eu marai suriai tara ni tahi. Mei tanaraau haru nei ra awa 'anai haa'i moi here ta'a'i, moi ha'ata'inia tanaraau heita'ahi, mamoi mamagugu ro'u. Mou gasigu ahoda ro'u suri'i ora-ora'a narau siri suri'i.

Mareho Ha'ahako

²⁴ Ha'a-aneanea God. 'Iia moi na matai 'omesuri ha'agorohi'amou baani'i mareho namou matai ahoda suri'i. 'Iia 'ai wai'amou ara'a beia mamoi re'iai rarahana ma bwa'i ta mareho nai sadoia 'anai ha'ahuni'amou 'inia, ma'ai haua tana'amou i wa'ewa'e na raha di'u.

²⁵ 'Iia moi naasi ta'i God. 'Iia na ha'atahigia 'inia Jisas Kraest i Araha aga. Taraawa'a mau mai tari 'ohani ma 'ari'a, 'iia na hauasa, 'iia na arari 'anai ha'aasaa, me 'iia na arari 'anai heimarungi beiai mena. Amen.

Buka Ha'ata'i

Gere Mamaani 'Iniai Bukani

'A 'ua? 'O aidangisiai he'ete'i hairiu anai ha'atee ha'agorohi mana ha'aneane? Gau ha'atee ha'agorohia Jisas 'iniai here na haua tanagia mana mareho goro na bane'i tanagia. Magau ha'a-aneanea Jisas 'inia 'ia naasi Garena God, magau ha'a-aneanea 'iniai barongana.

Ni Buka Ha'ata'i 'e buka na honu 'iniai ha'a-aneane. 'A ha'a-aidangisia goro 'inia tei naasia Jisas. 'A ha'a-aidangisia 'iniai 'omesia nagai haa Jisas na'i ha'ahakonai dangi.

'Ia Jisas 'a ha'ata'inia tanaa Jon 'i mwani mareho nara awa na'i bukani. 'A 'onaa do'a 'omesi'i na'i mauru'aa, ma'ata 'a ai'a do 'a mauru. 'Ia Jon 'a re'i'i tara'i mareho ha'abu'oahu ma ra'i ha'ara 'ini'i mareho narai to'o na'i 'oha nai boi mau. Taha na'ia Jon 'a 'omesi'i na'i 'ohasi ra bwara di'u 'anai 'unu ha'agorohi'i hura'a. Naasi 'iia 'a 'unu'i moi hura'ai taha nara 'ome ta'isada bei'i taha na 'omesi'i.

'Oi abui ha'imaania do'oi aidangisi'i hako moe'a i mwane mareho na'i Buka Ha'ata'i, 'inia 'ia Jon ma ai'a aidangisi'i hako ro'u! Ma'ata 'oi ha'imaania do ni taha na'ia Jon 'a ha'ata'inia hura'a tanagia, 'ai ha'ata'inia tana'o do 'ia Jisas na hauasa ma ahaaha baani'i mwani mareho hako.

'Oha na'oi 'oha'iniai Buka Ha'ata'i 'oi wai'ado'ado surisuri'i taha na'o matai ha'a-aneanea 'ini'i a Jisas.

¹ Naani taha 'ia God 'a ha'ata'inia tanaa Jisas Kraest 'anai ha'arangasia tanaraaui sae tatau'aro ana'i 'iniai taha na bwa'i orema maai to'o'a. Mia Kraest 'a ha'ataariai enjel tanaaua Jon i sae tatau'aro ana, 'anai ha'ata'inia tanaau.

² Minau 'au maani'i mwane maho nau re'i'i. Naia naasi ha'atee ana'ia God na 'ia Jisas Kraest na ha'ata'ini'i tanaau.

³ 'Ia God 'ai ha'agorohirai nei ra 'oha'inia hura'a i bukani tanaraaui sae ni heiso'i, mai ha'agorohirai nei ra rongoa mara ha'isuria. Na madoraa 'a raumwadu'a mana mareho nau usu'i na'i usu-usuni rai to'o'a.

Usu-usu Na Haa'i a Jon

Tanaraaui Saeni Heiso'i Na'i Eisia

⁴⁻⁵ 'Inaua Jon nau usu'i usu-usu 'ini tana'amou sae ni heiso'i na'i biu 'omaa na'i Provensi Eisia. Mau ha'arahesi mia God mea Jisas Kraest mana biu Hi'ona nara awa na'i maanai dora ni mwaeraha ana God rai goro 'ini'amou marai ha'a-awa goro'amou.* 'Ia God naasi na bwane awa mau mai, ma na'i ro'u mau 'ohani, mai awa ro'u mau na'i 'oha naigu boi. 'Ia Jisas Kraest 'a mangudi tarau 'anai taroha'ini'i ha'atee ana'ia God. Me 'iia naasi nei tahamora na suruta'e aho'i baaniai mae na bwa'i mae ro'u ta 'oha. 'Iia 'a marungi'i hakoi mwani mwaeraha ni marewana. 'A ta'ahigia ma ruhasigia baani'i ora-ora'a agaa'i 'iniai 'abuna.

⁶ Ma marungigia 'onaa'i mwaeraha, ma haugaau 'onaa'i Piriisi neina gai tau'aro tanaa God i Amana. Gau magai ha'a-aneanea magai ha'aasaa 'iniai mena ana tarau tarau. Amen.

⁷ 'Ado'adoa! 'Ia Jisas 'ai boi aho'i na'i hunganai rorodo. 'Iraau hakoi mwane sae rai 'omesia, rei'uaa 'iraau nei rau rubu'ia 'iniai oo'o rai 'omesia

* **1:4-5 Biu Hi'ona:** Na'i Baebol, i naba biu 'e naba hauasa. Naasi, 'iraau sae madoma nara aidangisiai Baebol ra 'adoma'inia do ai'a huunai biu Hi'ona. Me ra hadanga'inia moi ta'i Hi'ona Maea na hauasa.

ro'u. Miraau hakoi sae rai angi uru-uru na'i 'oha rai re'ia. Ni mahosi 'ai to'o o'asi. Amen.

⁸ 'Ia God aga na mena ma bwane awa mau mai, ma awa mau na'i 'ohani, mai awa ro'u mau na'i 'oha naigu boi, 'a o'ani, "Inau naasi Alfa mana Omega, na taraawa'a mana hahakodi mwani mareho."†

'Ia Jon 'A Re'ia Jisas Kraest

⁹ 'Inaua Jon 'e ta'i do'oramou beia Jisas Kraest. 'Igaau gau rongomaata'i suriai awa gau haa na'i bahainai heimarungi ana, ma'ata 'iia 'ai ha'a-wetewetegaau 'anai ura baabau. 'Inau ra gaasiau na'i gere marau Patmos suriai taroha'inia aguai ha'atee ana'ia God mana ha'ausuringa'i ana'ia Jisas.

¹⁰ 'E ta'i dangi sade na Hi'ona Maea 'a rabe beiau. Mau rongoa na'i murigu i ringe na rongo raha mana aohana 'a 'onaai ahuri.

¹¹ 'A o'ani, "Oi usu'i dio na'i buka i taha na'oi re'i'i. Ma'oi ha'ataari'i 'ari tanaraaui sae ni heisoi na'i Efesas, Smana, Pagamam, Taetaera, Sadis, Piladelfia mana Leodisia."

¹² 'Augu rihota'i aho'i do wai re'iai sae na ha'ateesi mau re'iai biu raita gol nara ura-ura.

¹³ Ma'e maho 'ome 'onaai sae na ura na'i 'ubutadi raita 'isi 'a 'ome 'onaaii Gare'i Inoni. 'A siri na'i to'oni tewa na dio tari ano. Mana bwana ra tau'arona 'iniai gol 'a garia na'i waiburuna.

¹⁴ Ni bwauna mana warihuna ra mamaahui 'onaai tagai 'abe, mana maana ra 'onaai ngarungarui 'eu.

¹⁵ Ni uwana ra 'ome 'onaai dorai bras na madoro 'iniai 'eu, mana ringena 'a rongo 'onaai aohanai wai na kae ahe.

¹⁶ Ma dauai biu hee'u na'i rima odona. Ma'e naihi na mwamwakaru hairiu na hura'a na'i ngoona. Ni hauraena tari auru na'i 'u'una 'a wadora'i 'onaai 'oha na rara wetewete i sina na'i atoa.

¹⁷ 'Oha nau re'ia, 'au topira'i ruru mau abwa auru dioi ano na'i maana 'onaai sae na mae. Mia dau mai beiau 'iniai rima odona ma o'ani, "Oi abu maaa'u! 'Inau naasi taraawa'a mana hahakonai mwani maho.

¹⁸ 'Au mae mau tahi aho'i ro'u, mau bwa'i mae'a ro'u ta 'oha. 'Inau naasi maanai bara 'anai mae, minau to'o mena ro'u 'ini'i aunga nara awa na'i dora adaa'i nei ra mae.

¹⁹ 'Oi usu'i dioi taha na'o re'i'i nara bwane to'o'a, mana taha na'o re'i'i nara to'o na'i 'ohani mana taha rai to'o ro'u mau ta'oha.

²⁰ Mawai mamaani ruhasia tana'o i 'ado'ado 'anai biu hee'u na'o re'i'i na'i rima odogu mana biu raita gol. Na biu hee'u, naasi biu enjel narau 'omesuriraui sae ni heisoi na'i biu 'omaa na'i Eisia, mana biu raita gol, naasi 'iraaui sae ni heisoi na'i biu 'omaasi."

2

Usu-usu Tanaraaui

Saeni Heisoi Na'i Efesas

¹ Mia mo'osi 'a o'ani 'iniau, "Nara 'ini taha na'oi usu'i tanaai enjel na 'omesuriraui sae ni heisoi na'i Efesas maai ha'a-aidangisiraui 'ini'i. 'Oi o'ani,

Baania mo'o na dauai biu hee'u na'i rima odona, ma hahano na'i 'uruhanai biu raita gol, moisu bahurongoai taha wai 'unua.

² 'Inau 'au aidangisi'i hakoi taha mou haa'i. 'Au aidangisiai tau'aro raha namou haa mana ura baabau namou haa suri'i mwani mareho bwara namou siri suri'i. 'Au aidangisia do mou ura bwarasi'i sae ra haa'i here

† **1:8 Alfa mana Omega:** Ni rua ha'ateesi naasi taraawa'anai leta mana leta ha'ahako na'i alfabet adaui Grik.

ta'a'i. Ma na'i 'oha tara'i sae ra haa'i here dorai 'unuraa'u 'inia do 'iraa'u ra'i ha'ataari agu'i, mou wana hegahegaraau mamougu 'iraraa do rau pwari'i moi.

³ Na'i madoraa mou siri suri'i mwani maho ra ha'abooboo abe 'inia suria'u amou, 'i'amou mou ai'a here nuga, mou ura baabau moi.

⁴ Ma'ata 'e ta'i maho namou haua na 'inau 'au ai'a wa'ewa'e 'inia! Na'i 'ohani mougu ai'a huunai ta'ahiau'a 'onaa na'i na'o.

⁵ Moi wai'ado'ado suriai he'ua i raha na hauai heita'ahi amou tanaau na'i na'o ani. Moi rihosi mamoi haa'i aho'i mwani here goro namou haa'i ga'u na'i na'o. 'Onaa mou bwa'i rihosi, me 'inau wai boi bei'amou mawai rahiai raita amou baaniai dora ana.

⁶ Ma'ata 'e ta'i maho namou haua nau wa'ewa'e 'inia. Mou 'ita'i mwane here ta'aa adaa'i ruruha nara suri'i ha'ausuringa'i pwapwari'i ana'i a Nikolas. 'Inau 'ita'i ro'u.

⁷ 'Onaa mou to'o karinga ma moi rongoai taha na Hi'ona Maea na 'unua tanaraau sae ni heiso'i. 'Iatei nai ura baabau tari hahakona 'ai ngauai huanai hasi'ei ni tahi na'i mou ana God."

Usu-usu Tanaraau

Saeni Heiso'i Na'i Smana

⁸ Mia mo'osi 'a o'ani ro'u 'inau. "Nara 'ini taha na'oi usu'i tanaai enjel na 'omesuriraau sae ni heiso'i na'i Smana maai ha'a-aidangisiraau 'ini'i. 'Oi o'ani,

Nara 'ini ha'atee agu'i. 'Inau naasi taraawa'anai mwani maho. Minau ro'u naasi hahakonai mwani maho. 'Inau 'au mae ga'u ma na'i 'ohani 'au tahi aho'i ro'u. Moisu rongoai taha wai maania.

⁹ 'Inau 'au aidangisiai rongomaata'i amou mana pohara amou. Ma'ata 'i'amou mou ai'a pohara ro'u. Mau aidangisia ro'u i hadahada ha'ata'ai'amou adaau Jiu. Rei'uaa narau 'unua do 'iraa'u ra'i Jiu, na'i 'ado'adogu 'iraa'u ai'a huunai Jiu, 'inia 'iraa'u 'e ruruha ana moia Saetan.

¹⁰ Naasi moi abui maaa'usi'i rongomaata'i namoi siri suri'i. 'Ia Saetan 'ai nuga'i tara'i abe 'ini'amou na'i rumaniho'o 'anai ohongi'amou mamoi rongomaata'i suria ta tangahurui dangi. Me 'onaa moi ura baabau na'i hinihinimou, rei'uaa moi mae, 'inau wai taharimou 'inia tahi tarau.

¹¹ 'Onaa mou to'o karinga mamoi rongoai taha na Hi'ona Maea 'a 'unua tanaraau sae ni heiso'i. 'Iatei nai ura baabau tari hahakona 'a bwa'i rongomaata'i na'i ruanai mae."*

Usu-usu Tanaraau

Saeni Heiso'i Na'i Pagamam

¹² Mia mo'o naasi 'a o'ani ro'u 'inau. "Nara 'ini taha na'oi usu'i tanaai enjel na 'omesuriraau sae ni heiso'i na'i Pagamam mai ha'a-aidangisiraau 'ini'i. 'Oi o'ani,

Nara 'ini ha'atee agu'i. 'Inaua mo'o nau to'oraai naihi na mwamwakaru hairiu! Moisu rongoai taha wai maania.

¹³ 'Au aidangisia do 'i'amou mou awa na'i 'omaa na 'ia Saetan 'a tau'aro wetewete na'iei. Rei'uaa na o'asi mi'amou mou ura baabau suriai hinihiniau amou. 'Au aidangisia ro'u i taha na to'o tanaa Antipas, i sae tatau'aro goro agua nara ngahu ha'amaesia 'inia taroha'inia ana na'i 'omaa amou na tau'aro ieia Saetan. Rei'uaa na o'asi, mi'amou ai'a agoheta'i hinihiniau.

* 2:11 2:11 Na'i Buka Ha'ata'i 20:14 ra hadanga'inia 'ado'ado 'anai ruanai mae.

14 Ma'ata tara'i maho 'au ai'a wa'ewa'e 'ini'amou 'ini'i. Mou ha'awate'i tara'i nei 'ini'amou 'anai suriai ha'ausuringa'i ana Belam.† Na'i 'oha bwani 'ia Belam 'a ha'ausuria Balak 'inia here nai haua 'anai ha'a-sirihiraau noni nai Israel na'i ora-ora'a. Mia Balak 'a ha'ausuriraaui 'anai ngaa'i mahoingau nara ho'asi 'ini'i tanaraau araaranunu, ma 'anai haa'i mwani here wawaasua'a.

15 'T'amou mou o'asi ro'u. Mou ha'awateraaui tara'i nei 'ini'amou 'anai suri'i mwane ha'ausuringa'i ta'a'i ana'i ruruha ana Nikolas.‡

16 Naasi moi rihosi! 'Onaa mou bwa'i, ma bwa'i orea ma wai boi hei'oi bei'i sae 'isi 'inia naihi na hura'a baaniai ngoogu.

17 'Onaa mou to'o karinga mamoi rongoai taha na Hi'ona Maea 'a 'unua tanaraau sae ni heisoi. 'Ira tei narai ura baabau tari hahakona, wai ha'angauraaui 'inia 'mana' na awa mau na'i dora bainihu§ mawai haa'i tanaraau tara'i hau mamaahui nara bwane usu'i ata haoru adaa'i suri'i. 'Abwa'i ta sae ro'u nai 'irara'i ata 'isi, 'iraaui moi nei rau to'ora'i hau narai 'irara'i."

Usu-usu Tanaraau

Saeni Heisoi Na'i Taetaera

18 Mia mo'osi 'a o'ani ro'u 'iniau. "Nara 'ini taha na'oi usu'i tanaai enjel na 'omesuriraaui sae ni heisoi na'i Taetaera maai ha'a-aidangisiraau 'ini'i. 'O'i o'ani,

'Inau garena God! Ni maagu ra 'onaai ngarungarui 'eu, mana uwagu'i ra wadowado 'onaai bras. Moisu bahurongoai taha wai maania.

19 'Au aidangisi'i hakoi mwani maho 'ini'amou, ni heita'ahi amou, ni hinihini amou, ni tau'aro namou haa tanaau, mana here mou haua namou ura baabau 'inia. 'Au aidangisia ro'u doni mwane mareho namou haa'i na'i 'ohani, ra goro di'u baaniai na'o.

20 Ma'ata 'e ta'i maho nau ai'a wa'ewa'e 'ini'amou 'inia. Naasia Jesibel, ni urao na 'unua haaria do 'iia 'e Rarabea magu ai'a, mi'amou ha'awatea 'anai ha'ausuri ma ha'ateharaau sae tatau'aro agu'i 'anai wawaasua'a mana ngaa'i mahoingau nara ho'asi'i tana'i araaranunu.

21 'Au nugaa tanaa i madoraa 'anai orisi ma ai'a raba agoheta'inia awa wawaasua'a na hauasi.

22 'Inau wai ha'a-rongomaata'ia Jesibel mawai ha'a-rongomaata'iraaui ro'u i nei ra wawaasua'a beia 'onaa narau bwa'i rihosi.

23 Wai ngahu gata'iniraaui ro'u i nei ra suriai ha'ausuringa'i ana. Ma naasi 'iraaui hakoi mwane sae ni heisoi raigu aidangisia do 'inau 'au 'irara'i hakoi 'adoma'idaa'i sae mana hei'irisidaa'i. Ni taharimou nawai haua 'ai 'ari moi suriai mareho namou haa'i.

24 Tara'i nei 'ini'amou na'i Taetaera mou ai'a suriai ha'ausuringa'i ta'aa ana Jesibel. Mou ai'a 'iraraa ro'u i taha 'iraaui nei ra suria Jesibel ra 'unua 'inia ha'ausuringa'i ana'ia Saetan nara bainihu. Naasi 'au bwa'i 'unua tana'amou ta maho bwara do moi suria.

25 'E ta'i maho moi nawai 'unua. Moi ura baabau na'i hinihinimou tari 'oha wai boi aho'i.

26 'Iraui nei ra ura baabau marau araisuriau tari hahakona, 'inau wai hauai mena tanaraui 'anai marungira hakoi burungai noni na'i marewana.

27-28 Mawai haua tanaraui mena na ta'isada beiai mena na haua tanaau i Amagu. Ni heimarungi adaaui 'ai wetewete di'u maai

† 2:14 2:14 Nambas 22:5, 7; 31:16; Diutronomi 23:4; Nambas 25:1-3 ‡ 2:15 **Ruruha ana Nikolas:** Wanasiai 2:6 § 2:17 **"Mana" na awa mau na'i dora bainihu:** 'Iraui Jiu ra 'adoma'inia do na'i gaarangia woui hahakonai dangi, rai sadoiai bakosi na awa iei mahoingau nara 'unua 'inia 'mana' na 'ia Rarabea Jeremaea na girua.

ha'amaemae'aai 'adoma'idaa'i burungai sae narau marungi'i. Rai here ha'ata'airaau 'onaai panikeni hau nara roho kasakasaa. Mawai haua tanaraau ro'u i hee'u ni dangi.

²⁹ 'Onaa mou to'o karinga mamoi rongoai taha na Hi'ona Maea 'a 'unua tanaraau sae ni heisoi."

3

Usu-usu Tanaraau

Saeni Heisoi Na'i Sadis

¹ Mia mo'osi 'a o'ani ro'u 'iniau. "Nara 'ini taha na'oi usu'i tanaai enjel na 'omesuriraau sae ni heisoi na'i Sadis mai ha'a-aidangisiraau 'ini'i. 'Oi o'ani,

Nara 'ini ha'atee agu'i. 'Inaua mo'o nau marungiai biu Hi'ona ana'ia God mana biu hee'u.* Moisu bahurongoai taha wai maania. 'Au aidangisiai taha namou haua. Mwane sae ra 'adoma'inia do 'i'amou ra'i sae hinihini namou dauai tahi tarau, me mou 'onaai sae na mae na bwarai araisuria God.

² Naasi moi rarai! Moi bonasia do moi ha'a-wetewetea aho'i hinihini-moo'i. Na'i 'ohani, na gere hinihini na mou to'oraa mau, 'a gaarangi mae ha'atai'a. 'Inia 'au sadoia doni barongamoo'i ra ai'a taraa odo-odo na'i maana God.

³ Moi 'adoma'i aho'isi'i ha'ausuringa'i nara haa'i tana'amou namou rongo'i. Moi dau'i baabau ha'ausuringa'i 'isi mamoi rihosi. 'Onaa mou bwa'i rarai minau wai boi na'i madoraa namou bwa'i 'iraraa 'onaai sae beriberi.

⁴ Tara'i nei 'ini'amou ra ai'a ha'ado'o'a'i tahingadaa'i 'ini ora-ora'a 'onaai sae na ha'ado'o'aa'i bwana ana 'ini mwagi. 'Iraausi wai ha'ato'oniraau 'ini'i to'oni mamaahui marai tatariori beiau na'i hourana agua, suria 'irrausi rau arari 'anai awa 'isi.

⁵ 'Irai nei ra ura baabau tari hahakona rai ho'osi'i bwana mamaahui. Minau bwa'i kai'i atadaa'i baaniai bukani tahi. 'Inau wai ha'arangasia tanaa Amagu miraaui enjel ana'i do 'irrausi ra'i rongoiusuri agu'i.

⁶ 'Onaa mou to'o karinga mamoi rongoai taha na Hi'ona Maea 'a 'unua tanaraau sae ni heisoi."

Usu-usu Tanaraau

Saeni Heisoi Na'i Piladelfia

⁷ Mia mo'osi 'a o'ani ro'u 'iniau. "Nara 'ini taha na'oi usu'i tanaai enjel na 'omesuriraau sae ni heisoi na'i Piladelfia maai ha'a-aidangisiraau 'ini'i. 'Oi o'ani,

'Inau nei nau maea mau ha'a-momori, 'au to'oraai kii ana Mwaeraha Deved minau nau to'oraai mena 'anai marungiai hourana ana God.† Na'i 'oha wai tahangiai maraaruma anai hourana ana God, 'a bwa'i sae naigu matai honosia, mana'i 'oha wai honosiai maraaruma, 'abwa'i ta sae naigui tahangia ro'u. Moisu rongoai mareho wai 'unuani.

⁸ 'Inau 'au aidangisi'i hakoi maho mou haa'i. Ruruha amou ai'a taraa wetewete di'u mamougu araisuri'i moi ha'ausuringa'i agu'i, mamou ai'a tohe hunia do 'i'amou ra'i rongoiusuri agu'i. Naasi 'a 'onaa do 'au tahangia tana'amou maraaruma na bwa'i ta sae ro'u nai matai honosia baani'amou.

* **3:1 Biu Hi'ona:** Wanasiai 1:4 † **3:7 Kii ana Mwaeraha Deved:** Wana na'i Aisaea 22:22. **Kii 'e nunu 'iniaai mena hauasa na to'oraa Deved na'i 'oha bwani. Na'i 'ohani, 'Ia Kraest na to'oraai kii ma'ua menasi 'anai marungiraau noni na'i marewana hako.**

⁹ Moisu re'iai here wai haua tanaai ruruha ana Saetan. Rau 'unua do 'irauu ra'i Jiu maraugu pwari'i. 'Inau wai ha'a-auruhirauu marai topira'i ruru tana'amou marai aidangisia do 'inau 'au ta'ahi'amou.

¹⁰ 'Iniai araisuria amouu i ha'atora agua tana'amou domoi ura baabau suri'i mwani mareho bwara, 'inau wai taatahi bwarasi'amou baaniai madoraani rongomaata'i raha nai ha'imaanirauu hakoi sae na'i marewana narai siri na'iei.

¹¹ 'Inau 'abwai'orea mawai boi'a aho'i. Naasi moi dau baabau na'i hinihini namou to'oraa, neina ra bwai'rahi'i didimaa ni mwaeraha narai taharimou 'ini'i.

¹² 'Iraau hakoi nei ra ura baabau tari hahakona, rai 'onaai auu na'i Ruma Maea ana God agua, 'inia rai awa 'isi tarau. Mawai usua na'i abedaa'i i atanai God agua mana atanai 'omaa maea, i Jerusalem haoru na 'ia God agua 'ai ha'ataaria dio baaniai aro. Mawai usua ro'u i ata haoru agua na'i abedaa'i.

¹³ 'Onaa mou to'o karinga mamoi rongoai taha na Hi'ona Maea 'a 'unua tanaraau sae ni heisoi."

Usu-usu Tanaraau

Saeni Heisoi Na'i Leodisia

¹⁴ Mia mo'osi 'a o'ani ro'u 'inau, "Nara 'ini taha na'oi usu'i tanaai enjel na 'omesurirauu sae ni heisoi na'i Leodisia maai ha'a-aidangisiraau 'ini'i. 'Oi o'ani,

Nara 'ini ha'atee agu'i. 'Inaua mo'o nara 'unua 'inia 'Amen.' 'Inau 'au mangudi 'anai taroha'ini'i ha'atee ana'ia God mana mwani maho nau 'unu'i ra ha'a-momori. 'Ia God 'a ha'atau'arou 'anai ha'apwa'ara'i mwane maho na'i marewana. Moisu bahurongoai taha wai 'unua.

¹⁵ 'Inau 'au aidangisi'i hakoi maho mou haa'i. Mou ai'a 'adoma'i wanusi 'inau ma mou ai'a 'adoma'i raorao 'inau ro'u. Mau rabasia do mou ga'i 'adoma'i wanusi ma'uasi mou ga'i 'adoma'i raorao.

¹⁶ Me suriai gere 'adoma'i raorao moi mau amouu, 'inau wai busura'ini'amou hura'a baaniai ngoogu.

¹⁷ Mou 'unua domou toto'ora, mamou to'ora'i hakoi mwani maho mou rabasi'i, mamougu ai'a aidangisiai ta'aa ha'atai amouu. 'A arari do 'irauu sae rai arunga ta'ahi'amou, 'inia mou pohara mamou wa'aroko mamou kuru.

¹⁸ Naasi moi boi beiau mamoi hori'i gol nara bwani ha'a-wadiwadi'i 'inia 'eu. 'Onaa moi haua o'asi, moi toto'ora ha'a-momori. Moi hori bwana mamaahui beiau ro'u mamoi ho'osi'i, neina moi abui wa'aroko ha'ananimai inoni o'asi! Mamoi hori merisini 'ada'i maamoo'i, neina moi wanawana goro aho'i.

¹⁹ 'Iraui nei nau ta'ahirauu 'au matai hadahada wetewete tanaraau na'i 'oha rau taritari'a mau matai ha'a-mama'airauu ro'u. Naasi moi 'adoma'i raorao 'inau mamoi rihosi baani'i ora-ora'a amoo'i.

²⁰ Moi bahurongo, 'inau 'au ura na'i maraaruma mau pwepwee. 'Iatei nai rongoai ringegu ma'ai tahangiai maraaruma, 'inau wai siri beia mawai ngau beia.

²¹ 'Ira tei ra ura baabau tari hahakona rai heinagu beiau na'i dora ni mwaeraha agua, 'onaai ura baabau agua mau heinagu beia Amagu na'i dora ni mwaeraha ana.

²² 'Onaa mou to'o karinga mamoi rongoai taha na Hi'ona Maea 'a 'unua tanaraau sae ni heisoi."

4

Ra Ha'arahesia God Na'i Aro

¹ Na'i murinai re'i'i agu'i mwani maho 'isi, 'augu 'ome mara tahangia'ai maraaruma na'i aro. Mana ringe nau rongoa ga'u ani na rongo 'onaai ahuri 'a o'ani 'iniau, "Ta'eha mai 'ini, mawai ha'ata'inia tana'o i taha naigu to'o ro'u."

² Na'i 'ohasi mana Hi'ona Maea 'a rabe beiau. Mau re'iai dora heheinagu anai mwaeraha, 'e sae na heinagu na'iei.

³ Ni saesi, 'a wadora'i 'onaai hau 'ome goro ra 'unua 'iniai Jespa mana Kanalian. Mana rau'aro na wadowado 'onaai hau ra 'unua 'iniai Emarol 'a awa garigariai dora heheinagu anai mwaeraha.

⁴ Mana rua tangahuru mana hai dora heheinagu ra awa garigariai dora heheinagu anai mwaeraha na awa na'i 'ubuta. Ni rua tangahuru mana hai dora heheinagu 'isi, ra'i saemaua nara heinagu suri'i. Ra ho'osi'i bwana mamaahui marau nuga'i suri'i bwaudaa'i didimaa ni mwaeraha nara tau'arodi 'iniai gol.

⁵ Ma na'i dora heheinagu anai mwaeraha na'i 'ubuta 'a hura'a mai ei mararea mana hita. Ma 'e biu raita ngarungaru nara awa na'i maanai dorasi. Nara 'isi biu Hi'ona ana'ia God.*

⁶ Mana'i ro'u i maanai dorasi 'e mareho na 'ome 'onaaiasi na ma'inora goro ma wadora'i goro 'onaai gilaasi na awaiei.

Ma na'i garigariai dora heheinagu anai mwaeraha 'e hai kae maho tahitahi na abedaa'i hako ra honura'i maa.

⁷ 'E nei ma'e 'omehana. Maho tahitahi tahamora 'a 'ome 'onaai laeon. Nei haisuri 'a 'ome 'onaai kau mwane. Orunai nei, ni hauraena tari auru na'i 'u'una 'a 'onaai sae, mana haina 'a 'ome 'onaai hada na roho.

⁸ 'Iraui hai marehosi rau 'ado ono gahogaho mana abedi ra honura'i maa tari auru suri'i bahaidi gahogahodi. 'Ado rodo mana dangi rau ganariai "Maea, Maea, Maea, Araha God 'o mena.

'O bwane awa mau mai ma na'i 'ohani mei ta'oha nai boi mau ro'u."

⁹ Mana hai maho tahitahisi rau matai ha'aasaa marau ha'ahoua marau ha'atee ha'agorohia mo'o na awa tarau na heinagu na'i dora heheinagu anai mwaeraha.

¹⁰ 'Ado 'oha narau ha'arahesia mo'osi, na rua tangahuru mana hai saemaua rau topira'i ruru tanaa marau ha'arahesia. Rau nuga'i didimaa ni mwaeraha adaa'i na'i maanai dora heheinagu anai mwaeraha marau o'ani,

¹¹ "Toe naasi God mana Araha ameeu,

I'oe 'a arari dorai ha'aasa'o marai ha'ahou'o 'iniai mena amua.

'Inia i'oe 'o ha'apwa'ara'i ma'o ha'atahi'i mwani maho na'i marewana suriai hei'irisimu."

5

Na Buka Mana Siip

¹ Mia mo'o na heinagu na'i hunganai dora heheinagu anai mwaeraha 'a dauai buka 'iniai rima odona na 'onaai rorokui pepa nara usu-usu na'i rua aba hairiu. Ni bukasi ra bwani honosia, mana bukasi 'e biu dora 'anai ha'ababaua na awa iei.*

² Mau re'iai enjel na mena na ha'atee raha o'ani, "Iatei na arari 'anai rahiai biu dora 'anai ha'ababauasi maai tahangiai buka?"

* **4:5 Biu Hi'ona ana'ia God:** Wanasia koment na'i 1:4 * **5:1 Biu dora 'anai ha'ababauai buka:** Ni herehere nara haua, ra suungiai rumu ii'a (candle) mara ha'auduhia na'i hunganai buka 'anai ha'ahasigonia.

³ Me 'a bwa'i sae na'i aro mana'i marewana mana'i dora adaui nei nara mae'a nai matai tahangia mwada'u i buka 'anai wana na'i raron.

⁴ Mau angi uru-uru, 'inia 'a bwarai sadoia ta sae nai arari 'anai kehasiai bukasi 'anai wana na'i raron.

⁵ Ma'e ta'i 'iniraui rua tangahuru mana hai saemaua 'isi 'a o'ani 'iniau, "O'i abu angi! 'Oisu 'ome. 'Ia Jisas nara 'unua 'iniai Laeon na huta na'i burungana Jiuda mea Deved, 'a bwani ha'ahehoa Saetan. 'Iia nai matai rahiai biu dora ra ha'ababaua na'i bukasi maai matai kehasia."

⁶ Mau re'iai Gare'i Siip na ura na'i na'onai dora heheinagu anai mwaeraha, miraui saemaua mana hai maho tahitahisi rau awa garigaria. Na Gare'i Siip naasi 'a 'ome 'onaa dora ngahu ha'amaesia ga'u. 'A to'oraai biu rangorango mana biu maa. Na'isi biu Hi'ona ana'ia God na ha'ataari'i hura'a 'ari suriai marewana.

⁷ Mana Gare'i Siip 'a 'ari wou ma rahiai buka baaniai rima odona mo'o na heinagu na'i dora heheinagu anai mwaeraha.

⁸ 'Oha na rahia hako i bukasi, 'iraui hai maho tahitahi ani mana rua tangahuru mana hai saemaua rau topira'i ruru bwarasia. Rau 'ado gitaa mana rabo'o gol nara honu 'ini'i insens. Ni insens 'isi 'e nunu 'ini'i ha'arahesi adaa'i sae ana'ia God.

⁹ Ma rau suru'iai gana haoru o'ani,

"Toe na'o arari 'anai rahiai buka

mana rahiai biu dora nara ha'ababaua 'inia.

'Inia i'oe nara ngahu ha'amaesi'o mana 'abumu na'o horiraau 'iniai sae na'i marewana tanaa God,

sae suri 'ado burunga mana 'ado ha'atee mana 'ado marau.

¹⁰ 'O marungiraau 'onaai mwaeraha ma'o ha'a-piriisiraau neina rai tau'aro tana'o.

Ma ta dangi raigu marungiraui sae na'i marewana."

¹¹ 'Augu wanawana ro'u wou mau rongoai ringenai kae ruruhai enjel. 'A bwarai uduma'i tarihadi 'iniai rago di'u adaui. Ma rau awa garigariraui saemaua mana hai maho tahitahisi mana dora heheinagu anai mwaeraha.

¹² Rau ganagana raha o'ani,

"Na Gare'i Siip nara ngahu ha'amaesia ga'u, 'a arari dogai ha'aasaa,

'inia 'iia 'a mena ma toto'ora ma wetewete ma madoma.

Gai ha'ahoua magai ha'aasaa

magai ha'atee ha'agorohiai atana."

¹³ Mau rongoai 'ado ngarutadi mareho na ha'apwa'ara'i a God na'i aro mana'i marewana mana'i dora adaa'i nei ra mae'a ma na'i asi rau o'ani,

"Gau magai ha'atee ha'agorohia tarau i Gare'i Siip

mea mo'o na heinagu na'i dora anai mwaeraha,

magai ha'aasarua magai ha'ahourarua 'inia 'irarua raru mena."

¹⁴ Mana hai maho tahitahisi narau awa garigariai dora heheinagu anai mwaeraha rau o'ani, "Amen." Miraui saemaua raugu topira'i ruru marau ha'arahesirarua.

6

Gare'i Siip 'A Tahangiai Buka

¹ Mana Gare'i Siip 'a rahiai dora tahamora nara ha'ababaua 'inia i buka. Mau rongoai ringenai ta'i 'iniraui hai mareho tahitahisi, 'a rongo 'onaai kae huai hita na maguru. 'A o'ani, "Hura'a mai!"

² Mau re'iai hoosi mamaahui, mana nei na heinagu na'i hungana 'a daai ba'e. Ra nugaai didimaa ni mwaeraha na'i bwauna ma ta'e hura'a 'onaai sae hehei'oi na ha'aagau 'anai hura'a wini'i tara'i hei'oi.

³ Mana Gare'i Siip 'a rahiai ruana'i dora 'anai ha'ababauai buka. Mau rongoai ruana'i mareho tahitahi 'a o'ani, "Hura'a mai!"

⁴ Ma hura'a mai ta'i hoosi ro'u na wangawanga. Na nei na heinagu na'i hungana 'a daai naihi na mwamwaku' hairiu ma to'oraai mena 'anai ha'a-haingahuiraaui sae na'i marewana 'anai ngahu ha'amaesiraaui hairiu.

⁵ Mana Gare'i Siip 'a rahiai orunai dora 'ana ha'ababauai buka, mau rongoai orunai mareho tahitahi 'a o'ani, "Hura'a mai!" Ma hura'a mai hoosi buruburu'a. Na sae na ta'e na'i hungana, 'a daa i maho 'anai toho ha'ata'isada'i hihi'a adaa'i mareho.

⁶ Mau rongoai ha'atee na hura'a mai na'i 'uruhanai hai mareho tahitahisi 'a o'ani, "Oi hano ma'oi ha'ata'ai'i mahoingau na'i marewana neina ni horihori 'anai ta'i dangi bubu 'ai araria moi ta'i gere rabo'oi flaoa, ma 'onaa flaoa 'a ai'a taraa goro, ma'ai araria moi ta oru gere rabo'o. Ma'ata 'oi abu hereta'ai'i hasi'ei ngaungau 'onaa'i 'oliv mana grep."

⁷ Mana Gare'i Siip 'a rahiai hainai dora 'anai ha'ababauai buka. Mau rongoai ringenai hainai mareho tahitahi na o'ani, "Hura'a mai!"

⁸ Mau re'iai hoosi na kala ana 'a 'ome 'onaa'i rawai hasi'ei na gora, na 'ome 'onaa do 'e maho na bwani mae'a. 'Ia mo'o na ta'e na'i hungana ra ha'a-atania 'inia'i "Mae." Mana nata nei na haisuri ra 'unua 'inia'i "Dora adaaui nei ra mae." 'Ia God 'a hua tanararuai mena 'anai ha'amaesia'i kae ruruhai sae na'i 'ado dora na'i marewana.* Rarui matai ha'amaesiraaui na'i 'oha rarui ha'ataari'i mwamwaa wasi 'anai ngauraaui mararui ha'ato'o'i kae heingahui, mana hioro raha, mana daoha ta'a'i.

⁹ Mana Gare'i Siip 'a rahiai rima'ni dora 'anai ha'ababauai buka. Mau re'i'i aungadi mwani sae ra mae'a ra awa na'i maana'i dora ni ho'asi. Nara 'isi aungadi sae nara ngahui'i 'inia'i hinihinia adaaui mana taroha'inia adaaui ha'atee ana God.

¹⁰ Miraau'i aunga rau ha'atee raha o'ani, "Araha God, i'oe 'o mena di'u. 'O maea ma'o ha'a-momori. Na'i ngaita na'oi hiiriraaui ma'oi ha'a-mama'airaaui nei na'i marewana nara ha'amaesi'ameu?"

¹¹ Mara ha'a 'ado to'oni tewa mamahuiraaui mia Araha 'a o'ani 'iniraaui, "Moi mamasi ga'u tari 'oha narai ha'amaesiraaui ro'u i sae hinihini ra awa mau na'i marewana nara tau'aro ro'u tanaa God."

¹² Mana 'oha na Gare'i Siip 'a rahiai ononai dora 'anai ha'ababauai buka 'e nunu raha na to'o. Ni sina 'a buruburu'a 'onaa'i bwana buruburu'a mana hura 'a rara wangawanga 'onaa'i abu.

¹³ Ni hee'u ra ahoda dioi marewana 'onaa'i huai hasi'ei fig nara ahoda 'oha na nunusi'i dioi ro'a raha.

¹⁴ Mana ahoasara 'a heihoa ma sara 'onaa'i hi'o ra rokurokua. Ni hungahunga mana marau ra sara baani'i dora adaa'i.

¹⁵ 'Iraau'i mwaeraha ni marewana mana na'otara, miraau'i na'otara adaa'i hehei'oi, miraau'i nei toto'ora, miraau'i nei to'o mena, miraau'i slev, miraau'i nei nara ai'a slev, rau bainihu suri'i wabwa marau ohi suri'i hau suri'i hungahunga.

¹⁶ Rau awara tanara i hungahunga mana hau o'ani, "Moi kukuhai'ameu mamei bainihu baania mo'o na heinagu na'i dora heheinagu anai mwaeraha, mana taesu'a na haa i Gare'i Siip.

¹⁷ 'Iniai madoraa adarua 'anai ha'a-mama'ai'ameu naani'a. 'Iatei nai matai wetewete 'anai ura bwarasia?"

7

E Ta'i 'Arangi Hai Tangahuru Mana

* 6:8 6:8 Na'i ha'ateeni Grik ra 'unua do ta'i kota (1/4) 'iniraaui sae rai mae.

Hai Merui Saeni Israel Ra Ha'araraau

¹ Na'i muri ro'u 'au re'iai hai enjel rau ura suri'i hai di'unai marewana. Rau dau bwarasiai hai mamaai ro'a 'anai abu aruwaisiai ano mana asi mana hasi'ei.

² Rau to'oraa ro'u i mena 'anai here ha'ata'aiai ano mana asi. Mau re'ia ro'u ta'i enjel na boi baaniai dora na ara'a iei sina, 'a ha'aagau 'anai ha'araraau noni 'inia ha'ara ana God na tahitahi. Ma ha'atee raha tanaraau hai enjel o'ani,

³ "Moi abu ga'u here ha'ata'aiai ano, miraaui hasi'ei mana asi! 'Ai tari madoraa nagai nugaai ha'ara ana God na'i hauraedi sae tatau'aro ana'i."

⁴ Mau rongoai siha sae rai to'orai ha'ara na'i hauraedi. 'E ta'i 'arangi hai tangahuru mana hai meru baaniai burungadaa'i Israel.

⁵ 'E ta'i tangahuru mana rua meru baaniai burungana Jiuda,

'e ta'i tangahuru mana rua meru baaniai burungana Ruben,

'e ta'i tangahuru mana rua meru baaniai burungana Gad,

⁶ 'e ta'i tangahuru mana rua meru baaniai burungana 'Asa,

'e ta'i tangahuru mana rua meru baaniai burungana Naftali,

'e ta'i tangahuru mana rua meru baaniai burungana Manase,

⁷ 'e ta'i tangahuru mana rua meru baaniai burungana Simion,

'e ta'i tangahuru mana rua meru baaniai burungana Livae,

'e ta'i tangahuru mana rua meru baaniai burungana Isaka,

⁸ 'e ta'i tangahuru mana rua meru baaniai burungana Sebiulan,

'e ta'i tangahuru mana rua meru baaniai burungana Josep

ma'e ta'i tangahuru mana rua meru baaniai burungana Benjamin.

Sae Baani'i 'Ado Marau

⁹ Na'i muri mau re'i'i mwani sae rago nau bwa'i matai uduma'i tarihadi. Mwani sae abe 'ome he'ete'i hairiu baani'i 'ado burunga mana 'ado marau mana 'ado ha'atee hehe'ete'i na'i marewana. Ra ura na'i na'onai dora heheinagu anai mwaeraha ma ro'u na'i maanai Gare'i Siip. Ra siri suri'i to'oni tewa mamaahui mara dau'i hahaa' niu.

¹⁰ Ra ha'atee raha o'ani, "Ia God aga na heinagu na'i hunganai dora heheinagu anai mwaeraha mana Gare'i Siip, raru to'orai mena 'anai ha'atahigia."

¹¹ Miraaui enjel ra ura garigariai dora heheinagu anai mwaeraha miraaui ro'u i saemaua mana hai maho tahitahi ani rau topira'i ruru marau mwaoro dio na'i ano na'i na'onai dora heheinagu anai mwaeraha marau ha'arahesia God o'ani,

¹² "Ha'amomori, i'oe God ameeu,
meu ha'a-aneane'o mameu ha'aasaai atamu.

Meu ha'atee ha'agorohi'o mameu ha'ahou'o

'inia i'oe 'o madoma, ma'o mena ma'o wetewete tarau na bwa'i hako'a ta'oha! Amen."

¹³ Ma'e ta'i 'iniraui saemaua 'a songa'iniau o'ani, "Ira tei sae to'oni mamaahui tewa 'isi? Mana'i hei ra boi ei?"

¹⁴ Minau aramia o'ani, "Saemaua, 'inau ai'a 'iraraa. I'oe gasi."

Mia o'ani, "Neirausi nei narau tahisiai rongomaata'i raha narau bwane siri na'i raron. Rau wasi'i bwana adaa'i 'inia 'abunai Gare'i Siip narau ha'amamahui'i 'ini'i.

¹⁵ Naia narau ura 'inia na'i maanai dora heheinagu ana God marau ha'arahesia suri rodo mana dangi na'i ruma maea ana. 'Ia mo'o na heinagu na'i hunganai dora heheinagu anai mwaeraha 'ai awa beiraaui mai 'omesuriraaui.

16 Raugu bwa'i hioro'a, ma'ua maesiai gono, mana raoraohanai sina ma'ua ta maho ro'u 'agu bwa'i to'iraa'u.

17 'Inia na Gare'i Siip na awa na'i maanai dora heheinagu anai mwaeraha 'a 'omesuriraa'u 'onaai sae na 'omesuri'i siip ana'i. Ma'ai na'otaradaau 'anai 'ari gono na'i hurahurai wai ni tahi. Mia God 'ai idu'i'i wai baani'i maadaa'i, raugu bwa'i ahutotou'a ro'u ta'oha."

8

Ra Rahiai Biunai Dora

'Anai Ha'ababauai Buka

1 Na'i 'oha na Gare'i Siip 'a rahiai biunai dora 'anai ha'ababauai buka, na'i aro 'a papaku suriai abai 'aoa.

2 'Iraaui biu enjel narau ura na'i maana God, ra ha'a 'ado ahuriraa'u.

3 Mana nata enjel na daai rabo'o gol ra awaiei insens, 'a boi ma ura na'i bobonai dora ni ho'asi. Ra haa'i insens rago tanaa 'anai nuga goni'i bei'i ha'arahesi adaa'i noni ana'ia God. Ma hauai suu ho'asi 'ini'i na'i hunganai dora ni suu ho'asi nara tagorahia 'iniaai gol na awa na'i maanai dora heheinagu anai mwaeraha.

4 Mana asuasunai insens mana ha'arahesi adaa'i noni ana'ia God ra ara'a goni tanaa God baaniai rabo'o na daa i enjel.

5 Na'i muri 'augu 'ome mana enjel 'a ha'ahonua'a i rabo'o anai insens 'iniaai 'eu baaniai dora ni suu ho'asi, ma gaasia dio na'i marewana. Ma boi kae rongo raha ma mararea ma hitahita ma kae nunu na 'ihara'iniaai ano.

Ra Uuhi'i Ahuri

6 Mana biu enjel rau ha'aagau 'anai uuhi'i ahuri adaa'i.

7 Na'i madoraa na enjel tahamora 'a uuhiai ahuri ana, i wai ra 'unua 'iniaai 'aesi 'a haidorari beiai 'eu mana 'abu, ra ahoda dioi marewana 'onaai rangi. Ma ragoi hasi'ei mana ano ra noro.* Mana mwane hahaarisi mamarewa'a ra noro hako.

8 Mana ruanai enjel 'a uuhiai ahuri ana, ma'e maho na 'ome 'onaai hungahunga na ngarungaru 'a ahoda dio na'i asi. Ma'e kae dora 'iniaai asi na aho'ita'i 'abu.†

9 Ma rago i mareho tahitahi na'i asi ra mae, ma ragoi haka ra here ha'ata'ai'i.‡

10 Mana orunai enjel 'a uuhiai ahuri ana, ma'e kae hee'u na ngarungaru 'onaai hahaaaisina nara suungia na ahoda dio baaniai aro marawa hunganai kae dora 'ini'i wai mana hurahura.§

11 Na atanai hee'usi, ra 'unua 'iniaai mahai, ma'e kae dora 'ini'i wai ra mahai. Ma ragoi sae ra mae 'ini'i gonohi'i wai mahai.*

12 Mana hainai enjel 'a uuhiai ahuri ana, ma'e kae dora 'iniaai sina mana hura ra kuhi, mana hee'u ra o'asi ro'u ma'e hai 'aoa 'iniaai dangi na ai'a marewa mana rodo 'a o'asi ro'u.†

* **8:7** 8:7 Na'i ha'ateeni Grik ra 'unua do ta'i third (1/3) 'ini'i hasi'ei mana ano ra noro. Na'i ha'atee ni Arosi 'a bwarai 'unua ta'i third. † **8:8** 8:8 Na'i ha'ateeni Grik ra 'unua do ta'i third (1/3) 'iniaai asi na aho'ita'i abu. ‡ **8:9** 8:9 Na'i ha'ateeni Grik ra 'unua do ta'i third (1/3) 'ini'i mareho tahitahi na'i asi ra mae ma 'e ta'i third 'ini'i haka ra here ha'ata'ai'i. § **8:10** 8:10 Na'i ha'ateeni Grik ra 'unua do ni kae hee'usi 'a ahoda hunganai ta'i third (1/3) 'ini'i wai mana hurahura. * **8:11** 8:11 Na'i ha'ateeni Grik ra 'unua do ta'i third (1/3) 'ini'i wai ra mahai. † **8:12** 8:12 Na'i ha'ateeni Grik ra 'unua do 'e ta'i third (1/3) 'iniaai sina mana hura mana hee'u ra kuhi.

¹³ 'Augu 'ome ma'e hada na roho ahaaha 'ari aro marawa 'a ha'atee raha o'ani, "Ha'a-arohai'amou di'u i saenai marewana. Na'i 'oha 'iraau nata oru enjel raigu uuhi'i ro'u i ahuri adaa'i, 'ai ta'aa di'u tana'amou."

9

¹ Na'i 'oha rimanai enjel 'a uuhiai ahuri ana, 'au re'iai hee'u na ahoda dio baaniai aro marawa na'i marewana. Ra haua tanaai hee'u i kii 'anai tahangiai honohono anai waumu na ai'a to'o hahakona.

² 'Oha na tahangia, asuasu ra hura'a na'iei 'a 'onaai asuasunai kae 'eu. Ni asuasu 'a ha'abwarasiai rarahanai sina, mana marewana 'a kuhu.

³ Mana ngabo ra roho hura'a baaniai asuasu mara 'adarara 'ari suriai marewana. Mana wetewete nara hau'i tana'i ngabo 'isi ra wetewete 'onaai'i suhari.

⁴ Ra ha'a-aburaau 'inia here ha'ata'ai'i hahaarisi mana hasi'ei mana mwani taraani raraaua. Rai matai ha'a-mama'airaau moi nei ra ai'a to'oraai ha'ara ana God na'i hauraeda.

⁵ Rai ha'a-maata'iraau suria ta rima hura, ma'ata ra bwa'i ha'amaesiraau. Ni ha'a-mama'ai rai haua tanaraau, 'ai maata'i 'onaai su'i na haa i suhari.

⁶ Na'i madoraasi, 'iraau sae rai bonasiai haa'i herehere dorai mae 'inia, marau bwa'i mae. Rai 'irisia di'u i mae magu bwara.

⁷ Ni ngabo 'isi ra 'ome 'onaai hoosi nara ha'aagau 'anai hei'oi. Maho ra 'onaai didimaa gol adaa'i mwaeraha ra awa suri'i bwaudi mana hauraedi tari auru suri'i 'u'udi ra 'ome 'onaai sae.

⁸ Ni warihudi ra tewa 'onaai warihui urao, mana rihodi ra 'onaai rihoi laeon.

⁹ Ra ho'osi'i to'oni ni hei'oi na'i waiburudi nara tau'arodi 'inia 'aean. Mana gahogahodi ra rongo raha 'onaai bwea nara ogea 'inia hoosi na 'eba 'inia heingahui.

¹⁰ Ni kekeredi ra 'onaai kekerei suhari ra to'o maho ra haisu'isu'i 'ini'i nara mwamwakaru 'anai ha'a-mama'airaau sae suriai rima hura.

¹¹ I mwaeraha adaau, naasi enjel ta'aa na 'omesuriai waumu. Atana na'i ha'atee adaau Jiu, ra 'unua 'inia Abadon, miraui Grik ra 'unua 'inia Apolion. Ni 'ado'ado 'anai rua atasi, 'ia mo'o na matai here ha'ata'ai'i maho.

¹² Naasi maho ta'aa tahamora na to'o. 'Abwa'i orea ma ta rua maho ta'aa 'ai to'o'a ro'u.

¹³ Mana orunai enjel 'a uuhiai ahuri ana, mau rongoai ha'atee na boi baaniai hai rangorango anai dora ni ho'asi nara tagoraa 'inia gol na ura na'i maana God.

¹⁴ 'A o'ani 'inia ononai enjel, "Oi ruhasiraui hai enjel nara ho'osiraau na'i bobonai wai rahai Iufreitis."

¹⁵ 'Iraau rau bwani ha'aagau mau mai, raugu mamasia moi madoraai dangi mana hura mana harisi 'anai ha'amaesiai kae ruruhai sae na'i marewana.*

¹⁶ Mau rongoai 'unua ada i siha sae hehei'oi narau to'ora nara ta'e suri'i hoosi, 'a 'onaai rua 'arangi milion.

¹⁷ Mau re'i'i sae hehei'oi ra ta'e suri'i hoosi. Ni to'oni ni hei'oi nara nuga'i suri'i waiburudi ra 'ome wangawanga 'onaai ngarungarui 'eu ma tara'i 'omehanai 'eusi ra gere raba 'ome borabora'a mana togatoga'a. Ni bwaudi hoosi 'isi, ra 'onaai bwau i laeon, ni 'eu mana asuasu mana hau madoro ra hura'a baani'i ngoodi.

* 9:15 9:15 Na'i ha'ateeni Grik ra 'unua do 'e ta'i third (1/3) 'iniraui sae na'i marewana rai mae.

¹⁸ 'E kae ruruha 'iniraaui sae na'i marewana nara maesiai oru ha'a-mama'ai raha ra hura'a baani'i ngoodi hoosi, ni 'eu mana asuasua mana hau madoro.†

¹⁹ Ni wetewete adaa'i hoosi 'isi ra awa suri'i ngoodi mana'i kekeredi. Ni kekeredi ra 'onaai bwau i mwaa nara hahairete nara matai here ha'ata'airaau 'ini'i sae.

²⁰ Miraaui nei nara ai'a mae na'i ha'a-mama'ai raha nara to'o 'ini, ra ai'a nugasi'i mau i herehere adaa'i nara ai'a goro. Ra ha'arahesi'i moi mau i adaro mana araaranunu nara ai'a matai wanawana ma'ua rongorongo ma'uasi hadahada, narau tau'arodi 'ini'i gol, mana silva, mana bras, mana hau, mana hasi'ei.

²¹ Marau ai'a nugasi'i ro'u tara'i baronga ta'a'i adaa'i 'onaai heingahu, hai'uaasi, wawaasua'a, mana beri.

10

Enjel Mana Gere Buka

¹ Mau re'ia ro'u i enjel na mena, 'a dio mai baaniai aro. 'A ho'owa'a 'inia'i rorodo, ma'e rau'aro na awa na'i ahoranai bwauna. Ni hauraena tari auru na'i 'u'una 'a 'onaai sina, mana uwana'i ra 'onaai kae ngarungarui 'eu.

² 'A daa i gere buka na 'onaai rorokui pepa nara bwani kehasia'a. Ma ura, na uwa odona na'i hunganai asi mana nata uwa na'i dora mamata.

³ Ma awara hura'a 'inia'i ringe raha na rongo 'onaai laeon na ngurunguru. Na'i muri 'e biu huai hita nagu ha'atee ro'u.

⁴ 'Au gaarangi usu'i taha rau 'unu'i ma'e ha'atee na boi baaniai aro 'a o'ani, "'Oi abu rangasi'i ma'ua usu'i maho 'isi."

⁵ Mana enjel na ura tahanga na'i asi mana dora mamata 'a taranga'inia'i rima odona ara'ai aro.

⁶ Ma hauai duruduru na wetewete na'i atana God na awa tarau na ha'apwa'araai ahoasara mana marewana mana asi mana mwani mareho na'i rarodi. Ni enjel 'a o'ani, "'Ia God 'agu bwa'i mamasi'a ro'u."

⁷ Na'i 'oha na biunai enjel 'ai uuhiai ahuri ana, 'ai to'o i taha na 'ia God na 'adoma'i nunuga 'inia mau mai. Naasi 'ado'ado na bwani ha'arangasiai tanaraaui sae tatau'aro ana'i, 'iraau'i Rarabea, magu ai'a ha'arangasiai hura'a tanaa namoiwou ta sae."

⁸ Mana ha'atee na boi baaniai aro 'a o'ani ro'u 'iniau, "'Oi 'ari ma'oi rahiai buka nara bwani kehasia baaniai rimarimanai enjel na ura tahanga na'i asi mana dora mamata."

⁹ 'Oha nau 'ari mau ha'angoniai gere bukasi baaniai enjel, 'a o'ani 'iniau, "'Oi hauai buka ma'oi ngaa! Ni ahumu 'ai mamasi 'inia, ma'ata na'i ngoomu 'ai mamagi 'onaai huai modi'o."

¹⁰ Mau rahiai gere buka baaniai enjel mau ngaa. Ni ngauhana 'a mamagi 'onaai huai modi'o na'i ngoogu ma na'i ahugu 'a mamasi.

¹¹ Mana enjel 'a o'ani ro'u 'iniau, "'Oi taroha'inia waiori taha nai to'o tanaraaui sae 'ado burunga, 'ado marau, mana 'ado ha'atee hehe'ete'i hairiu, mana mwani mwaeraha he'ete'i hairiu ro'u."

11

Rua Rarabea Ana God

¹ Mara haua tanaaui gere bahoro'i hasi'ei 'anai tohotoho, mara o'ani 'iniau, "'Oi 'ari ma'oi tohongi'ai Ruma Maea ana God. 'Oi tohonga ro'u i dora ni ho'asi ma'oi uduma'iniraaui sae ra ha'arahesi.

† 9:18 9:18 Na'i ha'ateeni Grik ra 'unua do 'e ta'i third (1/3) 'iniraaui sae rai mae.

² 'Oi abu tohongiai kae dora a'ora na'i abau 'omaa. 'Oi nugaa moi, 'inia ra bwani nugasia'a tanaraaui nei ra ai'a 'iraraa God. 'Iraau rai marungiai Jerusalem suria ta hai tangahuru mana rua hura.

³ Ma'ata wai ha'ataariai rua sae heheitaroha'i agua 'anai taroha'iniiai ha'atee agu'i suriai hai tangahuru mana rua hura.* Rarui siri suri'i bwana ni ahutotou.

⁴ "Ni rua Rarabea naasi rua hasi'ei nara 'unua 'iniiai 'Oliv mana rua raita ra ura na'i maanai mwaeraha na marungiai marewana.

⁵ I maeronga nai raba here ha'ata'airarua, ni 'eu 'ai hura'a baani'i ngoodaru'i maai ha'amaesia. Naasi here nararui haa 'ana tanei nai ha'imaania here ha'ata'airarua.

⁶ Raru to'o mena 'anai ha'abwarasiai rangi na'i aro ma'ai abu rangi na'i madoraa rarui heitaroha'i. Mararu to'o mena 'anai ha'a-aho'ita'ini'i wai 'iniiai 'abu, mararu matai haa'i mwani ha'a-mama'ai 'onaai here ha'a-ta'airaui sae na'i marewana namoiwou ta 'oha nararui rabasia.

⁷ "Na'i 'oha na rua Rarabea raru heitaroha'i hako, ni kae mwamwaa wasi 'ome ta'aa na awa na'i kae waumu na ai'a to'o hahakona, 'ai hura'a mai ma'ai heingahui beirarua ma'ai ngahu ha'amaesirarua.

⁸ Mana abedaru'i rai dadao na'i koranai tara na'i 'omaa raha ra rabua na'i dadaahoro i Araha adarua. 'Iraau sae ni 'omaasi gau ga'i 'unua do ra 'onaairaui sae ni Sodom mana Ijip na'i 'oha bwani nara 'ageta'i araisuri'i ro'u i ha'atee adaa'i rarabea.

⁹ 'E oru dangi mana aba na sae suri'i 'ado marau mana 'ado burunga mana 'ado ha'atee rai wana suri'i moi abedaru'i rua Rarabeasi. Ra bwa'i watea ta sae 'anai toringirarua.

¹⁰ Miraau hakoi sae na'i marewana rai haa'i kae ngaungau marai wa'ewa'e. Rai ba'oba'oraaui hairiu 'iniiai mae adarua i rua Rarabea raru ha'a-mama'airaui.

¹¹ "Ma na'i moi murinai oru dangi mana aba, mia God 'ai haa'i aho'i manawa tanararua. Rarui ura ara'a miraui nei rai re'irarua rai maaa'u.

¹² Mana rua Rarabea rarui rongoai ringe nai boi baaniai aro nai ha'atee raha o'ani, 'Ta'eha mai 'ini.' 'Iraui maerongadaru'i rai wana riu na'i 'oha rai wairarua ara'ai aro na'i rorodo.

¹³ "Na'i 'ohasi 'e kae nunu raha nai to'o. 'Ai 'ihara'iniiai ano maai here ha'ata'aiiai tangahurudi ruma na'i 'omaasi. 'E biu merui sae nai mae. 'Iraui nei rai tahi mau, rai maaa'u marai ha'aasaa God na awa na'i aro.

¹⁴ Naani ruanai maho ta'aa nai to'o, ni oruna 'abwa'i orea ma'ai to'o'a ro'u."

Na Biunai Enjel 'A Uuhiai Ahuri Ana

¹⁵ Mana biunai enjel 'a uuhiai ahuri ana, mau rongo'i ringe ra rongo raha ra boi baaniai aro. Ra o'ani, "Na'i 'ohani mwani maho hako na'i marewanani ra awa na'i bahainai heimarungi ana Araha God mana nei na 'ome sigihia 'anai ha'atahiraui. 'Ia God 'ai marungiraui tarau ma bwa'i hako'a."

¹⁶ Miraui rua tangahuru mana hai saemaui narau heinagu suri'i dorani mwaeraha na'i maana God, rau topira'i ruru marau mwaoro dio na'i ano marau ha'arahesia.

¹⁷ Rau o'ani,
"Araha God, na mena amua 'a di'u'i hako i mwani maho.

I'oe 'o bwane awa mau mai ma'o awa mau ro'u na'i 'ohani.
Meu ha'atee ha'agorohi'o

* **11:3 Hai tangahuru mana rua hura:** Na'i Ha'atee ni Grik ra 'unua 1,260 dangi, me 1,260 dangi 'a ta'isada beiai 42 hura.

'inia 'o ha'ata'inia'a i mena amua na'o taraawa'a marungiraau 'inia inoni.

18 'Iraaui nei ra ai'a hinihini'o ra taesu'a mumua,
ma'ata 'a tari'a ro'u i madoraa amua 'anai ha'ata'iniai taesu'a amua.
Naani'a i madoraa 'anai hiiriraau nei ra mae
mana tahariraau sae tatau'aro amu'i.
'Oi tahariraau nei amu'i, 'iraaui Rarabea miraaui nei ra ha'ahou'o, rei'uaa
ra'i sae ororiu ma'ua ai'a.
Naani'a i madoraa ro'u 'anai ha'a-ai'araau nei ra here ha'a-ta'airaau sae
na'i marewana."

19 Hoita, na maraaruma anai Ruma Maea ana God na'i aro 'a wawaa'a mara matai re'ia moi bakosi ra awa iei Ha'atora ana'ia God. Mau 'omesiai mararea mau rongoai maguru anai huai hita ma'e nunu na 'ihara'iniai ano ma ra'i mwani dorai 'aesi rago ra ahoda dio baaniai aro marawa.

12

Urao Mana Draegon

1 Ma'e maho 'ome ha'abu'oahu na ha'ata'i mai na'i ahoasara. 'E urao na bwana ana naasi i sina, mana hura na'i bahainai uwana. 'A nugai didimaa ni mwaeraha na'i bwauna na awa iei ta'i tangahuru mana rua hee'u.

2 'A angi awaawara 'iniai maata'i anai ahuna 'iniai raba ha'ahuta.

3 Ma'e ta'i maho 'ome ha'abu'oahu na ha'ata'i ro'u na'i ahoasara. 'E kae draegon wangawanga na to'oraai biu bwau mana tangahuru rangorango. 'Ado bwau ra to'o didimaa ni mwaeraha.

4 'A ragoi hee'u na'i ahoasara na taragoni'i 'iniai kekerena ma gaasi'i dio na'i marewana. Mana draegon 'a rihota'i tanaai urao, 'inia 'a raba ngaai gare ana 'oha nai huta.*

5 Ma ha'ahutaai gare mwane nai marungia hakoi mwani marau na'i marewana, mana heimarungi ana 'ai wetewete di'u. Ra tahunga'iniai garesi mara waia beira'i tanaa God na heinagu na'i dora ni mwaeraha ana.

6 Mana urao 'a hora 'ari dora mangasara na'i dora na 'ia God 'a ha'aagaua tanaa. Rai 'omesuria iei suria ta hai tangahuru mana rua hura.

'Ia Maekol 'A Hei'oi Beiai Draegon

7 'E heingahui raha na to'o na'i aro. 'Ia Maekol miraaui enjel ana'i rau heingahui beiai draegon mana enjel ta'a'i ana'i.

8 'Ia Maekol mana ruruha ana rau ha'ahehoai draegon mana ruruha ana. Rau tariha'iniraau hura'a baaniai aro

9 mara gaasiraau dio na'i marewana. Ha'amomori! Ni draegon naasi mana enjel ana'i, ra gaasiraau hura'a baaniai aro. Naia mau i mwaa ra 'unua 'inia Ha'ahuni ma'ua Saetan na pwari'iraau hakoi sae na'i marewana mau mai na'i taraawa'a.

10 Mau rongoai ringe na ha'atee raha, 'a boi baaniai aro ma o'ani,

"Na'i 'ohani 'ia God agaau 'a ha'atahigaau'a ma ha'ata'inia do 'a to'o mena 'anai heimarungi 'onaai mwaeraha. Mana Ha'atahi na 'ia God 'a 'ome sigihia 'a ha'ata'inia haaria do 'a to'o mena 'anai marungi'i mwani maho hako. 'Inia 'ia Saetan na ha'ahuniraau sae agaa'i na'i maana God 'ado 'oha, ra gaasia'a hura'a baaniai aro.

11 'Iraaui sae agaa'i rau ha'aheho'a Saetan 'iniai mena anai 'abunai Gare'i Siip mana mena anai Taroha Goro narau taroha'ini'i. Rau mwa'emwa'e 'anai wate'i tahingadaa'i tanaa God rei'uaa rai mae.

* 12:4 12:4 Na'i ha'ateeni Grik ra 'unua do 'ai gaasi'i dio ta'i third (1/3) 'ini'i hee'u.

¹² Naasi, mou ga'i wa'ewa'e 'i'amoui nei mou awa na'i aro. Ma ha'a-arohai'amou di'u i nei mou awa na'i marewana mana asi, 'inia ra gaasia'a dio a Ha'ahuni na'i marewana. 'Iia 'a taesu'a di'u 'inia 'a 'iraraa do madoraa ana 'a pwapwaku'a."

¹³ Na'i 'oha na draegon 'a aidangisia do ra gaasia'a dio na'i marewana, 'a tariha'inia'ai urao na bura'i ha'ahutaai gare mwane.

¹⁴ Mana urao, 'ia God 'a haua tanaai rua gahogaho 'onaai gahogahoi kae hada 'anai roho ha'atau 'ini'i 'ari dora nara ha'aagaua tanaa na'i dora mangasara. Na'i 'isi narai 'omesuria iei marai taatahi bwarasia baaniai draegon suria ta oru harisi mana aba.

¹⁵ Mana draegon 'a ngisuta'inia hura'a i wai na 'onaai kae wai raha na'i ngoona do 'ai taresiai uraosi.

¹⁶ Mana ano 'a 'a'uhiai uraosi, 'a 'onaa do 'a ha'a-mwangangaai ngoona ma gonohiai wai na hura'a baania ngoonai draegon.

¹⁷ Mana draegon 'a taesu'a di'u 'anai uraosi ma hauai heingahui raha bei'i gare ana'i. Neiraausi nei ra araisuri'i taha na 'unu'ia God mana ha'ausuringa'i ana'ia Jisas.

¹⁸ Mana draegon 'a hura'a na ura na'i one.

13

Rua Kae Mwamwaa Wasi 'Ome Ta'aa

¹ Mau re'iai kae mwamwaa wasi 'ome ta'aa na hura'a mai baaniai asi. 'A to'oraai tangahuru rangorango mana biu bwau. 'Ado rangorango ra to'o didimaa ni mwaeraha. Mana 'ado bwau ra awa iei ata ra ha'atee ha'ata'aia God.

² Ni mwamwaasi 'a abe 'onaai leopard ma uwa 'onaai bea ma ngoo 'onaai laeon. Mana draegon 'a haua tanaai mwamwaasi wetewete ana mana mena ana 'anai heimarungi.

³ 'E ta'i 'ini'i biu bwausi 'a 'ome 'onaa do 'a kae maara ga'u na 'ome 'onaa do'a ga'i mae 'inia, ma'ata 'a goro'a aho'i. 'Iraau hako i sae na'i marewana ra heimwaota'i 'inia marau araisuriai mwamwaasi.

⁴ Rau ha'arahesia draegon na hauai mena tanaa marau ha'arahesia ro'u i mwamwaasi, rau o'ani, "'Abwa'i ta sae nai ta'isada 'onaai mwamwaasi! Ma bwa'i sae nai arari 'anai heingahui beia."

⁵ Mia God 'a ha'awateai mwamwaasi 'anai ha'a-ta'eta'ea haaria ma 'anai ha'atee ha'ata'aia God. Ma'ata 'e hai tangahuru mana rua hura moi ra watea tanaa do 'ai heimarungi suria.

⁶ Ni mwamwaasi 'a ha'atee ha'ata'aia God ma ha'atee ha'ata'aiai atana God mana dora monomono ana miraaui nei rau awa beia na'i aro.

⁷ Ra ha'awatea do 'ai heingahui beiraui sae ana'ia God maai ha'ahedoraau. Mara haua ro'u tanaa i mena 'anai marungiraau 'ado burunga, 'ado marau, mana 'ado ha'atee.

⁸ 'Iraau hakoi sae na'i marewana rai ha'arahesia mwamwaasi. 'Iraau moi nei ra awa i atadi na'i buka ni tahi taraawa'a na'i 'oha 'ia God 'a ai'a ha'apwa'araa mau i marewana naraugu bwa'i ha'arahesia. I bukasi 'iaanai Gare'i Siip nara ngahu ha'amaesia.

⁹ 'Onaa 'o to'o karinga ma'oi bahurongo ma'oi aidangi tarihana!

¹⁰ 'Onaa 'ia God nai raba dau'o 'anai gaasi'o na'i rumanih'o, ma'oi 'ari rumanih'o. Ma 'onaa 'ia God nai raba ngahui'o 'iniaai naihi na mwamwakuu hairiu, ma'oi mae 'iniaai naihi na mwamwakuu hairiu. Naasi 'a ha'ata'inia do 'i'amou sae ana'ia God moi ura baabau mamoi hinihinia wetewete a God.

Ruanai Kae Mwamwaa Wasi 'Ome Ta'aa

Na Hura'a Mai Baaniai Ano

¹¹ Mau re'iai ta'i kae mwamwaa ro'u na hura'a mai baaniai ano. 'A to'oraai rua rangorango 'onaai Gare'i Siip ma ringe 'onaai draegon.

¹² Ni 'etanai kae mwamwaa 'a hauai mena tanaai ruanai mwamwaa maai tau'aro tanaa. Mana ruanai mwamwaa 'a ha'a-'usu'usuraui inoni 'anai ha'arahesiaui mwamwaa na maara ga'usi ma goro aho'i.

¹³ 'A haa'i kae ha'abu'oahu raha ma'e ta'i 'oha 'a ha'adiohiaui 'eu baaniai aro marawa na'i maadaa'i sae rago.

¹⁴ Ni ruanai mwamwaa 'a ha'abweuraau'a i sae na'i marewana 'iniaui haa'i ana'i ha'abu'oahu 'iniaui mena anai mwamwaa tahamora. 'A ha'a-tau'aroraui sae 'anai aranununaui mwamwaa na maara ga'usi 'iniaui naihi na mwamwakaru hairiu ma ai'a mae.

¹⁵ Mia God 'a ha'awatea do'ai hauai manawa tanaai araaranunusi mai matai ha-ha'atee. 'Iraau hakoi nei rai kakawata'i ha'arahesia, rai ha'amaesira.

¹⁶ Ni ruanai mwamwaa 'a ha'a-'usu'usura i mwani sae hako 'anai nuga ha'ara na'i rima ododa ma'ua na'i hauraeda. Rei'uaa i'oe 'e sae ororiu ma'ua ai'a, rei'uaa 'o toto'ora ma'ua ai'a, rei'uaa i'oe 'e slev ma'ua ai'a,

¹⁷ 'oi to'o ha'ara ma'ata'a. 'Iatei na bwa'i, 'a bwa'i matai hori ma'ua raonga'inia ta maho. Ni ha'ara 'a ura 'iniaui atanai mwamwaa tahamora mana naba anai atana.

¹⁸ 'Onaa 'o madoma ma'oi 'iraraui 'ado'ado anai naba anai mwamwaa. 'A ura 'iniaui ata i sae, mana nabasi naasi 666.

14

I Gare'i Siip Mana 144,000 Rongoiusuri Ana

¹ 'Augu 'ome ro'u mana Gare'i Siip 'a ura na'i hungahungai Saeon beiraui ta'i 'arangi hai tangahuru mana hai merui sae ra usu'i atanai Gare'i Siip mana atana Amana na'i hauraeda.

² Mau rongoai maho na rongo raha na'i aro. 'A rongo raha 'onaui wai na ahe ma'ua guruguru 'anai hita, ma rongo ro'u 'onaa 'oha nara takiri'i mwani gitaa.

³ Ma'e gana haoru ra ganaria na'i maanai dora ni mwaeraha ana God ma na'i maadaui hai kae maho tahitahi miraui saemau. Ai'a ta sae'a ro'u nai 'iraraui ganasi, 'iraaui moi ta'i 'arangi hai tangahuru mana hai merui sae na 'ia God na rahiraau hura'a baaniaui marewana.

⁴⁻⁵ 'Iraui sae 'isi ra ai'a 'ari beia ta urao marau suriaui Gare'i Siip na'i hei nai wairaaui 'ariei. Rau ai'a pwapwaari'i marau odo-odo na'i maana God. Ra rahiraau hura'a baaniaui marewana 'anai wateraui 'onaui bane na ororiu di'u tanaa God mana Gare'i Siip.

Hadahada Adaui Oru Enjel

⁶ Mau re'ia ro'u i enjel na roho aharau 'ari aro marawa. 'A waui Taroha Goro na bwa'i hako'a ro'u ta 'oha tanaraui sae suri'i 'ado burunga, sae 'ado ha-ha'atee mana sae suri'i 'ado marau na'i marewana.

⁷ Ni enjel 'a o'ani, "Moi ha'ahoua God mamoi ha'a-aneanea. 'Iniaui madoraa ana naani'a 'anai hiiriraui sae. Moi ha'arahesia mo'o na ha'apwa'araui ahoasara mana anoi bahai mana asi mana mwani wai."

⁸ Mana ruanai enjel 'a boi haisuri ma o'ani, "Ni kae 'omaa raha i Babilon 'a kokohu'a. 'A 'onaui gere urao na ha'agono waeniaui saemwane 'anai ha'akarea maui wawaasua'a beia. 'Inia naasi 'omaa na ha'a-karekaraui sae ni marewana 'anai ha'arahesi'i araaranunu."

⁹ Mana orunai enjel 'a boi haisuri ro'u ma o'ani, "'Iatei sae nai ha'arahesiaui kae mwamwaa wasi ma'uasi ha'arahesiaui araaranunu ra aranununa 'iniaui mwamwaasi, ma 'iatei sae nai to'oraui ha'ara ana na'i rimana ma'ua hauraena,

¹⁰ 'ia God 'ai taesu'a 'ana maai ha'a-mama'aia. Ni ha'a-mama'ai 'ai haua tanaa 'ai raha di'u mia God 'a bwa'i ahu ta'ahia 'inia. Na'i maadi enjel maea mana Gare'i Siip 'ia God 'ai ha'a-mama'aia 'inia 'eu na raorao di'u na noro 'inia hui madoro.

¹¹ 'Iatei nai ha'arahesiai mwamwaa wasi ma'uasi ha'arahesiai araaranunu ra aranununa 'inia mwamwaa wasi naasi, ma 'iatei nai rabasiai ha'ara anai atana, rai ha'a-mama'aia 'ado rodo mana dangi. Na asuhanai 'eu na ha'a-rongomaata'ia 'a bwa'i papaku mia mo'osi 'a bwa'i arunga maarihu."

¹² Naasi, 'i'amou sae ana'ia God moi ura baabau mamoi araisuri'i taha na 'unu'ia God mamoi hinihinia wetewete a Jisas.

¹³ Mau rongoa ro'u i ha'atee na boi baaniai aro na o'ani, "O'i usu'i dioi maho wai 'unu'i. Na'i 'ohani ma 'ari'a 'ia Araha God 'ai ha'agorohiraau nei ra mae ha'i hinihini." Mana Hi'ona Maea 'a heiarami o'ani, "Ha'amomori, 'irau rai mamaro baani'i tagora raha adaa'i marai taharirau 'ini'i tau'aro goro adaa'i."

Ha'amama'ai Ana God

'A Dioi Hungadaui Sae Na'i Marewana

¹⁴ 'Au 'ome ro'u mau re'iai rorodo mamaahui, ma'e sae na 'ome 'onaai Gare'i Inoni na heinagu na'i hungana. 'A awa i didimaa ni mwaeraha ra tau'arona 'inia gol na'i bwauna, ma daai naihi mwamwaku.

¹⁵ Ma'e enjel na hura'a mai baaniai Ruma Maea na'i aro, 'a totoro o'ani, "O'i taraawa'a tau'aro'a 'inia naihi amua, 'inia madoraa 'anai husi'i hua baani'i hasi'ei naani'a. Mwani hua na'i marewana ra maua'a."

¹⁶ Mia mo'o na heinagu na'i hungana rorodo 'a taraawa'a tau'aro 'inia naihi ana, ma ha'igoni'i hako i hua na'i marewana.

¹⁷ Ma'e ta'i enjel na daai naihi mwamwaku 'a hura'a mai ro'u baaniai Ruma Maea na'i aro.

¹⁸ Mana nata enjel na 'omesuriai 'eu na'i dora ni ho'asi 'a hura'a mai ma o'ani 'inia enjel na to'oraai naihi, "Na mwani grep na'i marewana ra mada'a. 'O'i husi'i 'inia naihi amua."

¹⁹ Ma tabari'i bubungudi mwane grep na'i marewana ma gaasi'i dio na'i giru do raigu buuhara hungadi, naasi ha'ara 'inia taesu'a ana God.

²⁰ Ni giru 'a awa hura'ai murinai 'omaa. Na'i 'oha ra buu roosi'i huadi grep 'anai ha'ahura'ahi'i waidi, ni 'abu 'a ahe hura'a ma aho'ita'i kae wai raha. Ni tewa na haa 'a 'onaai oru 'arangi kilomita, mana dodo na haa 'a 'onaai ta'i tahanga.

15

Ha'amama'ai Hahako

¹ Na'i muri mau re'ia ro'u i kae maho na'i aro na 'ome ha'abu'oahu. 'E biu enjel narau waa mai biu ha'a-mama'ai hahako. Na'i muri mia God 'agu bwa'i taesu'a'a ro'u.

² Mau re'iai maho na 'ome 'onaiai asi na maremare 'onaai gilaasi nara doraria beiai 'eu. Miraaui nei narau ha'ahehoai mwamwaa wasi mana araaranunu ra aranununa 'inia mwamwaasi mana naba anai atana, rau ura na'i hungana asi naasi. Mia God 'a haa'i gitaa tanaraau

³ marau ganariai gana na 'ia Moses, sae tatau'aro ana, mana Gare'i Siip nararu gana. Rau gana o'ani,

"Araha God, 'o mena di'u'i mwane mareho hako
mana mareho na'o haa'i ra hauasa mara ha'abu'oahu.

'O marungi'i hako mwane marau,

mana mwane mareho na'o haa'i ra odo-odo mara goro tatarasi.

⁴ Aراها, mwane sae hako ra ga'i ha'ahoua ma'ua ha'aasaai atamu.

'Inia i'oe 'ete'o na'o maea.

Miraaui hako sae suri'i mwane marau rai ha'a-aneane'o,
'inia rau 'omesi'i mwane mareho odo-odo na'o haa'i."

⁵ Na'i muri mau re'ia i Ruma Maea na'i aro nara tahangiai ahii na maea di'u na'i raronā.

⁶ Mana biu enjel 'anai waa'i ha'a-mama'ai tanaraaui noni ra hura'a mai baaniai Ruma Maea. Ra siri suri'i to'oni tewa mamaahui, ra nuga'i rorowa'a gol ruahoro auru suri'i waiburudaa'i.

⁷ 'E ta'i 'iniraaui hai maho tahitahi 'ani 'a ha'a 'adoreaui biu enjel 'ini'i rabo'o nara tau'arodi 'inia gol. Ni rabo'o 'isi ra honu 'inia taesu'a ana God, God na awa tarau.

⁸ Mana raronai Ruma Maea 'a honu 'inia asuasunai mena ana God, 'inia 'ia God na awa na'i dorasi. 'A bwa'i sae nai matai siri na'iei tari 'oha 'iraaui biu enjel rai ringisi'i hako ha'a-mama'ai hahako.

16

Biu Ha'amama'ai Hahako Ana God

¹ Mau rongoai ringe na ha'atee na rongo raha na boi baaniai Ruma Maea. 'A o'ani 'iniraaui biu enjel, "Moi hura'a mamoi ringisi'i biu rabo'o ra honu 'inia taesu'a ana God na'i marewana."

² Mana enjel tahamora 'a hura'a ma ringisiai rabo'o ana na'i marewana. Ai'a orea mana keo 'ome ha'amwagimwagi mara maata'i ra hura'a suri'i abedaa'i sae ra to'oraa ha'ara anai mwamwaa wasi mana nei ra ha'arahesia araaranunu ra aranununa 'inia mwamwaasi.

³ Mana ruana enjel 'a ringisiai rabo'o ana na'i asi. Na'i mau 'ohasi mana asi 'a aho'ita'i 'abu 'onaai 'abunai sae na mae. Na mwane maho tahitahi na'i asi ra mae hako.

⁴ Mana orunai enjel 'a ringisiai rabo'o ana suri'i mwani wai mana hurahura mara aho'ita'i 'abu ro'u.

⁵ Mau rongoai enjel na to'o mena 'ini'i wai, 'a o'ani,
"God, i'oe 'o maea di'u,

'o bwane awa mau mai ma na'i ro'u mau 'ohani.

Ni ha'a-mama'ai na'o haua tanaraau 'a odo-odo,

⁶ 'inia ra ha'a-ahesi'i 'abudi sae amu'i miraaui ro'u i Rarabea.

Na'i 'ohani 'o ha'a-gonohiraau'a aho'i 'inia 'abu,

'inia 'a arari do'oi haua o'asi tanaraau."

⁷ Mau rongoai ha'atee na boi baaniai dora ni ho'asi, 'a o'ani,

"Ha'amomori, Aراها God, i'oe 'o mena di'u

mana ha'a-mama'ai na'o haa'i ra odo-odo mara goro tatarasi."

⁸ Mana hainai enjel 'a ringisiai rabo'o ana na'i sina, mana sina 'a ha'a-nororaui sae 'inia raoraohana na 'onaai 'eu.

⁹ 'Iraui hako sae ra noro 'inia raorao marau ha'atee ha'ata'aia God 'inia 'ia na hauai ha'a-mama'aisi. Rei'uaa na o'asi ma ai'a ta sae nai orisi 'adoma'i maai rihota'i tanaa God ma'ai ha'a-aneanea.

¹⁰ Mana rimanai enjel 'a ringisiai rabo'o ana na'i hunganai dora ni mwaeraha anai mwamwaa wasi. Na'i mau 'ohasi mana dora na marungi'i mwamwaa wasi, ra kuhi totobono'a mana sae ra taraawa'a 'ara ngingita 'inia rongomaata'i ada.

¹¹ Rau ha'atee ha'ata'aia God na awai aro 'inia rongomaata'i ada 'ini'i keodaa'i. Ma'ata rau ai'a agoheta'i haa'i here ta'a'i.

¹² Mana ononai enjel 'a ringisiai rabo'o ana na'i wai rahai Iufreitis mana wai raha naasi 'a mamata 'anai ha'aagauai tara tanarai mwaeraha mana sae hehei'oi adaa'i narai boi baaniai dora na ara'a iei sina.

¹³ Ma'e adaro na 'ome 'onaai warau na hura'a na'i ngoonai draegon. Ma'e nei na hura'a na'i ngoonai kae mwamwaa wasi ma 'e nei ro'u na hura'a na'i ngoonai rarabea pwapwaari'i.

¹⁴ Ni adaro 'isi ra to'o mena 'anai haa'i ha'abu'oahu. Ra hura'a suriai marewana 'anai taragoni'i mwani mwaeraha hako 'anai hei'oi beia God huunai mena na'i dangi nai hihiri na'iei.

¹⁵⁻¹⁶ 'Iraaui mwani mwaeraha rau goni na'i dora 'iraaui Jiu rau 'unua 'iniai Amagedon.

Naasi moi 'ado'adoai maho na 'unua Kraest na o'ani, "Moi ha'aagau, 'inia 'inau wai boi na'i madoraa namou bwa'i 'iraraa 'onaai sae beriberi. Wai ha'agorohiraaui nei narau awa ha'aagau tarau. Rau bwa'i ninima 'onaai sae hehei'oi na rahiai bwana ana 'anai mauru magu 'asu'a 'iniai hei'oi ma ninima'a 'iniai hahano ha'i wa'aroko ana."

¹⁷ Na'i 'oha na biunai enjel 'a ringisiai rabo'o ana na'i 'ari ahoasara, 'e ringe na ha'atee na rongo raha na boi baaniai dora anai mwaeraha na'i Ruma Maea. 'A o'ani, "Agau'a!"

¹⁸ Ma mararea ma guruguru mara pusu i kae huai hita, ma to'o i kae nunu raha. Ai'a ta nunu o'asi nai to'o ga'u ta 'oha!

¹⁹ Na ano 'a kakahita mana 'omaa rahai Babilon 'a heihoa 'iniai oru dora. Ma tara'i 'omaa raha suri'i nata marau ra kokohu. 'Ia God 'a ha'agonohiai Babilon 'iniai panikeni waen na honu 'iniai taesu'a ana.

²⁰ Na mwane gere marau mana hungahunga ra ai'a'i.

²¹ Mana buruburui 'aesi na hihi'a adaa'i 'e rima tangahurui kilo ra ahoda huniraaui sae baaniai aro marawa. Miraaui sae rau ha'atee ha'ata'aia God 'iniai ha'a-mama'airaaui ana, 'iniai 'aesi 'a ha'ata'airaaui di'u.

17

Urao Rebirebi

Mana Mwamwaa Wasi Wangawanga

¹ 'E ta'i 'iniraaui biu enjel na daa'i biu rabo'o 'isi 'a boi beiau ma o'ani, "Oi boi mawai ha'ata'inia tana'o i 'omaa raha na awa na'i bobodi mwani wai. 'Ia God 'ai ha'a-mama'ai ai 'omaasi, 'inia 'a here 'onaai urao rebirebi.

² Babilon 'a 'onaai gere urao na ha'agono waeniai saemwane 'anai ha'akarea maai wawaasua'a beia. 'Inia naasi 'omaa na ha'a-karekareraaui sae na'i marewana 'anai ha'arawesi'i araaranunu. Mana 'ado mwaeraha na'i marewana ra bwani taritari'a beia."

³ 'Iniai hei'a'auhi anai Hi'ona Maea, i enjel 'a wai'au 'ari dora man-gasara mau re'iai urao na heinagu na'i hunganai kae mwamwaa wasi wangawanga. Ni abenai mwamwaa wasi naasi 'a honura'i ata nara ha'atee ha'ata'aia God ma to'oraai biu bwau mana tangahuru rangorango.

⁴ Ni bwana anai uraosi 'a borabora'a ma wangawanga mana uraosi ra ha'araunia 'iniai gol mana pal mana hau 'ome goro. 'A daai panikeni gol na honu 'iniai maho ha'amwagimwagi nara 'ome ta'a'i na haa'i.

⁵ Ra usuai ata na'i hauraena na 'ado'ado 'ana 'a awa bainihu na o'ani, "Inau kae 'omaa rahai Babilon naasi inadaau hakoi mwani rebirebi mana mwani maho ta'a'i na'i marewana."

⁶ Mana uraosi 'a 'ome 'onaa do 'a ru'uhia 'iniai gonohi'i anai 'abudaa'i sae ana'ia God na ha'amaesi'i 'iniai hinihinia adaaua Jisas. Na'i 'oha nau re'iai uraosi, 'au heimwaota'i di'u.

⁷ Mana enjel 'a o'ani 'iniau, "Ni 'uaana na'o heimwaota'i 'inia? Wai mamaani ruhasia tana'o i 'ado'ado 'anai urao mana kae mwamwaa wasi na heinagu na'i hungana na to'oraai biu bwau mana tangahuru rangorango.

8 Ni mwamwaa wasi na'o re'ia ani naasi mwamwaa na tahi ga'u ma na'i 'ohani 'agu mae. Ma bwa'i ore maai hura'a mai'a aho'i ro'u na'i kae waumu na ai'a to'o hahakona. Me ma'ata 'ai hura'a mai moi neina 'ia God 'ai ha'a-ai'aa daara'i'a. 'Iraau hakoi nei na'i marewana nara ai'a awai atadaa'i na'i buka ni tahi taraawa'a na'i 'oha 'ia God 'a ai'a ha'apwa'araa mau i marewana, rai heimwaota'i 'oha rai re'iai mwamwaasi. 'Inia 'a tahi ga'u ma mae magu tahi aho'i ro'u."

9 "'E sae madoma nai wai'ado'ado goro 'a ga'i matai aidangisia moi 'ado'ado 'ada'i maho 'isi. Na biu bwau 'a ura 'iniau biu hungahunga na uraosi 'a heinagu suri'i. Ma ura ro'u 'iniau biu mwaeraha.

10 'E rima nei 'iniraui mwaeraha 'isi na mae'a. Ma 'e ta'i na heimarungi na'i 'ohani, mana nata nei naigu boi mau ro'u. Na'i 'oha nai boi 'ai heimarungi moi suria ta gere madoraa.

11 Mana kae mwamwaa wasi na tahi ga'u ma mae, naasi 'e ta'i 'iniraui biu mwaeraha maigu aho'i ro'u mau mai 'onaai warunai mwaeraha. Ma'ata, aho'i mai nai haua, 'ai aho'i mai neina 'ia God 'ai ha'a-ai'aa daara'i'a.

12 Na tangahuru rangorango na'o re'ia ani naasi nata tangahuru mwaeraha narau ai'a heimarungi mau. Ma'ata rai ta'i heimarungi mwamwaa wasi suria ta gere madoraa moi.

13 Ni 'ado'adodaa'i ta'i tangahuru mwaeraha 'isi ra ta'isada, rau haua tanaai mwamwaa wasi i mena mana wetewete adaau 'anai heimarungi.

14 Rai hei'oi beiai Gare'i Siip. Ma'ata ni Gare'i Siip miraui nei na 'ome sigihirau marau tau'aro mangudi tanaa, rai ha'ahedoraui mwaeraha 'isi. 'Inia 'ia naasi huunai Araha mana huunai Mwaeraha."

15 Mana enjel 'a o'ani ro'u 'iniau, "Ni wai na'o re'i'i na urao rebirebi na heinagu bobodi, naasi ruruhai sae baani'i mwani marau he'ete'i mana sae 'ado ha-ha'atee he'ete'i.

16 Ni tangahuru rangorango mana mwamwaa wasi wangawanga rai taraawa'a 'itaai urao rebirebi. Rai rahi'i bori ana'i baania marai nugasia maai awa ha'i ore-ore. Rai ngauai uraosi, mana aba narai ngau tahia rai gaasia ara'ai 'eu.

17 'Ia God 'ai ha'a 'adoma'i aratararaui tangahuru mwaeraha dorai hauai mena adaau tanaai mwamwaa wasi naasi. Rai haua o'asi tari madoraa nai to'o i maho na 'unua God.

18 Ni urao na'o re'ia ani, naasi kae 'omaa raha na marungi'i hakoi mwani mwaeraha na'i marewana."

18

'Omaai Babilon 'A Kokohu

1 Na'i muri mau re'ia ro'u i enjel na mena na dio mai baaniai aro. Ni marewana 'a marewa hako 'iniau rarahana.

2 'A tooro raha o'ani, "Kae 'omaa rahai Babilon na baabau ani, 'a kokohu'a. 'A ai'a ura'a. 'A ha'i 'omaa ta'aa'a, 'iraau moi adaro naraugu awa iei 'ohani. 'A aho'ita'i nu'i adaui manu ta'a'i mana mwamwaa ta'a'i.

3 Babilon 'a 'onaai gere urao na ha'agono waeniai saemwane 'anai ha'akarea maai wawaasua'a beia. 'Inia naasi 'omaa na ha'a-karekaraui sae na'i marewana 'anai ha'arahesi'i araaranunu. 'Iraui mwani mwaeraha na'i marewana rau bwani taritari'a hako beia. Miraui sae raoraonga'i bori na'i marewana rau toto'ora, 'inia 'iraui saeni Babilon rau hairaurau di'u."

4 Mau rongoa ro'u i ha'atee na boi baaniai aro na o'ani, "T'amousae agu'i moi hura'a baaniai Babilon. 'A gasi to'i'amousae i ora-ora'a ana'i maigu to'i'amousae ro'u i kae ha'a-mama'ai raha nai to'ia.

⁵ 'Inia ora-ora'a ana'i ra wadu taha'a ara'ai aro mia God 'a bwa'i kaku'a'i moi ora-ora'a 'isi.

⁶ Rai ha'a-mama'ai Babilon suriai here na haua tana'amou, ma'ata na ha'a-mama'ai narai haua tanaa rai ha'adi'ua tanaa. Maho ta'aa na haa tana'amou, rai a'oi'a ara'a i wetewetehana maraigu haua aho'i tanaa 'anai ha'a-rongomaata'ia.

⁷ Na'i na'o 'a ha'a-ta'eta'ea haaria ma wa'ewa'e 'ini'i mwane mareho goro na to'ora'i. 'A o'ani, "Inaunisi 'au heimarungi 'onaai mwaeraha. Mau bwa'i 'onaai nao nawai ahutotou mawai angi.' Naasi 'ohani rai ha'ata'isadaai rongomaata'i mana ahutotou beiai siha arunga goro na to'ora'a na'i na'o.

⁸ 'Iniai 'unua ana o'asi, na mwane ha'a-mama'ai rai to'ia Babilon na'i rarona moi ta'i dangi. 'Iraau saeni Babilon rai maesiraau hioro, rai angi uru-uru ma 'ai rago i nei narai mae. Mana 'eu 'ai suungiai 'omaasi, 'inia Araha God na mena nai hiiria."

⁹ 'Iraau mwani mwaeraha na'i marewana narau taritari'a beia marau hasura'ini'i beiai maho goro na to'ora'i, rai ahutotou marai angi uru-uru na'i 'oha rai re'iai asuhanai 'eu 'oha nai noro.

¹⁰ Rai mamaa'usiai ha'a-mama'ai na auru na'i hungana. Rai ura ha'atau marai o'ani, "Ha'arohaiai kae 'omaa baabau ani, ha'arohaiai Babilon! 'Agu 'asu'a moi mana ha'a-mama'ai ana 'a to'ia'a."

¹¹ 'Iraau hako'i sae raoraonga'i bori na'i marewana rai ahutotou marai angi 'inia 'a bwa'i sae naigu hori'i maho rai raonga'ini'i.

¹² 'A bwa'i sae nai hori'i gol mana silva mana hau 'ome goro mana pal mana bwana hori bwara 'onaai silika mana bwana 'ome goro mamaahui mana borabora'a mana wangawanga. Ra to'ora'i ro'u i hasi'ei sisi'ini goro mana maho 'ome goro ra tau'arodi 'ini'i rihoi elopant mana maho ra tau'arodi 'ini'i hasi'ei hori bwara, mana maho ra tau'arodi 'iniai 'aeana mana bras mana hau 'ome goro.

¹³ Rau to'ora'i ro'u tara'i bori he'ete'i, maho 'onaai waen mana rumu mana insens, nei he'ete'i hairiu, mana maho ra ha'angaugoroi mahoingau mana flaoa mana wiit mana kau mana siip mana hoosi mana bwea ra oge'i hoosi. Rau to'ora'i ro'ui slev 'anai raonga'ini'i.

¹⁴ 'Iraau sae raoraonga'i bori rai o'ani, "Ha'arohai'o Babilon. Mwani maho goro na'o raba to'ora'i di'u ani ra ai'a'i'a! Mana mwani maho nara ha'ata'iniai toto'ora amua ra hako'a ma 'ogu bwa'i re'i'i ro'u ta 'oha."

¹⁵ 'Iraau sae raoraonga'i bori narau toto'ora 'iniai raoraonga'i adaau tanaai 'omaasi, rai mamaa'u 'oha rai re'iai ha'a-mama'ai na to'ia. Rai ura ha'atau, rai ahutotou marai angi.

¹⁶ Rai o'ani, "Ha'arohaiai kae 'omaai Babilon! 'A ho'osi'i bwana 'ome goro ra mamaahui mana wangawanga mana borabora'a, ma 'ome goro 'ini'i maho ra tau'arodi 'iniai gol mana hau 'ome goro mana pal.

¹⁷ 'Agu 'asu'a moi mana mwane toto'ora ana'i ra ai'a'i hako'a!"

'Iraau mwani sae bwauodo suri'i haka mana sae tatau'aro adaai mana nei ra ta'e suri'i haka mana sae raoraonga'i bori nara dau ha'a 'ini'i haka rai ura goni ha'atau maraigu wana.

¹⁸ 'Oha rai re'iai asuhanai 'eu 'oha nai noro i Babilon, rai o'ani, "Ai'a ta 'omaa nai ta'isada bei'o Babilon."

¹⁹ Naasi marai nuga kahua 'ada'i bwaudaa'i 'iniai ahutotou adaau marai angi. Rai o'ani, "Ha'arohaiai Babilon! 'Iraau nei ra hahano suriai asi suri'i haka rau toto'ora 'ini'i maho goro na to'ora'i ma na'i moi gere madoraa ma ai'aa'a i 'omaasi."

²⁰ 'Amou na'i aro, mou ga'i wa'ewa'e! Mi'amoui sae ana'ia God miraaui Ha'ataari mana Rarabea mou ga'i wa'ewa'e ro'u 'iniai ha'a-mama'ai na haua God tanaai Babilon 'iniai here na haua tana'amou.

²¹ Hoita, ma 'e ta'i enjel na mena di'u 'a rahiai kae hau ma gaasia na'i asi ma o'ani, "Ai 'onaai gaasia nau haa i hauni i kaia rai haa i 'omaai Babilon. 'Agu bwa'i ura'a aho'i ro'u ta 'oha.

²² Na'i raronai 'omaasi ragu bwa'i rongoa'a ro'u i angianginai gitaa mana uhi-uhi 'au mana ahuri mana gana. 'A bwa'i 'oha raigu ha'a-urasia ro'u ta dora ni tagora mana dora ni tau'aro flaoa 'anai ha'atoto bred.

²³ 'Abwa'i raita naigu marewa ro'u na'i 'omaasi ma bwa'i ta sae raigui ha'aha'iwaia ro'u na'i 'isi. Na'i na'o, 'iraaui sae raoraonga'i bori amu'i narau ha'i saemaua na'i marewana. Ma'o ha'abweubweu'i sae suri 'ado marau 'inia'i 'uaasiraaui amua.

²⁴ Ni ha'a-mama'ai 'a dio na'i hungamu 'inia'i ha'a-ahe'i amu'i 'abudaa'i sae ana'ia God miraaui Rarabea mana mwani sae na'i marewana."

19

Gana Wa'ewa'e Na'i Aro

¹ Na'i muri mau rongoai maho na rongo 'onaai'i ringedi mwane sae rago na'i aro. Ra totoro o'ani, "Ha'agorohia Araha God aga na ha'atahigia. 'Iia 'a hauasa ma mena.

² Ni hihiri ana 'a odo-odo ma goro tatarasi. Ni urao rebirebi na ha'oraora'araui saeni marewana 'inia'i here ana na ai'a goro, 'ia God 'a hiiria ma ha'a-mama'aia 'inia'i ngahui'i ana'i sae tatau'aro ana'ia God."

³ Miraaui ha'atee raha o'ani ro'u, "Ha'agorohia God! Ni 'omaai Babilon 'a bwa'i agoheta'i asu 'inia'i noro na haa."

⁴ Miraaui rua tangahuru mana hai saemaua mana hai maho tahitahi ani, rau topira'i ruru marau mwaoro dio na'i ano marau ha'arahesia God na heinagu na'i dora ni mwaeraha ana. Rau o'ani, "Amen! Ha'agorohia God."

Ngau Goni Na'i Ha'iwai Anai Gare'i Siip

⁵ Ma'e ha'atee na hura'a mai baaniai dora ni mwaeraha, 'a o'ani, "T'amou nei na mou ha'ahoua God, moi ha'a-aneanea. T'amoui sae tatau'aro ana'i, rei'uaa na i'oe 'e sae raha ma'ua 'e taraani sae moi, moi ha'a-aneanea God!"

⁶ Mau rongoai maho na rongo raha 'onaa kae ruruhai sae ma raba rongo 'onaai wai na ahe, ma guruguru ma pusu, 'a raba rongo 'onaai hita. Rau o'ani, "Ha'agorohia Araha God aga! 'Inia 'iia 'a mena di'u'i mwane mareho hako ma heimarungi 'onaai mwaeraha.

⁷ Gai wa'ewa'e magai ha'aasaa, 'inia naani'a i dangi 'anai ha'aha'iwaiai Gare'i Siip. Na urao rarui hagugoni 'a ha'aagau'a.

⁸ Ra bwani haua tanaa i bwana ni ha'iwai ana. 'A mamaahui wadowado ma wadiwadi. Ni bwana 'a ura 'inia'i maho goro rau haa'i sae ana'ia God."

⁹ Mana enjel 'a o'ani 'iniaui, "'Oi usu'i dio maho 'ini. 'Ia God 'ai ha'agorohirai nei ra ari'ahuraaui 'anai ngaugoni na'i ha'iwai anai Gare'i Siip." Mana enjel 'a o'ani ro'u, "Hadahada nau haa'isi, ra'i ha'atee ana'ia God nara ha'a-momori."

¹⁰ Mau topira'i ruru mau abwa auru na'i ano tanaai enjel 'anai ha'arahesia. Mana enjel 'a o'ani 'iniaui, "'Oi abu haua o'asi tanaau. 'Inau 'e sae tatau'aro ro'u moi 'onaai'o ma 'onaairaaui ro'u tara'i nei narau araisuri'i ha'ausuringa'i na 'ia Jisas 'a ha'ata'ini'i. 'Oi ha'arahesia moia God. Na nei na ha'arangasi'i hura'a 'ado'adona'i a God, 'ai ha'arangasia ma'ata i mareho na 'ia Jisas 'a ha'ata'ini'i."

'Ia Mo'o Na Ta'e

Na'i Hunganai Hoosi Mamaahui

¹¹ Mau re'iai aro 'a wawaa, mau re'ia ro'u i hoosi mamaahui. 'Ia mo'o na ta'e na'i hungana, atana 'ia Mangudi ma'ua Ha'amomori. 'A hihiri odo-odo ma odo-odo na'i 'oha na hura'a 'inia hei'oi.

¹² Ni maana ra 'ora'ora 'onaai ngarungarui 'eu mara rago i didimaa ni mwaeraha na to'ora'i, 'inia 'iia naasi huunai mwaeraha. 'E ata ra usua beia, me 'iia moi na 'iraraai 'ado'ado 'ana.

¹³ Mana bwana ana 'a buni 'inia 'abu, mana atana mo'osi, naasi Ha'atee ana God.

¹⁴ 'Iraau mwane sae hehei'oi na'i aro rau ta'e suri'i hoosi mamaahui marau suria mo'osi. Rau ho'osi'i bwana mamaahui nara wadiwadi.

¹⁵ Ma'e naihi na mwamwaku na hura'a na'i ngoona 'anai ha'ahoraui mwane marau. Na heimarungi ana 'ai wetewete di'u. 'Ai ha'ata'ina taesu'a ana God huunai mena 'oha nai rogairau maerongana'i 'onaai sae na buu roga'i huadi grep 'anai ha'ahura'ahi'i wadi.

¹⁶ Na'i bwana ana ma na'i 'abina ra usuai ha'atee na o'ani, "Huunai Araha mana huunai Mwaeraha."

¹⁷ Mau re'iai enjel na ura na'i sina. 'A ari'ahuraui mwani manu na'i ahoasara, 'a o'ani, "Moi boi mamoi rurugoni na'i ngaugoni na haua God.

¹⁸ 'T'amou moi ngaa'i hasi'odi mwani mwaeraha, mana hasi'odi na'ohadi sae hehei'oi miraaui sae hehei'oi, mana hasi'odi hoosi mana nei ra ta'e suri'i, miraaui slev mana nei ra ai'a slev, mana hasi'odi saemau miraaui taraani sae ro'u."

¹⁹ 'Au re'ia ro'u i kae mwamwaa wasi 'ome ta'aa miraaui mwani mwaeraha na'i marewana miraaui sae hehei'oi adaa'i. Rau boi 'anai heingahui beia mo'o na ta'e na'i hungana hoosi mamaahui mana ruruha ana.

²⁰ Marau dauraru i mwamwaa wasi mana Rarabea pwapwari'i. 'Ia mau Rarabea pwapwari'i na haa'i ha'abu'oahu 'anai tau'aro tanaai mwamwaa wasi 'anai ha'abweuraui nei ra to'oraai ha'ara anai mwamwaasi mara ha'arahesia araaranunu ra aranununa 'inia mwamwaasi. Rau gaasiraru ha'i tahitahi na'i bwerai 'eu na noro 'inia hau madoro ra 'unua 'inia salfa.

²¹ Mana sae hehei'oi adaru'i, rau ngahuraui 'inia naihi na mwamwaku na hura'a na'i ngoona mo'o na ta'e na'i hungana hoosi. Mana mwani manu ra roho dio mara ngaa'i abedaa'i narau masu riu 'ini'i.

20

'E Ta'i Merui Harisi

¹ Mau re'iai enjel na dio mai baaniai aro beiai kii anai kae waumu na ai'a to'o hahakona. 'A dadaa ro'u i kae arihau.

² Ma tosiai draegon 'inia arihau 'anai ha'abwarasia suria ta ta'i merui harisi. Na draegonisi, naia mau i mwaa ani ra 'unua 'inia Ha'ahuni ma'ua Saetan.

³ Mana enjel 'a gaasia dioi draegon na'i waumu ma pwaru bwarasia ma ha'ababaua. 'Ai awa 'isi suria ta ta'i merui harisi maigu matai ha'abweuraui ro'u i saenai marewana. Ma'ata na'i 'ohasi rai ha'ahura'ahia moi ta gere madoraa.

⁴ Mau re'i'i dora heheinagu adaa'i mwaeraha. 'Iraui nei ra heinagu suri'i, neiraaui nei ra sigihirau 'anai hihiri. Mau re'i'i ro'u i aungadi nei ra horosi'i 'u'udi suriai taroha'ina adaaui ha'atee ana'ia God mana ha'ausuringa'i ana'ia Jisas. 'Iraui ro'usi rau ai'a ha'arahesia mwamwaa wasi mana araaranunu ra aranununa 'inia mwamwaa wasi naasi. Marau ai'a rabasia dorai nugaai ha'ara anai mwamwaa wasi na'i rimada ma'ua hauraeda. 'Iraui rai tahi aho'i ro'u marai heimarungi beia Kraest suria ta ta'i merui harisi.

5-6 Neiraausi nei tahamora ra ha'a-suruta'eraau aho'i baaniai mae. Rau maea mia God 'a ha'agorohiraau. Na ruanai mae nara 'unua 'iniaia bwerai 'eu 'agu bwa'i to'iraau'a. Rai ha'i Piriisi tanaa God mia Kraest marai ta'i heimarungi suria ta ta'i merui harisi.

'A bwa'i ta sae ro'u raigu ha'a-suruta'ea baaniai mae tari murinai ta'i merui harisi.

'Ia Saetan 'A Heho'a

7 Na'i murinai ta'i merui harisi, 'ia Saetan rai ruhasia baaniai rumaniho'o.

8 Ma'ai ha'abweuraau sae suri'i mwani dora hako na'i marewana nara 'unuraau ro'u 'iniaia saeni Gog mana saeni Magog. Rai rago 'onaai nunu'u na'i one. 'Ia Saetan 'ai 'unuraau mai 'anai hei'oi beiraau sae ana'ia God.

9 Rai hahano mai marai awa gariai dora ra awa iei sae ana'ia God mana 'omaa na 'ia God 'a ta'ahia. Rei'uaa nai o'asi, ni 'eu 'ai dio mai baaniai aro 'anai ha'a-ai'araau.

10 Mia Saetan, mo'o na ha'abweuraau, rai gaasia na'i bwerai 'eu na noro 'iniaia hau madoro ra 'unua 'iniaia salfa. 'Ai awa beiai kae mwamwaa wasi mana Rarabea pwapwaari'i nara bwane gaasirarua na'iei ani. Rai rongomaata'i goni suri'i rodo mana dangi na bwa'i hako.

'Ia God 'A Hiiriraui Noni

11 Mau re'iai dora heheinagu anai mwaeraha 'a mamaahui ma'e nei na heinagu na'iei. Mana marewana mana aro marawa raru hano baania mo'osi na ai'a ta sae naigu re'irarua ro'u.

12-13 Mau re'iraui sae ra mae'a, 'iraui sae ororiu miraau taraani sae ro'u, ra ura na'i maanai dora heheinagu anai mwaeraha. 'Iraui nei nara awa ga'u na'i dora adaui nei ra mae, ra awa ro'u 'isi goni beiraui nei ra mae na'i asi. Mia God 'a kehasi'i buka ra ha'arangasi'i taha ra haa'i sae 'oha ra tahi mau, ma kehasia ro'u i buka ni tahi. Mia God 'a hiiriraui sae suriai mareho nara ha'arangasi'i nara awa suri'i buka 'isi.

14 Na'i muri, na mae mana dora adaui nei ra mae ra gaasirarua na'i bwerai 'eu. Ni bwerai 'eu naasi ruanai mae.

15 'Tatei na ai'a awa i atana na'i buka ni tahi, rai gaasia na'i bwerai 'eu.

21

Ahoasara Haoru Mana Marewana Haoru

1 Mau re'ia ro'u i marewana haoru mana ahoasara raru ai'aa, mana asi 'a o'asi ro'u.

2 Mau re'iai Jerusalem haoru, i 'omaa maea, 'ia God 'a ha'ataaria dio mai baaniai aro. 'A 'onaai gere urao na ha'aagau 'anai ha'iwai na siri suri'i bwana 'ome goro 'anai heisadoi beiai mwane ana.

3 Mau rongoai ha'atee na boi baaniai dora heheinagu anai mwaeraha. 'A o'ani, "'Omaa ana God 'a awa'a beiraui sae ana'i. 'Ia God 'ai awa beiraui miraui ra'i sae ana'i. Ha'amomori, 'ia God haaria 'ai awa beiraui.

4 'Ia God 'ai idu'i'i wai baani'i maadaa'i. Raugu bwa'i mae'a ro'u ta 'oha ma'ua ahutotou ma'ua angi ma'uasi rongomaata'i. Mwani maho ta'a'i ra to'iraui ga'u, ragu ai'a'i'a."

5 Mia mo'o na heinagu na'i dora heheinagu anai mwaeraha 'a o'ani, "'Au ha'ahaoru'i hakoi mwani maho!" Magu o'ani ro'u 'iniaui, "'Oi usu'i dioi taha nau 'unu'i. Ha'atee agu'i ra ha'a-momori ma'o matai 'u'uri'i."

6 Ma o'ani ro'u, "Mwani maho ra agau'a. 'Inau naasi Alfa mana Omega, i taraawa'ana mana hahakona. 'Inau wai hisu dadara'a 'iniaui wai na hura'a mai baaniai hurahurai wai ni tahi tanaraui nei ra raba gono.

7 'Iraui nei ra ura baabau tari hahakona rai daa'i mareho goro 'isi. Minaui wai ha'i God adaui miraui rai ha'i sae agu'i.

⁸ Mawai 'unua tana'o i taha nai to'iraau nei ra maaa'uta'i hinihiniau, ma'ua murisiau, ma'ua to'ora'i baronga ta'a'i ma'ua heingahu ma'ua awa wawaasua'a ma'ua hai'uaasi ma'ua ha'arahesi'i araaranunu ma'ua pwapwaari'i. Rai siri na'i ruanai mae, rai gaasiraau na'i bwera na noro 'iniau hau madoro ra 'unua 'iniau salfa."

Jerusalem Haoru

⁹ Mau re'iai ta'i 'iniraau biu enjel nara daa'i rabo'o nara honu 'iniau biu ha'a-mama'ai ani. 'A boi beiau ma o'ani, "'Oi boi mawai ha'ata'inia tana'o i gere urao nai wainai Gareu Siip."

¹⁰ 'Iniau hei'a'auhi anai Hi'ona Maea, i enjel 'a waiuu ara'a na'i hun-gahunga ahaaha. Ma ha'ata'inia tanaau Jerusalem, 'omaa maea na dio mai baania God na'i aro.

¹¹ Ni rarahana God 'a marewa hako 'ari suriai 'omaasi. Mana 'omaasi 'a marewa wadowado 'onaai hau wadowado ra 'unua 'iniau Jaspaa ma ma'inora 'onaai gilaasi.

¹² Ni 'omaasi ra bara garia 'iniau bani hau na ahaaha ma bwabwanahora ma to'oraai ta'i tangahuru mana rua maraaruma. 'Ado maraaruma ra 'ado enjel 'ana'i 'omesuria. Mana 'ado maraaruma ra usu'i ei atadi 'ado ta'i tangahuru mana rua burungadaa'i Israel.

¹³ 'E oru maraaruma na awa na'i aba na ara'a iei sina, 'e oru na awa na'i aba na suu iei sina, 'e oru na awa aba bo hura'a, mana nata oru na'i aba bo siri.

¹⁴ Na'i wa'anai bani hau anai 'omaasi, 'e ta'i tangahuru mana rua kae hau na awa 'ana'i dau 'o'oriai bani. 'Ado hau ra usu'i ei atadi 'ado ta'i tangahuru mana rua Ha'ataari anai Gareu Siip.

¹⁵ Mana enjel na ha'atee tanaau 'a to'oraai mareho 'ana'i tohotoho nara tagorahia 'iniau gol 'ana'i tohongiai 'omaa mana bani hau 'ana'i 'omaa mana maraaruma 'ana'i bani hausi.

¹⁶ 'Omaasi 'ado hai aba 'inia, ra ta'isada, tewa ana mana bwabwahora ana. Mana ahaaha na haa i hai aba ra ta'isada ro'u, 'a 'ome 'onaai bakosi. 'Oha na enjel 'a tohongia, ni tohotoho anai 'ado aba 'e rua meru hai 'arangi kilomita. Ni tewa mana ahaaha mana bwabwahora na haua ra ta'isada hako.

¹⁷ Mana enjel 'a tohongia ro'u i bani hau 'ana'i 'omaasi. Ni ahaaha na haa, 'e oru tangahuru mana ono tahanga. Tohotoho na hauai enjel 'a 'ona ro'u moi herehere nara hahaua ro'u moi sae.

¹⁸ Bani hau 'ana'i 'omaasi ra tau'arona 'iniau hau ra 'unua 'iniau Jaspaa mana ano mana mwani maho nara tau'arona 'iniau 'omaasi ra tau'arodi 'iniau huunai gol na ma'inora 'onaai gilaasi.

¹⁹ Ni kae hau ra dau 'o'oriai bani 'ana'i 'omaa ra ha'arauni'i 'ini'i hau 'ome goro.

Hau tahamora na dau 'o'oriai bani ra ha'araunia 'iniau hau 'ome goro
ra 'unua 'iniau Jaspaa,

ruana ra raunia 'iniau Safae,

oruna Agit,

haina Emarol,

²⁰ rimana Oniks,

onona Kanalian,

biuna Krisolait,

waruna Beril,

siwana Topas,

tangahuruna Krisopeis,

tangahuru mana ta'ina Jasing,

mana tangahuru mana ruana Ametis.

21 Honohono 'ada'i ta'i tangahuru mana rua maraaruma 'anai bani ra tau'arodi 'inia pal, 'e ta'i pal ma'e ta'i honohono. Mana tara anai 'omaa ra tau'arodi 'inia huunai gol na ma'inora 'onaai gilaasi.

22 'Au ai'a re'ia ta ruma maea na'i 'omaasi. 'Inia 'ia Araha God huunai mena mana Gare'i Siip raru awa tarau 'isi. 'Irarua nararu 'onaai ruma maea anai 'omaasi.

23 Mana 'omaasi 'agu ai'a 'irisia'ai hura mana sina 'anai ha'amarewaa. Ni rarahana God mana Gare'i Siip raru ha'amarewaa'a.

24 'Iraau mwani sae suri'i 'ado marau, marewa na'i 'omaasi na haua tanaraau marewa 'anai hahano suria. Mana mwani mwaeraha rai wai mai toto'ora adaa'i na'i 'isi.

25 Ni maraaruma na'i bara 'anai 'omaasi ra ai'a matai honosi'i, 'inia na'i 'isi 'a bwa'i rodo.

26 Na mwani toto'ora adaa'i mwani marau mana maho goro ra to'ora'i rai waa'i mai na'i 'omaasi.

27 I mareho 'anai haa'i 'ini'i hereta'aa mana sae hehereta'a'i miraaui sae pwapwaari'i rau bwa'i awa na'i 'omaasi. 'Iraau moi nei ra awa i atadaa'i na'i buka ni tahi anai Gare'i Siip narai matai awa na'isi.

22

1 Mana enjel 'a ha'ata'inia tanaau wai ni tahi na wadora'i 'onaai gilaasi. 'A ahe hura'a baaniai dora heheinagu ana God mana Gare'i Siip.

2 Ma ahe dio na'i 'ubutanai tara raha na'i 'omaa. 'Ado bobo i wai ra tahi ei hasi'ei ni tahi nara hungu 'ado hura suriai ta'i harisi. Rawadi 'iraau sae suri'i 'ado marau na'i marewana ra ha'i merisini 'ini'i 'anai ha'agorohi'i daoha adaa'i.

3 Ni ha'a-mama'ai ana God 'a bwa'i dio'a i hungadaui sae na'i 'omaasi. 'Ia God mana Gare'i Siip rarui heinagu suri'i dorani heimarungi adaru'i, miraaui sae na'i 'omaasi rai ha'arahesia God.

4 Marai re'ia haaria God mana atana 'ai awa na'i hauraeda.

5 Na'i 'omaasi 'abwa'igui rodo'a ro'u ta 'oha, ma bwa'i sae nai 'irisia ta raita 'anai ha'amarewa ma'ua 'ai 'irisiai marewanai sina. 'Inia 'ia Araha God naasi raita adaaui, miraaui rai heimarungi tarau beia 'onaai mwaeraha.

Na Aho'i Mai Ana Jisas

6 Mana enjel 'a o'ani ro'u 'iniau, "Ha'atee 'ini ra ha'a-momori ma'o matai 'u'uri'i. 'Ia Araha God na ha'ataariai Hi'ona Maea ana tanaraau Rarabea, 'iia 'a ha'ataariai enjel ana tanaraau sae tatau'aro ana'i 'anai ha'ata'inia tanaraau taha na bwa'i orea mai to'o'a."

7 'Ia Jisas 'a o'ani, "'Ado'adoa! 'Inau 'abwa'i orea mawai aho'i'a mai. 'Ia God 'ai ha'agorohiraui nei ra suriai taha na ha'arangasia i bukani."

8 'Inaua Jon nau rongo'i, mau re'i'i maho 'isi. 'Oha nau rongo'i mau re'i'i hako, 'au topira'i ruru mau abwa aurui ano 'anai ha'arahesia enjel na ha'ata'ini'i tanaau.

9 Mana enjel 'a o'ani, "'Oi abu haua o'asi, 'inia 'inau 'e sae tatau'aro ro'u moi 'onaai'o miraaui Rarabea, miraaui ro'u i nei ra araisuri'i taha ra usu'i dio na'i bukani. 'Oi ha'arahesia moia God!"

10 "'Oi ha'arangasi'i hura'ai taha ra ha'ata'inia tana'o na'o usua na'i bukani. 'Inia 'abwa'i orea marai to'o'a."

11 'Iraau sae ora-ora'a rai haa'i moe'a i here ora-ora'a, miraaui sae hehere ta'aa rai haa'i moe'a i here ta'a'i, miraaui sae goro rai haa'i moe'a i here goro, miraaui sae odo-odo rai haa'i moe'a i here odo-odo."

12 Mia Jisas 'a o'ani, "'Ado'adoa! 'Abwa'i orea mawai aho'i mai. 'Oha wai aho'i mai wai tahariraui sae suriai taha rau haa'i."

13 'Inau naasi Alfa mana Omega, i taraawa'ana mana hahakona.

¹⁴ 'Ia God 'ai ha'agorohiraau nei ra wasi ha'a-wariwari'i bwana adaa'i. Miraau rai ngauai huanai hasi'ei ni tahi marai ha'awateraau 'anai siri na'i maanai bara anai 'omaa.

¹⁵ Miraau sae hehere ta'aa mana hahai'uaasi, mana sae ra wawaasua'a, mana sae hahaingahu, mana sae ra ha'arahesi'i araaranunu, mana sae ra pwapwaari'i, rai awa na'i hura'ai murinai 'omaa."

¹⁶ "'Inaua Jisas nau ha'ataariai enjel agua 'anai taroha'ini'i maho 'ini tana'amou, 'i'amou sae ni heisoi namou awa suri'i mwani dora. 'Inau 'au huta na'i burungana Mwaeraha Deved minau naasi hee'u-ni-dangi na bewaa."

¹⁷ I Hi'ona Maea miraau sae hinihini nara 'onaai gere urao nai wainai Gare'i Siip, raru o'ani 'inia Jisas, "'Oi boi!" Mia tei na rongoai ha'ateesi 'a ga'i o'ani ro'u, "'Oi boi!" Mia tei na raba gono, 'oi boi! 'Onaa 'o rabasiai wai ni tahi, 'oi boi ma'oi haua, 'oi haua dadara'a moi.

¹⁸ Naani ha'atee ha'abasu agua tanaraau nei ra rongoai ha'atee rarabea nara awa na'i bukani. 'Ia tei nai a'oi'i taha ra maani'i na'i bukani, 'ia God 'ai ha'a-mama'aia 'onaai ha'a-mama'ai ra awa na'i bukani.

¹⁹ Ma 'iatei nai rahi'i tara'i ha'atee rarabea ra hadanga'ini'i na'i bukani, 'ia God 'ai rahia ro'u baania i maho goro ra hadanga'ini'i na'i bukani, ma bwa'i awa na'i 'omaa maea, ma bwa'i haua ta hua baaniai hasi'ei ni tahi.

²⁰ 'Ia Jisas na 'unu'i maho 'ini 'a o'ani, "Ha'amomori! 'Abwa'i ore'a mawai aho'i mai!"

Naasi Araha Jisas, 'oi aho'i mai raurau.

²¹ 'Au ha'arahesi mia Araha Jisas 'ai goro 'ini'amou hako. Amen.

DIKSONARI

Aha ha'ara (*Circumcision*) Na'i ringeringe adaa'i Jiu, rau matai hauai maho nara 'unua 'iniaia aha ha'ara na'i warunai dangi murinai huta anai gare mwane. Mana mareho nara haua naasi ra aha horoosiai 'uri'urinai maho anai gare mwane. I aha ha'ara 'e ha'ara 'anai ha'ata'inia do 'ia mo'osi 'e ai Jiu me 'iia 'e ta'i 'iniraau noni ana'ia God. (Jenesis 17:4-7, 19)

Bakosi ni Duruduru (*Ark of the covenant*) Ni Bakosi ni Duruduru ra tagoraa 'iniaia hasi'ei maragu kuaia 'ari hako'i abena 'iniaia gol. Na'i raronai bakosisi nara nugaa i rua hau papaheta'a nara usua iei ta'i tangahurui ha'atora. Mara nugaa ro'u i 'a'abi ana Eron mana hua i wai na honu 'iniaia mahoingau nara 'unua 'iniaia "mana." 'Iraau sae ni Israel rau waiai bakosisi 'ari suri'i mwani dora narau 'ari suri'i.

Ni bakosisi mana mareho nara awa na'i raroni ra maea di'u, mana mareho 'isi ra'i ha'ara 'ini'i duruduru ana'ia God beiraau sae ana'i. 'Ari tari na'i 'oha narau ha'a-urasi hako'a i Ruma Maea ana God na'i Jerusalem naragu nugaa siri bakosisi na'iei.

Duruduru (*Covenant*) Na'i Baebol, ni 'ado'ado 'anai durudurusi 'a 'onaai mareho na rua sae ma'ua rua ruruhai sae nararu ahu aratara 'inia. 'Onaai heihauu, nata ruruha 'a duruduru 'anai haua ta maho mana nata ruruha 'a duruduru ro'u 'anai haua ro'u ta mareho.

Na'i raroni Usu-usu Maea gau re'iai rua kae duruduru na 'ia God na haua. 'Etana, 'a hauai duruduru nara 'unua 'iniaia duruduru bwani (old covenant). Mana ruana, 'a haua i nei nara 'unua 'iniaia duruduru haoru (new covenant). Na'i duruduru bwani, 'ia God 'a hauai duruduru beiraau sae ni Israel. 'A durua do 'iia 'ai 'omesurirau ma 'ai ha'atahirau 'onaai 'irau rai araisuri'i mwani ringe ana'i na ha'arangasi'i tanaa Moses. Ma durua ro'u do 'ai ha'a-mama'airau 'onaai rai horoosi'i. Ma'ata 'a bwara tanarau 'anai araisuri'i hako i ringe 'isi, tarana naasi 'a bwara ro'u dorai odo-odo ro'u na'i maana God.

'Oha na 'ia God 'a haua i duruduru haoru, 'a durua do 'ai ruhasirau sae baani'i ora-ora'a adaa'i 'onaai rai hinihinia Jisas Kraest. 'Inia na'i mae na haua na'i dadaahoro, 'ia Jisas 'a dauai ha'amama'ai na 'igaau ga'i daua 'ini'i ora-ora'a agaa'i. Naasi na nei na hinihinia Kraest 'a odo-odo na'i maana God.

Draegon (*Dragon*) Ni draegon ra ai'a huunai awa na'i marewana. 'E mwamwaa nara mamaania moi maagu ai'a ta sae mau nai re'ia tanei. Ra 'unua do na mwamwaa 'a raba 'ome 'onaai haha, ma'ata 'e kae mwamwaa raha di'u. Na'i Buka Ha'ata'i 'i draegon 'a ura 'inia Saetan.

Enjel (*Angel*) 'I mareho nara 'unu enjel 'ini'isi, ra'i sae heheitaroha'i ana'ia God narau awa beia God. Ma'ata ra ai'a huudi sae. 'Irausi ra'i mareho tahitahi nagau bwa'i matai tarau to'o 'omesi'i moi tari 'oha narai raba ha'ata'i haarirau tana'o ma'oigui matai re'i'i.

'Ia God 'a ha'a-taarirau hura'a i enjel na'i marewana 'anai tatau'aro tanaa. Ra 'omesurirau sae ana'ia God 'ado 'oha. 'Ia Maekol naasi na'ohadaui enjel. 'E ta'i enjel na ororiu di'u ro'u, naasia Gabriel.

Farisei (*Pharisees*) 'Iraau Farisei ra'i na'otara ororiu na'i madoraa ana Jisas. Rau aidangisi'i mwani ha'atora mana ringe na 'ia God na 'unu'i tanaa Moses marau ha'ausurirau Jiu dorai araisuri'i hako. Rau a'oi'i ro'u wou i ringe ana'ia Moses 'ini'i ha'ausuringa'i adaa'i haarirau marau ha'ausurirau noni 'ini'i 'anai ha'isuri'i. Rau matai ha'aba'o di'u, 'inia rau 'adoma'inia do 'irau rau goro di'urau hako'i mwani sae.

Garei Inoni (*Son of Man*) Na'i Buka Duruduru Bwani, 'ia Rarabea Daniel 'a ha'atee rarabeanga'iniai Ha'atahi na 'ia God 'ai ha'ataaria dio mai 'anai ha'atahiraau noni baani'i ora-ora'a adaa'i. 'A 'unua mo'osi 'iniai Garey Inoni.

Na'i Buka Duruduru Haoru, 'a rago i 'oha na 'ia Jisas 'a 'unua haaria 'iniai Garey Inoni. 'E kae 'ado'ado na awa na'iei. Ni 'ado'ado 'ana, do 'ia God 'a ha'ataaria mai beiai mena ana. Ni atasi 'a ha'ata'inia do 'ia Jisas naasi God, me 'iia ro'u 'e huunai inoni.

Ha'ataari (*Apostle*) 'Ia Jisas 'a 'ome sigihiraau ta'i tangahuru mana waira rua sae baaniraau sae narau suria 'anai ha'i Ha'ataari ana'i. 'Iraausi narai ura 'inia Jisas na'i marewana. 'Ia Jisas 'a ha'a-taariraau hura'a 'anai maani'i tanaraau noni mareho narau re'i'i, ma 'anai taroha'inia tanaraau i Taroha Goro. 'Iraau narau na'otara tanaraau sae hinihini.

Tara'i sae ro'u 'onaasi a Pol, gau 'unua do 'iia ro'u 'e Ha'ataari rei'uaa na 'iia 'a ai'a ta'i 'iniraau ta'i tangahuru mana rua rongoiusuri ana'ia Jisas. 'Iia 'e Ha'ataari ro'u suria 'iia God 'a 'ome sigihia 'anai taroha'iniai Taroha Goro ma 'anai na'otaranai heisoi.

Ha'atahi (*Saviour*) Ra 'unua Jisas 'iniai Ha'atahi suria 'a ha'atahigia baaniai ha'amama'ai na 'ia God na ga'i haua tanagia 'ini'i ora-ora'a agaa'i. 'Iraau hako i noni 'a ta'isada do 'ia God 'a ga'i gaasiraau siri na'i mae tarau marai awa ha'atau baania. Me na'i 'oha na 'ia Jisas 'a mae na'i dadaahoro, 'a dauai ha'amama'ai na 'iraau rau ga'i daua, rei'uaa na 'iia ai'a haua ta ta'i ora-ora'a. Naasi 'ia God 'a mwa'emwa'e 'anai 'adoma'i nugasi'i ora-ora'a adaa'i nei nara hinihinia Jisas Kraest ma 'unua do rau odo-odo na'i maana. Na'i mae ana, 'ia Jisas 'a ha'atahiraau ro'u baaniai mena ana Saetan.

Heimarungi ana God (*Kingdom of God*) Tara'i 'oha, "kingdom of God" 'a ta'isada moi beiai hourana ana God ma'uasi heaven. Ma'ata, tara'i 'oha na 'ado'ado 'a gere he'ete'i. Na'i 'oha nara hadanga'iniai "kingdom of God" ra hadanga'iniai heimarungi na 'ia God 'a haua beiraau noni ana'i na'i raronai tahingadaa'i. 'Ia God 'a marungiraau sae hinihini 'onaai mwaeraha. 'Iia 'a tatahi bwarasiraau, 'a taguma'iniraau, 'a na'otaradaau ma 'unua tanaraau i taha narai haua.

'I 'oha na 'ia Jisas 'a boi na'i marewana, 'i heimarungi ana God 'a ataha mai. Ma'ata 'a ai'a 'onaai 'adoma'inia adaau Jiu. 'Iraau rau 'adoma'inia do 'ia Jisas 'ai ha'a-uriasai hourana ana na'i marewana. Ma'ata 'ia Jisas 'a boi 'anai heimarungi suri'i tahingadaa'i sae narai hinihinia.

Naasi na'i 'ohani, na heimarungi ana God 'a awa beiraau sae narau waia Jisas 'onaai mwaeraha na'i tahingadaa'i. Ma na'i 'oha nai aho'i mai, 'ai taraawa'a heimarungi na'i hourana ana na 'iraau sae rai matai 'omesia.

Hi'ona Maea (*Holy Spirit*) 'I Hi'ona Maea 'e God ro'u, 'ona Godi Ama, ma'ua Godi Gare, 'ia Jisas Kraest. Miraausi 'e ta'i God moi. Na Hi'ona Maea 'a sirihiraau ma rabe beiraau i nei nara hinihinia Jisas Kraest ma awa 'anai 'a'auhiraau.

'A ha'a-aidangisiraau sae 'ini'i mareho nara ha'a-momori. 'A ha'arahesi tanaa God taradaau sae hinihini. 'A na'otaradaau marai aidangisiai taha 'anai haua. 'A ha'a-weteweteraau sae hinihini marai taroha'ini'i ha'atee ana'ia God marai tau'aro tanaa. 'A haa'i bane ni tatau'aro tanaraau 'anai tau'aro 'ini'i 'anai ha'a-wetewetea i heisoi.

Kansol (*Council or Sanhedrin*) Ni Kansol 'e ruruha nara awa iei biu tangahuru mana ta'i saemaua adaau Jiu. 'Iraausi narau to'oraai mena 'anai hiiriraau Jiu suri'i taha narau ha'atari'a'i. Na Na'ohadaau Piriisi naasi na na'otaradaau. 'Oha ra waia Jisas 'anai awa na'i maanai Kansol, ra hiiria 'anai mae. Ma'ata 'iraau moi Rom nara to'oraai mena 'anai

ha'amaesiai sae na'i 'ohasi. Naasi marau ha'ataaria Jisas 'ari tanaa Paelat, 'inia 'iia naasi ai Rom, me 'iia na Primia na'i 'ohasi.

Rarabea (*Prophet*) 'I rarabea 'e sae na taroha'inia hura'a i taroha ma'ua hadahada na 'ia God na ha'ata'ini'i tanaa.

Na'i Buka Duruduru Bwani, 'ia God 'a ha'ataari'i mwani rarabea tanaraaui Israel. Tara'i nei 'iniraaui naasia Samiuel, Aisaea mea Jeremaea. 'Ia God 'a ha'ata'inia tanaraaui taha nai to'o ta 'oha nai boi mau. 'A 'unua ro'u tanaraaui maho 'anai 'unu'i tanaraaui Israel 'anai ha'a-aidangisiraaui 'ini'i ora-ora'a adaa'i.

Ringe ana'ia Moses (*Law of Moses*) Na'i Baebol, na'i 'oha nara 'unuai Ringe ana'ia Moses, ai'a do naia moi ta'i tangahurui ha'atora. Ra 'adoma'ini'i mwani maho nara awa na'i rima buka na 'ia Moses 'a usu'i. Naasi Jenesis, Eksodas, Levitikas, Nambas mana Diutronomi. 'I buka 'isi ra honu 'ini'i mwani ringeringe mana mwani ha'atora he'ite'i hairiu na 'ia God na nuga'i tanaraaui Jiu.

Rongoiusuri (*Disciple*) 'Iraaui nei narau suria Jisas marau baturongoi ha'atee ana'i marau araisuri'i, ra 'unuraau 'ini'i rongoiusuri ana'i a Jisas.

Rongo 'ini breidi nara ai'a dorari'i 'inia draebam (*Feast of unleavened bread*)

Ni rongosi ra ha'ato'oa suriai biu dangi na'i moi murinai Rongo 'anai 'adoma'i aho'isiai Roho Aharau. Suriai biu dangi, 'iraaui Jiu rau ngaa'i moi breidi nara ai'a dorari'i beiai draebam. Naasi herehere adaaui 'anai 'adoma'i aho'isiai 'oha na wauwa adaa'i ra hora hura'a baaniai Ijip. Na'i 'ohasi ra here ha'a-osaosa di'u, naasi tarana nara ai'a to'o madoraa 'inia 'anai dorari'i 'ini'i breidi adaa'i 'inia draebam.

Rongo nara 'unua 'inia Pentikos (*Festival of Pentecost*) Ni 'ado'ado 'anai Pentikos naasi rima tangahuru. 'Iraaui Jiu rau ha'ato'oai Rongo i Pentikos rima tangahuru i dangi murinai taraawa'anai Rongo 'anai 'adoma'i aho'isiai Roho Aharau. Rau ha'ato'oa na'i madoraa 'anai taragoni'i wiit na'i hura i Mei. Ni Hi'ona Maea 'a dio mai ma sirihiraau sae hinihini na'i 'oha nara ha'ato'oai Rongo i Pentikos. Tarana naasi nagaugu 'unua 'inia dangisi 'inia dangi Pentikos.

Rongo ni Roho Aharau (*Passover festival*) Ni Rongo ni Roho Aharau 'a ororiu di'u tanaraaui Jiu. 'I rongosi 'a waiwai ta'i sade mara haua 'ado harisi. Mana rongo naasi 'e rongo na 'iraaui Jiu rau 'adoma'i aho'isiai 'oha na 'iraaui wauwa adaa'i ra tau'aro 'onaai slev na'i Ijip tari 'oha na 'ia Moses 'a wairaaui hura'a.

Na'i 'ohasi, 'ia God 'a ha'abasuraau do 'ai ha'ataaria mai enjel ana 'anai ngahui'i gare mwane hutai na'o suri'i 'ado ruma. Ma'ata, 'a 'unua tanaraaui Jiu do rai ngahui'i tara'i garei siip marai more'i bwaui maraaruma adaa'i 'ini'i 'abudi. Rai haua o'asi, neina na'i 'oha nai boi enjel ni heingahu maai 'omesiai 'abu na'i maraaruma, 'ai roho aharau moi baaniai rumasi.

Taraawa'a na'i 'ohasi, suri'i 'ado ruma adaa'i Jiu ra ngahui'i garei siip marau ha'amatota'i 'anai ngaa'i suri'i 'ado 'oha narau ha'ato'oai Rongo ni Roho Aharau.

Ruma Maea ana God (*Temple of God*) 'Iraaui Jiu rau to'oraa moi ta'i Ruma Maea. Naasi ruma nara 'unua 'inia Ruma Maea ana God. 'I ruma maeasi 'ia Mwaeraha Solomon na tagoraa ma awa na'i Jerusalem. Naasi 'etanai Ruma Maea nara tagoraa. Na mwani mareho maea nara awa na'i Ruma Saira ana God, ra ru'u'i hako 'ari na'i Ruma Maea anasia God.

Taraawa'a na'i 'ohasi, 'iraaui Jiu rau matai haa'i ho'asi adaa'i moi na'i rumasi, 'agu bwa'i do ta dora he'ete'i ro'u. Naasi, na'i 'oha narau ha'ato'o'i dangi ororiu adaa'i ma'ua rongo adaa'i, 'iraaui Jiu rau hano 'anai 'ari na'i Jerusalem.

'Oha narau awa moi suri'i 'omaa adaa'i, 'iraau Jiu rau ha'arahesi suri'i ruma nara 'unu'i 'ini'i ruma ni ha'arahesi (synagogue). Rai 'oha'inia Usu-usu Maea marai sukuru hadahada, ma'ata rau bwa'i matai hauai ho'asi na'iei.

Ruma Saira ana God (*Tabernacle or Tent of God*) Na'i 'oha bwani, na'i 'oha na 'iraau Jiu ra hano hairiu na'i dora mangasara, 'ia God 'a 'unua tanaa Moses 'anai tagoraa ta ruma saira tanaa. Ma 'unu ha'agorohia tanaa i 'ome he'ua nai haua i ruma sairasi. 'A 'unua tanaa do 'ai tagorahia 'inia bwana 'ome goro mana uriuri mwamwaa. Rumasi rai matai rahia dio moi neina rai matai wawaa hairiu moi 'ari suri'i dora narai 'ari suri'i. 'Oha narai 'ariwou ta dora narai 'adoma'inia gere awa na'iei, marau ha'a-urasi ga'u marau mamaronga'inia Bakosi ni Duruduru na'i raronai.

Na'i raronai ahii nara nunuga iei Bakosi naasi, 'e ahii na maea di'u. Na'i ro'u i rumasi na 'iraau noni ra matai waa'i mai taha narau wate'i tanaa God mana Piriisi 'ai ho'asi 'ini'i tanaa God. Naasi taha narau haua moe'a 'ari tari 'oha na 'ia Solomon 'a ha'a-urasi Ruma Maea ana God (Temple) na'i Jerusalem.

Sadiusi (*Sadducees*) 'Iraau Sadiusi 'e ruruhai sae toto'ora beiraui Jiu. 'Iraau rau hinihinia do 'iraau sae rau ga'i araisuri'i moi ringe ana'ia Moses, ma'ata ra ga'i bwa'i araisuri'i ringe na 'iraau sae moi naragu a'oi'i moi wou na'i muri. Suriai o'asi ana narau matai heita'ia tarau 'inia beiraui Farisei. Tara'i hinihinidaa'i ra gere hehe'ete'i ro'u baaniraau i Farisei. 'Iraau Farisei rau hinihinia do 'iraau sae rai suruta'e aho'i murinai mae narai haa'i. 'Iraau Sadiusi rau ai'a hinihini o'asi.

Taroha Goro (*Gospel*) Na'i Baebol, 'oha nara 'unuai Taroha Goro, ra ai'a minimuai hai taroho goro ana Matiu mea Mak mea Luk mea Jon. Ni Taroha Goro, naasi taroha na 'ia God na haua tanaraui noni. Ni tarohasi, do 'ia God 'a ha'ataaria mai Garena na'i marewana 'anai ha'atahiraui noni baaniai ha'amama'ai nara ga'i daua 'ini'i ora-ora'a adaa'i.

Usu-usu Maea (*Scripture*) Na'i Baebol, na'i 'oha nara hadanga'inia Usu-usu Maea, ra minimu'i mwani buka na'i Buka Duruduru Bwani, taraawa'a na'i Jenesi 'ari tari na'i Malakae. Na'i madoraa adaaui Ha'ataari, na mwani buka nara awa na'i Buka Duruduru Haoru (New Testament) na'i 'ohanisi, ra ai'a nuga goni'i mau 'onaai ta'i buka. Naasi, na'i 'oha nara hadanga'inia Usu-usu Maea, ra hadanga'inia Buka Duruduru Bwani. Ma'ata na'i 'ohanisi, na'i 'oha nagau hadanga'inia Usu-usu Maea, gau 'adoma'ini'i mwani buka hako na'i raronai Baebol.

Dora 'anai sadoi'i tatara nara maani'i tara'i mareho ororiu

'A'auhiai nata nei

(Helping others) Matiu 6:1-4; 7:12; 25:31-46; Luk 3:10-11; 6:38; Buka Tatau'aro 11:27-30; 1 Korin 10:24; 2 Korin 8:1-15; 9:1-15; Galesia 6:9-10; Pilipae 4:14-19; Hibru 10:24; 13:1-3; 13:16; Jems 1:27; 2:15-16; 1 Jon 3:16-18.

'Adoma'i nugasi

(Forgiveness)

'Ia God 'a 'adoma'i nugasi'i 'inogaa'i. Matiu 26:28; Mak 11:25-26; Buka Tatau'aro 5:31; 10:43; 26:18; Efesas 1:7; Kolosae 1:13-14; 2:13-14; Hibru 10:17-18; 1 Jon 1:8—2:2.

'Adoma'i nugasiai nata nei. Matiu 6:12-15; 18:21-35; Mak 11:25; Luk 6:37; 17:3-4; 2 Korin 2:5-11; Efesas 4:31-32; Kolosae 3:13.

Araisuria God

(Obedience to God) Jon 14:15; 14:21; 14:23-24; 15:10-17; Rom 13:8-10; 1 Pita 1:14-16; 1 Jon 2:3-8; 3:22-24; 2 Jon 5-6.

Aro

(Heaven) Luk 12:32-34; Jon 14:1-3; 2 Korin 5:1-8; Pilipae 1:23; Kolosae 3:1; 1 Pita 1:4-5; Buka Ha'ata'i 4:1-11; 21:1-4; 21:22—22:5; 22:14-15.

Awa manego; Ha'a-anoano'o; Ha'a-auruhi'o

(Humility) Matiu 5:3-12; 18:1-5; Luk 14:7-11; 18:9-14; Efesas 4:2; Pilipae 2:3-11; Kolosae 3:12-13; Jems 4:5-10; 1 Pita 5:5-7.

Baronganai sae hinihini

(Characteristics of a Christian) Jon 13:34-35; 14:27; Rom 12:9-13; Galesia 5:22-26; Kolosae 3:12-17; 1 Tesalonaeka 5:16-18.

Bwareomaea

(Baptism) Matiu 28:18-20; Jon 3:22; 4:1-2; Buka Tatau'aro 2:37-42; 8:12; 8:36-38; 10:44-48; 16:14-15; 16:31-33; 19:1-7; 22:12-16; Rom 6:1-4; Galesia 3:26-27; Kolosae 2:12; 1 Pita 3:20-22.

Dora ni ha'amama'ai; Dora ni rongomaata'i; 'Eu na bwa'i kuru

(Hell) Matiu 10:28; 13:41-42, 47-50; 25:41; Luk 16:23-26; 2 Tesalonaeka 1:9; Buka Ha'ata'i 20:10-15; 21:8.

Gare ana'ia God

(Children of God) Jon 1:12-13; Rom 8:14-17; Galesia 4:6-7; Hibru 12:5-11; 1 Jon 3:1-3.

God

(God) Mak 10:27; 12:29-30; Luk 1:37; 6:35-36; Jon 4:24; Buka Tatau'aro 14:14-17; 17:22-31; Rom 1:18-23; 11:33-36; 1 Korin 8:4-6; 2 Korin 1:3; 1 Timoti 1:17; 6:15-16; Hibru 4:13; 10:30-31; Jems 1:17; 1 Pita 1:14-17; 1 Jon 1:5; 4:7-12; 4:16; Jiud 24-25; Buka Ha'ata'i 4:8-11; 15:3-4.

Gono raha 'ini waini bweu

(Drunkenness) Rom 13:13; 1 Korin 5:11; 6:9-11; Galesia 5:19-21; Efesas 5:18; 1 Timoti 3:1-3; Taetas 1:7; 1 Pita 4:3-5.

Gaumani

(Government) Matiu 22:15-22; Buka Tatau'aro 5:27-29; Rom 13:1-7; 1 Timoti 2:1-4; Taetas 3:1; 1 Pita 2:13-17.

Ha'a; Toto'ora

(Money, possessions) Matiu 6:19-21; 6:24-34; Luk 12:13-21; 12:32-34; Buka Tatau'aro 20:35; 1 Timoti 6:6-10; 6:17-19; Hibru 13:5-6; Jems 2:1-9; 5:1-6.

Ha'agorohiai sae baaniai daoha

(Healing) Matiu 4:23-25; 9:35; 11:2-5; Buka Tatau'aro 3:1-6; 8:4-8; 19:11-16; 28:8-9; 1 Korin 12:9; 12:29-30; 2 Korin 12:7-10; 1 Timoti 5:23; 2 Timoti 4:20; Jems 5:14-15.

Ha'apwa'ara

(Creation) Matiu 19:4; Jon 1:3; Buka Tatau'aro 14:15; 17:24-26; 1 Korin 8:6; Kolosae 1:15-16; Hibru 1:2; 11:3; Buka Ha'ata'i 4:11.

Ha'arahesi

(Prayer)

Ha'ausuringa'i 'ini ha'arahesi. Matiu 6:5-13; 7:7-11; 18:19-20; Mak 11:24-25; Luk 11:1-13; 18:1-8; 21:36; Jon 14:13-14; 15:7; 16:23-26; Rom 8:26-27; 12:12; Efesas 2:18; 6:18; Pilipae 4:6-7; Kolosae 4:2; 1 Tesalonaeka 5:17; 1 Timoti 2:1-4; 2:8; 4:4-5; Hibru 4:16; 10:19-22; Jems 1:5-8; 4:2-3; 5:13-18; 1 Pita 4:7; 1 Jon 3:21-22; 5:14-15.

Heiha'auu 'ini ha'arahesi. Matiu 11:25-26; 14:23; 19:13-15; Mak 1:35; Luk 5:16; 6:12; 22:32; 22:39-46; Jon 11:41-42; 17:1-26; Buka Tatau'aro 4:24-31; 16:25; 20:36; 21:5; Rom 1:9-10; 10:1-2; 15:30-33; 2 Korin 12:7-10; Efesas 1:15-20; 3:14-21; 6:19-20; Pilipae 1:3-5; 1:9-11; Kolosae 1:9-12; 4:3-4; 1 Tesalonaeka 3:9-13; 2 Tesalonaeka 1:11-12; 3:1-5; Hibru 5:7; 7:25.

Ha'arahesi araaranunu mana haa'i ha'abu'oahu 'inia mena anai adaro

(Idol worship and Sorcery) Matiu 4:10; Buka Tatau'aro 13:4-12; 17:22-31; 19:11-20; 1 Korin 5:11; 6:9-11; 8:1-13; 10:1-22; 2 Korin 6:14-18; Galesia 5:19-21; 1 Tesalonaeka 1:9-10; 1 Jon 5:21; Buka Ha'ata'i 21:8; 22:15.

Ha'ariri 'ini ngau; Nuga ngau

(Fasting) Matiu 6:16-18; Mak 2:18-20; Buka Tatau'aro 13:1-3; 14:23.

Ha'atee ha'agorohiai nata nei; Tagio tanaai nata nei

(Thankfulness) Luk 17:11-19; Jon 6:11; Rom 1:21; Efesas 5:20; Kolosae 2:7; 3:17; 4:2; 1 Tesalonaeka 5:18; 1 Timoti 2:1; 4:4-5.

Hagu nagai haua beiraaui sae hinihini

(Fellowship with believers) Matiu 18:19-20; Buka Tatau'aro 2:41-47; Rom 12:4-8; Efesas 1:22-23; 4:11-16; Kolosae 3:15-17; 1 Timoti 4:13; Hibru 10:24-25.

Haigaasi

(Divorce) Matiu 5:31-32; 19:3-9; Luk 16:18; Rom 7:2-3; 1 Korin 7:10-16.

Heiso ana Jisas Kraest

(Church of Jesus Christ) Matiu 16:13-20; Buka Tatau'aro 2:41-42; Rom 12:4-8; 1 Korin 12:12-30; Efesas 1:22-23; 2:19-22; 4:1-16; Kolosae 1:18; Hibru 10:24-25; 1 Pita 2:4-10; Buka Ha'ata'i 19:5-10.

Heita'ahi

(Love)

Heita'ahi ana God tanagia. Jon 3:16; Rom 5:8; Efesas 2:4-5; 1 Jon 4:9-10.

Gai ta'ahia God. Matiu 22:37-38; Mak 12:28-30; Jon 14:21; 1 Pita 1:8; 1 Jon 5:3.

Gai ta'ahigaau hairiu. Matiu 5:43-48; 22:39; Jon 13:34-35; 15:12-17; Rom 12:9-10; 13:8-10; 1 Korin 13:1-13; 16:14; Galesia 5:13-14; 1 Tesalonaeka 4:9-10; 1 Pita 4:8; 1 Jon 2:9-11; 3:11-18; 4:7-21.

Herehere 'anai ha'ah Hoa Saetan mana heiohong

(Overcoming Satan and temptation) Matiu 4:1-11; 6:13; Luk 22:31-32; Jon 17:14-19; Rom 8:31-39; 12:12; 16:19-20; 1 Korin 10:12-13; 16:13; 2 Korin 12:7-10; Efesas 3:20-21; 6:10-18; Pilipae 4:13; 1 Tesalonaeka 3:5-8; 2 Tesalonaeka 3:3; 2 Timoti 1:7-8; Hibru 2:18; 4:14-16; 12:1-2; Jems 4:7; 1 Pita 1:5; 5:8-11; 1 Jon 4:4; 5:3-5; Buka Ha'ata'i 12:7-12.

Hihiri ana God; Dangi ni hihiri

(Judgment of God) Matiu 7:21-23; 16:24-27; 25:31-46; Jon 3:18-21; 5:24-29; Buka Tatau'aro 17:30-31; Rom 2:1-11; 14:10-12; 1 Korin 3:10-15; 4:5; 2 Korin 5:9-10; 2 Tesalonaeka 1:5-10; Hibru 9:27-28; 10:26-31; 1 Pita 1:17; 4:3-5; Buka Ha'ata'i 20:11-15.

Hinihini

(Faith, believing)

Dauai tahi tarau 'iniaai hinihini. Jon 1:12; 3:15-18; 3:36; 6:47; 14:6; 20:31; Buka Tatau'aro 4:12; 16:30-31; Rom 3:20-22; 10:9-10; Galesia 2:16; Efesas 2:8-9.

Hinihini nagai haua 'onaai sae hinihini. Mak 11:22-25; Luk 17:5-6; Jon 14:1; Rom 5:1-2; 14:22-23; 1 Korin 13:13; 2 Korin 5:6-7; Galesia 5:6; Hibru 11; Jems 1:2-8; 2:14-26; 1 Pita 1:3-9.

Hi'ona Maea

(Holy Spirit) Matiu 28:19; Mak 1:9-11; 3:28-30; Luk 1:35; 3:16; 4:1; 11:13; 12:12; Jon 1:32-34; 3:5-8; 7:37-39; 14:15-17; 14:26; 15:26; 16:7-15; 20:19-23; Buka Tatau'aro 1:4-5; 1:8; 2:1-18; 2:38-39; 4:31; 5:3-5; 8:14-17; 10:44-48; 13:2-4; 15:28; 16:7-10; 19:1-7; Rom 5:5; 7:6; 8:9-16; 8:26-27; 1 Korin 2:4; 2:9-16; 3:16; 6:11; 6:19; 12:1-13; 2 Korin 1:21-22; 5:5; Galesia 3:2-5; 4:6; 5:16-18; 5:22-25; Efesas 1:13-14; 1:17; 3:16; 4:3-4; 4:30; 5:18-20; 6:17-18; 1 Tesalonaeka 1:5-6; 5:19; 2 Tesalonaeka 2:13; Taetas 3:5-6; Hibru 2:4; 9:14; 1 Pita 1:2; 1:11; 2 Pita 1:20-21; 1 Jon 2:20; 3:24; 4:13; 5:6-8.

Ho'asi; Watea Haari'o tanaa God

(Sacrifice) Matiu 9:13; Mak 12:33; Rom 12:1; Hibru 9:6—10:18.

Jisas Kraest

(Jesus Christ)

Jisas Kraest na Garena God. Matiu 11:27-30; 16:13-17; Luk 1:35; Jon 1:1-18; 5:19-29; 6:35-40; 8:58; 11:25-27; 14:5-11; 17:1-5; 20:26-31; Buka Tatau'aro 3:13-16; 4:10-12; Rom 1:3-4; 1 Korin 3:11; 2 Korin 4:4-6; 5:21; Galesia 4:4-5; Pilipae 2:5-11; Kolosae 1:15-20; 2:9-10; Hibru 1:1-14; 7:26-28; 1 Jon 2:1-2; 5:20; Buka Ha'ata'i 1:12-18; 19:11-16.

Jisas Kraest 'a huta 'onaai noni. Jon 1:14; Luk 1:26-38; Matiu 1:18-25; Luk 2:1-20; Matiu 2:1-23; Galesia 4:4-5; Pilipae 2:6-7; Hibru 2:14-18.

Jisas 'a ha'ausuriraau noni ma ha'agorohiraau baani'i daoha. Matiu 4:23-25; 7:28-29; 9:35-36; 11:1-6; Luk 4:14-44; Buka Tatau'aro 10:36-38; Jon 20:30-31.

Jisas 'a haa'i mwani ha'abu'oahu. Matiu 8:1-4; 8:5-13; 8:14-15; 8:23-27; 8:28-33; 9:1-7; 9:18-26; 9:27-31; 9:32-33; 12:9-14; 12:22; 14:15-21; 14:22-32; 15:22-28; 15:32-38; 17:14-18; 20:29-34; 21:18-22; Mak 1:21-28; 7:32-37; 8:22-25; Luk 5:4-8; 7:11-15; 13:10-13; 14:1-4; 17:12-14; 22:50-51; Jon 2:1-11; 4:46-54; 5:5-9; 9:1-7; 11:11-44; 21:4-6; Buka Tatau'aro 2:22.

'Iraau na'otara rau daua Jisas marau hiiria 'anai ha'amaesia. Matiu 26:47-68; 27:1-2; 27:11-31; Mak 14:43-65; 15:1-20; Luk 22:47-53; 22:63-71; 23:1-25; Jon 18:1-14; 18:19-24; 18:28—19:16.

Ra rabua Jisas na'i dadaahoro. Matiu 27:32-56; Mak 15:21-41; Luk 23:26-49; Jon 19:17-37.

Ra aoraa Jisas na'i wabwa. Matiu 27:57-66; Mak 15:42-47; Luk 23:50-56; Jon 19:38-42.

Jisas 'a tahi aho'i ma ha'ata'i tanaraau noni. Matiu 28:1-20; Mak 16:1-8; Luk 24:1-49; Jon 20:1—21:14; Buka Tatau'aro 1:3-8; 2:24-32; 3:15; 4:10; 4:33; 10:39-43; 13:29-39; 17:2-3; 17:30-31; Rom 1:4; 4:24-25; 1 Korin 15:3-8; 15:12-21; Buka Ha'ata'i 1:18.

Jisas 'a ara'ai aro. Luk 24:50-51; Buka Tatau'aro 1:9-11; 2:32-36; 5:30-31; Rom 8:34; Efesas 1:20-23; Pilipae 2:9-11; Hibru 1:3-11; 2:9; 4:14-16; 7:25-26; 10:12-14; 1 Pita 3:22.

Jisas 'ai boi aho'i mau. Matiu 24:29-44; Jon 14:1-3; Buka Tatau'aro 1:10-11; 3:19-21; Pilipae 3:20-21; Kolosae 3:4; 1 Tesalonaeka 1:9-10; 3:13; 4:13—5:11; 2 Tesalonaeka 1:6-10; 2:1-4; 1 Timoti 6:13-15; 2 Timoti 4:8; Hibru 9:28; 2 Pita 3:1-18; 1 Jon 3:1-3; Buka Ha'ata'i 1:7; 22:12-13.

Mae

(Death) Jon 6:39-40; 11:17-27; 14:1-4; Rom 8:10-11; 8:38-39; 14:7-9; 1 Korin 15:12-58; 2 Korin 5:1-10; Pilipae 1:20-24; 1 Tesalonaeka 4:13-18; Hibru 2:14-15; Buka Ha'ata'i 14:13; 21:1-4; 22:1-5.

Na'otara na'i heisoi

(Church leaders)

Barongadi na'otara na'i heisoi. Buka Tatau'aro 6:1-6; Buka Tatau'aro 14:23; 1 Timoti 3:1-13; Taetas 1:5-9.

Ha'ausuringa'i tanaraau na'otara na'i heisoi. Matiu 28:18-20; Luk 22:24-27; Buka Tatau'aro 20:17-35; 1 Tesalonaeka 2:1-12; 1 Timoti 4:1-16; 2 Timoti 2:1-26; 3:10-17; 4:1-5; Taetas 2:7-8; 1 Pita 5:1-4.

Ha'ahouraaui na'otara na'i heisoi. 1 Korin 9:14; Galesia 6:6; 1 Tesalonaeka 5:12-13; 1 Timoti 5:17-22; Hibru 13:7; 13:17.

Ngau maea

(The Lord's Supper) Matiu 26:26-30; Mak 14:22-26; Luk 22:14-20; Jon 6; 1 Korin 10:14-22; 11:17-34.

Nora ta'airaaui sae hinihini

(Persecution) Matiu 5:10-12; Mak 13:9-13; Luk 12:4-9; Jon 15:18-21; 16:1-4; Buka Tatau'aro 5:41; Rom 8:35-37; 12:12-14; 12:17-21; 1 Korin 4:11-13; 2 Korin 4:8-11; 12:10; Pilipae 1:28-29; 2 Tesalonaeka 1:4-8; 3:2-4; 2 Timoti 3:10-13; Hibru 10:32-39; 12:3-4; 1 Pita 3:13-17; 4:12-19; Buka Ha'ata'i 2:10.

Odo-odo na'i maana God

(Justification) Buka Tatau'aro 13:38-39; Rom 3:21-26; 5:1; 5:9-10; 5:18-19; Galesia 2:16; 3:6-9; Taetas 3:7.

Ora-ora'a; 'Ino; Here ta'aa

(Sin)

'E taha naasi ora-ora'a? Rom 1:18-32; 8:5-8; Galesia 5:19-21; Efesas 2:1-3; 5:3-5; Kolosae 3:5-10; Jems 4:17; 1 Pita 4:3; 1 Jon 3:4-5.

Mwani sae hako ra ora-ora'a. Jon 8:7-9; Rom 3:9-20; 3:23; 5:12; Galesia 3:22; 1 Jon 1:8-10.

'A ororiu do'ia God 'ai ha'atahiraau noni baaniai ha'amama'ai nai boi ta 'oha. Matiu 10:28; 13:41-42; Jon 3:18-20; 3:36; Buka Tatau'aro 17:30-31; Rom 1:18-19; 6:23; Galesia 6:7-8; Kolosae 3:5-6; 2 Tesalonaeka 1:7-9; Hibru 9:27; 10:26-31; 1 Pita 1:17; 4:3-5; Jiud 7; Buka Ha'ata'i 20:11-15.

Rihosi baaniai ora-ora'a

(Repentance) Matiu 4:17; Mak 6:12; Luk 13:1-5; 15:1-31; 24:45-47; Buka Tatau'aro 2:37-40; 3:19-20; 17:29-31; 20:21; 26:19-20; 2 Korin 7:8-11; 2 Pita 3:9; Buka Ha'ata'i 9:20-21.

Rongomaata'i

(Suffering) Rom 8:18-25; 8:28; 2 Korin 1:4; 4:16-18; Jems 1:2-4; 1 Pita 1:6-9; 2:19-21; 5:8-10.

Ruhisigaau ma'ua ha'atahigaau baaniai ora-ora'a; Dauai tahi tarau

(Salvation) Jon 3:16-17; Buka Tatau'aro 2:37-39; 4:11-12; Rom 5:1-11; 10:9-13; Efesas 2:1-10; 1 Timoti 1:15-16; 2:3-7; 1 Pita 1:3-5.

Saetan

(Satan) Matiu 13:19; 25:41; Luk 4:1-13; 22:3-4; Jon 8:42-44; 2 Korin 2:10-11; 4:4; 11:13-15; Efesas 2:2; 1 Tesalonaeka 2:18; 2 Tesalonaeka 2:9-12; 1 Pita 5:8-9; 1 Jon 3:8-10; Buka Ha'ata'i 12:7-12; 20:1-3; 20:10.

Tahinganai rua sae ha'iwai bei'i gare adaru'i

(Family life)

Rua ha'iwai. Matiu 19:4-6; 1 Korin 7:1-16; Efesas 5:21-33; Kolosae 3:18-19; Taetas 2:3-5; Hibrū 13:4; 1 Pita 3:1-7.

Mwani gare. Matiu 15:3-6; Luk 2:51; Efesas 6:1-3; Kolosae 3:20; 1 Timoti 5:4; 5:8; Hibrū 12:7-11.

Ama mana ina. Efesas 6:4; Kolosae 3:21; 1 Timoti 3:4-5.

'Iraui nao. Buka Tatau'aro 6:1; Rom 7:2-3; 1 Korin 7:39-40; 1 Timoti 5:3-16; Jems 1:27.

Tahī tarau

(Eternal life) Matiu 19:16-30; Luk 10:25-28; Jon 3:1-16; 5:19-29; 10:10; 11:25-26; 14:6; 17:2-3; 20:31; Rom 5:21; 6:5-14; 8:10-17; 2 Korin 5:17; Galesia 2:20; Efesas 2:1-6; Kolosae 2:13; 3:1-4; 2 Timoti 1:10; Taetas 3:4-7; 1 Pita 1:23; 1 Jon 5:11-13.

Taritari'a baaniai urao amua ma'ua mwane amua

(Adultery) Matiu 5:27-30; Jon 8:2-11; Rom 13:8-10; 6:9-20; Galesia 5:19; Hibrū 13:4.

Taroha Goro

(Good news) Buka Tatau'aro 20:24; Rom 1:2-4, 16-17; 1 Korin 1:17-25; 15:1-7; Galesia 1:6-12; Efesas 1:13; Pilipae 1:27; Kolosae 1:5-6; 1 Tesalonaeka 1:5; 2 Tesalonaeka 2:14; 2 Timoti 1:8-11; 2:8-10.

Usu-usu Maea

(Scriptures) Matiu 4:1-4; 5:17-20; 22:29; Jon 8:31-32; 20:31; Buka Tatau'aro 20:32; Rom 15:4; 16:26; Kolosae 3:16; 1 Tesalonaeka 2:13; 1 Timoti 4:13; 2 Timoti 3:14-17; Hibrū 4:12; 1 Pita 1:22-25; 2 Pita 1:19-21; 2 Jon 9-10; Buka Ha'ata'i 1:3.

Waiiai nata sae na'i kooti

(Lawsuits, court cases) Matiu 5:25-26; 5:38-42; 18:15-17; Rom 12:14-21; 1 Korin 6:1-8.

Wadiwadi baaniai ora-ora'a 'inīai mae na haua Kraest

(Cleansing from sin by Christ's death) Matiu 26:26-29; Rom 3:25; 5:9-10; Efesas 1:7; Hibrū 9:11-14; 1 Jon 1:6-7; Buka Ha'ata'i 7:14-17.

Wawaasua'a

(Fornication) 1 Korin 5:9-11; Galesia 5:19; Efesas 5:3; Kolosae 3:5-6; 1 Tesalonaeka 4:1-8; Hibrū 13:4; Jjud 7.